

Wængongui nânö
Apænegainö



New Testament in Waorani (EC:auc:Waorani)

Wængonguï nänö Apænegaïnö
New Testament in Waorani (EC:auc:Waorani)

copyright © 2009 Wycliffe Bible Translators, Inc.

Language: Waorani

Translation by: Wycliffe Bible Translators, Inc.

Waorani [auc], Ecuador

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Waorani

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

Contents

| | |
|------------------------------|-----|
| Mäateo | 1 |
| Mäadoco | 74 |
| Odoca | 118 |
| Wäö | 195 |
| Näni Cægäinö | 250 |
| Odömänoidi | 323 |
| 1 Coodintoidi | 357 |
| 2 Coodintoidi | 390 |
| Gadataidi | 411 |
| Epetoidi | 423 |
| Pidipenteidi | 435 |
| Codotenteidi | 443 |
| 1 Tetadönitenteidi | 451 |
| 2 Tetadönitenteidi | 458 |
| 1 Tımoteo | 462 |
| 2 Tımoteo | 472 |
| Tito | 479 |
| Pidemöö | 484 |
| Ebedeoidi | 486 |
| Tantiago | 513 |
| 1 Pegodo | 521 |
| 2 Pegodo | 531 |
| 1 Wäö | 537 |
| 2 Wäö | 546 |
| 3 Wäö | 548 |
| Codaa | 550 |
| Nänö Odömongäinö | 553 |

Itota Codito ingantedö ante Mäateo nänö watapæ ante yewæmongainta

Itota Codito wæmæidi (Odoca 3.23-38)

¹ Nē Ponguingä, ante dodäni nāni nē angaingä iñömö Itota Codito inongä ingampa. Tömengä iñömö Abadäo wodi pæingä nē ingaingä inte Awënë Dabii wodi pæingä mōnō inongä ingacäimpa. Tömengä wæmæidi iimaï emongadänimpa, ante yewæmonte ongompa.

² Abadäo wodi wengä Itæca eñagacäimpa. Ayæ wææ Itæca wodi wengä Aacobo eñagacäimpa.

Ayæ wææ Aacobo wodi wënäni Oodaa nāni caipæ eñagadänimpa.

³ Ayæ wææ Oodaa wodi Tämata ingante monte Pade tönö Dada inate tapæigacäimpa.

Ayæ wææ Pade wodi wengä Etedöo eñagacäimpa.

Ayæ wææ Etedöo wodi wengä Adäma eñagacäimpa.

⁴ Ayæ wææ Adäma wodi wengä Äminadabo eñagacäimpa.

Ayæ wææ Äminadabo wodi wengä Näatöo eñagacäimpa.

Ayæ wææ Näatöo wodi wengä Tädämöo eñagacäimpa.

⁵ Ayæ wææ Tädämöo wodi pæte Adacaba ingante möninqe Boodo ingante tapæigacäimpa.

Ayæ wææ Boodo wodi pæte Odoto ingante monte Obedo ingante tapæigacäimpa.

Ayæ wææ Obedo wodi wengä Yæte eñagacäimpa.

⁶ Ayæ wææ Yæte wodi wengä Dabii eñate pædinque awënë odeye bagacäimpa.

Ayæ wææ Dabii wodi pæte Odiya wodi nänöogængä iningä ingante möninqe Tadömöo ingante tapæigacäimpa.

⁷ Ayæ wææ Tadömöo wodi wengä Doboöo eñagacäimpa.

Ayæ wææ Doboöo wodi wengä Abiya eñagacäimpa.

Ayæ wææ Abiya wodi wengä Ata eñagacäimpa.

⁸ Ayæ wææ Ata wodi wengä Ootapato eñagacäimpa.

Ayæ wææ Ootapato wodi wengä Oodäo eñagacäimpa.

Ayæ wææ Oodäo wodi wengä Otiya eñagacäimpa.

⁹ Ayæ wææ Otiya wodi wengä Ootäo eñagacäimpa.

Ayæ wææ Ootäo wodi wengä Acadæ eñagacäimpa.

Ayæ wææ Acadæ wodi wengä Etequiya eñagacäimpa.

¹⁰ Ayæ wææ Etequiya wodi wengä Mänatee eñagacäimpa.

Ayæ wææ Mänatee wodi wengä Ämöö eñagacäimpa.

Ayæ wææ Ämöö wodi wengä Ootiya eñagacäimpa.

¹¹ İninqe Ootiya wodi quëwengäñedë idægoidi inänite babidöniaidi ponte ö æ gobæ wabæca mäodäni gogadänimpa.

Ayæ wææ Babidöniabæ nāni goyedë Ootiya wodi wënäni Eecöniya nāni caipæ eñagadänimpa.

¹² Mänii Babidöniabæ ö ænte godäni ate ayæ wææ Eecöniya wodi wengä Tadatiedo eñagacäimpa.

Ayæ wææ Tadatiedo wodi wengä Dodobabedo eñagacäimpa.

¹³ Ayæ wææ Dodobabedo wodi wengä Abiodo eñagacäimpa.

Ayæ wææ Abiodo wodi wengä Ediaquimö eñagacäimpa.

Ayæ wææ Ediaquimö wodi wengä Atodo eñagacäimpa.

¹⁴ Ayæ wææ Atodo wodi wengä Tadoco eñagacäimpa.

Ayæ wææ Tadoco wodi wengä Aquii eñagacäimpa.

Ayæ wææ Aquii wodi wengä Ediodo eñagacäimpa.

15 Ayæ wææ Ediodo wodi wengä Edeadado eñagacäimpa.

Ayæ wææ Edeadado wodi wengä Mäatäo eñagacäimpa.

Ayæ wææ Mäatäo wodi wengä Aacobo eñagacäimpa.

16 Ayæ wææ Ootee wodi ingante Aacobo tapæigacäimpa.

Ayæ Ootee wodi eñate pæte wææ Itota badä ingungä ingante Mäadiya ingante mongacäimpa.

Mäadiya ingante mongä ate tömengä wæætë Itota ingante mangacäimpa. Tömengä iñömö Awënë bacæcäimpa, ante cædinque Wængonguï oginguipæ gao cæcä ate edæ, Codito, ante nänö nê pemongaingä ingacäimpa.

17 Mänömaï i incæ Abadäo wodi pæinani wææ nänömoidi wææ, önompo tipæmpoga wææ mempoga go mempoga mänimpoga nani yebæñedë ate Abadäo wodi pæingä Dabii eñagacäimpa. Ayæ wææ Awënë Dabii wodi pæinani wææ nänömoidi wææ, önompo tipæmpoga wææ mempoga go mempoga mänimpoga nani yebæñedë ate Oodeoidi inänite wabæca Babidöniabæ ænte gogadänimpa. Ayæ Babidöniabæ ænte godäni ate tömönäni pæinani wææ nänömoidi wææ, önompo tipæmpoga wææ mempoga go mempoga mänimpoga nani yebæñedë ate mönö Codito nänö ponguinque eñagacäimpa.

*Itota Codito eñacampa
(Odoca 2.1-7)*

18 Itota Codito iimaï eñagacäimpa. Wäänä Mäadiya wodi nänö baquecäñedë Ootee wodi tömengä ingante do, Monguïmo, angä eñëningä inte ayæ mönämaï iñongante Wængonguï Tæiyæ Waëmö Önöwoca angä eñëninge do yædëmadä bacä adänitapa. 19 Yædëmadä ingä adinque Ootee cöwë nö cædongä inte, Piinte änäni wæcæ wæ, ante wædinque, Awëmö pango cæcæboimpa, ante pönengantapa.

20 Ante önöwënenque pönëninge möwocodë wiimöñongä Wængonguï tömengä anquedo ingante da pönongä pöninque anquedo iñömö iimaï angantapa. “Ootee, Awënë Dabii pæimi inömi

inte bitö nänöogængä Mäadiya ingante guiñënamäi æncæbiimpa. Tömengä iñömö Wængonguï Tæiyæ Waëmö Önöwoca angä eñente beyænque ënengä adinque bitö iñömö tömengä ingante ee moncæbiimpa.

21 Tömengä Wëñængä onguiñængä ingante mancæcäimpa. Mangä pæcä ate tömengä iñömö, Botö guidëmini mini wæquinque wënæ wënæ cæminipa, ante adinque botö æmo beyænque quëwencæminimpa, ante cæcæcäimpa cæbii. Bitö tömengä ëmöwo ante, Nê Ængä inongä ingampa, ante Itota pemoncæbiimpa,” ante anquedo Wængonguï nänö nê da pönöningä ponte Ootee ingante angacäimpa.

22 İninque Wængonguï beyæ nê apænegaingä iimaï ante nänö yewæmongainö bai ante iinque batimpa.

23 “Baquecä incæ yædëmadä badinque Wëñængä onguiñængä ingante mancæcäimpa. Mangä eñacä adinque tömengä ëmöwo, Æmänoedo, ante godö pemoncädänimpa.” Ante nani yewæmongainö bai cædinque tömengä ëmöwo, “Wængonguï mönö weca quëwengampa,” ante, Æmänoedo, ante pemonte inongäimpa.

24 Ootee mänii wiimonte ñäni ömæmongä ate Wængonguï nänö da pönöningä anquedo nänö ämaï eñente cædinque oncönë ænte gocä incæte guëa mönämaï ingadäimpa. 25 Edæ bamoncadengä eñacä ate, Itota, ante pemonte ate tömëna mäniñedë ate guëa mongadäimpa.

2

Nê eñënanäni Itota weca eñacæ pönänipa

1 Itota Bedëe nani quëwëñömö eñacä ate mäniñedë edæ Edode Oodeabæ awënë od-eye nänö iñedë edæ nê nö eñënanäni gobæ nænque tamönö quëwënanäni inte Eedotadëe pongadänimpa. 2 Ponte äninque,

—Oodeo Awënë Odeye iñömö ñöwocä eñadingä iñömö æyömönö owocää, ante eñencæte ante wæmönipa. Edæ nænque tamönö quëwëñömöni Awënë nëmö ta ñongæ adinque mönitö tömengä weca ædæ wææninque edæ, Bitö Wængonguï imidö angüenë, ante watapæ apænecæ pömöni imönipa, änänitapa.

³ Ayæ, Wacä Awënë Odeye eñacampa, ante tededäni eñente wædinque mäniömæ tömämæ awënë odeye Edode wæætë piinte bayongä Eedotadëe quëwënanäni tömänäni tömengä tönö godongämæ guïñente wædanitapa. ⁴ Ìninqe, Wængonguï quï, ante nê godönäni ñænænäni tönö Wængonguï nänö wææ angainö ante nê odömönäni tönö tömänäni inänite Edode añecä godongämæ pönänitapa. Pönäni ate tömengä, Codito nani angaingä iñömö æyömönö eñaquingää, ante æbanö yewæmonte öñö amïni. ⁵ Äñongante,

—Oodeabæ iñömö Bedëe nani quëwëñömö mäniñömö eñacæcäimpa, ante Wængonguï beyæ nê apænecä incæ iïmaï ante yewæmongacäimpa, ante apænedänitapa.

⁶ “Oodabæ awënë gobedönadodoidi tæiyænäni iñönäni

mïnitö adobæca Oodabæ quëwëninque Bedëe iñömö mïni quëwencabo iñömö mäa pönï iïmini incæte edæ wïi önomïnique incæmïnimpä.

Ïñæmpä Wëñængä adocanque eñate pædinque nê Awënë bate taodinque nê aacä bai ïnongä inte botö guidënanäni idægoidi inänite aacæcäimpa.”

Ante yewæmongä amönipa.

⁷ Ante apænedäni eñente wædinque Edode wæætë nê nö eñënäni inänite awëmö añete pönäni ate, Nëmö æyedëno mä pönï tamö amïnitawo. Äñongante tömënäni, Mäniñedë tamö atamönipa, ante apænedäni. ⁸ Eñëninque Edode iñömö,

—Mïnitö wæætë Bedëe iñömö mäo nê eñadingä ingante diqui diqui minte aedäni. Tömengä ingante adinque wæætë adodö pöninque apænemïni eñëmoedäni. Edæ mïnitö gote æbanö wëñæ ingante apænemïni bai botö adobai edæ gote ædæ wææninque edæ, Wængonguï Awënë imidö anguënë, ante watapæ apænecæte ante ämopa, ante Edode önonque ante pönëninque apænecäimpa.

⁹ Angä eñëninque nëmö nê adinäni iñömö Bedëe taadö gote æmö ayönäni edæ ado nëmö tömënäni nænque tamönö quëwëninque nani adimö incæ wo go adinque edæ tē wocæ goyönänite nëmö Wëñæ owoyömö oncömanca tæcædæca

inö næ gongæ adänitapa. ¹⁰ Adinque tömënäni edæ, Mönö acæ pönongä iñömö ongongampa, ante pönëninque watapæ togadänimpa. ¹¹ Mänii nani adincönë go guite ayönäni Wëñængä iñömö wäänä Mäadiya tönö ongongä adinque tömënäni Wëñængä weca ædæ wææninque, Bitö Wængonguï Awënë imidö anguënë, ante watapæ apænedänitapa. Ayæ tömënäni nani ænte pönincoo wi æmpodinque oodo tönö oguï waa quï tönö ti nä öni pæqui tönö, Bitö quï impa, ante pædæ godönäni ængacäimpa. ¹² Idæwaa adinque tömënäni möwocodë wïimöñönänite wacä ponte apænecantapa. Mïnitö awënë Edode weca ocæ emænte godämaï iedäni, angä eñëninque tömënäni wæætë yaatænque godinque tömënäni ömæ wadæ gogadänimpa.

Ooteidi Equitobæ wodii winönänipa

¹³ Godäni ïninqe edæ Ootee wïimöñongä Wængonguï anquedo ingante da pönongä ponte apænedinque, “Edode do Wëñængä ingante wænoncæte ante diqui mincæcäimpa cæbii. Ængæ gantite Wëñængä nana badancaya inate ö ænte Equitobæ wodii goe. Ayæ gote quëwëñömïni botö ämo ate pödäni,” angä.

¹⁴ Eñëninque Ootee tömengä nänö wïimöönæ ayaönænëña incæ ængæ gantidinqe Wëñængä nana badancaya inate ö æninque edæ Equitobæ gocantapa. ¹⁵ Godinque Ootee nani wencabo iñömö Edode nänö wænguinganca quëwencæ gogadänimpa. Go quëwënanäni ïninqe mönö Awënë Wængonguï iïmaï ante nänö apænecäimpa. “Botö Wëñængä Equitobæ quëwëñongante añebo pongantapa,” ante Wængonguï beyæ nê apænecä nänö yewæmongainö bai edæ do ïinque batimpa.

Wëñænäni inänite Edode angä wænönäni wænänipa

¹⁶ Edode guiquënë, Nëmö nê nö eñënäni botö äninö ante eñënämaï inte dæ godänipa, ante adinque edæ ænguï bacantapa. Ænguï badinque tömengä, Wëñænäni inänite mäo wænöedäni, angantapa. Äninque tömengä, Mëa wadepo iñonte nëmö ta atamönipa, ante nê eñënäni nani änimpoga

ante pönëinque, Mëa wadepo ëñadinäni tönö ayæ ëñadinäni tönö Bedëe quëwënäni incæ Bedëe eyequei quëwënäni incæ onguifñænänique inänite mäo wænödëdäni, angantapa. Ininque nê wænönäni wæætë awënë nänö adinänique inänite capo ado tedæ wænönäni wængadänimpa. ¹⁷ Wænäni wädäni ininque Wængongui beyæ nê apænegaingä Eedëmiya wodi iimaï ante nänö angainö bai edæ linque batimpa.

¹⁸ “Nämaa nani quëwëñömö nê Ca ca wæwënä nänä Ca ca wæpämö ëñänänitapa.

Wäänä nê Yæ yæ änönä inte,

Daquedä iñömö, Botö wëñænäni, ante wädä ëñänänitapa.

Dæ änäni pönente wædinque wäänä ædö cæte piyænë cæquinäa,” ante Eedëmiya wodi yewæmongacäimpa.

¹⁹ Ayæ ate awënë Edode wængä ininque Ootee iñömö Equitobæ ayæ quëwëninque wiimöñongä Wængongui anquedo ponte a ongöninque tömengä ingante apænecantapa. ²⁰ “Ootee ëñëmi. Wëñængä ingante wænoncæ änönäni incæ dobæ wænänipa cæbii. Ængæ gantite Wëñængä nänä badancaya inate Idægobæ adodö ænte gocæbiimpa,” angä.

²¹ Eñëninque Ootee iñömö edæ ængæ gantidique nänä badancaya inate Idægobæ adodö ænte gocantapa. ²² Mäniñedë wæmpo Edode wængä ininque, Wæætë tömengä wengä Adoquedao Oodeabæ awënë odeye bacantapa, ante tededäni ëñente wædinque Ootee iñömö, Botö Oodeabæ ædö cæte wæætë goquimoo, ante guifñente wæcantapa. Wæætë tömengä möwocodë wiimöñongä wacä angä ëñëninque Oodeabæ wodo tebæ godinque Gadideabæ gocantapa. ²³ Godinque Ootee nani wencabo Näatadeta ponte quëwënänitapa. Ininque, Näatadënö ingampa, ante pemoncädänimpa, ante Wængongui beyæ nê apænegaingä nänö angainö bai cædinque wädäni ñowo mönö Codito ingante, Näatadënö, ante pemonte bai apænëgadänimpa.

3

Wäo önömæca ponte apænecä ëñänäni
(*Mäadoco 1.1-8; Odoca 3.1-9, 15-17; Wäo 1.19-28*)

¹ Mäniñedë Wäo mönö nê æpænë guidönongä inte Oodeabæ önömæca ponte apænecä ëñengadänimpa. ² Ponte apænëdinque tömengä, “Öönädë Awënë incæ inguipoga tömämæ Awënë Odeye bacæcäimpa cæminii. Minitö wënæ wënæ cædinö ante, Ancaa wæwente awädö, ante ñimpo cædäni,” ante Wäo apænecä ëñänänitapa.

³ Mänömainö ante nê apænecä ingantedö ante Wængongui beyæ nê apænegaingä Itaiya wodi iimaï ante do yewæmongacäimpa.

“Önömæca iñömö adocanque ogæ tedete aa pecæcäimpa.

‘Awënë nänö ponguinö ante minitö tee moncate bai cædäni.

Taadö töinö pinonte bai cædinque minitö wënæ wënæ mini cædinö ante edæ wido cædäni,’ ante aa pecä ëñengæimpa,”

⁴ Ante Itaiya wodi nänö nê angaingä inte Wäo ñowo pongantapa. Tömengä weocoo ante cämeyo ocaguincoo nonte badonte wëñate mongæninque pacadeyænta ante æmontai badonte encadeyængäimpa. Tömengä cængui ante ñawäique cæninque tömengä bequi ante guifñëmænque ade bete quëwëngäimpa. ⁵ Quëwëñongä, Eedotadëe quëwënäni tönö Oodeabæ tömäo quëwënäni tönö tömengä weca tate bee téninque änänitapa. ⁶ Bitö ämaï näwangä wënæ wënæ cæte quëwëmöni inte wæmönipa, ante wädäni ëñëninque Wäo Oododänö æpænë guidongä guidänitapa.

⁷ Ayæ Paditeoidi tönö Tadoteoidi guiquënë Wäo nänö guidöñömö pönäni adinque tömengä ayæ wæætë tömënäni inänite angantapa. “Tæntæ pæimini bai inömini inte minitö iñömö ëñänämaï cæte quëwëminipa. Oo pönä wænompädäni, ante æcänö wææ angä ëñëninque wodii winonte pöminii. ⁸ Iñæmpa Wængongui Awënë gämænö minitö dicæ ocæ emænte poncæ cæminiyaa. Nö cæte pömini ininque minitö nê ocæ emænte pönäni nani waa cædö bai

adobaí waa cæedáni. ⁹ Ayæ námá wææ äninque, ‘Mönitö adomönique docä Abadäo wodi pæimöni inte möni quëwenguinque imönipa,’ ante mîni tedewënö ante pönënamai inguënë quëwëminii. Iñæmpa Wængongui, Botö pæinani bacædänimpa, angä bai dicacoo incæ dobæ tömengä pæinani bai bacædönimpa. ¹⁰ Edæ awæ yecæte ante awænca nani mæ yequinca eyewa pöni næænani bai Wængongui nänö panguinca næænte bai do edæ a ongongampa. Tömengä wainca ante a ongöñongä ömæcawæ bai wii pönente cædani adinque awæncaca wægo yete godö gongapamö iya tante bai cæcæcäimpa, ante ämo ëñëmaimînipa.”

¹¹ Ayæ, “Mînitö wënæ wënæ mîni cædinö ante wido cæcæmînipa, ante cædinque botö mînitö imînite æpænë guidömo guimînipa. Incæte botö mänömai cæbo ate wacä ayæ poncæcäimpa. Tömengä iñömö tæi ëmongä ëwocadongä iñongante botö wæætë wædämo inömo inte tömengä awæncata incæ ædö cæte godö ænte nææmaimoo. Tömengä da pönongä pöninque Wængongui Tæiyæ Waëmö Önöwoca incæ pö guidinque mînitö mîmö mënongacæcäimpa. Ayæ mînitö wënæ wënæ cædinö ante gonga tante bai tömengä cæcæcäimpa. ¹² Waocä, Todigo tömëmö wati wati tænoninque botö tænoniñömö önömancaque baquinque botö apænte æninque waiña tömämö oncönë da wencæboimpa, ante timpodæ næænte wo ææntodö wo ææntodö cædinque ontapocoo wææincoo wadæ ñëmænte wo ëwengampa. Waocä mänömai wo ëwencæte ante timpodæ næængä bai mönö në Ponguingä iñömö adobaí oo pöni apænte ancæcäimpa. Todigo waiñacooque oncönë da wente në mangä bai tömengä adobaí në waëmö inani inänite apænte ængä ate tömënani tömengä nempo guicædänimpa. Wæætë wadæ ñëmænte wo ëwente bai cædinque tömengä në ontapocoo wææincoo bai inani inänite cöwë bæcoyömö iya tangä gonte wæcædänimpa,” ante Wäo apænegacäimpa.

*Itota æpænë guicampa
(Mäadoco 1.9-11; Odoca 3.21-22)*

¹³ Wäo ayæ apæneyongä Itota iñömö Gadideabæ quëwëninque, Wäo botö imote æpænë guidongä guicæboimpa, ante cædinque Oododänonga pongantapa.

¹⁴ Ponte, Guidömi guibo, añongante Wäo wæætë wææ äninque,

—Botö waëmö imopa diyæ bitö imite guidömo guiquimii. Bitö wæætë botö imote guidömi guibo bai waa incædönimpa.

¹⁵ Ante wæyongante Itota wæætë,

—Cöwë ee cæbi, ämopa. Wængongui nänö änö ante tömänö ëñente nö cæmö inguënëmö imopa.

Ante apænecä ëñëninque Wäo Ao ante ee guidongä guigacäimpa. ¹⁶ Guiite æpæ do tao gongænte æmö ayongä iñontobæ öönæ incæ wëä godömonte bayö Wængongui Önöwoca incæ equemö wææ bai tömengä wææ pö guicä acantapa. ¹⁷ Wææ guicä ayongä edæ öönædë inö apænedinque, “Mäningä iñömö botö Wëñængä inongä inte botö në waadecä ingampa. Tömengä ingante adinque botö watapæ tobopa,” ante öönædë inö apænecä ëñengacäimpa.

4

Itota incæ wënæ wënæ cæcæcäimpa, ante wënæ cæcampa

(Mäadoco 1.12-13; Odoca 4.1-13)

¹ Ayæ mäniñedë edæ, Itota iñömö wënæ angä ëñente æbänö cæquingä, ante Wængongui Önöwoca incæ Itota ingante önömæca mäicä æigacäimpa.

² Æi quëwëninque tömengä wantæpiyæ coadenta ëönæ mänimpoönæ itædë woyowotæ cænämai quëwëninque gue ænente wægacäimpa. ³ Gue ænente wæyongä wënæ awënë, Wëñæ wënæ cæe, ante në anewengä inongä inte Itota weca pöninque,

—Bitö Wængongui Wëmi imitawo. Näwangä i ininque dica incæ päo ämi ba cæmaimipa.

⁴ Añongante Itota iñömö,

—“Cænguinque cænte ædö cæte quëwenguüi. Wængongui nänö apænedö tömäne ëñente cædinque waocä cænguüi cænte bai quëwencæcäimpa.” Mänömainö ante Wængongui beyæ yewæmonte ongö apa anewë, äninque Baa angantapa.

⁵ Wënæ awënë ayæ Itota ingante Ee-dotadëe tæiyæ waëmö nāni quëwëñömö ænte mäocä gocantapa. Ayæ Wængongui oncö ñænæconga wænömënæca ænte mäi gönongä næ gongængantapa. ⁶ Næ gongæñongante wënæ awënë wæætë,

—Bitö Wængongui Wëmi imitawo. Nāwangä i ñinque bitö to wæibi ate dodāni iimainö ante nāni yewæmongainö bai ñinque ba abaimpa.

“Bitö beyæ ante cædinque Wængongui tömengä anquedoidi inänite angä pöninque, tömënāni bitö imite wææ aate iñæ æmpodāni ate

bitö dicaa tee tēwadāmai incæbiimpa,” ante yewæmonte ongompa cæbii.

⁷ Äñongante Itota,

—Iñempa godömenque ante yewæmongatimpa. gaiñömö, “Bitö Awënë bitö Wængongui iñongante bitö wæætë edæ, ‘Eñenāmai cæbo incæte mönö Awënë Wængongui æbānö cæquingäa,’ ante acæte ante cædāmai incæbiimpa,” ante adobai wææ yewæmonte ongö apa änewëe, ante Itota angantapa.

⁸ Ayæ wæætë wënæ awënë Itota ingante æibæ pöni onquiyaboga mäicä æicantapa. Æi ongöñongä wënæ awënë iñömö awënë odeye ömæcoo inguipoga tömāo ongöñömæcoo adoyömö a ongonte bai ado tedæ odömöninge awënë odeyeidi waa pöni nāni emönö adobai odömongä acantapa. ⁹ Itota ingante apænedinque wënæ awënë,

—Bitö botö weca ædæ wææninque, Tatānabi bitö Wængongui Awënë bai inömi imipa, ante watapæ apænebi eñemoe. Mänömainö ante apænebi eñëninque botö wæætë, Mäniömæ tömāo ongöñömæ pönömo æninque bitö tömāmæ Awënë babaimpa, ante wënæ incæ änewengantapa.

¹⁰ Änewëñongante Itota wæætë,

—“Bitö Awënë Wængongui weca ædæ wææninque tömengä ingante, Bitö Wængongui imidö angüenë, ante watapæ apænecæbiimpa. Ayæ tömengä adocanque ingante næ cæbi incæbiimpa,” ante Wængongui beyæ yewæmongatimpa cæbii. Botö weca ongönāmai gobawe, angantapa. ¹¹ Angä go ate Wængongui

tömengä anquedoidi pöninque Itota beyæ pönö waa cægadānimpa.

Gadideabæ ponte Itota mä apænecampa (Mäadoco 1.14-15; Odoca 4.14-15)

¹² Ayæ quëwëñongä, Wäo ingante dobæ tee mönedānipa, ante tededāni eñente wædinque, Itota wæætë Gadideabæ wadæ gogacäimpa. ¹³ Wadæ godinque tömengä Näatadeta ponte wodo pænta godinque godömenque go gäwapæ yæwedeca Tabodöoidi tönö Nempatadiidi nāni owogaimæ iñömö pöninque edæ Capënaömö nāni quëwëñömö ponte quëwengantapa. ¹⁴ Itota mäniñömö ponte quëwengä ñinque Itaiya wodi Wængongui beyæ næ apænecä nänö angainö bai mäniñedë ñinque batimpa.

¹⁵ “Tabodöömæ tönö Nempatadiibæ in-gäwapæno gämænö godö, Oododānö æmæmäa iñömö, Gadideabæ iñömö wii oodeoidi wadāni nāni quëwëñömö impa.

¹⁶ Næ eñenāmai ināni wëmö iñömö contayönāni,

tömënāni weca ñäo guinæ tamö bai adānitapa.

Tömënāni nāni wænguimāmo oo iñonte wëmö iñömö contayönāni,

mönö Codito ñäo emongä inte do pongä adānitapa.”

Ante Itaiya wodi nänö yewæmongainö bai ante cædinque Itota mäniñömö ponte apænecä eñënanitapa.

¹⁷ Itota mäniñedë iimāi ante mä apænecä eñënanitapa. “Öönädë Awënë incæ inguipoga tömāmæ Awënë Odeye oo bacæcäimpa cæminii. Minitö wënæ wënæ cædinö ante, Ancaa wæwente awædö, ante pönente ñimpo cæedāni,” ante cöwë apænecä eñengadānimpa.

Në gæyæ dadöwënāni inänite Itota aa pecampa (Mäadoco 1.16-20; Odoca 5.1-11)

¹⁸ Ayæ mäniñ pöninque Itota gäwapæ Gadideapæ yæwedeca gote cægonte ayongä Timönö Pegodo nāni änongä tönö Æntade nāna caya inate acantapa. Næ gæyæ dadöwëna inöna inte tömëna ñöwo dicamöñæ æpænë wo guitodonte

dadöwēñöna Itota gote acantapa. ¹⁹Tömēna inate Itota,

—İñāna, botö miñæ edæ tee empo pöeda, ämopa. Nē dadonte ænte pömīna inte botö weca pöñömināte botö pönö cæbo ate minātö wæætē nē apænemīna badinque waodāni inānite nē ænte pömīna bacæminaimpa, angantapa.

²⁰Angä ēñēninque tömēna dicamöñæ do emö cæte godinque Itota miñæ edæ tee empo wadæ godatapa.

²¹Māniñömö ongonte wadæ godinque Itota wada inate Tebedeo wēna Tantiago tönö Wäö nāna caya inate acantapa. Tömēna mæmpo tönö wipodē ongonte dicamöñæ tadömoncöna adinque Itota tömēna inate, Botö miñæ pöeda, angä. ²²Ēñēninque tömēna Ao äninque Tebedeo wēna Tantiago tönö Wäö wæmpocä ingante wæætē, Mæmpo ēñēmi, änatapa. Nē cædāni tönö wipodē owote cæyöminite mönatö bitö imite emö cæte godinque Itota miñæ gomönapa, äninque adodaque wadæ gogadaimpa.

Tæiyænāni inānite Itota odömonte apænecä ēñēnānipa
(*Odoca 6.17-19*)

²³Ayæ Gadideabæ tömāmæ godinque Itota iñömö Wængongui apænecä nāni ēñente yewæmongainta ate odömöincönē go guite odömonte apænegacäimpa. Öönædē Awēnē incæ inguipoga tömāmæ Awēnē oo badinque waa cæte aacæcäimpa, ante apænecä ēñengadānimpa. Ayæ waodāni wēnæ wēnæ inte nāni wæwēnō ante ayæ quiēmē beyæ wæncæ cæte wædāni incæ Itota tömēnāni nāni wædö ante pönö cæcä ate tömānāni waa badānitapa. ²⁴Adinque, Itota mänömaï cæcampa, ante Tidiabæ tömāmæ gode änāni ēñēninque waodāni pöninque nē wēnæ wēnæ inte wæwēnāni inānite tömengä weca ænte pönānitapa. Ayæ nantate wæwēnāni tönö wēnæ inte quēwēnāni inānite ænte pöninque dowænte ināni tönö cömāināni inānite tömengä weca ænte pönāni adinque tömengä godö cæcä ate nē wēnæ wēnæ inināni inte tömānāni waa bagadānimpa.

²⁵Ayæ Gadideabæ quēwēnāni tönö Decapodibæ quēwēnāni pöñönāni wadāni Eedotadē quēwēnāni tönö Oodeabæ

quēwēnāni ayæ Oododänö æmæmāa quēwēnāni tæiyænāni pöninque tömengä miñæ tee empote gogadānimpa.

5

Itota änanquidi cæte apænecä ēñēnānipa

¹Tæiyænāni pönāni adinque Itota iñömö änanquidi æi tæ contayongä tömengä miñæ nē godāni pönāni. ²Ate tömengä iñæ ænete nanguï tedete iïmaï ante odömonte apænecä ēñengadānimpa.

Waocä iïmaï cæte watapæ tote quēwencæcäimpa, ante
(*Odoca 6.20-23*)

³“Waodāni, Botö waēmö ewocabopa diyæ öönædē Awēnē weca go guiquimoo, ante nē wædāni iñömö tömēnāni nāni watapæ toquinque edæ öönædē Awēnē Odeye nempo tömēnāni quēwenguinö do ädānipa,” angantapa.

⁴“Nē wæwente quēwēnāni iñömö tömēnāni nāni watapæ toquinque wædānipa. Edæ Wængongui tömēnāni inānite waadete godö cæcä ate tömēnāni wampo pönencædānimpa.”

⁵“Nē gänē pönente ædæmö cæte quēwēnāni iñömö tömēnāni nāni watapæ toquinque edæ inguipoga tömāmæ æninque awēnēidi bai bacædānimpa.”

⁶“Wængongui nö pönī nänö entawēnō bai adobai entawencæboimpa, ante æcänö cænguï cæinente bai wæda, æcänö tepæ gæwænte bai wæda tömēnāni iñömö nāni watapæ toquinque wædānipa. Edæ tömēnāni tömo cænte bai Wængongui nänö nö entawēnō ænte ædæmö entawente tocædānimpa,” ante Itota apænecantapa.

⁷“Wadāni quēwencædānimpa, ante nē godö waadete waa cædāni iñömö tömēnāni nāni watapæ toquinque cædānipa. Edæ mänömaï nē cædāni inānite wadāni wæætē, Quēwencæminimpa, ante näemæ apænedinque godö waadete waa cæcædānimpa.”

⁸“Mimö ñäö bai nē entawēnāni iñömö tömēnāni nāni watapæ toquinque edæ Wængongui ingante do acædānimpa,” ante apænecantapa.

⁹“Guädö guëa püināmaï iedāni, ante nē wææ wææ änāni iñömö tömēnāni nāni watapæ toquinque edæ wææ änānipa.

Tömənäni inänite wadäni edæ, Minitö Wængongui wēñämīni imīnīpa, ante do apænedäni ēñente tocædänīpa.”

10 “Nö cædäni beyænque wadäni piinte pänäni nē wæwənäni iñömö edæ tömənäni nāni watapæ toquinque wæwənänīpa. Tömənäni öönæde Awēnē Odeye nempo nāni quēwenguinö edæ do ëadänīpa.”

11 “Wadäni botö beyæ piinīnque mīnitö imīnīte babæ ante änänitawo. Mīnitö imīnīte edæ togænte pänänitawo. Inīnque edæ mīni watapæ toquinque impa. Ayæ, Nē wīwa cæmīni imīnīpa, ante wadäni piinte änewənäni wæmīni inīnque edæ mīni watapæ toquinque impa. 12 Edæ, Öönæde mönö ænguīnö ante nanguī ongompa, ante pönēnīnque mīnitö ñöwo wadäni nāni piinte cæyedē incæ watapæ toedäni. Edæ mīnitö imīnīte piinte pänäni bai mīnitö ayæ dæ äñedē Wængongui beyæ nē apænegainäni inänite adobai piinte pangadänīpa, ante toquēnē wæwēmīni,” ante Itota odömōnte apænegacäimpa.

Cati bai imīnīpa. Ñäo bai imīnīpa, ante (Mäadoco 9.50; Odoco 14.34-35)

13 Godömenque apænedīnque Itota, “Mīnitö iñömö inguipoga quēwənäni beyæ cati quīmōnte cæi bai inte ongömīnīpa. Inīnque mīnitö cati bai yæpæ emōnte bai inömīni inte wæætē edæ nongæmōnte bai badämaī iedäni. Cati iñömö yæpæ emönämaī nongæmōnte ba adīnque edæ æbänö cæte wæætē yæpæ waa emonguīi. Waa impa cænguīnänīi anguēnē. Inæmpa wido cæte nāni pinä gāwate cægonguīnque babaimpa,” ante odömōnte apænecantapa.

14 Ayæ, “Ñäo bai emömīni inte mīnitö iñömö edæ inguipoga quēwənäni beyæ tica ēnente bai cædinque, Edonque acædänīpa, ante cæmīni imīnīpa. Änanquidi tæiyænäni mænōnte quēwənäni inīnque edæ ædö cæte wē womōnte inguīi. Edæ edonque abaimpa. 15 Waocä ædö cæte ti wodōnote godö cængænē boo cæcaquingää anguēnē. Edæ, Mönö quēwencabo edonque acæimpa, ante cædinque waocä ti wodōnodīnque wænömēnæcapaa cö cæcä ate edonque bæco aquīnāni. 16 Mīnitö guiquēnē, Wadäni mönö waa cædinö adīnque mönö Mæmpo

öönæde nē quēwengä ñäo bai tömengä nänö emönö ante waa ate apænecædänīpa, ante cædinque cöwē ñäo bai pönēnīnque waa cæte quēwēedäni,” ante Itota odömōnte apænecantapa.

Wængongui nänö wææ angainö ante

17 Ayæ iīmaī ante godömenque odömōnte apænecantapa. “Wængongui, Iīmaī cæedäni, ante Möitee wodi ingante angä ēñēnīnque tömengä nänö wææ yewæmongainö ante ayæ Wængongui beyæ nē apænedäni nāni yewæmongainö ante mīnitö, Mäninö ante Itota wido cæcæte ante pongampa, ante ædö cæte pönēmīni. Inæmpa wīi wido cæcæte ante pönimo inte botö tömənäni nāni angainö bai iīnque cæbo bacæimpa, ante pömo imopa. 18 Edæ näwangä ämopa. Inguipoga tönö öönæ iīnque baganca Wængongui, Iīmaī cæedäni, ante nänö wææ angainö iñōnte adodeque pönī wē womōnte badämaī ingæimpa. Edæ guiyä tænoncaī incæ picæ yewæmönī incæ adodeque cöwē wadæ cædämaī iñōnte tömengä nänö angainö bai tömänö adodö iīnque cæte bacæimpa. 19 Inīnque Wængongui nänö wææ angainö ante æcänö adodeque pönī ante ēñēnämaī cæda iñömö tömengä iñömö edæ öönæde Awēnē Odeye nempo quēwengä incæte önonganque pönī inguingänö anguēnē. Ayæ adobai Wængongui nänö wææ angainö adodeque pönī ante odömōnīnque, Mänīne ante ēñēnämaī cæedäni, ante æcänö odömōnte apæneda tömengä iñömö öönæde Awēnē Odeye nempo quēwengä incæte önonganque inguingänö anguēnē. Wæætē mäninö Wængongui nänö wææ angainö ante nē ēñente cædinque æcänö adodö ante odömōnte apæneda guiquēnē tömengä wæætē öönæde Awēnē Odeye nempo quēwēnīnque ñænængä pönī inguingänö anguēnē. 20 Incæte mīnitö imīnīte iīmaī ämopa. Iīmaī cæedäni, ante nāni wææ yewæmongainö ate nē odömönäni nāni cægancaque nö cæmīni incæte Paditeoidi nāni cægancaque nö cæmīni incæte mīnitö wīi godömenque nö cæmīni inīnque mīnitö edæ öönæde Awēnē Odeye nempo ædö cæte guīite quēwēmaīmīni,” ante Itota odömōnte apænecantapa.

Piinte nāni änō ante Itota odōmonte apænecampa
(*Odoca 12.57-59*)

²¹ Mänōmainō ante apænedinque Itota godōmenque odōmonte apænecantapa. “Möitee wodi iñōmō, ‘Wacā ingante godō wænōnāmaī iē. Nē wænongā nānō apænte pante wæquinque impa,’ ante dodāni inānite tōmengā nānō wææ angainō ante mīnitō iñōmō do ēñēninque Ao āmīnitawo. ²² Botō iñōmō edæ godōmenque ante nō āmopa. Nāni caipæ iñōnāni æcānō tōmengā tōniñacā ingante piina iñōmō tōmengā nānō apænte pante wæquinque cæcampa. Ayæ tōmengā tōniñacā ingante æcānō, Ēñēnāmaī imipa, āna edæ tōmengā ingante nē Apænte nāni Āncabo weca nānō panguinque ænte gönoncædānimpā. Edæ wacā ingante æcānō, Bitō mīmō ōmædēmi inte wīi ēñencædō, ante nē āna iñōmō tōmengā tadōmengadænguipo gonga bæcoyōmō nānō wido cæquinque angampa tōö,” ante Itota apænegacāimpā.

²³ Ayæ, “Mänōmaī beyæ bitō, Wængonguī quī, ante nāni iya tāimoga godoncæte ante tæcæ cædinque, Æ, botō tōniñacā ingante edæ wænæ wænæ cæbo piingampa, ante pōnēmi ininque, ²⁴ bitō godonguincoo nāni iya tāimoga gāānē ñōnōninque bitō tōniñacā weca tāno gote nō apæneyōmi mīnatō guēa piyænē cæmīna ate bitō iñōmō adodō ponte godōe,” angantapa.

²⁵ Ayæ, “Bitō imite nē piinte cæcā iñōmō nē apænte anguināni weca gönoncæte ante ænte idōmæ goyongā bitō tōmengā ingante waa apænebi ēñēninque tōmengā wæætē piyænē cædinque ee abaingampa. Edæ taadō godinque guēa waa apænedinque piyænē cædāmaī imīna ininque tōmengā iñōmō nē awēnē apænte anguingā weca ænte māocā gobāimipa. Ayæ awēnē nē apænte angā ingante pædæ godongā æninque tōmengā bitō imite wæætē wææ wānongā ingante angā ēñēninque tōmengā wæætē bitō imite bæi ongonte do tee mōnebaingampa. ²⁶ Tee mōnecā ininque edæ bitō godonte æinta tōmanta pōnī pædæ godonte tabāimipa, ante āmo ēñēmaīmipa,” ante Itota apænegacāimpā.

Nāni godō towēmāmo ante Itota odōmonte apænecampa

²⁷ Ayæ apænedinque, “Möitee wodi, ‘Bitō nānōogængā ināmaī iñongante bitō godō mōnāmaī incæbiimpā,’ ante nānō wææ angainō ante ēñēninque mīnitō Ao āmīnitawo. ²⁸ Botō godōmenque apænedinque nō āmopa. Onquiyængā ingante wīwa toīnente adingā iñōmō tōmengā nānōogængā ināmaī iñongante do godō monte baī mīmō dobæ wentamō entawengampa.”

²⁹ Ayæ, “Bitō tōmēmō inō incæ adinque wænæ wænæ toīnente babi ininque tōmēmi adīmō incæ o togæmonte baī cædinque wænæ wænæ bitō cædīnō ante wido cæbi waa imaimpa. Wæætē bitō wænæ wænæ adīmō wido cædāmaī ininque bitō baō tōmāo tadōmengadænguipo wido cæte baquinō anguēnē. ³⁰ Adobaī bitō ōnompoca tōmēmæ inō incæ wænæ wænæ cædīmi inte tōmēmi cædimpo incæ aa wi æmpote baī cædinque bitō wænæ wænæ cædīnō ante wido cæbi waa imaimpa. Edæ a wi æmpote wido cædāmaī imi ininque bitō baō tōmāo tadōmengadænguipo wido cæte baquinō anguēnē,” ante Itota apænegacāimpā.

Nāni pāmænte wædō ante Itota odōmonte apænecampa

(*Mäateo 19.9; Mäadoco 10.11-12; Odoca 16.18*)

³¹ Godōmenque odōmonte apænedinque Itota, “Ayæ, ‘Onquiyængā ingante æcānō pāmæinēna tōmengā iñōmō yewæmōinta ænte yewæmōninque, Bitō imite æmæwo pāmæmopa, ante yewæmonte onquiyængā ingante godongā æncæcāimpā,’ ante dodāni nāni angainō ante do ēñēninque Ao āmīnitawo. ³² Botō edæ wadō ante iīmaī ante nō āmopa. Onquiyængā awēmō todāmaī ee quēwēñongante tōmengā nānōogængā godō pāmængā ininque onquiyængā nē towengā nānō baquinque wacā ingante godō mōwengampa. Ayæ onquiyængā pāmænte goyongā wacā onguīñængā tōmengā ingante godō mōninque adobaī nē towengā bacampa, ante apænebo ēñēmaīmīnīpa,” ante Itota apænegacāimpā.

Cōwē baquinō anguēnē, ante nāni ānewēnō ante

³³ “Ayæ wæætē edæ, ‘Botō Wængonguī cōwē quēwengā bai botō änō cōwē baquinō anguēnē, ante āmi īninque Wængonguī ēñengā beyænque bitō āninō ante cōwē cædinque bitō wadō cædāmaī incæbiimpa,’ ante Mōitee wodi dodāni inānite angacāimpa. Mīnitō iñōmō tōmengā nānō wææ angainō ante ēñēninque Ao āmīnitawo. ³⁴ Botō wadō ante nō āmo ēñēedāni. Edæ māninō, Botō änō nōingā baquinō anguēnē, ante ānāmaī iedāni. Ayæ māninō ancæte ante mīnitō Wængonguī ēmōwo ante apænedāmaī imīni incæte mīnitō, Öönæ tæi ongō bai impa, ante apænedāmaī iedāni. Iñæmpa, Öönæ, ante āmīni īninque mīnitō Wængonguī öönædē waa pōni nānō contayōmō ante apænebaīmīni apa ānewēmīni. ³⁵ Ayæ Wængonguī ēmōwo ante ānāmaī īninque mīnitō, Imæca cōwē ongō bai botō änō cōwē baquinō anguēnē, ante adobaī apænedāmaī iedāni. Iñæmpa, Imæca, āmīni īninque mīnitō Wængonguī pi cæwate nānō ongōñōmō ante apænebaīmīni apa ānewēmīni. Ayæ, Eedotadēē cōwē ongō bai botō änō cōwē baquinō anguēnē, ante apænedāmaī iedāni. Iñæmpa Eedotadēē iñōmō mōnō Tæiyæ Awēnē Odeye ongongā apa ānewēmīni. ³⁶ Ayæ adobaī, Botō änō nōingā baquinō anguēnē, ancæte ante bitō, Tōmēmo ocabo tæi ongō bai impa, ante mīni ānewēnō ante ānāmaī iē. Iñæmpa bitō ocaguī wentamō encabi īninque bitō ædō cæte adoguinque pōni godō cæbi nāāmænta baquīi. Ayæ nāāmænta encabi īninque bitō ædō cæte adoguinque pōni godō cæbi wentamō baquīi anguēnē. ³⁷ Iñinque mīnitō Ao āinēmīni inte ‘Ao’ āninque māninque æedāni. Ayæ edæ Baa āinente wædinque ‘Baa’ āninque edæ māninque æedāni. Godōmenque āninque mīnitō edæ nē wīwa cædongā angā beyænque āmīnipa tōō,” ante Itota odōmonte apænegacāimpa.

Næmæ wēncē wēncē nāni cædō ante (Odoca 6.29-30)

³⁸ Ayæ godōmenque odōmonte apænedinque Itota, “Iīmaī ante dodāni nāni angainō ante ēñēninque Ao āmīnitawo. ‘Bitō godō cæbi beyæ wacā awinca tæigæmongā bacā īninque tōmengā næmæ cæcā beyænque bitō awinca adobaī tæigæmōmi

bacæbiimpa. Ayæ bitō godō cæbi beyæ wacā бага tā tobæ gogacā īninque tōmengā næmæ cæcā beyænque bitō бага adobaī tā tobæ gogacæbiimpa.’ ³⁹ Botō wæætē wadō ante nō āmo ēñēedāni. Nē wīwa pōnō cæcā ingante næmæ cædāmaī iedāni. Edæ wacā bitō tōmempaga inō pōnō tamongā wædīmi inte bitō wæætē æmæmpaga inō dadi ēmæmonte ee ongōmi wæætē tamongæ. ⁴⁰ Ayæ wacā, Bitō imite nē apænte angā weca ænte godinque botō bitō weocoo æncæboimpa, ante cæyongā bitō mānincooque tōmengā ingante pædæ godōninque wacoo bitō yabæ mongæncōo tōnō ee abi ö æncæcāimpa. ⁴¹ Ayæ wacā bitō imite, Bado, māninganca mongænte māobi goboe, angā ēñēninque bitō tōmengā nānō āninganca māobi goyongante ayæ adoganca godōmenque mongænte māobi gocæ. ⁴² Ayæ nē, Pōnōmi æmoe, angā ingante godōmi ængæ. Ayæ wacā, Bitō quinca pōnōmi ænte cæte ate wæætē pōnōmo æe, ante nē angā ingante bitō pæ gompodāmaī incæbiimpa,” ante Itota apænegacāimpa.

Nē piinte ānāni inānite waadete cæedāni, ante (Odoca 6.27-28, 32-36)

⁴³ Ayæ apænedinque Itota, “Mīnitō dodāni nāni angainō ante do ēñēninque edæ Ao āmīnitawo. Tōmēnāni iñōmō, ‘Bitō guidengā ingante waadete cæe,’ āninque edæ, ‘Nē piingā ingante næmæ piinte cæe,’ ante wææ ānānitapa. ⁴⁴ Botō iñōmō edæ wadō ante nō āmo ēñēedāni. Mīnitō imīnite nē piinte cædāni inānite mīnitō wæætē waadete cæedāni. Ayæ mīnitō imīnite nē togænte pānāni beyæ ante Wængonguī ingante apæneedāni. ⁴⁵ Mānōmaī cædinque mīnitō mōnō Mæmpo öönædē nē quēwengā wēñæmīni bacæmīnimpa. Edæ nē wīwa cædāni beyæ incæ nē waa cædāni beyæ incæ Mæmpo Wængonguī angā nænque tamompa. Ayæ nē nō cædāni beyæ incæ nē nō cædāmaī ināni beyæ incæ Wængonguī angā cōönæ cæpa. ⁴⁶ Mīnitō guiquēnē mīnitō imīnite nē waadedānique inānite waadete pōnēmīni īninque mīnitō mīni cædinō beyæ ante dicæ paga ænguimīniyaa. Iñæmpa odōmāno awēnē beyæ nē æwēnāni

incæ mīnitō waadete pōnenganca adoganca cædinque tōmēnāni inānite nē waadete pōnēnānique inānite waadete pōnēnānipa tōō. Bitō godōmenque cæbitawogaa. ⁴⁷ Ayæ mīnitō tōniñadānique inānite waadete apænedinque mīnitō dicæ godōmenque cæmīniyaa. Ìñæmpa wadāni nē, Nāmā cæte quēwenguīmo, ante nē ēñēnāmaī cædāni incæ mīni cædō baī adoganca cædāni apa quēwēmīni. ⁴⁸ Mōnō Mæmpo oōnædē quēwengā nē nō waa cædongā ingā baī mīnitō adobaī cædinque picæmīni badinque nō waa cæte quēwēedāni,” ante Itota odōmonte apænegacāimpa.

6

Æbānō cæte waa cæquī, ante Itota apænecampa

¹ Itota ayæ godōmenque iīmaī ante odōmonte apænegacāimpa. “Mīnitō edæ, Wængonguī nānō ānō ēñente nō cæbote, ante cæmīnitawo. Ìninque mīnitō, Waodāni botō imote waa acædānimpa, ante ānāmaī inte wīi waodāni ayōnāni cædinque waa cæedāni. Edæ, Waodāni botō imote waa acædānimpa, ante pōnēninque cæmīni ìninque mōnō Mæmpo oōnædē nē quēwengā iñōmō mīnitō cædi beyæ wæætē pōnōnāmaī ìmaingampa,” angantapa.

² Ayæ, “Wadāni nē wadō ante wadō cædāni guiquēnē, Ōmaadāni inte nē wædāni quī, ante pædæ godoncæte ante cædinque, Botō æbānō waa pōni cæboo, ante tōmānāni ponte waa acædānimpa, ante pōnente todompeta nāni ancadeca we we oōnānipa. Tōmēnāni mīnitō odōmōincōnē go guīite ongōninque ayæ taadō gote cægōninque, Botō waa pōni cæbo aedāni, ante yedæ ānāni ēñente godongāmæ pōnāni ate tōmēnāni tōmānāni ayōnāni godōnānipa. Bitō iñōmō tōmēnāni nāni, Pōnō waa acædānimpa, wædō baī wædāmaī inte edæ pæ wēēnete godōe. Tōmēnāni waodānique godō waa adāni æninque māninque ænānipa. Wængonguī guiquēnē waa adāmaī incæcāimpa. Nāwangā āmopa.

³ Bitō iñōmō, Ōmaadāni inte nē wædāni quī, ante godoncæte ante cædinque bitō guīidengā eyequei pōni ongongā incæ adāmaī incæcāimpa, ante wææ cæe.

⁴ Mānōmaī wææ cædinque awēmō godōmi æncædānimpa. Mānōmaī cæbi adinque bitō Mæmpo nē wēmō iñōmō nē acā inongā inte awēmō bitō godōni ante wæætē eyepæ pōnongā æncæbiimpa,” ante Itota angacāimpa.

*Wængonguī ingante æbānō apænequī,
ante Itota apænecā
(Odoca 11.2-4)*

⁵ Ayæ godōmenque apænedinque, Itota, “Wadāni Wængonguī ingante apænedinque nāmanque ante nāni cæbaī mīnitō iñōmō wīi adobainō ante Wængonguī ingante apæneedāni. Mānināni guiquēnē, Botō apænebo adinque waodāni pōnō waa acædānimpa, ante pōnēwēninque mīnitō odōmōincōnē go guīidinque næ gongæninque Wængonguī ingante apænedānipa. Ayæ tōmēnāni nāni quēwēñōmō ñænquedæmpo iñōmō gote næ gongæninque Wængonguī ingante apænedānipa. Nāwangā āmopa. Tōmēnāni waodānique godō waa adāni æninque māninque ænānipa. Wængonguī guiquēnē waa adāmaī incæcāimpa. ⁶ Bitō iñōmō tōmēmi oncōnē guīite odemō tee mōnedinque mōnō Mæmpo nē awēmō quēwengā ingante apænee. Mānōmaī cæbi adinque bitō Mæmpo wēmō iñōmō nē acā inongā inte awēmō bitō cædinō ante wæætē eyepæ pōnongā æncæbiimpa,” ante Itota odōmonte apænecantapa.

⁷ Ayæ, “Nāmā cæte quēwenguīmo, ante nē ānāni ōnonque nāni tedewēnō baī tededāmaī inte mīnitō nō cædinque Wængonguī ingante apæneedāni. Tōmēnāni iñōmō, Wantæpiyæ tedebo beyænque Wængonguī ēñencæcāimpa, ante babæ ante pōnēninque ōnōneque tedewēnānipa cæmīni. ⁸ Mīnitō iñōmō edæ tōmēnāni ōnōneque tedete nāni cædō baī edæ cædāmaī ìedāni. Ìñæmpa mōnō Mæmpo ingante apænedāmaī iñōmonte tōmengā mōnō anguinō ante wēēnēñedē do ēñengā apa tedewēmīni. ⁹ Ìninque edæ iīmaī ante Wængonguī ingante apæneedāni.

‘Mōnitō Mæmpo nē oōnædē quēwēnōmi inte ēñēmi.

Bitö emöwo Täiyæ Waemö emömi adinque mönitö bitö emöwo ante waa adinque apænemönipa.

¹⁰ Bitö öönædë Awënë në ingaïmi inte inguipoga Awënë Odeyebi edæ bitö baquinque quingæ pöe.

Öönædë owodäni eñente cædäni bai inguipoga adobaï bitö änö ante edæ eñente cæte bacæimpa.

¹¹ Mönitö imönite bitö, Cænguï, ante iimö iñö iimö iñö bitö pönöni ñöwoönæ incæ eyepæ pönömi ænte cæmönie.

¹² Mönitö imönite në waa cæquënänäni inte pönö wënæ wënæ cædäni adinque mönitö godö ñimpo cæmöni quëwänäni bai bitö në panguënemi incæ adobaï cædinque

mönitö në waa cæquënemöni inte wënæ wënæ cæmöni adinque pönö ñimpo cæbi quëwëmönie.

¹³ Ayæ mönitö wënæ wënæ cæinente wædö ante bitö pönö wææ cæbi ate mönitö taadö oda cædämaï inte wënæ wënæ cædämaï incæmönimpa.

Edæ në wiwa cædongä nempo ongonte wæyömönite bitö gä peyæmpote æmi quëwencæmönie, ämönipa.

Tömëmique edæ Awënë Odeye tæï piñæmi iñömi mönitö bitö nempo ongömönipa. Nämä ñäö bai entawëmi inte bitö cöwë tæï emömi inömi imipa.

Amëë, ante, Näwangä impa, ante apænemönipa.

Mänömainö ante Wængonguï ingante apæneedäni,” ante Itota odomonte apænegacäimpa.

¹⁴ Ayæ godömenque odömonte apænedinque Itota iimainö ante apænegacäimpa. “Minitö imönite wënæ wënæ cæyönänite minitö godö ñimpo cæmïni ininque mönö Mæmpo në öönædë quëwengä adobaï minitö wënæ wënæ cædinö ante pönö ñimpo cæcä quëwëmaïimïnipa. ¹⁵ Wæætë minitö waodäni nani wënæ wënæ cædinö ante ñimpo cædämaï imïni adinque edæ mönö Mæmpo adobaï minitö wënæ wënæ cædinö ante ñimpo cædämaï inte pönö piincæcäimpa,” ante Itota apænegacäimpa.

Wængonguï beyæ ante cëbänö cænämaï i, ante

¹⁶ Ayæ odömonte apænecantapa. “Wadö ante në wadö cædäni guiquënë iimäi ante mä pönëninque cædänipa. Wængonguï beyæ ante ee ate cænämaï inte botö wæwente bai emömo adinque wadäni botö imote waa acædänimpa, ante awinca nämönänipa. Minitö iñömö Wængonguï beyæ ante cædinque ee ate cænämaï imïni ininque tömënanäni nani cëbaï cædämaï iedäni. Wæætë nämönämaï inte Wængonguï beyænque ante cænämaï iedäni. Näwangä minitö imönite ämopa. Tömënanäni waodänique godö waa adäni æninque mäninque ænänipa. Wængonguï guiquënë waa adämaï incæcäimpa. ¹⁷ Bitö guiquënë Wængonguï beyænque ante ee ate cænämaï inte cæbi ininque awinca ñä mëmonte ayæ ocabo öni pæcate cæe. ¹⁸ Bitö ee ate cænämaï imi ininque, Waodäni edonque acædänimpa, ante änämaï inte wæætë, Mæmpoque acæcäimpa, ante mänömaï cæe. Bitö mänömaï cæbi adinque mönö Mæmpo në wëmö iñömö quëwengä inongä inte wëmö iñömö edonque adinque awëmö bitö cædinö ante wæætë eyepæ pönongä æncæbiimpa,” ante Itota apænegacäimpa.

Öönædë mïni waa pönï manguincoo ante (Odoca 12.33-34)

¹⁹ Godömenque odömonte apænedinque Itota, “Tömëmo mäincoo, ante mancæte ante wædinque minitö inguipogaque cayæ cænte to tamonte iñömö cabo tē gæte da wënämaï iedäni. Edæ në ö ænänäni bæ tate nani ö ænguinque inguipogaque da wëmïni apa quëwëmïni. ²⁰ Öönædë ongoncoo guiquënë to tamönämaï impa. Cayæ guidämaï i ininque mäincoo wodämaï ongompa. Ayæ në ö ænguinäni adobaï mäniñömö bæ tate guidämaï inäni ininque mäincoo cöwë wë wodönämaï ee ongompa. Ininque, Waadete mïni cædincoo cabo tē gæte bai cædinque minitö öönædë waa pönï incoo mïni ænte manguinque ñöwo iñömö waodäni inänite waadedinque ee cædäni. ²¹ Edæ waa pönï minitö mäincoo ongöñömö minitö mäniñömö adoyömö quëwencæte ante wëmïni imïnipa, ante adinque botö mänömainö ante apænetabopa,” ante Itota odömonte apænecantapa.

*Awınca wainca mönō ēmōnō ante
(Odoca 11.34-36)*

²² Ayæ odōmonte apænedinque, “Baonga quēwēninque mönō edonque adinque cæcæimpa, ante mönō awınca ēmōmōmpa. İninque awınca wainca ēmonte edonque ate bai bitō mīmōno adobai ñäö entawēninque, Nō cæbote, ante pōnēmi İninque bitō baonga nō cæte quēwēmaïmipa. ²³ Wæætē edæ awınca wii wainca ēmōninque adāmaï inte bai wentamō entawēmi İninque bitō, Wiwa cæbote, ante mīmōno pōnēñōmite bitō baonga wiwa cæbaïmipa. Edæ mīmō ñäö entawēñōmi wentamō ba İninque bitō quēwenguïmāmo mæ māmōnte bai baquïnō anguēnē,” ante Itota apænecantapa.

*Wængonguï beyæ cædinque mäincoo beyæ
cæqui
(Odoca 16.13)*

²⁴ Ante apænedinque Itota ayæ odōmonte apænecantapa. “Mēnaa awēnēna bayōnate waocä İñōmō mēnaa awēnēna nāna änō ante ædō cæte ēñente cæquiringä. İñæmpa adocanque ingante püinque tōmengä wacä ingante waadebaingampa. Wæætē İngä miñæ tee empo godinque tōmengä mäningä ingante edæ wiwa adinque emō cæte gobaingampa. Minitō adobai Wængonguï beyæ ante nē cæmīni inte ædō cæte mäincoo beyæ ante cæte quēwenguïmīni,” ante Itota angacäimpa.

*Mæmpo Wængonguï mönō İmonte aa-
campa, ante
(Odoca 12.22-31)*

²⁵ Äninque, Itota ayæ godongämæ odōmonte apænedinque, “Mänōmaï beyæ botō mīnitō İmīnite İmaï ämopa, angantapa. Minitō inguipogaque mīni quēwenguïmāmo ante wädāmaï İedāni. Cænguï bequï ante ayæ weocoo ante wädāmaï İedāni. Cænguï cænte beyænque mönō dicæ quēwēmōngaa. Weocooque mönō mongænō beyænque dicæ quēwēmōngaa. Mönō quēwēmāmo İñōmō godōmenque impa. ²⁶ Ayamōidi awænæca nē cæwodāni İñānite amīnitawo. Tōmēnāni dicæ tōmēmō mīnte pæ ate tā pete daga wente mänāniyaa. Incæte mönō Mæmpo öönæde quēwēnōngä inte wæætē tōmēnāni İñānite eyepæ godongä cænāni aedāni. Minitō guiquēnē ayamōidi

İnämaï İñōmīnite Wængonguï mīnitō İmīnite godōmenque waa adinque eyepæ pōnōngä cænte apa wæwēmīni. ²⁷ Edæ Wængonguï nänō anganca quēwenguēnēmīni inte mīnitō, Wantæ İño incæ godōmenque quēwēmote, ante wæwēmīni incæte edæ ædō cæte nāmä cædinque godōmenque wantæpiyæ quēwenguïmīni.”

²⁸ Äninque Itota godōmenque odōmonte apænecantapa. “İninque mīnitō, Weocoo quincodō wēñaquïi, ante pōnente quīnante wæwēmīni. İñæmpa ongaicoo ömæde pæ İñōmō weocoo ante daque daque dadāmaï inte wodonte tīnāmaï tōmenque pæ aedāni. ²⁹ Incæte Awēnē Tadōmōo wodi waëmoncoo pōni ēñagaingä incæ wii ongai bai ēñagacäimpa. Ongai İñōmō godōmenque waëmō pōni ēnodānīpa. ³⁰ Gaguïmæ İñōmō İimō ate edæ gongapamō guitodonte tanguinque pæ incæte ñōwoönæ Wængonguï pōnōngä waëmō wēñate ēnopa. İninque, Waëmō ēnodō nē pōnōngä inte Wængonguï mönō İmonte godōmenque eyepæ pōni pōnōngä ænte wēñacæimpa, ante pōnēmīniyaa. ³¹ İninque mīnitō, ‘Quimōnō impa cænguïmōo,’ ante, ‘Quimænō impa bequïmōo,’ ante ayæ, ‘Quincodō impa wēñaquïmōo,’ ante pōnēninque guīñente wæwēnāmaï İedāni. ³² Mänīnō ante wadāni nē ēñēnāmaï İñāni nāni cabo nāni cabo wädāni incæte mīnitō guiquēnē, Mönō æīnente wädō ante mönō Mæmpo İñōmō edæ do ēñengampa, ante pōnēninque edæ guīñente wädāmaï incæmīnīmpa. ³³ Wæætē edæ, Wængonguï Awēnē Odeye nempo quēwencæboimpa, ante nanguï cædinque mīnitō, Tōmengä nō cæte nänō waa quēwēnō bai adobai nō cæte waa quēwencæboimpa, ante adobai nanguï cæedāni. Mänōmaï quēwencæte ante tāno wæmīni adinque Mæmpo Wængonguï mänīnō ante do edæ eyepæ pōni pōnōngä æñōmīni mänīncooque mīni wädō ante adobai eyepæ pōnōngä æncæmīnīmpa. ³⁴ Mänōmaï İ İninque, İimō ate æbānō cæquïi, ante guīñente wädāmaï İedāni. Edæ İimō ate mänīnō ante pōnēninque eyepæ pōnente inguïmpa. İninque mīnitō, Nōwoönæque æbānō cæquïi, ante guīñente pōnēninque mänīnganca pōnente quēwēedāni,” ante Itota

odömonte apænegacäimpa.

7

Wadäni inänite apænte änämaï iedäni, ante (Odoca 6.37-38, 41-42)

¹ Mänömainö ante odömonte apænedinque Itota godömenque apænegacäimpa. “Minitö wacä ingante, Wënæ wënæ imipa, ante apænte änämaï iedäni. Edæ mini apænte wæquinque minitö wadäni inänite apænte äminipa. ² Minitö wadäni inänite tee mante godömini nani ænganca wæætë adoganca pönönäni æncæminimpa. Ayæ mini apænte anganca adoganca apænte änäni wæcæminimpa. ³ Bitö töninäcä wædænque wënæ wënæ cæcä iñongante bitö guiquënë nanguï bitö wënæ wënæ cædinö ante pönänämaï inte quinate tömengä ingante piinte anewemii. Tömengä edæ awinca guiyä mä owo emongä bai entawente wæyongante bitö wæætë awæmpa wææ emongä bai wææ entawemi inte ædö cæte ate bai tömengä ingante apænte ämii. ⁴ Edæ tömëmi awinca awæmpa wææ emonte bai bitö wënæ wënæ adimö emömi inte bitö töninäcä ingante, ‘Biwi, bitö awinca guiyangä mä owo bai ate æ wimömoe,’ ante edæ abipa diyæ æ wimonguimii. ⁵ Iñæmpa wadö tedete wadö cædömi inte bitö edæ tömëmi awinca awæ wææ ongompa täno wido cæte ate edonque adinque bitö töninäcä awinca guiyä mä owodö æmoncæbiimpa.”

⁶ Äninque Itota godömenque apænedinque, “Guintaidi inänite, Tömënäni cænguï, ante tæiyæ waëmö cænguï godönänitawoo. Edæ godönämaï inäni bai minitö adobai Wængonguï nänö tæiyæ waëmö apænedö ante nê Baa änäni inänite apænedämaï iedäni. Ayæ odæ wængänäidi weca waodäni wamoncoo waa pönï emoncoo wææntodönämaï inäni bai minitö adobai Wængonguï beyæ waa pönï nani apænegainö ante nê eñente cædämaï inäni inänite apænedämaï iedäni. Edæ odæ wængänä pinä gäwa baö wänä ñænte bai cædinque tömënäni eñänämaï inte cædinque dadi emænte tömëmini baö wangö pocænte bai piimainäni, ante minitö apænedämaï ñine cædäni,” ante Itota apænegacäimpa.

Pönömi æmoe, ante mönö angæimpa, ante (Odoca 11.9-13; 6.31)

⁷ Ayæ apænedinque Itota, “Pönömi æmoe, ante nê angä bai cædinque minitö mini ænguïnö ante Wængonguï ingante apæneedäni. Æyömönö ii, ante nê diqui diqui mingä bai cædinque minitö, Æbänö ii, ante ædæmö eñencæte ante Wængonguï ingante wede pönente apæneedäni. Odemö mönitö beyæ wi ænecæimpa, ante aa pecä bai cædinque minitö, Æbänö cæquimoo, ante eñencæte ante Wængonguï ingante nanguï apæneedäni. ⁸ Edæ, Pönömi æmoe, ante nê änäni iñömö edæ do ænänipa. Nê diqui diqui minäni adobai do adänipa. Ayæ odemö ponte nê aa pedäni tömënäni nani guiquinque edæ do wi ænete bai bacæimpa.”

⁹ Ayæ, “Bitö waobi inömi inte eñëmi. Bitö wëñængä cænguï ante päö angä eñëninque bitö dicæ dicaque pædæ godömiyaa. ¹⁰ Gäyæ angä ininque bitö tæntæ incæ dicæ pædæ godömiyaa. ¹¹ Mini waocabo nê wiwa cædömini incæ, Quïnö waa i, ante eñëninque minitö wëñænäni inänite waëmoncooque godömini ænänipa. Ininque mönö Mæmpo öönædë nê quëwengä iñömö nê änäni inänite waëmoncooque ante godömenque pönongampa,” ante Itota odömonte apænecantapa.

¹² Ayæ, “Minitö, Waodäni botö imote waa cædäni æninque waa tobaimopa, ante wæminitawo. Ininque mini ante wædö bai ante minitö tömënäni inänite adobai waa cædäni. Mäninonque ante wææ ancæte ante dodäni, Iïmaï cædäni, ante wææ angadänimpa. Ayæ Wængonguï beyæ nê apænedäni adodö ante ancæte ante yewæmongadänimpa. Ininque botö änö bai cædinque minitö tömënäni nani angainö bai do edæ cæbaiminipa,” ante Itota odömoncæte ante apænecantapa.

Odemö guiyänemö ante (Odoca 13.24)

¹³ Itota godömenque odömoncæte ante iïmaï apænecantapa. “Minitö guiyänemö guidinque quëwenguïnö taadonque pödäni. Wænguïnö godö guiquinemö guiquënë yabæ inö ñænænemö ongö

adinque tæiyænāni ōnonque pō guiite edæ tōmēnāni nāni wænguinque ñænænonque godānīpa. ¹⁴ Wæætē wædænque īnāni guiquēnē diqui minte guiyānemō adinque quēwenguinō guiyānō guiite pōnānīpa,” ante Itota apænecantapa.

Awæ æbānō iwæ, ante tōmenca bete eñengæimpa, ante (Odoca 6.43-44)

¹⁵ Itota ayæ godōmenque odōmonte apænecantapa. “Pancadāniya, Wængonguī beyæ nē apænemōni īmōnīpa, ante nē babæ apænedāni īñōnānite mīnitō gomō ate tōmēnāni īnānite eñēnāmaī īedāni. Tōmēnāni īñōmō edæ mēñēidi baī īnāni incæ obega æmontai baī wēñate baī babæ cædānīpa. Obega ee quēwēnāni baī ee cæmōni īmōnīpa, ante edæ babæ ante pōnāni tamēñedāni. ¹⁶ Edæ tōmenca adinque mīnitō, Awæ æbānō iwæ, ante tā pete bete do eñēmīni baī, īnāni ædānidō īnāni, ante eñencæte ante tōmēnāni nāni cædinō adinque edæ do eñencæmīnīpa.”

“Yowemō æncæte ante waodāni dicæ daa mongæwāa tā pete ænāniyaa. Igowæñeca æncæte ante waodāni dicæ wæntowāa edæ tā pete ænāniyaa. ¹⁷ Waiwæ tōmāwæ wainca incapa. Baawæ wæætē baaca incapa. ¹⁸ Waincawæ incæ ædō cæte baaca incaquīi. Wæætē wiwa iwæ incæ ædō cæte wainca incaquīi. ¹⁹ Awæ quiwæmenque wainca incadāmaī ī īnīnque māniwæ tōmēwæ mæ yete gongapamō guitodōnāni gonguinque ñongæmpa. Tōmēnāni adobaī nāni gonte wæquinque babæ cædānīpa. ²⁰ Īnīnque, Awæ æbānō iwæ, ante tōmenca adinque do eñēnāni baī waocā nānō cædō ante adinque, Tōmengā æbānō ingāā, ante edæ do eñencæmīnīpa,” ante Itota apænecacāimpa.

Wīi tōmānāni ōōncædē guiquīnāni, ante (Odoca 13.25-27)

²¹ Ayæ godōmenque odōmonte apænedinque Itota īmaī apænecantapa. “Botō īmote, ‘Awēnē, bitō botō Awēnē īmīpa,’ ante nē tededāni nāni tededō beyænque ædō cæte ōōnædē Awēnē Odeye ōmæ guiquīnāni. Wæætē mōnō Mæmpo ōōnædē quēwengā nānō ānō baī nē cædingā īñōmō

tōmengānque guicæcāimpa. ²² Īnīnque bay-onte pancadāniya botō īmote, ‘Awēnē, Awēnē,’ ānīnque, ‘Bitō beyæ apænecacāimpa. Ayæ, Bitō ēmōwo apænedinque wēnæ inte wido cægamōniī ae. Bitō ēmōwo apænedinque mōnitō, Ate pōnencædānīpa, ante bamōnengæ cædinque nanguī waa cægamōniī ae,’ ancædānīpa. ²³ Eñēnīnque botō wæætē, ‘Īñæmpa botō mīnitō īmīnīte cōwē adāmaī inte tæcæ abopa. Nē eñēnāmaī cædimīni inte botō weca ongōnāmaī gobæwedāni,’ ancæboimpa,” ante Itota apænecacāimpa.

Nē mænōna īnate ante (Māadoco 1.22; Odoca 6.47-49)

²⁴ Ayæ wæætē odōmōnīnque Itota īmaī apænecantapa. “Īnīnque edæ botō apænebo eñēnīnque nē eñente cædāni īñōmō tōmēnāni waocā nē eñengā inte nānō nō eñente cæi baī cædānīpa. Nē eñengā īñōmō tæēmoncaa mænongampa. ²⁵ Tæēmoncaa mænongā ate cōōnæ nanguī cæ ate æpæ eyede ānīnque pō tapæmpa. Ayæ woboyæ nanguī pæmænte pō incæte oncō tæēmoncaa mænonte ongō īnīnque ædō cæte cabænte bobænte guiquīi. Nē eñente cædāni īñōmō māniñōmō mænongā baī inte todānīpa. ²⁶ Wæætē botō apænebo eñēnīnque nē eñēnāmaī cædāni guiquēnē tōmēnāni īñōmō waocā ocaī ōmæcacā nānō eñēnāmaī cæi baī cædānīpa. Nē ōmæcacā īñōmō ēmōnaiya aquīi īñōmō mænongampa. ²⁷ Aquīi īñōmō mænongā ate cōōnæ nanguī cæ ate æpæ eyede ante tapæmpa. Ayæ woboyæ nanguī pæmænte pō adinque mānīncō ōñonte ætæwo go-quinque edæ do acapowate bogocæ tæ go wææmpa. Nē eñēnāmaī cædāni īñōmō māniñōmō mænongā baī inte wædānīpa,” ante Itota odōmonte apænecacāimpa.

²⁸ Māninganca ante īnīnque apæneca eñēnīnque tōmānāni, Quīnō baī angāā, ante guīñente wædinque, ²⁹ Wīi mōnō īmonte nē odōmōnāni nāni odōmōnō baī tōmengā īñōmō nē angā inte baī edæ godōmenque nōingā ante odōmongā eñēmōmpa, ante tedegadānīpa.

8

*Në baadingä ingante Itota wadæ caacampa**(Mäadoco 1.40-45; Odoca 5.12-16)*

¹ Mänii änanquidi ongöningue iinque apænete wæængä adinque tæiyænäni tömengä miñæ wæængadänimpa. ² Tömengä miñæ tee empote wææ goyönäni wacä baate eñawengä inongä inte eyepæ pö bee téninque Itota önöwa gääné ædæ wææninque apænecantapa.

—Awënë, Bitö Ao ämi inte wadæ caabi iinque botö waintai baabaïmopa.

³ Äñongante Itota pædæ wææmpo gampo caadinque,

—Ao ämopa. Bitö waintai baacæbiimpa.

Angä iinque ñömæintai nänö eñadintai dæ baadinque tömengä waintai edæ do baacantapa. ⁴ Itota edæ tömengä ingante,

—Botö æbänö cæboo, ante wadäni inänite mäo apænedämai imäwe. Wæætë, Näwangä impa, ante acädänimpa, ante cædinque bitö, Wængongui qui, ante në godongä weca töingä godinque waintai bitö baadintai odömömi acæcäimpa. Ayæ Möitee wodi wææ ante nänö angaincoo bai ænte pöningue bitö waintai bitö baadi beyæ ante edæ, Wængongui qui, äninque në godongä ingante pædæ godömi æncæcäimpa, ante Itota angacäimpa.

*Capitäo ingante në cæcä ingante Itota cæcä waa bacampa**(Odoca 7.1-10)*

⁵ Mänii pöningue Capënaömö pö guiiyongä odömäno tontadoidi awënë capitäo incæ, Itota pönö cæcæcäimpa, ante apænecæte ante pongantapa. ⁶ Pöningue tömengä,

—Awënë, botimote në cæcä iñömö cömäingä badinque nangui pöni nantate oncönë öñongampa cæbii.

⁷ Ante äñongante Itota,

—Gote cæbo waa bacä ae.

⁸ Angä eñëninque,

—Awënë eñëmi. Botö waëmö imopa diyæ bitö botö oncönë pö guiiquimii. Edæ bitö adoyömö ongöningue ämi iinque botö imote në cæcä waa bacæcäimpa. ⁹ Bitö iñömö Awënë Wængongui ingante në eñente cædömi imi bai botö adobai wacä awënë

ingante në eñente cæbo imopa. Iinque botö awënë äabo inte botö awënë beyænque ämo eñëninque tontadoidi wæætë guiñente wædinque botö änö ante eñente cædänipa. Iinque adocanque ingante botö, Goe, ämo eñëninque edæ do gocampa. Wacä ingante, Pöe, ämo eñente pongampa. Ayæ botö imote në cæcä ingante, Cæe, ämo eñëninque edæ do cæcampa.

¹⁰ Ante tontado capitäo nangui eñengä inte apænecä eñente wædinque Itota wæætë tömengä miñæ tee empo pönäni inänite apænedinque,

—Minitö iminite näwangä ämopa. Mönö idægocabo iñömönte mäningä wede pönengä ingä bai adocanque incæ edæ dæ angä awædö, angantapa. ¹¹ Incæte iimainö ante apænebo eñëedäni. Mönö wæmæidi Abadäo wodi Itæca wodi Aacobo wodi öönæde Awënë Odeye ææmæ ponte waa beyönäni edæ nænque tamönö gämænö quëwënäni tönö nænque guidö gämænö quëwënäni iñömö idægoidi inämai inäni incæ tæiyænäni adoyömö pöningue mönö wæmæidi tönö godongämæ becädänimpa. ¹² Wæætë Wængongui Awënë Odeye ömæ në guiquënenäni guiquënë tömënäni wëmö iñömö, nani guingo imonte Yæ yæ wæyömö mäniñömö guitodonte wæquänidö angüënë.

¹³ Äninque Itota wæætë tontado capitäo ingante,

—Ñöwo wadæ goe. Bitö pönönö bai do bacæiimpa.

Ante äñongä adoyedë Itota nänö äniñedë incæ awënë ingä në cæcä do waa bagacäimpa.

*Pegodo nänögængä badä ingante Itota cæcä waa bacä**(Mäadoco 1.29-31; Odoca 4.38-39)*

¹⁴ Ayæ Itota mäniñömö pöningue Pegodo oncönë pö guiiite ayongä Pegodo nänögængä wäänä daicawo gawænte möimoga öñongä acantapa. ¹⁵ Adinque tömengä önompo pædæ wææmpote bæi ongongä ate onquiyængä wæætë gancaë badinque ængæ gantidinque Itota beyæ pönö cæcantapa.

Nantate wæwēnāni inānite Itota cæcā waa badānīpa

(Mäadoco 1.32-34; Odoca 4.40-41)

¹⁶ Māniönæ gāwadecæ ba ininque wēnæ tönō quēwēnāni tæiyænāni inānite ænte pōnāni adinque adodeque āninque Itota wēnæ inte wido cæcantapa. Ayæ quiēmē quiēmē nantate wæwēnāni inānite, Waa baedāni, angā waa badānitapa. ¹⁷ Itota mānōmaī cæcā ininque Wængonguī beyæ nē apænecā Itaiya wodi do iūmaī ante nānō angainō bai iinque batimpa. “Mönō nantate wæwēmāmo ö æninque mönō daicawoidi teēmente gote māo wido cæte bai cædinque tōmengā teēmente wængā beyænque quēwēmō imompa,” ante Itaiya nānō angainō bai Itota cægacāimpa.

Itota miñæ nē goinēna

(Odoca 9.57-62)

¹⁸ Itota iñōmō, Tæiyænāni godāmæ gongænāni awædō, ante pōnēninque tōmengā miñæ nē godāni inānite, Gāwapæ æmæ wedeca mantamīni taoboedāni. ¹⁹ Äninque ayæ ongōñongante wacā tōmēnāni nāni wææ yewæmongainō ante nē adingā inte nē odōmongā inongā inte Itota weca pōninque,

—Awēnē nē Odōmōmi ēñēmi. Bitō ædōmē goyōmite botō bitō miñæ pō gocæboimpa.

²⁰ Angā ēñēninque Itota wæætē edæ,

—Babæ guintaidi iñōmō ontatodē monguī ēadāni inānīpa. Ayamōidi ongonta ēadāni inānīpa. Botō Waobo ēñagaīmo guiquēnē monguī ömaabo imo apa poncæ ämii, ante Itota wææ apænægacāimpa.

²¹ Ayæ wacā tōmengā ēmiñængā incæ tōmengā ingante,

—Awēnē ēñēmi. Botō tāno gote botō wæmpo wængā ate daga wente ate pōmoe.

²² Äñongante Itota wæætē,

—Iñæmpa nē wæwocadāni incæ tōmēnāni guidēnāni wænāni ate ee abi daga wencædānīmpa. Bitō wæætē botō miñæ ee pōe, angacāimpa.

Itota angā ēñente woboyæ æpæ næ gongæmpa

(Mäadoco 4.35-41; Odoca 8.22-25)

²³ Māniū tao gocæte ante wipodē guiiyongā tōmengā miñæ nē godāni godongāmæ guidīnque tōmengā tönō tao godānitapa.

²⁴ Tao wogaa goyönāni woboyæ iñontobæ nangui pōni pæmæninque æpæ mængonta mængonta pōninque gao gao goyonte wipo ñānæ ñānæ æi guidentapa. Itota iñōmō mö ñongantapa. ²⁵ Mö ñongā adinque tōmengā tönō godāni iñōmō tōmengā weca gote, Ömæmoncæcāimpa, ante tao cædinque,

—Awēnē, bete wæncæ cæmompā cæbii.

²⁶ Ante äñönāni,

—Mīni pōnēegade, quimæ guññewēmīni.

Äninque tōmengā ængæ gantidīnque, Woboyæ pæmænāmaī imāwe. Gāwapæ incæ cædāmaī næ gongæmāwe, angā ēñente woboyæ pæmænāmaī iñō gāwapæ incæ næ gongæninque ñancæ ñancæ gongæmænīmpa. ²⁷ Äñongā tōmēnāni ancai guññēninque nāmāneque tededīnque,

—Æcāmē inte angā ēñente woboyæ incæ æpæ incæ gongæmpa, ante guññente wægadānīmpa.

Guedatabæ iñōmō wēncæ inte nē enempoda
(Mäadoco 5.1-20; Odoca 8.26-39)

²⁸ Māniū æmæmāa tao ti wæænte Guedatabæ pōñongā wēnæ inte quēwēna iñōmō wao wodido quēwente pōninque Itota ingante māmō bee tēnatapa. Tōmēna iñōmō, Waodāni taadō godāmaī incædānīmpa, ante wææ cæcæte ante nē piinte cædōna inte edæ, ²⁹ pō bee tēninque ogæ tededatapa.

—Bitō Wængonguī Wēmi inōmi incæ quimæ mönatō weca pōwēē. Iinque bayedē möna pante wæquēnēnō ante pōnēninque bitō ñōwo do pancæte ante pōmitawo, ante wædatapa.

³⁰ Ante äñönate odæ wængänāidi nangui ināni a ongonte cænāni adinque, ³¹ wēnæidi guiquēnē Itota ingante äninque,

—Bitō cōwē wido cæcæte ante pōnēmi ininque edæ odæ wængänāidi baönē ämi gobāimōnīpa.

³² Ante ancaa tedete äna ēñēninque Itota,

—Gobæwedāni, angā.

Äñēninque tōmēnāni tao godinque odæ wængänāidi baönē guiiyönāni odæncato wæætē ontadāa wæænōmēmō iñōmō gāwapæno pogodo wæi guite becadote capo wængadānīmpa.

³³ Becadote wænāni adinque odæ wængänāidi nē aadināni guiquēnē pogodo wodīi winonte tōmēnāni quēwēñōmō māo,

Itota mänömaï cæcä wæmönipa, ante ted-edänitapa. Ayæ, Wænæidi tönö nê quëwënina inate Itota mänömaï cæcampa, ante wæmönipa, ante apænedäni. ³⁴ Eñëninque tömänäni Itota ingante bee tencæte ante tömënäni nâni quëwëñömö tate pönänitapa. Tömengä ingante adinque, Mönitö ömæ iñömö quëwënämaï gobawe, ante nanguï angadänimpa.

9

Nê cömäingä ingante Itota angä dao dao gocampa

(Mäadoco 2.1-12; Odoca 5.17-26)

¹ Mäninö ante änäni eñëninque Itota wadæ godinque wipodë go guiidinque imæmäa tate tömengä quëwëñömö pongacäimpa. ² Pongä adinque wadäni nê cömäingä möimpataa öñöñongante edæ æmataæ æmataæ bæi ongöninque tömengä ingante næænte pönänitapa. Næænte pönäni adinque, Nê næænte pönänäni tönö nê cömäingä wede pönente pönänipa, ante adinque Itota iñömö nê cömäingä ingante,

—Botö wëmi eñëmi. Wænæ wænæ bitö cædimämo ante ñöwo ñimpo cætimpa.

³ Ante apænecä eñëninque edæ nê wææ odömönäni guiquënë pancadäniya nämäneque pönente tededinque, “İngä iñömö Wængonguï ingampa diyæ mänömaï cæquingää. Edæ babæ ancædö.” ⁴ Ante pönëñönäni Itota tömënäni nâni pönëwënö ante önöwëninque do eñëninque edæ,

—Minitö mimöno quimæ wiwa ante pönëwëminii. ⁵ “Nê cömäingä nänö wænæ wænæ cædimämo ante do ñimpo cætimpa,” ante botö Wængonguï bai ämo eñëninque minitö guiquënë, Wængonguï ingampa diyæ mänömaï cæquingää, ante pönëminipa. Ayæ wæætë, “Ængæ gantidinque dao dao gocæcäimpa,” ante botö Wængonguï bai cæbo adinque minitö edæ, Wængonguï ingampa diyæ mänömaï cæquingää, ante adobai pönëmini imäminipa, ante awædö. İñæmpa mänömainö ante pönëmini ininque minitö edæ æbänö cæquënëmo imo äminii.

⁶ Incæte woadäni nâni wænæ wænæ cædimämo ante botö Waobo eñagaimo inte inguipoga quëwëninque nê ämo inte

ñimpo cæbo quëwënänipa, ante minitö edæ eñencæminimpa, ante botö iïmaï cæbopa.

Äninque edæ nê cömäingä ingante edæ,

—Ængæ gantidinque bitö möimpata topo cædinque ænte tömëmi oncönë næænte goe.

⁷ Angä eñëninque cömäingä iningä incæ edæ ængæ gantidinque tömengä oncönë wadæ gocantapa. ⁸ Dao dao gocä ate wædinque godongämæ ongönäni iñömö, Æbänö cæcäi, ante eñënamäi inte guifente wædinque, Wængonguï pönö cæcä beyænque waocä ñöwo nê angä badinque mänömaï cæcä amönipa, ante pönëninque, Wængonguï bitö ñäö bai emömi inte tæi piñænte cæbi amönipa, ante watapæ apænegadänimpa.

Mäateo ingante Itota angä tee empote gocampa

(Mäadoco 2.13-17; Odoca 5.27-32)

⁹ Itota edæ mäninö godömenque gocæ cæte ayongä adocanque Mäateo iñömö, Odömäno awënë qui bacæimpa, ante godonte æinta nâni æincönë ongonte cæcä adinque Itota guimö adinque Mäateo ingante angantapa.

—Botö miñæ pöe, angä.

Eñëninque Mäateo edæ do ængæ gantidinque Itota miñæ tee empote wadæ gocantapa.

¹⁰ Ayæ ate Itota tömengä miñæ nê godäni tönö Mäateo oncönë go guiite cængöñönäni odömäno awënë beyæ nê æwënäni tönö nê eñënamäi cædäni tönö nanguï inäni ponte godongämæ cænänitapa. ¹¹ Adinque Padi-teoidi guiquënë tömengä miñæ nê godäni inänite äninque,

—Minitö Awënë nê Odömongä iñömö odömäno awënë beyæ nê æwënäni tönö nê eñënamäi cædäni tönö quimæ godongämæ cæwengää.

¹² Änäni eñëninque Itota,

—Nê waa ingä guiquënë, Cæbi waa baboe, änämaï ingampa. Nê wænæ wænæ inte wæcä guiquënë dotodo ingante, Cæbi waa baboe, ante do aa pecampa. ¹³ Pancadäniya, Nämä incæ nê entawëmo imopa, ante nê änäni inänite adinque botö nê dotodo bai adobai inömo inte tömënäni inänite aa pedämaï incæboimpa. Wadäni guiquënë,

Nämä wēnæ wēnæ cæbo imopa, ante nē ānāni guiquēnē, Wængonguī gāmænō poncædānimpa, ante botō tōmēnāni inānite aa pecæ pōnōmoimpa. “Baō, Wængonguī quī baquimpa, ante nē iya tānāni inānite wīi ainēwædō, wæætē godō waadete waa cædāni inānite ainēmo imopa,” ante Wængonguī angā apa quēwēnāni. Nōwo edæ godinque Wængonguī nānō ānō æbānō ante angā ēñente pōmæwedāni, ante Itota apænecacāimpa.

—Ee ate cænāmaī ingæimpa, ante nē ānāni (Mäadoco 2.18-22; Odoca 5.33-39)

¹⁴ Māniñedē Wāō miñæ nē godāni pōninque Itota ingante āninque,

—Paditeoidi tōnō Wāō miñæ mōni go-cabo tōnō mōnitonque Wængonguī beyæ ante ee ate wīi cæmōnīpa. Bitō miñæ nē godāni guiquēnē quīnante Wængonguī beyæ ante cædāmaī inte edæ do cænānīi.

¹⁵ Ānāni ēñēninque Itota wæætē,

—Onguīñægā nē monguingā nānō wente ænte nē pōnāni baī inōnāni inte botō miñæ nē godāni iñōmō ædō cæte wæwente baī cænāmaī inguīnānīi. Wæætē ayæ ate guiquēnē, Monguingā, nāni nē ānongā baī iñōmote wadāni ponte botō imote ō ænte gocædānimpa. Mānōmaī cædāni ate botō miñæ nē godāni iñōmō māniñedē ate wæætē cænāmaī inte wæcædānimpa, ante apænedinque Itota godōmenque iīmaī ante apænecacāimpa.

¹⁶ “Waacā dicæ mīincoo æninque pedæncooga pōnō tadōmonguingāa. Mānōmaī cæcā ininque edæ mīincoo incæ dobæ gāni tamonte guipite ate godōmenque wānā tente baquēnē. Mīnitō, Awente baī cænāmaī inte waa quēwengæimpa, ante mīni ānewēnō guiquēnē pedæncoo baī inte ēwenguincoo baī ēnepa. Codito nempo wat-apæ quēwengæimpa, ante botō apænedō guiquēnē mīincoo baī inte quēwenguīne ēnepa. Ininque ēwenguīne tōnō quēwenguīne edæ ædō cæte adoyōmō ēñente cæquīi.

¹⁷ Ayæ adobaī yowepæ biīnōmæ nāni āmæ mīimæ æninque woadāni ædō cæte picæ æmontaicadedē godō pe ñiñænguīnānīi. Edæ picæ æmontaicadedē pe ñiñæñāni ininque yedæ æninque ætæwo goquīnō anguēnē. Wæætē edæ æmontai mīincadedē pe

ñiñænte ate yedæ æninque tæi æbænāmaī ee ongōñō edæ mīimæ tōnō æmontaicade adobaī ee ongongæimpa, apa quēwēminīi,” ante Itota apænecacāimpa.

Gaido wēñægā beyæ cæcæ goyongante

onquiyægā Itota weocoo gampocampa (Mäadoco 5.21-43; Odoca 8.40-56)

¹⁸ Tōmēnāni inānite tæcæ apæneyongā wacā tōmēnāni odōmōincō awēnē inongā inte Itota weca ponte ædæ wææninque apænecantapa.

—Botō wēñægā baquēcā iñōmō edæ dobæ wæncæ cæcampa cæbīi. Bitō ponte tōmengā ingante gampobi ate quēwencæcāimpa.

¹⁹ Angā ēñēninque Itota iñōmō ængæ gantidinque tōmengā tōnō goyōna tōmengā miñæ nē godāni godongāmæ godānitapa.

²⁰ Idōmæ goyōnāni edæ wacā onquiyægā wantæpiyæ dote wadepo cōwē wepæ wantæ bidāmaī wææ wæwēningā iñōmō ñōwo Itota onōñabæ inō pōninque tōmengā weocoo yæwedecooque gampocantapa.

²¹ “Tōmengā weocooque gampote waa bawēnēmote,” ante onquiyægā nāmā pōnēninque gampocantapa. ²² Gampocā ate Itota dadi ēmæmonte adinque,

—Onquiyæmi, wæwēnāmaī iē. Bitō wede pōnēnō beyæ edæ wantæ bawēnēmīpa.

Ante āñongā do edæ wantæ bawēnengacāimpa.

²³ Itota mānīi godinque awēnē oncōnē go guīte ayongā nē ōōña baī ōōnāni tōnō nanguī ināni cægonte Yæ yæ wædāni inānite adinque, ²⁴ tōmēnāni inānite,

—Gā goedāni, āninque, Iñæmpa iñōmō wēñægā wodi wīi æmæwo wængampa. Ōnonque edæ mō ñongampa.

Angā ēñēninque tōmēnāni, Angantedō amīni, ante tōmengā ingante badete todānitapa. ²⁵ Ayæ mānīi angā taodāni adinque Itota pō guīdinque wēñægā baquēcā wodi ingante pædæ wææmpo bæi ongonte tōō æmægā ate wēñægā ængæ ganticantapa. ²⁶ Mānōmaī cæcā adinque nē adāni iñōmō gode ā gode ā cædāni ate māniñōmō quēwēnāni tōmānāni ēñengadānimpa.

Babetamōna inate Itota gampomongā waa adapa

²⁷ Itota wadæ gote godömenque goyongä babetamöna tee empo ponte aa pedinque,
—Awënë Dabii pæimi inömi inte mönatö imönate pönö waadete waa cæbi æmönæ, ante ancaa aa pedatapa.

²⁸ Aa peyöna tömengä edæ oncönë go guicä adinque adoyömö pö guidatapa. Guida adinque Itota tömëna inate,
—Mina änö ante nö waa cæquimo, ante pönëmïna.

Äñongante,
—Ao. Awënë, bitö änö bai cæcæbiimpa, ante pönëmönapa.

²⁹ Apænedä eñëninque Itota pædæ gopo gampomöninque,
—Në pönëmïna inïmïna inte mïna pönenganca do waa bacæmïnaimpa.

³⁰ Ante äñongä edæ tömëna awinca wi æmante bai adatapa. Itota iñömö edæ,
—Botö cædinö ante apænedämaï inguënë quëwëmïnaa. Edæ pæ wëneyömïna eñënamäi incædänimpa, ante nanguï angantapa.

³¹ Ìninque wadæ godinque Itota nänö äninö ante wïi eñente cædinque tömëna, Itota mänömaï cæcä waa bamontamönapa, ante tömämæ mäo apænedä eñengadänimpa.

Wënæ inte wido cæyongä babetadecä ìningä tedecampa

³² Wadæ goyöna edæ wënæ tönö cæcä inte babetadecä inongä ingante Itota weca ænte pönäni. ³³ Adinque wënæ ingante Itota wido cæyongä babetadecä ìningä iñömö edæ do tedecä adinque tömänäni ancai guñëninque,

—Itota nänö cædö bai mönö idægocabo adocanque incæ dicæ cæcä atamongaa, ante wædänitapa.

³⁴ Paditeoidi guiquënë,
—Wënæidi awënë tönö cædingä inte tömengä wido cæcä apa änewënanii, ante pïngadänimpa.

Itota waodäni inänite waadete waa acampa

³⁵ Itota iñömö nanguï nani quëwëñömö ayæ wædænque nani quëwëñömö wayömö wayömö godinque Wængonguï angä nani eñente yewæmongainta ate odömöincönë go guii go guii cædinque odömongä

adänitapa. Ayæ, Mönö Awënë Odeye inguipoga oo ponguinö anguënë, ante nänö waa pönï äninö ante apænegä eñënanitapa. Ayæ quiëmë daicawo cæpämö adinque quiëmë wæncæ cæte wæwënö adinque tömengä godö cæcä waa badänitapa.

³⁶ Cæningancoo bai waodäni incæ bacoo inäni iñönäni në aadingä dæ angä bai inänipa, ante acantapa. Mänömaï inäni inte babæidi wiñaate wædinäni bai ængæ gantidämaï inäni bai waodäni incæ wæwëñönäni Itota tömënanï tönö godongämæ wæwente bai pönengantapa. ³⁷ Ayæ tömengä miñæ në godäni inänite apænedinque,

Tömëmoncoo bacoo bai inäni iñönänite tä pete inäni bai në gode änäni iñömö mënäniya pönï inänipa cæmïni. ³⁸ Tömëmoncodë gæqui angä Awënë iñongante munitö tömengä ingante apænedinque, Tömëmoncodë në gæquinäni da godömi gote gæte bai äñete poncædänimpa, ante Wængonguï ingante apæneedäni, ante Itota apænegacäimpa.

10

Itota angä ate dote ganca inäni në gode änäni badänipa

(Mäadoco 3.13-19; Odoca 6.12-16)

¹ Ayæ ate tömengä miñæ në godäni önonpo tipæmpoga go mënäniya mänimpodäni iñönänite Itota äñecä pönäni ate tömengä, Botö pönö cæbo ate munitö në ämïni badinque wënæidi në wentamö ewocadäni inänite wido cæcæmïnimpä, angantapa. Ayæ, Quiëmë daicawo gawænäni incæ quiëmë beyæ wæncæ cæte wæwënäni incæ munitö eyepæ inte godö cæmïni ate në wæwëninäni waa bacædänimpä, ante pönö cægacäimpa.

² Itota nänö në da godöninäni önonpo tipæmpoga go mënäniya mänimpodäni inänipa, ante adinque, Dote, ante nani gocabo inänipa, ante tededänipa. Tömënanï iïmaï emönäni inänipa. Tänäda Timönö Pegodo mönö änongä tönö Æntade näna caya inapa. Ayæ Tebedeo wëna Tantiago tönö Wäo näna caya inapa. ³ Pedipe tönö Batodömëe mënaa inapa. Odömäno awënë beyæ në æwëningä Mäateo tönö Tömato mënaa inapa. Adepeo wengä Tantiago tönö Tadeo inapa. ⁴ Wacä, Mönö ömæ ingæimpa,

ante nē nanguī cædingā incæ wacā Timönō ingampa. Ayæ Itota ingante odömönte nē godonguingā Codaa Icadiote mönō ānongā ingacāimpa. Mānimpodāni Itota miñæ nāni, Dote, ante gocabo inānīpa.

Wængonguī Awēnē ingantedō ante apæneedāni, ante Itota angā godānīpa (Māadoca 6.7-13; Odoca 9.1-6)

⁵ Īnīnque Itota miñæ nāni, Dote, ante gocabo iñōnānite tōmengā, “Mīnitō idægoidi ināmaī ināni taadō godāmaī inte edæ Tāmadiāidi nāni quēwēñōmō go guīdāmaī iedāni, ante da godongantapa. ⁶ Edæ cæningāidi obegaidi gueogæ gote bai inōnāni inte mönō idægocabo taadō oda cædinque tōmēnāni nāni wē wom-onte wænguīnō godānīpa, ante adīnque mīnitō tōmēnāni weca gote cæedāni. ⁷ Godīnque mīnitō, Öönædē Awēnē Odeye oo poncæcāimpa cæmīnī, ante māo apænemīni eñencædānīpa. ⁸ Ayæ quiēmē beyæ nantate wæwēnāni adīnque godō cæmīni ate waa bacædānīpa. Do wænīnāni inānite godō cæmīni ate ñāni ömæmoncædānīpa. Baate ināni inānite godō wadæ caamīni waintai baacædānīpa. Wænæidi inte godō wido cæedāni. Botō önonque ānāmaī inte pönō cæbo ænimīni inte mīnitō botō cæbo bai adobaī cædinque wadāni inānite ānāmaī inte önonque godō cæmīni æncædānīpa,” ante Itota angantapa.

⁹ Ayæ, “Mīnitō gocæ cædinque, Godonte æinta, ante tīguitamō incæ oodo incæ padata incæ edæ wente æincadedē da wente ænāmaī iedāni. ¹⁰ Edæ wadāni beyænque nē cæcā iñōmō tōmengā eyepæ ænte quēwencæcāimpa cæmīnī. Māincoo da wenguīncade ænāmaī inte goedāni, Weocoo mīni eñacooque eñate awæncata mīni ewataque ewate ongonto mīni nææntoque næænte goedāni,” angantapa.

¹¹ Ayæ apænedīnque Itota tōmengā miñæ nē godāni inānite angantapa. “Nanguī pōnī nāni quēwēñōmō incæ wædænque ināni nāni quēwēñōmō incæ mīnitō māniñōmō go guīdīnque waocā nē nō cæcā ingante ante diqui minte adīnque māningā oncōnē go guīite owodīnque wayōmō mīni go quēwenganca

mānīncōnenque quēwēedāni. ¹² Mānīncōnē go guīdīnque, Īñānāni, waa quēwēedāni, æedāni. ¹³ Ayæ ānīnque, Mīnitō weca æbānō pō guīite quēwenguīmōnīi, āñōmīni Ao ānāni ate mīnitō tōmēnāni weca go guīite gānē pōnēnīnque ee quēwēedāni. Wæætē nō cædāmaī ināni adīnque mīnitō edæ ee quēwēnāmaī edæ wadæ gomīni wæcædānīpa. ¹⁴ Edæ, Pōedāni, ānāmaī ināni adīnque ayæ mīnitō apænemīni eñēnāmaī ināni ĩnīnque mīnitō wæætē tōmēnāni oncodo tao godīnque, Mīnitō quēwēñōmō nāwate awædō, ante odōmoncæte ante cædinque önöwa wadæ wadæ cæwate wadæ goedāni. ¹⁵ Edæ nāwangā āmopa. Botō apænte anguīönæ iñonte Todōmä iñōmō quēwengāināni tōnō Gömoda iñōmō quēwengāināni tōnō nanguī pante wæwēñōnāni mīnitō ĩmīnite nē Baa ānāni guīquēnē godōmenque pante edæ wæwencædānīpa,” ante Itota tōmēnāni inānite da godongā godānītapa.

Togænte pancædānīpa, ante

¹⁶ Ayæ ānīnque Itota, “Cōwā æedāni, angantapa. Mīnitō iñōmō nē cæningāidi bai iñōmīnite botō iñōmō mēñe bai ināni weca da godōmo godīnque mīnitō tæntæ nāmā wææ cæcæte ante nānō eñente cæbaī adobaī eñente cæedāni. Wæætē edæ equemō nānō ee cæbaī mīnitō adobaī piīnāmaī inte ee cæte quēwēedāni. ¹⁷ Ayæ edæ mīnitō ĩmīnite bæi ongōnīnque waodāni tōmēnāni nē apænte ānāni weca māo pædæ godōnāni æncædānīpa. Ayæ godōmenque tōmēnāni odōmōincōnē māo ænte godīnque mīnitō ĩmīnite tæi tæi pancædānīpa cæmīnī. Īnīnque mīnitō edæ, Æbānō cæquīnānīi, ante do eñēmīni inte edæ nāmā wææ aædāni. ¹⁸ Ayæ, Awēnēidi tōnō nē eñēnāmaī ināni adobaī eñencædānīpa, ante cædinque botō āmo eñēnīnque mīnitō ĩmīnite māo pancabaa awēnēidi gobedōnadodoidi weca ayæ tōmāmæ awēnēidi odeyēidi weca gōnōnāni gongænīnque mīnitō botō beyæ apæncæmīnīpa. ¹⁹ Māniñedē tōmēnāni nāni ænte māo gōnōñedē, Quīnō bai apænequīmoo, ante guīñēnete wædāmaī iedāni. Māniñedē edæ quīnō bai apænequīi, ante do eñencæmīnīpa. ²⁰ Īñæmpa wīi

nämä pönëninque apænequimîni wæætë mönô Wæmpo Önôwoca incæ apæneçä ëñëninque apænequimîni imînipa,” ante Itota apænegacäimpa.

²¹ Ayæ godömenque apænedinque Itota, “Mäniñedë edæ nâna caya iñönate adocanque näëmæ pîinînque, Wænoncæ, äninque tömengä tönîñacä ingante da godongä gocæcäimpa. Nâna wencaya iñönate mæmpocä iñömö näëmæ pîinînque, Wænoncæ, äninque tömengä wengä ingante da godongä gocæcäimpa. Ayæ wëñænâni incæ wæmpoda inate näëmæ pîinînque mäo apænedâni ëñëninque wadâni tömënâni wæmpoda inate mämö wænönâni wæncædäimpa. ²² Ayæ, Coditoidi imînipææ, ante tömänâni botö ëmowo beyænque mînitö imînite nangui pîincädänîmpa. Pîinâni wæwëmîni incæ æcänö iimæca iinque baganca wæntædämaï inte botö ëmowo beyæ piinte badämaï ingää tömengä ingante botö æmo beyænque quëwencæcäimpa. ²³ Mäniñedë ate waodâni togænte pancæte ante mîni quëwëñömö pönâni ate wædinque mînitö iñömö wayömö wadâni nâni quëwëñömö wodii winöedâni, ämopa. Edæ näwangä ämopa. Edæ mönô Idægobæ wayömö wodii winöninque pancayömonga goyöminîni botö Waobo ëñagaïmo inte edæ do poncæboimpa,” ante Itota apænegacäimpa.

²⁴ Ayæ, “Në odömongä ingante piinte cæyönâni tömengä miñæ në gocä ingante edæ ædö cæte piinte cædämaï inguinâni. ²⁵ Awënë në odömongä wæwente quëwëñongä tömengä miñæ në gocä guiquënë ædö cæte wæwëñämaï quëwëngüingää. Edæ në cæcä tömengä awënë bai bacä iinque idæwaa edæ imaimpa. Botö oncö ëacä bai në Awënë imo iñömote wadâni, Wënæ awënë Beedboobi imidö angüënë, ante pîinâni incæ mînitö botö tönö mîni quëwencabo iñöminite wadâni godömenque wënæ wënæ ante pîincädänîmpa,” ante Itota apæneçä ëñëngadänîmpa.

*Guiñëñämaï iedâni, ante
(Odoca 12.2-7)*

²⁶ Ayæ apænedinque, “Incæte tömënâni inänite guïñëñämaï iedâni. Iñæmpa,

Adämaï incädänîmpa, ante quiëmë wë womonte i incæ iincayæ ate tömäa wi ænete bayonte edonque pönî bacæimpa. Ayæ quiëmë awëmö cæteï incæ iincayæ ate edonque pönî acädänîmpa. ²⁷ Botö wëmö iñömö mînitö imînite apænebo ëñente ate mînitö botö apænedö ante ñäo apäiyömö apæneçämînîmpa. Ayæ godö wæntæ botö äninö ëñente ate mînitö æibæ oncömanca æidinque ogæ tedete apænemîni ëñencädänîmpa. ²⁸ Ayæ në baonque wænönâni inte önôwoca wænönämaï inâni inänite adinque mînitö tömënâni inänite guïñëñämaï iedâni. Wæætë edæ baö tönö önôwoca tadömengadænguipo në ömæe ëwëngongä ingante guiquënë mînitö tömengä ingante guïñente wæedâni.”

²⁹ Äninque, Itota godömenque apæneçantapa. “Wocä ayamöidi önompo æmæmpoque mänîmpodâni beyæ tîguitamö adotamonque ante pædæ godongä amînitawo. Incæte mînitö Mæmpo änämaï iñonte ayamö adocanque incæ yæipodë wæænämaï ingampa. ³⁰ Mönô ocagui incæ æpoguïnö encamöö, ante Mæmpo Wængongui do ëñëninque mönô imonte aacampa. ³¹ Edæ, Ayamöidi bacoo pönî iinque önönque inänîpa, ante në äningä inte mönô Mæmpo iñömö mînitö imînite wæætë waa acä apa guïñëwëminîi,” ante Itota apænegacäimpa.

*Waodâni ëñëñönâni mönô Itota ingante
Ao angæimpa, ante
(Odoca 12.8-9)*

³² Godömenque apænedinque Itota, “Æcänö waodâni ëñëñönâni botö imote Ao äninque, Bitö botö Awënë inömi imîpa, ante äna tömengä öönædë æiyongante botö tömengä ingante wæætë edæ Ao äninque, Bitö iñömö botö miñæ në gogaïmi inömi imîpa, ante botö Mæmpo ëñëñongä ancæboimpa. ³³ Wæætë waodâni ëñëñönâni botö imote në Baa angaingä ingante guiquënë botö Mæmpo öönædë në quëwengä ëñëñongä botö tömengä ingante adobaï edæ Baa ancæboimpa,” ante Itota apænegacäimpa.

*Botö beyænque guëa pîincädänîmpa,
angampa
(Odoca 12.51-53, 14.26-27)*

³⁴ Ayæ apænedinque Itota, “Inguipoga quëwënäni piyænë cæte wæætedö wæætë cædämaï inte quëwencædänimpa, ante cæcæte ante Itota ïmæca pongaingä ingampa, ante mïnitö pönëmïnitawo. Ìñæmpa yaëmë næænte bai pömo ïmopa. ³⁵ Botö apænedö beyæ onguiñæna nana wæmpocaya incæ næëmæ piincædaimpa, ante pömo ïmopa. Onquiyæna adobai nana badancaya incæ næëmæ piincædaimpa. Nana wæntecaya incæ næëmæ waadedämaï inte piincædaimpa, ante pömopa. Mänömaï cæbo ïmopa, ante pönëmïniyaa. ³⁶ Ìninqe, botö änö beyæ nani owocabo incæ næëmæ waadedämaï piincædänimpa,” ante apænegacäimpa.

³⁷ Ayæ apænedinque Itota iïmaï apænecantapa. “Edæ æcänö mæmpo tönö wäänä ïnate ædæmö waadedinque botö ïmote wæætë pönömenque waadedä ïñömö tömengä ïñömö botö nê ëmiñængä ædö cæte baquingää. Adobai wëñængä ingante ædæmö waadedinque botö ïmote pönömenque nê waadecä ïñömö tömengä wæætë botö nê ëmiñængä ædö cæte baquingää. ³⁸ Ayæ æcänö botö miñæ pöinena tömengä ïñömö edæ, Awæ botö wænguiwæ, ante næænte ponte bai cædinque, Wænönäni wæmo incæte Itota miñæ cöwë gocæboimpa, ante poncæcäimpa. Wæætë æcänö mänömaï cædämaï ïna guiquënë tömengä ædö cæte botö nê ëmiñængä inguingää. ³⁹ Æcänö nämanque pönente, Ìmæcaque waa quëwenguïmo, ante änaa tömengä ïñömö quëwënämaï incæcäimpa. Wæætë edæ, Wæmo incæ wæwëmo incæ botö öönædë Awënë angä ëñente cöwë cæcæboimpa, ante æcänö äna guiquënë tömengä ïñömö edæ cöwë quëwencæcäimpa,” ante Itota apænegacäimpa.

Në pönengä nänö waa cædinö beyæ eyepæ æncæcäimpa
(Mäadoco 9.41)

⁴⁰ Ayæ apænedinque, “Mïnitö ïmïnite Ao äninque waocä botö ïmote do edæ Ao äningä ingampa. Ayæ botö ïmote Ao äninque botö ïmote nê da pönongaingä ingante do edæ Ao äningä ingampa. ⁴¹ Wængongui beyæ nê apænecä ingante bitö, Wængongui

beyæ nê apænebi inte pöe, ämi ïninqe Wængongui beyæ nê apænecä nänö paga ænganca bitö adopo æncæbiimpa. Ayæ nê nö cæcä ingante, Bitö nê nö cæbi inte pöe, ämi ïninqe nê nö cæcä nänö paga ænganca bitö adopo æncæbiimpa. ⁴² Näwangä ämopa. Bitö Itota miñæ nê gobi inte æpæ becæbiimpa, ante bitö guiyangä ingante pædæ godömi ængä ïninqe bitö godöni beyæ eyepæ æncæbiimpa,” ante apænedinque Itota tömënäni ïnänite da godongä gogadänimpa.

11

Wäö tömengä miñæ nê goda ïnate da pönongä pönapa

(Odoca 7.18-35)

¹ Ayæ tömengä miñæ nani, Dote, ante gocabo ïnänite ïninqe apænedinque Itota wadæ godinque tömënäni nani quëwëñömö odömoncæte ante ayæ, Æñencædänimpa, ante apænecæte ante wayömö wayömö gocantapa.

² Mäniñedë edæ Wäö ïñömö tee mönete ongöñongante wadäni tömengä weca pöninque, Mönö Codito iïmaï cæcampa, ante tededäni ëñente wædinque Wäö wæætë tömengä miñæ goda ïnate Itota weca da godongä godatapa. ³ Ìninqe Wäö beyæ ancæte ante pöninque tömëna iïmainö ante Itota ingante apænedatapa.

—Bitö ïñömö dodäni nani, Nê Ponguingä, ante nê angäimi adobi ïmitawo. Wæætë tömënäni nani nê angäimi ïnämaï ïmi ïninqe bitö wæætë, Wacä ponguingä, ante wänö cöedäni, ämitawoo. Æbänö mönitö cæquimönii, ante ëñencæte ante wæmönipa.

⁴ Ante äñönate Itota wæætë, “Mïnatö ponte ëñëñömïna botö æbänö apænebo ëñëmïnatawo, ante ayæ, Botö æbänö cæbo amïnatawo, ante mïnatö wæætë Wäö weca gote mäo apænemïna ëñengæda. ⁵ Botö godö cæbo ate babetamö ïninäni incæ waa bamonte adäni amïnapa. Cömante ïninäni incæ waa bate dao dao godäni amïnapa. Baate ïninäni incæ æmontai waëmöntai baadäni amïnapa. Babetamonca ïnani ïñönänite botö godö cæmömo ate önömonca waa bamoncate ëñënäni amïnapa. Do æmæwo wænte öñönäni ïñönänite botö godö cæbo ate ñäni ömæmönäni amïnapa. Ömaadäni inte wæyönänite botö Wængongui

waa pöni nänö pönö cægainö ante apænebo eñente todäni aminapa. ⁶ Ayæ, Botö beyæ waocä wii piinte wadæ gocä iñömö tömengä watapæ nänö quëwenguinque edæ oda cædämaï incæcäimpa, ante apænebo eñëninque minatö Wäö ingante mäo adodö ante apænemina eñengæda,” ante Itota angantapa.

⁷ Angä eñëninque Wäö beyæ nê äñina wadæ goyöna edæ Itota wæætê tömänäni inänite, Wäö æbänö ingää, ante apænecantapa. “Minitö guiquënë quinä acæte ante önömæca gominitapa. Cæwipa woboyæ pæmænte ate æmænö ædæ æmænö ædæ gobaingä ingante minitö dicæ acæ gominitawogaa. ⁸ İninque edæ quingänö ingante acæte ante gominitapa. Waocä weocoo waëmoncoo mongængö ingante minitö dicæ acæ gominitawogaa. İñæmpa waëmoncoo mongængä iñömö awënë oncönê quëwengä apa quëwënanii. ⁹ İninque edæ quinate gominitawo. Minitö mini nê go acæ cædongä iñömö edæ Wængongui beyæ nê apænecä ingantawo. Nawangä impa. Wængongui beyæ nê apænecä Wäö ingampa. Incæte tömengä wii Wængongui beyæ nê apænegainäni bai inongä inte godömenque nanguï cæcä ingampa, ante apænebo eñëmaïminipa. ¹⁰ Wængongui iïmaï angampa, ante yewæmongatimpa.

‘Botö beyæ nê apænecä ingante da pönömo pöninque tömengä taadö täno beyænte bai cæcæcäimpa.

Tömengä bitö Codito İmi beyæ ante taadö waa pinonte bai waa cæcæcäimpa.’

Mänömainö ante dodäni adocä Wäö ingantedö ante pönëninque yewæmongadänimpa.

¹¹ Nöwo iñömö ämo eñëedäni. İmæca mini eñagaincabo iñöminite æpænê mönö nê guidönongä Wäö adocanque ñænængä iñongante wacä tömengä bai edæ dæ angampa. Incæte öönæde Awënë Odeye nempo quëwënanii iñönäni adocanque guiyangä pöni ingä incæte Wäö pönömenque wædangä ingampa,” ante Itota apænecantapa. ¹² Ayæ iïmaï ante godömenque apænecantapa. “Wäö täno nänö apænedöñedê ayæ godömenque ñöwo ganca tæi piñænäni pogodo pöninque,

Öönæde Awënë Odeye nempo mönö wäänê guicæimpa, ante tee tate guite bai cædinque, Mönö Awënë incæcäimpa, ante edæ ö ænte bai cædänipa. ¹³ Edæ Wængongui beyæ nê apænegainäni tönö, İïmaï cæedäni, ante nê wææ angaingä tönö tömënanii tömänäni edæ, Awënë poncæcäimpa, ante cöwê Wäö nänö ponganca apænegadänimpa. ¹⁴ İninque, Ediya wodi ayæ poncæcäimpa, ante nänii nê äñongä Wäö iñömö adocä ingampa, ante pönëminiyaa. ¹⁵ Eamonca ongonte eñëedäni,” angantapa.

¹⁶ Godömenque apænedinque Itota iïmaï angantapa. “Inguipogaque ante nê quëwënanii iñömö quingämê bai inänipa. Quiëmê bai edæ quëwënanipa. Wëñænäni mönö godonte æiñömö tæ contate owempodäni nänii owempodö bai edæ adobai cædänipa, ante awædö. Wëñænäni nänii owempote cæcabo incæ ææmæ cæte bai owempote cædinque wadäni inänite aa pedänipa. ¹⁷ ‘Minitö beyæ ööña we we ööñömöni minitö wæætê edæ äwadämaï iminitapa töö,’ ante owempodinque wëñænäni piinte tedewënanipa. Ayæ wæætê, Waocä do wængä ate nänii wæbai ante wëñænäni nänii owempote cæcabo iñömö, ‘Mönitö Ca ca wæyömöni minitö wæætê edæ wædämaï imini wæmönipa,’ ante piïninque aa pedäni bai ñöwodäni iñömö edæ adobai piinte tedewënanii inänipa. ¹⁸ İïmaï edæ impa. Wëñænäni nänii wædö bai Wäö iñömö cængui cænämaï tepæ bedämaï ponte quëwëñongante ñöwodäni guiquënë, Wënæ tönö Wäö quëwengampa, ante piïnänipa. ¹⁹ Ayæ wæætê botö Waobo eñagaimo inte edæ ponte nê cænte bete quëwëmo adinque botö imotedö ante minitö iñömö, Cæowæobi inte cæmipa. Beowæobi inte bebipa, ante badete tomänipa. Ayæ godömenque, Odömäno awënë beyæ nê æwënanii tönö nê eñënamai cædäni iñönänite bitö tömënanii æmigo imipææ, ante botö imote piïninque minitö wëñænäni nänii piinte aa pedö bai änewëminipa töö. Incæte, Nê nö eñënanii iñömö nö cædänipa, ante adinque, Nawangä nö eñënanipa, ante mönö eñengæimpa,” ante Itota

apænegacäimpa.

Në eñenāmai cædāni inānite Itota pīngampa

(Odoca 10.13-15)

²⁰ Ayæ, Minitō quēwēñōmō botō bamōnengæ nanguī cæbo adīmīni incæ mīnitō wēnæ wēnæ mīni cædinō ante, Ancaa wæwente awædō, ante dicæ wæmīnitawogaa, ante pīninque Itota wayōmō wayōmō tōmengā nānō nanguī cædiñōmō quēwēnāni inānite iimainō ante mā pīngantapa.

²¹ “Codatī iñōmō quēwēmīni eñēedāni. Betaida iñōmō quēwēmīni eñēedāni. Minitō mīni wæwengūnque eñenāmai cæte quēwēmīnidō anguēnē. Edæ botō mīnitō weca tæi pīñænte botō cædi bai Tido nāni quēwengaiñōmō Tidōō nāni quēwengaiñōmō adobai cæbo bai māniñōmō quēwengaināni iñōmō tōmēnāni dobæ wēnæ wēnæ nāni cægainō ante ñimpo cædinque weocoo gōmæ ēmoncoo wēñadinque gōnai ōni pæcate Ca ca wæcægadānimpa.

²² Iinque mīnitō imīnite āmopa. Wængonguī nānō apænte anguīōnæ iinque bayonte Tido iñōmō quēwengaināni tōnō Tidōō iñōmō quēwengaināni inānite nanguī pangā wæwēnāni incæte tōmengā mīnitō imīnite godōmenque pangā wæwencæmīnimpa.

²³ Ayæ Capēnaōmō iñōmō quēwēmīni eñēedāni. Minitō imīnite Wængonguī dicæ ōnædē wo ææntodongā æi gote toquimīniyaa. Iñæmpa tadōmengadænguipo wææntodongā guī wæcæmīnimpa. Edæ botō mīnitō weca tæi pīñænte botō cædi bai Todōmā nāni quēwengaiñōmō adobai cæbo bai tōmēnāni nāni quēwengaiñōmō edæ godōmenque ñōwo ganca edæ mæ ongoncædōnimpa.

²⁴ Iinque edæ āmo eñēedāni. Wængonguī nānō apænte anguīōnæ iinque bayonte Todōmā quēwengaināni inānite nanguī pangā wædāni incæte mīnitō imīnite godōmenque pangā wæcæmīnimpa,” ante Itota tōmēnāni inānite pīngacäimpa.

Botō weca pō guēmædāni, angampa

(Odoca 10.21-22)

²⁵ Ayæ māniñedē Wængonguī ingante apænedinque Itota, “Mæmpo eñēmi.

Wadāni nāmā ocai encadāni tōnō nanguī adinque në eñenāni tōnō māninō bitō eñengainō ante eñenāmai incædānimpa, ante cædinque bitō cægainō ante wē wodonte bai pæ wēenegabiimpa. Wæætē edæ wēñænāni nāni pōnēnō bai në pōnēnāni inānite wæætē bitō edonque odōmōmi adinque do eñenānipa. Bitō ōnædē Awēnē ingāimi inte inguipoga Awēnē adobi inōmi inte edæ mānōmai cæbipa, ante adinque botō bitō imite waa ate pōnēninque apænebopa. ²⁶ Mæmpo, bitō tōmēmi ānō bai cædinque waa cæbi adinque botō Ao āmopa,” ante Wængonguī ingante waa apænecantapa.

²⁷ Wængonguī ingante iinque apænedinque Itota godongāmæ ongōnāni inānite wæætē apænecantapa. “Botō Mæmpo nō eñengā inte pōnō odōmongā beyænque botō iñōmō tōmānō ante në eñēmo imopa. Ayæ, Botō tōmengā Wēñæmo iñōmote botō Mæmpoque botō imote në againgā iñongante wadāni adāmai inānipa. Wæætē edæ Mæmpocā ingante botō tōmengā Wēñæmo inōmo inte adoboque në agaīmo imopa. Iinque, Botō abo bai iinānique adobai ate bai pōnencædānimpa, ante cædinque botō mīnitō imīnite odōmōmo adinque mīnitō adobai Mæmpocā ingante në ate bai pōnēmīni bamīnipa.”

²⁸ “Teēmē mongænte bai nangæ batawēmīni iinque mīnitō botō weca pōmīni ate botō wæætē teēmē mongænte mīni wæwēnō ante ō æmo ate mīnitō wæætē gancæ pōnente guēmancæmīnimpa. ²⁹ Edæ botō mīmōno gānē pōnēninque nāmā beyænque ānāmai quēwēmo adinque mīnitō botō weca pōmīni iinque botō mīnitō tōnō iñacabo cæcæboimpa. Edæ wagadada awæmpaa goti wīmoncate āāmencaque goda bai mōna guēa cæcaya bayōmōna botō nō eñenōmo inte pōnō odōmonte apænebo eñēninque mīnitō ōnōwoca wampo pōnente guēmancæmīnimpa. ³⁰ Edæ botō tōnō āāmencaque bai cædinque bitō iñōmō oo wīmoncadimpa mongænte bai edæ do cæcæbiimpa. Botō mongæncōo wodæi iñonte bitō wæætē edæ wodæi mongænte gote bai nangæ badāmai incæbiimpa,” ante Itota iinque apænegacäimpa.

12

Guëmanguiönæ iñonte tömëmö tä pete ænänipa

(Mäadoco 2.23-28; Odoca 6.1-5)

¹ Mäniñedē guëmanguiönæ iñonte Itota tömëmoncodē tæcæguedencodē gocantapa. Goyongä tömengä miñæ nē godäni guiquënë gæwænte wædinque tömëmö tä pe tä pe æninque tæcæ cæncæ cædäni.

² Adinque Paditeoidi guiquënë Itota ingante wæætē,

—Bitö miñæ nē godäni æbänö cædänii, ante cöwä aquënë. Ìñæmpa, Guëmanguiönæ iñonte mäninö bai cædämaï iedäni, ante dodäni nāni wææ angainö ante eñenāmaï inte iñäni iñömö do cædänipa töö.

³ Ante püñönänite Itota,

—Minitö iñæmpa docä Dabii wodi tönö godongämæ godäni tönö gæwænte wædäni iñinque tömengä æbänö cægacäi ante yewæmonte ongö incæte mīnitö iñömö adāmaï inte bai anewëmini awædö.

⁴ Tömengä iñömö Wængongui oncönē go guicantapa. Mänincönē, Wængongui qui, ante nē godönänique cænguï impa, ante wææ nāni angainö bai cædinque tömënäni, Wængongui qui, ante päö ñoncæ ñoncæ cædönänimpa. Incæte mänii päö wii Dabiidi cænguï ini incæ Dabii do cængantapa. Ayæ tömengä tönö cægönäni adobai godongämæ cængadänimpa. ⁵ Ayæ, Wængongui qui, ante nē godönäni iñömö Wængongui oncönē ñænæncönē iñömö önönæque nāni cæbai guëmanguiönæ iñonte adobai cædäni incæte wentamö entawënāmaï önönque cæcædänimpa, ante Möitee wodi wææ yewæmongacäimpa. Minitö iñömö mäninö ante adāmaï inte bai anewëminipa töö, angantapa.

⁶ “Ayæ apænebo eñnedäni. Minitö, Wængongui oncö ñænæncö waa pönī ongoncompa, ante ayömini edæ botö ñöwo mīnitö weca nē ongömo guiquënë wii Wængongui oncö bai ongömo inte wii önömoque ongömopa. Wæætē edæ nāmā nō cædömo inte botö iñömö edæ godömenque waa pönī ongömo apa quëwëmini. ⁷ Incæte, Wængongui iimainö ante apænecampa. ‘Wængongui qui, äninque mīni iya tänö ante pönömenque waa adinque botö nē waadete

mīni godö waa cædö ante godömenque waa abopa,’ ante Wængongui angampa. Ìnīnque mīnitö iñömö Wængongui nänö angainö ante eñëmini inte bai iñäni wentamö mongænāmaï iñönänite, Mīni pante wæquinque mänömaï cæminipa, ante apænte pīnāmaï incædöminimpa. ⁸ Botö iñömö Waobo nē eñagäimo iñömö Tæiyæ Awënë iñömo imopa. Ìnīnque botö nē guëmanguiönæ Awënë iñömo inte edæ, Guëmanguiönæ iñonte edæ æbänö cæquii, ante adobo nē ‘Ämo imopa,’ ante Itota apænecäimpa.

Ni cömampoingä

(Mäadoco 3.1-6; Odoca 6.6-11)

⁹ Äninque wadæ godinque Itota iñömö Wængongui angä nāni eñente yewæmongainta ate oodeoidi nāni odömöincönē go guigacäimpa. ¹⁰ Mäniñömö ni cömampoingä a ongongä adinque Paditeoidi guiquënë, Itota wapiticæ cæcä iñinque mönö mäo piinte angæimpa, ante nē änäni inte tömengä ingante änanitapa.

—Guëmanguiönæ iñonte wacä waa bacæcäimpa, ante cædäni, ante Wængongui wææ angantawo.

¹¹ Ante Itota ingante äñönänite tömengä wæætē,

—Guëmanguiönæ iñonte waocä tömengä cæningä ontatodē goyæ guii adinque mīni waocabo imīni incæ æcämē pædæ guii pote ænāmaï imaingä. ¹² Cæningä önonganque iñongante waocä iñömö waëmö pönī ingampa, ante adinque guëmanguiönæ i incæte waodäni beyæ cöwē waa cæcæimpa, ante ämo eñëmaimīnipa.

¹³ Äninque ni cömampoingä ingante wæætē,

—Pædæ pompobi, angä.

Eñëninque tömengä pædæ gopodinque æmæmpo bai waa empocä bacantapa. ¹⁴ Adinque edæ Paditeoidi guiquënë wadæ godinque, Æbänö cæte tömengä ingante wænömö wænguingä, ante godongämæ pönëninque tedegadänimpa.

Codito æbänö cæquingä, ante Itaiya nänö apænecainö

¹⁵ Tömënäni, Wænongæimpa, ante pönente tededäni wædinque Itota iñömö wadæ gocantapa. Wadæ goyongä

tæiyænāni tee empo godāni ate wædinque tōmengā godō cæcā ate nē wænæ wænæ inte wæwēnīnāni tōmānāni waa badānitapa.

¹⁶ Ayæ nē waa badīnāni īnānite, Mīnitō, Botō æbodō īmo, ante māo apænedāmaī iedāni, ante wææ angantapa. ¹⁷ Īnīnque Itaiya wodi Wængonguī beyæ nē apæneccā īmaīnō ante nānō yewæmongainō bai īnīnque cætīmpa.

¹⁸ “Wængonguī īmaī ante apæneccampa. Botō īmote nē cæquingā incæcāīmpa, ante botō nē apænte ænongā īñōmō a ongongā aedāni.

Adocā botō nē waadedongā īñongante botō tōmengā ingante adīnque watapæ tobopa.

Botō Ōnōwoca ingante da pōnōmo ænte ēwocadinque botō īmo nē cæcā īñōmō,

Botō nō cæte apænte ancæboīmpa, ante tōmengā oodeoidi īnāmaī īnāni īnānite māo apæneccæcāīmpa.

¹⁹ Incæte tōmengā wīī wæætedō wææte pīincæcāīmpa. Ogæ tededāmaī incæcāīmpa.

Waodāni taadō godīnque tōmengā dicæ Yæ yæ ante tedecā ēñēnāniyaa.

²⁰ Cæwīpa bedē næænīmpa wā tadāmaī īnāni bai waocā wæwengā īñongante tōmengā adobai nē wæwengā ingante wido cædāmaī ingampa.

Ayæ gongapæncade cōmencaguī mīni tente tēmāmoque go adīnque pī ongōmōnāmaī īnāni bai tōmengā adobai waocā wæntæye bayongante tōmengā ingante godō pīināmaī ingampa.

Adocā botō īmote nē cædongā ingaingā inte tōmengā nē Awēnē nānō baganca cōwē nōingā ante apænte ānīnque cōwē waa cæcæcāīmpa.

²¹ Ayæ botō īmote nē cædongā nē Awēnē bacā adīnque wadāni oodeoidi īnāmaī īnāni incæ, Tōmengā ēmōwo beyænque mōnō quēwengæīmpa, ante pōnencædānīmpa,”

ante Itaiya wodi Wængonguī beyæ nānō yewæmongainō bai Itota mōnō Codito ñōwo ponte waa cæcā ingampa.

Wænæ tōnō cæcā īmaingampa, ante wapiticæ ānānīpa

(Māadoco 3.20-30; Odoca 11.14-23, 12.10)

²² Māniñedē wacā wænæ tōnō quēwēnongā inte babetamongā babetadecā badingā īñongante wadāni tōmengā ingante ænte māmōnāni pongā adīnque Itota godō cæcā ate tōmengā awīnca adīnque nē tedecā bacantapa. ²³ Cæcā waa bacā adīnque tōmānāni, Æbānō cæcāā, ante guīñente wædinque, “Awēnē Dabii wodi pæingā wabānō īmaingampa,” ante pōnente wægadānīmpa.

²⁴ Mānōmaīnō ante wædāni ēñēnīnque Pa-diteoidi guīquēnē, “Īñæmpa wænæidi awēnē Beedeboo tōnō nē cæcā īnongā inte Itota wænæidi īnānite wido cæbaingampa,” ante tedewēnānitapa.

²⁵ Wapiticæ tōmēnāni pōnēnō ante ēñente wædinque Itota tōmēnāni īnānite, “Awēnē odeye nempo quēwēnāni īñōmō nāēmæ wæætedō wææte cædāni īnīnque awēnē odeye nānō ōmædempote wæquinque tōmēnāni nāmā ēwente cæbaīnānīpa. Ayæ adocōnē owocabo incæ adoyōmō godongāmæ quēwēnīnāni incæ nāēmæ wæætedō wææte cædāni īnīnque tōmēnāni oncō woquinque nāwæ gobāīnānīpa.

²⁶ Ayæ Tatāna nempo quēwēnāni īñōmō edæ nāēmæ pīīnīnque wæætedō wææte cædinque tōmengā ingante wido cædāni īnīnque Tatāna dicæ tōmēnāni awēnē odeye īmaingāā. ²⁷ Mīnitō, Beedeboo tōnō cædinque Itota wænæidi īnānite wido cæcampa, ante tedewēmīnīpa. Mānīnō mīni ānewēnō nāwangā ī bai mīnitō mīñæ nē godāni guīquēnē æcānō tōnō cæte wido cædānīi. Īnīnque mīnitō mīñæ nē godāni incæ mīni ānewēnō beyænque ante nāēmæ pīīnīnque mīnitō īmīnite wææte apænte ānīnque pīīncædānīmpa anguēnē. ²⁸ Botō īñōmō Wængonguī Ōnōwoca tōnō cæte wænæidi īnānite wido cæbo apa ānewēmīni. Mānōmaī ī īnīnque botō Wængonguī Awēnē Odeye īnōmo inte mīnitō weca do pōmo aedāni,” ante Itota apænegacāīmpa.

²⁹ Ayæ apænedīnque tōmengā, “Nē tæī pīñægā ingante wīī goto wīnīnque waocā ædō cæte tōmengā oncōnē guīite māīncoo ō ængūingāā. Edæ nē ēacā ingante bæi

ongonte goto winte ate pö guite ö ænani bai botö iñömö wænæ inte nê bæi ongonte wido cæbo ïmopa,” angantapa.

³⁰ Ayæ, “Botö tönö æcänö wii godongämæ cæcä iñömö tömengä iñömö edæ Baa ante botö ïmote piinte cæcä ingampa. Ayæ botö, Waodäni botö miñæ poncædänimpa, ante cæyömo waocä botö tönö wii cæcä iñömö tömengä wæætê botö miñæ poncæ cæyönänite tatodongä wadæ godänipa,” ante apænegacantapa.

³¹ Ayæ, “Ïninqe apænebo eñeedäni, angantapa. Mini waocabo wænæ wænæ cæmini incæ Mæmpo Wængongui ingantedö ante babæ ante godö wiwa ämini incæte Wængongui wæætê tömänö beyæ pönö ñimpo cæcä beyænque quëwencæminimpa. Wæætê edæ Wængongui Önöwoca ingante babæ ante godö wiwa ämini ïninqe Wængongui mäninö ante cöwê ñimpo cædämaï incæcäimpa.” ³² Ayæ botö Waobo eñagaimo iñömote botö ïmotedö ante waocä piininqe adodeque angä incæte Wængongui godö ñimpo cæcä ate quëwencæcäimpa. Wæætê botö Tæiyæ Waëmö Önöwoca ingantedö ante æcänö piininqe babæ äna guiquënë tömengä inguipoga nänö quëwengäñedê incæ wæante ate nänö goyedê incæ Wængongui tömengä nänö wænæ wænæ äninö ante cöwê ñimpo cædämaï incæcäimpa,” ante Itota apænegacäimpa.

Awæ æbänö iwæ, ante tömenca bete eñengæimpa, ante (Odoco 6.43-45)

³³ Ayæ waomö mönö cædinö ante awæ incate bai impa, ante odömoncæte ante Itota iïmaï ante apænegacäimpa. “Awæ æbänö iwæ, ante eñencæte ante mönö tömenca tä pete bete eñengæimpa. Awæ waiwæ iwæ ïninqe tömenca wainca incaquiwæ impa. Wæætê awæ baawæ iwæ ïninqe edæ tömenca baaca incaquiwæ iwæmpa, ante eñengæimpa.” ³⁴ Mïmönê mönö pönëmämo eyede tate bai tao godedinque mönö mänimämoque ante pönëninque tedemompa. Ïninqe mïnitö tæntæ pæimïni bai imïni iñömö wiwa cæte quëwemïni inte mïnitö ædö cæte waa ante apænequimïni. ³⁵ Ayæ waa pönï mäincoo da wente ate

tadonte ænani bai cædinque nê waa cæcä iñömö mïmönê waa pönï nänö entawëninö ante pönëninque waa pönï tedete waa cæcampa. Nê wiwa cæcä guiquënë mïmönê wiwa nänö entawëninö ante pönëninque wiwa tedete wænæ wænæ cæcampa.”

³⁶ “Edæ apænebo eñeedäni. Wængongui tömengä nänö apænte anguiönæ ïninqe, Mänine quïnante önonque tedebitawo, ante angä eñëninque mïni waocabo edonque apænequënemïni imïnipa. ³⁷ Ïninqe mïni tedepämo tömämämo ante Wængongui apænte äninque edæ pancamïniya imïnite ñimpo cædinque edæ pancamïniya imïnite, Mïni panguinque tedewëmïnipa, ancæcäimpa,” ante Itota apænegacäimpa.

Mä cæte odömömi amönie, ante änänipa (Mäadoco 8.11-12; Odoco 11.29-32)

³⁸ Apænegä eñëninque nê odömönäni tönö Paditeoidi pancadäniya Itota ingante apænedinque,

—Awënë nê Odömömi eñëmi. Pönencædänimpa, ante mä cæte bitö odömönö ante mönitö äinente wæmönipa.

³⁹ Äñönäni Itota wæætê,

—Mïni nê wiwa cæcabo inte Wængongui ingante emö cæte pangote bai mïni wadæ godincabo iñömö mïnitö, Mä cæte odömömi adinque pönëmaïmönipa, ante ancaa ämini awædö. Näwangä ämo eñeedäni. Nöwomïni imïnite mä cæte odömönämaï ingæimpa. Cönäö wodi beyæ nänö cægäinö ante edæ mäninqe mïni aquinque cæcæimpa änewëmïni. ⁴⁰ Mëönaa go adoönæque ïninqe gæyæ cæncadê Cönäö wodi nänö ongongaï bai edæ botö adobaï Waobo eñagaimo inte edæ mëönaa go adoönæque adopoönæ wao wodido ongoncæboimpa. ⁴¹ Cönäö wodi Wængongui beyæ apænegä eñëninque Nïnebaidi wænæ wænæ nani cægäinö ante ñimpo cædinque Wængongui gämænö pongadänimpa. Cönäö wodi wædangä ïñongante botö nê ñænæmo inte nö ante apænebo eñëninque mïnitö wæætê eñënämaï imïnipa. Ïninqe Nïnebaidi Wængongui gämænö nê pongäinäni incæ Wængongui nê apænte angä weca pöninqe mïni ñöwo quëwencabo tönö godongämæ gongænte ongöninqe,

Mini panguinque eñenāmaī ingaminimpa tōō, ante apænte piinānidō anguēnē.

⁴² “Ayæ adobaī betamonca gāmænō ömæ awēnē onquiyængä iñömō awēnē Tadömōō wodi nanguī eñente nānō apænedō ante eñencæte ante doönæ quēwēninque pongacāimpa. Tadömōō wædænque eñengä iñongante botō godömenque nanguī eñemo inte mīnitō weca ongōñömote mīnitō iñæmpa wīī eñēmīnīpa tōō. İninque māningä onquiyængä incæ Wængonguī nē apænte angä weca pōninque mīni ñöwo quēwencabo tönō godongāmæ ongōninque, Mīni panguinque eñenāmaī ingaminimpa tōō, ante apænte piincæcāimpa,” ante Itota apænegacāimpa.

Wēnæ waodē owote godingä inte adodō pongampa, ante (Odoca 11.24-26)

⁴³ Ayæ apænedinque Itota iīmaī ante apænecantapa. “Wacä baönē owote ate tao godinque wēnæ iñömō edæ, Quingänō baönē go guidinque edæ guēmante quēwenguimoo, ante diqui diqui minte ayongä önömæca to aminte i ate wædinque edæ, ⁴⁴ ‘Botō tao godincönē adodō go guite quēwencæboimpa,’ ante pōnēninque adodō pongampa. Ponte ayongä waocä önonganque bayongante wacä önöwoca tömengäa owodāmaī ingä adinque wēnæ wæætē, Æ waocä botō owodincö bai inongä inte ñöwo önonconque bai wadæ ñēmænte māincoo cabo tē gæte bai ömæwocacä ingä abopa. ⁴⁵ Ante adinque tömengä wæætē godinque wēnæidi godömenque wīwa cædāni tiæte ganca mānimpodāni inānite ænte pongampa. Tömēnāni tömānāni waocä baönē godongāmæ pō guite owodāni ate waocä iñömō wēnæ yewæninque godömenque wæwengampa. Ñöwomīni guiquēnē wīwa mīni cæcabo adobaī bate wæwencæmīnīmpa,” ante Itota apænegacāimpa.

Itota badä tönō tömengä biwīidi (Mäadoco 3.31-35; Odoca 8.19-21)

⁴⁶ Itota oncönē a ongōninque nanguī ināni inānite apæneyongä tömengä nānō biwīidi tönō tömengä wäänä tömengä ingante bee tente apænecæte ante oncodo ponte a

ongönāni. ⁴⁷ Adinque wacä añecæ ponte apænecantapa.

—Bitō badä bitō biwīidi bitō imite apænecæte ante oncodo ponte yabæque ongönānīpa cæbīi.

⁴⁸ Añongante Itota wæætē,

—Botō badä ædänō inää ante ämoo. Ayæ botō biwīidi ædānidō inānīi ante ämoo, ante pōnēmīnīi.

⁴⁹ Äninque, Itota tömengä miñæ nē godāni gāmænō oo cæmōninque,

—İnāni iñömō botō badāidi botō biwīidi inönāni inānīpa, ante mænōmānō ämo abāimīnīpa. ⁵⁰ Mönō Mæmpo öönædē nē quēwengä nānō änō bai eñente æcänō cæte quēwēna māningä edæ botō biwī ingampa. Māningä botō biwinque ingampa. Mānīnā botō badä inampa, ante pōnencæboimpa, ante Itota apænegacāimpa.

13

Waocä nānō quiyadō ante odömönte apænecampa

(Mäadoco 4.1-9; Odoca 8.4-8)

¹ Māniönæ edæ Itota oncodo tao godinque gāwapæ wedeca godinque tæ contagacāimpa. ² Tömengä nānō tæ contate ongōñömō nanguī ināni tömāo goto ponte ongönāni adinque tömengä wæætē wipodē go guite tæ contate wāi wocænte owoyongä tömēnāni ayæ gāwapæ yæwedecaque ömaaque ongönānitapa. ³ Ayæ ömaaque ongönāni inānite apænedinque tömengä, Wængonguī Awēnē nempo quēwēninque æbänō cæquīi, ante eñencæmīnīmpa, ante botō imæca quēwēnāni nāni cædönō ante odömönte apænebo eñēedāni.

Äninque Itota nanguī apænecantapa. “Wacä nē quiyacä iñömō quiyacæ go-campa. ⁴ Gote quiyayongä pancamonga taadō iñömō wææmōmpa. Taadō wæænte eyepodimō öñöñonte ayamōidi pōninque dobæ ade cænānīpa. ⁵ Pancamonga guiquēnē dicamontaa onguipoi woyedömō iñömō eyepote wææmpa. Onguipoi woyedömō öñömō inte pæquināmaī quingæ tā bocate pædinque æmonga æipa. ⁶ Edæ guingo icate æmæwo nāñe wæmpa. İninque oguimento yæyæmē guiwadāmaī inte cōñe bawadāmaī iñönte nænque ti nāwāñö wānā

cacadinque edæ guingo icate nãne wæmpa. ⁷ Pancamonga guiquënë ömentacodë nãno eyepodimö iñomö pæquinämaï tä bocate gä æiyonte ömentacoo pö incootonque ganta cæca ate nãne wæmpa. Wampo incapa pæquii. ⁸ Waëmonguipoga quiyadimö guiquënë tä bocate waa pædinque tömëmö nanguï pöni incapa. Incate pancawæncaa tiëë ganca, pancawæncaa tetenta ganca, pancawæncaa todëinta ganca mänimpomö incapa. Quiyacä nãno quiyadö ante edæ botö mäninque ante apænebopa. ⁹ Eämonca ongonte eñëedäni,” ante Itota apænegacäimpa.

Önömoncaque eñente pönënamäi inänipa, ante

(Mäadoco 4.10-12; Odoca 8.9-10)

¹⁰ Ayæ tömengä miñæ në godäni tömengä weca ponte apænedinque, Itota eñëmi. Bitö tömënäni inänite inguipoga quëwënäni nãni cæinö ante odömöninque quinante mäninque ante odömonte apænebitawo.

¹¹ Äñönänite Itota, “Öönädë Awënë Odeye nempo æbänö quëwenguüi, ante mini waocabo wëenëhedë mini eñënamäi ingainö ante botö ñowo minitö iminite pönö edonque apænebo ate minitö adomïnique në eñëmini bamïnipa. Wæætë tömënäni inänite guiquënë botö mäninö ante godö apænedämaï imopa. ¹² Edæ në eacä ingante godönäni nãno godömenque æi bai botö në eñengä ingante godö apænebo ate tömengä godömenque waa pöni eñente bacæcäimpa. Wæætë në ömæpocä inongä ingante wædænque nãno eadï incæ ö ænãni bai në eñënamäi ingä guiquënë adobai wædænque nãno eñënö incæ ö ænte bai ewente bai baquinö anguënë. ¹³ Incæte edæ awincaque adinque në adämaï inäni inte tömënäni önömoncaque eñëninque në eñënamäi inäni inte pönënamäi inänipa. Inique botö, Wængonguï Awënë nempo æbänö quëwenguüi, ante eñënamäi incädänimpa, ante cædinque imæca quëwënäni nãni cæinonque ante odömonte apænebopa, angantapa. ¹⁴ Edæ Wængonguï beyæ apænedinque Itaiya wodi iïmaï ante nãno yewæmongainö bai ñowo quëwënäni incæ inque cädänipa.

‘Nawangä eñencæte ante cædinque minitö önömoncaque eñëninque pönënamäi imini inte eñënamäi incæminimpa.

Nawangä acæte ante cædinque minitö awincaque adinque wæætë pönënamäi imini inte adämaï incæminimpa.

¹⁵ Mäninäni, Wii ainëwædö, ante awinca mönæ guimonte bai cædinque,

Önömonca wii eñëinëwædö, ante tee mömoncate bai cædinque,

Mimönë wii pönëinëwædö, ante mimö ömädë inäni inänipa.

Wii mänömaï i bai tömënäni awinca adinque

önömonca eñëninque mimönë pönencädönänimpa.

Ayæ tömënäni nãni waa baquinque edæ dadi emæninque botö gämænö poncädönänimpa.’

Ante Itaiya wodi nãno angainö bai inque cætimpa,” ante Itota apænegacäimpa.

¹⁶ Ante Itota tömengä miñæ në godäni inänite apænecantapa. “Minitö guiquënë awinca do adinque önömonca do eñëninque mini toquinque impa. ¹⁷ Nawangä ämopa. Wængonguï beyæ në apænegainäni tönö në nö cægainäni tönö ñowo mini adö ante nanguï ainente wædäni incæte adämaï ingadänimpa. Ayæ mini ñowo eñënö ante nanguï eñëinente wædäni incæte eñënamäi ingadänimpa,” ante Itota apænegacäimpa.

Quiyacä nãno cædö ante pönente iïmaï impa

(Mäadoco 4.13-20; Odoca 8.11-15)

¹⁸ Itota ayæ tömënäni inänite godömenque apænecantapa. “Mänii quiyacä nãno quiyainö ante apænedinque botö, Wængonguï Awënë ingante æbänö eñenguüi, ante odömoncæte ante apæneyömo minitö eämonca ongonte eñëedäni, angantapa.

¹⁹ Awënë Wængonguï Odeye nempo æbänö cæte quëwenguüi, ante mönö apænedö ante önömoncaque eñëninque waocä mimöno pönënamäi ingä inique tömengä mimöno nãno eñëninö incæ wënæ në wiwa cæcä inongä inte pö ö ængampa. Mäningä në pönënamäi ingä iñomö taadö wedeca eyepodimö bai ingampa.

²⁰ Woyedömö dicamontaa eyepodimö bai ingä guiquënë tömengä Wængonguï nãno apænedö eñëninque quingæ Ao ante watapæ tocampa. ²¹ Ayæ ate adocä incæ

tömëmö woyedömö bai oguimento yæyæmë guiwadämaï bai ingä inte wantæ iñö quëwengampa. Wængonguï nänö apænedö beyæ piinani wæyongä tömengä ingante wënæ wënæ cæcæte ante togænäni ate wædinque tömengä guïñente wædinque edæ ëmö cæte gocampa,” angantapa.

²² Ayæ, “Ömentacodë wæænte pædimö bai ingä guiquënë tömengä ëñëninque godömenque quëwëñongä inguipoga quëwente quïëmë beyænque mönö wæpämö pöninque ayæ, Mäincoo beyænque toquïmo, ante nani oda cæte wæwëmämö pöninque ömentacoo ñancate cæ bai cæyonte Wængonguï nänö apænedinö incæ incadämaï bai bapa. ²³ Onguipoga wainguipoga quiyadimö bai ingä guiquënë tömengä Wængonguï nänö apænedö ëñente wede pönëninque edæ tömëwæ incate bai Wængonguï beyæ nanguï cæcampa. Pancadäniya edæ tiëë ganca incate bai nanguï cædänipa. Wadäni guiquënë tetenta ganca incate bai cædänipa. Ayæ wadäni todëinta ganca incate bai cædänipa,” ante Itota apænegacä ëñënanitapa.

Waimö tönö ömentacoo quiyate pæmö ante odömongampa

²⁴ Ayæ wæætë inguipoga quëwënäni nani cæinö ante odömöninque Itota godömenque apænegacäimpa. “Öönædë Awënë Odeye iñömö gönea tömëmö waimö në quiyacä bai ingampa. ²⁵ Tömengä quiyate gocä ate waodäni mö ñöñönäni wacä në piinte cædongä inte wæætë tömengä nänö quiyadiñömö awëmö ponte, Ömentacoo pæcæimpa, ante adoyömö pönö ni quiyate wadæ gocä. ²⁶ Ate waimö tänä nä bocate waiwæ pædinque tömëmö incayö adoyömö tæcæguedë ömentacoo pæ. ²⁷ Adinque në cædäni guiquënë në ëacä weca pöninque, ‘Awënë, bitö gönea quiyadiñömö tömëmö waimö minämaï imitawo. Ædönö ponte ömentacoo adoyömö pæ, ante wæmönipa.’ ²⁸ Ante añönäni, ‘Wa. Mönö piinte änongå cæbaingampa. Wabänö ii.’ Ante pönëñongä tömënäni, ‘Inique bitö ämi godinque abæ wiquïmöni, ämitawo.’ ²⁹ Änani ëñëninque në ëacä wæætë edæ, ‘Iñæmpa mänömaï cæmini inique waiwæ tönö ömentacoo guëa abæ

wite babaimpa. ³⁰ Inique munitö ñöwo edæ ömæ widämaï inte to amiña peganca ee amini guëa pæcæimpa. Amiñayedë edæ në pedäni inänite botö, Ömentacoo täno të gæte topo cæte iya täninque tömëmö waimö guiquënë tä pete mämö ñönöedäni, ancæboimpa,’ ante në ëacä apænegacampa.” Mänömainö ante odömoncæte ante Itota apænegacäimpa.

Möotatamö guidimö ante odömonte apænegacampa

(Mäadoco 4.30-32; Odoca 13.18-19)

³¹ Ayæ wæætë inguipoga mönö adö ante odömöninque Itota godömenque apænedinque, “Wacä möotatamö tömëmö ænte mäo tömëmoncodë quiyacä bocate pæ aminitawo. Mänimö guidimö inte ñænæ pæ bai Wængonguï Awënë Odeye nempo mini quëwencabo iñömö adobaï yebænte pæpa. ³² Edæ möotatamö mini ænte quiyamö guidimö pönö i bai wamö mini quiyamö adomonque incæ adobaï guiyämö pönö i iñömö edæ dæ ampa. Incæte möotatamö iñömö tä bocate pædinque möotatawæ edæ ocäñequi doyæ pæwæ bapa. Wii tömäa ocäñequi mini quiyadiwæ bai edæ ocäa inämaï inte möotatawæ iñömö edæ ñænæ awæ i adinque ayamöidi ponte awænëmæ ongönänipa. Möotatamö guidimö incæ mänömaï pæ bai Wængonguï Awënë nempo quëwënäni iñömö wædænque inänäni incæ nanguï yebænguïnäni inänipa,” ante odömöninque Itota apænegacäimpa.

Päo yedæ æmpoquï da wenguï ante odömonte apænegacä

(Odoca 13.20-21)

³³ Ayæ wæætë inguipoga quëwënäni nani cæinö ante odömöninque Itota godömenque iïmaï ante apænegacantapa. “Päo yedæ æmpocæimpa, ante onquiyängä ñænængade tee manguincade ænte tee mäninque ædäna nani ämö ænte mepoga go adopoque da wëninque ayæ yedæ æmpoquï ænte pönö da wëninque wempo wempo ædæmö cædengä ate päömo yedæ æmpote tömäo näämænta bapa. Yedæ æmpote ate päömo tömäo näämænta ba bai öönædë Awënë Odeye nempo mini quëwencabo iñömö tömämini

nö eñente bamīnīpa,” ante odömōnīnque Itota apænegacāīmpa.

Inguīpoga nāni cæī bai īmpa, ante Itota odōmongampa

(Mäadoco 4.33-34)

³⁴ Nanguī īnāni mānīñōmō ongōnāni īñōnānīte Itota inguīpoga quēwēnāni nāni cæīnō ante odömōnīnque mānīnque ante tōmēnāni īnānīte apænecantapa. ³⁵ Edæ Wængonguī beyæ nē apænegaīngā īīmāīnō ante doyedē apænegacāīmpa.

“Wængonguī æbānō cæcāā, ante botō inguīpoga quēwēnāni nāni cæīnō ante odömōnīnque botō īñæ ænete apænecæboīmpa.

Wængonguī nānō badongāīñedē ayæ godōmenque ñōwo ganca nānō wē wodonte eñengāīnō ante botō ñōwo apænecæboīmpa,” ante docā nānō angāīnō bai ñōwo īñōmō īīnque cæquinque Itota odōmonte apænegacāīmpa.

Ömentacoo ante īīmāī ante īmpa

³⁶ Ayæ nanguī īnāni īnānīte emō cæte godīnque Itota oncōnē pō guīcā adīnque tōmengā mīñæ nē godāni guīquēnē tōmengā īngante māmō ānānītapa. Gōnea ömentacoo quīyadīncoo ante apænedīnque bitō æbānō ante odōmoncæte ante apænebīī. Edæ edonque apænebi eñēmōnīe.

³⁷ Āñōnānīte tōmengā, “Tōmēmō wāīmō nē quīyadīngā botō ānīngā īñōmō botō Waobo eñagāīmo īnte mānīngā bai īmopa. ³⁸ Gōnea botō ānīñōmō bai īnguīpo īmpa. Tōmēmō wāīmō botō ānīmō bai īnāni guīquēnē Awēnē Odeye īngante nāni eñencabo īnānīpa. Ömentacoo botō ānīncoo bai īnāni guīquēnē wēnæ īnte nē eñēnāni īñōnāni ³⁹ nē pīīnte quīyacā botō ānīngā bai īñōmō edæ wēnæīdī awēnē īngampa. Amīña bai guīquēnē inguīpoga īīnque bayedē īngæīmpa. Ayæ amīña tā pete bai cædāni guīquēnē Wængonguī anquedoidī īnānīpa.”

⁴⁰ “Īnīnque edæ nāni amīña bayedē ömentacoo tē gæte topo cæte nāni īya tāī bai edæ adobāī īīnque bayedē baquīnō anguēnē. ⁴¹ Mānīñedē edæ Waobo eñagāīmo īnte botō anquedoidī īnānīte āmo pōnīnque tōmēnāni gōnea īñōmō ömentacoo tē gæte

bai cæcædānīmpa. Botō nempo quēwēnāni pancadānīya oda cæte eñēnāmaī cædānīpa. Īnīnque, Oda cæcædānīmpa, ante nē cædāni tōnō nē eñēnāmaī cædāni tōnō tōmānāni īnānīte botō anquedoidī īñōmō abæ wīte bai tē gæte māo, ⁴² gongapamō nāni āmogate Ca ca wæyōmō wīdo cæcædānīmpa. ⁴³ Mānīñedē edæ nē nō entawēmīni guīquēnē mōnō Mæmpo Awēnē Odeye īñongā tōmengā nempo nē quēwēmīni īñōmō edæ nænque tamō guīnæ gongæ bai adobāī guīnæ edæ gongæncæmīnīmpa. Ēamonca ongonte eñēedāni,” ante Itota angacāīmpa.

Wæmoncoo wē wodonte māīncoo, ante

⁴⁴ Godōmenque odömōnīnque Itota īīmāīnō ante apænecantapa. “Öönædē Awēnē Odeye nempo mīni quēwēncabo īñōmō wæmoncoo onguīpodē ææ wote nāni wē wodonte māīncoo bai īmpa. Waocā gote māīncoo adīnque adodō ææ wote ænīnque wayōmō wē wodongampa. Wodonte ate tōmengā watapæ todīnque tōmengā ēadīncoo tōmancoo godonte eyepæ ænīnque tōmengā wæmoncoo nānō wē wodōnīmæ æncæte ante omæ nē ēadīngā weca do godīnque mānīmæ tōmāmæ beyæ ante edæ eyepæ pædæ godōnīnque ængampa. Waocā mānōmaī tōmengā ēadīncoo tōmancoo nānō godōnī bai cædīnque öönædē Awēnē Odeye īñōmō, Botō nempo quēwēncæmīnīmpa, ante tōmengā Wēñængā īngante eyepæ godōnīnque inguīpoga tōmāo quēwēnāni īnānīte ængacāīmpa,” ante Itota apænegacāīmpa.

Wamō adomonque pōnī wæmō īmō ante

⁴⁵ Ayæ godōmenque, “Öönædē Awēnē Odeye nempo guīcæte ante cæcā īñōmō wæmoncoo pededamō nāni āmoncoo godonte æncæte ante nē dīquī dīquī mīngā bai īngampa. ⁴⁶ Īnīnque wamō pededamō nānō æīnēnīmō adomonque wæmō pōnī ī ate tæcæ adīnque waocā wadæ gote tōmengā nānō ēadīncoo tōmancoo godonte eyepæ ænīnque wæætē mānīmō wamō īncæ godonte ængampa,” ante Itota odōmonte apænegacāīmpa.

Dīcamōñcæ ante odōmonte Itota apænecampa

⁴⁷ “Ayæ wæætē edæ, Öönædē Awēnē Odeye iñömō edæ dicamōñæ gāwapæ nāni dadōi bai tōmāā gæyæidi ænte bai cæcampa. ⁴⁸ Dicamōñæ eyede dadōninque yæwedeca wēā manta cōnōninque tæ contate apænte adinque, Nāwāaquiringā i, adinque ö æ otodē da wēninque, Baacā i, adinque wido cædāni bai Wængongui Awēnē adobai cæquiringānō anguēnē. ⁴⁹ Edæ iinque bayedē Wængongui anquedoidi pōninque nē nō cædāni inānite apænte æninque nē wiwa cædāni inānite adinque nānēnē gōnongā ⁵⁰ ongōñōnānite gongapamō edæ guitodongā guicædānimpa. Tömēnāni edæ māniñōmō guiite ongōninque āmogate wædinque Ca ca wæcædānimpa,” ante Itota odōmonte apænegacāimpa.

Waëmoncoo incæ mīincoo tōnō pedæncoo ante

⁵¹ Māniñō ante iinque odōmonte apænedinque Itota tōmēnāni inānite,

—Botō odōmonte apænedō tōmānō ante edonque eñēmīnitawo.

Åñongante,

—Ao eñentamōnipa.

⁵² Ante apænedāni eñēninque tōmengā apænegacāimpa.

—Iinque æcānō, Öönædē Awēnē Odeye æbānō cæcāā, ante ædæmō eñēninque nē odōmonte apænedā i tōmengā iñömō waëmoncoo nē da wente mangā bai adobai inongā inte Wængongui nānō ānō ante entawengā ingampa. Ayæ edæ nē ēacā nānō da wēnincade wi ænedinque mīincoo tōnō pedæncoo tadonte odōmongā bai nē odōmonte apænegā iñömō adobai cæcampa. Edæ doyedē nānō eñēnō incæ ñōwo nānō eñēnō incæ mīmōnē waa pōni nānō entawēnō ante edonque odōmonte apænegacāampa, ante Itota māninque ante idæwaa apænegacāimpa.

Nātatadeta iñömō ponte Itota apænegacāampa (Māadoco 6.1-6; Odoca 4.16-30)

⁵³ Wængongui Awēnē æbānō cæcāā, ante odōmoncæte ante imæca quēwēnāni nāni cæinō ante nānō odōmōniñō tōmānō ante iinque apænedinque Itota wadæ gocantapa. ⁵⁴ Tōmengā nānō pægañōmō ponte tōmēnāni odōmōincōnē pō guidinque māniñōmō quēwēnāni inānite odōmonte

apænegacāampa. Eñēninque tōmēnāni anca iñēninque,

—Iingā iñæmpa, æbānō cæte nangui eñengā ingāā, ānānitapa. Tōmengā edæ æbānō cæte tæi piñæninque bamōnengæ cæcāā, ante eñencæte ante wæmōnipa.

⁵⁵ Iingā iñæmpa awæmpa nē timōwengā wengā imaingā inte bamōnengæ mānōmāi cæcampa, ante awædō. Tōmengā wāānā emōwo Māadiya ingampa, ante awædō. Tōmengā biwīdi onōnānique Tantiago tōnō Ootee, Timōnō tōnō Codaa ināma iñānitawogaa. ⁵⁶ Tōmengā biwinqueidi mōnitō tōnō tōmānāni ongōnāni aedāni.

Iinque tōmengā wæætē æbānō cæte nangui eñengā badinque edæ nangui cæcāā.

⁵⁷ Ante pōnente wædinque tōmēnāni tōmengā beyæ ante piinte badānitapa. Piinte badāni adinque Itota tōmēnāni inānite angantapa.

—Iñæmpa Wængongui beyæ nē apænegā iñömō tōmengā tōmāmæ gote apæneyongante tōmengā ingante waa adānipa. Wæætē tōmengā nānō pægañōmō pōninque oncōnē pō guiite apæneyongā edæ māniñōmonque tōmengā ingante wiwa adānipa tōō, ante apænegacāimpa.

⁵⁸ Incæte, Pōnēnāma iñōnānite botō ædō cæte nangui mā cæquimoo, ante pōnente wædinque tōmengā tōmēnāni weca edæ wædænque pōni cægacāimpa.

14

Wāō æpcēnē nē guidōnongā wængampa (Māadoco 6.14-29; Odoca 9.7-9)

¹ Tōmānāni māniñedē, Itota æbānō cæcāā, ante māo ānāni eñēninque pancabaa awēnē Edode do eñengacāampa. ² Tōmengā iñömō tōmengā ingante nē cædāni inānite apænegacāampa. “Wāō wodi æpcēnē nē guidōningā incæ iingā Itota iñömō adocā inte a ongongā awædō. Tōmengā do wænte ñāni omæmōninque pongampa tōō. Māniñō beyænque tōmengā tæi piñænte entawēnongā inte nē nangui cæcā ingampa,” ante awædō, angantapa.

³ Wāō wodi iñömō iīma i wængacāampa. Do iñedē awēnē Edode iñömō tōmengā biwī Pedipe manguiwēningā Ædodiya ingante ö ænte mōningā inongāimpa. Māningā Ædodiya

Wäo ingante püingä beyænque Edode iñömö Wäo ingante bæi ongonte goti winte tee mönedongäimpa. ⁴ Edæ Wäo iñömö nänö caate wænguine Edode ingante iimainö ante do wææ äningä inongäimpa. “Edode eñëmi, bitö Wængongui nänö angainö bai eñënamai inte edæ mäningä onquiyængä ingante manguiwëmipa töö,” ante cöwë wææ äningä inongäimpa.

⁵ Angä eñente piinque Edode, Wäo ingante botö æbänö cæte wænonguimo, ante cædongäimpa. Incæte tömänäni, Wængongui beyæ nê apænedongä Wäo ingampa, ante tededäni eñëningä inte Edode, Botö imote piinäni wæcæ wæ, ante guñente wædinque Wäo ingante wænönämai inte ata cæpodongäimpa. ⁶ Incæte Edode nänö eñagäionæ iinque bayö wadäni ponte godongämæ bete ayönäni edæ Ædodiya wengä baquécä tode pete äwacä adinque Edode wæætë nangui todongäimpa. ⁷ Iinque tömengä, Wængongui ayongä näwangä ämopa, ante baquécä ingante ämongäimpa. Waa pöni bitö tode pete äwadi beyæ bitö quiëmë ante æinente ämi adinque botö bitö änö ante cöwë pönömo æncæbiimpa, ämongäimpa. ⁸ Angä eñëninque baquécä wæætë wäänä weca gote, Æbänö anguimoo, ante äñongä wäänä guiquënë, iimai æe, angä eñëninque baquécä wæætë Edode ingante,

—Iimai pönö cæbi æmoe. Wäo æpænë guidönongä ingante wangö tamencate tömengä ocabo ini coyomænætaca cö cæte ænte mämö pædæ pönömi æmoe.

⁹ Angä eñente wædinque awënë odeye iñömö, Æ eñente awädö. Quinö ñowo cæquimoo, ante nangui wædongäimpa. Incæte godongämæ becönäni eñëñönänite, Wængongui ayongä cöwë godoncæboimpa, ante nê äningä inte nê wænongä ingante tömengä, Baquécä nänö äninö bai cædäni, ämongäimpa. ¹⁰ Angä eñëninque nê wænongä tee möneincönë go guidinque edæ Wäo ingante mäo bæi ongöninge wangö tomencadongäimpa. ¹¹ Ayæ Wäo ocabo ini coyomænætaca cö cædinque baquécä weca ænte mämö pædæ pönönäni æninque baquécä wæætë wäänä inante godongä ænönäimpa.

¹² Ayæ Wäo wodi tömengä miñæ nê godinäni pöninge tömengä baö ini ænte mäo daga wëninge wæætë Itota weca pöninge, Wäo wodi mänömai wængä wæmönipa, ante tömengä ingante apænegadänimpa.

5.000 ganca inäni inänite Itota godongä cænänipa

(Mäadoco 6.30-44; Odoca 9.10-17; Wäo 6.1-14)

¹³ Wäo wodi do wængäimpa, ante apænedäni eñente wædinque Itota wæætë edæ, Önömæca gocæboimpa, ante wipodë gui contate wogaa gocantapa. Gocä ate, Mäniñömö gocæ cæcampa, ante tededäni eñëninque tæiyænäni tömënanäni nani quëwëñömö wacönë ta wacönë ta ömaaque oo pænta täno gote mä ongönänitapa. ¹⁴ Itota iñömö wipodë wogaa pö ti wæænte ayongä nangui inäni dobæ ponte mä ongönäni adinque, Æbänö cæte quëwëñönänii, ante tömënanäni tönö godongämæ wæte bai pönengantapa. Ayæ daicawo gawænäni inänite godö cæcä ate waa badänitapa. ¹⁵ Gäwadecæ bayö tömengä miñæ nê godäni tömengä weca pöninge, —Ñowo wëmö bacæ cæpa cæbii, änänitapa. Ayæ, Önömæca incæ cænguï dæ ä adinque bitö godongämæ ongönäni inänite ämi waodäni quëwëñömö gote cænguï godonte ænte cæncædänimpa.

¹⁶ Äñönänite Itota,

—Goquinäni, ante quinänte äminii. Minitö wæætë godömini cæncædänimpa, ämopa.

¹⁷ Äñongante,

—Iñæmpa päö önompo æmæmpoque gæyæ mäa pöni i. Cænguï nææmönipa diyæ godömöni cænguïnänii.

¹⁸ Ante wææ äñönäni Itota iñömö,

—Mänimpodänique nææmüni incæ ænte mämö pædæ pönömini æmoedäni, angantapa.

¹⁹ Ayæ godongämæ mä ongönäni inänite angä gaguimäa tæ contadäni ate tömengä päö önompo æmæmpoque gæyæ mäa æninque öönæde inö æmö adinque, Wængongui, bitö waa pönömi ænte cæmönipa. Ante apænedinque päö pä æ pä æ cædinque tömengä miñæ nê godäni inänite pædæ pönongä æninque

tömänäni wæætē godōmenque tōmänäni inänite di mæñæ di mæñæ cædäni ænte cænänitapa. ²⁰ Mänōmaï pönō cæcä æninque tōmänäni tōmo pōni cænänitapa. Cænte ate edæ tōmänäni ao mæ ao mæ nāni ñönōni ee õñoncoo pædæ wææmpo ö æ da da wente æninque tōmengä miñæ nē godäni iñōmō otodē õnōmpo tipæmpoga go mentodēa cænguï eyede da wēnāni contagatimpa. ²¹ Nē cænāni iñōmō edæ onguiñænānique incæ tinco miido ganca mānimpodāni iñōnāni onquiyænāni tönō nāni wencabo tönō godōmenque nanguï ināni inte cængadānimpa.

*Itota æpæ yædopæno dao dao gocampa
(Mäadoco 6.45-52; Wäö 6.16-21)*

²² Tömänäni iinque cænāni ate Itota tōmengä miñæ nē godānique inänite do angantapa. Minitō tāno wipodē guï contate æmæ wedeca tao goyōmīni botō wæætē godongāmæ ongönāni inänite ämo godāni ate ayæ poncæboimpa. ²³ Angä Ao ante tao goyönāni tōmengä wæætē wadāni inänite, Nōwo goedāni, angä wadæ godānitapa. Ayæ tōmengä Wængonguï ingante apæ necæte ante ānanquidi æcantapa. Æite apænedinque wēmō bayō tōmengä adocanque a on-gongacäimpa. ²⁴ Tōmengä miñæ nē godāni guiquēnē taocæte ante cædinque edæ tæcætibæ wiyate cæwoyönāni edæ woboyæ pæmænte nanguï pōñō edæ æpæ incæ incæ cæte mængonta mængonta cæyonte wipo wāi wocæntapa. ²⁵ Ayæ tawadiya nānō peyedē bayonte edæ Itota iñōmō æpæ yædopænoque edæ dao dao pongä adānitapa. ²⁶ Yædopæno edæ dao dao pongä gomō adinque tōmengä miñæ nē godāni edæ ancai guïñēninque,

—Quiēmē imāi. Waocä wænte babæningä wabānō cægongä, ante Yæ ante guïñente wædānitapa.

²⁷ Ante wæyönāni edæ Itota iñōmō,
—Ee piyænē cæte guïñēnāmaï iedāni. Botō imo apa guïñewēmīni.

²⁸ Ante añongä, Pegodo guiquēnē,
—Awēnē, bitō imitawo. Nō nō imi inte bitō æpæ yædopæ bitō weca ämi pōmoe.

²⁹ Angä eñēninque,
—Pöe.

Añongä Pegodo wipodē ongöninque edæ ti wææninque yædopæno edæ dao dao gote Itota weca tæcæ obo ponte ayongä, ³⁰ woboyæ nanguï nanguï pæmæ ate wædinque ancai guïñēninque æpænē tæi guïidinque Yæ wæcantapa.

—Awēnē, æpæ bete wæncæbointaye.

³¹ Ante wæcä adinque Itota tōmengä ingante edæ quingæ pædæ gopo tōö æmæninque,

—Iñæmpa botonque iñōmote pönēninque pöe, antabopa. Quinante wapiticæ edæ pönēmitapa, angantapa.

³² Ayæ wipodē guïda ate woboyæ iñontobæ næ pæmænāmaï gongæ.

³³ Adinque wipodē ongönāni wæætē Itota weca ædæ wæænte apænedinque,

—Nawangä bitō Wængonguï Wēñæmi inōmi imipa, ante watapæ apænedānitapa.

Caate wædäni inänite Itota cæcä waa badānipa

(Mäadoco 6.53-56)

³⁴ Ayæ æmæmäa taodinque tōmänäni Guënetadetebæ ti wæænänitapa. ³⁵ Ti wæænāni adinque māniömæ quēwēnāni guiquēnē, Tōmengä Itota ingampa, ante do adinque tōmāmæ mæo gode ä gode ä cædäni eñēninque wēnæ wēnæ ināni inänite tōmänäni inänite tōmengä weca ænte māmönāni pönänitapa. ³⁶ Itota ingante, Bitō weocoo ämi yæwedecoque gampote waa bacædānimpa. Änāni wædinque tōmengä Ao angä eñēninque nē gampo gampo cædäni iñōmō tōmänäni edæ waa ināni bagadānimpa.

15

Mimōno tao godi beyænque waocä wentamō ewocacampa

(Mäadoco 7.1-23)

¹ Dodāni nāni wææ angainta ate nē odömönāni tönō Paditeoidi pancadāniya Eedotadēe quēwēninque māniñedē Itota weca pöninque iimāi änänitapa.

² —Bitō miñæ nē godāni iñōmō dodāni nāni angainō ante quinante eñēnāmaï inte wapiticæ cædäni wæmönipa. Tömänäni iñæmpa mempodāmaï inte wentamō nam-pote cænguï cænāni awædō.

³ Ante piināni wædinque Itota wæætē,

—Minitö guiquënë dodäni nāni angainonque ante eñente cæcæte ante cædinque Wængongui nānō wææ angainō ante edæ quinate eñente cædāmaï iminii. ⁴ Wængongui, “Bitö wæmpo ingante bitö badä inante waadedinque waa cæe,” angacäimpa. Ayæ, “Wæmpocä ingante wäänä inante nē piinte wiwa angä ingante wænömini wæncæcäimpa,” ante wææ angacäimpa. ⁵ Minitö guiquënë iïmaï anewëninque edæ wææ cæminipa. Waocä mæmpocä ingante waa cæquënegä iñongante wäänä inante adobai waa cæquënegä iñongante minitö wæætē wææ äninque, Waocä wæmpocä ingante wäänä inante iïmainö ante apænecæcäimpa, anewëminipa. Wæætē edæ “Mæmpo, bitö qui, ante, Badä, minö qui, ante botö pönömo mina ænguënenö incæ ñowo wæætē edæ, Wængongui qui, ante do edæ godonte impa.” ⁶ Ante apænedinque waocä wæmpoda inate wii godonguënegä ingampa, ante minitö iñömö edæ wææ anewëmini awädö. Iñæmpa mänömainö ante wææ anewëninque minitö edæ dodäni nāni angainonque ante cæcæte ante cædinque Wængongui nānō wææ angainō ante edæ, Önöneque impa, ante bai cæminipa töö. ⁷ Minitö waa cæmini inte bai nē anewëmini iñöminite edæ ämo eñeedäni. Mini cædö ante Wængongui iïmaï ante apænecampa, ante Itaiya wodi nöingä ante yewæmongacäimpa.

⁸ “Iñäni iñömö botö imote önöneque waa apænete bai tededäni incæte, tömënäni mimöno æmæ pönente edæ gobæ ongonte bai inäni awädö.

⁹ Ayæ botö weca ædæ wæænte waa ate bai tededinque tömënäni, Wængongui imidö anguënë, ante önöneque tedewëninque önönque edæ cædänipa.

Waadäni nāni wææ änönö ante odömonte apænedänipa töö.”

Ante Wængongui piingampa, ante yewæmongacäimpa.

¹⁰ Mänömainö ante apænete ate Itota wæætē nanguï ongönäni inänite aa pecä pönäni adinque apænecäimpa.

—Botö apænebo eñëninque ocaidë pönente ædæmö eñeedäni, angantapa.

¹¹ Önönë guidi beyænque waocä mimö wentamö entawënämaï ingampa. Wæætē mimönë wiwa pönëninque nānō önöne tao gode beyænque tömengä wentamö mongængampa, ante apænebo eñeedäni.

¹² Ante apænecä ate tömengä miñæ nē godäni iñömö tömengä weca ponte änänitapa.

—Bitö mänömainö ante apænebi eñëninque Paditeoidi iñömö guingo imonte piñäni apa anewë.

¹³ Añönäni tömengä,

—Awæ botö Mæmpo minämaï iwæ to wite bai wido cæte bacäimpa. Paditeoidi iñömö wii botö Mæmpo quinäni inönäni inte adobai edæ wido cæte wæcædänimpa.

¹⁴ Edæ babetamönäni bai eñënämaï inäni inte tömënäni iñömö wadäni adobai babetamönäni bai inäni inänite nē ænte mäodäni inäni apa cæminii. Tömënäni inänite gomö aedäni. Edæ babetamongä ingante wacä adobai babetamongä inongä ingante ænte mäocä gocä ininque tömëna nāna babetamoncaya guëa ontatodë mongæcadæ guiibainapa.

¹⁵ Ante apænecä eñëninque Pegodo,

—Mänömainö ante odömonte apænedinque bitö æbänö ante odömoncæte ante apænebitapa, ante apænebi eñëmönie.

¹⁶ Añongante Itota,

—Minitö incæ ocäi ömæcadäni bai inömini inte eñënämaï iminitawo. ¹⁷ Edæ quincöomë önöne guidincöo incæ cæncadë guite ate goiwaa ogä mente wido cæte ba apa anewëminii. ¹⁸ Wæætē önöne waocä nānō tedewënö guiquënë mimönë nānō wiwa pönënö beyænque tao godepa.

Iñinque waocä önöwoca mäninö beyænque wentamö ewocacampa. ¹⁹ Edæ waocä mimönë nānō entawente taodinö beyæ wiwa ante pönengampa. Mimönë nānō piinte pönënö beyænque waocä godö wængongampa.

Mimönë towëinente tömengä nänöogængä inämaï iñongante godö mongampa. Ayæ æcämenque iñongante wængongampa.

Mimönë towëinente beyænque waocä godö mongampa. Mimöno æinente wædinque wacä qui awëmö ængampa. Mimönë wiwa pönëninque wacä ingante godö babæ wapiticæ apænecampa. Ayæ wacä ingante piinte tedecampa. ²⁰ Iñinque

mimōno tao godi beyænque waocä wentamö ewocacampa. Wæætë mempodämaï inte nänö cænö beyæ waocä wentamö ewocadämaï ingampa, ante edæ Itota apænegacäimpa.

Onquiyængä oodeocä inämaï inte wede pönente angampa
(Mäadoco 7.24-30)

²¹ Mäniñömö quëwente wadæ godinque Itota Tido nāni quëwëñömö Tidöo nāni quëwëñömö eyequei pongacäimpa. ²² Mäniñömö ponte quëwëñongä onquiyængä Cānaāmæ nē ëñate pædingä inte adoyömö quëwente tadinque tömengä weca pöningue aa pecantapa.

—Awënë bitö Awënë Dabii wodi pæimi inömi inte ëñëmi. Botö beyæ pönö waadete waa cæe. Botö wëñængä onquiyængä wënæ inte quëwente wæwengampa cæbii.

²³ Ante mänömaï aa pecä wædinque Itota pæ wëenecantapa. Pæ wëenecä adinque tömengä miñæ nē godāni guiquënë tömengä weca pöningue wææ apænedänitapa.

—Mönö miñæ tee empote Yæ yæ nē änewënongä ingante ämi gocæe.

²⁴ Ante wææ änāni ëñëninque Itota wæætë,

—Cæninäni obegaidi gueogæ gote wæwënāni bai möni idægocabo adobai inte wë wömonte wädāni adinque Mæmpo Wængongui, Tömënanique inänite cæquimi goquimi, äninque botö imote da pönongä wii pontawoo.

²⁵ Angä ëñëninque onquiyængä iñömö wæætë Itota önöwa gäänë ædæ wææninque apænecantapa.

—Awënë, botö beyæ cæbi waa bacæe, angantapa.

²⁶ Äñongante Itota wæætë,

—Wënāni cænguï inguënë waocä dicæ guintamöidi cænguï ante wææntodonguingää. Bitö edæ wabi iñömite botö bitö beyæ ædö cæte cæquimoo.

²⁷ Angä ëñente wædinque,

—Awënë iñæmpa nē ëadāni nāni cænte eyepodimö wæænte ænömengadæmpa inö öñöñö guintamöidi ade cæmpa.

²⁸ Äñongante Itota,

—Onquiyæmi ëñëmi. Bitö nanguï pönëni iñömite bitö änö ante do cæte impa.

Ante tæcæ apæneyongä tömengä wengä edæ do adoyedë edæ waa bagacäimpa.

Caate wädāni inänite Itota cæcä waa badänipa

²⁹ Mäniñömö quëwëninque wadæ godinque Itota Gadideapæ ömaaque pö änanquidi æi tæ contacantapa. ³⁰ Tæ contate ongöñongä nanguï ināni godongämæ pöningue wënæ wënæ inte wädāni inänite ænte pönänitapa. Pæ opa pæ opa godāni tönö tente tobænte wädāni inänite babetamö ināni tönö babetade ināni inänite Itota weca ænte mämö ñö cädänitapa.

Ñö cädāni ongöñönänite Itota tömänāni inänite godö cæcä ate waa badänitapa.

³¹ Godongämæ ongönāni guiquënë, Itota godö cæcä ate babetade inänāni incæ tededāni ëñëmönipa, ante guïñente wädänitapa. Tente tobænte wædināni incæ waa badāni amönipa. Pæ opa pæ opa godāni inänāni incæ waa bate godāni amönipa. Babetamö inänāni incæ waa adāni wæmönipa, ante guïñente wædinque edæ Wængongui ingante apænedinque, Möni idægocabo Wængongui inömi inte edæ bitö adobique ñäö bai ëmömi inte edæ tæi piñænte cæbi amönipa, ante watapæ apænegadänimpa.

4.000 ganca ināni inänite Itota godongä cænänipa

(Mäadoco 8.1-10)

³² Mäniñedë Itota tömengä miñæ nē godāni inänite aa pecä pönāni ate apænecantapa.

—Ināni botö weca ongönāni iñömö mëönaa go adoönæque iñonte botö weca ongöñönāni tömënanī cænguï ömæpodāni badāni ate wædinque botö tömënanī tönö godongämæ wæte bai pönëmopa. Cænāmaï inte gue ænente wæyönänite botö, Oncönë goedāni, ämo gote bai tömënanī edæ idömæ godinque nangæ badinque edæ bocæ bocæ cæte wæcædönänimpa.

³³ Angä wædinque tömengä miñæ nē godāni wæætë,

—Ënodāni inänīyaa. Önömæca incæ päö impa æninque godömöni cænguïnāni.

³⁴ Ante wæyönänite Itota,
—Minitö päö æpodö nææmini.

Åñongante,

—Päö önompo æmæmpoque go mēa gæyæ
guiyā pōni mēa pōni mæ ongompa, ante
edæ apænedänitapa.

³⁵ Itota iñömö godongämæ ongönäni nan-
guï inäni iñönänite angä tæ contadänitapa.

³⁶ Æinque päö önompo æmæmpoque go mēa
tönö gæyæ tönö nāni næænincoo pædæ
godönäni æninque tömengä Wængonguï
ingante, Bitö waa pönömi cæncæmönimpa,
ante apænedinque pä æninque tömengä
miñæ nē godäni inänite pædæ pönongä
æninque tömēnāni wæætē wadäni
inänite pædæ pædæ godönäni ænänitapa.

³⁷ Æninque tömānāni godongämæ
cæninque tömo pōni cænänitapa. Idæwaa
cænāni ate tömēnāni pä ænte nāni cænte
ñönōni ee öñoncoo wente æninque Itota
miñæ nē godäni otodē pönö da wēnänitapa.

Æinque önompo æmæmpoque go men-
todēa cænguï eyede contagatimpa. ³⁸ Nē
cænīnāni iñömö onguiñænānique coatodo
mīido ganca iñönāni onquiyænāni tönö
nāni wencabo tönö tömēnāni æpodānimē
godömenque nanguï pōni inönänimpa.

³⁹ Æinque cænāni ate Itota iñömö, Goedāni,
angä godäni ate tömengä wipodē guï
contate imæmāa Mäagadabæ pongacäimpa.

16

Mä cæte odömömi amönie, änänipa
(Mäadoco 8.11-13; Odoca 12.54-56)

¹ Itota pongä adinque Paditeoidi
tönö Tadoteoidi iñömö, Mönö ämō
ēñēninque tömengä oda cæbaingampa, ante
cædinque Itota ingante apænedinque, Bitö,
Pönencædänimpa, ante öönædē mä cæi bai
cæbi amönie. ² Änāni ēñēninque tömengä
wæætē,

—Minitö iñæmpa gawadecæ iñonte æmō
adinque, “Baänæ watamō bacæ wiñadæ
pōni gongæmpa,” ante do ēñēmīnīpa. ³ Ayæ
ñäö bayö edæ, “Cöönæ cæcæ guinæ wepæ
bai gongæmpa,” äninque mīnitö, Öönæ
æbänö eönæpa, ante adinque do edæ
ēñēmīnīpa. Æinque, Wængonguï quīnō
cæcæ cæcampa, ante quīnante wīi ēñēmīni.

⁴ Æñowomīni iñömö edæ nē wīwa cæmīni inte
mīnitö Wængonguï ingante pangocæte bai
ëmō cæte gomīni imīnīpa. Edæ, Mä cæte
odömömi adinque pönēmāimönīpa, ante
ancaa ämīni awædö. Incæte Cönäö wodi
mä pōni nänö cægāinö ante adinque mīnitö
pönenguēnēmīni iñömīnīte māninque mīni
aquinque ante odömönte ingæimpa.

Äninque Itota tömēnāni inänite ëmō cæte
wadæ edæ gogacäimpa.

Wapiticæ nāni apænedö yedæ cæmpoquï
bai impa, ante

(Mäadoco 8.14-21)

⁵ Tömengä miñæ nē godäni guiquēnē tao
gocæ cædinque päö wīi pönente ænāmaï
inte æmæmāa tao ti wæænänitapa. ⁶ Itota
iñömö mānīi päö tömēnāni nāni ænāmaï inö
ante wīi tededinque wadö ante pönente
iīmaï apænecantapa.

—Päö yedæ æmpoquï, ante Paditeoidi
tönö Tadoteoidi nāni da wente cæi ate
gomö aedāni.

⁷ Angä ēñente wædinque tömengä nänö
nē ëmīñænāni wæætē nāni caboque teded-
inque,

—Päö ænte pönāmaï imöimpa, ante Itota
wabänö mānōmaï beyæ ämaingampa.

⁸ Ante nāmāneque tededāni wædinque
Itota iñömö,

—Mīni pönēegade. Päö ænāmaï inte
mīni pönīnō ante quīmæ tedewēmīnīi.

⁹ Awincaque adinque adāmaï imīnitawo.
Edæ päö önompo æmæmpoque æninque
botö godömo æninque tinco mīido ganca
ināni nāni cænīnō ante awincaque
adīmīni inte mīnitö mīmōno pönēnāmaï
imīni awædö. Ayæ cænte ate nāni
wææntodönincoo wente ænte mīni con-
tadinö iñömö cænguï æpotodēnō on-
gontawo, ante pönēmīniyaa. ¹⁰ Ayæ ate
botö önompo æmæmpoque go mēa päö
ænte godömo æninque coatodo mīido
ganca ināni nāni cænīnō ante adinque
mīnitö iñömö edæ ēñēnāmaï imīnitawo.

Ayæ edæ ñænæ otodē mīni wente ænte
contadinö cænguï æpotodēnō ongontawo,
ante pönēmīniyaa. ¹¹ Mānīnō ñöwo botö,
Gomö aedāni, ante wææ äninque botö wīi
pāonque ante apænetabopa, ante quīnante
wīi ēñēmīnīi. Incæte botö, Päö yedæ
æmpoquï, ante Paditeoidi tönö Tadoteoidi

näni da wente cæi ate gomö aedäni, ante wææ ämopa.

12 Angä ëñente pönente wædinque tömënäni, Gomö aedäni, ante apænedinque Itota wii önonque päo da wente cæinque ante wææ angampa. Wæætë edæ Tadoeoidi tönö Paditeoidi wapiticæ ante näni odömönte apænedö ante tömengä, Gomö aedäni, ante wææ angampa, ante do ëñënanitapa.

Bitö Coditobi inömi imipa, ante Pegodo angampa

(Mäadoco 8.27-30; Odoca 9.18-21)

13 Mänii imæmäa tate ate Tetadea Pidipobæ eyequei pöninque tömengä miñæ nê godäni inänite apænedinque Itota,

—Botö Waobo ëñagaïmo inömotë wadäni botö imotedö ante tedinque, Æbodö imoo, ante apænedäni ëñëminii.

14 Añongante tömënäni wæætë apænedänitapa.

—Bitö imitedö ante apænedinque pancadäniya, Æpænë nê guidongaingä Wäo wodi incæ Itota adocä imaingampa, ante tedinäniya. Wadäni guiquënë, Ediya wodi incæ Itota inongä imaingampa, ante apænedänipa. Wadäni guiquënë, Eedëmiya wodi ingampa, ante apænedänipa. Ayæ, Wii Eedëmiya ingä ininque Itota Wængongui beyæ nê apænegaïnäni inönänite adocä imaingä ingampa, ante tedinäniya.

15 Ante tömengä miñæ nê godäni apænedäni ëñëninque Itota wæætë,

—Minitö diyæ, Æbodö imoo, ante pönëminii.

16 Añongante Timönö Pegodo wæætë,

—Wængongui nê quëwengä Wëmi ingaïmi inte bitö inömo Coditobi inömi imipa.

17 Ante apænecä ëñëninque Itota inömo,

—Timönö bitö Öönata wëmi inömi inte ëñëmi. Wii waocä apænecä beyæ bitö mänömainö ante ëñëmitapa. Wæætë bitö nangui toquinque edæ botö Mæmpo öönädë nê quëwengä incæ bitö imite pönö odömönte apænecä ëñëmitapa. 18 Ayæ edæ iimaï ante bitö imite ämopa. Bitö dicamö bai inömi imipa, ante pönëninque botö bitö emöwo ante Pegodo pönö pemömo emömiya. Incæte dicabo tæimö i bai bitö nê äninö inömo edæ tæine i inönte botö mänimoga tæi mænonte bai pönö badömo

ate minitö mini pönencabo bacæminimpa. Ininque minitö, Itota nê Codito ingampa, ante mini pönencabo inömo tæi emömini badinque mänimoga tæi ongonde bai wede pönëñöminite nê tæi piñænäni tadömengadænguipo owote ta pönäni incæ ædö cæte godömenque mämö bæ taquinänii. 19 Edæ öönädë Awënë Odeye nempo guiquinque ante odemö wi ænequi bai botö bitö imite pönömo æncæbiimpa. Æmi ate bitö nê ämi badimi inte inguipoga bitö wææ änö incæ öönädë dobæ wææ angainö inte ongongæimpa. Ayæ bitö quiemë inguipoga ñimpo cæbi i inönte mänii adobai öönädë dobæ ñimpo cæte ongongæimpa.

20 Ante inque apænedinque Itota tömengä miñæ nê godäni inänite iimaïnte ante wææ angantapa. Minitö inömo botö imotedö ante apænedinque, Codito inongä ingampa, ante gode änamai inte edæ pæ wëneedäni, angacäimpa.

Itota, iimaï cädäni wæncæboimpa, ante apænecampa

(Mäadoco 8.31-9.1; Odoca 9.22-27)

21 Ayæ Itota mäniñedë mä odömöninque tömengä miñæ nê godäni inänite apænedinque, Botö cöwë Eedotadë goquënëmo imopa, angantapa. Gobo ate oodeoidi nê aadäni näni Picæncabo tönö, Wængongui quï, ante nê godönäni ñænænäni tönö nê odömönäni tönö godongämæ cædinque botö imote wënæ wënæ cädäni wæwæncæboimpa. Ayæ botö imote godömenque wænönäni wæncæboimpa. Incæte Wængongui angä beyænque botö mëönaa go adoönæque inönte edæ ñäni ömæmönte quëwæncæboimpa, ante apænecäimpa. 22 Mänömainö ante apænecä ëñëñönäni Pegodo guiquënë Itota ingante nänënë mäo godinque Itota ingante piingantapa.

—Awënë, quimæ wæncæ anewëë. Wængongui pönö wææ aacä beyæ bitö caate wädämai incæbiimpa.

23 Ante wææ añongante Itota dadi emæninque Pegodo ingante näëmæ piinque,

—Bitö Tatänabi bai inömi inte edæ botö weca ongönämaï wadæ gobæwe, angantapa. Bitö wii Wængongui nänö pönëno ante pönëmi inte wæætë edæ waodanique nani pönëwënö bai pönëninque mänömainö ante bitö botö imote ægodawaqui ñononte bai cædinque wææ anewëmi awædö, angacäimpa.

²⁴ Ayæ tömengä miñæ në godäni inänite apænecantapa.

—Æcänö botö miñæ pöinëna ina tömengä iñömö nämä beyæ ante pönënämaï inte edæ botö miñæ tee empote poncæcäimpa. Nämä nänö wænguiwæ mongænte ponte bai cædinque tömengä, Botö wæmo incæ caate wæbo incæ Itota ingante cöwë tee empote gocæboimpa, ante poncæcäimpa. ²⁵ Edæ æcänö, Nämä wææ gompodinque quëwencæboimpa, ante cædinque botö miñæ pönämaï ingä guiquënë tömengä iñömö edæ quëwënämaï incæcäimpa. Wæætë edæ, Wænönäni wæmo incæte botö Itota miñæ tee empote cöwë gocæboimpa, ante æcänö äna guiquënë tömengä wæætë quëwencæcäimpa. ²⁶ Edæ waocä inguipoga ongoncoo tömancoo ö æncæte ante cædinque nämä önöwoca incæ pædæ godongä wë womonte ba ininque edæ tömengä nänö ömæwocate wæquinque æmaingampa. Iñæmpa eyepæ godongampa diyæ önöwoca wæætë æmaingä.

²⁷ Ante Itota iñömö, “Edæ botö Waobo ëñagaïmo inte botö Wæmpo ñäö tömäo guinæ gongæñonte botö edæ botö anquedoidi tönö edæ godongämæ poncæboimpa. Ayæ pömo ate botö tömämini minitö cægai ganca ante eyepæ pædæ pönömo æncæminimpa. ²⁸ Edæ näwangä ämopa. Minitö iñömö ongömini pancaminiya iñömö ayæ wænämaï mümini quëwëñömini botö Waobo ëñagaïmo inte Awënë Odeye bate ponte a ongömo adinque minitö botö nempo quëwencæminimpa,” ante Itota apænecäimpa.

17

Itota waëmö pöni ñäö bai ëmongä bacä adänipa

(Mäadoco 9.2-13; Odoca 9.28-36)

¹ Mäninö ante apænecä ate Itota önompo æmæmpoque go adoönæque iñonte Pegodo ingante ayæ Tantiago tönö Wäö nana caya inate mänimpodäni inänite änanquidi mæicä adodanique æigadänimpa. ² Æite ongöñönäni edæ Itota awinca tömënäni ayönäni edæ wii cöwë nänö ëmönö bai waëmö pöni ñäö bai edæ ëmongä bamongä adänitapa. Edæ nænque ti näwante ñäö bai bate ëmongä ininque tömengä weocoo näämænta ñäö incoo ëñacä adänitapa. ³ Ayæ ayönäni edæ doyedë pöni në æigaina iñömö Möitee wodi tönö Ediya wodi incæ iñontobæ a ongöninque Itota tönö godongämæ tedegönäni. ⁴ Adinque edæ Pegodo guiquënë Itota ingante apænecantapa.

—Awënë ëñëmi. Iñömö mönö waa pöni ongonte awædö. Bitö Ao ämi ininque botö oncontaicoo mentaiya go adotaique mænöninque bitö oncontai ante adotaique Möitee oncontai ante adotaique Ediya oncontai ante adotaique mænömaïmopa.

⁵ Ante ayæ tedeyongä boguimämo waëmö pöni ocabogadäni obo wææninque guinæ gongæ ayönäni boguimämodë önönepämoque apænecantapa.

—Iingä iñömö botö Wengä inongä inte botö në waadegaingä inongä ingampa. Tömengä ingante adinque botö watapæ tobopa. Minitö tömengä pönö apænecä ëñëdäni.

⁶ Angä wædinque tömengä miñæ në æidäni iñömö ancai guiñëninque do do wäate bai cædinque guidömëmæ tæ go wæænänitapa. ⁷ Go wæænäni adinque Itota tömënäni weca ponte godö gampodinque,

—Guiñënämaï inte ængæ gantiedäni, angantapa.

⁸ Ayæ æmö ayönäni Itotaque adocanque ongongä agadänimpa.

⁹ Ayæ änanquidi inö wææ pöñönäni Itota tömënäni inänite angantapa.

—Minitö mä pöni botö ëmönö wiimonte bai mini adinö ante gode änämaï pæ wëneyömini botö iñömö Waobo në ëñagaïmo inte edæ wænte ate ñäni ömæmoncæboimpa. Ñäni ömæmömo ate minitö edæ mäniñedë ate apænecæminimpa.

¹⁰ Angä ëñente wædinque tömengä tönö në æidänäni tömengä ingante änänitapa.

—Mänömaï i ïinque, Ediya wodi tãno poncæcãimpa, ante nê odömönãni iñæmpa quĩnante apænedãni.

11 Äñönãni Itota wæætê,

—Ediya wodi nãni änongå iñömö tãno pongã ingampa. Näwangã impa. Pöningue tömengã, Doyedê ingaï baï ñowo wæætê adobaï bacæimpa, ante badongampa.

12 Botö wæætê iĩmainö ante apænebo êñeedãni. Ñowocã mönö Ediya ïongã inte do pongãimpa ante aquênê. Do pöningã ingante edæ awincaque adinque, Æcãnö ingää, ante êñênãmaï inte cädãni guiquênê quiêmê nãni cæinênö incæ edæ do cädãnipa. Ayæ adobaï, Tömengã ingante nãni cædi baï botö Waobo êñagaïmo iñömote botö ïmote adobaï wënæ wënæ cädãni wæcæboimpa, ante apænebo êñeedãni.

13 Ante apænecã êñëningue tömengã tönö nê æidinãni iñömö edæ, Æpænê mönö guidöningã Wäö ingantedö ante apænecampa, ante tæcæ êñênãni inte wægadãnimpa.

Itota wënæ ingante angã go ate wëñængã waa bacampa

(Mäadoco 9.14-29; Odoca 9.37-43)

14 Mänii änanquidi æidinãni inte adodö wæëningue nangui pöni ïnãni weca pönãni adinque wacã onguiñængã Itota weca ponte da guicapodinique angantapa.

15 —Awënê êñëmi. Botö wengã onguiñængã ingante waadete waa cæ æmopa. Tömengã iñömö edæ ancaa quidi quidi dowænte wæwëningue wantæ wantæ iñö gongapamö tæ wææ tæ wææ cæcampa. Ayæ æpænê tæi guii tæi guii cæcampa.

16 Ante wædinque, Botö wengã ingante pönö cæmini waa bacæcãimpa, ante botö bitö miñæ nê godãni weca ænte pömo adinque tömënãni ædö cæte cæquinãni.

17 Äñongante Itota tömënãni ïnãnite,

—Ñowomini mini ædæmö cädãmaï incabo mini pönëgade impa, angantapa. Minitö weca æpogadö quëwëmoï. Wapiticæ cæmini iñöminite æpogadö piyænê cæte wæwëmoï. Edæ wëñængã ingante iñömö botö weca ænte mämömini pongãedãni, angantapa.

18 Ayæ wënæ ingante piinque Itota, Tao gobäwe, angã tao gocã ate wëñængã iñömö dobæ waa bacantapa.

19 Ayæ ate tömengã miñæ nê godãni adodãnique Itota weca pöningue tömengã ingante,

—Mönitö guiquênê bitö baï wido cæcæ cædinque edæ quĩnante wido cädãmaï intamönii.

20 Ante wæyönãnite,

—Wede pönëminipa diyæ wido cæquimiiii. Edæ mini pönëno möotatamö baï guiyã pöni ëwocamini ïinque minitö änanquidi iñömö ongonquidi adinque, Nänênê gobäwe, ante ämini baï edæ änanquidi incæ do gã gote wayömö gongæncædönimpa. Edæ quiêmê cæcæte ante ämini ïinque tömänö edæ do cæte babaimpa, ante näwangã apænebo êñeedãni. 21 Incæte mänii wënæ inte wido cæcæte ante cædinque cængui wantæpiyæ cænãmaï inte Wængongui ingante apænete ate edæ wido cæqui impa, ante Itota apænecã êñënãnitapa.

Wënönãni wæncæboimpa, ante Itota adodö ante apænecã

(Mäadoco 9.30-32; Odoca 9.43-45)

22 Mänii Gadideabæ pöningue godongãmæ goyönãnite Itota iĩmainö ante apænecantapa. Adocanque, Waocã nê êñagaingã iñömö æyömönö ongongää, ante godö odömöningue botö ïmote waodãni nempo pædæ godongã æncædãnimpa. 23 Nê ænãni wæætê botö ïmote wænönãni nãne wæncæboimpa. Ayæ mëönaa go adoönæque iñonte edæ Wængongui angã beyænque botö edæ ñãni ömæmonte quëwæncæboimpa.

Itota mänömainö ante apænecã êñëningue tömengã miñæ nê godãni wæætê edæ nangui wæwente bagadãnimpa.

Wængongui oncö beyæ, ante Itota eyepæ godongampa

24 Mänii pöningue tömënãni Itota tönö godongãmæ Capënaömö nãni quëwëñömö pöñönãni wadãni guiquênê Wængongui oncö beyæ ante tigitamö didacöma nãni änantamö mentamonga ante nê änonãni inte Pegodo weca ponte änanitapa.

—Minitö Awënê nê Odömongã guiquênê Wængongui oncö beyæ ante didacöma tigitamö cöwë pönönãmaï ingantawo.

²⁵ Æñönänite Pegodo,
—Cöwë nē pönongä ingampa.

Äninqe oncönë pö wäänë guiiyongante Itota täno apænegantapa.

—Timönö, æbänö ante pönëmi, angantapa. Æimæca nē quëwëmö mönö eyepæ ænte quëwengæimpa, ante imæca awënë odeyeidi iñömö edæ tömënäni nempo nē quëwënäni inänite, Pönömini æmoedäni, änänitawo. Wæætë edæ wadäni inänite änänitawo. Ædänidö inänite änäni, ante pönëmi, ante Pegodo ingante Itota angantapa.

²⁶ Æñongante Pegodo,
—Wadäni inänite änänipa.

Ante apæneyongä Itota wæætë edæ,

—Mänömaï i ininqe edæ mönö Awënë Wængongui nempo nē quëwënömö inte wii godonguënëmö imompa. ²⁷ Incæte wii piinte bacædänimpa, ante botö iïmaï ämopa. Bitö gäwapäa mäo dadonte wëä tadöñömi gæyæ tänocä tacä æe. Æninqe gæyæ önöneca wi ænete ayömi adotamonque incæ coatodo didacöma emontamö incæ edæ gæyæ önöne ongotamö adinqe bitö tadonte æncæbiimpa. Mänintamö ænte mäo bitö beyæ botö beyæ eyepæ godömi æncædänimpa, angä gote Pegodo cægacäimpa.

18

Æcänö ñcæncængä inte nē angä inguingää, ante tededänipa

(Mäadoco 9.33-37; Odoca 9.46-48)

¹ Mäniñedë Itota miñæ nē godäni tömengä weca ponte apænedinqe,

—Bitö öönæde Awënë Odeye iinque bayömi æcänö bitö nempo quëwëninque ñænængä pönï inongä inte nē angä inguingää, änänitapa.

² Itota iñömö wëñængä guiyangä ingante edæ aa pecä pongä ate tömengä ingante tæcæguedë goncædinque tömënäni inänite wæætë apænegantapa.

³ —Nawangä ämo eñëedäni. Minitö öönæde Awënë Odeye nempo guicæte ante wapiticæ mini pönëwënö wido cædinque wëñænäni nani piyænë cæte pönënö bai pönëedäni. Mänömaï cædämaï imini ininqe Awënë Odeye nempo cöwë guidämaï inte

wæbaiminipa. ⁴ Incæte iingä wëñængä, Önömoque imopa, ante pönengä bai æcänö adobainö ante pönente quëwëna guiquënë tömengä iñömö edæ öönæde Awënë Odeye nempo quëwëninque ñænængä pönï inte edæ nē angä ingampa. ⁵ Ayæ æcänö botö emöwo apænedinqe mäningä bai wëñængä ingante, Pöe, ante godö waa cæcä iñömö tömengä iñömö edæ botö imote edæ do, Pöe, ante pönö waa cæcä ingampa, ante Itota apænegacäimpa.

Wacä oda cæcæcäimpa, ante nani wæquinque cædänipa
(Mäadoco 9.42-48; Odoca 17.1-2)

⁶ Itota ayæ apænegantapa. “Wadäni godö cædäni beyæ botö imote nē pönënäni incæ pancadäniya edæ dobæ oda cæte wënæ wënæ cædänipa. Ininqe, Wëñængä adocanque guiyangä pönï ingä incæ oda cædämaï incæcäimpa, ante wææ cæcæte ante cædinque nē godö cæcæ cædingä ingante iïmaï cædäni ininqe tömengä toquënegä imaingampa. Waodäni nani dacæ godö dacæ godö cæquinca ñænænca æninqe tömengä önömenca æ wëmencadinque tömengä ingante tæcætibæ wido cædäni ininqe tömengä edæ, Wënæ wënæ cædämaï inte becadote wæmo beyænque Wængongui botö imote wii godömenque pangampa, ante wædinque waa toquënegä imaingampa. ⁷ Quiëmë beyæ oda cædinque inguipoga quëwënäni nani wæquinque wënæ wënæ cædänipa. Nē pönënäni incæ pancadäniya wii eñente do oda cædänipa. Cöwë mänömaï impa. Incæte, Oda cæcæcäimpa, ante nē cæcä iñömö edæ tömengä nangui nänö caate wæquinque cæcampa,” ante apænegacäimpa.

⁸ Ayæ, “Bitö önompoca cædinque wënæ wënæ cæbi ininqe önompo aa wi æmpote wido cæte bai cædinque wënæ wënæ bitö cædinö ante wido cæbäwe. Bitö önöwa wapiticæ godinque wënæ wënæ cæbi ininqe bitö önöwa aa wi æwate wido cæte bai cædinque wënæ wënæ bitö cædinö ante wido cæbäwe. Iñæmpa inguipoga quëwëninque bitö æmæmpoque empobi incæte æmæntique entibi incæte bitö öönæde æidinqe cöwë wænämaï

quëwëmi ìninqe waa ìmáimpa. Edæ tipæmpoga empobi inte tipæntiya entibi inte edæ bitö gonga cöwë bæcote wæwenguifñömö wii æmæwo wido cæte wæquimido anguënë. ⁹ Ayæ bitö awinca wiwa adinque wënæ wënæ cæbi ìninqe bitö awinca oo togæmonte wido cæte bai cædinque wënæ wënæ bitö cædinö ante wido cæbæwe. Ìñæmpa inguipoga quëwëninque bitö æmæmonque ëmömi inte bitö godömenque quëwëmi ìninqe waa ìmáimpa. Edæ wii tipæmonga ëmömi inte edæ bitö tadömengadænguipo gonga cöwë bæcote wæwenguifñömö wii wido cæte wæquimido anguënë,” ante Itota angacæimpa.

Bodego wë womonte ba, ante odömonte apænecæimpa

(Odoca 15.3-7)

¹⁰ Ayæ, “Ìngä guiyangä ìñömö önonganque ingampa, ante mînitö adocanque ingante incæ piinte adämaï ìmæwedäni. Ìñæmpa tömënäni ìnänite nê aadäni anquedoidi incæ öönæde quëwëninque botö Mæmpo nê öönæde quëwengä awinca cöwë adänipa cæminii. ¹¹ Edæ botö Waobo ëñagaïmo inte edæ wë womönäni ìnänite diqui minte æncæte ante pömo ìmopa,” ante Itota apænecantapa.

¹² Ayæ, “Æbänö ante pönëmini edæ. Waocä obegaidi tiëe ganca ëacä ongöñönäni adocanque pangocæte nänënë gocä adinque nê ëacä ìñömö nöobenta i nöebe ganca ìnäni änämænë ongöñönänite ëmö cæte diqui mincæ wii goquingä, ante pönëminii. Cöwë edæ diqui diqui mincæ gocæcæimpa. ¹³ Godinque nê pangocæ godingä ingante ëadente acä ìninqe nê ëacä waa tobaingampa. Edæ pangocæ godämaï ìnäni nöobenta i nöebe ganca ìnäni ìnänite adinque cöwë tocä ìnongä inte tömengä tæcæ nänö adingä beyæ godömenque tocampa. ¹⁴ Mînitö Mæmpo öönæde nê quëwengä adobaingä, Guiyangä wë womonte wænämaï incæcæimpa, ante cöwë diqui diqui mingampa,” ante Itota odömonte apænecæimpa.

Në wënæ wënæ cæcä ingante pünämaï inte waadecæimpa

(Odoca 17.3)

¹⁵ Godömenque odöminque Itota apænecantapa. “Bitö tönifñacä bitö ìmite wënæ wënæ cæcä wædinque bitö tömengä weca gote ämi adominaque nänënë gote ongöeda. Ongöñöminate bitö tömengä ingante, Mänömaï cæbitapa, ante ämi ëñengäe. Mänömaï ämi ëñengä ìninqe tömengä waadete babaingampa,” ante apænecæimpa. ¹⁶ Ayæ godömenque apænecantapa. “Wæætë tömengä ëñenämaï inte waadedämaï ingä ìninqe bitö Wængongui angä ëñente nänii yewæmongainö bai cæe. Waocä æbänö cæcäa, ante adinque waoda mënaa ìna incæ mënaa go adocanque ìnänii incæ adoyömö ante apænedäni ìninqe tömënäni nänii apænedö beyænque ante mönö, Nö impa, ante ëñengæimpa, ante Wængongui beyæ yewæmongatimpa. Ìninqe bitö, Mönö adoyömö ante apænecæimpa, ante waoda mënaa ìnate ämi incæ adocanque ingante ämi incæ æcämenque bitö tönö goda tömengä adoyömö ante nöinö ante apænecæcæimpa. ¹⁷ Ayæ apænëmini ate nê wënæ wënæ cædingä cöwë ëñenämaï ingä ate wædinque bitö ìñömö, Itota nê Codito ingampa, ante mîni pönencabo weca gote apænëbi ëñenguinäni. Ayæ tömënäni wææ änäni ate tömengä godömenque ëñenämaï ingä ìninqe tömengä, Nämä cæte quëwenguïmo, ante nê ëñenämaï cædäni bai ingampa. Ayæ, Odömäno awënë beyæ nê æwengä bai ingampa cæbii. Tömengä ëñenämaï cæcäinö anguënë, ante bitö edæ tömengä ingante gomö ae,” ante Itota angantapa.

¹⁸ Ayæ apænëdinque, “Näwangä ämopa. Mînitö inguipoga nê ämîni inte apænte ämîni ìninqe mîni apænte äninö incæ öönæde dobæ apænte ante impa. Ayæ inguipoga mînitö apænte äninque ñimpo cæminii ìninqe mîni cædö bai öönæde adobaï do ñimpo cæte ingæimpa.”

¹⁹ Ante apænëdinque Itota ayæ apænëdinque, “Mînitö ìmînite iïmaï ämopa, angantapa. Inguipoga mëminäa guëa adoyömö pönente apænëyöminä botö Mæmpo öönæde nê quëwengä ìñömö mîna ämaï ante tömänö cæcæcæimpa. ²⁰ Edæ mëminäa ìmîna incæ mëminäa go ado-

canque imini incæ æpomīnimē inōmīni incæ mīnitō adoyōmō ponte botō ēmōwo apænete ongōñōmīni edæ botō adoyōmō mīnitō tōnō godongāmæ ongoncæboimpa,” ante Itota apænegacāimpa.

²¹ Ayæ ate Pegodo tōmengä weca ponte äninque,

—Awēnē, botō tōniñacā botō imote wēnæ wēnæ cæcā adinque botō tōmengä ingante æpogadō godō ñimpo cæbo ee goquingä. Edæ onompo æmæmpoque go mempoga mānimpoga ñimpo cæbo ee goquingä, ämii.

²² Äñongante Itota,

—İñæmpa, wīi onompo æmæmpoque go mempogaque anguii. Edæ godōmenque bitō änimpoga piināmaī inte ñimpo cæbi ate wæætē adopoga wæætē adopoga ayæ cōwē tetenta ganca wæætē wæætē ñimpo cædinque coatodo tiento nōobenta ganca mānimpoga piināmaī inte ñimpo cæbi goquingä. Mänōmaī ante Itota tōmengä miñæ nē godāni inānite, Cōwē piināmaī inte ñimpo cæquimīni, angacāimpa.

Nē cædongä nänō waadedāmaī cædō ante odōmongampa

²³ Itota ayæ apænecantapa. “Mānīnō beyæ bitō änō bai cædāni wædinque imæca awēnē odeye nänō apænte āmaī öönædē Awēnē Odeye incæ tōmengä ingante nē ēñēmīni imīnite æbānō apænte angampa, ante odōmōmo aquimīni, angantapa. ²⁴ İmæca awēnē iñōmō, Botō imote nē cædāni incæ botō imote debe ināni inte eyepæ pōnōnāni æncæboimpa, ante cæyongä adocanque tudento ñænængade nāni godonte æinta incæ diete müido ganca nänō pōnongä æni beyæ wæætē pōnōnāmaī debe ingä adinque tōmengä ingante ænte māmōnāni pongampa. ²⁵ Pongä adinque tōmengä awēnē iñōmō, Ömæpocā inte tōmengä ædō cæte pōnongä ænguimoo, ante pōnente wædinque iimaī angantapa. Wacā ingante nē cædāni tōmengä nāni wencabo bacædānimpa, ante cædinque botō nē pōnōnāmaī ingä nāna gæncaya nāni wencabo tōmānāni inānite bæi ongonte wacā ingante godonte eyepæ ænguimoo, angä. ²⁶ Eñente wædinque edæ nē cæcā iñōmō tōmengä weca ædæ wæænīnque edæ, ‘Awēnē, waadete cædinque ee abi

adinque botō ayæ ate botō debe inganca tōmanta pōnōmo æncæbiimpa.’ ²⁷ Ante wæcā ēñēnīnque awēnē iñōmō nē cæcā ingante guëa wæte bai pōnēnīnque, Tōmāā edæ godonte impa, äninque godō ñimpo cæcā abæ tawænte gocantapa.

²⁸ “Incæte tōmengä tōnō wadāni nāni godongāmæ cæcabo iñōnāni wacā guiquēnē adocā ingante tiēē tīguitamō ganca nänō pōnongä æni beyæ wæætē pōnōnāmaī debe inongäimpa. Adinque nē abæ tawænte godingä incæ tōmengä ingante debe ingä ingante godō yao ongonte ñimāmençate cædinque, ‘Do bitō æninta pōnōmi æmo tōō.’ ²⁹ Ante piingä wædinque tōmengä tōnō nē cæcā inte nē debe ingä wæætē nē äningä weca da guicapodinque, ‘Bitō waadete cædinque ee abi inīnque botō ayæ ate pōnōmo æncæbiimpa.’ ³⁰ Ante wæyongä edæ Baa äninque tōmengä, Tōmanta edæ cōwē pōnōmi æmo ate tabaīmipa, äninque edæ tee mōnecā ongongantapa.”

³¹ “Adinque edæ tōmēna tōnō nē cædāni guiquēnē, Mänōmaī cæcā, ante wædinque piinīnque awēnē weca gote, Mänōmaī cæcampa, ante wæmōnipa. ³² Änāni ēñēnīnque wēnæ wēnæ nē cædingä ingante äñecā pongä ate tōmengä ingante awēnē, ‘Botō imo nē cædīmi inte nē wēnæ wēnæ cæbitapa tōō. İñæmpa bitō nangui āmi beyænque botō edæ, Tōmanta edæ godonte impa, ante ñimpo cæbo abæ tawænte gobitapa. ³³ İninque botō guëa wæte pōnente cæbo bai bitō tōnō nē cæcā ingante bitō adobai guëa wæte pōnēmi bai waa incædōnimpa.’ ³⁴ Äninque awēnē äingä badinque, Tōmengä tōmanta nänō æninta botō imote adodō nänō pōnongūnganca botō, Tōmengä ingante ænte pancæmīnimpa, ämopa. Äninque tōmengä ingante tee mōnete oncōnē nē pānāni inānite pædæ godongä ænānipa.” ³⁵ Mānīnque ante odōmōnte apænedinque Itota godōmenque apænecantapa.

—Edæ mīni waocabo iñōmīnite mīnitō wacā nänō wēnæ wēnæ cædinō ante godō ñimpo cædāmaī imīni adinque awēnē nänō apænte änō bai botō Mæmpo öönædē nē quēwengä iñōmō adobai mīnitō wēnæ

wënæ cædinö ante ñimpo cædämaï inte tömänö ancæcäimpa, ante apænecäimpa.

19

Nänöogængä ingante nani pämcænö ante (Mäadoco 10.1-12; Odoca 16.18)

¹ Mänii Gadideabæ quëwente iinque apænete ate Itota Oododänö æmæmäa godinque Oodeabæ pongacäimpa. ² Pongä adinque nanguï inäni tee empo goyönäni tömengä gampocä waa badänitapa.

³ Paditeoidi guiquënë, Godö ämö eñëninque Itota wabänö adodeque oda cædete wæcä tocäi, ante pönëwënäni inte tömengä weca pöninque änänitapa.

—Wængonguï æbänö ante wææ angacäi. Waocä tömengä nänöogængä ingante quiëmë beyænque pämcængä iinque edæ nö cæte intawo.

⁴ Ante añönäni Itota,

—Minitö iñæmpa Wængonguï beyæ ante nani yewæmöinta adämaï inte äminitawo. Wëenëñedë edæ waocä ingante në Badongaingä iñömö, “Onguïñængä ingampa, ante ayæ, Onquiyængä ingampa, ante badongacäimpa,” ante yewæmongatimpa.

⁵ Ayæ, “Mänömaï beyæ waocä mæmpocä ingante emö cæte wäänä inante emö cæte godinque onquiyængä ingante, Botö nänöogængä, ante æmæwo moncæcäimpa. Iinque mënaa inäna incæ tömëna nana gæncaya badinque adocanque bai bacædaimpa,” ante yewæmongatimpa.

⁶ Iinque tömëna nana gæncaya adocanque bai badinque nänënë mënaa inämaï inapa. Mänömaï beyæ Wængonguï, Adocanque bai inapa, ante nana gæncaya nänö në badongaina iñönate waocä wæætë pango cædämaï incæcäimpa.

⁷ Añongante tömënäni wæætë,

—Iinque, Æmæwo pämcæmo goquïmi, ante yewæmöninque mäninta bitö yewæmöninta onquiyængä ingante godömi ængä ate bitö önonque pämcæncæbiimpa, ante Möitee wodi quinante wææ angacäi, ante eñencæte ante mönitö wæmönipa.

⁸ Änäni eñëninque Itota edæ,

—Iñæmpa, Mimö ömædëmini inömini inte minitö wënæ wënæ cæinëmini iminipa, ante wædinque edæ Möitee,

Nänöogængä ingante pämcænguïmi, ante yewæmongacäimpa. Wëenëñedë iñömö edæ wii mänömaï ingatimpa. ⁹ Wæætë onquiyængä wacä ingante godö todämaï iñongante tömengä ingante në pämcæningä iñömö tömengä dobæ nänö towenguinque edæ wacä onquiyængä ingante godö mongampa. Ayæ onquiyængä pämcænte goyongä wacä onguïñængä tömengä ingante godö möninque adobaï në towengä bacampa, ante ämo pönëmaïminipa.

¹⁰ Angä eñëninque tömengä miñæ në godäni guiquënë,

—Iñæmpa nana gæncaya ina inte pämcænämaï ingæimpa, ante bitö änö bai nö i iinque edæ waocä wëmö cæcä bai waa imaimpa, ante pönente wæmönipa.

¹¹ Ante wæyönänite Itota,

—Wëmö cæcä, ante mini änö bai ante waocä ædö cæte cæquingäa. Wængonguï nänö äninänique mäninö ante Ao ante mönämaï inänipa. ¹² Edæ ædänidö mönämaï inguinänii, ante pancadäniya guiquënë wäänä cæncadë eñayedë edæ ongænca babetamiñænäni eñagainäni inte mönämaï inäni. Pancadäniya wæætë waodäni cædäni beyænque babetamiñænäni badinque mönämaï inänipa. Ayæ pancadäniya guiquënë öönädë Awënë Odeye nempo beyæ ante nämä pönëninque Ao ante edæ mönämaï inänipa. Edæ æcänö botö änö eñente Ao äna, tömenganque mänömaï cæcæcäimpa, ante Itota odömongä eñengadänimpa.

Wëñcænäni inänite gampo cæcadinque waa apæncampa

(Mäadoco 10.13-16; Odoca 18.15-17)

¹³ Ayæ ate, Wëñænäni inänite Itota pönö gampo cæcadinque tömënäni beyæ Wængonguï ingante apænecæcäimpa, ante cædinque wadäni tömengä weca ænte pö ænte pö cædäni adinque tömengä miñæ në godäni guiquënë, Ænte pönämaï iedäni, äninque Baa Baa änäni. ¹⁴ Ate wædinque Itota iñömö edæ,

—Wëñænäni inänite ee amini poncædänimpa. Edæ mäninäni nani pönënö bai adobaï pönënäni inte edæ öönädë Awënë Odeye nempo do quëwënäni inänipa. Iinque

mīnitō iñōmō wēñænāni inānite Baa ānāmai iedāni.

¹⁵ Aninque wēñænāni inānite pædæ gopo gampo cæcadinque wadæ gogacāimpa.

Māincoo nē nanguī ēacā Itota weca ponte apænecampa

(Mäadoco 10.17-31; Odoca 18.18-30)

¹⁶ Ayæ wacā Itota weca pōninque,

—Awēnē nē Odōmōmi apænebi ēñēmoe, angantapa. Botō æbānō waa cæbo ininque cōwē wænāmai wantæpiyæ quēwēmaimoo.

¹⁷ Ante āñongā Itota edæ,

—Wængonguī adocanque nē waa cæcā ingā incæte bitō botō imonte āninque, Æbānō waa cæquīmo, āmii. Incæte, Quēwenguīmo, ante wæbi ininque bitō, Īimai cæedāni, ante Wængonguī nānō wææ angainō ante ēñente cæe.

¹⁸ Angā wædinque,

—Ædedō ante āmii.

Āñongante Itota wæætē,

—Īimai. “Wacā ingante godō wænōnāmai. Bitō nānōogængā ināmai iñongante godō mōnāmai. Wacā qui awēmō ænāmai. Wacā æbānō cæcā, ante godō babæ wapiticæ ānāmai. ¹⁹ Wæmpocā ingante wānā inante waa adinque godō waa cæe. Ayæ, Nāmā ante bitō waadete cæbi bai wadāni inānite adobai godō waadete cæe.”

²⁰ Angā ēñēninque edēningā iñōmō,

—Botō māninō bitō ānō bai do cæte pægaimo inte botō quīnō edæ godōmenque cæquīmo.

²¹ Āñongante Itota wæætē,

—Bitō, Ædæmō nō cæbo bacæboimpa, āmi ininque edæ öönædē bitō waëmoncoo ænguinque edæ ñōwo godinque imæca bitō mānincoo tōmancoo godonte æninque bitō æninta wæætē ömæpodāni inte wædāni inānite tōmanta godōmi æncædānimpā. Ayæ edæ botō imote tee empote pōe.

²² Angā ēñēninque edēningā iñōmō edæ, Botō māincoo, ante nānō nanguī ēacoo ante pōnente wæwente wædinque wadæ gogacāimpa.

²³ Gocā ininque edæ Itota tōmengā mīñæ nē godāni inānite apænedinque,

—Nāwangā āmo ēñēdāni, angantapa. Öönædē Awēnē Odeye nempo guīte quēwencæte ante cædinque waodāni ömæpodāni inte botō mīñæ pōnānimpā.

Māincoo nanguī ēacā guīquēnē æbānō cæte ömæpocā inte botō mīñæ ponte guīte quēwenguingā, angantapa. ²⁴ Ayæ cāmeyo iñōmō guīyangā ingampa diyæ daagō guīyampite pædæ tacā. Cāmeyo ñænængade inongā inte pædæ tadāmai ingā bai nē ēacā adobai ingampa. Tōmengā nāmā ayongā ñænængā inongā inte edæ æbānō cæte Wængonguī Awēnē Odeye nempo do wānē guīte quēwenguingā.

²⁵ Ante apænecā wædinque tōmengā mīñæ nē godāni wæætē ancai guīñēninque,

—Īñæmpā mānōmai ī ininque æcānō wānē guīte quēwenguingā, ānānitapa.

²⁶ Itota tōmēnāni inānite cōwā adinque apænecantapa.

—Waomīnique incæ nāmā mīni cædō beyænque ædō cæte quēwēmaimīni. Wæætē Wængonguinque nāmā tōmānō do cæcā ingampa.

²⁷ Angā ēñente wædinque Pegodo guīquēnē,

—Mōnitō iñōmō edæ mōni ēadincoo owæ caate bitō mīñæ ömæpomōni inte pōmōni abipa. Ömæpomōni imōni inte edæ quīnō ænguīmōnii.

²⁸ Āñongante Itota wæætē tōmēnāni inānite angantapa.

—Nāwangā āmopa. Botō badōmo ate tōmancoo mīncooque iinque bayonte botō Waobo ēñagaīmo iñōmō edæ tōmēmo ñāö emōnō emōninque edæ pō tæ contactæboimpa. Ininque mīnitō botō imote nē tee empogaimīni inte māñēdē ate tōmēmīni tæ containpaa tipæmpoga go mempaa pō tæ contadinque awēñēdi badinque edæ idægoidi tipæmpoga go men-cabodāniya inānite apænte ancæmīnimpā.

²⁹ “Ayæ godōmenque āmopa. Mīnitō nāwangā oncodo tao godinque mīnitō tōññadāni inānite emō cæte godinque badā inante mæmpocā ingante wēnāni inānite botō emōwo beyænque emō cæte pōmīnitapa. Ininque Īimai ante nāwangā āmopa. Æcānō botō beyænque mānōmai cædinque tōmengā nānō ēadi ömæ emō cæte goda iñōmō tōmengā nānō emō cæte godincoo bai adopocoo æncæcāimpa. Wīi adopogaque edæ æninque tōmengā wæætē edæ godōmenque adopocoo adopocoo æninque

tië ganca mänimpoga æncæcäimpa. Ayæ botö pönö cæbo æninque tömengä cöwë wantæpiyæ wænāmaī quëwencæcäimpa. ³⁰ Incæte edæ tåno yæcado ongönināni pancadāniya wæætë yæmiñæ gote ongönāni bacædānimpa. Ayæ yæmiñæ ongönināni inte wæætë yæcado ponte ongoncædānimpa,” ante Itota apænegacäimpa.

20

Në cædāni cæbānō cædānii, ante odömōnte apænecampa

¹ Itota ayæ edæ, Öönædë Awënë Odeye nempo æbānō quëwënānii, ante odömoncæte ante iīmaī apænegacäimpa. “Wacä nē ömæ ëacä nānō cæbaī Öönædë Awënë Odeye incæ adobaī cæcampa. Nē ëacä ñāö bayö oncodo taodique, Æcānō ñöwoönæ botö yowementacodë cæquīnaa. ² Ante adinque tömengä beyæ nē cæcædāni inānite, Mīnitö tömää itædë cæmīni ate botö adocanque ingante deënaio tigitamö adotamonque pönöninge wacä ingante wacä ingante adotamonque adotamonque pönömo æncæmīnimpa, añongante Ao ante yowementacodë cæcæ godānipa. ³ Gote cæyönāni tömantadæ æñonte nē ëacä tömēnāni nāni godonte æiñömö gote ayongä wadāni önonque cædāmaī a ongönāni. ⁴ Adinque tömengä, ‘Mīnitö adobaī gote cæmīni ate eyepæ godömo æncæmīnimpa.’ Angä ëñëninge Ao ante godānipa. ⁵ Ayæ tæcæbæcä iñonte adobaī tömengä wadāni inānite angä godāni ate wæætë ædæ wæicä iñonte adobaī taodique wadāni inānite angä godāni. ⁶ Ate edæ awæncabo wæiyongante edæ adocä tao ayongä wadāni önonque a ongönāni adinque tömengä tömēnāni inānite, ‘Quīnante tömää itædë edæ cædāmaī a ongömīni.’ ⁷ Ante añongä, ‘Iñæmpa mönitö imönite, Cæedāni, änānipa cæquīmönii.’ Änāni ëñëninge, ‘Mīnitö adobaī edæ botö yowementacodë gote cæedāni,’ angä godānitapa,” ante Itota odömōnte apænecantapa.

⁸ Ayæ, “Gäwadecæ pönī bayonte nē ëacä iñömö tömengä beyæ nē apænecä ingante äninque, ‘Botö beyæ nē cædāni inānite aa pebi pönāni ate bitö tömēnāni nāni cædi beyæ godömi eyepæ æncædānimpa.

Awæncabo wæiyongä ñöwo pönī gote cædināni inānite edæ tåno godömi ænāni ate wæætë wëenë gote cædināni inānite edæ ayæ ate godömi æncædānimpa.’ ⁹ Angä ëñente aa peyongä awæncabo wæiyongä gote cædināni inte tåno pönāni ate deënaio tigitamö adotamonque adotamonque godongä ænāni. ¹⁰ Ate adinque tåno gote cædināni guiquënë, Mönö godömenque ænguī impa, ante pönëñönāni tömengä godongä æninque edæ deënaio tigitamö incæ adotamonque adotamonque adopo adopo ænānipa. ¹¹ Æninque tömēnāni nē ëacä ingante piinte tededinque, ¹² ‘Mönitö tömää itædë nāwancate cæmōni incæ iñæmpa cæbii. Ayæ pönāni guiquënë wantæ iñö adoque ooda ganca cædāni incæ mönitö baī adopo godömi ænāni wæmönipa töö.’ ¹³ Ante piññönāni nē ëacä wæætë adocanque ingante apænedinque, ‘Iñæmpa botö bitö imite wënæ wënæ cæbogaa. Edæ, Deënaio tigitamö adotamonque pönömo æncæbiimpa, añömo Ao änāmaī imitawoo. ¹⁴ Bado, bitö quī incæ ænte goe. Edæ bitö æni baī ayæ ponte cædingä ingante adopo godonguënemo intabopa. ¹⁵ Edæ botö ëadincoo incæ, Æcānō ingante godonguimo, ante pönente wædinque ædö cæte tömëmo incæ änāmaī inguimoo. Botö nē waa cæbo iñömote bitö guiquënë edæ piinte abi awædö,’ ante nē ëacä angampa.”

¹⁶ Mäninganca ante odömōnte apænedinque Itota iñömö, “Mänömaī cædāni inique botö, Tåno yæcado ongönināni inte wæætë yæmiñæ gote ongoncædānimpa, antabopa. Ayæ, Yæmiñæ ongönināni inte wæætë yæcado ponte ongoncædānimpa, ante apænetabopa,” ante apænegacäimpa.

Itota, Wæncæboimpa, ante wæætë adodö ante apænecä

(Mäadoco 10.32-34; Odoca 18.31-34)

¹⁷ Mänii godinque Eedotadëe gocæ cædinque tömengä miñæ, Dote, ante nāni gocabo inānite Itota nänënë ænte mäodique idömæ goyönāni apænecantapa.

¹⁸ —Ñöwo iñömö edæ mönö Eedotadëe iñömö æicæimpa. Æi gote ongömö ate adocanque, Wacä nē ëñagaingä æyömönö ongongä, ante wadāni inānite

godö odömongä bæi ongonguinäni. Ayæ, Wængongui quï, ante nê godönäni ñænænäni tönö nê odömönäni nempo tömengä botö imote pædæ godongä æninqe tömënäni wæætë botö imote apænte äninqe, Cöwë wæncæcäimpa, ancædänimpa. ¹⁹ Ayæ edæ, Awæ ñænquedimæ cædinque tömengä ingante timpote wænödäni, ante tömënäni oodeoidi inämaï inäni nempo botö imote wæætë mäo godönäni æncædänimpa. Æninqe tömënäni wæætë botö imotedö ante badete todinque ayæ tæi tæi päninqe awäa timpodäni wæncæboimpa. Nãñe wæmo ate Wængongui angä beyænque botö meönaa go adoönæque iñonte ñäni ömæmoncæboimpa, ante Itota apænegacäimpa.

Tantiago tönö Wäö badä, Botö ämaï ante cæe, angampa

(Mäadoco 10.35-45)

²⁰ Tebedeo wëna Wäö tönö Santiago iñöna tömëna badä iñömö tömënä wëna tönö Itota weca ponte ædæ wææninqe edæ, Botö ämaï ante cæe, ante apæncä.

²¹ Eñëninque Itota,

—Minö quïnö apæncæte ante pömü.

Äñongante,

—Bitö Tæiyæ Awënë Odeye bate tæ contadinque edæ botö wëñæna inate ämi ate adocanque bitö tömëmæmi inö adocanque dipæmæmi inö tæ contaquïna ämopa, angantapa.

²² Eñëninque Itota wæætë,

—Iñæmpa adämaï inte mïnitö ämïni awædö. Botö nantate wæwenguimæ bai becabo bai minatö edæ adotaca becate bai Ao ante botö beyæ nantate wæwenguimäna. Edæ æpænë guiite bai botö wænguimæ bai guiñënämaï imïnapa diyæ botö beyæ wænguimäna.

Äñongante,

—Ao ante guiñënämaï cæcæmönaimpa, änatapa.

²³ Itota wæætë,

—Botö nanguï caate wæwëmo bai minatö adotaca bete bai äanque bai caate wæcæmïnaimpa. Näwangä impa. Incæte æcänö botö tömëmæ inö æcänö botö dipæmæ inö tæ contaquïna botö edæ pönö änämaï imopa. Wæætë botö Mæmpo do, Mänïnaque mänimpaa tæ contaquïna,

ante nê badongaingä inte tömengä adocanque godö angä contaquïna, ante Itota apænegacäimpa.

²⁴ Mänömaïnö ante tededapa töö, ante eñëninque wadäni diete ganca tömengä miñæ nê godäni guiquënë iñäna nana caya inate edæ piñänitapa. ²⁵ Piñäni ininqe Itota aa pecä pönäni ate tömënäni inänite iïmaï apæncantapa.

—Oodeoidi inämaï inäni awënëidi æbänö cædänipa, ante do eñëminipa. Tömënäni iñömö nämä beyænque ante cædinque nanguï piñte änäni wædinque tömënäni nempo quëwënäni wæætë do eñente cædänipa. Ayæ tömënäni weca nê ñænænäni inönäni iñömö, Tömëmoque ämo eñente cædäni, ante piñte änäni wædänipa. ²⁶ Mïnitö guiquënë tömënäni nämä beyænque ante nanguï änäni bai wïi adobai cæquënëmini imïnipa. Wæætë mïni cabo iñömini adocanque ñænængä pönï ingä bacæte ante cædinque tömengä wæætë edæ mïnitö beyæ nê cæcä baquënegä ingampa. ²⁷ Ayæ yæcado ongöinente wæcä iñömö tömengä yæcado ongoncæte ante cædinque wæætë edæ yæmiñæ pönï gote tömänäni inänite nê cæcä badinque tömengä nämä beyæ ante cædämaï inguënegä ingampa. ²⁸ Edæ Waobo eñagaïmo inte adobai, Botö beyæ pönö cæcædänimpa, ante wïi pömo imopa. Wæætë wadäni beyæ godö cæcæte ante pömoimpa. Ayæ edæ nanguï inäni tee mönete bai wæwëñönäni botö wæætë, Tömënäni wibænete tacædänimpa, ante tömëmo wepæ incæ godoncæte ante pömo imopa, ante Itota apænegacäimpa.

Babetamöna iñöna Itota gampomongä waa bamönapa

(Mäadoco 10.46-52; Odoco 18.35-43)

²⁹ Itota mänïnö godinque Eedicoo näni quëwëñömö ponte tayönäni tömengä miñæ nanguï inäni tee empote godänitapa. ³⁰ Goyönäni onguïñæna babetamöna iñömö taadö wedeca tæ contate a ongöñöna, Itota pongampa, änäni eñëninque aa pedatapa.

—Awënë, bitö Dabii wodi pæimi inömi inte mönatö imönate pönö waadete waa cæe.

³¹ Ante äñöna godongämæ godäni guiquënë, Apocænë inguënë quëwënaa, änäni incæ godömenque yedæ aa pedinque,

—Awënë, bitö Dabii wodi pæimi inömi inte mönatö imönate pönö waadete waa cæe, änatapa.

³² Itota iñömö næ gongæninque añecä pöna adinque,

—Mīnatö imīnate quīnō cæbo ämīnaa.

³³ Angä eñēninque,

—Awënë gampomömi awinca wi ænete bai aquimöna, ante wæmöna.

³⁴ Añöna Itota tömēna godongāmæ wæte bai pönēninque edæ pædæ gopo gampomongantapa. Gampomongä ate tömēna waa ada badinque Itota miñæ do godatapa.

21

Itota Eedotadēe iñömö pongampa

(Mäadoco 11.1-11; Odoco 19.28-40; Wäö 12.12-19)

¹ Mänii gote Eedotadēe obo pöninque Odi-bowænquidi ontacamö goimö Betapaguee nāni quēwēñömö ganca pöñönāni Itota tömengä miñæ næ goda mēnaa inate da godöninque angantapa. ² Tömēna inate,

—Mänii nāni quēwēñömö ongö amīna. Tömēñömö go guiite ayöminā bodo on-quiyæ nāna wencaya ñāni ñæi a ongö acæminaimpa. Ñāni ñæi a ongö adinque mīnatö mänina inate ñi cæyænte botö weca ænte pöeda. ³ Ayæ mīnatö imīnate wææ änāni eñēninque mīnatö wæætē edæ, Awënë nānō ænguēnēnō ante ænte gomōnapa, ante apæneeda. Ayæ, Tömengä iinque cæte ate do da pönongä æncæminimpa, ante apæneeda, angantapa.

⁴ Do iñömö Wængonguī beyæ næ apænegainö ante edæ iinque bacæimpa, ante mänömaī cætimpā.

⁵ “Tiöno iñömö quēwēnāni inānite iīmaī äedāni,

‘Badogaa, mīnitö Awënë Odeye ñöwo mīnitö weca pongä aedāni.

Edæ mönō mäincoo mongæwēnongä bodo wengäa tæ contate mönō Awënë pongampa.

Tömengä gänē pönengä inte bodoga contate pongä aedāni,’ ante ancæminimpa.”

Ante docä nānō apænegainö ante ñöwo iinque cætimpā.

⁶ Mänömainö ante angä eñēnte godinque tömengä miñæ næ goda iñömö Itota nānō äninö bai do cædinque, ⁷ bodo nāna wencaya inate töi töi ænte pöninque tömēna weocoo yabæcooque æidämæ wo cæyabæda ate Itota wænömēnæca inö æi yiyæ tæ contacantapa. ⁸ Adinque edæ nanguī ināni, Itota nānō ponguīnō, ante tömēnāni weocoo yabæcooque ñö cædinque bee podöwayönāni wadāni guiquēnē gönea gote yæpæma oñabo tapænte māmö bee bee podöwadāni ate tömengä podöwainonque gocantapa. ⁹ Gocä adinque täno godāni tönö ayæ pönāni tönö godongāmæ godinque nanguī ināni yedæ äninque,

—Bitö Awënë Dabii wodi pæimi inömi inte pömi adinque, Möni quēwenguinque impa, ante, Badogaa, ante tomönipa. Awënë Wængonguī emöwo beyænque pömi iinque bitö toquinque edæ Wængonguī bitö imite waa cæcæcäimpa. Ayæ öönæde iñömö adobai, Badogaa, möni quēwenguinque, ante ingæimpa.

¹⁰ Ante mänii cædinque pöñönāni, Itota Eedotadēe pongä adinque mäniñömö quēwēnāni ancaī guiñēninque,

—Māningä æcānō ingää.

¹¹ Ante wæyönāni godongāmæ pönāni iñömö,

—Itota ingampa. Tömengä iñömö Wængonguī beyæ næ apænegainö ante Gadideabæ Näatadeta quēwente pongä ingampa, ante apænegadānimpa.

Wængonguī oncö tæiyæ wæmö bacæimpa, ante cæcä

(Mäadoco 11.15-19; Odoco 19.45-48; Wäö 2.13-22)

¹² Itota iñömö Wængonguī oncö ñænæncönē yabæcönē pö guidinque mäniñömö mäincoo mänāni tönö wadāni næ godonte ænāni tönö ongönāni adinque tömengä tömänāni inānite, Oncodo taoedāni, äninque da tadongä oncodo tao godānitapa. Ayæ campio ante nāni godonte æimpa tönö equemö godoncæte ante næ mänāni nāni cönöimpa tönö bæ tacä tömampaa guidömēmæ tæ go wææntapa. ¹³ Ayæ tömēnāni inānite angantapa.

—Wængonguī beyæ iīmainö ante yewæmongatimpā. “Waadāni botö oncönē pö guidinque botö imote

apænecædänimpa,” ante Wængongui angä incæte mīnitō wēnæ wēnæ cæmīni beyænque Wængongui oncō incæ nē awēmō ō ænāni nāni womōincōnē bai wentamō bapa tōō.

¹⁴ Änīnque Itota ayæ Wængongui oncō ñænæncōnē yabæcōnē ongōñongä pæ opa pæ opa godāni tōnō babetamōnāni tōmengä weca pōnāni adīnque tōmengä godō cæcä ate waa badānitapa. ¹⁵ Mänōmaī mā cæcä waa badāni ate wædīnque, Wængongui qui, ante nē godōnāni ñænænāni tōnō nē odōmōnāni guiquēnē piinte badānitapa. Ayæ wēñænāni Wængongui oncō ñænæncō yabæque ongōnīnque yedæ änīnque, “Badogaa, Awēnē Dabii pæīmi īnōmi adīnque mōni quēwenguīnque impa,” ante Yæ änānitapa. Änāni ēñēnīnque nē godōnāni ñænænāni tōnō nē odōmōnāni ængui badīnque ¹⁶ Itota ingante änānitapa.

—Wēñænāni æbānō änāni ēñēnāmaī īmitawo.

Äñōnāni Itota,

Do ēñēmopa. Īñæmpa mīnitō guiquēnē Wængongui beyæ ante īmainō ante yewæmōnte ongō adāmaī inte anewēmīnitawo. “Bitō tæcæ ēñadāni tōnō goōmæ nē gānāni īnānite apænebi ēñente, tōmēnāni Ao ante nō pōni tededīnque, Wængongui tæiyæ wæmō ingānō, ante watapæ apænedānīpa.”

Mänōmainō ante yewæmōnte ī apa anewēmīnīi.

¹⁷ Änīnque Itota edæ tōmēnāni īnānite emō cæte wadæ godīnque Betānia nāni quēwēñōmō gote mongacāimpa.

Iigowæ ömæcawæ ī adīnque Itota pūngampa

(Mäadoco 11.12-14, 20-26)

¹⁸ Nāō bayō Eedotadēē nāni quēwēnō gāmænō adodō pōnīnque Itota gæwænte wæcantapa. ¹⁹ Gomō adīnque iigowæ a ongō ponte ayongä õñaboque emæ adīnque,

—Ömæcabi īmi cōwē incadāmaī incæbiimpā.

Äñongä iigowæ incæ guiñē wænīmpa.

²⁰ Guiñē wæ adīnque tōmengä miñæ nē godāni īñōmō,

—Quīmæ iigowæ īñontobæ guiñē wæ amōō.

²¹ Ante wæyōnāni Itota īñōmō edæ,

—Nāwangä ante mīnitō īmīnite apænebopa. Wīi æmæ pōnēmīni inte wede pōnēmīni īnīnque mīnitō iigowæ inte botō cæbaī adobaī do cæbaīmīni. Ayæ godōmenque cædīnque mīnitō ānanquidi ongō ate, “Ānanquidi ēñēmi, änīnque, Bitō cabænte wo gote gæwapænē guīie,” ante ämīni īnīnque edæ mīnitō änīnō bai do babāimpā. ²² Wængongui ingante wede pōnēmīni īnīnque quīēmē incæ ante tōmengä ingante apænēmīni incæ mīni änīnō tōmānō æncæmīnīmpa, ante apænegacāimpā.

Awēnē īmīpa, ante æcānō ānāi, ante Itota ingante änānīpa

(Mäadoco 11.27-33; Odoco 20.1-8)

²³ Itota ayæ Wængongui oncō ñænæncōnē yabæcōnē pō guīdīnque odōmōnte apænecä ēñēñōnāni, Wængongui qui, ante nē godōnāni ñænænāni tōnō ood-eoidi īnānite nē aadāni, Nāni Picæncabo, nāni änāni tōnō tōmengä weca pōnīnque änānitapa.

—Æcānō nē angä inte bitō īmite angä cæbīi. Īñæmpa, Nē ämi bacæbiimpā, ante æcānō pōnō āna ēñente nē ämi inte bai cæbīi, ante ēñencæte ante wæmōnīpa.

²⁴ Änāni ēñēnīnque,

—Mīni āmaī botō adodeque ämo ēñēnīnque mīnitō tāno apænēmīni ēñente ate māniñedē ate botō wæætē, Æcānō nē āna inte pōnō angä cæboo, ante apænebo ēñēmaīmīnīpa. ²⁵ Wäō wodi ingante guiquēnē, Bitō æpænē guidoncæbiimpā, ante æcānō āna ēñente guidongāi, ante pōnēmīnīi. Wængongui oōnædē apænecä ēñente cæcantawo. Wæætē edæ waodānīque änāni ēñente cæcantawo. Ædō ante pōnēmīnīi.

Itota angä ēñēnīnque tōmēnāni nāmāneque wæætēdō wæætē tedecōnīnque, “Wa, æbānō anguii, ante wædānitapa. Īñæmpa, Wængongui angä ēñēnīnque Wäō cægacāimpā, ämō bai Itota wæætē mōnō imōte, ‘Quīnante pōnēnāmaī īmīnitawo,’ ancædongāimpā,” ante wædānitapa. ²⁶ Wæætē edæ, “Waodāni tōmānāni, Wængongui beyæ nē apænecä Wäō wodi ingacāimpā, ante pōnēnānīpa, ante pōnente wædīnque Itota ingante nē änāni īñōmō, Wadāni pīnāni wæcæ wæ,

äninque, Waodäninque änäni eñente Wäo cægacäimpa, ante mönō ædō cæte anguii.”

²⁷ Ante pönëninque tömënäni Itota ingante edæ,

—Wa, eñënëmaï imönipa.

Ante wæyönäni Itota edæ,

İninque botō adobaï, Æcänō nē angä inte pönō angä cæboo, ante mīni äninō ante apænedämaï incæboimpa, angacäimpa.

Mæmpocä wëna æbänō cæda, ante odömongampa

²⁸ Itota odömoncæte ante apænedinque,

—Mīnitō guiquënë odömonte tedebo ate ämo eñente apænemīni eñëmoedäni. İmaï impa. Waocä tömengä wëna mēnaa iñōna adocanque weca godinque mæmpocä iñömō, “Botō wëmi, bitō ñöwoönæ yowementacodē cæte pöe.” ²⁹ Äñongä edæ, “Wīi goinēmo,” angampa. Wæætē edæ ayæ ate pönencöninque edæ, Botō ædō cæte Baa äninque quëwëmoo, ante pönëninque edæ mæmpocä nänō äninō ante eñëninque edæ cæcæ gocampa. ³⁰ Ayæ ate mæmpocä wæætē wacä wengä weca adobaï mao äñongä tömengä edæ, “Bitō mæmpobi ämi eñente gocæboimpa,” ante apænecä incæte edæ godämaï ingampa. Mäninque ante tedebo. ³¹ Ñöwo mīnitō imīnite ämopa, Mæmpocä nänō änō baï æcänō cæcäi, ante pönëmīni.

Äñongante,

—Tänocä.

Ante apæneyönäni Itota tömënäni inänite wæætē,

—Nawangä ämopa. Mīnitō Awënë Wængongui Odeye nempo pö guidämaï iñöminite odömāno awënë beyæ nē æwënäni tönō onquiyænäni mæincoo beyæ ante nē towente quëwënäni tönō täno ponte do guicædänimpa. ³² Edæ Wäo wodi mīnitō weca ponte nō cæte töinō ante odömōñongante mīnitō iñömō pönëmīnitawogaa. Ayæ godömenque awënë beyæ nē æwënäni incæ mæincoo beyæ ante nē towente quëwënäni tönō incæ do pönënanipa. Ayæ mīnitō mänömaï cædäni adimīni incæte wæætē wënæ wënæ mīni cædinō ante wædämaï inte wīi pönëmīnitapa töö, ante Itota apænegacäimpa.

Në aadäni inguënänäni incæ wīwa cædänipa, ante

(Mäadoco 12.1-12; Odoca 20.9-19)

³³ Ayæ godömenque apænedinque Itota, “Wængongui Awënë æbänō cæcää, ante eñencæminimpa, ante botō imæca quëwënäni nāni cæinō ante odömonte apænebo eñëedäni. Edæ iimaï impa. Ömæ äcä yowementacodē da da mao da caate wææ cædinque, Tömëmō ænte pinä pinä gawate wæ yopænte tömëmæ ænguiñömō ante cædinque ææ wote badongantapa. Ayæ, Yowementacodē awëmō guidämaï incædänimpa, ante cædinque æi wænömænæca gomō aquinñömō mænongä ate nē äcä iñömō wabæca gocæ cædinque wadäni ömæ wite nē aate tä pedäni inänite apænecantapa. Botō yowementacodē incæ mīnitō ömæ wite aedäni. Aayöminite botō, Mīnitō qui, ante pancamonga pönömo æncæminimpa, angä Ao äñönäni wadæ gocantapa. ³⁴ Ayæ yowedepo wodo bayonte tömengä ingante nē cædäni inänite, Mīnitō yowementacodē nē aadäni weca godinque botō yowemō incæ pancamonga ämīni æninque botō weca wæætē mämömīni æmoedäni, angä godänitapa. ³⁵ Angä godinque pönäni adinque yowementacodē nē aadäni guiquënë nē æncæ pönäni inänite bæi ongöninque adocanque ingante nanguï tæi tæi päninque wacä ingante godömenque wænönäni wængä ate ayæ wacä ingante dicaca tacadäni. ³⁶ Adinque mao apænedäni wædinque nē äcä iñömō wæætē godömenque nanguï inäni da godongä gote pönäni adinque nē aadäni guiquënë adobaï cædäni wædänitapa.”

³⁷ Ayæ godömenque odömöninque Itota apænecantapa. “İninque nē äcä iñömō, ‘Tömëmo wengä ingante da godömo gocä adinque tömënäni guiñente wædinque ee abainänipa,’ äninque tömengä ingante da godongä tömengä pönī gocantapa. ³⁸ Yowementacodē nē aadäni guiquënë gomō ayönäni nē äcä wengä dicæ pongä adinque, ‘Tömengä ingampa. Wæmpocä mæincoo ini edæ lingä iñömō nē ænguingä ingampa cæmöö. Mönō edæ mao wænömō wængä ate edæ mönō qui babaimpa.’ ³⁹ Änewëninque tömënäni nē äcä wengä

ingante edæ bæi ongonte yowementacodē wææ cæte iñōmō yabæque edæ, Ömæe, ante wænōnāni wængantapa.”

⁴⁰ Ante māninganca odōmonte apænedinque Itota iñōmō tōmengā ingante nē ānināni inānite angantapa. “Iñinque mīnitō iñōmō, Nē ēacā pōninque edæ yowementacodē nē aaquēnēnāni inānite æbānō cæquingāā, ante pōnēmīni.”

⁴¹ Ante añongante tōmēnāni wæætē,

—Ömæe, ante nē wænōnīnāni inānite tōmengā nāēmæ edæ, Ömæe, ante wæñongā wæncædānimpa. Ayæ wæætē, Ædānidō nō cædinque yowedepo iñō yowedepo iñō tā pete pōnōnāni ænguimoo, ante adinque awēnē, Mīnitō wæætē aacæmīnimpa, angā Ao ante aacædānimpa, ante apænedānitapa.

⁴² Itota ayæ tōmēnāni inānite,

—Wængonguī angā ēñente nāni yewæmonga æbānō ongō ante mīnitō adāmaī inte āmīni awædō, angantapa.

“Dica ænte adinque, Wēnæ wēnæ inca, ante nē mænōnāni nāni wido cædinca incæ gomonga waēmonca inca iñinque tāno nāni ñōnōnīnca bæbængapa do bacapa.

Wængonguī Awēnē incæ mænōmaī cæcā adinque mōnō waocabo guñente wædinque waa amompa,”

Ante yewæmonte impa abaimīnīpa.

⁴³ Māninō mīni ēñēnāmaī inō beyæ mīnitō Awēnē Wængonguī Odeye nempo quēwente mīni cæquēnēnō incæ ō ænte baī cæcā wæcæmīnimpa. Ayæ wæætē wadāni inānite tōmēmō wainca incate baī nō cædāni inānite godō angā ēñēnīnque tōmēnāni wæætē tōmengā nempo quēwente waa cæcædānimpa. ⁴⁴ Botō iñōmō māniī dica waēmonca baī inōmo inte āmo ēñēnīnque nē wæcā iñōmō tōmengā iñōmō mānīnca tæ go wæænīnque wædænque tobænte wæcā baī inongā inte botō ōnōwa gāānē ædæ wææncæcāimpa. Wæætē æcānō ingante Wængonguī piinte mānīnca tacacā inaa tōmengā guiquēnē quiēmē baī yaintai baī goquīnō anguēnē, ante pōnēmīniyaa.

⁴⁵ Ante nē aaquēnēnāni nāni cæinō ante odōmōnīnque Itota apænecā ēñente wædinque, Wængonguī qui, ante nē godōnāni ñænænāni tōnō Paditeoidi iñōmō,

Iñæmpa mōnō imonte piinte angā awædō, ante pōnente wædinque, ⁴⁶ Quīnō cæte tōmengā ingante bæi ongonte ō ænguī, ante cōwā adānitapa. Incæte, Waodāni tōmānāni, Wængonguī beyæ nē apænecā Itota inongā ingampa, ante pōnēnānīpa, ante wædinque, Piināni wæcæ wæ, ānīnque edæ ñimpo cægadānimpa.

22

Monguimæno ante odōmonte apænecampa (Odoca 14.15-24)

¹ Wængonguī Awēnē æbānō cæquingāā, ante ēñencæmīnimpa, ante imæca awēnē nānō cæinō ante Itota tōmānāni inānite wæætē odōmonte apænegacāimpa.

² “Inguipoga awēnē odeye tōmengā wēñæ beyæ monguimæno ante nānō cæcā ōnōnædē Awēnē Odeye iñōmō adobaī cæcampa. ³ Inguipoga awēnē iñōmō tōmengā ingante nē cædāni inānite, Wēēnē botō ānināni inānite wente ænte pōedāni. Angā tē tē wente ænāni ēñēnīnque edæ,

Wīi pōinēwædō, ānāni. ⁴ Eñente wædinque awēnē wæætē wadāni tōmengā ingante nē cædāni inānite da godōnīnque, ‘Wēēnē botō ānināni weca godinque botō beyæ iimainō ante apænemīni ēñencædānimpa. Botō wengā monguimæno ante wagadaidi onguīñænāni tōnō cænīnāni oguimo pōni ināni inānite do wænōnīnque botō ææmænoca do eyepæ cæbopa. Botō wengā monguimæno pō beedāni, ante mæmpocā angampa, ante edæ botō beyæ apæneedāni.’ ⁵ Angā ēñēnīnque gote apæneyōnāni tōmēnāni ēñēnāmaī inte ōnonque wadæ godinque pancadāniya gōnea ante goyōnāni wadāni godonte æncæte ante godānitapa. ⁶ Wadāni ayæ ongōnāni guiquēnē ēñēnāmaī inte awēnē nānō da godonte nē cædāni inānite piinte wēnæ wēnæ cædāni wæyōnāni māo wænōnāni wænānitapa.”

⁷ “Mænōmaī cædāni ate wædinque awēnē odeye iñōmō āingā badinque tōmengā tontadoidi inānite angā ēñēnīnque nē wænōnīnāni inānite māo capo wænōnāni. Wænāni adinque godōmenque onconcoo tōmēnāni nāni ēadincoo iya tānāni. ⁸ Iñinque edæ awēnē wæætē tōmengā

ingante nē cædāni inānite, ‘Monguimæno do eyepæ cæte ongō incæte botō nē ānināni waa cædānipa diyæ āmo bequīnānii. ⁹ Īninqe mīnitō wæætē edæ iyænompoga iyænompoga māo godinque æcāmenque ingante bee tēninqe tōmēnāni tōmānāni inānite āmīni ææmæno pō becædānimpa.’ ¹⁰ Angā ēñente cædinque nē cædāni taadonque pō bee bee bee tēninqe waa cædāni incæ wīwa cædāni incæ tōmānāni inānite āñete ænte māmōnāni pō monguimæno oncōnē pō guiidinqe eyede goto gongænte bedānitapa.”

¹¹ Ayæ, “Awēnē odeye iñōmō ēñacæ pō bedāni inānite acæ guiyongā edæ adocanque monguimæno bequī weocoo awēnē odeye nānō pōnōnincōo incæ wēñadāmaī inte ōnoncooque ee mongængā. ¹² Adinque, ‘Æmigo, bitō ædō cæte monguimæno weocoo wēñadāmaī inte ōnoncooque ee mongænte guibii,’ ante āñongā edæ pæ wēnecā. ¹³ Adinque awēnē odeye iñōmō nē aadāni inānite āninqe, ‘Nē monguimæno weocoo wēñadāmaī ingā ingante mīnitō goti wimpote wææ goti wēwate edæ wēmō iñōmō nāni guingo imonte Yæ yæ ante wæyōmō māo wido cæedāni,’ ante awēnē odeye angampa. ¹⁴ Mānōmaī nāni cædō baī adobaī impa. Edæ nanguī ināni inānite Wængonguī, Pōedāni, angā incæte edæ wædænque ināni inānite apænte Ao ante ængampa,” ante Itota apænegacāimpa.

*Tæiyæ Awēnē nānō āintamō ante ted-
edānipa*

(Māadoco 12.13-17; Odoca 20.20-26)

¹⁵ Itota mānōmaī apænecā ēñente wædinque Paditeoidi wadæ godinque godongāmæ ponēē cōninqe, Mōnō piinte apænte anguinque ante quīnō cæmō ate Itota adodeque wapiticæ tededinque oda cæquingā. ¹⁶ Ante pōnēninqe tōmēnāni nē ēmīñænāni tōnō Edodeidi inānite da godōnāni godinque Itota weca pōninqe,

—Awēnē nē Odōmōmi ēñēmi. Bitō nō pōnente cæbi ĩmipa, ante do ēñēmōnipa. Ayæ bitō ayōmi mōnitō tōmāmōni ōnōmōnique ĩmōni adinque bitō, Waodāni æbānō anguīnānii, ante ayæ, Æbānō cæquīnānii, ante wædāmaī inōmi inte edæ Wængonguī

taadō ante guīñēnāmaī inte nō odōmonte apænebipa. ¹⁷ Īninqe bitō æbānō pōnēmii. Odōmāno gobiedōno beyæ ante tæiyæ awēnē Tetædo tiguitamō nānō ānintamō ante æbānō wææ yewæmonte ĩ, ante ēñencæte ante wæmōnipa edæ. Godonte edæ waa cæte intawo. Wæætē wēnæ wēnæ cæte intawo, ante apænebi ēñencæmōnimpa.

¹⁸ Āñōnāni Itota iñōmō tōmēnāni do, Cæmō wapiticæ tedecæcāimpa, ante nāni ānīnō ante do ēñēninqe tōmēnāni inānite wæætē edæ,

—Mīni wadō tedete wadō cæcabo iñōmō edæ quīnante botō ĩmote, Æbānō cæmō oda cæquingā, ante cæmīnii. ¹⁹ Tetædo tiguitamō nānō ānintamō odōmōmīni aquīmo.

Āñongā deēnadio tiguitamō adotamonque ænte pōnāni. ²⁰ Adinque tōmēnāni inānite Itota,

—Æcānō awinca baī yewæmonte badonte ĩ. Edæ æcānō ēmōwo ante yewæmonte ĩ.

²¹ Āñongante,

—Awēnē Tetædo awinca baī yewæmonte badonte impa. Adocā ēmōwo ante yewæmonte ongō amōnipa.

Ānāni ēñēninqe Itota iñōmō edæ,

—Awēnē Tetædo quī ĩ ĩninqe edæ Tetædo ingante godongæimpa. Wæætē Awēnē Wængonguī quī ĩ ĩninqe Wængonguī ingante godonguī ĩ apa ānewēmīnii.

²² Ante Itota nānō ānīnō ēñente beyæ, Quiēmē baī angā, ante ancai guīñente wædinque wadæ gogadānimpa.

*Ædō cæte ñāni ōmæmonguī, ante
wædānipa*

(Māadoco 12.18-27; Odoca 20.27-40)

²³ Māñiōnæ adoōnæ iñōnte Tadoteoidi nē, Waocā wæninqe ñāni ōmæmōnāmaī æmæwo wængampa, ante nē ānewēnāni inte Itota weca pōninqe, ĩmāinō ante ēñencæte ante wæmōnipa, ānānitapa.

²⁴ —Awēnē nē Odōmōmi ēñēmi. Mōitee wodi mōnō beyæ ante wææ yewæmōninqe ĩmaī ante yewæmongacāimpa. Waocā mōninqe wēñæ tapæidāmaī inte wængā ate tōmengā tōñīnacā wæætē owæmpoingā ingante mōninqe wēñæ tapæidinque, Botō tōñīnacā wodi wengā

ingampa, ante pæpogacæcäimpa, ante yewæmongacäimpa. ²⁵ Nöwo iñömö möni cabo iñömönite adodäni näni caipæ önompo æmæmpoque go mänaa inäni iñönäni bamoncadengä möninqwe wëñæ tapæidämai manguiwëninque edæ näñe wængä ate ayæmengä wæætë owæmpodingä ingante mongä. ²⁶ İninqwe ayæmengä incæ adobaï wëñæ ömæpocä näñe wængantapa. Ayæ wææ wacä ayæmengä adocä ingante monte ate wëñæ adobaï tapæidämai inte edæ näñe wængantapa. Ayæ wææ wacä adobaingä, ayæ wææ wacä tapæidämai inte näñe, ayæ wææ wacä, ayæ wææ ayæmengä pöni adocä ingante möninqwe wëñæ tapæidämai inte näñe wængantapa. ²⁷ Onquiyængä guiquënë owæmpote wædinque tömangä pöni näñe wængantapa. ²⁸ İninqwe, Mönö ñäni ömæmonguiönæ, ante mini äönæ iñonte mäningä owæmpoingä iñömö æcänö nänöogængä baquingä. Edæ tömengä ingante iñömö edæ tömänäni manguiwengadänimpa. ²⁹ Äñönänite Itota wæætë,

—Minitö iñæmpa. Wængongui angä eñente näni yewæmöinta adämai inte baï ämini awædö. Wængongui adocanque tæi piñængä inte edæ tömää cæcampa, ante pönënamäi inte edæ oda cæte ämini awædö. ³⁰ Edæ Wængongui anquedoidi öönædë cöwë owodäni baï inönäni inte waodäni ñäni ömæmöninqwe godö ñänönämai inäni inte edæ mönämai inguinänidö anguënë. ³¹ Wæætë do wængainäni näni ñäni ömæmonguinö ante eñencæminimpa, ante Wængongui beyæ yewæmonte ongö adämai iminitawo. ³² “Botö iñömö Abadäo Wængonguimo ingaimo inte ayæ Itæca Wængonguimo ingaimo inte botö Aacobo Wængonguimo adobo imo anguënë,” angacäimpa. Ante nê angaingä inte edæ æmæwo wæninäni tömënäni Wængonguingä ædö cæte inguingä. Wæætë edæ miï quëwënänique tömënäni Wængongui inongä ingampa. İninqwe edæ nê wænte godinäni incæ ayæ miïnäni quëwënäni inänipa, ante pönenguënë änewëminii.

³³ Ante apænecä eñëninque godongämæ

eñengönäni guiquënë, Æbänö cæte Itota waa pöni odömonte apænecä eñëmönii, ante wægadänimpa.

Wængongui nänö wææ angäine mänea tæineda pöni ënepa

(Mäadoco 12.28-34)

³⁴ Tadoteoidi guiquënë, Ædö cæte gomonga anguii, ante edæ pæ wënedänitapa. Mänömai Itota nänö nö äninö beyæ pæ wënedänipa, ante tededäni eñëninque Paditeoidi wæætë godongämæ pönänitapa. ³⁵ Itota æbänö cæte wapiticæ ämaingä, ante pönëñönäni adocanque idægoidi näni wææ angainö ante nê ate eñëngä iñömö Itota ingante angantapa.

³⁶ —Awënë nê Odömömi eñëmi. Wængongui, İimai cædäni, ante nänö wææ angäinecöo ante pönëninque ædedö tæine pöni i iñonte mönö nangui eñente waa cæquii.

³⁷ Äñongante Itota iñömö,

—İimainö ante nänö wææ angäine iñömö edæ tæine pöni iñonte mönö nangui eñente waa cæcäimpa. “Wængongui mönö Awënë ingante bitö mimö entawente waadedinque bitö ocäi encabi inte nö pönëninque bitö önöwoca ewocabi inte edæ tömengä ingante ædæmö waa waadete pönë.”

³⁸ Mänine nänö wææ angainö waa pöni i ininqwe mänine täno waa cæqui impa.

³⁹ Ayæ wade nänö angainö adobaï nangui waa eñente cæqui impa. “Bitö nämä bitö waadete waa cædö baï adobaï pönëninque wadäni inänite adobaï waa waadete cæe.”

⁴⁰ İimai cædäni, ante Möitee wodi nänö wææ angainö ayæ Wængongui beyæ nê apænädäni näni angainö cæcæte ante cædinque edæ mänine Wængongui mänea nänö wææ angäine eñente cæte beyænque edæ tömänö edæ do eyepæ cæte impa, ante Itota apænecäimpa.

Codito æcänö pæingä inongä ingä, ante apænecampa

(Mäadoco 12.35-37; Odoca 20.41-44)

⁴¹ Mänii Paditeoidi adoyömö ponte ayæ ongöñönäni Itota tömënäni inänite angantapa. ⁴² Itota iñömö tömënäni inänite,

—Codito iñömö æcänö ingä, ante pönëmini. Æcänö Wengä inongä ingä, ante pönëmini.

Ante añongante Paditeoidi wæætē,
—Awënë Dabii pæingä inongä ingampa.

⁴³ Añönänite Itota edæ,

—Awënë Dabii pæingä inongä iñongante edæ Dabii tömē edæ Codito ingantedō äninque quinante, Awënë imipa, angacäimpa.

⁴⁴ “Awënë Wængonguī incæ botō Awënë ingante apænedinque,

Botō tömēmæ inō tæ contayōmi, bitō imite nē pīināni inänite bæ tabo ate bitō önōwa gäänē ongöñönänite bitō pinä gäwacæbiimpa, angacäimpa.”

Ante Wængonguī Önōwoca apænecä eñëninque Dabii wodi yewæmongacäimpa.

⁴⁵ Codito nē Awënë ingampa, ante awënë Dabii wodi nänō nē angaingä inongä inte edæ adocä Codito iñömō ædō cæte näemæ Awënë Dabii wodi pæingä inguingää, ante pönenguënë anewemīni.

⁴⁶ Ante añongä edæ tömänäni, Mönō ædō cæte wæætē anguūi, äninque eñënämaī inte edæ pæ wëenegadänimpa. Ayæ iincayæ ate, Apænebi eñëmōni, ante ædō cæte anguūmoo, ante edæ tömänäni guiñente wædinque änämaī ingadänimpa.

23

Paditeoidi tönō nē odömönäni inänite Itota pīinte angä

(Mäadoco 12.38-40; Odoca 11.37-54, 20.45-47)

¹ Pæ wëenedäni adinque tömengä miñæ nē godäni godongämæ ongönäni nanguū inäni tönō ongöñönänite Itota tömänäni inänite apænegacäimpa.

² “Nē odömönäni tönō Paditeoidi iñömō Möitee wodi nänō angainō ante nē eñënäni inte nē nō odömōnte apænedäni inänipa. ³ Mänōmaī inäni adinque mīnitō iñömō tömënäni äninō ante tömänō ante cōwē eñente cæedäni. Wæætē tömënäni nāni cæi bai cædämaī iedäni. Edæ, iīmaī cæedäni iīmaī cæedäni, ante nāni änō ante tömënäni nāmä incæ eñënämaī cædänipa. ⁴ Edæ mæincoo teëmencoo mö paate wadäni önönancapæ cō cædancapæänäni bai cædinque tömënäni, Wadäni guëmancædänimpa, ante cædämaī inäni inte önompogonca adopogoncaque incæ gä ænancapæänämaī inänipa.”

⁵ “Quiēmē cædäni incæ tömënäni cōwē, Wadäni botō imote waa acædänimpa, ante cædänipa. Wadäni, Bitō Wængonguī beyæ nāni yewæmongainta nanguū abi imipa, ante pönëninque mōnitō imönite waa acædänimpa, ante babæ cædinque mäninta æmontaicate nænæ pōni badonte mīni tente önoncaipoga wo cæte encapodänipa. Ayæ, Bitō Wængonguī ingante nanguū apænebi imipa, ante pönencædänimpa, ante cædinque tömënäni weocoo nā cæwate nā cæwate doyæ guënë ewa badöninque doyæ pōni wëñate mongænänipa. ⁶ Ayæ ææmæ becæ godinque tömënäni, Botō täno bete tocæboimpa, ante waëmompaa pōni tæ contate bete todänipa. Ayæ Wængonguī angä nāni eñente yewæmongainta ate odömöincönē pō guiddinque tömënäni nāmanque ante pönëninque waëmompaa pōni tæ contate todänipa. ⁷ Ayæ wadäni nāni godonte æiñömō wainō pancadē goyönäni wadäni pō bee tēninque, Nē odömōmi, bitō imite waa amönipa, ante apænedäni eñëninque edæ nē odömönäni iñömō nanguū todänipa,” ante Itota apænecantapa.

⁸ Ayæ apænedinque, “Mīnitō guiquënë mīnitō Awënë nē Odömōngä adocanque pōni iñongä mīni caipæ iñömōnīte wadäni, Awënë nē odömōmi imipa, ante änämaī incædänimpa, ante wææ cæedäni. ⁹ Ayæ mönō Mæmpo adocanque pōni öönædē quëwengä ingä adinque mīnitō waocä ingantedō ante apænedinque, Mönō mæmpo ingampa, ante änämaī iedäni. ¹⁰ Ayæ, Mönō Awënë nē Odömōngä iñömō adocanque pōni Codito inongä ingampa, ante eñëmīni iñömōnīte wadäni, Nē ämi imipa, ante änämaī incædänimpa, ante wææ cæedäni. ¹¹ Ayæ edæ mīni cabo iñömōnīte wacä beyæ wacä nē godō cæcä iñömō nænængä pōni ingä incæcäimpa. ¹² Edæ nāmä ængö cæte bai cædinque æcänō, Botō botō, äna tömengä iñömō edæ wææntodonte bai önonque bacæcäimpa. Wæætē æcänō, Botō botō, änämaī inte, Önōmoque imopa, äna iñömō edæ tömengä ingante ængö cæte bai cædäni adinque wadäni tömengä ingante waa acædänimpa,” ante Itota tömengä miñæ nē godäni inänite apænegacäimpa.

13 Ayæ nē odömönäni tönö Paditeoidi inänite Itota piinte angantapa. “Minitö iñömö mini pante wæquinque edæ wadö tedete wadö cæmini iminipa. Wadäni öönæde Awënë Odeye nempo guidämaï incædänimpa, ante minitö odemö tee mönete bai wææ cæminipa. Tömëmini guidämaï imini inte minitö wadäni guicæ cæyönänite edæ tömënäni nani guidämaï wæquinque edæ wææ cæminipa. 14 Nē odömömini tönö Paditeoidi imini mini wadö tedete wadö cædincabo inte mini wæquinque impa. Owæmpoinäni oncö ö æmini incæte minitö, Wantæpiyæ botö tedebo beyænque wadäni botö imote waa acædänimpa, ante Wængongui ingante wantæpiyæ nē tedemini inte godömenque mini panguinque ingæimpa,” ante Itota angacäimpa.

15 Ayæ apænedinque, “Nē odömömini tönö Paditeoidi imini mini wadö tedete wadö cædincabo inte mini wæquinque. Edæ, Adocanque incæ mönitö emiñængä bacæcäimpa, ante minitö æpæ tömämæ wogaa gote diqui diqui mininque inguipoga taadö tömänö gote diqui diqui minte ayömini adocanque Ao angä adinque minitö tömengä ingante godö odömömini. Eñëninque tömengä guiquënë minitö wënæ wënæ goquinö godömenque godinque gomonga nē wënæ wënæ cæcä badinque tadömengadænguipo nänö gomonga panguinque minitö miñæ tee empote gocampa töö.”

16 Ayæ, “Babetamömini mini wæquinque babæ ante mäomini ate edæ oda cæte godänipa. Iñæmpa iïmaï anewëminipa. ‘Botö änö nöingä baquinö anguënë, ancæte ante æcänö, Wængongui tæiyæ waëmö oncö tæi ongö bai impa, äna tömengä önonque tedete apænecampa, ante anewëminipa. Wæætë edæ, Wængongui tæiyæ waëmö oncö oodo mäë ongö bai impa, ante æcänö äna guiquënë tömengä nö angä inte cæcæcäimpa,’ ante minitö iñömö babæ wapiticæ äminipa. 17 Mini babetamö incabo mimö ömæde incædö. Edæ Wængongui tæiyæ waëmö oncönë oodo öñö adinque, Oodo incæ godömenque waa pönï impa, ante babæ ante pönëminipa. Iñæmpa oodo æninque, Wængongui oncö

waëmö emonguinta, ante ænte badönäni beyænque oodo tæiyæ waëmö bapa, ante pönëminiyaa.”

18 “Ayæ edæ minitö babæ apænedinque, ‘Botö änö nöingä baquinö anguënë, ancæte ante waocä, Wængongui qui, ante baö nani iya täimpaa tæi ongö bai impa, ante æcänö äna önonque tedecampa. Wæætë mäninö ancæte ante, Baö iya täimpaa nani iya tanguingä bai impa, ante æcänö äna iñömö tömengä nö ante cæcæcäimpa,’ ante minitö babæ wapiticæ äminipa. 19 Mini babetamö incabo ämini eñëmoedäni. Ædö waa intawo. Nani iya täimpaa incædö tæiyæ waëmö intawo. Wæætë edæ baö nani iya tanguingä incæ tæiyæ waëmö intawo. Æbänö ante pönëmini. Iñæmpa baö æninque, Wængongui qui, ante iya tänäni beyænque baö näwäaquiringä bacampa, ante pönëminiyaa. 20 İninque, Botö änö nöingä baquinö anguënë, ancæte ante waocä, Nani iya täimpaa tæi ongö bai impa, ante æcänö äna tömengä, Iya täimpaa tönö baö nani iya tanguingä tönö tömää beyæ, ante bai dobæ angampa. 21 Ayæ æcänö, Wængongui tæiyæ waëmö oncö beyænque ante näwangä baquinö anguënë, äna tömengä Wængongui oncö beyæ ayæ mänincönë nē owocä beyæ adobai dobæ angampa. 22 Ayæ æcänö, Öönæde beyænque näwangä baquinö anguënë, äna tömengä edæ Wængongui nänö containpaa beyæ ayæ containpaa nē Contacä beyæ adobai dobæ angampa,” ante apænegacäimpa.

23 Ayæ apænedinque Itota, “Nē odömömini tönö Paditeoidi incæ mini wadö tedete wadö cædincabo inte mini wæquinque impa. Tömëmini mini minte pædimö tönö guimö ogui wayabo tönö tömëmö mini tä pete ænimö tē gæte diete ganca mini cabo tē gædincoo ñö cædinque adocooque æninque, Wængongui qui, ante godöninque waa cæminipa. Incæte edæ Wængongui, Nö cæedäni, ante nänö änö ante, Godö waadete waa cæedäni, ante nänö änö ante, Wede pönente cæedäni, ante nänö änö ante minitö mini wæquinque eñente cædämaï iminipa. Iïmaï täno waa cæquënëmini inte minitö mänincoo ayæ godömenque Wængongui ingante godömini inguënëmini iminipa.

²⁴ Babetamömini babæ ante mäomini ate edæ oda cæte godänipa. Minitö, Diete ganca minitö mäincoo ongö adinque adocooque cöwë godongui i, äninque owætaca bequifñömö guincawæ owoyö tæ wedote bai cæminipa. Wæætë edæ Wængongui nänö änö bai cädämaï inte minitö edæ cämeyo ñænængade pöni owoyö önonque ade bete bai pönënamäi inte cæminipa, ante awædö,” ante Itota apænégacäimpa.

²⁵ Ayæ nê odömönäni tönö Paditeoidi inänite godömenque äninque tömengä, “Mini wadö tedete wadö cæcabo inte mini wæquinque impa. Owæta tönö cængæ yabætaque ñongate bai minitö wadäni ayönäni nê waa cæmini inte wæætë edæ cæncadenta inö wentaga engate bai cæminipa. Mini wacä qui ö æinënö ayæ nämanque ante mini towënö beyæ owæta cæncadenta inö opogö tagate eyede bai impa diyæ. ²⁶ Bitö Paditeobi babetamömi eññemi. Cæncadenta inö täno ñä mënongabi ininque yabæta inö ñongate wainta baquinö anguënë,” angacäimpa.

²⁷ Ayæ, “Nê odömömömini tönö Paditeoidi incæ mini wadö tedete wadö cædincabo inte mini wæquinque impa. Minitö wao wodido bai yabæque waëmö paate bai iñonte cæncadé inö wao bayetoca ñömænte öö wayömö bai entawëmömini iminipææ. ²⁸ Ininque wadäni yabæque adinque, Minitö nö entawëmömini iminipa, ante pönëñönäni minitö wiwa mini pönënö beyæ wadö tededinque wadö cædinque edæ mimö wentamö entawëmömini,” ante Itota piingacäimpa.

²⁹ Tömënäni inänite ayæ piinque, “Nê odömömömini tönö Paditeoidi incæ mini wadö tedete wadö cædincabo inte mini wæquinque. Edæ Wængongui beyæ nê apænégainäni wodido, ante minitö do mænönominipa. Ayæ, Nê nö cægainäni wodido, ante mænöninque minitö oncontai waëmö pöni paadominipa. ³⁰ Ayæ, ‘Mæmæidi nani quëwengaiñedë quëwëmöni bai mönitö tömënäni tönö, Wængongui beyæ nê apænëdönäni inänite mäo wænönämäi inte ee quëwencædömönimpa,’ ante äminipa. ³¹ Mänömainö ante apænëdinque minitö, Wængongui beyæ nê apænégainäni inänite nê wænongainäni pæimöni imönipa, ante nämä incæ edonque pöni apænte

äminipa. ³² Edæ minitö wæmæidi nê wænongainäni inte nani pe ñiñængaimämo wii eyepæ inte bai cædinque minitö ñöwo godömenque eyede pe ñiñænte bai capo wænömæwedäni,” ante Itota badete bai angacäimpa.

³³ Ayæ äninque, “Mini tæntæcabo pæimöni bai imöni eññedäni. Mini obecabo pæimöni bai imöni eññedäni. Minitö tadömengadænguipo mini pante wæquënënö ante æbänö cæte aamö cæte edæ tabaiminijaa. ³⁴ Ininque Wængongui beyæ nê apænëdäni tönö nê nö eññänäni tönö nê odömönäni inänite botö ñöwo minitö weca da pönömo pönänipa. Adinque minitö iñömö edæ pancadäniya inänite wænömömini wæncædänimpa. Pancadäniya inänite minitö awäa timpomöni wæncædänimpa. Ayæ pancadäniya inänite minitö odömöincönë bæi ongöninque tæi tæi päimöni caate wædinque tömënäni wayömö quëwënäni weca wayömö quëwënäni weca wodii goyönäni minitö tee empo tee empo togænte goquimöni, ante awædö. ³⁵ Mänömaï wënæ wënæ cæyömöni edæ ñöwomöni beyænque tömäa inguipoga wepæ aa bedinque näate baquimönidö anguënë. Edæ Adäo wodi wengä Abedo nê nö cægängä wepæ tönö ayæ quëwente nê eññente cædäni inänite godö wænönäni wængainäni tönö tömënäni tömänäni wepæ beyæ minitö näate wæcæminimpa. Ayæ minitö Wængongui oncö ñænæncö boyæ iya täimpaa gäänë ongöninque Bedequiya wengä Tacadiya ingante godö wænömömini wängä ininque tömengä wepæ näate wæminipa. ³⁶ Nöwomöni mini wepæ näate wæquinque tömanguipo aa betinö anguënë, ante ämo eññedäni,” ante Itota tömënäni inänite idæwaa piinte apænégacäimpa.

Eedotadëë quëwënäni beyæ ante Itota wæcampa

(Odoca 13.34-35)

³⁷ Ayæ Eedotadëë iñömö quëwënäni beyæ ante pönëninque Itota, “Eedotadëë quëwëmöni eññedäni, angantapa. Wængongui beyæ nê apænëdäni inänite mini wænongaincabo inte ayæ Wængongui nänö da pönönäni inänite dicaca tacamöni iñöminite botö iñömö minitö iminite waadete pönö cæinente nanguï wæbopa.

Tawadiya wæmönä iñömö, Botö wënäni, ante gompodinque tæcæenëmæ wëä pönö ö ænä bai botö adobai, Botö wënäni pöedäni, ante æpogadö äñömote minitö, Wii pöinente awædö, ante Baa ämini wætabopa. ³⁸ Nöwo iñömö edæ mini quëwëñömö önonconcoque baconcoo tamëñedäni. ³⁹ Nöwo iñömö edæ botö dæ äñömo minitö, 'Awënë Wængongui ëmowo beyænque pöinque bitö toquinque edæ waa cæcæbiimpa,' ante mini anginganca minitö edæ botö imote adämaï incæminimpa ante ämo ëñeedäni," ante Itota apænegacäimpa.

24

Wængongui oncö ñænæncö bæ tate bacæimpa, ante

(Mäadoco 13.1-2; Odoca 21.5-6)

¹ Itota Wængongui oncö ñænæncö oncodo tao gocantapa. Wadæ gocæ cæyongä tömengä miñæ në godäni iñömö, Wængongui oncö ñænæncö æbänö waa pönï mænonte ii, ante odömoncæte ante tömengä weca pönäni. ² Ate wædinque Itota wæætë,

—Minitö guiquënë mänincoo tömancoo edæ waa aminitawo. Näwangä ante minitö iminite apænebopa. Mänincoo mini acoo incæ tömanca bæ tadäni wæænca adinque panguimæ panguimæ godinque dica adocaque pönï incæ wænömënæca ongönämaï ingæimpa, ante apænegacäimpa.

Oo iinque bacæimpa, ante æbänö ate ëñenguüi, ante

(Mäadoco 13.3-23; Odoca 21.7-24, 17.22-24)

³ Mänii taodinque Odibowænquidi pö æite tæ contate ongöñongä tömengä miñæ në godäni adodänique tömengä weca ponte apænedänitapa.

—Bitö änö ante æyedënö iinque baquüi, ante ëñencæte ante wæmönipa. Edæ bitö ponque æyedënö ponguimii, ante ayæ mönö inguipoga quëwënö æyedënö æmæwo iinque baquüi, ante ëñencæte ante wæmönipa. Iinque, Æbänö mä odömönte bai ba adinque edæ, Oo pönï impa, ante wædinque ëñenguimönii, ante ëñencæte ante wæmönipa.

⁴ Äñönäni Itota,

—Wapiticæ odömöñönäni minitö wæætë, Mönö oda cædämaï ingæimpa, ante nämä wææ aquënë quëwëminii. Edæ iimaï baquüi i ataquedäni. ⁵ Edæ wadäni nanguü inäni botö ëmowo ante babæ tedete pöinque, "Botö Codito inömo imopa," ante apænedinque wapiticæ mäodäni godinque edæ nanguü inäni tömënäni miñæ oda cæte wapiticæ gocædänimpa. ⁶ Edæ, Wabæca awënë tönö pö bee téninque wæætedö wæætë cædapa, ante tededäni ëñencæminimpa. Ayæ wayömö nani guëadö guëa cæte wænönö ante tededäni incæte edæ guïñente wædämaï iedäni. Edæ mäninö botö äninö bai cöwë bacæimpa. Ba incæte mönö inguipoga quëwënö iñömö mäniñedë wii æmæwo iinque bacæimpa. ⁷ Adobæca quëwënäni iñönänite wabæca quëwënäni ponte bee téninque guëadö guëa cæquinäni inänipa. Adobæca awënë odeye nempo quëwëñönänite wabæca awënë odeye tömengä nänö ënempodäni mämö bee téninque guëadö guëa cæte wænonte wænguinäni inänipa. Ayæ waodäni nani cæinente wænguinque cængui incæ tömäa capo wængæimpa. Ayæ wayömö wayömö goinque pö wæcædänimpa. ⁸ Incæte mänii nani wæwënö ba iinque edæ önonque mä pönï nani wæwenguü inguinö angüënë.

⁹ Mänömainö ante Itota godömenque apænegacäimpa. "Mäniñedë edæ minitö iminite mini wæquinque ö ænte mäo godönäni wæyömini godömenque wænönäni wæncæminimpa. Ayæ mäniñedë botö ëmowo apænemini beyæ tömämaë quëwënäni minitö iminite püincædänimpa. ¹⁰ Ayæ adoyedë mini pönencabo incæ pancadäniya guingo imonte bai badinque edæ pönënämaï inte Baa anguinäni. Ayæ mini cabo incæ näemæ püinque pancadäniya, Nänö wænguinque, ante wacä ingante näemæ godoncædänimpa. ¹¹ Ayæ në babæ ante apænedäni ponte, Wængongui beyæ në apænemöni imönipa, ante odömönäni adinque pancadäniya edæ oda cæte wadö pönente baquinäni inänipa. ¹² Ayæ ëñënämaï inte nani cæpämö godömenque yebænte bai nanguü ba ate wædinque në pönëninäni inte wodo tömänäni edæ Baa äninque waad-

edāmaī bacædānimpa. ¹³ Edæ æcānō iīmæca iinque baganca wæntædāmaī inte botō ãmōwo beyæ piinte badāmaī inaa tōmengā edæ botō æmo beyænque cōwē wænāmaī quēwencæcāimpa. ¹⁴ Ayæ edæ, Awēnē Odeye nempo watapæ quēwengæimpa, ante mīni pōnencabo tōmāmæ quēwēnāni inānite māo apænemīni ēñencædānimpa. Mānōmaī apænedinque iinque cæmīni ate māniñedē ate edæ iinque baquinō anguēnē,” ante Itota tōmengā miñæ nē godāni inānite apænegacāimpa.

¹⁵ Ayæ apænedinque Itota, “Iinque, Wængonguī beyæ nē apænegaingā Daāniedo wodi, Ñōmæī bai oō wadō nāni wo ēwenguīmāmo incæ Wængonguī oncō tæiyæ waëmoncōnē ænte māmō cō cæquinānidō anguēnē, angacāimpa. Daāniedo nānō yewæmongainta adinque nē adingā iñōmō tōmengā do ēñēmaingampa. Iincayæ ate mānōmaī cō cædāni ongō adinque, ¹⁶ māniñedē Oodeabæ quēwēmīni iñōmō edæ ānanquidi do wodii wīnonte æibæwedāni. ¹⁷ Ayæ oncōmanca ongōmīni iinque māincoo æncæte ante oncōnē wæi guidāmaī inte oncōmancaque oncōmancaque wodii wīnōmæwedāni. ¹⁸ Ayæ tōmēmoncodē cæmīni iinque yacoo æncæte ante oncōnē ocæ ãmænāmaī inte godōmenque wodii wīnōmæwedāni. ¹⁹ Māniñonæ iinque bayedē nē yædēmadā ināni tōnō goōmæ nē gānōnāni tōnō tōmēnāni nāni wæquīmāmo baquinō anguēnē. ²⁰ Ayæ mīnitō mīni wodii wīnonguīonæ ante pōnēninque edæ Wængonguī ingante, Wīi edæ cōonædepo bacæimpa, ante ayæ, Guēmanguīonæ iñonte badāmaī ingæimpa, ante ædāni. ²¹ Edæ māniñedē waodāni nanguī nāni wæwēmāmo nāni angā baquinō anguēnē. Edæ Wængonguī nānō badongaiñedē mānōmaī nāni wæwēmāmo bai dæ ānonte ayæ godōmenque ñōwo ganca dæ ānompā. Ayæ godōmenque iinque baganca mānōmaī nāni wæwenguīmāmo bai dæ anguīnō anguēnē. ²² Edæ wantæpiyæ nāni wæwenguī impa, ante adinque Wængonguī, Mānimpoōnæque edæ wæwencædānimpa, ante pōnōmenque ante ānāmaī ingā bai quingānō quēwenguēnē

dæ ancædōnānimpa. Incæte, Nē quēwenguīnāni botō angaināni wīi wantæpiyæ wæwencædānimpa, ante cædinque Wængonguī dobæ pōnōmenque āninque, Idæwaa impa, ancæcāimpa,” ante Itota apænegacāimpa.

²³ Ayæ, Iinque bayonte æbānō inguīi, ante apænedinque Itota godōmenque iīmaī ante apænecantapa. “Māniñedē wadāni mīnitō iimīnite, ‘Iñōmō mōnō Codito ponte ongongā tamēñedāni,’ ante ayæ, ‘Wayōmō ponte a ongongā atamōnīpa,’ ante tededāni ēñēninque mīnitō iñōmō edæ ēñēnāmaī imæwedāni. ²⁴ Wadāni māniñedē ponte a ongōninque nāmā incæ ante, Tōmēmo Codito inōmo imopa, ante babæ ante tedequināni. Ayæ, Wængonguī beyæ nē apænebo inōmo imopa, ante babæ ante tedequināni. Tōmēnāni, Wængonguī nānō apænte ængaināni incæ æmæwo oda cædinque wapiticæ gocædānimpa, ante cædinque bamōnengæ bai cædinque oōnædē cæi bai cædinque nō odōmonte bai cæquināni inānipa. Incæte Wængonguī nē apænte ængaingā inte edæ ee aquingā diyæ æmæwo oda cædinque wapiticæ goquinānīi. ²⁵ Edæ iinque badāmaī iñonte botō ñōwo do apænebo ēñēdāni. ²⁶ Iinque, pōnente quēwēñōmīni wadāni, ‘Cōwā aedāni, ñōmæca mæ ongongampa,’ ante ānāni ēñēninque mīnitō acæ taodāmaī iedāni. Ayæ, ‘Oncō guimongacōnē a ongongā apa quēwēdāni,’ ante ānāni incæte pōnēnāmaī iedāni. ²⁷ Edæ nænque tamōnō gāmænō nāininque guidō gāmænō quingæ gote bai edæ tōmānāni edonque ayōnāni botō Waobo ēñagaīmo inte botō ponque poncæboimpa. ²⁸ Edæ abadæidi ñōmæingāa weō pōnāni bai mīnitō tōmāmīni adoyedē iñontobæ botō weca ponguīmīni imīnipa,” ante Itota apænegacāimpa.

Waocā ēñagaīgā iīmaī pōninque cæcæcāimpa, ante

(Māadoco 13.24-37; Odoca 21.25-33, 17.26-30, 34-36)

²⁹ Ayæ godōmenque apænedinque Itota, “Māniī nāni wæwēmāmo nāni angā iinque go ate nænque iñontobæ wēmō badinque apāicā apāidāmaī ingæimpa. Nēmōncoo oōnædē inō wææ tæ wæænīnque waa

tæ waa tæ wæængæimpa. Öönædë tæi ongongaincoo incæ wancæ wancæ cæte bai wapiticæ goquino anguene. ³⁰ Mäniñedë ate botö Waobo në eñagaïmo inte oo põñoömo öönædë ate bai ba adinque wabæca nani cabo wabæca nani cabo tömämæ quewenani Ca ca wæcædanimpa. Wæyönani botö Waobo në eñagaïmo inte boguimancodë mämö põninque botö tæi põni piñæmo inte ñäo apæite bai waemö emonte wææmo acædanimpa. ³¹ Mäniñedë todompeta mönö ancadeca yedæ ænete bai we öönonte botö anquedoidi inänite da godömo godinque tömënani boguimä æmænö betamonca æmænö betamonca nänö põ goinö godinque öönædë tömæne godinque edæ Wængongui nänö apænte ængainani inänite añete poncædanimpa,” ante Itota apænecantapa.

³² Ayæ, “Wængongui Awenë æyedënö ponguingää, ante botö iigowæ æbänö iwæ ante odömonte apænebo eñeedäni. Tömewæ müiwæ badinque iigowæ wayabo tänä nä boca adinque minitö, Öñabo nänö bocaïnepo inte nænque näwantedæ baquinque bocapa, ante põneninque edæ do eñemïnipa. ³³ Ayæ adobai mäninö botö apænedinö bai edæ do ba adinque minitö, Waocä në eñagaingä iñömö edæ do odemö põni ongöninque edæ oo poncæcäimpa, ante eñencæminimpa. ³⁴ Näwangä ämopa. Nöwomïni ayæ müimïni queweninque wænte godämaï iñömïni mäninö botö apænedinö bai tömänö edæ do iinque baquino anguene. ³⁵ Öönædë ongöñömö inguipoga tönö wo ewente bai dæ ba incæte botö angainonque guiquenë edæ dæ badämaï inte edæ cöwë tæi ongongæimpa,” angantapa.

³⁶ Ayæ, “Mäniönæ æyedënö i, ante, Mänïnepo ædepodö i, ante eñencæte ante mini wædinö ante æcämenque incæ eñenämaï ingampa. Tömänani eñenämaï iñönani edæ Wængongui anquedoidi incæ eñenämaï inänipa. Wæmpocä Wëmo incæ eñenämaï iñömote Wæmpocä iñömö tömengä adocanque incæ edæ në eñengä ingampa,” ante Itota apænegacäimpa.

³⁷ Ayæ godömenque iïmaï ante apænecantapa, “Waobo në eñagaïmo inte botö ponguionæ iinque bayedë guiquenë Nöwee wodi

Docä nani angaingä nänö quewenëdë dodäni nani quewengai bai adobai edæ quewenguinani inänipa. ³⁸ Mäniñedë æpæ ayæ änämaï iñedë në quewengainani iñömö ononque cænte bete, Monguingä, ante godonte ate möninque tömënani Docä Nöwee oncö bai wipo mænonte nänö guiquionæ iinque baganca quewencægadanimpa. ³⁹ Tömënani inänite æpæ ænte gocæ cæganca tömënani, Æpæ anguimpa, ante eñenämaï nani quewengai bai adobai eñenämaï cæyönani botö Waobo eñagaïmö inte adobai edæ iñontobæ poncæboimpa. ⁴⁰ Mäniñedë waoda tömëmoncodë guëa cæyöna adocanque ingante ö ænani goyongä adocanque wæætë a ongoncæcäimpa. ⁴¹ Ayæ onquiyæna guëa apo cæyöna adocanque ingante ö ænani goyongä adocanque wæætë a ongoncæcäimpa,” ante Itota odömonte apænecantapa.

⁴² Ayæ, “Awenë æyedënö ponguingää, ante eñenämaï imïni inte minitö müimïni inte edæ cöwä aquenë quewenani. ⁴³ Në awemö ængä æyedënö ponguingää, ante eñente bai në eacä iñömö, Bæ tate guidämaï incæcäimpa, ante wææ wänoncædongäimpa, ante eñente queweedäni. ⁴⁴ Wao Wëmo eñagaïmo inte botö adobai minitö eñenämaï iñömïni do iñontobæ ponguimo imo ante minitö botö ponguino ante wänö cöedäni,” ante Itota angacäimpa.

Awenë quincoo ante në cædëmö aacä (Odoca 12.41-48)

⁴⁵ Ayæ Itota iïmaï apænecantapa. “Inguipoga awenë iñömö, Æcänö në eñengä inongä inte botö quincoo ante ædëmö aacä inguingää, äninque, Mänömaï inte cæcä ingante adinque botö ämo ate tömengä në angä badinque botö oncönë quewenani inänite ædëmö aadinque cængui eyepæ iñonte godongä cæncædanimpa, angampa. ⁴⁶ Ante awenë wayömö gote ponte ayongä, Në cæcä botö änö ante eñente cæcampa, ante adinque awenë wæætë tömengä ingante godö waa cæcä tömengä ingante godö waa cæcä ate në waa cæcä iñömö edæ waa tocæcäimpa. ⁴⁷ Minitö imïnite näwangä ante apænebopa. Në eñente cædingä ingante

awënë, Bitö botö mäincoo tömancoo edæ nē aabi bacæbiimpa, ancæcäimpa.”

48 “Wæætē edæ tömengä ingante nē cæcä incæ wēnæ wēnæ cæcä inongä inte mīmōno pōnēwēninqe, Botö awënë wabänö wantæpiyæ pōnāmaī imaingampa, ante pōnengä ininqe æbänö babai. 49 Tömengä edæ wadäni nāni cæcabo iñōnānite näēmæ pūininqe tæi tæi pangä ininqe ayæ nē tī nāmæ bete quidi quidi dowænte badäni tōnō godongāmæ cænte becä. 50 Ininqe tömengä, Æönædö ponguingää, ante wædāmaī iñongante, Æyedēnō ponguingää, ante eñēnāmaī iñongante edæ awënë iñontobæ pongä wæbaingampa. 51 Pōninqe awënë iñōmō eñēnāmaī cædingä ingante baö wido wido todinqe tömengä ingantedö äninque, Nē wadö tedete wadö cædināni nāni panguinö gote tömēnāni tōnō godongāmæ ongonte wæcæcäimpa. Ante cædinque awënë tömēnāni nāni guingo imonte Ca ca wæyōmō wido cæcä wæcæcäimpa,” ante Itota apænegacäimpa.

25

Baquedäni nāni cæinö ante odömongampa

1 Mäninganca apænedinqe Itota ayæ godōmenque odōmonte apænegacäimpa. “Māniñedē öönædē Awënë Odeye nempo quēwēnāni iñōmō baquedäni diete ganca nāni cæi bai adobai cæcædänimpa. Baquedäni iñōmō, Edëningä ñōwoönæ monguingä, ante tica enēincade æninque tömengä ingante bee tencæte ante tao godänipa. 2 Baquedäni incæ tömēnāni tinco ganca ināni nē eñēnāni iñōnāni edæ adoganca tinco ganca ināni nē eñēnāmaī ināni inänipa. 3 Nē eñēnāmaī ināni guiquēnē tömēnāni tica enēincade æninque gongapæncade ænāmaī goyōnāni, 4 nē eñēnāni guiquēnē gongapæncadedē godö pe ñiñænte gongapæ eyepæ ænte godänipa. 5 Mänōmaī ænte gote ayōnāni nē monguingä wantæpiyæ pōnāmaī dæ angä adinqe tömēnāni tömānāni edæ möinente ædo ædo cædinque mö ñōnänipa.”

6 “Mö ñōñōnāni ayaönæñēña pōni bayonte edæ, ‘Nē monguingä pongä ataqueedäni. Tao bee tenguēnē quēwēmīni.’ 7 Ante aa pedäni eñēninque edæ baquedäni

tömānāni ængæ gantidinqe, Tica enēincade waēmō tī wodōnote bacæimpa, ante wadæ wadæ cædänipa. 8 Cæyōnāni nē eñēnāmaī ināni guiquēnē nē eñēnāni inānite, ‘Mōnitö tica enēincade edæ wodo mōnæ emōmpa cæmīni. Mīnitö næænīmæ incæ pancapāa pōnōmīni æncæmōnimpa.’ 9 Äñōnāni, ‘Iñæmpa, mōnitö beyæ mīnitö beyæ adobai wīi eyepæ imaimpa, ante awædö. Edæ godoncæte ante nē mānāni weca gote godonte æedäni.’ 10 Änāni eñente godonte æncæ goyōnāni edæ nē monguingä do pongä adinqe nē eñente eyepæ næænīnāni iñōmō monguingä tōnō godongāmæ monguimæno oncōnē becä guidäni ininqe edæ odemö tee mönete intapa. 11 Ayæ ate edæ wadäni gongapæ eyepæ ænte pōñōnāni do tee mönete i adinqe tömēnāni, ‘Awënë, awënë eñēmi. Odemö wi ænebi guimōnie.’ 12 Ante wæyōnāni awënë wæætē, ‘Mīnitö imīnite näwangä ämopa. Mīnitö æmīnidö imīni, ante botö cōwē adāmaī imopa,’ angampa.” Mäninqe ante odōmoncæte ante Itota iimāi angantapa.

13 “Mīnitö guiquēnē, Æönædö i, æyedēnō i, ante eñēnāmaī imīni inte edæ wänö conte quēwēedäni,” angacäimpa.

Tadento nāni godonte cæinta ante odömongampa

(Odoca 19.11-27)

14 Ayæ æbänö baquīi, ante odōmoncæte ante Itota, Waocä nē ëacä nänö cæi bai bacæimpa, ante apænegacäimpa. “Nē ëacä wayōmō gocæte ante cædinque tömengä ingante nē cædäni inānite äñete māmōngä pōñōnānite, Botö ëadinta incæ pōnōmo æninque mīnitö nē aamīni badingue botö beyæ godonte æncæmīnimpa. 15 Äninque nē ëacä iñōmō, Nē cædäni æbänö nangui cædinque aaquīnāni, ante adinqe tadento ñænængade nāni godonte æinta incæ adocanque ingante önompo æmæmpoque mänimpota pædæ pōnōninque wacä ingante tadento mentaa mänimpota pædæ pōnōninque wacä ingante tadento ado- taque pædæ pōnongampa. Ayæ wadæ gocä. 16 Ininqe tadento önompo æmæmpoque mänimpota nē æningä iñōmō do godinqe godonte æ godonte æ cædinque önompo

æmæmpota tömengä nänö ænimpota adopota æñongä edæ tadento önonpo tipæmpoga bapa. ¹⁷ Ayæ tadento mentaa nē æningä adobaï godonte æ godonte æ cædinque mentaa nänö æninta adopota wæætē æñongä edæ tadento mēa go mēa bapa. ¹⁸ Wæætē adotaque nē æningä guiquēnē tömengä wadæ godinque onguipodē ææ wodinque awēnē godonte æinta æninque tee moncate wē wodongampa,” angantapa.

¹⁹ Ayæ, “Wantæpiyæ ate tömēnāni awēnē adodö pöningue, Botö qui eyepæ æncæboimpa, ante cædinque tömēnāni nāni ænte aadinta ante cōwä acantapa. ²⁰ Önonpo æmæmpo que tadento nē æningä iñömö edæ æmæmpota adopota nänö godonte æninta ænte pöningue awēnē ingante, ‘Awēnē, bitö botö imote, Aacæbiimpa, ante tadento önonpo æmæmpo que mänimpota pædæ pönömi æntabopa. Æninque botö godonte ænte godonte ænte edæ nanguï cædinque edæ mänimpota adopota æmæmpota dobæ æmoï ae.’ ²¹ Angä wædinque tömengä awēnē iñömö, ‘Badogaa. Botö imote nē cæbi inömi inte bitö ædæmö aabi inte ñöwo waa cæbi æmopa. Bitö wædænque æninque cōwē ædæmö aabi adinque botö ñöwo nanguï pönï botö éadincoo pönömo æninque bitö wæætē edæ nē aabi bacæbiimpa. Botö bitö awēnē inömo inte watapæ tote quēwēmo iñömote bitö edæ äänömonque bai bitö watapæ tote quēwenguinque pöe,’ angantapa.”

²² “Ayæ mēa tadento nē æningä adobaï pöningue, ‘Awēnē, bitö botö imote, Aacæbiimpa, ante tadento mentaa mänimpota pædæ pönömi æninque botö godonte ænte godonte ænte edæ nanguï cædinque edæ mentaa mänimpota adopota dobæ æmoï ae.’ ²³ Angä wædinque tömengä awēnē iñömö, ‘Badogaa. Botö imote nē cæbi inömi inte bitö ædæmö aabi inte ñöwo waa cæbi æmopa. Bitö wædænque æninque cōwē ædæmö aabi adinque botö ñöwo nanguï pönï botö éadincoo pönömo æninque bitö wæætē edæ nē aabi bacæbiimpa. Botö bitö awēnē inömo inte watapæ tote quēwēmo iñömote bitö edæ äänömonque bai bitö watapæ tote quēwenguinque pöe,’

angantapa.”

²⁴ “Ayæ ate edæ adotaque nē æningä wæætē pöningue, ‘Awēnē, bitö nē waadedämaï cædömi inte bitö wii gadiñömö wayömö incæ edæ do wogaabipa. Ayæ bitö wii miñömö wayömö incæ edæ do tä pete gæte bai æmipa, angantapa. ²⁵ Ìninque botö edæ ancai guiñente wædinque edæ tao godinque onguipodē ææ wote bitö tadento daga wëninque edæ wë wodontabopa. Bado, bitö qui incæ edæ do æmipa,’ angantapa.”

²⁶ “Angä eñente wædinque tömengä awēnē wæætē, ‘Botö imote nē cæbi inömi inte bitö wiwa pönemi inte wæntæye cæbi abopa. Botö æbänö gadämaï iñömö do wogaabopa, ante bitö edæ do eñemitapa. Botö minämaï iñömö do tä pete gæbopa, ante bitö äninö edæ do eñenimi inte cæbitapa töö. ²⁷ Ìninque mäninö ante do eñenimi inte bitö edæ padata botö godonte æinta æninque edæ nē godonte ænāni weca godonte ænguēnēmi imitapa töö. Mänömaï cæbi bai botö ocæ emænte pöningue edæ botö qui do æninque wadāni nāni guidöninta tönö edæ do æncædömoimpa töö.’ ²⁸ Äninque tömengä ingante nē cædāni inänite awēnē angantapa. ‘Minitö ñöwo iingä tadento adotaque tömengä nänö nææninta ö æninque edæ tadento önonpo tipæmpoga nē næængä ingante pædæ godömini æncæcäimpa. ²⁹ Edæ nē éadāni inänite tömānāni inänite godömenque godonte ingæimpa. Ìninque tömēnāni qui nanguï éacædänimpa. Wæætē edæ éadämaï inte ömæpocä ingä guiquēnē tömengä nänö éadincoo wædænque pönï i incæte edæ ö ænte dæ ba wæcæcäimpa. ³⁰ Ayæ edæ mäningä botö imote nē cædingä incæ wæntæye inongä inte cædämaï iñongante mīnitö wēmö iñömö nāni guingo imonte Ca ca wæwēñömö tömengä ingante edæ guitodonte wido cæmini wæcæcäimpa,’ ante tömengä awēnē angampa.”

Tömämæ quēwēnāni inänite apænte angæimpa, ante

³¹ Itota mänömainö ante odömonte apænedinque godömenque apænegacäimpa. “Botö anquedoidi tönö godongämæ pöningue botö Waobo nē eñagaimo inte ñöo

apäite bai në emömo inte poncæboimpa. Mäniñedē botō pōñedē botō Awēnē tæ contaimpaa tæ contadique edæ öönædē waa pōni ongonāni bai waa pōni ongoncæboimpa. ³² Mäniñedē tōmāmæ quēwēnāni botō weca godongāmæ ponte a ongoncædānimpa. Ayæ në aacā tōmengā cænināni inānite apænte adinque bodegoidi æmænō cōnōninque cabodaidi æmænō nānō cōnōnō bai cædinque botō iñōmō edæ imæca quēwēnāni tōmānāni inānite apænte adinque pancadāniya inānite æmænō gōnōninque wadāni inānite æmænō gōnōmo ongoncædānimpa. ³³ Obegaidi bai në eñente cædāni inānite botō tōmēmæ inō gōnōninque wæætē cabodaidi bai në eñēnāmaī cædāni inānite botō dipæmæ inō gōnoncæboimpa.”

³⁴ “Gōnōninque botō Awēnē Odeyebo inōmo inte botō tōmēmæ inō në ongonāni inānite ancæboimpa. ‘Botō Mæmpo nānō në waademini inte pōedāni. Tōmengā ingui-poga nānō badongaiñedē āninque, Awēnē Odeye nempo mini quēwenguinō impa, ante do badongacāimpa. Ininque Awēnē Odeye nempo mini quēwenguēnēnō ñōwo ænte quēwēdāni. ³⁵ Edæ botō gue ænente wæyōmo mīnitō cænguī në pōnōmīni cængaboimpa. Tepæ gæwænte wæbo adinque mīnitō në pōnōmīni begaboimpa. Botō Wabo imo inte cowodē bai pōmo adinque mīnitō, Pō guī, āmīni eñēninque mīnitō weca guīte eñagaboimpa. ³⁶ Ayæ ömaabo inte wæyōmo mīnitō pōnōmīni wēñagaboimpa. Wēnæ wēnæ inte wæyōmo mīnitō ponte në waadete cægāimīni imīnīpa. Tee mōnete oncōnē ongonte wæwēñōmote botō weca eñacæ në pongāimīni inōmīni inte mīnitō ñōwo wæætē edæ botō nempo guīte quēwencæmīnimpa,’ ancæboimpa.”

³⁷ “Ämo eñēninque edæ në nō cædāni guiquēnē, ‘Awēnē iñæmpa æyedēnō bitō gue ænente wæyōmi dicæ pōnōmōni cæmitawogaa, ancædānimpa. Ayæ tepæ gæwæñōmi dicæ pōnōmōni bebitawogaa. ³⁸ Æyedēnō wacā incæ pōmi adinque mōnitō dicæ, Pō guī, antamōniyaa. Ayæ ömaabi adinque dicæ pōnōmōni wēñabitawogaa. ³⁹ Ayæ wēnæ wēnæ inte wæyōmi incæ tee mōnete wæyōmi

incæ mōnitō dicæ acæ pontamōniyaa.’ ⁴⁰ Ante wæyōnāni botō Awēnē Odeyebo inōmo inte edæ tōmēnāni inānite, ‘Iñæmpa botō tōniñadāni iñōnānite adocanque önonganque iñongante mīnitō waa cægāimīni inte edæ botō imote do waa cæte imīnīpa ämo eñēdāni,’ ante tōmēnāni inānite ancæboimpa,” angantapa.

⁴¹ “Ayæ botō dipæmæ inō në ongonāni inānite botō në Awēnē inōmo inte ancæboimpa. ‘Mīnitō në tente wæquēnēmīni guiquēnē ñōwo edæ gā gobæwedāni. Edæ Wængonguī do badōninque, Wēnæ tōnō tōmengā anquedoidi nānō në emīñænāni tōnō wantæpiyæ cōwē wænāmaī nāni bæcote wæquiñōmō, ante nānō badongaiñōmō mīnitō mäniñōmō edæ gote guībæwedāni,’ ante edæ ancæboimpa.

⁴² ‘Edæ botō gue ænente wæbo adinque mīnitō edæ dicæ pōnōmīni cæntabogaa. Gæwænte wæyōmo mīnitō dicæ pōnōmīni betabogaa. ⁴³ Ayæ Wabo imo inte cowodē bai pōmo adinque mīnitō dicæ, Pō guīe, ämīnitawogaa. Ömaabo inte wæyōmo wecoo dicæ pōnōmīni wēñatabogaa. Wēnæ wēnæ inte wæbo incæ tee mōnete wæbo incæ mīnitō iñōmō edæ dicæ eñacæ pōmīnitawogaa,’ ancæboimpa.”

⁴⁴ “Ämo eñente wædinque në eñēnāmaī ināni iñōmō, ‘Awēnē eñēmi. Bitō æyedēnō gue ænente tepæ gæwænte wæbitawo. Ayæ wabi bai inte æyedēnō pōmi atamōniyaa. Wecoo ömaabi inte wæbi adinque, daicawo gawæmi adinque, tee mōnete wæbi adinque mōnitō bitō beyæ dicæ cædāmaī intamōniyaa.’ ⁴⁵ Äñōnāni botō iñōmō edæ tōmēnāni inānite, ‘Iñæmpa wacā ingante önonganque iñongante mīnitō cædāmaī ingāimīni inte botō imote edæ mäninō do cædāmaī ingamīnimpa. Ämo eñēmaimīnīpa,’ ante piincæboimpa. ⁴⁶ Ininque tōmēnāni nāni tente wæwenguinō incæ æmæwo wadæ gocædānimpa. Wæætē në nō cædāni guiquēnē cōwē wænāmaī nāni quēwenguinō æmæwo gocædānimpa,” ante Itota apænegacāimpa.

26

Itota ingante bæi ongongæimpa, ante

cædänipa

(*Mäadoco 14.1-2; Odoca 22.1-2; Wäo 11.45-53*)

¹ Ayæ mäninö tömänö iinque apænete ate Itota tömengä miñæ nē godäni inänite apænegacantapa.

²—Mëönaa go ate wodo pänta gogaiönæ bai Patowa mönö ææmæ cænguionæ impa, ante do eñëminipa. Mäniönæ iñonte botö Waobo eñagaïmo iñömote botö imote bæi ongöningue edæ, Awæ ñænquedimæ cæte iingä ingante töö godöningue daagö timpote wææ tiwadingue edæ æænö gö cæte wænödäni, ante botö imote pædæ godönäni æncædänimpa, ante apænegacäimpa.

³ Mäniñedë, Wængongui qui, ante nē godongä ñænængä pöni Caiapato oncönë godongämæ pöningue wadäni nē godönäni ñænänäni tönö oodeoidi inänite nē aadäni nāni Picæncabo iñömö, ⁴ adoyömö pönëningue, Mönö æbänö babæ cæte Itota ingante awëmö bæi ongonte ænte wængongui, ⁵ ante pönänäni incæte,

—Iñæmpa ææmæntedæ iñonte wænömö bai tömänäni ænguï bate Yæ yæ ante piinte cæcædönänimpa, ante pönente wædingue mönö ædö cæte mäniñedë cæquiï, ante wægadänimpa.

Itota ocaboga onquiyængä ogui wapæ gao cæcacampa

(*Mäadoco 14.3-9; Wäo 12.1-8*)

⁶ Itota mäniñedë Betänia godingue nē baadingä Timönö oncönë guï eñadingue cæncongantapa. ⁷ Cæncöñongä wacä onquiyængä iñömö tömengä weca pö guidingue ogui wapæ nāni nanguï godonte ænimæ dica adabatodo waincadedë pe ñiñænte nänö mänimæ incæ ñöwo ænte mämö Itota ocaboga edæ gao cæcacantapa. ⁸ Mänömaï cæcä adingue Itota miñæ nāni gocabo iñömö piinque,

—Iñæmpa önonque gao guënente bai cæcampa töö, änänitapa. ⁹ Edæ iimæ iñömö nanguï pöni æninta beyæ godonte ænguënemæ imæmpa. Godonte ænte bai ömæpodäni inänite wæætë godonguënë apa.

¹⁰ Ante piinäni wædingue Itota iñömö,

—Quimæ piwëminii. Iingä onquiyængä iñömö botö imote waa pöni cæcä apa

quëwëminii. ¹¹ Iñæmpa ömæpodäni ante mīni äninäni mīnitö weca cöwë quëwëñönäni botö wæætë mīnitö weca wii wantæpiyæ quëwencæboimpa. ¹² Mänimæ ogui wapæ botonga gadongadingue tömengä botö baö daga wenguingue eyepæ iñonte edæ öni paacantapa. ¹³ Mīnitö iminite näwangä ante apænebopa. Waa pöni botö apænedö apænedingue tömämæ æyömömë apænedäni eñänäni mäningä onquiyængä nänö cædinö ante adobai tededäni eñente pönencædänimpa, ante Itota apænegacäimpa.

Itota ingante Codaa odömönte godoncæte ante cæcampa

(*Mäadoco 14.10-11; Odoca 22.3-6*)

¹⁴ Ayæ mäniñedë nāni, Dote, äincabo iñönäni adocanque Codaa Icadote nāni änongä iñömö, Wængongui qui, ante nē godönäni ñænänäni weca gocantapa. ¹⁵ Godingue apænegacantapa.

—Botö, Itota æyömönö ongongä, ante pönö odömömo ate mīnitö bæi ongonte æmīni iningue æpotadö, Eyepæ i, ante pönömīni æmäimoo.

Angä eñëningue tömënäni padata ti-guitamö incæ todëinta ganca tee mam-pote tömengä ingante pædæ godönäni. ¹⁶ Æningä inte tömengä cöwë cöwä adingue, Æbänö cæte Itota ingante odömönte pædæ godömo ate ænguänäni, ante pönente cægacäimpa.

Päo tönö owæta Itota pædæ pönongä cænte bedänipa

(*Mäadoco 14.12-25; Odoca 22.7-23; Wäo 13.21-30; 1 Coodintoidi 11.23-26*)

¹⁷ Mäniñedë oodeoidi päo yedæ æmpoqui ömæmö i nāni ææmæ cæte cænguionæ tæcæ ba adingue Itota miñæ nē godäni iñömö, Wodo pänta gogaiönæ bai Patowa mönö ææmæ cænguionæ impa, ante pönente wædingue tömengä weca ponte änänitapa.

—Æyömönö bitö beyæ Patowa ææmæ ante cæmöni ate cænguimii.

¹⁸ Äñönäni tömengä nänö emiñæna mënaa inate äningue,

—Mīnatö waodäni nāni quëwëñömö godingue onguinængä botö nē äningä ingante bee tēningue mīnatö iimainö ante

apænemīna eñengæda. “Mönö Awënë iīmaī angampa. Botö wænguiönæ oo pönī bapa cæbii. Botö nē emiñænāni tönö botö bitö oncönē Patowa ææmæ ponte cæncæmönimpa, angampa,” ante ämīna eñengæda, angä.

¹⁹ Eñente wædinque tömēna Itota nänö änö bai cædinque, Patowa ææmæ cængui impa, ante cædatapa.

²⁰ Gäwadecæ bayö Itota tönö, Dote, nāni äincabo ponte godongämæ cæncæte ante ongönānitapa. ²¹ Cæncöñönāni Itota,

—Nāwangä ante apænebo eñēedāni. Mīni cabo incæ adocanque, Æncædānimpa, ante botö imote odömonte pædæ godonguingä ingampa.

²² Ante apænecä eñēninque tömēnāni wæwente bayönāni adocanque adocanque,

—Awënē, botö imotedö ante dicæ apænebitawogaa.

²³ Ante tedeyönāni Itota wæætē,

—Botö tönö guëa adotaca nē mīi cædingä iñömö tömengä botö imote nē odömonte pædæ godonguingä ingampa.

²⁴ Edæ dodāni Wængongui beyæ nāni yewæmongainö bai cædinque botö Waobo eñagaimo inte cöwē wænte goquënemo imodö angüenē. İninque edæ botö imo nē odömonte godonguingä iñömö tömengä nänö wæquinque ingæimpa. Māningä wīi eñate bai waa toquënegä incædongäimpa.

²⁵ Ante apænecä wædinque Codaa iñömö Itota ingante nē odömonte godonguingä iñömö edæ,

—Awënē nē Odömömi eñēmi, botö imotedö ante ämitawogaa.

Ante añongante edæ Itota,

—Tömēmi nāmā incæ, Botö imotedö, ante do tedebi imipa.

²⁶ Ante apænecantapa. Ayæ cæncöñönāni Itota päö bæi ongonte æninque Wængongui ingante waa ate apænedinque päö pä æninque tömengä miñæ nē godāni inānite pædæ godö pædæ godö cæcantapa.

—Botö baö bai impa, ante pædæ pönömo æninque mīnitö Ao ante cæedāni.

²⁷ Äninque ayæ bequimæ owætaca bæi ongonte æninque Wængongui ingante waa ate pönente apænedinque pædæ godöninque,

—Botö wepæ bai impa, ante pædæ pönömo æninque tömämīni Ao äninque godongämæ intaca beedāni, angantapa.

²⁸ Botö wepæ iīmæ bai impa. Wængongui do apænedinque, Botö pönö cæbo ate mīnitö Ao ämīni İninque mönö godongämæ waa cæte quëwengæimpa, angacäimpa. Nöwo adobai mīine äninque apænebopa. Botö wepæ ante Ao ante æmīni inte mönö godongämæ waa cæte quëwengæimpa. Edæ nanguī imīni mīni wënæ wënæ cædinö beyæ ante ñä mēnongaquimæ impa. ²⁹ Nāwangä ämopa. Botö Mæmpo Awënē Odeye iñongä botö tömengä nempo quëwëninque mīnitö tönö godongämæ müimæ botö beganca mānimæ yowepæ ñöwo æmæwo bebo tamēñedāni, ante Itota apænegacäimpa.

Dicæ abogaa, ante Pegodo anguingä, ante apænecampa

(Mäadoco 14.26-31; Odoca 22.31-34; Wäö 13.36-38)

³⁰ Ayæ Wængongui ingante ämotamīni ante tao godinque Odibowænquidi godānitapa. ³¹ Goyönānite Itota apænecantapa.

—Wængongui beyæ yewæmöninque, “Nē aadingä ingante tacabo dæ wængä İninque edæ cæningäidi obegaidi panguimæ goquimpa,” ante nāni yewæmonte angainö bai cædinque mīnitö tömämīni ñöwoönæ woyowotæ incæ botö dæ ämo beyæ guingo imonte badinque edæ panguimæ goquimīni imīnīpa. ³² Panguimæ gomīni incæte botö edæ ñāni ömæmonte ate Gadideabæ täno gote a ongöñömo mīnitö ayæ pöedāni.

³³ Angä wædinque Pegodo guiquënē,

—İñæmpa dæ ämi beyæ tömānāni guingo imonte badinque panguimæ godāni incæte edæ botö guiquënē cöwē panguimæ godāmaī incæboimpa.

³⁴ Äñongante Itota wæætē,

—Bitö imite nāwangä ante apænebo eñēe. Nöwoönæ woyowotæ incæ tawadiya pedāmaī iñonte bitö botö imotedö ante wadö ante apænedinque, Dicæ abogaa, ante edæ mempoga go adopoque anguimi imipa.

³⁵ Angä eñente wædinque,

—İñæmpa bitö tönö guëa wæmo incæte botö cöwë, Dicæ abogaa, ante edæ änämaï incæboimpa.

Äñongä tömengä miñæ nē godäni tömänäni adodö ante angadänimpa.

Guetëmänii iñömö Itota Wængonguï ingante apæñecampa

(Mäadoco 14.32-42; Odoca 22.39-46)

³⁶ Mänii godinque Itota yabæ incæ Guetëmänii nāni äñömö tömengä miñæ nē godäni tönö gocantapa. Mäniñömö pöningque tömengä tömēnāni İñänite,

—Tæ contate ongöñömīni botö godömenque godinque Wængonguï ingante apænete pömoedäni.

³⁷ Äninqe Pegodo tönö Tebedeo wēna İnate ænte mäocä goyönāni Itota iñömö nangui wæwente badinque ancaï guññēninque, ³⁸ tömēnāni İñänite,

—Botö wænguimāmo pönö angüenē, ante botö önöwoca incæ pæmænte wæte wængui wæ, ante wæbo tamēñedäni. Mīnitö guiquenē äamonca godongämæ wææ aacöedäni.

³⁹ Äninqe Itota wædænque godömenque godinque guidömēmæ ñongænte Wængonguï ingante apæñecantapa. “Botö Mæmpo, bitö Ao äninqe edæ ti nä wænguimæ bai ö ænte bai cædinque botö İmote edæ, Wænāmaï incæbiimpa, ämi İninqe botö edæ waa tobaïmopa. Incæte botö änönö bai wii cædinque wæætē tömēmi änönö bai cæe,” ämopa.

⁴⁰ Ante apæñecä ate tömengä miñæ nē godäni weca adodö ponte ayongä tömēnāni mö ñönāni adinque tömengä Pegodo ingante,

—Botö tönö wänö conguenēmini incæ mīnitö adoque ooda incæ wii aacömīni.

⁴¹ Mīmōno waa cæinēmōnīpa, ante ewocayōmīni baö aquiiñö eñamīni inte wæntæye bamīnīpa. İninqe edæ wänö cōninqe nāmā beyænque ante Wængonguï ingante apæñedinque edæ, Wii wēnæ wēnæ cæinēmōni bacæmōnīpa, ante apæneedäni.

⁴² Äninqe Itota adodö wadæ gote wæætē apæñedinque, “Botö Mæmpo, botö bedāmaï iñömote bitö ö ænāmaï İmi İninqe botö cöwë bitö ämaï becæboimpa.”

⁴³ Ante Wængonguï ingante apænete ate ponte ayongante möwo möinente æmō cæte wædinque mö ñönāni. ⁴⁴ Adinque edæ tömengä wæætē adodö godinque ñöwo mempoga go adopoque nānö apæñedinö ante adodö ante Wængonguï ingante İninqe apæñecantapa. ⁴⁵ Ayæ tömengä miñæ nē godäni weca wæætē adodö pöningque,

—İñæmpa cöwë mömīni edæ cöwë guemāmīni awædö. Aquenē quēwēedäni. Botö Waobo eñagaïmo inte botö wæwenguïönæ do bayonte edæ botö İmote nē wēnæ wēnæ cædäni İñänite nē godö odömonguingä iñömö do godongäi атақeädäni. ⁴⁶ Ängæ gantite mönö gocæimpa. Botö İmo nē odömonte godonguingä obo pōni pongä tamēñedäni, angacäimpa.

Itota ingante bæi ongonte æñänīpa

(Mäadoco 14.43-50; Odoca 22.47-53; Wäö 18.2-11)

⁴⁷ Ayæ apæneyongä edæ Codaa wodi tömēnāni nāni, Dote, ante gocabo adocabo İningä incæ ñöwo pongantapa. Wængonguï qui, ante nē godönāni ñænænāni tönö ood-eoidi İñänite nē aadāni nāni Picæncabo tönö da pönönāni pöningque wadāni tæiyænāni adobaï yaemē nææninqe canta næænāni inte Codaa miñæ pönānitapa. ⁴⁸ Doyedē iñömö nē odömonte godoncæ cæcä Codaa iñömö tömengä miñæ poncæ cædäni İñänite İmaï ante wēenēñedē apæñedingä İnongäimpa. “Botö odömonte queë bemōmo adinque mīnitö wæætē, Tömengä ingampa, ante adinque tömengä ingante edæ bæi ongonte ö æedäni.”

⁴⁹ Ante do äningä inte Codaa ñöwo iñömö Itota weca pöningque,

—Awenē nē Odömōmi İmi, bitö İmi.

Äninqe edæ waa cæte bai queë bemon-gantapa. ⁵⁰ Adinque Itota wæætē,

—Botö miñæ nē godīmi eñēmi. Mänīnö ante bitö ponque pö cæbāwe.

Äñongä wadāni tömengä weca pöningque pædæ gopo bæi ongonte Itota ingante æñänītapa.

⁵¹ Wængonguï qui, ante nē godongä ñænængä pōni ingante nē cæcä mäniñömö ponte a ongongä adinque Itota tönö pöningä adocanque pædæ guipote yaemē o togænte æninqe mäningä nē cæcä

ingante tæi päninque önömonca wangö tamoncacantapa. ⁵² Adinque Itota iñömö tömengä ingante,

—Yaëmë adodö mini tïe, ämopa. Edæ yaëmë në o togænte næænäni tömänäni inänite yaëmenca adobaï tacadäni wæncædänimpa. ⁵³ Iñæmpa æbänö ante pönëmi edæ. Wængonguï anquedoidi adocabodäninque tei miido ganca iñönänite botö Mæmpo ingante apænebo baï tömengä do angä ininque anquedoidi näni cabo näni cabo incæ önompo tipæmpoga go menca-bodäniya botö beyæ ponte cæbainänipa, ante pönëmiyaa. ⁵⁴ Incæte botö Codito inömo inte botö Mæmpo ingante mänömaï apænebo ëñente cæcä baï dodäni, Codito iïmaï wæncæcäimpa, ante Wængonguï angä ëñente näni yewæmongainö ante ædö cæte iinque bacædönimpa, ante awædö, ante apænegacäimpa.

⁵⁵ Ayæ wæætë ñowo pönäni inänite Itota apænecantapa.

—Minitö iñæmpa, Bitö në ö ænïmi imipa, ante baï cædinque botö imote canta tönö yaëmë næænte ö æncæte ante pömïni awædö. Botö Wængonguï oncö yabæcönë iimö iñö iimö iñö apænecönömo mïnitö botö imote yao ongönämaï ee amïnitapa töö. ⁵⁶ Incæte mïnitö Wængonguï beyæ në apænedäni näni yewæmongainö baï ñowo iinque baquinque cæmïni abopa.

Ante apænecä ëñëninque tömengä emiñængä në godinäni tömänäni edæ näwæ panguimæ cæte wodii winongadänimpa.

Në Apænte näni Änoncabo weca Itota ongampa

(Mäadoco 14.53-65; Odoca 22.54-55, 63-71; Wäö 18.12-14, 19-24)

⁵⁷ Ayæ Itota ingante në yao ongonte ænäni guiquënë, tömengä ingante mäo godinque edæ, Wængonguï qui, ante në godongä ñænængä pönï inongä Caiapato weca ænte godänitapa. Mänïñömö do pöninque në wææ ante odömönäni tönö oodeoidi inänite në aadäni näni Picæncabo tönö do a ongönänimpa. Mänïñömö Itota ingante ænte mämönäni pongacäimpa. ⁵⁸ Pegodo guiquënë tömengä miñæ ayæ ayæ godinque, Wængonguï qui, ante në godongä ñænængä pönï inongä oncö

yacömoyæ iñömö pö guiddinque, Itota ingante æbänö cæquinänii, ante wææ wänönäni weca pöninque tæ contate waa acongantapa.

⁵⁹ Wængonguï qui, ante në godönäni ñænænäni tönö në Apænte näni Änoncabo tömänäni, Mönö apænte ante wænömö wæncæcäimpa, ante cædinque, Itota nänö wænguinque wænæ wænæ cæcä ingampa, ante æcänö babæ ante anguingää, ante diqui diqui mïnönänimpa. ⁶⁰ Incæte nangui inäni ponte babæ apænedäni incæte, Æcänö eyepæ babæ änaa, ante edæ dæ angä wædänitapa. Ayæ ate mënaa në babæ wapiticæ änöna inte awënëidi weca pö guiite, ⁶¹ apænedinque,

—Iingä, “Wængonguï tæiyæ waëmö oncö ongö incæte botö iñömö tæi piñæmo inömo inte godö cæbo baï wo tænguimæ wææmaimpa. Ayæ mënaa go adoönæque iñonte botö wæætë do mænömaïmopa,” angä ëñentamönapa töö. ⁶² Ante apæneda ëñëninque në godongä ñænængä pönï inongä incæ ængæ gantidinque Itota ingante,

—Iñæmpa pæ wëenebii. Tömëna bitö imitedö ante godö äninque näna äninö ante bitö æbänö ämii.

⁶³ Äñongä Itota cöwë änämaï edæ pæ wëenecä. Adinque në godongä ñænængä pönï inongä wæætë,

—Wængonguï në Quëwengä inte tömengä nänö ëñëñongä edæ näwangä ante apænebi ëñëmönii, ämopa. Mönö Codito iñömö Wængonguï Wengä inongä ingampa. Bitö iñæmpa mänimidö inömi imitawo.

⁶⁴ Mänömaï angä ëñëninque Itota wæætë, —Tömëmi bitö äninö baï mänimodö inömo imopa. Incæte botö godömenque apænebo ëñëedäni. Iincayæ ate botö iñömö edæ Waobo ëñagäimo inte edæ Wængonguï në Tæi Piñængä ingä tömëmængä inö tæ contabo adinque mïnitö ayæ ate botö öönæde boguimancodë pömo acæmïnimpa.

⁶⁵ Ante apænecä ëñente wædinque në godongä ñænængä pönï inongä piinte badinque, Eñente awædö, ante baï cædinque edæ nämä weocoo wänä ñænte,

—Wængonguï ingampa mänömaï cæquiringää. Edæ tömengä nämä incæ babæ

ante nē wēnæ wēnæ apæneçä iñique idæwaa. Wacä tömengä ingantedö, Wēnæ wēnæ cæcä atabopa, ante nē ancæcäimpa, ante ñowo diqui diqui mināmaï ingæimpa. Tömengä nämä Wængonguï Wengä inte bai babæ ante nänö anewēninö ante do eñēmīni inte mīnitö, ⁶⁶ edæ æbänö ante pönēmīni.

Ante añongä nē apænte änāni guiquēnē,
—Nänö wænguinque anewengampa töö.

⁶⁷ Ante apænte äñique edæ pancadāniya Itota tömengä awinca towæ tänömöñique tæi tæi pänānitapa. Wadāni guiquēnē tömengä ingante tamöñique,

⁶⁸ tömengä ingante,

—Bitö Codito ïmitawo. Æcänö bitö ïmite awēmö nē pānaa, ante Wængonguï beyænque apænedinque apænebi eñēmōñii, ante badete togadānimpa.

Pegodo incæ, Dicæ abogaa, angampa

(Mäadoco 14.66-72; Odoca 22.56-62; Wäö 18.15-18, 25-27)

⁶⁹ Ayæ Pegodo guiquēnē mänii yæipodē yacömöñāa contate ongöñongä onquiyængä nē cæcä iñömö tömengä weca ponte apænedinque,

—Mäningä Gadideabæ quēwēningä Itota tönö bitö guëa cægömitapa töö.

⁷⁰ Ante apæneyongä tömānāni nāni ayömö Pegodo,

—Dicæ. Bitö änö ante æbänö ämii, ante dicæ eñēmogaa.

⁷¹ Ante äñique Pegodo yademö gäänē tao gote ongongä adinque wacä onquiyængä wæætē godongämæ ongönāni inānite apænedinque,

—Mäningä adobaï Itota Näatadeta quēwēnongä tönö nē cægöningä ingä aedāni.

⁷² Ante apæneyongä Pegodo wæætē,

—Wængonguï eñēñongä botö näwangä ämo eñēedāni. Ìngä onquiyængä nänö nē äningä ingante botö dicæ abogaa, angantapa.

⁷³ Ayæ wantæ ate mäniñömö ongönāni Pegodo weca pöñinque,

—Ìñæmpa Itota tömengä tedecä bai adode nē tedebi inte bitö tömengä mīñæ mīni nē gocabo adobi ïmipa töö.

⁷⁴ Äñönāni edæ Pegodo wæætē, Wængonguï eñēñongä apænedinque botö

nöingä ämopa, ante Wængonguï emöwo ante babæ tedewēninque tömēnāni inānite,

—Mīni nē angä ingante dicæ abogaa.

Mänömaï ante tæcæ anewēñongä edæ tawadiya dobæ petapa. ⁷⁵ Pe wædinque tömengä, Æ Itota nänö äñinö bai impa, ante wæcantapa. Itota, “Tawadiya pedāmaï iñonte bitö botö imotedö ante wadö ante apænedinque, Dicæ abogaa, ante edæ mempoga go adopoque anguïmi ïmipa,” angantapa. Ante Pegodo, Nöwo nänö pequinque do pecampa, ante wædinque oncodo taote edæ guingo imonte wædinque edæ Ca ca wægacäimpa.

27

Itota ingante Pidato weca ænte mäo gönönānipa

(Mäadoco 15.1; Odoca 23.1-2; Wäö 18.28-32)

¹ Ayæ ñäö bayonte, Wængonguï qui, ante nē godönāni ñænænāni tönö oodeidi inānite nē aadāni nāni Picæncabo tönö apænte äñique edæ, Itota ingante wæñongæimpa, ante godongämæ Ao angadānimpa. ² Äñique tömengä ingante yao ongonte goti winte äñique edæ odömānoidi beyæ Oodeabæ awēnē gobedönadodo Pidato ingante mäo gönönāni ængacäimpa.

Codaa wodi iïmaï cædinque wængampa

³ Ayæ, Itota ingante wæñongæimpa, änāni eñente wædinque Codaa tömengä ingante nē godöningä guiquēnē, Æ tömengä nänö wænguinquemē cæboinö ante pönēmogaa, ante guingo imonte wæcantapa. Ayæ, Wængonguï qui, ante nē godönāni ñænænāni tönö nē aadāni nāni Picæncabo adodö æncædānimpa, ante todēinta padatamö tömēnāni nāni pönontamö adodö pædæ godoncæte ante gocantapa.

⁴ Ayæ tömēnāni inānite,

—Ìñæmpa cæboo. Edæ Itota wēnæ wēnæ cædāmaï Ìningä iñongante botö nē godönimo inte wiwa cæbo imo ante awædö.

Ante añongante tömēnāni guiquēnē,

—Tömēmi wēnæ wēnæ cædīmi inte wentamö bitö entawēnö adinque mönitö ædö cæte wæquimōñii. Tömēmi edæ nē cædīmi inte edæ abaïmipa töö.

5 Änāni wædinque edæ tiguitamö incæ Wængonguī tæiyæ waēmö oncönē wo wææntodöningue Codaa oncodo tao godinque edæ nämā önömenca wëä æi goti guemencate dobæ wængacäimpa.

6 Mäninta wo wææntodongä ate wædinque, Wængonguī qui, ante nē godönāni ñænænāni incæ tiguitamö yao yao ongonte æninque,

—Wepæ näadintamö adinque Wængonguī Baa ancæcäimpa, ante pönente wædinque mönö, Wængonguī qui, ante ædö cæte godonguimö.

7 Ante godongämæ pönencöningue tömēnāni, Oodeoidi ināmaī ināni wodido bacæimpa, ante ömæ nē dai bædongä äadiömæ incæ mänii tiguitamö godonte ængadänimpa. 8 İninque wepæ näadintamö godonte nāni ænimæ ante, Wepænguipo impa, ante nāni pemönimæ iñömö ñöwo ganca impa. 9 İninque do iñömö Eedēmiya wodi Wængonguī beyæ iimaī ante nänö apænegaïnö bai iinque batimpa. “Idægoidi, Tömengä beyæ mänimpotamö godonte ængæimpa, ante nāni änimpotamö incæ todēinta tiguitamö padatamö æninque, 10 tömēnāni Wængonguī botö imote nänö äninö bai eñente cædinque edæ dai bædongä äadiömæ godonte ænānitapa,” ante Eedēmiya nänö angaïnö bai do iinque batimpa.

Pidato weca Itota ongongampa

(Mäadoco 15.2-5; Odoca 23.3-5; Wäö 18.33-38)

11 Itota iñömö awënë gobedönadodo Pidato weca a ongöñongante awënë gobedönadodo iñömö tömengä ingante,

—Bitö oodeoidi Awënë Odeyebi imitawo.

Äñongante,

—Bitö tömēmi änö bai botö mänimodö imopa, Itota angantapa.

12 Ayæ, Wængonguī qui, ante nē godönāni ñænænāni tönö nē aadāni nāni Picæncabo guiquënë Itota ingante äninque, Wënæ wënæ cæbipa töö, ante äñönāni tömengä edæ pæ wëenecä. 13 Ate wædinque Pidato wæætē,

—Bitö æpogadö wënæ wënæ cæbi imipa, ante nanguī äñāni eñenāmaī inte bitö ædö cæte edæ pæ wëenebii.

14 Äñongante Itota iñömö tömēnāni nāni äninö ante adodeque ante apænedāmaī ingä adinque awënë gobedönadodo wæætē, Quiēmē bai pæ wëenecä awædö, ante wængacäimpa.

Itota wæncæcäimpa, änānipa

(Mäadoco 15.6-20; Odoca 23.13-25; Wäö 18.38-19.16)

15 Mänimæ awënë gobedönadodo mäniiñedē wadepo iñö wadepo iñö cöwē iimaī cædongäimpa. Oodeoidi ææmæ nāni cæyedē gobedönadodo iñömö, Nē tee mönete ongönāni inānite adinque mīnitö æcänö ingante ämīni ñimpo cæbo goquingää, ante äñongä änāni eñëningue tömengä tömēnāni nāni äningä adocanque ingante ñimpo cæcä godongäimpa. 16 Mäniiñedē adocanque wënæ wënæ nänö cædinö beyæ tee mönete a ongongampa, ante tömānāni do eñenönānimpa. Mäningä emöwo Badabato inongäimpa. 17 İninque nanguī ināni godongämæ pönāni ate Pidato tömēnāni inānite edæ,

—Æcänö ingante mīnitö beyæ ñimpo cæbo abæ tawænte gocä ænguimīni. Badabato ingante ñimpo cæbo gocä ænguimīni. Wæætē edæ Itota Codito mīni äñongä ingante ñimpo cæbo gocä ænguimīni, angacäimpa.

18 Edæ do iñömö, Itota gomonga cæcä ate wædinque tömēnāni tömengä ingante piinte adönānimpa. Mäninö beyænque tömēnāni Itota ingante bæi ongonte botö nempo ænte mämö pædæ pönönānitapa, ante Pidato do eñengantapa.

19 Ayæ odömānoidi nāni apænte anguimpaa ayæ ongöñongä Pidato nänöogængä iñömö wacä ingante da pönongä pöninque Pidato ingante nänöogængä beyæ apænecantapa. “Botö ñöwoönæ möwocodē wiiimöningue mäningä nē nö cædongä beyæ nanguī wogæi wogæi cæwënente wæbopa cæbii. Bitö tömengä ingante gampodāmaī inte gomö aquënë quëwëe, ämopa,” ante bitö nänöogængä angampa, angantapa.

20 Angä eñente wæyongä, Wængonguī qui, ante nē godönāni ñænænāni tönö nē aadāni nāni Picæncabo nāni äncabo guiquënë wadāni nē godongämæ ongönāni inānite äñānitapa. Mīnitö Pidato ingante

iimaï äedäni. Badabato ingante ñimpo cæbi gocæ. Itota ingante wæætë ämi wænönäni wængæe, ante äedäni, änänitapa. Awënëidi incæ mänömaï änäni ëñëningue godongämæ ongönäni Ao änänitapa.

²¹ Awënë Pidato iñömö tömënäni inänite äningue,

—Mënaa ongöna iñönate munitö æcänö ingante ämïni ñimpo cæbo goquingäa.

Äñongante,

—Badabato ingante ämönipa.

²² Änäni wædingue Pidato wæætë,

—Iningue Itota Codito mïni äongä ingante æbänö cæquimoo, ante ämïni.

Äñongante tömänäni edæ,

—Awæ ñænquedimæ ämi cæte gönonte wænönäni wængæe töö.

²³ Änäni ëñëningue Pidato ayæ,

—Iñæmpa quinö wënæ wënæ cæcantawo.

Äñongä tömënäni godömenque yedæ äningue adodö,

—Ämi awäa timpote wænönäni wængæe.

²⁴ Ante ancaa änewëñönäni Pidato iñömö, Tæcæ wæætedö wæætë änäni inte tömënäni wënæ wënæ cædäni wæqui wæ, ante guiñente wædingue ayæ, Ædö cæte botö godömenque cæquimoo, ante pönente wædingue edæ æpæ pi ñiñænte tömënäni ayönäni önonpo mempodingue tömënäni inänite angantapa.

—Tömengä wënæ wënæ cædämaï iñongante botö, Wænongæimpa, änämaï imo inte tömengä wepæ näadämaï imo äedäni. Wæætë munitö guiquënë, Wæncæcäimpa, ante në änimini inte edæ näate bacæminimpa, ante adingue botö mempobo äedäni.

²⁵ Angä ëñëningue tömänäni Ao äningue edæ,

—Möni äninö beyænque mönitö incæ mönitö wënäni incæ tömengä wepæ beyæ näate bai bacæmönimpa töö.

²⁶ Änäni ate awënë gobedönadodo Pidato tömënäni näni äninö ante ëñente cædingue edæ Badabato ingante ñimpo cædingue tömënäni nempo pædæ godongä ænänitapa. Wæætë edæ Itota ingante edæ Pidato angä æmontai badöimenca tæi tæi pänäni ate tömengä ingante ñænque

quepote awäa näni gönonguinque edæ da godongä ænte godänitapa.

²⁷ Awënë gobedönadodo nänö wæe wänönäni guiquënë Itota ingante ænte godingue awënë gobedönadodo oncönë Podætodio näni ancönë mangui guiyongä tontadoidi bacabo Itota weca godongämæ äñete pönänitapa. ²⁸ Pöningue tömënäni, Awënë imi inte awënë wecoo wëñacæbiimpa, ante bai cædingue badete todingue Itota wecoo gä tadongadingue wæætë opatawæ ëmoncoo pönö da wëñadingue, ²⁹ daa mongæmenca bai æningue que cædingue, Awënë poganta wencacæbiimpa, ante bai cædingue pönö daga wencadänitapa. Ayæ cæwipa ænte mämö pædæ pönonte änäni æningue tömengä tömëmæmpoca pæ mangä adingue tömënäni da guicapodingue tömengä ingante,

—Badogaa, bitö oodeo awënë odeyebi imipææ, ante badete togadänimpa.

³⁰ Ayæ tömengäa towæ towæ tänongadingue cæwipa æningue tæi tæi ancaa pancadänitapa. ³¹ Ayæ iingue badete todingue tömënäni opatawæ ëmoncoo gä tadongadingue tömengä nämä wecoo daga wëñadänitapa. Ayæ edæ tömengä ingante awæ timpote wænoncæte ante töö æmænte ænte tao mäodäni gogacäimpa.

Itota ingante awäa timpodäni wængampa (Mäadoco 15.21-32; Odoca 23.26-43; Wäö 19.17-27)

³² Ænte mäo godingue tömënäni Tidëne quëwengä Timönö ingante bee tëningue tömengä ingante edæ, Bitö ægodöe, Itota ingante möni timpoquiwæ ænte mongænte goe, änäni mongænte gocantapa.

³³ Mänii Itota ingante ænte mäo godingue Godogota näni äñömö mönö tededö “Ocatainö” iñömö mäniñömö pönänitapa.

³⁴ Mäniñömö pönäni ate wadäni, Nantate beyæ becæcäimpa, ante cædingue yowepæ biinömæ näni ämæ tönö moncapæ adoyömö wempo cædëningue pædæ pönö cæyönäni tömengä önonque yædæ bedingue edæ Baa angantapa.

³⁵ Ayæ Itota ingante awæ ñænquedimæ näni ænte pöniwäa töö godöningue pönö timpodingue wææ tiwadingue ængæ

gantidēnānitapa. Ængæ gantidēnāni ate wægōñongā tōmēnāni wæætē tōmengā weocoo inī ante, Æcānō quınca nō ta adinque tōmengā mānincoo æncæcāimpa, ante wææntodōninque adocooque adocooque ænānitapa. Mānōmaī cæyōnāni Wængonguī beyæ nāni apænegaīnō bai īinque cætimpā. “Botō weocoo inī ò æninque tōmēnāni nāni caboque wacā ingā wacā ingā nēnempodānitapa. Ayæ, Æcānō quınca nō ta adinque tōmengā mānincoo æncæcāimpa, ante cædānitapa.”³⁶ Tōmēnāni tæ contadinque tōmengā ingante wææ aadānitapa. ³⁷ Ayæ, Itota nē wænguēnengā ingampa, ante quīnante ānānī, ante edonque acæimpa, ante cædinque tōmēnāni, “Īingā Itota īñōmō ood-eoidi Awēnē Odeye īnongā ingampa,” ante yewæmōninque edæ awæmpaa tōmengā ocaboca īnō tee tinte wo cædānitapa.

³⁸ Ayæ wada nē ò ænte quēwēnīna īnate adoyedē tōmengā tōnō adocanque tōmēmæ īnō adocanque dipæmæ īnō godō timpote ængæ gantidēdāni wægongadaimpa. ³⁹ Ayæ wodo pænta nē godāni guiquēnē Itota ingante godō wēnæ wēnæ ante badete todinque pica pica cædinque, ⁴⁰ tōmengā ingante wapiticæ apænedinque,

—Bitō īñæmpa Wængonguī tæiyæ waēmō oncō incæ bæ tate wo ēwēninque edæ mēōnaa go adoōnæque īñonte do mænoncæ āmitawo. Mānōmaī cæcæ ānīmi īnte bitō tōmēmi edæ nāmā incæ cæte quēwēmāwe. Bitō nō Wængonguī Wēmi īmi īninque edæ o togæmpote o togæwate wææe, āmōnipa tōō.

⁴¹ Āñōnāni edæ, Wængonguī quī, ante nē godōnāni nænænāni guiquēnē nē odōmōnāni tōnō ayæ oodeoidi īnānite nē aadāni nāni Picæncabo tōnō adobaī īmaī ante edæ badete todānitapa.

⁴²—Tōmengā, Wadāni quēwencædānimpa, ante waa cæcantawoo. Nōwo īñæmpa ædō cæte nāmā waa cæte quēwenguingā. Idægoidi awēnē odeye ingampa diyæ ti wæænte goquingā. Edæ ti wæænte gocā adinque mōnitō wæætē edæ, Nāwangā impa, ante pōnēmaī wædō. ⁴³ Ayæ nāmā ingantedō āninque tōmengā edæ, Botō Wængonguī Wēmo īnōmo īmopa, ante angāmææ. Tōmengā, Wængonguī cōwē

pōnō cæcæcāimpa, ante wede pōnengā īñongante Wængonguī wæætē tōmengā ingante edæ waa acampa diyæ nīmpo cæcā goquingā, ante badete todānitapa. ⁴⁴ Ayæ nē ò æna guiquēnē tōmengā tōnō godongāmæ timpote wægōna īninque Itota ingante piinte adobaī wēnæ wēnæ ante badete togadaimpa.

Itota wængampa

(*Māadoco 15.33-41; Odoca 23.44-49; Wäo 19.28-30*)

⁴⁵ Tæcæbæcā pōnī bayō tōmāmæ īñontobæ wēmō badinque ayæ ayaōnāa wæiganca mæ māmōnte bai īnimpa. ⁴⁶ Ayæ edæ ayaōnāa wæiyōnte Itota nanguī pōnī yedæ āninque, “Edii, Edii, nēma tabatāni,” āninque mōnō tededō, “Botō Wængonguīñaa, botō Wængonguīñaa, ædō cæte botō īmo ēmō cæte gobiya.”

⁴⁷ Ante wæcā ēñēninque godāmæ ongōnāni guiquēnē,

—Æ. Ediya ingante aa pecā apa.

⁴⁸ Āñōnāni adocanque do pogodo gote onætāmō ænte pōninque biīnōmæ bai onōmænque ænte aa bedōninque næænte, Cæwipaca pædæ æænōmo becæcāimpa, ante cæyongā, ⁴⁹ wadāni guiquēnē,

—Ee aquēnē. Ediya edæ ponte wabānō cæcā quēwenguingā abaimpa, angadānimpa.

⁵⁰ Itota īñōmō wæætē ogæ tededinque do wængacāimpa. ⁵¹ Īninque edæ Wængonguī oncō tæiyæ waēmōncōnē weocoo odemō nāni wææ wodōincoo adoyedē onōnæca īnō tæcæguedē pōnī tænguīmæ wææntapa. Ayæ goinque bayōnte dica incæ tæ gāmæntapa. ⁵² Ayæ wao wodido incæ wi ænote bayōnte edæ Wængonguī quīnāni do wængaīnāni incæ pancadāniya nāni omæmōninque ⁵³ tōmēnāni wodido abæ tawænte godānitapa. Edæ nōwo īñōmō, Itota nāni omæmōngā ate tōmēnāni nē nāni omæmōnīnāni īnte Eedotadēē nāni waēmō quēwēñōmō ponte a ongōñōnāni nanguī ināni agadānimpa.

⁵⁴ Mānīi goinque do pō adinque ayæ, Æbānō cætimpā, ante tōmānō adinque edæ tontado capitāō tōnō wææ wānōnāni tōnō ancaī guīñēninque,

—Nawangä impa. İingä iñömö Wængongui Wengä ingainö ante pönenguenë, angadänimpa.

⁵⁵ Do iñömö Itota Gadideabæ quëwente pöñongante onquiyænäni nanguï inäni tee empote pöningue tömengä beyæ nê cædinäni inte ñowo adodäni adoyömö pö gongæningue pömö adänitapa. ⁵⁶ Mäadiya Mäagadadänä tönö wacä Mäadiya inatapa. İinä iñömö Tantiago tönö Ootee badä inantapa. Ayæ Tebedeo wëna tömëna badä tönö wadäni adobai Itota wæñongante gobæ agadänimpa.

Itota wodi baö ini mäo daga wënänipa
(Mäadoco 15.42-47; Odoca 23.50-56; Wäo 19.38-42)

⁵⁷ Ayæ gawadecæ bayonte Ootee nê nanguï êacä incæ Itota miñæ nê gocä do badingä inte Adimatea iñömö pægaingä inte pongä ingantapa. ⁵⁸ Tömengä iñömö ñowo Pidato weca godinque, Itota wodi baö ini pönömi æmoe, angantapa. Pidato Ao äningue nê cædäni inänite, Tömengä baö ee amini æncæcäimpa, angantapa. ⁵⁹ Itota wodi baö ini gämiyate pædæ wæænonte ænte godinque waëmö weocoo ninocoo nani ancoo wini wini caadinque, ⁶⁰ Ootee, Botö wodido baquimpa, ante dicamontaa nänö wodintatodë müintatodë mäo guidö ñö cædinque daga wengantapa. Ayæ dicabo da pæñæ pönö tee mönodinque wadæ gogacäimpa. ⁶¹ İimai cæyongä Mäadiya Mäagadadänä tönö wacä Mäadiya tönö Itota wodido obo contate acönatapa.

Itota wodido iñömö wæcæ wænönäni a ongönäni

⁶² Ayæ guëmanguïönæ bacæ cæpa, ante nani täno cæönæ iinque cædäni ate iimö ate, Wængongui qui, ante nê godönäni ñænænäni tönö Paditeoidi guiquenë Pidato weca ponte ⁶³ tömengä ingante äningue,

—Awënë eñemi. Mäningä nê babæ äningä iñömö tömengä müingä iñedë apænedinque, Meönaa go adoönæque iñonte botö ñäni ömæmoncæboimpa, ante nänö äninö ante pönente wæmönipa. ⁶⁴ Ayæ tömengä miñæ nê godinäni incæ tömengä baö ini awëmö ö æmainäni ante edæ wæmönipa. Ænäni iinque tömënäni, “Dobæ ñäni ömæmongäimpa,”

ante godömenque babæ änäni edæ wënæ wënæ babaimpa cæbii. Ñowo wææ wänönäni inänite ämi godinque tömënäni mäningä nänö wodintatodë tæëmö tee mönodinque meönaa go adoönæque ganca wææ wänonte acædänimpa. Edæ wii godömenque wënæ wënæ bacæimpa, ante cæcæbiimpa, ämönipa.

⁶⁵ Äñönäni Pidato wæætë,

—Bado, wææ wänönäni mä ongönänipa. Minitö tömënäni inänite ænte mäomini goyönäni minitö wæætë mini eñëninö bai do cædinque tæëmö tee mönote cædäni.

⁶⁶ Angä eñente godinque tæëmö mönodinque Itota nänö wodintatodë dai tee bædodänitapa. Ayæ, Awënë emöwo adinque wi ænodämaï incædänimpa, ante dai bæyömö aquïñedë ongontoca da guidonte awënë emöwo adimpaca yewæmonte bai bagatimpa. Ayæ wææ wänönäni inänite ænte mäo gö cædäni wææ wänongadänimpa.

28

Itota do wæningä inte ñäni ömæmonte quëwengampa

(Mäadoco 16.1-8; Odoca 24.1-12; Wäo 20.1-10)

¹ Mänii guëmanguïönæ iinque go ate wacä tëmäna baquinque ñäo ba iinque Mäadiya Mäagadadänä tönö wacä Mäadiya iñömö Itota wodido acæte ante gogadäimpa.

² Awënë Wængongui anquedo do wææ pöningue edæ dicabo wëä godö oo wi ænocantapa. Ayæ goinque nanguï ocæ ocæ cætimpa. Anquedo iñömö dicaboga tæ contacantapa. ³ Tömengä awinca näinte cæ bai emönongä inte tömengä weocoo näämænta pönü emoncoo mongænte a ongongä. ⁴ Adinque edæ nê wææ wänönäni guiquenë ancaï guïñente wædinque do do wäate bai badinque æmæwo wænte bai öñönänitapa. ⁵ Mänii onquiyænäna pöñönate Wængongui anquedo iñömö,

—Guïñenämaï ieda. Itota nani awäa timpodäni wæningä ingante minatö diqui diqui miminapa, ante edæ do eñëmopa.

⁶ İñömö edæ dæ angampa. Tömengä nänö äninö bai cædinque do edæ ñäni ömæmöninque tao gocäimpa. Pö guite aeda. İntatodë nänö öñontatodë iñömö edæ öñontatoque impa. ⁷ Ayæ nê adimäna inte

edæ quingæ pogodo gote tömengä miñæ në godināni inānite gode ante apænedinque, “Itota dobæ ñāni ömæmongäimpa ataque- edāni, äeda.” Ayæ iñömö tömengä Gadideabæ tāno godinque a ongöñongä mīnitö gote aedāni, ante mīnatö gode ante apæneda eñeedāni. Bado, ämo eñēmīnāpa edæ.

⁸ Angä eñēninque tömengä wodido abæ tawænte wadæ godinque tömēna, Ancai guiñente wæte todadö, äninque watapæ todinque Itota miñæ në godināni inānite gode ancæ pogodo godatapa. ⁹ Goyöna edæ Itota incæ iñontobæ mao bee tēninque edæ, Mīnatö, angä eñēninque edæ iñāna tömengä weca pōninque önōwaca ædæ wæænte mö ongōwate, Wængongui Awēnē imidö anguēnē, ante watapæ apæneyöna, ¹⁰ Itota iñömö edæ,

—Guiñēnāmaī ieda, angantapa. Ayæ, Mīnatö botö biwīdi inānite gode äninque iīmaī äeda. Mīnitö Gadideabæ godinque botö imote acæmīnīmpa, ante tömēnāni inānite äeda, ante Itota angacāimpa.

Nē wææ wänōnināni babæ ante apænedānīpa

¹¹ Onquiyæna gode ancæ goyöna Itota wodido në wææ wänōnināni pancadāniya wæætē tömēnāni nāni quēwēñömö godinque, Wængongui qui, ante në godōnāni ñænænāni inānite apænedinque, iīmaī cætīmpa, ante tömānō ante apænedānitapa. ¹² Apænedāni eñēninque edæ në godōnāni ñænænāni guiquēnē në aadāni nāni Picæncabo tönö pōnē cōninque godongāmæ Ao äninque tontadoidi në wææ wänōnāni iñōnānite tīguitamö padatamö bacoo godōninque, ¹³ tömēnāni inānite iīmaī angadānīmpa.

—Wadāni Itota wodi baö ante wæyōnāni edæ mīnitö önonque, Mö cōñömōni tömengä miñæ në godināni awēmö ponte ö ænānitapa, ante babæ apænecæmīnīmpa. ¹⁴ Ayæ mäninö añōmīni awēnē gobedōnadodo eñēninque, Quīmæ möwēmīnīi, ante pīngä adinque edæ mönitö wæætē wææ cædinque tömengä ingante ämōni eñēninque tömengä pānāmaī ñīmpo cæyongä mīnitö guiñente wædāmaī incæmīnīmpa.

¹⁵ Äninque në godōnāni ñænænāni iñömö në wææ wänōnināni inānite nanguī tīguitamö godōnāni ænānitapa. Mānintamö æninque awēnēdi babæ nāni äninö bai adodö ante apænedinque, Tömengä miñæ në godāni ö ænānitapa, ante babæ wapiticæ apænegadānīmpa. İninque tömēnāni nāni babæ apænedö eñēninque edæ oodeoidi gode ante tededinque godōmenque ñōwo ganca ayæ wapiticæ ante tededānīpa.

Itota, Apænecæ goedāni, angampa (Mäadoco 16.14-18; Odoca 24.36-49; Wäo 20.19-23)

¹⁶ Önompo æmæmpoque go adodānique Itota miñæ nāni godincabo guiquēnē mänīi Itota nānō änö bai cædinque Gadideabæ godinque änanquidi æiyōnāni ¹⁷ Itota a ongongä adinque tömengä weca ædæ wæænte, Wængongui Awēnē imidö anguēnē, ante watapæ apæneyōnāni pancadāniya guiquēnē, Wabānō i, ante pōnēnāmaī ingadānīmpa. ¹⁸ Itota iñömö tömēnāni weca pōnōmenque pōninque,

—Wængongui pōnō cæcā beyænque botö iñömö öönæde Tæiyæ Awēnē inōmo inte inguipoga adobai në Tæiyæ Awēnē badinque nāmā tæi pīñæmo inte në ämo imopa. ¹⁹ Ante wædinque mīnitö guiquēnē inguipoga tömāmæ quēwēnāni weca godinque, Itota miñæ gocædānīmpa, ante apænemīni eñente botö miñæ në godāni bacædānīmpa. Ayæ mönö Mæmpo emōwo apænedinque, ayæ Wængongui Wemo iñōmote botö emōwo apænedinque, ayæ Wængongui Tæiyæ Waemö Önōwoca emōwo apænedinque mīnitö tömāmæ quēwēnāni inānite æpænē guidōmīni guicædānīmpa. ²⁰ Ayæ botö mīnitö imīnite botö äninö ante, Tömānō ante adodö cæedāni, ante odōmōmīni eñente cæcædānīmpa. Ayæ botö edæ ñōwo incæ ayæ inguipoga iinque baganca cōwē mīnitö tönö ongonte godongāmæ cæcæboīmpa. Nāwangä inguinö anguēnē, ante Itota angacāimpa.

Itota Codito ingantedö ante Mäadoco nänö watapæ ante yewæmongainta

*Wäö önömæca ponte apæneca ëñëñänipa
(Mäateo 3.1-12; Odoca 3.1-9, 15-17; Wäö
1.19-28)*

¹ Ponguingä, ante nani Codito angaingä inongä inte Wængongui Wengä Itota ingantedö ante botö Mäadocobo watapæ ante yewæmömopa.

² Doyedë iñömö Wængongui beyæ apænedinque, Codito ingante Wængongui iimaï angäimpa, ante Itaiya wodi yewæmongainta. “Taadö bitö goquinö waa wëwaqingä, ante bai cædinque botö, Botö beyæ në gode änongä ingante da godömo täno beyænte gocä ate bitö ayæ gocæbiimpa, ämopa.

³ Önömæca iñömö adocanque ogæ tedete aa pecæcäimpa. Tömengä iñömö, ‘Awënë nänö ponguinö ante minitö tee moncate bai cædinque, taadö töinö pinonte bai cæedäni,’ ante aa pecä ëñengäimpa,”

⁴ Ante Itaiya wodi nänö në angaingä inongä inte Wäö ñöwo önömæca pöningue æpænë guidongantapa. Mänömaï cædinque tömengä mäniñömö pönäni inänite apænedinque, Minitö, Idæwaa wënæ wënæ cæte awædö, ante ocæ ëmænte Wængongui gämænö pöningue æpænë guicæminimpa. Mänömaï cæmini adinque Wængongui minitö cædinö ante në panguënengä incæte piinämaï inte ñimpo cæcæcäimpa.

⁵ Ante Wäö mänömaï apæneyongante Oodeabæ tömäo quëwëñäni Eedotadëë quëwëñäni tömänäni tömengä weca pö pö bee tente ëñëningue, Näwangä ämipa. Bitö ä bai ëñëñämaï cæte quëwëñäni inte idæwaa wënæ wënæ cæte awædö, ante wædäni ëñëningue Wäö Oododänö æpænë guidongä guidänitapa.

⁶ Wäö iñömö weocoo ante cämeyo ocaguincoo nonte badöincoo mongænte adobai pacadeyænta ante æmontai

badonte encadeyænongäimpa. Tömengä cængui ante ñäwäique cænte tömengä bequi ante guiñëmænque ade bete në quëwëñongäimpa. ⁷ Iimaï ante apæneca ëñëñänitapa. “Iincayæ ate në Ponguingä guiquënë tömengä tæi ëmongä ewocadongä inte nangui cæcä ingampa. Botö guiquënë wædämo pöni inömo inte tömengä awæncata eyepæ imopa godö ñi cæquimoo. ⁸ Botö önonque æpænë guidömo guiminipa. Tömengä wæætë da pönongä ate Wængongui Tæiyæ Waëmö Önöwoca pö guicä ewocacæminimpa,” ante Wäö mäniñedë apænegacäimpa.

*Itota æpænë guicampa
(Mäateo 3.13-17; Odoca 3.21-22)*

⁹ Inque Gadideabæ Näatadeta quëwente Itota mäniñedë pongä adinque Wäö Oododänö æpænë tömengä ingante guidongä guicantapa. ¹⁰ Inique æpænë guidingä inte do ää ta gongæningue Itota æmö ayongä öönæ gä godonte bayö equemö wææ bai Wængongui Tæiyæ Waëmö Önöwoca incæ tömengä wææ guicä acantapa. ¹¹ Ayæ ëñëñongante, “Bitö botö Wëmi inömi inte në botö waadebi imipa, ate tobopa,” ante öönædë inö apæneca ëñengacäimpa.

*Itota incæ wënæ wënæ cæcæcäimpa, ante wënæ cæcampa
(Mäateo 4.1-11; Odoca 4.1-13)*

¹² Mäniñedë Itota ingante Wængongui Önöwoca incæ, Æibawë, äningue önömæca mæicä æicantapa. ¹³ Æi quëwëningue wantæpiyæ coadenta eönæ önömæca quëwëñongante wënæ awënë Tatäna pöningue, Wënæ wënæ cæcæcäimpa, ante Itota ingante cædongäimpa. Ayæ Itota mänömaï babæidi quëwëñömö quëwëñongante Wængongui tömengä anquedoidi inänite da pönongä pöningue tömëñäni tömengä beyæ pönö waa cægadänimpa.

*Itota Gadideabæ pöningue tæcæ mä cæcampa
(Mäateo 4.12-17; Odoca 4.14-15)*

¹⁴ Mänömaï cæte ate ayæ awënë odeye Edode dobæ Wäö ingante tee mönecä ate mäniñedë Gadideabæ pöningue Itota mä Wængongui nänö waa pöni

cægainō ante iīmaī ante apænegacäimpa.
 15 “Ponguingä, ante dodäni nāni angaiñedē
 botō Wængonguī Awēnē Odeyebo inōmo
 inte ñōwo iinque bayedē do pōmopa,
 ante apænebo eñeedäni. Minitō wēnæ
 wēnæ mīni cædimāmo wido cædinque waa
 pōni botō apænedinō mīni eñenō ante
 pōneedäni,” ante Itota angacäimpa.

*Nē gæyæ dadōwēnāni inānite Itota aa
 pecampa*

(Mäateo 4.18-22; Odoca 5.1-11)

16 Ayæ mänii pōninque Itota gāwapæ Ga-
 dideapæ yæwedeca gote cægonte ayongä
 Timönō tönō Æntade tōmengä tōniñacä inate
 acantapa. Nē gæyæ dadōwēna inōna inte
 tōmēna dicamōñæ æpænē wo guitodonte
 dadōwēna acantapa. 17 Tōmēna inate Itota,

—Iñāna, botō miñæ edæ tee empo
 pōeda, ämopa. Nē dadonte ænte pōmīna
 inte botō weca pōñōmīnate botō pōnō
 cæbo ate mīnatō wæætē nē apænemīna
 badinque woadäni inānite nē ænte pōmīna
 bacæmīnaimpa, angantapa. 18 Angä
 eñēninque tōmēna dicamōñæ do emō cæte
 godinque Itota miñæ edæ tee empo wadæ
 godatapa.

19 Itota iñōmō godōmenque gote ayongä
 Tebede wēna Tantiago tönō Wäō adobai
 wipodē dicamōñæ tadōmoncōna acantapa.

20 Adinque Itota do, Botō miñæ pōeda, angä
 eñēninque tōmēna Ao äninque wæmpocä in-
 gante wæætē, Mæmpo eñēmi, änatapa. Bitō
 nempo wipo emō cæte gomōnapa, äninque
 adodaque wæmpocä ingante emō cæte Itota
 miñæ wadæ godatapa.

Itota angä eñente wēnæ incæ tao gopa

(Odoca 4.31-37)

21 Ayæ tōmēnāni quēwēñōmō Capēnaōmō
 māmongä pōnānitapa. Oodeoidi guēmanguiōnæ
 bayonte Itota iñōmō Wængonguī apænecä
 nāni eñente yewæmongainta ate nāni
 odömōincōnē do pō guidindque odōmonte
 apænecä eñēnānitapa. 22 Eñēñōnāni
 tōmengä nāmā tæi piñæninque nē angä
 inongä inte nō odōmonte apænecä eñente
 wædinque tōmēnāni, Wadäni nē wææ
 odömōnāni guiquēnē mänōmaī odōmonte
 apænedäni eñēmongaa. Itotaque nāmā
 nē eñente entawēnongä inte nō pōni
 odōmonte apænecä eñēmōnipa, ante

wædānitapa. 23 Ayæ wēnæ wentamō
 ewocacä inte nē quēwengä mänñedē
 tōmēnāni odömōincōnē a ongōninque
 iñontobæ yedæ ante apænecantapa.

24 —Bitō Itota Näatadeta quēwēnīmi inte
 quīnante mōnatō weca pōmii. Mōnatō
 imōnate edæ æmæwo wido cæcæte ante
 wabānō pōmitawo. Bitō æmōmidō imii, ante
 botō do atabopa. Bitō Wængonguī Tæiyæ
 Waēmō Wēmi inōmi imipa, ante edæ do
 eñēmopa.

25 Ante tedeyongante Itota tōmengä in-
 gante wææ äninque,

—Apocænē quēwenguēnē tedewēē.
 Waocä baönē quēwēnōmi inte edæ tao
 gobäwe.

26 Angä eñēninque wēnæ nē wentamō
 ewocacä iñōmō waocä ingante quidi quidi
 mao tæ gotodō go wææñongante, Yæ yæ,
 äninque dobæ tao gotapa.

27 Itota angä wēnæ tao gocä adinque
 tōmānāni guīñente wædinque nāni caboque
 wæætedō wæætē tededinque,

—Iingä iñōmō quīnō bai ante cæcä.
 Tōmengä nē angä inongä inte edæ mä pōni
 odōmonte apænecampa. Edæ wēnæidi nē
 wentamō ewocadäni inānite tōmengä angä
 eñente cædānipa, ante awædō.

28 Ante pōnente wædinque tōmēnāni,
 Itota mänōmaī cæcampa, ante tededinque
 Gadideabæ tōmāo quēwēnāni inānite mao
 gode ä gode ä cædāni do eñengadānimpa.

*Pegodo nänōogæ wäänä ingante Itota
 cæcä gançæ bacä*

(Mäateo 8.14-15; Odoca 4.38-39)

29 Mänii Itota oodeoidi odömōincōnē
 ongōninque iinque odōmonte apænecä ate
 tōmēnāni tao godinque Tantiago tönō
 Wäō miñæ godinque Timönō tönō Æntade
 oncōnē go guidānitapa. 30 Go guiiyōnānite
 wadāni, Timönō nänōogængä wäänä
 daicawo gawænte möimoga oñongampa,
 änāni. 31 Eñente wædinque Itota tōmengä
 weca go gongæninque pædæ wææmpote
 bæi ongonte tōo æmængä ate tōmengä
 ængæ ganticantapa. Ayæ gançæ badinque
 tōmengä wæætē tōmēnāni beyæ cæcantapa.

*Daicawo gawcænāni inānite Itota cæcä
 waa badānipa*

(Mäateo 8.16-17; Odoca 4.40-41)

³² Mäniönæ gawadecæ pōni nænque wēmō bayō wadāni daicawo gawænāni inānite wēnæ inte quēwēnāni inānite tōmānāni inānite Itota weca ænte pōnānitapa. ³³ Ayæ māniñōmō quēwēnāni tōmānāni adoyōmō pōninqe odemō goto gongænānitapa. ³⁴ Ayæ quiēmē beyæ wēnæ wēnæ inte wædāni adinqe Itota nanguī ināni inānite godō cæcā waa badānitapa. Ayæ wēnæidi nanguī ināni inānite wido cædinque Itota, Botō æbodō imoo, ante nē adīmīni inte tededāmai imæwedāni, ante tōmēnāni inānite wææ angacāimpa.

Itota oodeoidi odōmōincōnē go guidinque apænecampa

(Odoca 4.42-44)

³⁵ Ayæ tæcæ oque pōnente wēmō iñonte ængæ gantidinqe Itota on-codo tao gote gomonga önōmæca godinqe Wængonguī ingante apænecantapa.

³⁶ Apæneyongante Tīmōnōidi, Ædōnō gocāi, ante tee empo tee empo gote, ³⁷ adinqe,

—Dæ ämi wædinque tōmānāni bitō imite ante diqui diqui mīnānīpa cæbii.

³⁸ Ante añōnānite Itota wæætē,

—Mōnō wayōmō gocæimpa. Eye-quei nāni quēwēñōmō nāni quēwēñōmō māo botō apænebo eñencædānimpa, ante cæcæte ante tate pontabopa.

³⁹ Ante nē āningā inte Gadideabæ tōmāo godinqe oodeoidi odōmōincōnē go guii go guii cædinque Wængonguī nānō apænedō ante Itota apænecā eñengadānimpa. Ayæ wēnæidi inānite wido cæcā gogadānimpa.

Nē baadingā ingante Itota wadæ caacampa

(Mäateo 8.1-4; Odoca 5.12-16)

⁴⁰ Ayæ wacā cōwē baate eñawengā inongā inte Itota weca ponte da guicapodinqe,

—Bitō Ao ämi inte wadæ caabi ininqe botō do waintai baabaïmpa.

⁴¹ Añongante Itota tōmengā tōnō guēa wæwente bai nanguī pōnengā inte pædæ wææmpo gampo caadinqe,

—Ao ämpa. Bitō waintai baacæbiimpa.

⁴² Angā ininqe ñōmæintai nānō eñadintai dæ baadinqe tōmengā waintai edæ do baacantapa. ⁴³ Itota edæ tōmengā ingante do da godōninqe nanguī angantapa.

⁴⁴—Eñēmi. Botō æbānō cæboo, ante edæ wadāni inānite māo apænedāmai imæwe. Wæætē, Nāwangā impa, ante acædānimpa, ante cædinque bitō, Wængonguī qui, ante nē godongā weca tōingā godinqe waintai bitō baadintai odōmōmi ædæmō acæcāimpa. Ayæ Mōitee wodi wææ ante nānō angaincoo bai ænte pōninqe bitō waintai bitō baadi beyæ ante edæ, Wængonguī qui, āninqe nē godongā ingante pædæ godōmi æncæcāimpa, ante Itota nē baadingā ingante nanguī angantapa.

⁴⁵ Angā incæte nē baadingā wæætē wadæ godinqe eñēnāmai inte gode ä gode ä cædinque edæ, Itota wadæ caacā waintai baaboï aedāni, ante māo tedecā eñēnānitapa. Mānōmai eñēnāmai cæcā beyænque Itota, Tōmēnāni weca ñōwo ædō cæte edonque goquimoo, ante wædinque nānēnē gote önōmæca gomonga cægongantapa. Incæte tōmengā weca æmænō quēwēnāni æmænō quēwēnāni cōwē pō pō cægadānimpa.

2

Nē cōmāingā ingante Itota angā dao dao gocampa

(Mäateo 9.1-8; Odoca 5.17-26)

¹ Ayæ tæönæ quēwēninque ocæ emænte Capēnaōmō pongā adinqe wadāni, Itota oncōnē ponte ongongampa. ² Ante tededāni wædinque nanguī ināni acæ pōnāni oncōnē eyede pōni guidinque odemō incæ tōmāo wææ ongōnānitapa. Mānōmai tōmāo goto ongōnāni inānite tōmengā Wængonguī nānō apænedō ante apænecā. ³ Eñēñōnāni wadāni tōnō godongāmæ pōninqe mengāa go mengāa ināni incæ cōmāingā nānō mōimpataa æmætæ æmætæ bæi ongonte næænte pōnānitapa.

⁴ Ponte ayōnāni wadāni Itota weca eyede pōni goto ongōnāni adinqe nē ænte māmō pōnināni iñōmō, Ædō cæte guiqui. Ante wædinque oncōmāa inō æidāmæ mæi æidinqe Itota önōnæca inō epæ cædāni ompite gongæñō tōmēnāni cōmāingā mōimpataa bæi ongōninqe tōmengā ingante Itota weca edæ pædæ wæænōnāni. ⁵ Wæænte ongongā adinqe, Tōmēnāni æbānō wede pōnente cædānīpa, ante adinqe Itota cōmāingā ingante,

—Botö wëmi wädämaï ie. Wënæ wënæ bitö cædimämo ante bitö ñowo ñimpo cæte quëwencæbiimpa.

⁶ Ante apænecä eñëninque në wææ odömönäni guiquënë pancadäniya godämæ tæ contate ongöninque nämäneque pönente tededinque, ⁷ “Quimæ anewëe. Ìngä ìñömö Wængonguï ingampa diyæ mänömaï cæquiringäa. Edæ babæ ancädö. Waomö wënæ wënæ mönö cædimämo ante Wængonguinque në ñimpo cæcä ingampa.”

⁸ Ante mïmönoque pönëñönäni Itota tömënäni nani pönëwënö ante önöwënenque do eñente bai pönëninque edæ,

—Minitö quimæ mänömainö ante pönëwëminii.

⁹ “Botö në cömäingä nänö wënæ wënæ cædimämo ante ñimpo cæbo quëwencæcäimpa,” ante botö Wængonguï bai ämo eñëninque mïnitö guiquënë, Wængonguï ingampa diyæ mänömaï cæquiringäa, ante pönëminipa. Wæætë edæ, “Ængæ gantidinque möimpata æninque dao dao gocæcäimpa,” ante botö Wængonguï bai ämo ìninque mïnitö adobai, Wængonguï ingampa diyæ mänömaï cæquiringäa, ante pönëmini ìmaïminipa, ante awädö. Ìñæmpa mänömainö ante pönëmini ìninque mïnitö edæ æbänö cæquënëmo ìmo äminii. ¹⁰ Incæte botö Waobo eñagaïmo ìnte inguipoga quëwëninque waomïni mïni wënæ wënæ cædimämo ante në ämo ìnte ñimpo cæbopa, ante mïnitö edæ eñencæminimpa, ante botö ìmaï cæbopa.

Äninque edæ në cömäingä ingante edæ,

¹¹ —Bitö ìmite ämo eñëe. Ængæ gantidinque bitö möimpata topo cæte æninque edæ tömëmi oncönë næænte goe.

¹² Angä eñëninque cömäingä ìningä incæ edæ tömänäni ayönäni ængæ gantidinque möimpata topo cæte nææ nææ tao gocä adänitapa. Dao dao gocä adinque tömënäni, Æbänö cæcäi, ante eñënamäi ìnte guïñente wædinque,

—Wëenëñedë mänömaï cædäni atamöniyaa. Ñowo ìñömö mä pönï cæcä amönipa, ante pönëninque, Wængonguï bitö ñäö emömi ìnte waa pönï cæbi amönipa, ante watapæ apænægädänimpa.

Debiï ingante Itota angä tee empote gocampa

(Mäateo 9.9-13; Odoca 5.27-32)

¹³ Itota wæætë adodö gäwapæ wedeca gocantapa. Ayæ nanguï ìnäni adoyömö pö pö cædäni adinque tömengä tömënäni ìnänite odömönte apænecä eñënanitapa.

¹⁴ Ayæ godömenque cægonte ayongä Adepeo wengä Debiï ìñömö, Odömäno awënë quï bacæimpa, ante godonte æinta nani æincönë awënë beyæ æncæte ante ongongä adinque Itota tömengä ingante,

—Botö miñæ pöe.

Angä eñëninque Debiï edæ ængæ gantidinque tömengä miñæ wadæ edæ gocantapa.

¹⁵ Ayæ ate Itotaidi Debiï oncönë pö guïite cængöñönäni odömäno awënë beyæ në æwënäni tönö në eñënamäi cædäni tönö nanguï ìnäni adoyömö pö guïite godongämæ cænänitapa. Edæ tæiyænäni tömengä miñæ në godäni ìnönänimpa.

¹⁶ Paditeoidi ìnönäni ìnte në odömönäni guiquënë ponte ayönäni në eñënamäi ìnäni tönö awënë beyæ në æwënäni tönö Itota godongämæ cængä adinque tömënäni tömengä miñæ në godäni ìnänite änänitapa.

—Odömäno awënë beyæ në æwënäni tönö wadäni në eñënamäi cædäni tönö Itota quimæ godongämæ cæwengäa.

¹⁷ Äñönäni Itota wæætë tömënäni ìnänite,

—Në waa ingä guiquënë, Cæbi waa baboe, änämaï ingampa. Në wënæ wënæ ingä guiquënë dotodo ingante do, Cæbi waa baboe, ante aa pecampa. Pancadäniya, Nämä incæ nö entawëmo ìmopa, ante në änäni ìnänite adinque botö në dotodo bai adobai ìnömo ìnte tömënäni ìnänite aa pedämaï incæboimpa. Wadäni guiquënë, Nämä wënæ wënæ cæbo ìmopa, ante në änäni guiquënë, Wængonguï gämænö poncædänimpa, ante botö tömënäni ìnänite aa pecæ pontabopa, ante Itota apænægacäimpa.

Ee ate cænämaï ingcæimpa, ante në änäni
(Mäateo 9.14-17; Odoca 5.33-39)

¹⁸ Wäö miñæ në godäni tönö Paditeoidi tönö mäniñedë Wængonguï beyæ ante ee ate cænämaï ìnönänimpa. Ìninque wadäni Itota weca pöninque änänitapa.

—Wäo miñæ nē godāni tōnō Paditeoidi miñæ nē godāni tōnō tōmēnānique, Wængonguī beyæ, ante ee ate cænāmaī inānīpa. Bitō miñæ nē godāni guiquēnē quīnante Wængonguī beyæ ante cædāmaī ināni inte do cænānīi.

¹⁹ Änāni ēñēnīnque Itota wæætē,

—Onguīñængā nē monguingā nānō wente ænte nē pōnāni baī inōnāni inte botō miñæ nē godāni iñōmō ædō cæte wæwente baī cænāmaī inguīnānīi. Edæ botō tōnō watapæ quēwēnāni inte tōmēnāni ædō cæte wæwente baī cænāmaī inguīnānīi.

²⁰ Wæætē ayæ ate guiquēnē, Monguingā, nāni nē ānongā baī iñōmote wadāni ponte botō imote bæi ongōnīnque ō ænte gocædānīmpa. Mānōmaī cædāni ate botō miñæ nē godāni iñōmō māniñedē ate wæætē cænāmaī inte wæcædānīmpa, ante apænedīnque Itota godōmenque iīmaī ante apænegacāīmpa.

²¹ “Waocā dicæ mīincoo ænīnque pedæncōoga pōnō tadōmonguingāa. Mānōmaī cæcā īnīnque edæ mīincoo incæ dobæ gāānē tamonte guipite ate godōmenque wānā tente baquēnē. Mīnitō, Awente baī cænāmaī inte waa quēwengæīmpa, ante mīni ānewēnō guiquēnē pedæncōo baī inte ēwenguīne ēnēpa. Codito nempo watapæ quēwengæīmpa, ante botō apænedō guiquēnē mīincoo baī inte quēwenguīne ēnēpa. Īnīnque ēwenguīne tōnō quēwenguīne ædō cæte adoyōmō ēñente cæquīi. ²² Ayæ adobaī yowepæ biīnōmæ mīimæ ænīnque waocā ædō cæte picæ æmontaicadedē godō pe ñiñænguingāa. Edæ picæ æmontaicadedē pe ñiñængā īnīnque yedæ æænīnque ætæwo goquīnō anguēnē. Wæætē edæ æmontai mīincadedē pe ñiñænte ate yedæ æænīnque tæi æbænāmaī ee ongonguī apa quēwēmīni,” ante Itota apænegacāīmpa.

Guēmanguīōnæ iñonte tōmēmō tā pete ænānīpa

(Māateo 12.1-8; Odoca 6.1-5)

²³ Ayæ ate guēmanguīōnæ iñonte Itota tōmēmoncodē tæcæguedencodē gocantapa. Goyongā tōmengā miñæ nē godāni tōmēmō inca tæcæ tā pe tā pe ænte idōmæ godāni.

²⁴ Adīnque Paditeoidi guiquēnē Itota ingante ānīnque,

—Bitō miñæ nē godāni æbānō cædānīi, ante cōwā aquēnē. Īñæmpa, Guēmanguīōnæ iñonte mānīnō baī cædāmaī iedāni, ante dodāni nāni wææ angāinō ante ēñēnāmaī inte iīnāni ēñēnāmaī inte quīmæ cædānīi.

²⁵ Ante pīiñōnānīte Itota,

—Docā Dabīi wodi tōmengā nānō nē ēmīñænāni tōnō ōmæpodāni pōnī inte gæwæante wædīnque æbānō cægadānīi, ante yewæmonte ōñō incæ mīnitō iñæmpa adāmaī inte āmīni awædō. ²⁶ Wængonguī quī, ante nē godōnānique cænguī impa, ante wææ nāni angāinō baī cædīnque dodāni pāō, Wængonguī quī, ante ñoncæ ñoncæ cædōnānīmpa. Incæte Abiatade wodi nē godongā ñænængā pōnī inongā nānō godōñedē māniñedē Dabīi wodi Wængonguī oncōnē go guīdīnque mānīi pāō do ænte cænīnque tōmengā miñæ nē godāni inānīte godōmenque godongā cænānītapa, ante yewæmonte ōñō apa ānewēmīnīi.

²⁷ Ante apænedīnque Itota ayæ,

—Wængonguī quīnante, Guēmanguīōnæ, ante badongacāī, ante pōnēmīni. Guēmancædānīmpa, ante cædīnque Wængonguī waomō beyænque ante, Mīnitō guēmanguīōnæ, ante badongacāīmpa, ante pōnenguēnēmīni īmīnīpa. Ædānidō māniōnæ iñonte cædāmaī inānīi, ante pōnēnīnque Wængonguī dicæ māniōnæ beyænque ante waodāni inānīte badongantawogaa. Ædō cæte mānōmāinō ante pōnēwēmīnīi. ²⁸ Īnīnque botō Waobo nē ēñagāīmo iñōmō Tæiyæ Awēnē inōmo inte edæ guēmanguīōnæ Awēnē inōmo īmopa. Ayæ, Guēmanguīōnæ iñonte edæ æbānō cæquīi, ante adobo nē Amo ingāīmo īmopa, ante Itota apænegacāīmpa.

3

Nī cōmampōingā

(Māateo 12.9-14; Odoca 6.6-11)

¹ Īncayæ ate Itota wæætē ood-eoidi Wængonguī apænecā nāni ēñente yewæmongainta ate nāni odōmōincōnē go guīcantapa. Māniñōmō onguīñængā nī cōmampote wædongā inte a ongongan-tapa.

² Māniñedē Paditeoidi pancadānīya, Itota wapiticæ cæcā īnīnque

mönö wæætē piinte angæimpa, ante nē ānewēnāni inte cædōnānimpā. Nōwo iñōmō tōmēnāni, Guēmanguiōnæ i incæte Itota nī cōmampoingā ingante, Waa bacæcāimpā, ante cæcā iñinque mönö māo piinte angæimpa, ante babæ cæcæte ante cōwā adānitapā. ³ Ante cōwā ayōnāni nī cōmampoingā ingante Itota,

—Bitō ængæ gantidinqe tæcæguedē pō næ gongæe.

⁴ Äninqe wæætē nē piinte ancædāni iñānite äninqe,

—Guēmanguiōnæ iñonte mönö æbānō cæquēnēmō imōō, ante wææ angatīi. Mönö edæ waa cæquēnēmō imompā, ante pōnēmīnitawo. Wæætē edæ, Wēnæ wēnæ cæquēnēmō imompā, ante pōnēmīnitawo. Quēwencædānimpā, ante mönö waa cæquēnēmō imompā, ante pōnēmīnitawo. Wæætē, Wæncædānimpā, ante mönö wænonguēnēmō imompā, ante pōnēmīnitawo. Mänōmāi ante Itota angā iñinque tōmēnāni edæ pæ wēenedānitapā.

⁵ Adinqe tōmengā ænguī badinqe tōmēnāni iñānite æmætæ gomō æmætæ gomō adinqe edæ, Mīmō ömædēināni incædō, ante wædinque nī cōmampoingā ingante,

—Pædæ pompobi, angā ēñēninqe pædæ pompodinqe nē cōmampodinqā incæ ædæmō waa empocā bapocantapā. ⁶ Adinqe edæ Paditeoidi guiquēnē wadæ tao godinqe Edodeidi tōnō bee tēninqe, Mönö æbānō cæte Itota ingante wænonmō wænguingā, ante godongāmæ pōnēninqe tedegadānimpā.

Gāwapæ wedeca nanguī iñāni pōnānīpā

⁷ Itota iñōmō tōmengā nānō nē emiñænāni tōnō wadæ tao godinqe gāwapæ wedeca godāni adinqe Gadideabæ quēwēnāni nanguī iñāni tee empote godānitapā. ⁸ Iñinque wadāni Oodeabæ, Eedotadēē, Idōmeabæ, Oododānō æmæmāa, Tido eyequei, Tidōo eyequei māniñōmō quēwente tededinqe, Itota mänōmāi cæcampā, ante tededāni ēñente wædinque bacoo iñāni māniōmæ tōmāo quēwēnāni inte tōmengā weca pōnānitapā. ⁹ Adinqe Itota, Goto gongæñāni wæcæ wæ, ante pōnēninqe tōmengā miñæ cōwē nē godāni

iñānite, Wipo ænte pōmīni ate botō wipodē wāi wocænte owocæboimpā, angantapā. ¹⁰ Wēēnē iñōmō, Itota nanguī iñāni iñānite gampocā waa badānīpā, ante nē adīnāni inte tōmēnāni nōwo, Mönö gampo cæte waa bacæimpā, ante cædinque goto gongæñāni wædinque mänōmānō ante ānongāimpā.

¹¹ Ayæ Itota ingante adinqe wēnæidi nē wentamō ēwocadāni incæ tōmengā önōwā gāānē ædæ wææninqe,

—Bitō Wængonguī Wēmi iñōmi imīpā tōō, ante Yæ ānānitapā. ¹² Eñente wædinque Itota wæætē, Botō æbodō imoo, ante cōwē ānāmāi inguēnē quēwēmīnīi, angacāimpā.

Itota angā ate dote ganca iñāni nē gode ānāni badānīpā

(Mäateo 10.1-4; Odoca 6.12-16)

¹³ Ayæ ānanquidi æidinqe Itota, iñāni iñānite āmo poncædānimpā, ante aa pecā tōmengā weca pōnānitapā. ¹⁴ Pōnāni ate tōmengā dote ganca iñāni mānimpodāni iñānite, Mīnitō botō miñæ quēwēñōmīnite botō wadāni weca da godōmo gote apænemīni ēñencædānimpā, āninqe, Botō beyæ nē gode āmīni incæmīnimpā, angacāimpā. ¹⁵ Ayæ pōnō apænebo ēñēninqe mīnitō tæi emōmīni inte wēnæidi iñānite nē āmīni badinqe wido cæcæmīnimpā. ¹⁶ Tōmengā dote ganca nānō apænte ænāni iñōmō iīmāi emōnōnānimpā. Tānocā Timōnō emongā incæte Itota wawo Pegodo pemongacāimpā. ¹⁷ Tebedeo wodi wēna Tantiago tōnō Wāō nāna caya nē yedæ tededā ina adinqe Itota, “Detæbo nānōmoda baī inapā,” ante, Mæmæ beyæ, ante Boānede pemongacāimpā. ¹⁸ Ayæ Æntade, Pedipe tōnō Batodōmēē, Mäateo tōnō Tōmato, Adepeo wengā Tantiago tōnō Tadeo iñānitapā. Ayæ, Mönö ömæ ingæimpā, ante nanguī cædongā inte wacā Timōnō ingantapā. ¹⁹ Ayæ Itota ingante odōmonte nē godonguingā Codaa Icadote nāni ānongā ingacāimpā. Mānimpodāni iñānite Itota angā nē gode ānāni bagadānimpā.

Wēnæ tōnō cæcā imāingampā, ante wapiticæ ānānīpā

(Mäateo 12.22-32; Odoca 11.14-23, 12.10)

²⁰ Ayæ ate Itota oncōnē pongacāimpā. Pongā adinqe bacoo iñāni wæætē pō pō goto gongæñāni adinqe wadāni

guiquënë, Itotaidi quiodö cænguïnänii, ante wædönänimpa. ²¹ Ayæ, Quimæ. Ocai edæ ömædæcacä pönente bai cæcämææ, ante pönente tededönänimpa. Mänömainö ante tededäni eñëninque Itota guidënanii guiquënë tömengä ingante bæi ongonte æncæte ante wadæ pönänimpa.

²² Ayæ nê wææ odömönäni guiquënë Eedotadëë quëwente pöningue, “Iñæmpa wënæ awënë Beedeboo tönö quëwengä inte Itota mäningä tönö cædinque wënæidi inänite wido cæcä imaingampa,” ante tedewënanii.

²³ Eñente wædinque Itota aa pecä pönäni ate, “Tatäna mïni änogä iñömö nämä incæ ædö cæte wido cæquingä, ante eñencæminimpa, ante botö, Ingui-poga æbänö cædänii, ante odömömo aedäni. ²⁴ Awënë odeye nempo quëwënanii iñömö piinänii badinque näëmæ wæatedö wæætë cædäni ininque awënë odeye nänö ömædempote wæquinque tömënanii nämä ëwente cædänipa. ²⁵ Ayæ adocönë owocabo incæ adoyömö godongämæ quëwëninäni incæ näëmæ wæatedö wæætë cædäni ininque tömënanii oncö woquinque näwæ gobainänipa. ²⁶ Ayæ Tatäna nempo quëwënanii iñömö edæ näëmæ piinte badinque wæatedö wæætë cædinque tömengä ingante wido cædäni ininque Tatäna dicæ tömënanii awënë imaingä,” ante Itota odömönte apænegacämpa.

²⁷ Ayæ, “Nê tæi piinängä ingante wii goto wininque waocä ædö cæte tömengä oncönë guite mäincoo ö ænguingä. Edæ nê ëacä ingante bæi ongonte goto winte ate pö guite ö ænänii bai botö iñömö wënæ inte nê bæi ongonte wido cæbo imopa,” angantapa.

²⁸ Ayæ, “Näwangä apænebo eñëedäni, angantapa. Mïni waocabo wënæ wënæ cæmïni incæ wadäni inänite godö babæ änewëminii incæte edæ Wængongui wæætë tömänö ante pönö ñimpo cæcä beyænque quëwencæminimpa. ²⁹ Wæætë Wængongui Tæiyæ Waëmö Önowoca ingante waocä godö babæ ante wënæ wënæ apænegacä ininque tömengä æmæwo wentamö mongængä bagaingä ininque cöwë wantæpiyæ wentamö mongæncæcämpa. Mänömai beyæ Wængongui ñöwopämo

iñonte ñimpo cædämai inte iincayæ pömämo iñonte adobai ñimpo cædämai inte cöwë pancæcämpa,” ante Itota apænegacämpa.

³⁰ Äninqe, Minitö botö imote, Bitö wënæ nê wentamö ëwocacä tönö quëwente cæbaimipa, äminitawoo. Iñæmpa, Wængongui Tæiyæ Waëmö Önowoca tönö quëwente cæbo apa änewëminii, ante Itota apænegacämpa.

Itota badä tönö tömengä biwiidi
(Mäateo 12.46-50; Odoca 8.19-21)

³¹ Ayæ Itota wäänä tömengä biwiidi tönö mäni nänii ponque pö do pöningue yabæque ayæ ongöninqe, Guii äñete tae. ³² Änänii eñente äñecæte ante ponte apænegacä eñëninque wadäni Itota weca contate ongönäni Itota ingante wæætë apænedinque,

—Bitö badä bitö biwiidi tönö bitö imite ante oncodo ponte yabæque ongönänipa cæbii.

³³ Ante äñönänite,

—Botö badä ædänö inää ante ämoo, ante pönëminii. Ayæ botö biwiidi ædänidö inänii ante ämoo, ante pönëminii.

³⁴ Äninqe godämæ contate ongönäni inänite adinque,

—Iinänii iñömö edæ botö badäidi botö biwiidi inönäni inänipa, ante mänömainö ämo abaiminipa. ³⁵ Edæ Wængongui nänö äno bai eñente æcänö cæte quëwëna mäningä botö biwi ingampa. Mäningä botö biwinque ingampa. Mäninä botö badä inampa, ämo abaiminipa, ante Itota apænegacämpa.

4

Waocä nänö quiyadö ante odömönte apænegacämpa
(Mäateo 13.1-9; Odoca 8.4-8)

¹ Wæætë gäwapæ yæwedeca gote odömoncæ cæyongä nangui inänii tömäo goto ponte ongönäni adinque Itota wipodë go guite tæ contate wäi wocænte owoyongä tömënanii ayæ gäwapæ yæwedecaque ömaaque ongönänitapa. ² Ininque tömënanii inänite nangui pönii odömöningue Itota, Wængongui Awënë nempo quëwëninque æbänö cæquii, ante eñencæminimpa, ante botö imæca quëwënanii nänii cæinö ante odömönte apænebo eñëedäni.

Äninqe iimaï ante odömönte apæneca
 eñengadänimpa. ³ “Apænebo eñeedäni.
 Waocä nê quiyadongä iñömö quiyacæ
 gocampa. ⁴ Gote quiyayongä panca-
 monga taadö iñömö eyepote wææmompä.
 Taadö wæænte eyepodimö öñöñonte
 ayamöidi pöningue dobæ ade cænänipa.
⁵ Pancamonga guiquenê dicamontaa
 onguipoi woyedömö iñömö eyepote
 wææmpä. Onguipoi woyedömö öñömö
 inte pæquinämaï quingæ tä bocate
 pædinque æmonga æipa. ⁶ İninqe
 oguimento yæyæmê guiwadämaï inte cöñe
 bawadämaï iñönte nænque ti näwäñö wänä
 cacadinque edæ guingo icate näñe wæmpä.
⁷ Pancamonga guiquenê ömentacodê nänö
 eyepodimö iñömö pæquinämaï tä bocate gä
 æiyonte ömentacoo pö incootonque ganta
 cæca ate näñe wæmpä. Wampo incapa
 pæquiï. ⁸ Waæmonguipoga quiyadimö
 guiquenê tä bocate waa pædinque tömëmö
 nanguï pönï godömenque incapa. Pan-
 cawæncaa edæ todëinta ganca, pan-
 cawæncaa teitenta ganca, pancawæncaa
 tiëe ganca mänimpomö incapa. Quiyacä
 nänö quiyadö ante edæ botö mäninqe ante
 apænebopa.”

⁹ Mänömaï impa, ante iinque apænebopa.
 Eamonca ongonde edæ eñeedäni, ante Itota
 apænegacäimpa.

*Önömoncaque eñente pönänämaï inänipa,
 ante*
(Mäateo 13.10-17; Odoca 8.9-10)

¹⁰ Ayæ ate nanguï ongöninäni dæ godäni
 ate Itotaidi adodänique ongöñönäni edæ,
 Dote, ante näni gocabo tönö wadäni
 tömengä miñæ godäni tönö tömengä
 weca ponte änänitapa. Itota eñemi.
 Bitö mäninö ante apænedinque æbänö
 ante odömoncæte ante apænebitawo.
¹¹ Äñönänite, “Wængonguï Awenê Od-
 eye iñömö æbänö awëmö cæcää, ante
 mini waocabo wëenëñedê eñenämaï ininö
 incæte ñöwo edonque pönö apænebo
 ate minitö adomînique nê eñëmini
 bamînipä. Gobæ ongönäni inänite
 apænedinque, Inguipoga quëwënäni näni
 cæi bai impa, ante botö pancaa ante
 odömönte apænebo eñenänipa. ¹² Dodäni
 Wængonguï beyæ apænedinque iimainö

ante yewæmongadänimpa. Wængonguï
 nänö nê ñimpo cæquënänäni inämaï inäni
 inte tömënäni iñömö awincaque adinque
 wïi ædæmö adäni inte önömoncaque
 eñëninque ædæmö eñenämaï inäni inte
 edæ ocæ emænte pönämaï incädänimpa,
 ante yewæmongadänimpa. Mänömaï iinque
 bacæimpa, ante beyænque botö tömënäni
 inänite wïi edonque apænebopa,” ante
 Itota apænecantapa.

*Quiyacä nänö cæinö ante pönente iimainö
 ante eñëgæimpa*

(Mäateo 13.18-23; Odoca 8.11-15)

¹³ Itota ayæ tömënäni inänite godömenque
 apænecantapa. “Botö mäninö ingui-
 poga näni cæinö ante do odömönte
 apænebo eñëninque minitö eñenämaï
 iminitawo. İninqe ñöwo godömenque
 odömönte apænebo incæte minitö ædö cæte
 godömenque eñenguimîni.”

¹⁴ “İimaï impa. Nê apæneca iñömö
 tömëmö quiyate bai cædinque Wængonguï
 tömengä nänö apænedö ante apænecampä.
¹⁵ Pancadäniya guiquenê taadö eyepote
 wæænîmö bai inäni inte Wængonguï
 nänö apænedö ante eñëninque mîmönö
 pönänämaï iñönänite ayamö ade cængä bai
 Tatäna incæ ponte ö ængampa. ¹⁶ Wadäni
 guiquenê dicamontaa woyedömö iñömö
 eyepote wæænîmö bai inäni inte tömënäni
 Wængonguï nänö apænedö eñëninque
 quingæ Ao ante watapæ todänipa.”

¹⁷ “Ayæ ate adodäni wantæ iñö
 quëwëñönänite wadäni Wængonguï nänö
 apænedö beyæ piinäni wädänipa. Ayæ
 wadäni wënæ wënæ cæcæte ante togænte
 pänäni wädänipa. İninqe oguimento
 yæyæmê guiwadämaï näñe wænte bai
 inäni inte tömënäni guiñente wædinque emö
 cæte godänipa. ¹⁸ Ayæ wadäni guiquenê
 ömentacodê eyepote wæænîmö bai inänäni
 inte Wængonguï nänö apænedö eñëñönäni,
¹⁹ inguipoga quëwente quiëmê beyænque
 mönö wæpämo pompa. Ayæ, Mäincoo
 beyænque toquîmo, ante näni oda cæte
 wæwëmämö pöningue wacoo wacoo näni
 æinënö pöningue edæ ömentacoo ñancate cæ
 bai cæyonte Wængonguï nänö apænedinö
 incæ incadämaï bai bapa. ²⁰ Onguipoga
 wainguiipoga quiyadimö bai inäni

guiquënë tömënäni Wængonguï apænedinö eñente Ao äninque wede pönënäni inte tömëwæ incate bai Wængonguï beyæ nanguï cædänipa. Pancadäniya todëinta ganca incate bai nanguï cæyönäni, pancadäniya godömenque teitenta ganca incate bai cædänipa. Pancadäniya nanguï pönï tiëë ganca incate bai cædänipa,” ante Itota apænecä eñënänitapa.

Gongapæncade ante odömönte apænecampa (Odoca 8.16-18)

²¹ Ayæ tömënäni inänite Itota iïmaï odömöninque apænecantapa. “Waomïni gongapæncade ti wodönodinque dicæ owætadë boo cæcaminiyaa. Dicæ möimoga ænömengadæ inö mäo concæminiyaa. Wæætë edæ wænömënæcapaa concæmïni ñäo bæco amïnipa. ²² Quïnö ante wë wodonte bai i iñömö mäninö ante iïncayæ ate tadonte edonque ate bai eñenguinque ñöwo wë wodonte impa. Quïnö bee ocate bai i iñömö mäninö iïncayæ ate wi æncate edonque aquinque ñöwo bee ocate impa. ²³ Eamonca ongönte eñenguënë cæminii,” angantapa.

²⁴ Ayæ tömënäni inänite godömenque apænedinque Itota, “Önömonca eñëninque eñenguënë cæminii. Minitö mini tee mante godoncade incæ adocadeca tee mäninque Wængonguï minitö iminïte adodö pönöninque godömenque ayæ pönongä æncæminimpa. ²⁵ Edæ nê éacä ingante godönäni ængä bai nê eñengä ingante godö apænebo eñente entawëninque tömengä godömenque eñente bacæcäimpa. Nê éadämaï ingä guiquënë tömengä wædænque pönï nänö mäincoo iñönte mänincoo tömancoo ö ænänï wæcä bai nê eñënämaï ingä adobai tömengä wædænque pönï nänö eñente entawënö iñönte ö ænte bai cæbo dæ ba ate wæcæcäimpa.” Mänömainö ante Itota tömengä emiñænäni inänite odömönte apænecä eñënänitapa.

Guiyämö pæpa, ante odömönte apænecä

²⁶ Nöwo iñömö öömaque ongönäni inänite godömenque odömöninque Itota iïmaï ante apænegacäimpa. “Waocä quiyacä ate awëmö pæ bai inte Wængonguï Awënë Odeye pönö cæcä ate tömengä nempo nê quëwënäni awëmö yebæninque bacoo pönï

badänipa. Apænebo eñëedäni. Waocä gönea quiyate ate, ²⁷ woyowotæ mö ñöninque baänæ ñäni ömæmöñongä iïmö iñö iïmö iñö tömëmö nänö quiyadimö incæ awëmö tä bocate pæpa. Waocä iñömö, Æbämë cæte tä bocate pæpa, ante acantawogaa. ²⁸ Edæ onguipo beyænque tömengä nänö quiyadimö incæ tä bocate pædinque æmonga æi cænguimæ baate ate ayæ cænguï yagapa. ²⁹ Yaga adinque, Amiñate cænguï bapa, ante edæ pete ængampa,” ante odömönte Itota apænegacäimpa.

Möotatamö guidimö ante odömönte apænecampa

(Mäateo 13.31-32; Odoca 13.18-19)

³⁰ Ayæ godömenque apænedinque Itota, “Wængonguï Awënë Odeye nempo æbänö quëwënäni, ante mönö quïnö odömönte ate eñenguï. Edæ, Inguipoga quïnö pæte yebænte bai i adinque, Mäninäni adobai yebænänipa, ante eñengæimpa. ³¹ Iïmaï impa. Möotatamö mini ænte quiyamö guidimö pönï i bai wamö mini quiyamö adomonque incæ adobai guiyämö pönï i iñömö edæ dæ ampa. ³² Incæte möotatamö iñömö tä bocate pædinque möotatawæ edæ ocäñequi doyæ pæwæ bapa. Wïi tömäa ocäñequi mini quiyadiwæ bai edæ ocäa inämaï inte möotatawæ iñömö edæ ñænæ awæ impa. Adinque tömëwæ ibæñömö ayamöidi gänë iñömö ponte ongönänipa. Möotatamö guidimö incæ mänömaï pæ bai Wængonguï Awënë nempo quëwënäni iñömö wædænque ininäni incæ nanguï yebænguïnäni inänipa,” ante Itota odömönte apænegacäimpa.

Inguipoga näni cæi bai impa, ante Itota odömongampa

(Mäateo 13.34-35)

³³ Ayæ Itota, Wængonguï Awënë nempo quëwëninque æbänö cæquï, ante eñencædänimpä, ante imæca quëwënäni nänï cæinö ante godömenque nanguï pönï odömöninque godongämæ ongönäni nänï eñenganca apænedinque idæwaa. ³⁴ Mäninonque bai odömönte apænedinque tömënäni inänite cöwë godömenque apænedämaï inongäimpa. Incæte tömengä miñæ nê godäni adodänique ongöñönänite

Itota edonque pōni, Mänōmaī impa, ante tōmānō ante apæ necā ēñengadānimpa.

Itota angā ēñente woboyæ æpæ næ gongæmpa

(*Mäateo 8.23-27; Odoca 8.22-25*)

³⁵ Māniōnæ gāwadecæ bayonte Itota tōmengā ēmiñænāni inānite,

—Gāwapæ æmæmāa taocæimpa.

³⁶ Äninqe ömaa ongönāni inānite emö cæte taocæ cædinque tōmengā nānō apænedimodē adopodē ayæ contayongante mantadāni taocantapa. Adinque wadāni wapodē godongāmæ taodānitapa.

³⁷ Tao wogaa goyönāni woboyæ iñontobæ nanguī pōni pæmæninque æpæ mængonta mængonta pōninque gao gao wipodē änēñō,

³⁸ Itota yæmiñæmpo bee podoncate mō ñongantapa. Ömæmoncæcäimpa, ante tao cædinque,

—Awënē, bete wæncæ cæmompā mō ñömij.

³⁹ Änāni ēñēninque ñāni ömæmonte ængæ gantidinque,

—Woboyæ, pæmænāmaī imāwe. Gāwapæ incæ cædāmaī næ gongæmāwe.

Ante añongā woboyæ pæmænāmaī iñō gāwapæ incæ næ gongæninque ñancæ ñancæ gongæmænimpa. ⁴⁰ Ayæ tōmēnāni inānite,

—Mīni pōnēegade, quīmæ guiñewēmīni.

⁴¹ Äñongā tōmēnāni ancaī guiñēninque nāmāneque tededinque,

—Æcāmē inte angā ēñente woboyæ incæ æpæ incæ gongæmpa, ante guiñente wægadānimpa.

5

Wænæ wentamō ewocacā tönō nē quēwengā

(*Mäateo 8.28-34; Odoca 8.26-39*)

¹ İninque Itotaidi mānīi æmæmāa tao godinque Guedatabæ pō ti wæænānitapa.

² Itota mänōmaī pōninque gāwapæ tao ti wæængā adinque onguiñængā wænæ wentamō ewocacā tönō nē quēwengā inongā inte edæ waodānido quēwente tao bee tengantapa. ³ Tōmengā waodānido cōwē nē quēwengā ingante ædō cæte goto winguināni. Daagōmenca incæ tææmō impa goto winguināni. ⁴ Ēno

pönō goto wimænte wææ ēno pönō goto wīwate bacæcäimpa, ante ancaa cæyönāni tōmengā daagömē wangō ñæ wangō ñæ cædongäimpa. Æcāmenque incæ tæi piñængā inte tōmengā ingante ænguingā. Edæ dæ änongäimpa. ⁵ Itædē incæ woyowotæ incæ tōmengā änanquidi æite wææ waodānido pō änanquidi æite wææ ocæ emænte pō pō cæte Yæ yæ äninque dicaca nāmā incæ äwænonga äwænonga cæte wencata bai ēñate quēwengäimpa.

⁶ İninque Itota go dibæ pongā adinque tōmengā quingæ pogodo godinque Itota weca ædæ wææninque, ⁷ ogæ tededinque,

—Itota ēñēmi, bitō nē Æibæ Quēwengā Wængonguī Wēmi inōmi incæ quīmæ botō weca pōwēē. Edæ, Ämogate wæcæcäimpa, ante botō imote cædāmaī imāwe, ante nanguī angantapa.

⁸ Edæ tōmengā tæcæ pō bee tēñongante wænæ ingante Itota iīmāi ante äningā inongäimpa.

—Wentamō nē wentamō ewocabi inte ämo ēñē. Bitō waocā baonga guidēmi inte ñōwo tao gobāwe, ante Itota tāno angā ēñente wædingā inte wænæ ñōwo, Cædāmaī imāwe, angantapa.

⁹ İninque Itota, —Bitō æmōmidō imii. Äñongante,

—Tontadoidi tæiyænāni adinque, Deguiönō, änānīpa. Mönitō adobai tæiyæ pōni imōnīpa, ante botō emōwo adobai Deguiönō emōmopa.

¹⁰ Ante apænedinque ayæ, Mönitō imōnite wabæca wido cædāmaī incæbiimpa, ante ancaa angantapa. ¹¹ Māniñömō odæ wængänāidi nanguī ināni eyequei änanquidi a cængönāni adinque, ¹² wænæidi incæ Itota ingante,

—İi odæ wængänāidi weca ämi godinque tōmēnāni baönē guiite quēwēmōnie.

¹³ Ante tedete añönānite Itota Ao angā ēñente wædinque wænæidi wentamō ewocadāni iñömō tao gote odæ wængänāidi baönē go guidānitapa. İninque odæncato dote mīido ganca ināni incæ ontacamō cægōninque tōmāne to wæi gāwapæno pogodo wæi guiite becadote capo wænānitapa.

14 Becadote wænāni adinque odæ wængānāidi nē aadināni guiquēnē pogodo wodii wīnonte tōmēnāni quēwēñōmō māo bee tente apænedinque idōmæ māo gode ā gode ā cæte, Itota mǎnōmaī cæcā wæmōnīpa, ante apænedāni ēñēninque wadāni, Æbānō cæcāi, ante acæte ante pōnānitapa. 15 Itota weca ponte ayōnāni wēnæidi tōnō nē quēwēningā incæ ñōwo ōnonganque bate weocoo ēñacā inte tæ contate ongongā adinque tōmēnāni, Mōnō Deguiōnō ēnempocā āningā ingampa, ante guīñente wægadānimpa. 16 Nē adināni guiquēnē ñōwo pōnāni inānite apænedinque, Wēnæ ēnempocā iningā ingante Itota æbānō cæcāi, odæ wængānāidi inānite Itota æbānō cæcāi, ante apænedāni. 17 Ēñēninque tōmēnāni wæætē Itota ingante, Mōnitō weca quēwēnāmaī gobāwe, ānāni.

18 Ēñente wædinque wipodē go guicæ cæyongante wēnæidi inte quēwēningā iñōmō, Bitō miñæ māobi goboe. 19 Āñongante Baa āninque Itota,

—Tōmēmi oncōnē gote, Wængonguī Awēnē wēnæidi inānite wido cæcā ōnōmoque baboi aminīpa, ante bitō guīdēnāni inānite māo apænebi ēñencædānimpa. Ayæ, Botō wæwente quēwēñōmote tōmengā guēa wæwente bai pōnente pōnō cæcā waa batabopa, ante apænebi ēñencædānimpa.

20 Itota angā ēñēninque wadæ godinque tōmengā Decapodibæ māo, Itota waa cæcā waa batabopa, ante apænecā. Ēñente wædinque tōmānāni, Æ æbānō cæte mǎnōmaī waa bacāi, ante guīñente wægadānimpa.

Gaido wēñængā beyæ cæcæ goyongante

onquiyængā Itota weocoo gampocampa (Māateo 9.18-26; Odoca 8.40-56)

21 Mānīi wipodē guīte tōmengā imæmāa ta ti wæængā ate nanguī ināni acæte ante pō goto goto godāmæ gongænānitapa. Itota ayæ gāwapæ wedeca ongongantapa. 22 Ayæ ongōñongā wacā oodeoidi odōmōincō awēnē inongā inte tōmengā emōwo Gaido iñōmō Itota ingante adinque pōninque tōmengā ōnōwaca gāānē ædæ wæænīnque, 23 tōmengā ingante,

—Botō wēñængā baquecā iñōmō edæ dobæ wæncæ cæcampa cæbii. Bitō ponte tōmengā ingante gampobi waa bate quēwencæcāimpa, ante nanguī angantapa.

24 Gaido mǎnōmaī angā ēñēninque Itota wæætē tōmengā miñæ gocantapa. Idōmæ goyongante nanguī ināni bee tente goto goto pōnāni. 25 Īninque godāmæ ongōnāni tōnō onquiyængā adocanque wantæpiyæ dote wadepo iñonte wepæ wantæ bidāmaī cōwē wææ wæwēningā inte adobai ponte tōmēnāni miñæ gocantapa. 26 Doyedē iñōmō onquiyængā waa bawēnencæte ante cædinque tōmengā quincōo tōmancoo eyepote pædæ godongā æninque dotodoidi tæiyænāni cædāni caate wæcā incæte tōmengā waa bawēnēnāmaī inte godōmenque wēnæ wēnæ bate wædongāimpa.

27 Mǎnōmaī quēwente wæyongante wadāni, Itota mǎnōmaī cæcampa, ante tededāni ēñente wædinque tōmengā ñōwo goto pōnāni tōnō pōninque Itota ōnōñabæca inō ponte weocooque godō gampocantapa. 28 Edæ, “Tōmengā weocooque gampote waa bawēnēmote,” ante pōnēningā inte, 29 tōmengā godō gampoyongā wepæ nānō gowete wæwēnimæ wantæ bi ate tōmengā, Wantæ biwēnēmopa, ante ōnōwēnenque pōnengantapa. 30 Itota iñōmō, Æ, tæi piñante botō entawēnō incæ edæ wacā beyæ cæquinque do gotimpa, ante wæwēnente awædō, āninque goto gongænāni tæcæguedē næ gongænīnque dadi emænte cōwā adinque,

—Botō weocoo æcānō pōnō gampodaī, angantapa.

31 Āñongante tōmengā nānō nē emiñænāni guiquēnē,

—Ēnodāni pōnānīpa aquīmīi. Æcānō gampodaī, ante āmīi.

32 Wææ ānāni incæte tōmengā, Æcānō botō imote wede pōnēninque gampodaī, ante godōmenque tōmāo cōwā cōwā acantapa. 33 Ayongante onquiyængā guiquēnē, Wampo bawēnēmopa, ante pōnēningā inte nanguī guīñēninque do do wāate wædinque Itota weca ponte ædæ wææncate tōmānō ante tōingā apænecā ēñengantapa.

34 Apænecā ēñēninque Itota wæætē,

—Onquiyæmi eñëmi. Bitö wede pönëno beyæ edæ wampo bawënemipa. Ñowo edæ wädämaï inte waa godinque nö bawënente quëwëe, angantapa.

³⁵ Ante tæcæ apæneyongä oodeoidi odömöincö awënë Gaido oncönë quëwënäni mäniñedë pöningue edæ Gaido ingante apænedänitapa.

—Bitö wengä iñömö ñowo æmæwo wængampa cæbii. Ñowo Awënë në Odömongä ingante quïnante godömenque angüi.

³⁶ Ante ponte añönänite Itota tömënäni æbänö tededäni ante eñënämaï inte bai cædinque oodeoidi odömöincö awënë Gaido ingante apænedinque,

—Guiñänämaï inte önonque wede pönëe, angantapa.

³⁷ Ayæ godongämæ ongönäni inänite, Ee ongödäni, äninque Pegodo ingante, Tantiago tönö Wäo näna caya inate mänimpodänique inänite ænte gocantapa.

³⁸ Tömënäni tönö godinque Itota tömënäni odömöincö awënë oncönë ponte ayongä mänincönë woadäni nanguï cægöningue edæ Ca ca wædinque ogæ tedete Yæ yæ änäni acantapa. ³⁹ Adinque Itota oncönë guïdinque,

—Quimæ ogæ tedete cægöwëminii. Quimæ Ca ca wëminii. Iñæmpa iñömö wëñængä wodi edæ wii æmæwo wængantapa. Edæ mö ñongampa.

⁴⁰ Ante apænecä eñëninque tömënäni, Angantedö amïni, ante tömengä ingante badete todänitapa. Itota wæætë edæ, Gä goedäni, angä oncodo tao godänitapa. Ininque wëñængä wæmpo tönö wäänä inate Itota tömengä miñæ në pöninäni tönö mänimpodänique inänite ænte manguicä wëñængä wodi näno öñoncönë wäänë guïdänitapa. ⁴¹ Wëñængä wodi ingante Itota pædæ wææmpo bæi ongonte töö æmæninque,

—Tadita cömi, äninque mönö tededö, “Wëñæmi onquiyæmi ængæ gantibi,” angantapa.

⁴² Angä eñëninque wëñængä baquecä dote wadepo eñadingä inte dobæ ængæ gantite dao dao gocä. Adinque tömänäni ancai guïñente wädänitapa. ⁴³ Itota wæætë,

Botö æbänö cæboo, ante mïnitö mäo apænedämaï iedäni. Äninque edæ wëñængä beyæ cængui angä godöna cængantapa.

6

Näatadeta iñömö ponte Itota apænecampa (Mäateo 13.53-58; Odoca 4.16-30)

¹ Itota wadæ godinque tömengä miñæ në godäni tönö tömengä näno pægaiñömö pongadänimpa. ² Ayæ, Guëmanguïönæ impa, äninque Itota tömënäni odömöincönë go guïdinque tæcæ odömonte apænecä eñëninque mäniñömö ongönäni nanguï inäni guïñente wædinque näni caboque tededänitapa.

—Iñgä iñæmpa ædö cæte nanguï eñente apænecä. Æbänö cæquïi, ante æcänö tömengä ingante godö odömongä adinque tömengä mänömaï bamönengæ cæcä, ante eñencæte ante wæmönipa. ³ Iñgä iñæmpa mönö awæmpa në timöwengä imaingä inte bamönengæ mänömaï cæcampa, ante awædö. Edæ Mäadiya wengä inongä inte tömengä iñömö önönänique mëmö ingampa. Tantiago tönö Ootee, Codaa tönö Timönö tömënäni mëmö inämaï ingantawogaa. Tömengä biwinqueidi incæ mönitö tönö wii ongönäni atamöö.

Ante pönente wædinque tömengä beyæ ante piinte badänitapa. ⁴ Ininque piinte badäni adinque Itota wæætë angantapa.

—Iñæmpa, Wængongui beyæ në apænecä inte tömämæ gote apæneyongante tömengä ingante waa adänipa. Wæætë tömengä näno pægaiñömö ponte apæneyongante mäniñömonque wæætë wiwa adänipa. Tömengä näno guïdänäni tönö tömengä oncönë owodäni tönö mänimpodänique tömengä ingante wiwa adänipa töö.

⁵ Äninque Itota adopoque adopoque gampocä waa badänitapa. Mänömaï wædænque cædinque tömengä, Ædö cæte gomonga cæquïmoo. ⁶ Äninque, Mïni pönëegade. Quïnante pönänämaï imïni, ante wægacäimpa.

Wængongui Awënë ingantedö ante apæneedäni, ante Itota angä godänipa (Mäateo 10.5-15; Odoca 9.1-6)

Ayæ wayömö nāni quēwēñömö wayömö nāni quēwēñömö māo odömöninque Itota apænecä eñengadānimpa. ⁷ Ayæ, Dote ināni, nāni ānönāni inānite aa pecä pönāni ininque, Nōwo mīnitō æmænō mēmīnaa æmænō mēmīnaa goyōmīnite botō pönō cæbo ate mīnitō awēnēidi bai badinque edæ wēnæidi wentamō ewocadāni inānite nē āmīni incæmīnimpa, ante da godongä godānitapa. ⁸ Ayæ, Īmaī cæedāni, angantapa. Mīnitō taadō godinque ongontoque mīni nææntoque næænte goedāni. Cænguī incæ māincoo da wenguincade incæ ænāmaī inte godinque tigitamō ononcamoncadēdē da wēnāmaī inte omæpomīni goedāni. ⁹ Awæncata mīni ewataque ewate weocoo mīni eñacooque eñadinque wacoo ænāmaī goedāni, angantapa. ¹⁰ Ayæ godōmenque ānīnque Itota,

—Godinque æcōnēnō tāno go guimīni owodinque mīnitō wayömö mīni go quēwenguīnganca mānincōnenque go guī go guī cædinque quēwēedāni. ¹¹ Æyōmōmē goyōmīnite wadāni, Pōedāni, ānāmaī inte mīnitō apænedō ante wīī eñēnāni wædinque mīnitō wæætē tōmēnāni inānite emō cæte iīmānō ante goedāni. Mīnitō iñæmpa, Pōedāni, ānāmaī imīni adinque mōnitō gomōni tamēñedāni, ante odōmoncæte ante mīnitō onōwa wadæ wadæ cæwadinque wadæ goedāni.

¹² Ānīnque Itota tōmengä emīñænāni inānite, Nōwo goedāni, ānīnque da godongä godānitapa. Godinque tōmēnāni wabæca quēwēnāni inānite māo, Mīnitō wēnæ wēnæ mīni cædinō ante wæwente pōnēnīnque ñimpo cæedāni, ante māo apænedāni eñēnānitapa. ¹³ Wēnæidi nanguī ināni inānite wido cædānitapa. Ayæ waodāni nanguī ināni wēnæ wēnæ inte wædāni iñōnānite oginguipæ oni oni paadāni ate waa bagadānimpa.

*Wäo æpænē nē guidōnongä wængampa
(Mäateo 14.1-12; Odoco 9.7-9)*

¹⁴ Itota emōwo ante apænedāni eñēnīnque tōmāmæ quēwēnāni do eñēnīnque gode ä gode ä cæte tedeyōnāni Edode pancabaa awēnē odeye incæ, Itota æbānō cæcää, ante eñengacāimpa. Īnīnque tōmengä iñōmō,

—Æpænē nē guidōnongä Wäo wodi dobæ wænte ñāni omæmōningä inte iingä Itota iñōmō imaingampa. Mānīnō beyænque tōmengä tæi pīñænte entawēnongä inte nē nanguī cæcä ingampa, ante pōnēmopa, angantapa.

¹⁵ Ayæ wadāni,

—Ediya wodi imaingampa.

Ante tedeyōnāni wadāni wæætē,

—Wængonguī beyæ nē apænegaināni bai tōmengä adocä imaingampa.

¹⁶ Ante tededāni eñēnīnque Edode iñōmō,

—Botō nē wangō tamencadongä Wäo wodi adocä incæ edæ ñāni omæmonte a ongōmaingampa, ante wædongäimpa.

¹⁷ Wäo wodi iñōmō iīmāi wængacāimpa.

Do iñedē awēnē Edode nānō tōniñacä Pedipe ayæ mīingä iñongä Pedipe manguiwēningä Ædodiya ingante Edode iñōmō, Botō nānōgængä bacæcāimpa, ante o ænte mongä. Īnīnque tōmengä adocä Wäo wodi ingante bæi ongonte goti winte tee mōnedongäimpa. ¹⁸ Edæ Wäo iñōmō nānō caate wænguinque Edode ingante iīmānō ante do wææ āningä inongäimpa. “Edode eñēmi, Wængonguī nānō angainō bai eñēnāmaī inte bitō tōniñacä nānōgængä ingante edæ manguiwēmipa tōö.”

¹⁹ Ante wææ angä eñēnīnque Ædodiya guiquēnē Wäo nānō ānīnō beyæ cōwē pīinīnque tōmengä ingante wænoncæ cæcä incæte ædō cæte tōmengä ingante wænonguingä. ²⁰ Edæ, Wäo tæiyæ waemō onguīñængä inte nē nō cæcä ingampa, ante do eñēnongä inte Edode iñōmō Wäo ingante edæ guīñente wædongä inongäimpa. Īnīnque tōmengä ingante edæ wææ gompodongäimpa. Ayæ Wäo apænecä eñēnīnque Edode, Angä eñente æbānō cæquīmoo, ante nanguī wæcä incæte tōmengä ingante eñēnīnque todongäimpa.

²¹ Īncayæ ate Edode nānō eñagaiōnæ iinque bayonte Ædodiya, Æonædō wænonguīmoo, ante nānō āniōnæ eyepæ batimpa. Edode iñōmō, Māniōnæ bai eñagaboimpa, ante ææmæ cædinque wente ængä ate tōmengä mīñæ awēnēidi tōnō tontadoidi awēnēidi tōnō Gadideabæ quēwēnāni awēnēidi tōnō tōmānāni becæ pōnānitapa.

²² Ponte bete cængōñōnāni Ædodiya wengä

baquecä incæ tæcæguedë pö gongænte tode pete äwacä adinque awënë odeye Edode tönö godongämæ ongönäni nanguï todönänimpa. Ìninqe baquecä ingante Edode änongäimpa,

—Waa pönï bitö tode pete äwadi beyænque bitö quiëmë ante æinente ämi ate botö eñente da pönömo æe.

²³ Äninqe ayæ godömenque äninqe, Wængonguï eñëñongä nöingä ämopa, änongäimpa. Quiëmë impa bitö æinëmi botö tömäa edæ do godömo æncæbiimpa. Edæ bitö æinente ämi ìninqe botö awënë odeyebo ìnömo inte botö ênempodö incæ edæ tæcæ pä cæte pönömo æmaïmipa.

²⁴ Angä eñëninque taodinqe,

—Badä eñëmi, quïnö anguïmoo.

Äñongante wäänä edæ do,

—Botö ìmaï ämopa, änantapa. Wäö æpænë nê guidongä ocabo wangö tomen- cate pædæ pönömi æmoe, ancæbiimpa, ämopa.

²⁵ Änä eñëninque awënë weca do ponte guiddinqe baquecä wæætë,

—Wäö æpænë nê guidongä ingante wangö tomen- cate tömengä ocabo ìni coyomënætaca cö cæte do pönömi æmoe.

²⁶ Angä eñente wædinque awënë odeye ìñömö, Æ eñente awædö. Quïnö ñöwo cæquïmoo, ante nanguï wædongäimpa. Incæte tömengä, Botö ìñæmpa godongämæ becönäni eñëñönänite, Wængonguï ayongä cöwë godoncæboimpa, ante nê äñimo inte edæ ædö cæte ñöwo Baa anguïmoo. ²⁷ Ante pönente wædinque tömengä nänö äñinö, Cöwë godonguï impa, ante pönëninque Edode wæætë nê wænongä ingante, Bitö godinque wangö tomen- cate æente mämömi ængæ. ²⁸ Angä eñëninque nê wænongä wæætë tee mönincönë gote guiddinqe Wäö ingante wangö tomen- cacä wængantapa. Ayæ Wäö ocamö ìni coyomënætaca cö cædinque baquecä weca æente mämö pædæ pönongä æninqe baquecä wæætë wäänä ìnante godongä ænonäimpa.

²⁹ Mänömaï wængäimpa, ante gode änäni eñente wædinque Wäö wodi tömengä miñæ nê godinäni incæ pöninqe tömengä baö ìni æente mäo daga wengadänimpa.

5.000 ganca ìnäni ìnänite Itota godongä cæñänipa

(Mäateo 14.13-21; Odoca 9.10-17; Wäö 6.1-14)

³⁰ Mänüi Itota nê nänö da godöninäni ìñömö ocæ emænte ponte godämæ gongænte, Mänömaï cætamönipa. Mänömaï odömonte apænemöni eñëñänitapa. ³¹ Ante apænedänitapa. Ayæ, wadäni nanguï owentædæ pänta owentædæ pänta wææ cægönäni adinque tömënäni ædö cæte cæquïnänii. Cænguï incæ ædö cæte cænguïnänii. Adinque Itota,

—Minitö adomïnique botö miñæ önömæca gote wædænque guëmædäni, angantapa. ³² Angä Ao ante tömënäni adodänique Itota miñæ wadæ godinque önömæca gocæte ante wipodë wææ con- tate wogaa godänitapa. ³³ Goyönänite wadäni guiquënë, Itotaidi incæ godänipa, ante adinque wacönë ta wacönë ta god- inque tæiyænäni tee ta tee ta go ömaaque oo pänta pogodo gote do edæ pöninqe a ongönänitapa. ³⁴ Ayæ wipodë wogaa mämö tæcæ æænoncadoyönäni Itota ìñömö ti wæænte ayongä nanguï ìnäni do ponte a ongönäni acantapa. Tömënäni nê aacä dæ äñongä obegaidi quëwenguïnämaï ìnäni inte adodänique ongönäni bai ìnäni inte wæwënänipa, ante pönente tömengä tömënäni tönö godongämæ wæwente bai pönengantapa. Ìninqe nanguï odömonte apænecä eñëñänitapa. ³⁵ Ayæ gäwadecæ bayö Itota miñæ nê godäni tömengä weca ponte äninque,

—Ñöwo wëmö bacæ cæpa cæbii, äñänitapa. Ayæ, Önömæca incæ cænguï dæ ampa. ³⁶ Ìñänäni ìnänite ämi idömæ owodäni weca godinque ayæ nanguï ìnäni nänäni quëwëñömö godinque cænguï godonte cænguïnänie.

³⁷ Äñönänite Itota wæætë,

Minitö wæætë godömïni cæncædänimpa, ämopa.

Äñongante,

—Æ, ênodäni ìnäniyaa. Ìñæmpa ocho apäicä cæte beyæ paga æinta æninqe mänimpota päö ante godonte æninqe edæ wüi eyepæ ìmampa. Mönitö wadæ gote mänimpota beyæ päö godonte æninqe

iñömö godongämæ ongönäni inänite godömöni cænguñänii, ämitawoo.

³⁸ Ante wæyönänite Itota,

—Päo æpodö nææminii. Acæ goedäni.

Angä ate pöningue,

—Päo önompo æmæmpoque gæyæ mäa pöni mä ongompa.

³⁹ Ante apænedäni eñëningue Itota godongämæ mä ongönäni inänite, Ñowo mini cabo mini cabo gaguimäa tæ contaedäni. ⁴⁰ Angä eñëningue pancadäniya tiëe ganca näni cabo nänënë pancadäniya tincoenta ganca näni cabo nänënë tömänäni näni cabo näni cabo tæ contadänitapa. ⁴¹ Tæ contadäni ate päo önompo æmæmpoque gæyæ mäa æningue öönæde inö æmö adinque, Wængongui, bitö waa pönömi ænte cæmönipa, ante apænedinque päo pä pä æ cædinque tömengä, Nangui inäni cængu ante ænte mäo cö cæedäni, ante tömengä miñæ nê godäni inänite pædæ pönongä æningue mäo cö cædänitapa. Ayæ gæyæ mäa iñonte adobai æningue tömengä tömänäni inänite di mæñæ di mæñæ cæcä æningue cænänitapa. ⁴² Æningue tömänäni tömo pöni cænäni, ⁴³ ate edæ tömengä emiñænäni päo tönö gæyæ näni ao mænte ñönöni ee öñoncoo pædæ wææmpo ö æ da da wente æningue otodë önompo tipæmpoga go mentodëa cængu eyede da wänäni contagatimpa. ⁴⁴ Nê cænäni iñömö onguñænäni edæ tinco miido ganca mänimpodäni nangui inäni näni wencabo cængadänimpa.

Itota yædopæ dao dao gocampa

(Mäateo 14.22; Wäö 6.16-21)

⁴⁵ Itota ayæ do tömengä nänö nê emiñænäni inänite, Ægodödäni. Minitö täno wipodë guiite æmæ wedeca Betaida tao goyömini botö wæætë wadäni nê cænänäni inänite ämo godäni ate pömoedäni. ⁴⁶ Angä Ao ante tao goyönäni tömengä wadäni inänite wæætë angä godäni ate adocanque ongonte Wængongui ingante apænecæte ante änanquidi æicantapa. ⁴⁷ Ayæ wëmö bayö tömënäni tæcætibæ wogaa goyönäni tömengä adocanque ömaa ongonte ayongä, ⁴⁸ tömengä nänö emiñænäni wiyate taocæ cæyönäni edæ woboyæ nangui pæmænte pönömenque

ænte pö ædö cæte goquñänii. Adinque tawadiya nänö peyedë edæ tæcæpæ pöni i gäwapæ wænömænæcapæ inö edæ Itota iñömö æpæno yædopæ dao dao obo ponte wodo pænta gocæ cæcantapa. ⁴⁹ Yædopæ edæ gocä gomö adinque tömënäni Yæ äningue, Waocä wænte babæningä wabänö cægongä, ante wædänitapa. ⁵⁰ Edæ tömengä ingante adinque tömänäni ancai guiñente wædänitapa. Tömengä iñömö tömënäni inänite do apænedinque,

—Ee piyænë cæte guiñenämai iedäni. Botö imo apa guiñewëminii.

⁵¹ Äningue wipodë pö guicä ate woboyæ incæ næ gongæ pæmænämai batapa. Ba adinque tömënäni godömenque guiñëningue, Quinante mänömai cæ, ante wædänitapa. ⁵² Edæ, Itota æbänö iñontobæ päo nangui pöni pönö badongä, ante nê adinäni incæte tömënäni mimö ömæde inäni inte bai wi pönente wægadänimpa.

Caate wædäni inänite Itota cæcä waa badänipa

(Mäateo 14.34-36)

⁵³ Ayæ æmæmäa taodinque tömënäni Guënetadetebæ ti wææningue wipo ñä cæmencadänitapa. ⁵⁴ Mänömai ti wæænte ñä cæmencayönäni mäniñömö quëwënäni guiquënë, Tömengä Itota ingampa, ante do adänitapa. ⁵⁵ Ante adinque mäniömæ tömäo pogodo godinque wënæ wënæ wæwënäni inänite ñönæmpado ñö cædinque, Itota æyömönö ongongäa, ante eñëningue tömëñömö tömengä nänö ongöñömö do ænte pönänitapa. ⁵⁶ Ayæ wadäni näni nangui pöni quëwëñömö incæ wædænque näni quëwëñömö incæ idömæ incæ, Itota ædömë gocäa, ante adinque wadäni wæncæ cædäni inänite mäniñömö ænte mämö taadö wedeca ñö cædäni öñönänitapa. Inäni wæætë tömengä ingante, Bitö weocoo yæwedecooque ämi gampote waa bamönie. Ante wæyönänite, Ao angä eñente nê gampo gampo cædänique tömänäni waa inäni bagadänimpa.

7

Mimöno tao godi beyænque waocä wentamö ewocacampa

(Mäateo 15.1-20)

1 Ayæ Paditeoidi tönö nē wææ odömönāni tönö pancadāniya Eedotadēē quēwente māniñedē Itota weca ponte godongāmæ gongænte ayönāni, 2 Itota miñæ nē godāni pancadāniya mem-podāmaï inte wentamö empote cænāni adānitapa. 3 Edæ dodāni, Önompo ædæmō mempoïnānique cæncædānimpa, ante nāni wææ angainö ante Ao äinique, Bapogabo cæte wæcæ wæ, ante Paditeoidi tönö oodeoidi tömänāni ancaa mem-pote ate cænönāni inānipa. 4 Ayæ, Ædæmō äadānique cænguïnāni inānipa, ante pönëninque oodeoidi nāni godonte æiñömö gote pöninque ædæmō äate ate cænānipa. Ayæ dodāni godömenque nanguï nāni wææ angainö ante pönente Ao ante cædinque tömënāni owæta cængæ tiguicade awæmpa tömancoo ancaa mënongate quëwënānipa. 5 İninque dodāni nāni wææ angainö ante Ao ante tömänö ante eñente cæte quëwënāni inte Paditeoidi tönö nē wææ odömönāni ñowo iñömö Itota ingante edæ piinte äinique,

—Bitö miñæ nē godāni iñömö quïnante dodāni nāni angainö ante eñënāmaï inte wentamö nampote cænguï cænāni.

6 Ante piïnāni wædinque Itota wæætē,

—Minitö guiquënë waa cæmini inte bai nē änewëmini iñöminite mini cædö ante Wængonguï iïmaï apænecampa, ante Itaiya wodi nöngä ante yewæmongacäimpa.

“İnāni iñömö botö imote önöneque waa apænete bai tededāni incæte, tömënāni mimöno æmæ pönente edæ gobæ ongonte bai ināni awædö.

7 Ayæ botö imote waa ate bai ædæ wæænte tededinque, Wængonguïmi imidö angüenē, ante apænedāni incæte tömënāni botö imote önonquedö ante cædānipa.

Waadānique nāni wææ änönö ante odömonte apænedānipa töö.”

Ante Wængonguï piingampa, ante yewæmongacäimpa.

8 Edæ Wængonguï, İïmaï cæedāni, ante nānō wææ angainö ante Baa änimini inte minitö waodānique nāni änewënö ante Ao ante cæminipa töö, angantapa.

9 Ante apænedinque Itota godömenque,

—Minitö dodāni nāni angainonque ante eñente cæcæte ante cædinque Wængonguï

nānō wææ angainö ante wido cædinque dicæ waa cæminiyaa. 10 Möitee wodi, “Bitö Wæmpo ingante bitö badä inante waadedinque waa cæe,” angacäimpa. Ayæ, “Waacä wæmpocä ingante wäänä inante piinte wënæ wënæ angä ininque minitö tömengä ingante wænömini wæncæcäimpa,” ante wææ ante yewæmongacäimpa. 11 Incæte minitö iïmainö ante wææ cæminipa. Wacä mæmpocä ingante waa cæquënegä iñongante wäänä inante adobai waa cæquënegä iñongante minitö wæætē wææ äinique, Bitö wæmpocä ingante wäänä inante apænedinque iïmaï ante apænecæbiimpa, änewëminipa. Bitö, “Mæmpo, bitö qui, ante, Badä, minö qui, ante do botö pönongüenönö incæ ñowo wæætē Wængonguï ingante do edæ godonte impa,” ante, Codobänö nāni änö impa, ante apænecæbiimpa. 12 Äinique minitö Wæmpo beyæ wäänä beyæ nē cæquënegä ingante wææ ämini beyæ tömengä wii cæcampa. 13 Mänömaï cædinque minitö dodāni nāni angainö mini Ao ante æninonque ante eñëninque Wængonguï nānō angainö ante edæ, Önöneque impa, ante bai cæminipa töö. Ayæ adobai wapiticæ äinique minitö wadö wadö cædinque wënæ wënæ cæminipa töö, ante Itota apænecäimpa.

14 Ayæ nanguï ināni inānite Itota aa pecä pönönānite apænecantapa.

—Minitö tömämini iminite apænebo eñëninque ocaidē pönente ædæmō eñëedāni.

15 Quincoomē yabæque ongoncoo incæ waocä önönē guidi beyænque tömengä mimö dicæ wentamö entawenguingää. Wæætē mimönē wiwa pönëninque nānō tao godincoo beyænque mimö wentamö mongængampa, ante apænebo eñëedāni.

16 Æamonca ongonte eñëedāni.

Ante apænedinque Itota nanguï ongönāni inānite emö cæte oncönē gote wäänē guicä ate tömengä nānō nē emiñænāni guiquënë, Mänömainö ante odömonte apænedinque bitö æbänö ante odömoncæte ante apænebitapa, ante eñencæte ante wæmönipa. 18 Ante wæyönānite Itota,

—Minitö incæ ocai ömæcadäni bai inömini inte eñenāmai iminitawo. Cænguī incæ waocä mīmönē guiipa wentamö ewocaquingää. ¹⁹ Edæ wīi mīmönē guiipa. Wæætē cæncadē guite goiwaa ogä mente wido cæquinque i apa anewemīni.

Mänömainö äninque Itota, Tömää cænguī waemö impa, angacäimpa. ²⁰ Äninque godömenque,

—Mīmönē wīwa pönëninque nänö tao godincoo beyænque waocä wentamö ewocacampa. ²¹ Edæ mīmönē nänö entawente taodinö beyænque waocä önöwëninque wënæ wënæ ante pönengampa. Mīmönē towëinente nänö pönëno beyænque waocä godö towente quëwengampa. Mīmönö æinente wædinque wacä qui awëmö ængampa. Mīmönē nänö piinte pönëno beyænque godö wænongampa. Nänöogængä ināmai iñongante waocä mīmönē towëinente nänö pönëno beyænque godö mongampa. ²² Mīmönē nangui æinente wædinque mäincooque ante pönëwengampa. Mīmönē nänö taodi beyæ wacä ingante piinte cæcampa. Mīmönē pönëwëninque, Wacä edæ oda cæcädänimpa, ante babæ cæcampa. Wīwa nänö pönëwënö beyænque quingämē bai cæte quëwengampa. Mīmönē nänö piinte adö beyæ waocä, Wacä bai ñænæmo pöni bacæboimpa, ante cæcampa, ayæ wacä ingante godö wënæ wënæ ante babæ angampa. Mīmönē nämä ante waa ate nänö pönëno beyænque, Tömëmoque waemö imopa, ante nämä waa acampa. Mīmö ömædengä inte eñenāmai cæte önonque quëwengampa. ²³ Mänīi wīwa cæpāmo tömāmāmo mīmönē nänö pönëno beyænque waocä wentamö ewocacampa, ante Itota apænegacäimpa.

Onquiyæ oodeo ināmai inte Itota ingante pönente angä

(Mäateo 15.21-28)

²⁴ Mänīñömö quëwente godinque Itota Tido eyequei gogacäimpa. Ayæ, Awëmö guite owoyömo wadäni adāmai incädänimpa, ante pönëninque oncönē pö wäänē guite ongongä incæte ædö cæte wīi aquināni. ²⁵ Edæ, Itota owocampa, ante do tededäni eñëninque wacä wäänä, Botö wengä

onquiyængä iñömö wënæ nē wentamö ewocacä ingante enempocampa, ante wædinque Itota weca ponte ædæ wæente apænecantapa. ²⁶ Itota eñëmi. Wënæ botö wengä tönö nē quëwengä ingante wido cæquimi, angantapa. Mänīi onquiyængä Tidopënitabæ nē eñagaingä inte guidiego tededö nē tedecä inongä. ²⁷ Adinque Itota, Wīi oodea onquiyængä inongampa, ante wædinque angantapa.

—Wënäni cænguī inguënē waocä dicæ guintamöidi cænguī ante wæentodonguingää. Bitö edæ wabi iñömite botö bitö beyæ ædö cæte cæquimoo.

²⁸ Äñongante,

—Awënē iñæmpa wëñænäni cænguī cæninque eyepodäni wæente ænömengadæmpa inö öñöñö guintamöidi ade cæmpa.

²⁹ Ante apæneyongä Itota,

—Bitö nö apænedimi inte waa gocæbiimpa. Wënæ bitö wëñængä nänö wädö incæ dobæ edæ emö cæte wadæ gotimpa.

³⁰ Angä eñëninque oncönē go guite ayongä tömengä wëñængä önonganque bate möimoga ongongä agacäimpa.

Babetamoncacä ingante Itota waa cæcampa

³¹ Mänīi Tido gote quëwëninque Itota wadæ godinque Tidöo wodo pänta gocanque go Gadideapæ wedeca poncæ cædinque Decapodibæ yaatænque pongantapa. ³² Gadideapæ wedeca pongä adinque wacä önömonca babetamoncacä inte önöne wapiticæ tedecä ingante Itota weca ænte pöninque, Gampo cæbi waa babaingampa.

³³ Äñönäni Itota babetamoncacä ingante nänëne ænte godinque önömonca pædæ guipomoncäcantapa. Ayæ nämä önonpo towæ tänompodique wapiticæ tedecä ingante godö gampo cæguënëwacantapa. ³⁴ Ayæ öönæde inö æmö adinque öö guëmante äninque babetamoncacä ingante, “Epata,” äninque mönö tededö, “Önömonca wi æmoncabäwe,” angantapa.

³⁵ Äñongä edæ önömonca tee mömoncate bai inī wi ænete bai badinque önonguënëwa ñimæncæguënëwa gote bai cæguënëwadinque töö tedecantapa. ³⁶ Itota, Botö cæbo nē adimīni inte gode änāmai iedäni, äninque ancaa angä incæte nē adināni iñömö

godömenque nanguï gode ä gode ä cæte tededäni ³⁷ Eñente wædinque tömänäni nanguï guiñëninque, “Edæ önömonca babetamonca ininäni inänite Itota cæcä ate önömonca eñënenäni badänipa. Önöne babetade ininäni inänite cæcä ate önöne tededäni badäni atamönipa. Tömää edæ waa cæcä ingampa,” ante nanguï tedete wægadänimpa.

8

4.000 ganca inäni inänite Itota godongä cænänipa

(Mäateo 15.32-39)

¹ Mäniñedë wadäni tæiyæ pönï inäni ponte eñëñönäni tömënenäni cænguï dæ ä adinque Itota tömengä miñæ nê godäni inänite aa pecä pönäni ate,

² —Inäni botö weca ongönäni iñömö meönaa go adoönæque iñonte botö weca ongöñönäni tömënenäni cænguï ömæpodäni badäni ate wædinque botö tömënenäni tönö godongämæ wæte bai nanguï pönëmo imopa. ³ Cænämaï inte gue ænente wæyönänite botö, Oncönë goedäni, ämo gote bai tömënenäni edæ idömæ godinque tepæ gæwæninque edæ nangæ badinque bocæ bocæ cæte wæcædönänimpa. Edæ pancadäniya gobæ quëwente pönäni abopa.

⁴ Ante apænecä eñente wædinque tömengä miñæ nê godäni wæætë,

—Inæmpa önömæca incæ päö impa æninque godömöni cænguïnäni.

⁵ Ante wæyönänite Itota,

—Päö æpodö nææmïni. Äñongante,

—Önompö æmæmpoque go mëa më on-gompa.

⁶ Ante apæneyönäni Itota godongämæ nanguï ongönäni inänite angä onguipoiya tæ contadänitapa. Ayæ päö önompö æmæmpoque go mëa näni næænincoo pædæ godönäni æninque tömengä Wængonguï ingante, Bitö waa pönömi cæncæmönimpa, ante apænedinque pä æninque tömengä miñæ nê godäni inänite, Pædæ godö pædæ godö cæmïni cæncædänimpa, ante godongä æninque wadäni inänite godäni ænte cænänitapa.

⁷ Ayæ gæyæ mëa pönï næænänitapa. Mänï näni næænï æninque Wængonguï ingante

apænedinque adobaï angä pædæ godö pædæ godö cædäni. ⁸ Æninque tömö pönï cænänitapa. Ayæ idæwaa cænäni ate tömënenäni pä ænte näni cænte ñönönï ee öñoncoo wente æninque Itota miñæ nê godäni otodë pönö da wënanitapa. Ininque önompö æmæmpoque go mentodëa cænguï eyede contagatimpa. ⁹ Nê cænäni iñömö onguïñænänique ante tee mam-pote coatodo müido ganca bai inäni inte ongönönänimpa. Ininque cænäni ate Itota angä wadæ godänitapa. ¹⁰ Godäni ate Itotaidi do wipodë guï contate cæwodinque imæmää pöninque Dadämänotabæ pon-gadänimpa.

Mä cæte odömömi amönie, ante Paditeoidi änänipa

(Mäateo 16.1-4; Odoca 12.54-56)

¹¹ Itota pongä adinque Paditeoidi ponte bee tæninque tömengä ingante, Æbänö cæbii, æbänö ämii, ante ancaa änänitapa. Ayæ, Mönö ämö eñente tömengä oda cæbaingampa, ante cædinque Itota ingante apænedinque, Bitö, Pönencædänimpa, ante öönædë mä cæi bai cæbi amönie. ¹² Änäni eñëninque Itota, Ancaa änäni awædö, ante wæwente badinque öö öö ante guëmangantapa.

—Inæmpa ñöwomïni, Mä cæte odömömi adinque pönëmaïmönipa, ante ancaa ämïni awædö. Näwangä ämö eñëedäni. Ñöwomïni imïnite mä cæte odömönämaï ingæimpa.

¹³ Ante äninque tömënenäni inänite ëmö cæte godinque wipodë guïte æmæmää taocæ cæte cæwodinque wadæ gocantapa.

Wapiticæ apænedäni eñëninque gomö aedäni, angampa

(Mäateo 16.5-12)

¹⁴ Mänïi æmæmää näni tao gocæ cæyedë tömengä miñæ nê godäni guiquënë päö wïi pönente ænämaï inte godäni ininque päö adoque pönï näni wëenëñedë ñönöninque wipodë öñompa. ¹⁵ Itota iñömö mänïi päö tömënenäni näni ænämaï inö ante wïi tededinque wadö ante pönente apænecantapa.

—Päö yedæ æmpoquï, ante Paditeoidi tönö Edode näni da wente cæi ate gomö aedäni. ¹⁶ Angä eñente wædinque tömengä nänö nê ëmiñænäni wæætë näni caboque tedinque, Päö ænte pönämaï

imöimpa, ante Itota wabänö mänömaï beyæ ämaingampa.

¹⁷ Ante nämäneque tededäni wædinque Itota wæætë tömënäni inänite,

—Päo ænämaï inte mïni pöninö ante quïmæ tedewëminii. Botö päo ante dicæ wæbogaa. Nanguï cæbo adimïni inte mïnitö ayæ ëñënämaï imïnitawo. Edæ mïmö ömædëmïni inte tedewëminipa, ante awædö.

¹⁸ Edæ awincaque adinque ayæ adämaï imïnitawoo. Önömoncaque ëñëninque ëñënämaï imïnitawoo. Edæ botö æbänö cætabopa, ante adimïni inte edæ wïi pönëmïnitawo. ¹⁹ Päo önömpo æmæmpoque botö pä ænte godöni incæ tincö müido ganca inäni nani cænte ñönöni ee öñöñonte æpotodënö cænguï wente æmïinii.

Äñongante,

—Önömpo tipæmpoga go mentodëa.

²⁰ Ayæ päo önömpo æmæmpoque go mëa guiquënë coatodo müido ganca inäni nani cænte ñönöni ee öñöncoo æpotodënö cænguï wente æmïinii.

Äñongante,

—Önömpo æmæmpoque go mentodëa.

²¹ Apænedäni ëñëninque tömengä edæ,

—Inæmpa Tadoteoidi tönö Paditeoidi wapiticæ ante nani odömonte apænedö ante botö, Gomö aedäni, ante wææ ämopa, ante mïnitö ayæ ëñënämaï imïnitawoo, angacäimpa.

Betaida inömö babetamongä ingante gampomongampa

²² Mäninö godinque Betaida inömö pönäni adinque wadäni babetamongä ingante Itota weca ænte pöninque, Gampomonguïmi. ²³ Änäni ëñëninque Itota babetamongä önömpo bæi ongonte töö æmænte tömënäni quëwëñömö tao yabæque ænte mäocä gocantapa. Ayæ godö towæ tänömonte gampo cæmöninque, Pancia tæcæ abi edæ, angantapa. ²⁴ Äñongä edæ tæcæ inæ æmonte,

—Awæ cægonte bai woadäni incæ cægönäni abopa. ²⁵ Itota wæætë godö gampo cæmongä ate babetamongä iningä incæ ñöwo cöwä adinque edæ waa bamöninque tömäo edonque pöni acantapa.

²⁶ Ininque tömengä ingante Itota,

—Inömö nani quëwëñömö yaatænque wadæ godinque tömëmi oncönë goe, angä gogacäimpa.

Bitö Codito inömi imipa, ante Pegodo angampa

(Mäateo 16.13-20; Odoca 9.18-21)

²⁷ Itota inömö tömengä miñæ në godäni tönö wadæ godinque Tetadea Pidipobæ wædænque inäni nani quëwëñömö wædænque inäni nani quëwëñömö go go cædänitapa. Idömæ godinque tömengä nänö në ëmïñænäni inänite Itota angantapa.

—Wadäni botö imotedö ante tededinque, Æbodö imoo, ante apænedäni ëñëmïinii.

²⁸ Äñongante,

—Bitö imitedö ante apænedinque pancadäniya, Æpænë në guidongaingä Wäo wodi incæ Itota adocä imaingampa, ante tededänipa. Wadäni guiquënë, Ediya wodi incæ Itota inongä imaingampa, ante apænedänipa. Wadäni guiquënë, Wængonguï beyæ në apænegainäni bai Itota inömö adocä imaingampa, ante bitö imitedö ante tededänipa, änänitapa.

²⁹ Ante tömengä miñæ në godäni apænedäni ëñëninque Itota,

—Ayæ mïnitö guiquënë, Æbodö imoo, ante æmïinii.

Äñongante Pegodo inömö,

—Bitö mönö Codito inömi imipa.

³⁰ Angä ëñëninque, Botö imotedö ante, Codito inongä ingampa, ante gode änämaï edæ pæ wëenedäni, ämopa, ante Itota wææ angacäimpa.

Itota, İmaï cædäni wæncæboimpa, ante apænecampa

(Mäateo 16.21-28; Odoca 9.22-27)

³¹ Ayæ mäniñedë Itota tömengä miñæ në godäni inänite imäi ante mä odömonte apænegacäimpa. Botö Waobo ëñagaimo inte nanguï caate wæquënëmo imopa. Edæ në aadäni nani Picæncabo tönö, Wængonguï quï, ante në godönäni ñænænäni tönö në odömönäni tönö mäninäni inömö botö imote Baa änäni wæquënëmo imopa. Ayæ botö imote godömenque wænönäni wæncæboimpa. Incæte botö do wænönäni wænimo inte edæ mëönaa go adoönæque inönte ñäni ömæmoncæboimpa. ³² Mänömaï ante Itota edonque apænecantapa.

Apæ necä eññönäni Pegodo guiquenë Itota ingante nänënë mäocä godinque, Quimæ wæncæ anewëe, wææ ante tæcæ piincæ cæyongante, ³³ Itota edæ tömengä miñæ nē godäni gämænō dadi emænte adinque Pegodo ingante näemæ piinque angantapa.

—Bitō Tatānabi bai inōmi inte edæ botō weca ongönāmai wadæ gobawe. Wii Wængongui nänō änönō ante pönēmi inte bitō waodānique nāni pönēwēnonque ante pönēninque mänōmainō ante tedebe awædō, angantapa.

³⁴ Ayæ tömengä emiñænāni tönō nangui ongönāni inānite aa pecä pönāni ate Itota tömānāni inānite apænedinque,

—Æcänō botō miñæ pönēna ina tömengä nāmā beyænque ante pönēnāmai inte botō miñæ tee empote poncæcäimpa. Nāmā nänō wænguiwæ ænte mongænte ponte bai cædinque tömengä, Botō wænguimo incæ caate wæbo incæ Itota ingante cōwē tee empote gocæboimpa, äninque poncæcäimpa. ³⁵ Edæ æcänō, Nāmā wææ gompodinque quēwencæboimpa, ante cædinque botō miñæ pönāmai ingä guiquenë tömengä iñömō edæ quēwēnāmai incæcäimpa. Wæætē edæ, Wænönāni wæmo incæte botō Itota miñæ tee empote godinque tömengä waa pönī nänō cægainō ante apæ necæboimpa, ante æcänō cæda guiquenë tömengä edæ ayæ quēwencæcäimpa. ³⁶ Edæ waocä inguiwæ ongoncoo tömancoo o æncæte ante cædinque nāmā önōwoca incæ pædæ godongä wē womonte ba iinque edæ tömengä nänō ömæwocate wæquinque mäincooque æmaingampa. ³⁷ Iñæmpa eyepæ godongampa diyæ önōwoca wæætē æmaingä. ³⁸ Nōwodāni Wængongui ingante pāmænte godinque nē eññēnāmai cædāni weca quēwēninque mīnitō iñömō botō Waobo nē eññagāimo beyæ ante guingo imonte wæmīnitawo. Botō apænedō beyæ ante guingo imonte wæmīnitawo. Iñæmpa botō Mæmpo ñäo guinæ gongæñonte anquedoidi tæiyæ waemō emönāni tönō dibæ pöninque botō wæætē botō beyæ ante nē guingo imonte wædingä beyæ ante näemæ guingo imonte wæcæboimpa.

9

¹ Mänōmainō äninque Itota godōmenque, —Botō weca ongömīni pancamīniya iñömō iīmai ba acæmīnimpa, ante näwangä ämopa. Mīnitō ayæ wænāmai mīimīni quēwēñōmīni botō Wængongui Awēnē Odeye inōmo inte tæi piñæninque Tæiyæ Awēnē babo acæmīnimpa, ante Itota apænegacäimpa.

Itota waemō pönī ñäo bai emongä bacä adānīpa

(Mäateo 17.1-13; Odoco 9.28-36)

² Mäninō ante apæ necä ate Itota iñömō önompo æmæmpoque go adoönæque iinque go ate Pegodo ingante Tantiago tönō Wäo inate mänimpodānique inānite änanquidi mæicä adodānique æibæ æite ongongadānimpa. Æite ongöñönāni edæ Itota awinca tömēnāni ayönāni edæ wii cōwē nänō emönō bai waemō pönī ñäo bai edæ emongä bamongä adānitapa. ³ Tömengä weocoo ñäo pönī näämænta weocoo eñacä adinque tömēnāni, Ædō cæte iincoo bai näämænta pönī yamonte cæquīnānii, ante edæ wædānitapa. ⁴ Ayæ ayönāni edæ doyedē pönī nē æigaina iñömō Möitee wodi tönō Ediya wodi incæ Itota tönō edæ godongämæ pō gongæninque tedegōna adānitapa. ⁵ Adinque Pegodo guiquenë Itota ingante,

—Awēnē nē Odömōmi eññēmi. Iñömō mönō waa pönī ongonte awædō. Bitō ämi iinque mönitō oncontaicoo mentaiya go adotaique mænöninque bitō oncontai ante adotaique Möitee oncontai ante adotaique Ediya oncontai ante adotaique mænōmāimōnīpa, angantapa.

⁶ Edæ Wäo tönō Tantiago tönō godongämæ guñente wædinque Pegodo, Æbänō ante tedequimoo, ante eññēnāmai inte mäninō ante önonque tedecantapa. ⁷ Ayæ edæ boguimāmo ocabogadāni obo wææninque ganta owo iinque önönepāmoque boguimāmodē apæ necantapa. “Iingä iñömō botō Wengä botō nē waadecä ingampa cæmīnii. Tömengä pönō apæ necä ate eññēdāni,” ante apæ necä eññengadānimpa. ⁸ Eññēninque quingæ gomō gomō ayönāni wada edæ

do dæ goda iñõnate Itota adocanque ñõwo tömënäni weca ongongä agadänimpa.

⁹ Ayæ änanquidi inö wææ pöñõnäni Itota tömënäni inänite angantapa. Mäninö mini adinö ante minitö gode änämaï pæ wëeneyömini botö Waobo eñagäimo inte edæ wænte ate ñäni ömæmoncæboimpa. Ñäni ömæmömo ate minitö edæ mäniñedë ate apænecæminimpa. ¹⁰ Ante angä eñëninge tömënäni gode änämaï pæ wëenedäni incæ nämäneque, Mäninö tömengä nänö ñäni ömæmonguimämo ante æbänö ante apænecää, ante wædönänimpa. ¹¹ Ìninqe Itota ingante,

—Mänömaï i ìninqe, Ediya wodi täno poncæcäimpa, ante në odömönäni iñæmpa quinante apænedänii.

¹² Äñönänite Itota wæætë,

—Ediya wodi näni änongä iñömö täno pongä ingampa. Näwangä impa. Pöninqe tömengä, Doyedë ingäi bai ñõwo wæætë adobai nö pönï bacæimpa, ante badongampa. Ìninqe dodäni Waocä në eñaquingä ingantedö ante yewæmöninqe, Nanguï caate wæyongante wadäni püninqe Baa ancædänimpa, ante quinante yewæmongadänii, ante pönëmini. ¹³ Incæte botö iimainö ante apænebo eñëedäni. Ñõwocä mönö Ediya inongä inte do pongäimpa ante aquënë. Tömengä pongä adinqe wadäni edæ dodäni näni yewæmongainö bai adobai cædinque quiëmë ante näni cæinewënö ante do cædänipa, ante Itota tömengä tönö në æidänäni inänite apænegacäimpa.

Itota wënæ ingante angä go ate wëñængä waa bacampa

(Mäteo 17.14-21; Odoca 9.37-43)

¹⁴ Itotaidi mänii wææninge tömengä nänö në emiñænäni æidämaï inäni weca ponte ayönäni wadäni nanguï inäni goto gongænäni adänitapa. Në æidämaï inäni tæcæguedë ongöñönänite në wææ odömönäni guiquënë tömënäni tönö wæætedö wæætë änäni adänitapa. ¹⁵ Itota do pongä adinqe edæ goto gongænänäni tömänäni guifente wædinque wadæ pogodo ponte bee téninqe, Bitö pömi, änänitapa.

¹⁶ Äñönänite Itota,

—Tömënäni tönö quinö ante apænedinqe wæætedö wæætë äminii.

¹⁷ Äñongante adocanque tæcæguedë ongongä inte wæætë apænedinqe,

—Awënë në Odömömi eñëmi. Botö wengä wënæ babetadecä ingante ewocampa, ante wædinque botö tömengä ingante bitö weca ænte pontabopa.

¹⁸ Äyömömë ongöñongante wënæ pö guidinqe wëñængä ingante cöwë gotodongä tæ go wæængampa. Ìninqe wëñængä wodi mäwanta tadedinqe wentoquënë wentoquënë angadinque pæ opate bacampa. Mänömaï cæcä ate wædinque botö bitö miñæ në godäni inänite, Wënæ inte wido cæedäni, ämo cæquënëänäni incæ ædö cæte cæquänänii.

¹⁹ Ante apæneyongä Itota tömënäni inänite,

—Ñõwömini mini pönëgade. Botö minitö weca æpogadö quëwëmoï. Pönënamäi inte cæyöminite botö æpogadö piyænë cæte wæwëmoï. Edæ wëñængä ingante botö weca ænte mämömini pongæedäni, angantapa.

²⁰ Änte pönäni ate wënæ incæ Itota ingante adinqe do wëñængä ingante do do wæate bai cædinque wido cæcä tæ go wæængantapa. Ayæ mäwantabo tadedinqe бага wentoquënë wentoquënë angadinque edæ pæntæmæ pæntæmæ gocä. ²¹ Adinqe wæmpocä ingante Itota,

—Æyedönö mänömaï bacäi.

Äñongante,

—Wëñængäñedë do badingä inte quëwengampa. ²² Quëwëñongante wëñængä ingante wantæ wantæ iñö wantæ wantæ iñö, Gongapamö guitodömo gonte wæncæcäimpa, ante wënæ incæ cæcä. Ayæ, Äpænë adobai guitodömo becadote wæncæcäimpa, ante cæcampa cæbii. Näwangä tæi piñæmi ìninqe bitö mönatö wæwënö ante pönente cæbaimipa.

²³ Äñongante,

—Bitö guiquënë wabänö wede pönëmi ìmitawoo. Edæ wede pönëñongante edæ waocä beyæ tömää do cæte impa.

²⁴ Angä eñente wædinque wæmpocä iñömö yedæ äninqe,

—Bitö imite pönēmopa. Edæ botö æmæ pönönö ante bitö cæbi ate ædæmō wede pönente bacæboimpa, ante wæbopa.

²⁵ Ante añongä nanguï inäni do pogodo pönäni ate wædinque Itota iñömö wënæ nē wentamö ewocacä ingante piinte äninque,

—Wënæbi bitö, Babetamonca babetade bacædänimpa, ante nē cæbi inömi inte ñowo tao godinque wii adodö guiquimi incæbiimpa, angantapa.

²⁶ Eñente wædinque nanguï Yæ yæ äninque wëñængä ingante wido cæcä do do wäate tæ go wææninque pæntæmæ pæntæmæ goyongante wënæ tao gocantapa. Gocä ate wëñængä do wænänäni bai õñongä ate wædinque pancadäniya, Æmæwo wæmaingampa, ante wædäni.

²⁷ İninque Itota iñömö pædæ wææmpo önompö bæi ongonte ængæ ganticantapa.

²⁸ Itota ayæ wadæ godinque oncönë pö guiyongante tömengä nänö nē emiñænäni awëmö äninque,

—Mönitö guiquënë bitö bai wido cæcæte ante cædinque quinate wido cædämaï intamönii.

²⁹ Ante wæyönänite,

—Wënæ mäningä bai ingante wido cæcæte ante cædinque wantæpiyæ cænämaï inte Wængonguï ingante nanguï apænete ate wido cæcæimpa, ante apæneca eñengadänimpa.

Wænönäni wæncæboimpa, ante Itota adodö ante apæneca

(Mäateo 17.22-23; Odoca 9.43-45)

³⁰ Ayæ wadæ gote gote Gadideabæ wodo pænta godinque Itota, Wadäni adämaï iñönänite ³¹ botö emiñænäni adodänique ongõñönänite odömönte apænebo eñencædänimpa ante cæcantapa. Ayæ tömënäni inänite iimainö ante awëmö apænecantapa.

—Adocanque, Waocä nē eñagaingä æyömönö ongongäa, ante godö odömöninque botö imote waodäni nempo pædæ godongä æncædänimpa. Nē ænäni wæætë botö imote edæ wænönäni näñe wæncæboimpa. Incæte mēönaa go adoönæque iñonte botö adobo incæ ñäni ömæmoncæboimpa.

³² Ante apæneyongante tömengä emiñænäni önömoncaque eñëninque

eñënämaï inäni inte, Æbänö ante tede-bii, ante guñente wædinque änämaï pæ wëenegadänimpa.

Æcänö ñæncængä inte nē angä inguingäa, ante tededänipa

(Mäateo 18.1-5; Odoca 9.46-48)

³³ Mänii godinque Capënaömö iñömö ponte oncönë guidinque tömënäni inänite Itota,

—Idömæ pöninque æbänö ante tedeminitawo.

³⁴ Añongante edæ, Mönö cabo incæ æcänonque ñænængä pöni inongä inte nē angä inguingäa, ante tedewëninäni inte guingo imonte wædinque pæ wëenedänitapa.

³⁵ İninque tæ contadinque Itota iñömö, Dote, näni äincabo inänite, Pöedäni, angä pönäni ate,

—Yæcado ongömote, ante nē änongä iñömö tömengä wæætë yæmiñængä pöni gote ongonte tömänäni beyæ nē godö cæcä bate waa tobaingampa.

³⁶ Äninque Itota wëñængä guiyangä ingante æninque tæcæguedë goncæte pæ mäninque tömënäni inänite wæætë apænecantapa.

³⁷ —Æcänö botö emöwo apænedinque mäningä bai wëñængä ingante, Pöe, ante godö waa cæcä iñömö tömengä iñömö edæ botö imote edæ do, Pöe, ante pönö waa cæcä ingampa. Ayæ edæ botö imote, Pöe, ante nē waa cæcä iñömö tömengä iñömö wii botö adoboque imote waa cæcä ingampa. Wæætë botö imote nē da pönöningä ingante Wængonguï ingante adobai edæ, Pöe, ante do waa cæcampa, ante Itota apænegacäimpa.

Mönö imonte æcänö pünämaï ina mönö tönö cæcampa

(Mäateo 10.42; Odoca 9.49-50)

³⁸ Itota mänömaï apæneca eñëñönäni Wäo guiquënë,

—Awënë nē Odömömi eñëmi. Wacä bitö emöwo apænedinque wënæidi inte wido cæcä atamönipa töö. Ayæ, Wii mönö cabo ingampa, ante adinque mönitö tömengä ingante Baa äninque, Cædämaï imäwe, antamönipa.

³⁹ Ante apæneyongante Itota wæætë,

—Ee amini cæcædäni. Edæ æcänö botö emöwo apænedinque öönædë näni cæi bai

mä cæda, tömengä ædö cæte botö imotedö ante do wënæ wënæ anguingä. ⁴⁰ Edæ mönö imonte æcänö pïināmaï ina tömengä mönö cabo inongä inte baï mönö tönö godongämæ cæcä ingampa töö. ⁴¹ Näwangä ämopa. Bitö Codito nänö nē emiñænömi imi ænte bee, ante wacä mīnitö iminite æpæ adotacaque pönongä bemini inique nē pönöningä wæætē tömengä nänö pönöninö beyæ eyepæ æncæcäimpa, angacäimpa.

Wacä oda cæcæcäimpa, ante nāni wæequinque cædänipa

(Mäateo 18.6-9; Odoca 17.1-2)

⁴² Mänömainö apænedinque Itota godömenque apænecantapa. “Wadäni godö cædäni beyæ botö imote nē pönänäni incæ pancadäniya edæ dobæ oda cæte wënæ wënæ cædänipa. Inique, Wëñængä adocanque guiyangä pönī ingä incæ oda cædämaï incæcäimpa, ante wææ cæcæte ante cædinque nē godö cæcæ cædingä ingante iïmaï cædäni inique tömengä toquënegä imaingampa. Waodäni nāni dacæ godö dacæ godö cæquinca ñænænca æninque tömengä önömenca æ wëmencadinque tömengä ingante tæcætibæ wido cædäni inique tömengä edæ, Wënæ wënæ cædämaï inte becadote wæmo beyænque Wængonguï botö imote wii godömenque pangampa, ante wædinque waa toquënegä imaingampa. ⁴³ Bitö önompoca cædinque wënæ wënæ cæbi inique bitö önompo aa wi æmpote baï wido cæte baï cædinque wënæ wënæ bitö cædinö ante wido cæbæwe. Iñæmpa inguipoga quëwëninque æmæmpoque empobi incæte bitö cöwë bitö wænāmaï quëwënginque öönædë æibi waa imaimpa. Edæ wii tipæmpoga empobi inte edæ bitö gonga cöwë bæcote wæwënguïñömö wii æmæwo wido cæte wæquimido anguënë. ⁴⁴ Edæ mäniñömö tadömengadænguipo iñömö cængota wænāmaï gonga emönāmaï bæcoquinö anguënë.”

⁴⁵ Ayæ, “Bitö önöwaca wapiticæ godinque ëñënamäi cæbi inique önöwa aa wi æwate baï wido cæte baï cædinque wënæ wënæ bitö cædinö ante wido cæbæwe. Iñæmpa inguipoga quëwëninque æmæwacque ewabi incæte bitö cöwë

bitö wænāmaï quëwënginque öönædë æibi waa imaimpa. Edæ wii tipæmpoga ewabi inte edæ bitö tadömengadænguipo wido cæte wæquimido anguënë. ⁴⁶ Edæ mäniñömö tadömengadænguipo iñömö cængota wænāmaï gonga emönāmaï bæcoquinö anguënë.”

⁴⁷ “Ayæ ægodawate tæ go wæænte baï cædinque bitö awinca beyæ ëñënamäi cæbi adinque bitö awinca cäi cæmonte baï cædinque wënæ wënæ bitö cædinö ante wido cæquimi, ämo. Edæ bitö, Botö tipæmonga emonte incæ tadömengadænguipo wii goinente awædö, ante pönente wædinque edæ cäi cæmonte awinca æmæmonque emömi inte quëwëninque Wængonguï Awënë Odeye weca æite waa tobaïmipa. ⁴⁸ Edæ mäniñömö tadömengadænguipo iñömö cængota wænāmaï gonga emönāmaï bæcoquinö anguënë,” ante Itota apænecantapa.

⁴⁹ Ayæ godömenque apænedinque, “Wadäni, Ööingä ñömænāmaï ingæimpa, ante cædinque cati ñænæ quimönique gongapamö æñö cæte biyadänipa. Waomini tömämīni adobaï caate wædinque ædæmö biyate baï badinque ñömænāmaï inguimimidö anguënë. ⁵⁰ Cati quimonte cæi iñömö wæme inte gæpæ emompa. Incæte nongæmonte ba adinque mīnitö wæætē æbänö nö cæmīni wæætē gæpæ emonguï i. Ööingä wæme bacæimpa, ante quimonte cæi wëä wëä pæmönäni baï cædinque mīnitö mīni caipæ incæ piyænë cæte wacä ingä wacä ingä waa cæte quëwëdäni,” ante Itota odömonte apænecä ëñengadänimpa.

10

Nänöogængä ingante nāni pämænö ante (Mäateo 19.1-12; Odoca 16.18)

¹ Mänii Capënaömö ongöninque wadæ tao iguidinque Oodeabæ ganca Oododänö æmæ wedeca pongantapa. Pongä adinque nanguï inäni wæætē pö pö cædäni adinque Itota cöwë nänö odömöi baï adobaï odömonte apænecä ëñënanitapa. ² Paditeoidi guiquënë, Godö ämö ëñëninque Itota adodeque oda cædete wæcä tocæi, ante cædinque tömengä weca pöninque, Itota ëñëmi, änänitapa. Wængonguï æbänö

ante wææ angacäi. Waocä tömengä nänöogængä ingante pämgängä ininque edæ nö cæte intawo.

³ Ante äñönäni tömengä wæætë,

—Möitee wodi æbänö ante yewæmöninque mīnitö imīnite wææ angacäi.

⁴ Angä ëñëninque,

—Æmæwo pämgæmo goquimi, ante yewæmöninque mäninta bitö yewæmöninta onquiyængä ingante godömi ængä ate bitö önonque pämgæncæbiimpa, ante Möitee wodi wææ ante yewæmongacäimpa.

⁵ Ante apænedäni ëñëninque Itota,

—Ïñæmpa, Mīmō ömædëmīni inömi inite mīnitö wënæ wënæ cæinëmīni imīnīpa, ante wædinque Möitee wodi, Mänömaï cæedäni, ante yewæmongacäimpa. ⁶ Edæ wëenëñedë Wængonguï nänö badongaiñedë tömengä, “Onguïñængä ingampa, ayæ, Onquiyængä ingampa, ante badongacäimpa. ⁷ Mänömaï beyæ waocä mæmpocä ingante ëmö cædinque wäänä inante ëmö cæte godinque onquiyængä ingante, Botö nänöogængä, ante æmæwo mongä ate tömëna nāna gæncaya inöna inite möninque guëa quëwencædaimpa. ⁸ Ïninque æmæwo möninque tömëna nāna gæncaya incæ adocanque bai bate quëwencædaimpa,” ante Möitee wodi nänö yewæmongai bai cædinque tömëna nāna gæncaya do möninque nänëñë ināmaï adocanque bai do bacäimpa. ⁹ Mänömaï beyæ Wængonguï, Adocanque bai inapa, ante nāna gæncaya nänö në badongaina iñönate waocä wæætë pango cædämaï incæcäimpa.

¹⁰ Angä wædinque Itota tönö oncönë guidinque tömengä mīñæ në godänique, Æbänö ante ämitawo. Godömenque apænebi ëñëmönie. ¹¹ Ante äñönänite Itota,

—Æcänö näwä nänöogængä ingante pämgæninque wacä onquiyængä ingante möna tömengä wiwa towengä do badinque näwä nänöogængä ingante wiwa cæcampa. ¹² Onquiyængä guiquënë tömengä nänöogængä ingante pämgænte godinque wacä ingante godö mongä ininque tömengä adobai wiwa towengä bacampa, ante Itota apænegacä ëñengadänimpa.

Wëñænäni inänite gampo cæcadinque waa apænegacä

(Mäateo 19.13-15; Odoca 18.15-17)

¹³ Ayæ ate, Wëñænäni inänite Itota pönö gampo cæcadinque waadete apænegacäimpa, ante cædinque wadäni tömengä weca ænte pö ænte pö cædäni adinque tömengä mīñæ në godäni guiquënë, Ænte pönämaï iedäni, äninque Baa Baa änäni. ¹⁴ Ate wædinque Itota ænguï badinque në Baa änönäni inänite wææ äninque,

—Wëñænäni inänite ee amīni poncædänimpa. Edæ mäninäni nāni pönënö bai adobai pönënanī inite edæ Wængonguï Awënë Odeye nempo do quëwënäni inänīpa. Ïninque mīnitö iñömö wëñænäni inänite Baa änämaï iedäni. ¹⁵ Edæ näwangä apænebo ëñëedäni. Wëñængä do pönengä inite Ao angä ingä bai Wængonguï Awënë Odeye ingante do pönëninque në Ao änäni iñömö tömënanīque tömengä nempo guidinque quëwënänīpa. Wadäni guiquënë Wængonguï Awënë Odeye ingante Baa ante pönënamai inäni guiquënë tömënanī ædö cæte tömengä nempo guidinque quëwenguinänī, ante Itota apænegacäimpa.

¹⁶ Äninque edæ wëñænäni inänite bæi ongonte pä mäninque, Wængonguï mīnitö imīnite waadete pönö cæcæcäimpa, ante Itota gampo cæcacä gampo cæcadinque waa apænegacäimpa.

Mäincoo nanguï ëacä Itota weca ponte apænegacä

(Mäateo 19.16-30; Odoca 18.18-30)

¹⁷ Ayæ godömenque gocæ cæyongä wacä edæ Itota weca pogodo ponte da guicapod-inque,

—Awënë në waa Odömömi apænebi ëñëmoe. Botö æbänö cædinque cöwë wänämaï wantæpiyæ quëwëmaïmoo.

¹⁸ Äñongante Itota edæ,

—Wængonguï adocanque në waa cæcä iñongante bitö botö imote, Në waa cæbi imīpa, ämī. ¹⁹ Ïmaï cæedäni, ante Wængonguï nänö wææ angainö ante bitö tömëmi do ëñëmīpa. “Wacä ingante godö wänönämaï ie. Bitö nänöogængä ināmaï iñongante godö guëa mönāmaï ie. Wacä qui adinque awëmö ænāmaï ie. Wacä wënæ wënæ cæcä atabopa, ante godö babæ

wapiticæ änämaï ie. Wacä qui æncæte ante cædinque babæ cædämaï ie. Wæmpocä ingante wäänä inante waa adinque tömëna inante godö waadete cæe,” ante wææ yewæmongacäimpa, ante bitö edæ do ëñëmipa, angantapa.

²⁰ Ante apænecä ëñëninque nê äningä guiquënë Itota ingante wæætë,

—Awënë nê Odömömi ëñëmi. Botö mäninö bitö änö bai tömänö ëñente cædinque pægaboï ae.

²¹ Apænecä ëñëninque Itota tömengä ingante cöwä adinque waadete pönëninque,

—Adodeque ayæ ëñente cæquënëmi ïimipa, ante ämo ëñëe. Öönædë bitö waëmoncoo ænguinque edæ ñöwo godinque imæca bitö mänincoo tömancoo godonte æninque bitö æninta wæætë ömæpodäni inte wædäni inänite tömanta godömi æncædänimpa. Ayæ edæ botö imote tee empote pöe.

²² Angä ëñëninque, Botö mäincoo nangui impa, ante pönente wædinque nê ëacä iñömö nangui wæwëninque wadæ gogacäimpa.

²³ Gocä adinque Itota godongämæ adinque tömengä nänö nê ëmiñænäni inänite,

—Wængongui Awënë Odeye nempo guiite quëwencæte ante cædinque waodäni ömæpodäni inte botö miñæ pönänipa. Mäincoo nangui ëacä guiquënë æbänö cæte ömæpocä inte botö miñæ ponte guiite quëwenguingää, angantapa.

²⁴ Ìninque tömengä miñæ nê godäni tömengä nänö apænedö beyæ ante, Æbänö angää, ante guiñente wæyönänite Itota wæætë,

—Botö wëmini ëñëedäni. Wængongui Awënë Odeye nempo guiite quëwencæte ante cædinque ante waocä mäincoo mangä beyænque eyepæ cæcampa diyæ guiiquingää. ²⁵ Edæ cämeyo guiyangä ingampa diyæ daagö guiyampite pædæ tacää. Ìninque, cämeyo ñænængade inongä inte pædæ tadämaï ingä bai nê ëacä adobai ingampa. Tömengä nämä ayongä ñænængä inongä inte edæ æbänö cæte Wængongui Awënë Odeye nempo do wäänë guiite quëwenguingää.

²⁶ Ante apænecä ëñëninque godömenque nangui pöni guiñente wædinque tömënäni nämäneque tededinque,

—Ìñæmpa mänömaï i ïininque æcänö wäänë guiite quëwenguingää.

²⁷ Ante nämäneque tededäni inänite adinque Itota,

—Waominique incæ nämä mini cædö beyænque ædö cæte quëwëmaïminii. Wængongui guiquënë wii wao bai cædongä inte nämä incæ tömänö do cæcä ingampa.

²⁸ Ante apænecä ate Pegodo tömengä ingante äninque,

—Mönitö iñömö möni ëadincoo owæ caate bitö miñæ ömæpomöni pömöni ae.

²⁹ Tæcæ añongante Itota tömënäni inänite wæætë,

—Minitö botö beyæ ante pönëninque waa pöni botö apænebodö beyæ ante pönëninque pöminitapa. Ìninque edæ botö iïmaï ante näwangä ämopa. Æcänö mäninö beyæ tömengä oncodo taodinque tömengä tönïñadäni inänite ëmö cædinque mæmpocä tönö wäänä inante ëmö cæte wëñænäni inänite ëmö cæte godinque tömengä göneacoo ëmö cæte owæ caate godinque botö miñæ æcänö wadæ pöna iñömö, ³⁰ tömengä iñömö inguipoga quëwënincoo wëenë nänö ëadincoo bai adopocoo æninque godömenque adopo adopo tiëe ganca mänimpoga adopo æncæcäimpa. Ayæ onconcoo æninque tömengä tönïñadäni tömengä badäidi tömengä wëñænäni tiëe ganca bai yebænäni bai æninque, tömengä göneacoo wæætë bacoo æncæcäimpa. Incæte tömengä ingante togænte pancædänimpa. Ìncayæ pömämo bayonte botö, Bitö quëwenguiämämo, ante godömo æninque tömengä cöwë wantæpiyæ wænämaï quëwencæcäimpa. ³¹ Incæte edæ täno yæcado ongöninäni inte pancadäniya wæætë yæmiñæ gote ongönäni bacædänimpa. Ayæ yæmiñæ ongöninäni inte wæætë yæcado ponte ongönäni bacædänimpa, ante Itota apænegacäimpa.

*Wæncæboimpa, ante Itota wæætë adodö ante apænecampa
(Mäteo 20.17-19; Odoca 18.31-34)*

³² Mänii Eedotadëe ante ñöwo änämænë æiyönäni Itota incæ tãno beyænte æicã. Ate wædinque tõmengä emiñænäni guiquënë, Tõmengä nãno wænguinque tãno æicampa, ante wæyönäni ayæ pönäni guiquënë guiñente wædönänimpa. Itota iñömö tõmengä miñæ, Dote, ante nãni gocabo inãnite nãnenë æente mãocã goyönäni tõmengä, Botö imote iimaï cædãni bacæboimpa, ante edonque apænegantapa. ³³ Eñeñönãnite, “Ñöwo iñömö mönö edæ Eedotadëe iñömö æicæimpa. Mäniñömö æi pö gongæmö ate adocanque, Waocã nê eñagaingä æyömönö ongongää, ante godö odõmongä bæi ongonguñäni. Ayæ, Wængonguï quï, ante nê godönäni ñænænäni tõnõ nê odõmönäni nempo tõmengä botö imote pædæ godongä æninque tõmënäni wæætë botö imote apænte äninque, Cõwë wæncæcäimpa, äninque oodeoidi inãmaï inãni inãnite wæætë pædæ mão godönäni. ³⁴ Æninque iinãni wæætë botö imotedö ante badete todinque botonga tawimæ towæ tãnongadinque æmontaimenca tæi tæi pãnäni ämogate wæyömote botö imote godõmenque wænönäni wæncæboimpa. Wæætë do wænimo inte botö mæõnaa go adoönæque iñonte ñäni õmæmoncæboimpa,” ante Itota wæætë apænegacäimpa.

Tantiago tõnõ Wäö, Mõnatö ämaï cæe, ante wædapa

(Mäateo 20.20-28)

³⁵ Ayæ Tebedeo wëna Santiago tõnõ Wäö iñömö Itota weca pöninque,

—Awënë nê Odõmõmi eñëmi. Mõnatö quiëmë ämõna cæbi waa tobaimõnapa,

³⁶ Äna eñëninque,

—Mĩnatö beyæ quĩnõ cæbo æmĩna.

³⁷ Äñongante,

—Awënë inõmi inte bitö ñäö emõmãmodë tæ contadinque mõnatö imõnate iimaï cæcæbiimpa, ante ämõnapa. Adocanque bitö tõmëmæmi inõ adocanque dipæmæmi inõ ämi tæ contaquimõna.

³⁸ Ante äna eñente wædinque Itota wæætë,

—Iñæmpa mĩnatö eñëñãmaï inte mänõmaï ämĩna awædö. Edæ botö nantate wæwenguimæ bai becabo bai mĩnatö edæ

adobaï adotaca becate bai Ao ante botö beyæ nantate wæwenguimĩnaa. Ayæ botö wænguimãmo ante mĩnatö adopænë guite bai adobaï Ao ante botö beyæ guiñenãmaï inte wænguimĩnaa.

³⁹ Ante äñongante,

—Ao ante guiñenãmaï cæcæmõnaimpa.

Ante apæneyõnate Itota,

—Botö nanguï caate wæwëmo bai mĩnatö adotaca becate bai äanque bai caate wæquimĩna imĩnapa. Botö wænguimãmo ante mĩnatö adopænë guite bai adobaï wænguimĩna imĩnapa. Nãwangä impa.

⁴⁰ Incæte botö tõmëmæmo inõ botö dipæmæmo inõ æcãno tæ contaquĩna, ante wii botö godö ämo imopa. Wæætë, Awënë contaimpaa mäninaque tæ contaquĩna, ante do badongaingä inte Mæmpo Wængonguï iñömö tõmengä adocanque godö angä contacædaimpa, ante Itota apænegacäimpa.

⁴¹ Mänõmainõ ante tededapa tõö, ante eñëninque wadãni diete ganca tõmengä miñæ nê godãni guiquënë Santiago tõnõ Wäö inate piinãnitapa. ⁴² Piinãni ate wædinque Itota aa pecã pönäni ate tõmënäni inãnite wæætë apænegantapa.

—Mĩnitö, Oodeoidi inãmaï inãni æbãno cædãnipa, ante do eñëmĩnipa. Tõmënäni nãni, Awënëidi, ante nê äñönäni iñömö nãmã beyænque ante cædinque nanguï piinte äñäni wædinque awënëidi nempo quëwënäni incæ wæætë do eñente cædãnipa. Ayæ tõmënäni weca nê ñænænäni inönäni iñömö, Tõmëmoque ämo eñente cædãni, ante piinte äñäni wædãnipa. ⁴³ Mĩnitö guiquënë tõmënäni nãmã beyænque ante nanguï äñäni bai wii adobaï cæquënëmi inĩnipa. Wæætë mĩni cabo iñõmĩni adocanque ñænængä pönĩ ingä bacæte ante cædinque tõmengä tãno edæ mĩnitö beyæ nê cæcã baquënegä ingampa. ⁴⁴ Ayæ yæcado ongõinente wæcã iñömö tõmengä yæcado ongoncæte ante cædinque wæætë edæ yæmiñæ pönĩ gote tõmãnäni beyæ nê cæcã badinque tõmengä nãmã beyæ ante cædãmaï inguënegä ingampa. ⁴⁵ Edæ Waobo eñagaïmo inte adobaï, Botö beyæ pönõ cæcædãnimpa, ante wii põmo imopa. Wæætë wadãni beyæ godö cæcæte ante põmoimpa. Ayæ edæ nanguï inãni tee mõnete bai wæwëñönäni

botö wæætë, Tömënanî wibænete tadinque quëwencædänimpa, ante tömëmo wepæ incæ godoncæte ante põmo ìmopa, ante Itota apænegacäimpa.

Batïmeo babetamongä ingante Itota angä waa bamongä

(Mäateo 20.29-34; Odoca 18.35-43)

⁴⁶ Itota mäninö godinque Eedicoo näni quëwëñömö pongadänimpa. Tömengä nänö nê emiñænänî tönö tæiyænänî tönö Eedicoo iñömö wodo pænta tayönänî wacä babetamongä Tïmeo wodi wë Batïmeo iñömö taadö wedeca, Pönömi æmoe, ante äneconongäimpa. ⁴⁷ Ìninqe wadäni, Itota Näatadeta pædingä inte pongampa, ante tededäni ëñëninque tömengä ogæ tedete,

—Itota ëñëmi. Awënë Dabii wodi pæimi inömi inte botö wædö ante pönente cæe.

⁴⁸ Ante tæcæ añongante godongämæ godäni pancadäniya, Apocænë inguënë quëwëe, ante änäni incæte tömengä godömenque yedæ aa pedinque,

—Awënë Dabii wodi pæimi inömi inte botö wædö ante pönente cæe.

⁴⁹ Äninqe ancaa aa pecä ëñëninque Itota næ gongæninque,

—Babetamongä ingante aa pemini pongædäni.

Angä ëñëninque babetamongä ingante,

—Ængæ gantidinque wædämaï ìmäwe. Bitö ìmite, Pöe, angä apa quëwëe.

⁵⁰ Änäni ëñëninque babetamongä incæ ayacooga gäni tadongate do ængæ gantidinque Itota weca pongä. ⁵¹ Adinque,

—Bitö beyæ quïnö cæquimoo.

Äñongante babetamongä,

—Awënë nê Odömömi ëñëmi. Cæbi waa bamonte aboe.

⁵² Angä ëñëninque Itota,

—Waa bitö bamonguinque botö ìmote pönëmitapa. Önonque wadæ gobäwe.

Äñongante tömengä do waa bamonte adinque Itota miñæ taadonque gogacäimpa.

11

Itota Eedotadëe iñömö pongampa

(Mäateo 21.1-11; Odoca 19.28-40; Wäö 12.12-19)

¹ Mänii gote Eedotadëe obo pöninque Odi-bowænquidi näni anquidi ontacamö goinö

Betapaguee näni quëwëñömö ganca ayæ Betänia näni quëwëñömö ganca põñönäni Itota tömengä miñæ nê goda ìnate mënaa ìnate da godöninque angantapa. ² Ìimaï angantapa.

—Mänii näni quëwëñömö ongö amina. Tömëñömö go guiite ayömina bodo wë picængä incæ waocä ingante mongænämaï ìningä inte nänî næingä a ongongä acæmïnaimpa. Adinque nï cæyænte ænte pöeda. ³ Wacä, Quïnante nï cæyæmïnaa, ante wææ angä ëñëninque minatö wæætë edæ, Mönö Awënë nänö ænguënënö ante ænte gomönapa. Tömengä ìnque cæte ate adodö do da põnongä æedäni, ante äeda.

⁴ Angä ëñente gote ayöna bodo wë taadö wedeca odemö awäa nänö næ a ongö adinque nï cæyænte ænte gocæte ante cæda.

⁵ Adinque mäniiñömö ongönäni guiquënë,

—Bodo wë quimæ nï cæyæwëmïnaa.

⁶ Äñönänite Itota nänö äninö adodö äna ëñëninque, Ao änäni. ⁷ Eñëninque nï cæyænte Itota weca töi töi ænte pönatapa. Ænte pöninque tömëna weocoo yabæcooque æidämæ wo cæyabæda ate Itota wænömënæca inö æi yiyæ tæ contacantapa. ⁸ Adinque nanguï inäni, Itota nänö ponguïnö, ante tömënanî weocoo yabæcooque pönö bee podöwayönäni wadäni guiquënë gönea gote yæpæma öñabo tapænte mämö bee bee podöwadäni ate tömengä podöwainonque gocantapa.

⁹ Gocä adinque täno godäni tönö ayæ pönäni tönö nanguï inäni godongämæ godinque yedæ äninque,

—Möni quëwenguinque impa, ante, Bado-gaa, ante tomönipa. Awënë Wængonguï emöwo beyænque põmi ìninqe bitö toquinque edæ Wængonguï bitö ìmite waa cæcæcäimpa. ¹⁰ Mönö mæmæ Dabii wodi pæimi inömi ìmipa, ante adinque mönitö, Awënë odeye Dabii wodi nempo näni waa quëwengai bai bitö nempo mönitö waa quëwenguinque impa. Ìninqe, Badogaa, ante yedæ añömöni æibæ põni quëwënanî incæ, Badogaa, ancædänimpa.

¹¹ Ante yedæ añönäni Itota Eedotadëe põ ti wææninque Wængonguï oncö nænæncönë yabæcönë põ guidinque mäniiñömö ongoncoo tömäa acantapa.

Ayæ, Gäwadecæ pōni ba awædō, ante tōmengä ēmiñænāni dote ganca ināni tōnō wadæ tao Betānia gogacäimpa.

Igowæ ömæcawæ i adinque Itota pūngampa

(Mäateo 21.18-19)

¹² Gote Betānia monte baönæ pōñōnāni Itota gæwænte wædinque, ¹³ Quinō impa cænguimoo, ante gomō ayongä iigowæ öñabo emæ incæ incate bocabaimpa, ante gote ayongä ömæcawæ acantapa. Önōnepoque i beyæ incadāmaī intapa. ¹⁴ Ante iigowæ inte apænedinque,

—Igowæ ēñēmi. Incaquināmaī inte bitō incaquimi cænguinanīi.

Äñongante tōmengä nānō nē ēmiñænāni edæ ēñēe gongænānimpa.

Wængonguī oncō tæiyæ waēmō bacæimpa, ante cæcä

(Mäateo 21.12-17; Odoca 19.45-48; Wäo 2.13-22)

¹⁵ Do nāni ponguēnēnō Eedotadēe pōnānitapa. Itota iñōmō Wængonguī oncō ñænæncōnē yabæcōnē pō guidinque māniñōmō māincoo mānāni tōnō wadāni godonte æncæte ante godongāmæ pōnāni tōnō ongōnāni adinque tōmānāni inānite, Oncodo tao goedāni, ante da tadongä tao godānitapa. Ayæ campio ante nāni godonte æimpa tōnō equemō godoncæte ante nē mānāni nāni cōnōimpa tōnō bæ tacä tōmampaa guidōmēmæ tæ go wææntapa.

¹⁶ Ayæ wadāni māincoo mongænte yacōnenque gocæte ante cæyōnānite Itota, İncodo mongænte godāmaī iedāni, āninque wææ cæcantapa. ¹⁷ Ayæ tōmēnāni inānite angantapa.

—Wængonguī beyæ iīmaīnō ante yewæmongatimpa. “Tōmāmæ quēwēnāni botō oncōnē pō guidinque botō imote apænecädānimpa,” ante Wængonguī angä incæte mīnitō wēnæ wēnæ cæmīni beyænque Wængonguī oncō incæ nē awēmō ö ænāni nāni womōincōnē baī wentamō bapa tōo.

¹⁸ Ante odōmonte apæneyongante, Wængonguī quī, ante nē godōnāni ñænænāni tōnō nē wææ ante odōmōnāni tōnō ēñēe gōnānitapa. Wadāni önōnānique guiquēnē, Itota quinante waa pōni apænecä

ēñēmōnīi, ante wædāni. Adinque awēnēidi wæætē, Itota beyænque pīināni wæcæ wæ, ante pōnēninque Itota ingante guiñente wædinque, Quinō cæmō wæmaingāā, ante wænoncæte ante pōnente cægadānimpa. ¹⁹ Gäwadecæ bayonte Itotaidi iñōmō on-codo tao godinque godōmenque yabæque tao gogadānimpa.

Igowæ ömæcawæ do guiñē wæ adānipa (Mäateo 21.20-22)

²⁰ Baänæ ate iīmō nāni pōninō adodō ponte ayōnāni iigowæ yæwaguinto ætæwowate tōmēwæ æi ayawæ edæ dobæ guingo iwate wænimpa, ante adānitapa. ²¹ Adinque Pegodo, Itota iīmō nānō āni baī impa, ante pōnēninque,

—Awēnē nē Odōmōmi cōwā ae. Bitō piinte āniwæ inte iigowæ edæ dobæ guiñē wæ ataque.

²² Äñongante tōmēnāni inānite Itota wæætē,

—Wængonguī ingante wede pōnēmæwedāni, angantapa. ²³ İi ānanquidi iñōmō ongō iñonte waocä, “Änanquidi ēñēmi, āninque, Bitō cabænte wo gote gäwapænē guie,” angä ēñēninque ānanquidi tōmē gäwapæno do wo gote guiquī i, ante pōnēmīnitawo.

Edæ nāwangä ante mīnitō imīnite apænebopa. Æcāmenque incæ edæ æmæ pōnēnāmaī inte, Botō ānō baī do bacæimpa, ante wede pōnēninque āna ininque tōmengä nānō āninō baī do æmaingampa. ²⁴ Mānōmaī beyæ botō mīnitō imīnite apænebopa. Mīnitō quiēmē incæ ante Wængonguī ingante apænedinque, Tōmengä nāwangä pōnongä æncæboimpa, ante wede pōnente apænemīni ininque mīnitō āninō tōmānō edæ do æncæmīnimpa.

²⁵ Ayæ edæ, “Mīnitō, Wīwa cæbo incæte Wængonguī öönæde nē quēwēnongä inte botō imote pōnō ñimpo cæcä ininque botō waa tobāimopa, ante wæmīnitawo. İñæmpa, Wængonguī mānōmaīnō cæcæcäimpa, ante cædinque mīnitō tōmengä ingante apænecæte ante ongōninque tāno piyænē cæte cæedāni. Wacä wēnæ wēnæ cæcä wædōmīni inte mīnitō wæætē tōmengä ingante pōnō ñimpo cæedāni, ante Itota apænegacäimpa. ²⁶ Wæætē edæ mīnitō

pönö ñimpo cædāmaī imīni ininque mīnitō wēnæ wēnæ cædinō ante mīnitō Mæmpo öönædē nē quēwengā inongā inte tōmengā adobaī ñimpo cædāmaī imaingampa,” ante Itota apænægacāimpa.

Awēnē imipa, ante cecānō ānaī, ante Itota ingante ānānīpa

(Māateo 21.23-27; Odoca 20.1-8)

²⁷ Eedotadēē iñōmō adodō pōnānitapa. Itota Wængonguī oncō ñænæncōnē yabæcōnē go guite cægōñongā, Wængonguī quī, ante nē godōnāni ñænænāni tōnō nē wææ ante odōmōnāni tōnō nē aadāni nāni Picæncabo, nāni ānāni tōnō tōmengā weca ponte ānānitapa. ²⁸ Tōmengā ingante,

—Æcānō nē angā inte bitō imite angā cæbii, ānānitapa. Æcānō bitō imite, Nē āmi imipa, pönō āna æninque bitō nē āmi inte baī edæ mānōmaī cæbii. ²⁹ Ante wæyōnānite Itota nāēmæ āninque,

—Botō mīnitō ānō baī adodeque āmo ēñēninque mīnitō wæætē apænemīni ēñēmoedāni. Apænemīni ēñēnte ate, Botō cædinō ante æcānō nē angā inte pönō āna æninque cæboī, ante botō wæætē apænebo ēñēmaimīnīpa.

³⁰ Wäo wodi ingante æcānō, Æpænē guidonguīmi, āna ēñēninque tōmengā wæætē guidongāī, ante pōnēmīni. Edæ Wængonguī angā ēñēnte cæcantawoo. Wæætē waodānique ānāni ēñēnte cæcantawoo. Æcānō Wäo ingante ānaa, ante apænemīni ēñēmoedāni. ³¹ Angā ēñēnte wædinque tōmēnāni, Æbānō anguīī, ante wæætēdō wæætē nāmāneque tēdedinque, “Wængonguī angā ēñēnte Wäo guidongantapa, ante āmō baī Itota wæætē mōnō imonte, ‘Quīnante Wäo ingante pōnēnāmaī imīnitapa,’ ancædongāimpa. ³² Ante pōnente wædinque wæætē, Wængonguī beyæ nē apænecā Wäo wodi inongāimpa, ante tōmānāni pōnēnānīpa. Ante pōnēninque awēnēidi wæætē, Waodānique ānāni ēñēnte Wäo guidongantapa,” ante mōnō ædō cæte anguīī. Edæ pīnāni wæcæ wæ. ³³ Ante guīñēnte wædinque Itota ingante edæ,

—Wa. Ēñēnāmaī imōnīpa.

Ante wæyōnānite Itota wæætē,

—Īninque edæ, Æcānō nē angā inte pönō āna æninque botō cæboī, ante mīnitō ānō

ante botō adobaī apænēdāmaī incæboimpa, ante angacāimpa.

12

Nē aadāni inguēnēnāni incæ wīwa cædānīpa, ante

(Māateo 21.33-46; Odoca 20.9-19)

¹ Ayæ māniñedē Itota, Wængonguī æbānō cæcāā, ante ēñēncædānīpa, ante imæca quēwēnāni nāni cæinō ante odōmōninque iīmaī apænecantapa. “Waocā yowementacodē mīninque wææ da da māo da caadinque, Tōmēmoncoo ænte pīnā pīnā gāwate tōmēmæ ontatodē wæ yopænte æñōmō, ante ææ wote badongā. Ayæ yowementacodē awēmō guidāmaī incædānīpa, ante æi wænōmēnæca gomō aquīñōmō mænongā. Ate wabæca gocæ cædinque wadāni ōmæ wite nē aadāni inānite, Botō yowementacodē incæ ōmæ wite aedāni, angantapa. Aayōmīnite botō, Mīnitō quī, ante pancamonga pōnōmo æncæmīnīpa, angā Ao āñōnāni wadæ gocantapa.”

² “Ayæ yowedepo bayonte tōmengā ingante nē cæcā ingante apænēdinque, Bitō yowementacodē nē aadāni weca godinque pancamonga āmi æninque botō weca wæætē māmōmi æmoe, angā gocantapa. ³ Angā godinque pongā adinque yowementacodē nē aadāni guiquēnē nē æncæ pōningā ingante bæi ongonte tæi tæi pāninque ōmæpocā da tadōnāni gocantapa. ⁴ Adinque nē ēacā iñōmō wacā ingante tōmengā ingante nē cæcā ingante angā gote pongā adinque yowementacodē nē aadāni adobaī tæi tacadāni wæyongante, Guingo imonte wæcæcāimpa, ante tōmengā ingante godō wīwa cædānīpa. ⁵ Ayæ wæætē nē ēacā wacā ingante da godongā godinque yowementacodē pongā adinque nē aadāni wæætē tōmengā ingante wænōnāni wængantapa. Ayæ wæætē nanguī ināni inānite da godongā pōnāni adinque pancadāniya inānite tæi tæi pāninque pancadāniya inānite wænōnāni wænānitapa.”

⁶ “Adocanque pōnī nē ēacā weca ongōnongāimpa. Māningā iñōmō nē ēacā wengā onguīñægā iñongante nē ēacā tōmengā ingante nanguī waadedongāimpa. Īninque nē ēacā iñōmō, ‘Tōmēmo wengā

ingante da godömo gocä adinque tömënäni guññente wædinque ee abainäni, ante pönëninque tömengä ingante da godongä tömangä pönï gocantapa. ⁷ Gote dicæ pongä adinque tömënäni, ‘Tömengä ingampa. Wæmpocä mäincoo ini edæ iingä iñömö nê ænguingä ingampa cæmöö. Mönö edæ mäo wænömö wængä ate edæ mönö qui babaimpa.’ ⁸ Änewëninque tömënäni nê äcä wengä ingante edæ bæi ongonde wænöninque tömengä baö ini yowementacodê wææ cæte yabæque edæ, Ömäe, ante wido cædänitapa. Mäninque apænebopa.”

⁹ Ante tededinque Itota apænegacäimpa. Ayæ mänii nê äninäni inänite wæætê iimäi angantapa. “Ininque yowementacodê nê aaquënänäni inänite nê äcä æbänö cæquingää, ante pönëmini. Tömengä edæ, Ömäe, ante do pöninque nê aaquënänäni inänite godö wænöninque wadäni inänite yowementacodê godongä æninque aacædänimpa.”

¹⁰ Äninque Itota, “Minitö guiquënë dodäni näni yewæmongainta adämaï inte botö imote äminitawo. Edæ iimainö ante Wængongui angä eñente yewæmongadänimpa.

‘Dica ænte adinque, Wænæ wænæ inca, ante nê mænönäni näni wido cædinca incæ gomonga waëmonca inca ininque täno näni ñönöninca bæbængapa do bacapa.

¹¹ Wængongui Awënë incæ mänömaï cæcä adinque mönö waocabo guññente wædinque waa amompa,’
Ante yewæmonte i abaiminipa.”

¹² Mänömaï apæncä eñente wædinque awënëidi wæætê, Iñæmpa nê aaquënänäni näni cæinö ante odömönte apænedinque Itota mönö imonte piinte angä awædö, ante pönëninque tömengä ingante bæi ongoncæ cædänitapa. Incæte, Wadäni piinäni wæcæ wæ, ante wædinque ee adinque bæi ongönämaï inte tömënäni edæ wadæ godadänimpa.

Tæiyæ Awënë nänö äintamö ante tededänipa

(Mäateo 22.15-22; Odoca 20.20-26)

¹³ Mänii awënëidi incæ ayæ ate Padi-teoidi pancadäniya tönö Edodeidi pancadäniya inänite da godöninque, Minitö gote Itota ingante äñömïni wabänö tömengä nänö pante wæquinque adodeque wapiticæ bai tedebaingampa. ¹⁴ Änäni eñëninque Itota weca wadæ pöninque,

—Awënë nê Odömömi eñëmi. Bitö nö pönente cæbi imipa, ante do eñëmönipa. Ayæ bitö ayömi mönitö tömämöni önömönique bai imöni adinque bitö iñömö, Waodäni æbänö anguinäni, ante ayæ, Æbänö cæquinäni, ante wädämaï imi inte Wængongui taadö ante bitö guññenämaï inte nö odömönte apænebipa. Ininque apænebi eñëmönie. Odömäno gobiedöno beyæ ante tæiyæ awënë Tetædo tiguitamö nänö äintamö ante æbänö wææ yewæmonte i, ante eñencæte ante wæmönipa.

¹⁵ Godonte edæ waa cæte intawo. Wæætê wænæ wænæ cæte intawo. Ante äñönänite Itota iñömö, Waa cæte bai tedewënanipa, ante do eñente wædingä inte tömënäni inänite,

—Botö imotedö ante cædinque, Æbänö cæmö ate oda cæquingää, ante quinante cæminii. Deënadio tiguitamö ænte pömïni abodäni.

¹⁶ Angä eñente ænte pönäni adinque,

—Æcänö awinca bai yewæmonte badonte i. Æcänö emöwo ante yewæmonte i.

Ante äñongante,

—Awënë Tetædo awinca bai yewæmonte badonte impa. Adocä emöwo ante yewæmonte ongö amönipa.

¹⁷ Ante apænedäni eñëninque Itota tömënäni inänite,

—Awënë Tetædo qui i ininque edæ Tetædo ingante godongæimpa. Wæætê Awënë Wængongui qui i ininque Wængongui ingante godongui i apa änewëminii.

Angä eñëninque tömënäni, Æ, nö pönï ante apæncampa, ante tömengä ingante waa adinque guññente wægadänimpa.

Ædö cæte ñäni ömæmonguii, ante wædänipa

(Mäateo 22.23-33; Odoca 20.27-40)

¹⁸ Ayæ Tadoteoidi nê, Waocä wæninque ñäni ömæmönämaï æmæwo wængampa,

ante nē ānewēnāni inte Itota weca pōninque, Mōni ānō ante āmi ēñēmāimōnipa, āninque,
 19 —Awēnē nē Odōmōmi ēñēmi. Mōitee wodi mōnō beyæ ante wææ yewæmōninque iīmaī ante yewæmongacāimpa. Waocā mōninque wēñæ tapæidāmaī inte wængā ate tōmengā tōniñacā wæætē owæmpoingā ingante mōninque wēñæ tapæidinque, Botō tōniñacā wodi wengā ingampa, ante pæpogacæcāimpa, ante yewæmongacāimpa.

20 “Īninque wadāni iīmaī cædānitapa, ante apænemōni ēñēe. Edæ ōnompō æmæmpoque go mengāa nāni caipæ iñōnānite bamoncadengā mōninque wēñæ tapæidāmaī manguiwēninque edæ nāñe wængā. 21 Wængā ĩninque wææ ayæmengā adocā ingante mōninque wēñæ tapæidāmaī nāñe wængā. Ayæ wææ wacā adobai wēñæ tapæidāmaī nāñe. 22 Ayæ wææ wēñæ tapæidāmaī nāñe, ayæ wææ wēñæ tapæidāmaī nāñe, ayæ wææ wēñæ tapæidāmaī nāñe, ayæ wææ ayæmengā pōni adocā ingante mōninque wēñæ tapæidāmaī nāñe wængantapa. Onquiyængā guiquēnē ancaa owæmpote wædinque tōmengā pōni nāñe wængantapa. 23 Īninque, Mōnō ñāni ōmæmonguiōnæ, ante mīni aōnæ iñonte māningā owæmpoingā iñōmō æcānō nānōogængā baquingāa. Edæ tōmengā ingante iñōmō edæ tōmānāni manguiwengadānimpa.”

24 Āñōnānite Itota wæætē,
 —Mīnitō iñæmpa. Wængonguī angā ēñente nāni yewæmōinta adāmaī inte bai āmīni awædō. Wængonguī adocanque tæi piñængā inte edæ tōmāa cæcampa, ante pōnēnāmaī inte edæ oda cæte āmīni awædō. 25 Edæ Wængonguī anquedoidi ōōnædē cōwē owodāni bai inōnāni inte wadāni ñāni ōmæmōninque godō ñānōnāmaī mōnāmaī inguinānidō anguēnē. 26 Wæætē do wængaināni nāni ñāni ōmæmonguinō ante Mōitee wodi ocāñequiya ante yewæmōninque adotaa æbānō yewæmongacāi, ante mīnitō adāmaī inte āmīni awædō. Edæ Mōitee wodi ingante Wængonguī iīmaī angacāimpa. “Botō iñōmō Abadāo Wængonguimo ingaīmo inte ayæ Itæca Wængonguimo ingaīmo inte

botō Aacobo Wængonguimo adobo imo anguēnē.” 27 Ante nē angaingā inte edæ æmæwo wænīnāni tōmēnāni Wængonguī ædō cæte inguingāa. Wæætē edæ mūi quēwēnānique tōmēnāni Wængonguī inongā ingampa, pōnenguēnē quēwēmīni. Nē wænte godīnāni incæ ayæ mīināni quēwēnāni inānipa. Mīnitō edæ wadō ante tededimīni inte edæ oda cæte wapiticæ ānewēmīnipa, angacāimpa.

Wængonguī nānō wææ angaine mēnea tæineda pōni ēnēpa

(Māateo 22.34-40)

28 Mānōmaī āñōnānite nō apænecā ēñente wædinque adocanque nē wææ ante odōmongā iñōmō Itota weca pōninque,

—Wængonguī, iīmaī cædāni, ante nānō wææ angainecoo ante pōnēninque ædedō tæine pōni iñonte mōnō nanguī ēñente waa cæquīi.

29 Āñongante Itota iñōmō,

—Īmaīne ante nānō wææ angaine iñōmō edæ tæine pōni ēne iñonte mōnō nanguī ēñente cædinque waa cæcāimpa, angantapa. “Idægoidi, āmo ēñēedāni. Wængonguī mōnō Awēnē iñōmō, tōmengā adocanque inongā inte edæ nāwā Awēnē inongā ingampa. 30 Mānōmaī Awēnē Wængonguī ingampa, ante adinque bitō mīmō entawente tōmengā ingante waadedinque ōnōwoca ēwocabi inte ædæmō waadete pōnencæbiimpa. Ayæ edæ bitō ocāi encabi inte nō pōnēninque bitō baō tæi piñænte ēñabi inte edæ godō waadete cædinque tōmengā ingante waa waadete pōnēe,” ante nānō yewæmongaine tæine iñonte mōnō nanguī ēñente waa cæcāimpa. 31 Ayæ wade nānō angaine adobai tæine iñonte mōnō ēñente waa cæcāimpa. “Nāmā bitō waadete waa cædō bai adobai pōnēninque bitō wadāni inānite adobai waa waadete cæe.” Māninque. iīmaī cædāni, ante Wængonguī nānō wææ angainō ante tæineda bai wade edæ dæ ampa.

32 Ante apænecā ēñēninque nē wææ odōmongā iñōmō,

—Awēnē nē Odōmōmi nāwangā edæ ante apænebi ēñēmopa. Wacā wængonguī dæ āñongante adocanque mōnō Wængonguī inongā ingampa, ante nō āmīpa. 33 Īninque

tömengä ingante mīmōno entawente waadedinque mōnō ocai encamō inte nō pōnēninque mōnō baō tæi pīñæmō inte godō Wængonguī ingante waadete cædinque nāmā mōnō pōnēnō bai wadāni inānite adobai waadete godō waa cæmō adinque Wængonguī waa acampa. Nāwangā impa. Baō bataa iya tante godōmō incæ, Wængonguī qui, ante mōnō ancaa godōmō incæ Wængonguī ayongā wædænque waa cæte impa. Wæætē māninō bitō āninō bai cæmō adinque Wængonguī godōmenque waa acampa.

³⁴ Ante nē wææ odōmongā nō ēñente apænegacāimpa. —Bitō Wængonguī Awēnē Odeye nempo obo pōni ongōmi inte guibaimipa, ante awædō.

—Bitō Wængonguī Awēnē Odeye nempo obo pōni ongōmi inte guibaimipa, ante awædō.

Angā ēñēninque tōmānāni, Mōnō æbānō godōmenque anguīi, ante guīñēnete wædinque pæ wēēnegadānimpa.

Codito æcānō Pæingā inongā ingāā, ante (Māateo 22.41-46; Odoca 20.41-44)

³⁵ Pæ wēēnedāni adinque Itota ayæ Wængonguī oncō ñænæncō yabæcōnē ongōninque odōmonte apænecantapa.

—Dodāni nāni wææ yewæmongainō ante nē odōmōnāni iñōmō mōnō Codito ingantedō ante apænedinque, Awēnē Dabii wodi pæingā inongā ingampa, ante quīnante ānāni, ante pōnēmīni. ³⁶ Iñæmpa Dabii wodi incæ Wængonguī Tæiyæ Waēmō Ōnōwoca tōnō apænedinque,

“Botō Awēnē ingante apænedinque Awēnē Wængonguī incæ iīmaī ante apænegacāimpa.

Bitō botō tōmēmæ inō tæ contate ongōñōmi, Bitō imite nē pīnāni inānite bæ tabo ate, bitō ōnōwa gāānē ongōnāni inānite pinā gāwacæbiimpā.”

Ante Awēnē Dabii wodi incæ yewæmongacāimpā.

³⁷ Codito inongā ingampa, ante awēnē Dabii wodi nānō nē angaingā inongā inte edæ adocā Codito iñōmō ædō cæte nāēmæ Awēnē Dabii wodi pæingā inguīgāā, ante pōnenguēnē ānewēmīni. Mānōmainō ante Itota odōmonte apænegacā ēñēninque tæiyænāni godongāmæ ongōnāni waa ēñengadānimpa.

Nē wææ odōmōnāni inānite Itota pūingampa

(Māateo 23.1-36; Odoca 11.37-54, 20.45-47)

³⁸ Itota godōmenque iīmaī ante odōmonte apænegacāimpa. “Cædāmaī, ante wææ ante nāni yewæmongainta nē ate odōmōnāni inānite mīnitō gomō aedāni. Tōmēnāni iñōmō doyaēncōo waēmoncōo wēñate mongænte todānipa. Waodāni nāni godonte æiñōmō cægōñōnānite wadāni pō bee tēninque tōmēnāni inānite, Nē odōmōmi, bitō imite waa amōnipa, ante apænedāni ēñēninque edæ nē odōmōnāni iñōmō nanguī todānipa. ³⁹ Ayæ tōmēnāni odōmōincōnē go guīdinque tōmēnāni nāmanque ante pōnēninque waēmompaa pōni tæ contate todānipa. Ayæ ææmæ becæ godinque tōmēnāni, Botō tāno bete tocæboimpa, ante waēmompaa pōni tæ contate bete todānipa. ⁴⁰ Ayæ owæmpoināni oncō yo mongænte bai cædinque ō æwēnāni inte nē wææ odōmōnāni iñōmō, Botō imote waa acædānimpa, ante cædinque Wængonguī ingante nōingā apænete bai cædinque babæ cædinque wantæpiyæ tededānipa. Tōmēnāni godōmenque nāni nanguī pōni pante wæquinque mānōmaī nāmā beyænque ante cædānipa, ante adinque mīnitō iñōmō ee gomō aedāni,” ante Itota wææ angacāimpa.

Owæmpoingā incæ, Wængonguī qui, ante godongampa

(Odoca 21.1-4)

⁴¹ Māniñedē Wængonguī oncō yabæcōnē iñōmō, Wængonguī qui, ante nāni wēnoncadedē da wēnōnānimpa. Mānincōnē pō guīdinque tōmēnāni nāni da wēnoncade gāānē tæ contadinque Itota a ongōñongā nanguī ināni adoyōmō pōninque daga daga wēnāni acantapa. Pancadāniya nanguī ēadāni inte nanguī pōni da wēnāni acantapa. ⁴² Ayæ a ongōñongā owæmpoingā ōmæpocā inte ōnontamonque incæ mentamonga ænte māmō daga wengan-tapa. ⁴³ Adinque Itota tōmengā nānō nē ēmiñænāni inānite aa pecā pōnāni ate,

—Nāwangā ante apænebo ēñēdāni. Wadāni tōmānāni wædænque pōni godonte bai wīi eyepæ daga wēñōnāni iingā owæmpoingā iñōmō ōmæpocā inte wædongā incæte godōmenque nanguī

godonte bai godongä abopa. ⁴⁴ Edæ mäninäni guiquënë nangui eadäni inönäni inte, Quëwenguinta impa, ante cö cædinque tömënäni nāni wii æinentaque ayæ ongöintaque godönänipa. Ìngä ömæpocä ingä guiquënë tömengä nānō quëwenguinta incæ, Wængongui qui bacæimpa, ante tōmanta edæ daga wengampa, ante Itota apænegacäimpa.

13

Wængongui oncö ñæncö bæ tate bacæimpa, ante

(Mäateo 24.1-2; Odoca 21.5-6)

¹ Mänii Wængongui oncö ñæncö yabæcönë ongonte iinque apænete tao goyongä tömengä nānō nē emiñængä adocanque Itota ingante,

—Awënë nē Odömömi eñëmi, angantapa. Dicacoo wainca wænömënæca wænömënæca nāni mænongaincaco waincö ongö cōwä ae.

² Æñongante edæ,

—Bitö guiquënë, ñæncægade nāni mænongaincö ongö abii. Mänincoo mini acoo incæ tōmanca bæ tadäni wæænca adinque panguimæ panguimæ godinque dica adocaque pōni incæ wænömënæca ongönāmaï ingæimpa, ante Itota apænegacäimpa.

Oo iinque bacæimpa, ante æbänö ate eñenguü, ante

(Mäateo 24.3-28; Odoca 21.7-24, 17.22-24)

³ Mänii taodinque Odibowænquidi go æidinque tömënäni Wængongui oncö ñæncö gomö nāni ayömö tæ contayongä Pegodo tönö Tantiago, Wäo tönö Æntade mänimpodäni Itota ingante awëmö änänitapa. ⁴ Mänii bitö äninö ante æyedënö iinque baquü, ante eñencæte ante wæmönipa. Ayæ, Ìmaï cæbo ate minitö, Oo pōni impa, ante eñencæminimpa, ante Wængongui æbänö mä cæquingäa, ante apænebi eñëmaimönipa.

⁵ Ante wæyönänite Itota, “Wapiticæ odömöñönäni minitö wæætë, Mönö oda cædāmaï ingæimpa, ante nāmā wææ aquënë quëwëminii. Edæ iimaï baquü i ataquedäni. ⁶ Edæ wadäni nangui

inäni babæ tedete pöninge botö emöwo ante, ‘Botö mänimodö inömo imopa,’ ante apænedinque wapiticæ edæ mäodäni godinque nangui inäni tömënäni miñæ oda cæte wapiticæ gocædänimpa,” ante apænecantapā.

⁷ Ayæ, “Wabæca awënë tönö pö bee tëninge wæætëdö wæætë cædapa, ante tededäni eñencæminimpa. Ayæ wayömö nāni guëadö guëa cæte wænönö ante tededäni incæte edæ guiñente wædāmaï iedäni. Edæ mäninö botö äninö bai cōwë bacæimpa. Ba incæte mönö inguipoga quëwënö iñömö mäniñedë wii æmæwo iinque bacæimpa.

⁸ Adobæca quëwënäni iñönänite wabæca quëwënäni ponte bee tëninge guëadö guëa cæquinäni inänipa. Adobæca awënë odaye nempo quëwëñönänite wabæca awënë odaye tontadoidi mämö bee tëninge guëadö guëa cæte wænonte wænguinäni inänipa. Ayæ wayömö wayömö goinque pö wæcædänimpa. Ayæ waodäni nāni cæinente wænguinque cænguï incæ tömää capo wængæimpa. Mänii wëñæ mä nantate bai wæwente bamini incæte mini godömenque wæwëninge ingæimpa.”

⁹ Ante apænedinque Itota godömenque, “Tömëmini nāmā incæ wææ aadedäni. Edæ minitö iminite bæi ongöninge edæ nē apænte änäni weca mäo pædæ godönäni æncædänimpa. Ayæ godömenque tömënäni odömöincönë mäo gönönäni gongæñömini minitö iminite tæi tæi pancædänimpa. Ayæ botö beyænque pancabaa awënëidi gobedönadodoidi weca ayæ tömämæ awënëidi odayeidi weca mäo gönönäni gongæninge minitö botö beyæ apænecæminimpa.

¹⁰ Edæ iinque bayedë botö äñedë ayæ badāmaï iñonte, Botö æmo beyænque quëwencæminimpa, ante waa pōni botö apænedö ante tömämæ quëwënäni doyedë eñencædänimpa. ¹¹ Iinque mäniñedë minitö iminite nāni bæi ongonte ænte goyedë, Nē apænte änäni weca ongöninge æbänö ante apænequimoo, ante wædāmaï iedäni. Edæ, Æbänö waa apænequü,

ante Wængongui Tæiyæ Waëmö Önöwoca apæncä eñente ate apænecæminimpa. Wii nāmā pönëninge wæætë Wængongui nānō apænedö eñëninge apænecæminimpa.”

12 “Mäniñedē edæ nāna caya iñonate adocanque näemæ piñinque, Wænoncæ, äninque tömengä tönñacä ingante da godongä gocæcäimpa. Nāna wencaya iñonate mämpocä iñömö näemæ piñinque, Wænoncæ, äninque tömengä wengä ingante da godongä gocæcäimpa. Ayæ wēñænāni incæ wæmpoda inate näemæ piñinque mäo apænedāni eñēninque wadāni tömēnāni wæmpoda inate māmō wænōnāni wæncædäimpa. 13 Ayæ, Coditoidi iminipææ, ante tömānāni botō emōwo beyænque mīnitō iminite nangui piñcædānimpa. Piñnāni wæwēmīni incæte æcānō iimæca iinque baganca wæntædāmaī inte botō emōwo beyæ piñte badāmaī inaa botō tömengä ingante æmo beyænque quēwencæcäimpa,” ante Itota apænecantapa.

14 Ayæ, “Wadāni pō ñömæi bai öo wadō nāni wo ewenguimāmo incæ tæiyæ waemō iñömö ænte māmō cō cæcædānimpa, ante doyedē yewæmongatimpa. Docä nānō yewæmongainta adinque nē adingä iñömö tömengä do eñēmaingampa. Iincayæ ate cō cædāni ongō adinque edæ mäniñedē Oodeabæ quēwēmīni iñömö änanquidi do wodii winonte æibæwedāni. 15 Ayæ oncōmanca ongōmīni iinque māincoo æncæte ante oncōnē wæi guidāmaī inte oncōmancaque oncōmancaque wodii winōmäewedāni. 16 Ayæ nē gönea cæmīni iinque yacoo æncæte ante oncōnē ocæ emænāmaī inte godōmenque wodii winōmäewedāni. 17 Mäniönæ iinque bayedē yædemadä ināni tönō goömæ nē gānōnāni tönō tömēnāni nāni wæquimāmo baquīnō anguēnē. 18 Ayæ mīnitō mīni wodii winonguionæ ante pönēninque edæ Wængongui ingante, Wīi edæ cōönædepo bacæimpa, ante apæneedāni. 19 Edæ mäniñedē woadāni nangui nāni wæwēmāmo nāni angä baquīnō anguēnē. Edæ Wængongui nānō badongaiñedē mänōmaī nāni wæwēmāmo bai dæ añonte ayæ godōmenque ñōwo ganca dæ änompā. Ayæ godōmenque iinque baganca mänōmaī nāni wæwenguimāmo bai dæ anguīnō anguēnē.”

20 “Edæ wantæpiyæ nāni wæwenguī impa, ante adinque Wængongui, Mänimpoönæque edæ wæwencædānimpa, ante pönōmenque

ante änāmaī ingä bai quingänō quēwenguēnē dæ ancædōnānimpa. Incæte Wængongui, Mänimpodāni inānite apænte æmo beyænque nē quēwenguīnāni inānipa, ante nānō apænte ængaināni inānite waadete pönēninque dobæ, Mänimpoönæque wæwencædānimpa, ante cædinque pönōmenque angacäimpa,” ante Itota apænegacäimpa.

21 Ayæ, Iinque bayonte æbānō inguīi, apænedinque Itota godōmenque iimāi ante apænecantapa. “Mäniñedē wadāni mīnitō iminite, ‘Iñömö mönō Codito ponte ongongä tamēñedāni,’ ante ayæ, ‘Wayömō a ongongä atamōnipa,’ ante tededāni eñēninque edæ mīnitō iñömö eñēnāmaī imæwedāni. 22 Wadāni mäniñedē ponte a ongōninque nāmā incæ ante, Tömēmo Codito inōmo imopa, ante babæ ante tedequīnāni. Ayæ, Wængongui beyæ nē apænebo inōmo imopa, ante nē babæ ante tedequīnāni. Tömēnāni, Wængongui nānō apænte ængaināni incæ æmæwo oda cædinque wapiticæ gocædānimpa, ante cædinque bamōnengæ bai cædinque öönædē cæi bai cædinque nō odōmonte bai cæquīnāni inānipa. Incæte Wængongui nē apænte ængaingä inte edæ ee aquingä diyæ æmæwo oda cædinque wapiticæ goquīnāni. 23 Edæ iinque badāmaī iñonte botō ñōwo do apænebo eñente cædāni. Oda cædāmaī incæboimpa, ante nāmā wææ aabæwedāni,” ante Itota angacäimpa.

Waobo eñagaïmo inte botō iimāi ponte cæcæboimpa, ante

(Mäateo 24.29-35, 42, 44; Odoca 21.25-36)

24 Äninque Itota ayæ godōmenque apænedinque, “Mänīi nāni wæwēmāmo nāni angä iinque go ate nænque iñontobæ wēmō badinque apäicä apäidāmaī ingæimpa. 25 Nēmoncoo öönædē inō wææ tæ wææninque waa tæ waa tæ wæængæimpa. Öönædē tæi ongongaincoo incæ wancæ wancæ cæte bai wapiticæ goquīnō anguēnē. 26 Mäniñedē edæ botō Waobo nē eñagaïmo inte boguīmancodē pöninque tæi pōni piñæmo iinque edæ ñāo apäite bai waemō emonte wææmo acædānimpa. 27 Mänōmaī pöninque botō æmænō betamonca æmænō betamonca

boguimä nāni pō goinō godinque inguipoga tömāne godinque öönæ tömāne godinque Wængonguī nānō apænte ængaināni inānite añete poncædānimpa.”

²⁸ Ante Itota godömenque apænedinque, “Igowæ æbānō iwæ, ante odömonte apænebo eññenque pönëedāni, angantapa. Tömewæ müiwæ badinque iigowæ wayabo tänä nä boca adinque mīnitō, Öñabo nānō bocañepo inte nænque nāwatedæ baquinque bocapa, ante pönëninque edæ do eññeminpa. ²⁹ Ayæ adobaī mäninō botō apænedō bai edæ do ba adinque mīnitō, Waocā nē eñagaingā do odemō pōni ongöninque inguipoga oo poncæcāimpa, ante eññencæminimpa. ³⁰ Nāwangā ämopa. Nöwomīni ayæ müimīni quëwëninque wænte godāmaī iñömīni mäninō botō apænedinō bai tömānō edæ do iñque baquīnō anguënē. ³¹ Edæ öönædē ongöñömō inguipoga tönō wo ewente bai dæ ba incæte botō angainonque guiquënē dæ badāmaī inte edæ cöwë tæi ongongæimpa,” angacāimpa.

³² Ayæ, “Māniönæ æyedönō i, ante, Māñinēpo ædepodō i, ante eññencæte ante mīni wædinō ante æcāmenque incæ eññenāmaī ingampa. Tömānāni eññenāmaī iñönāni edæ Wængonguī anquedoidi incæ eññenāmaī inānipa. Wæmpocā Wëmo incæ eññenāmaī iñömote Wæmpocā iñömō tömengā adocanque incæ edæ nē eñngā ingampa,” angantapa.

³³ Äninque ayæ godömenque apænedinque Itota tömēnāni inānite iīmaī angantapa. “Iñinque, Æyedönō baquīi, ante eññenāmaī imīni inte edæ mönāmaī müimīni wānō cōninque edæ Wængonguī ingante apæneedāni. ³⁴ Botō ponguīnō iñömō waocā ëacā nānō cæi bai impa. Iñgā waocā iñömō wabæca gocæ cædinque, Botō imote nē cædāni nē änāni badinque botō oncō waa aacædānimpa, ante adocanque ingante, Māninganca cæe, wacā ingante edæ, Māninganca cæe, wacā ingante, Māninganca cæe, ante odömöninque odemō wææ a congā ingante, Cöwā ae, äninque wadæ gocā. ³⁵ Iñinque botō nē ëacā bai iñömote mīnitō, Mönitō Awënē æyedönō ponguingā, ante eññenāmaī imīni inte gāwadecæ ayaönænēña tawadiya peyedē

ñāo ba, æyedemē poncæcāimpa, ante wadō congüenē cæmīni. ³⁶ Edæ, Wīi mö ñömöni ponguingā ingānō anguënē, ante cædinque müimīni quëwëmaimīnipa. ³⁷ Mīnitō imīnite botō änō ante tömānāni inānite adobaī, Wānō congüenē quëwëmīni,” ante Itota angacāimpa.

14

Itota ingante bæi ongonte cængæimpa, ante cædānipa

(Mäateo 26.1-5; Odoca 22.1-2; Wäo 11.45-53)

¹ Mëönaa go ate wodo pänta gogaionæ bai Patowa ææmæ baquimpa, ante pönëninque oodeoidi ñöwo, Päo yedæ æmpoquī ömæmō i mönō cængüionæ inguimpa, ante cædönānimpa. Māniñedē, Wængonguī qui, ante nē godönāni ñænænāni tönō nē wææ ante odömönāni iñömō, Mönō awëmō cæte Itota ingante bæi ongonte ænte māo wænongæimpa, ante cædönānimpa. ² Oo pōni impa, ante wædinque awënēidi,

—Iñæmpa ææmæntedæ iñonte wænömō bai tömānāni ænguī bate Yæ yæ ante piinte cæcædönānimpa, ante adinque mönō ædō cæte māniñedē cæquīi, ante wægadānimpa.

Itota ocaboga onquiyængä oguī wapæ gao cæcacampa

(Mäateo 26.6-13; Wäo 12.1-8)

³ Itota iñömō Betānia godinque nē baad-ingā Timönō oncönē go guiite eññacantapa. Guīi eññate cæncöñongā onquiyængä adoyömō pō guicantapa. Tömengā oguī wapæ nāwā näadodopæ nāni änömæ nānō nanguī godonte ænimæ dica adabatodo waincadedē pe ñiñænte mäningā inte ñöwo ænte māmō Itota weca pongantapa. Pöninque tömengā mänincade wencade ao mænodinque Itota ocaboga edæ gao cæcacantapa. ⁴ Adinque godongāmæ ongönāni pancadāniya ænguī badinque nāni caboque tededinque,

—Iñæmpa oguī wapæ incæ önonque guënente bai cæcampa töö. ⁵ Edæ waocā adoque wadepo cæte beyæ paga æninque todetiento deñnadiota nāni æninta ayæ godömenque æninta beyæ godonte ænguënemæ imæmpa. Godonte ænte bai

ömæpodäni inänite wæætë godonguënë apa.

Ante nämäneque tededingue onquiyängä ingante nanguï piinte änänitapa.

⁶ Itota wæætë,

—Quimæ püwëminii. İngä onquiyängä iñömö botö imote waa pöni cæcä apa quëwëminii. Ee aquënë quëwëminii. ⁷ Edæ ömæpodäni mîni änänäni mînitö weca cöwë quëwënanäni adingue mînitö æyedëmë tömënanäni beyæ waa cæinëminii inte edæ do waa cæbaiminipa. Botö guiquënë mînitö weca wii wantæpiyæ ongoncæboimpa. ⁸ Adingue mänimæ ogui wapæ botonga gadongadingue tömengä edæ botö baö daga wenguingue eyepæ iñonte öni paa-cantapa. İninqe tömengä nänö cæganca ante do cæcä apa änewëminii. ⁹ Mînitö iminite näwangä ante apænebopa. Tömämæ æyömömë wadäni nani ëñente toquingue botö imotedö ante apænedäni ëñënanii mäningä onquiyängä nänö cædinö ante adobai tededäni ëñente pönencædanimpa, ante Itota apænegacäimpa.

Itota ingante odömonte godoncæte ante Codaa cæcampa

(Mäateo 26.14-16; Odoca 22.3-6)

¹⁰ Ayæ mäniñedë nani, Dote, äincabo iñönäni adocanque Codaa Icadote nani änongä iñömö, Itota æyömönö on-gongää, ante odömonte pædæ pönömo æncæminimpa, ante cædinque, Wængongui qui, ante në godönäni ñænænäni weca wadæ gocantapa. ¹¹ Godinque tömengä, İimai cæcæboimpa, ante apænecä ëñëninque awënëidi nanguï todinque Ao äninque, Cæbi ate tiguitamö pönömöni æncæbiimpa, änäni. Eñëninque Codaa Ao äninque, Æbänö cæte godö odömömo ænguïnänii, ante cöwä adingue ancaa cægacäimpa.

Awënë Itota päö tönö owæta pönongä cænte bedänipa

(Mäateo 26.17-29; Odoca 22.7-23; Wäö 13.21-30; 1 Coodintoidi 11.23-26)

¹² Oodeoidi päö yedæ æmpoqui ömæmö i nani cænguionæ tæcæ ba ate tömënanäni, Wodo pænta gogaionæ bai Patowa mönö cænguionæ impa, ante pönente cædinque, Wængongui qui impa, ante codotedo

mäniönæ edæ cöwë wænönönänimpa. İninqe mäniönæ iinque ba adingue tömengä nänö në ëmiñænäni Itota ingante äninque,

—Ædönö ämi gote mönitö Patowa ææmæ ante cæmöni ate bitö bete cænguimii.

¹³ Änäni ëñëninque Itota tömengä nänö në ëmiñænäna mënaa inate da godöninque,

—Mänii nanguï nani quëwëñömö gote taadö goyöminate onguinängä incæ cad-abodë æpæ iyænte næænte pö bee tengä adingue minatö tömengä miñæ tee empote goeda. ¹⁴ Tömengä æcönëni guicä adingue mäni oncö në ëacä ingante äninque minatö, “Mönö Awënë në Odömongä inte İimai angampa. Bitö oncönë guicönë æcönëni ante, Bitö oncö, ante ämi guidinque botö në ëmiñænäni tönö botö Patowa ææmæ bete cænguimönii, angampa.” ¹⁵ Ante äñöminate tömengä æmongapaa mæi odömöninque ñænæncö awæmpa nänö do cönöincö odömongä adingue minatö mänincönë mönö beyæ tömää eyepæ cæcæminaimpa.

¹⁶ Angä ëñente tao godinque nani quëwëñömö ponte ayöna, Itota nänö änö bai tömää do cæte ongompä, ante adingue tömëna Patowa ææmæ ante cædatapa.

¹⁷ Gäwadecæ bayonte dote inäni nani cabo Itota miñæ godongämæ pönänitapa.

¹⁸ Ponte tæ contate cæncöñönänite Itota,

—Nawangä ante apænebo ëñënedäni. Mîni cabo incæ adocanque botö tönö ñöwo godongämæ cæncongä incæ, Æncædanimpa, ante botö imote odömonte pædæ godonguingä ingampa.

¹⁹ Ante apænecä ëñëninque, Wæinente awædö, ante pönëninque tömengä ingante adocanque adocanque äninque tömänäni adoyömö,

—Botö imotedö ante dicæ apænebitawogaa.

²⁰ Äñönäni Itota wæætë,

—Önompö tipæmpoga go mëminäa iñöminii adocanque botö tönö guëa adotaca mi cæte cængä incæ tömengä në cæquingä ingampa.

²¹ Edæ dodäni Wængongui beyæ ante nani yewæmongai bai cædinque botö Waobo ëñagaimo inte cöwë wænte goquënëmo imodö angüënë. Incæte botö imote në odömonte godömongä guiquënë tömengä

nänö wæquinque cæquiringä ingampa. Mäningä wii ēñate bai waa toquēnengä incædongäimpa. ²² Ayæ tæcæ cæncōñönäni Itota päö bæi ongonte æninque Wængongui ingante waa ate apænedinque päö pä æninque tömēnāni inānite pædæ godö pædæ godö cæcantapa.

—Botö baö bai impa, ante pædæ pönömo æninque mīnitö Ao ante cæedāni.

²³ Äninque ayæ bequimæ owætaca bæi ongonte æninque Wængongui ingante waa ate apænedinque pædæ godöningue nēnempocä æninque tömānāni bedānitapa.

²⁴ Beyönāni tömēnāni inānite apænedinque,

—Botö wepæ iimæ bai impa. Wængongui do apænedinque, Botö pönö cæbo ate mīnitö Ao ämīni ininque mönö godongämæ waa cæte quēwengæimpa, angacäimpa. Nöwo adobai miine äninque apænebopa. Botö wepæ ante Ao ante æmīni inte mönö godongämæ waa cæte quēwengæimpa. Edæ nangui ināni beyæ gowequimæ impa.

²⁵ Botö iñömö Awēnē Odeye badinque ocæ emænte pöningue mīimæ botö beganca mānimæ yowepæ ñöwo æmæwo bebo tamēñedāni, ante Itota apænegacäimpa.

Pegodo incæ, Dicæ abogaa, apænequingä ingampa, ante

(Mäateo 26.30-35; Odoca 22.31-34; Wäö 13.36-38)

²⁶ Ayæ Wængongui ingante ämotamīni ante tao godinque Odibowænquidi godānitapa. ²⁷ Goyönānite Itota iimāi ante apænecantapa.

—Dodāni Wængongui beyæ yewæmōninque “Nē aadingä ingante tacabo dæ wængä ate cæningäidi obegaidi wæætē panguimæ goquimpa,” ante nāni yewæmonte angainö bai cædinque botö dæ ämo beyæ guingo imonte wædinque tömāmīni edæ nāwæ goquimīni imīnipa, ante awædö. ²⁸ Panguimæ gomīni incæte botö edæ ñāni ömæmonte Gadideabæ täno gote a ongōñömo mīnitö ayæ pöedāni.

²⁹ Angä ēñente wædinque Pegodo guiquēnē,

—Iñæmpa dæ ämi beyæ tömānāni guingo imonte badinque panguimæ godāni incæte edæ botö guiquēnē cōwē panguimæ godāmai incæboimpa.

³⁰ Äñongante,

—Bitö imite nāwangä ante apænebo ēñēe. Nöwoönæ woyowotæ incæ tawadiya mempoga pedāmai iñonte bitö iñömö botö imotedö ante wadö ante apænedinque, Dicæ abogaa, ante mempoga go adopoque anguimi imipa.

³¹ Angä ēñente wædinque Pegodo wæætē,

—Iñæmpa botö bitö tönö wæmo incæte māninö ante cōwē änāmai incæboimpa.

Ante nangui äñongä tömānāni adodö ante apænegadānimpa.

Guetämāni iñömö Itota Wængongui ingante apænecampa

(Mäateo 26.36-46; Odoca 22.39-46)

³² Mānii godinque yabæ incæ Guetämāni nāni äñömö pöningue tömengä miñæ nē godāni inānite Itota,

—Tæ contate ongōñömini botö godömenque gote Wængongui ingante apænete pömoedāni.

³³ Äninque Pegodo Tantiago Wäö mānimpodānique inānite ænte mäocä goyönāni Itota iñömö nangui wæwente badinque guñente wæcantapa. ³⁴ Ayæ tömēnāni inānite,

—Botö wæwēmāmo entawēninque pæmænte wæte wængui wædö. Mīnitö guiquēnē tæ contadinque ëamonca wänö cöedāni.

³⁵ Äninque wædæ pö gote ædæ wæænte guidömēmæ ñongæninque Wængongui ingante, Bitö Ao ämi botö caate wæquintedæ wii ba ate waa tobaïmopa. ³⁶ Äninque,

“Mæmpo, botö Wæmpo ēñēmi. Bitö tæi piñæmi inömi imipa. Bitö ti nā wænguimæ bai ö ænte bai cædinque botö imote edæ, Wænāmai incæbiimpa, ämi ininque botö edæ waa tobaïmopa. Incæte botö änönö bai wii cædinque wæætē tömēmi änönö bai cæe,” ämopa.

³⁷ Äninque tömēnāni weca adodö ponte ayongä mö ñönāni adinque tömengä Pegodo ingante,

—Timönö edæ mömitawo. Botö tönö wänö conguēnēmi incæ bitö adoque oda ganca incæ wii aacömii. ³⁸ Edæ, Mimöno waa cæinēmōnipa, ante ewocayömini baö aquiiñö ēñamīni inte wæntæye bamīnipa. Ininque edæ mīnitö wänö

cöninge nämä beyænque Wængongui ingante apænedinque edæ, Wii wænæ wænæ cæinëmöni bacæmönimpa, ante apæneedäni.

³⁹ Äninque Itota wæætë wadæ godinque wëenë nänö äninö bai apænedinque Wængongui ingante adodö ante apænecantapa.

⁴⁰ Ayæ adodö ponte ayongä möwo möinente ædo ædo cædinque mö ñönäni acantapa. Acampa, ante wædinque tömënäni, Æbänö anguimöö, äninque edæ pæ wëenedänitapa.

⁴¹ Itota wæætë mempoga go adopoque gote apænedinque ñöwo adodö pöninge edæ tömënäni inänite,

—Ayæ edæ guëmante mö ñöminii. Edæ idæwaa. Ñöwo iinque cætimpa. Botö Waobo ëñagaimo inte edæ botö wæwenguiönæ do edæ ba iinque nê wænæ wænæ cædäni nempo nê pædæ godömoncæ cædingä iñömö botö imote do odömonte godongäi ataquedäni. ⁴² Ñöwo edæ ængæ gantidique mönö gocæimpa. Botö imo nê odömonte godonguingä iñömö edæ obo pöni pongä tamëñedäni, angacäimpa.

Itota ingante bæi ongonte ænte godänipa
(Mäateo 26.47-56; Odoca 22.47-53; Wäö 18.2-11)

⁴³ Ayæ apæneyongä edæ Codaa wodi tömënäni nani, Dote, ante gocabo adocabo iinängä incæ ñöwo pongantapa. Do iñömö, Wængongui qui, ante nê godönäni ñænænäni tönö nê wææ odömönäni tönö nê aadäni nani Picæncabo tönö wadäni inänite, Codaa miñæ goedäni, ante da godönönänimpa. Ñöwo iñömö tömënäni nani nê da godönäni inte tæiyænäni yaëmë næænte canta næænte Codaa miñæ pönänitapa. ⁴⁴ Doyedë iñömö nê odömonte godoncæ cæcä Codaa iñömö tömengä miñæ poncæ cædäni inänite iimaï ante wëenëñedë apænedingä inongäimpa. “Botö odömonte queë bemömo adinque minitö wæætë, Tömengä ingampa, ante adinque tömengä ingante bæi ongonte æninque wææ cæte mäomini gocæcäimpa.” ⁴⁵ Ante do äningä inte Codaa iñömö ñöwo Itota weca pöninge,

—Awënë nê Odömömi imi.

Äninque edæ waa cæte bai edæ queë bemongantapa. ⁴⁶ Mänömaï queë bemonte

odömongä adinque tömengä miñæ pönäni incæ Itota ingante pædæ gopo bæi ongonte ænänitapa.

⁴⁷ Wængongui qui, ante nê godongä ñænængä pöni inongä ingante nê cæcä incæ mänñömö ponte a ongongä adinque Itota gäänë ongongä adocanque pædæ guipote yaëmë o togænte æninque mäningä nê cæcä ingante tæi päninque önömonca wangö tamoncacantapa. ⁴⁸ Adinque Itota iñömö ñöwo pönäni inänite,

—Minitö iñæmpa, Bitö nê ö ænimi imipa, ante bai cædinque botö imote canta tönö yaëmë næænte ö æncæte ante pömini awædö. ⁴⁹ Iñæmpa Wængongui oncö ñænæncönë yabæcönë iimö iñö iimö iñö apænecöninge botö minitö weca a ongöñömote minitö edæ bæi ongönämaï ee aminitapa töö. Incæte Wængongui angä ëñente nani yewæmongainö bai iinque baquinque ante cæcæimpa.

⁵⁰ Ante apæneyongante tömänäni edæ ëmö cæte wodii winönänitapa. ⁵¹ Adocanque edëningä guiquënë ömaacä inte yabæcooque ninocoo nani ancooque pönö winiyate Itota miñæ gocantapa. Tömengä ingante yao ongönänitapa. ⁵² Adinque tömengä wæætë gä tadongate weocoo ömaacä wodii winongacäimpa.

Nê Apænte nani Änoncabo weca Itota ongongampa
(Mäateo 26.57-68; Odoca 22.54-55, 63-71; Wäö 18.12-14, 19-24)

⁵³ Wængongui qui, ante nê godongä ñænængä pöni inongä weca ænte godinque Itota ingante gönönäni gongænte ongongantapa. Ayæ, Wængongui qui, ante nê godönäni ñænænäni tönö nê aadäni nani Picæncabo tönö nê wææ odömönäni tönö tömänäni pö bee bee bee tente godongämæ ongönänitapa. ⁵⁴ Pegodo guiquënë tömengä miñæ ayæ ayæ godinque, Wængongui qui, ante nê godongä ñænængä pöni inongä oncö yacömoyæ iñömö wäänë guicantapa. Mänñömö guidique tömengä wææ wänönäni tönö gongapamö tæ contate a ootocongantapa.

⁵⁵ Wængongui qui, ante nê godönäni ñænænäni tönö nê Apænte nani Änoncabo tömänäni, Mönö apænte ante wänömö

wæncæcäimpa, ante cædinque, Itota nänö wænguinque wënæ wënæ cæcä ingampa, ante æcänö nē adingä inte godö anguingä, ante ancaa diqui diqui miñönäni mänömainö ante nē angüenengä edæ dæ angantapa. ⁵⁶ Edæ nanguï inäni pöninque babæ apænedinque, Mänömaï cæcä atamönipa, ante apænedäni incæte adoyömö apænedämaï inäni inte wapiticæ wapiticæ änänitapa. ⁵⁷ Ayæ ate pancadäniya ængæ gantidinque, Tömengä ingante apænte angæimpa, ante cædinque babæ wapiticæ ante äninque,

⁵⁸—İngä iïmaï ante apænecä eñentamönipa. “İncö Wængonguï tæiyæ waëmö oncö waodäni önompoca näni mænönincö incæte botö cæbo wo tænguimæ wæænguimpa. Ayæ meönaa go adoönæque iñonte wacö wii önompoca mænonguincö wæætë mænoncæboimpa,” ante apænecä eñentamönipa töö, ante tededäni.

⁵⁹ Incæte adodeque ante apænedinque adoyömö äninque tömönäni godömenque äninque wadö wadö wapiticæ ante apænedänitapa.

⁶⁰ Eñente wædinque, Wængonguï qui, ante nē godongä ñænængä pönï inongä guiquenë godongämæ ongönäni tönö tæcæguedë dibæ ongonte ængæ gantidinque Itota ingante,

—İñæmpa pæ wëenebii. Bitö æbänö cæbitapa, ante iïnäni näni äninö ante bitö æbänö ämii.

⁶¹ Ante añongante edæ Itota cöwë änämaï pæ wëenecä. Adinque nē godongä ñænængä pönï inongä wæætë godö äninque,

—Wængonguï mönö Waëmö inongä Wengä mönö Codito inongä ingampa. Bitö iñæmpa mänimidö inömi iimitawo.

⁶² Añongante Itota iñömö,

—Ao. Mänimodö inömo imopa. İninque iincayæ ate botö Waobo eñagaïmo inte Wængonguï nē Tæï Piñængä ingä tömëmængä inö tæ contabo adinque minitö ayæ ate botö öönædë boguimancodë pömo acæminimpa.

⁶³ Ante apænecä eñente wædinque nē godongä ñænængä pönï inongä iñömö piinte badinque, Eñente awædö, ante

baï cædinque edæ nämä weocoo wänä ñæninque,

—Idæwaa, angantapa. Nöwo wacä ingante, Itota wënæ wënæ cæcä atabopa, ante nē äincædongä ingante godömenque diqui diqui minämaï ingæimpa. ⁶⁴ Tömengä nämä Wængonguï Wengä inte baï babæ godö tedewengampa töö. İninque edæ tömengä babæ nänö änewenö ante do eñëmini inte edæ æbänö ante pönëminii.

Ante añongante nē apænte änäni tömänäni edæ, Nänö pante wænguinque edæ änewengampa töö.

⁶⁵ Ante apænte änäni ate edæ pancadäniya Itota tömengäa towæ tänongadinque tömengä awinca weocoota pönö ñäne cæmöninque tæi tæi päninque tömengä ingante,

—Æcänö pänaa, ante Wængonguï beyænque apænebi eñëmönie.

Ante badete toyönäni wææ wänönäni guiquenë tömengä ingante bæi ongonte tæi tæi pangadänimpa.

Pegodo inçæ, Dicæ abogaa, angampa
(*Mäteo 26.69-75; Odoca 22.56-62; Wäo 18.15-18, 25-29*)

⁶⁶ Ayæ Pegodo guiquenë yæipodë yacömöñäa guï contate ongöñongä onquiyængä, Wængonguï qui, ante nē godongä ñænængä pönï inongä ingante nē cæcä iñömö adoyömö pö guicantapa.

⁶⁷ Ponte ayongä Pegodo gongapamö ootocæ cæcä adinque onquiyængä ædæmö cöwä adinque,

—Mäningä Näatadeta iñömö quëwënongä Itota tönö bitö guëa cægömitapa töö.

⁶⁸ Angä eñente wædinque,

—Dicæ. Bitö änö ante æbänö ämii, ante dicæ eñëmogaa.

Äninque tao yabædemö gäänë gongæñongä tawadiya wëenengä petapa. ⁶⁹ Ayæ wæætë Pegodo ingante adinque onquiyængä iñömö godongämæ ongönäni inänite,

—Mäningä adocabodäni iningä inte ongongä ataquedäni.

⁷⁰ Ante apæneyongä Pegodo wæætë, Dicæ bitö angänö imogaa, angantapa. Ayæ wantæ ate mänïñömö ongönäni adobai,

—İñæmpa Gadideabæ quëwënimi inte bitö näwangä Itota tönö tee empo në pömi imipa töö.

⁷¹ Änani ëñente wædinque Pegodo wæætë, Botö Wængongui ëñëñongä nöingä ämopa, ante Wængongui ëmöwo ante babæ tedewëninque tömënäni inänite wæætë,

—Mïni angantedö ingante dicæ abogaa. Dicæ abo ante bai änewëminipa töö.

⁷² Ante tæcæ änewëñongä iñontobæ tawadiya ayængä petapa. Ayængä pe ëñente wædinque Pegodo Itota nänö äninö ante pönengantapa. Itota do iñömö, “Tawadiya mempoga pedämaï iñonte bitö botö imotedö ante wadö ante apænedinque, Dicæ abogaa, ante edæ mempoga go adopoque anguïmi imipa,” änogäimpa. Ante pönente wædinque Pegodo, Nöwo nänö pequinque do pecampa, ante wædinque Ca ca wægacäimpa.

15

Itota incæ Pidato weca ongongampa

(Mäateo 27.1-2, 11-14; Odoca 23.1-5; Wäö 18.28-38)

¹ Wængongui qui, ante në godönäni ñænænäni tönö në aadäni nani Picæncabo tönö në wææ odömönäni tönö tömënäni iñömö në änäni inönäni inte oodeoidi nani në Apænte Änoncabo inönänimpa. İninqe mänii ñäö bayonte tömënäni, Æbänö cæquii, ante pönente wædinque godongämæ pönëë cöinque Ao äninque Itota ingante goto winte töö æmænte ænte godinque odömäno awënë Pidato wodi nempo mäo pædæ godönäni ængantapa. ² Pidato guiquënë tömengä ingante,

—Oodeoidi Awënë Odeyebi bitö imitawoo. Äñongante,

—Bitö tömëmi änö bai botö mänimodö imopa, ante Itota angantapa.

³ Wængongui qui, ante në godönäni ñænænäni guiquënë, İngä Itota iñömö wënæ wënæ cæcampa, ante wadö wadö ante piinque Pidato ingante ancaa änänitapa. ⁴ Änani ëñente wædinque Pidato wæætë Itota ingante,

—İñæmpa pæ wënebii. Bitö æpogadö wënæ wënæ cæbi imipa, ante nanguï änäni apa quëwëë.

⁵ Äñongante Itota tömënäni nani äninö ante cöwë apænedämaï ingä adinque awënë gobedönadodo wæætë, Quiëmë bai pæ wëenecä awädö, ante guïñente wægacäimpa.

Itota wæncæcäimpa, änänipa

(Mäateo 27.15-31; Odoca 23.13-25; Wäö 18.38-40, 19.1-16)

⁶ Mänimæ awënë gobedönadodo mäniiñedë wadepo iñö wadepo iñö cöwë iïmaï cædongäimpa. Oodeoidi ææmæ cæyönänite gobedönadodo iñömö, Në tee mönete ongönäni inänite adinque mïnitö æcänö ingante ämïni ñimpo cæbo goquingäa, ante änäni ëñëninque tömengä tömënäni nani äningä adocanque ingante ñimpo cæcä godongäimpa. ⁷ Doyedë wadäni ænguï badinque, Awënë ingante wido cæcæimpa, ante cædinque wænonte cæyönäni adocanque Badabato nani änogä tömënäni tönö godongämæ cædongä inongäimpa. İninqe awënëidi në wiwa cædäni inänite bæi ongonte goto winäni ongöñönäni Badabato adobaï tömënäni tönö godongämæ tee mömænete ongönongäimpa. ⁸ İninqe ñöwo iñömö wadäni tæiyænäni Pidato weca pöninque, Cöwë bitö cædö bai ñöwo adobaï mönitö beyæ cæquïmi ante wæmönipa.

⁹ Änäni ëñëninque Pidato iñömö,

—Oodeoidi Awënë Odeye ingante pönö ñimpo cæbo abæ tawængä ænguïmïni. Æbänö cæbo ænguïmïni.

¹⁰ Edæ do iñömö Itota gomonga cæcä ate wædinque, Wængongui qui, ante në godönäni ñænænäni incæ tömengä ingante piinte adönänimpa. Mäninö beyænque tömënäni Itota ingante bæi ongonte botö nempo ænte mämö pædæ pönönänimpa. Ante pönente wædinque Pidato, Oodeoidi Awënë Odeye ingante ñimpo cæbo goquingä, ämïnitawoo, ante ñöwo angantapa. ¹¹ İninqe, Wængongui qui, ante në godönäni ñænænäni guiquënë godongämæ ongönäni inänite apænedinque, Mïnitö Pidato ingante iïmaï äedäni, änänitapa. Änäni ëñëninque oodeoidi wæætë Pidato ingante, Wïi bitö änogänö ante ämönipa. Wæætë Badabato ingante ñimpo cæbi

gocæe, ante änäni. ¹² Eññenique Pidato godö äninque,

—İninque oodeoidi Awënë Odeye mini änogä ingante æbänö cæquimoo, ante äminii.

¹³ Äñongante tömënäni ogæ tededinque,

—Awæ ñænquedimæ ämi cæte wænönäni wængæe töö.

¹⁴ Änäni eññente wædinque Pidato,

—İñæmpa quinä wænæ wænæ cæcantawoo.

Äñongante godömenque yedæ äninque adodö,

—Ämi awäa timpote wænönäni wængæe töö.

¹⁵ Ancaa äneweññönäni Pidato iññömö, Mäninäni pïinämaï piyænë cæcädänimpa, ante cædinque Badabato näni äningä ingante godö ñimpo cædinque tömënäni nempo pædæ godongä ænänitapa. Wæætë edæ Itota ingante edæ Pidato wodi angä æmontai badöimenca tæi tæi pänäni ate ñænque quepote awäa näni gönonguinque edæ da godongä ænte godänitapa.

¹⁶ Pædæ godongä ate nê tontadoidi tömengä ingante töö æmænte wadæ godinque awënë gobedönadodo oncönë Podætodio näni ancönë mangui guiyongä tontadoidi bacabo Itota weca godongämæ äññete pönänitapa. ¹⁷ Pöninque tömënäni, Awënë imi inte awënë weocoo wëñacæbiimpa, ante bai cædinque badete todinque Itota ingante wæætë opatawæ ëmoncoo pönö da wëñadinque daa mongæmenca æninque que cædinque, Awënë poganta, ante bai pönö daga wencädänitapa. ¹⁸ Ayæ Yæ yæ äninque,

—Badogaa, bitö oodeo awënë odeyebi imipææ.

¹⁹ Ante badete todinque cæwipaca ancaa tæi tæi pancadinque tömengäa towæ towæ tänongadinque da guicapote ædæ wææninque, Bitö Tæiyæ Waëmö Awënë imi amönipa, ante bai badete todänitapa.

²⁰ Ayæ iinque badete todinque tömënäni opatawæ ëmoncoo gä tadongadinque tömengä nämä weocoo da wëñädänitapa. Ayæ edæ tömengä ingante awæ timpote gönoncæte ante töö æmænte ænte tao mäodäni gogacäimpa.

Itota ingante awäa timpodäni wængampa (Mäteo 27.32-44; Odoca 23.26-43; Wäö 19.17-27)

²¹ Mäniñedë Tidëne quëwënogä Timönö guiquënë Adecantodo tönö Odopo tömëna wæmpo inongä inte tömengä yabæque gote pönongäimpa. İninque Itota ingante ænte godinque ayönäni mäningä Timönö ñöwo wodo tebæ gocæ cædinque pongä adänitapa. İninque tontadoidi, Bitö ægodöe. Itota ingante möni timpoquiwæ ænte mongænte goe, änäni ænte mongænte gocantapa.

²² Mänömaï godinque Godogota näni äññömö mönö tededö “Ocatainö” iññömö Itota ingante ænte pönänitapa. ²³ Mäniññömö pönäni ate wadäni, Nantate beyæ becæcäimpa, ante cædinque biinömæ näni wædænque ti nämæ tönö miidapæ näni äññömæ adoyömö wempo cædëninque pædæ pönö cæyönäni tömengä önonque yædæ bedinque edæ bedämaï ingantapa. ²⁴ Ayæ tömengä ingante awæ ñænquedimæ näni ænte pöniwäa töö godöninque pönö timpodinque wææ tiwadinque ængæ gantidënanitapa. Ængæ gantidënanäni ate wægöñongä tömënäni wæætë tömengä weocoo ini ante, Æcänö quince nö ta adinque tömengä mänincoo æncæcäimpa, ante wææntodöninque adocooque adocooque ænänitapa.

²⁵ Edæ nænque tömantadæ æññonte mäniñedë incæ tömengä ingante iinque timpote edæ ængæ gantidënanäni wægongacäimpa.

²⁶ Ayæ, Itota wæncæcäimpa, ante quinänte apænte änänii, ante tömänäni ponte adinque eññencädänimpa, ante yewæmöninque, “Oodeoidi Awënë Odeye inongä ingampa,” ante yewæmöninque awæmpaa wo cädänitapa. ²⁷ Ayæ wada nê ö ænte quëwëñina inate adoyedë tömengä tönö adocanque tömëmæ inö adocanque dipæmæ inö godö timpote gantidëdäni wægongadäimpa. ²⁸ İninque, Nê eññänämaï cädäni näni cabo tönö tömengä adocä ingampa, ante Wængongui angä eññente näni yewæmongainö bai ñöwo iinque bagatimpa.

²⁹ Ayæ wodo pænta nê godäni guiquënë Itota ingante godö babæ ante badetë todinque pica pica cædinque,

—Bitö iñæmpa Wængongui tæiyæ waëmö oncö incæ bæ tate wo ëwëninque mëönaa go adoönæque iñonte do mænonguimi inte edæ, ³⁰ o togæmpote o togæwate ti wæænninge edæ quëwëmäwe.

³¹ Ayæ, Wængongui qui, ante nê godönäni ñænænäni tönö nê wææ odömönäni adobai nani cabo nämäneque godongämæ badete todinque,

—Tömengä, Wadäni quëwencädänimpa, ante waa cæcantawoo. Ñöwo iñæmpa. Nämä beyænque eyepæ cæcampa diyæ quëwenguingä. ³² Idægoidi awënë odeye ingä ininque tömengä ti wæænte gocä adinque mönitö wæætë, Tömengä näwä Codito ingampa, ante pönëmaï wädö.

Ante badete toyönäni nê ö æna tömengä tönö godongämæ timpote wægöna incæ adobai Itota ingante piinique wënæ wënæ ante badete togadaimpa.

Itota wængampa

(*Mäateo 27.45-56; Odoca 23.44-49; Wäo 19.28-30*)

³³ Tæcæbæcä pönï bayö tömämæ iñontobæ wëmö badinque ayæ ayaönäa wæiganca mäë mämonte bai inimpa.

³⁴ Ininque ayaönäa wæiyonte Itota nanguï pönï yedæ äninque, “Edoi, Edoi, nêma tabatäni,” äninque mönö tededö, “Botö Wængonguiñaa, botö Wængonguiñaa, ædö cæte botö imote ëmö cæte gobyaa.”

³⁵ Ante wæcä ëñëninque godämæ ongönäni guiquënë,

—Æ. Ediya wodi ingante aa pecä apa.

³⁶ Äñönäni adocanque do pogodo gote önætämö ænte pöninque biinömæ bai önömænque æninque aa bedonte næænninge edæ, Becæcäimpa, ante cædinque cæwipaca pædæ æænongantapa.

—Ee aquënë quëwëedäni. Ediya wabänö ponte o togænte pædæ wæænongä abaimpa.

³⁷ Angä ate Itota iñömö wæætë ogæ äninque edæ æmäwo guëmäninque wængacäimpa. ³⁸ Ininque edæ Wængongui tæiyæ waëmoncönë weocoo odemö nani wææ wodöincoo adoyedë önönæca inö tæcæguedë pönï tænguimæ wææntapa. ³⁹ Mänömaï ogæ äninque do wængä adinque tontadoidi awënë capitäo guiquënë,

—Näwangä impa. Ìingä iñömö Wængongui Wengä ingainö ante pönenguënë, angacäimpa.

⁴⁰ Ayæ onquiyænäni Mäadiya Mäagadadënë nani änongå, Otite tönö Tantiagomö badä Mäadiya, Tadömee, mänimpodäni adobai oo gote gomö a ongönänitapa. ⁴¹ Tömënanäni iñömö Gadideabæ quëwengäñedë Itota miñæ gote pönö waa cædinäni inte ñöwo pö gobæ ongöninque pömö adänitapa. Itota Eedotadëe pö æñongante wadäni onquiyænäninque godongämæ tee empote pöninäni inte ñöwo pöninque a ongönänitapa.

Itota wodi baö ini mäo daga wënänipa

(*Mäateo 27.57-61; Odoca 23.50-56; Wäo 19.38-42*)

⁴² Oodeoidi nani, Gäwadecæ ba ate guëmanguïönæ inguimpa, ante nani täno cæönæ ingatimpa. Ininque gäwadecæ oo ba ate wædinque, ⁴³ Adimatea iñömö quëwëningä inte Ootee, Wængongui Awënë Odeye nempo mönö æyedëno quëwengäimpa, ante wänö conte bai quëwënongåimpa. Tömengä oodeoidi nani Apænte Äincabo adocä inongä inte ñænængä inongäimpa. Tömengä iñömö Pidato weca ñöwo guiñënämaï pö guidinque, Itota wodi baö pönömi ænte wëmoe, angantapa. ⁴⁴ Angä ëñëninque Pidato, Wa. Wabänö wængäi, ante pönente wædinque awënë capitäo ingante äñete pongä adinque, Do wængäi. ⁴⁵ Äñongante edæ, Dobæ wængäimpa, ante apæncä ëñëninque Pidato wæætë Ootee ingante, Itota wodi baö ini o togænte æmäwe. ⁴⁶ Angä ëñëninque Ootee iñömö edæ waëmö weocoo nino nani änoncoo godonte æninque Itota wodi baö ini wi æmpote wææ wi æwadinque pædæ wæænonte ænte gocantapa. Ayæ mänincoo wini wini caate dicamontaa wointatodë guidö ñö cæte daga wëninque dicabo edæ da pæñæ pönö tee mönogacäimpa. ⁴⁷ Mänömaï cæyongante Mäadiya Mäagadadënë nani änongå tönö Otite badä Mäadiya mänimpodaque tömengä ingante nani da wëniñömö adatapa.

16

Itota do wæningä inte ñäni ömæmonte quëwengampa

(Mäateo 28.1-10; Odoca 24.1-12; Wäo 20.1-10)

¹ Tömënäni guëmanguïönæ iinque go ate Mäadiya Mäagadadënë nāni ānongä tönö Tantiago badä Mäadiya tönö Tadömee tömënäni iñömö, Itota wodi baö öni pæcæimpa, ante cædinque ogui waqui godonte ænānitapa. ² Ænte ate wacä tēmāna baquinque ñäö tæcæ bayonte iināni do godinque nænque tæcæ mæ awæ nānö tamöñedë Itota wodido pöningue, ³ nāmāneque ānānitapa.

—Dicabo nāni moncadodince æcänö tæi piñængä inte pönö da tæñæna ate mönö guiite aqui. ⁴ Ante wædinque go gongænte pömo ayönäni dicabo ñænængade pöni nāni ānince incæ dobæ dicabo ñænængade pöni do da tæñæi a öñö adānitapa. ⁵ Adinque tömengä wodido wäänë guiite ayönäni edëningä bai ingä doyæncoo nāmænta ëmoncoo wëñate tömëmæ inö tæ contate a ongongä adinque onquiyænāni wæætë edæ ancai guiñente wædānitapa. ⁶ Edëningä iñömö,

—Guiñente wædāmai iedāni. Minitö, Itota Nāatadeta quëwëningä ingante edæ wadāni awæ timpodāni ate nē wæningä ingante edæ diqui diqui mīmīni awædö. Tömengä edæ dobæ ñāni ömæmonte tao gocäimpa. Iñömö edæ dæ angampa. Iintodë nānö öñontatodë iñömö edæ önontatoque iī ataqueedāni. ⁷ Ayæ Pegodo tönö tömengä nānö nē ëmiñænīnāni tömānāni inānite gode ante apænedinque mīnitö nē adīmīni inte iīmāinö ante apæncæmīnimpā. “Itota iñömö tāno Gadideabæ godinque a ongöñongante mīnitö adoyömö godinque tömengä nānö ānīnö bai godinque tömengä ingante acæmīnimpā,” ante gote apænedāni.

⁸ Ante apæncä ëñëninque, Æbānö ante mānōmai angāā, ante ancai guiñente do do wäate wædinque onquiyænāni iñömö Itota wodido abæ tawæ tao wodii winönānitapa. Guiñente wædönāni inte tömënäni wadāni inānite bee tēninque apænedāmai pæ wënegadānimpā.

Itota ingante Mäadiya Mäagadadënë acampa

(Wäo 20.11-18)

⁹ Itota tömënäni nāni guëmāniönæ go ate iimö baänæque do ñāni ömæmonte pö a ongöñongante Mäadiya Mäagadadënë tānocä agacäimpa. Iingä onquiyængä iñömö wëñëñedë wënæidi tiæte ganca ināni ënempoyongante Itota wido cædongäimpa.

¹⁰ Nöwo iñömö Itota miñæ nāni quëwëncabo ayæ ca wæwëñönānite Mäadiya Mäagadadënë incæ tömënäni inānite māo apæncantapa.

¹¹ Itota ayæ mīingä ingä atabopa, ante apæncä ëñëninque tömënäni wīi pönënānique ongongadānimpā.

Wada tömengä nānö nē ëmiñænīna Itota ingante adapa

(Odoca 24.13-35)

¹² Mānōmai wīi pönënāni ate tömënäni nāni Itota miñæ godincabo incæ mēnaa idömæ gote ayöna Itota incæ wacä bai bate cægongä adatapa. ¹³ Ate wædinque tömēna wadæ godinque Itota miñæ nāni godincabo wadāni inānite apænedinque, Mānōmai cægongä atamōnāni, āna ëñëninque edæ cōwë pönënāmai ingadānimpā.

Tömengä nānö da godönīnāni inānite Itota angampa

(Mäateo 28.16-20; Odoca 24.36-49; Wäo 20.19-23)

¹⁴ Ayæ ate onte ganca ināni nāni Itota miñæ godincabo cænte tedete a cōñönāni Itota pö a ongongä adānitapa. Tömengä iñömö, Minitö pönëgade impā. Wadāni, Itota do edæ ñāni ömæmonte cægongä atamōnīpa, ante apænedāni ëñëninque mīnitö mīmö ömædēmīni inte wīi pönēmīni, ante Itota piingacäimpa.

¹⁵ Ayæ tömënäni inānite, “Wængongui nānö badongaināni inguipoga tömāo quëwëñāni iñönānite mīnitö botö imotedö ante māo tömānāni inānite watapæ apænēmīni ëñencädānimpā. ¹⁶ Edæ æcänö wede pönëninque æpænë guida tömengä botö godö æmo beyænque quëwëncæcäimpa. Wæætë nē pönënāmai ingä guiquënë tömengä nānö apænte pante wæquinque pönënāmai ingampa.

¹⁷ Botö cæbo ate nē pönënāni adobai

edæ iīmaī mā cædāni adinque wadāni do ēñencædānimpa. Botō emōwo apænedinque tōmēnāni wēnæidi inānite wido cæcædānimpa. Ayæ wadāni tōmēnāni tededō mā tedecædānimpa. ¹⁸ Ayæ tæntæ bæi ongōnāni incæte wænguīmæ bedāni incæte wēnæ wēnæ badāmaī incædānimpa. Ayæ caate wædāni inānite gampodāni ate do waa bacædānimpa,” ante Itota apænegacāimpa.

*Itota incæ öönædē æicampa
(Odoca 24.50-53)*

¹⁹ Iīnque tōmēnāni inānite apænecā ēñēnāni ate edæ Wængonguī öönædē ængō cæcā æidinque Wængonguī tōmengā nānō tōmēmæ inō mōnō Awēnē Itota iñōmō tæ contagacāimpa. ²⁰ Iīnque tōmengā nānō emiñænīnāni wæætē edæ tōmāmæ wadæ godinque wabæca māo wabæca māo apænedāni ēñēnānitapa. Mōnō Awēnē incæ cæcā ate tōmēnāni mā cædāni adinque nē ēñēnāni wæætē, Nō impa, ante wægadānimpa. Mānīnque ante yewæmonte impa.

Itota Codito ingantedö ante Odoca nänö watapæ ante yewæmongainta

Odoca imo yewæmömopa, ante

¹ Nñowodäni nanguï inäni incæ, Mönitö weca æbänö iinque cægatimpa, ante do yewæmoncæ cædänipa. ² Doyedë quëwënäni iñömö, Æbänö cægatimpa, ante në againäni inte mäninö ante, Nawangä impa, ante në apænedäni badinque adode beyæ ante në cædäni bagadänimpa. Tömënanäni mönitö imönite adodö ante pönö apænedäni ëñentamönipa. Iinque iinäni apænedäni möni ëñenö bai nñowodäni wæætë edæ adobai pönäni ante yewæmoncæ cædäni iinque botö iñömö edæ, Adobainö ante yewæmoncæboimpa, antabopa. ³ Teopido bitö nænæmi pönäni inömi inte ëñëmi. Botö iñömö, Wëenëñedë æbänö mä pönäni cægatimpa, ante ayæ, Nñowo ganca æbänö cæte i, ante ëñencæte ante nanguï cædinque ædæmö ëñënimö inte botö edæ, Bitö Teopidobi acæbiimpa, ante adodö adodö ante yewæmömopa. ⁴ Wadäni odömönte apænedäni ëñëninque bitö wæætë, Nö intawo, ante ëñencæte ante cædinque botö yewæmöninta adinque edæ do ëñencæbiimpa. Mänömainö ante yewæmömö ae.

Wäö ëñaqingä, ante anquedo ponte apænecampa

⁵ Wængonguï qui, ante në godönäni pancadäniya Abiyaidi nani cabo iñönänite adocanque Tacadiya ëmongacäimpa. Tömengä iñömö Oodeabæ awënë odeye Edode wodi nänö ingaiñedë, Wængonguï qui, ante në godongä ingacäimpa. Tömengä nänöogængä Aadöo wodi pæingä Editabeti ingacäimpa. ⁶ Tömëna iñömö nana gæncaya inöna inte Wængonguï ayongante nö cæte quëwëninque Wængonguï, Iimäi cæedäni, ante nänö wææ angainö ante ëñente quëwëñonate wadäni, Eñënamäi quëwënapa, ante ædö cæte anguinänii. ⁷ Editabeti owæntacä inte

wëñæ mänämaï quëwëñongante wëñæ dæ ä wædinque nana gæncaya picæna badinque quëwengadaimpa.

⁸ Dæ ä wædinque quëwëñonate Tacadiya wodi tönö godongämæ nani godoncabo nani godöñedë ba iinque tömengä iñömö, Wængonguï qui, ante godongantapa. ⁹ Godöñongante tömënanäni, Æcänö nñowo guiddinque oguï waquï tanguingä, ante acæte ante cædänitapa. Tömënanäni cöwë nani cæi bai cædinque tömënanäni ëmowo wataa wataa yewæmöninque adoyömö da wëninque adotaque tadonte adänitapa. Ayönäni, Tacadiya ëmowo impa, ante adinque änäni ëñëninque tömengä Awënë Wængonguï tæiyæ waëmö oncönë guiddinque oguï waquï tangantapa. ¹⁰ Waodäni tömänäni, Nñowo oguï waquï iya tangæimpa, ante yabæcönë godongämæ pöninque Wængonguï ingante apænecadänimpa. ¹¹ Tacadiya iñömö tæcæ tancæ cæyongä Wængonguï nänö da pönöningä anquedo tömënanäni nani iya täimpaa gäänë tömëmæ inö pö næ gongæante a ongongä acantapa. ¹² Adinque Tacadiya, Æbänö cæquïi, ante ancai guïñente wæcantapa. ¹³ Wæyongante anquedo guiquënë,

—Tacadiya, guïñënamäi ie. Bitö Wængonguï ingante apænëbi ëñëninque tömengä bitö änö ante do cæcampa. Bitö nänöogængä Editabeti iñömö onguïñængä ingante mancæcäimpa cæbii. Mangä ëñacä adinque bitö tömengä ëmowo, Wäö, pemoncæbiimpa. ¹⁴ Wëñængä waa pönäni ëñacä adinque bitö watapæ tocæbiimpa. Wadäni nanguï inäni adobai wëñængä ëñacä ate tocædänimpa. ¹⁵ Wængonguï incæ, Botö ayömo bitö wengä wadäni bai guiyä inämaï nænængä pönäni ingä abopa, angä beyæ waodäni adobai tömengä beyæ ante adinque tocædänimpa. Yowepæ biinömæ incæ wapæ incæ tömengä ti namæ tömämæ bedämaï incæcäimpa. Wäänä cæncadë ayæ ongöñongante Wængonguï Tæiyæ Waëmö Önowoca incæ tömengäa pö guicæcäimpa. ¹⁶ Ayæ bitö wengä picængä badinque mäo apænecä ëñëninque idægoidi nanguï inäni Wængonguï gämænö poncædänimpa. ¹⁷ Ayæ Wængonguï Önowoca ingante Ediya

wodi nānō ēwocagāi bai adobāi ēwocadinque bitō wengā iñōmō adocā nānō tæi piñængāi bai adobāi tæi piñængā incæcāimpa. Inique tōmengā iñōmō mōnō Awēnē nānō ponguīnō ante tāno beyænte bai cædinque odōmongā ate mæmpoidi wēñænāni inānite pōnente waadete cæcædānimpa. Ayæ tōmengā apænecā ēñēninque nē ēñēnāmaī cædāni incæ nō cæte quēwēnāni nāni ēñēnō bai nō ēñente cæcædānimpa. Mānōmaī cædinque bitō wengā adocā apænecā ēñente cædinque waodāni mōnō Awēnē nānō ponguīnō ante eyepæ pōni cædinque tōmengā ingante ante wānō concædānimpa. Mānōmainō ante anquedo Tacadiya ingante apænegacāimpa.

¹⁸ Angā ēñēninque Tacadiya wæætē anquedo ingante apænedinque,

—Iñæmpa botō nānōogænā picænā inampa. Botō adobāi picæmo imopa. Ædō cæte, Nō impa, ante ēñenguīmo.

¹⁹ Āñongā anquedo wæætē,

—Botō Gabodiedo ingaīmo imo apa ānewēē. Wængonguī weca nē ongōmo iñōmote tōmengā iñōmō, Botō watapæ apænedō ante bitō Tacadiya ingante apænete pōe, ante da pōnongā pontabopa. ²⁰ Nōwo iñōmō botō ānō pōnēnāmaī imi inte bitō babetadebi badinque tededāmaī iñōmite botō apænedō ante iinque cæbo ba ate tedecæbiimpa, ante anquedo Tacadiya ingante apænecantapa.

²¹ Mānōmaī tedeyōna wadāni, Tacadiya taquingā, ante wānō cōninque, Wængonguī tæiyæ waēmō oncōnē guiidinke æiuedō taquingāā, ante wægadānimpa. ²² Tōmengā tadinque tededāmaī ingantapa. Ayæ godōmenque tededāmaī inte ōnompoque oo cæpo oo cæpo cæcā adinque tōmēnāni, Wængonguī tæiyæ waēmō oncōnē guiite ongōninque Tacadiya wīimonte bai mā pōni adingā inte nōwo edæ babetadecā inte tacampa, ante wædānitapa.

²³ Wængonguī beyæ ante cæe, ante nāni iinque āniōnæ ganca cædinque Tacadiya wodi oncōnē gocantapa. ²⁴ Māniñedē ate tōmengā nānōogængā Editabeti yædēmadā badinque edæ ōnompo æmæmpoque apāicā ganca oncōnē wē womongantapa. ²⁵ Tōmengā iñōmō edæ, “Wēēnēñedē,

Owæntabi imipa, ante piñāni wæbo adinque Wængonguī botō imote waadete pōnō cædinque nōwo wæætē, Piñāmaī incædānimpa, ante cæcampa,” ante pōnēninque Editabeti togacāimpa.

Itota ēñaquingā, ante

²⁶ Editabeti ōnompo æmæmpoque go adoque apāicā yædēmadā nānō iñedē Wængonguī tōmengā anquedo Gabodiedo nāni ānongā ingante da pōnongā pōninque Gadideabæ Nāatadeta nāni quēwēñōmō gocantapa. ²⁷ Godinque tōmengā baquēcā Māadiya nāni ānongā weca pongantapa. Tōmengā ingante Awēnē Dabii wodi pæingā Ootee, Monguīmo, ante do āningā inongāimpa. ²⁸ Inique anquedo Gabodiedo Māadiya weca pō guiidinke tōmengā ingante,

—Wængonguī nānō nē waadebi inte ēñēe. Wængonguī bitō imite waa cæcæcāimpa. Wadāni onquiyænāni inānite Wængonguī pōnōmenque pōnō waa cædongā inte bitō imite edæ godōmenque waa pōni pōnō cæcā acæimpa. ²⁹ Ante tæcæ apæneyongā tōmengā ancaī guiñēninque, Quīnō bai i ante botō imote apænecāā, ante wæcantapa. ³⁰ Wæyongante anquedo wæætē,

—Māadiya, bitō guiñēnāmaī iē. Wængonguī incæ edæ bitō imite nanguī waadete pōnō acampa. ³¹ Bitō nōwo edæ yædēmadā badinque bitō wēñængā onguiñængā mancæbiimpa. Tōmengā ēñacā ate bitō tōmengā emōwo, Itota ingampa, ante pemoncæbiimpa. ³² Tōmengā iñōmō edæ nanguī tæi piñænte cæcā incæcāimpa. Inique tōmengā ingantedō ante, Æibæ pōni nē Quēwengā Wengā ingaingā ingampa, ante apænecāimpa. Ayæ Awēnē Wængonguī incæ tōmengā ingante apænedinque, Bitō Awēnē bayōmi mæmæ awēnē odeye Dabii wodi nempo dodāni nāni quēwengāi bai bitō nempo adobāi quēwencædānimpa, ante adocā Itota ingante pōnongā ænte Awēnē Odeye bacæcāimpa. ³³ Inique Aacoboidi tōmengā nempo quēwēñōnānite tōmengā cōwē tōmēnāni Awēnē Odeye incæcāimpa. Tōmengā nānō Awēnē Odeye inguīmāmo iñōmō edæ dæ badāmaī ingæimpa, ante

Wængonguī nānō da pōnōningā Māadiya ingante angantapa.

³⁴ Māadiya wæætē tōmengā ingante,

—Botō iñæmpa onguīñængā tōnō mōnāmaī inte wēñæ ædō cæte manguimoo.

³⁵ Ante wæyongante anquedo wæætē edæ,

—Wængonguī Tæiyæ Waēmō Ōnōwoca incæ bitō weca poncæcāimpa. Wængonguī Æibæ Quēwēnongā tōmengā nānō tæi piñænō incæ wææ owo baī cæcæcāimpa. Mānōmaī beyæ bitō Wēñængā Onguiñængā incæ Tæiyæ Waēmō ēñacā ate, Wængonguī Wēñængā ingampa, ante pemoncædānimpā.

³⁶ Ayæ godōmenque apænebo ēñēe. Editabeti bitō guidengā iñōmō picængade pōni iñongante, Owæntacā ingampa, ante tededānitawo. Incæte tōmengā picængadecā incæ dobæ edæ ōnompō æmæmpo que go adoque apāicā yædēmadā inte tōmengā wēñængā edæ onguīñængā ingante ēnengampa. ³⁷ Iñæmpa quiēmē ante Wængonguī nānō ānōnō ante tōmāā edæ cōwē cæcæimpa.

³⁸ Ante anquedo angā ēñente wædinque Māadiya,

—Mōnō Awēnē beyænque nē cæbo imopa. Bitō ānō baī Ao āmo bacæimpa.

Ante apænecā ēñēninque Wængonguī nānō da pōnōningā incæ ēmō cæte wadæ gogacāimpa.

Editabeti weca Māadiya ēñacæ gocampa

³⁹ Māniñedē ate Māadiya wodi wadæ godinque ānāmænē quingæ æidinque Oodeabæ quēwēnāni nāni quēwēñōmō adoyōmonque incæ pōninque, ⁴⁰ Tacadiya oncōnē pō guidinque Editabeti ingante, Waa quēwēmi, angantapa. ⁴¹ Māadiya mānōmaī apænecā ēñēninque Editabeti wodi wengā cæncadē ongōninque wogæi wogæi tocantapa. Editabeti iñōmō Wængonguī Tæiyæ Waēmō Ōnōwoca incæ tōmengā pō guicā ininque ædæmō pōni ēwocacā bacantapa. ⁴² Mānōmaī badinque adocā ogæ tededinque,

—Mōnō onquiyæncabo iñōmonte bitō adobique bitō waa toquinque impa, angantapa. Wængonguī wamōni imōnite pōnōmenque waadedinque bitō imīnite godōmenque nanguī waadecampa. Bitō

nē ēnēnongā ingante Wængonguī nanguī waadecā beyæ tōmengā adobaī tocæcāimpa. ⁴³ Botō ōnōmoque iñōmote bitō iñōmō mōnō Awēnē badā inōmi inte edæ botō weca quīnante pōmii. ⁴⁴ Tæcæ edæ apænebi ōnōmonca ēñēñōmo botō cæncadē nē ongōnongā incæ wogæi wogæi watapæ tocā ae. ⁴⁵ Mōnō Awēnē bitō imite nānō ānīnō ante bitō iñōmō, Tōmengā cōwē cæcæcāimpa, ante pōnēninque bitō toquinque edæ nē pōnēmi imitapa.

⁴⁶ Editabeti mānōmaī apæneyongā Māadiya wæætē āmotamīni ante baī iīmaī angacāimpa.

“Botō mīmōno pōnēninque, Mōnō Awēnē iñōmō edæ waa pōni mōnō inongā ingampa, ante watapæ apænebopa.

⁴⁷ Ayæ, Quēwencæbiimpā, ante botō imote nē Ængā iñongante botō Wængonguī ingante ante pōnēninque edæ watapæ tote ēwocabopa.

⁴⁸ Botō tōmengā ingante nē cædōmo inte ōnōmoque pōni iñōmote tōmengā wæætē botō imote waa acampa.

Iīncayæ nānōmōidi wææ iīncayæ nānōmōidi wææ ināni tōmānāni botō imotedō ante apænedinque,

Tōmēnā iñōmō Wængonguī nānō nē waadedā ingadāimpā, ante apænecædānimpā.

⁴⁹ Wængonguī nē Tæi Piñænongā inte botō imote pōnō nanguī cæcā beyænque edæ apænecædānimpā.

Tōmengā ēmōwo iñōmō edæ Tæiyæ Waēmō ēmongampa.

⁵⁰ Ayæ iīncayæ nānōmōidi wææ iīncayæ nānōmōidi wææ ināni tōmengā ingante guīñente cæyōnānite tōmengā wæætē waadete pōnō waa cæcæcāimpa.

⁵¹ Tōmengā nē tæi piñænongā inte tōmengā ōnompoca cæte baī nanguī cæcantapa. Ayæ wadāni, Tōmēmoque waēmō imopa, ante ōnōwēninque pōnēnāni inānite tōmengā angā nāwæ godānitapa.

⁵² Ayæ awēnēidi nāni tæ containpaa ongōñōnānite tōmengā tōmēnāni inānite wido cæcā godānitapa.

Wæætē ōnōnānique inānite ængō cæcā contadinque tōmēnāni wæætē awēnēidi baī badānitapa.

53 Ayæ gue ænente wædāni iñōnānite tōmengā waa pōni cænguī godongā æninqe tōmēnāni tōmo pōni cænānitapa.

Wæætē nangui ēadāni tōmēnāni inānite da godongā godinque omæpodāni inte godānitapa.

54 Mōnō idægocabo iñōmō tōmengā ingante nē cæmō iñōmonte tōmengā mōnō tōnō godongāmæ cæcantapa.

Ayæ, Waadete botō pōnō waa cægainō bai adodō cæcæboimpa, ante pōnēninqe tōmengā ñowo pōnō waadete waa cæcā æmompā.

55 Abadāō wodi pæimō iñōmonte tōmengā mōnō mæmæidi inānite nānō angainō bai cædinque,

cōwē ñimpo cædāmaī inte pōnō waadete cæcampa.”

56 Ante Māadiya wodi ämotamīni ante bai angantapa. Ayæ Editabeti weca mēa go adoque apāicā quēwente ate ayæ ate tōmengā oncōnē gogacāimpa.

Wäō eñacampa

57 Editabeti wodi guiquēnē oo pōni ēnēninqe tōmengā wēñængā onguiñængā mangacāimpa. 58 Ayæ tōmengā guidēnāni tōnō godongāmæ quēwēnāni iñōmō, Æ mōnō Awēnē wīi piingā inte Editabeti ingante ædæmō waadete waa cæcampa, ante tæcæ eñēmōnipa, āninqe Editabeti tōnō godongāmæ togadānimpa. 59 Ayæ adoque Wængongui itædē go ate wēñængā ingante æmontaique eō togæncæ cædāni iñōmō godongāmæ pōninqe tōmengā wæmpo emōwo bai ante, Tacadiya, ante pemoncæ cædānitapa. 60 Cæyōnānite wāānā Baa āninqe,

—Tōmengā emōwo Wäō emoncæcāimpa, ante wææ angadāimpa.

61 Äñongante tōmēnāni wæætē,

—Iñæmpa bitō guidēnāni Wäō emōnāmaī. Dæ ämōnānipa.

62 Äninqe wæmpocā ingante omō cædinque, Æmongānō emonguingā ämii, ante odōmōmi amōnii. 63 Äñōnānite tōmengā tededāmaī inongā inte onompocaque odōmongā adinque yewæmōinta æninqe pædæ pōnōnāni ate tōmengā iñōmō edæ, “Tōmengā emōwo Wäō emoncæcāimpa,”

ante yewæmongā adinque tōmānāni edæ guīñente wægadānimpa. 64 Yewæmongā ate tōmengā ononguēnēwa ñimæ cæguēnēwate bai baguēnēwate ate edæ tōmengā ogæ tededinque Wængongui ingante, Waa pōni cæbi abopa, ante watapæ edæ apænecantapa. 65 İninqe māniñōmō godongāmæ quēwēnāni tōnō Oodeabæ ānāmænē quēwēnāni tōnō tōmānāni, Mānōmaī batimpa, ante nangui tededānitapa. 66 Tededāni eñēninqe nē eñēnāni wæætē, “İngā wēñængā iñōmō æbānō nānō baquinque edæ pæquingā,” ante tōmānāni godongāmæ wægadānimpa. Edæ tōmengā tōnō Wængongui godongāmæ cæcā ingacāimpa.

Tacadiya ämotamīni ante angampa

67 Wēñængā wæmpocā Tacadiya guiquēnē Wængongui Tæiyæ Waemō Onōwoca ingante ewocadinque Wængongui beyæ apænedinque ämotamīni ante bai apænecantapa.

68 “Mōnō idægocabo Wængongui iñōmō adocā mōnō Awēnē iñongante mōnō tōmengā ingante waa ate watapæ apænecāimpa.

Tōmengā iñōmō, Botō quīnāni bate abæ tawænte bai quēwencædānimpa, ante tōmengā do æncæ pongā acæimpa.

69 ‘Önōmoncawæ wææ emoncate bai wææ gompocæcāimpa,’ ante cædinque tōmengā mōnō imonte nē ænguingā ingante da pōnongā pōninqe iingā wæætē ængā beyænque quēwēmompā.

Wængongui ingante nē cægaingā awēnē od-eye Dabii wodi pæingā inongā inte tōmengā mānōmaī cæcā beyænque quēwēmompā.

70 Wængongui iñōmō tōmengā beyæ nē apænegaināni tæiyæ waemō ingaināni iñōnānite tōmēnāni tōnō apænedinque,

Cōwē cæcæboimpa, ante nānō apænegainō bai ñowo edæ iinque cæcampa.

71 Mōnō iñōmō nē piinte ānāni nempo ongōñōmonte tōmengā,

Piinte cædānipa, ante adinque mōnō imonte gā pe æmpote ö ængā beyænque quēwēmompā.

72 Mänömaï cædinque tömengä mönō mæmæidi inänite nänō angainō bai cædinque ñowo waadete pönō cæcampa.

Ayæ, Botō pönō cæbo ate mīnitō Ao ämīni inique mönō godongämæ wææ cæte quëwengæimpa, ante tömengä tæiyæ waëmō nänō angainō ante cōwē pönēnongä inte ñowo iinique cæcampa.

73 Edæ mæmæ Abadäo wodi ingante, Botō nē Quëwëmo ingaimo inte nöingä ämopa,

ante Wængonguï iïmainō ante nänō pönō cæquinō ante nō apænecacäimpa.

74 Abadäo ëñëmi. Nē piinte cædäni nempo wæwëñömīnite botō gä pe æmpote ö ænīnque

pönō cæbo ate eyepæ badīnque mīnitō wæætē guïñēnāmaï inte botō Wængonguï imo beyæ cæcæmīnimpa, ante Wængonguï nē pönō cæquiringä inte apænecacäimpa.

75 Wængonguï iñömō edæ, Mīnitō tæiyæ waëmō ëwocadinque mīni quëwenganca

botō weca nō pönī cæte quëwencæmīnimpa, ante pönō cæcä ingacäimpa,” ante wëñængä mæmpocä Tacadiya wodi apænecantapa.

76 Ayæ wëñængä ingante tömengä iïmaï ante godömenque apænecantapa.

“Botō wëmi bitō imite botō wæætē apænëbo ëñëe, angantapa.

Nē Æibæ Pönī Quëwengä beyæ bitō nē apænëbi inömi imipa, ante bitō imitedö ante apænecædänimpa.

Mönō Awënë taadö pīnongæimpa, ante bitō edæ täno beyænte gote bai cædinque,

77 mönō Awënë quīnāni inänite iïmaï ante odömonte apænecæbiimpa.

Wënæ wënæ mīni cædö ante Wængonguï pönō ñimpo cæcä ate mīnitō iñömō edæ,

Tömengä ængä beyænque mönō quëwenguï impa, ante do ëñencæmīnimpa, ante apænëbi ëñencædänimpa.

78 Edæ mönō Wængonguï incæ mönō wënæ wënæ wædönō ante waadete pönō waa cædinque,

öönædë Quëwengä ingante mönō weca da pönongä pönīnque nænque tæcæ tamō bai ëmongä acæimpa.

79 Mänömaï cædinque mönō wænguimämo beyæ wëmō iñömō awædö,

ante wæyömonte tömengä ponte a ongongä adīnque mönō nænque pämo oo tote bai quëwëmompä.

Ayæ, Mīnitō mīni gänē pönente quëwenguïno taadonque poncæmīnimpa,

ante tömengä töö æmænte mämongä pömompä.”

Mänömainō ante Tacadiya wodi tömengä wëñængä ingante apænecacäimpa.

80 Wëñængä iñömō do pædinque önöwoca tæi piñænte ëwocagacäimpa. Idægoidi weca tömengä nänō ponte a ongonganca önömæca quëwengacäimpa.

2

Itota ëñacampa

(Mäateo 1.18-25)

1 Wäö idægoidi weca nänō pöñedë iinique bayonte awënë Tetædo Agoto iñömō, Æpomīnidö imīni, ante acæte ante cædinque odömāno ömæ nē quëwënāni inänite edæ, Mīnitō ëmöwo tömämīni yewæmoncæmīnimpa, angacäimpa. 2 Tidiabæ awënë Tidënio ingäñedë odömāno awënë täno angä. 3 Ëñëninque adocanque tömengä mæmæidi nāni quëwengäiñömō wacä tömengä mæmæidi nāni quëwengäiñömō tömānāni yewæmoncæte ante edæ go go cægädänimpa.

4 İinique Oodeabæ Awënë wodi Dabii wodi pæingä inongä inte Ootee iñömō Gadideabæ Näatadeta nāni quëwëñömō quëwëninque adobai tömengä mæmæ Dabii wodi nänō quëwengäiñömō Bedëe iñömō gogacäimpa. 5 Edæ Ootee nänöögængä inguingä Mäadiya yædëmadä iñongante tömëna nāna gæncaya inguina guëa yewæmoncæ godatapa. 6 Bedëe ponte quëwëñöna Wëñængä iñömō iinique pædinque 7 bamoncadengä incæ onguïñængä inte iïmaï ëñagacäimpa. Mäniñömō monguï incönë iñömō mäniñedë eyede pönī goti ongönāni ate wædinque tömëna wæætē cænënanī cænguï oncon-

taidë guiyantaidë go guida ate Wëñængä

ēñacantapa. Īninqe guiyantaidē ēñacā ate wäänā Wēñængā ingante weocoo wīni wīni caadinque cænēnāni cænguincadedē ñō cædā oñongantapa.

Obegaidi inānite nē aadāni inānite anquedoidi apænedāni

⁸ Idægoidi cænīnāni obegaidi nāni ānōnāni iñōnānite nē aawēnāni iñōmō eyepancadē adoönæ woyowotæ a cōnōnānimpa. ⁹ A cōñōnāni mōnō Awēnē anquedo ponte a ongōñongā mōnō Awēnē nānō ñāō ēmōnō beyænque godongāmæ guinæ gongæ adinque nē aadāni ancai guiñente wædānitapa. ¹⁰ Anquedo iñōmō tōmēnāni inānite, “Guiñēnāmaī imæwedāni. Mini nanguī ēñente toquinque ante botō ñōwo watapæ apænebo ēñēdāni. Mīnitō tōnō inguipoga tōmāo quēwēnāni adobaī adode beyænque watapæ tocæmīnimpa. ¹¹ Mōnō Awēnē Codito iñōmō, Æmo beyænque quēwencæmīnimpa, ante nē Ængā baquingā inongā inte do edæ ēñacantapa. Edæ mīnitō beyæ ante tōmengā ñōwoönæ incæ awēnē Dabii wodi nānō quēwengaiñōmō ēñacantapa. ¹² Nō impa, ante gote acæmīnimpa. Wēñængā ingante wäänā wīni wīni caadinque edæ cænīnāni cænguincadedē ñō cædā ate a oñongā adinque mīnitō, Nō impa, ante ēñencæmīnimpa.”

¹³ Ante anquedo āñongā wadāni nanguī ināni oönædē owodāni incæ iñontobæ tontadoidi ongōnāni bai tōmengā tōnō godongāmæ ponte a ongōninqe āmotamīni ante bai āninqe Wængonguī ingante iīmaī ante watapæ apænedānitapa.

¹⁴ “Wængonguī æibæ pōni quēwēnongā inte edæ ñāō apāite bai ēmongānō anguēnē.

Tōmengā inguipoga iñōmō waadete pōnō cæcā beyænque mīni waocabo edæ gānē pōnenguimīnidō anguēnē.”

¹⁵ Ante āmotamīni ante bai āninqe anquedoidi oönædē adodō wadæ æite godāni ate nē aawēnāni iñōmō nāni cabo tededinque,

—Mōnō Awēnē mōnō imonte apænecā mōnō ēñēnō ante, Æbānō cæcāi, ante mōnō Bedēē gote ædæmō acæimpa. ¹⁶ Āninqe pogodo ponte ayōnāni Māadiya tōnō Ootee a ongōñōna Wēñængā iñōmō cænīnāni

cænguincadedē a oñongā adānitapa. ¹⁷ Īninqe adinque wadæ godinque, Wēñængā æbānō ingāā, ante anquedo apænecā nāni ēñēnō ante gode ā gode ā cæte wayōmō wayōmō quēwēnāni inānite tededāni ēñēnānitapa. ¹⁸ Ēñēninqe tōmānāni wæætē, Nē aawēnāni æbānō ante apænedāni, ante guiñente wædānitapa. ¹⁹ Māadiya guiquēnē, Wēñængā æbānō ingā ānāni, ante nāmā pōnēē congantapa. ²⁰ Nē aawēnāni guiquēnē, Wængonguī ñāō apāite bai ēmōnongā inte pōnō waa pōni cæcā æmōnipa. Edæ anquedo nānō apænedō bai do cæcā amōnipa, ante apænedinque eyepancadē ocæ ēmænte gogadānimpa.

Bitō Wengā, ante mæmpoda Wēñængā ingante Wængonguī oncōnē ænte pōnapa

²¹ Ayæ, Adoque Wængonguī itædē go ate æmontaique eō togængæimpa, ante idægoidi cōwē nāni cæi bai cædinque Wēñængā ingante eō togænānitapa. Ayæ Māadiya yædēmadāmaī nānō iñedē anquedo nānō pemōnīnō bai āninqe mæmpoda Wēñængā ēmōwo ante, Itota, pemongadaimpa.

²² Wäänā mānimpoönæ wepæ nāate inampa, ante Mōitee wodi nānō angaimpoönæ ĩnque go ate tōmēna, Wēñængā iñōmō Wængonguī Awēnē quī ingampa, ante mōnō godongæimpa, ante tōmengā ingante Eedotadēē iñōmō ænte gogadaimpa.

²³ Edæ, “Onguīñænāni bamoncadēnāni tōmānāni tæiyæ waēmō bacædānimpa, ante tōmēnāni Wængonguī Awēnē nempo pædæ godongæimpa,” ante Awēnē Wængonguī nānō angainō ante ēñēninqe Māadiya tōnō Ootee do cædatapa. ²⁴ Ayæ, Equemōna nāna gæncaya, Wængonguī quī, ante godongæimpa. Wīi mānōmaī cæte tæcæ wengā wengā pæda mēnaa inate godongæimpa. Ootee tōnō Māadiya iñōmō mānōmaī cædinque, Wængonguī quī impa, ante mēnaa inate ænte pōninqe pædæ godōna ængacāimpa.

²⁵ Māniñedē adocanque edæ tōmengā ēmōwo Tīmeōnō Wængonguī beyænque ante nō cædongā inte Eedotadēē iñōmō quēwengacāimpa. Idægoidi wampo pōnente quēwencædānimpa, ante Wængonguī æyedēnō ædæmō cæquingāā, ante tōmengā

wänö cönonte quëwëngäimpa. Ayæ Wængonguï Tæiyæ Waëmö Önöwoca ingante tömengä cöwë ewocacä inongäimpa.

²⁶ Wængonguï Tæiyæ Waëmö Önöwoca do apænecä eñëninge Timeönö wodi iñömö, Botö ayæ wænämaï mïimö quëwëmoyedë mönö Awënë Codito ingante aquïmo imopa, ante do eñëningä inongäimpa.

²⁷ Nöwo iñömö Wængonguï Önöwoca angä eñëninge tömengä Wængonguï oncö ñænæncönë yabæcönë pö guicantapa. Mänïñedë Itota mæmpoda iñömö idægoidi wææ ante nani cægainö bai cæcæte ante cædinque Wëñængä Itota ingante ænte pö guida.

²⁸ Adinque Timeönö iñömö edæ Wëñængä ingante bæi ongonte pæ mäninque Wængonguï ingante, Tömëmi waa toquinque mönitö imönite pönö cæbipa, ante apænecantapa.

²⁹ “Bitö Tæiyæ Awënë inömi inte eñëmi. Bitö imite në cæbo iñömote bitö doyedë, Cæbo acæbiimpa, angabiimpa.

Ïinque bitö äninö bai ñöwo edæ ïinque cæbi adïmo iñömote bitö ämi ate wænte goboe.

³⁰ Edæ bitö, Quëwencæminimpa, ante në Ængingä ingante ñöwo da pönömi ponte eñacä do abopa.

³¹ Mänömaï cædinque bitö, Wadäni nani cabo wadäni nani cabo waodäni tömänäni acædänimpa,

ante cædinque bitö në Ængingä ingante ñöwo da pönömi ponte a ongongä acæimpa.

³² Idægoidi inämaï inäni incæ tömënanï nani cabo nani cabo incæ edonque acædänimpa, ante cædinque bitö da pönömi pöninque tömengä ñäo apäite bai a ongongä acædänimpa.

Ayæ möni idægocabo iñömönite bitö, Wëñængä ængä beyænque botö quïmini iñömö ñäo bai waëmö pönï emöninque quëwencæminimpa, ante pönö cæbi abopa.”

³³ Ante ämotamini ante bai Timeönö wodi, Wëñængä æbänö cæquingä ingäa, ante tedecä eñëninge Wëñængä mæmpo tönö tömengä badä iñömö guïñente wædatapa.

³⁴ Timeönö wæætë, Mina waa toquinque ïingä Wëñængä ingante

æminapa, ante apænedinque tömengä badä Mäadiya ingante iïmaï ante godömenque apænecantapa.

—Picængä badinque ïingä Wëñængä cæcä beyænque idægoidi pancadäniya tæ go wæænte bai wæyönäni pancadäniya wæætë ængæ gantite bai quëwencædänimpa.

Wængonguï iñömö, Wëñængä ingante ate eñencædänimpa, ante odömonte cæyongä pancadäniya wæætë adocä ingante godö pïinte tedecædänimpa.

³⁵ Ante apænedinque Timeönö iñömö Mäadiya ingante apænecantapa. Mänömaï bayonte, Nanguï inäni æbänö ante mïmöno pönënanï, ante edonque acæimpa. Bitö iñömö yaëmë yete bai wæwente ewocacæbiimpa, ante apænegacäimpa.

³⁶ Ayæ wadä iñömö Wængonguï beyæ në apænedä iñömö tömënä emöwo Änä adobaï ongönantapa. Atedoidi nani cabo iñönäni adocanque Pänöedo wënë inönä inte tömënä picængadedä ingadäimpa. Tömengä iñömö baquécäñedë möninque nänöogængä tönö onompo æmæmpoque go mæa wadepo quëwente ate onguïñængä guiquënë ñäne wængacäimpa.

³⁷ Onquiyænä iñömö ñöwo otenta i coatodo wadepo nänö eñagainganca owæmpoinä quëwënë inte tömënä Wængonguï oncö ñænæncönë yabæcönenque cöwë quëwëninge taodämaï inönäimpa. Itädë woyowotæ tömënä cöwë, Wængonguï ingampa, ante waa cædinque Wængonguï ingante apænecæte ante wantæpiyæ cænämaï quëwënë inönäimpa.

³⁸ Tömënä ñöwo eyepæ pönï mämö bee téninque Itota ingante adinque Wængonguï ingante waa ate pönëninge apænecantapa. Ayæ wadäni, Mönitö Eedotadëe iñömö quëwëmöni iñömönite Wængonguï æyedëno pönö cæcä beyæ abæ tawænte quëwenguïmönï, ante në wänö cönäni inänite dodä Änä iñömö Wëñængä ingante do adinä inte, Wëñængä në Ængingä inte do eñate pongä atabopa, ante cöwë apænedä eñengadänimpa.

Näatadeta ocæ emcænte godänipa

³⁹ Ayæ mänï, Awënë Wængonguï, iïmaï cædäni, nänö angainö ante ïinque cæte ate Ootee nani wencabo Gädideabæ gocæte ante wadæ godinque

Näatadeta tömēnāni nāna quēwēniñōmō pongadānimpā. ⁴⁰ Wēñængā iñōmō edæ picængā pædinque tæi piñængā bacantapa. Ayæ ocai encacā inte nanguī ēñente bagacāimpā. Ayæ Wængonguī waadete pōnō apæñecā ēñente ēwocadinque tömengā nē waadete pōnō cæcā ingacāimpā.

Wængonguī oncōnē Itota gote ongongampa

⁴¹ Wodo pænta gogaïōnæ bai Patowa mönō ææmæ cænguiōnæ ñōwo impā, ante pōnēninque idægoidi Patowa ante Eedotadēē godinque ææmæ cædōnānimpā. Itota mæmpoda adobai Patowa nāni ämæ cōwē cæyedē wadepo iñō wadepo iñō Eedotadēē goda ingadainpā. ⁴² Ìninque Itota dote wadepo iñonte Wængonguī beyæ ante ææmæ cōwē nāni cædō bai Ootee nāni wencabo do gote cædānitapa. ⁴³ Ææmæ tömäā ïinque cædinque oncōnē poncæte ante taadonque pōninque mæmpoda adāmai iñōnate Itota guiquēnē Eedotadēē iñōmō ayæ quēwengantapa. ⁴⁴ Godongämæ mönō poncabo tōnō pongā ïmaingampa, ante pōnēna inte taadō tömäā itædē pōninque tömēna guidēnāni weca tömēna æmigoidi weca diqui diqui mincæ cæyōna, ⁴⁵ edæ dæ angā. Ate wædinque tömengā ingante diqui mincæte ante Eedotadēē adodō ocæ émænte gogadainpā.

⁴⁶ Mēōnaa go adoōnæque iñonte diqui diqui minte ate edæ Wængonguī oncō ñænæ oncōnē yabæcōnē pō guite ayōnate Itota iñōmō nē odōmōnāni weca ēñēē cōninque, Æbānō ï, Æbānō cæquī, ante angā adatapa. ⁴⁷ Tömengā apæñecā ēñēninque tömānāni, Æ tömengā iñōmō ocai nē encacā waa ēñængā amōnipa, änānitapa. Ayæ, Itota ingante, Æbānō ï, ante änāni ēñēninque tömengā wæætē nō apæñecampa, ante wædinque tömānāni guīñente wædānitapa. ⁴⁸ Mæmpoda iñōmō māniñōmō pō guite ayōna Itota mānōmai cæcā adinque guīñente wædatapa. Tömengā badā tömengā ingante,

—Botō Wēmi ēñēmi. Mōnatō ïmōnate quīnante mānōmai cæbii. Ìñæmpa bitō wæmpo tōnō mönatō bitō ïmite ante ancaa diqui diqui minte wæwentamōnapa.

⁴⁹ Äñongante tömengā wæætē,

—Minatō iñæmpa, Mæmpocā oncōnē Itota ongonguēnengā ingampa, ante ēñēnāmai ïminatawo. Quīnante wayōmō diqui diqui mīminatawo.

⁵⁰ Äñongante, Æbānō ante angā, ante ædæmō ēñēnāmai ïnatapa.

⁵¹ Tömengā wæætē mæmpoda mīñæ gote Näatadeta pōninque tömēna nāna änō ante cōwē ēñente cæcantapa. Wäänā guiquēnē tömengā nānō cædinō ante nāmā pōnēē congā ingacāimpā. ⁵² Itota iñōmō edæ nanguī ēñængā bate pædongāimpā. Picængā bayongante Wængonguī tōnō waodāni adobai tömengā ingante cōwē godōmenque godōmenque waadete adōnānimpā.

3

Wäo æpænē nē guidongā önömæca quēwente apæñecā

(Mäateo 3.1-12; Mäadoco 1.1-8; Wäo 1.19-28)

¹ Tibedio quinte wadepo tömāmæ awēnē nānō ïnōñedē Pontio Pidato wodi nāni änongā adoyedē Oodeabæ awēnē ïñongante Edode wæætē Gadideabæ awēnē ïnongāimpā. Adoyedē iñōmō Edode wodi nānō tōniñacā Pedipe Itodeabæ Todacōnitebæ awēnē ïñongā Ditāniato wodi adoyedē Abidēniabæ awēnē ïnongāimpā.

² Mānimpodāni māniōmæ awēnēidi iñōnāni Änato wodi tōnō Caiapato wodi adoyedē, Wængonguī quī, ante nē godōna ñænænā pōni ïnōna ïnōnainpā. Tömēna nāna ïnōñedē adoyedē edæ Tacadiya wodi wengā Wäo ingante önömæca iñōmō ayæ quēwēñongante Wængonguī apænegacāimpā. ³ Wäo wodi iñōmō Oododānonga ömaaque go tömäo cægōninque ïmai apæñecā ēñēnānitapa. Mīnitō, Idæwaa wēnæ wēnæ cæte awædō, ante ocæ émænte Wængonguī gämænō pōedāni. Ayæ, Wēnæ wēnæ botō cædinō ante Wængonguī piñnāmai inte pōnō ata cæpocā quēwēmopa, ante edonque acæimpā, ante odōmōninque æpænē guīiedāni, ante Wäo angacāimpā.

⁴ Mānōmai cædinque Wængonguī beyæ nē apænegaingā Itaiya wodi ïmai ante nānō yewæmonte apænegainō bai Wäo adobai cægacāimpā.

“Adocanque önömæca ongōninque ïmai ante yedæ tedecā ēñencædānimpā.

‘Awënë nänö ponguinö ante tee monte bai
cædinque,
taadö töinö pinonte bai cæedäni.

⁵ Onquiyabo incæ änanquidi incæ,
Mæmö pöni bacæimpa, ante ææ
wocæimpa.

Biyönæ iñömö tee möninque mæmö pöni
badongæimpa.

Taadö idiquibæ iñonte töinö pinongæimpa.
Wënæ wënæ iñonte wainö pöni taadö
badongæimpa.

⁶ Taadö mänömaï mæmö pöni ba
iinique tömämæ quëwënanï incæ,
Wængongui pönö ængä beyænque
mönö quëwenguinö impa, ante
edonque acædänimpa, ‘ancæcäimpa.’”

⁷ Ante yewæmonte ongompa cæminii,
ante Wäö wodi æpænë guicæte ante
pönäni nanguï inäni iñönänite iïmaï angan-
tapa. “Minitö iñömö täntæ pæimïni bai inte
në babæ cæmini iinique edæ ëñenguënë
quëwëmini. Wængongui nänö piinte pan-
guimämo ante edæ, Wænompadäni, ante
æcänö äna ëñëninque minitö wodii winonte
pöminii. ⁸ Wængongui Awënë gämænö
minitö ocæ ëmænte poncæ cæminitawo.
Nö nö pömini iinique edæ në ocæ ëmænte
pönäni wainca incate bai waa cædäni bai
minitö iñömö edæ adobai waa cæedäni.
Minitö nämæneque pönëninque, ‘Minitö
mæmæ Abadäo wodi pæimöni imöni
beyænque Wængongui mönitö imönite
waa acæcäimpa,’ ante nämä wææ ancæ
cæminitawo. Iñæmpa Wængongui angä
bai Abadäo wodi pæimïni mïni inö bai
dicacoo incæ dobæ adobai bacædonii
apa anewëminii. ⁹ Awæ iñömö wainca in-
cadämaï i iinique edæ do yete gongapamö
iya tangæimpa. Awæ yecæte ante awænca
eyewa næænäni bai Wængongui nänö
panguimämo iñömö edæ oo pöni pö apa
quëwëminii,” ante Wäö apænægacäimpa.
¹⁰ Angä wædinque godongämæ ongönäni
pancadäniya wæætë,

Mänömaï i iinique æbänö cæquënëmöni
imönii. ¹¹ Añönänite Wäö,

—Weocoo mencooga në mangä iñömö
weocoo ömaacä ingante adocooque
godongä æncæcäimpa. Cængui në ëcä
adobai cængui ömæpocä ingante godongä
æncæcäimpa, angantapa. ¹² Ayæ odömäno

awënë nänö äninta në ænäni guiquënë
adobai æpænë guicæte ante pöninque Wäö
ingante änänitapa.

—Në odömömi ëñëmi. Mönitö iñömö
æbänö cæquënëmöni imönii. ¹³ Añönänite
tömengä wæætë,

—Minitö awënë, Mänimpota, ante nänö
änimpota ante wadäni inänite ämïni pædæ
pönönäni eyepæ æninque minitö wæætë,
Tömëmöni quï, ante godömenque änämaï
iedäni, angantapa. ¹⁴ Ayæ tontadoidi
adobai tömengä ingante,

—Mönitö guiquënë æbänö cæquënëmöni
imönii.

Añönänite Wäö wodi iïmaï angantapa.

—Minitö wacä tömengä nänö godonte
æinta ö æncæte ante pæmënänämaï iedäni.
Ayæ wacä wënæ wënæ cædämaï iñongante
minitö, Wënæ wënæ cæbitapa, ante babæ
wapiticæ änämaï iedäni. Ayæ minitö
cædi beyæ minitö awënë eyepæ pönongä
æninque piyænë cæte godömenque æinente
wædämaï iedäni, angantapa.

¹⁵ Añongante godongämæ ongönäni
iñömö, Wængongui doyedë, Codito pongu-
ingä, ante nänö në angaingä iñömö
edæ iingä Wäö wabänö imaingampa, ante
önöwënenque pönënanï inte edæ, Wäö
æbänö cæquingä, ante acæte ante a
ongönänitapa. ¹⁶ Wäö wæætë tömänäni
inänite apænedinque, “Botö guiquënë
näwangä minitö imönite æpænë guidömo
guimïnipa. Iñcayæ ate në Pongu-
ingä guiquënë tömengä iñömö näwangä
ñænægä pöni iñongante botö guiquënë
guiyämo inömo inte tömengä awæncata
incæ ædö cæte ñi cæquimoo. Tömengä
iñömö minitonga gonga bæcote bai cædinque
Wængongui Tæiyæ Waëmö Önöwoca in-
gante edæ da pönongä æncæminimpa.
¹⁷ Waocä, Todigo tömëmö wati wati
tænöninque botö tænoniñömö önömancaque
baquinque botö waiña tömämö oncönë
da wencæboimpa, ante timpodæ næænte
wo ææntodö wo ææntodö cædinque on-
tapocoo wææincoo wadæ ñëmænte wo
ëwengampa. Waocä mänömaï wo ëwencæte
ante timpodæ næægä bai mönö në
Ponguingä iñömö adobai oo pöni apænte
ancæcäimpa. Edæ wæmö inäni inänite

apænte æninqe tōmengä ontapocoo bai inäni inänite gonga cōwē bæcoyōmō iya tangä gonte wæcædänimpa.”

¹⁸ Mänōmaĩnō äninqe Wäō wodi godōmenque wade wade apænedinque tōmēnāni inänite, Ämo ēñēmaĩminipa, angacäimpa. Ayæ, Codito ingantedō ante watapæ apæncä ēñengadänimpa. ¹⁹ Incæte tōmengä pancabaa Awēnē Edode ingante, Bitō tōniñacä nänōogængä Ædodiya ingante mōmii, ante piĩninqe Edode nänō wiwa cædinō ante tōmānō ante piingä adinque, ²⁰ Edode wodi guiquēnē godōmenque wiwa cædinque Wäō ingante tee mōnecä wægacäimpa.

Itota æpæñē guicampa

(Mäateo 3.13-17; Mäadoco 1.9-11)

²¹ Mänii Wäō tōmānāni inänite æpæñē nänō guidōñedē Itota ingante adobai guidongä guicantapa. Guiite ate Wængongui ingante apæneyongä öönæ wi ænete bai bayonte edæ ²² Wængongui Tæiyæ Waēmō Öñowoca equemō wææ contate bai tōmengäa edonque pōni wææ guicä ate öönædē apænedinque,

—Bitō botō Wēmi botō nē waadebi imipa. Bitō imite waa adinque waa tobopa, ante öönædē apæncä ēñengacäimpa.

Itota nänō mæmæidi

(Mäateo 1.1-17)

²³ Todēinta wadepo nänō ēñagaiñedē iĩnque bayonte Itota māniñedē tāno cæcä ingacäimpa. Tōmengä ingante nē pæpogadongä iĩñomō Ootee iĩngante wadāni, Itota wæmpocä ingampa, ante pōnēñänimpa.

Ootee wodi mæmpo wææ Edii wodi ingacäimpa.

²⁴ Edii wodi mæmpo wææ Mäatato, Mäatato wodi mæmpo wææ Debii, Debii wodi mæmpo wææ Mēedequi, Mēedequi wodi mæmpo wææ Cāna, Cāna wodi mæmpo wææ docä Ootee wodi ingacäimpa.

²⁵ Mänii docä Ootee wodi mæmpo wææ Mäatatia, Mäatatia wodi mæmpo wææ Ämoto, Ämoto wodi mæmpo wææ Näacö, Näacö wodi mæmpo wææ Etedi,

Etedi wodi mæmpo wææ Näagai ingacäimpa.

²⁶ Näagai wodi mæmpo wææ Mäato, Mäato wodi mæmpo wææ docä Mäatatia, docä Mäatatia wodi mæmpo wææ Tēmei, Tēmei wodi mæmpo wææ Ooteco, Ooteco wodi mæmpo wææ Oodaa ingacäimpa.

²⁷ Oodaa wodi mæmpo wææ Owāna, Owāna wodi mæmpo wææ Deta, Deta wodi mæmpo wææ Dodobabedo, Dodobabedo wodi mæmpo wææ Tadatiedo, Tadatiedo wodi mæmpo wææ Nēedi ingacäimpa.

²⁸ Nēedi wodi mæmpo wææ docä Mēedequi, docä Mēedequi wodi mæmpo wææ Adi, Adi wodi mæmpo wææ Cotäo, Cotäo wodi mæmpo wææ Edēmadäo, Edēmadäo wodi mæmpo wææ Ede ingacäimpa.

²⁹ Ede wodi mæmpo wææ Ootowee, Ootowee wodi mæmpo wææ Ediyedede, Ediyedede wodi mæmpo wææ Oodii, Oodii wodi mæmpo wææ docä Mäatato ingacäimpa.

³⁰ Mänii docä Mäatato wodi mæmpo wææ docä Debii, mänii docä Debii wodi mæmpo wææ Timeönö, Timeönö wodi mæmpo wææ docä Oodaa, docä Oodaa wodi mæmpo wææ wacä docä Ootee, mänii docä Ootee wodi mæmpo wææ Öönäo, Öönäo wodi mæmpo wææ Ediyaquimō ingacäimpa.

³¹ Ediyaquimō wodi mæmpo wææ Mēedeä, Mēedeä wodi mæmpo wææ Mēna, Mēna wodi mæmpo wææ Mäatata, Mäatata wodi mæmpo wææ Näatāni ingacäimpa.

³² Näatāni wodi mæmpo wææ Awēnē Dabii, Awēnē Dabii wodi mæmpo wææ Yæte, Yæte wodi mæmpo wææ Obedo, Obedo wodi mæmpo wææ Boodo, Boodo wodi mæmpo wææ Tāna, Tāna wodi mæmpo wææ Näatöo ingacäimpa.

³³ Näatöo wodi mæmpo wææ Äminadabo, Äminadabo wodi mæmpo wææ Adämii,

Adämüi wodi mæmpo wææ Adöni,
Adöni wodi mæmpo wææ Etedöo,
Etedöo wodi mæmpo wææ Pade,
Pade wodi mæmpo wææ wacä docä Oodaa
ingacäimpa.

³⁴ Mänüi docä Oodaa wodi mæmpo wææ
Aacobo,

Aacobo wodi mæmpo wææ Itæca,
Itæca wodi mæmpo wææ Abadäo,
Abadäo wodi mæmpo wææ Tade,
Tade wodi mæmpo wææ Näacodo in-
gacäimpa.

³⁵ Näacodo wodi mæmpo wææ Tedogo,
Tedogo wodi mæmpo wææ Dagao,
Dagao wodi mæmpo wææ Pedego,
Pedego wodi mæmpo wææ Eebedo,
Eebedo wodi mæmpo wææ wacä docä Täna
ingacäimpa.

³⁶ Mänüi Täna wodi mæmpo wææ Cainäo,
Cainäo wodi mæmpo wææ Adapacadæ,
Adapacadæ wodi mæmpo wææ Temö,
Temö wodi mæmpo wææ Docä Nöwee,
Docä Nöwee wodi mæmpo wææ Nämeco
ingacäimpa.

³⁷ Nämeco wodi mæmpo wææ Mäatotadëo,
Mäatotadëo wodi mæmpo wææ Ënoco,
Ënoco wodi mæmpo wææ Aadedo,
Aadedo wodi mæmpo wææ Mäadadede,
Mäadadede wodi mæmpo wææ wacä docä
Cainäo ingacäimpa.

³⁸ Docä Cainäo wodi mæmpo wææ Ënoto,
Ënoto wodi mæmpo wææ Teto,
Teto wodi mæmpo wææ Adäo,
Adäo wodi ingante nê badongaingä iñömö
edæ mönö Mæmpo Wængonguü
inongä ingacäimpa. Mäninäni iñömö
edæ Itota mæmæidi ingadänimpa.

4

*Itota wënæ wënæ cæcæcäimpa, ante
wënæ cæcampa*

(Mäteo 4.1-11; Mäadoco 1.12-13)

¹ Mänüi Oododänonga quëwëninque
Wængonguü Tæiyæ Waëmö Önöwoca
ingante ædæmö ewocacä inongä inte
Itota iñömö wadæ gocantapa. Goyon-
gante Wængonguü Önöwoca tömengä in-
gante önömæca ænte mäocä gogacäimpa.

² Godinque coadenta eönæ mänimpoönæ
quëwëñongante wënæ awënë pöningue,

Wënæ wënæ cæe, ante ancaa cædongäimpa.
Itota iñömö mänimpoönæ cænämaï iningä
inte edæ iinque bayonte gæwænte
wæcantapa. ³ Adinque wënæ awënë
tömengä ingante,

—Bitö näwangä Wængonguü Wëmi inömi
inte dica incæ päö ämi ba cæmaïmipa.

⁴ Äñongante,

—“Cæntedö quëwenguü i. Iñæmpa
Wængonguü nänö apænedö ante tömänö
ante ëñente quëwengæimpa,” ante
yewæmonte ongö apa, äninque Itota edæ
Baa angacäimpa.

⁵ Ayæ Itota ingante onquiyaboga ænte
mæicä æite ongöñongante wënæ awënë
wæætë inguipoga awënë odeyedi ömæ
tömäo ongöñömæ adoyömö a ongonte bai
adotedæ odömongä acantapa. ⁶ Odömongä
ayongante Itota ingante äninque wënæ
awënë wæætë,

—Awënëidi waincönë pönü ongöninque
waëmoncooga mongæninque tæi piñæninque
tömënanü nempo quëwënanü inänite nan-
guü änäni ëñente do cædänipa, ante abii.
Tömënanü waëmö pönü nänü ëmömämo ante
æcänö ëmonguingää, ante, Tæi piñænte nänü
ënempodö ante æcänö empoquingää, ante,
botö iñömö edæ do ænte ënempogäimo inte
tömëmoque nê ämo inte godömo ænänipa.
Ïninque bitö imite, Bado, godömo æe, ämopa.

⁷ Ïninque bitö mänincoo æncæte ante botö
weca ædæ wææninque, Tatänabi bitö
Wængonguü bai inömi imipa, ämi adinque
botö wæætë, Bado, bitö tömämæ Awënë
babipa, ante edæ pönömo æmaïmipa, ante
wënæ awënë änewengantapa.

⁸ Angä ëñëninque Itota,

—Ïmaï ante yewæmongatimpa. “Awënë
Wængonguü weca ædæ wæænte tömengä
ingante apænedinque, Bitö adobique
Wængonguüimi imidö angüenë, ante wat-
apæ apæñecæbiimpa. Ayæ, Wængonguü
beyænque cæcæbiimpa,” ante wææ
yewæmonte ongö apa quëwëe, ante Itota
angacäimpa.

⁹ Wënæ awënë ayæ Itota ingante Eedo-
tadëe ænte mäocä goyongante Wængonguü
oncö ñænæ oncömäa ænte mæicä
æicantapa. Æite næ gongæñongante wënæ
awënë wæætë, Bitö näwangä Wængonguü

Wēmi ïmipa, ante acædānimpa, ante bitō to wæibāwe. ¹⁰ Äninqe wēnæ awēnē godōmenque apænedinque, “Ïmaï ante do yewæmonte ongompa,

Bitō ïmite wææ aacædānimpa, ante cædinque

Wængonguï tōmengä anquedoidi inänite da pōnongä

¹¹ pōninqe bitō ïmite ïñæ æmpodāni ïninqe, bitō dicaa tee tēwadāmaï incæbiimpa,” ante yewæmongatimpa cæbii.

¹² Äñongä Itota wæætē,

—Ïñæmpa ïmaï ante ingatimpa. “Bitō, Mönö Awēnē Wængonguï æbānō cæquingä, ante acæte ante cædāmaï incæbiimpa. Eñēnāmaï cæbo incæte edæ mönö Awēnē Wængonguï botō ïmote cōwē wææ aaquingä, ante acæte ante wēnæ wēnæ cædāmaï incæbiimpa,” ante wææ yewæmonte ongö apa änewēē, Itota angacäimpa.

¹³ Ante Itota angä ate wēnæ awēnē incæ, Itota wēnæ wēnæ cæcæcäimpa, ante nänö änewēnō ïninqe cædinque ïncayæ ate nänö ponte cæquinque edæ wadæ gogacäimpa.

Gadideabæ godinque Itota täno cæcampa (Mäateo 4.12-17; Mäadoco 1.14-15)

¹⁴ Itota ïñömö Wængonguï Önöwoca nänö tæi piñænö ewocadinque Gadideabæ adodö pongacäimpa. Do pongäimpa, ante adinque wadāni wayömö gode ä gode ä cædāni eñengadānimpa. ¹⁵ Tōmengä ïñömö mäniömæ wayömö wayömö godinque tōmēnāni nāni odömöincönē go guiite go guiite cædinque odömönte apænecä adinque tōmānāni, Waa pōni odömönte apænecampa, ante tedegadānimpa.

Näatadeta ïñömö ponte Itota apænecampa (Mäateo 13.53-58; Mäadoco 6.1-6)

¹⁶ Wæætē Näatadeta tōmengä nänö pægaiñömö pōninqe tōmēnāni guēmanguïönæ ïñonte Itota nänö cōwē cæi bai ñöwo cæcantapa. Oodeoidi Wængonguï apænecä nāni eñente yewæmongainta ate odömöincönē go guidinque tōmengä mäninta ate apænecæte ante ængæ ganticä. ¹⁷ Adinque tōmengä ingante Itaiya wodi Wængonguï beyæ nänö yewæmongainta pædæ pōnönāni ængantapa. Äninqe, Mäniñömö

yewæmonte ï, ante ñi cæpote adinque, Ïmaï yewæmonte ongompa, ante apænecantapa.

¹⁸ “Wængonguï Awēnē Önöwoca botonga pō guicä ate botō tōmengä ingante ewocabopa.

Ïninqe tōmengä botonga gao cæte bai cædinque tōmengä nänö tæi piñæmämo da pōnöninqe botō ïmote angantapa.

Bitō ömaadāni wæwēnāni inänite Wængonguï Awēnē waa pōnö cæcæcäimpa, ante watapæ apænebi eñencædānimpa, angacäimpa.

Nē tee mönete bai wædāni inänite bitō, Wængonguï pōnö wi ænecä beyænque mīnitö abæ tawænte gocæminimpa, ante godö apænebi eñencædānimpa.

Nē babetamönāni inänite, Mīnitö wæætē waa acæminimpa, ante bitö godö cæcæbiimpa.

Piinte cædāni ate wæwente quēwēñönānite bitö wæætē gä pe æmpobi abæ tawænte bai gocædānimpa.

¹⁹ Ayæ, Wængonguï Awēnē nänö waadete cæquīnepo do batimpa, ante apænebi

eñencædānimpa, ante Wængonguï botö ïmote do da pōnongä pōmo ïmopa.”

²⁰ Ante Itaiya wodi nänö yewæmongainta adinque adodö nā nā capodinque mäniñömö nē cæcä ingante pædæ godöninque Itota tæ contacantapa. Mänömaï cæcä adinque tōmēnāni nāni odömöincönē nē ongönāni tōmānāni tōmengä ingante cōwä adānitapa. ²¹ Ayönānite,

—Wængonguï botö ïmotedö ante apænecä eñēninque nāni yewæmongainö bai ñöwoönæ eñēñömiñi edæ do ïninqe ba æminipa.

²² Ante apænecä eñēninque tōmānāni, Tōmengä nanguï waadete pōnö tedecampa, ante apænedinque tōmengä ingante waa adinque guiñente wædānitapa.

—Ïngä ïñæmpa Ootee wengä ïmaingä inte bamönengæ mänömaï cæcampa, ante awædö, ante nāni caboque tededānitapa.

²³ Mänömaï ante wæyönänite Itota tömënäni nāni pönënö ante önöwënenque eñëninque,

—Botö imote apænedinque mīnitö, “Bitö dotodo bai inömi inte nāmā incæ cæte waa babāwe,” ante dodāni nāni angainö bai ante tedemini awædö. Ayæ, “Capënaömö iñömö bitö waa cæbi adinque tededāni eñëmönipa. Māniñömö bitö cædinö bai tömëmi eñagāiñömö adobai wii cæbii,” ante wæmīni abopa.

²⁴ Äninqe Itota godömenque apænedinque, —Nāwangä ämopa. Wængonguï beyæ nē apænecä iñömö tömengä quëwëniñömö ponte apæneyongante, Wii eñëinē wædö, ante Baa änānipa. ²⁵ Nāwangä edæ ämo eñëedāni. Docä Ediya wodi quëwengäñedē mēa go adoque wadepo ayæ tæcæ wadepo iñonte tömënāni ömæ tömäo nāni gæwænte wægaimāmo baquinque cöönæ cædāmaï ingatimpa. Māniñedē Idægobæ iñömö owæmpoināni nanguï ināni quëwëñönänite, ²⁶ tömënāni weca Ediya ingante da godönāmaï inte Wængonguï wæætē edæ, Bitö Tidöo eyequei gote Tadezata iñömö quëwengä owæmpoingä weca goe, angä gogacäimpa. ²⁷ Adobai Wængonguï beyæ nē apænegaingä Editeo wodi quëwengäñedē Idægobæ æmontai nē baadāni nanguï ināni iñönänite Wængonguï tömënāni inänite wadæ caadāmaï inte wæætē edæ Tidiabæ quëwengä Näämäo ingante wadæ caacä waintai baagacäimpa.

²⁸ Ante Itota apænecä eñëninque mänincönē ongönāni tömänāni piinte äināni badānitapa. ²⁹ Äināni badinque tömengä ingante tömënāni nāni quëwëñömö yabæ inö wido cædānitapa. Ayæ tömënāni nāni mænonte quëwenquidi tömāne ænte mäo godinque tömënāni, Bæ tamö guidömëmæ tæ wææncæcäimpa. ³⁰ Ante cæyönāni, Itota iñömö tæcæguedē godinque aamö cæte wadæ gogacäimpa.

*Itota angä eñente wënæ incæ tao gopa
(Mäadoco 1.21-28)*

³¹ Wadæ godinque Gadideabæ Capënaömö nāni quëwëñömö pöninque Itota tömënāni nāni guëmanguïönæ bayonte tömënāni inänite odömonte apænecä eñënanitapa. ³² Eñëñönāni tömengä nāmā tæi piñæninque

nē angä inongä inte nö odömonte apænecä eñente wædinque tömënāni, Æ tömengä iñömö nö pönī odömonte apænecä eñëmönipa, ante wædānitapa.

³³ Māniñedē edæ onguïñængä wënæ wentamö ewocacä tönö nē quëwengä iñömö tömënāni odömöincönē a ongöninque iñontobæ yedæ ante aa pecantapa.

³⁴ —Quimæ quëwëe. Bitö Itota Näatadeta quëwëniimi inte quinante mönatö weca pömii. Mönatö imönate edæ æmæwo wido cæcæte ante wabänö pömitawo. Bitö æmömidö imii, ante botö do atabopa. Bitö Wængonguï Tæiyæ Waëmö Wëmi inömi imipa, ante edæ do eñëmopa.

³⁵ Ante tedeyongante Itota wææ äninque, —Apocænē quëwenguënē tedewëe. Waocä baönē quëwënömi inte edæ tao gobāwe.

Angä eñëninque wënæ guiquënē tömänāni ayönāni waocä ingante mäo tæ gotodö go wææñongante tömengä baonga wënæ wënæ cædāmaï inte tao gotapa. ³⁶ Itota angä wënæ tao gocä adinque tömänāni guïñente wædinque nāmāneque tededinque,

—Tömengä æbänö cæte nē angä ingää. Iñæmpa nē angä inongä inte tömengä tæi piñæninque wënæidi nē wentamö ewocadāni inänite angä tao godāni awædö.

³⁷ Ante pönente wædinque tömënāni, Itota mänömaï cæcampa, ante tededinque mänïömæ tömäo gode ä gode ä cædāni eñengadānimpa.

*Pegodo nänöogæ wäänä ingante Itota
cæcä gançæ bacä*

(Mäateo 8.14-15; Mäadoco 1.29-31)

³⁸ Mänii tömënāni odömöincönē ongonte apænedinque Itota tao godinque Timönö oncönē go guicantapa. Go guiyongante wadāni, Timönö nänöogængä wäänä iñömö nanguï daicawo gawænte nangæ bacampa cæbii, änāni. ³⁹ Eñëninque Itota tömengä weca go gongæninque daicawo inte piinte bai äninque, Idæwaa impa, angä dæ batapa. Iñinque tömengä gançæ badinque ængæ gantidinque tömënāni beyæ cæcantapa.

Nantate wæwēnāni inānite Itota cæcā waa badānīpa

(Māateo 8.16-17; Māadoco 1.32-34)

⁴⁰ Nænque gāwadecæ bayonte nantate wæwēnāni inānite Itota weca ænte pōnāni adinque tōmengā wacā ingante wacā ingante godō gampocā ate tōmēnāni waa badānitapa. ⁴¹ Ayæ waodāni nanguī ināni baōnē wēnæidi quēwēñōnānite Itota angā ēñēninque tao godinque,

—Bitō Wængonguī Wēmi inōmi imīpa, ante Yæ ānānitapa.

Īninque Itota, Botō Codito inōmo imīpa, ante do ēñēnānīpa, ante wædinque wēnæidi inānite, Apocænē imāewedāni, ante edæ wææ angacāimpa.

Itota oodeoidi odōmōincōnē go guite apænecā

(Māadoco 1.35-39)

⁴² Ayæ baānæ ate Itota wayōmō onōmæca gocantapa. Gocā adinque wadāni tōmengā ingante ante diqui diqui minte tōmengā weca do pōninque, Mōnitō imōnite emō cæte godāmaī incæbiimpa, ante wææ cæcæte ante cædānitapa. ⁴³ Ate wædinque tōmengā wææ āninque,

—Botō, Wængonguī Awēnē Odeye nempo watapæ quēwenguīnō anguēnē, ante cōwē apænequēnēmo imīpa. Wængonguī, Mānōmainō ante apænecæbiimpa, ante botō imote da pōnongā pōnīmo inte botō tōmānāni quēwēñōmō gote apænequēnēmo inte gobopa.

⁴⁴ Ante Oodeabæ godinque tōmēnāni odōmōincōnē go guī go guī cædinque Itota apænecā ēñengadānimpa.

5

Gæyæ nanguī pōnī dadōwēnānīpa

(Māateo 4.18-22; Māadoco 1.16-20)

¹ Ayæ Itota Guēnetadepæ wedeca gote ongōninque Wængonguī nānō apænedō ante apænecantapa. Ēñencæte ante cædinque nanguī ināni godongāmæ pō goto ongote ēñē congadānimpa. ² Apænecā ēñēñōnāni tōmengā gomō ayongā gæyæ nē dadōwēnāni dicamōñæ yamoncæte ante ti wææninque tōmēnāni nāni ti wææ godimpo mēa wipo gāwapæ wedeca omædempo wāi wocæ acantapa. ³ Adinque

Itota adoque wipodē Timōnō wipodē guiidique tōmengā ingante, Tæcæpæno gāmænō eyequei wo go wāi wocæe, angā gā go wāi wocængā ĩninque Itota tæ contate tōmēnāni inānite odōmonte apænecā ēñēnānitapa. ⁴ Tōmēnāni inānite ĩnque apænedinque Timōnō ingante,

—Bitō wipo tæcæpæno godōmenque ænte gobi ate mīnitō dicamōñæ wo guitodonte gæyæ dadonte æncæmīnimpa.

⁵ Āñongā Timōnō,

—Awēnē ēñēmi. Tōmāā woyowotæ gæyæ dadoncæte ante dicamōñæ ancaā guitodōñōmōni wīi datapa. Incæte bitō āmi beyænque botō Ao ante cæcæboimpa.

⁶ Ante māo guitodōñōnāni gæyæ nanguī pōnī da ate dicamōñæ wodo wægo tengatimpa. ⁷ Īninque Timōnōidi wa wipodē ongōnāni ponte godongāmæ æncædānimpa, ante omō cædāni adinque wa wipo ænte pōnāni ate gæyæ mēa wipodē eyede pōnī ñōnōnāni ate wipo emā guiicæ cætimpa.

⁸ Īninque, Itota angā beyænque gæyæ nanguī pōnī æmōnīpa, ante adinque Timōnō Pegodo ĩñōmō Itota onōwa gāānē ædæ wææninque,

—Awēnē ēñēmi. Botō wēnæ wēnæ entawēmo ĩñōmote bitō waēmō pōnī entawēmi inte nānēnē goe, angacāimpa.

⁹ Ante guīñente wæyongante nē dadōwēnāni wadāni adobaī, Āebānō cæte nanguī pōnī gæyæ dadonte æmōō, ante wædinque ancaī guīñēninque Timōnō tōnō godongāmæ wædānitapa. ¹⁰ Ayæ Timōnō tōnō godongāmæ gæyæ nē dadōwēna Tebedeo wodi wēna Tantiago tōnō Wāō adobaī guīñente wægadāimpa. Īninque Itota ĩñōmō Timōnō ingante,

—Guīñēnāmaī incæbiimpa. Gæyæidi gæte bitō æmaī bitō ĩncayæ ate waodāni inānite gæte baī cædinque apænebi ēñēninque ponte quēwencædānimpa.

¹¹ Angā ēñēninque wipo emōnaiya ænte māmō ñā cæcadodique tōmēnāni māincoo tōmancoo edæ emō cædinque edæ Itota mīñæ wadæ gogadānimpa.

Nē baadingā ingante Itota wadæ caa-campa

(Māateo 8.1-4; Māadoco 1.40-45)

12 Ìincayæ ate Itota wadäni nāni quëwëñömö gote quëwëñongante wacä cöwë baate ëñawëñongä inte tömengä weca ponte guidömëmæ ædæ wææninque angantapa,

—Awënë, bitö Ao ämi inte wadæ caabi ìinque botö waintai baabaïmopa.

13 Añongä Itota pædæ wææmpo gampo caadinque,

—Ao ämopa. Bitö waintai baacæbiimpa.

Ante tæcæ añongä ñömæintai nänö ëñadintai edæ dæ baadinque tömengä waintai do baacantapa. 14 Ìinque Itota tömengä ingante,

—Ëñëmi. Bitö waintai baadimi inte wadäni ìänite mäo apænedämaï ìe. Wæætë, Näwangä impa, ante acædänimpa, ante cædinque bitö, Wængonguï quï, ante nê godongä weca töngä godinque waintai bitö baadintai odömömi ædæmö acæcäimpa. Ayæ Möitee wodi wææ ante nänö angaincoo bai ænte pöningue bitö waintai bitö baadi beyæ ante edæ, Wængonguï quï, äninque nê godongä ingante pædæ godömi æncæcäimpa, ante wææ angantapa.

15 Wææ angä incæte, Itota mänömaï cæcampa, ante nanguï gode ä gode ä cædäni ëñëninque nanguï ìäni Itota apænecä ëñencæte ante ayæ tömënäni nāni caate wædö waa bacæte ante goto pö goto pö cægadänimpa. 16 Itota ìñömö wantæ wantæ ìñö önömæca nänënë godinque Wængonguï ingante wæætë wæætë apænegacäimpa.

Nê cömäingä ingante Itota angä dao dao gocampa

(Mäateo 9.1-8; Mäadoco 2.1-12)

17 Ayæ adobaï ìimö ìñö ìimö ìñö Itota cöwë odömönte apænegacäimpa. Mäniñedë oodeoidi nāni wææ angainö ante nanguï adinque nê ëñëñäni ìñömö nê odömönäni ìñönänimpa. Wadäni adobaï, Mönö wææ angainö ante ëñente cæcæimpa, ante nanguï änäni guiquënë Paditeoidi nāni änäni ìñönänimpa. Ìinque Itota mäniñedë odömönte apæneyongä mänināni nê odömönäni tönö Paditeoidi ìñömö Gadideabæ nāni quëwëñömö ta Oodeabæ nāni quëwëñömö ta pöningue ayæ Eedotadëë ìñömö ta pöningue Itota weca pöningue tæ contate a ongönänitapa. Mäniñedë wadäni

wa wa badinque wënæ wënæ inte wædäni ìñönänite Itota ìñömö Awënë Wængonguï nänö tæï piñænö entawëninque nanguï cæcä waa badönänimpa. 18 Ìinque wadäni nê cömäingä nänö möimpataa æmætæ æmætæ bæi ongonte nææninque, Itota weca ænte manguï ñö cæcæimpa, ante pönänitapa. 19 Ponte ayönäni wadäni eyede pönï goto ongönäni adinque nê ænte mämö pönināni ìñömö, Ædö cæte guiquü. Ante wædinque oncömäa ìñö æidämæ mäi æidinque dai bæte mænönïñömö epæ cædäni ompite gongæñö tömënäni cömäingä möimpataa bæi ongöninque tömengä ingante godongämæ ongönäni weca tæcægedë Itota weca pædæ wæænönäni ongongantapa. 20 Mänömaï cædäni adinque Itota, Näwangä wede pönente cædänipa, ante adinque,

—Æmigo, wënæ wënæ bitö cædimämo ante ñöwo ñimpo cætimpa.

21 Añongä Paditeoidi tönö nê wææ odömönäni nämäneque pönente tededinque, “Wënæ wënæ cædingä ingante æcänö ñimpo cæquingää. Ìingä ìñömö Wængonguï ingampa diyæ mänömaï cæquingää. Edæ babæ ancædö.”

22 Ante pönëñönäni Itota tömënäni nāni pönëwënö ante do ëñëninque,

—Minitö mïmöno quimæ wënæ wënæ pönëwëminii. 23 “Nê cömäingä nänö wënæ wënæ cædimämo ante godö ñimpo cæbopa,” ante botö Wængonguï bai ämo ëñëninque mïnitö guiquënë, Wængonguï ingampa diyæ mänömaï cæquingää, ante pönëminipa. Ayæ wæætë, “Ængæ gantidinque möimpata ænte dao dao gocæcäimpa,” ante botö Wængonguï bai ämo ëñëninque mïnitö adobaï, Wængonguï ingampa diyæ mänömaï cæquingää, ante pönëmini ìmaïminipa, ante awædö. Ìñæmpa mänömainö ante pönëmini ìinque mïnitö edæ æbänö cæquënëmo äminii. 24 Incæte botö Waobo ëñagaïmo inte inguipoga quëwëninque waodäni nāni wënæ wënæ cædimämo ante nê ämo inte pönö ñimpo cæbopa, ante mïnitö edæ ëñencæminimpa, ante botö ìimäi cæbopa.

Äninque nê cömäingä ingante edæ,

—Bitō ïmite ämo ëñëe. Ængæ gantidinqe bitō mömpata topo cæte æninque tōmëmi oncönë næænte goe.

²⁵ Angä ëñëninque cōmäingä ïningä incæ edæ tōmänäni ayönäni ængæ gantidinqe, Wængonguï ñäö bai ëmönongå inte pönö tæï piñænte cæcä æmopa, ante apænedinqe tōmengä nänö öñöninta topo cæte tao oncönë ænte gocantapa. ²⁶ Gocä ate wædinqe tōmänäni, Æbänö cæcäi, ante ëñënämaï inte guñente wædinqe, Wængonguï bitō ñäö bai ëmömi inte waa pönï cæbi amönipa, ante watapæ apænegadänimpa. Ayæ,

—Ñowo ïñömö mä pönï cæcä amönipa, ante ancai guñente wædänitapa.

Debii ingante Itota angä tee empote gocampa

(Mäateo 9.9-13; Mäadoco 2.13-17)

²⁷ Ayæ ate Itota tao gote ayongä odömäno awënë nänö äninta ante nē ængä Debii ingante acantapa. Tōmengä ïñömö Awënë nänö æimpa gäänë tæ contate ongongä adinqe Itota tōmengä ingante,

—Botö miñæ pöe.

²⁸ Angä ëñëninque do ængæ gantidinqe Debii mänincoo tōmancoo ëmö cæte Itota miñæ wadæ gogacäimpa.

²⁹ Ayæ ate Debii, Itota beyæ, ante tōmengä oncönë ææmæ nanguï pönï cæcantapa. ïninqe ææmæ becæte ante awënë beyæ nē æwënäni nanguï ïnäni pö tæ contate cæñönäni wadäni adobai pö tæ contate cænäni. ³⁰ Adinqe Paditeoidi tönö tōmënäni nē odömönäni guiquënë Itota miñæ nē godäni ïnänite piinte äninque,

—Odömäno awënë beyæ nē æwënäni tönö wadäni nē wënæ wënæ cædäni tönö mïnitö quimæ godongämæ ponte tæ contate bete cæmïni.

³¹ Ante püñönäni Itota wæætë tōmënäni ïnänite,

—Në waa ingä guiquënë, Cæbi waa baboe, änämaï ïñongante nē wënæ wënæ ingä guiquënë dotodo ingante, Cæbi waa baboe, ante do aa pecampa.

³² Pancadäniya, Nämä incæ nē nō entawëmo ïmopa, ante nē änäni ïñönänite botö ïñömö edæ nē dotodo bai adobai ïnomo inte tōmënäni ïnänite aa pedämaï incæboimpa. Wadäni guiquënë, Nämä

wënæ wënæ cæbo ïmopa, ante nē änäni ïñönänite botö, Tōmënäni, Idæwaa wënæ wënæ cæte awædö, ante Wængonguï gämænö poncädänimpa, ante cædinqe tōmënäni ïnänite aa pecæ pongaboimpa, ante Itota apænegacäimpa.

Ee ate cænämaï ingæimpa, ante nē änäni (Mäateo 9.14-17; Mäadoco 2.18-22)

³³ Itota ingante ïmaï ante ayæ änänitapa. Wäö miñæ nē godäni ïñömö, Wængonguï beyæ, ante ee ate cænämaï ïnäni. Ayæ Paditeoidi miñæ nē godäni adobai ee ate cædänipa. Bitö miñæ nē godäni guiquënë do cænte bete quëwënäni tōö.

³⁴ Änäni ëñëninque Itota wæætë,

—Onguïñængä nē monguingä wente ænte pönäni ïñönänite mïnitö wæætë, Ee ate cænämaï ïedäni, ante edæ ædö cæte wææ anguimïni. Monguingä nänö wente ænte nē pönäni bai ïñönäni inte botö miñæ nē godäni ïñömö ædö cæte wæwente bai cænämaï inguïnäni. ³⁵ Wæætë ayæ ate guiquënë, Monguingä, nani nē änongå bai ïñömote wadäni ponte botö ïmote ö ænte gocädänimpa. Mänömaï cædäni ate botö miñæ nē godäni ïñömö mäniñedë ate wæætë cænämaï inte wæcädänimpa, ante Itota apænegacäimpa. ³⁶ Ayæ, Wængonguï Awënë nempo quëwëninque æbänö cæquïi, ante ëñencädänimpa, ante Itota ïmæca quëwënäni nani cæinö ante odömönte ïmaï ante apænecantapa.

—Mïincoo badonte ate waocä dicæ adocoo wänä ñænte pancacooga æninque pedæncocoo pönö tadömonguingä. Mänömaï cæcä ïninqe edæ mïincoo incæ do wänä tente baquënë. Ayæ pedæncocoo ëmönö bai mïincoo wïi adobai ëmopa. Mïnitö, Awente bai cænämaï inte mönö quëwengæimpa, ante mïni änewënö guiquënë pedæncocoo bai inte wote baquïne ënepa. Wængonguï gämænö pöninqe quëwencæmïnimpä, ante botö apænedö guiquënë mïincoo bai inte quëwenguïne ënepa. ïninqe wote baquïne tönö quëwenguïne tönö ædö cæte mënea ante ëñente cæquïi. ³⁷ Ayæ adobai yowepæ biinömæ mïimæ æninque waocä ædö cæte picæ æmontaicadedë godö pe ñiñænguingä. ïñæmpa picæ æmontaicadedë pe ñiñængä ïninqe edæ

tæi æbæ æmæwo goquënë. ³⁸ Miiimæ wæætē miincadedē pe ñiñængæimpa. Adobaï botō odömönō miiimæ bai iñonte dodāni nāni odömōwēnō ædō cæte botō odömönō tönō adoyedē eñente cæquii. ³⁹ Incæte, “Gönænīmæ iñömō waēmepæ ïmæmpa,” ante nē bedōmīni inte mīnitō miiimæ ædō cæte quingæ bequimīni, ante Itota angacāimpa.

6

Guëmanguïönæ iñonte tōmēmō tā pete ænānīpa

(Mäateo 12.1-8; Mäadoco 2.23-28)

¹ Ayæ ate guëmanguïönæ iñonte Itota tōmēmoncodē tæcæguedencodē gocantapa. Goyongä tōmengä miñæ nē godāni iñömō tōmēmō inca tā pete ænīnque dacæ dacæ cædinque ade cæ ade cæ godāni. ² Adinque Paditeoidi guiquënë,

—Iñæmpa, Guëmanguïönæ iñonte mäninō bai cædāmaï iedāni, ante dodāni nāni wææ angainō ante mīnitō eñenāmaï inte quimæ cæmīni.

³ Ante pīiñōnānite Itota,

—Docä Dabii wodi tōmengä nānō emiñænāni tönō omæpodāni inte gæwænte wædinque æbānō cægadāni, ante yewæmonte oñō incæ mīnitō iñæmpa adāmaï inte bai amīni awædō. ⁴ Wængonguï quī, ante nē godōnānīque cænguī impa, ante wææ nāni angainō bai cædinque dodāni pāo, Wængonguï quī, ante ñoncæ ñoncæ cædōnānīpa. Incæte Dabii wodi Wængonguï oncōnē go guidinque mānii pāo do ænte cænīnque tōmengä miñæ nē godāni inānite godōmenque godongä cænānitapa, ante yewæmonte oñō apa anewēmīni.

⁵ Ante apænedinque Itota tōmēnāni inānite ayæ apænecantapa.

—Botō iñömō Waobo nē eñagāimo iñömō Tæiyæ Awēnē inōmo inte edæ guëmanguïönæ Awēnē inōmo imopa. Iñinque botō, Guëmanguïönæ iñonte edæ æbānō cæquii, ante adobo nē Amo ingāimo imopa, ante Itota apænegacāimpa.

Ni cōmampoingä

(Mäateo 12.9-14; Mäadoco 3.1-6)

⁶ Iñcayæ ate guëmanguïönæ adobaï waönæ iñonte Itota oodeoidi odömōincōnē go guite odōmonte apæneyongä onguiñængä onompo tōmēmæ inō ni cōmampote wædongä inte māniñömō a ongongan-tapa. ⁷ Māniñedē nē odömōnāni tönō Paditeoidi guiquënë, Itota wapiticæ cæcä iñinque mōnō wæætē pīinte angæimpa, ante nē anewēnāni inōnānīpa. Nōwo iñömō tōmēnāni, Nōwoönæ guëmanguïönæ i incæte Itota ni cōmampoingä ingante, Waa bacæcāimpa, ante cæcä iñinque mōnō māo pīinte angæimpa, ante babæ cæcæte ante cōwā adānitapa. ⁸ Mānīnō, Mōnō pīingæimpa, ante nāni pōnēwēnō ante Itota iñömō onōwēnenque edæ do eñēnīnque edæ ni cōmampoingä ingante,

—Bitō ængæ gantidinque tæcæguedē pō næ gongæe.

Angä eñēnīnque ængæ gantidinque pō næ gongægantapa. ⁹ Iñinque Itota nē pīinte ancædāni inānite,

—Ämo apænēmīni eñēmoedāni. Guëmanguïönæ iñonte mōnō æbānō cæquënëmö imōo, ante wææ angatīi, ante pōnēmīni. Mōnō waa cæquënëmö imopa, ante pōnēmīnitawo. Wæætē edæ, Mōnō wēnæ wēnæ cæquënëmö imopa, ante pōnēmīnitawo. Guëmanguïönæ iñonte edæ, Quēwencædānīpa, ante cæquënëmö imopa, ante pōnēmīnitawo. Wæætē mōnō edæ omæe ewenguënëmö imopa, ante pōnēmīnitawo. ¹⁰ Änīnque æmætæ gomō æmætæ gomō edæ tōmānāni inānite adinque ni cōmampoingä ingante,

—Pædæ pompobi.

Angä eñente cædinque nē cōmampodingä incæ pædæ æmpote edæ ædæmö waa empocä bapocantapa. ¹¹ Iñinque tōmēnāni, Guëmanguïönæ incæ mānōmaï cæcampa, ante ænguī badinque, Itota ingante mōnō æbānō cæquii, ante pīinīnque nāni cabo nāmāneque tedegadānīpa.

Itota angä ate dote ganca ināni nē gode änāni badānīpa

(Mäateo 10.1-4; Mäadoco 3.13-19)

¹² Māniñedē Wængonguī ingante apænecæte ante Itota ānanquidi æidinque tōmāā woyowotæ apænee congantapa.

¹³ Nāo ba adinque tōmengä miñæ nē

pöninäni inänite aa pecä pönäni ate tömengä, Botö beyæ në gode ämini incæminimpa, ante dote ganca inäni mänimpodäni inänite apænte ængacäimpa. ¹⁴Tömengä nänö në da godönäni baquinäni iñömö edæ iimaï emönönänimpa. Tānocä Timönö emongä ingä incæte Itota wawo Pegodo pemongacäimpa. Ìngä Pegodo tönö Æntade nāna caya, Tantiago tönö Wäö nāna caya, Pedipe tönö Batodömëe, ¹⁵Mäateo tönö Tömato, Adepeo wengä Tantiago inönänimpa. Ayæ, Mönö ömæ ingæimpa, ante nanguï cædongä inte wacä Timönö inongäimpa. ¹⁶Tantiago wengä Codaa tönö Itota ingante odömöte në godonguingä ingaingä inte wacä Codaa Icadote nāni ānongä inatapa. Mänimpodäni inänite Itota apænte ængacäimpa.

Tæiyænāni inänite Itota gampocä waa badänipa

(Mäateo 4.23-25)

¹⁷Mänimpodäni tönö Itota mæmö iñömö wææninqe næ gongænte ongongantapa. Mäniñömö tömengä miñæ në godäni nanguï inäni do ponte a ongönönänimpa. Ayæ tömënäni tönö wadäni Eedotadëe iñömö quëwënäni tönö Oodeabæ tömāo quëwënäni ayæ Tido eyequeï Tidöo eyequeï gāwapæ wedeca quëwënäni nanguï inäni do ponte a ongönönänimpa. Tömënäni, Itota apæneca ëñengæimpa, ante ayæ, Wënæ wënæ inte wæwëmö inte mönö waa edæ bacæimpa, ante pöninqe a ongönänitapa. ¹⁸Ayæ wënæidi në wentamö ewocadäni tönö quëwente wæwënäni mäniñömö ponte ongönäni inänite Itota adoyömö wææ pöninqe godö cæcä waa badänitapa. ¹⁹Ayæ, Itota tæi piñænte entawengä inte pönö cæcä ate waa badänipa, ante adinqe tömänäni tömengä ingante gampocæte ante cædänitapa.

Mini toquinque, ante ayæ, Mini wæquinque, ante

(Mäateo 5.1-12)

²⁰Ayæ Itota tömengä miñæ në godäni inänite gomö adinqe apæneca ëñänänitapa.

“Minitö, Botö waëmö imopa diyæ Awënë Odeye nempo guiquimoo, ante në wæwëmini iñömö watapæ mini toquinque

Wængonguï Awënë Odeye nempo mini quëwenguinö edæ do ëaminipa,” angantapa.

²¹“Inguipogaque gæwænte wæmini inte edæ mini watapæ toquinque Wængonguï pönongä tömo pönö cæncæminimpa,” angantapa.

“Minitö inguipogaque wæwente quëwëmini inte edæ mini watapæ toquinque Wængonguï pönö waadete cæcæcäimpa,” angantapa.

²²“Botö Waobo ëñagaïmo miñæ gomini beyænque wadäni minitö iminite badete todinqe piinte adinqe wido cædänitawo. Botö beyænque minitö emöwo ante, Wiwa emöwo awædö, ante Baa änänitawo. Edæ mini waa toquinque inguipogaque mänömaï cædänipa. ²³Öönædë mönö ænguino ante nanguï ongompä, ante pönëninque minitö ñowodäni nāni piinte cæyedë incæ watapæ toedäni. Ìnāni në piinte cædäni wæmæidi incæ Wængonguï beyæ në apænegaïnäni inänite edæ adobaï piinte cægadänimpa, ante toquënë wæwëminii. ²⁴Wæætë edæ mäincoo nanguï në ëamini guiquënë iincayæ ate mini wæquinque edæ inguipogaque watapæ quëwëminipa,” ante Itota apænecantapa.

²⁵“Në tömo cæmini guiquënë iincayæ ate mini gæwænte wæquinque edæ inguipogaque tömo cæminipa,” ante apænecantapa.

“Në Ca ca tomini adobaï iincayæ ate Ca ca mini wæquinque edæ inguipogaque tomnipa,” angantapa.

²⁶“Minitö iminite ante tömänäni waa apænedäni ininqe edæ mini wæquinque ingæimpa. Ìñæmpä inäni në waa apænedäni adodäni mæmæidi adobaï cægadänimpa. Wadäni babæ wapiticæ apænedäni incæ, Wængonguï beyæ në apænebo imopa, ante në änewënäni inänite inäni mæmæidi iñömö adobaï waa apænegaïnänimpa,” ante Itota apænecäimpa.

Në piinte cædäni inänite waadete cæcæcäimpa, ante

(Mäateo 5.38-48, 7.12)

²⁷Ayæ godömenque apænedinqe Itota, “Minitö në ëñëmini iñöminite ämo ëñëdäni. Minitö iminite në piinte cædäni inänite minitö wæætë waadete cædäni. Minitö

iminite nē pūinte adāni inānite mīnitō wæætē waa cæedāni. ²⁸ Wænæ wænæ bacæmīnīmpa, ante nē ānāni inānite mīnitō wæætē waa apænete godō cæedāni. Mīnitō iminite nē wænæ wænæ cædāni inānite mīnitō wæætē tōmēnāni beyæ ante Wængonguī ingante apæneedāni. ²⁹ Wacā bitō imite imæmpaga inō tamongā wædīmi inte bitō wæætē æmæmpaga inō dadi emæmonte ee ongōmi tamongæ. Ayæ yogui beyæ bitō yabæcoo ò ængā adīnque onōnancapæncōo tōnō ee abi ò ængæ. ³⁰ Māincoo ante nē angā ingante tōmengā nānō ānoncoo edæ ee godōmi ængæ. Ayæ bitō māincoo nē ò ængā ingante, Wæætē adodō pōnōmi æmoe, ānāmaī incæbiīmpa. ³¹ Mīnitō, Wadāni botō imote waa cæcædānīmpa, ante wæmīnitawo. Edæ mīnīnō ante mīni wædō baī adobaī wædānīpa, ante pōnēnīnque mīnitō wæætē wadāni tōmānāni inānite waa cæedāni,” ante Itota angacāīmpa.

³² Ayæ apænedīnque, “Mīnitō iminite nē waadedānīnque inānite waadete pōnēmīni inte wadāni inānite waadedāmaī imīni adīnque edæ Wængonguī dicæ mīnitō iminite waadete pōnō aquingāa. Inæmpa nē ēñēnāmaī cædāni incæ nē waadete pōnēnānīnque inānite waadete pōnēnīnque mīnitō cæganca do cædānīpa tōō. ³³ Ayæ adobaī mīnitō iminite waa cædānīnque inānite waa cæmīni inte wadāni inānite waa cædāmaī imīni adīnque Wængonguī mīnitō iminite dicæ waa aquingāa. Inæmpa mīnitō cædō baī nē ēñēnāmaī cædāni incæ adobaī do cædāni apa cæmīnī. ³⁴ Ayæ, Adodō pōnongā æncæboīmpa, ante pōnēwēnīnque mīnitō nē adodō pōnongūngā ingante godōmīni inte wadāni inānite godōnāmaī imīni adīnque Wængonguī mīnitō iminite dicæ waa aquingāa. Inæmpa nē ēñēnāmaī ināni nāni cabo incæ, Adodō pōnongā æncæboīmpa, ante pōnēwēnīnque nē adodō pōnongūnganque ingante godōnīnque mīnitō cædō baī adobaī cædānīpa tōō.”

³⁵ “Wæætē mīnitō iminite nē pūināni inānite waadete pōnēnīnque waa cæedāni. Ayæ tōmēnāni nāni ānō ante, Adodō pōnōmi æmoe, ante ānāmaī inte ee godōmīni æncædānīmpa. Mānōmaī waadete cæmīni inīnque mīnitō īncayæ ate mīni waadete cægānō beyæ nangūi æmaīmīnīpa. Ayæ

mōnō Mæmpo Æibæ pōnī nē Quēwengā īñongante tōmengā ingante nē waa ate pōnēnāmaī ināni inānite tōmengā godō waadete cæcampa. Nē wīwa cædāni inānite tōmengā godō waadete cæcampa. Inīnque mīnitō tōmengā nānō cæī baī adobaī waadete cæmīni inīnque Mæmpocā waadete nānō entawēnō baī mīnitō adobaī entawēnīnque tōmengā wēmīni imāīmīnīpa. ³⁶ Mōnō Mæmpo pōnō waadete nānō waa cægāī baī mīnitō adobaī wadāni inānite godō waadete waa cæedāni,” ante Itota angacāīmpa.

Wadāni inānite apænte ānāmaī iedāni, ante (Māateo 7.1-5)

³⁷ Ayæ wæætē Itota īīmaī ante apænecantapa. “Wacā ingante apænte ānāmaī imīni inīnque mōnō Mæmpo wæætē mīnitō iminite apænte ānāmaī incæcāīmpa. Ayæ, Wacā nānō tente wæquinque wænæ wænæ cæcampa, ante ānāmaī imīni ate mōnō Mæmpo wæætē, Mīni tente wæquinque wænæ wænæ cæmīnīpa, ante apænte ānāmaī incæcāīmpa. Wacā wænæ wænæ cæcā ingante mīnitō nīmpo cæmīni ee gocā ate mōnō Mæmpo adobaī mīnitō iminite nīmpo cæcā quēwencæmīnīmpa. ³⁸ Wadāni inānite ee godōedāni. Mīnitō ee godōmīni ænāni inīnque wadāni wæætē mīnitō iminite ee pōnōnāni æncæmīnīmpa. Nē pōnōnāni īñōmō tōmēnāni nāni tee māīncadedē da wēnīnque da wæænonte wancæ wancæ cædīnque eyepote wæængūnque eyede pōnī da wēnīnque mīnitō ænguīncadedē pōnō wāne cædāni edæ æncæmīnīmpa. Edæ mīnitō tee mante mīni godōīncade incæ adocadeca tee mante baī cædīnque Wængonguī mīnitō iminite eyepæ pōnongā æncæmīnīmpa,” ante Itota apænegacāīmpa.

³⁹ Ayæ, Wængonguī Awēnē nempo quēwēnīnque æbānō cæquīī, ante ēñēncædānīmpa, ante Itota imæca quēwēnāni nāni cæīnō ante odōmōnīnque īīmaī apænecantapa. “Babetamongā ingante wacā babetamongā incæ ædō cæte māo odōmongā goquingāa. Inæmpa mānōmaī cædīnque nāna babetamoncaya ompite adopiticæ guēa go wææ guīibāīnāpa. ⁴⁰ Nē odōmonte apæncā īñōmō nē ēñengā inte odōmōñongante tōmengā nānō nē emīñengā guīquēnē dicæ

godömenque eñengä ingäa. Incæte iinque odömonte apænegä eñëninge tömengä nänö nê emiñengä abæ tawæninge wæætê nê odömongä bai bacæcäimpa,” ante Itota apænegacäimpa.

⁴¹ Ayæ apænedinque, “Bitö töninacä wædænque wænæ wænæ cæcä iñongante bitö guiquënë nanguï bitö wænæ wænæ cædinö ante wädämaï inömi inte tömengä ingante quinante piinte änewëmi. Iñæmpa tömëmi awinca gäänë awæmpa wææ ongompa, ante adämaï inte bai cæbipa töö. ⁴² Tömëmi awinca gäänë awæmpa wææ ongompa, ante bitö adämaï inte bitö töninacä ingante, ‘Biwi, bitö awinca guiyä mæ owo bai ate æ wimömoe,’ ante edæ abipa ænguimii. Iñæmpa bitö nê wadö tedete wadö cædömi inte edæ tömëmi awinca gäänë wææ ongompa täno wido cæte ate edonque adinque bitö töninacä awinca guiyä owodö æncæbiimpa,” ante Itota angacäimpa.

Awæ æbänö iwæ, ante tömenca bete eñengæimpa, ante

(Mäateo 7.17-20, 12.33-35)

⁴³ Ayæ godömenque apænedinque Itota, “Waincawæ incæ ædö cæte baaca incaquiï. Wæætê wiwa iwæ incæ ædö cæte wainca incaquiï. ⁴⁴ Awæ æbänö iwæ, ante eñencæte ante mönö tömenca tä pete bete eñengæimpa. Iigowæñeca æncæte ante woadäni dicæ daa mongæwäa edæ tä pete ænäniyaa. Yowemö æncæte ante woadäni dicæ daacamëña tä pete ænäniyaa. ⁴⁵ Mönö waocabo iñömö adobai inömö inte cæmompä. Mïmönë mönö pönëmämo eyede tate bai tao godedinque mönö mänimämoque ante pönëninge tedemompä. Waocä nê waa cæcä guiquënë waa pönï tömengä nänö pönënö ante entawëninge waa tedecampä. Nê wiwa cæcä guiquënë tömengä nänö wiwa pönënö ante entawëninge wiwa tedecampä,” ante Itota apænegacäimpa.

Nê mænöna ante

(Mäateo 7.24-27)

⁴⁶ Ayæ godömenque apænedinque, “Minitö iñömö botö imote, ‘Awënë, mönitö Awënë imipa,’ ante tedemini incæte botö änö ante quinante wiï eñente cæminii.

⁴⁷ Nöwo iñömö edæ apænebo eñëedäni. Botö gämænö ponte eñëninge waocä botö änö ante do eñente cæcä iñömö tömengä iïmaï ingampa. ⁴⁸ Waocä adocanque oncö mænoncæte ante guibæ ææ wodinque dicaboga mænoncæte ante gönongä bai nê eñente cæcä iñömö adobai cæcä ingampa. Tömengä oncö tæi mænonte ongö iinque æpæ äninge quingæ pö incæte oncö ædö cæte wancæ wancæ cæquiï. Iñæmpa tæi mænonte ongompa. ⁴⁹ Wæætê waocä guibæ ææ wote gönönämaï yabæque oncö mænongä ate yabæque mænöiñömö æpæ äninge pö ate oncö dobæ bogo cæte tæ wææninge æmæwo gopa. Botö apænebo eñëninge waocä nê eñënämaï cæcä iñömö tömengä nê yabæque mænongä bai inte ocai incadämaï inte bai eñënämaï cæcampä,” ante Itota iinque apænegacäimpa.

7

Capitöo ingante nê cæcä ingante Itota cæcä waa bacampä

(Mäateo 8.5-13)

¹ Ayæ tömënanï inänite iinque apænedinque Itota Capënaömö nänï quëwëñömö gogacäimpa. ² Mäninömö quëwëninge odömäno tontadoidi awënë capitöo ingante nê cæcä iñömö wænæ wænæ badinque æmæwo wæncæ cæcä ingantapa. Awënë capitöo ingante nê cæcä iñongante awënë wæætê tömengä ingante nanguï waadecantapa. ³ Iinque, Itota waa cæcä ingampa, ante mämö apænedäni eñëningä inte tontado capitöo iñömö oodeoidi inänite nê aadäni nänï Picæncabo inänite apænedinque, Minitö Itota weca godinque tömengä ingante ämini eñente pöninque tömengä wæætê botö imote nê cæcä ingante cæcä waa bacæcäimpa. ⁴ Angä eñente godinque nê aadäni nänï Picæncabo guiquënë Itota weca pöninque tömengä ingante nanguï änänitapa.

—Mönö oodeocabo iñömöte mäningä tontado capitöo iñömö mönö imonte waa cæcampä, ante wædinque bitö tömengä beyæ waa cæcæbiimpa. ⁵ Tömengä iñömö mönö oodeocabo iñömöte waadete cædinque, Wængonguï apænegä nänï eñente yewæmongainta ate minitö odömöincö

impa, ante do mænonte pönongä æmompä cæbii.

6 Änani eñëningue Itota nê aadani nani Picæncabo tönö wadæ gocantapa. Oncö obo pöñönänite tontado capitäo iñömö tömengä guidënanî inänite, Go bee ténique botö beyæ Itota ingante iïmai ante apæneedäni, angantapa. “Awënë ee ongöe. Botö waëmö imopa diyæ bitö botö oncönê pö guiquimii, ante capitäo bitö imite angampa,” ante apæneedäni, angä ponte apænedänitapa. 7 Ayæ adobaï, “Botö wii waëmö inömo inte edæ bitö weca pönämai intabopa. Incæte bitö adoyömö ongöninque ämi ininque botö imote nê cæcä waa bacæcäimpa. 8 Bitö iñömö Awënë Wængongui ingante nê eñente cædömi imi bai botö adobaï wacä awënë ingante nê eñente cæbo imopa. Ininque botö awënë äabo inte botö awënë beyænque ämo eñëningue tontadoidi wæætê guifente wædinque botö änö ante cædänipa. Ininque adocanque ingante botö, Goe, ämo eñëningue edæ do gocampa. Wacä ingante, Pöe, ämo eñëningue edæ do pongampa. Ayæ botö imote nê cæcä ingante, Cæe, ämo eñëningue edæ do cæcampa.” Mänömainö ante Itota ingante botö beyæ ante apænemini eñengädäni, ante tontado capitäo iñömö tömengä guidënanî inänite angä godinque tömënanî wæætê capitäo nänö änö bai ante Itota ingante adodö ante apænedänitapa.

9 Mänömainö ante tontado awënë beyæ apænedäni eñëningue Itota wæætê, Mäningä tontado awënë iñömö waa pöni eñengampa, ante wædinque godongämæ ongönäni inänite,

—Nawangä ämopa. Mönö idægocabo iñömönte mäningä wede pönengä ingä bai adocanque incæ edæ dæ angä awædö, angantapa.

10 Ayæ nê bee tencæ pöninani oncönê wadæ gote ayönäni capitäo ingante nê cæcä iñömö do waa bacä agadänimpa.

Æmcæwo wæningä ingante Itota angä nñani ömcæmongampa

11 Itota iñömö iïmö ate Näino nani quëwëñömö gocæte ante goyongante tömengä nänö nê emiñænäni tönö wadäni nanguï inäni godongämæ gogadänimpa.

12 Mäniñömö yabædemö obo pöñongä onguifængä æmæwo wæningä ingante næænte pönänitapa. Tömengä badä owæmpoingä inongä inte tömengä wengä adocanque wængä wædinque pongantapa. Ayæ mäniñömö quëwënanî nanguï inäni wäänä tönö godongämæ pönäni acantapa. 13 Wäänä ingante adinque Itota tömengä tönö guëa wæwente bai pönëningue,

—Wædämai ië.

14 Äninqe do wæningä ingante tömënanî nani daga wenguimpa gäänê ponte gam-pocä ate nê næænänäni næ gongænänitapa. Itota iñömö,

—Edënimî, bitö imite ämopa. Ængæ gantie, angantapa.

15 Eñëningue nê wæningä incæ ængæ gantidinqe tæcæ tedecä adinque Itota wäänä ingante pædæ godongä ængantapa.

16 Itota mänömai cæcä adinque tömänäni nanguï guifente wædinque Wængongui ingante watapæ apænedinque,

—Wængongui beyæ nê apænecä tæi ëmongä inongä inte mönö weca a ongongä amoppa, änänitapa.

Ayæ,

—Wængongui quimö iñömönte Wængongui incæ mönö weca ponte godongämæ cæcampa. Nawangä impa, ante nanguï todänitapa.

17 Ayæ Oodeabæ tömäo quëwënanî inänite wayömö gomonga quëwënanî inänite mäo gode ä gode ä cæte, Itota æbänö cæcäa, ante apænedäni eñengadänimpa.

Wäo tömengä miñæ nê goda inate da pönongä pönäpa

(Mäateo 11.2-19)

18 Wäo miñæ nê godäni adobaï, Itota æbänö cæcä ingäa, ante eñëningue Wäo ingante mämö apænedäni eñengantapa. Mäninö ante apænedäni eñente wædinque Wäo iñömö tömengä miñæ nê goda mënaa inate añecä pönatapa. 19 Pöna adinque Wäo tömëna inate, Minatö mönö Awënë weca godinque botö beyæ ante iïmai ante äeda, angantapa. Awënë eñëmi. Bitö iñömö dodäni nani, Nê Ponguingä, angaïmi adobi imitawo. Wæætê tömënanî nani nê angaïmi inämai imi ininque bitö wæætê, Wacä ponguingä, ante wänö cödäni, ämitawoo.

Æbänö mönitö cæquimōnii, ante botö beyæ ante eñencæte ante äeda. Ante Wäö mēnaa inate Itota weca da godongä godatapa. ²⁰ Godinque Itota weca pōninque iimaï ante apænedatapa.

—Wäö æpænē nē guidōnongä iñōmō mönatö imōnate da pōnōninque bitö imite iimaï angampa. Awēnē eñēmi. Dodāni nāni, Nē Ponguingä, angaïmi bitö iñōmō adobi imitawo. Wæætē tōmēnāni nāni angaïmi ināmaï imi ininque bitö wæætē, Wacä ponguingä, ante wänö cōedāni, ämitawo. Æbänö mönitö cæquimōnii, ante eñencæte ante Wäö mönatö imōnate da pōnongä pontamōnapa, änatapa.

²¹ Māniñedē incæ daicawo gawænāni tōnō wēnæ wēnæ inte wæwēnāni nangui ināni inānite Itota godö waa cæcä waa badānitapa. Wēnæidi nē wiwa ewocadāni inānite tōmengä wido cæcä ate waodāni nangui ināni waa badānitapa. Babetamōnāni nangui ināni inānite tōmengä gampomongä waa bamōnānitapa.

²² Ininque mänōmaï cæcä waa ayōnate ñōwo pōna inate Itota,

—Botö godö cæbo ate babetamō inināni incæ do adāni amīnapa. Cōmante inināni incæ waa bate dao dao godāni amīnapa. Baate inināni incæ ñōwo æmontai waëmontai baadāni amīnapa. Babeta-monca ināni iñōnānite botö godö cæbo ate önōmonca eñēnāni badāni amīnapa. Do æmæwo wænte öñōnāni iñōnānite botö godö cæbo ate ñāni ömæmonte quēwēnāni amīnapa. Ömaadāni inte wæwēnāni inānite botö Wængongui Awēnē pōnō waa cæcæcäimpa, ante watapæ apænebo eñencædānimpa. Ininque minatö ponte eñēñōmīna botö æbänö apænebo eñēmīnatawo, ante ayæ, Botö æbänö cæbo amīnatawo, ante minatö ñōwo wæætē Wäö weca gote mǎo apænemīna eñengæda, angantapa.

²³ Ayæ, “Botö beyæ waocä wii piinte wadæ gocä iñōmō tōmengä nānō watapæ toquinque oda cædāmaï incæcäimpa, ante Wäö ingante mǎo apænemīna eñencæcäimpa,” ante Itota angantapa.

²⁴ Angä eñēninque Wäö beyæ nē äniina wadæ goda adinque Itota wæætē godongämæ ongōnāni inānite, Wäö æbänö

ingää, ante apænecantapa. “Minitö guiquēnē quīnō acæte ante önōmæca gomīnitapa. Cæwipa woboyæ pæmænte ate æmænō ædæ æmænō ædæ gobaingä ingante mīnitö dicæ acæ gomīnitawogaa.

²⁵ Ininque edæ quingänö ingante acæte ante gomīnitapa. Edæ waocä weocoo waëmoncoo mongænongä ingante mīnitö dicæ acæ gomīnitawogaa. Iñæmpa weocoo waëmoncoo nē mongænāni iñōmō nāmanque ante pōnente nāni ænte mǎincoo beyæ ante nē towēnāni inte tōmēnāni iñōmō awēnē oncōnē quēwēnāni apa quēwēnāni.

²⁶ Ininque edæ quīnante gomīnitawo. Minitö mīni nē go acæ cædongä iñōmō edæ Wængongui beyæ nē apænecä ingantawo. Nāwangä impa. Wængongui beyæ nē apænecä Wäö ingampa. Incæte tōmengä wii Wængongui beyæ nē apænegaināni bai inongä inte godōmenque nangui cæcä ingampa, ante apænebo eñēmaïminipa. ²⁷ Wængongui iimaï angampa, ante yewæmongatimpa.

‘Botö beyæ nē apænecä ingante da godōmo godinque tōmengä taadö tǎno beyænte bai cæcæcäimpa.

Tōmengä bitö Codito imi beyæ ante taadö waa pīnonte bai waa cæcæcäimpa.’

Mänōmaïnö ante dodāni adocä Wäö ingantedö ante pōnēninque yewæmongadānimpa.

²⁸ Ñōwo iñōmō ämo eñēedāni. Imæca mīni eñagaincabo iñōmīnite æpænē mönō nē guidōnongä Wäö adocanque ñænængä iñongante wacä tōmengä bai edæ dæ angampa. Incæte Wængongui Awēnē Odeye nempo quēwēnāni iñōnāni adocanque guiyangä pōni ingä incæte Wäö pōnōmenque wædangä ingampa,” ante Itota apænecantapa.

²⁹ Itota mänōmaïnö ante apænecä nē eñēnāni iñōmō odōmāno awēnē beyæ nē æwēnāni incæ wadāni incæ tōmānāni Wäö nānō nē guidongainānique inōnānimpa. Ininque tōmēnāni, Wængongui nō cæcä ingampa, ante tōmānāni apænedānitapa.

³⁰ Paditeoidi tōnō idægoidi nāni wææ angainō ante nē ate eñēnāni guiquēnē Wäö nānō guidongaināni ināmaï inōnānimpa. Ininque tōmēnāni guiquēnē Wængongui

gāmænō ponguēnēnāni incæte edæ Baa ānānitapa.

³¹ Godōmenque apænedinque Itota iīmaī angantapa. “Mānōmaī ī inique inguipogaque ante nē quēwēnāni iñōmō quingāmē bai inānīpa. Quiēmē bai edæ quēwēnānīpa. ³² Wēñænāni mōnō godonte æiñōmō tæ contate owempodāni nāni owempodō bai edæ adobai cædānīpa, ante awædō. Wēñænāni nāni owempote cæcabo incæ ææmæ cæte bai owempote cædinque wadāni inānite aa pedānīpa. ‘Mīnitō beyæ öōña we we öōñōmōni mīnitō wæætē edæ āwadāmaī imīnitapa tōö,’ ante owempodīnque wēñænāni piīnte tedewēnānīpa. Ayæ wæætē, Waocā do wængā ate nāni wæbai, ante wēñænāni nāni owempote cæcabo iñōmō, ‘Mōnitō Ca ca wæyōmōni mīnitō wæætē edæ wædāmaī imīni wæmōnīpa,’ ante piīnīnque aa pedāni bai ñōwodāni iñōmō edæ adobai piīnte tedewēnāni inānīpa.”

³³ “Edæ iīmaī impa. Wēñænāni nāni wædō bai Wäö æpænē mōnō nē guidōnongā iñōmō cænguī cænāmaī yowepæ biīnōmæ nāni wædænque tī nāmæ bedāmaī ponte quēwēñongante mīnitō guiquēnē, Wēnæ tōnō Wäö quēwengampa, ante piīmīnīpa. ³⁴ Ayæ wæætē botō Waobo ēñagāimo inte tōmāā cænguī cænte yowepæ biīnōmæ bete mīnitō weca ponte quēwēñōmote mīnitō guiquēnē, Cæowæobi inte cæmīpa. Beowæobi inte bebīpa, ante badete tomīnīpa. Ayæ godōmenque, Odōmāno awēnē beyæ nē æwēnāni tōnō wadāni nē ēñēnāmaī cædāni iñōnānite bitō tōmēnāni æmīgo imipææ, ante botō imote piīnīnque mīnitō wēñænāni nāni piīnte aa pedō bai ānewēmīnīpa tōö. ³⁵ Incæte, Nē nō ēñēnāni iñōmō nō cædānīpa, ante adīnque, Nāwangā nō ēñēnānīpa, ante mōnō ēñengæīmpa,” ante Itota apænegacāīmpa.

Paditeocā Timōnō oncōnē Itota go guiite ēñacampa

³⁶ Ayæ ate adocanque Paditeocā incæ Itota ingante, Botō oncōnē pō cæe, angā Ao ante Paditeocā oncōnē godīnque pō guiite cæ congantapa. ³⁷ Tōmēnāni quēwēñōmō onquiyængā nē wēnæ wēnæ cæte quēwengā inongāīmpa. Tōmengā iñōmō,

Paditeocā oncōnē Itota cæncongampa, ante tededāni ēñēnīnque oguī wapæ dica adabatodo waincadedē pe ñiñænte næænte pongantapa. ³⁸ Pō guidīnque tōmengā Itota önōwaca inō pō næ gongæñīnque Ca ca wæcantapa. Ca ca wæyongā Itota önōwaca inō ömæ petæ petæ wææ aa bee adīnque onquiyængā wæætē tōmengā ocaguīncooca wadæ cæwacantapa. Ayæ queē bewadīnque oguī wapæ gao cæwacantapa. ³⁹ Mānōmaī cæcā adīnque, Pō cæe, nē āningā inte Paditeocā iñōmō nāmāneque pōnēnīnque, “Itota iñōmō Wængonguī beyæ nē apæneccā inte bai tōmengā, Æcānō botō imote gampocāā, ante ayæ, Quiēmē bai onquiyængā ingāā, ante ēñencædongāīmpa. Iñæmpa nē wēnæ wēnæ cædongā ingampa, ante do ēñencædongāīmpa.” ⁴⁰ Ante pōnēñongā Itota wæætē,

—Timōnō, bitō imite adodeque apænebo ēñēe.

—Ñongante Paditeo wæætē,

—Ao, nē Odōmōmi imi, apænebi ēñēmoe.

⁴¹ Angā inīnque Itota,

—Onguīñængā adocanque nē godōwengā inte quēwēñongante onguīñæna mēnaa inante godongā ate debe badapa. Adocanque ingante nanguī quīnīento emō godongā ate nanguī debe bayongante wacā ingante wædænque tincoenta emō godongā ate wædænque debe bacampa. ⁴² Nē godōningā nānō ānīmpota ömæpoda inte tōmēna, Ædō cæte wæætē adodō pōnonguīmōnaa, ante wæyōnate nē godōningā iñōmō edæ, Ömæpomīna inte mīnatō ædō cæte adodō pōnōmīna ænguīmoo, ante botō ænāmaī inte ñīmpo cæcæboīmpa, angampa. Inīnque Timōnō bitō imite amōpa. Mēnaa inate ñīmpo cæte ānāmaī ingā adīnque nē godongā ingante æcānō godōmenque nanguī waadete pōnengūngāā, ante pōnēmīi.

⁴³ Ñongante Timōnō,

—Wa. Godōmenque nanguī emō debe ingā iñōmō tōmengā wabānō godōmenque waadete pōnengā imāingampa, amōpa.

Angā ēñēnīnque Itota,

—Nāwangā ante pōnēmīpa.

44 Äninqe Itota onquiyængä gämænö dadi emænte adinqe Timönö ingante apænedinqe,

—İngä onquiyængä ingante edæ abi. Botö bitö oncönë pö guiyömete bitö, Mëwaquimæ, ante bitö dicæ pönömiyaa. Tömengä guiquënë ömæ wææmonte aa bewadinque tömengä ocaguinca wadæ cæwacä ae. 45 Bitö guiquënë waadedämaï inte queë bemönämaï iñömite tömengä iñömö botö pö guiyedë täno queë bewadinque cöwë queë bewacä ae. 46 Bitö guiquënë oginguipæ gao cæcadämaï iñömite tömengä iñömö ogui wapæ gao cæwacä ae. 47 İninqe botö, Tömengä mänömaï cæcampa, ante odömöninqe bitö imite ämo ëñëe. Edæ tömengä nanguï wënæ wënæ cæcä iñongante Wængongui godö ñimpo cæcä ate tömengä wæætë nanguï waadete pönengampa. Bitö iñömö edæ wædænque wënæ wënæ cæbi iñömite Wængongui pönö ñimpo cæcä ate bitö wæætë wædænque waadete pönëmi abopa.

48 Äninqe onquiyængä ingante apænedinqe Itota,

—Wënæ wënæ bitö cædinö ante pönö ñimpo cæbo æe.

49 Angä ëñëninque wadäni godongämæ cæ cönäni guiquënë godö wæntæ wæntæ äninque,

—İngä iñömö edæ waocä wënæ wënæ nänö cædinö ante, Pönö ñimpo cæbo æe, ante në angä iñömö edæ æcänö ingää.

50 Ante wædinque tedeyönäni Itota iñömö onquiyængä ingante,

—Bitö wede pönönö beyænque quëwencæbiicæpæ. Nöwo edæ wædämaï inte goe, angacäimpa.

8

Itota beyæ, ante onquiyænäni godongämæ cædänipa

1 Ayæ ate Itota nanguï inäni nani quëwëñömö wayömö wædænque inäni nani quëwëñömö wayömö wayömö godinque, Awënë Wængongui Odeye nempo watapæ quëwencæminimpa, ante waa apænecä ëñengadänimpa. Ayæ tömengä tönö dote ganca inäni mänimpodäni godongämæ godänitapa. 2 Ayæ onquiyænäni adobaï

Itota miñæ godänitapa. Tömënäni pancadäniya wënæidi në wiwa ewocadäni tönö në quëwengainäni iñönänite wadäni nantate wæwengainäni iñönänite Itota cæcä ate tömänäni do waa badänäni inte ñöwo tömengä miñæ tee empote godäni inönänimpa. Adocanque Mäadiya Mäagadadënë nani angaingä tömengä baonga wënæidi tiæte ganca inäni tao godäni ininqe tömengä önonganque badingä inte Itotaidi tönö godinque pönö cæcä inongäimpa. 3 Wacä onquiyængä Wäönä nänöogængä Tiota guiquënë Edode nänö ëadincoo në aacä iñongante Wäönä iñömö Totänä tönö ayæ wadäni onquiyænäni nanguï inäni tönö adobaï Itotaidi tönö godongämæ godinque pönö cædönänimpa. Tömënäni nani ëadincoo incæ ænte pöninque Itotaidi beyæ ante pönö cædönänimpa.

Waocä nänö quiyadö ante Itota odömönte apænecampa

(Mäateo 13.1-9; Mäadoco 4.1-9)

4 Nanguï inäni wayömö nani quëwencabo wayömö nani quëwencabo bacoo inäni godongämæ ponte a ongöñönänite Itota apænecantapa. Wængongui nänö apænedö ante waodäni æbänö ëñënanii, ante ëñencædänimpa, ante inguipoga quëwënäni nani cæinö ante iimainö ante apænecantapa. 5 “Waocä në quiyadongä iñömö quiyacæ gocampa. Gote quiyayongä pancamonga taadö iñömö wææmompä. Taadö wæænte eyepodimö öñöñönte pinä gawadäni ædö cæpæ pæquii. Ayæ ayamöidi pöninque dobæ ade cænänipa. 6 Pancamonga guiquënë dicamontaa iñömö wææninque pæquinämaï gä æidinque oguiñento guiwapa pæquii. Guiwadämaï inte edæ guingo icadinque tömencaguï näñe wæcaguimpa. 7 Pancamonga guiquënë ömentacodë nänö eyepodimö iñömö pæquinämaï tä bocate gä æiyonte ömentacoo adoyömö pö incootonque ganta cæca ate näñe wæmpa. Wampo incapa pæquii. 8 Wæmonguipoga quiyadimö guiquënë tä bocate waa pædinque tömëmö tiëe ganca mänimpomö nanguï pönö incapa. Quiyacä nänö quiyadö ante edæ botö mäninque ante apænebopa.”

Mänömainö ante apænedinque Itota ogæ tededinque, “Eamonca ongonte edæ eñeedäni,” angacäimpa.

Önömonque eñente pönenämaï inäni, ante (Mäateo 13.10-17; Mäadoco 4.10-12)

⁹ Tömengä miñæ nē godäni iñömö, Itota eñēmi, änänitapa. Mäninö ante apænedinque bitö æbänö ante odömoncæte ante apænebitawo. ¹⁰ Äñönänite tömengä, “Wængongui Awenē Odeye nempo æbänö quēwenguï, ante mini waocabo wēenēñedē mini eñenāmaï ingainö ante botö ñowo edonque pönö apænebo ate mīnitö adomīnique eñēmīni imīnīpa. Wæætē wadäni inänite edæ botö inguipoga quēwēnāni nāni cæinonque ante odömōninque apænebopa. Edæ tömēnāni, Awıncaque adinque wīi ædæmō adäni inte önömoncaque eñēninque ædæmō eñenāmaï incädänimpa, ante dodäni Wængongui beyæ ante nāni yewæmongainö bai iinque bacäimpa, ante botö tömēnāni inänite mänömainonque ante apænebopa,” ante Itota apænecantapa.

Quiyacä nänö cæinö ante pönente iimainö ante eñengäimpa

(Mäateo 13.18-23; Mäadoco 4.13-20)

¹¹ Itota ayæ godömenque apænecantapa. “Botö nē quiyacä nänö cæinö ante apænedinque iimainö ante odömoncæte ante apænetabopa. Tömēmö quiyadimö iñömö Wængongui nänö apænedö bai impa. ¹² Taadö wæænte öñömö botö änömö guiquenē nē eñenāni bai impa. Tömēnāni Wængongui nänö apænedö ante tæcæ eñēñönänite wēnæ awenē pōninque, Quēwēnāmaï incädänimpa, ante cædinque Wængongui nänö angainö ante ö ængä ininque tömēnāni ömætawēnāni inte ædö cæte pönente quēwenguināni. ¹³ Dicamontaa wæænte pædimö bai inäni guiquenē Wængongui nänö apænedö ante watapæ eñente todinque nē Ao änäni inäni. Tömēnāni iñömö oguimento guiwadāmaï bai inäni inte wantæ iñö pönēnāni ate tömēnāni nāni pönēnö beyæ ante wadäni piinte cädäni ate tömēnāni wæætē guñente wædinque emö cæte godänipa. ¹⁴ Ömentacodē wæænte pædimö bai inäni

guiquenē tömēnāni eñēninque godömenque quēwēñönāni inguipoga quēwente quñemē beyænque mönö wæpāmo pö ate guñente wædinque pædāmaï inäni. Mäincooque beyæ ayæ önonque towente nāni wædö beyæ tömēnāni ömentacoo incootonque ñä caate bai cæ ininque edæ wampo encädänipa pæquīnāni. ¹⁵ Onguipoga wainguipoga quiyadimö bai inäni guiquenē tömēnāni nō pönente waa cæte quēwēnāni inäni. Tömēnāni iñömö edæ Wængongui nänö apænedö ante eñēninque do bæi ongonte wede pönēnāni inäni. Wæntæye ināmaï inäni inte tömēnāni ee cædinque tömewæ incate bai waa cädänipa. Botö mänömainö tömānö ante odömoncæte ante nē quiyacä nänö cædö ante apænetabopa,” ante Itota apænegacäimpa.

Gongapæncade, ante odömonte apænecampa (Mäadoco 4.21-25)

¹⁶ Ayæ, “Gongapæncade ti wodönodinque waodäni dicæ owætadē boo cæcadäniyaa. Möimoga ænömengadæ inö dicæ concæcadäniyaa. Wæætē, Mänīñömö nē pö guidäni acädänimpa, ante cædinque gongapæncade awæmpa æmongapaa concädäni ñäö bæco adänipa. ¹⁷ Quiemē ante wē wodonte i iñömö mäninö tömānö ante iincayæ ate edonque ate bai eñengäimpa. Quinö ñowo bee ocate bai i incæ mäninö tömānö iincayæ ate wi æncate bai iñonte edonque acäimpa,” ante Itota apænecantapa.

¹⁸ Ayæ, “Nē eacä ingante godönāni ængä bai nē eñengä ingante godö apænebo eñente entawēninque tömengä godömenque eñente bacæcäimpa. Nē eadāmaï ingä guiquenē tömengä, Eabopa, ante pönēninque nänö wædænque pōni eadincoo iñonte ö ænāni wæcä bai nē eñenāmaï ingä adobai tömengä, Entawēmopa, ante pönengä ininque wædænque pōni nänö entawēnö iñonte edæ ö ænte bai cæbo dæ ba ate wæcæcäimpa cæminii. Eamonca ongonte eñenguenē quēwēmīni,” ante Itota apænegacäimpa.

Itota wäänä tönö tömengä biwüidi pönänipa

(Mäateo 12.46-50; Mäadoco 3.31-35)

¹⁹ Mänīñedē tömengä wäänä tönö tömengä biwüidi pōninque tömengä weca guicæte ante cæyönāni wadäni goto ongönāni ate

wædinque, Ædö cæte guiquii. ²⁰ Ante wædāni adinque wacā,

—Itota eñēmi. Bitō badā tōnō bitō biwīidi bitō imite ante oncodo ponte yabæque ongōnānīpā cæbii.

²¹ Ante apænecā eñēninque Itota,

—Wængonguī nānō ānō eñēninque nē eñēnte cædāni iñōmō tōmēnāni botō badā bai botō tōniñadāni bai inānīpā, angacāimpā.

Itota angā eñēnte woboyæ æpæ næ gongæmpa

(*Māateo 8.23-27; Māadoco 4.35-41*)

²² Māniñedē tōmengā miñæ nē godāni inānite Itota,

—Gāwapæ æmæmāa taocæimpā.

Angā eñēnte cædinque tōmengā tōnō wipodē guidinque tæcæ taocæ wogaa godānitapa.

²³ Tao wogaa goyōnāni Itota wipodē nāñe ñongæninque edæ mō ñongantapa. Mānōmaī mō ñōñongā goyōnānite woboyæ nanguī pōni pæmæninque edæ æpæ mængonta mængonta pōninque wipodē baguimæ guī adinque tōmēnāni, Æpæ bete wænguī wæ, ante Yæ wædānitapa. ²⁴ Itota weca gote, Ōmæmoncæcāimpā, ante tao cædinque,

—Awēnē, mōni Awēnē, eñenguēnē quēwēe. Bete wæncæ cæmompā cæbii.

Ānāni ñāni ōmæmonte ængæ gantid- inque, Woboyæ æpæ idæwaa mængonta cæbipā. Næ gongæmāwe, angā. Næ gongæninque ñancæ ñancæ gongæmæmpā.

²⁵ Ayæ tōmēnāni inānite,

—Mīni pōnēgade incæ quīnante wīi pōnēmīni.

Āñongante tōmēnāni ancaī guīñēninque, Æbānō anguimōō, ante nāmāneque tede- gadānīpā.

—Īngā iñōmō æcānō inongā inte mānōmaī angā eñēninque woboyæ incæ æpæ incæ næ gongæmpā, ante wæmōnīpā, ante tede- gadānīpā.

Guedatabæ iñōmō wēncæ inte nē enempocā
(*Māateo 8.28-34; Māadoco 5.1-20*)

²⁶ Māniī Gadideabæ emō cæte godinque Itotaidi æmæmāa wogaa tao godinque Guedatabæ pō ti wæxnānitapa. ²⁷ Wipodē manta wo cæyōnāni Itota ti wæænte tæcæ ōmaa goyongante onguīñængā

wēnæidi tōnō nē quēwengā iñōmō māmō bee tengantapa. Īngā iñōmō tōmēnāni quēwēñōmō nē quēwengāingā inte ñōwo wantæpiyæ oncōnē quēwēnāmaī inte ōmaacā quēwēninque waodānidoque cōwē quēwengā inongāimpā. ²⁸ Itota ingante ad- inque tōmengā ōnōwa inō ædæ wææninque edæ Yæ angantapa.

—Itota eñēmi, bitō Æibæ Quēwengā Wængonguī Wēmi inōmi incæ quimæ botō weca pōwēe. Botō imote edæ, Āmogate wæcæcāimpā, ante cædāmaī imāwe, ante nanguī angantapa.

²⁹ Edæ tæcæ pōñongante tōmengā wentamō nānō nē ewocadongā ingante Itota, Gobāwe, ante do angā eñēnte wædingā inte ñōwo mānōmaī angantapa. Māniī wēnæ iñōmō wantæ wantæ iñonte onguīñængā ingante bæi ongonte bai cædongāimpā. Īninque māningā onguīñængā ingante waodāni daagōmenca edæ eno pōnō goto wimænte wææ eno pōnō goto wīwadinque wææ wānōnōnānīpā. Incæte tōmengā daagōmē wangō ñæ wangō ñæ cædongāimpā. Ayæ tōmengā ingante wēnæ wæætē wæætē da godongā ōnōmæca wodii wīnonte quēwēnongā inte adocā ñōwo Itota weca ponte angacāimpā. ³⁰ Angā eñēninque Itota wæætē,

—Æmōmidō imīi.

Āñongante,

—Botō emōwo Deguiōnō emōmopā, an- gantapa.

Edæ tontadoidi Deguiōnō nāni ānoncabo bacoo ināni bai botō nē enempodāni adobaī wēnæidi bacoo inānīpā, ante adinque, Deguiōnō emōmopā, ante onguīñængā angantapa. ³¹ Wēnæidi guiquēnē Itota ingante wæætē wæætē āninque, Mōnitō imōnite tadōmengadænguipoga wido cædāmaī imāwe, ancaā ānānitapa.

³² Māniñōmō odæ wængānāidi nanguī ināni ānanquidi a cængōnāni adinque, Īñōmō odæ wængānā baōnē āmi go guiite quēwenguimōni, ānāni eñēninque Itota, Ao angā. ³³ Eñēninque waocā baōnē quēwente tao godinque wēnæidi odæ wængānā baōnē wæætē go guīdāni ate odæncato wæætē ontadāa wæænōmēmō iñōmō

gäwapæno pogodo wæi guiite becadote capo wængadänimpa.

³⁴ Itota mänömaï cæcä ate wædinque odæ wængänäidi nê aadinäni guiquenê pogodo wodii winonte tömënäni quëwëñömö mäo bee tente apænedinque idömæ mäo gode ä gode ä cæte, Itota mänömaï cæcä wæmönipa, ante apænedänitapa.

³⁵ Eñëninque wadäni wæætë, Æbänö cæcäi, ante acæte ante pönänitapa. Itota weca ponte ayönäni wënæidi tönö nê quëwëningä incæ ñöwo önonganque bate weocoo ëñacä inte Itota önöwa gäänë ëñëë congä adinque guiñente wægadänimpa.

³⁶ Wënæ tönö quëwëningä ingante Itota mänömaï cæcä ante nê adinäni iñömö ñöwo pönäni inänite, Mänömaï cæcantapa, ante do apænedänitapa.

³⁷ Eñëninque Guedatabæ quëwënäni tömänäni ancaï guiñente wædinque Itota ingante, Mönitö weca quëwënämaï ñöwo gobäwe, änäni ëñente wædinque tömengä wipodë imæmää poncæte ante guicä. ³⁸ Adinque wënæidi tao godäni ate nê önonganque bate quëwengä iñömö Itota ingante, Bitö miñæ mäobi goboe, angä ëñëninque Itota wæætë, Bitö ee quëwëmi, äninque,

³⁹ —Tömëmi oncönë adodö godinque, Wængongui æbänö nanguï cæcä waa batawoo, ante mäo apænebi ëñencädänimpa.

Angä ëñëninque oncönë godinque tömënäni nani quëwëñömö tömäo cægöningque tömengä, Itota mänömaï cæcä ate waa batabopa, ante mäo apænecä ëñengadänimpa.

Gaido wëñængä beyæ cæcæ goyongante

Itota weocoo onquiyængä gampocampa (Mäateo 9.18-26; Mäadoco 5.21-43)

⁴⁰ Itota imæmää ocæ ëmænte pongä adinque, Æyedënö ponguingä, ante nê wædinäni inte tömänäni tömengä ingante waa ate togadänimpa. ⁴¹ Mäniñedë wacä oodeoidi odömöincö awënë inongä inte tömengä ëmöwo Gaido iñömö pö Itota önöwaca inö ædæ wææninque tömengä ingante, Botö oncönë quingæ pöe, ante nanguï angantapa. ⁴² Edæ botö wëñængä onquiyængä adocanque inongä inte dote

wadepo nänö ëñagai iñonte edæ wæncæ cæcampa cæbii, ante wæcantapa.

Iñinque Itota tömengä miñæ gocantapa. Idömæ goyongante nanguï inäni goto goto pöninque wodo mö ñongænäni wæcantapa. Wampo impa goquingä.

⁴³ Mäniñedë wacä onquiyængä pongantapa. Tömengä iñömö wantæpiyæ dote wadepo iñonte wepæ wantæ bidämaï cöwë wææ wædinque waa bawëncæte ante cædinque tömengä quincöo tömancöo eyepote pædæ godongä æninque dotodoidi æcämenque incæ onquiyængä beyæ ædö cæte waa cæquinänii. ⁴⁴ Mänömaï quëwente wædongä inte tömengä ñöwo Itota önöñabæca inö pöninque tömengä weocoo yæwedecooque godö gampo cæyongä wepæ iñontobæ edæ wantæ bitapa.

⁴⁵ Itota iñömö edæ,

—Æcänö botö imote pönö gampodäi.

Äñongante tömänäni, Æcänö gampodatawogaa, ante adoyömö ante änäni ate wædinque Pegodoidi wæætë,

—Awënë ëñëmi. Bitö weca tömänäni goto goto godäni apa ämii.

⁴⁶ Itota wæætë,

—Iñæmpa adocanque botö imote wede pönëninque gampocantapa. Tæi piñænte botö entawënö incæ edæ wacä beyæ cæquinque do gotimpa, ante wæwënente awædö.

⁴⁷ Äñongante onquiyængä iñömö, Ædö cæte wë womonguimoo, ante pönente wædinque do do wäate bai guiñëninque Itota weca ædæ wææncate tömänäni ayönänite apænedinque, Botö waa bawëncæte ante bitö imite pönö gampotabopa. Tæcæ pönö gampo cædinque waa babo ae. ⁴⁸ Ante apænecä ëñëninque Itota,

—Onquiyæmi ëñëmi. Bitö wede pönëno beyæ edæ wantæ bawënemipa. Ñöwo edæ nö bawënemite wampo pönente waa goe, ante godö ædæmö apænecantapa.

⁴⁹ Ante tæcæ apæneyongä oodeoidi odömöincö awënë Gaido oncönë quëwengä mäniñedë pöninque edæ Gaido ingante apænecantapa.

—Bitö wengä iñömö ñöwo æmæwo wængampa cæbii. Nê Odömongä ingante ñöwo bitö godömenque änämaï incæbiimpa.

⁵⁰ Ante ñowo pöningä Gaido ingante angä eñëninge Itota wæætë,

—Gaido, guiñënamäi ie. Bitö wede pönëmi adinque bitö wengä mïngä quëwencæcäimpa.

⁵¹ Äninqe Itota godömenque godinque awënë oncönë pö guicæ cædinque Pegodo ingante Tantiago tönö Wäö inate wëñængä wæmpo tönö wäänä inate mänimpodänique inänite ænte manguicä wäänë guidänitapa. Wadäni inänite wæætë wææ cæcä guidämaï inänitapa. ⁵² Tömänäni Ca ca wædinque wëñængä wodi ingante ante pönente wæwënäni adinque Itota tömënäni inänite,

—Ca ca wädämaï iedäni. Iñæmpa iñömö wëñængä wodi edæ wii æmæwo wængantapa. Mö edæ ñongampa.

⁵³ Angä eñente wædinque tömënäni, Æmæwo wænte öñongampa, ante do adinäni inte wæætë edæ, Antedö amini, ante tömengä ingante badete todänitapa.

⁵⁴ Ininqe Itota wëñængä ingante pædæ wææmpo bæi ongonte töö æmæninque ogæ tededinque,

—Wëñæmi, ængæ gantibi, angantapa.

⁵⁵ Äñongä tömengä do wæningä inte ñäni ömæmonte quëwëninque ængæ gantican-tapa. Itota wëñængä beyæ cænguï angä godöna cængantapa. ⁵⁶ Adinque mæmpoda, Æbänö cæte mänömaï cæcää, ante guiñente wædatapa. Incæte Itota wæætë, Botö æbänö cæboo, ante minatö wadäni inänite apænedämaï incæminaimpa, angacäimpa.

9

Wængonguï Awënë ingantedö ante apæneedäni, ante Itota angä godänipa (Mäateo 10.5-15; Mäadoco 6.7-13)

¹ Tömengä miñæ në godäni, Dote inäni, nani änönäni inänite Itota angä pönäni ate, Botö në ämo inte botö tæi piñænö ante ñowo pönömo ænte entawëninque mïnitö tæi piñæninque në ämini bacæminimpa. Ininqe mïnitö ämini ate wënæidi tömänäni do gocædänimpa. Adobaï ämini ate wënæ wënæ inte wæwënäni waa bacædänimpa.

² Mïnitö, Wængonguï Awënë Odeye inguipoga do pongäimpa, ante apænemini eñencædänimpa. Ayæ wënæ wënæ inäni

inänite godö cæmini waa bacædänimpa, ante Itota mänimpodäni inänite da godongä gogadänimpa.

³ Iïmaï angacäimpa.

—Mïnitö ömæpomini taadö goedäni. Ongonto incæ mäincoo da wenguincade incæ cænguï incæ godonte æinta incæ tömancoo edæ ænämaï inte ömæpomini godinque edæ eñacooque eñate goedäni, angantapa. ⁴ Ayæ, Godinque æcönënö tano go guiimini owodinque mïnitö wayömö mïni go quëwenganca mänincönenque go guii go guii cædinque quëwëedäni.

⁵ Æyömömë goyöminite wadäni, Pöedäni, änämaï inte mïnitö apænedö ante wii eñënanäni wædinque mïnitö wæætë tömënäni inänite emö cæte iïmaïnö ante goedäni. Mïnitö iñæmpa, Pöedäni, änämaï imini adinque mönitö gomöni tamëñedäni, ante odömoncæte ante mïnitö önöwa wadæ wadæ cæwadinque wadæ goedäni.

⁶ Angä godinque tömënäni quëwëñömö wayömö tömënäni quëwëñömö wayömö tömäo godinque Itota nänö da godöninäni iñömö mönö Awënë ingantedö ante mäo watapæ apænedäni eñënanitapa. Ayæ wënæ wënæ inäni inänite godö cædäni ate waa bagadänimpa.

Itota æcänö ingää, ante Edode wæcampa (Mäateo 14.1-12; Mäadoco 6.14-29)

⁷ Tömänäni mäniñedë, Itotaidi æbänö cædäni, ante tedeyönänite pancabaa awënë odeye Edode incæ do eñengantapa. Itota iñömö æcänö ingää, ante wædinque pancadäniya, Wäö wodi do wænte ñäni ömæmönöngä inte iingä Itota iïmaingampa, ante tededäni eñente wædinque awënë Edode guiñente wæcantapa. ⁸ Wadäni guiquënë, Ediya wodi ponte a ongömaingampa, ante tedeyönäni wadäni guiquënë, Wængonguï beyæ në apænegainäni incæ adocanque docä incæ do ñäni ömæmönöngä inte a ongömaingampa, ante tededäni. ⁹ Eñente wædinque Edode wæætë,

—Botö tömömo ämo eñëninque Wäö wodi ingante wido tamencadäni wængantapa. Ininqe mäningä Itota nani në tededongä guiquënë æcänö ingää.

Ante wædinque Edode, Æbänö cæte Itota ingante aquimoo, ante nanguï cægacäimpa.

5.000 ganca inäni inänite Itota godongä cænänipa

(Mäateo 14.13-21; Mäadoco 6.30-44; Wäö 6.1-14)

¹⁰ Itota nänö da godöninäni iñömö tömengä weca adodö pöningue, Mänömaï mänömaï cætamonipa, ante nanguï tededäni eñengacäimpa. Eñente ate tömengä tömönäni inänite nänënë Betaida eyequeï ænte mäocä. ¹¹ Goyönänite wadäni do eñëningue tee empote pönäni adinque Itota, Waa pömini abopa, ante waadete apænedinque, Minitö Wængonguï Awënë Odeye nempo watapæ quëwencæminimpa, ante apænecantapa. Ayæ, Pancadäniya waa baquënenäni inänipa, ante adinque tömengä godö cæcä ate waa badänitapa.

¹² Ayæ gawadecæ bayonte edæ, Dote, ante nänï Itota miñæ gocabo iñömö tömengä weca pöningue änänitapa.

—Iñömö önömæca impa cæbii. Bitö godongämæ ongönäni inänite ämi idömæ owodäni weca godinque ayæ nanguï inäni nänï quëwëñömö godinque oncö eyepæ i ate cæningue moncædänimpa.

¹³ Äñönänite Itota,

—Minitö wæætë godömini cæncædänimpa. Äñongante,

—Iñæmpa päö onompo æmæmpoque gæyæ mæa pönï mänimpoque nææmönipa töö. Ininque bitö wæætë, Tömänäni beyæ cænguï gote ænte pödäni, ämitawoo.

¹⁴ Onguïñænänique tinco müido ganca inäni edæ mæ ongönönänimpa. Incæte Itota tömengä miñæ nē godäni inänite angantapa.

—Minitö tömänäni inänite, Tincoenta ganca mini cabo nänënë tincoenta ganca mini cabo nänënë ämini tæ contactædänimpa.

¹⁵ Angä eñëningue änäni tæ contactädänitapa. ¹⁶ Itota päö onompo æmæmpoque æningue gæyæ mæa æningue öönædë æmö adinque Wængonguï ingante, Bitö waa pönömi ænte cæmönipa, ante apænecantapa. Ayæ päö tönö gæyæ pä æ pä æ cædinque tömengä miñæ nē godäni inänite pædæ godongä æningue tömönäni

tömänäni inänite di mæñæ di mæñæ cædäni ænte cængadänimpa. ¹⁷ Tömänäni eyepæ ænte tömo pönï cænänitapa. Ayæ ao mæ ao mæ cæte ñönönäni ate Itota miñæ nē godäni wæætë ao mæ nänï ñönönï ee öñoncoo pædæ wææmpo ö æningue önompo tipæmpoga go mentodëa cænguï eyede da wënäni contagatimpa.

Bitö Coditobi inömi imipa, ante Pegodo apænecampa

(Mäateo 16.13-19; Mäadoco 8.27-29)

¹⁸ Ayæ ate Itota nänënë godinque Wængonguï ingante apæneyongä tömengä miñæ nē godäni tömengä tönö godongämæ ongönönänimpa. Tömönäni inänite angantapa.

—Wadäni botö imotedö ante apænedinque, Æbodö imoo, ante apænedäni eñëmïni.

¹⁹ Äñongante tömönäni wæætë,

—Bitö imitedö ante apænedinque pancadäniya, Wäö æpænë nē guidongaingä incæ Itota adocä imaingä ingampa, änänipa. Wadäni pancadäniya wæætë, Ediya wodi ingaingä incæ Itota adocä imaingä ingampa, änänipa. Pancadäniya wæætë, Wængonguï beyæ nē apænegaingä adocanque do wængaingä inte ñäni ömæmonte quëwëngö incæ Itota adocä imaingä ingampa, ante tededänipa.

²⁰ —Minitö guiquënë, Botö æbodö imoo, ante pönëmïni.

Äñongante Pegodo,

—Wængonguï nänö nē angäimi inömi inte bitö iñömö edæ nē Coditobi inömi imipa, angantapa.

Itota, İmaï cædäni wæncæboimpa, ante apænecampa

(Mäateo 16.20-28; Mäadoco 8.30-9.1)

²¹ Pegodo mänömainö ante apæncä eñëningue Itota wæætë angantapa. Minitö botö imotedö ante apænedinque, Codito inongä ingampa, ante gode änämaï iedäni ämopa, ante nanguï äningue edæ wææ angacäimpa. ²² Äningue,

—Botö Waobo eñagaïmo inte nanguï caate wæquënëmo imopa. Nē aadäni nänï Picæncabo tönö, Wængonguï quï, ante nē godönäni ñænænäni tönö nē odömönäni tönö mäninäni edæ botö imote Baa änäni wæquënëmo imopa. Ayæ botö

imote godömenque wænönäni wænguënemo imopa. Incæte Wængongui angä beyænque botö meönaa go adoönæque iñonte edæ ñäni ömæmonte quëwencæboimpa, ante apænegacäimpa.

²³ Ante apænedinque Itota tömänäni inänite godömenque apænedinque,

—Æcänö botö miñæ pöinäna ina tömengä nämä beyænque ante pönänamaï inte iimö iñö iimö iñö botö miñæ tee empote poncæcäimpa. Nämä nänö wænguiwæ næante ponte bai cædinque tömengä, Botö wænguimo incæ caate wæbo incæ Itota ingante cöwë tee empote gocæboimpa, äninque poncæcäimpa. ²⁴ Edæ æcänö, Nämä wææ gompodinque quëwencæboimpa, ante cædinque botö miñæ pönämaï ingä guiquënë tömengä iñömö edæ quëwänämaï incæcäimpa. Wæætë edæ, Wænönäni wæmo incæte botö Itota miñæ tee empote cöwë gocæboimpa, ante æcänö äna guiquënë tömengä wæætë quëwencæcäimpa. ²⁵ Edæ waocä inguipoga ongoncoo tömancoo ö æncæte ante cædinque nämä önöwoca incæ pædæ godongä wë womonte ba ininque edæ tömengä iñæmpa quëwengampa diyæ mäincoo ëaquiringä. ²⁶ Minitö pancaminiya botö beyæ ante botö apænedö beyæ ante guingo imonte wæminitawo. Iñæmpa botö Mæmpo nänö ëmönö tönö anquedoidi tæiyæ waëmö inäni nani ëmönö guinæ gongæñonte botö Waobo në ëñagäimo inte edæ nämä ñäo apäite bai dibæ pöninque botö wæætë në guñente wægaingä beyæ ante näëmæ guingo imonte edæ wæcæboimpa. ²⁷ Näwangä ämopa. Botö weca ongömini pancaminiya ayæ wänämaï edæ miimini quëwëñömini botö Wængongui Awënë Odeyebo babo ate botö nempo guicæminimpa, ante Itota apænegacäimpa.

Itota waëmö pöni ñäo bai ëmongä bacä adänipa

(Mäateo 17.1-8; Mäadoco 9.2-8)

²⁸ Mänömainö ante apænedingä inte Itota adoque Wængongui itæde go ate Wængongui ingante apænecæte ante ædinque Pegodo ingante Wäö tönö Tantiago inate mänimpodäni inänite änanquidi ænte mæicä æidänitapa. ²⁹ Æite go apæneyongä tömengä awinca iñömö edæ

wii cöwë nänö ëmönö bai waëmö pöni ñäo bai edæ ëmongä bamongä adänitapa. Ayæ tömengä weocoo nänö ëñacoo iñömö edæ näinte bai ëmoncoo badinque näämænta pöni ëñacantapa. ³⁰ Ayæ ayönäni edæ onguiñæna mënaa edæ Möitee wodi tönö Ediya wodi incæ iñontobæ a ongöninque Itota tönö tededatapa. ³¹ Tömëna iñömö ñäo apäite bai ëmöna inte Itota tönö godongämæ apænedatapa. Godongämæ apænedinque tömënäni, Itota æbänö ñöwo Eedotadëe godinque iinque cædinque oo wænte wadæ gocæcäimpa, ante tededänitapa. ³² Mänömainö ante tedeyönäni Pegodoidi guiquënë möinente a ongöninque ædæmö ñäni ömæmonte æmö ayönäni Itota ñäo apäite bai ëmongä adinque tömengä tönö onguiñæna mënaa godongämæ adiyæ ongönäni adänitapa. ³³ Onguiñæna iñömö Itota ingante tæcæ ëmö cæte gocæ cæyöna Pegodo guiquënë,

—Awënë ëñëmi. Iñömö mönö waa pöni ongonte awædö. Bitö ämi ate mönitö oncontaicoo mentaiya go adotaique mænöninque bitö oncontai ante adotaique Möitee oncontai ante adotaique Ediya oncontai ante adotaique mænömaimönipa.

Mänömainö ante tededinque Pegodo, Æbänö ante tedequënëmo imoo, ante ëñänämaï inte önönque tedecantapa. ³⁴ Mänömaï tedeyongä boguimancoo obo wæante wææ owoyö adämaï inäni inte, Boguimancoo ganta cæ wæcæ wæ, ante Pegodoidi guñente wædänitapa. ³⁵ Ayæ boguimancodë önöpämoque apænecantapa. “Iingä botö Wengä botö në apænte ægaingä ingampa cæminii. Tömengä pönö apænecä ate ëñëedäni.”

³⁶ Ante apænecä ëñente ayönäni Itota ñöwo adocanque a ongongä adänitapa. Iinque tömengä miñæ në godäni në adinäni que inte pæ wëenedinque tömënäni nani adinö ante mäniñedë wädäni inänite apænedämaï ingadänimpa.

Itota wëncæ ingante angä go ate wëñcængä waa bacampa

(Mäateo 17.14-21; Mäadoco 9.14-29)

³⁷ Mänii änanquidi æi iimö ate wææ pöñönäni Itota ingante bee tencæte ante nanguï inäni pönänitapa. ³⁸ Godongämæ

ponte nangui ināni ongoñōnāni onguiñængā adocanque edæ ogæ tedinque,

—Nē Odōmōmi ēñēmi. Botō wengā onguiñængā ingante pōnō waa ae. Tōmengā adocanque botō wengā ingampa cæbii. ³⁹ Tōmengā nānō nē ēwocadongā inte wēnæ incæ tōmengā ingante edæ bæi ongongā ate tōmengā iñontobæ Yæ yæ angampa. Ayæ godō cæcā ate botō wengā edæ do do wāadinque ōnōne māwanta tadecampa. Wēnæ iñōmō wantæ iñō tao godinque adodō pō guite edæ cōwē quēwēninque botō wengā ingante edæ ēwencæ cæcampa cæbii. ⁴⁰ Bitō miñæ nē godāni inānite botō, Wēnæ inte wido cædāni, ancaā āñōmo tōmēnāni nē cæquēnēnāni incæ ædō cæte wido cæquinānii, ante wæbopa.

⁴¹ Ante wæyongante Itota,

—Nōwōmini mini ædæmō cædāmaincabo mini pōnēgade impa. Minitō weca æpogadō quēwēmoī. Wapiticæ cæyōmīnite botō æpogadō piyænē cæte wæwēmoī. Āninque mæmpocā ingante apænedinque, Bitō wengā ingante botō weca ænte pōe.

⁴² Angā ēñente ænte māmongā pōñongante wēnæ incæ yæipodē bæ tacā do do wāate wæwengantapa. Tōmengā wentamō nānō nē ēwocadongā ingante Itota iñōmō edæ, Ee ae, ante wææ angantapa. Ayæ wēñængā ingante pōnō cæcā ate tōmengā wæætē ōnonganque bayongante mæmpocā ingante Itota pædæ godongā ængacāimpa.

⁴³ Mānōmaī cæcā adinque, Wængonguī incæ tæī piñænongā inte mānōmaī cæcampa, ante pōnēninque tōmānāni ancaī guiñente wægadānimpa.

Īmaī cædāni wæncæboimpa, ante adodō ante apænecā

(Māateo 17.22-23; Māadoco 9.30-32)

Mānōmaī cæcā ate guiñente wæyōnāni tōmengā miñæ nē godāni inānite Itota iīmaī ante apænegacāimpa.

⁴⁴ —Nōwo āmo ēñenguēnē quēwēmīnii. Adocanque, Waocā nē ēñagaingā æyōmōnō ongongāā, ante godō odōmōninque botō imote waodāni nempo pædæ godōnāni æncædānimpa.

⁴⁵ Āninque tōmengā nānō apænedō æbānō i, ante wædānitapa. Wē womonte i

īninque tōmēnāni ædō cæte ēñenguīnānii. Ayæ, Æbānō ante āmii, ante anguēnēnāni incæ edæ guiñēnete wædinque pæ wēenegadānimpa.

*Æcānonque nē angā inguingāā, ante ted-
edānipa*

(Māateo 18.1-5; Māadoco 9.33-37)

⁴⁶ Tōmengā miñæ nāni nē gocabo iñōmō, Mōni cabo incæ æcānonque ñænængā pōni inongā inte nē angā inguingāā, ante wædinque nāmā incæ wæætēdō wæætē tedeyōnānite ⁴⁷ Itota ōnōwēnenque do ēñengantapa. Ēñēninque wēñængā adocanque ingante bæi ongōninque tōmengā gāānē iñōmō gō cæcantapa. ⁴⁸ Tōmēnāni inānite apænecantapa.

—Waocā botō emōwo beyænque iingā wēñængā ingante, Pōe, ante waa cæcā iñōmō tōmengā botō imote adobāi edæ, Pōe, ante do waa cæcampa. Botō imote æcānō, Pōe, āninque waa cæda tōmengā adobāi botō imote nē da pōnongā ingante Wængonguī ingante edæ adobāi, Pōe, ante do waa cæcampa. Edæ mini waocabo wædāmini iñōmīnite waocā guiyangā pōni inongā nānō entawēnō bai nē entawengā iñōmō tōmengā ñænængā pōni inongā ingampa, ante apænegacāimpa.

*Nē pūinte cædāmaī ingā iñōmō godongāmæ
cæcā ingampa*

(Māadoco 9.38-40)

⁴⁹ Wāo iñōmō Itota ingante apænedinque, —Awēnē ēñēmi. Wacā incæ mōnō cabo ināmaī inongā inte bitō emōwo apænedinque wēnæidi inānite wido cæcā atamōnipa. Īninque mōnitō wæætē edæ, Bitō mōnitō tōnō gobi imipa Itota emōwo apænequīmii, ante tōmengā ingante edæ wææ antamōnipa.

⁵⁰ Ante apæneyongante Itota,

—Īñæmpa mīnitō imīnite nē pūinte cædāmaī ingā iñōmō tōmengā wæætē mīnitō tōnō godongāmæ cæcā ingampa cæmīnii. Tōmengā ingante wææ ānāmaī incæmīnimpa, angacāimpa.

*Tantiago tōnō Wāo inate Itota wææ
angampa*

⁵¹ Oo pōni nānō æiquiōnæ bacæ cæyonte Itota, Eedotadēē iñōmō botō

cōwē gocæboimpa, ante gocæ cæcantapa.
⁵² Wadāni inānite tōmengā, Poncæcāimpa,
 ante mīnitō tāno beyænte goedāni, ante da
 godongā godānitapa. Godinque tōmēnāni
 iñōmō Tāmadiabæ godinque tōmengā beyæ
 cæcæte ante Tāmadiaidi nāni quēwēñōmō
 gocæ cæyōnāni, ⁵³ Tāmadiaidi wæætē edæ,
 Eedotadēē gāmænō Itota gocā awædō,
 ante adinque, Mōnitō weca pōnāmaī
 incæcāimpa, ante wææ ānānitapa. ⁵⁴ Īmaī
 cædāni adinque Wāō tōnō Tantiago
 tōmengā nānō ēmiñæna iñōmō,

—Awēnē ēñēmi. Baa ānāni ad-
 inque oōnædē gonga āmōna wææ gonte
 wænguīnāni, āmi, ānatapa.

⁵⁵ Āñōnate Itota wæætē edæ dadi
 ēmæmonte wææ ante tōmēna īnate,
 “Īñæmpa mīnatō īmīnate æwocadō angā
 ēñēnte āmīnaa, ante mīnatō edæ ēñēnāmaī
 īmīna awædō. ⁵⁶ Īñæmpa botō Waobo
 ēñagaīmo īmo iñōmō edæ waodāni inānite
 ōmæe ēwencæte ante wīī pongaīmo
 īmopa. Wæætē edæ, Botō æmo beyænque
 quēwencædānimpa, ante pongaboimpa,”
 ante pīngacāimpa. Ayæ wadāni nāni
 quēwēñōmō gogadānimpa.

Itota miñæ nē goīnēnāni
(Māateo 8.19-22)

⁵⁷ Taadonque goyōnāni Itota ingante
 wacā angantapa.

—Awēnē, bitō ædōmē goyōmite botō bitō
 miñæ pō gocæboimpa.

⁵⁸ Angā ēñēninque Itota wæætē,

—Babæ guintaidi iñōmō ontatodē
 monguī ēadāni inānipa. Ayamōidi ongonta
 ēadāni inānipa. Botō Waobo ēñagaīmo
 wæætē edæ monguī ōmaabo īmopa poncæ
 āmīi, angacāimpa.

⁵⁹ Ayæ wacā ingante Itota,

—Botō miñæ pōe.

Angā ēñēnte wædinque tōmengā,

—Awēnē ēñēmi. Botō tāno gote botō
 wæmpo wængā ate daga wente ate pōmoe.

⁶⁰ Āñongante Itota wæætē,

—Īñæmpa nē wæwocadāni incæ
 tōmēnāni guīdēnāni wænāni ate ee
 abi daga wencædānimpa. Bitō wæætē,
 Wængonguī Awēnē Odeye do pongāimpa,
 ante gote apænebi ēñencædānimpa. ⁶¹ Ayæ
 wacā adobaī,

—Awēnē bitō īmite tee empote goīnēmo
 incæ ee ongōñōmi tāno gote botō gui-
 idēnāni inānite, Gobopa, ante apænete
 pōmoe. ⁶² Āñongante Itota wæætē,

—Ōmæ nē mangæ mangæ cædongā
 iñōmō tōō pōni mīnte pæquimpa, ante
 cæquēnengā ingampa. Tōmengā dadi
 ēmænte adinque tōō pōni cæcampa diyæ
 tōō mīnte pæquīi. Ayæ adobaī Wængonguī
 Awēnē Odeye nempo quēwēninque nē
 cæquēnengā iñōmō tōmengā dadi ēmænte
 inguipogaque ante acā īninque Awēnē
 beyæ ante ædō cæte cæquingā.

10

*72 ganca ināni inānite Itota da godongā
 godānipa*

¹ Ayæ ate mōnō Awēnē godōmenque
 tetenta i doo ganca ināni mānimpodāni
 inānite īmaī angantapa. Mīnitō æmænō
 mēmīnaa æmænō mēmīnaa godinque
 botō nē goquīñōmō ante wayōmō nāni
 quēwēñōmō māo wayōmō nāni quēwēñōmō
 māo tāno beyænte gomīni ate botō
 ayæ poncæboimpa, āninque da godongā
 gogadānimpa. ² Īmaī ante da godongā
 godānitapa. “Nāwangā āmopa. Waocā
 tōmencacodē do pequinca nanguī inca baī
 Awēnē nempo nē quēwenguēnēnāni adobaī
 nanguī ināni inānipa. Incæte nē tā pedāni
 wædænque ināni baī nē gode ānāni iñōmō
 adobaī mēnāniya pōni inānipa cæmīnīi.
 Mīnitō Wængonguī ingante apænedinque,
 Awēnē, bitō tōmencacodē nē ēabi inte āmi
 ēñēninque gote apæncædānimpa, ante
 ædāni. ³ Nōwo mīnitō iñōmō goedāni,
 āmopa. Mēñeidi weca ongōninque codote-
 doidi iñōmō tæēmō inānipa diyæ nāmā
 wææ aaquīnānīi. Mīnitō iñōmō codote-
 doidi aquīnāni baī adobaī aquīmīni
 iñōmīnīte botō āmo mēñe baī ināni weca
 edæ gomīni ataquēdāni. ⁴ Godonte mīni
 ænguinta wente æī ænāmaī inte māincoo
 mongænte godāmaī iedāni. Awæncata
 næænte godāmaī iedāni. Taadō godinque
 wacā ingante bee tēninque apænedāmaī
 inte goedāni. ⁵ Ācōnēmenque go guīite, Mīni
 quēwencabo gānē pōnente waa quēwēdāni,
 āmīni ēñencædānimpa. ⁶ Mānincōnē
 quēwengā Ao angā īninque tōmengā gānē

pönente waa quëwëmaingampa. Wæætë Baa angä ininque mīnitō adomīnique gānë pönente waa quëwëmaīmīnipa. ⁷ Mānincōnë mīni go guīdincōnë quëwëñōmīnite mānincōnë quëwënāni pædæ pōnōnāni ænte cænte bete quëwëedāni. Edæ nē cæcā iñōmō tōmengä nānō cædi beyæ eyepæ ænguënengä ingampa. Mīnitō adocōnenque quëwëninque wacōnë wacōnë godāmaī iedāni. ⁸ Æyōmōmë goyōmīni māniñōmō quëwënāni, Pōedāni, ānāni eñente wædinque mīnitō tōmēnāni cænguī pōnōnāni æninque cæedāni. ⁹ Wënæ wënæ wæwënāni inānite godō cæmīni waa bacædānimpa. Ayæ tōmēnāni inānite, ‘Wængonguī Awënë Odeye mīnitō weca oo pongä acæmīnimpa,’ ante apæneedāni. ¹⁰ Ayæ tōmēnāni quëwëñōmō go guīyōmīnite Baa ānāni ininque mīnitō wæætë tōmēnāni taadonque tao godinque tōmēnāni inānite, ¹¹ ‘Mīnitō quëwëñōmō onguīpoi wadæ cæwate gomōna tamēñedāni. Incæte Wængonguī Awënë Odeye mīnitō weca oo pongä acæmīnimpa,’ ante ædāni. ¹² Edæ mīnitō imīnite āmopa. Wængonguī nānō apænte anguīōnæ iinque bayonte Todōmä iñōmō quëwengaināni guiquënë nanguī pante wæwëñōnāni mīnitō imīnite nē Baa ānāni guiquënë godōmenque nanguī pante wæwenguināni inānipa,” ante Itota angacāimpa.

Në eñēnāmaī quëwënāni inānite Itota pūingampa

(Māateo 11.20-24)

¹³ Äninque Itota nē eñēnāmaī quëwënāni inānite pūinque iīmaī angantapa. “Co-datī iñōmō quëwëmīni eñēedāni. Betaida iñōmō quëwëmīni eñēedāni. Mīnitō mīni wæwenguinque eñēnāmaī cæte quëwëmīnidō anguënë. Edæ botō mīnitō weca tæi piñænte botō cædi bai Tido nāni quëwengaiñōmō Tidōō nāni quëwengaiñōmō adobai cæbo bai māniñōmō quëwengaināni iñōmō wënæ wënæ nāni cægainō ante dobæ ñimpo cædinque gömæ ëmoncoo da wëñadinque gönaiboga tæ contadinque Ca ca wæcægadānimpa. ¹⁴ İninque Wængonguī nānō apænte anguīōnæ iinque bayonte Tido iñōmō tōnō Tidōō iñōmō

quëwengaināni inānite nanguī pangä wæwënāni incæte tōmengä mīnitō imīnite godōmenque pangä wæwencæmīnimpa. ¹⁵ Ayæ Capēnaōmō iñōmō quëwëmīni eñēedāni. Wængonguī mīnitō imīnite dicæ oönædë wo ææntodongä æi gote toquimīniyaa. İñæmpa tadōmengadænguipo wææntodongä guī wæcæmīnimpa,” angantapa. ¹⁶ Äninque Itota wæætë tetenta i doo ināni inānite apænedinque, “Mīnitō apæneyōmīni æcānō eñengä tōmengä iñōmō edæ botō imote do eñengä ingampa. Wæætë mīnitō imīnite nē Baa angä iñōmō tōmengä edæ botō imote do Baa angä ingampa. Ayæ botō imote nē Baa äningä inte tōmengä botō imote nē da pōnōningä ingante do Baa angampa,” ante apænedinque tōmēnāni inānite Itota angä godānitapa.

Tetenta i doo ināni do godināni inte ocæ ëmænte pōnāni

¹⁷ Angä godināni inte tetenta i doo ganca ināni adodō ocæ ëmænte pōninque watapæ todinque Itota ingante apænedinque,

—Awënë, bitō ëmōwo apænedinque mōnitō wënæidi inānite ämōni eñēninque bitō ëmōwo beyænque godānipa.

¹⁸ Ante todāni eñēninque Itota wæætë,

—Näinte quingæ cæ bai Tatāna iñōmō wënæ awënë incæ oönædë inō wæængä nē agaimo inte botō adobo ämopa. ¹⁹ Botō pōnō ämo ate mīnitō iñōmō nē ämīni badinque edæ tæntæ tōnō emēñe ingante pinä gāwadāni bai adobai tæi ëmōmīni inte tæntæ bai nē cædāni inānite wido cæcæmīnimpa. Ayæ mōnō imonte nē piinte cædongä incæ tæi piñænte cæcā incæte mīnitō iñōmō godōmenque tæi ëmōmīni inte māningä nānō tæi piñænte cæpāmo ante tōmāmāmo ante edæ wido cæcæmīnimpa. Edæ æcāmenque incæ mīnitō imīnite æmæwo wido cædāmaī incæcāimpa. ²⁰ Incæte mīnitō ämīni eñēninque wënæidi do eñente cædāni beyænque todāmaī iedāni. Wæætë, Mōnitō ëmōwo oönædë dobæ yewæmonte ongompa, ante adinque mīnitō mānōmaī beyænque watapæ toedāni, angacāimpa.

Mæmpo Wængonguī ingante apænedinque Itota tocampa

(Mäateo 11.25-27, 13.16-17)

21 Äninqe Wængonguī Tæiyæ Waëmō Önöwoca ingante ewocadongä inte Itota mänñedē edæ watapæ todinque Wængonguī ingante iīmaī ante apænecantapa. “Mæmpo eññemi. Bitō, Wadäni nämä ocai encadäni tönō nanguī adinque nē eññänäni tönō mäninō bitō cægäinō ante eññänämaī incädänimpa, ante cædinque bitō cægäinō ante wē wodongabiimpa. Wæætē wēñænäni tæcæ eñnadäni bai inäni inänite bitō edonque odömōmi adinque do eññänäni. Bitō öönædē Awënë ingäimi inte inguipoga Awënë adobi inōmi inte edæ mänōmaī cæbipa, ante adinque botō bitō imite waa ate pönëninque apænebopa. Mæmpo, bitō tömëmi äno bai cædinque waa cæbi adinque botō Ao ämopa, ante apænebopa,” ante Wængonguī ingante apænegacäimpa.

22 Ayæ, “Botō Mæmpo incæ, Bitō Awënë inōmi inte aacæbiimpa, ante tömäo iñömō ongoncoo botō nempo pædæ pönöninque tömäo iñömō quëwënäni tömänäni inänite adobai botō nempo pædæ pönongä æninqe botō iñömō edæ tömancoo enempodinque tömäo iñömō quëwënäni inänite nē enempobo imopa. Wængonguī Wëmo iñömote, Æbodō imoo, ante Mæmpoque eñngä ingampa. Botō wæætē tömengä Wëmo inōmo inte, Wængonguī æcänō ingää, ante adoboque nē eññemo imopa. Ayæ, Iñäninque nē eññänäni incädänimpa, ante botō nē angäinäni inänite odömōnte botō apænebo eññäninque tömënäni wæætē, Wængonguī æcänō ingää, ante nē eññänäni badäni ate mönitō adomöninque äanque bai nē eññemōni imönipa.”

23 Ante apænedinque Itota dadi emæninque tömengä miñæ nē godäninque inänite apænedinque, “Nöwo mini adinō adinque nē emömini inte minitō mini watapæ quëwënguinque impa. 24 Iīmaī impa, ante apænebo eññedäni. Wængonguī beyæ nē apænegäinäni nanguī inäni tönō imæca awënëidi nanguī inäni incæ mini adinō bai ante äinente wægäinäni incæte

edæ adämaī ingadänimpa. Mini eññäninō ante adobai eññänente wægäinäni incæte tömënäni eññänämaī ingadänimpa,” ante mäninganca Itota apænecä eñngadänimpa.

Tämadiabæ quëwengä incæ nē waa cæcä ingampa, ante

25 Ayæ ate adocanque idægoidi näni wææ angäinō ante nē ate eñngä iñömō, Itota æbänō wapiticæ apænebaingää, ante cædinque ængæ gantidinque tömengä ingante iīmaī angantapa.

—Awënë nē Odömōmi eññemi. Botō æbänō cæte cōwē wænämaī wantæpiyæ quëwënguimoo, ante wæbopa.

26 Äñongante Itota,

—Möitee wodi, Iīmaī cædäni, ante wææ yewæmöninque æbänō ante yewæmongä ongō abii.

27 Äñongante nē odömōngä wæætē,

—Iīmaī ante yewæmongacäimpa. Bitō mīmō entawëmi inte Wængonguī mönō Awënë ingante waadedinque bitō önöwoca ewocadinque ædæmō waadete pönencæbiimpa. Bitō baō tæi piñante eññabi inte godō waadete cædinque bitō ocai encabi inte nö pönëninque waa waadete pönëe. Ayæ adobai bitō nämä bitō waadete waa cædō bai adobai pönëninque godongämæ quëwënäni inänite adobai waa waadete cæe.

28 Ante apænecä eññäninque Itota tömengä ingante wæætē,

—Bitō nö eññemi inte nöingä apænebitapa. Mäninō bitō äninō bai cæbi ininque bitō wænämaī quëwëmaīmipa.

29 Angä eññäninque guññente wædinque nē odömōngä iñömō, Botō cæquënenō ante wii cæbopa, ante Itota eññänämaī incæcäimpa, ante nämanque ante wææ äninque,

—Iñæmpa wa. Godongämæ quëwënäni, ante bitō äninäni iñömō ædänidō inänii.

30 Äñongante Itota wæætē, Mönō guidengä æcänō ingää, ante odömōncæte ante iīmaī apænegacäimpa.

—Onguñængä adocanque Eedotadëe quëwente Eedicoo wæidō cægöñongante nē ö ænäni tömengä ingante iñontobæ bæi ongonte weocoo gäni tadongadinque tæi tæi pänäni nangæ bacä ininque wadæ godäni. 31 Ate, Wængonguī quī, ante nē

godongä adocanque adodö wæidö godö godinque nê nangæ bate öñongä ingante gomö adinque ee wodo pänta æmæ wedeca gocampa. ³² Ayæ ate Debii wodi pæinäni näni Wængongui oncönê cæcabo incæ adocanque adobaï adoyömö wææ pöninque nê nangæ bate öñongä ingante gomö adinque ee wodo pänta gocampa. ³³ Ayæ ate wacä Tämadiabæ nê quëwënongå incæ ado wæidö godinque nê nangæ öñongä weca adoyömö ponte gomö adinque, Tömengä ædö cæte quëwëngüingä, ante tömengä wædö ante bai nanguï pönente cæcantapa. ³⁴ Ìngä ìñömö nê nangæ bate öñongä weca pöninque tæi tæi pänäni nänö æbäadiñömö oginguipæ tönö yowepæ ti nämæ biinömæ näni ämæ gao caadinque wecooca wïni caacampa. Ayæ, Tæ contate gocæcäimpa, ante adocä Tämadiabæ quëwëngä ìñömö nämä nänö nê mongænte goquënengå bodo önöñabæ nê nangæ badingä ingante ængö cæcä tæ contayongante bodo ingante töö töö ænte gocampa. Ayæ taadö pönäni näni cænte guiite möincö ganca ænte mäo guidinque nê nangæ badingä ingante waa cæcampa. ³⁵ Ìimö ate padata näni godonte æinta mentaa tadöningue mänincönê nê aacä ingante pædæ godöningue, Bitö nê nangæ badingä ingante waa cæe. Quiëmê æinengä adinque bitö godömi ængä ate botö bitö weca adodö pöninque bitö godönimpo adopo wæætê pædæ pönömo æncæbiimpa, ante gocampa. Mänömaï cæcampa. ³⁶ Änningue Itota tömengä ingante nê äningä ingante godömenque angantapa. Bitö ìmite ñöwo ämo ëñëningue bitö wæætê apænebi ëñëmoe. Nê nangæ bate öñongä weca pönäni mengäa go adocanque inäni incæte æcänö tömengä tönö godongämæ quëwënanäni bai inte waa cæcantawoo, ante pönëmii.

³⁷ Äñongante nê odömongä wæætê,

—Tömengä ingante nê waadete godö waa cædongä incæ tömengä guidengä bai cæcampa.

Ante apæneca ëñëningue Itota wæætê,

—Tömengä nänö cædö bai bitö adobaï godinque cæbæwe, angacäimpa.

Mäadota tönö Mäadiya näna caya oncönê Itota ëñacampa

³⁸ Ayæ taadö goyönäni tömënanäni quëwëñömö pongä adinque onquiyængä tömengä ëmöwo Mäadota ìñömö Itota ingante angä tömengä oncönê pö guiite ëñacantapa. ³⁹ Mäadota tönïñacä Mäadiya ìñömö Itota önöwaca ìnö tæ contadinque tömengä apæneca ëñëe congantapa. ⁴⁰ Mäadota guiquënë nê ëñadäni beyæ ante nanguï cæte wædinque Itota weca pöninque, —Awënë, botö tönïñacä ëmö cæte gocä ate botö adoboque nanguï cæbo ate wædämaï ìmitawo. Edæ ämi pö cæcæe.

⁴¹ Äñongante Itota,

—Mäadota, Mäadota, bitö wa wa wa cæcæte ante wæwëmi awædö. ⁴² Wæætê adoque pönï cædinque edæ eyepæ impa. Mäadiya do, Quinö waa cæquimoo, ante apænte pönëningä inte botö önöwaca ìnö pö tæ contate ëñëe congä adinque botö wæætê tömengä ingante, Goe, änämaï incæboimpa, angacäimpa.

11

Wængongui ingante æbänö apænequï, ante Itota apæneca (Mäateo 6.9-15, 7.7-11)

¹ Itota ayæ ate wayömö gote Wængongui ingante apæneca. Ìinque apæneca adinque tömengä nänö nê ëmiñængä adocanque tömengä ingante apænedinque,

—Awënë ëñëmi, Wäö tömengä nänö ëmiñænäni inänite odömonte, Wængongui ingante æbänö ante apænequï, ante nänö apænedö bai bitö mönitö ìmönite adobaï ante odömonte apænebi ëñenguïmönii.

² Ante wæyönäni Itota,

—Wængongui ingante apæneca ante ìmaï ante apæneedäni, “Mönitö Mæmpo nê öönædê quëwënömi inte ëñëmi.

Mönitö bitö ëmöwo tæiyæ waëmö ëmömi adinque bitö ëmöwo ante waa adinque apænemönipa.

Bitö öönædê Awënë nê ingäimi inte inguipoga Awënë Odeyebi bitö baquinque edæ quingæ pöe. Öönædê owodäni ëñente cædäni bai inguipoga adobaï bitö änö bai ëñente cæcæimpa.

³ Mönitö imönite bitö, Cænguï, ante iimö iñö iimö iñö eyepæ pönömi ænte cæmönie.

⁴ Mönitö wænæ wænæ cæmöni incæte bitö nê panguënemi incæ pönö ñimpo cæbi quëwëmönie. Mönitö adobai edæ wadäni mönitö imönite wænæ wænæ cædäni adinque ñimpo cæmöni quëwënäni ae.

Mönitö wænæ wænæ möni cæinënö godö gocæte ante cæmöni adinque bitö wææ cæbi ate mäninö godö godämaï inte mönitö wæætë wænæ wænæ cædämaï incæmönimpa, Wæætë edæ nê wīwa ewocadongä nempo ongöñömönite bitö gä pe æmpobi quëwëmönie.”

Mänömainö ante apænete Wængonguï ingante apæneedäni, Itota angantapa.

⁵ Äninqe tömënäni inänite godömenque apænedinque Itota,

—Bitö iimaï cæbi ininque bitö æmigo æbänö cæbaingää, ante pönëedäni. Ayaönæneña incæ bitö æmigo weca godinque bitö, “Botö æmigo ëñëmi. Päömo bodogaa tänoque pönömi ænimo inte ayæ ate botö adopo pönömo æncæbiimpa. ⁶ Edæ wacä botö æmigo incæ wayömö gocæte ante botö weca pongampa cæbii. Botö, Quinö impa diyæ godömo cænguingää, ante wædimo inte bitö imite ämopa.” ⁷ Äñömi tömengä guicönë öñöninque, “Botö odemö ædæmö tee mönedinque botö wëñænäni tönö möimoga öñömo inte diyæ ædö cæte ængæ gantite godömo ænguimii. Ee ae.” ⁸ Äninqe bitö æmigo incæ bitö ämi beyænque ængæ gantite pönönämaï ingampa. Incæte wæætë wæætë äñömi tömengä, Ancaa ëñente awædö, äninqe ængæ gantidinqe bitö imite do pönongä æmaïmipa. ⁹ Ante apænedinque botö iñömö minitö iminite iimaï ämopa. Pönömi æmoe, ante nê angä bai cædinque minitö mini ænguïnö ante Wængonguï ingante apæneedäni. Äyömönö ii, ante nê diqui diqui mingä bai cædinque minitö, Æbänö ii, ante ædæmö ëñencæte ante Wængonguï ingante wede pönente apæneedäni. Odemö mönitö beyæ wi ænecæimpa, ante aa pecä bai cædinque minitö, Æbänö cæquimoo, ante ëñencæte ante Wængonguï ingante

nanguï apæneedäni. ¹⁰ Edæ, Pönömi æmoe, ante nê änäni iñömö edæ do ænänipa. Nê diqui diqui minäni iñömö do adänipa. Ayæ odemö ponte nê aa pedäni tömënäni nani guiquinque edæ do wi ænete bai bacæimpa.

¹¹ Ante apænedinque Itota godömenque apænecantapa.

—Wëñæ mæmpobi imi, ëñëmi. Bitö wëñængä päö ante angä ëñëninque bitö dicæ dicamö incæ godömi ængäa. Gæyæ ante angä ëñëninque bitö tæntæbo incæ dicæ godömi ængäa. ¹² Enquëmo angä ëñëninque bitö emëñe incæ dicæ godömi ængäa. ¹³ Ininque minitö nê wīwa cædömini incæ, Wëñængä beyæ quinö waa i, ante ëñëmini inte do godömini ængampa. Mönö Mæmpo iñömö waa pönö cædongä iñongante änäni ëñëninque tömengä nê änäni inänite tömengä Tæiyæ Waëmö Önöwoca ingante da pönongä æncædänimpa, ante Itota apænegacäimpa.

Wænæ tönö cæcä imaingampa, ante wapiticæ änänipa

(Mäateo 12.22-30; Mäadoco 3.20-27)

¹⁴ Ayæ wænæ nê babetadecä iñömö waocä baö do guite ongöñongante Itota tæcæ wido cæcantapa. Wænæ tao gocä ate onguïñængä tededämaï iningä incæ do tedecä ate wædinque godongämæ ongönäni wæætë guïñente wædinque waa agadänimpa. ¹⁵ Pancadäniya guiquënë, “Iñæmpa wænæ awënë Beedebö tönö godongämæ cædinque Itota wænæidi inänite wido cæcä imaingampa töö,” ante tedewënanitapa.

¹⁶ Wadäni guiquënë, Æbänö cæmö ate Itota oda cæquingää, ante cædinque tömengä ingante, Bitö öönæde nani cæi bai mä odömömi ate pönëmaïmönipa, änänitapa. ¹⁷ Mänömaï babæ cæcæte ante änewënanipa, ante Itota do ëñëningä inte iimaï angantapa. “Awënë odeye nempo quëwënäni näëmæ wæætedö wæætë cædäni ininque awënë nänö ömædempote wæquinque tömënäni nämä ewente cædänipa. Ayæ adocönë owocabo incæ adoyömö godongämæ quëwëninäni incæ näëmæ wæætedö wæætë cædäni ininque tömënäni oncö woquinque näwæ

gobainānīpa. ¹⁸ Mīnitō, Wēnæ awēnē Beede-boo tōnō cædinque Itota wēnæidi inānite wido cæbaingampa, ante ānewēmīnīpa tōō. Īñæmpa awēnē Tatāna nempo quēwēnāni ĩñōmō nāēmæ wæætēdō wæætē piināni ĩnīnque adocabodāni ināmaī ĩñōnānite tōmengā dicæ tōmēnāni inānite ēnempobaingāa. ¹⁹ Mīnitō, Beedeboo tōnō cædinque Itota wēnæidi inānite wido cæcampa, ante tedewēmīnīpa. Mānīnō mīni ānewēnō nāwangā ĩ baī mīnitō mīñæ nē godāni guiquēnē æcānō tōnō cæte wido cædānī. ĩnīnque mīnitō mīñæ nē godāni incæ mīni ānewēnō beyænque ante nāēmæ piinīnque mīnitō ĩmīnite wæætē apænte ānīnque piincædānīmpa anguēnē. ²⁰ Botō ĩñōmō Wængonguī tōnō godongāmæ cædinque wēnæidi inānite wido cæbo apa ānewēmīni. Mānōmaī ĩ ĩnīnque botō Wængonguī Awēnē Odeye ĩnōmo ĩnte mīnitō weca do pōmo aedāni,” ante Itota apænēgacāīmpa.

²¹ Ayæ, “Īmaī ĩmpa. Nē tæī piñængā ĩñōmō tæēmoncoo wēñate mongænīnque, Wææ godō cæinca, ante tæēmonca næænte tōmengā oncō boyæ wææ godō wææ godō cæyongā tōmengā ēadincoo ĩñōmō edæ ee ongompa. Tatāna ĩñōmō mānōmaī ingampa. ²² Incæte wacā godōmenque tæī ēmongā ĩnte pōnīnque māningā ingante edæ bæ tacampa. Ayæ tæēmonca, Wææ godō botō cæinca, ante māningā nānō ānīnca ñōwo pōningā ĩñōmō gā pe æmpote ō ænīnque tōmengā nānō ēadincoo adobaī gā pe æmpote ō ænte māo nēnempocampa. Botō ĩñōmō nē tæī ēmōmo pōnī ĩnōmo ĩnte edæ godōmenque tæī ēmongā nānō gānā cæbaī cæbopa,” angantapa.

²³ Ayæ, “Botō tōnō æcānō wīī godongāmæ cæcā ĩñōmō tōmengā ĩñōmō edæ botō ĩmote Baa ante piinte cæcā ingampa. Ayæ botō, Waodāni botō mīñæ poncædānīmpa, ante cæyōmo waocā botō tōnō wīī cæcā ĩñōmō tōmengā wæætē botō mīñæ poncæ cæyōnānite tatodongā wadæ godānīpa,” ante Itota apænēcantapa.

Wēnæ waodē owote godingā ĩnte adodō pompa, ante
(Māateo 12.43-45)

²⁴ Ayæ apænēdinque Itota ĩmaī ante apænēcantapa. “Waocā baōnē owote ate tao godinque wēnæ wentamō nānō ēwocadingā ĩñōmō edæ, Quingānō baōnē go guīdinque edæ guēmante quēwenguīmoo, ante diqui diqui ĩnte ayongā ōnōmæca to amīnte ĩ ate wædinque edæ, ‘Botō tao godincōnē adodō go guīte quēwencæboīmpa,’ ante pōnēnīnque adodō pongampa. ²⁵ Ponte ayongā waocā ōnonganque bayongante wacā ōnōwoca tōmengāa owodāmaī ingā adinque wēnæ wæætē, Æ waocā botō owodincō baī ĩnongā ĩnte ñōwo wadæ ñēmænte māincoo cabo tē gæte baī ōmæwocacā ingā abopa. ²⁶ Ate adinque tōmengā wæætē godinque wēnæidi godōmenque wentamō ēwocadāni tiæte ganca mānīmpodāni inānite ænte pongampa. Tōmēnāni tōmānāni waocā baōnē godongāmæ pō guīte owodāni ate waocā ĩñōmō wēnæ yewænīnque godōmenque wæwengampa,” ante Itota apænēgacāīmpa.

Æbānō cæte watapæ quēwenguī, ante

²⁷ Itota tæcæ apænēyongante on-quiyængā ĩñōmō godongāmæ ongōnāni tōnō ongōnīnque ogæ tededīnque,
—Bitō ĩmīte nē mangāinā ĩnte edæ tōmēnā nānā toquinque ĩmpa. Bitō ĩmī goōmæ gānongāinā ĩnte edæ tōmēnā watapæ nānā quēwenguīnque ĩmpa.

²⁸ Ante ogæ tedecā ēñēnīnque Itota wæætē,

—Īñæmpa Wængonguī nānō ānō ēñēnīnque nē cædāni guiquēnē tōmēnāni wæætē nāni watapæ quēwenguīnque ēñēnte cædānīpa, ante apænēgacāīmpa.

Öönædē nāni cæī baī cædinque mā cæbi amōnie, ānānīpa

²⁹ Māniñedē godōmenque nanguī ĩnāni pōnāni adinque Itota, ĩmaī ante apænēcantapa. “Mīnitō wīwa mīni cæcabo ĩmīnīpa. Mīnitō edæ, Mā cæte odōmōmi adinque pōnēmaīmōnīpa, ante ancaa āmīni awædō. Nāwangā āmo ēñēdāni. Cōnāō wodi beyæ cædinque Wængonguī bamōnengæ nānō cægāinō ante mīnitō pōnēnāmaī ĩñōmīnite edæ mānīnque mīni aquīnque cæcæīmpa

änewëminii. ³⁰ Nīnebaidi pōnencædānimpa, ante Cōnāo wodi ingante Wængonguī angā quëwengacāimpa. Nōwomīni pōnencæmīnimpa, ante adobaī cædinque Wængonguī botō Waobo ëñagāimo iñōmote adobaī angā quëwëmo acæmīnimpa. ³¹ Doyedë iñōmō betamonca gāmænō ömæ awënë inongā inte onquiyængā incæ awënë Tadōmōo wodi nanguī ëñente nānō apænedō ante ëñencæte ante doōnæ quëwëninque pongacāimpa. Tadōmōo wædænque ëñengā iñongante botō godōmenque nanguī ëñëmo inte mīnitō weca ongōñōmote mīnitō iñæmpa wīi ëñëmīnīpa tōō. İninque māningā onquiyængā incæ Wængonguī nē apænte angā weca pōninque mīni ñōwo quëwencabo tōnō godongāmæ ongōninque, Mīni pante wæquinque ëñënāmaī ingamīnimpa tōō, ante apænte pīnguīgā ingampa. ³² Cōnāo wodi Wængonguī beyæ apæncæ ëñëninque Nīnebaidi wënæ wënæ nāni cægāinō ante wæwente pōnëninque ñimpo cægadānimpa. Cōnāo wodi wædangā iñongante botō wæætë nē ñænæmo inte apænebo ëñëninque mīnitō iñōmō ëñënāmaī imīnīpa. İninque Nīnebaidi incæ Wængonguī nē apænte angā weca pōninque mīni ñōwo quëwencabo tōnō godongāmæ gongænte ongōninque, Mīni pante wæquinque ëñënāmaī ingamīnīpa tōō, ante apænte pīnānidō angüenë,” angantapa.

Mōnō awinca gomō aquīnemō baī ëmōmpa, ante

(Māateo 5.15, 6.22-23)

³³ Ayæ godōmenque apæncantapa. “Gongapæncade tī wodōnodinque waodāni dicæ awëmō iñōmō wë wodōnāniyaa. Owæta boo cæcadāniyaa. Wæætë, Māniñōmō nē pō guīdāni acædānimpa, ante cædinque gongapæncade awæmpa æmongapaa cō cædāni ñāo bæco adānīpa. ³⁴ Mōnō baō tōmāo beyæ mōnō awinca tica ënente baī ëmōmōmpa. Mōnō nō pōnëninque amō İninque mōnō ñāo tica ënente cægonte baī waa cæte quëwëmōmpa. Wæætë wīwa pōnente amō İninque mōnō wëmō iñōmō cægonte baī inte wīwa cæte quëwëmōmpa. ³⁵ Mānōmaī beyæ bitō, Wëmō ëwocadāmaī incæboimpa, ante bitō önōwoca cōwā adinque nāmā wææ

cæe. ³⁶ İninque bitō baō tōmāo ñāo entawëninque bitō önōwoca adobaī ñāo ëwocabi İninque quīomenque incæ wëmō entawënāmaī İmaīmīpa. Gongapæncade ñāo bæco edonque abi baī edæ ñāo ædæmō entawëninque edonque adinque waa quëwëmaīmīpa,” ante Itota apænegacāimpa.

Paditeoidi tōnō nē wææ odōmōnāni İnānite Itota pīngā

(Māateo 23.1-36; Māadoco 12.38-40; Odoca 20.45-47)

³⁷ İninque apæncæ ate adocanque Paditeocā tōmengā ingante, Pō cæe, angā ëñente pō guīte cæncæte ante ongongā. ³⁸ Adinque Paditeocā iñōmō, Itota quīnante mempodāmaī inte cægāā, ante guīñente wæcā. ³⁹ İninque mōnō Awënë tōmengā ingante,

—Mīnitō Paditeoidi iñōmō edæ owæta tōnō podato cæncadë İnō wentamō ënencōo ee adinque yabæque mënongate baī cæmīni imīnipææ. Māincōoque æīnente mīni wædō beyæ ayæ wīwa mīni cædō beyæ edæ mīmōno wentamō entawëmīni imīnīpa. ⁴⁰ Mīni ëñëgadë. Nē badongā iñōmō yabæque badōninque cæncadë İnō badōnāmaī ingantawogaa. İñæmpa mōnō baō nē badongaingā iñōmō adocā mōnō önōwoca badongacāi apa quëwëminii. ⁴¹ İninque mīnitō wæætë wadāni İnānite ædæmō waadedinque mīnitō māincōo pædæ godō pædæ godō cæmīni İninque tōmancōo edæ ñā mënongate baī ba adinque mīnitō wæætë edæ ñāo baī entawencæmīnimpa.

⁴² Paditeoidi mīni wæquinque İmaī cæmīnīpa. Māincōo diete ganca mānīmpocōo ænte cō cædinque, Adocōoque Wængonguī quī İmpa, ante mōnō godongæİmpa, ante cæmīnīpa. Mīnitō mānōmaī cædinque edæ öñabo mīni mīnte pæyabo, Oguī waa cænguī, ante mīni tā pete æñabo incæ edæ, Wængonguī quī İmpa, ante pancayaboga godōmīnīpa. Māninganca cædinque mīnitō waa cæmīni incæte wadāni İnānite nō cædāmaī imīni inte Wængonguī ingante waadete pōnënāmaī imīnīpa tōō. İñæmpa mānīnō öñabo godongüenëmīni inte mīnitō godōmenque waadete pōnëninque nō cæquënëmīni imīnīpa.

⁴³ Ayæ Paditeoidi mini wæquinque impa. Minitö odömöincönë go guiddinque nämanque ante pönëninque waëmompaa pönï tæ contate tomïni awædö. Ayæ waodäni nani godonte æïmancadë godinque minitö nämanque pönëninque, Wadäni, Waa quëwëedäni, ante apænedinque mönitö imönite waa acädänimpa, ante mini wæquinque edæ änewëminipa töö.

⁴⁴ Ayæ waocä wodido ñömæi ongö bai minitö iñömö mini wæquinque edæ wentamö entawëminipa. Mänömaï entawëminipa, ante ëñënamäi inte wadäni edæ mini änö ante ëñente cædinque edæ oda cädänipa, ante Itota pïngantapa.

⁴⁵ Ìniquë adocanque idægoidi nani wææ angainö ante në ate ëñengä iñömö Itota ingante apænedinque,

—Awënë, mänömaï äninque bitö mönitö imönite adobai pïnte änewëmi awædö.

⁴⁶ Äñongante,

—Minitö dodäni nani wææ angainö ante në adimïni inte edæ mini adobai wæquinque impa. Edæ, Cädämaï cädämaï, ante ancaa wææ äninque minitö iñömö edæ mäincoo teëmencoo mö paate wadäni önöncapæ cö cædancapænäni bai cæminipa töö. Ayæ wæætë önopogonca adopogoncaque incæ gä ænancapænämaï cæte bai cædinque minitö mini wæquinque edæ, Æbänö cæte waa quëwenguï, ante odömönte apænedämaï iminipa töö, ante Itota apænecantapa.

⁴⁷ Ayæ godömenque apænedinque, “Wængonguï beyæ në apænegainäni inänite minitö mæmæidi incæ në wænönäni ingadänimpa. Minitö iñömö, Në wænongainäni nänömoidi imönipa, ante bai cædinque, Wængonguï beyæ në apænegainänido, ante mænönominipa töö. Mini wæquinque edæ mänömaï cæminipa. ⁴⁸ Ìniquë, Mönitö mæmæidi wænongadänimpa, ante ëñënimöni inte tömënäni wodido ante mænönomönipa, äninque minitö mæmæidi nani cægainö ante Ao äninque cæminipa töö,” ante Itota pïngantapa.

⁴⁹ Ayæ iïmaï ante apænecantapa. “Mänömaï beyæ Wængonguï mönö në ëñengaingä inongä incæ iïmaï ante

apænegacäimpa. ‘Botö beyæ në apænedäni tönö botö në da godönäni inänite botö, Idægoidi weca gote apæneedäni, ämo gocädänimpa. Ämo gote pönäni adinque idægoidi wæætë pancadäniya inänite wænönäni wæncädänimpa. Ayæ pancadäniya inänite togænte pänäni wæcädänimpa,’ ante Wængonguï do apænegacäimpa. ⁵⁰ Ìniquë ñöwo quëwëmini iñöminite, Quinante wænöminii, ante Wængonguï edæ minitö iminite ancæcäimpa. Wængonguï beyæ në apænegainäni inänite tömengä nänö badongaiñedë dodäni mä pönï wænönäni beyæ ayæ iincayæ ate ñöwo ganca wænönäni beyæ iniquë edæ në wænäni tömänäni wæpæ nani näagainö ante, Ñöwo quëwëmini mäninäni tömänäni wæpæ näate bai iminipa. ⁵¹ Edæ tömänäni nani wænongainö ante edæ ñöwomini mini pante wæquinque impa. Edæ mä pönï wænöninque docä Abedo wodi ingante adocanque wænongä wængacäimpa. Iincayæ ate Wængonguï oncö ñænæncö boyæ nani iya täimpaa gänë ongöñongante Tacadiya wodi ingante wænönäni nänö wænganca wadäni nanguï inäni inänite wænönäni wængadänimpa. Incæte Wængonguï, Minitö mæmæidi nänömoidi ingaimini inte tömënäni nani wænongai beyænque wæpæ näate bai wentamö entawëñöminite botö wæætë ñöwomini iminite pämo wæcæminimpa, ante Wængonguï angampa,” ante Itota apænegacäimpa.

⁵² Ayæ apænedinque, “Dodäni nani wææ angainö ante në adimïni iñömö minitö në ëñenguënëmini inte edæ mini wæquinque nö pönente ëñënamäi iminipa. Ayæ wadäni, Nö pönente ëñengæimpa, ante odemö guite bai tæcæ cädäni adinque minitö odemö tee mönete yabæ wido cæte bai cædinque tömënäni inänite edæ wææ cæminipa töö,” ante Itota apænegacäimpa.

⁵³ Ìniquë apænete tao goyongä në odömönäni tönö Paditeoidi tömengä ingante nanguï pïnte badinque, Ämöni ëñëninque apænebi ëñëmönii, apænebi ëñëmönii, ante ancaa änänitapa. ⁵⁴ Ayæ, Tömengä wabänö oda cæte tedecä iniquë mönö wæætë pämo wæbaingampa, ante

wææ wānonte bai cægadānimpa.

12

Wadō tedete wadō nāni cædōnō ante

¹ Māniñedē nanguī ināni æpodō mīido ganca ināni adoyōmō pō bee tē bee tē cædinque goto gongæññōnāni Itota tōmengā miñæ nē godāni inānite tāno apænedinque, “Paditeoidi iñōmō wadō tedete wadō cæyōnāni mīnitō wæætē wadō nāni cædō ante, Pāo yedæ æmpoquī bai wodō wodō cæpa, ante gomō adinque tōmēnāni nāni cæinō bai cædāmaī iedāni. ² Adāmaī incædānimpa, ante quiēmē wē wodonte i incæ iincayæ ate tōmāā wi ænete bayonte edonque pōni bacæimpa. Ayæ quiēmē awēmō cæte i incæ iincayæ ate edonque pōni acædānimpa. ³ Wēmō iñōmō mīni tededō incæ edæ ñāo iñōmō edonque pōni eñgæimpa. Ayæ guicōnē mīnitō wæntæ apænedō incæ iincayæ ate oncōmanca inō æi edæ ogæ tedete edonque eñgæimpa,” ante Itota apænecantapa.

Æcānō ingante guiñente wæquī, ante (Māateo 10.26-31)

⁴ Ayæ, “Botō æmigoidi āmo eñeedāni. Waocā baonque wænōnāni ate tōmengā ingante ædō cæte godōmenque cæquīnāni. Ininque mīnitō iñōmō, Baonque wænōnāni wæncæ wæ, āninque edæ guiñēnāmaī iedāni. ⁵ Wæætē edæ, Æcānō ingante guiñente wæquēnēmīni imīni, ante botō odōmonte apænebo eñeedāni. Waomīni imīnite wænonte ate nē angā inongā inte tadōmengadænguipo nē wido cæcā ingante iñōmō mīnitō tōmengā ingante edæ guiñeedāni. Ao. Māningā ingante guiñente wæedāni,” ante Itota apænecantapa.

⁶ Ayæ, “Wadāni ayamōidi onompo æmæmpoque mānimpodāni beyæ tiguītamō mentamonga ante pædæ godonte ænāni amīnitawo. Incæte ayamō adocanque ingante edæ Wængonguī cōwē wææ acampa. ⁷ Edæ, Ayamōidi bacoo pōni ināni incæte onōnānique inānipa, ante nē āningā inte mōnō Mæmpo iñōmō mīnitō imīnite wæætē godōmenque waa acampa. Iñæmpa mōnō ocaguī incæ æpoguīnō encamōō, ante Wængonguī iñōmō edæ do eñente aacā apa guiñewēmīni,” ante Itota angantapa.

Wadāni eñēñōnāni mōnō Itota ingante Ao angæimpa, ante

(Māateo 10.32-33, 12.32; Māadoco 10.19-20)

⁸ Ayæ apænedinque, “Nāwangā āmopa, angantapa. Æcānō wadāni eñēñōnāni botō imote Ao āninque, Bitō botō Awēnē inōmi imipa, ante āna botō Waobo nē eñagaīmo inte tōmengā ingante wæætē Ao āninque, Bitō iñōmō botō miñæ nē gogaīmi inōmi imipa, ante Wængonguī anquedoidi eñēñōnāni ancæboimpa. ⁹ Wæætē edæ wadāni eñēñōnāni botō imote nē Baa angaingā ingante botō wæætē Wængonguī anquedoidi eñēñōnāni tōmengā ingante edæ Baa ancæboimpa,” angantapa.

¹⁰ Āninque, “Botō Waobo eñagaīmo iñōmote waocā babæ ante wīwa angā incæte Wængonguī wæætē edæ pōnō ñimpo cæcā quēwencæcāimpa. Wæætē Wængonguī Tæiyæ Waēmō Onōwoca ingante godō babæ ante nē ānewengā ingante Wængonguī wæætē edæ ñimpo cædāmaī inte cōwē pancæcāimpa,” ante Itota apænecantapa.

¹¹ Ayæ, “Mīnitō imīnite bæi ongonde tōmēnāni odōmōincōnē ænte godinque gō cædāni incæte mīnitō māniñedē, Æbānō ante apænequīmoo, ante wædāmaī iedāni. Awēnēidi weca incæ nē ānāni weca incæ mīnitō imīnite ænte māo goncædāni incæte mīnitō māniñedē, Pīnāni eñente wædinque æbānō ante nāmā wææ anguīmoo, ante ayæ, Æbānō ante apænequīmoo, ante guiñente wædāmaī iedāni. ¹² Iñæmpa Wængonguī Tæiyæ Waēmō Onōwoca māniñedē incæ, Æbānō wææ anguī, ante odōmonte angā eñēninque mīnitō wæætē māninō ante wææ ancæmīnimpa,” ante Itota apænegacāimpa.

Māincoo nāni æinēmāmo ante

¹³ Tæcæ apæneyongā godongāmæ ongōnāni ongōninque adocanque Itota ingante,

—Awēnē, botō wæmpo wodi mangaincoo incæ mæmpo wodi omæ ingaīmæ incæ botō mēmō ingante tæcæguedē āmi pā cæcā æmōe.

¹⁴ Āñongante Itota,

—Botō nē apænte āmo imopa diyæ āmo pā cæqingāā.

¹⁵ Äninqe godongämæ ongönäni inänite apænedinque,

—Wii mäincoo nanguï ænte beyænque mönō quëwengæimpa cæminii. Mini mäincoo æinëmämo ante edæ ñimpo cædinque ee aedäni.

¹⁶ Äninqe Itota, Wængonguï Awënë æbänō cæqingäa, ante eñencædänimpa, ante imæca quëwënäni nani cæinō ante odömöninque iïmaï apænecantapa.

—Adocanque nē nanguï ēacā inte tömengä ömæ waingui-poga nanguï pōni pæ. ¹⁷ Adinque tömengä iñömō, “Æbänō cæquimoo. Botō cænguï da wenguincō ñænæncō impa diyæ da wente manguimoo.” ¹⁸ Äninqe, “iïmaï cæcæboimpa. Guiyancō oncō bæ tate ñænæncō wæætē mænoncæboimpa. Mænöninque tömëmoncoo tönō mäincoo wæætē mänincönē tömancoo da wencæboimpa.”

¹⁹ Ayæ nämanque apænedinque botō, Botō cænguï tönō mäincoo nanguï wadepo ba beyæ eyepæ mänimo inte botō guëmancæboimpa. Önonque cænguï nanguï cænte nanguï bete tocæboimpa,”

²⁰ Ante nämanque pönëñongä wæætē nē mäningä ingante Wængonguï, “Eñenämaï cæbipa töö. Ñowo woyowotæ incæ edæ, Idæwaa quëwëmipa, ämo wæncæbiimpa. Wæmi adinque edæ bitō mäincoo inï edæ æcänō mäincoo baquii,” ante Wængonguï angampa, ante Itota, Mäninque ante apænebopa, angacäimpa. ²¹ Ayæ tömënäni inänite wæætē, “Wængonguï mänömaï angä eñente wædinque minitō wæætē iïmaï ante pönencæminimpa. Æcänō, Tömëmoque quï, ante da da wente mäna iñömō tömengä Wængonguï ayongä nē ömæpocä bai inte ömæwocacä ingampa. Nē ēacā wodi nänō wænō bai tömengä adobai bate wæquinō anguënē,” ante Itota apænegacäimpa.

Tömengä wëñcænäni inänite Wængonguï aacampa, ante

(Mäateo 6.25-34)

²² Itota mäniñedē tömengä miñæ nē godäni inänite, “iñinque botō minitō iminite ämopa. Ingui-poga mini quëwenguimämo ante wädämaï iedäni. Quimönō impa cænguimoo, ante, Quincodō impa

wëñaquimoo, ante wädämaï iedäni. ²³ Cænguinque cæninqe dicæ quëwëmongaa. Weocooque wëñadinque dicæ quëwëmongaa. Mönō quëwenguimämo iñömō godömenque impa. ²⁴ Gapatai iñömō cænguï ante dicæ minte pæ ate tä pete mänäniyaa. Incæte Wængonguï eyepæ godongä cænäni aedäni. Minitō guiquënë öömä eadäni bai inämaï iñöminite Wængonguï minitō iminite godömenque waa adinque eyepæ pönongä cæminipa. ²⁵ Wængonguï nänō anganca quëwëninque minitō nanguï cædinque wantæ iñō incæ ædō cæte godömenque quëwenguiminii. ²⁶ Mäninō wædænque cæqui incæte wii eyepæ cæmini iñinque minitō, Botō quëwenguinō ante wadō wadō cæcæboimpa, ante quinante wæminii,” ante Itota angantapa.

²⁷ Ayæ, “Ongai guiquënë weocoo ante daque daque dadämaï inte wodonte tinämaï iñönänite Wængonguï weocoo waëmoncoo bai godongä waa pōni ënopa. Awënë Tadömō wodi waëmoncoo ëgagingä incæ wii ongai bai eñagacäimpa. Ongai iñömō godömenque waëmō pōni ënopa. ²⁸ Gaguimæ iñömō iimō ate edæ gongapamō nē tanguinque ñowoönæ pæ incæte Wængonguï waëmō pönongä ënopa. iñinque, Waëmō ënodō nē pönongä inte mönō imonte godömenque eyepæ pōni pönongä ænte eñacæimpa, ante pönëmïniyaa. ²⁹ Minitō cænguï ante bequi ante æinente wädämaï iedäni. Edæ, Æbänō cæte ænguimōö, ante wädämaï iedäni. ³⁰ Ingui-poga wayömō nani eñenämaï incabo wayömō nani eñenämaï incabo mäninō ante wæyönäni minitō guiquënë, Mönō ænguënënō ante mönō Mæmpo iñömō edæ do eñengampa, ante pönëninque guñente wädämaï iedäni. ³¹ Wæætē Awënë Odeye nempo quëwencæte ante nanguï cæyöminite tömengä wæætē minitō ænguënënō ante do edæ eyepæ pōni pönongä æncæminimpa,” ante Itota apænecantapa.

Mönō ëaquincoo öönædē do ëamompa, ante (Mäateo 6.19-21)

³² Godömenque apænedinque Itota, “Botō nē aabo iñömote minitō botō miñæ mini gocabo iñömō wædænque pōni imini incæte edæ guñente wädämaï iedäni. Iñæmpa

mīnitō Mæmpo iñōmō, Awēnē Odeye nempo quēwencæminīmpa, ante pōnō cædinque waa tocampa cæminī. ³³ Mīnitō iñōmō, Ō ænāni dæ añōmō cayæ cænāmaī iñōmō botō mǎincoo wodāmaī inguincoo inte edæ cōwē mæ ongongæimpa, ante cædinque ōönædē iñōmō wo ææntodonte baī cæedāni. Wodāmaincadedē da wente baī cædinque mīnitō mǎincoo godonte æninque ōmæpodāni wæwēnāni inānite wæætē godōmīni æncædānimpa. ³⁴ Mīni waocabo iñōmō mīnitō mǎincoo ongōñōmō māniñōmō quēwencæte ante wæmīni imīnīpa, ante adinque botō, Ōönædē iñōmō wo ææntodonte baī cæte māedāni, antabopa,” ante Itota apænecantapa.

Tōmāā eyepæ cædinque wānō cōedāni, ante

³⁵ Ayæ apænedinque, “Waadāni, Awēnē beyæ ante cæcæimpa, ante weocoo eyepæ wēñadinque, Gongapæncade waēmō bæcocæimpa, ante eyepæ pōnī cædāni baī mīnitō adobaī eyepæ pōnī cædinque, Awēnē poncæcāimpa, ante wānō cōedāni. ³⁶ Edæ waodāni tōmēnāni awēnē wayōmō gote ææmæ bete ocæ emænte ponte aa pecā eñēninque quingæ wi ænecæte ante wānō cōnāni baī cædinque mīnitō adobaī, Awēnē poncæcāimpa, ante wānō cōedāni. ³⁷ Edæ awēnē ponte ayongā tōmengā ingante nē cædāni wānō cōnāni adinque tōmengā wæætē edæ pōnō waa cæcā æninque tōmēnāni iñōmō tocædānimpa. Mīnitō imīnite nāwangā amopa. Nē wānō cōnīnāni inānite awēnē pōnō angā ate tæ contadāni ate tōmengā nē awēnē inongā incæ, Nanguī cæcæimpa, ante weocoo wēñadinque tōmēnāni weca pōninque edæ pōnō cæcā æncædānimpa. ³⁸ Edæ woyowotæ tæcæ bæcā incæ ayatadāa wæicā incæ pōninque tōmengā nē wānō cōnīnāni inānite waa adinque pōnō waa cæcā adinque tōmēnāni iñōmō watapæ edæ tocædānimpa. ³⁹ Wæætē oncō nē èacā guiquēnē, Nē awēmō æncæ cædongā æyedēnō ponguingāā, ante eñēninque do wææ cæcā baī nē awēmō æncæ cædongā wæætē edæ pō guite ænāmaī incædongāimpa, ante apænebo eñente pōnēedāni. ⁴⁰ Mīnitō adobaī, Waocā

nē eñagaingā æyedēnō ponguingāā, ante eñēnāmaī imīni inte edæ tōmānō eyepæ cædinque edæ wānō cōedāni,” ante Itota angacāimpa.

Awēnē ingante nē cæda, ante (Māateo 24.45-51)

⁴¹ Mānōmaī angā eñēninque Pegodo, —Mānīnō odōmonte bitō apænedō ante mōnitō adomōnique eñencæmōnimpa, ante apænebitawo. Wæætē edæ, Wadāni tōmānāni eñencædānimpa, ante apænebitawo.

⁴² Añongante mōnō Awēnē wæætē odōmoncæte ante apænedinque, “Ingui-poga awēnē iñōmō, Æcānō nē eñengā inongā inte botō quincoo ante ædæmō aacā ingante adinque botō amo ate tōmengā nē angā badinque botō oncōnē nē cædāni inānite ædæmō aadinque cænguī eyepæ iñonte godongā cæncædānimpa, angampa.

⁴³ Īninque awēnē wayōmō gote ponte ayongā, Nē cæcā botō änō ante eñente cæcampa, ante adinque awēnē wæætē tōmengā ingante godō waa cæcā ate nē waa cæcā iñōmō edæ waa tocæcāimpa.

⁴⁴ Mīnitō imīnite nāwangā ante apænebopa. Nē eñente cædingā ingante awēnē, Bitō botō mǎincoo tōmancoo edæ nē aabi bacæbiimpa, ancæcāimpa.”

⁴⁵ “Incæte nē cæcā wæætē, Botō awēnē æiquedō ponguingāā, ante pōnēninque tōmengā tōnō awēnē ingante nāni godongāmæ cæcabo onguīñænāni incæ onquiyænāni incæ tōmēnāni inānite tæi tæi pāninque cænguī nanguī cæninque tī nāmæ nanguī bete quidi quidi dowænte bacā. ⁴⁶ Īninque tōmengā, Æönædō ponguingāā, ante wædāmaī iñongante, Æyedēnō ponguingāā, ante eñēnāmaī iñongante edæ awēnē iñontobæ pongā wæbaingampa. Ponte adinque awēnē wæætē māningā nē eñēnāmaī cædingā ingante wido wido todinque nē pōnēnāmaī ināni weca māo wido cæbaingampa,” ante Itota apænecantapa.

⁴⁷ Ayæ, “Awēnē ingante nē cæcā incæ awēnē nānō änō ante ōnōmoncaque eñēninque wīi eyepæ cædinque eñēnāmaī cæcā ĩninque awēnē iñōmō tōmengā ingante nanguī tæi tæi pancæcāimpa. ⁴⁸ Ayæ

wæætē edæ, Awēnē æbānō angāā, ante ēñēnāmaī inte ēmoncacā guiquēnē tōmengā nānō panguingue wēnæ wēnæ cæcā incæte tōmengā ingante wædænque tæi tæi pancæcāimpa, ante Itota apænegacāimpa. Edæ awēnē æcānō nempo nanguī pōnongā ænte næængā iñōmō tōmengā ingante Awēnē wæætē, Bitō adodō nanguī pōnōmi æmoe, ancæcāimpa. Ayæ, Botō māincoo nanguī ongoncoo iñonte bitō aacæbiimpa, ante æcānō ingante awēnē angāā tōmengā ingante, Bitō godōmenque nanguī cæcæbiimpa, ante awēnē ancæcāimpa,” ante odōmōninque Itota apænegacāimpa.

Nāwæ gocædānimpa, ante cæcæte ante pōmopa, angampa
(Māateo 10.34-36)

⁴⁹ Āninque Itota godōmenque apænedinque, “Botō inguipoga gonga baī tānoncæte ante pongaīmo inte edæ, Do tānonte baī edæ waa tocædōmoimpa. ⁵⁰ Ayæ botō nantate wæwencæte ante pongaīmo inte botō nantate wæganca nantate botō wæquēnēnō ante iinque cæcæte ante wæbopa. ⁵¹ Mīnitō, Inguipoga quēwēnāni piyænē cæte wæætēdō wæætē cædāmaī inte quēwencædānimpa, ante cæcæte ante Itota pongaingā ingampa, ante pōnēmīnitawo. Iñæmpa wadō āmo ēñēdāni. Botō inguipoga pōmo beyænque wæætēdō wæætē piincædānimpa. ⁵² Iincayæ ate ōnempo æmæmpoque nāni owocabo mānimpodāni iñōnānite mengāa go adocanque ināni iñōmō botō beyænque mēnaa inate nāēmæ piinte bacædānimpa. Ayæ wæætē mēnaa ina incæ mengāa go adocanque ināni inānite wæætē nāēmæ piinte bacædaimpa. ⁵³ Botō emōwo beyæ mæmpocā tōmengā wengā onguiñængā ingante nāēmæ piinte bacæcāimpa. Wēñængā wæætē mæmpocā ingante nāēmæ piinte bacæcāimpa. Wāānā tōmēnā wengā onquiyængā ingante wæætē nāēmæ piinte bacædāimpa. Wæætē wāānā ingante wēñængā incæ nāēmæ piinte bacæcāimpa. Biyongā ingante nānō wæntedā incæ nāēmæ piinte bacædāimpa. Nānō wæntedā inante biyongā ingante nāēmæ wæætē piinte bacæcāimpa,” ante Itota tōmengā miñæ nē godāni inānite apænegacāimpa.

Æbānō oo baquimpa, ante ēñengæimpa, ante
(Māateo 16.1-4, 8.11-13)

⁵⁴ Ayæ godongāmæ ongōnāni inānite apænedinque, “Nænque guidō gāmænō boguimā wentamō pō adinque mīnitō, Cōōnæ wentamō wocæmpa, āñōmīni edæ do cæpa. ⁵⁵ Ayæ wæætē woboyæ betamonca inō pæmæ pō adinque, Ocoi nāwancæ cæpa, ante tedeyōmīni dobæ ocoi nāwampa. ⁵⁶ Inguipoga gomō adinque ōōnædē æmō adinque mīnitō, Æbānō cæcæte ante emōō, ante edæ do ēñēmīnīpa. Wæætē, Inguipoga wayōmō wayōmō æbānō cædāni, ante adinque mīnitō, Wængonguī oo pōni cæquingānō anguēnē, ante quīnante wūi ēñēmīni. Edæ wadō tedete wadō cæmīni imīnīpa tōō,” ante Itota tōmēnāni inānite piingacāimpa.

Nē piingā ingante waadete apænecæimpa, ante
(Māateo 5.25-26)

⁵⁷ Ayæ edæ, “Æbānō cæte nō cæquīi, ante mīnitō tōmēmīnique apænte ante cæquēnēmīni imīnīpa. ⁵⁸ Nē piinte angā iñōmō bitō imite edæ, Wiwa cæbīpa, ante awēnē weca ænte māocā idōmæ godinque bitō guiquēnē tōmengā ingante waadete apænebi ēñēninque tōmengā wæætē piyænē cædinque ee abaingampa. Wæætē edæ wūi waadete apænebi ininque tōmengā nē apænte angā weca godōmenque ænte gobaingampa. Nē apænte angā wæætē bitō imite wææ wānongā ingante pædæ godongā æninque wææ wānongā wæætē tee mōnebaingampa. ⁵⁹ Tee mōnecā ininque bitō quīēmē beyæ debe imi ininque edæ tōmanta pōni di godonte ate tabaīmīpa, ante āmo ēñēmaīmīpa,” ante Itota apænegacāimpa.

13

Ocæ emænte Wængonguī gāmænō ponguēnēmīni imīnīpa

¹ Māniñedē wadāni Itota weca pōninque iīmaī ante apænedāni ēñengantapa. Gadideabæ quēwēnāni, Wængonguī quī, ante cæningā ingante tæcæ wænōñōnānite Pidato guiquēnē tōmēnāni inānite iñontobæ wænōninque tōmēnāni wepæ cæningā wepæ tōnō dibæ cæcantapa. ² Ante

tedeyönäni Itota wæætē, “Gadideabæ quëwënäni wadäni pönömenque wënæ wënæ cædäni iñönäni mänimpodänique godömenque wënæ wënæ cædäni inte mänömaï wænänipa, ante mīnitō pönēmīni awædō. Iñæmpa Gadideabæ quëwënäni tōmänäni adobaï wënæ wënæ cædäni iñönäni mäninänique edæ wænänipa. ³ Wīi mänömaï impa, ämo ëñëmaïmīnīpa. Tömēnāni wīi godömenque wënæ wënæ cædināni inte wænänitapa. Mīnitō guiquēnē wënæ wënæ mīni cædinō ante wæwente pönēninque ñimpo cædāmaï imīni inique mīnitō tōmäminī adobaï wæmäimīnīpa,” ängantapa.

⁴ “Ayæ Eedotadēë iñömō tōmēnāni nāni gomō aquincō Tidoe nāni änoncō tæ wææñonte waodäni dietiocho ganca ināni capo wænāni inique mīnitō, Tömēnāni godömenque wënæ wënæ cædäni inte wænänipa, ante pönēmīni awædō. Iñæmpa Eedotadēë quëwënäni tōmänäni adobaï wënæ wënæ cædäni iñönäni mänimpodänique edæ wænänipa. ⁵ Wīi mīnitō pönēnō baï impa, ämo ëñëmaïmīnīpa. Tömēnāni wīi godömenque wënæ wënæ cædināni inte wænänitapa. Mīnitō guiquēnē wënæ wënæ mīni cædinō ante wæwente pönēninque ñimpo cædāmaï imīni inique mīnitō tōmäminī adobaï wæmäimīnīpa,” ante Itota apænecantapa.

Iigowæ ömæca ongompa, ante odömönte apænecampa

⁶ Ayæ Itota, Wængonguï Awënë æbänō cæcää, ante ëñencædänīpa, ante imæca quëwënäni nāni cæinō ante odömöninque iīmaï apænecantapa. “Waocä tōmencodē iigowæ minte pæ ate tōmenca ante ponte ayongä edæ dæ ömæcawæ ongompa. ⁷ Ate wædinque tōmengä ocæ ëmænte godinque tōmencawæncoo nē aacä ingante apænedinque, ‘Edæ mēa go adoque wadepo tōmenca ante gote ayömo edæ mänīi iigowæ cōwē ömæcawæ önonque wææ ongompa cæbii. Ömæcawæ wææ ongöwæ adinque wido tate æmæwo wido cæe.’ ⁸ Äñongä tōmencawæncoo nē aacä wæætē, ‘Awënë, ee ongöe. Botō iigowæ önöwa gäänē ææ wodinque mämō wagada goi ænte wempo cædente tee moncabo

ate wadepo ate bitō ongöñömi edæ, ⁹ do incabaimpa. Wæætē wadepo ate ayömite ömæcawæ ate wædinque edæ æmæwo wido tate wido cæbaïmīpa,’ ante nē cæcä angampa.” Mäninque ante odömönte apænebopa, ante Itota apænecäimpa.

Itota bocæ bocæ wædingä ingante cæcä ate waa bacampa

¹⁰ Guëmanguïönæ iñönte Itota oodeoidi odömöincönē go guidinque odömönte apænecantapa. ¹¹ Onquiyängä mänīñömō ongongä iñömō tōmengä dietiocho wadepo iñönte wënæ guicä ate bocæ bocæ wæwëningä inte ædō cæte adiyæ ængæ gantiquingä. ¹² Tōmengä ingante adinque Itota aa pecä pongä ate,

—Onquiyæmi, bitō bocæ bocæ wædō ante ñöwo botō ñimæncæpote baï cæbo ate bitō waa babīpa.

¹³ Äninque tōmengä ingante gampocä ate ñimæncæpote baï badinque onquiyängä iñömō adiyæ gantidinque wæætē, Wængonguï bitō ñäö baï ëmömi inte waa pönī pönō cæbi æmopa, ante watapæ apænecantapa. ¹⁴ Guëmanguïönæ iñönte Itota mänömaï cæcä waa bacä adinque tōmēnāni odömöincō awënë guiquēnē pīinte badinque godongämæ ongönāni inänite,

—Quimæ quëwëmīnīi. Önonpo æmæmpoque go adoönæque mönō cæönæ iñönte mīnitō waa bacæte ante ponguënēmīni imīnīpa. Guëmanguïönæ iñönte edæ cædāmaï in-guënë quëwëmīnīi.

¹⁵ Ante pīiñongante mönō Awënë wæætē, —Mīnitō wadō tedete nē wadō cædömīni inte ëñëdäni. Mīnitō cæningä iñömō wagada incæ bodo incæ gue ænente wæyongante mīnitō guëmanguïönæ i incæte cōwē ñi cæyænte æpæ wedeca ænte mäo gönömīni gongænte becampa. ¹⁶ Wæætē mäningä onquiyängä iñömō Abadäö wodi pæingä iñongante Tatāna dietiocho wadepo iñönte goti winte baï cæcä wædingä iñongante mīnitō iñæmpa guëmanguïönæ i beyænque edæ, Tōmengä ñimæncæpodāmaï incæcäimpa, ante quīnante wææ ämīnīi.

¹⁷ Angä ëñente wædinque nē pīinte änāni guingo imonte wæyönāni godongämæ ongönāni guiquēnē, Bamönengæ pönī Itota

waa pōnī cæcampa, ante adinque nanguī togadānīpa.

Mōotatamō guidīmō ante odōmonte apænegacampa

(Māateo 13.31-32; Māadoco 4.30-32)

18 Īnīnque Itota tōmēnāni ĩnānite, “Wængonguī Awēnē Odeye nempo nāni quēwencabo ĩñōmō quīnō baī ĩnānī. Edæ, Æbānō nanguī yebænte badānī, ante botō inguipoga quīnō pæte yebænte baī ĩ adinque, Mānīnāni adobaī yebænānīpa, ante ēñenguī. 19 Īmaī impa. Waocā mōotatamō tōmēmō ænte māo tōmēmōncodē quīyacā bocate pæ ĩnīnque ñænæñeque bayonte ayamōidi pōnīnque awænēmæ ongōnānīpa. Mōotatamō guidīmō incæ mānōmaī pæ baī Wængonguī Awēnē nempo quēwēnāni ĩñōmō wædænque ĩnīnāni incæ nanguī yebænguīnāni ĩnānīpa,” ante Itota odōmonte apænegacāmpa.

Pāo yedæ æmpoquī da wenguī ante odōmonte apænegacampa

(Māateo 13.33)

20 Itota ayæ angantapa. “Wængonguī Awēnē ĩñōmō tōmengā nempo quēwēnāni ĩnānite æbānō cæcāā, ante odōmōncæte ante botō, Īmaī cæcampa, ante odōmonte apænebo ēñenguīmīnī. 21 Edæ ĩmaī impa. Onquiyængā ñænængade tee manguincade ænte tee mānīnque ædīna nāni āmō ænte mempoga go adopoque da wēnīnque ayæ, Pāo yedæ æmpocāmpa, ante adoyōmō pōnō da wēnīnque wempo wempo ædæmō cædengā ate pāōmo yedæ æmpote tōmāo nāāmænta bapa. Yedæ æmpote ate pāōmo tōmāo nāāmænta ba baī oōnædē Awēnē nempo mīni quēwencabo ĩñōmō tōmāmīni nō ēñente bamīnīpa,” ante Itota odōmonte apænegacantapa.

Odemō guiyānemō, ante

(Māateo 7.13-14, 21-23)

22 Itota māñīfēdē Eedotadēē taadō godīnque nanguī nāni quēwēñōmō wodo pænta godīnque wædænque nāni quēwēñōmō wodo pænta godīnque wayōmō wayōmō gote odōmonte apænegacāmpa. 23 Goyongante adocanque,

—Awēnē, bitō æmi beyænque nē quēwenguīnāni ĩñōmō wædænque ĩnānīpa, āmitawo.

Ñongante Itota,

24 —Odemō guiyānemō guicæte ante edæ nanguī cædāni. Edæ nanguī ĩnāni incæ guicæte ante cædīnque guīdāmaī incædānīpa, āmo ēñēmaīmīnīpa. 25 Īmaī impa. Oncō nē ēacā ængæ gantīdīnque odemō tee mōnecā adīnque mīnitō ĩñōmō tōmengā oncō boyæ gote ongōnīnque aa pedīnque, “Awēnē, wi ænebi guīquīmōnī.” Ante wæyōmīnīte tōmengā, “Æmīnidō ĩmīnī, ante ayæ, Ædōnō gāmænō quēwente pōmīni ĩmīnī, ante botō adāmaī ĩmōpa,” ancæcāmpa. 26 Angā ēñēnīnque mīnitō wæætē, “Īñæmpa mōnitō bitō tōnō godongāmæ cænte becongāmōnīpa. Ayæ bitō mōnitō taadō ponte cægōnīnque odōmonte apænebi ēñengāmōni æ,” ancæmīnīpa. 27 Āñōmīni tōmengā ĩñōmō, “Æmīnidō ĩmīnī, ante, Ædōnō gāmænō pōmīni ĩmīnī, ante botō ēñēnāmaī ĩmōpa. Edæ do antabopa. Ñōwo nē wīwa cægāmīnī inte edæ botō weca ongōnāmaī. Edæ wadæ goedāni, āmōpa,” ancæcāmpa, ante Itota apænegacantapa.

28 “Īnīnque mīnitō gomō ayōmīni Wængonguī beyæ nē apænegānīni tōnō dodāni Abadāo wodi Itæca wodi Aacobo wodi tōnō tōmānāni Wængonguī Awēnē Odeye omæ godongāmæ ongōñōnāni mīnitō ĩmīnīte edæ yabæque wido cæcā ate wædīnque mīnitō wæætē guingo imonte pīnte wædīnque edæ Ca ca wæcæmīnīpa. 29 Wadāni wæætē edæ nænque tamōnō pōnāni tōnō nænque guīdō pōnāni ayæ betamonca æmataæ æmataæ pōnāni tōnō Wængonguī Awēnē Odeye oncōnē ponte tæ contadīnque ææmæ bete cængōncædānīpa. 30 Īnīnque ayæ ate ēñēnāni incæ pancadānīya yæcado ongōnāni bate toyōnāni mīnitō guīquēnē do ēñēnīmīni inte yæcado ongōmīni incæte pancāmīnīya wæætē yæmīñæ gote ongōnte wæcæmīnīpa,” ante Itota apænegacāmpa.

Eedotadēē quēwēnāni beyæ ante Itota wæcampa

(Māateo 23.37-39)

³¹ Māniñedē Paditeoidi pancadāniya tōmengā weca pōninque,

—Awēnē Edode bitō imite wænoncæ angantaye. Bitō ongōnāmai wayōmō wadæ goe.

³² Ānāni ēñēninque Itota,

—Edode congāñe bai babæ cædongā iñongante mīnitō tōmengā weca godinque, Itota iīmai angampa, ante apænemīni ēñengædāni. “Edode ēñēmi. Botō ñōwoōnæque baōnæque wēnæidi inānite iñque wido cædinque iñque godō cæbo waa badāni ate iñabæ guingā iñonte botō edæ māniñedē edæ idæwaa cægāimo bacæboimpa, ante Itota apænecampa,” ante apænemīni ēñengædāni, āmopa.

³³ Incæte botō ñōwoōnæ godinque baōnæ godōmenque godinque edæ waōnæ godōmenque botō goquēnēnō godinque Eedotadēē gocæboimpa. Edæ Wængonguī beyæ nē apænegaināni incæ Eedotadēē iñōmō tōmēnāni nāni wængaiñōmō iñonte botō Wængonguī beyæ nē apænebo adobo inōmo inte edæ ædō cæte wayōmō ongonte wænguīmoo.

³⁴ Ante apænedinque Itota Eedotadēē iñōmō quēwēnāni beyæ ante pōnente wædinque, “Eedotadēē quēwēmīni ēñēdāni, angantapa. Wængonguī beyæ nē apænedāni inānite mīni wænongaincabo inte ayæ Wængonguī nānō da pōnōnāni inānite dicaca tacamīni iñōmīnite botō iñōmō mīnitō imīnite waadete pōnō cæinente nanguī wæbopa. Tawadiya wæmōnā iñōmō, Botō wēnāni, ante gom-podinque tæcæenēmæ wēā pōnō ō ænā bai botō adobai, Botō wēnāni pōedāni, ante æpogadō añōmote mīnitō, Wīi pōinente awædō, ante Baa āmīni wætabopa. ³⁵ Ñōwo iñōmō mīnitō onconcoo edæ ōnonconcooque baconcoo tamēñedāni. Ñōwo edæ botō dæ añōmo mīnitō, ‘Awēnē Wængonguī emōwo beyænque pōninque bitō toquinque edæ waa cæcæbiimpa,’ ante mīni anguinganca mīnitō edæ botō imote adāmai incæmīnampa ante āmo ēñēdāni,” ante Itota apænecacāimpa.

14

Æpæ ēñate nē wædongā ingante Itota cæcā waa bacā

¹ Itota guēmanguiōnæ iñonte Paditeoidi awēnē oncōnē cæncæte ante go guīiy-ongante godongāmæ ponte ongōnāni guiquēnē, Itota æbānō cæquingāā, ante waa agōnānitapa. ² Tōmengā weca adocanque æpæ ēñate nē wædongā inte a ongongā. ³ Adinque idægoidi nāni wææ angainō ante nē ate ēñēnāni tōnō Paditeoidi inānite apænedinque Itota iīmai angantapa.

—Wængonguī æbānō ante wææ angacāi. Waa bacædānampa, ante guēmanguiōnæ iñonte mōnō waa cæquēnēmō imōō, ante pōnēmīni. Wæætē edæ, Guēmanguiōnæ iñonte cædāmai inguēnēmō imōō, ante pōnēmīni.

⁴ Āñongā edæ pæ wēenedānitapa. Itota iñōmō edæ nē æpæ ēñate wædongā ingante gampocā waa bacantapa. Ayæ, Goe, angā gocantapa. ⁵ Angā gocā ate Itota wæætē tōmēnāni inānite iīmai angantapa.

—Mīnitō waocabo iñōmīnite adocanque tōmengā wēñængā onguīñængā incæ tōmengā wagada onguīñængā incæ æpæ ante nāni ææ wodiñōmō goyæ guīicā iñinque mæmpocā iñōmō guēmanguiōnæ iñonte edæ dicæ tōō tadōnāmai inguingāā. Mānōmai goyæ guīicā wædinque mīnitō tōmāmīni guēmanguiōnæ i incæte do gote nāwæ gongæninque edæ quingæ tōō tadōmaimīnipa.

⁶ Ante Itota añongante tōmēnāni ædō cæte wæætē anguīnāni. Edæ pæ wēenedānitapa.

Monguīmæno ante awēnē beyæ gote nē wente cænāni, ante

⁷ Ayæ Paditeo awēnē nānō nē añēdīnāni pōninque nāmanque ante pōnēninque, Yæcado ongōñōmote botō imote waa acædānampa, ante cædinque waa pōni tæ contaī iñōmō tæ contadāni Itota acantapa. Iñinque tōmengā, Wængonguī Awēnē nempo quēwēninque æbānō cæquīi, ante ēñencædānampa, ante imæca quēwēnāni nāni cæinō ante odōmōninque iīmai apænecantapa.

⁸ —Bitō imite, Monguīmæno pō bee, ante nē wente ængā ēñēninque bitō pōninque yæcado inō waēmō iñōmō tæ contadāmai incæbiimpa. Iñæmpa wacā tōmengā nānō nē waadecā pongā iñinque ⁹ mīnatō imīnate nē wente ængā iñōmō bitō weca pōninque,

“Bitō gā goyōmi botō nē waadecā wæætē tæ contaquingā,” ante āmaingampa. Īnque bitō gā godinque wīi waēmō ĩñōmō wæætē tæ contadinque guingo imonte wæbaīmipa. ¹⁰ Wæætē nē wente ængā ēñēninque bitō monguimæno pōninque yæmiñæ pōni wænæ wænæ ĩñōmō tæ contae. Edæ nē wente ængā ponte ayongā bitō wænæ wænæ ĩñōmō tæ contabi adinque tōmengā wæætē bitō ĩmite, “Botō nē waadebi ĩnōmi inte bitō ñōwo yæcado pōni pō tæ contae, āmopa,” āmaingampa. Mānōmaī angā ēñēninque godongāmæ cæ cōnāni ĩñōmō, Nē ēacā nānō nē waadebi bitō ĩmi amōnipa, ante bitō ĩmite waa abainānipa. ¹¹ Edæ, Botō nāmā nē waa cæbo ĩnōmo inte edæ yæcado ongonguēnēmo ĩmopa, ante nē cæcā ĩñōmō tōmengā ĩñōmō wææntodonte bai guingo imonte wæcæcāimpa. Wæætē edæ, Botō ōnōmoque ĩmopa, ante yæmiñæ nē ongongā ĩñōmō tōmengā guiquēnē ængō cæte tocæcāimpa, ante Itota apænecantapa.

¹² Tōmēnāni ĩnānite ĩnque apænedinque nē wente æningā ingante Itota godōmenque angantapa.

—Bitō, Pō cæe, ante ææmænoca wente æninque bitō æmigoidi ĩnānite wente ænāmaī ĩe. Bitō tōniñadāni ĩnānite wente ænāmaī ĩe. Bitō guidēnāni ĩnānite wente ænāmaī ĩe. Eyequeī owote māincoo nē ēadāni ĩnānite wente ænāmaī ĩe. Edæ bitō tōmēnāni ĩnānite wente æmi ĩnque tōmēnāni wæætē bitō ĩmite wente æmāinānipa, ante wææ cædinque bitō ĩñōmō, Botō godōnō wæætē eyepæ pōnōnāni māninque æninque ōnædē wæætē ænāmaī ĩmaīmopa, ante wædinque edæ tōmēnāni ĩnānite wente ænāmaī ĩe. ¹³ Wæætē ææmæno ante wente æninque ōmæpodāni inte wæwēnāni ĩnānite cōmante wæwēnāni ĩnānite bee ñante wæwēnāni ĩnānite babetamōnāni ĩnānite wente æe. ¹⁴ Mānināni ĩnānite wente æninque edæ bitō toquinque ingæimpa. Tōmēnāni wæætē ædō cæte adopo pōnōnāni ænguimii. Edæ nē nō cædāni nāni ñāni ōmæmonguionæ ĩnque bayonte edæ mōnō Mæmpo Wængonguī incæ bitō ĩmite adopo pōnongā æncæbiimpa, ante Itota apænegacāimpa.

apænecampa

(Māteō 22.1-10)

¹⁵ Angā ēñēninque Itota tōnō nē cængongā adocanque tōmengā ingante apænecantapa.

—Wængonguī Awēnē Odeye pongā ate tōmengā tōnō godongāmæ nē cængā ĩñōmō edæ tōmengā nānō watapæ toquinque cænguingā.

¹⁶ Apænecā ēñēninque Itota wæætē tōmengā ingante odōmoncæte ante apænecantapa.

—Wacā ææmæno ante cædinque nanguī ĩnāni ĩnānite māo apænedinque, ĩncayæ ate āmo ate pō bete cædāni, ante cæcantapa. ¹⁷ Ææmæno beyedē ĩnque bayonte tōmengā ingante nē cæcā ingante āninque, “Īionæ ææmæno ĩnque cætimpā. Pōedāni,” ante bitō tē tē wente ænte pōe, ante da godongā. ¹⁸ Godinque wente ængā ēñēninque do nānō nē āñēdināni wæætē, Ædō cæte ponguimōnii, ante tōmānāni adoyōmō wædānipa. Tānocā ĩñōmō, “Botō ōmæ ante tæcæ godonte æninque botō acæ goquimo inte botō ææmæ becæ godāmaī ĩmopa. Incæte nē wente æningā weca adodō gote bitō botō beyæ apænebi ēñēninque tōmengā wæætē botō ĩmote pīināmaī incæcāimpa,” angampa. ¹⁹ Wacā guiquēnē, “Wagada onguīñæna nāna goti wimencacaya nāna goti wimencacaya ōnōmpo æmæmpoque ganca mānimpodāni ĩnāni ĩnānite godonte ænimo inte botō, Æbānō cædānii, ante acæ gocæ cæbopa. ĩnque botō ææmæ becæ pōnāmaī ĩmo incæte awēnē ingante āmi botō ĩmote pīināmaī incæcāimpa,” angampa. ²⁰ Wacā guiquēnē, “Botō tæcæ mōnimo inte ædō cæte ponguimoo,” angā.

²¹ Ēñēninque nē cæcā ĩñōmō awēnē weca adodō pōninque tōmēnāni nāni cædōnō ante tōmāā apænecā ēñēnte wædinque nē ēacā ĩñōmō ænguī badinque tōmengā ingante nē cæcā ingante, “Bitō mōnō quēwēñōmō wacā taadō wacā taadō ñænænō incæ guiyānō incæ tōmāo gote adinque nē ōmæpodāni ĩnānite, nē cōmāināni ĩnānite, nē biyaate ĩnāni ĩnānite, nē babetamōnāni ĩnānite adinque ænte pōe.” ²² Angā ēñēnte cædinque nē cæcā wæætē awēnē ingante,

Ææmæ ante Itota odōmoncæte ante

“Awënë, bitö äninö ante do cæbo incæte bitö oncö wii eyede impa.” ²³ Ante apæ necä eñente wædinque awënë wæætë, “Önömæca iñömö ñænænö incæ guiyänö incæ gote diqui diqui minte wadäni inänite ate ämi pönäni ininque botö oncö eyede ponte cæncædänimpa. ²⁴ Edæ bitö imite ämopa, Wëenëñedë botö wente æninäni incæ bedämaï incædänimpa,” ante nē ēacä angampa. Mäinque ante apænebopa, ante Itota apænegacäimpa.

Itota miñæ gocæte ante cæbänö cæquii, ante

(Mäateo 10.37-38)

²⁵ Itota tönö nanguï inäni godongämæ godänitapa. Tömënanäni inänite apæ necæte ante tömengä dadi emænte adinque apæ necantapa.

²⁶ “Minitö iñömö, Itota gämænö ponguïmo, äminitawo. Iñæmpa botö weca pöninque waocä mæmpo tönö wäänä inate ante wædämaï incæcäimpa. Tömengä nänöogængä ingante ante wædämaï inte tömengä wëñænäni tönö tömengä nänö tönñadäni inänite ante wædämaï incæcäimpa. Mänimpodäni inänite piinte bai pönëninque tömengä, Nämantage ante quëwencæboimpa, ante wædämaï inte piinte bai pönëninque botö imote wæætë godömenque nanguï waadete pönenguëngä ingampa. Mänömaï ante pönënanäni iñömö tömënanäni edæ botö miñæ nē godäni badänipa. ²⁷ Ayæ botö miñæ poncæ cædinque waocä, Awæ botö wænguiwæ, ante næænte ponte bai cædinque, Wænönäni wæmo incæte Itota miñæ cöwë gocæboimpa, ante poncæcäimpa. Mänömainö ante wii cæcä iñömö tömengä iñömö edæ botö nē emiñængä ædö cæte baquingä. ²⁸ Æi gomö aquincö mænoncæ cædinque bitö, Æpodö godonte æninque iinque mænonguïmo. Botö eyepæ mantawo, ante täno pönënamäi inte edæ ædö cæte mænonguïmi. ²⁹ Täno pönë cönämaï imi ininque bitö ongonto ontowæ do näñe ñongæninque godömenque ænguï ante ömæpobi badinque iinque edæ mænönämaï imaïmipa. Ayæ edæ mænönämaï imi adinque godongämæ ongönäni wæætë, ³⁰ Æ bitö mænoncæ

cædämi incæ iinque mænönämaï imipa töö, ante badete tobainäni, angantapa.

³¹ Ayæ, “Imæca awënë wabæca awënë ingante guëadö guëa piinte cæcæte ante cædinque ædö cæte täno pönënamäi inte cæquingä. Imaï pönente cæquëngä ingampa. Botö tontadoidi guiquënë diete müido ganca iñönänite wabæca awënë tömengä tontadoidi guiquënë bæinte müido ganca inäni awædö. Tömengä tontadoidi nanguï inäni tönö piincæte ante pönongante botö æbänö cæte edæ wææ cæquïmo, ante täno pönë congüënë ingampa. ³² Ayæ, Botö iñömö tæi piñæmo imopa diyæ tömënanäni inänite wido cæquïmo, ante pönengä ininque tömengä edæ wabæca awënë gobæ ongöñongante mäo wææ angüengä ingampa. Edæ, Botö æbänö cæbo ate bitö wæætë piyænë cæte ee ate gobi quëwëmoe, ante wææ angüengä ingampa. ³³ Mini cabo adobaï iminipa. Mäincooque impa, ante godonte bai cædinque minitö tömancoo emö cædinque tömänäni inänite emö cædinque botö miñæ poncæminimpa. Iñæmpa emö cædämaï imini ininque minitö botö nē emiñæmini ædö cæte baquïminii,” ante Itota angacäimpa.

Cati incæ nongæ bapa, ante

(Mäateo 5.13; Mäadoco 9.50)

³⁴ Ayæ apænedinque Itota, “Cati quïmonte cæi iñömö waëme inte gæpæ emompa, angacäimpa. Incæte nongæmonte ba adinque minitö wæætë æbänö nō cæmini wæætë gæpæ emonguï. ³⁵ Iñæmpa gönea inguipoga cati wäne cædäni ininque tömëmö cati beyæ pædämaï ingæimpa. Ayæ wagada goi tönö wempodente wäne cædäni ininque tömëmö cati beyæ pædämaï ingæimpa. Ininque edæ cati nongæ ba ate wido cædänipa. Mänömaï apænebo eñëninque ëamonca ongonte eñëdäni,” ante Itota apænegacäimpa.

15

Cæningä wë womönimpa, ante odömöninque apæ necampa

(Mäateo 18.10-14)

¹ Odömäno awënë beyæ nē ænänäni tönö Wængonguï ingante eñënamäi inte nē cædäni tönö tömänäni Itota apæ necä

ēñencæte ante godongamæ pönäni inönänimpa. ² Adinque Paditeoidi tönö nē odömönäni guiquenē Itota ingante ante pīiniquē,

—Īngä iñömö, Pöedäni, āniquē nē ēñenāmaī cædäni tönö cæ congä awædö.

³ Ante pīinte tededäni wædinque Itota, Wængonguī Awenē nempo quēwēninque æbänö cæquī, ante ēñencædänimpa, ante imæca quēwēnāni nāni cæinö ante odömöninque iīmaī apænecantapa.

⁴ “Mīnitö iñæmpa. Mīni waocabo iñöminite adobi iñömö bitö obegaidi tiēē ganca ēabi iñömi obega adocanque incæ wē womonte edæ dæ bacä ininque bitö iñömö æbänö cæbaīmii. Edæ nōobenta i nōebe ināni ayæ ongoncoo inānite yabæque emö cæte godinque önömæca gote wē womöningä ingante bitö ædö cæte diqui diqui mināmaī imii. Bitö aganca cōwē edæ diqui diqui mīmaīmipa. ⁵ Ayæ diqui diqui minte

ēadente ate, Ñowo ēadēmopa, ante todinque önönancapæ wo ææntodöninque, ⁶ oncönē mongænte pöninque bitö guidēnāni tönö bitö æmigoidi tönö añete pönäni ate, ‘Badogaa, botö wē womö wædö dobæ ēadente i abopa. Edæ mönö watapæ toquinque impa,’ ante nē ēabi iñömö ämaīmipa. ⁷ Öönædē quēwēnāni iñömö adobaī cædänipa, ante apænebo ēñēedäni. Waodäni nōobenta i nōebe ganca ināni nē nō cædönāni inte wē womönāmaī inte ayæ ongönāni adinque öönædē quēwēnāni wædænque todänipa. Wæætē waocä adocanque incæ nē womöningä iñömö tömengä edæ wēnæ wēnæ nänö cædinö ante wæwente pönēninque ñimpo cæte pongä adinque öönædē quēwēnāni iñömö godömenque watapæ todänipa,” ante Itota apænecacäimpa.

Onquiyængä tiguitamö nänö wē wodönintamö ante

⁸ Godömenque apænedinque Itota odömongantapa. “Ayæ wæætē onquiyængä tiguitamö diete ganca māñongä adotamonque wē wodonte ba adinque, Ñäö gongængæimpa, ante tica wodönodinque tömengä oncö tömäo wadæ ñēmæ wadæ ñēmæ cæte diqui diqui minte ængampa.

⁹ Do æninque tömengä guidēnāni tönö

tömengä æmigoidi tönö añete pönönänite, ‘Botö wē womontamö wædö dobæ ēadente abopa. Mönö edæ watapæ toquinque impa,’ angampa. ¹⁰ Ininque mīnitö imīnite apænebopa. Adocanque incæ wēnæ wēnæ nänö cædinö wæwente pönēninque ñimpo cædinque pongä adinque Wængonguī anquedoidi incæ watapæ todänipa,” ante Itota apænecacäimpa.

Mäincoo nē ewengä ingante mæmpocä waadete pönö cæcä

¹¹ Ayæ godömenque apænedinque Itota, “Mæmpocä tömengä wēñæna mēnaa iñönate, ¹² ayæmengä iñömö wæmpocä ingante apænedinque, ‘Mæmpo, bitö ēacoo incæ æmæncooque pä cæte botö ænguēnecooque pönömi æmoe.’ Angä Ao äninque wæmpocä pä cædinque wacä ingä pædæ wacä ingä pædæ godongä æna.

¹³ Ate wantæ ate ayæmengä iñömö ænte næænte wabæca godinque quingämē baī önonque towente quēwēninque wæmpocä nänö pönönincoo incæ eye cæpote ba. ¹⁴ Ate mǎñömæ cænguī dæ ba ate nāni gæwænte wæpāmo pö ininque tömengä mäincoo ænguēnengä inte wæwengä. ¹⁵ Ininque tömengä mǎññömö quēwengä weca gote äninque, Bitö imi nē cæbo bacæboimpa, añongante Ao äninque, Botö ömæ odæ wængänäidi nāni cæmancadē gote nē aabi bacæbiimpa, ante da godongä. ¹⁶ Gote aadinque tömengä gue ænente ömædengä inte odæ wængänäidi nāni cæntapodē incæ cæinente wæyongante cænguī dicæ pönönāniyaa.”

¹⁷ “Ante wædinque tömengä nāmanque pönēē cöninque, ‘Iñæmpa botö wæmpo ingante nē cædäni iñömö önönänique incæ eyepæ pönī cæñönāni botö iñömö edæ gæwænte wænguī wæ. ¹⁸ Botö mæmpo weca edæ wadæ gocæboimpa. Gote pöninque botö tömengä ingante, Mæmpo ēñēmi. Öönædē quēwengä ingante botö godö ēñenāmaī cædinque bitö ayömite pönö wēnæ wēnæ cæbo iñömote, ¹⁹ bitö ñowo edæ, Botö wēmi, ante ædö cæte anguīmii. Wæætē edæ, Bitö botö imote, Nē cæbi bae, ämi ate botö bitö imite nē cæbo bacæboimpa, ancæboimpa.’ ²⁰ Ante pönēninque wadæ godinque wæmpocä weca gocantapa,” ante

apænedinque Itota godömenque odömonte apænecantapa.

“Ayæmengä mänömaï gote gobæ pöni dibæ pöñongante wæmpocä iñömö gomö adinque iñontobæ pönö waadete wæcampa. Pogodo pöni godinque tömengä wengä ingante waa waadedinque bæi ongonte queë bemongampa. ²¹ Tömengä wengä iñömö, ‘Mæmpo ëñëmi. Öönædë nê quëwengä ingante botö godö ëñënamäi cædinque bitö ayömite pönö wënæ wënæ cæbo iñömote bitö ñöwo edæ, Botö wëmi, ante ædö cæte anguimii.’ ²² Ante tæcæ apæneyongante mæmpocä iñömö nê cædäni inänite äninque, ‘Weocoo waëmoncoo quingæ ö ænte mämö daga wëñaquimini. Öonmpo timpoi ænte pöninque godö da timpodinque awæncata ö ænte godö da wëwaedäni. ²³ Ayæ wagada wëñængä nanguï cænte uguïmo pöni inongä inte wænonte ænömïni ate mönö cænte tocæimpa. ²⁴ Edæ botö wengä iñömö do wænte bai inongä incæte ñöwo miingä pongä aedäni. Botö nê wë womongä wædongä incæ edæ ñöwo dobæ éadente tobopa.’ Ante wæmpocä angä ëñëninque ææmæ cædinque nanguï todänitapa,” ante Itota godömenque odömonte apænecantapa.

²⁵ “Ææmæ cæte toyönäni bamoncadengä guiquënë gönea ayæ cædongäimpa. Ìinque cæte ate obo ponte ëñëñongä ämotamini ante äwadäni. ²⁶ Ëñente wædinque nê cæcä ingante äñecä pöñongante, Æbänö cædäni, ante wæcampa. ²⁷ Äñongante, ‘Bitö biwï incæ do pongä adinque bitö wæmpo, Botö wengä miingä ëñadente tobopa, ante adinque wagada wengä uguïmo pöni inongä ingante do angä wænonte ææmæ cæte todänipa.’ ²⁸ Ante apænecä ëñëninque bamoncadengä iñömö edæ ænguï badinque oncönë guidämaï, Baa angä. Wædinque wæmpocä iñömö oncodö taodinque tömengä ingante waadete apænedinque, Oncönë pö guïie, angampa. ²⁹ Bamoncadengä wæætë, ‘Ìñæmpa bitö beyæ ante wadepo iñö wadepo iñö botö ancaa cædinque bitö änö tömänö ante do cæbo iñömote bitö wæætë, Bitö æmigoidi tönö cænte tocæminimpa, ante dicæ ämiyaa. Caboda wengä incæ dicæ pönömi æmogaa.

³⁰ Wæætë mäningä bitö wengä guiquënë onquiyænäni mäincoo beyæ ante nê towente quëwënäni tönö quëwëninque bitö éadincoo incæ nê ëwënergä inte pongä adinque bitö wæætë wagada wë uguïmo pöni inongä incæ mäningä beyæ do wænömipa, ante awædö,’ angantapa.”

³¹ “Ante püiñongante wæmpocä, ‘Botö wëmi ëñëmi. Bitö iñömö cöwë edæ botö weca ongömi imipa. Botö mäincoo ini edæ bitö mäincoo cöwë impa. ³² Incæte mäningä bitö biwï, Do wæmaï ingampa, ante mönö nê pönëngä inte ñöwo miingä ingä pongä ae. Nê wë womöningä ingante do éadente ate edæ ææmæ cæte toquënë inimpa,’ ante bamoncadengä ingante mæmpocä angampa.” Mäninque ante apænebopa, ante Itota apænegacäimpa.

16

Në aaquënergä incæ nö cædämaï ingampa, ante

¹ Itota tömengä miñæ nê godäni inänite godömenque apænedinque, “Waocä adocanque mäincoo nanguï éacä iñongante wadäni, Bitö mäincoo nê aaquënergä incæ önonque pöni wido cæcä ae. ² Änäni ëñëninque nê éacä iñömö nê aaquënergä ingante äñecä pongä ate iïmaï angampa. ‘Bitö quimæ cæbii, ante adinque tededäni edæ ëñëmopa. Nöwo idæwaa botö mäincoo inte nê aadimi inte edæ abæ tawæ gocæbiimpa. Ämo ate ëñente wædinque bitö botö mäincoo ini ante edæ, Æbänö aadinque cæboo,’ ante apænebi ëñëmoe.”

³ “Ante püinte angä ëñente wædinque nê aadingä iñömö nämäneque tededinque, ‘Botö awënë, Gobäwe, angä ëñëninque botö abæ tawænte gote awædö. Botö cæte ænguëmenta ñöwo ænämaï ininque æbänö cæte ænte quëwenguïmo. Botö, Wadäni beyæ onguipoi ææ wobo ate pönönäni ænte quëwencæboimpa, ante pönëmo bai edæ tæi piñæmopa diyæ ææ woquïmoo. Ayæ, Önonque pönömïni æmoedäni, ante ædö cæte anguïmoo. Guïñënete awædö. ⁴ Æ. Tæcæ pönëmopa. Botö awënë angä botö abæ tawænte goyömote wadäni wæætë, Botö oncönë pö guïie, ancædänimpa, ante cædinque botö ñöwo iïmaï cæcæboimpa,’

ante iīmaī cæcampa,” ante apænedinque Itota godömenque apænecantapa.

⁵ “Wadāni iñömö iingä awënë pönongä æninque adodö pönönāmaī ināni inte debe inönānimpa. Iñāni inānite adocanque adocanque tōmānāni inānite angä pönönānite nē aadingä iñömö tāno pöningä ingante apænedinque, ‘Botö awënë ingante bitö ayæ æpodö pönönāmaī imii.’

⁶ Añongante, ‘Oguinguiæ incæ botö tië ganca tanquebo encadedë awënë ingante pönönāmaī inte debe imopa.’ Ante apænecä eñëninque ‘Mānimpocadedë debe imipa,’ ante awënë nānō yewæmöninta pædæ godöninque nē aadingä iñömö, ‘Bado, bitö iinta ænte pönömenque ante yewæmöninque edæ, Botö tincoenta ganca encadedë debe imopa, ante edæ quingæ tæ contate yewæmöe,’ angä eñente cæcampa. ⁷ Ayæ pöningä ingante nē aadingä angantapa. ‘Bitö guiquënë æpodö pönönāmaī imii.’ Añongante, ‘Todigo incæ tee manguincade ñænængade pöni tië ganca encadedë botö debe imopa.’ Ante apænecä eñëninque awënë nānō yewæmöninta pædæ godinque nē aadingä, ‘Bado bitö iinta ænte pönömenque ante yewæmöninque, Otenta ganca debe imopa, ante yewæmöe,’ angä cæcampa.”

⁸ “Iñinque nē aaquënegä mänömaī önonque wīwa cæcä wædinque awënë tōmengä ingante, Bitö ocai nanguī encabi inte nāmanque ante pönëwëninque cæbitapa, angampa, ante Itota nē aaquënegä ingante ante māninque apænecantapa. Ayæ godongāmæ ongönāni inānite godömenque apænedinque, Inguipogaque ante quëwënāni iñömö nāni caboque nanguī eñente cæyönāni botö ñäö iñömö nē quëwënāni nāni cabo guiquënë wīi nanguī eñente cædānipa,” ante Itota odömoncæte ante apænecantapa.

⁹ Ayæ, “Minitö iminite ñöwo ämo eñëedāni. Māningä nē aacä ocai encate cæcä bai minitö iñömö adobai inguipogaque wīwa cæcæte ante nāni godonte æinta māmīni iñinque ocai encate tōingä pönente cæedāni. Inguipoga iñinque bayedë māninta iñömö edæ dæ bacæimpa, ante pönente wædinque, wadāni beyænque ante godö

waa cæedāni. Mänömaī cæmīni iñinque minitö ömæpomīni inte öönædë nāni cöwë wantæpiyæ quëwencönë æite godinque pönöminite, Oncönë pöedāni, ämañānipa,” ante Itota apænecantapa.

¹⁰ Ayæ, “Waacä māincoo wædænque pöni æninque ædæmö aacä iñinque tōmengä wæætë nanguī māincoo æninque adobai ædæmö aaquingä ingampa. Wæætë edæ māincoo wædænque pöni aaquënegä incæ babæ cæcä iñinque tōmengä wæætë nanguī æninque cöwë babæ cæquingä imaingampa. ¹¹ Iñinque māincooque ante mīni wædoncoo æninque minitö ædæmö aadāmaī imīni adinque minitö iminite, Wo ëwënāmāincoo aacæbiimpa, ante dicæ pönönāni ænguimīniyaa. ¹² Ayæ wacä minitö iminite, Botö qui ædæmö aedāni, ante pönongä ænimīni inte minitö ædæmö aadāmaī imīni adinque, Tömëmīni qui, ante minitö iminite pönönāmaī incædānimpa,” ante Itota apænegacäimpa.

¹³ Ante apænedinque Itota godömenque apænecantapa. “Mēnaa awënëna ina beyæ waocä ædö cæte cæquingä. Adocanque awënë ingante pīinque wacä ingante waadebaingampa. Wæætë adocanque miñæ godinque wacä ingante wīi waa abaingampa. Minitö adobai imīni inte Wængongui ingante nē cæmīni iñinque māincooque ante ædö cæte cæquimīni,” ante Itota angacäimpa.

¹⁴ Itota apænecä eñëninque Paditeoidi guiquënë māincooque ante nē wæwënāni inönāni inte, Quimæ anewë, ante badete togadānimpa. ¹⁵ Adinque Itota wæætë tōmënāni inānite, “Minitö iñæmpa, Mönitö imönite adinque waodāni, Nē nō cædāni inānipa, ante pönencædānimpa, ante nē babæ cæmīni imīnipa. Incæte Wængongui minitö mimönë mīni entawënö ante edæ do acampa. Waodāni nāni waa adö ante Wængongui wæætë, Wentamö pöni i awædö, ante piingampa,” ante Itota apænecantapa.

Wængongui Awënë nānō wææ angainö cöwë ongompä

¹⁶ Äninque Itota, “Wëenënedë iñömö Wäö nānō ponganca dodāni Mōitee wodi nānō wææ angainö ante ayæ Wængongui beyæ

nē apænedāni nāni angainō ante apænete quēwengadānimpā. Nōwo guiquēnē, Wængonguī Awēnē Odeye nempo guiite quēwengæimpā, ante watapæ apænete impā. Iīne ante ēñēninque tōmānāni Awēnē nempo guicæte ante edæ pæ pagænte cædinque da godō guidānimpā,” ante apænegacantapā.

¹⁷ Ayæ apænedinque, “Incæte oōnæ tōnō inguipo æmæwo edæ dæ nāni baganca edæ Wængonguī nānō wææ angainō iñōmō edæ cōwē mæ ongongæimpā. Mānīne ante yewæmōninque dodāni nāni tænoncagai iñōmō edæ guiyā pōnī incæ cōwē wadæ cædāmaī ingæimpā,” ante Itota apænegacāimpā.

Nāni pāmcente wædō ante Itota apænegacampā

(Māateo 19.1-12; Mādaco 10.1-12)

¹⁸ Ayæ godōmenque apænedinque Itota, “Æcānō nāwā nānōogængā ingante pāmæninque wacā onquiyængā ingante godō mōna iñōmō tōmengā edæ wiwa towengā do bacampā. Adobaī, tōmengā nānōogængā iīngā iñongante wacā mōninque edæ do towente bacampā,” ante apænegacantapā.

Tæcæ wodi tōnō Datado, ante Itota odōmonte apænegā

¹⁹ Godōmenque odōmonte apænegacæte ante Itota iīmaī ante apænegacāimpā. “Onguīñængā adocanque nē ēcā inte cæncadencoō wæmoncoō wēñadinque awēnēidi nāni opatawæ ēmoncoō baī yabæque wēñadongāimpā. Tōmengā tæcæ wodi iīngā inte wæme cænguīncooque æninque iīmō iñō iīmō iñō ææmæ cædinque nangui todirque quēwēnongāimpā. ²⁰ Tæcæ wodi yabædemō iñō wacā tōmengā emōwo Datado ingante ænte māmō nō cædāni ñongængantapā. Iīngā iñōmō, Pōnōmi æmoe, Pōnōmi æmoe, ante nē ānewēnongā inte quēmoncoō tōmāo baate wædongāimpā. ²¹ Ayæ tæcæ wodi weca cæninque eyepodāni wæænte oñoncoō adinque tōmengā ænte cæncæte ante wæwēnongāimpā. Ayæ edæ tōmengā nangui baate ñōmænte wæyongā guintaidi incæ pō yædæ yædæ beyadōnānimpā. ²² Tōmengā nē, Pōnōmi æmoe, Pōnōmi æmoe, ante

ānewēnongā inte nāñe wængā adinque Wængonguī anquedoidi tōmengā onōwoca ingante Abadāo wodi weca ænte mæidāni æicantapā. Ayæ ate tæcæ wodi adobaī nāñe wængā adinque tōmengā baō iñi daga wēnānitapā.”

²³ Ante apænedinque Itota tæcæ wodi ingante ante godōmenque apænegacantapā. “Tōmengā onōwoca guidōmēmō taadō wææ gote mæ māmōnte baī iñōmō ongōninque nangui āmogate wæwēnongā inte gomō ayongā Abadāo wodi a ongongā acantapā. Datado wodi adobaī Abadāo wodi weca a ongongā acantapā. ²⁴ Adinque tæcæ wodi iñōmō Abadāo ingante aa pedinque, ‘Mæmpo Abadāo ēñēmi. Botō gonga bæcoyōmō guiite nangui āmogate wæwēmo cæbii. Botō āmogate wædō ante pōnō waadete waa cædinque bitō Datado ingante da pōnōmi pōninque tōmengā æpæ ada ipomencacā botō cōñe bamen-caboe.’ ²⁵ Añongante Abadāo, ‘Botō wēmi, Datado imæcayedē wēnæ wēnæ āmogate wæwēñongante bitō māincoo wæmoncooque ænte todirque quēwēnōmiimpā. Nōwo diyæ bitō āmogate wæwēñōmite Datado ingante wæætē ædæmō cæbo ate wampo pōnēninque tōmengā ñōwo iñōmō watapæ quēwente tocampā. ²⁶ Ayæ godōmenque āmo ēñēe. Nānēnē i apa ānewēe. Botō weca ongongā inte ædō cæte bitō weca goquingāā. Wæætē bitō weca ongongā inte botō weca ædō cæte ponguingāā. Guibæ pōnī iñōmō taadō impā taquīi. Edæ dæ ampa,’ ante Abadāo wodi angampā, angantapā.”

²⁷ “Angā ēñente wædinque tæcæ wodi wæætē, ‘Mæmpo Abadāo ēñēmi. Datado ingante āmi ēñente tōmengā botō mæmpo oncōnē adodō gocæcāimpā. ²⁸ Māniñōmō botō tōniñadāni onompo æmæmpoque ganca mānimpodāni inānimpā. Iīnque bitō Datado ingante āmi tōmēnāni weca gote, Wænompadāni, ante wææ angā ēñēninque tōmēnāni wæætē iñōmō nangui pōnī āmogate wæwēñōmō pōnāmaī incædānimpā.’ ²⁹ Añongante Abadāo wæætē, ‘Mōitee wodi nānō wææ ante yewæmongainta Wængonguī beyæ nē apænedāni nāni yewæmongainta

do mänäni inte edæ bitö tönĩñadäni iĩñomö mäninta adinque, Æbänö i, ante do eñenguēnēnāni inānīpa.’³⁰ Ante apæneyongä tæcæ wodi wæætē, ‘Iñæmpa mæmpo Abadäo eñēmi. Wacä nē wængaingä inte ñāni ömæmonte tömēnāni weca gote apænecä eñēninque botö tönĩñadäni tömēnāni wēnæ wēnæ cædinö ante wæwente pönēninque do edæ ñimpo cæbainānīpa.’³¹ Ante wæyongante, ‘Iñæmpa Möitee wodi nänö wææ angainö ante Wængonguĩ beyæ nāni apænegainö ante eñēnāmaĩ ināni inte tömēnāni nē wæente ñāni ömæmōningä apæneyongante cōwē eñēnāmaĩ imāinānīpa,’ ante Abadäo wodi angantapa.” Tæcæ wodi ingante ante apænedinque Itota mäninque ante apænegacäimpa.

17

Wacä oda cæcæcäimpa, ante nāni wæquinque cædānīpa
(Mäateo 18.6-7; Mäadoco 9.42)

¹ Ayæ tömengä miñæ nē godāni inānite apænedinque Itota, “Nē pönēnāni incæ pancadāniya wīi eñente do oda cædānīpa. Cōwē mänōmaĩ impa. Incæte, Oda cæcæcäimpa, ante nē cæcä iĩñomö edæ tömengä nangui nänö caate wæquinque cæcampa. ² İninque edæ, Wēñængä adocanque guiyangä pönĩ incæ oda cæcæcäimpa, ante nē godö cæcæ cædingä iĩñomö edæ, Wīi cæcæcäimpa, ante mönö edæ wææ cæcæimpa. Waodāni nāni dacæ godö dacæ godö cæquinca ñænænca æninque nē godö cæcæ cæcä önömenca æ wēmencadinque tömengä ingante tæcætibæ wido cædāni ĩninque tömengä edæ, Wēnæ wēnæ cædāmaĩ inte wæmo beyænque Wængonguĩ botö imote pānāmaĩ ingampa, ante tömengä waa toquēnengä imaingampa. ³ Mänōmaĩ ämo eñēmīni inte mīnitö, Oda cæcæcäimpa, ante nē cæcä bai cædāmaĩ incæboimpa, ante edæ nāmā wææ aedāni,” æninque Itota iĩmaĩ apænecantapa.

“Wacä wēnæ wēnæ cæcä adinque bitö wæætē tömengä ingante, Cædāmaĩ incæbiimpa, ante wææ æ. Ämi eñēninque tömengä wēnæ wēnæ nänö cædinö beyæ guingo imonte wædinque, Wiwa cætabopa,

ante apænecä eñēninque bitö wæætē piyænē cædinque tömengä ingante ñimpo cæbi ee gocæcäimpa. ⁴ Tömengä wæætē adoönæque iĩonte önompo æmæmpoque go mempoga mänimpoga bitö imite wīwa cædingä inte tömengä guingo imōninque, ‘Bitö imite wīwa cætabopa,’ ante adopoga apænecä eñēninque bitö wæætē tömengä ingante adopoga ñimpo cæbi ee gocæcäimpa,” ante Itota angantapa.

Mönö tæi piñænte entawenguinque wede pönēmōmpa

⁵ Mönö Awēnē tömengä nänö nē da godönināni iĩñomö tömengä ingante æninque, —Wædænque pönēmōni iĩñomōnite bitö pönö cæbi æninque mönitö ædæmō wede pönēmōni bacæmōnīpa.

⁶ Änāni eñēninque mönö Awēnē wæætē, —Möotatamö guiyämö pönĩ nänö inganca mīnitö pönēnö mäninganca wædænque pönēmīnitawo. Mäningancaque pönēmīni incæte mīnitö möodedawæ nāni äwæ inte apænedinque, “Awæ eñēmi. Bitö bæ wite godö gāwapæ minte pæbæwe,” ante ämīni bai awæ incæ dobæ edæ eñente cæcædönimpa, ante Itota apænecantapa.

Wacä ingante nē cæcä incæ iĩmaĩ cæquēnengä ingampa

⁷ Ayæ godömenque apænedinque, “Mīni waocabo iĩñomīnite adobi nē äbi ĩmi ĩninque bitö imite nē cæcä ingante edæ æbänö cæbaimīi. Tömengä gönea mangæ mangæ wodinque ayæ cænīnāni inānite ĩnque aadinque pö guicä adinque bitö iĩñomö edæ, ‘Pö tæ contate cæe,’ ante edæ dicæ ämiyaa. Edæ nē eacä ingampa diyæ tano cænguingä. ⁸ Wæætē nē äbi inömi inte bitö, ‘Botö beyæ cængui ænōninque bitö weocoo topo cædinque pönömi æninque botö cænte bebo ate bitö mäñĩñedē ate edæ cænte becæbiimpa,’ ante cōwē ämaimīpa. ⁹ Ayæ, Cæe, ante bitö äñinö ante tömengä eñente cæcä beyænque bitö, Waa cæbi æmopa, ante dicæ anguimīi. ¹⁰ İninque mönö Awēnē, Cæedāni, ante nänö angainö ante eyepæ pönĩ cædinque mīnitö adobai ante pönenguēnēmīni ĩmīnīpa. ‘Mōnitö nē cæmōnique inte önomōnique inömōni inte wēnæ wēnæ cæte awædö. Mōnitö tömengä nänö änonque mäninque cæte ate tömengä

beyæ ante dicæ godömenque nanguï cæmönijaa,' ante pönente wæquëñëmini iminipa," ante Itota tömengä miñæ nê godäni inänite apænegacäimpa.

Itota angä ate diete ganca inäni waintai baadänipa

11 Mänii Eedotadëe iñömö gocæte ante godinque Itota Tämadiabæ æmætæ Gadideabæ æmætæ tæcæguedë pönï godinque, 12 waodäni nani quëwëñömö tæcæ pönongä nê baate wädäni önompo tipæmpoga inäni pö bee ténänitapa. Pö gobæ næ gongæninque pömö adinque, 13 aa pedänitapa.

—Itota nê Awënë inömi inte ëñëmi. Mönitö wädö ante pönö waadete waa cæe, ämönipa.

14 Äñönänite gomö adinque Itota,

—Minitö guiquënë Wængonguï oncönë godinque, Wængonguï quï, ante nê godönäni inänite minitö æmontai mäo odömömïni acädänimpa.

Angä ëñente tömënanï idömæ godinque iñontobæ waintai baagadänimpa. 15 İninqe adocanque watapæ todinque, Wængonguï bitö ñäo apäite bai inömi inte edæ waa cæbi æmopa, ante yedæ apænedinque adodö pongantapa. 16 Tömengä iñömö wabæca Tämadiabæ nê quëwëningä incæ pö Itota önöwa inö guidömëmæ ñongæninque waa ate pönëninque, Bitö pönö cæbi ate waintai baabopa, ante apænecä. 17 Eñëninque Itota wæætë angantapa.

—İñæmpa mïni cabo önompo tipæmpoga mänimpomïni inömi inte edæ wii tömämïni waintai baaminitawo. İninqe wadäni önompo æmæmpoque go mënaa go mënaa inäni iñömö edæ ædönö gote dæ änänii. 18 İngä iñömö wabæca quëwëningä incæ adocanque Wængonguï ingante waa pönï apænecæte ante ponte quëwëñongä wadäni guiquënë tömänäni pönämaï inänitawo.

19 Äninque Itota tömengä ingante,

—Bitö wede pönëno beyænque waintai baadïmi inte ængæ gantite goe, angantapa.

İmaï iñque bayonte Awënë Odeye poncæcäimpa, ante

(Mäteo 24.23-28, 36-41)

20 Paditeoidi Itota ingante, Wængonguï Awënë æyedëno ponte Awënë Odeye baquingäa, ante wæyönänite tömengä wæætë, İñæmpa wii waomïni ayömïni Wængonguï Awënë Odeye pongä ingampa.

21 İninqe, "Tömengä iñömö ponte ongongampa," ante ayæ wæætë, "Tömengä wayömö gote ongongampa," ante edæ ædö cæte anguï. Minitö weca nê quëwëngä incæ Awënë Odeye bayongante waodäni tömengä nempo do quëwënanï apa änewëminii, ante Paditeoidi inänite angacäimpa.

22 Ayæ tömënanï inänite iñque apænedinque Itota tömengä nänö nê emiñænänï inänite wæætë apænecantapa.

—İncayæ ate minitö, Waocä nê ëñagaingä ingante adoönæque incæ äinëmönipa, ante wæcæminimpa. Wæmïni incæte adämaï incæminimpa. 23 Wadäni minitö iminite, "İñömö ongongä tamëñedäni," äninque ayæ, "Wayömö ongongä tamëñedäni," äñönäni minitö acæ godämaï iedäni. Tömënanï miñæ edæ godämaï imæwedäni. 24 Botö ponguïönæ iñque bayonte botö iñömö edæ Waobo nê ëñagaïmo inte edæ ñäo æmatæ æmatæ näinte bai ëmöninque edæ edonque pönï ponte a ongoncæboimpa. 25 Incæte botö ñöwo guiquënë täno nanguï ämogate wæwencæboimpa. Ayæ ñöwodäni iñömö botö imote edæ Baa äninque wido cæcädänimpa, ante Itota apænecantapa.

26 "Botö Waobo nê ëñagaïmo inte botö ponguïönæ iñque bayedë guiquënë Nöwee wodi Docä nani angaingä nänö quëwëñedë dodäni nani quëwëngä bai adobai edæ quëwëngüinänï inänipa. 27 Docä Nöwee wodi ñænæ wipoboga oncö bai mænöninque tömengä nänö guiganca tömënanï önonque cænte bete monte quëwëngadänimpa. Monguïna, ante ñänonte quëwëngadänimpa. Mäniñedë edæ tömënanï nani capo bedö wænguinque edæ æpæ do angatimpa. 28 Dooto wodi nänö quëwëngäñedë dodäni adobai cænte bete quëwëngadänimpa. Nê mänäni godongadänimpa. Äinënanï wæætë godonte ængadänimpa. Minte pæcæimpa, ante cædinque onconcoo mænonte quëwëngadänimpa. 29 Incæte Dooto wodi Todömä iñömö quëwente nänö

tao gogaïönæ iñonte gonga tönö atopodemö nangui ocoi bæcomö cöönæ cæ bai wææninque mäo bæco ïninque mäniñömö quëwënnäni tömänäni gonte wængadänimpa.
³⁰ Botö Waobo ëñagaïmo inte edonque botö a ongöñedë mäninö näni bæco gonte wængaï bai adobaï bacæimpa, ante ämo ëñëmaïminipa,” ante Itota angacäimpa.

³¹ Ayæ godömenque apænedinque, “Mäniönæ iñonte minitö oncömança ongöninque, Botö mäincoo, ante oncönë wæi guïdinque ænämaï inte wodii winömäewedäni. Ayæ gönea cædinque mäincoo ante oncönë ocæ ëmænte æncæ pönämaï imäewedäni. ³² Iñæmpa, Dooto nänöogængä wodi æbänö dadi ëmænte adinque edæ gonte wængacäi, ante pönëminiyaa. ³³ Inguipogaque cöwë quëwencæboimpa, ante në pönengä iñömö tömengä iñömö edæ quëwënnämaï incæcäimpa. Wæætë edæ inguipoga mönö guëmante quëwenguïmämo ante në wädämaï ingä guiquënë tömengä iñömö edæ cöwë wænämaï quëwencæcäimpa, ante ämo ëñëmaïminipa,” ante Itota apænegacäimpa.

³⁴ Ayæ, “Mäniñedë woyowotæ i ïninque mënaa äñömonque öñöna adocanque ingante bæi ongonte goyönäni adocanque ingante ëmö cæte godäni a ongoncæcäimpa. ³⁵ Ayæ onquiyæna cænguï ante guëa dicaca dacæ dacæ cæte godö wëñöna adocanque ingante bæi ongonte goyönäni adocanque ingante ëmö cæte godäni a ongoncæcäimpa.” ³⁶ “Ayæ onguïñæna gönea guëa cæyöna adocanque ingante bæi ongonte goyönäni adocanque ëmö cæte godäni a ongoncæcäimpa.”

³⁷ Ante apænecä ëñente wædinque tömënäni wæætë,

—Awënë, bitö änö æyömönö incæ mänömaï baquïi.

Äñönänite,

—Baö æyömömë wænte öñöñömonte abadæidi wë ongonte edæ do godongämæ pönäni bai waodäni, Mönitö Awënë pongampa, ante do ëñëninque godongämæ poncædänimpa, ante Itota apænegacäimpa.

18

Në apænte änongå tönö owæmpoingä æbänö cædaï, ante

¹ Ayæ tömengä miñæ në godäni cöwë Wængongui ingante apænedinque wæntæte badämaï incædänimpa, ante cædinque Itota inguipoga quëwënnäni näni cæinö ante odömonte apænegacäimpa.

² “Wayömö näni quëwëñömö adocanque waodäni näni në apænte änongå inte quëwënongåimpa. Wængongui ingante guïñänämaï inongä inte tömengä iñömö, Waodäni æbänö änanii, ante wädämaï inongäimpa. ³ Adoyömö tömënäni quëwëñömö onquiyængä adocanque owæmpoingä inte në wædongä inte quëwënongåimpa. Tömengä guiquënë mäningä në apænte adongä weca wæætë wæætë pöninque, Botö imote adocanque në piingä iñongante bitö ämi ëñente wæætë nö cæcæcäimpa. ⁴ Ante ancaa pöninque änä ëñente wædinque në apænte änongå iñömö edæ cöwë Baa Baa angä. Incæte ayæ ate nämäneque tededinque tömengä, ‘Onquiyængä iñömö ancaa angä awædö, äninque, Wængongui ingante guïñänämaï imo inte botö, Waodäni æbänö änanii, ante wädämaï imo incæte, ⁵ mäningä owæmpoingä pö pö cæcä wædinque botö, Ancaa ponte angä wæcæ wæ, ante wæætë tömengä ingante waa cæcæboimpa. Tömengä ingante në piingä ingante botö, Nö cæe, ante wææ ämo wæcæcäimpa.’ Äninque në Baa äningä incæte owæmpoingä beyæ do waa cæcampa. Mäninque ante odömömopa.”

⁶ Ante odömonte apænedinque mönö Awënë iñömö godömenque apænecantapa. “Në apænte angä iñömö wiwa cæcä incæte, Tömengä æbänö apænecäa, ante minitö ëñente pönëmäewedäni. ⁷ Wængongui nänö në apænte ængaimini inte minitö itædë woyowotæ wæætë wæætë aa pe aa pe cæyömini Wængongui edæ ædö cæte Baa anguingäa. Wææ ämi ate nö cæcædänimpa, ante äñöminite tömengä iñömö edæ, İncayæ ate cæcæboimpa, ante ædö cæte anguingäa. ⁸ Wæætë quingæ edæ do cæcæcäimpa. Në piinte cædinäni iñönänite Wængongui wææ angä ate tömënäni minitö iminite wæætë nö cæcædänimpa, ante ämo ëñëmaïminipa.

Incæte Wao Wëmo ëñagaïmo inte botö ponte ayömo wede pönënanï wabänö inguipoga mæ ongönäni aquïmo, ante wæbopa,” ante Itota angacäïmpa.

Paditeo tönö awënë beyæ nê ænongä æbänö cæda, ante

⁹ Ayæ pancadäniya, Wadäni önönäni que iñönäni mönonque nö cæmö ïmopa, ante pönëwëni que wadäni inänite piinte adänipa. Mänömainö ante nê anewënanï inänite Itota, Wængonguï ingante æbänö apænequï, ante ëñencädänïmpa, ante ïmæca quëwëna nänä apæneinö ante odömöninque apænecantapa. ¹⁰ “Woda mënaa Paditeo tönö odömäno awënë beyæ nê æwengä iñömö Wængonguï ingante apænecæte ante Wængonguï oncö ñænæncö yabæcönë æi guïdatapa. ¹¹ Paditeo iñömö adiyæ gongæninque nämä incæ apænedinque, ‘Wængonguï ëñëmi. Wadäni bai wïi ïmopa. Botö iñömö godömenque waëmö ïmopa, ante todinque botö mänömaï beyæ bitö ïmite waa ate apænebopa, anewengampa. Edæ wadäni guiquënë wacä qui ö ænänipa. Wadäni inänite wiwa cædänipa. Tömënanï nänöogængä inämaï iñongante godö guëa mönänipa. Botö iñömö mäninänï bai inämaï inömo inte botö mäniñömö ongongä odömäno awënë beyæ nê æwengä bai wïi ïmopa, ante adinque botö Wængonguï bitö ïmite waa ate pönëninque apænebopa. ¹² Botö iñömö, mëönaa go mëönaa iñonte, mëönaa go mëönaa iñonte bitö ïmite apænecæte ante cænämaï quëwëmopa. Ayæ botö ænincoo tömancoo ate adinque botö önompo tipæmpoga mänimpocoo mæ ongöñoncoo adocooque æninque, Wængonguï qui, ante cöwë pædæ pönömo æ,’ ante apænewengampa.”

¹³ “Odömäno awënë beyæ nê ænongä guiquënë guingo imöninque nämä tæi tæi yatawëni que, ‘Wængonguï ëñëmi, botö nê wiwa cæbo adinque bitö waadete pönö piinämaï incæbiïmpa, ämopa,’ angä. Mäninque angampa. ¹⁴ Mänömainö ante odömoncæte ante apænedinque Itota, Nöwo ämo ëñëdäni, angantapa. ïngä awënë beyæ nê æwengä mänömaï äñongante Wængonguï do, Botö ayömo

bitö nö cæbi babipa, ante godö badongä ate tömengä edæ nö pönëngongä inte tömengä oncönë gocampa. Wæætë Paditeo, Nämänque waëmö ïmopa, ante nê anewëningä ingante Wængonguï, Nö cæbi bacæbiïmpa, ante godö badönämaï incæcäïmpa, ante ämo ëñëmaïminipa. Edæ, Nämänque waa cæbo ïmopa, ante nê ængö cæcä guiquënë edæ wææntodonte bai inte wæcæcäïmpa. Wæætë, Nämänque wënæ wënæ cæbo ïmopa, ante nê apænecä guiquënë edæ ængö cæte bai inte tocæcäïmpa,” ante Itota apænegacäïmpa.

Wëñænänï inänite gampo cæcadinque Itota waa apænecä

(Mäateo 19.13-15; Mäadoco 10.13-16)

¹⁵ Ayæ ate wadäni, Wëñænänï inänite Itota pönö gampo cæcadinque waa apænecæcäïmpa, ante cædinque tömengä weca guiyänänï inänite ænte pö ænte pö cædäni adinque tömengä miñæ nê godäni guiquënë, Ænte pönämaï iedäni, ante Baa änäni. ¹⁶ Adinque Itota wæætë wëñænänï inänite aa pecä pöñönänï tömengä miñæ nê godäni inänite apænecantapa.

—Wëñænänï inänite botö weca ee amini poncädänïmpa. Iñæmpa mäninänï nänï pönëno bai adobai pönënanï inte edæ Wængonguï Awënë Odeye nempo do quëwënanï inänipa. ïninque minitö iñömö wëñænänï inänite Baa änämaï iedäni. ¹⁷ Edæ näwangä apænebo ëñëdäni. Wëñængä do pönengä inte Ao angä ingä bai Wængonguï Awënë Odeye ingante do pönëninque nê Ao änäni iñömö tömënanique tömengä nempo guïdinque quëwënanipa. Wadäni guiquënë Wængonguï Awënë Odeye ingante Baa ante pönënanämaï inäni guiquënë tömënanï ædö cæte tömengä nempo guïdinque quëwënguïnänï, ante Itota apænegacäïmpa.

Mäincoo nanguï ëacä inte Itota weca ponte apænecampa

(Mäateo 19.16-30; Mäadoco 10.17-31)

¹⁸ Mäniñedë Itota ingante wacä awënë angantapa.

—Awënë nê waa Odömömi apænebi ëñëmoe. Botö æbänö cædinque wænämaï wantæpiyæ quëwëmaïmo.

¹⁹ Äñongante Itota tömengä ingante,

—Wængonguī adocanque nē waa cæcā iñongante bitō botō imote, Nē waa cæbi imipa, amii. ²⁰ Äninqe Itota godömenque apænecantapa. Iīmaī cæedāni, ante Wængonguī nānō wææ angainō ante bitō tōmēmi edæ do eñēmipa. “Bitō nānōogængä ināmaī iñongante bitō godō guëa mōnāmaī iē. Wacā ingante godō wænōnāmaī iē. Wacā qui adinqe awēmō ænāmaī iē. Wacā wænæ wænæ cæcā atabopa, ante godō babæ wapiticæ änāmaī iē. Wæmpocā ingante wäänā inante waa adinqe tōmēna inate godō waadete cæe,” ante wææ yewæmongacäimpa, ante bitō edæ do eñēmipa, angantapa.

²¹ Ante apænecä eñēninqe mäningä awënë wæætē,

—Botō mäninō bitō änō bai tōmänō ante eñente cædinque pægaboī ae.

²² Ante apænecä eñēninqe Itota wæætē,

—Adodeque ayæ eñente cæquēnēmi imipa, ante ämo eñēe. Öönædē bitō waëmoncoo ænguinque edæ imæca bitō mänincoo tōmancoo godonte æninqe bitō æninta wæætē ömæpodāni inte wædāni inānite tōmanta godōmi æncædānimpa. Ayæ edæ botō imote tee empote pōe.

²³ Angä eñente wædinque tōmengä mäincoo nanguī éadongä inte mänincoo beyænque ante pōnēninqe mäningä awënë iñömō wæwente bacantapa. ²⁴ Ininqe Itota tōmengä ingante gomō adinqe,

—Wængonguī Awënë Odeye nempo guiite quëwencæte ante cædinque waodāni ömæpodāni inte botō miñæ pōnānipa. Mäincoo nanguī éacä guiquēnē æbānō cæte ömæpocä inte botō miñæ ponte guiite quëwenguingää, angantapa. ²⁵ Cämeyo iñömō guiyangä ingampa diyæ daagō guiyampite pædæ tacää. Ininqe cämeyo pædæ tadāmaī ingä bai nē éacä iñömō adobai ingampa. Tōmengä nämä ayongä ñænængä inongä inte edæ æbānō cæte Wængonguī Awënë Odeye nempo do wäänē guiite quëwenguingää.

²⁶ Mänōmaīnō ante Itota apænecä eñēninqe nē eñēnāni wæætē,

—Iñæmpa mänōmaī i ininqe æcānō wäänē guiite quëwenguingää.

²⁷ Ante wæyōnānite,

—Waomīni mīni, Ædō cæte cæquīi, ante mīni wædō incæ Wængonguī iñömō do cæcampa, ante Itota apænecä.

²⁸ Eñente wædinque Pegodo,

—Awënë eñēmi. Mōnitō éadincoo owæ caate bitō miñæ tee empo pōmōni abipa.

²⁹ Äñongante Itota tōmēnāni inānite wæætē,

—Mīnitō nāwangä oncodo tao godinqe mīnitō nānōogængä ingante mīnitō tōniñadāni inānite wæmpoda inate wēñænāni inānite emō cæte botō miñæ pōmīnitapa. Ininqe iīmaī ante nāwangä ämopa. Æcānō Wængonguī Awënë Odeye beyænque botō miñæ mänōmaī pōna iñömō, ³⁰ tōmengä iñömō inguipoga quëwēninqe nānō emō cædincoo adopocoo æninqe ayæ wæætē godömenque nanguī æncæcäimpa. Ayæ iincayæ ate öönædē godinqe edæ tōmengä cōwē wantæpiyæ wænāmaī quëwencæcäimpa, ante ämo eñēmaīmīnipa, angacäimpa.

Itota, Wæncæboimpa, ante wæætē adodō ante apænecä

(Mäateo 20.17-19; Mäadoco 10.32-34)

³¹ Äninqe tōmengä miñæ, Dote, ante nāni gocabo inānite Itota nānēnē ænte mäocä goyōnāni iīmaī ante apænecantapa. “Nōwo iñömō mōnō edæ Eedotadēe iñömō æicæimpa. Wængonguī beyæ nē apænegaināni iīmaīnō ante yewæmōninqe, Nē Waocä iincayæ ate eñate pæcä adinqe tōmengä ingante æbānō cæquīnāni, ante yewæmongadānimpa. Nōwo mōnō Eedotadēe iñömō æi pō gongæmō ate edæ mäninō dodāni nāni angainō bai edæ do iinque bacæimpa. ³² Botō edæ mānimodō eñagaimo iñömote oodeoidi botō imote ö æninqe wadāni inānite pædæ mao godōnāni ö æninqe tōmēnāni wæætē tawimæ botonga towæ tånongadinque botō imote badete todinqe piīninqe wiwa anguināni inānipa. ³³ Ayæ æmontaimenca tæi tæi pānāni ämogate wæyōmote botō imote godömenque wænōnāni wæncæboimpa. Wæætē mēōnaa go adoönæque iñonte edæ botō do wænimo inte edæ ñāni ömæmonte wæætē quëwencæboimpa,” angantapa.

³⁴ Tōmengä miñæ nē godāni iñömō mäninō, Tōmengä æbānō bate wæquingää,

ante adodeque incæ edæ eññämaï ingadänimpa. Tömengä nänö apænedö edæ wë wodonte bai iñonte tömënäni önömoncaque eññëninge, Æbänö ante apænecää, ante wii edonque eññënitapa.

Itota angä ate babetamongä iningä incæ do waa acampa

(Mäateo 20.29-34; Mäadoco 10.46-52)

³⁵ Itota mäninö godinque Eedicoo iñömö obo pöñongä onguinängä babetamö inte nê wædongä inte taadö wedeca, Pönömi æmoe, ante äneconongäimpa.

³⁶ Nanguï inäni cægönäni eññëninge babetamongä iñömö, Quinante cægönänii, ante wæyongante, ³⁷ Itota Näatadeta quëwëningä inte edæ ñöwo wodo tebæ gocampa, ante apænedäni. ³⁸ Eññëninge tömengä iñömö aa pedinque,

—Itota eññëmi. Bitö Awënë Dabii wodi pæïmi inömi inte botö wædö ante edæ ñöwo waadete pönö waa cæe.

³⁹ Äñongante täno godäni wæætë tömengä ingante, Apocænë inguënë anewëë, ante wææ äñönäni tömengä godömenque nanguï äninque,

—Awënë Dabii pæïmi inömi inte edæ botö wædö ante pönö waadete waa cæe, ante wæcä.

⁴⁰ Wædinque Itota næ gongæninge, Tömengä ingante ænte mämömini pongædäni. Angä obo ænte mämönäni pöñongante Itota,

⁴¹ —Æbänö ante ämii. Bitö beyæ quinö cæquimoo.

Äñongante,

—Awënë, wëenë botö emongaï bai cæbi acæboimpa.

⁴² Angä eññëninge Itota wæætë,

—Wëenë bitö emongaï bai abäwe. Edæ wede pönëmi inte edæ waa bamömipa.

⁴³ Ante nänö äñedë nê babetamongä do waa bamöninge Itota miñæ godinque Wængonguï ingante, Bitö ñäö apäite bai emömi inte edæ waa cæbi æmopa, ante togacäimpa. Mänömaï cæcä adinque tömänäni adobaï Wængonguï ingante waa adinque, Bitö ñäö bai emömi inte waa cæbipa, ante togadänimpa.

19

Itota tönö Taqueo

¹ Itota mänii Eedicoo pöninge tæcæ wodo tebæ gocä ingantapa. ² Mäniñömö adocanque Taqueo näni änogä iñömö tömengä odömäno awënë beyæ nê ænäni awënë inongä inte nanguï mäincoo eadongä inongäimpa. ³ Tömengä ñöwo, Itota æcänö ingää, ante acæte ante ponte ayongä wadäni nanguï inäni wææ ongönäni adinque, Botö ocäa pönï inömo inte edæ Itota ingante ædö cæte aquimoo, ante wæcantapa. ⁴ Adämaï inte wæyongante wadäni, Itota iinö gämænö pö wodo tebæ goquingä, ante tededäni eññëninge tömengä Itota ingante acæte ante pogodo täno gote awäa ticämödöwäa näni äwäa daëwa æi næ gongænte a ongongantapa. ⁵ Itota obo pöninge æmö ayongä Taqueo a ongongä adinque tömengä ingante,

—Taqueo, quingæ wææe. Ñöwoönæ edæ pö bitö oncönë eññaquënëmo imopa.

⁶ Angä eññëninge Taqueo quingæ wææ ti wææninge, Ao, botö oncönë waa poncæbiimpa, ante watapæ todinge edæ tömengä oncönë mämongä pongacäimpa.

⁷ Itota mänömaï cæcä adinque wadäni, Æ nê wiwa cæcä weca Itota quimæ eñnacæ gocää, ante tömänäni piinte tedegadänimpa.

⁸ Taqueo iñömö edæ tömënäni ayönäni ængæ gantite adiyæ ongöninge mönö Awënë ingante,

—Awënë eññëmi. Botö mäincoo tæcæguedencoo pä cædinque ömæpodäni inte wæwënäni inänite ñöwo godömo ænäni ae. Ayæ botö wacä qui ante babæ äninque ö æmö wæcä ininque wëenëñedë botö ö ænincoo adopocoo bai incæ godömenque mempoga go mempoga godömo æncæcäimpa.

⁹ Ante apænecä eññëninge Itota wadäni inänite apænedinque,

—Taqueo adobaï Abadäö wodi pæingä iñongante botö nê æmö inömo inte tömengä oncönë näni owocabo quëwencædänimpa, ante ñöwoönæ pontabopa. ¹⁰ Botö Waobo eññagaïmo iñömö æmö beyænque quëwencædänimpa, ante cædinque wë womönte bai inäni inänite diqui diqui mincæ pontabopa, ante Itota apænegacäimpa.

Minata nāni godonte æinta ante odōmongampa

(Māateo 25.14-30)

11 Mānōmaī apænecā ēñēnāni inte tōmēnāni, Itota Eedotadēē obo pongampa, ante adinque, Wængonguī Awēnē Odeye nempo mōnō oo pōnī quēwēnguinque impa, ante pōnente edæ oda cædānitapa. Īnque Itota, Wængonguī Awēnē æbānō cæquingāā, ante ēñencædānimpā, ante ĩmæca quēwēnāni nāni cæīnō ante odōmōninque apænecantapa.

12 Īmāinō ante apænecantapa. “Waacā adocanque awēnē odeye pæingā ĩnongā inte, Botō gobæ wabæca gote ĩmæca pancabaa awēnē odeye bate pōmoedāni.

13 Ānque tōmēngā ingante nē cædāni diete ganca ĩnāni ĩnānite añete pōnāni ate tōmēngā oodo mīnata nāni āinta wantæpiyæ cæte nāni æinta incæ ænque adocanque ingante adotaque pædæ wacā ingante adotaque pædæ godōninque tōmānāni ĩnānite godongā adopota adopota ænānīpa. ‘Mīnitō mānīnta ænque godonte æī godonte æī cædinque, Yebængæimpā, ante botō gote pompoga cædāni.’ 14 Ante wadæ gocā adinque tōmēngā nempo quēwēnāni guiquēnē tōmēngā ingante pīinte cædinque pancadāniya ĩnānite ānque, Mīnitō tōmēngā mīñæ godinque awēnēidi ĩnānite gode ānque, Māningā ĩñōmō wīi mōnitō awēnē odeye bacæcāimpā, ante wææ āmīni ēñencædānimpā, ante da godōnāni godānitapa,” ante apænedinque Itota ayæ godōmenque apænecantapa.

15 “Incæte awēnēidi do ānāni ate awēnē odeye badinque tōmēngā ōmæ pongantapa. Pōninque tōmēngā, Botō beyæ nē cædāni ĩñōmō godonte æī godonte æī cædinque æbānō godōmenque nanguī edæ ænte mānānī, ante acæte ante cædinque, Botō oodo mīnata nē ænīnāni ĩnānite añete pōedāni, angā. 16 Añete pōnāni ate tōmēngā weca tāno pōningā ĩñōmō, ‘Awēnē ēñēmi. Bitō oodo mīnata adotaque incæ ōnempo tipæmpoga mānīmpota edæ ñōwo yebænte bapa.’ 17 Ante apænecā ēñēninque tōmēngā ingante, ‘Botō ĩmote nē cæbi ĩmi waa cæbi æmopa. Wædænque incæ ænīmi inte bitō ædæmō aate cæbīpa, ante adinque

botō ōnempo tipæmpoga nāni quēwēñōmō quēwēnāni ĩñōnānite bitō nempo pōnōmo ænque nē āmi inte aabi æmoe.’ 18 Ante tōmēnāni awēnē angā ate ayængā pōninque, ‘Awēnē ēñēmi. Bitō oodo mīnata adotaque incæ ōnempo æmæmpoque mānīmpota ñōwo yebænte bapa.’ 19 Ante apænecā ēñēninque tōmēngā ingante adobāi apænedinque, ‘Ōnempo æmæmpoque nāni quēwēñōmō quēwēnāni ĩñōnānite botō bitō nempo godōmo ænte aabi æmoe,’ angantapa,” ante Itota apænecantapa.

20 Ayæ godōmenque apænedinque Itota, “Awēnē angā ate tōmēngā guiquēnē pōninque, ‘Awēnē ēñēmi, tōmēmi mīnata æe. Botō weocodē ædæmō wīni caadinque wææ aate mantabopa. 21 Ānque, Bitō wīi bitō ñōnōnī incæ wacā ñōnōnī incæ ō ænte māmi awædō. Ayæ wīi bitō mīmi pæ incæ wacā mingā pædi incæ tā pebi ĩmīpa, ante pōnente wædinque cætabopa. Bitō tæēmō ĩnōmi ĩmīpa, ante guīñente wædinque botō oodo mīnata botō ænīnta wīni caapote weocodē ædæmō wææ aabo ae.’ 22 Añongante tōmēngā awēnē ĩñōmō, ‘Īñæmpa bitō nē wīwa cæbi ĩmi nāmā bitō tededō beyænque bitō ĩmite apænte ancæboimpā. Botō tæēmō ĩmo inte wīi botō ñōnōnī incæ wacā ñōnōnī incæ ō æmopa. Wīi botō mīmo pædi incæ wacā mingā pædi incæ edæ do tā pebo ĩmopa. Mānōmaī impā, ante bitō dicæ ēñēnāmaī ĩmitawogaa. 23 Do ēñēnīmi inte bitō ēñente edæ cæquēnēmi ĩmitapa tōō. Botō oodo mīnata godonte æinta ænque edæ nē godonte ænāni weca baanco weca quīnante wīi guidonte æmitawo. Mānōmaī cæbi bāi botō ocæ ēmænte pōninque edæ botō quī do ænque wadāni nāni guidōnīnta tōnō edæ do æncædōmoimpā tōō,’ angampa.”

24 “Ānque godongāmæ ongōnāni ĩnānite awēnē apænecantapa. ‘Mīnitō ñōwo ĩngā mīnata nānō næænīnta ō ænque edæ mīnata ōnempo tipæmpoga nē næængā ingante pædæ godōmīni æncæcāimpā.’ 25 Angā ēñēninque tōmēnāni, ‘Awēnē ĩñæmpa, ĩngā diete ganca mīnata do mangā apa āmīi.’ 26 Ante wæyōnāni awēnē wæætē, ‘Īñæmpa nē ēadāni ĩnānite tōmānāni ĩnānite godōmenque godonte ingæimpā. Wæætē

edæ eadāmaī inte ömæpocā ingā guiquenē tömengä nänö eadincoo wædænque pönī i incæte edæ ö ænte dæ ba wæcæcäimpa. Ante apænebo eñēmaīmīnīpa. ²⁷ Ayæ botö imote nē pīināni guiquenē botö imotedö ante apænedinque, Bitö wīi mönitö awenē odeye bacæcäimpa, ante nē Baa änāni guiquenē, tömēnāni inānite botö weca ænte pöinque botö ayömo wænömīni wæncædānīpa, ämopa, awenē angantapa. Mānīnque ante odömonte apænebopa,” ante Itota apænegacäimpa.

Eedotadēe iñömö Itota pongampa

(Mäteo 21.1-11; Mäadoco 11.1-11; Wäo 12.12-19)

²⁸ Māninganca apænedinque Itota Eedotadēe æicæte ante täno gocantapa. ²⁹ Godinque Odibowænquidi nāni anquidi ontacamö goinö Betapaguee nāni quēwēñömö obo pöinque Betānia ganca pöinque Itota tömengä miñæ nē goda mēnaa inate da godöinque, ³⁰ iīmaī angantapa.

—Māniī nāni quēwēñömö ongö amīna. Tömēñömö go guite ayöminā bodo wē picængä incæ waocā ingante mongænāmaī iningā inte nāni næingā a ongongä acæmīnāimpa. Adinque nī cæyænte ænte pöeda. ³¹ Ayæ wacā mīnatö imīnate, Quīnante nī cæyæmīnaa, ante wææ angä ininque mīnatö wæætē, Mönö Awenē nänö ænguēnēnö ante æmönāpa, ante apæneedā, angantapa.

³² Tömengä nänö nē da godöna wadæ gote ayöna Itota nänö āni bai bodo wē a ongö.

³³ Adinque nī cæyæñöna bodo wē nē eadāni tömēna inate,

—Bodo wē quimæ nī cæyæwēmīnaa.

³⁴ Wææ añönānite tömēna wæætē,

—Mönö Awenē nänö ænguēnēnö ante æmönāpa.

³⁵ Ante äna eñēninque Ao änāni ininque awæ nā cæyæñömö nī cæyænte bodo ingante töi töi ænte pönatapa. Ayæ ænte pöinque tömēna weocoo yabæcooque æidāmæ wo cæyabædinque äna ate Itota wænömēnæca inö æi tæ contate gocantapa.

³⁶ Bodoga æi tæ contate taadonque goyongä tömengä nänö goquīnö ante woadāni weocoo wæænö bee podöwadānitapa.

³⁷ Odibowænquidi wæænömēmö iñömö

pönömenque pöñongante tömengä miñæ nē godāni godongāmæ nāni poncabo tömānāni iñontobæ nanguī todirque ogæ tededānitapa. Itota bamönengæ nanguī cæcä atamönīpa, ante nāni adinö ante pönēninque Wængonguī ingante waa ate apænedānitapa.

³⁸ —Möni quēwengūnque impa, ante, Badogaa, ante tomönīpa. Awenē Wængonguī emöwo beyænque pömi ininque bitö toquinque edæ Wængonguī bitö imite waa cæcæcäimpa. Öönädē nē quēwengä pönö piyænē cæcänö anguēnē. Æibæ pönī quēwēnongä iñömö nāö bai emongänö anguēnē. ³⁹ Ante nanguī ināni godongāmæ godinque ämotamīni ante bai añönāni pancadāniya Paditeoidi inönāni inte Itota ingante,

—Nē Odömömi eñēmi. Bitö miñæ nē godāni inānite wææ ämi apocænē inānie.

⁴⁰ Añönānite tömengä wæætē,

—Mīnitö imīnate nāwangä ämopa. Woadāni pæ wēenedāni ininque dicacoo incæ botö imote waa ate bai edæ yedæ ämaīnānīpa, ante Itota apænegacäimpa.

⁴¹ Ayæ pönömenque pöinque Eedotadēe gomö adinque Itota māniñömö quēwēnāni inānite ante pönēninque Ca ca wædinque, ⁴² iīmaī angantapa. “Mīnitö iñömö edæ nōwoönæ mīni gänē pönengūnque botö imote edonque pönī adinque Ao ämīni bai waa incædönīpa. Incæte mīnitö, Æbänö cæte gänē pönengūmöö, ante edæ wē wodonte bai i ininque mīnitö adāmaī imīnīpa. ⁴³ İncayæ ate mīnitö imīnate nē pīināni incæ mīnitö wææ cæinca gäänē pönö tee mongate godāmæ wææ ongönāni adinque mīnitö edæ ædö cæte tao wodii winonguīmīni. ⁴⁴ Botö mīnitö weca pömo incæte mīnitö awincaque adinque, Wængonguī nōwoönæ ponte æncæcäimpa, ante dicæ amīniyaa. Mänömaī beyænque nē pīināni iñömö mīnitö imīnate bæ tadāni tæ go wææñöminite wænönāni wæncæmīnīpa. Ayæ wēñænāni wææ cæte iñömö quēwēñönānite tömēnāni inānite edæ wænönāni wæncædānīpa. Dica mīni mænongainca incæ bæ tadāni ate dica adocaque incæ wænömēnæca inö ongönāmaī ingäimpa,” ante Itota apænegacäimpa.

Wængonguī oncō tæiyæ waēmō bacæimpa, ante cæcampa

(Mäateo 21.12-17; Mäadoco 11.15-19; Wäo 2.13-22)

⁴⁵ Ayæ Wængonguī oncō ñænæncönē yabæcönē go guidine Itota māniñmō nē godonte æncæte ante nē mänāni inānite da tadongā tao goyōnānite, ⁴⁶ Ayæ tōmēnāni inānite angantapa.

—Wængonguī beyæ iimainō ante yewæmongatimpa. “Waodāni botō oncönē pō guidine botō imote apæncædānimpā,” ante Wængonguī angā incæte mīnitō wēnæ wēnæ cæmīni beyænque Wængonguī oncō incæ nē awēmō ō ænāni nāni womōincönē bai wentamō bapa tōō.

⁴⁷ Ayæ iimō iñō iimō iñō Wængonguī oncō ñænæncönē yabæcönē go guidine Itota odōmonte apæncæ ēñēnānitapa. Māniñmō, Wængonguī quī, ante nē godōnāni ñænænāni tōnō nē odōmōnāni tōnō tōmēnāni awēnēidi guiquēnē, Itota ingante wænonte wido cæcæimpa, ante ancaa cæyōnāni, ⁴⁸ wadāni tōmānāni, Tōmengā æbānō odōmongāā, ante ēñē cōnāni adinque awēnēidi wæætē, Tōmengā ingante mōnō ædō cæte wido cæquī, ante wædinque ñimpo cægadānimpā.

20

Awēnē imipa, ante cæcānō ānāi, ante Itota ingante ānānīpa

(Mäateo 21.23-27; Mäadoco 11.27-33)

¹ Incayæ ate Itota Wængonguī oncō ñænæncönē yabæcönē go guite waodāni inānite odōmonte apænedinque Wængonguī Awēnē ingantedō ante watapæ apæncæ ēñēnānitapa. Apæncæ ēñēñōnāni, Wængonguī quī, ante nē godōnāni ñænænāni tōnō nē odōmōnāni iñōmō nē aadāni nāni Picæncabo tōnō tōmengā weca ponte ānānitapa. ² Ponte apænedinque,

—Æcānō nē angā inte bitō imite angā cæbii. Bitō imite æcānō, Nē āmi babīpa, āna ēñēnīnque cæbii.

³ Ante añōnānite Itota,

—Botō wæætē mīnitō imīnite āmo ēñēnte apænemīni ēñēmoedāni. ⁴ Wäo wodi iñōmō quīnante æpænē guidongantawo, ante pōnēmīni. Ōönædē nē owocā angā ēñēnte

cæcantawoo. Waodānique ānāni ēñēnte cæcantawoo. Æbānō ante pōnēmīni. Mīnitō wæætē apænemīni ēñēmoedāni.

⁵ Añongā tōmēnāni iñōmō nāni caboque tededinque, “Iñæmpa mōnō, Wængonguī ōönædē iñō angā Wäo ēñēnte cæcampa, āmō bai Itota wæætē, ‘Quīnante tōmengā ingante pōnēnāmai imīni,’ ante mōnō imonte piincædongāimpā. ⁶ Ayæ wæætē, Waodānique ānāni ēñēnte cægacāimpā, āmo bai godongāmæ ongōnāni iñōmō, Wængonguī beyæ nē apæncæ Wäo wodi ingacāimpā, ante nē pōnēnāni inte tōmānāni mōnō imonte dicaca tacadāni wæncædōmōimpā.”

⁷ Ante pōnente wædinque tōmēnāni wæætē Itota ingante, Wa. Æcāmē angā ēñēnīnque Wäo wodi cægacāi, ante ēñēnāmai imōnīpa, ānāni. ⁸ Wædinque Itota wæætē,

—Botō adobai, Æcānō nē angā inte pōnō āna ēñēnīnque botō mānōmai cæboo, ante mīnitō imīnite apænedāmai incæboimpā, angacāimpā.

Nē aadāni inguēnēnāni incæ wīwa cædānīpa, ante

(Mäateo 21.33-44; Mäadoco 12.1-11)

⁹ Ayæ godongāmæ ongōnāni inānite Itota, Wængonguī Awēnē æbānō cæcāā, ante ēñēncædānīmpā, ante imæca quēwēnāni nāni cæinō ante odōmōnīnque iimāi apæncantapa. “Onguīñægā adocanque yowementacodē minte pæyonte wadāni ōmæ wite aate nē tā pedāni inānite, Botō yowementacodē incæ ōmæ wite aadāni. Aayōmīnite botō, Mīnitō quī, ante pancamonga pōnōmo æncæmīnīmpā, angā Ao ānāni ate nē ēacā iñōmō edæ wantæpiyæ wabæca quēwēncæ gocantapa.

¹⁰ Yowedepo iinque bayedē nē cæcā ingante nē ēacā iñōmō, Bitō yowementacodē nē aadāni weca godinque pancamonga āmi ænīnque botō weca wæætē māmōmi æmoe, angā. Gote pongā adinque yowementacodē nē aadāni guiquēnē nē æncæ pōningā ingante bæi ongonte tæi tæi pānīnque da tadōnāni ōmæpocā inte gocantapa. ¹¹ Ayæ wæætē nē ēacā iñōmō wacā tōmengā ingante nē cæcā ingante angā gote pongā adinque yowementacodē nē

aadāni adobaī tæi tæi pānāni wæyongante, Guingo imonte wæcæcāimpa, ante godō wīwa cædāni wæyongante da tadōnāni ōmæpocā inte gocampa. ¹² Ayæ mēnaa inate da godongā ōmæpoda pōna adinque nē ēacā iñōmō wacā nē cæcā ingante angā gote pōñongante tōmēnāni godō mæ yete wido cædānitapa,” ante odōmōninque Itota godōmenque apænecantapa.

¹³ “Mānōmaī cædānīpa, ante ēñente wædinque yowementacodē nē ēacā iñōmō, ‘Botō iñōmō æbānō cæquēnēmo imoo, ante wædinque, Botō edæ īīmaī cæcæboimpa. Botō wengā onguīñængā botō nē waadecā iñongante da godōmo gocæcāimpa. Tōmēmo wengā da godōmo gocā adinque tōmēnāni wabānō guīñente wædinque ee abainānīpa,’ ante pōnēninque da godongā. ¹⁴ Gote dicæ pongā adinque yowementacodē nē aadāni guiquēnē, ‘Tōmengā ingampa. Wæmpocā māincoo īni edæ īingā iñōmō nē ænguingā ingampa cæmōō. Mōnō edæ māo wænōmō wængā ate edæ mōnō quī babaimpa.’ ¹⁵ Anewēninque tōmēnāni tōmengā ingante wææ cæte iñōmō yabæque wido cædinque godōmenque wænōnāni wængantapa.”

Ante Itota, Māninque ante apænebopa, ante tōmēnāni inānite angantapa. “Mānōmaī cædāni adinque yowementacodē nē ēacā iñōmō tōmēnāni inānite æbānō cæquingāā, ante pōnēmīni. ¹⁶ Tōmengā edæ do pōninque nē aaquēnēnāni inānite godō wænōninque wadāni inānite wæætē yowementacodē godongā æninque nē aadāni bacædānimpa.”

Itota mānōmaī angā ēñente wædinque godongāmæ ongōnāni iñōmō,

—Mānōmaī cædāmaī inguēnē anewēē, ante wædānitapa.

¹⁷ Īninque Itota tōmēnāni inānite gomō adinque,

—Īñæmpa ēñēnāmaī cæmīni iñōmīnite Wængonguī pānāmaī inguingāā, ante pōnēmīnitawo. Īninque mīnitō, Īīmaī ante quīnante yewæmongatimpa, ante pōnēmīni.

“Dica ænte adinque, Wēnæ wēnæ inca, ante nē mænōnāni nāni wido cædinca incæ

gomonga waēmonca inca Īninque tāno nāni ñōnōninca bæbængapa do bacapa,” ante yewæmongadānimpa. ¹⁸ Botō iñōmō mānīī dica waēmonca bai iñōmo inte āmo ēñēninque nē wæcā iñōmō tōmengā iñōmō mānincaā tæ go wæænīnque tobænte wæte bai botō ōnōwa gāānē ædæ wææncæcāimpa. Wæætē æcānō ingante Wængonguī pīinte mānīncaca tacacā īnaa tōmengā guiquēnē quīēmē bai yaintai bai goquingānō anguēnē, ante pōnēmīniyaa, ante Itota apænegacāimpa.

¹⁹ Ante nē aaquēnēnāni nāni cæinō ante odōmōninque Itota apæncā ēñente wædinque nē odōmōnāni tōnō, Wængonguī quī, ante nē godōnāni ñænænāni iñōmō, Īñæmpa mōnō imonte pīinte angā awædō, ante pōnēnānitapa. Īninque tōmēnāni, Mōnō ñōwo pōnī tōmengā ingante bæi ongongæimpa, ante cædānitapa. Incæte tæcæ bæi ongoncæ cædinque, Wadāni pīināni wæcæ wæ, ante wædinque ee adānitapa.

Tæiyæ Awēnē nānō āintamō ante ted-edānīpa

(Māateo 22.15-22; Māadoco 12.13-17)

²⁰ Īninque, Mōnō Itota ingante bæi ongōninque odōmāno gobedōnadodo awēnē nempo godōmō æninque tōmengā wæætē nē angā inte edæ Itota ingante apænte ancæcāimpa, ante ñænænāni incæ tōmengā ingante cōwā adānitapa. Ayæ wadāni inānite āninque, Mīnitō Itota mīñæ tee empote gote nōingā ante bai apænedinque wæætē babæ cædāni. Babæ cæmīni beyæ tōmengā adodeque incæ wapiticæ tedecā ēñēninque mīnitō ocæ emænte ponte apænemīni ēñencæmōnimpa, ānāni ēñente godinque ñænænāni nāni ānīnō bai babæ cædānitapa. ²¹ Īninque ñænænāni nāni nē da godōnīnāni iñōmō Itota weca pōninque,

—Awēnē nē Odōmōmi ēñēmi. Bitō apænedō nō impa, ante do ēñēmōnīpa. Bitō ayōmi mōnō waocabo adoyōmō pōnī imōnīpa, ante adinque bitō tōmāmōni imōnite adoyōmō pōnī cæbi æmōnīpa. Ayæ, Wængonguī taadō ante bitō nō pōnī odōmōmi īmīpa, ante ēñēmōnīpa. ²² Īninque apænebi ēñēmōnīi. Odōmāno gobiedōno beyæ ante tæiyæ awēnē Tetædo

tiguitamö nänö änintamö ante æbänö wææ yewæmonte i, ante eñencæte ante wæmönipa edæ. Godonte edæ waa cæte intawo. Wæætë wënæ wënæ cæte intawo.

²³ Æñönänite Itota iñömö, Tömënäni wënæ wënæ ancæte ante babæ cædänipa, ante do eñente wædinque,

²⁴ —Deënadio tiguitamö odömömini aboedäni. Æcänö awinca bai yewæmonte badonte i. Æcänö emöwo ante yewæmonte ongö, ante edæ apænemini eñëmoedäni.

Æñongante,

—Awënë Tetædo awinca bai yewæmonte badonte impa. Adocä emöwo ante yewæmonte ongö amönipa.

²⁵ Ante apænedäni eñëninque,

—Awënë Tetædo qui i ininque edæ Tetædo ingante godongæimpa. Wæætë Awënë Wængongui qui i ininque Wængongui ingante godongui i apa anewemini.

²⁶ Ante Itota tömänäni ayönänite nö apænecä eñente wædinque ñænænäni nani da pönöninäni wæætë, Mönö ædö cæte piinguü, ante guingo imonte wædinque pæ wëenegadänimpa.

Ædö cæte ñäni ömæmonguü, ante wædänipa

(Mäteo 22.23-33; Mäadoco 12.18-27)

²⁷ Tadoteoidi në, Waocä wæninque ñäni ömæmönämaï æmæwo wængampa, ante në anewänäni inte Itota weca pöninque, Mönö änö ante apænebi eñëmaimönipa, änänitapa.

²⁸ —Awënë në Odömömi eñëmi. Mönö beyæ ante Möitee wodi iïmaï ante wææ yewæmongacäimpa. Onguiñængä monte ate wëñæ tapæidämaï inte wængä ininque tömengä tönñacä incæ owæmpoingä ingante möninque, Botö tönñacä wodi wënäni wæætë pæcædänimpa, ante tapæicæcäimpa, ante yewæmongacäimpa.

²⁹ Ininque wadäni iïmaï cædänitapa, ante apænemöni eñëe. Edæ onompo æmæmpoque go mengäa nani caipæ iñönänite bamoncadengä möninque wëñæ tapæidämaï manguiwëninque edæ nänne wængä. ³⁰ Ate ayæmengä wææ adocä ingante möninque wëñæ tapæidämaï inte nänne wængä. ³¹ Ayæ wææ wacä möninque adobai nänne wængä, ayæ wææ wacä möninque nänne wængä, ayæ wææ

wacä möninque nänne, ayæ wææ wacä möninque nänne, ayæ wææ wacä möninque nänne wængampa. Onompo æmæmpoque go mënäa inäni owæmpoingä ingante möninque edæ wëñæ tapæidämaï inte edæ tömänäni nänne wænäni. ³² Ate onquiyængä tömengä nänne wængä. ³³ Ininque, Mönö ñäni ömæmonguionæ, ante mini äönæ iñonte mäningä owæmpoingä iñömö æcänö nännogængä baquingä. Edæ tömengä ingante iñömö edæ tömänäni manguiwengadänimpa.

³⁴ Æñönänite Itota,

—Inguipoga quëwëninque edæ mini waocabo iñömö do möminipa. Wacä ingante do godö ñänömöni mongampa.

³⁵ Wæætë, Miingui-poga bayonte iñäninque eyepæ inte ñäni ömæmonte öönædë æite quëwencædänimpa, ante Wængongui nänö në angainäni iñömö tömänäni mönämaï ininque wadäni inänite godö ñänönämaï incædänimpa. ³⁶ Ayæ Wængongui anquedoidi bai inönäni inte tömänäni Wængongui nänö në angainäni iñömö ædö cæte wæætë wænguinäni.

Tömënäni në ñäni ömæmongainäni inönäni inte edæ Wængongui wëñænäni inänipa.

³⁷ Wæætë Möitee wodi incæ ocäñeque bæcoñeque ante nänö yewæmongainta adotaa yewæmöninque, Waodäni dobæ ñäni ömæmonte quëwencædänimpa, ante edonque odömongacäimpa. Tömengä iïmaï ante yewæmongacäimpa. Mönö Awënë inongä iñömö Abadäo Wængongui ingaingä inte ayæ Itæca Wængongui ingaingä inte adocä Aacobo wodi Wængongui ingänö angüenë, ante yewæmongacäimpa.

³⁸ Inæmpa Wængongui iñömö në quëwënanäni Wængongui inongä inte tömengä në wængainäni Wængongui inämaï ingampa. Wæætë tömengä ayongante do wængainäni incæ tömänäni miinäni quëwënanäni.

³⁹ Ante apæneyongante në odömönäni pancadäniya,

—Awënë në Odömömi eñëmi. Bitö nöingä ante apænebi awædö, ante apænedänitapa.

⁴⁰ Ayæ wadäni tömänäni guñente wædinque godömenque änämaï ingadänimpa.

Codito æcänö Pæingä inongä ingäa, ante (Mäteo 22.41-46; Mäadoco 12.35-37)

⁴¹ Ayæ tōmēnāni inānite Itota,
—Awēnē Dabii wodi Pæingā inongā wææ
Codito ingampa, ante quīnante ānānii, ante
pōnēmīni, angantapa. ⁴² Īñæmpa Dabii
wodi incæ tōmengā nānō āmotamīni āntaa
īīmaī ante yewæmongacāimpa.

“Botō Awēnē ingante apænedinque
Awēnē Wængonguī incæ īīmaī ante
apænegacāimpa.

Bitō botō tōmēmæ inō tæ contate a ongoe.

⁴³ Ongōñōmite botō bitō ĩmite nē pīnāni
inānite bæ tate cæbo ate,
bitō ōnōwa gāānē ongōnāni inānite
pīnā gāwacæbiimpa,” ante Awēnē
Wængonguī apænegacāimpa.

⁴⁴ Codito nē Awēnē ingampa, ante awēnē
Dabii wodi nānō nē angaingā inongā inte
edæ adocā Codito ĩñōmō ædō cæte nāēmæ
Awēnē Dabii wodi Pæingā inguingāā.
ante pōnenguēnē ānewēmīnii, ante Itota
angacāimpa.

*Nē wææ odōmōnāni inānite Itota
pīngampa*

*(Māateo 23.1-36; Māadoco 12.38-40;
Odoca 11.37-54)*

⁴⁵ Ayæ tōmānāni ēñēē cōñōnānite
tōmengā mīñæ nē godānique inānite Itota
apænegacāimpa.

⁴⁶ “Cædāmāi, ante wææ ante nāni
yewæmongainta nē ate odōmōnāni inānite
mīnitō gomō aedāni. Tōmēnāni ĩñōmō
doyæncōo waēmoncōo wēñate mongænte
todānipa. Waodāni nāni godonte æññōmō
cægōñōnānite wadāni pō bee tēninque
tōmēnāni inānite, Nē odōmōmi, bitō ĩmite
waa amōnipa, ante apænedāni ēñēninque
edæ nē odōmōnāni ĩñōmō nanguī todānipa.
Ayæ tōmēnāni odōmōincōnē go guīd-
inque tōmēnāni nāmanque ante pōnēninque
waēmompaa pōni tæ contate todānipa. Ayæ
ææmæ becæ godinque tōmēnāni, Botō tāno
bete tocæimpa, ante waēmompaa pōni tæ
contate bete todānipa. ⁴⁷ Ayæ owæmpōināni
oncō yo mongænte bai cædinque ō æwēnāni
inte nē wææ odōmōnāni ĩñōmō, Botō
ĩmote waa acædānipa, ante cædinque
Wængonguī ingante nōingā apænete bai
cædinque babæ cædinque wantæpiyæ
tededānipa. Tōmēnāni edæ nāni nanguī
pōni pante wæquinque mānōmāi nāmā
beyænque ante cædānipa, ante adinque

mīnitō ĩñōmō ee gomō aedāni,” ante Itota
wææ angacāimpa.

21

*Owæmpoingā incæ, Wængonguī quī, ante
godongampa*

(Māadoco 12.41-44)

¹ Itota Wængonguī oncōnē ongonte gomō
ayongā nē nanguī ēadāni, Wængonguī
quī, ante nāni wēnoncadedē pō daga
daga wēnāni acantapa. ² Ayæ ayongā
onquiyængā owæmpoingā ōmæpocā inte
ōnontamonque mentamonga pō daga
wengā. ³ Adinque Itota īīmaī ante
apænegacāimpa.

—Nāwangā ante apænebo ēñēedāni.
Wadāni tōmānāni wædænque pōni
godonte bai wīi eyepæ daga wēñōnāni
īingā owæmpoingā ĩñōmō ōmæpocā inte
wædongā incæte godōmenque nanguī
godonte bai godongā abopa. ⁴ Tōmēnāni
nanguī ēadāni inōnāni inte, Quēwenguinta
impa, ante cō cædinque tōmēnāni nāni wīi
æñinentaque ayæ ongōintaque godōnānipa.
Īingā ōmæpocā ingā guīquēnē tōmengā
nānō quēwenguinta incæ, Wængonguī
quī bacæimpa, ante tōmanta edæ daga
wengampa, ante Itota apænegacāimpa.

*Wængonguī oncō ñæncō bæ tate
baccēimpa, ante*

(Māateo 24.1-2; Māadoco 13.1-2)

⁵ Wēēñēdē Wængonguī oncō ñæncō
mænōninque wadāni dicacōo waēmoncōo
pōni tee bædāni waa ongoncadompa. Ayæ
wacōo waēmoncōo pōni ænte pōninque,
Wængonguī quī impa, ante pædæ godōnāni
ongōnompaa. Nōwo ĩñōmō Itota mīñæ
nē godāni pancadāniya gomō ayōnāni,
Dicacōo tōnō wadāni waa pōni nāni ænte
pōnoncōo waēmoncōo pōni ongō amōnipa,
ante tededānitapa. Tedeyōnānite Itota,

⁶ —Mānincoo mīni acoo incæ īincayæ
ate tōmanca bæ tadāni wæænca adinque
panguīmæ panguīmæ godinque dica ado-
cāque pōni incæ wænōmēnæca ongōnāmāi
ingæimpa, ante apænegacāimpa.

*Oo ĩnque baccēimpa, ante æbānō ate
ēñenguī, ante*

(Māateo 24.3-28; Māadoco 13.3-23)

⁷ Mänömaï apænecä eñëninque tömënäni wæætë,

—Awënë në Odömömi eñëmi. Mänii bitö äninö ante æyedënö iinque baquii, ante eñencæte ante wæmönipa. Ayæ, iïmaï cæbo ate minitö, Oo pönï impa, ante eñencæminimpa, ante Wængongui æbänö mä cæquiringää, ante apænebi eñëmönie.

⁸ Äñönäni Itota, “Wapiticæ odömöñönäni minitö wæætë, Mönö oda cädämaï ingæimpa, ante nämä wææ aedäni. Edæ iïmaï baquï i атакедäni. Wadäni nanguï inäni ponte botö emöwo ante apænedinque, ‘Coditobo imopa,’ ante babæ ante tedequinäni inänipa. Ayæ, ‘Oo pönï impa,’ ante ponte nanguï inäni tedequinäni inänipa. Mänömainö ante ponte tedeyönänite minitö wæætë tömënäni miñæ tee empote godämaï imæwedäni. ⁹ Ayæ, Wabæca awënë tönö pö bee téninque wæætedö wæætë cädapa, ante tededäni eñencæminimpa. Ayæ, Adobæca quëwëninque incæ awënë ingante wido cæcæte ante ængæ gantidänipa, ante tededäni eñëninque minitö iñömö edæ guiñenämaï iedäni. Mänömaï edæ täno cöwë bacæimpa. Incæte iinque baönæ botö äönæ æiquedö ponguü.”

¹⁰ Ante apænedinque Itota godömenque apænecantapa. “Adobæca quëwënäni iñönänite wabæca quëwënäni ponte bee téninque guëadö guëa cæquinäni inänipa. Adobæca awënë odeye nempo quëwëñönänite wabæca awënë odeye nempo quëwënäni mämö bee téninque guëadö guëa cæte wænonte wænguinäni inänipa. ¹¹ Ayæ wayömö wayömö goinque nanguï pönï ocæ ocæ cæcæimpa. Ayæ waodäni näni cæinente wænguinque cænguï incæ tömää capo wængæimpa. Ayæ quingæ näni wodonte wënæ wënæ inte wæwenguimämo incæ edæ do pongæimpa. Edæ ancai näni guiñenguimämo edæ pongæimpa. Öönädë iñömö näni wo go wo go cæwënguimämo edæ ate bai bacæimpa.”

¹² Ayæ apænedinque Itota, “Mänimämo näni guiñenguimämo tömämämo ayæ pönämaï iñonte minitö iminite togænte yao ongonte tömënäni odömöincönë ænte go guidinque apænte äninque minitö iminite

mäo tee mönecädänimpa. Ayæ botö emöwo beyæ minitö iminite tömämæ awënëidi odeyeidi weca ayæ pancabaa awënëidi gobedönadodoidi weca ænte mäodäni gote gongæncæminimpa. ¹³ Minitö awënëidi weca godinque gongænte apænemini eñëninque awënëidi incæ, Itota æcänö ingää, ante eñencädänimpa. ¹⁴ Iinque minitö iminite awënëidi weca ayæ ænte godämaï iñedë incæ minitö iïmaï ante nämäneque pönëedäni. Botö awënë weca ongöninque æbänö ante wææ anguimoo, ante edæ wädämaï incæboimpa, ante piyænë cæedäni. ¹⁵ Iñæmpa botö pönö nö apænebo eñënimini inte minitö wæætë adodö ante apænecæminimpa. Mänömainö ante apænemini eñëninque në piinäni guiquënë nö pönï mini apænedö ante ædö cæte wido cæquinäni. Wæætedö wæætë ædö cæte anguinäni. ¹⁶ Minitö mæmpoidi incæ minitö tönïñadäni incæ minitö guidënäni incæ minitö æmigoidi incæ, Iingä ingampa, ante godö odömöninque minitö iminite wadäni nempo pædæ godönäni ö æncädänimpa. Æninque pancaminiya iminite godömenque wænönäni wænguimini inänipa. ¹⁷ Ayæ, Coditoidi iminipææ, ante tömänäni botö emöwo beyænque minitö iminite nanguï piincädänimpa. ¹⁸ Incæte minitö baö incæ ocaguï incæ adoguinque incæ æmæwo ëwënämaï ingæimpa. ¹⁹ Iinque minitö botö imote piinämaï inte wæntädämaï inte ee cæmini iinque botö æmo beyænque quëwencæminimpa.”

²⁰ Ante apænedinque Itota godömenque apænecäimpa. “Wabæca tontadoidi pöninque Eedotadëe godongämæ wææ ongönäni adinque minitö, Bæ tate näni wido cæquimämo oo pompa, ante do edæ eñencæminimpa. ²¹ Mänömaï cädäni adinque Oodeabæ quëwëmini iñömö änanquidi do wodii winonte æibæwedäni. Ayæ Eedotadëe quëwëmini iñömö edæ yabæque taobæwedäni. Ayæ yabæque quëwëmini inte Eedotadëe iñömö pö guidämaï imæwedäni. ²² Mänïñedë edæ Wængongui nänö panguiönæ incæ Wængongui beyæ näni yewæmonte angaiönæ incæ iinque baquinö anguënë. ²³ Mänïönæ iinque bayedë edæ yædëmadä

ināni tönö goömæ nē gānōnāni tönö tōmēnāni nāni wæquīmāmo baquīnō anguēnē. Imæca quēwēnāni edæ māniñedē nanguī pōni caate wæquīnāni inānipa. Idægoidi inānite edæ nanguī pōni piinte cæquīnō anguēnē. ²⁴ Pancadāniya inānite yaēmenca wido tadāni wænguīnāni inānipa. Ayæ pancadāniya inānite bæi ongonte māo wabæca ænte goquīnāni inānipa. Wængonguī doyedē apænedinque, Oodeo ināmaī ināni iinque nāni cæpoga cæcædānimpā, angacāimpā. Iinque tōmengā nānō angaimpoga iinque baganca oodeoidi ināmaī ināni incæ Eedotadēē iñōmō pōninque nanguī cægōninque pinā gāwate bai bæ tadāni wæquīmīni imīnipa, ante apænebo eñēmaimīnipa,” ante Itota apænegacāimpā.

Waobo eñagaīmo inte botō iīmaī ponte cæcæboimpā, ante

(Māateo 24.29-35, 42-44; Māadoco 13.24-37)

²⁵ Ayæ, “Oo pōni impā, ante edæ eñencæmīnimpā, ante cædinque Wængonguī angā ate nænque tönō apāicā nēmoncoo mā pōni edæ wacoo bai bacæimpā. Inguipoga guiquēnē ñænængade pōni gāwapæntibæ tadōmengadæ mængonta mængonta cædinque nanguī ä eñente wædinque tōmāmæ quēwēnāni edæ, Æbānō cæquīmōō, ante edæ nanguī pōni guīñente wæquīnāni inānipa. ²⁶ Ayæ waodāni æmō ayōnāni oōnædē tæi ongongaincoo incæ wancæ wancæ cæte bai wapiticæ go ate adinque tōmēnāni ancaī guīñente wædinque, Inguipoga mōnō quēwēñōmō edæ quiēmē bai bacæimpā, ante wædinque iñontobæ nangæ bate wæcædānimpā. ²⁷ Māniñedē edæ botō Waobo nē eñagaīmo inte boguīmancodē pōninque tæi pōni piñæmo iinque edæ ñāo apāite bai waēmō emonte wææmo acædānimpā. ²⁸ Iinque mānōmaī tæcæ ba ate wædinque mīnitō ocabo guīni æmencadinque, Badogaa, āninque edæ, Oo pōni mōnō abæ tawænte goquīnque impā, ante amæwedāni,” ante Itota apænegacāimpā.

²⁹ Ayæ, Wængonguī Awēnē oo poncæcāimpā, ante æbānō eñenguīi, ante eñencædānimpā, ante Itota imæca quēwēnāni nāni cæinō

ante odōmōninque iīmaī apænecantapa. “Iigowæ aedāni. Ayæ quiwæmē incæ tōmāwæ aedāni. ³⁰ Oñabo tånā nā boca adinque mīnitō iñōmō, Oñabo nānō bocainepo inte nænque nāwantedæ baquinque bocapa, ante pōnēninque edæ do eñēmīnipa. ³¹ Ayæ adobaī mānīnō botō apænedō bai do edæ ba adinque mīnitō, Wængonguī Awēnē Odeye do odemō pōni ongōninque inguipoga oo poncæcāimpā, ante eñencæmīnimpā,” angacāimpā.

³² Ayæ apænedinque Itota, “Nāwangā amopa. Nōwomīni mīmīni quēwēninque wænte godāmaī iñōmīni edæ mānīnō botō ānīnō bai tōmānō edæ do iinque baquīnō anguēnē. ³³ Edæ oōnædē ongōñōmō inguipoga tönō wo ewente bai dæ ba incæte botō angaīnonque guiquēnē dæ badāmaī inte edæ cōwē tæi ongongæimpā,” ante apænecantapa.

³⁴ Ayæ, “Mīnitō iñōmō edæ, Mōnō quingāmē bai wīwa quēwēmō iinque mōnō mīmō omædēmō bate wæcæ wæ, ante nāmā wææ aaedāni. Ti nāmæ bete quidi quidi dowāninque mīmō omædēmō bacæ wæ, ante nāmā wææ aaedāni. Ayæ, Inguipoga quēwēmō inte quiēmē beyænque wædinque mīmō omædēmō bacæ wæ, ante nāmā wææ cæedāni. Mīmō omædēmō inte wæyōmonte māniōnæ wīi iñontobæ pō wæcæimpā, ante mīmō omædēmō badāmaī ingæimpā, ante nāmā wææ cæedāni. ³⁵ Iñæmpā waodāni tōmānāni inguipoga tōmāmæ quēwēñōnānite edæ iñontobæ ba wæcædānimpā. ³⁶ Iinque woyowotæ itædē cōwē wānō cōninque mīnitō Wængonguī ingante cōwē apæneedāni. Mīnitō, Mānīnō iinque ba adinque mōnō eyepæ inte aamō cæte wodi wīnongæimpā, ante Wængonguī ingante apæneedāni. Ayæ, Waocā nē eñagaingā weca mōnō eyepæ gongængæimpā, ante adobaī edæ Wængonguī ingante apæneedāni,” ante Itota angacāimpā.

³⁷ Itota māniñedē Wængonguī oncō ñænæncōnē iīmō iñō iīmō iñō yabæcōnē go guīte odōmonte apænecā eñēnāni ante tōmengā wæætē gāwadecæ iñō gāwadecæ iñō tao godinque Odibowænquidi æite owodongāimpā. ³⁸ Ayæ tōmengā

Wængonguī oncō ñænæncōnē yabæcōnē ongonte apænecā ēñencæte ante tōmānāni wæætē baānæ iñō pō baānæ iñō pō beē tēnōnānimpa.

22

Itota ingante bæi ongongæimpa, ante cædānipa

(Māateo 26.1-5, 14-16; Māadoco 14.1-2, 10-11; Wäö 11.45-53)

¹ Pāō yedæ æmpoquī ōmæmō ī nāni cænguīōnæ ante oodeoidi, Patowa mōnō wodo pænta gogaīōnæ ææmæ oo pōni bacæimpa, ante cædōnānimpa.

² Wængonguī quī, ante nē godōnāni ñænænāni tōnō nē odōmōnāni iñōmō, Itota ingante mōnō wido cæcæimpa, ante cōwē cædōnānimpa. Incæte, Wadāni pīnāni wæcæ wæ, ante guīñente wædinque tōmēnāni māniñedē, Mōnō æbānō cæte awēmō bæi ongongæimpa, ante wægadānimpa.

³ Ayæ Itota miñæ nāni, Dote, ante gocabo iñōnāni Codaa Icadote nāni ānongā adocā īnongāimpa. Tatāna māniñedē tōmengā pō guicantapa. ⁴ Īninqe nē godōnāni ñænænāni tōnō Wængonguī oncō nē wæwænōnāni awēnēidi iñōmō godongāmæ ongōñōnāni Codaa tōmēnāni weca godinque iīmaī ante apænecantapa. Itota æyōmōnō ongongāā, ante botō æbānō odōmonte pædæ pōnōmo ate ænguīmīni. Angā ēñēninqe tōmēnāni tōmengā tōnō māniñō ante godongāmæ tedegadānimpa.

⁵ Tōmengā, Odōmonte pædæ pōnōmo æncæmīnimpa, ante apæneyongante tōmēnāni nanguī todinque wæætē, Tiguitamō padatamō pōnōmōni æncæbiimpa, ante apænedāni. ⁶ Ēñēninqe tōmengā Ao antē wadæ godinque, Wadāni adāmaī iñōnānite botō æbānō cæte iīnāni inānite awēmō odōmonte godōmo ænguīnāni, ante cōwā adinque cægacāimpa.

Awēnē Itota pāō tōnō owæta godongā cænte bedānipa

(Māateo 26.17-29; Māadoco 14.12-25; Wäö 13.21-30; 1 Coodintoidi 11.23-26)

⁷ Pāō yedæ æmpoquī ōmæmō ī nāni cænguīōnæ iñonte wodo pænta gogaīōnæ baī ī ininqe Patowa ææmæ bete

cænguīōnæ do iinqe batimpa. Māniñōnæ iñonte oodeoidi cōwē cæningā codotedo ingante wænōninqe, Wængonguī quī, ante godonguēnēnāni inōnānimpa. ⁸ Īninqe Pegodo tōnō Wäö inate da godōninqe Itota iīmaī angantapa.

—Minatō inōnō gote, Patowa ææmæno impa, ante ænōmīna ate mōnō cængæimpa.

⁹ Angā ēñēninqe tōmēna,

—Æcōnēnō go guiite æænonguīmōna, āmii.

¹⁰ Āñōnate tōmengā wæætē,

—Waa aeda. Minatō māniñ nāni quēwēñōmō go guiyōmīna onguīñængā incæ cadabodē æpæ iyænte næænte gocā adinque tōmengā ingante edæ tee empote goeda. Tee empo goyōmīna tōmengā oncōnē go guicā adinque, ¹¹ mīnatō wæætē oncō nē ēacā ingante iīmaī ante āeda. “Mōnō Awēnē nē Odōmongā incæ bitō imite iīmaī angampa. Bitō æcōnēnō āmi guidinqe botō nē ēmiñænāni tōnō Patowa ææmæ ante cænguīmōni, angampa,” ante apæneeda. ¹² Mānōmaīnō ante apænemīna ēñēninqe nē oncō ēacā iñōmō æmongapaa māi goyōmīnate oncō ñænæncō awæmpaa do nānō cōnōincō odōmongā adinque mīnatō mānincōnē tōmāā eyepæ cæcæmīnaimpa, ante Itota da godongā godatapa.

¹³ Mānōmaī angā godinque apæneyōna, Itota nānō ānō baī adobaī tōmāā batimpa, ante adinque tōmengā nānō nē ēmiñæna, Patowa ææmæno impa, ante cædatapa.

¹⁴ Īninqe ææmæno nāni cæñedē iinqe bayonte Itota awæmpaa gānē pō tæ contayongā tōmengā nānō nē da godōnīnāni godongāmæ pō tæ contadāni. ¹⁵ Adinque Itota tōmēnāni inānite apænecantapa.

—Botō iñōmō caate wæte wænāmaī iñedē mīnitō tōnō godongāmæ Patowa ante cænte tocæimpa, ante cæinente nanguī wætabopa.

¹⁶ Apænebo ēñēdāni. Botō Wængonguī Awēnē inōmo inte Awēnē Odeye badinque māniñedē ate waodāni inānite æmæwo pōni ata cæpocæboimpa. Māninganca botō ata cæpoganca botō ñōwo, Wængonguī Awēnē dodāni inānite ata cæpodinque wodo pænta gogacāimpa, ante Patowa ææmæno ñōwo iinqe cæncæ cæbopa. ¹⁷ Āninqe ayæ Itota bequīmæ owætaca bæi ongonte

æninque Wængongui ingante waa ate apænedinque tõmënäni inänite angantapa.

—Minitö owæta iinta æninque godongämæ beedäni. ¹⁸ Ämo ëñëedäni. Yowepæ ñowo bedinque botö Wængongui Awënë inömo inte Awënë Odeye botö baganca edæ ñowo æmæwo bebopa.

¹⁹ Ante apænedinque Itota pöö æninque Wængongui ingante waa ate pönente apænedinque pä æninque pædæ godöninque apænegantapa.

—Ii pöö botö baö bai impa. Botö, Minitö quëwencæminimpa, ante botö baö godonte bai cædinque wæncæboimpa. Botö pä ænte pædæ pönömo bai minitö iincayæ ate botö imote ante pönëninque adobai cæte wacä ingä wacä ingä pædæ godonte cæedäni, angantapa. ²⁰ Mänömaï angä iinque cænäni ate owæta adobai ænte apænedinque tõmengä,

—Botö wepæ iimæ bai impa. Wængongui do apænedinque, Botö pönö cæbo ate minitö Ao ämini iinque mönö godongämæ waa cæte quëwengæimpa, angacäimpa. Ñowo adobai botö wepæ minitö beyæ pædæ godömo ate minitö Ao ante æmini iinque mönö godongämæ waa cæte quëwengæimpa. ²¹ Incæte botö imote në pönö odömonte pædæ godonguingä iñömö botö önompo gäänë cænguimpaa adoyömö ongö aedäni. ²² Wængongui do nänö angainö bai botö në Waobo ëñagaimo inte wænte gocæboimpa. Näwangä impa. Incæte botö imote në pönö odömonte pædæ godonguingä iñömö edæ tõmengä nänö nanguï wæwenguinque edæ mänömaï cæcä ingampa töö.

²³ Ante Itota apæneyongä tõmënäni nani caboque tædedinque edæ, Æcänö ingante ante apænegä, ante wædänitapa.

*Æcänö yæcado ongonguingä, ante ted-
edänipa*

²⁴ Ayæ adobai, Mönö cabo iñömönte æcänö ñænængä inte edæ yæcado ongönte bai në angä baquingä, ante wædinque tõmënäni wæætedö wææte äninque nanguï tedewënäni. ²⁵ Adinque Itota tõmënäni inänite, “Idægoidi inämaï inäni awënëidi iñömö tõmënäni nempo quëwënäni inänite,

Botö ämo ëñente cæedäni, ante nanguï piinte änewënäni. Incæte në piinte änewënäni iñönänite tõmënäni nempo quëwënäni wææte, Mönitö awënëidi në Pönö Cædäni inänipa, ante babæ ante pemöwënäni. ²⁶ Wææte minitö guiquënë inguipoga awënëidi nani cæi bai cædämaï iedäni. Mini cabo incæ në yæcado ongongä inte yæmiñængä bai baquënegä ingampa. Ayæ në angä inongä inte wacä beyæ në cæcä bai baquënegä ingampa. ²⁷ Æbänö ante pönëminii. Æcänö ingante, Awënë bai ingampa, ante nanguï waa adänii. Në cænguimpaa gäänë tæ contate cængä ingante waa adänitawo. Wææte awënë beyæ ante ænte mämö pönongä ingante waa adänitawo. Iñæmpa në contacä ingante näwangä waa adänipa. Incæte botö iñömö önomoque bai cædömo inte minitö weca pöninque në ænte mämö pönongä bai inte në pönö cædömo imopa,” ante Itota apænegantapa.

²⁸ Ayæ apænedinque, “Botö caate wæwëñömöte minitö iñömö botö tönö godongämæ iñacabo cædimini iminipa. ²⁹ Iinque botö Mæmpo botö imote, Awënë Odeye bacæbiimpa, ante nänö pönö cægai bai botö wææte, Botö tönö iñacabo cædimini inömini inte minitö awënë odeyeidi adobai bacæminimpa, ante pönö cæcæboimpa. ³⁰ Ayæ, Botö në Awënë Odeye bayömöte minitö botö awæmpaa gäänë tæ contadinque godongämæ edæ cænte becæminimpa, ämopa. Ayæ idægoidi önompo tipæmpoga go mencabodäniya iñönänite minitö awënë tæ containpaa tæ contadinque tõmënäni inänite në apænte ämini bacæminimpa,” ante tõmengä miñæ në godäni inänite Itota apænegacäimpa.

*Pegodo incæ, Dicæ abogaa, ante angu-
ingä ingampa, ante*

*(Mäate 26.31-35; Mäadoco 14.27-31; Wäö
13.36-38)*

³¹ Itota ayæ,

—Timönö, ëñëmi. Timönö, bitö imite ämopa. Waocä tõmëmö ænte wancæ wancæ cæcä ontapo wææ bai minitö iminite Tatäna incæ bæi ongönte wænæ wænæ cæcæte ante angampa. ³² Wææte, Bitö wede pönëninque nangæ badämaï incæbiimpa, ante botö do edæ Wængongui ingante

apænetabopa. Īninqe bitō iñōmō edæ ĩncayæ ate botō gāmænō ocæ ěmænte ponguimi ĩmipa. Pōninqe, Bitō tōniñadāni wæætē tæi piñænāni bacædānimpa, ante tōmēnāni ĩnānite godō tōō æmænte bai cæe.

³³ Ante apæneca ēñēninqe Timōnō wæætē,

—Awēnē ēñēmi. Bitō ĩmite tee mōnedāni ĩninqe botō do bitō tōnō go guibaīmopa. Bitō ĩmite wænōnāni wæmi ĩninqe edæ botō bitō tōnō do wæmaīmopa.

³⁴ Ante apæneca ēñēninqe Itota angantapa.

—Pegodo, bitō ĩmite āmo ēñēe. Tawadiya ñōwoñæ ayæ pedāmaī ĩñonte bitō botō ĩmotedō apænedinqe, Dicæ abogaa, ante mempoga go adopoque anguimi ĩmipa, ante Itota apænegacāimpa.

Botō caate wæquimāmo oo baccāimpa, angampa

³⁵ Ayæ wæætē tōmēnāni ĩnānite,

—Botō wēēñēdē mīnitō ĩmīnite da godōninqe, Godonte æinta da wente ænguincadedē ænāmaī inte goedāni, antabopa. Māincoo da wente ænguī næænāmaī inte awæncata næænāmaī inte goedāni, ante botō da godōmo godinque mīnitō ænguēnēmīni inte wæmīnitawo.

Āñongante,

—Ænguēnente wædāmaī intamōnipa, ānānitapa.

³⁶ Itota wæætē tōmēnāni ĩnānite,

—Ñōwo iñōmō æcānō godonte æinta da wente ænguincade māna tōmengā mānincade næænte gocæcāimpa. Ayæ māincoo da wente ænguī adobai næænte gocæcāimpa. Ayæ yaēmē mānāmaī ingā inte weocoo yacoo nē māningā wacā ingante godonte æninqe wæætē yaēmē godonte æncæcāimpa. ³⁷ Īmaī ante dodāni nāni yewæmongainō bai botō ĩmote cæcædānimpa. “Nē ēñēnāmaī nāni cæcabo ĩñōnānite tōmengā adocā ĩnongā ingampa, ante ānānitapa,” ante yewæmongatimpa. Mānōmaī impa, ante pōnēninqe botō ĩmaī āmopa. Botō ĩmote æbānō cæquīnānīi, ante nāni yewæmongainō bai botō ĩmote tōmānō ĩninqe cæquīnō anguēnē. Botō ĩmote ante nāni yewæmongainō bai cædinque ñōwo iñōmō edæ eyepæ ba aedāni.

³⁸ Ante apæneyongante tōmēnāni,

—Awēnē, yaēmē mēa mæ ongō ae.

Ānānitapa. Tōmengā wæætē,

—Idæwaa, angacāimpa.

Guetēmānī iñōmō Itota Wængonguī ingante apæneca

(Māateo 26.36-46; Māadoco 14.32-42)

³⁹ ĩninqe apænedinqe Itota wadæ godinque cōwē nānō æidō bai æidinque Odi-bowænquidi go æiyongante tōmengā miñæ nē godāni tee empo æigadānimpa. ⁴⁰ Āi cōwē nānō æi ongōñōmo pōninqe tōmēnāni ĩnānite,

—Mīnitō ñōwo Wængonguī ingante nāmā beyænque apænedinqe, Mōnitō wīi wēnæ wēnæ cæinēmōni bacæmōnimpa, ante apæneedāni.

⁴¹ Āninqe Itota wadæ godinque dica mōnō wido cæganca māninganca godinque da guicapodinque Wængonguī ingante apænecantapa. ⁴² Apænedinqe, “Mæmpo ēñēmi. Bitō Ao āninqe edæ tī nā wænguimæ bai ō ænte bai cædinque botō ĩmote edæ, Wænāmaī incæbiimpa, āmi ĩninqe botō edæ waa tobaīmopa. Incæte botō ānōnō bai wīi cædinque wæætē tōmēmi ānōnō bai cæe, āmopa.”

⁴³ Ante apæneyongā Wængonguī oōnædē nānō da pōnōningā anquedo Itota weca ponte a ongōninqe, Tæi piñænte entawencæbiimpa, ante cædinque pōnō tōō æmænte bai cæcantapa. ⁴⁴ Incæte Itota iñōmō edæ nanguī wæwente badinque Wængonguī ingante ancaa apæneca ĩninqe edæ tōmengā owæmæ wepæ gowete bai tadinque onguipoiya petæ petæ wææntapa.

⁴⁵ Ayæ ĩninqe apænedinqe tōmengā ængæ gantite godinque tōmengā miñæ nē pōnīnāni weca ponte ayongā tōmēnāni nanguī wæwente wædinque mō ñōnāni.

⁴⁶ Adinque edæ tōmengā tōmēnāni ĩnānite,

—Īñæmpa mōwo mōmīnīi. Edæ ængæ gantidinque, Wēnæ wēnæ cæinente badāmaī incæmōnimpa, ante Wængonguī ingante apæneedāni, angacāimpa.

Itota ingante bæi ongonte ænte godānipa

(Māateo 26.47-56; Māadoco 14.43-50; Wāō 18.2-11)

⁴⁷ Ante tæcæ apæneyongā nanguī ĩnāni ĩñontobæ ponte a ongōnānitapa. Itota miñæ

nāni, Dote, ante gocabo ïningä incæ Codaa ïñömö täno beyænte pöninge Itota ingante waa cæte bai queë bemoncæte ante pongä.

⁴⁸ Adinque Itota tömengä ingante,

—Codaa ïñæmpa, botö Waobo ëñagaïmo ïñömote bitö, ïngä ingampa, ante queë bemöninge odömonte pædæ godömi ænguïnānii, angantapa.

⁴⁹ Mänömaï cæcæ cædänipa, ante adinque tömengä miñæ nê godäni guiqüenê,

—Awënê, yaëmenca godö tao cæquïmöni ämii, änānitapa.

⁵⁰ Wængonguï quï, ante nê godongä ñænængä pöni ïnogä ingante nê cæcä ïñömö mäniñömö ponte a ongongä adinque Itota miñæ nê pöningä adocanque wæætê yaëmê æninqe mäningä önömonca tömëmonca ïnö wangö tamoncacä wæcantapa. ⁵¹ Adinque Itota wæætê,

—Idæwaa, äninque gampo cæmoncacä waa bamoncagacäimpa. ⁵² Ayæ, Wængonguï quï, ante nê godönäni ñænænāni incæ Wængonguï oncö ñænæncö ante nê wææ wänönāni incæ nê aadāni nāni Picæncabo incæ tömengä ingante æncæte ante nê pönināni ïñönānite Itota tömënāni ïnānite, Botö miñæ nê godäni tönö botö dicæ awënê ingante wido cæcæte ante cæbogaa. Incæte mīnitö, Nê wido cæcä ingampa, ante bai cæmīni awædö. Edæ canta teëmenca mīni badöinca tönö yaëmê næænte botö weca pömīnii. ⁵³ ïñæmpa botö æpogadö Wængonguï oncö ñænæncönê ïimö ïñö ïimö ïñö yabæcönê go guiddinque mīnitö weca a ongöñömote mīnitö wæætê bæi ongoncæte ante pædæ gopodāmaï ïmīnitapa. Edæ ñöwo wëmö mæ māmōnte bai ïñonte edæ mīni nê wënæ wënæ cæyedê impa, ante apænegacäimpa töö.

Pegodo incæ, Dicæ abogaa, angampa

(*Mäateo 26.57-58, 69-75; Mäadoco 14.53-54, 66-72; Wäö 18.12-18, 25-27*)

⁵⁴ ïninque Itota ingante bæi ongonte ænte mäo, Wængonguï quï, ante nê godongä ñænængä pöni ïnogä weca ænte godänitapa. Gobæ godäni ïninque Pegodo ïñömö ayæ ayæ gocantapa. ⁵⁵ Ñænæ oncö yacömoyæ ïñömö wææ wänönāni gonga tänōnte godāmæ pö tæ contadāni adinque Pegodo tömënāni weca pö tæ contacä.

⁵⁶ Adinque nê cæcä onquiyængä tömengä gongapamö ongongä adinque tömengä ingante cöwä adinque,

—Ëngä adobaï mäningä miñæ tee empo gocä ingantapa.

⁵⁷ Äñongante Pegodo,

—Onquiyæmi ëñëmi. Botö mäningä ingante dicæ abogaa, angantapa.

⁵⁸ Ayæ wantæ ate wacä pöninge Pegodo ingante waa adinque,

—Bitö adobaï tömengä miñæ nê gobi ïmitapa töö.

Ante apænecä ëñëninque,

—Onguïñæmi ëñëmi. Botö dicæ tömengä miñæ gobogaa. Edæ wabo ïmopa.

⁵⁹ Ayæ wacä adobaï wantæ wantæ adoque ooda go ate äninque,

Ëngä ïñömö Itota miñæ nê godingä ingampa. Näwangä impa. Gadideabæ quëwëningä inte edæ pongä aedāni.

⁶⁰ Angä ëñëninque Pegodo,

—Onguïñæmi, quïëmê bai apænebipa, ante botö ëñënämaï ïmopa.

Ante tæcæ mënea äñongante tawadiya ïñontobæ aa aa pecantapa. ⁶¹ Itota incæ tömengä gämænö dadi ëmænte pömö acä adinque Pegodo ïñontobæ, Æ, äninque, “Tawadiya ñöwoönæ pedāmaï ïñonte bitö botö ïmotedö ante wadö ate apænedinque, Dicæ abogaa, ante tededinque mempoga go adopoque anguïmi ïmipa,” ante Itota wëenëñedê apænecä ëñentabopa. ⁶² Ñöwo nänö pequinque do pecampa, ante pönente wædinque Pegodo oncodo tao godinque Ca ca wægacäimpa.

Itota ingante badete todinque cædänipa
(*Mäateo 26.67-68; Mäadoco 14.65*)

⁶³ Itota ingante nê wææ wänönāni ïñömö tömengä ingante mäniñedê badete todinque edæ tæi tæi pänānitapa. ⁶⁴ Ayæ tömengä awinca wīni cæmöninque tömënāni,

—Æcänö bitö ïmite tæi tæi pānaa, ante Wængonguï apænecä ëñente ate apænebi ëñëmönie.

⁶⁵ Ante badete todinque quïëmê bai ante godö babæ änewënānitapa.

Nê apænte änāni weca Itota ongongampa
(*Mäateo 26.59-66; Mäadoco 14.55-64; Wäö 18.19-24*)

⁶⁶ Nāo bayedē, Wængonguī quī, ante nē godōnāni n̄ænænāni tōnō nē odōmōnāni iñōmō idægoidi inānite nē aadāni nāni Picæncabo inōnāni inte edæ godongāmæ go bee tēninque tōmēnāni nāni apænte anguimpaa gāānē ongōñōnāni Itota ingante tōmēnāni weca tōō æmænte ænte māo gōnōnāni gongængantapa.

⁶⁷ Tōmengā ingante nē apænte ānāni iñōmō,

—Apænebi eñēmōnie, āninque, Bitō mōnitō Codito inōmi imitawoo.

Åñōnānite Itota wæætē,

—Botō apænebo ininque mīnitō wæætē eñēnāmaī imāimīnīpa.

⁶⁸ Ayæ wæætē botō eñencæte ante āmo ininque mīnitō wæætē botō imote apænedāmaī imāimīnīpa.

⁶⁹ Incæte āmo eñēdāni. Botō iñōmō nē Waobo eñagāimo inte iincayæ ate Wængonguī nē tæi Piñængā tōmēmæ inō tæ contate ongoncæboimpa.

⁷⁰ Ante apæneca eñēninque tōmānāni,

—Iñæmpa, bitō Wængonguī Wēmi imitawoo.

Åñōnānite,

—Botō mānimodō imopa. Tōmēmīni edæ mānōmaī āninque edæ nō apænemīnīpa.

⁷¹ Ante apæneca eñēninque,

—Idæwaa. Tōmengā nāmā incæ edæ, Wængonguī Wēmo imopa, ante wēnæ wēnæ apæneca do eñentamōmpa. Ininque mōnō nōwo edæ, Wadāni, Itota wēnæ wēnæ cæcampa, ante apæneca dānīmpa, ante quīnante godōmenque diqui diqui minguii, ante wægadānīmpa.

23

Pidato weca gote Itota ongongampa

(*Māateo 27.1-2, 11-14; Māadoco 15.1-5; Wāō 18.28-38*)

¹ Ininque māniñōmō ongōnāni tōmānāni godongāmæ ængæ gantidīnque Itota ingante awēnē Pidato weca ænte gogadānīmpa. ² Godīnque tōmēnāni, Itota iīmaī nē wēnæ wēnæ cæcā ingampa, ante pīinīnque,

—Mōnitō cōwā ayōmōni iingā iñōmō wapiticæ odōmonte apæneca eñēninque mōnitō omæ quēwēnāni oda cæte eñēnāmaī cædāni wæmōnīpa. Edæ odōmāno awēnē Tetædo nānō ānīnta godōnāmaī iedāni, ante

tōmengā wææ angampa. Ayæ tōmengā, Botō iñōmō Awēnē Odeye Coditobo inōmo imopa, ante nāmā ante angampa tōō.

³ Ante godō pīināni eñēninque Pidato iñōmō Itota ingante,

—Bitō oodeoidi Awēnē Odeyebi imitawoo.

Åñongante Itota wæætē,

—Bitō tōmēmi ānō bai botō mānimodō imopa, angantapa. ⁴ Ininque nē godōnāni n̄ænænāni tōnō wadāni godongāmæ ongōñōnānite Pidato wæætē,

—Botō ayōmote iingā dicæ eñēnāmaī cæte wentamō mongængā abogaa, angantapa.

⁵ Ante Pidato apæneca incæte tōmēnāni godōmenque āninque,

—Iñæmpa tōmengā Gadideabæ tāno odōmōninque nōwo iñōmō ganca pōninque Oodeabæ tōmāo godīnque odōmonte apæneca eñēninque waodāni edæ pīinte badāni apa cæbii, ānānitapa.

—Iñæmpa tōmengā Gadideabæ tāno

odōmōninque nōwo iñōmō ganca pōninque Oodeabæ tōmāo godīnque odōmonte apæneca eñēninque waodāni edæ pīinte badāni apa cæbii, ānānitapa.

Edode weca Itota gote ongongampa

⁶ Mānōmaīnō ānāni eñēnte wædinque Pidato wæætē, iingā iñōmō nāwangā Gadideabæ quēwēningā inte pongantawoo.

⁷ Åñongante, Māningānō ingampa, ante apænedāni eñēninque tōmengā, Gadideabæ nē quēwēningā inte tōmengā awēnē Edode nānō nē enempodongā ingampa, ante tæcæ eñengantapa.

Ayæ, Edode nōwo Eedotadēē ponte quēwengampa, ante do eñēningā inte Itota ingante Edode weca Pidato da godongā gocantapa. ⁸ Doyedē iñōmō wadāni, Itota æbānō cæcāā, ante tededāni eñēninque Edode, Itota botō weca pōninque wabānō bamōnengæ pōnī cæcā abaīmopa, ante pōnēninque tōmengā ingante wantæpiyæ aīnengā inongāīmpa.

Ininque Itota ingante nōwo adīnque Edode nanguī togacāīmpa. ⁹ Ininque, Apænebi eñēmoe, āmi eñēmoe, ante Edode wæætē wæætē āñongante Itota iñōmō edæ pæ wēēnete apænedāmaī ingacāīmpa.

¹⁰ Edode weca adoyōmō ongōninque nē godōnāni n̄ænænāni tōnō nē odōmōnāni guiquēnē ænguī badīnque, Itota wēnæ wēnæ cæcā ingampa tōō, ante nanguī pīinte angadānīmpa. ¹¹ Ayæ Edode tōnō tōmengā tontadoidi tōnō Itota ingante pīinīnque, Waa cæte bai cæcantedō abi,

—Iñæmpa tōmengā Gadideabæ tāno

odōmōninque nōwo iñōmō ganca pōninque Oodeabæ tōmāo godīnque odōmonte apæneca eñēninque waodāni edæ pīinte badāni apa cæbii, ānānitapa.

—Iñæmpa tōmengā Gadideabæ tāno

odōmōninque nōwo iñōmō ganca pōninque Oodeabæ tōmāo godīnque odōmonte apæneca eñēninque waodāni edæ pīinte badāni apa cæbii, ānānitapa.

—Iñæmpa tōmengā Gadideabæ tāno

odōmōninque nōwo iñōmō ganca pōninque Oodeabæ tōmāo godīnque odōmonte apæneca eñēninque waodāni edæ pīinte badāni apa cæbii, ānānitapa.

—Iñæmpa tōmengā Gadideabæ tāno

odōmōninque nōwo iñōmō ganca pōninque Oodeabæ tōmāo godīnque odōmonte apæneca eñēninque waodāni edæ pīinte badāni apa cæbii, ānānitapa.

ante badete todänitapa. Önonque badete tocæte ante tömënäni waëmö pönï weocoo daga wëñadinque tömengä ingante adodö Pidato weca da godönäni gogacäimpa. ¹² Ìninqe do näna guëadö guëa piincaya ìnina inte edæ Edode tönö Pidato mänïönæ edæ guëa piyænë cæte näna æmigocaya bagadaimpa.

Itota wæncæcäimpa, änänipa
(*Mäateo 27.15-26; Mäadoco 15.6-15; Wäö 18.39-19.16*)

¹³ Pidato ìñömö në godönäni ñænænäni tönö awënëidi tönö önönänique ìnänite äñecä pönäni ate tömengä, ¹⁴ tömänäni ìnänite äninque,

—Ìngä ingante botö weca ænte pöninque mïnitö, Tömengä wapiticæ odömönte apæneçä ëñëninque wadäni oda cædinque ëñënämaï cædänipa, ante pïimïnipa. Incæte mïnitö edonque ayöminite botö, Itota æbänö cæcää, ante ëñencæte ante cöwä ayömo edæ tömengä wënæ wënæ nänö cædö ante mïni anewënö ante edæ dæ ä abopa. ¹⁵ Ayæ Edode adobaï tömengä ingante apænte äninque wënæ wënæ nänö cædinö ante adämaï inte wædinque adodö botö weca da pönongä ponte a ongongä aedäni. Edæ, Tömengä nänö wænguinque, ante nänö cædinö edæ dæ ä apa anewëminii. ¹⁶ Ìninqe botö önonque tæi tæi päninque ñimpo cæbo gocæcäimpa, ante Pidato angantapa. ¹⁷ Wadepo ìñö wadepo ìñö tömënäni ææmæ nänï cæyedë, Në tee mönete ongongä adocanque gocæcäimpa, ante cöwë godö ñimpo cæquënegä ìnongä inte awënë Pidato ñöwo mänömainö ante cæcantapa. ¹⁸ Mänömainö angä ëñëninque tömänäni adoyömö ogæ tededinque,

—Itota ingante wido cædinque Badabato ingante wæætë pönö ñimpo cæbi æmönïe, änänitapa.

¹⁹ Badabato guiquënë tömënäni nänï quëwëñömö awënë ingante wido cæcæte ante cædinque godömenque waocä ingante wænöningä inte edæ ñöwo tee mönete ongönongäimpa. ²⁰ Pidato ìñömö, Itota ingante æbänö cæte ñimpo cæbo goquingä, ante wædinque tömënäni ìnänite wæætë aa aa peyongante, ²¹ Oodeoidi wæætë,

—Awæ ñænquedimæ ämi cæte gönonte wænönäni wængæe töö, ante wæætë wæætë adodö äninque Yæ änänitapa.

²² Quimæ anewëminii, ante do mem-poga äningä inte Pidato ñöwo mem-poga go adopoque änongä inte,

—Quinö wënæ wënæ cæcantawogaa, angantapa. Ìñæmpa, Quinö wënæ wënæ cæcantawo, ante cöwä ayömo edæ dæ ampa. Ìninqe botö ämo ate edæ tömengä ingante tæi tæi päninque ñimpo cædäni gocæcäimpa, ämopa, angantapa.

²³ Incæte awënëidi tönö wadäni godömenque Yæ äninque, Awæ ñænquedimæ ämi cæte gönonte wænönäni wæncæcäimpa, ante, Cöwë wænongæimpa, ante ancaa aa pedänitapa. Ìninqe tömënäni nänï Yæ yæ änö beyænque Pidato ñimpo cæcantapa. ²⁴ Ìninqe ancaa wææ änäni ëñente wædinque tömengä, Tömënäni nänï änö bai godö cæcæboimpa, ante nämäneque pönengantapa. ²⁵ Mänïñedë Badabato në, Awënë ingante wido cæcäimpa, ante cædinque në wænöningä inte ayæ tee mönete ongönongäimpa. Pidato ñöwo, Ìngä guiquënë oodeoidi nänï në äningä ingampa, ante godö ñimpo cæcantapa. Itota ingante wæætë, Oodeoidi nänï änö bai cæcäimpa, ante cædinque Itota ingante wæætë tontadoidi nempo pædæ godongä ænte godänitapa.

Itota ingante awäa timpodäni wængampa
(*Mäateo 27.32-44; Mäadoco 15.21-32; Wäö 19.17-27*)

²⁶ Itota ingante ænte goyönäni Tidënebæ në quëwengä Timönö wayömö gote pöninque eyepæ pönï mämö bee tengantapa. Tömengä ingante adinque bæi ongöninque tömënäni, Ñænquedimæ möni cædiwæ Itota miñæ ænte goe, äninque ñö cædancapænäni næænte gocantapa.

²⁷ Goyongante Itota miñæ nanguï ìnänï godänitapa. Onquiyænäni incæ Yæ yæ ante wo ca wo ca wædinque tee empote godänitapa. ²⁸ Ìninqe Itota dadi ëmænte adinque tömënäni ìnänite,

—Onquiyæmïni, Eedotadëe quëwëminii inte mïnitö botö beyæ ante wädämaï ìedäni. Wæætë tömëminii nämä beyænque ante

wæedāni. Ayæ mīnitō wēñænāni beyæ ante pōnente wæedāni, āmopa. ²⁹ Īncayæ ate mīnitō caate wædinque īmaī ante wæquīmīni īmīnīpa. “Wēñæ nē mǎnāmaī ingā īñōmō edæ tōmengā nānō waa toquinque. Goömæ nē gānōnāmaī ingā īñōmō edæ tōmengā nānō toquinque impa,” ante wæquīmīni īmīnīpa. ³⁰ Mǎniñedē edæ, “Wadāni īmaī ante wæcædānīpa. Onquiyabo onguipo æmæwo cabæñō goyæ guimōnie. Ānanquidi wææ mōnitonga capo ñongæñō wē womonte bamōnie, ante wæcædānīpa,” ante dodāni nāni yewæmongainō baī edæ bacæimpa. ³¹ Edæ awæ mīiwæ īñonte gonga wædænque wo cædāni baī ñōwo īñōmō wadāni wīi nanguī wēnæ wēnæ cædānīpa. Wæætē awæ amīmō bayonte tī wodōnoyōnāni dobæ wo bæco baī wadāni īncayæ ate quingāmē baī cæquināni īnānīpa, ante Itota mǎnīnō godinque apænegacāimpa.

³² Ayæ, Māo wængongæimpa, ante nē ænte godāni īñōmō mēnaa nē wēnæ wēnæ cædīna īnate tōmengā tōnō godongāmæ ænte gogadānīpa. ³³ Ocataīnō, nāni āñōmō ænte pōninque awæ ñænquedīmæ nāni badōñiwāa Itota ingante tōō godonte timpodinque wææ tīwadinque ængæ gantidēnānitapa. Ængæ gantidēnāni ate wægōñongā tōmēnāni nē wēnæ wēnæ cædīna īnate adobāi Itota tōmēmæ īnō adocanque tōmengā dipæmæ īnō adocanque timpote gōnōnāni gongænatapa. ³⁴ Mǎnōmaī cædāni adinque Itota,

—Mæmpo ēñēmi. Tōmēnāni ēñēnāmaī īnāni inte īmaī cædānīpa cæbīi. Wēnæ wēnæ nāni cæīnō ante bitō wæætē edæ ñimpo cæbi quēwencædānīpa āmopa, angacāimpa.

Mǎniñedē tōmengā weocoo īni ante, Æcānō quīnca nō ta adinque tōmengā badīncoo æncæcāimpa, ante tōmēnāni wæntodōninque adocooque adocooque ænānitapa. ³⁵ Wadāni, Æbānō cæquingāā, ante acæte ante godongāmæ a ongōnānitapa. Awēñēdi incæ tōmengā ingante ante badete todinque,

—Tōmengā, Quēwencædānīpa, ante wadāni īnānite ængā quēwēnānitawo.

Ayæ Wængonguī īñōmō, Codito ingampa, āninque tōmengā ingante ængantawo. Īninque tōmengā Wængonguī nānō nē ængaingā īnongā inte edæ nāmā aamō cæte quēwencæcāimpa, ante badete togadānīpa.

³⁶ Tontadoidi guiquēnē obo pōninque tōmengā ingante badete tote baī cædinque edæ, Yowepæ tī nāmæ becæcāimpa, ante pædæ æænōninque, ³⁷ tōmengā ingante,

—Oodeoidi Awēnē Odeyebi īmi īninque bitō nāmā aamō cædinque quēwēmāwe, ante towengadānīpa.

³⁸ Ayæ, “Īngā oodeoidi Awēnē Odeye īnongā ingampa,” ante yewæmōninque tōmēnāni tōmengā dæca īnō wo cædāni owotapa.

³⁹ Nē wēnæ wēnæ cædīna guiquēnē tōmengā tōnō ongōñōna adocanque tōmengā ingante godō wēnæ wēnæ ante badete tocantapa.

—Bitō īñæmpa, Codito īnōmo īmopa, āmitawo. Mǎnīmi īnōmi īninque bitō tōmēmi aamō cæte gote quēwēninque mōnatō īmōnate adobāi ñimpo cæbi aamō cæte gomōnae.

⁴⁰ Āñongante wacā wææ āninque,

—Īñæmpa tōmēmi adobāi bitō wænguinque ongōmi inte Wængonguī ingante guīñēnāmaī inte āmi awædō. ⁴¹ Mōnatō wēnæ wēnæ cæmōna īñōmōnate nē apænte ānāni edæ nōingā cæte pānāni wæmōnāpa. Mōnatō wēnæ wēnæ cædīnō beyæ eyepæ tente wæmōnāpa. Tōmengā guiquēnē wēnæ wēnæ cædāmaī īnongā inte wængā apa ānewēē.

⁴² Āninque adocā wæætē Itota ingante apænedinque,

Awēnē ēñēmi. Bitō Awēnē Odeye badinque botō īmote pōnente cæbi āmopa.

⁴³ Āñongante Itota,

—Nāwangā āmopa. Bitō ñōwoōnæ incæ wænte godinque do wænte gogaināni nāni watapæ quēwēñōmō botō tōnō guēa ongoncæbiimpa, angacāimpa.

Itota wængampa

(Māateo 27.45-56; Māadoco 15.33-41; Wāo 19.28-30)

⁴⁴ Mǎniñedē edæ tæcæbæcā īñedē mæ māmōnte baī tæcæ badinque ayaōnāa

wæiganca tōmāmæ iñōmō edæ wēmō ingatimpa. ⁴⁵ Edæ nænque nāwānāmaī ī inique wēmō ingatimpa. Ayæ Wængonguī tæiyæ waëmoncōnē odemō nāni wææ wodoincoo adoyedē edæ ōnōnæca inō tæcæguedē pōnī tænguīmæ wææntapa.

⁴⁶ Māniñedē Itota ogæ tedinque,

—Mæmpo eñēmi. Nōwo edæ botō ōnōwoca bitō ōnōnempo pædæ pōnōmo æe.

Äninqe edæ æmæwo guëmāninqe wængacāimpa.

⁴⁷ Mānōmaī cæte wængä adinque odōmāno tontado capitāo incæ,

—Nāwangä impa. İngä iñōmō edæ nō pōnī cæcä inongä inte edæ wængä abopa, äninqe, Wængonguī ñāo apāite bai emōnongä inte mānōmaī cæcä abopa, ante apænegacāimpa.

⁴⁸ Ayæ, Æbānō cæquīi, ante godongāmæ ponte a ongōnāni iñōmō tōmānāni, Itota mānōmaī wængä awædō, ante wædinque edæ nāmā ōnontawē tæi tæi tompotawēninqe wadæ gogadānimpā.

⁴⁹ Wæætē Itota ingante nē do adināninqe iñōmō gobæ ongonte pōmō agōnānitapa. Wēēñedē tōmengä Gadideabæ quēwente pōñongante onquiyænāni tōmengä miñæ nē pōñināni inte tōmēnāni ñōwo adobaī gobæ ongonte pōmō agōnānitapa.

Itota wodi baō inī māo daga wēnānīpa

(Māateo 27.57-61; Māadoco 15.42-47; Wäo 19.38-42)

⁵⁰ Oodeoidi nāni Apænte Äincabo iñōnānite adocanque tōmengä emōwo Ootee inongäimpa. Tōmengä cōwē waa cædinque nē nō cædongä inongäimpa. ⁵¹ Do iñōmō, Itota ingante wænongæimpa, ante oodeoidi nāni Apænte Äincabo godongāmæ pōnente cæyōnānite adocā Ootee iñōmō edæ Baa ante tōmēnāni tōnō godongāmæ cædāmaī inongäimpa. Tōmengä, Wængonguī Awēnē Odeye nempo mōnō æyedēnō quēwengæimpa, ante wānō conte bai quēwēnongä inongäimpa. Tōmengä Oodeabæ Adimatea iñōmō nē quēwēnongä inte ñōwo pōningä ingantapa. ⁵² Māningä Ootee iñōmō awēnē Pidato weca do gote apænedinque, Itota wodi baō inī pōnōmi ænte daga wēmoe. ⁵³ Angä eñēninqe awēnē

Ao angä eñente gocantapa. Godinque tōmengä Itota wodi baō inī wi æmpote wææ wi æwadinque pædæ wæænonte ænte godinque waēmō weocoo ñino nāni änoncoo wīni wīni caate dicamontaa wointatodē ōnontatoque iñōmō daga wengantapa. Do nāni wēnāmaī intatocæ iñonte daga wengantapa. ⁵⁴ Oodeoidi nāni, Gäwadecæ ba ate guëmanguiönæ inguimpa, ante tāno nāni cæönæ ī inique Ootee mānōmaī tāno cægacāimpa.

⁵⁵ Do iñōmō Gadideabæ quēwente Itota tōnō godongāmæ nē pōñināni inte onquiyænāni ñōwo Ootee miñæ tee empote pōninque Itota wodido adinque, Tōmengä baō æbānō ñō cædāni, ante do adānitapa.

⁵⁶ Adinque tōmēnāni oncōnē godinque oguī wapæ oguī wayabo tōnō ænte ponte ōni pæcæte ante cædānitapa. Incæte, Guëmanguiönæ impa, ante wædinque waönæ ate nāni goquinque tōmēnāni Wængonguī nānō wææ angainō bai cædinque tāno guëmangadānimpā.

24

Itota do wæningä inte ñāni ōmæmonte quēwengampa

(Māateo 28.1-10; Māadoco 16.1-8; Wäo 20.1-10)

¹ Ayæ guëmanguiönæ inique go ate baänæ ate ooque pōnente bayonte māñināni onquiyænāni oguī waquī nāni cædincoo ñōwo ænte nææninqe Itota wodido pōnānitapa.

² Ponte ayōnāni dicabo ñænængade pōnī do da tæñæi a ōñō adānitapa. ³ Ayæ ontatodē guiite ayōnāni edæ mōnō Awēnē Itota wodi baō edæ dæ antapa. ⁴ Ōnontatoque ī awædō, ante adinque guiñente wæyōnāni edēñina bai ina iñōmō weocoo nāāmænta pōnī nāinte bai emoncoo mongæna inte edæ iñontobæ tōmēna weca a ongōna.

⁵ Ate wædinque onquiyænāni iñōmō ancaī guiñente wædinque ædæ wæænte onguipoga bigui tēmōnānitapa. Edēñina bai ina iñōmō onquiyænāni inānite,

—İñæmpa mīnitō do wænīnāni weca ponte nē quēwengä ingante ante quīnante diqui diqui mīmīni. ⁶ Tōmengä iñōmō edæ dobæ ñāni ōmæmonte godingä inte edæ iintatodē iñōmō dæ angä aedāni.

Tömengä wëenëñedë Gadideabæ mīnitō weca nānō ayæ quëwëñedë mīnitō imīnite iīmaī ante apæñecä ëñëmīni inte ñōwo adodō ante pōñeedāni. ⁷ Tömengä iñōmō, Botō Waobo ëñagaimō iñōmote nē wënæ wënæ cædāni nempo odōmonte māo pædæ godōnāni æninque tōmēnāni wæætë wænōnāni wænguënēmo imopa, ante apæñecä ëñëmīnitapa. Ayæ mēōnaa go adoönæque iñonte botō ñāni òmæmonte quëwenguënēmo imopa, ante apæñecä ëñëmīni inte pōnenguënë quëwëedāni.

⁸ Ante edēnina bai ina āna ëñente wædinque onquiyænāni iñōmō, Itota æbānō angacāi, ante tæcæ pōñente wædānitapa.

⁹ Iñique ontatodë tao wadæ godinque onquiyænāni iñōmō Itota tōmengä miñæ nē godināni ònempo tipæmpoga go adocanque ināni inānite māo apænedinque wadāni tōmānāni inānite apænedāni ëñēnānitapa.

¹⁰ Mānōmaīnō ante Itota nānō nē da godongaināni inānite nē gote apænedāni iñōmō Māadiya Māagadadēnā nāni ānongä tōnō Wāönā, Tantiago wāänā Māadiya ayæ wadāni onquiyænānique tōnō godinque tōmēnāni inānite apænedāni ëñēnōnānimpa.

¹¹ Incæte, Mānōmaī impa, ante māo apænedāni ëñēninque, Onquiyænāni iñōmō ònonquedō ante tededāni awædō, ante Itota nānō nē da godōnināni iñōmō edæ pōñēnāmaī ingadānimpa. ¹² Pegodo guiquënë quingæ ængæ gantidinque pogodo godinque Itota wodido pongantapa. Ponte ædæ wææninque guimō ayongä wīni wīni cædincooque òñō adinque tōmengä nāmāneque pōñēninque, Æbāmë cætimpā, ante wædinque wadæ gogacāimpa.

Ëmaodō taadō godānīpa
(Māadoco 16.12-13)

¹³ Eedotadëë ongōninque wædænque ināni nāni quëwëñōmō Ëmao goinō iñōmō onte quidōmetodo ganca māninganca taadō impa. Māniōnæ adoönæque iñonte Ëmao iñōmō gocæte ante waoda mēnaa idōmæ godatapa. ¹⁴ Æbānō cætimpā, ante tōmānō ante tedegodatapa. ¹⁵ Tedegoyōna Itota incæ māmō bee tēninque godongāmæ gocā. ¹⁶ Incæte, Tömengä æcānō ingāā, ante wë wodonte bai i beyæ tōmēna adāmaī ëmōna inte ëñēnāmaī inatapa. ¹⁷ Itota iñōmō,

—Æbānō ante wæætēdō wæætë tede gomīnatawoo.

Angä ëñente wædinque tōmēna wæwente bai ëmōna inte edæ næ gongænatapa.

¹⁸ Adocanque tōmengä ëmōwo Codeopato iñōmō tōmengä ingante apænedinque,

—Eedotadëë quëwēnāni tōmānāni, Æbānō ñōwo māniñōmō cætimpā, ante ëñēñōnāni bitō adobique adoyōmō quëwēninque edæ ëñēnāmaī imitawoo.

¹⁹ Æñongante Itota,

—Ædō ämīna.

Æñongä tōmēna wæætë,

—Itota Nāatadeta quëwēningä ingante ante tedemōnāpa. Wængonguī beyæ nē apæñecä inongä inte māningä onguīñængä iñōmō Wængonguī ayongä ayæ waodāni ayōnāni adobai tæi piñæñongä inte waa pōni apænedinque nangui cæcä inongäimpa. ²⁰ Mānōmaī iñongante nē godōnāni ñænænāni tōnō mōnō òmæ awēñēidi guiquënë wadāni nempo pædæ godōninque, Itota ingante apænte āninque māo wænōmīni wængæedāni, ānāni ëñēninque iināni wæætë tōmengä ingante ñænquedimæ cæte timpote wææ tīwadinque edæ gōnōnāni wængantapa. ²¹ Mōnatō guiquënë, Tömengä mōnō idægocabo Awēñē badinque pōnō ængä beyænque mōnō abæ tawænte quëwenguimō imōmpa, ante pōñēnimōna inte edæ ñōwo wæmōnāpa.

Ayæ, Tōmēnāni mānōmaī nāni cædiōnæ edæ ñōwo mēōnaa go adoönæque impa, ante edæ mōnatō godōmenque wæmōna ae. ²² Mānōmaī i incæte mōni cabo incæ onquiyænāni pancadāniya tōmengä wodido gote pōninque, iīmaī atamōnīpa, ante apænedāni ëñente wædinque mōnatō wæætë ancai guīñente wæmōnāpa.

²³ Tōmēnāni iñōmō tōmengä baō ini adāmaī ināni inte edæ wadæ pōninque iīmaī ante apænedāni wætāmōnāpa. Mōnitō wīimonte bai Wængonguī anquedoda inate mā pōni atamōnīpa, ānānitapa. Ayōmōnite anquedoda iñōmō, Itota ñāni òmæmonte edæ mīngä quëwengampa, ante apænedāni ëñēninque edæ wadæ pōmōnīpa, ante onquiyænāni apænedāni ëñentāmōnāpa. ²⁴ Mānōmaīnō ante apænedāni ëñēninque mōni cabo incæ pancadāniya Itota wodido

gote adinque, Onquiyænāni nāni āninō bai edæ nāwangā impa, ante adāni incæte Itota ingante adāmaī ināni wæmōnāpa.

²⁵ Ante apæneda eñēninque Itota wæætē tōmēna inate,

—Mīnatō pōnēgade i apa ānewēmīnaa. Mīmō ōmædēmīna imīna inte mīnatō Wængonguī beyæ nē apænegaināni nāni apænedō ante tōmānō ante edæ eñēnāmaī imīna awædō. ²⁶ Codito iñōmō edæ cōwē caate wæquēnengā ingacāimpa. Ayæ wænte ñāni ōmæmōninque tōmengā nāmā nānō ñāo iñōmō æiquēnengā ingacāimpa, ante pōnēmīnaa.

²⁷ Ayæ, Codito æbānō cæquingāā, ante Mōitee wodi æbānō apænete yewæmongacāi, ante tāno apænedinque Itota mīmōnoque pōnēninque, Wængonguī beyæ nē apænedāni tōmānāni æbānō apænegadānii, ante, Codito æbānō cæquēnengā ingacāi, ante edonque odōmonte apænecā eñēnatāpa.

²⁸ Mānīi tōmēna nāna quēwēñōmō tōmēna nāna gocæ cæyōmō pōñōnāni Itota wodo tebæ gocæ cæte bai cæcā. ²⁹ Adinque tōmēna nanguī āninque tōmengā ingante edæ,

—Ñōwo gāwadecæ pōnī inte wēmō ba apa. Mōnatō oncōnē go guīite cænte monte baānæ ate goe.

Ante ancaa āñōna tōmēna oncōnē pō eñacæ guīcantāpa. ³⁰ Ayæ tōmēna tōnō cæncæte ante tæ contadinque tōmengā pāo pā æninque Wængonguī ingante waa ate pōnente apænedinque tōmēna inate tæcæ pædæ godoncæ cæyongā. ³¹ Tōmēna awīnca wi ænete bai bayō, Tōmengā ingāmpa, ante edæ tæcæ adatāpa. Tōmengā iñōmō edæ adoyedē tōmēna ayōna edæ dæ gocā.

³² Adinque tōmēna guēa tededinque,

—Nāwangā intawo. Wængonguī mōnō Codito ingantedō ante apænecā eñēninque æbānō yewæmongadānimpa, ante tōmengā ponte odōmongā eñēninque mōnō mīmō edæ gonga bæco bai totamōmpa. Wīi edæ mānōmaī intawo.

³³ Ante tededinque tōmēna adodō taadō quingæ godinque Eedotadēē ponte ayōnate edæ Itota miñæ nē godināni iñōmō onte ganca mānimpodāni iñōnāni tōmēnāni

tōnō wadāni godongāmæ pō bee tente a ongōnāni adatāpa. ³⁴ Iñāni guīquēnē,

—Mōnō Awēnē iñōmō ñāni ōmæmonte mīingā quēwengāmpa. Nāwangā edæ impa. Tōmengā ingante Timōnō Pegodo do acantāpa, ante godongāmæ tededāni adatāpa.

³⁵ Mānōmainō ante tededāni eñēninque tōmēna wæætē, Mōnatō taadō goyōmōnate wacā pō bee tēninque iīmaī cæcantāpa, āninque, Æbānō cæcantāpa, ante adodō adodō ante apænedatāpa. Ayæ godōmenque apænedinque, Oncōnē go guīyōmōni tōmengā pāo pā ængā adinque mōnatō, Itota ingāmpa, ante do eñentamōnāpa, ante tōmānō ante apæneda eñengadānimpa.

Tōmengā miñæ nē godināni weca Itota pongāmpa

(Māateo 28.16-20; Māadoco 16.14-18; Wāo 20.19-23)

³⁶ Mānīnō ante ayæ tæcæ tedeyōnāni Itota incæ edæ tōmēnāni weca tæcæguedēnāni do pō guīite a ongōninque,

—Guīñēnāmaī gānē pōnēedāni.

³⁷ Angā eñēninque tōmēnāni, Ōnōwoca badī iīmaī, ante ancai guīñente wædinque, Yæ ānāni. ³⁸ Adinque Itota,

—Quīnante guīñewēmīnii. Mīmōno quīnante æmæ æmæ pōnente wæmīnii. ³⁹ Bado botō ōnōmpo empobo edæ aedāni. Botō ōnōwa ēwabo aedāni. Botō baō edæ gampo caate aedāni. Iñāmpa ōnōwoca badī imo bai ædō cæte baō tōnō bamē ēaquēnēmōō. Baō tōnō bamē ēadōmo inte botō imo apa guīñewēmīnii.

⁴⁰ Āninque Itota ōnōmpo tōnō ōnōwa tōmēnāni inānite odōmongā. ⁴¹ Adāni incæte tōmēnāni guīñente todinque wede pōnēnāmaī iñōnānite tōmengā,

—Mīnitō weca cænguī æbānō māmīnii.

⁴² Āñongante gæyæ baō do awēnīi ēadāni inte pædæ godōnāni ⁴³ æninque tōmēnāni ayōnāni edæ ade cængantāpa. ⁴⁴ Ayæ tōmēnāni inānite apænedinque Itota,

—Botō imotedō ante Mōitee wodi wææ āninque æbānō yewæmongacāi, ante botō mīnitō weca ayæ quēwēninque do apænetabopa. Botō imotedō ante Wængonguī beyæ nē apænegaināni æbānō yewæmongadānii, ayæ āmotamīni āninque æbānō yewæmongadānii, ante

apænetabopa. Mänine botö apænedö ante tömänö edæ iinque baquinö angüenë.

⁴⁵ Ante apænedinque Itota, Ocai encate eñencædänimpa, ante pönö cædinque tömënäni inänite Wængongui angä eñëninque näni yewæmongainö ante odömonte apænecä eñëninque tömënäni edonque edæ eñënänitapa. ⁴⁶ Ayæ godömenque apænedinque,

—Mönö Codito cöwë nantate wæninque meönaa go adoönæque iñonte ñäni ömæmanguenengä incæcäimpa, ante edæ edonque yewæmongatimpa. ⁴⁷ Ayæ, Codito emöwo ante Eedotadëe iñömö täno apænete ate tömämæ quëwënäni inänite iimaï ante apænecäimpa. Tömënäni inänite apænedinque, Wënæ wënæ mini cædinö ante ñimpo cædinque Wængongui gämænö pödäni. Pömïni adinque tömengä wæætë pänämaï inte pönö ñimpo cæcæcäimpa, ante apænequinäni incædänimpa, ante yewæmongatimpa. ⁴⁸ Minitö iñömö, Æbänö cætimpa, ante në adimïni inte edæ në apænequimini iminipa. ⁴⁹ Ayæ edæ Wængongui, Botö Tæiyæ Waëmö Önöwoca ingante da pönömo æncæminimpa, angacäimpa. Ininque botö Mæmpo nänö në angaingä ingante botö oo da pönömo æncæminimpa. Mänömaï i ininque Wængongui nänö tæi piñænö æncæte ante minitö, Wængongui Önöwoca ingante ewocacäimpa, ante Eedotadëe iñömö wänö cödäni, angacäimpa.

Ööncedë Itota æicampa

(Mäateo 16.19-20)

⁵⁰ Itota ayæ tao godinque Betânia obo pöninque tipæmpoga pædæ æmpodinque, Minitö iminite Wængongui waa cæcæcäimpa, ante waa apænecä eñengadänimpa. ⁵¹ Tæcæ apænecä eñëñönäni edæ tömengä iñontobæ inque ingä edæ öönæde æigacäimpa. ⁵² Adinque tömengä miñæ në godinäni iñömö ædæ wæænte apænedinque, Näwangä Wængongui Wengä inongä inte æicampa, ante watapæ apænedinque Eedotadëe wadæ godinque nanguï togadänimpa. ⁵³ Wængongui oncö ñænæncönë yabæcönë iimö iñö iimö iñö pö pö cædinque Wængongui ingante, Bitö ñäö bai emömi

inte waa pönï cæbipa, ante cöwë waa apænegadänimpa.

Itota Codito ingantedö ante Wäo nänö watapæ ante yewæmongainta

*Wængongui nänö Angainö ante nê
ëmongaingä Waocä bagacäimpa*

¹ Wëenëñedë pönï Wængongui nänö mä badöñedë Wængongui nänö Angainö ante nê ëmongaingä iñömö do ingacäimpa. Tömengä Wængongui weca quëwengacäimpa.

Ayæ adocä adobai nê Wængongui inongä ingacäimpa. ² Wëenëñedë pönï tömancoo badönämaï iñedë mäningä do Wængongui weca quëwengacäimpa.

³ Wængongui angä ëñëningue adocä tömancoo badongacäimpa. Tömengä wii badongä bai Wængongui nänö badongaincoo tömancoo edæ dæ ancædönimpa.

⁴ Mäningä iñömö mönö quëwenguinö entawengacäimpa. Ayæ mönö quëwenguinö edæ entawëningue tömengä waodäni beyæ nê ñäo bai inongä ingacäimpa. ⁵ Tömengä nê ñäo bai ingaingä inte mönö wëmö iñömö ta tamongä ate adoyömö ñäo bai bayonte edæ mönö wëmö iñömö edæ mänii ñäo ædö cæte mönæ ëmongui.

⁶ Onguiñængä adocanque ingante Wængongui da pönongä pöningä ingampa. Tömengä ëmowo, Wäo, ante pëmonte ingacäimpa. ⁷ Tömengä iñömö Wængongui nänö ñäo ëmömämo ante edonque pönï bacäimpa, ante nê ñäo bai ingaingä ingantedö ante apæñecæte ante pongacäimpa.

Adocä apæñecä beyænque waodäni tömänäni tömengä nänö nê apæñedongä ingante pönencædänimpa, ante pongacäimpa. ⁸ Incæte mäningä wii ñäo bai ingaingä ingampa. Wæætë tömengä, Wacä waodäni beyæ nê ñäo bai ingaingä ingampa, ante apæñecæte ante pongacäimpa.

⁹ Nê nö ñäo bai nê ingaingä iñömö waodäni tömänäni inänite tömengä nänö ñäo ëmömämo pönoncæte ante inguipoga wææ pongacäimpa.

¹⁰ Tömengä inguipoga iñömö quëwengacäimpa Ayæ tömengä inguipoga nê badongaingä

iñongante inguipogaque quëwënäni wæætë Baa äninque tömengä ingante ædö cæte ate bai pönenguinänii. ¹¹ Tömengä edæ tömengä quï weca pongacäimpa. Pongä ate tömengä guidëñäni incæ tömengä ingante ænämaï ingadänimpa. ¹² Incæte tömengä ingante nê ængainäni iñömö tömengä ëmowo, Codito, ante nê wede pönëñäni iñönänite tömengä tömëñäni inänite Ao äninque edæ, Wængongui wënäni bacædänimpa, ante pönö cægacäimpa. ¹³ Ayæ Wængongui wënäni iñömö wii waocä ëñate bai inänipa. Waocä, Botö wë manguingue, ante änämaï iñongante ëñadänipa. Wii nänöogængä angä beyænque inänipa. Wæætë Wængongui tömenganque cæcä ate tömëñäni tömengä wënäni badänipa.

¹⁴ Tömengä iñömö edæ, Wængongui nänö Angainö, ante nê ëmongaingä ininque Waocä ëñate bagacäimpa. Waocä ëñate badinque tömengä mönö weca quëwengacäimpa. Mæmpo Wængongui Wengä adocanque inte adocä godömenque ñænængä inte nê cædongä ingä atamönipa. Adocä Mæmpo weca quëwente nê pongä iñömö tömengä nanguï waadete pönö cædongä inte nöingä änongä ingampa. ¹⁵ Wäo iñömö, Mäningä æbänö ingäa, ante apæñecäimpa. “Mäningä botö nê apæñedongä ingantedö ante iïmaï apæñetabopa. Botö täno pömo imopa. Tömengä nê ayæ Ponguingä iñömö godömenque ñænængä inte cædongä ingampa. Edæ botö ëñadämaï iñedë tömengä do ingacäimpa,” ante nanguï pönï yedæ äninque Wäo apæñegacäimpa.

¹⁶ Mäningä nê ayæ Ponguingä iñömö nanguï pönï waadete pönö cædinque tömengä wæætë wæætë nänö entawënö ante pönongä æninque tomompa. ¹⁷ Edæ Wængongui tömengä nänö wææ angainö ante apæñecä ëñëningue Möitee wodi wæætë adodö ante yewæmöninque waodäni inänite godongacäimpa. Wængongui nänö waadete pönö cægainö ante nöingä nänö angainö ante guiquënë Itota Codito beyænque ëñëmompa. Itota Codito iñömö mönö nê Ponguingä ingaingä ingampa. ¹⁸ Mönö waocabo tömämö incæ Wængongui ingante cöwë adämaï imompa. Incæte tömengä adocanque Wengä Wængongui

weca nē quēwēnongā inte, Mæmpo æbänö ingaingā ingää, ante tömengä odömongä ate pönēmompā.

Wäo æpænē guidönongä, Botö wii Codito ïmopa, angä

(Mäateo 3.11-12; Mäadoco 1.7-8; Odoca 3.15-17)

¹⁹ Oodeoidi awēnēidi Eedotadēē quēwēnāni iñömö Wængonguī quī, ante nē godönāni tönö Debii wodi pæināni inānite da godönāni Wäo weca godānipā. Gote pöninque adodāni, Æbidö inömi ïmii, ante apænebi eñēmönie, añönāni Wäo iīmaī āninque ²⁰ nāmā wææ änāmaī inte wæætē, Botö wii Codito inömo ïmopa, ante edonque pönī angantapa.

—Botö wii Codito inömo ïmopa.

²¹ Añongante tömēnāni wæætē tömengä ingante,

—Æbidö inömi ïmii, Ediya wodi inömi ïmii. Apænebi eñēmönie.

Ante änāni eñēninque tömengä,

—Wabo ïmopa.

Ante añongä tömēnāni wæætē,

—Wængonguī beyæ nē apænebi ayæ Ponguīmi inömi ïmitawo.

Änāni eñēninque tömengä,

—Wabo ïmopa.

Ante angantapa.

²² Tömēnāni iinque āninque,

—Æbidö inömi ïmii, ante apænebi eñēmönie töö. Mönitö ïmönite nē da pönönināni weca godinque mönitö tömēnāni inānite, Æbidö ïmii, ante ancæmönimpa. Iinque bitö nāmā incæ æbänö ämii.

²³ Añönāni Wäo wæætē tömēnāni inānite, Itaiya wodi nē Wængonguī beyæ nē apænecā nänö angainö bai ante iīmaī ante apænebo eñencæminimpa.

—Önömæca incæ nē aa pebo inömo inte botö tömēmo pepāmo iīmaī nāni eñēnö impa. “Awēnē nänö ponguīnö ante töinö pinonte bai tee möedāni,” ante aa pebopa, angantapa.

²⁴ Paditeoidi nē wadö tedete wadö cædāni nāni cabo inönāni inte tömēnāni pancadāniya inānite da godönāni Wäo weca nē godānipā. ²⁵ Gote pöninque mänināni guiquēnē,

—Bitö wii Codito inömi inte wii Ediya wodi inömi inte ayæ wii Wængonguī beyæ nē apænebi ayæ Ponguīmi inömi ïmipa. Bitö ædö cæte wadāni inānite æpænē guidömi ïmii.

²⁶ Ante añönāni Wäo wæætē,

—Botö önonque æpænē guidönömo ïmopa. Wæætē minitö weca adocanque a ongongä iñongante, Tömengä æcänö ingää, ante minitö eñēnāmaī iminipa. ²⁷ Botö täno pömo ïmopa. Tömengä nē ayæ Ponguingä ingampa. Botö önonque wædænque cæbo inte ædö cæte tömengä awæncata incæ ñi cæte cæbo imoo.

²⁸ Betānia nāni quēwēñömö Oododänö æmæmāa Wäo æpænē nänö guidöñömö mänömaī bagatimpa.

Itota Wængonguī Codotedo

²⁹ Baänæ ate Itota bee tente pongä adinque Wäo apænecantapa. “Aedāni, iingä Wængonguī da pönongä pöningä ingampa. Ayæ tömengä wadāni inguipoga quēwēnāni nāni wēnæ wēnæ cægainö ante æninque teēmē mongænte wænguingä ingampa, ante Wængonguī tömengä ingante, Codotedo, ante pönö pemongacäimpa. ³⁰ Mäningä iñömö botö nē apænedongä iñongante botö iīmaī apænetabopa. ‘Botö täno pömo ïmopa. Onguīñængä nē ayæ Ponguingä iñömö godömenque ñænængä inte cædongä ingampa. Edæ botö eñädāmaī iñedē tömengä do ingacäimpa.’

³¹ Botö incæ adobai, Tömengä æcänö ingää, ante eñēnāmaī intabopa. Mönö idægocabo iñömonte, Minitö tömengä ingante eñencæminimpa, ante botö æpænē guidöninque pömo intabopa.”

³² Ayæ Wäo, Tömengä ingampa, ante āninque, “Botö æmö ayömote Wængonguī Önöwoca incæ öönæde owote equemö bai wææ tömengäa næ gongængä atabopa.

³³ Wængonguī, Wadāni inānite æpænē guidöe, ante botö imote nē da pönöningä wii botö imo angä bai botö, Itota æcänö ingää, ante eñēnāmaimo incædömoimpa. Incæte tömengä botö imote iīmaī angantapa. ‘Wængonguī Önöwoca incæ æcänö onguīñængäa wææ næ gongængä ayömi mäningä iñömö nē æpænē guidönāni

baï Wængonguï Tæiyæ Waëmö Önöwoca ingante da pönongä waodäni mīmōnoque pō guiquingä, ante cæcä ingampa.’
³⁴ Mäninö botö adinö impa. Mänömaï beyæ iïmai ämopa, Mäningä iñömö Wængonguï Wengä inongä ingampa,” ante Wäo apænegacäimpa.

Itota miñæ nē tāno godäni

³⁵ Baänæ ate Wäo tönö tömengä emiñæna mänaa adoyömö ongöñönäni ³⁶ Itota wodo tebæ cæsongä adinque Wäo angantapa.

—Aeda, tömengä iñömö Wængonguï Codotedo inongä ingampa.

³⁷ Mäninö angä eñëninque Wäo nänö nē emiñæna inina incæ Itota ingante tee empo godaimpa. ³⁸ Itota dadi emænte ayongä tee empo pōna adinque angantapa.

—Quinante pöminaa.

Ante añongä tömëna wæætë,

—Mætodo, æyömönö owobi. Apænebi eñëmönae.

Änatapa. Mänine, Mætodo, ante mönö tededö, Nē Odömongä, ante impa.

³⁹ Äna eñëninque tömengä,

—Ægodöeda go aeda.

Äñongä tömengä miñæ godatapa. Goyöna ædæ wææicä intapa. Ayæ nänö owocönë gote adinque tömëna adoönæ tömengä weca a ongönapa.

⁴⁰ Wäo nänö äninö eñëninque Itota ingante tee empo goda mänaa iñönte adocanque Æntade iñömö Timönö Pegodo töninacä ingantapa. ⁴¹ Tömengä nänö töninacä Timönö ingante ancæte ante diqui diqui minte gote adinque angantapa.

—Mætiya mönö ämongä ingante atamönapa, angantapa. Tömengä iñömö Wængonguï nänö nē Pönongaingä Codito inongä ingampa.

⁴² Ayæ Timönö ingante Itota weca ænte mämongä pongä adinque Itota angampa.

—Bitö Wäo wë Timönömi imi abopa. Botö wæætë, Bitö tæimö dicabo baï imipa, ante bitö imite mönö tededö, Quepata, pönö pemömopa. Önonque adowo emöwo incæ guidiego tededö, Pegodo, änänipa.

Pedipe tönö Näatänaedo inate Itota angä tee empo goda

⁴³ Baänæ ate Itota, Gadideabæ ante gocæboimpa, ante pönengäimpa. Pedipe ingante adinque Itota tömengä ingante,
 —Botö miñæ pöe, ämo, angacäimpa.

⁴⁴ Pedipe iñömö Æntade tönö Pegodo baï Betaida nana quëwëñömö adoyömö quëwëningä inongaimpa. ⁴⁵ Pedipe

Näatänaedo weca gocä adinque tömengä ingante iïmai äninque,

—Wængonguï nänö wææ angainö ante yewæmöninque Möitee wodi nänö nē yewæmongaingä ingante mönitö atamönipa. Wængonguï beyæ nē apænegainäni adobaï mäningä ingantedö

ante yewæmongadänimpa. Tömengä iñömö Itota Näatadeta quëwëningä inte Ootee wengä ingampa, ante angantapa.

⁴⁶ Ante añongä Näatänaedo wæætë,

—Näatadeta quëwëñömö adocanque waa quëwente pongä, ante mönitö dicæ eñëmöniyaa.

Angä eñëninque Pedipe iñömö,

—Pö ae, angantapa.

⁴⁷ Itota ayongä Näatänaedo pongä adinque tömengä,

—Iingä iñömö näwä idægocä inongä inte tömengä nē nö entawëningä inte babæ cædämaï inongä ingampa, ämopa.

⁴⁸ Angä eñëninque Näatänaedo,

—Æbänö imoo, ante bitö æbänö cæte do eñëmii,

Ante añongä Itota wæætë tömengä ingante,

—Pedipe iñömö bitö imite ayæ aa pedämaï iñedë bitö iigowæncawa tæ contabi iñömite botö bitö imite do atabopa, angacäimpa.

⁴⁹ Ayæ Näatänaedo,

—Awënë nē Odömömi imi, bitö Wængonguï Wëmi inömi imipa. Idægoidi mönö cabo iñömönte bitö mönitö Awënë Odeyebi inömi imipa, ämopa.

⁵⁰ Äñongä Itota wæætë,

—Bitö iigowæncawa tæ contabi iñömite botö bitö imite atabopa, ämo beyænque pönëmi imipa. Mäninö ante adinque bitö godömenque botö bamönengæ cæbo acæbiimpa, ämopa.

⁵¹ Tömengä godömenque angantapa.

—Bitö imite näwangä ämopa. Öönædë wi ænete bayö Wængonguï anquedoidi Waocä

ẽñagaingä weca wææninqe æiyönäni bitö acæbiimpa.

2

Cānaa quẽwẽñömö nāni monguimæno cæte bedāni

¹ Mẽönaa go adoönæque iñonte Cānaa quẽwẽñömö Gadideabæ iñömö monguimæno ante bedānipa. Itota wäänä adoyömö ponte ongongacäimpa. ² Itota tömengä emiñænāni tönö tömēnāni inānite adobaī, Monguimæno mini bequingue, ante tẽ tẽ wente ænte pongadānimpa. ³ Ayæ yowepæ wædænque tĩ nāmæ biinömæ nāni amæ dæ bedāni adinque Itota wäänä tömengä Wengä ingante,

—Tömēnāni biinömæ dæ amæmpa.

⁴ Æñongä Itota wæætẽ,

—Badä ẽñēmĩ. Botö cæquēnēnö tömēmoque cæquĩnö impa. Botö cæyedẽ wĩ eyepæ impa, amopa.

⁵ Tömengä wäänä iñömö nẽ cædāni inānite,

—Mĩnitö imĩnite æbānö angä ẽñente cædāni, angantapa.

⁶ Ayæ onompo æmæmpoque go adocadeque æpæncade dica inte badöincade iñömö cö cædāni ongoncadedepa. Wængonguĩ weca guicæte ante waēmö bacæmöimpa, ante äate cædānipa, ante oodeoidi nāni äagaincade incadepa. İncade pancacadea otenta ditodo næ ongoncadedepa. Ayæ pancacadea tiẽ ditodo næ ongoncadedepa.

⁷ Nẽ cædāni inānite Itota,

—Æpæncadecoo iñömö æpæ eyede pöni pe ñiñædāni.

Angä ẽñēninqe pe ñiñængadānimpa.

⁸ Ayæ tömēnāni inānite,

—Owæta ænte wædænque mä iyænte monguimæno ante nẽ cædongä ingante godömini æncæcäimpa, amopa.

Angä ẽñēninqe mänömaĩ cægadānimpa.

⁹ Ayæ monguimæno ante nẽ cædongä æpæ inimæ incæ biinömæ badimæ æninqe, Æbānö imæ, ante bedinque tömengä, Itota nānö badönimæ impa, ante ẽñēnāmaĩ inongäimpa. Nẽ cædönāni Itota weca æpæ pe ñiñænāninqe ẽñēnönānimpa. Ayæ monguimæno ante nẽ cædongä iñömö nẽ

monguingä ingante, Nānēnẽ pöe, aa pecä pongä ate, ¹⁰ iĩmaĩ angantapa.

—Wadāni tömānāni waĩmæ biinömæ täno godönāni bedānipa. Ayæ ate ææmæ becæ pönāni tömo pöni bedāni adinque tömēnāni biinömæ wædænque godonte nāni ænimæ wæætẽ godönāni bedānipa. Bitö guiquēnẽ ñöwoyedẽ waĩmæ biinömæ bitö nānēnẽ concædimæ ænte pömipa.

¹¹ Itota, Acædānimpa, ante mänömaĩ cædinque tömengä Cānaa quẽwẽñömö Gadideabæ iñömö mänĩ mä nānö bamönengæ cægacäimpa. Mänĩ tæi piñænte bamönengæ cæcä adinque waodāni, Tömengä waēmö pöni inte cæcampa, ante edonque agadānimpa. Ayæ tömengä emiñænāni iñömö tömengä ingante godömenque wede pönēnāni bagadānimpa.

¹² Ayæ ate Capēnaömö quẽwẽñömö Itota tömengä wäänä tönö tömengä biwĩidi tönö tömengä emiñænāni tönö wææ gogadānimpa. Mänĩñömö godinque wædænque eönæ quẽwengadānimpa.

Wængonguĩ oncö tæiyæ waēmö baccäimpa, ante cæcä

(Mäateo 21.12-13; Mäadoco 11.15-18; Odoca 19.45-46)

¹³ Wodo pænta gogaiönæ, ante oodeoidi Patowa nāni ææmæ cænguionæ oo pöni bayedẽ Itota Eedotadẽ iñömö æigacäimpa.

¹⁴ Tömengä iñömö Wængonguĩ oncö ñænæncönẽ yabæcönẽ pö guidinque ayongä wagadaidi obegaidi tönö equemöidi inānite godonte æncæte ante nẽ mänāni inānite acantapa. Ayæ wadāni campio næænte nẽ godonte ænönāni iñömö nāni godonte æimpaa tæ contayönānite tömengä acantapa. ¹⁵ Yæguincamẽ ñænæmömo nää wēnēninqe que cæte ate æninqe tömengä Wængonguĩ oncö ñænæncönẽ yabæcönẽ nẽ ongönāni inānite tatodongä tao godānitapa. Adobaī obegaidi tönö wagadaidi inānite, Tao gobæwedāni, angä tao godānitapa. Ayæ campio næænte nẽ godonte ænönāni tömēnāni tigitamö æninqe tömengä wido cæcä gueogæ gotimpa. Ayæ adodāni nāni æimpaa bæ tacä guidömēmæ go wææntapa. ¹⁶ Ayæ equemöidi godonte æncæte ante nẽ mänāni inānite Itota,

—Mĩnitö equemöidi ænte tao gobæwedāni. Botö Mæmpo oncönẽ incæ mĩnitö ædö cæte,

Mönö godonte æiñömö bai impa, ante cæminitapa töö, angacäimpa.

¹⁷ Mäninö angä eñëninque tömengä emiñænäni Awënë Dabii nänö yewæmongainö ante iimaï ante pönte wædänipa. “Bitö oncö ante waodäni waa acædänimpa, ante cæcæboimpa, ante botö nanguï cæinente wængui wæ,” ante yewæmongatimpa.

¹⁸ Ayæ oodeoidi awënëidi pancadäniya tömengä ingante,

—Bitö mänüi tömäa awënë bai cæbi incæ æbänö bitö bamönengæ cæte odömömi adinque mönitö, Mäningä nê angä ingampa, ante eñencæmönimpa, ämönipa.

¹⁹ Äñönäni Itota wæætë tömënäni inänite,

—Wængongui tæiyæ waëmö oncö incæ munitö iincö bæ tate ewëmini ininque botö meönaa go adoönæque iñö miincö mænoncæboimpa, ämopa.

²⁰ Angä eñëninque oodeoidi awënëidi pancadäniya,

—Wængongui tæiyæ waëmö oncö coadenta i tei wadepo ganca mænongadänimpa. Bitö iñömö ædö cæte, Botö meönaa go adoönæque iñö miincö mænoncæboimpa, ämii, änänitapa.

²¹ Itota iñömö nämä baö incæ ante, Wængongui tæiyæ waëmö oncö bai impa, ante apænecä inongäimpa. ²² Tömengä iincayæ wængä ate Wængongui, Näni ömæmöe, angä nñäni ömæmongä ate, Æbänö angacäi, ante tömengä emiñænäni pönënanitapa. Ayæ, Wængongui angä eñente nani yewæmongainö nö impa, ante pönënanite inte ayæ Itota tömënäni inänite nänö äninö ante adobai pönengadänimpa.

Itota, Mönö waocabo æbänö imö, ante eñengampa

²³ Patowa nani ææmæ cæyedë Itota Eedotadëe iñömö ponte quëwëninque, Acædänimpa, ante bamönengæ nanguï cæcä adinque waodäni tæiyænäni iñömö, Mäningä mönö Codito ingampa, ante pönengadänimpa. ²⁴ Itota edæ, Waodäni tömänäni æbänö entawënäni inänii, ante do eñëningä inte tömengä, Wabänö pönënanii, ante tömënäni inänite gomö adongä ingantapa. ²⁵ Edæ tömengä waodäni nani entawënö ante do eñëningä ingantapa. Ininque waocä iñömö, Waodäni æbänö

cædäni, ante apænecæcäimpa, ante Itota tömengä ingante, Bitö botö imo adodö ancæbiimpa, ante änämaï ingacäimpa.

3

Itota tönö Nüicodemö

¹ Paditeocä adocanque tömengä emöwo Nüicodemö tömengä iñömö oodeoidi awënëidi tönö nê godongämæ cæcä ingacäimpa. ² Adocä woyowotæ Itota weca pöninque,

—Awënë nê Odömömi eñëmi. Wængongui, Odömoncæbiimpa, ante bitö imite da pönongä pönimi imipa, do eñëmönipa. Edæ Wængongui waocä tönö godongämæ cædämaï ingä ininque mäningä ædö cæte bitö bai bamönengæ cæcä aquimönii.

³ Angä eñëninque Itota wæætë,

—Bitö imite näwangä ämopa. Nê mem-poga eñadinganque Wængongui Awënë Odeye nempo guite aquingä ingampa.

⁴ Äñongä Nüicodemö,

—Waocä picængä ba ate ædö cæte mem-poga eñaquingä. Tömengä nänö wäänä cæncadë ædö cæte mem-poga guie æidinqe eñaquingä.

⁵ Angä eñëninque Itota angantapa.

—Bitö imite näwangä ämopa. Waocä æpænë guidengä iñongante Wængongui Önöwoca cæcä beyænque mem-poga eñadinganque Wængongui Awënë Odeye nempo guite quëwëningä ingampa.

⁶ Baonga beyænque nê eñadäni iñömö edæ baonque eñate quëwënänipa. Wæætë Wængongui Önöwoca cæcä beyænque nê eñadäni iñömö Wængongui Önöwoca ingante ewocate quëwënänipa. ⁷ Botö, Bitö mem-poga eñaquëni imipa, ante botö änö eñëninque, Æbämë impa, ante änämaï incæbiimpa. ⁸ Woboyæ nänö cægäi bai wayömö wayömö pæmænte gopa. Woboyæ nänö pæmæmämö eñëmö incæ, Ædonö pæmænte pö, ædonö pæmænte go, ante eñënamäi imoppa. Wængongui Önöwoca cæcä beyænque nê eñadäni tömänäni inänite tömengä æbänö cæcä, ante adobai eñënamäi imoppa, ämopa, ante Itota apænecantapa.

⁹ Apænecä eñëninque Nüicodemö,

—Æbänö inguii.

¹⁰ Äñongä Itota wæætë,

—Idægoidi inänite nē odömömi imi incæte mäninö ante ædö cæte eññämaï imii.

¹¹ Bitö imite näwangä ämopa. Mönitö quiëmë ante eññimöni inte mäninö ante apænemönipa. Mönitö quiëmë ante adimöni ininque, Mänömaï impa, ante apænemönipa. Minitö guiquënë möni äno ante apænemöni eññinque ayæ Baa ämini inte pönenämaï iminipa. ¹² Botö minitö iminite, Inguipoga quëwänäni weca æbänö i, ante apænedimo imo incæte minitö eññämaï iminipa. Ininque Wængonguï cæcä beyænque öönæde mini quëwenguinö ante æbänö i, ante apænebo bai ædö cæte pönenguimiiii, ante apænegacäimpa.

¹³ Ayæ apænedinque, “Waadäni tömänäni öönæde æidämaï ingadänimpa. Waobo nē eñagaimo inte öönæde quëwente nē wææ pömo iñömö botö adoboque öönæde æibo imopa. ¹⁴ Möitee wodi önomæca tæntæ nani badöninto æninque awäa ñä cædinque gö cæcä a ongongatimpa. Waobo eñagaimo imote adobai awäa timpodinque tiwadinque gö cædäni wægonguënemo imopa. ¹⁵ Mänömaï botö imote cædäni adinque botö imote nē wede pönänäni iñömö tömänäni cöwë wänämaï quëwencædänimpa,” ante Itota apænegacäimpa.

Wængonguï nänö waadete pönönö

¹⁶ “Edæ Wængonguï incæ inguipoga quëwänäni inänite nē waadete pönengä inte tömengä Wengä adocanque onguinängä iñongante pönongä pongacäimpa. Ininque æcänö tömengä ingante nē wede pönäna iñömö tömengä wë womönämaï inte cöwë wänämaï quëwencæcäimpa. ¹⁷ Edæ Wængonguï incæ tömengä Wengä ingante inguipoga iñömö da pönongä pongacäimpa. Incæte, Inguipoga quëwänäni nani pante wæquinque, ante apænte ancæte ante wii pongacäimpa. Wæætë inguipoga quëwänäni inänite tömengä ængä beyænque quëwencædänimpa, ante tömengä ingante da pönongä pongacäimpa.”

¹⁸ “Æcänö tömengä ingante nē wede pönäna iñömö Wængonguï tömengä ingante, Bitö pante wæquinque cæbipa, ante apænte anämaï incæcäimpa. Æcänö guiquënë wede

pönenämaï ina iñömö Wængonguï tömengä ingante, Botö Wengä adocanque iñongante bitö tömengä emöwo ante pönenämaï inömi inte wæcæbiimpa, ante do apænte angä ingampa. ¹⁹ Wængonguï nänö apænte äno iñömö iïmaï impa. Nē ñäo bai inongä iñömö, Wængonguï æbänö ingää, ante inguipoga iñömö ancæte ante pongacäimpa. Incæte waodäni tömännäni nani cædimämo wænæ wænæ i beyænque wëmö iñömö ante waadete pönänäni inänipa. Wæætë nē ñäo bai inongä ingante waadedämaï inänipa. ²⁰ Nē wænæ wænæ cædönäni inte ñäo iñömö ante piinque Baa äninque, Mönö cædinö edonque pönä badämaï ingæimpa, ante ñäo iñömö pönämaï inänipa. ²¹ Waodäni Wængonguï näwangä nänö ämaï nē cædönäni guiquënë, Mönö cædinö ante Wængonguï mönö tönö godongämæ cæcä beyænque cætamompa, ante edonque pönä acædänimpa, ante cædinque ñäo iñömö pöninque cædänipa.”

Wäo nē guidönongä Itota ingantedö ante apænegä

²² Ayæ ate Itota tömengä emiññänäni tönö Oodeabæ wædænque nani quëwëñömö godänitapa. Gote pöninque mäniñömö tömännäni tönö wædænque quëwëninque Itota angä beyænque tömännäni waodäni inänite æpænë guidönäni guigadänimpa. ²³ Ænöö quëwëñömö æpæ nanguï mæ adinque Wäo mäniñömö guidongä guigadänimpa. Ayæ waodäni, Wäo mönitö imönite æpænë guidongingä, ante cöwë tömengä weca pönäni inänite guidongä guidänimpa. Ænöö quëwëñömö Tadii quëwëñömö eyequei inimpa. ²⁴ Mäniñedë Wäo ingante ayæ tee mönedämaï ingadänimpa.

²⁵ Wäo emiññänäni pancadäniya oodeocä adocanque tönö apænedinque, Mönö oodeocabo æbänö cæte Wængonguï weca guicæte ante waëmö bacæmöimpa, ante tömännäni nani pönönö ante guëadö guëa ante tedewänäni. ²⁶ Adodäni Wäo weca ponte apænedinque,

—Nē odömömi eññemi. Oododänö æmæmäa bitö weca nē pöninängä ingantedö ante bitö, Mäningä ingampa, ante apænebitawo. Edæ mäningä onguinängä

iñömö adobai æpænē guidongä guiidänipa töö. Waodäni tömänäni tömengä weca godänipa, ante wädänitapa.

²⁷ Ante wädäni eñëninque Wäo,

—Wængongui öönæde quëwëngä pönö angä æninque waocä mänömai beyæ cæcampa. ²⁸ Botö wii Codito inömo imopa. Iñæmpa Wængongui botö imote täno da pönongä pönimo imopa. Tömengä ayæ Ponguingä, ante apænetabopa. Mänömainö ante apænebo eñënimini inte minitö tömëmini mäninö ante nē apænequënëmini iminipa. ²⁹ Monguingä iñömö mongä ate tömengä onquiyængä nänöogængä bacampa. Tömengä guidengä iñömö nē monguingä ante wänö cöninque eñëñongä monguingä apæneca eñëninque, Monguingä apæneca eñëmopa, ante watapæ tocampa. Botö adobai Codito apæneca eñëmopa, ante mäningä bai nangui watapæ tobo imopa. ³⁰ Tömengä iñömö godömenque ñænængä inte cædongä baquënegängä ingampa. Botö guiquënë pönömenque wädämo inte cædömo baquënëmo imopa, ante Wäo apænegacäimpa.

Öönæde nē quëwente wææ pongä

³¹ Ayæ Wäo godömenque apænecantapa. Öönæde nē quëwente wææ pongä iñömö tömengä iñömö wii wädäni bai wädangä inte wæætë ñænængä inte cædongä ingampa. Öönæde nē quëwente wææ pongä iñömö tömengä godömenque ñænængä inte cædongä ingampa. Inguipoga iñömö nē eñacä guiquënë waodäni bai quëwëngä inte inguipogaque ante apænecampa. ³² Tömengä Wængongui weca quïëmë adingä inte quïëmë eñëningä inte mäninö ante apæneca eñëninque wädäni wæætë, Näwangä impa, ante änämai inänipa töö. ³³ Mäninö ante nē Ao angä guiquënë tömengä, Wængongui näwangä angä ingampa, ante edonque pönö angä inongä ingampa. ³⁴ Edæ Wængongui nänö da pönöningä iñömö Wængongui nänö änö ante apænecampa. Tömengä ingante Wængongui iñömö tömengä Önöwoca ingante godongä æninque tömengä ædæmö ewocate quëwengampa.

³⁵ Mæmpo Wængongui iñömö tömengä Wengä ingante nē waadete pönengä ingampa. Wængongui tömengä ingante, Bitö nempo quïnö inincoo tömancoo pönömo æninque bitö awënë bacæbiimpa, ante pönö cægacäimpa. ³⁶ Æcänö Wængongui Wengä ingante nē wede pönëna iñömö tömengä cöwë wænämai quëwëncæcäimpa. Æcänö Wængongui Wengä ingante nē Baa ante pönënamäi ina guiquënë tömengä wii cöwë wænämai quëwëncæcäimpa. Edæ Wængongui tömengä ingante ængui nänö panguimämo cöwë cædongä ingampa, ante Wäo mäniñedë inque apænegacäimpa.

4

Itota Tämadiabæ onquiyængä ingante apæneca

¹ Paditeoidi inänite iimäi ante tededäni eñënanitapa. Itota pönö cædinque æpænē guidongä guidinque tömengä nänö emiñænäni iñömö wii Wäo emiñænäni bai wädænque badäni inte nangui inäni badänipa, ante tededänitapa. ² Mänömai änäni incæte wii Itota nē guidongä inongäimpa. Wæætë tömengä emiñænäni waodäni inänite guidönäni guigadänimpa. ³ Mäninö ante Paditeoidi do eñënanipa, ante änäni eñëninque Awënë Itota Oodeabæ quëwëninque wadæ go Gadideabæ iñömö ocæ emænte gogacäimpa.

⁴ Gadideabæ taadö Tämadiabæ iñömö tæcæguedë inö godö tömengä goquënegängä inongäimpa. ⁵ Tämadiabæ iñömö godinque tömengä Ticada nänö añömö pongantapa. Mänii Ticada quëwëñömö eyequei docä Aacobo wodi tömengä wengä Ootee wodi ingante, Pancabaa bitö ömæ baquiñömö, ante tömengä ingante nänö godongaimæ inimpa. ⁶ Ayæ æpäamönicæ Aacobo wodi nänö ææ wogaimönicæ adoyömö inimpa. Itota taadö gobæ inö godinque nangæ badinque æpäamönicæ iñömö pö tæ contayongä mäniñedë tæcæ bæcä bagatimpa. ⁷ Tæ contate ongöñongä Tämadiabæ quëwengä onquiyængä æpæ iyænte tadonte æncæte ante pongä adinque Itota tömengä ingante,

—Æpæ pönömi beboe, angantapa.

⁸ Edæ tömengä miñæ nē godäni mäninäni

quëwëñömö cængui godonte æncæ godäni inönänimpa.

⁹ Tämadiaidi inänite oodeoidi cöwë gomö adäni inänipa, ante ëñengä inte Tämadiabæ quëwengä onquiyængä inñömö Itota ingante,

—Bitö oodeobi imi incæte botö Tämadiabæ quëwëmo inñömote bitö ædö cæte botö imote, Æpæ pönömi beboe, ämii, ämopa.

¹⁰ Äñongä Itota wæætë,

—Bitö, Wængongui quinö nänö pönöni i, ante ëñente bai ayæ, Æbodö inömo inte bitö imite, Æpæ pönömi beboe, ante apæneboo, ante ëñente bai bitö wæætë botö imote, Æpæ pönömi beboe, ancædömiimpa. Ayæ botö bitö imite æpæ quëwenguimæ pönömo becædömiimpa, ämopa.

¹¹ Angä ëñëninque onquiyængä,

—Awënë, bitö æpæ mä iyæncade dæ ampa. Ayæ æpäämönicæ guiibæ impa. Mänimæ æpæ quëwenguimæ bitö nê apænedimæ ædönö mä iyænte ænguimii.

¹² Mönö docä mæmpo Aacobo wodi inñömö, Botö æmæwo wæmo adinque botö æpäämönicæ minitö qui bacæimpa, ante iimönicæ mönö imonte godongacäimpa. Tömengä adomönicæ æpæ begacäimpa. Tömengä wënäni tönö tömengä cæningäidi adobai adopæ begadänimpa. Adocä mönö docä wædangä inñongante bitö godömenque ñænæmi inte nê cædömi imitawogaa, ämopa.

¹³ Äñongä Itota wæætë,

—Æcämenque inñömö mänimæ bedinque wæætë gæwænte bacæcäimpa.

¹⁴ Æcämenque botö godonguimæ nê becä guiquënë tömengä gæwænämaï cöwë quëwencæcäimpa. Wæætë botö tömengä ingante tömëmo godonguimæ godömo bedinque tömengä botö quëwënö entawente quëwencæcäimpa. Æpäämönicæ cöwë cægö bai botö tömengä mimöno godonguimæ beyænque tömengä wænämaï nänö quëwenguinö do æninque quëwencæcäimpa, ämopa.

¹⁵ Onquiyængä tömengä ingante,

—Awënë, äninque, Botö gæwænämaï bacæboimpa, ante mänimæ botö imote pönömi beboe, ämopa. Ayæ mäninñömö cöwë æpæ iyæncæ pönämaï incæboimpa.

¹⁶ Ante äñongä tömengä wæætë,

—Goe, bitö nänöogængä ingante aa pedinque ænte mämömi pongæe, angantapa.

¹⁷ Äñongä tömengä wæætë,

—Botö nänöogængä dæ ampa.

Angä ëñëninque Itota tömengä ingante,

—Bitö, Botö nänöogængä dæ angampa, äninque nö ante ämipa. ¹⁸ Inñæmpa bitö nänöogæidi onompo æmæmpoque inñönänte bitö tömënäni inänite mönimi imipa töö. Ayæ ñöwoyedë onguinængä bitö weca nê quëwengä inñömö wii bitö näwä nänöogængä ingampa. Ininque ñöwo bitö änö inñömö edæ näwangä impa, ämopa.

¹⁹ Angä ëñëninque onquiyængä,

—Awënë, Bitö Wængongui beyæ nê apænebi imi adinque ëñëmopa. ²⁰ Mönitö dodäni mæmpoidi wodi, Ii onquiyabo inö gote Wængongui ingante, Bitö Awënë Wængongui imidö anguënë, ante ædæ wææninque angadänimpa. Minitö nê oodeoidi imini guiquënë, Wængongui ingante waa ate apænecæte ante Eedotadëe quëwëñömö mäninñömonque godinque ædæ wæænte apænecæimpa, äminipa töö.

²¹ Äñongä Itota wæætë,

—Onquiyæmi ëñëmi. Botö änö ëñëninque pönëe. Minitö inñömö ædæ wææninque botö Mæmpo ingante, Bitö Awënë Wængongui imidö anguënë, ante ii onquiyabo inö incæ Eedotadëe mäninñömö incæ minitö mäninö ante änämaï anguionæ oo pönö impa. ²² Minitö tämadiaidi inñömö nê Wængongui ingante, Bitö Awënë Wængongui imidö anguënë, ante ædæ wææninque apænemini incæte adocä ingante, Æbänö ingää, ante ëñënämaï iminipa töö. Mönitö guiquënë nê ædæ wææninque Wængongui ingante waa ate apænemöni inte adocä, Æbänö ingää, ante do ëñëmöni imönipa. Edæ, Nê wënæ wënæ cædäni wæncæ cædinäni incæ quëwencædänimpa, ante nê Ængä inñömö oodeocä inongä ingä apa anewëe. ²³ Botö Mæmpo ingante, Bitö Awënë Wængongui imidö anguënë, ante ædæ wææninque näwangä ante apænedönäni inte apænecædänimpa. Adodäni, Näwangä impa, ante nö pönente ewocadäni inte ædæ wææninque Wængongui ingante mäninö ante watapæ apænecædänimpa. Mäninö ante nani

apænequïönæ iñömö edæ oo pönï impa. Edæ do iinque batimpa. Wængonguï, Mänömaï entawente nö pönënanï bai inäni inänite diqui diqui minique, Mäninänique botö imote, Bitö Awënë Wængonguï imidö anguënë, ante ædæ wææninque watapæ apænecedänimpa, angampa. ²⁴ Wængonguï Önöwocaque ewocate quëwengä ingampa. Iinque në ædæ wæænte tömengä ingante watapæ apænedäni iñömö tömënanï, Näwangä impa, ante nö pönente ewocadäni inte ædæ wææninque tömengä ingante watapæ apænequënënanï inänipa, ämopa.

²⁵ Angä ëñëninque onquiyængä,

—Botö, Mëetiya nani Codito äongä poncæcäimpa, ante do ëñëmopa. Tömengä pongä ate, Æbänö inguïi, ante mönö imonte tömänö odömönte apæneca ëñencæmönimpa.

²⁶ Äñongä Itota wæætë,

—Botö në apænebo iñömö Codito inömo imo apa cæbii, ämopa.

²⁷ Tæcæ apæneyongante tömengä miñæ në godäni ocæ emænte ponte ayönäni tömengä iñömö onquiyængä ingante apæneca adinque, Æbänö cæ wæmönii, ante guïñente wædänitapa. Incæte, Æbänö ämii, ante, Quinante tömengä ingante tedebii, ante adocanque incæ änämaï ingantapa. ²⁸ Ayæ onquiyængä tömengä iyæncade emö cæte nani quëwëñömö ocæ emænte gote pöninque waodäni inänite apænedinque,

²⁹ —Ægodödäni, onguïñængä iñömö botö imote tæcæ adinque, Botö æbänö cæboo, ante tömänö ante botö imo në apæneca ingante pö aedäni. Mäningä wabänö mönö Codito inongä ingantawo, ante ämopa.

³⁰ Angä ëñëninque tömënanï nani quëwëñömö tao godinque tömengä weca gogadänimpa. ³¹ Onquiyængä nani quëwëñömö tæcæ goyongä Itota nänö në emiñænäni iñömö tömengä ingante,

—Awënë në Odömömi imi wædænque cæe, ämönipa.

³² Ante äñönäni tömengä wæætë tömënanï inänite,

—Botö cænguï botö ëadö ante quïnö i, ante mïnitö guiquënë tömäa ëñënamäi iminipa töö.

³³ Angä ëñëninque tömengä emiñænäni godongämæ nämanque apænedinque,

—Wabänö wacä tömengä ingante cænguï ænte pongantawo.

³⁴ Äñönäni Itota,

—Botö imote në da pönongä nänö änö bai botö cædö iñömö mänüi tömëmo cænguï bai impa. Ayæ, Tömengä nänö cædö ante tömänö iinque cæbopa, ante botö cædö iñömö botö cænguï bai adobaï impa.

³⁵ Minitö iñömö, Mëa go mëa apäicä bayonte amiñayedë tömëmoncodë gæcæmönimpa, ante wïi ämïnitawo. Botö guiquënë mïnitö iminïte ämopa. Waodäni inänite wi æmonte aedäni. Edæ mäninäni tömëmoncoo gæyedë bai inänipa. ³⁶ Itota, Botö beyæ ante waodäni inänite në gædongä ingante botö, Bitö cæbipa, ante paga cædinque ñöwoyedë incæ do pönömo ængampa.

Wænämäi wantæpiyæ quëwencædänimpa, ante cædinque ñöwoyedë incæ tömengä tömënanï inänite do gædongä ingampa. Iinque botö änö ante waodäni mimöno në quiyadingä tönö në gædingä tönö guëa tocædaïmpa. ³⁷ Mänömaï wëenëñedë nani angainö ante, Waocä adocanque tömëmö quiyacä ate wacä guiquënë në gædongä ingampa, ante näwangä ante impa.

³⁸ Tömëmoncodë iñömö cædäni bai cædämaï imini incæte mïnitö tömëmoncoo gæquïnäni bai bacæminimpa, ante botö, Waodäni botö quïnäni inänite gæcæminimpa, ante mïnitö iminïte da godömo gomïnitapa. Wadäni iñömö do mänincodë nangui pönï quiyate cædinque botö änö ante waodäni inänite apænegadänimpa. Minitö guiquënë mïni cædämaï iñömö incæ önonque gædimini iminipa, ante Itota apænegacäïmpa.

³⁹ Onquiyængä guiquënë tãmadiadi mänïñömö nani quëwëñömö quëwënanï inänite, “Tömengä iñömö botö imote tæcæ adinque, Botö æbänö cæboo, ante tömänö ante botö imote apænecantapa,” ante apæneca ëñëninque tömënanï nangui inäni Itota ingante pönengadänimpa. ⁴⁰ Tãmadiadi tömengä weca godinque, Bitö mönitö weca a ongöe, änäni ëñëninque tömengä mëönaa iñönte tömënanï weca owocantapa.

⁴¹ Tömengä nänö owoyedē tömengä nänö änö beyænque godömenque tæiyænäni iñömö tömengä ingante wede pönente badänitapa. ⁴² Adodäni onquiyængä ingante,

—Wii bitö apænete änonque ante eñëninque pönëmöni inte mönitö tömengä apæneçä adobaï eñënimöni imönipa. Ayæ, Mäningä iñömö inguipoga mönö quëwencabo iñömönte tömengä näwangä mönö imonte nē Ænongä ingampa, ante do eñëmönipa, apænegadänimpa.

Itota cæcä beyænque awënë tönö cæcä wengä waa bacäi

⁴³ Mëönaa go ate tömengä mäniñömö quëwëninque wadæ godinque, Gadideabæ gocæboimpa, ante gocantapa. ⁴⁴ Itota incæ wëenëñedē, İimaï impa, ante änongäimpa. Wængongui beyæ nē apæneçä inte tömengä nänö pægaïmæ incæ mäniñömö apæneyongä tömengä tönö pægaïnäni guiquënë tömengä ingante wii waa adänipa töö, ante änongäimpa. ⁴⁵ Tömengä mäni Gadideabæ nänö ponque pongä adinque gadideaïdi edæ Eedotadëe iñömö Patowa nani ææmæ cæyedē Itota bai mäniñömö gote ongöñönäni, Tömengä æbänö cæcä, ante tömäädinäni inte, Bitö pömi waa amönipa, ante tömengä ingante apænegadänimpa.

⁴⁶ Ayæ Gadideabæ godinque Itota wæætē Cänaa nani quëwëñömö, Æpæ incæ biïnömæ bacæimpa, ante wëenëñedē nänö cædiñömö adoyömö gocantapa. Capënaömö nani äñömö quëwëninque adocanque pancabaa awënë tönö godongämæ cæcä iñömö tömengä wëñængä onguiñængä wënæ wënæ inongäimpa. ⁴⁷ Adocä onguiñængä iñömö, Itota Oodeabæ quëwente Gadideabæ pongä, änäni eñëninque tömengä Itota weca gote angantapa. Botö wëñængä onguiñængä wæncæ cæcä iñongante bitö tömengä ingante cæbi waa bacæ. Ægodöe. ⁴⁸ Itota tömengä ingante,

—Botö, Acæminimpa, ante bamönengæ cæbo ate wæmini inte mïnitö mäninö beyænque botö imo pönëmïni awædo.

⁴⁹ Ante apæneçä eñëninque pancabaa awënë tönö godongämæ cæcä,

—Awënë, botö wëñængä ayæ wænämäi iñedē ægodöe gocæimpa.

⁵⁰ Ante äñongä Itota wæætē,

—Ñöwo wadæ goe. Bitö wëñængä iñömö quëwencæcäimpa, ämopa. Angä eñëninque onguiñængä, Itota nänö änö nö impa, ante pönëninque wadæ gogacäimpa. ⁵¹ Tömengä, Botö oncö, ante taadonque goyongante tömengä beyæ nē cædönäni tömengä ingante apæneçæte ante pö bee ténänitapa. Pö bee téninque,

—Bitö wëñængä waa bacäi.

⁵² Ante apænedäni eñëninque tömengä tömënäni inänite, Botö wëñængä æyedönö waa bacäi, ante äñongä tömënäni wæætē tömengä ingante,

—İimö ædæ gowayedē mäniñedē tömengä gancæ bacantapa, ante apænedänitapa.

⁵³ Ayæ wëñængä mæmpo, Bitö wëñængä quëwencæcäimpa, ante Itota botö imote nänö äniñedē adoyedē botö wëñængä do waa bacantapa, ante wædinque tömengä tönö tömengä nani quëwencabo tömancabo Itota ingante wede pönënäni bagadänimpa.

⁵⁴ Itota oodeoidi weca quëwente Gadideabæ ocæ emænte pöninque tömengä mäniñömö ii bamönengæ cædinque mem-poga nänö cædo bamönengæ bagatimpa.

5

Itota cæcä beyænque pæ opa pæ opa gocä waa bacäi

¹ Ayæ ate oodeoidi, Mönö Wængongui beyæ, ante nani ææmæ cæyedē Itota Eedotadëe iñömö ædinque ado ante gogacäimpa.

² Eedotadëe wææ cæte iñömö obegaidi nani pö guidemö gäänē gäwapæ impa. Mänimæ gäwapæ ebedeo tededö Betadapæ nani ämæ yæwedeca önompo æmæmpoque ñoncæcate inoncöimpa. ³ Mänincönē wënæ wënæ inäni tæiyænäni cöwē öñönönänimpa. Pancadäniya babetamönäni inte pancadäniya pæ opa pæ opa godönäni inte pancadäniya cömante inönäni inänipa.

⁴ Adodäni, Æpæ incæ gopæ, ante wänö cönönäni inönänimpa. Edæ Wængongui anquedo wæætē wæætē, Mänimæ incæ incæ gopængæimpa, ante wææ pöninque cædongäimpa. Gäwapæ incæ incæ go cæpæ adinque æcänö täno mänimænē guida

inte adocä quiēmē wēnæ wēnæ i waa badongäimpa. ⁵ Māniñōmō ōñōnāni weca adocanque nē ōñōnongä iñōmō todēinta i ocho wadepo ganca wēnæ wēnæ inte wægaingä inongäimpa. ⁶ Adocä māniñōmō ōñōngä ingante Itota ponte ayongä wadāni, Māningä wantæpiyæ mänōmaī wēnæ wēnæ inte wægaingä ingampa, ante apænedāni eñēninque Itota tōmengä ingante,

—Bitō, Waa bainēmo, āmitawo.

⁷ Ante añongä nē wēnæ wēnæ ingä wæætē,

—Awēnē, gāwapæ incæ incæ gopæñedē æcānō botō imote ænte guiquinaa edæ dæ angampa. Ayæ botō, Æpænē guicæboimpa, ante goyōmo wacā pōninque do tāno guicā.

⁸ Ante wæyongante Itota,

—Ængæ gantie, bitō bee podonte möimo ænte goe. ⁹ Añongä onguñængä iñōmō iñontobæ waa badingä inte tōmengä bee podonte möimo ænte cægonde gocantapa. Oodeoidi nāni guēmanguionæ iñonte Itota mänōmaī cæcantapa. ¹⁰ Mänōmaī beyæ oodeoidi awēnēidi iñōmō onguñængä nē waa badingä ingante,

—Ñōwoönæ guēmanguionæ iñonte mönō æbānō cæquii, ante do wææ yewæmonte impa cæbii. Bitō bee podonte möimo næænāmaī incæbiimpa.

¹¹ Ante pññōnāni tōmengä wæætē,

—Botō imote, Waa bae, ante nē cædingä iñōmō adocä incæ, Bitō bee podonte möimo ænte goe, angä cætabopa.

¹² Angä eñēninque tōmēnāni tōmengä ingante,

—Māningä iñōmō bitō imite, Bitō bee podonte möimo ænte goe, ante nē angä iñōmō æcānō ingää. Apænebi eñēmōnie, ānānitapa.

¹³ Itota guiquēnē do wadāni nanguī ināni ongōnāni tæcæguedē go wadæ godongäimpa. Mänōmaī beyæ onguñængä nē waa badingä iñōmō, Nē cædingä æcānō ingää, ante eñēnāmaī ingantapa. ¹⁴ Ayæ ate Itota Wængonguī oncō ñænæncō yabæcōnē go guiddinque tōmengä ingante bee tēninque,

—Eñēmi, bitō wæætē waa babi imipa. Inique godōmenque wēnæ wēnæ cædāmaī incæbiimpa. Bitō māniñō wēnæ wēnæ bitō

cægāinō ante ñimpo cædāmaī imi inique wabānō bitō wæwenguinque godōmenque babaīmipa, āmopa.

¹⁵ Angä eñēninque onguñængä wadæ gote oodeoidi awēnēidi weca pōninque angantapa. Botō imote, Waa bae, ante nē cædingä iñōmō Itota ingampa, ante apænecantapa. ¹⁶ Mänōmaī beyæ Itota māniñō nānō cædinō ante guēmanguionæ iñonte cæcā adinque oodeoidi awēnēidi iñōmō tōmengä ingante togænte wēnæ wēnæ cædānitapa. ¹⁷ Itota tōmēnāni inānite,

—Botō Mæmpo ñōwoönæ ganca tōmengä nānō cædō ayæ cæcā ingampa. Ayæ botō adobaī cæbo imopa, ante apænecantapa.

¹⁸ Māniñō angä eñēninque tōmēnāni godōmenque pññinque, Mōnō tōmengä ingante æbānō cæte wænōmō wænguingää, ante godōmenque nanguī cægadānimpa. Tōmēnāni, Tōmengä guēmanguionæ iñonte do cæcā ingampa. Ayæ godōmenque, Wængonguī botō Mæmpo inongäimpa, ante tededinque tōmengä, Botō Wængonguī bai imopa, ante bai cæcampa tōo, ante tōmēnāni godōmenque pñngadānimpa.

Tōmengä Wengä ingante Wængonguī pññō cæcā ate Awēnē bacampa

¹⁹ Itota adodāni inānite iīmaī āninque, “Botō mīnitō imīnite nāwangä āmopa. Botō Wængonguī Wēmo inōmo incæ ædō cæte adoboque nāmanque cæbo imoo. Botō Mæmpo æbānō cæcā adinque botō adodonque cæbopa. Edæ botō Mæmpo nānō cædō bai botō Wængonguī Wēmo inte adobaī cæbopa. ²⁰ Edæ Mæmpocā Wēmo iñōmote tōmengä botō imote waadete pññinque tōmengä nānō cædō tōmānō ante botō imote odōmongä abo imopa. Ayæ mīnitō, Æbānō cæcā wæmōo, ante wæcæmīnimpa, ante cædinque tōmengä godōmenque bamōnengæ nānō cædō ante botō imote odōmongä ate botō wæætē cæbo acæmīnimpa. ²¹ Edæ botō Mæmpo iñōmō æmæwo wængāināni inānite, Nāni omæmōninque mīnitō mīmīni quēwencæmīnimpa, ante pññō cæcā bai botō tōmengä Wēmo iñōmō adobaī cæbo imopa. Æcānō ingante, Bitō mīi quēwencæbiimpa, ante āinēmo inte botō tōmengä ingante pññō cæbo ate mīngä

quëwencæcäimpa. ²² Adobaï botö Mæmpo iñömö waodäni inänite adinque, Æcänö waa cæcantawo, ante, Æcänö wënæ wënæ cæcantawo, ante apænte änämaï ingampa. Wæætë edæ botö tömengä Wëmo iñömote tömengä, Bitö mäninö ante waodäni tömänäni inänite apænte ancæbiimpa, ante cægacäimpa. ²³ Mänömaï cædinque botö Mæmpo, Waodäni botö imo nani waa abai adobaï botö Wengä ingante tömänäni waa acædänimpa, ante cægacäimpa. Botö tömengä Wëmo iñömote nê waa adämaï ingä iñömö tömengä botö Wæmpocä botö imote da pönongä ingante adobaï waa adämaï ingampa töö,” ante Itota apænegacäimpa.

²⁴ Ayæ apænedinque, “Minitö iminite näwangä ämopa. Waocä botö änö ëñëninque botö imote nê da pönongaingä ingante nê wede pönengä iñömö tömengä nänö apænte pante wæwenguinö godämaï incæcäimpa. Wæætë tömengä nänö wænämaï quëwenguinö gocæcäimpa. Edæ tömengä mönö æmæwo wænguino ñimpo cædinque wænämaï mönö quëwenguinö do gocäimpa. ²⁵ Minitö iminite näwangä ämopa. Waodäni nê quëwënäni incæ tömënäni æmæwo wængainäni bai inönäni inte tömënäni iñömö Wængongui Wëmo botö tedepämo oo ëñencædänimpa. Nöwoönæ tömënäni nani ëñenguionæ do batimpa. Nê ëñënäni iñömö tömënäni nani wænämaï quëwenguinö gocædänimpa. ²⁶ Wængongui nämä nê quëwëngä inte tömänäni nani quëwëmämo ante nê godongä ingampa. Mänömaï beyænque botö tömengä Wëmo adobaï nämä nê quëwëno inte tömänäni nani quëwëmämo ante nê godömo imopa. ²⁷ Ayæ Waobo ëñagaimo iñömote tömengä pönö cæcä beyænque botö nê ämo badinque nämä tæi piñænte cædinque edæ, Æcänö waa cæcantawo, ante, Æcänö wënæ wënæ cæcantawo, ante nê apænte anguimo imopa. ²⁸ Botö mänömainö ante apænebo ëñëninque minitö, Æbänö angä wæmöö, ante änämaï incæminimpa. Edæ æmæwo wængainäni tömänäni tömënäni nani wodido nê öñongainäni iñönänite edæ botö tedepämo incæ tömënäni nani ëñenguionæ oo pönï impa. ²⁹ Botö tedepämo ëñëninque tömënäni tömänäni ta poncædänimpa. Nê waa cægainäni

iñömö wænämaï nani quëwenguinö nani goquinque ñäni ömæmoncædänimpa. Nê wënæ wënæ cægainäni guiquënë nani apænte pante æmæwo wæwenguinö nani goquinque ömæmoncædänimpa cæminii,” ante Itota apænegacäimpa.

Æcänö äna ëñente cæbii, ante Itota ingante änänipa

³⁰ Ayæ godömenque apænedinque Itota iïmaï apænecantapa. “Botö ædö cæte nämanque adoboque cæbo imoo. Wæætë Wængongui botö imote æbänö angä ëñëninque botö mäninö ante, Æcänö waa cæcantawo, ante, Æcänö wënæ wënæ cæcantawo, ante apænte ämopa. Ayæ botö apænte änö iñömö cöwë nöinö ante impa. Edæ botö tömëmo ämaï cædämaï imopa. Wæætë botö Mæmpo botö imote nê da pönongaingä nänö ämaï cæbo imopa. ³¹ Botö nämanque äninque, Æbänö cæboo, ante apænebo bai minitö, Önonquedö ante impa, ancædöminimpa. ³² Botö æbänö cæboo, ante wacä botö beyæ ante nê apæncä ingampa. Tömengä botö imotedö ante nänö apænedö iñömö edæ nö impa, ante ëñëmopa. ³³ Minitö botö imotedö ante, Æbänö cæcäa, ante ëñencæte ante Wäo nê æpænë guidönongä weca wadäni inänite da godöminitapa. Ayæ Wäo mäninäni inänite botö imotedö ante nö apæncä ëñënänitapa. ³⁴ Botö æbänö cæboo, ante waodäni botö beyæ apænecædänimpa, ante botö änämaï imopa. Wæætë, Minitö botö æmo beyænque quëwencæminimpa, ante cædinque botö mänömainö ante apænetabopa. ³⁵ Wäo nê æpænë guidönongä tömengä iñömö ti wodönoincade bæco bai ingacäimpa. Ayæ, Tömengä nänö angainö ñäo bai impa, ante adinque minitö wantæyö iñonte, Waa impa, ante watapæ tominitapa. ³⁶ Botö æbänö cæboo, ante Wäo nê æpænë guidönongä nänö angainö beyæ waodäni mäninö ante do ewocadäni ingadänimpa. Ayæ botö Mæmpo, Bitö iïmaï cæe, ante, Tömää iinque cæcæbiimpa, ante botö imote nänö angainö bai ante do cædömo imopa. Botö Mæmpo botö imote da pönongaingä ingampa, ante wadäni botö cædinö beyæ do ëñënänimpa. ³⁷ Ayæ botö Mæmpo botö imote nê da pönongaingä iñömö

adobaï, Botö æbänö cæboo, ante apæneca ðēngadānimpa. Minitö guiquēnē tōmengā ingante adāmaï imini inte tōmengā nānō tedepāmo incæ cōwē ðñēnāmaï iminipa tōö. ³⁸ Ayæ botö Mæmpo botö imote da pōnongā pōnimo imopa, ante mīnitö pōnēnāmaï imini inte edæ tōmengā nānō angainō ante entawēnāmaï quēwēmīni iminipa. ³⁹ Wængonguï angā ðñēninqwe nāni yewæmongainta ædæmō adōmīni inte edæ mīnitö, Māninö nāni yewæmongainta amōni beyænque mōnitö wænāmaï mōni quēwenguïnō gocæmōnimpa, ante pōnēmīni iminipa. Ìñæmpa mānintaa yewæmōninqwe botö imotedö ante apænedinqwe yewæmongadāni apa quēwēmīni. ⁴⁰ Botö, Minitö wænāmaï mīni quēwenguïnō ante pō æedāni, āñōmote mīnitö wæætē Baa āninqwe botö weca pōnāmaï iminipa,” ante Itota apænecantapa.

⁴¹ Ayæ apænedinqwe tōmengā, “Waadāni botö imote waa adinqwe apænecædānimpa, ante ānāmaï imopa, angantapa. ⁴² Ìñæmpa, Minitö æbänö cæmīni, ante botö do ðñēmopa. Wængonguï nānō waadete pōnente entawēnō mīnitö entawēnāmaï quēwēmīnipa, ante do ðñēmopa. ⁴³ Wængonguï angā ðñēninqwe botö wææ pōnimo adinqwe mīnitö Baa ante botö imote pōnēnāmaï iminipa. Wacā guiquēnē nāmā āninqwe pongā ininqwe mīnitö māningā ingante Ao ante pōnēmaïminipa, ante awædö. ⁴⁴ Minitö wacā ingā wacā ingā, Botö imote waa adinqwe waa apænecædānimpa, ante cæmīni awædö. Incæte mīnitö, Mōnō Wængonguï nē adocanque ingaingā ingampa, ante, Tōmengā mōnō imonte waa adinqwe apænecæcāimpa, ante cædāmaï iminipa. Mānōmaï beyæ mīnitö botö imote ædö cæte pōnēmīni imīni. ⁴⁵ Botö Mæmpo weca ongōninqwe mīnitö imīnitedö ante botö, Ìñāni wēnæ wēnæ cædāni inānitapa, ante ancæboimpa, ante mīnitö pōnēmīnitawo. Mānōmaïnō ante edæ pōnēnāmaï iedāni. Wæætē Mōitee wodi nānō angainō ðñente beyænque mōnō quēwengæimpa, ante pōnēmīnipa. Ìñæmpa adocā Mōitee wodi mīni nē pōnēnongā ðñōmō, Nē wēnæ wēnæ cæmīni iminipa,

ante ancæcāimpa cæmīni. ⁴⁶ Mīnitö Mōitee wodi ingante pōnente baï adobaï botö imote pōnencædōmīnimpa. Edæ tōmengā botö imotedö ante yewæmongacāimpa. ⁴⁷ Mōitee wodi nānō yewæmongainō ante pōnēnāmaï imini ininqwe mīnitö ædö cæte botö apænedö ante ðñēninqwe pōnenguïmīni,” ante Itota māniñedē inque apænegacāimpa.

6

5.000 ganca ināni inānite Itota godongā cæñānipa

¹ Māninö inque apænete ate wantæyö ðñonte Itota wadæ godinqwe gāwapæ Gadideapæ nāni āmæ æmæmāa tao gogacāimpa. Mānimæ Tibediapæ nāni āmæ impa. ² Tōmengā wogaa tao gocā adinqwe waodāni tæiyænāni pō tee empo godānitapa. Tōmengā, Acædānimpa, ante cædinque wēnæ wēnæ ināni inānite bamōnengæ cæte odōmongā do adināni inte godānitapa. ³ Ayæ Itota tōmengā nānō ðmiñænāni inānite ānanquidi ænte mæicā æidinque tōmēnāni tōmengā tōnō tæ contadānitapa. ⁴ Wodo pænta gogaïonæ, ante oodeoidi Patowa nāni ææmæ cæonæ oo pōni ingatimpa. ⁵ Itota gomō ayongā waodāni tæiyænāni tōmengā weca pōnāni adinqwe tōmengā Pedipe ingante,

—Mānināni waodāni beyæ ædōnō gote pāö godonte æninqwe godōmōni cænguïnāni, angantapa.

⁶ Edæ Itota ðñōmō, Æbänö cæbaïmoo, ante do ðñēningā inte māninö ante, Pedipe æbänö cæquingā, ante acæte ante angantapa. ⁷ Pedipe wæætē tōmengā ingante,

—Ìñæmpa pāö ante tōmānāni wædænque cæncædānimpa, ante ocho apāicā cæte beyæ paga æinta æninqwe mānimpota godonte æninqwe edæ wīi eyepæ imaimpa, angantapa. ⁸ Ayæ tōmengā ðmiñængā Timōnō Pegodo biwī Æntade ðñōmō Itota ingante,

⁹ —Mōnitö weca nē ongongā edēningā ðñōmō tebada nāni awēnēnimō guiyā pāö ðnompō æmæmpoque tōnō guiyā gæyæ mēa pōni næængā ingampa. Incæte māni cænguï tæiyænāni beyæ ædö cæte eyepæ ð, ante wæbopa.

¹⁰ Angä eñëinque Itota,

—Minitö tæiyænäni godongämæ ongönäni inänite ämïni tæ contaedäni, angantapa. Tömengä nänö ämaï änäni eñëinque waodäni önömæcaque inö nanguï gaguïmæ pæyömö do tæ contadänitapa. Onguïñænäni incæ onompo æmæmpoque miido ganca inäni inte tæ contadäni ingadänimpa. ¹¹ Itota päo æninque, Wængonguï, Bitö waa pönï pönömi ænte cænguïmöni, ante apænedinque tömengä nänö emiñænäni inänite godongä æninque tömënäni wæætë tæ contadäni inänite di mæñænäni cænänitapa. Ayæ tömengä gæyæ æninque adobaï cæcantapa. Tömänäni iñömö nani cæinënö ante eyepæ cængadänimpa.

¹² Tömënäni tömo pönï cænäni ate tömengä emiñænäni inänite tömengä,

—Cænguï nani ao mæ ao mæ ñönöni ee öñoncoo wote badämaï ingæimpa, ante pædæ wææmpo ö æedäni.

¹³ Angä eñente cædinque nê cænäni päo onompo æmæmpoque tebada nani awënënimö nani ao mæ ao mæ ñönöni ee öñoncoo ö ænte da wënäni ate edæ otodë tipæmpoga go mentodëa cænguï eyede da wënäni contagatimpa. ¹⁴ Waodäni iñömö Itota bamönengæ nänö cædi adinque,

—Nawangä iingä iñömö Wængonguï beyæ nê apænecä ingampa. Tömengä inguipoga Ponguingä, ante nani angaingä inongäimpa, ante tæcæ änänitapa.

¹⁵ Tömënäni, Bitö mönitö Awënë Odeye bacæbiimpa, ante botö imote bæi ongoncæte ante poncæ cædänipa, ante wædinque Itota wadæ godinque adocanque änanquidi wæætë æigacäimpa.

*Itota æpæ yædopæ dao dao gocä
(Mäateo 14.22-27; Mäadoco 6.45-52)*

¹⁶ Gäwadecæ pönï bayö tömengä emiñænäni iñömö gäwapæ yæwedeca wæi gogadänimpa. ¹⁷ Itota angä eñëinque mäniñömö wæi wipodë guidinque tömënäni, Gäwapæ æmæmäa Capënaömö nani quëwëñömö mönö taocæimpa, ante tæcæ wogaa tao goyönäni dobæ wëmö bayö Itota ayæ tömënäni weca pönämaï inongäimpa. ¹⁸ Ayæ woboyæ nanguï pæmænte pönö æpæ mæ conta mæ

conta cæyonte, ¹⁹ tömënäni wodo tinco quidömetodo wiyate cæyönäni Itota iñömö wipo gämænö pöninque æpæ yædopæ wænömënæcapæ dao dao pongä adinque ancai guiñënänitapa. ²⁰ Ancai guiñëñönänite Itota iñömö tömënäni inänite,

—Botö imopa. Guiñënämaï iedäni, angantapa.

²¹ Ante äñongä tömënäni Ao ante tömengä ingante wipodë æninque tömënäni nani goinëñömö emönaiya do tao gogadänimpa.

Waodäni Itota ante diqui diqui minte pönäni

²² Iimö ate tæiyænäni gäwapæ imæ wedeca a ongönönänimpa. Iinque tömënäni, Wipo adoque pönï mäniñömö wäi wocæ incæte Itota iñömö mänimpodë guidämaï iñongante tömengä miñæ godäni adodäninque guï wadæ tao godänitapa, ante adinque wædänitapa. ²³ Awënë Itota do Wængonguï ingante, Bitö waa pönï pönömi cænguïmöni, ante apænecä ate waodäni nani päo cæniñömö pancadäniya ayæ ongönänimpa. Nöwo iñömö wapocoo Tibedia nani quëwëñömö wo cæwodinque mäniñömö tömënäni nani cæniñömö eyequei pönäni adänitapa. ²⁴ Iinque Itota tönö tömengä nänö emiñænäni edæ dæ änäni wædinque tæiyænäni iñömö wipodë guite Capënaömö godinque Itota ante diqui diqui mincæte ante wogaa gogadänimpa.

Itota, Mönö quëwenguinque, ante cænguï bai ingampa

²⁵ Adodäni gäwapæ æmæmäa tao godinque tömengä ingä adinque,

—Awënë nê Odömömi imi æyedënö iñömö pömitawo, änänitapa.

²⁶ Äñönäni Itota wæætë,

—Minitö iminite nawangä ämopa. Minitö tömo pönï päo cænimïni inte botö imote ante diqui diqui mincæ pöminitapa töö. Wæætë edæ botö, Acæminimpa, ante bamönengæ cæbo beyæ minitö wïi pöminï awædö. ²⁷ Minitö, Mönö cænguï, ante æncæte ante cæmïni incæte inguipogaque mïni woquïnonque ante æncæ cædämaï quëwëedäni. Wæætë edæ, Mönö cænguï iinque bayedë cænguï mæ öñongæimpa, ante cædinque minitö, Mönö wænämaï

quëwenguinque gocæmõimpa, ante pönente quëwëedäni. Botõ nê Waobo ëñagaïmo ïmo mänii cænguï mînitõ ïmînite pönõmo æncæmînimpa. Botõ Mæmpo botõ ïmotedõ ante, ïngä nõ cæcä ingampa, ante odõmongacäimpa.

²⁸ Angä ëñëninque tõmënäni tõmengä ingante,

—Mönitõ, Wængonguï nänõ cæquimämo ante cæcæte ante quinõ cæquënëmõni ïmõnii, ante wæmõnipa.

²⁹ Äñönäni Itota wæætë,

—Botõ Wængonguï nänõ nê da pönongaïmo ïñõmote mînitõ botõ ïmote mîni wede pönënõ ïñõmõ edæ mäninõ Wængonguï nänõ cædõ impa, angantapa.

³⁰ Mänõmaï beyæ tõmënäni godõmenque tõmengä ingante,

—Bitõ, Eñencædänimpa, ante bamönengæ bitõ cædõ ante æbänõ cæte odõmõmi adinque pönëmaïmõnipa. Æbänõ cæquimii, ante änewënanitapa. ³¹ Mönõ wæmæidi önõmæca nani quëwëñedë cænguï mänää nani angai cængadänimpa. ïmaïnõ ante yewæmongatimpa. “Tõmengä, Minitõ cænguï, ante tõmënäni ïnänite öönædë ïnõ mäwææ godongacäimpa,” ante nani yewæmongainõ bai impa, ante apænedänitapa.

³² Itota wæætë tõmënäni ïnänite,

—Nawangä ämopa. Minitõ ïmînite öönædë mäwææ cænguï nê pönongaingä ïñõmõ tõmengä wii Mõitee wodi ingacäimpa. Wæætë botõ Mæmpo ïñõmõ tõmengä mînitõ ïmînite öönædë nani näwä cænguï bai pönongä cæncæmînimpa. ³³ Öönædë quëwente wææ pongaingä ïñõmõ tõmengä ïñõmõ, Cænguï bai ingampa, ante Wængonguï nänõ nê angaingä ingampa. Adocä inguipoga quëwënäni ïnänite, Mîni wantæpiyæ wænämaï quëwenguinõ ante pönongä æninque quëwënänipa.

³⁴ Ante Itota apænecä ëñëninque tõmënäni,

—Awënë, ñowo mänii cænguï ïmõ ïñõ ïimõ ïñõ pönõmi cæmõnie.

³⁵ Äñönäni Itota godõmenque apænedinque,

—Botõ ïñõmõ, Mîni quëwenguinque, ante mîni cænguï bai ïnõmo ïmopa. Botõ weca nê pongä ïñõmõ cõwë cænguï gue ænënämaï bai quëwencæcäimpa. Ayæ botõ

ïmote nê wede pönengä ïñõmõ cõwë tepæ gæwænämaï bai quëwenguingä ingampa, ante apænecantapa. ³⁶ Ayæ wæætë, Minitõ ïmînite do botõ änõ bai impa. Botõ ïmote do adimîni incæte mînitõ ayæ wede pönënämaï ïmînipa. ³⁷ Botõ Mæmpo, Bitõ quinäni bacædänimpa, ante cædinque botõ ïmote pönongä æmo ïninque botõ quinäni nê badäni ïnte tõmënäni tõmänäni ïñõmõ botõ weca edæ do pönänipa. Ayæ æcämenque botõ weca pöna ïnate, Botõ weca pönämaï ïmipa, ante cõwë änämaï incæboimpa. ³⁸ Edæ öönædë quëwëninque botõ wii tõmëmo ämaï cæcæboimpa, ante wææ pontabopa. Wæætë botõ ïmote nê da pönongaingä nänõ ämaï cæcæboimpa, ante wææ pontabopa. ³⁹ Ayæ botõ ïmote nê da pönongaingä botõ ïmo nänõ angainõ ïñõmõ ïmaï impa. Waodäni bitõ quinäni bacædänimpa, ante pönõmo æninque bitõ quinäni badinque adocanque incæ wë womonte wænämaï incæcäimpa. Wæætë ïinque baquionæ ïñonte bitõ, Näni ömæmõedäni, ämi ëñëninque bitõ quinäni tõmänäni edæ ñäni ömæmoncædänimpa. ⁴⁰ Edæ botõ Mæmpo nänõ angainõ ïñõmõ ïmaï impa. Botõ Wængonguï Wëmo ïñõmote botõ ïmote ædæmõ adinäni ïnte edæ botõ ïmote nê pönënäni tõmänäni cõwë wænämaï wantæpiyæ quëwencædänimpa. Mänõmaïnõ ante impa. Ayæ ïinque baquionæ ïñonte botõ mäninäni ïnänite, Minitõ ñäni ömæmõedäni, ämo ate ömæmoncædänimpa. Itota mänõmaï apænecantapa.

⁴¹ Apænecä ëñëninque oodeoidi ïñõmõ, Tõmengä, “Botõ cænguï bai ïmopa, ante öönædë ïnõ wææ pontabopa,” angampa, ante tõmengä ingantedõ ante tæcæ pïinte tedewënanitapa. ⁴² Tõmënäni,

—Ëngä ïñõmõ wii Ootee wengä Itota ingantawo. Tõmengä mæmpo tõnõ wäänä wii mõnõ adõna ïnatawo. Tõmengä ædõ cæte, Botõ öönædë quëwente wææ pontabopa, angä änewëë.

⁴³ Ante pïñönäni Itota wæætë,

—Minitõ nämanque godongämæ pïinte tededämaï ïedäni. ⁴⁴ Botõ Mæmpo botõ ïmote nê da pönongaingä wii pönõ cæcä bai æcämenque incæ botõ weca pönämaï incædongäimpa. Ayæ

inque baquiönæ iñonte botö weca në pongä ingante, Nñani ömæmöe, ämo ñani ömæmoncæcäimpa. ⁴⁵ Wængongui beyæ në apæneganäni nani yewæmongaintaa iimaï ante yewæmongadänimpa. “Wængongui waodäni tömänäni inänite odömonte apænecä eñencädänimpa.” Botö Mæmpo apænecä në eñenäni iñömö tömengä nänö odömonte apænedö ante në eñenäni inönäni ininque tömënäni tömänäni botö weca pönänpa, ante Itota apænecantapa.

⁴⁶ Ayæ apænedinque, “Mini waocabo tömämini incæ botö Mæmpo ingante cöwë adämaï iminitapa. Botonque iñömö Wængongui weca në quëwente pömo inte botö Mæmpo ingante në adimo iñömö adoboque pöni imopa. ⁴⁷ Minitö iminite näwangä ämopa. Botö imote në wede pönengä iñömö tömengä cöwë wantæpiyæ nänö quëwenguimämo do entawente quëwengä ingampa. ⁴⁸ Botö iñömö, Mini quëwenguinque, ante mini cængui bai imopa. ⁴⁹ Mini wæmæidi önömæca quëwëñedë cængui mänää nani angai cængainäni incæte edæ do wængadänimpa. ⁵⁰ Botö iñömö cængui bai inömo inte öönädë quëwente wææ pömo imopa. Ininque waocä, Cængui cænte bai quëwengæimpa, ante botö imote pönengä ininque tömengä cöwë wænämaï quëwëmaingampa. ⁵¹ Botö cængui bai imo inte öönädë quëwengaimo incæ wææ pontabopa. Æcänö cængui cænte bai botö imote pönëna tömengä iñömö cöwë wænämaï quëwencæcäimpa. Ii cængui botö godongui botö nämä baö impa. Inguipoga quëwënäni inänite, Minitö quëwenguimini, ante botö nämä baö incæ godoncæboimpa,” ante Itota mänömaï apænecantapa.

⁵² Mäninö angä eñente wædinque ood-eoidi nani cabo iñömö godongämæ nämanque tedinque wæætë godö wæætë godö änewënanitapa.

—Mäningä iñömö mönö imö tömengä nämä baö ædö cæte pönongä cænguimönii.

⁵³ Ante tedewëñönäni Itota wæætë tömënäni inänite,

—Minitö iminite näwangä ämopa. Botö Waobo eñagaimo iñömote minitö botö baö cænämaï inte botö wepæ bedämaï imini ininque ædö cæte Wængongui wantæpiyæ

nänö quëwenguimämo entawëmini inguimini. ⁵⁴ Botö baö në cængä ayæ botö wepæ në becä tömengä iñömö Wængongui wantæpiyæ nänö cöwë quëwenguimämo do entawente quëwengä ingampa. Ayæ inque baquiönæ iñonte botö mäningä ingante, Bitö ñani ömæmöe, ämo ñani ömæmoncæcäimpa. ⁵⁵ Edæ botö baö näwä cængui bai impa. Ayæ botö wepæ näwä bequï bai impa. ⁵⁶ Botö baö në cængä inte ayæ botö wepæ në becä iñömö tömengä botö nempo ee quëwëngä ingampa. Ayæ adobai tömengä botö imote entawëngä ingampa. ⁵⁷ Botö Mæmpo në Quëwëngä inte botö imote da pönongä pönimo imopa. Tömengä pönö cæcä ate quëwëmo imopa. Botö imote në cængä iñömö adobai botö cæbo beyænque quëwencæcäimpa. ⁵⁸ Botö cængui bai imo inte öönädë wææ pönimo iñömö mänii cængui bai imopa. Mönö wæmæidi cængui mänää nani angai cængainäni incæ edæ do wængadänimpa. Wæætë ñowo wææ pömo iñömote, Cængui impa, ante në cænongä iñömö tömengä cöwë wænämaï quëwencæcäimpa, ante Itota apænegacäimpa.

⁵⁹ Tömengä mäninö ante Capënaömö nani quëwëñömö nani odömöincönë ongöninque tömënäni inänite odömonte apænegacäimpa.

Itota nänö änö beyænque mönö wænämaï quëwengæimpa

⁶⁰ Mäninö odömonte apænecä eñenique tömengä emiñänäni nanguï inäni,

—Tömengä nänö odömonte apænedinö iñömö waadedämainö impa. Edæ æcänö eñëmaïnaa, ante änänitapa.

⁶¹ Mäninö nänö odömonte apænedinö ante tæcæ piinte tedewënäni wædinque Itota tömënäni inänite,

—Minitö botö äninö ante oda cæmini inte piimini iminitawo, angantapa. ⁶² Ayæ godömenque apænedinque, Botö Waobo eñagaimo imo öönädë quëwente wææ pongaimo inte adodö adoyömö æibo adinque minitö æbänö ante ämaïminii.

⁶³ Wængongui Önöwoca pönö cæcä beyænque waocä quëwengä ininque tömengä baonque nänö eñayö beyænque ædö cæte quëwëmaingää. Botö Wængongui Önöwoca tönö apænedinque minitö iminite botö

apænedinö beyæ mīnitō önōwoca ēwocate quēwencæmīnīmpa. ⁶⁴ Incæte mīnitō weca pancadāniya iñōmō botō imo pōnēnāmaī inānīpa tōō, ante Itota apænecantapa.

Edæ tōmēnāni weca æcānō tōmengä ingante pōnēnāmaī ingää, ante Itota do ēñēnongäīmpa. Ayæ tōmengä ingante nē godō odōmonguīgä æcānō imaingää, ante tōmengä adobaī do ēñēnongäīmpa. ⁶⁵ Itota godōmenque apænedinque,

—Botō mānīī beyæ mīnitō imīnite do antabopa. Botō Mæmpo wīī pōnō cæcā baī æcāmenque incæ botō weca pōnāmaī incædongäīmpa, ante apænegacäīmpa.

⁶⁶ Mānīōnæ ganca tōmengä mīñæ nē godāni incæ nanguī ināni wadæ godinque tōmengä mīñæ ayæ tee empo godāmaī ingadānīmpa. ⁶⁷ Tōmēnāni wadæ godāni adinque Itota önōmpo tipæmpoga go mēa ganca ināni inānite,

—Mīnitō diyæ æbānō cæquīmīnīi. Mīnitō tōmēnāni baī adobaī botō imote emō cæte, Wadæ goinēmōnīpa, ämīnitawo.

⁶⁸ Äñongä Timōnō Pegodo wæætē,

—Awēnē, æcānō mīñæ gobaīmōnīi. Wacā mōnitō imōnite nē emīñængä iñōmō edæ dæ angampa. Wantæpiyæ wænāmaī mōni quēwenguinō ante æbānō gocæmōnīmpa, ante wæyōmōni bitō iñōmō nē apænebi imīpa. ⁶⁹ Bitō iñōmō Wængonguī nānō da pōnōnōmi inte tōmengä nānō Tæiyæ Waēmō inōmi imīpa, ante pōnēmōni inte ēñēmōnīpa.

⁷⁰ Ante apænecä ēñēninque Itota,

—Mīnitō önōmpo tipæmpoga go mēa ganca imīni inte wīī botō apænte ænōmīni imīnitawo. Incæte mīni cabo incæ adocanque iñōmō wēnæ quī ingampa, ante apænegacäīmpa.

⁷¹ Timōnō Icadīote wengä Codaa ingantedō ante Itota mānōmaī angacäīmpa. Tōmengä önōmpo tipæmpoga go mēnaa nāni cabo adocanque inongä incæte ayæ ate Itota ingante odōmonte nē godonguīgä inongäīmpa.

7

Itota biwīidi tōmengä ingante pōnēnāmaī ināni

¹ Ayæ ate Itota Gadideabæ tōmāmæ wayōmō wayōmō gocä ingacäīmpa. Oodeabæ iñōmō oodeoidi awēnēidi botō imote wænoncæ cædānīpa, ante wædinque Itota, Oodeabæ wīī goinēmopa, ante mānīōmæ godāmaī inongäīmpa. ² Oodeoidi, Mōnō wæmæidi oncontaicoo mænōninque quēwengadānīmpa, ante pōnēninque tōmēnāni ææmæ oo pōni ingatīmpa. ³ Itota biwīidi tōmengä ingante,

—Bitō emīñænāni bitō bamōnengæ cæbi acædānīmpa, ante cæcæte ante bitō iñōmō ongōnāmaī inte wæætē Oodeabæ goquēnēmi imīpa. ⁴ Waodāni tōmānāni ayōnāni cæbo edonque acædānīmpa, ante cæinengä iñōmō tōmengä wīī awēmō cæcampa. Bitō mānīī cædinō do cæbi inte waodāni tōmānāni bitō imite edonque pōni acædānīmpa, ante odōmonte cæe, ämōnīpa.

⁵ Edæ tōmengä biwīidi incæ tōmengä ingante pōnēnāmaī ināni inōnānīmpa.

⁶ Mānōmaī beyæ Itota tōmēnāni inānite,

—Botō wīī ñōwo goquēnēmo imōpa. Mīnitō guiquēnē æyedēmē gomīni incæ cōwē waa impa. ⁷ Inguipogaque quēwēnāni mīnitō imīnite ædō cæte pīinte badānīi. Wæætē botō tōmēnāni inānite, Mīnitō wēnæ wēnæ cæmīni imīnīpa, ante apænebo beyæ tōmēnāni botō imo pīinānīpa. ⁸ Mīnitō ææmæ cædāni weca æite goedāni. Botō goquīōnæ wīī eyepæ impa, ante pōnēninque botō ayæ mānimæ cædāni weca godāmaī imōpa.

⁹ Mānīnō äninque tōmengä godōmenque Gadideabæ ongonte quēwengacäīmpa.

Itota nāni ææmæ cæyōmō gote pon-gacäīmpa

¹⁰ Incæte tōmengä biwīidi ææmæ ante godāni ate tōmengä adobaī godinque wīī waodāni nāni ayōmō gocampa. Wæætē awēmō gocantapa. ¹¹ Ayæ nāni ææmæ cæyōmō oodeoidi awēnēidi iñōmō,

—Māningä onguīñængä æyōmōnō ingää, ante tōmengä ingante ante diqui diqui minte wææ wānōnānitapa.

¹² Tæiyænāni ponte a ongōnāni godongāmæ nāmā tededinque tōmengä ingantedō ante wæntæ wæntæ tededānitapa. Pancadāniya, “Tōmengä waa cæcä ingampa.” Äñōnāni wadāni iñōmō,

“Baa, mäningä waodäni inänite wapiticæ mäodique, Oda cæquinänimpa, ante cæcä ingampa,” ante apænedönänimpa.

¹³ Oodeoidi awënëidi inäni adinque guiñente wædique wadäni tömänäni tömengä ingantedö ante waodäni eñeñönäni apænedämaï inönänimpa.

¹⁴ Tömänäni ææmæ do cæyedë Itota iñömö Wængongui oncö ñænæncönë yabæcönë æite pö guiðinque waodäni inänite mä odömonte apænegacäimpa.

¹⁵ Tömengä odömonte apænegacä eñëninque oodeoidi ancai guiñëninque,

—Æbänö cæte nanguï eñengä ingää. Edæ tömengä ecoeda adämaï inongä ingampa.

¹⁶ Äñönäni Itota wæætë,

—Botö odömonte apænedö ante wii nämä pönëninque odömonte apænebo imopa. Wæætë Wængongui botö imote në da pönongaingä nänö angainö ante odömonte apænebopa. ¹⁷ Minitö, Wængongui nänö angainö ante Itota odömonte apænegacäimpa, ante pönëminitawo. Wæætë, Nämä pönëninque Itota odömonte apænegacäimpa, ante pönëminitawo. Iñæmpa waocä, Wængongui nänö ämaï cæcæboimpa, ante æcänö änaa tömengä iñömö, Æcänö angä eñëninque Itota odömonte apænegacäimpa, ante do eñencæcäimpa. ¹⁸ Në nämä pönëninque apænegacä iñömö tömengä nämä ante, Botö imo waa acædänimpa, ante aïnente apænegacä ingampa. Wæætë edæ, Botö imo në da pönongainganque ingante waa acædänimpa, ante në aïnente cæcä iñömö tömengä edæ në nö cæte quëwëngä ingampa. Adocä, Waodäni oda cæquinänimpa, ante tömänäni inänite wii wapiticæ mäocä ingampa, ante Itota apænegacäimpa. ¹⁹ Ayæ apænedinque, “Wængongui nänö wææ angainö ante Möitee wodi wii minitö beyæ ante yewæmongacäi. Incæte minitö tömämïni Wængongui nänö wææ angainö adinque eñente cædämaï iminipa töö. Minitö quinante botö imote, Wænöinëmönimpa, ante pönëninque cæminii.”

²⁰ Ante awënëidi inänite äñongante nanguï inäni adoyömö ongönäni wæætë,

—Bitö wënæ tönö cæbi imipææ, ante tömengä ingante äninque, Bitö imite æcänö wænöinente cæcäa.

²¹ Ante änäni eñëninque Itota godömenque tömänäni inänite,

—Guëmanguïönæ iñonte botö adopoque bamönengæ cæbo adinque minitö tömämïni ancai guiñente wæminipa edæ. ²² Möitee wodi iñömö, Minitö wëñængä eñacä ate önonpo æmæmpo go mëönaa go adoönæque iñonte mäniönæ tömengä yabæque eö togæncæminimpa, ante minitö iminite odömonte apænegacäimpa. Wii Möitee wodi mänömaï mä cæcä ingacäimpa. Wæætë wëeñëdë incæ minitö wæmæidi do adodö cægadänimpa. Incæte Möitee wodi, Mäniönæ iñonte eö togæncæminimpa, ante pönö angä beyænque minitö guëmanguïönæ i incæte minitö wëñængä onguiñængä ingante eö togæminii iminipa töö. ²³ Möitee wodi nänö wææ yewæmongainö wido cædämaï ingæimpa, ante cædique minitö guëmanguïönæ iñonte edæ wëñængä onguiñængä ingante do eö togæminipa. Incæte edæ guëmanguïönæ iñonte botö wënæ wënæ iningä ingante ämo ate tömengä baö tömäñö waa bacä beyænque quinante botö imote pïimïni iminii. ²⁴ Waocä wabänö nänö cædi wënæ wënæ i, ante pönëninque ædæmö eñënamäi imini inte minitö tömengä ingä, Bitö wënæ wënæ cæbi imipa, ante apænte änämaï iedäni. Wæætë, Æbänö i, ante ædæmö eñëninque nöingä ante ancæminimpa, ante Itota mänömaï apænegacäimpa.

Itota iñömö Codito mönö në Ponguingä ingampa

²⁵ Mänömaï beyæ Eedotadëe quëwënanäni pancadäniya,

—Mäningä ingante wænömöni wæncæcäimpa, ante awënëidi wii änänitawo, ante mäniñedë tæcæ tedewënanitapa. ²⁶ Aedäni, tömengä iñömö edonque pönä a ongöninque waodäni inänite apæneyongä incæ mönö awënëidi tömengä ingante änämaï pæ wëenete inänipa töö. Tömänäni wabänö, Mäningä iñömö näwangä Codito mönö änonngä ingampa, ante pönënanitawo. ²⁷ Iñæmpa, Mäningä onguiñængä æyömönö quëwente pongä ingää, ante do eñëmöpa. Mönö Codito, Në Ponguingä, ante nänä angaingä iñömö æyömönö quëwente pongää, ante mönö

waocabo tömämö incæ eññämaï inguimö imompa, änänitapa.

²⁸ Ayæ Itota Wængongui oncö ñænæncönë yabæcönë odömonte apænedinque aa pecantapa.

—Ao, Botö æbodö imoo, ante minitö eññeminiyaa. Ayæ botö, Æyömönö quëwente põmoo, ante minitö adobaï eññeminiyaa. Botö wii nämä pönëninque pontabopa. Botö imote nē da pönongaingä näwangä inongä ingampa. Minitö, Tömengä æbänö ingää, ante eññämaï iminipa töö. ²⁹ Botö wæætē edæ tömengä weca quëwëmo iñömote tömengä botö imote da pönongä pönimo inte edæ botö iñömö edæ tömengä ingante do agaïmo inömo imopa, angacäimpa.

³⁰ Mäninö angä eññëninque tömënäni, Quinö cæte tömengä ingante bæi on-gonguimönimpa, ante pönengadänimpa. Incæte tömengä nänö wænguionæ wii eyepæ i beyæ tömengä ingante ö ænämaï ingadänimpa. ³¹ Tæiyænäni adoyömö põ ongönäni weca ongöninque nanguï inäni tömengä ingante wede pönënanitapa. Tömënäni,

—Mäningä onguiñængä iñömö nanguï bamönengæ cæcä inongäimpa. Mönö Codito iñömö tömengä pongä ate godömenque bamönengæ cæquiringä ingantawogaa.

Itota ingante bæi ongoncæte ante cædäni

³² Tæiyænäni mäniñömö ongönäni iñömö Itota ingantedö ante mänömainö ante wæntæ wæntæ tedeyönäni Paditeoidi eññänitapa. Ayæ, Wængongui qui, ante nē godönäni ñænænäni tönö Paditeoidi iñömö Wængongui oncö ñænæncö wææ wänönäni inänite, Minitö goedäni. Tömengä weca godinque tömengä ingante bæi ongonte ænte pödäni, änänitapa. ³³ Itota godömenque apænedinque,

—Minitö weca wantæyö quëwëninque botö ayæ ate botö imote nē da pönongaingä weca ocæ emænte gocæboimpa. ³⁴ Botö ocæ emænte gobo ate minitö botö imote ante diqui diqui mimini incæte adämaï inguimini iminipa. Ayæ botö go quëwëñömö minitö adoyömö ædö cæte ponguimini iminii.

³⁵ Angä eññëninque oodeoidi awënëidi namanque tededänitapa.

—Mäningä, Gocæboimpa, ante ædönö goyongante mönitö diqui diqui mininque adämaï inguimöni imönii. Tömengä, Edæ mönö guidënanäni do panguimæ godinque guidiegoidi weca wayömö wayömö nani quëwëñömö tömengä wabänö goquingää. Ayæ guidiegoidi mäniñömö quëwënanäni inänite odömonte apænebo eññæcädänimpa, ante apænequingää. ³⁶ Tömengä iñæmpa, “Botö imote ante diqui diqui mimini incæte minitö botö imote adämaï inguimini iminipa, angampa töö. Ayæ, Botö go quëwëñömö minitö adoyömö dicæ ponguiminiyaa,” ante mäniñö ante æbänö ante apænecantawo, angadänimpa.

Waëmö æpæ tayömö ta gopæ mönö quëwenguimæ impa

³⁷ Ayæ tömënäni nani ææmæ iinque cæönæ iñonte, Ñænæ ææmæ impa, ante godömenque nanguï cæyönäni Itota iñömö ængæ gantidinque yedæ yedæ tedecantapa.

—Nē gæwænte wæcä iñömö tömengä botö weca poncæcäimpa. Ayæ botö tönö godongämæ becæcäimpa. ³⁸ Æcämenque botö imote nē wede pönengä iñömö tömengä quëwenguimæ ænte entawencæcäimpa. Ayæ waëmö æpæ tayömö ta gote cægömæ bai tömengä adobaï tömengä nänö entawënö godonte bai cædinque, Wadäni bete bai quëwencædänimpa, ante godö cæcæcäimpa. Wængongui angä eññente nani yewæmongainö bai ante mänömainö ante impa.

³⁹ Mänömainö ante Itota iñömö, Botö imote nē wede pönënanäni inte ayæ ate Wængongui Önöwoca ingante ænte entawenguinäni inänipa, ante pönëninque mäningä Wængongui Önöwoca ingantedö ante apænegacäimpa. Edæ Itota ayæ wænämaï inte öönæde ocæ emænte æidämaï nänö iñedë Wængongui iñömö Tæiyæ Waëmö Önöwoca ingante ayæ da pönönämaï inongäimpa.

Wadäni wæætē godö wæætē godö nani anewëno

⁴⁰ Mäninö nänö änö eññëninque wadäni pancadäniya,

—Nawangä impa. Mäningä iñömö, Wængongui beyæ nē apæ necä nē Ponguingä, ante nani angaingä adocä inongä ingampa.

⁴¹ Ante añönäni wadäni guiquënë,

—Mönö Codito nē Ponguingä, ante nani angaingä mäningä ingampa.

Änani eñëninque wæætē wadäni,

—Mönö Codito ædö cæte Gadideabæ quēwente pongä ingää, änänitapa.

⁴² Iñæmpa mönö Codito iñömö Awënë Dabii pæingä inguingä impa. Ayæ Bedëe Dabii nänö quēwengaiñömö adoyömö eñäquingä ingampa, ante Wængongui angä eñente nani yewæmongainö ongö adämaï iminitawo.

⁴³ Angä eñëninque waodäni, Itota æcänö ingää, ante mänömaï wadö wadö ante pönte tedewengadänimpa.

⁴⁴ Pancadäniya, Tömengä ingante bæi ongöinēmönipa, änani incæte tömengä ingante bæi ongonte ænämaï ingadänimpa.

Awënëidi Itota ingante pönënamäi inönäni

⁴⁵ Wængongui oncö tæiyæ waëmö oncönē wææ wänönäni iñömö, Wængongui quï, ante nē godönäni ñænænäni tönö Paditeoidi weca ocæ emænte pönänipa. Ocæ emænte pönäni adinque tömënäni,

—Quinante tömengä ingante ænte pönämaï iminii.

⁴⁶ Ante añönäni wææ wänönäni wæætē,

—Mäningä onguiñængä waa apæ necä bai æcänö adobai tedecä iñömö edæ dæ angampa.

⁴⁷ Änani eñëninque Paditeoidi guiquënë,

—Tömengä minitö iminite adobai wapiticæ mäocä oda cæte gobaimini baminitawo.

⁴⁸ Äninque tömënäni godömenque, Awënëidi incæ Paditeoidi incæ adocanque tömengä ingante pönengä ingantawogaa.

⁴⁹ Nanguï inäni iñömö ongönäni guiquënë tömënäni nē önönäni que inte Wængongui nänö wææ angainö ante eñënamäi inäni inte tömengä ingante pönänäni inänipa. Mänömaï beyæ tömënäni Wængongui nänö pangaimämo ante wæquinäni inänipa.

⁵⁰ Niicodemö iñömö wëenëñedë Itota weca nē godingä adobai tömënäni bai Paditeocä inongä inte apæ necantapa.

⁵¹ —Waocä, Æbänö cæboo, ante nämä beyæ wææ änämaï iñongante mönö, Tömengä ingante pangæ impa, ante ædö cæte apænte anguii. Edæ, Wææ änämaï iñongante pangæ impa, ante dicæ wææ yewæmongadäniñaa.

⁵² Ante añongä tömënäni,

—Bitö adobai Gadideabæ quēwente ponte bai tede bipææ. Wængongui beyæ nani yewæmongainta ae. Adinque bitö, Wængongui beyæ nē apæ necä wii Gadideabæ quēwente pongä ingampa, ante do eñencæbi impa, ante angadänimpa.

Onquiyængä nänö towëno

⁵³ Mäninö änani ate tömänäni oncönē ocæ emænte gogadänimpa.

8

¹ Itota guiquënë Odibowænquidi nani anquidi gocantapa. ² Iimö ate ñäo bayedë tömengä Wængongui oncö ñænæcönē yabæcönē wæætē pö guicä adinque waodäni tömänäni tömengä nänö ongöñömö goto pönäni adinque Itota tömënäni inänite odömonte apæ necæte ante tæ contacantapa.

³ Mäniñedë onquiyængä adocanque tömengä nänöogængä inämaï iñongante wacä onguiñængä tönö tæcæ godö guëa mongä adäni ate nē odömönäni tönö Paditeoidi iñömö mäningä onquiyængä ingante ænte pönänitapa. Tömengä ingante tæcæguedë gö cädäni ongöñongä ⁴ tömënäni Itota ingante,

—Awënë nē Odömömi imi, iingä onquiyængä iñömö wacä ingante tæcæ godö guëa mongä adäni wæmönipa. ⁵ Wængongui nänö angainö ante Möitee wodi iimaï ante wææ yewæmongacä impa. Onquiyænäni mäningä onquiyængä bai cädäni iñönänite minitö tömënäni inänite dicæa tacamini wæncädänimpa. Bitö guiquënë quinö ämii.

⁶ Mäninö ante tömënäni iñömö, Æbänö apæ necäa, äninque, Wabänö pancadea wapiticæ tedecæcä impa, ante cädänitapa. Edæ wapiticæ tedecä ininque mönitö, Adocä wënæ wënæ cæcä ingampa, ante ancæmönimpa, ante cädänitapa. Itota guiquënë ædæ wææninqe onguipoga tömengä önongompoga yewæmongacä impa. ⁷ Tömënäni godömenque tömengä ingante

ēñencæte ante añönäni Itota ængæ gantite tōmēnāni inānite,

—Minitō weca adocanque ongōninque nē wēnæ wēnæ cædāmaī ingā ininque māningā tāno onquiyængā ingante, Wænguīmi, ante dicaca tacacæcāimpa, ante angantapa.

⁸ Äninque wæætē ædæ wææninque onguipoga yewæmongacāimpa. ⁹ Māninō angā nē ēñēnāni iñōmō adocanque wadæ go wacā wadæ go wacā wadæ go tōmānāni wadæ godānīpa. Picænāni tāno wadæ godāni ayæ wadāni wadæ godānitapa. Tōmānāni dæ godāni adinque Itota adocanque ee ongōñongā onquiyængā ayæ adoyōmō næ gongængantapa. ¹⁰ Itota ængæ gantidinque onquiyængā ingante,

—Æyōmōnō ināni. Bitō imite apænte äninque tacadāmaī inānitawo.

¹¹ Äñongā tōmengā wæætē,

—Awēnē, tōmānāni mænōmaī cædāmaī inānitapa.

Angā ēñēninque Itota,

—Botō adobaī bitō imite apænte äninque tacadāmaī incæboimpa. Nōwo goe ämopa. Bitō wēnæ wēnæ cæte quēwēnimāmo ñimpo cæte waa quēwēe, angacāimpa.

Inguipoga quēwēnāni beyæ Itota ñäo bai inongāimpa

¹² Ayæ Itota wæætē waodāni inānite apænedinque,

—Botō iñōmō inguipoga quēwēnāni beyæ ñäo bai imodō anguēnē. Æcänō botō miñæ tee empo goda tōmengā wēmō iñōmō cōwē cægōnāmaī ingampa. Wæætē tōmengā nānō quēwēnō taadō edonque acæcāimpa, ante botō tōmengā beyæ ñäo bai imopa, ante apæncantapa.

¹³ Paditeoidi guiquēnē tōmengā ingante,

—Bitō iñōmō nāmā äninque, Æbänō imoo, ante apænebi imipa tōō. Mænōmaī nāmanque ante apænebi beyæ bitō äninō önonquedō ante impa, ämōnīpa, pīnānitapa.

¹⁴ Itota wæætē,

—Botō iñōmō nāmā äninque, Æbänō imoo, ante apænebo incæ botō apænedō nāwangā impa. Edæ, Botō æyōmōnō quēwēnte pōmo imoo, ante ayæ, Ædönō gobo imoo, ante do ēñēmopa. Minitō guiquēnē, Botō æyōmōnō quēwēnte pōmoo imoo, ante ayæ, Ædönō gobo imoo, ante

wīi ēñēmīnīpa tōō. ¹⁵ Waodānique, İmaī cæedāni, ante nāni wææ ante cægāi bai minitō wacā ingante apænte ämīni imīnīpa. Botō guiquēnē waodāni tōmānāni inānite adinque, Æcänō waa cæcantawo, ante, Æcänō wēnæ wēnæ cæcantawo, ante apænte änāmaī imopa. ¹⁶ Incæte botō mænōmaī apænte ämo bai, Æbänō apænte ämoo, ante pōnēninque tōmēmo nō ante apænte ämopa. Edæ wīi botonque apænte ämopa. Wæætē botō Mæmpo botō imote nē da pōnongaingā iñōmō tōmengā iñōmō botō tōnō godongāmæ cæcā ate apænte ämopa.

¹⁷ Minitō mīni wææ yewæmongaintaa İmaī ante wææ yewæmongatimpa. Mēnaa onguīñæna nē adina inte tōmēna nāna adinō ante apænedā ēñēninque minitō wæætē, Nō impa, ante ēñencæminimpa.

¹⁸ Botō iñōmō nāmā äninque, Æbänō imoo, ante apænebo imopa. Ayæ botō Mæmpo botō imote nē da pōnongaingā iñōmō tōmengā botō imotedō ante, Æbänō ingää, ante adobaī apænecā ēñencæminimpa.

¹⁹ Angā ēñēninque tōmēnāni tōmengā ingante,

—Bitō Mæmpo æyōmōnō quēwengää. Äñönāni Itota wæætē,

—Minitō iñōmō, Botō incæ æbänō imoo, ante, Botō Mæmpo incæ æbänō ingaingā ingää, ante ēñēmīni imīnitawogaa. Botō æbodō imoo, ante ēñēmīni inte bai minitō, Botō Mæmpo æbänō ingaingā ingää, ante adobaī ēñēmīni incædōminimpa, ante apænegacāimpa.

²⁰ Itota Wængonguī oncō ñænæncōnē yabæcōnē go guidinque, Wængonguī quī, ante nāni da wencade gäänē ongonte apænedinque māninō ante apænegacāimpa. Incæte tōmengā nānō wænguīönæ wīi oo pōnī i beyænque tōmengā ingante bæi ongonte ænāmaī ingadānimpa.

Itota, Botō goquīñōmō minitō cædō cæte goquīmīni, angā

²¹ Itota wæætē tōmēnāni inānite äninque, —Botō wadæ goquīmo imopa. Gobo ate minitō botō imote ante diqui diqui mingūmīni imīnīpa. Minitō wēnæ wēnæ cædōmīni inte wæncæminimpa. Botō goquīñōmō minitō ædō cæte pongūmīni, angantapa.

²² Mäninö beyæ oodeoidi awenēidi, Tömengä iñömö, Botö goquiñömö ante mīnitö ædö cæte ponguimīni, ante quīnante angää. Tömengä nämä incæ, Wænonguimo, ante pönēnique iīmaī angantawo, ante änānitapa.

²³ Itota godömenque,

—Mīnitö iñömö inguipoga quēwēmīni imīnīpa. Botö guiquēnē öönædē quēwente pōmo imopa. Mīnitö iñömö iī inguipogaque nāni quēwencabo tönö adomīni imīnīpa. Botö guiquēnē iī inguipogaque nāni quēwencabo tönö adobo ināmaī imopa. ²⁴ Mänömaī beyæ botö, Mīnitö wænæ wænæ cædömīni inte wæncæmīnīpa, ante mīnitö imīnite apænetabopa. Botö, Æbänö imoo, ante ämo eñēnique pönēnāmaī imīni inīnque mīnitö wænæ wænæ cædömīni inte nō wæmaīmīnīpa.

²⁵ Ante apæncä eñēnique tōmēnāni,

—Æbidö imitawo.

Ante añönāni Itota wæætē,

—Botö do mīnitö imīnite, Æbodö imoo, ante nē änimo imopa. ²⁶ Botö mīnitö imīnitedö ante nanguī anguēnēmo imopa. Mīnitö imīnitedö ante ämo bai māniū botö änö mīni apænte angūnque imaimpa. Incæte botö imote nē da pönongaingä iñömö tōmengä nōingä inte tōmengä, Quinö botö imote angää, ante botö eñēninö ante botö adodö ante inguipoga quēwēnāni inānite apænebo imopa, angantapa. ²⁷ Incæte tōmēnāni, Itota tōmengä Mæmpo ingantedö ante mönitö imōnite apænecampa, ante eñēnāmaī ingadānīpa. ²⁸ Mänömaī beyæ Itota,

—Botö Waobo eñagaīmo iñömote mīnitö botö imote awāa timpodinque tiwadinque gö cæmīni wægöñömo mīnitö māniñedē edæ, Botö æbodö imoo, ante eñencæmīnīpa. Ayæ botö nämä pönēninque cædāmaī imopa. Wæætē Wæmpo nānö odömonte apænedö ante botö imote apæncä botö eñēninö ante adodö ante apænebopa, ante mīnitö adobai māniñedē eñencæmīnīpa. ²⁹ Botö imote nē da pönongaingä botö imote emö cædāmaī inte cōwē botö tönö godongāmæ ongongä ingampa. Edæ botö cōwē, Æbänö cæbo ate tōmengä waa aquingää, ante cæbopa, ante Itota apænegacāmpa.

³⁰ Mäninö añongä nanguī ināni iñömö tōmengä ingante pönengadānīpa.

Wænæ beyænque nē cædāni

³¹ Oodeoidi pancadāniya nē pönēnāni iñönānite Itota iñömö,

—Mīnitö cōwē botö odömonte apænedinö bai cæmīni inīnque botö miñæ nō gomīni imaimīnīpa. ³² Ayæ botö änö nōinö impa, ante eñencæmīnīpa. Mäninö nō botö änö beyænque mīnitö ñimpo cæte quēwencæmīnīpa.

³³ Ante añongä tōmēnāni wæætē,

—Mōnitö iñömö Abadäo nānö pæimōni imōni inte mönitö cōwē waocä æcāmenque beyænque nē cæmōni ināmaī intamōnīpa tōö. Bitö iñömö, Wacä beyænque mīnitö godömenque cædāmaī inte ñimpo cæte quēwencæmīnīpa, ante ædö cæte ämīi.

³⁴ Añönāni Itota wæætē,

Mīnitö imīnite nāwangä ämopa. Nē wænæ wænæ cæcä iñömö tōmengä wacä beyænque cæte nē quēwengä bai wædongä inte edæ tōmengä nānö wænæ wænæ cægāinonque ante cædinque ædö cæte aamö cæte go-quiringää. ³⁵ Wacä beyænque cæte nē quēwengä iñömö tōmengä awenē nāni wencabo tönö wīi cōwē godongāmæ quēwengä ingampa. Awenē wengä guiquēnē tōmengä mæmpo tönö nāna wencaya ina beyænque tōmengä awenē tönö cōwē guēa quēwengä ingampa. ³⁶ Mänömaī beyæ Wængonguī Wengä mīnitö imīnite ñimpo cæcä inīnque mīnitö nō ñimpo cæte quēwēninque wacä beyænque nē cæcä bai ināmaī inte quēwenguimīni imaimīnīpa. ³⁷ Mīnitö iñömö Abadäo nānö pæimīni imīnīpa, ante do eñēmopa. Incæte botö änö ante mīmönē entawēnāmaī quēwēmīni beyæ mīnitö botö imote, Wænömōni wæncæcāmpa, ante pönēmīni imīnīpa. ³⁸ Botö iñömö botö Mæmpo weca tōmēmo adinö ante mīnitö imīnite apænebo imopa. Mīnitö guiquēnē mīni mæmpo nānö angainö mīni eñēninö ante cæmīni imīnīpa.

³⁹ Ante apæneyongä tōmēnāni wæætē,

—Abadäo mönö docä mæmpo ingaingä ingampa.

Änāni eñēninque Itota,

—Mīnitö nō Abadäo wēmīni inte bai mīnitö tōmengä nānö cægāinö bai adobai

cæcædömīnīmpa tōō. ⁴⁰ Nōwo iñæmpa botō, Wængonguī nāwangā nānō angainō ante botō ēñēnīnō ante mīnitō īmīnite nē apænebo iñōmote mīnitō, Mōnitō æbānō cæte wænōmōni wænguingā, ante pōnēmīni īmīnīpa. Abadāō mānīī mīni cægai bai cædāmai ingacāimpa. ⁴¹ Mīnitō iñōmō tōmēmīni mæmpo nānō cægai bai adobai cædōmīni īmīni awædō.

Åñongante tōmēnāni,

—Mōnitō wīī wegōwæ wēmōni īmōnīpa tōō. Wængonguī incæ tōmengā adocanque mōnitō Mæmpo īnongāimpa.

⁴² Ånāni ēñēnīnque Itota tōmēnāni īnānite,

—Wængonguī nāwangā mīnitō Wæmpocā ingā bai mīnitō botō īmote waadete pōnencædōmīnīmpa. Edæ botō Wængonguī weca quēwente mīnitō weca nōwo wææ pontabopa. Botō wīī nāmā pōnēnīnque pontabopa. Wæætē tōmengā botō īmote da pōnongā pongaimo īmopa. ⁴³ Mīnitō īmīnite botō quīnō apæneboo, ante mīnitō quīnante ēñēnāmai īmīnīi. Edæ botō ānō ante, Quīnō apæneboo, ante mīnitō babetamō īnāni bai īnōmīni inte ædō cæte ēñēngūīmīnīi.

⁴⁴ Wēnæ iñōmō mīnitō mæmpo īnongāimpa. Ayæ mīnitō mæmpo nānō cæinēwēnō ante mīnitō adodō ante, Mōnitō cæinēmōnīpa, ante cæmīnīpa. Wēēnēñedē inguipoga mā badōñedē tōmengā, Botō wænonguīmo, ante do entawengā ingacāimpa. Tōmengā, Quīnō nāwangā īmpa, ante cōwē ānāmai ingampa. Ayæ edæ, Quīnō ānō nōinō īmpa, ante tōmengā entawēnāmai īnongāimpa. Adocā babæ tededīnque tōmengā babæ nānō entawēnonque ante tedewengā ingampa. Edæ tōmengā nē babæ ānongā ingampa. Ayæ tōmengā iñōmō mā babæ angaingā ingampa. ⁴⁵ Incæte botō nāwangā āmo beyænque mīnitō botō ānō ante pōnēnāmai īmīnīpa tōō. ⁴⁶ Mīnitō weca ongongā iñōmō æcāmenque incæ botō īmote apænte ānīnque, Bitō wēnæ wēnæ cæbi īmīpa, ante, Nāwangā īmpa, ante odōmōnatawogaa. Botō nāwangā āmo bai mīnitō quīnante botō angainō ante pōnēnāmai īmīnīpa. ⁴⁷ Wængonguī wēnāni nē īnōnāni iñōmō Wængonguī nānō angainō ante ēñēnāni īnānīpa. Mīnitō guīquēnē tōmengā wēmīni īnāmai īmīni beyæ,

Tōmengā quīnō angā, ante ēñēnāmai īmīnīpa, ante Itota apænegacāimpa.

Abadāō ayæ ēñadāmai iñedē mōnō Codito do ingaingā

⁴⁸ Oodeoidi wæætē tōmengā ingante,

—Bitō Tāmadiabæ quēwēmi īmīpææ. Ayæ wēnæ tōnō cæbi īmīpææ, ante wīī nāwangā āmōni intamōnīi.

⁴⁹ Ante pūnāni ēñēnīnque Itota wæætē apænedīnque,

—Botō wīī wēnæ tōnō cædōmo īmopa. Wæætē botō iñōmō, Botō Mæmpo ingante waa acæboīmpa, ante cæbo īmopa. Mīnitō guīquēnē botō īmote waa adāmai īmīnīpa tōō. ⁵⁰ Waodāni, Bitō waēmō īmīpa, ante botō īmote apænecædānīmpa, ante botō cædāmai īmopa. Wæætē wacā iñōmō, Waodāni bitō īmite apænedīnque, Waēmō īmīpa, ante apænecædānīmpa, ante nē cæcā ingampa. Māningā nē apænte ānongā ingampa. ⁵¹ Mīnitō īmīnite nāwangā āmopa. Botō angainō ante nē ēñēnte cæcā tōmengā iñōmō wantæpiyæ wēnāmai quēwencæcāimpa, angantapa.

⁵² Ante apænecā ēñēnīnque oodeoidi,

—Bitō wēnæ tōnō cæbi īmīpa, ante nōwo ædæmō ēñēmōnīpa. Abadāō wodi iñæmpa do wængacāimpa. Ayæ Wængonguī beyæ nē apænedāni adobai do wængadānīmpa. Incæte bitō, “Botō angainō ante nē ēñēnte cæcā tōmengā iñōmō wantæpiyæ wēnāmai quēwencæcāimpa, ante apænebi tōō.” ⁵³ Mōnō docā mæmpo Abadāō wodi nænængā inte cægaingā incæte bitō iñōmō edæ, Abadāō wædangā īnongante botō iñōmō godōmenque nænæmo inte cædōmo īmopa, āmitawo. Tōmengā iñōmō edæ do wængacāimpa. Ayæ Wængonguī beyæ nē apænedāni adobai do wængadāni apa ānewēē. Bitō nāmā ānīnque, Æcāmē bai īmoo, ante āmi.

⁵⁴ Åñōnāni Itota wæætē,

—Botō nāmā ānīnque, Waodāni, Bitō waēmō īmīpa, ante botō īmote apænecædānīmpa, ante ēñēnīnque wæbo bai waodāni botō īmote nāni waa apænedō wæætē ōnonquedō ante incædōnīmpa. Botō Mæmpo incæ mīnitō, Mōnō Wængonguī ingampa, ante mīni ānongā guīquēnē tōmengā iñōmō, Bitō waēmō īmīpa, ante botō īmote pōnō

apænecä apa quëwëminii. ⁵⁵ Minitö tömengä ingante wii adinque pönënamäi iminipa töö. Botö guiquënë tömengä ingante do agaïmo inte pönëmo imopa. Botö tömengä ingante adämaï imopa, ante bai botö mīnitö bai babæ ante ancædömoimpa. Wæætë tömengä ingante do adinque nē pönengäïmo inte botö iñömö edæ tömengä nänö angainö bai nē cæbo imopa. ⁵⁶ Inguipoga botö ponguionæ ante mīnitö docä mæmpo Abadäo wodi incæ, Codito ponguionæ pongä acæboimpa, ante pönëninque do edæ watapæ togacäimpa. Ininque tömengä mänionæ Codito nänö ponguionæ adinque godömenque togacäimpa, ante Itota apænecantapa.

⁵⁷ Oodeoidi tömengä ingante,

—Bitö eñagai iñömö tincoenta wadepo inämaï i incæte bitö ædö cæte, Botö Abadäo ingante atabopa, ante ämii.

⁵⁸ Ante pūiñönäni Itota wæætë,

—Mīnitö iminite näwangä ämopa. Abadäo wodi ayæ eñadämaï iñedë botö iñömö edæ do quëwëmo ingaïmo imopa, ante apænecantapa.

⁵⁹ Mäninö ante apænecä eñëninque tömënäni iñömö tömengä ingante dicaca tacacæte ante cædinque dicaco wææmpo ænänitapa. Incæte Itota wë womöninque Wængonguï oncö ñænæncodo tao wadæ gogacäimpa.

9

Babetamö eñagangä incæ waa bamonte acampa

¹ Itota gomonga godinque onguïñængä babetamö eñagangä ingante acantapa.

² Tömengä emiñænäni iñömö tömengä ingante,

—Awënë nē Odömömi imi, mäningä onguïñængä incæ tömengä mæmpoda incæ æcänö wënæ wënæ cæda beyæ tömengä babetamö eñacantawo, ante eñencæte ante anänitapa.

³ Itota tömënäni inänite,

—Iingä onguïñængä incæ tömengä mæmpoda incæ tömänäni wënæ wënæ cädämaï inänitapa. Wæætë tömengä babetamö eñagangä inte quëwëñongante Wængonguï nänö cædö iñömö edonque pönī acäimpa, ante mäningä mänömaï

ingacäimpa. ⁴ Iñänäni eñëedäni. Botö imote nē da pönongangä tömengä nänö cædö ante mönö müi quëwenganca mönö cæquënëmö imopa. Mönö wænguionæ iñonte mönö ædö cæte ayæ cæquimö. ⁵ Botö inguipoga quëwëñedë botö inguipoga quëwënäni beyæ ñäo bai inömo imopa.

⁶ Mäninö ante äninque Itota onguipoga towæ tänöninque wëä wëä gopodinque aquimæ bayonte æninque babetamongä awinca öni öni pæmongantapa. ⁷ Ayæ tömengä ingante,

—Goe. Gäwapæ Tidoee nänäni ämæ godinque bitö awinca ñäo mëmöe, ämopa, angantapa. Tidoepæ nänäni ämæ iñömö mönö tededö, Da godömæ, ante impa.

Angä eñente godinque onguïñængä ñä mëmöninque tömengä oncönë ocæ emænte pöninque do acä ingacäimpa. ⁸ Tömengä mänömaï do acä inte pongä adinque godongämæ quëwënäni tönö wëenëñedë tömengä, Pönömi æmoe, añongante nē adinänäni tönö,

—Æ, Iingä onguïñængä diyæ, Pönömini æmoedäni, ante nē anecöningä wii adocä ingantawo.

⁹ Änäni eñëninque pancadäniya,

—Mäningä ingampa, anänitapa.

Wadäni guiquënë,

—Wii tömengä ingä, önonque tömengä nänö emö bai emönongä ingampa.

Ante tedeyönäni onguïñængä tömenganque,

—Botö mänimodö inömo imopa, angantapa.

¹⁰ Ayæ tömënäni,

—Æbänö cæte bitö waa bamonte abii.

¹¹ Äñönäni tömengä wæætë,

—Onguïñængä iñömö tömengä emöwo Itota iñömö onguipoga towæ tänöninque wëä wëä gopodinque aquimæ bayonte æninque botö awinca öni öni pæmongantapa. Ayæ botö imote, “Goe. Gäwapæ Tidoepæ nänäni ämæ godinque bitö awinca ñä mëmöe” angantapa. Angä eñëninque botö wadæ gote ñä mëmöninque do waa bamonte abopa, angantapa.

¹² Tömënäni tömengä ingante,

—Iingä onguïñængä bitö anongä iñömö æyömönö ingä.

Ante añönäni tömengä wæætë,

—Botö eññämaï imopa, angacäimpa.

Babetamö ìningä ingante Paditeoidi ancaä äñäni

¹³ Ayæ Paditeoidi weca onguiñængä nê babetamö eñagaingä ingante ænte mämönäni pongantapa. ¹⁴ Itota mänii aquimæ badöninque babetamö ìningä awinca wi æmante bai nänö cæönæ iñömö oodeoidi guëmanguïönæ inönimpa. ¹⁵ Mänömaï beyæ Paditeoidi iñömö adobai eñencæte ante babetamö ìningä ingante edæ, Æbänö cæte bitö waa bamonte abii, ante añönäni tömengä wæætë,

—Mäningä iñömö aquimæ æninque botö awinca öni öni pæmongantapa. Ayæ botö tömö awinca ñä mämöninque ñöwo waa bamömo inte abopa, angantapa.

¹⁶ Paditeoidi pancadäniya,

—Ìngä onguiñængä iñömö wii Wængongui weca quëwente pongä ingampa. Edæ tömengä mönö guëmanguïönæ iñonte guëmänämaï inte do cæcampa, änänitapa.

Wadäni guiquënë,

—Ìñæmpa waocä nê wënæ wënæ cæcä ìningä inte ædö cæte mänömaï, Acæminimpa, ante mä cæquiringä, änänitapa.

Ìninque tömënäni wadö wadö ante pönente tedewengadänimpa. ¹⁷ Ayæ tömënäni wæætë babetamö ìningä ingante,

—Tömengä cæcä ate bitö waa abi inte bitö edæ tömengä ingantedö ante quïnö ämii.

Ante añönäni onguiñængä wæætë,

—Tömengä Wængongui beyæ nê apænecä ingampa, angantapa.

¹⁸ Babetamö ìningä iñömö, Waa bamömo imopa, ante apænecä eñëninque oodeoidi awënëidi ayæ pönënämaï inänitapa töö. Tömengä mæmpoda ìnate aa pedäni ponte apæneda ate mäniñedë pönënänitapa. ¹⁹ Tömënäni tömëna ìnate,

—Ìngä onguiñængä edæ minatö wengä ingantawo. Mäningä nê babetamö eñagaingä minatö änongå adocä ingantawo. Æbänö cæte tömengä ñöwo waa bamonte acäi.

²⁰ Ante añönäni tömengä mæmpoda wæætë, Nê babetamö eñagaingä iñömö tömengä mönatö wengä ingampa, ante eñëmönäni. ²¹ Incæte mönatö, Æbänö

cæte tömengä ñöwo waa bamonte acäi, ante, Æcänö tömengä awinca wi æmante bai cæcäi, ante eññämaï imönäni. Minitö tömengä ingante eñencæte ante ædäni. Tömengä do picængä ingampa. Tömenganque apænecä eñencæminimpa, änatapa.

²² Tömengä mæmpoda oodeoidi awënëidi inänite guïñëninque mäninö ante apænedatapa. Edæ oodeoidi awënëidi iïmaï ante do apænedönänimpa. Æcänö Itota ingante Ao ante, Mönö Codito ingampa, äna eñëninque edæ, Mönitö odömöincönë ongönämaï incæbiimpa, ante tömengä ingante da tadömöni tao gocæcäimpa, ante godongämæ pönente apænedönänimpa. ²³ Mänömaï beyæ tömengä mæmpoda, “Tömengä do picængä ingampa. Minitö tömengä ingante eñencæte ante ædäni,” angadäimpa.

²⁴ Onguiñængä nê babetamö ìningä ingante wæætë aa pedäni pongä ate tömengä ingante,

—Bitö Wængongui eñëñongä näwangä ante apænee, ämönipa. Edæ ìngä onguiñængä mäninö nê cædingä wënæ wënæ cæcä ingampa, ante edæ do amönipa.

²⁵ Ante püñönäni tömengä wæætë,

—Mäningä wënæ wënæ cæcä incæ wii wënæ wënæ cæcä incæ botö eññämaï imopa. Botö babetamömo inimo incæ ñöwo waa bamonte abopa. Mäninque eñëmö imopa.

²⁶ Ante apænecä eñëninque tömënäni tömengä ingante,

—Tömengä iñömö bitö ìmite æbänö cæcantawo. Æbänö cæte bitö waa bamonte abii, änänitapa.

²⁷ Tömengä wæætë,

—Minitö iminite do antabopa. Botö añömote minitö eññämaï iminipa töö. Quinante wæætë adodö ante eñëinëminii. Minitö adobai, Mönitö tömengä emiñæmöni baquimöni, ante äminitawo, ante angantapa.

²⁸ Ayæ tömënäni tömengä ingante piinte wënæ wënæ badete todinque,

—Bitö mäningä emiñæmi imipa töö. Mönitö guiquënë Möitee emiñæmöni imöni apa quëwëmii, änänitapa. ²⁹ Wængongui Möitee ingante apænegacäimpa, ante do

ēñēmōnipa. Īngā guiquēnē æyōmōnō quēwente pongāā, ante ēñēnāmaī ĩmōnipa.

³⁰ Āñōnāni onguīñængā wæætē,

—Mānīnō mīnitō ānīnō wīwa ĩmpa āmīnī. Tōmengā pōnō cæcā waa bāmonte abo incæte tōmengā æyōmōnō quēwente pongāā, ante mīnitō ēñēnāmaī ĩmīnipa. ³¹ Nē wēnæ wēnæ cædāni ĩñōmō Wængonguī ingante apæneyōnāni tōmengā tōmēnāni ĩnānite ēñēnāmaī ingampa, ante do ēñēmōmpa. Wæætē Wængonguī ingante, Bitō adobique mōnō Wængonguī ĩmidō anguēnē, ante nē apæncæ ĩñōmō tōmengā Wængonguī nānō angainō nē ēñente cædongā inte apæneyongante Wængonguī tōmengā ingante ēñencæcāĩmpa.

³² Waocā nē babetamō ēñagaingā ĩñongante wacā tōmengā awınca wī æmonte bāi cæcā ante æyedēmenque incæ inguipoga quēwēnāni dīcæ ānāni ēñēnānitawogaa.

³³ Īngā onguīñængā ĩñōmō wīi Wængonguī nānō da pōnongā pongaingā inte bāi tōmengā tōmānō cædāmaī incædongāĩmpa, angantapa.

³⁴ Mānīnō angā ēñēnīnque tōmēnāni wæætē,

Bitō ēñagaīñedē do wēnæ wēnæ cæte ēñagaīmi ĩmpa. Incæte bitō mōnitō ĩmōnite ædō cæte, Ēñencæmīnīmpa, ante odōmonte apænebi ĩmpa tōō.

Ānāni ĩnīnque tōmēnāni, Bitō mōnitō odōmōincōnē ongōnāmaī tao gobāwe, ante tōmengā ingante da tadōnāni tao gogacāĩmpa.

Nē babetamō bāi ĩnāni ĩnānite ante Itota apæncæcāmpa

³⁵ Tōmēnāni tōmengā ingante da tadōnānipa, ante tededāni ēñēnīnque Itota tōmengā ingante ante dīqui dīqui mīnte gote adīnque.

—Bitō Waocā nē ēñagaingā ingante pōnēmitawo.

³⁶ Angā ēñēnīnque onguīñængā,

—Awēnē, māningā æcānō ĩnaa. Botō tōmengā ingante pōncæboĩmpa, ante apænebi ēñēmoe.

³⁷ Ante āñongā Itota wæætē,

Bitō tōmengā ingante do abitapa. Ayæ bitō ĩmite nē apænebo ĩñōmō tōmēmo ĩmopa.

³⁸ Angā ēñēnīnque onguīñængā,

—Awēnē, botō wede pōnēmo ĩmopa. Ayæ, Bitō Wængonguī Wēmi ĩmidō anguēnē, ante tōmengā Itota weca ædæ wææñinque apæncæcantapa.

³⁹ Itota ĩñōmō edæ,

—Botō, Inguipoga quēwēnāni æbānō cædānīi, ante apænte ancæte ante pōnīnque ĩmaī cæbopa. Botō nē babetamōnāni bāi ĩnāni waa bacædānīmpa, ante cædīnque pontabopa. Ayæ wæætē, Mōnitō waa amōnipa, ante nē ānāni ĩnānite, botō, Babetamōmīni bāi ĩmīnipa, ante edonque odōmoncæte ante pontabopa.

⁴⁰ Mānīnō angā ēñēnīnque Paditeoidi pancadāniya tōmengā weca nē ongōnāni guiquēnē tōmengā ingante,

—Æbānō āmīi. ĩñæmpa mōnitō adobāi babetamōmōni bāi ĩmōnitawogaa.

⁴¹ Ante āñōnāni Itota wæætē,

—Mīnitō babetamōmīni bāi inte bāi wēnæ wēnæ cædāmaī incædōmīnīmpa. Wæætē mīnitō, Mōnitō waa amōnipa, ante nē ānōmīni inte mīni wentamō mongæncōo ee mongæmīni inguīmīnidō anguēnē, ante apæncæcāĩmpa.

10

Nē aacā tōnō tōmengā obegaidi

¹ Itota ayæ ĩmaī apæncæcantapa. “Mīnitō ĩmīnite nāwangā āmopa. Onguīñængā obegaidi nāni wææ cæyōmō guīdemō nē guīdāmaī inte wæætē wayōmō da ēwa æi guīcā ĩñōmō tōmengā ĩñōmō nē awēmō ō ængā ĩnongā inte adobāi wadāni ayōnāni nē pō ō ænte gocā ingampa. ² Odemō nē guīcā guiquēnē tōmengā obegaidi ĩnānite nē aacā ingampa. ³ Nē aacā beyæ odemō nē wææ cæcā wī æncæcāmpa. Wī æncæcā ate nē aacā pō guīte tedeyongā obegaidi tōmengā nānō tedepāmo ēñente ĩnānipa. Tōmengā obegaidi ĩnānite nāni ēmōwo nāni ēmōwo ante aa pecā pōñōnānite tōmengā tōmēnāni ĩnānite ænte taocāmpa. ⁴ Tōmengā obegaidi tōmānāni ĩnānite ænte taodīnque tōmengā ōnōmæca ĩñōmō tāno beyænte gocā ate tōmengā obegaidi tōmengā nānō tedepāmo ēñēnīnque tōmengā ingante tee empo godānipa. ⁵ Wacā ingante guiquēnē tōmēnāni tee empote godāmaī ĩnānipa. Wæætē wacā nānō tedepāmo ēñēnāmaī ĩnāni inte tōmēnāni tōmengā weca

ongönāmaī wodii gocædānimpa,” ante Itota apænecantapa.

⁶ Tömengä mänōmaī tōmēnāni inānite odōmoncæte ante, Nē aacā æbānō cæcāā, ante odōmonte apænecā incæte tōmēnāni tōmengä nānō ānīnō ante ēñēnāmaī ingadānimpa.

Itota mönō imonte nē Aacā ingä

⁷ Mänōmaī beyæ Itota wæætē ānīnque, “Botō mīnitō imīnite nāwangä ämopa. Botō iñōmō nē obegaidi bai ināni nāni wææ cæyōmō, Guicædānimpa, ante odemō bai imopa. ⁸ Wēēnēñedē botō ayæ pōnāmaī iñedē wadāni odōmonte apænecæ pongadānimpa. Tōmēnāni tōmānāni waodāni inānite nē awēmō ö ænāni bai inōnāni inte adobai wadāni ayōnāni nē pō ö ænte gogaināni bai ingadānimpa. Incæte waodāni iñōmō nē botō obegaidi bai inōnāni inte nē ö æinēnāni inānite wæætē ēñēnāmaī ingadānimpa. ⁹ Botō nē odemō bai imopa. Odemō nē guicā bai iñōmō tōmengä botō imote pōngä iñongante botō æmo beyænque quēwencæcāimpa. Adocā nē obega bai inte tōmēnāni nāni wææ cæyōmō guidemō nē guicā bai inīnque tōmengä piyænē cæte quēwencæcāimpa. Ayæ tōmengä wæætē nē taocā bai inīnque tōmengä nānō cænguī mæ öñō adīnque eyepæ cæncæcāimpa,” ante Itota apænecantapa.

¹⁰ Ayæ apænedīnque, “Nē awēmō ængä guiquēnē tōmengä iñōmō awēmō æncæte ante pongä inongä inte adobai wænoncæte ante wo ewencæte ante māninganca cæcæte ante pongä ingampa. Botō iñōmō, Waodāni quēwencædānimpa, ante ayæ, Tōmēnāni nāni quēwenguīnque ante watapæ pōni quēwencædānimpa, ante pontabopa. ¹¹ Botō obegaidi bai ināni inānite nē waa aacā bai imopa. Nē waa Aacā iñōmō nāmā incæ obegaidi beyænque wæncæcāimpa. ¹² Godonte æinta ante wacā ingante nē cæcā iñōmō tōmengä iñōmō obegaidi nē ēacā ināmaī inongä inte nē aacā ināmaī ingampa. Mänōmaī beyæ adocā iñōmō mēñe bai ingä pongä adīnque tōmengä obegaidi inānite emō cæte wodii wīnongampa. Tōmengä wodii wīnongä adīnque mēñe bai ingä wæætē obegaidi weca pogodo ponte obega

ingante yao ongōnīnque, Obegaidi pan-gocæ goquīnāni, ante cæcampa. ¹³ Godonte æintaque ante nē cæcā iñōmō, Æbānō cæte obegaidi waa quēwenguīnāni, ante ānāmaī inongä inte edæ wodii wīnongampa,” ante Itota apænecantapa. ¹⁴⁻¹⁵ Ayæ apænedīnque, “Obegaidi inānite waa aacā bai edæ botō iñōmō nē waa Aabo imopa. Botō Mæmpo edæ botō imote do ate pōngä bai botō adobai tōmengä ingante do adīnque pōnēmopa. Ayæ tōmēmo obegaidi bai ināni inānite do adīnque tōmēnāni inānite pōnēmopa. Ayæ tōmēnāni guiquēnē botō imote do adāni inte botō imote pōnēnānīpa. Botō nāmā incæ obegaidi bai ināni beyænque wæncæboimpa. ¹⁶ Ayæ wadāni iñōmō botō obegaidi bai nē ināni incæ wīi māniñōmō wææ cæyōmō quēwēnāni inānīpa. Botō mānīnāni inānite adobai ænte māmō ponguēnēmo imopa. Adodāni adobai botō tedepāmo, Æbānō ämo, ante ēñenguīnāni inānīpa. Mänōmaī beyæ mānīnāni iñōmō do botō quīnāni tōnō tōmānāni adocabodānīque baquīnāni inānīpa. Ayæ nē Aabo adoboque iñōmō tōmānāni beyæ cæcæboimpa.” ante Itota apænecantapa.

¹⁷ Ayæ apænedīnque, “Botō nāmā incæ Ao ante wænīnque ñāni ömæmoncæboimpa, ante cædīnque wæætē tōmēmo mīi quēwenguīmo incæboimpa. Mänōmaī beyæ botō Mæmpo botō imote waadete pōngä ingampa. ¹⁸ Waodāni iñōmō ædō cæte botō imote wænonguīnānīi. Botō nāmā incæ Ao ānīnque wæncæboimpa. Botō nāmā tæi piñæmo iñōmō, Wænguīmo, ante nē ämo inōmo imopa. Ayæ adobai botō nāmā tæi piñænte nē ämo inte botō, Ñāni ömæmoncæboimpa, ante cædīnque wæætē tōmēmo mīi quēwenguīmo incæboimpa. Botō Mæmpo iñōmō botō imote nānō wææ angainō botō ēñēnīnō ante ēñente cæbopa,” ante apænecantapa.

¹⁹ Mānīnō apænecā ēñēnīnque oodeoidi wæætē wadō wadō ante pōnente tedewengadānimpa. ²⁰ Oodeoidi nanguī ināni iñōmō, —Tōmengä wēnæ tōnō cæcā inte edæ ömæcacā inongä ingampa. Ædō cæte tōmengä ingante ēñēmīni imīnīi.

²¹ Äñōnāni oodeoidi incæ wadāni guiquēnē,

—Tömengä wënæ tönö cæcä inte bai tömengä iimaï nänö äninö ante wii angä incædongäimpa. Nē wënæ inte quēwente cæcä iñömö babetamönäni awinca wi æmante bai cæcä waa bamönäniyaa.

Oodeoidi Itota ingante Baa änäni

²² Yoguite tedæ iñonte waodäni Eedotadēē quēwēnāni, Wængonguï oncö tæiyæ waēmö oncö ante dodäni mænongadänimpa, ante pönente ææmæ cæyönāni. ²³ Itota Wængonguï oncö ñænæncönē yabæcönē Tadömö nāni änoncönē iñömö cægongantapa. ²⁴ Oodeoidi tömengä weca pö godongämæ gongænte änäni,

—Bitö æbänö imii, ante æpoönædö ayæ äinēnāmaï imii. Bitö mönitö Codito imi iñinque mönitö imönite edonque pöni apænebi eñēmönii.

²⁵ Ante añönäni Itota wæætē,

—Minitö iminite do antabopa. Incæte minitö pönēnāmaï iminipa töö. Botö edæ botö Mæmpo emöwo ante bamönengæ cæbo adinque minitö, Botö æbänö imoo, ante eñenguēnemini iminipa. ²⁶ Minitö wii botö obegaidi bai inömini inte botö imote pönēnāmaï iminipa töö. ²⁷ Waodäni botö obegaidi bai nē inäni inte botö tedepämo, Æbänö ämoo, ante do eñēnāni. Ayæ botö tömēnāni inänite adinque pönemo iñömote tömēnāni wæætē botö imote tee empote godänipa. ²⁸ Botö adodäni inänite wantæpiyæ nāni quēwenguinö godömo æninque quēwencædänimpa. Ayæ cöwē wænāmaï incædänimpa. Tömēnāni tömēmo önönempo ongöñönänite æcänö tömēnāni inänite gä pe æmpoda iñömö edæ dæ angampa. ²⁹ Botö Mæmpo edæ adodäni inänite botö imote nē pönongaingä inongä ingampa. Tömänāni wædänāni iñönāni tömengä iñömö godömenque ñænængä inte nanguï cædongä ingampa. Iñinque tömengä önönempo ongöñönänite æcänö tömēnāni inänite gä pe æmpoda iñömö edæ dæ angampa. ³⁰ Botö iñömö botö Mæmpo tönö äawocaque bai ewocamöna imönapa, ante Itota apænegacäimpa.

³¹ Mäninö angä eñēninque oodeoidi wæætē tömengä ingante dicaca tacacæte ante cædinque dicacoo wææmpo ænänipa.

³² Tömēnāni dicacoo wææmpo æñönänite Itota tömēnāni inänite,

—Botö minitö weca botö Mæmpo nänö angai bai nanguï bamönengæ odömote cætabopa. Ædö botö bamönengæ cædinö ante adinque minitö botö imote dicaca tacacæ cæminii.

³³ Ante añongä oodeoidi wæætē,

—Mäninö bitö waa cædinö beyæ ante mönitö wii bitö imite dicaca tacacæ cæmönipa. Wæætē bitö babæ ante Wængonguï ingante godö wënæ wënæ ämipa, ante bitö imite tacacæ cæmönipa. Edæ mönitö waömöni bai inte bitö adobai waobi imi incæte bitö, Botö Wængonguïmo inömo imopa, ante ämipa töö.

³⁴ Ante wæyönäni Itota wæætē tömēnāni inänite,

—Minitö mini wææ yewæmongainö wii iimaï ante yewæmongatü. “Minitö iñömö wængonguïdi iminipa, ante do antabopa,” ante yewæmongadänimpa. ³⁵ Wængonguï angä eñente nāni yewæmongainö ante waodäni ædö cæte Baa äninque wido cæquināni. Wængonguï nänö angainö ante apænecä nē eñēnāni iñönänite tömengä, Minitö wængonguïdi iminipa, angantapa.

³⁶ Ayæ botö Mæmpo botö imote inguipoga da pönoncæte ante, Botö adoboque quimi imipa, ante botö imote apænte ængacäimpa. Iñinque edæ botö tömengä quimo inömo inte tömengä nänö nē da pönongaïmo iñömote edæ botö imote edæ æbänö angüi. Iñæmpa botö iñömö Wængonguï Wëmo inömo imopa, añömote edæ minitö wæætē, Bitö babæ ante Wængonguï ingante godö wënæ wënæ ämipa, ante quinate äminitawo. ³⁷ Botö edæ Mæmpo nänö cædö bai cædāmaï imo bai minitö mäniñedē botö imote pönēnāmaï imini bai waa incædönimpa. ³⁸ Minitö botö imote pönēnāmaï imini incæte botö guiquenē botö Mæmpo nänö cædö bai adobai cæbo iñinque minitö, Botö æbänö cæboo, ante adinque pönencæminimpa. Mänömaï cædinque, Botö Mæmpo ingante botö ewocabo imopa, ante ayæ, Botö adobai botö Mæmpo nempo quēwēmopa, ante eñenguïmini inte ayæ eñēninque pönencæminimpa, ante Itota angacäimpa.

³⁹ Mäninö angä eñēninque tömēnāni wæætē tömengä ingante bæi ongoncæ

cæyönäni tömengä do aamö cæte gocantapa.

⁴⁰ Ayæ Eedotadëe wadæ godinque Oododänö æmæmæa ocæ emænte taod-inque tömengä Wäo wëenëñedë waodäni inänite æpænë nänö guidöniñömö adoyömö gote ongongä ingantapa. ⁴¹ Ayæ tömengä mäniñömö ongöñedë waodäni nangui inäni tömengä weca goto pöningue änänitapa.

—Ate eñencæminimpa, ante Wäo wodi cöwë bamönengæ cædämaï ingä incæte tömengä mäningä Itota ingantedö ante nänö angainö tömänö näwangä ante angantapa, ante apænedänitapa.

⁴² Ayæ mäniñömö ongöningue waodäni nangui inäni Itota ingante wede pönënanäni bagadänimpa.

11

Datado wængäimpa

¹ Mäniñedë wacä onguiñængä tömengä emöwo Datado wënæ wënæ badinque öñönongäimpa. Mäadiya tönö Mäadota tömengä tönïñada nana quëwëñömö tömengä adoyömö Betänia iñömö quëwëñongäimpa.

² Ìngä Mäadiya guiquënë ayæ ate ogui wapæ ænte Awënë Itota ingante öni pædinque nämä ocagui inte tömengä önöwa amimö cæquingä adocä Mäadiya iñongä tömengä tönïñacä Datado ñöwo wënæ wënæ bacä inongäimpa. ³ Ìninqe Datado tönïñada iñömö, Itota ingante aa pebi pongæ, äna eñente wacä gote,

—Awënë eñëmi, Bitö në waadecä iñömö wënæ wënæ ingampa cæbii, ante änapa, ante apænecantapa.

⁴ Mäninö nana änö ante apænecä eñëninque Itota,

—Mäninö wënæ wënæ inte nänö wædö iñömö wii wængui impa. Wæætë waodäni, Wængongui ñäo apäite emönongä ingampa, ante acædänimpa. Ayæ botö imote, Bitö Wængongui Wëmi adobaï ñäo apäite emönömi imipa, ante apænecædänimpa, ante mäningä wënæ wënæ ingampa, angantapa.

⁵ Mäadota tönö tömengä tönïñacä Mäadiya nana caya inate ayæ Datado ingante Itota tömënäni inänite waadete pönëñongäimpa.

⁶ Datado wënæ wënæ ingampa, ante apænecä eñngä incæte Itota nänö

ongöñömö adoyömö mëönaa ayæ ongongantapa. ⁷ Tömengä ayæ ate tömengä emiñænäni inänite,

—Ægodöedäni, wæætë Oodeabæ mönö gocæimpa.

⁸ Äñongä tömënäni wæætë tömengä ingante,

—Awënë në Odömömi imi, wantæyö intapa oodeoidi bitö imite dicaca tacacæ cædäni incæte bitö ñöwo wæætë, Mäniñömö goquimo, ämitawo.

⁹ Ante änäni Itota wæætë,

—Ïñæmpa nænque wii tömäa itædë apäitawo. Itædë në gocä mönö nænque inguipoga apäicä ate beyæ tëwadämaï gocampa. Botö iñömö itædë gocä bai adobaï müimo botö quëwenganca botö cæquënëñö iinqe cæquinque gobopa. ¹⁰ Woyowotæ në gocä bai guiquënë tömengä wæætë ñäo dæ ä beyæ tëwate bai gocampa, angacäimpa.

¹¹ Mäninö angä ate tömengä godömenque tömënäni inänite,

—Mönö æmigo Datado iñömö mö ñongä. Botö ñöwo tömengä weca gote, Ñäni ömæmoe, ämo ñäni ömæmonguingä, ante apænecantapa.

¹² Tömengä emiñænäni wæætë tömengä ingante,

—Awënë Itota, tömengä mö ñongä ininqe edæ gancæ baquingä, apænedänitapa.

¹³ Itota Datado nänö æmæwo wænimämo ante apænecä incæte tömengä emiñænäni guiquënë, Datado önonque mö ñongampa, ante Itota apænecampa, ante pönëñönänimpa.

¹⁴ Mänömaï beyæ Itota tömënäni inänite,

—Datado æmæwo wængäimpa, ante edonque pöni apænecantapa. ¹⁵ Minitö pönencæminimpa, ante botö, Tömengä wæncæ cæyongä botö tömengä weca ongönämaï intabopa, ante minitö beyæ ante tobopa. Ægodöedäni, tömengä weca mönö gocæimpa, angantapa.

¹⁶ Ayæ Tömato Äancadënaque nani äñongä iñömö Itota emiñænäni wadäni inänite,

—Ægodöedäni, äninqe, Tömengä tönö godongämæ wæncæte ante tömengä miñæ gocæimpa, angacäimpa.

Itota mönö ömæmonguimämo mönö müi quëwenguimämo ante në pönongä ingampa

17 Ayæ Itota ponte eññongä, Datado baö tömënäni nāni wodintatodē meönaa go meönaa do daga wēnānitapa, ante apænedāni eñngacāimpa. 18 Betānia iñömō nāni taadō godō Eedotadēē nāni quēwēñömō godō eyequei iñonimpa. Mānī taadō wodo tedete quidōmetodo ganca iñonimpa. 19 Oodeoidi nanguī iñāni iñömō Māadota tönō Māadiya weca pōninque, Minatō tōniñacā wængä ate wæwēmina incæte piyænē cæte quēwencæminaimpa, ante waadete apæneçæte ante pōnānitapa. 20 Itota oo pōni pongampa, ante ānāni eññenique Māadota tömengä ingante bee tencæte ante gocantapa. Māadiya guiquēnē oncōnē ee ongongantapa. 21 Māadota Itota weca pōninque tömengä ingante,

—Awēnē Itota, bitō mōnitō weca ongōmi bai botō tōniñacā wīi wæncædongäimpa. 22 Tömengä æmæwo wængä incæte bitō ñōwo Wængonguī ingante quiēmē ante apænebi tömengä pōnō cæcā ænguīmi imipa, ante botō eññemopa, ante apæneçantapa.

23 Angä eññenique Itota tömengä ingante,

—Bitō tōniñacā wodi ñāni ömæmonguingä.

24 Ante apæneçā eññenique Māadota wæætē,

—Ao, inguipoga iinque bayedē mōnō ñāni ömæmōñedē tömengä do wængaingä incæte ñāni ömæmoncæcāimpa, ante botō do eññemopa, angantapa.

25 Itota tömengä ingante āninque,

—Botō nē ñāni ömæmonguimo iñōmo inte cæbo beyænque mīnitō ñāni ömæmoncæcāimpa. Mīni wantæpiyæ quēwenguinque ante nē Quēwēmo iñōmo imopa. Botō imote nē wede pōnengä iñömō do wængä incæte ayæ ate wantæpiyæ quēwencæcāimpa. 26 Ayæ nē mīi quēwengä inte botō imote wede pōnengä iñömō tömengä cōwē wænāmaī quēwencæcāimpa. Bitō māninō ante pōnēmitawo.

27 Angä eññenique Māadota tömengä ingante,

—Awēnē Itota Ao ämopa, ante apæneçantapa. Bitō mōnitō Codito iñōmi imipa, ante pōnēmopa. Wængonguī Wēmi iñōmi inte bitō iñömō edæ, Inguipoga nē Ponguingä, ante nāni angāimi imipa, ante pōnēmopa, ante apæneçantapa.

Itota Datado wodintatodē gote wæcä

28 Mānōmaī ante apænedinque Māadota ocæ emænte gote Māadiya ingante aa pecä pongä ate Māadota tömengä ingante awēmō āninque,

—Mōnō nē Odōmongä do pōninque bitō imite aa pecampa.

29 Angä eññenique Māadiya quingæ ængæ gantite tömengä weca gocantapa. 30 Itota Betānia iñömō ayæ guidāmaī iñongäimpa. Māadota tömengä ingante nānō bee tēniñömō tömengä adoyōmō ayæ a ongōnongäimpa. 31 Oodeoidi Māadiya tönō oncōnē godongämæ ongōninque, Tömengä piyænē cæcæcāimpa, ante tæcæ waadete apæneyōnāni tömengä quingæ ængæ gantidinque taocā adinque tömënāni, Tömengä Datado wodi nānō wodintatodē wæcæte ante gocampa, ante pōnente tömengä ingante tee empote godānitapa.

32 Itota nānō ongōñömō pōninque Māadiya tömengä ingante adinque tömengä önōwa ædæ wæænte apænedinque,

—Awēnē Itota, bitō mōnitō weca ongōmi bai botō tōniñacā wīi wæncædongäimpa, ante wæcantapa.

33 Māadiya mānōmaī wæyongä oodeoidi tömengä tönō godongämæ nē pōnināni adobai wædāni adinque Itota wæwente entawēninque wæcantapa. 34 Ayæ,

—Datado wodi baö æyōmōnō da wēmīnitawo,

Angä eññenique tömënāni,

—Awēnē Itota, pō ae.

35 Ante āñōnāni Itota Ca wæcantapa.

36 Tömengä mānōmaī wæcä adinque oodeoidi,

—Aedāni, tömengä Datado wodi ingante nō waadete pōnengä ingantapa.

37 Ante tedeyōnāni pancadāniya,

—Tömengä iñæmpa nē babetamongä awinca wi æmōnte bai cædingä inte adocä Datado wodi ingante cæcā bai tömengä wīi wæncædongäimpa, ante wægadānimpa.

Datado nānō ñāni ömæmōmāmo

38 Itota wæætē wæwente entawēninque Datado wodintatodē pongacāimpa. Tömengä wodido ontatodē i iñōnte dicabo ñænængade da pæñæ pōnō tee mōnodāni.

39 Adinque Itota,

—Dicabo da tæ ñæedäni, añongä Datado wodi tönĩñacä Mäadota wæætë,

—Awënë Itota, eñëmi. Mëönaa go mëönaa tömengä wodido öñöninge tömengä wodi do öo wadingä ingampa.

⁴⁰ Ante wææ angä eñëninge Itota,

—Bitö wede pönëmi ïninge edæ Wængonguï æbänö ñäo apäite emönongä inte cæcää, ante bitö acæbiimpa, ante bitö ïmite wii antawo, angacäimpa.

⁴¹ ïninge tömënäni dicabo tæ ñænänitapa. Ayæ Itota æmö adinque,

—Mæmpo botö apænedinö ante do eñëmitapa, ante adinque botö bitö ïmite waa ate pönëninge apænebopa.

⁴² Botö apænedö ante æyedëmë apænebo incæ bitö cöwë eñëmipa, ante botö do eñëmopa. Wæætë edæ waodäni botö weca godongämæ gongænäni beyæ ante botö mäninö ante apænetabopa. Bitö botö ïmote da pönömi pontabopa, ante tömënäni pönencædänimpa, ante apænetabopa.

⁴³ Mänömainö ante Wængonguï ingante apænedinque Itota,

—Datado ta pöe, ante yedæ aa pecan-tapa.

⁴⁴ Në wæningä ïñömö edæ do ta pongantapa. Tömengä önonpo weocoo inte näni wini wini cædincoo ayæ empod-
inque önöwa näni wini wini cædincoo ayæ ewadinque tömengä awinca weocoo näni ñäne cæmönincoo ayæ emongä inte ta pongä adinque Itota tömënäni ïnänite,

—Mänincoo ñi cæmini gocæe, angacäimpa.

Itota ingante bæi ongonte ængæimpa, ante tedewënäni

(Mäateo 26.1-5; Mäadoco 14.1-2; Odoca 22.1-2)

⁴⁵ Mänömaï beyæ oodeoidi nangui ïnäni Mäadiya weca eñacæ në pöninäni inte ïnänäni ïñömö Itota mänömaï cæcä adinque tömengä ingante wede pönënäni bagadänimpa. ⁴⁶ Pancadäniya guiquënë Paditeoidi weca godinque, Itota quinö cæcää, ante adodö angadänimpa. ⁴⁷ ïninge Wængonguï qui, ante në godönäni ñænænäni tönö Paditeoidi ïñömö wæætë tömënäni ömæ näni Apænte Äincabo tömänäni ïnänite, Mönö godongämæ apænegacäimpa, ante adoyömö pöedäni, ante añönäni pönäni adinque tömënäni,

—Ïngä ïñömö, Acædänimpa, ante nangui bamönengæ cæcä ingä. Mönö quinö cæquimöö. ⁴⁸ Ante wædinque mönö tömengä ingante, Bitö mänömaï godömenque cædämaï incæbiimpa, ante wii wææ ämö ïninge waodäni tömänäni tömengä ingante pönëmainäni. Tömengä ingante pönënäni ïninge, Itota oodeoidi Awënë bacæte ante cæcampa, ante pönente wædinque odömänoidi incæ edæ wææ cæbainäni. ïninge tömënäni pöninque mönö tæiyæ waëmö oncö wo ewëmainäni. Ayæ mönö ömæ ïñömö mönö quëwencabo incæ nämä në ämö ïñömö tömënäni pö ö ænte bai cædinque tömënäni në änäni babainäni, änänitapa.

⁴⁹ Tömënäni weca adocanque Caiapato mänii wadepo, Wængonguï qui, ante në godongä ñænængä pönii ïngä inte tömengä ïñömö,

—Minitö tömänö ante eñënämaï ïminipa töö, apænegacäimpa. ⁵⁰ Mönö ömæ quëwencabo wii tömämö wængæimpa, ante wæætë tömëmö beyæ ante adocanque onguinængä wængä ïninge godömenque waa ïmampa, ante minitö eñënämaï ïmini inte tedewëmïni awædö.

⁵¹ Mänömainö ante apænedinque Caiapato mä nänö pönënonque ante wii angacäimpa. Wæætë tömengä mänii wadepo ïñonte, Wængonguï qui, ante në godongä ñænængä pönii ïngä inte Wængonguï beyæ apænedinque, Itota ïñömö oodeoidi beyæ ante wæncæcäimpa, ante apænegacäimpa. ⁵² Ayæ wii Oodeabæ quëwënänique beyæ ante wænguingä. Wæætë, Wængonguï wënäni wayömö wayömö pangote godinäni inte adodänique badinque adoyömö godongämæ poncædänimpa, ante tömengä wæncæcäimpa. ⁵³ Caiapato mäninö ante nänö äniönæ ïñonte täno godongämæ pönëninge oodeoidi ömæ näni Apænte Äincabo ïñömö, Äebänö cæte Itota ingante wænömö wænguingää, ante cöwë tedewënönänimpa.

⁵⁴ Mänömaï beyæ Itota ayæ oodeoidi weca wii edonque gocä ïngäimpa. Wæætë wadæ godinque tömengä önömæca eyequei Epadaimë näni añömö godinque

māniñömö tömengä emiñænāni tönö ongönongäimpa.

⁵⁵ Wodo pänta gogaiönæ, ante Patowa nāni cæönæ oo pōni inönimpa. Māniñedē Oodeabæ wayömö wayömö quēwēnāni nangui ināni Eedotadēē quēwēñömö pō æidinqe tömēnāni Patowa nāni ææmæ ayæ cædāmaï iñedē dodāni angai bai cædinque, Mönö wēnæ wēnæ cægainö ante mönō mēnongate bai waēmö bacæimpa, ante nāmā incæ āacæte ante cædinque æi gogadānimpa. ⁵⁶ Adodāni Wængongui oncö ñænæncönē yabæcönē pō guidinque adiyæ gongæninque, Itota æyömönö ingää, ante pönente gomö adinque nāmāneque godongāmæ apænedinque,

—Māningä iñömö ææmæ beyæ ante edæ pönāmaï ingantawo. Æbānō ante pönēmīni, ante apænedönānimpa.

⁵⁷ Wængongui qui, ante godönāni ñænænāni tönö Paditeoidi wæætē waodāni inānite wææ änönānimpa. Æcānō Itota nānō a ongöñömö ante nē ēñengä iñömö tömengä mönitö imönite angä ēñēninque mönitö wæætē Itota ingante yao ongonte æmāimönipa, ante do wææ änönānimpa.

12

Awēnē Itota önöwa ogui wapæ gao cæwacampa

(Mäateo 26.6-13; Mäadoco 14.3-9)

¹ Önompo æmæmpoque go adoönæque ate Patowa nāni āmæ bacæ cæyedē Itota Betānia iñömö pongantapa. Itota do angä ate nē ñāni ömæmönigä Datado iñömö tömengä adoyömö Betānia quēwēnongäimpa.

² Itota pongä adinque waodāni māniñömö quēwēnāni, Itota ingante waa amönipa, ante tömengä beyæ ææmæ cægadānimpa. Wadāni tönö Datado adobai Itota tönö godongāmæ tæ contate cæñönānite Mäadota iñömö tömēnāni inānite cængui godongä cænānitapa. ³ Ayæ Mäadiya iñömö mēedio ditodo ganca nāni ogui wapæ öni pæquimæ nāadodopæ nānō nangui godonte ænimæ incæ ænte māmö Itota önöwa gao cæwadinque tömengä ocagui inte amimö cæcā ininque oncönē tömancönē ogui waacönē ingatimpa. ⁴ Itota miñæ nē gocä adocanque Codaa Icadote nāni änongä

iñömö edæ, Itota ingante æncædānimpa, ante odömönte nē godonguingä inte ñöwo wææ apænecantapa.

⁵ —Iimæ nānō ogui wapæ quinante ömæpodāni beyæ ante godonte ænāmaï ingantawo. Iñæmpa waocä adoque wadepo cæte beyæ paga æninque todetiento deēnadiota nānō ænimpota beyæ mānimæ godonte ænimæ imæmpa, ante wæcantapa.

⁶ Tömengä dicæ ömæpodāni beyæ ante pönēninque mänömainö ante apænecantawogaa. Wæætē tömengä nē awēmö ænongä inte mäninö ante apænecantapa. Tömēnāni da wente æintaa næænongä inte tömengä iñömö, Tömēnāni da wēninta incæ pancataa botö qui bacæimpa, ante awēmö ænongä inte mänömaï apænecantapa. ⁷ Itota wæætē tömengä ingante,

—Onquiyængä ingante piinte ānewēnāmaï incæbiimpa. Mānimæ botö daga wenguionæ ante manguēnengä inte tömengä botö baö nāni daga wenguinque ante eyepæ iñonte öni paacantapa. ⁸ Ömæpodāni cōwē mīnitö weca quēwēnāni inānipa. Botö guiquēnē wii cōwē mīnitö weca quēwēmo imopa, ante apænegacäimpa.

Datado ingante wænongæimpa, ante tedewēnāni

⁹ Itota Betānia ponte ongongampa, ante apænedāni ēñēninque oodeoidi nangui ināni tömengä weca pönāni incæte wii tömengä beyænque pönānitapa. Wæætē adobai Datado ingante angä nē ñāni ömæmönigä ingante acæte ante pongadānimpa. ¹⁰ Mänömaï beyæ Wængongui qui, ante nē godönāni ñænænāni iñömö, Æbānō cæte Datado ingante adobai wænömö wænguingää, ante godongāmæ tedewēnānitapa. ¹¹ Iñæmpa oodeoidi nangui ināni, Datado beyæ mönitö imönite emö cæte Itota ingante pönēninque tömengä gämænö godānipa, ante wægadānimpa.

Itota Eedotadēē iñömö pongä

(Mäateo 21.1-11; Mäadoco 11.1-11; Odoca 19.28-40)

¹² Iimö ate, Eedotadēē iñömö poncæte ante Itota idömæ pongampa, ante apænedāni ēñēninque ææmæ beyæ ante tæiyænāni pönināni iñömö, ¹³ yädēmæmäa

wangö tate mäo bee tente taodisque yedæ aa pedisque,

—Möni quëwenguinque ante, Badogaa, ante tomönipa. Bitö Awënë Wængongui ëmöwo beyænque pömi inique bitö toquinque edæ Wængongui bitö imite waa cæcæcäimpa. Bitö idægoidi Awënë inömi inte bitö toquinque ingæimpa.

¹⁴ Ante yedæ añönäni Itota inömo bodo wengä ate æninque tömengäa æi contate pongantapa. Wëenënedë Wængongui beyæ iimaï ante nani yewæmonte angainö bai inique cædinque pongantapa.

¹⁵ “Tiöno inömo quëwëmini inömo edæ guiñënämaï iedäni.

Minitö Awënë Odeye ñöwo minitö weca pongä aedäni. Edæ bodo wengäa æi contate pongampa,”

ante yewæmongadänimpa. ¹⁶ Tömënäni dodäni nani angai bai cædinque Itota ingante bee tencæ taodäni adinque Itota nänö në ëmiñænäni inömo, Æbänö cædäni, ante mäniñedë ëñënämaï inte wædönänimpa. Wæætë edæ Itota Wængongui ñäö ëmöñömö ocæ ëmænte gocä adinque tömengä ëmiñænäni mäniñedë ate edæ, Itota ingante waodäni ñöwo nani cædönö ante dodäni wëenënedë yewæmongadänimpa, ante pönente wædönänimpa.

¹⁷ Datado wodi ontatodë ongöñongante Itota, Ta pöe, ante aa pecä ëñëninque në wæningä incæ ñäni ömæmöninque ta pongä adinque Itota weca godongämæ ongönänäni nanguï inäni inömo, Itota mänömaï cæcä atamönipa, ante gode ä gode ä cædönänimpa. ¹⁸ Inique edæ, Itota mänömaï bamönengæ cæcampa, ante apænedäni ëñente beyænque waodäni tæiyænäni Itota weca bee tencæ pönänitapa. ¹⁹ Mänömaï beyæ Paditeoidi inömo nämanque godongämæ tedewënanitapa.

—Waodäni tömänäni æbänö tömengä miñæ tee empo godäni ante aedäni. Mänü beyæ ante, Mönö cædinö wii eyepæ impa, ante adinque, Mönö æbänö cæte godömenque cæquimöö, ante wægadänimpa.

Guidiegoidi pancadäniya Itota ingante diqui minäni

²⁰ Eedotadëe inömo tömënäni ææmæ cæyedë Wængongui ingante waa ate apænecæte ante në pönäni pancadäniya inömo guidiegoidi inönänimpa. ²¹ Mäninäni inömo Pedipe weca pöninque edæ,

—Awënë, ëñëmi. Mönitö Itota ingante ainëmönipa, ante änänitapa. Mäningä Pedipe inömo Betaida quëwëñömö Gadideabæ quëwente pongä inongäimpa.

²² Tömengä inömo Æntade weca gote tömengä ingante guidiegoidi nani äninö ante apænecä ate tömëna wæætë Itota weca guëa godinque tömengä ingante añöna, ²³ Itota wæætë,

—Wængongui nänö cæönæ do ba inique tömengä pönö cæcä beyænque botö Waobo ëñagaimö inömo ñäö apäite ëmoncæboimpa.

²⁴ Minitö iminite näwangä ämopa. Tömëmö onguipo quiyadimö incæ yabæque ñömäadämaï i bai ædö cæte tä bocate pædinque tömëmö nanguï pönö imonguü. Wæætë tömëmö yabæque ñömäate ate tä bocate pædinque nanguï pönö imompa. Botö adobai wænguënemo imopa. Botö wii wæmo bai ædö cæte waodäni tæiyænäni botö quinäni baquinänii. ²⁵ Në, Nämanque pönente quëwëmote, ante pönengä inömo edæ tömengä nänö quëwenguimämo incæ wo ewente bacæcäimpa.

Inguipoga quëwënedë në, Wii nämanque pönente quëwëmote, ante pönengä guiquënë tömengä nänö wantæpiyæ quëwenguinö ante do ëadingä inte tömengä nänö wænämaï quëwenguinque gocæcäimpa. ²⁶ Æcänö botö imote në cæda ina tömengä inömo edæ botö imote tee empo goquënegä ingampa. Ayæ æyömönö botö quëwëmo botö imote në cædongä adoyömö quëwencæcäimpa. Botö Mæmpo inömo botö imote në cædongä ingante waa acæcäimpa, ante Itota apænegacäimpa.

Itota, Botö wæncæboimpa, ante apænecä

²⁷ Ayæ godömenque apænedinque Itota iimaï apænecantapa. “Botö guiñëmämo entawëninque wæbo inte quinö anguimoo. ‘Botö Mæmpo ëñëmi, äninque, Botö nantate wæwenguionæ oo pönö ba incæte bitö pönö ö æmi ate wæwënämaï bacæboimpa,’ ante botö wii mänömainö ante ancæboimpa. Edæ botö wæwenguinö beyæ ante pontabopa.

28 Mæmpo, Bitö æbänö ñäo apäite emömi imii, ante odömömi acædänimpa,” angantapa.

Äñongä öönædë inö tedepämo apænedinque ayæ ongöñomote botö imote pönëedäni ämopa, angantapa.

29 Mäniñömö godongämæ ongönäni nangui inäni iñömö mänimämo eñëninque edæ, Detæbo tæi tēmāmo bai impa, ante wædänitapa. Wadäni guiquënë,

—Anquedo iñömö tömengä ingante apænecantapa, ante änänitapa.

30 Itota iñömö wæætë,

—Mänimämo wii botö beyæ ante apænecampa. Wæætë mīnitö beyæ ante apænecampa. 31 Nöwoyedë Wængongui inguipoga quëwënanī inänite apænte nänö panguinö iñömö edæ oo baquinö anguënë. Inguipogaquë quëwënanī awënë iñongante wënæ ingante Wængongui nöwoyedë, Gobäwe, angä gocæcäimpa.

32 Botö imote awäa timpodinque ængæ gantidënanī wægömo ate botö waodäni tömänäni inänite, Mīnitö botö weca poncæminimpa, ante aa pecæboimpa, ante Itota apænecantapa.

33 Mänömainö ante apænedinque tömengä, Æbänö wænguimoo, ante eñencædänimpa, ante apænecantapa.

34 Eñëninque mäniñömö ongönäni nangui inäni,

—Mönitö iñæmpa, Mönö Codito cöwë ee ongoncæcäimpa, ante dodäni nāni wææ angainö ante yewæmonte ongompā, ante eñentamönipa. Incæte bitö iñömö nāmanque äninque, Botö Waobo eñagaimo iñömote botö imote awäa timpodinque gö cædäni wængonguimo imopa, ante ædö cæte ämii. Äninque, Iñgä Waocä nē eñagaingä iñæmpa ee ongönämaī wænte goquingäa.

35 Ante wæyönäni Itota tömënäni inänite,

—Botö, Waodäni mīmönë ñäo bai entawëninque quëwëncædänimpa, ante pontabopa. Wædænque ayæ iñö botö mīnitö weca quëwëninque mīnitö imīnite odömote apænebopa. Mönitö taadö wëmö badämaī ingæimpa, ante mīnitö taadö ayæ ñäo iñedë goedäni. Edæ wëmö iñömö nē gocä iñömö tömengä edæ, Ædönö goboo, ante eñënämaī ingampa. 36 Botö

ñäo bai emönömo imopa. Ñäo iñömö nē cægömöni incæmönimpa, ante bacæte ante cædinque mīnitö iñömö botö mīnitö weca ayæ ongöñomote botö imote pönëedäni ämopa, angantapa.

Tömengä iinque apænete ate wadæ godinque wë womonte ongongacäimpa.

Oodeoidi Itota ingante iūmaī cæte pönënämaī inänipa

37 Itota oodeoidi weca nangui bamönengæ cæte odömongä incæte tömënäni ayæ tömengä ingante pönënämaī inänitapa.

38 Wængongui beyæ nē apænecä Itaiya wodi iūmaī ante do nänö angainö bai iinque baquinque tömënäni mänömaī cædönänimpa.

“Awënë Wængongui eñëmi. Mönitö apænemöni tömënäni nāni eñënö ante edæ æcänö eñente pönengäa. Iñæmpa nē pönengä iñömö edæ dæ angä awædö.

Ayæ Awënë Wængongui nänö tæi piñænte cægainö ante æcänö ada iñömö edæ dæ angampa.”

39 Iinque tömënäni ædö cæte pönenguinänii, ante Itaiya wodi edæ wayömö yewæmöninque, Wængongui iūmainö ante cæcä beyæ pönënanī inänipa, ante yewæmongacäimpa.

40 “Tömënäni botö gämænö ocæ emænte pönäni bai botö wæætë, Waa bacæminimpa, ante godö cæcædömoimpa.

Incæte mänömaī cædämaī incæboimpa, ante Wængongui iūmaī cægacäimpa.

Tömengä godö cæcä beyænque waodäni babetamönäni bai adämaī bagadänimpa.

Adobaī mīmönë nāni pönënö ömædë badinque eñënämaī bagadänimpa.

Edæ, Tömënäni nāni adinö ante eñënämaī incædänimpa, ante cædinque

ayæ edæ, Tömënäni nāni eñënö ante eñënämaī incædänimpa,” ante wææ cægacäimpa.

ante Itaiya wodi yewæmongacäimpa.

41 Itaiya wodi Itota nänö ñäo emömämo æbänö ingui, ante do ate bai ingaingä inte edæ Itota ingantedö ante mäninö ante doyedë angacäimpa.

42 Nöwo guiquënë oodeoidi awënëidi tæiyänäni Itota ingante pönënanimpa. Incæte Paditeoidi beyæ guiñënanī inte,

Mönö odömöincönē go guiiyömönite tömēnāni mönitō imönite wīi tatodoncädānimpa, ante wææ cædinque tömēnāni nē pönēnāni incæ waodāni ēñēñōnāni pæ wēēnete tededāmai inānimpa. ⁴³ Edæ mänināni, Waodāni mönitō imönite waa ate apænecädānimpa, ante nanguī aīnente wædāni inönānimpa. Adodāni, Wængonguī mönitō imönite waa ate apænecæcäimpa, ante pönömenque aīnente wædāni inönānimpa.

Itota nänö änö beyænque waodāni apænte wæcædānimpa

⁴⁴ Itota yedæ äninque aa pecan-tapa. “Botö imote nē pönengä iñömö wīi botö adoboque imote pönēnongä ingampa. Wæætē edæ botö imote nē da pönongaingä ingante tömengä adobai pönengä inongäimpa. ⁴⁵ Adocä botö imote nē acä iñömö tömengä botö imote nē da pönongaingä ingante adobai acä ingampa. ⁴⁶ Botö imote nē wede pönēnāni iñönāni adocanque incæ wēmö iñömö wīi godömenque ee ongoncæcäimpa, ante cædinque botö iñömö inguipoga quēwēnāni weca ñäo bai inömo inte pontabopa.”

⁴⁷ “Waocä botö änö ēñēninque wīi ēñente cæcä ingä incæte botö tömengä ingante apænte änāmai imopa. Edæ botö wīi inguipoga quēwēnāni inānite apænecæte ante pontabopa. Wæætē inguipoga quēwēnāni inānite æmo beyænque quēwencæminimpa, ante pontabopa cæminii. ⁴⁸ Botö imote nē Baa angä iñömö tömengä botö änönö ante, Dicæ pönēmogaa, angä iñongante tömengä ingante nē apænte änö incæ edæ mæ ongompa. Inguipoga iñque baquiönæ iñonte botö äñinö incæ nē apænte anguingä bai ba iñinque mäningä ingante, Bitö pante wæquinque Baa angabiimpa, ante bai apænete ingæimpa. ⁴⁹ Edæ botö wīi nāmanque pönēninque apænetabopa. Wæætē, Botö quīnö apænequimoo, ante, Æbänö ante apænequimoo, ante botö Mæmpo botö imote nē da pönongaingä iñömö tömengä botö imote wææ angä ēñēninque apænetabopa. ⁵⁰ Tömengä nänö wææ angainö ēñente cæbo beyænque mīnitö wantæpiyæ cöwē quēwencæminimpa, ante

do ēñēmopa. Iñinque botö Mæmpo botö imote nänö angainö ante botö adodö ante apænebopa,” ante Itota mäniñedē iñque apænegacäimpa.

13

Itota incæ tömengä emiñænāni önöwa mēñöwacä

¹ Patowa nāni ämæ wantæyö bacæimpa, ante nāni cæyedē Itota iñömö, Botö inguipoga quēwente emö cæte botö Mæmpo weca ocæ emænte æi goquiönæ do bacæimpa, ante do ēñēnongäimpa. Itota ingante pönēnāni nē inguipoga quēwēnāni iñönānite tömengä tömēnāni inānite waadete pönēninque ñöwoyedē, Botö æbänö nanguī waadete pönēmo imoo, ante odömongäimpa.

² Gäwadecæ bayö Itota tömengä emiñænāni tönö godongämæ cæñönāni wēnæ awēnē cæcä beyænque Timönö wengä Codaa Icadiote iñömö, Itota ingante odömonte godoncæboimpa, ante pönengä inongäimpa. ³ Itota iñömö, Quincoomē ongoncoo incæ Wængonguī pönö cæcä beyænque botö tömancoo awēnē badinque nāmā tæi piñænte nē ämo imopa, ante ēñēnongäimpa. Ayæ edæ Wængonguī weca quēwente wææ pönimo inte botö Wængonguī weca ocæ emænte goquiimo imopa, ante do ēñēnongäimpa. ⁴ Mäninö ante ēñēnongä incæ tömengä iñque cænte ate ængæ gantidinque yabæcoo gä ta-dongadinque wadæ caaincoo æninque önoncadeyæ inö goti padengantapa. ⁵ Ayæ ate æpæ mēnongaquintadē pe ñiñænique tömengä emiñænāni tömānāni önöwa mēñöwadinque wadæ caaincoo goti padēincoo inte wadæ cæwacæ tæcæ cæcantapa.

⁶ Mänömai cædinque tömengä Timönö Pegodo weca pongä adinque adocä iñömö tömengä ingante,

—Bitö botö Awēnē imi incæte botö önöwa mēñöwacæ pömitawo.

⁷ Ante añongä Itota wæætē,

—Ñöwoque botö æbänö cæboo, ante ēñēnāmai imipa. Incæte ayæ ate ēñencæbiimpa.

⁸ Angä ēñēninque Pegodo,

—Botö önöwa cöwē mēnōwadāmaī incæbiimpa, ante Baa ämopa cæbii.

Ante äñongä Itota godömenque,

—Botö bitö önöwa mēnōwadāmaī imo bai bitö wii botö quimi imaimipa, ante angantapa.

⁹ Mäninö angä eñëninque Timönö Pegodo wæætē,

—Awënë, Mänömaī i inique bitö wii botö önöwaque mēnōwaquimi. Wæætē botö önömpo adobai mēnompodique botö ocabo mēnoncae.

¹⁰ Ante äñongä Itota wæætē,

—Æpæ nē äadingä iñömö tömengä baö eñayö tömäñö waëmö impa. Inique tömengä önöwaque nämanque mēnōwacä inte eyepæ impa. Minitö do mimö mēnongate waëmö entawënömini iminipa. Incæte wii tömämini waëmö entawëmimi iminipa, angantapa.

¹¹ Edæ, Æcänö botö imote nē odömönte godonguingä ingää, ante tömengä do eñëñongäimpa. Mänömaī beyæ tömengä, “Minitö wii tömämini do mēnongate waëmö entawënömini iminipa,” angantapa.

¹² Ayæ tömēnāni önöwa inique mēnōwadinque tömengä yabæcoo wēñadinque tömengä adodö gote tæ contadique tömēnāni inänite,

—Botö mänömaī cædique minitö beyæ ante quinö cæboo, ante eñëminitawo, ante äninque Itota godömenque, ¹³ Minitö botö imote, Nē Odömömi imipa, äninque ayæ adobai, Awënë imipa, ämini iminipa. Edæ botö minitö Awënë inömo inique minitö mänömainö ante näwangä ante äminipa.

¹⁴ Botö iñömö minitö Awënë inömo inte nē minitö iminite Odömömo imo incæ minitö önöwa do mēnōwabo äminipa. Inique botö mänömaī mēnōwabo bai minitö adobai wacä önöwa wacä önöwa mēnōwaquēnēmimi iminipa. ¹⁵ Botö cæbo bai minitö adobai cæcæminipa, ante cædique botö minitö beyæ ante cæbo aedäni. ¹⁶ Minitö iminite näwangä ämopa. Awënë ñænængä inongä iñongante tömengä ingante nē cæcä iñömö wii godömenque ñænængä ingampa.

Awënë nē da godongä ñænængä iñongä tömengä nänö nē da godöningä wæætē wii godömenque ñænængä ingampa. ¹⁷ Minitö ñöwo mäninö ante eñënimimi inte edæ

ado ante cæmini inique mini toquinque bacæimpa, ante Itota apænecantapa.

¹⁸ Ayæ apænedinque, “Botö wii tömämini beyæ antabopa. Botö apænte ænināni ædänidö ināni, ante botö nē eñëmo imopa. Wængongui angä eñente nāni yewæmongainö bai inique bacæimpa, ante iimaī bacæ cæpa. ‘Botö tönö godongämæ nē cængongä iñömö botö imote nē piinte cæcä bacantapa.’ ¹⁹ Mänömaī ba adinque edæ minitö botö imotedö ante apænedinque, Tömengä mönö Codito inongä ingampa, ante pönencæminipa, ante cædique botö ñöwo ayæ badāmaī iñedē minitö iminite ämopa. ²⁰ Minitö iminite näwangä ämopa. Æcämenque botö nē da godongaingä ingante æna tömengä iñömö edæ botö imote adobai ængä ingampa. Ayæ æcämenque botö imote æna tömengä iñömö botö imote nē da pönongaingä ingante ængä ingampa cæminii,” ante Itota apænegacäimpa.

Itota ingante Codaa nē godonguingä ingampa, ante

(Mäateo 26.20-25; Mäadoco 14.17-21; Odoca 22.21-23)

²¹ Mäninö angä ate Itota iñömö tömengä nänö wæwëmämo entawëninque wæcä inte, Näwangä ante apænebo eñëedäni. Mini cabo incæ adocanque, Æncädänimpa, ante botö imote odömönte pædæ godonguingä ingampa.

²² Ante apæneca wædique tömengä emiñænāni, Æcänö ingante apænecaä, ante eñëñämaī inte godongämæ wacä ingä wacä ingä adänitapa. ²³ Itota emiñænāni adocanque iñömö Itota nänö nē waadete pönengaingä inongäimpa. Tömengä iñömö Itota tönö äñömonque tæ contate ongönaimpa. ²⁴ Timönö Pegodo iñömö iingä ingante ömö ömö cædique angampa. Bitö Itota ingante, Æcänö ingää, ante ämi angä eñente ate apænebi eñëmönie. ²⁵ Angä eñëninque mäningä Itota tönö äñömonque nē tæ contacä iñömö,

—Awënë, æcänö ingää, ante apænebi eñëmönie, ante tömengä ingante äñongä.

²⁶ Itota wæætē,

—Botö ii päo owætaca mi cæte godömo nē ænguingä iñömö tömengä nē cæquiringä ingampa.

Ayæ päo owætaca müi cædinque Timönö wë Codaa Icadote ingante godongantapa. ²⁷ Codaa päo ængä ate Tatäna iñömö tömengä do guiigacäimpa. Ìinque tömengä ingante,

—Bitö quïnö cæcæ cæbii edæ quingæ cæe, ante Itota angantapa.

²⁸ Wadäni adoyömö nê cænäni iñömö, Itota quïnante mäninö ante tömengä ingante angäa, ante eñenämäi inönänimpa.

²⁹ Edæ Codaa tömënäni da wente æinta næænongä ingä beyæ tömënäni pancadäniya, Ææmæ beyæ ante mönö cængui wii eyepæ ëamöni ìinque, Bitö godonte æncæbiimpa, ante Itota angampa, ante pönönänimpa. Adobaï ömæpodäni inänite, Godömi ænguïnänimpa, ante Itota angampa, ante pönönänimpa.

³⁰ Codaa päo ænte ate tao gogacäimpa. Do woyowotæ inönimpa.

Itota nänö wææ änönö ante ñöwo angampa

³¹ Codaa dæ gocä adinque Itota,

—Botö Waobo eñagaïmo inte æbänö ñäo apäite emönömo imoo, ante ñöwo edonque bacæimpa. Botö cæquïnö beyæ Wængongui æbänö ñäo apäite emongä ingäa, ante edonque bacæimpa. ³² Ayæ botö cæquïnö beyæ Wængongui ñäo apäite nänö emönö edonque ba ìinque Wængongui cæcä ate botö ñäo apäite botö emönö adobaï edonque bacæimpa. Ayæ mänömaï Wængongui wantæyö cæcæcäimpa. ³³ Botö wëmini botö mïnitö weca wantæyö quëwëninque gobopa. Mïnitö botö imote ante diqui diqui minguimïni iminipa. Ayæ oodeidi inänite botö angainö bai ñöwo mïnitö iminite adodö amopa. Botö goquïñömö ante mïnitö ædö cæte ponguimïni imïni. ³⁴ Botö wææ änönö ante ñöwo mïnitö iminite amopa. Wacä ingä wacä ingä waadete pönencæminimpa. Botö mïnitö iminite waadete pönönömo bai mïnitö adobaï wacä ingä wacä ingä waadete pönenguënemïni iminipa. ³⁵ Mïnitö wacä ingä wacä ingä waadete pönemïni adinque wadäni tömänäni, Mïnitö Itota nänö nê emiñæmïni iminipa, ante eñencædänimpa, ante Itota apænecäimpa.

Pegodo incæ, Dicæ abogaa, angingü ingampa, ante

(Mäateo 26.31-35; Mäadoco 14.27-31; Odoca 22.31-34)

³⁶ Timönö Pegodo tömengä ingante,

—Awënë, ædömë gobii.

Ante añongä Itota wæætë,

—Botö goquïñömö ante bitö ædö cæte botö imote ñöwo tee empo ponguimi imii. Ayæ ate guiquënë bitö botö imote tee empo ponguimi incæbiimpa, angantapa.

³⁷ Pegodo godömenque,

—Awënë, äinque, Botö quïnante bitö imite ñöwo tee empo godämaï imoo, ante wæcampa. Botö Ao äinque bitö beyæ ante nämä wænguimo imopa.

³⁸ Ante añongä Itota wæætë,

—Bitö Ao äinque botö beyæ ante näwangä wænguimi imiyaa. Bitö imite näwangä ante apænebo eñëe. Tawadiya pedämaï iñonte bitö iñömö botö imotedö, Dicæ abogaa, ante mempoga go adopoque anguimi imipa, ante apænecäimpa.

14

Mæmpo weca mönö godö ante Itota taadö bai ingampa

¹ Itota tömengä emiñænäni inänite, “Mimönë guïñente wädämaï iedäni. Wæætë Wængongui ingante wede pönëedäni, angantapa. Ayæ adobaï botö imote wede pönëedäni. ² Botö Mæmpo nänö quëwëñömö onconcoo bacoo pöni mæ ongompa. Mänömaï impa, ante wii näwangä i bai botö mïnitö iminite ancædömoimpa. Mïnitö beyæ ante botö, Mïni ponte quëwenguï onconcoo ante tömäa ædæmö badoncæte ante mäniñömö gocæboimpa. ³ Ayæ mïnitö quëwenguï onconcoo tömäa ædæmö mænoncæte ante gobo ìinque botö ocæ emænte poncæboimpa. Pöninque mïnitö botö quëwëñömö adoyömö botö tönö godongämæ quëwencæminimpa, ante botö mïnitö iminite ænte mæibo æicæminimpa. ⁴ Botö goquïñömö æyömönö i, ante ayæ mäniñömö gocæte ante taadö godö ante mïnitö do eñëmïnipa,” ante Itota apænecantapa.

⁵ Apænecä eñëninque Tömato iñömö tömengä ingante,

—Awënë, Ædömë goquimii, ante mönitö eñenämaï imöni inte mönitö mäninö bitö goquinö ædönö i, ante taadö ædö cæte eñenguimöni.

⁶ Æñongä Itota wæætë,

—Botö iñömö tömëmo në taadömo bai inömo imopa. Ayæ botö adobo në näwangä änö bai inömo bai iñömote minitö æbänö näwangä impa, ante eñenguimini iminipa. Botö edæ në Quëwëmo inte pönö cæbo beyænque minitö quëwenguimini iminipa. Botö wii pönö cæbo bai waocä æcämenque incæ botö Mæmpocä weca godämaï incædongäimpa. ⁷ Botö imote do ate pönëmini inique minitö botö Mæmpo ingante adobai ate pönëmini imaiminipa. Nöwo tömengä ingante tæcæ ate bai pönëmini inte minitö tömengä ingante cöwë në agaimini incæminimpa, ante apænecantapa.

⁸ Mäninö apænecä eñëninque Pedipe iñömö,

—Awënë, Mæmpocä ingante odömömi amönie. Mäninque adinque idæwaa. Eyepæ impa.

⁹ Æñongä Itota wæætë,

—Pedipe eñëmi. Botö minitö weca wantæpiyæ quëwëmo incæ bitö ayæ botö imote adämaï inte bai pönënamai imitawo. Në botö imote acä iñömö tömengä adobai Mæmpocä ingante në acä ingampa. Inique bitö iñömö, Mæmpocä ingante odömömi amönie, ante ædö cæte botö imote ämii. ¹⁰ Wæmpocä nempo botö në quëwëmo imopa, ante ayæ, Wæmpocä ingante botö entawëmo imopa, ante bitö pönënamai imitawo. Botö minitö iminite, Æbänö apæneboo, ante wii nämanque pönëninque apænebopa. Wæætë botö Wæmpocä incæ botö tönö në äawocaque bai quëwëmongä inte edæ tömengä nänö cædö ante në cæcä ingampa. ¹¹ Tömengä nempo quëwëmo imopa, ante ayæ, Tömengä ingante botö entawëmo imopa, ante minitö iminite apænebo eñëninque pönëdäni. Wæætë edæ minitö botö änö beyænque ayæ pönënamai imini incæte botö bamönengæ nanguï cædinö adinque mäninö beyænque pönëdäni. ¹² Minitö iminite näwangä ämopa. Botö imote në wede pönengä iñömö tömengä botö cæbai adobai cæcæcäimpa. Ayæ

botö Mæmpocä weca ocæ ëmænte gobo beyæ në wede pönengä iñömö edæ wii önonque botö cæbai cædinque godömenque cæquingä ingampa. ¹³ Minitö botö ëmöwo ante apænëdinque quiëmë æncæte ante apænëmini eñëninque botö Wængongui Wëmo inömo inte edæ, Mæmpocä nänö ñäö ëmömämo edonque pönö acædänimpa, ante cædinque minitö änö bai edæ do cæcæboimpa. ¹⁴ Minitö, Ænguimöni, ante quiëmë beyæ ante botö ëmöwo ante botö imo apænëmini eñëninque do cæcæboimpa, ante Itota apænecäimpa.

Wængongui Tæiyæ Waëmö Önöwoca poncæcäimpa, ante

¹⁵ Ayæ godömenque apænëdinque Itota iïmaï ante apænecantapa. “Minitö botö imote waadete pönëmini inique botö wææ angainö ante eñente cæquimini imaiminipa. ¹⁶ Ayæ, Wacä botö beyæ ante minitö tönö godongämæ cæquingä, ante botö iñömö botö Mæmpocä ingante, Da godömi gocæ, ante apænecæboimpa. Ayæ tömengä botö änö ante do eñente cædinque edæ, Tömengä minitö tönö cöwë ongonte godongämæ cæcæcäimpa, ante cædinque adocä ingante minitö weca da pönongä ponguingä ingampa. ¹⁷ Wængongui në nö cæcä ingampa, ante näwangä impa, ante Wængongui Tæiyæ Waëmö Önöwoca incæ në odömongä inongä ingampa. Incæte waodäni në ingui-pogaque quëwënanäni iñömö tömengä ingante adämaï inäni inte pönënamai inönäni inte edæ ædö cæte tömengä ingante Ao ante ænguänäni. Wæætë edæ tömengä minitö weca quëwëmongä iñongante minitö tömengä ingante në entawenguimini inte tömengä ingante do ate bai pönëmini iminipa,” ante Itota apænecantapa.

¹⁸ Ayæ apænëdinque, “Botö wii minitö nöwamini bai mini baquinque ante edæ ëmö cæte goquimo imopa. Wæætë minitö weca ocæ ëmænte poncæboimpa. ¹⁹ Wantæ ate waodäni në ingui-pogaque quëwënanäni iñömö edæ botö imote adämaï inguinäni inäni. Minitö guiquënë botö imote aquimini iminipa. Edæ botö quëwëmo beyænque minitö adobai quëwëncæminipa. ²⁰ Ayæ

Wængongui Tæiyæ Waëmö Önöwoca nänö ponguionæ iñonte mīnitö iñömö edæ, Mönö æbänö äanque bai quëwëmö imöö, ante eñencæminimpa. Edæ, Botö Mæmpocä nempo quëwëmö imopa, ante ayæ edæ, Mīnitö botö nempo quëwëmini iminipa, ante ayæ, Mīnitö imīnite adobai botö entawëmo quëwënömini iminipa, ante mīnitö eñencæminimpa. ²¹ Æcänö botö wææ angainö ö æninqe eñente cæda tömengä iñömö botö imote nē waadete pönengä ingampa. Botö imote nē waadete pönengä ingante botö Mæmpo näemæ waadete pönencæcäimpa. Ayæ botö adobai mäningä ingante waadete pönencæboimpa. Ayæ, Botö æbänö imoo, ante tömengä ingante odömömo acæcäimpa,” ante Itota apænecantapa.

²² Codaa iñömö edæ wii Codaa Icadote wacä Codaa iñömö edæ Itota ingante apænecantapa.

—Awënë iñæmpa bitö mönitö imönite apænedinque, Botö æbänö imoo, ante odömömo acæminimpa, äninqe quīnante wæætë, Inguipogaque quëwënäni inänite odömönämai incæboimpa, ante pönëninque cæbitawo, angantapa.

²³ Itota wæætë,

—Wacä botö imote nē waadete pönengä ininque tömengä iñömö botö odömönte apænedö ante eñente cædongä imaingampa. Botö Mæmpo adocä ingante waadete pönenguingä ingampa. Ayæ mönatö tömengä tönö cöwë godongämæ quëwencæte ante tömengä weca ponguimöna imönapa. ²⁴ Botö imote nē waadete pönënämai ingä guiquënë tömengä iñömö botö odömönte apænedönö ante eñënämai cædongä ingampa. Mäninö botö odömönte apænebo mīni eñëninö iñömö wii botö nämä pönëninque apænedinö impa. Wæætë botö imote nē da pönongaingä nänö angainö impa, ante Itota apænecantapa.

²⁵ Ayæ apænedinque, “Mīnitö weca botö quëwëñedë botö mäninö ante mīnitö imīnite apænetabopa. ²⁶ Botö Mæmpocä botö emöwo beyæ ante tömengä Tæiyæ Waëmö Önöwoca ingante da pönongä ponguingä inte tömengä mīnitö tönö godongämæ nē cædongä ingampa. Adocä mīnitö imīnite tömänö ante odömönte apænecä

eñencæminimpa. Ayæ botö apænedö mīni eñëninö tömänö ante tömengä adodö apænecä wæætë pönencæminimpa,” ante Itota apænecantapa.

²⁷ Ayæ apænedinque, “Botö pönö cæbo beyænque mīnitö gänë entawente quëwëdäni, ante pönö cædinque gobopa. Botö gänë entawëmämo incæ mīnitö imīnite pönömo æninqe mīnitö gänë pönente quëwencæminimpa. Botö inguipogaque quëwënäni nāni godönö bai wii pönömo imopa. Nö cæte pönömo imopa. Mīnitö mīmönë guiñente wädämai inte piyænë cæte quëwencæminimpa. ²⁸ Botö mīnitö imīnite emö cæte godinque mīnitö weca ocæ emænte poncæboimpa, ante botö apænebo eñëmīnitapa. Botö edæ, Botö Mæmpocä weca gocæboimpa, ante apænebo eñënimīni inte mīnitö botö imote waadete pönëmīni ininque botö beyæ ante watapæ tobaiminipa. Edæ botö wii botö Mæmpo bai inömo inte wädämo inömo imopa. ²⁹ Mänömai ininque ba adinque mīnitö, Nāwangä impa, ante pönencæminimpa, ante botö ñöwoque ayæ badämai iñedë mīnitö imīnite apænetabopa,” ante Itota apænecantapa.

³⁰ Ayæ apænedinque, “Ii inguipogaque quëwënäni awënë iñömö wënæ inongä inte oo poncæ cæcampa. Ininque botö mīnitö imīnite wii wantæpiyæ ayæ apænebopa. Edæ tömengä ædö cæte botö imote nämä tæi piñænte nē angä inguingä. ³¹ Incæte botö, Wadäni inguipogaque quëwënäni iñömö iimai ante eñencædänimpa, ante cæbopa. Botö Mæmpo ingante botö waadete pönëmopa, ante ayæ, Botö Mæmpo botö imo wææ angä bai botö adodö cæbo imopa, ante tömënäni eñenguënänäni inänipa,” ante Itota ininque apænegacäimpa.

Ayæ, “Ñöwo edæ ængæ gantidinque mönö gocæimpa,” angacäimpa.

15

Itota näwä yowementa bai ingampa

¹ Ayæ godömenque apænedinque Itota iimai apænecantapa. “Botö näwä yowementa bai imopa. Ayæ botö Mæmpo yowementa nē aacä bai ingampa.

2 Botö imote pönänäni tömänäni iī yowementa gädēmænto bai inänipa. Æcänö wii botö emiñængä bai cæda tömengä iñömö gädēmænto ömæcato bai ingampa. Botö Mæmpo gädēmænto ömæcato bai iñongante wangö topænte bai cædinque tömengä ingante wido cæcampa. Æcänö botö emiñængä bai cæda guiquënë tömengä gädēmænto tömenca incato bai ingampa. Gädēmænto tömenca incato incæ godömenque waa pædinque nangui incacæimpa, ante wææ topæ wææ topæ cædäni bai botö Mæmpo iñömö adobai cæcampa. Botö nē emiñængä wii eyepæ cæcä adinque tömengä ingante wadæ cæcampa. 3 Botö änö ante mīnitö imīnite botö apænedinö beyæ mīnitö mīmönē do mēnongate quēwēmīni imīnīpa. 4 Mīnitö botö nempo ee quēwēnömīni incæmīnīpa. Ayæ adobai mīnitö botö imote cōwē entawente quēwēnömīni imīnīpa. Gädēmænto yowementa adoyömö ibænte odæ yate bai pæte incate bapa. Edæ gädēmænto adotoque iñonte ædö cæte nämä cædinque incaquintoo. Mīnitö iñömö, Tömenca incate bai mönö nangui cæcæimpa, ante cædinque botö nempo ee quēwenguēnēmīni imīnīpa,” ante Itota apænecantapa.

5 Ayæ apænedinque, “Botö yowementa bai imopa. Mīnitö guiquënë gädēmænto bai imīnīpa. Waocä botö nempo ee quēwēnongä inte ayæ botö imote cōwē entawēnongä ingä iñinque tömengä tömenca incate bai nangui cæbaingampa. Wæætē edæ botö nempo quēwēnämaī imīni iñinque mīnitö tömää cædämaī imaīmīnīpa tōö. 6 Nē botö nempo ee quēwēnämaī ingä iñömö tömengä gädēmænto näni wido cædinto bai ingampa. Mäninto amīmö bayonte gæte mämö gongapamö ñö cædäni wo bæco bai cædinque tömengä ingante botö Mæmpo adobai wido cæcä ingampa,” ante Itota apænecantapa.

7 Ayæ apænedinque, “Mīnitö guiquënë botö nempo ee quēwēninque botö angainö ante ee entawente quēwēmīni iñinque mīnitö quiēmē æncæte ante äinēmīni incæ Wængongui ingante apænemīni inte tömengä wæætē pönongä æmaīmīnīpa. 8 Mīnitö nangui pönī tömenca incate bai imīni inte, Mīnitö botö emiñæmīni

imīnīpa, ante edonque pönī ingæimpa. Mänömaī cæmīni iñinque, Botö Mæmpo ñäö apæite emönongä ingampa, ante odömonte ingæimpa. 9 Botö Mæmpo iñömö botö imo waadete pönengä ingaingä bai botö adobai mīnitö imīnite waadete pönemo intabopa. Botö nē waadete pönemo iñömote mīnitö iñömö botö nempo ee ongödäni. 10 Botö Mæmpo nē waadecä iñongante botö tömengä nänö wææ angainö ante eñente cædimo inte tömengä nempo ee ongömopa. Mīnitö adobai botö nē waadete pönemo iñömote mīnitö botö wææ angainö ante eñente cæmīni iñinque edæ botö nempo ee ongömīni imaīmīnīpa,” ante Itota apænecantapa.

11 Ayæ apænedinque, “Botö watapæ topämo ante mīnitö mīmönē entawēninque watapæ tocæmīnīpa, ante ayæ, Mīni watapæ topämo eyepæ ingæimpa, ante botö mīnitö imīnite mäninö ante apænetabopa. 12 Botö wææ änö iñömö iīmaī ante impa. Mīnitö imīnite botö waadete pönēninö bai mīnitö adobai wacä ingä wacä ingä waadete pönēedäni. 13 Æcänö nänö æmigoidi beyæ ante, Botö Ao äinque nämä incæ tömēnäni beyæ ante wænguimo, ante cæcä iñömö tömengä nänö waadete pönēmämo wii waodäni tömänäni waadete pönēmämo bai impa. Tömengä iñömö edæ godömenque nangui waadete pönengä ingampa. 14 Mīnitö botö wææ angainö eñente cæmīni iñinque botö guidēmīni imaīmīnīpa. 15 Mīnitö botö imo nē cædömīni imīnīpa, ante botö mīnitö imīnite godömenque apænedämaī imopa. Edæ awënë ingante nē cæcä iñömö, Awënë æbänö cæcä, ante eñēnämaingä ingampa. Wæætē edæ botö Mæmpo nänö angainö ante botö eñēninö tömänö ante mīnitö imīnite apænebo eñēmīni beyæ botö, Mīnitö botö guidēmīni imīnīpa, ante apænedimo imopa. 16 Mīnitö wii botö imote apænte ænīmīni imīnīpa. Wæætē botö iñömö, Mīnitö botö emiñæmīni inömīni inte tömenca nangui incate bai nangui cæcæmīnīpa, ante mīnitö imīnite apænte ænimo imopa. Mīnitö botö emiñæmīni inömīni inte cōwē cæmīni iñinque mīnitö quiēmē ante botö emöwo beyænque apænemīni eñēninque Mæmpocä iñömö do

pönongä æncæminimpa. ¹⁷ Botö wææ änö iñömö iïmaï ante impa. Minitö wacä ingä wacä ingä waadete pönëedäni,” ante Itota apænegacäimpa.

Inguipogaque nē quēwēnāni Itotaidi inānite nāni pūmāmo

¹⁸ Mänömainö ante apænedinque Itota godömenque iïmaï ante apænegantapa. “Inguipogaque nē quēwēnāni iñömö mīnitö imīnite pūnāni adinque mīnitö guīñēnāmaï inte edæ, Itota ingante do pūngadānimpa, ante pönēmīni imīnīpa.

¹⁹ Waodāni nē inguipogaque quēwēnāni nāni cabo wacä ingä wacä ingä waadete pönēnāni inānīpa. Mīnitö inguipogaque nāni quēwēncabo tönö adomīni imīni bai tōmēnāni mīnitö imīnite adobaï waadete pönencädönānimpa. Wæætē mīnitö inguipoga nāni quēwēncabo tönö adomīni ināmaï imīnīpa. Iñæmpa wēēnēñedē mīnitö inguipoga quēwēñōmīnite botö do mīnitö imīnite apænte æntabopa. Mänömaï beyæ nē inguipogaque quēwēnāni iñömö mīnitö imīnite pūnāni inānīpa. ²⁰ Botö änö ante mīnitö imīnite, Æbānō apæneboo, ante ñōwo wæætē pönëedāni. ‘Awēnē ñænængä inongä iñongante tōmengä ingante nē cæcä iñömö wīi godömenque ñænængä ingampa.’ Waodāni botö imote pūnāni wæwēmo bai mīnitö imīnite adobaï pūnāni wæwēmīni incæminimpa. Botö odömōnte apænegainö ante ēñente cädāni bai mīnitö odömōnte apænedö ante adobaï ēñente cæcädānimpa. ²¹ Mīnitö botö quīmīni iñōmīnite edæ botö emōwo beyænque iñāni, Botö imote nē da pönongaingä, Æbānō ingää, ante ēñēnāmaï ināni inte mänömaï edæ cæquināni inānīpa,” ante Itota apænegantapa.

²² Ayæ apænedinque, “Botö tōmēnāni inānite wīi ponte apænebo bai tōmēnāni nāni wentamö mongænguimāmo mongænāmaï incädönānimpa. Ñōwo iñömö, Botö apænebo nē ēñēnāni inte tōmēnāni nāni wentamö mongæmāmo do mongænānīpa. Iñæmpa Itota apænegä ēñēnāmaï imōnīpa, ante ædö cæte anguīnāni. ²³ Botö imote nē pūngä iñömö tōmengä adobaï botö Mæmpocä ingante pūngä ingampa.

²⁴ Wacä, Botö bamönengæ botö cæbai

adobaï cæcä iñömö cōwē dæ angampa. Iñinque botö wīi tōmēnāni weca bamönengæ cæbo bai tōmēnāni nāni wentamö mongænguimāmo mongænāmaï incädönānimpa.

Incæte, Botö æbānō cæboo, ante do adāni incæ tōmēnāni botö imote pūinque botö Mæmpo ingante adobaï pūnānitapa.

²⁵ Dodāni nāni wææ yewæmongaintaa yewæmōninque iïmaï ante nāni apænegainö bai ñōwodāni nāni cädö beyæ edæ inque batimpa. ‘Botö imote önonque pūnānitapa,’ ante yewæmongadānimpa,” ante Itota apænegantapa.

²⁶ Ayæ apænedinque, “Botö edæ botö Mæmpo weca ocæ emænte gote ate mīnitö beyæ ante mīnitö tönö godongämæ cæqingä ingante da pönocæboimpa. Māningä iñömö Wængonguī Tæiyæ Waēmö Önōwoca inongä inte edæ, Æbānō nāwangä i, ante apænegä ēñencæminimpa. Tōmengä botö Mæmpo weca quēwente ponguingä ingampa. Pöninque tōmengä, Botö æbānō cæboo, ante apænegä ēñencæminimpa.

²⁷ Mīnitö adobaï wēēnēñedē botö mä cæyedē do botö miñæ godimīni imīni inte edæ, Botö æbānō cæboo, ante apænequēnēmīni imīnīpa,” ante Itota tōmengä nānō nē emīñænāni inānite apænegacäimpa.

16

¹ Godömenque apænedinque Itota iïmaï apænegantapa. “Mīnitö oda cädāmaï tæi gongænte ongoncæminimpa, ante cædinque botö mīnitö imīnite mäninö ante tōmānō apænetabopa. ² Mīnitö odömōincōnē go guiyōmīnite wadāni, Mōnitö tönö godongämæ ongönāmaï iedāni, ante mīnitö imīnite tatodönāni gocæminimpa.

Wīi mäninonque cæquinānimpa. Wæætē iincayæ ate æcāmenque mīnitö imīnite nē wænonguīna ina iñömö tōmengä, Botö Wængonguī nānō cädö ante cæbopa, ante pönencæcäimpa. ³ Botö Mæmpo ingante wīi adinque pönēnāmaï ināni inte ayæ botö imote adāmaï inte bai pönēnāmaï ināni iñömö tōmēnāni iñömö mīnitö imīnite mäninö cæquināni inānīpa. ⁴ Edæ mänionæ bayonte mīnitö, Botö wææ angainö ante æbānō amoo, ante wæætē pönencæminimpa, ante botö mīnitö imīnite mäninö ante do apænetabopa,” ante Itota apænegacäimpa.

Wængonguī Tæiyæ Waëmō Ōnōwoca nānō cædō

Ayæ godōmenque apænedinque Itota iīmaī apænecantapa. “Mīnitō tōnō wēēnēñedē godongāmæ ongōmo beyæ botō mānīnō ante māniñedē apænedāmaī intabopa. ⁵ Botō imo nē da pōnongaingā weca botō ñōwo pōni ocæ ēmænte goquīmo incæte, Bitō æyōmōnō goquīmi, ante mīnitō tōmāmīni botō imote ānāmaī iīmīnīpa. ⁶ Botō mānīnō āmo beyæ mīnitō nanguī pōni wæwēmīni iīmīnīpa. ⁷ Incæte botō mīnitō iīmīnite nāwangā āmopa. Mīnitō beyæ waa ingæīmpa, ante botō goquīmo imopa. Botō wadæ godāmaī imo baī mīnitō tōnō godongāmæ nē cæqingā iñōmō mīnitō weca pōnāmaī incædongāīmpa. Wæætē edæ cōwē goquīmo inte godinque botō tōmengā ingante mīnitō weca da pōnōmo ponguingā ingampa. ⁸ Pōninque Wængonguī Tæiyæ Waëmō Ōnōwoca cæcā beyænque ingui-pogaque quēwēnāni, Mōnō wēnæ wēnæ cædōmō inte wentamō mongæmō awædō, ante wæcædānīmpa. Ayæ tōmengā cæcā beyænque, Wængonguī weca æcānō nō cæte quēwēna ina, ante ēñencædānīmpa. Ayæ Wængonguī apænte ante pancæcāīmpa, ante adobaī ēñencædānīmpa. ⁹ Edæ botō imote nāni pōnēnāmaī inō beyænque ingui-pogaque quēwēnāni iñōmō edæ, Mōnō wēnæ wēnæ cædonque ante cædinque pōnēnāmaī imopa, ante wæcædānīmpa, ante adocā cæcæcāīmpa. ¹⁰ Ayæ edæ, Botō iñōmō botō Mæmpo weca gote quēwēñōmote mīnitō botō imote adāmaī inguīmīni iīmīnīpa. Iñinque botō Mæmpo weca gote quēwēmo beyæ Wængonguī Tæiyæ Waëmō Ōnōwoca incæ, Æbānō nō cæte quēwenguī, ante ingui-pogaque quēwēnāni inānite odōmōnte apænecā ēñencædānīmpa. ¹¹ Ayæ ingui-pogaque quēwēnāni awēnē iñongante wēnæ ingante Wængonguī, Botō pancæboīmpa, ante do apænte angacāīmpa, ante Wængonguī Tæiyæ Waëmō Ōnōwoca godō odōmōnte apænecā beyænque ēñencædānīmpa,” ante Itota apænecantapa.

¹² Ayæ apænedinque, “Botō mīnitō iīmīnite nanguī ayæ apæneīnente wæbo incæte mīnitō ñōwo ganca ædō cæte

ēñenguīmīni. ¹³ Wængonguī Tæiyæ Waëmō Ōnōwoca pongā ate tōmengā iñōmō, Æbānō nāwangā impa, ante tōmānō ante mīnitō iīmīnite odōmōnte apænecā ēñencæmīnīmpa. Adocā, Æbānō apænequīmoo, ante wīi nāmā pōnēninque apænecæcāīmpa. Wæætē Wængonguī tōmengā ingante angā nānō ēñēnīnō ante Wængonguī Ōnōwoca iñōmō mānīnonque ante mīnitō iīmīnite odōmōnte apænecā ēñencæmīnīmpa. Ayæ, Iñcayæ ate æbānō baquī, ante tōmengā mīnitō iīmīnite apænecā ēñencæmīnīmpa. ¹⁴ Botō æbānō ñāo apāite ēmōnōmo imopa, ante edonque pōni bacæīmpa, ante cædinque tōmengā iñōmō botō entawēnō ante mīnitō iīmīnite odōmōnte apænecā ēñencæmīnīmpa. ¹⁵ Botō Mæmpo nānō ēadoncoo iñōmō edæ tōmancoo botō quīncoo impa. Mānōmaī beyæ iīmaī apænetabopa. Tōmēmo entawencoote ante Wængonguī Ōnōwoca iñōmō mīnitō iīmīnite odōmōnte apænecā ēñencæmīnīmpa, ante apænetabopa,” angantapa.

¹⁶ “Ayæ wantæ ate mīnitō botō imote adāmaī inguīmīni iīmīnīpa. Ayæ ate wantæyō iñonte botō imote wæætē acæmīnīmpa,” ante Itota apænegacāīmpa.

Mini wæwēmāmo incæ wæætē mīni to-quinque bacæīmpa

¹⁷ Tōmengā ēmiñænāni pancadāniya nāmanque godongāmæ apænedinque,

—Mānīnō āninque tōmengā, Mīnitō wantæ ate botō imote adāmaī inguīmīni iīmīnīpa, ante æbānō ancæte ante apænecāā, ante wædānitapa. Ayæ, Wantæ iñonte mīnitō botō imote wæætē acæmīnīmpa, ante ayæ, Botō Mæmpo weca gote quēwēmo beyæ impa, ante Itota apænecā awædō, ante apænedānitapa. ¹⁸ Tōmēnāni wæætē wæætē, Mānīnō tōmengā, Wantæyō, ante nānō ānō iñōmō edæ æbānō ante apænecāā, ante wædānitapa. Tōmengā æbānō ancæte ante apænecāā, ante ēñēnāmaī imōnīpa, ante wædānitapa.

¹⁹ Tōmēnāni mānīnō ante pōnēninque botō imote ēñencæte ante āinēnāni inānīpa, ante wædinque Itota tōmēnāni inānite,

—Wantæ ate mīnitō botō imote adāmaī inguīmīni iīmīnīpa, ante botō ānō ante ayæ, Wantæyō iñonte mīnitō botō imote wæætē acæmīnīmpa, ante botō

æbänö ämo, ante mīnitō nāmanque godongāmæ tedemīnitawo. ²⁰ Mīnitō imīnite nāwangā ämopa. Inguipogaque quēwēnāni iñōmō watapæ toyōnāni mīnitō caate wæquīmīni inte Ca ca wæcæmīnimpa. Mīnitō wæwenguīmīni imīnīpa. Incæte mīni wæwēmāmo incæ mīni toquinque bacæimpa. ²¹ Onquiyængā iñōmō tōmengā wēñæ ēñacæ cæyedē nanguī nantate wæcā inte wæwengā bacā incæte tōmengā wēñæ ēñacā adinque tōmengā, Botō wē ēñacā ingampa, ante watapæ tote beyæ tōmengā nānō wædinō ante edæ pōnēnāmaī ingampa. ²² Mīnitō tōmengā bai adobai imīnīpa. Ñōwoyedē mīni caate wæyedē impa. Incæte botō wæætē mīnitō imīnite aquīmo imopa. Mānōmaī beyæ mīnitō watapæ tocæmīnimpa. Māniñedē, Mīnitō todāmaī incæmīnimpa, ante æcāmenque incæ wææ cædāmaī incæcāimpa.

²³ Godōmenque apænedinque Itota, “Māniñedē mīnitō botō imote, Æbänö i, ante ēñencæte ante godōmenque änāmaī incæmīnimpa. Mīnitō imīnite nāwangā ämopa. Botō Mæmpo ingante mīnitō quiēmē æncæte ante botō emōwo ante apæneyōmīni tōmengā iñōmō do pōnongā æncæmīnimpa. ²⁴ Ñōwo ganca mīnitō quiēmē æncæte ante botō emōwo ante apænedāmaī inīmīni imīnīpa. Ñōwo iñōmō edæ, Pōnōmi æmōnie, ante Wængonguī ingante apæneedāni. Apænemīni ēñēninque tōmengā pōnongā æninque mīnitō eyepæ pōni mīni watapæ toquinque ænguīmīni incæmīnimpa,” ante Itota apænegacāimpa.

Itota nē tæi emōnongā ingampa

²⁵ Mānōmainō ante apænedinque Itota iīmaī apænecantapa. “Mīnitō imīnite inguipoga quēwēnāni nāni cæbainō ante odōmonte apænedimo incæte botō wantæyō baquiōnæ iinque bayonte mānōmainō ante godōmenque odōmonte apænedāmaī incæboimpa. Wæætē botō tōmēmo Mæmpo ingantedō ante apænedinque mīnitō imīnite edonque pōni apænecæboimpa. ²⁶ Māniñōnæ mīnitō botō Mæmpo ingante botō emōwo beyænque apænequīmīni imīnīpa. Ininque botō, Mīnitō beyæ ante botō Mæmpo ingante apænequīmo imopa, ante mānōmaī beyæ

botō änāmaī imopa. ²⁷ Edæ botō Mæmpo incæ mīnitō imīnite waadete pōnengā ingampa. Botō imo waadete pōnēninque mīnitō iñōmō edæ, Wængonguī weca quēwēninque Itota pongaingā ingampa, ante pōnēnimīni beyæ botō Mæmpo adobai mīnitō imīnite waadete pōnengā ingampa. ²⁸ Botō edæ Mæmpocā weca quēwente inguipoga iñōmō pōnimo inte ñōwo pōni inguipoga quēwēninque wadæ godinque Mæmpocā weca ocæ emænte goquīmo imopa,” ante Itota apænecantapa.

²⁹ Tōmengā emiñænāni,

—Ñōwo inguipoga quēwēnāni nāni cæbainō ante odōmonte apænedāmaī inte bitō edonque pōni apænebi ēñēmōnīpa. ³⁰ Bitō tōmānō ante ēñēmi imīpa, ante ñōwo ēñēmōnīpa. Ininque mōnitō, Æbänö i, ante ēñencæte ante bitō imite änāmaī iñōmōni bitō iñōmō do nē ēñēmi imīpa. Mānōmaī beyæ mōnitō, Bitō Wængonguī weca quēwente pōnīmi inte nē ēñēmi imīpa, ante do pōnēmōni imōnīpa.

³¹ Ante añōnāni Itota wæætē,

—Ñōwo tæcæ pōnēmīni imīnitawo. ³² Wantæyō bayedē iñōmō edæ ñōwo pōni batimpa. Māniñedē mīnitō botō imote emō cæte panguīmæ panguīmæ wodii winōninque tōmēmīni oncōnē go guīquīmīni imīnīpa. Botō imo adoboque emō cæte gomīni incæte botō iñæmpa wīi adoboque ongōmopa. Edæ botō Mæmpo botō tōnō godongāmæ ongongampa. ³³ Mīnitō iñōmō botō nempo quēwēmīni inte gānē pōnente quēwencæmīnimpa, ante cædinque botō māniñō ante mīnitō imīnite apænetabopa. Ii inguipoga quēwēninque mīnitō caate wæcæmīnimpa. Incæte mīni wæwenguīmāmo ante guīñēnāmaī iedāni. Edæ inguipogaque ante nāni wēnæ wēnæ cædōnō ante Baa āninque botō godōmenque tæi emōnōmo inte nē gānā cægaimo imopa. Mānōmainō ante Itota tōmengā nānō emiñænāni inānite iinque apænecā ēñengadānimpa.

17

Itota Mæmpo ingante mōnō beyæ ante apænecampa

¹ Itota mänömaïnö ante iinque apænedinque tømënäni inänite godö apænebo eñëninque öönæde æmö adinque iïmaï apænecantapa. “Mæmpo eñëmi. Bitö, Æbänö baquïi, ante bitö angainö bai do batimpa. Botö edæ, Bitö Wëmo inömo iñömote bitö pönö cæbi ate botö ñäo apäite bai botö emönö iñömö edonque pönï bacæimpa, ante apænebopa. Mänömaï cæbi adinque botö wæætë bitö beyæ pönö cæbo ate bitö ñäo emömämo edonque pönï bacæimpa. ² Bitö pædæ pönömi botö në ængainäni inänite botö cöwë wantæpiyæ nani quëwenguïnö ante godömo æncædänimpa, ante bitö botö tönö godongämæ cæbi beyænque botö waodäni tømänäni inänite në ämo batabopa. ³ Waodäni cöwë wantæpiyæ nani wænämaï quëwenguïnö ante iïmaï impa. Mæmpo, bitö adobique näwä Wængonguï inömi iñömote tømënäni bitö imite ate bai pönencædänimpa. Ayæ botö Itota Coditobo bitö në da pönongaïmo iñömote do adinque tømënäni pönencædänimpa. Tømënäni mänömaï nani pönënö beyænque edæ cöwë wantæpiyæ nani wænämaï quëwenguïmämo edæ do ëadänipa,” ante Itota apænecantapa.

⁴ Ayæ Mæmpo ingante godömenque apænedinque, “Bitö, Iïmaï cæe, ante bitö angainö ante botö inguipoga quëwëninque do iinque cæbo beyæ bitö ñäo emömämo edonque pönï bagatimpa. ⁵ Wëenëñedë pönï inguipoga badönämaï iñedë bitö weca ongöninque botö ñäo emongaïmo inte ñöwo bitö weca ocæ emænte pömo adinque bitö pönö cæbi ate botö adobo ñäo apäite bai emömo ate edæ edonque pönï acæimpa,” Mæmpo ingante apænecantapa.

⁶ Ayæ, “Inguipoga quëwënäni bitö quïnäni inänipa, ante bitö pædæ pönömi æninque botö wæætë, Wængonguï æcänö ingää, ante tømënäni inänite odömömo eñënanitapa. Adodäni bitö quïnäni iñönänite bitö tømënäni inänite pædæ pönömi æntabopa. Tømënäni bitö angainö ante eñente cædinäni inänipa. ⁷ Bitö pönömi æninque botö ewocagaincoo ante iïnäni iñömö edæ, Mänincoo tømancoo edæ Mæmpocä pönongä æninque Itota ewocacampa, ante ñöwo do eñënanitapa. ⁸ Edæ Mæmpo bitö pönö apænebi botö eñente ængainö ante botö adodö ante edæ

tømënäni do ænanitapa. Botö bitö weca quëwente pongaïmo imopa, ante eñëninque tømënäni ædæmö eñënanitapa. Ayæ, Bitö botö imote da pönömi në pongaïmo imopa, ante pönënanitapa,” ante Itota Mæmpocä ingante apænecantapa.

⁹ Ayæ, “Mæmpo, botö tømënäni beyæ ante bitö imite apænebopa. Botö wïi inguipogaque quëwënäni beyæ ante apænebopa. Wæætë edæ, Bitö në pædæ pönömi botö ængainäni iñömö edæ bitö quïnäni inänipa, ante botö tømënäni beyæ ante bitö imite apænebopa. ¹⁰ Botö quïnäni tømänäni bitö quïnäni inänipa. Ayæ bitö quïnäni tømänäni botö quïnäni adobai inänipa. Tømënäni cædäni beyænque botö ñäo emömämo edonque pönï batimpa.”

¹¹ Ante apænedinque Itota godömenque apænecantapa. “Botö inguipoga iñömö godömenque ongönämaï incæboimpa. Wæætë bitö weca ocæ emænte ponguïmo imopa. Botö emiñænäni guiquënë inguipoga iñömö ayæ ongönäni inänipa. Mæmpo bitö në Tæiyæ Waëmö inömi inte eñëmi. Bitö emöwo bitö pönö pemongaiwo beyænque botö tæi piñænte në ämo imopa. Iinque mönatö äawocaque bai ewocate quëwëmöna bai mäninäni adobai äawocaque bai ewocate quëwencædänimpa, ante cædinque bitö tæi piñæmi inte tømënäni inänite wææ aacæbiimpa, ante bitö imite apænebopa. ¹² Mäninäni weca botö quëwëñedë botö iñömö bitö emöwo bitö pönö pemongaiwo beyænque botö tømënäni inänite wææ aatabopa. Ayæ, Wë womönämaï incædänimpa, ante adodäni inänite wææ gampotabopa. Iinque tømënäni tømänäni wë womönämaï inänipa. Önonque adocanque iñömö æmæwo wë womonguënengä incæ tømengä iñömö edæ Wængonguï angä eñente nani yewæmongainö bai ñöwo iinque baquinque ante edæ æmæwo wë womongantapa,” ante Itota Mæmpocä ingante apænecantapa.

¹³ Ayæ, “Botö ñöwo bitö weca ocæ emænte ponguïmo imopa. Tømënäni botö watapæ topämo tømämämo entawëninque quëwencædänimpa, ante botö mäninö ante

ingui-poga ayæ quëwëñedë apænebo imopa. ¹⁴ Mæmpo, bitö angainö ante botö tömënäni inänite godö apænebo ëñënänitapa. Botö ingui-pogaque näni quëwencabo tönö adobo inämaï imo bai tömënäni edæ adobai ingui-pogaque näni quëwencabo tönö adodäni inämaï inäni adinque ingui-pogaque quëwënäni wæætë tömënäni inänite pünänitapa. ¹⁵ Mæmpo ëñëmi. Bitö botö ëmiñænäni inänite, Minitö ingui-poga iñömö ayæ quëwënämaï incæminimpa, ante ænte mäobi gocædänimpa, ante botö bitö imite apænedämaï imopa. Wæætë, Wënæ awënë nê wiwa cædongä iñömö tömënäni inänite, Oda cæcædänimpa, ante cæyongante bitö wææ aabi ate tömënäni wæætë oda cædämaï incædänimpa, ante bitö imite apænebopa. ¹⁶ Botö ingui-pogaque näni quëwencabo tönö adobo inämaï imo bai tömënäni edæ adobai ingui-pogaque näni quëwencabo tönö adodäni inämaï inänipa. ¹⁷ Bitö änö iñömö edæ näwangä ante impa. Inique bitö godö cæbi ate näwangä bitö änö beyænque tömënäni iñömö tömëmi cædonque ante cædinque tæiyæ waëmö ëwocate quëwënäni incædänimpa, ante bitö imite apænebopa. ¹⁸ Bitö botö imote ingui-poga iñömö bitö da pönömi pömo bai botö adobai tömënäni inänite ingui-poga quëwënäni weca da godömo godänitapa. ¹⁹ Tömënäni iñömö bitö cædonque ante cædinque tæiyæ waëmö ëwocate quëwënäni incædänimpa, ante botö iñömö edæ bitö cædonque ante Ao äninque, Botö nämä incæ tömënäni beyæ ante wænguïmo imopa,” ante Itota apænegacäntapa.

²⁰ “Mæmpo ëñëmi. Botö wii botö ëmiñænänique beyæ ante bitö imite apænebopa. Wæætë tömënäni botö angainö ante apænedäni ëñente pönëninque wadäni nê wede pönenguïnäni iñönänite botö iinäni beyæ ante adobai bitö imite apænebopa. ²¹ Mæmpo, Bitö imite botö entawëmo imo bai ayæ botö bitö nempo quëwëmo imo bai mäninäni tömänäni adobai äawocaque bai ëwocate quëwëmainänipa, ante cæcæbiimpa, ante bitö imite apænebopa. Ayæ ingui-poga quëwënäni iñömö, Bitö botö imote da pönömi pongaïmo imopa, ante pönencædänimpa, ante cædinque

bitö godö cæbi ate tömënäni mönatö nempo quëwencædänimpa, ante bitö imite apænebopa. ²² Bitö pönö cæbi beyænque botö ñäö bai entawëninque, Mönatö äawocaque bai ëwocate quëwëmöna bai tömënäni adobai äawocaque bai ëwocate quëwencædänimpa, ante botö iñömö bitö pönönimämo botö ñäö entawëmämo tömënäni inänite adopämo godömo ænte entawënänipa. ²³ Tömënäni äawocaque bai ëwocate quëwencædänimpa, ante tömënäni botö imote entawënänipa. Ayæ botö bitö imite entawëmo imopa. Tömënäni mänömaï äawocaque bai ëwocadäni adinque ingui-poga quëwënäni iñömö, Bitö botö imote nê da pönömi pongaïmo imopa, ante ëñencædänimpa, ante apænebopa. Ayæ botö imote waadete pönengaïmi imi bai bitö tömënäni inänite adobai waadete pönengaïmi imipa, ante ëñencædänimpa, ante apænebopa,” ante Mæmpocä ingante Itota apænegacäntapa.

²⁴ Ayæ, “Mæmpo, Bitö pædæ pönömi botö nê ængainäni iñömö botö ñäö ëmömämo acædänimpa, ante botö, Tömënäni botö quëwëñömö adoyömö quëwencædänimpa, ante äinente wæbopa. Wëenëñedë pönï ingui-poga badönämaï iñedë bitö iñömö edæ botö imote waadete pönëninque botö ñäö ëmömämo pönömi botö ængaïmämo tömënäni adopämo acædänimpa, ante äinente wæbopa. ²⁵ Mæmpo nê nö cædömi imi ëñëmi. Ingui-pogaque quëwënäni bitö imite wii adinque pönënämaï inäni incæte botö iñömö edæ bitö imite do ate pönëmo imopa. Botö ëmiñænäni iñömö, Bitö botö imote da pönömi nê pongaïmo imopa, ante do ëñënänitapa. ²⁶ Botö cæbo beyænque mäninäni iñömö, Bitö imite ate bai pönënanitapa. Botö imote bitö waadete pönëno ante adodö waadete pönëno tömënäni mimönë entawente quëwencædänimpa, ante ayæ, Tömënäni botö imote entawencædänimpa, ante botö ayæ cæbo beyænque tömënäni iñömö, Bitö imite ate bai pönencædänimpa,” ante Itota Mæmpo ingante iinque apænegacäimpa.

18

*Itota ingante bæi ongonte ænte godänipa
(Mäateo 26.47-56; Mäadoco 14.43-50;*

Odoca 22.47-53)

¹ Wængonguī ingante iinque apænedinque Itota tōmengā ēmiñænāni tōnō wadæ godinque Quedodōo biyōnæ æmæ wedeca godānitapa. Æmæ wedeca odibowæncodē nāni ancodē i iinque Itota tōmengā ēmiñænāni tōnō mānincodē pō guidānitapa.

² Itota ingante nē odōmonguingā Codaa iñōmō Itota tōmengā ēmiñænāni tōnō mānincodē wantæ iñō wantæ iñō gote ongōnāni iinque Itota ingante nē odōmonguingā Codaa iñōmō mānincodē do adingā inongāimpa. ³ Iinque tontadoidi adocaboque inānite æninque Codaa iñōmō edæ tāno beyænte adocodē pongantapa. Ayæ, Wængonguī quī, ante nē godōnāni ñænænāni tōnō Paditeoidi nāni wææ wānōnāni inānite Codaa nempo godōnāni æningā inte tōmengā tōmēnāni inānite tontadoidi tōnō ænte māmongā pōnānitapa. Pōninque tōmēnāni gonga ticañē næænte gongapæncade ticañē nææninque yaēmē næænte Codaa miñæ pōnānitapa. ⁴ Itota nāmā ante, Æbānō bate wæquimoo, ante tōmāā ēñēnongā inte awænē tao godinque tōmēnāni inānite,

—Æcānō ingante ante diqui diqui minte pōmīni.

⁵ Ante añongā tōmēnāni wæætē,

—Itota Nāatadeta nē quēwēningā ingante amōnipa.

Ānāni ēñēninque,

—Botō tōmēmo imopa, ante Itota apænecantapa.

Ayæ nē odōmonguingā Codaa iñōmō tōmēnāni weca a ongōnongāimpa. ⁶ Itota iñōmō, “Botō tōmēmo imopa,” ante añongā tōmēnāni gā godinque onguipoga tæ go wæænānitapa. ⁷ Tæ go wæænāni adinque tōmengā adodō,

—Æcānō ingante ante diqui diqui minte pōmīni.

Ante añongā tōmēnāni wæætē,

—Itota Nāatadeta quēwēningā ingante amōnipa.

⁸ Ānāni ēñēninque Itota wæætē,

—Botō tōmēmo imopa, ante do antabopa. Mīnitō iñōmō botō imote ante diqui diqui minte pōmīni bai mānīnāni inānite bæi ongōnāmaī iedāni.

⁹ Itota Mæmpocā ingante do apænedinque, “Bitō edæ pōnōmi botō ængāināni inānite wææ aabo beyæ adocanque incæ wē womōnāmaī inānitapa,” ante nānō angāinō bai ñōwo iinque bacæimpa, ante mānōmaī angantapa. ¹⁰ Timōnō Pegodo iñōmō nē yaēmē næængā inte pædæ guipote yaēmē æninque, Wængonguī quī, ante nē godongā ñænængā pōni inongā ingante nē cæcā ingante tæi pāninque tōmēmonca inō wangō tamoncacantapa. Pegodo nānō nē wangō tamoncadingā emōwo Māadoco emongā inongāimpa. ¹¹ Itota wæætē Pegodo ingante, —Bitō yaēmē adodō da wēe, āninque, Botō wæwenguimāmo ante botō Mæmpo pōnongā ænīmo inte wæwenguēnēmo imopa, angacāimpa.

Itota ingante bæi ongōninque Ānato weca ænte godāni

(*Māateo 26.57-58; Māadoco 14.53-54; Odoca 22.54*)

¹² Ayæ odōmāno tontadoidi tōnō tōmēnāni awēnē ayæ oodeoidi awēnēidi tōnō Itota ingante bæi ongōninque ænānitapa. Æninque tōmengā ingante goto wimpote cædānitapa. ¹³ Ayæ adodāni Ānato nānōwāa Caiapato weca Itota ingante ænte māo godānitapa. Edæ Caiapato iñōmō, Wængonguī quī, ante nē godongā ñænængā pōni inongā māni wadepo iñonte inongāimpa. ¹⁴ Caiapato wēēnēdē oodeoidi awēnēidi inānite iimaī ante nē ānongā inongāimpa. Mōnō waocabo beyæ ante adocanque onguīñængā wængā iinque waa imaimpa.

Pegodo incæ, Dicæ abogaa, angampa

(*Māateo 26.69-70; Māadoco 14.66-68; Odoca 22.55-57*)

¹⁵ Itota nānō ēmiñængā wacā tōnō Timōnō Pegodo iñōmō tōmēna iñōmō Itota ingante tee empo godatapa. Māningā iñōmō Itota nānō ēmiñængā iñōmō, Wængonguī quī, ante nē godongā ñænængā pōni nānō nē adingā inongāimpa. Iinque Itota tōnō pōninque tōmengā Wængonguī ingante nē godongā ñænængā pōni inongā oncō yacōmōñāa iñōmō pō guicantapa. ¹⁶ Pegodo guiquēnē odemō yabæ inō a ongōnongāimpa. Wacā Itota miñæ nē gocā iñōmō, Wængonguī quī, ante nē

godongä ñænængä pönī inongä nänö nē adingä iñömö tömengä ocæ emænte pöningue baquecä odemö nē wææ aacä ingante apænecantapa. Pegodo ingante ämi guicæ, angä eñëningue baquecä wi ænecä ate tömengä Pegodo ingante ænte manguicä guicantapa. ¹⁷ Manguicä guiyongä baquecä odemö nē wææ aacä iñömö Pegodo ingante,

—Bitö adobaī mäningä onguñængä nänö nē emiñænömi imipa töö.

Äñongä tömengä wæætë,

—Botö wabo imopa, angantapa.

¹⁸ Yoguite ingatimpa. Ayæ nē cædonäni tönö oodeoidi awënëidi wææ wänönäni gongapamö ootoqui, ante nāni tadönī gäänë adiyæ ongonte ootodönänimpa. Pegodo adobaī tömënäni tönö godongämæ adiyæ ongonte ootocantapa.

Nē godongä ñæncængä Itota ingante angampa

(*Mäateo 26.59-66; Mäadoco 14.55-64; Odoca 22.66-71*)

¹⁹ Mäniñedë Änato iñömö, Wængongui qui, ante nē godongä ñænængä pönī iñömö Itota ingante, Bitö nē emiñænäni diyæ, änogäimpa. Ayæ Itota nänö odömönte apænegainö ante, Äbänö i, ante tömengä ingante adobaī angantapa. ²⁰ Itota wæætë,

—Wadäni eñëñönänite botö edonque pönī apænebo eñëñänitapa. Botö cöwë minitö odömöincönë incæ Wængongui oncö ñænæncönë incæ oodeoidi tömänäni nāni pöincönë pö guiddingue odömönte apænebo eñëñänitapa. Botö cöwë awëmö apænedämaī intabopa. ²¹ Bitö botö imote, Äbänö i, ante quinate ämii. Botö imote nē eñëñänäni inänite ämi eñente apænedäni eñencæbiimpa. Edæ mäninäni ædæmö eñëñänäni inänipa.

²² Mänömainö angä eñëningue wææ wänongä adocanque iñömö Itota gäänë ongöningue tömengä ingante tæi tamöningue apænecä,

—Wængongui qui, ante nē godongä ñænængä pönī inongä ingante ædö cæte mänömaī ante wæætë anewëë töö.

²³ Ante äñongä Itota wæætë,

—Botö wænæ wænæ änimo imo bai bitö botö wænæ wænæ äninö ante, Äbänö i, ante apænebi eñëmoe. Wæætë edæ näwangä

ante apænebo inique bitö quinate botö imote tæi tamömipææ, angantapa.

²⁴ Ayæ, Wængongui qui, ante nē godongä ñænængä pönī Caiapato weca gocæcäimpa, ante Änato iñömö Itota ingante ayæ goto wimpoingä iñongante angä eñëningue tömengä ingante ænte gogadänimpa.

Pegodo incæ, Dicæ abogaa, wæætë angampa

(*Mäateo 26.71-75; Mäadoco 14.69-72; Odoca 22.58-62*)

²⁵ Timönö Pegodo ayæ adiyæ ootoyongante wadäni,

—Bitö tömengä emiñænömi adobaī imipa töö.

Änāni eñëningue tömengä,

—Wabo imopa, angantapa.

²⁶ Wængongui qui, ante nē godongä ñænængä pönī inongä ingante nē cædäni iñönänite adocanque iñömö Pegodo nänö nē wangö tamoncadingä guiddengä inongäimpa. Tömengä iñömö Pegodo ingante,

—Bitö tömengä miñæ odibowæncodë ongöñedë bitö imi atabopa. Bitö wii imitawo.

²⁷ Ante äñongä Pegodo wæætë, Wabo imopa, ante tæcæ anewëñongä tawadiya dobæ pegatimpa.

Pidato weca Itota ongongä

(*Mäateo 27.1-2; Mäadoco 15.1-5; Odoca 23.1-5*)

²⁸ Tæcæ ñäö bayonte Itota ayæ Caiapato weca ongöñongante oodeoidi iñömö, Mönö tömengä ingante odömäno gobedönadodo awënë Pidato weca ænte gocæimpa, ante cædinque awënë oncö boyæ mäodäni gocantapa. Incæte tömënäni dodäni nāni wææ angainö beyæ ante guiddengä wædinque, Pidato oncönë guiddengä bai mönitö mimö wentamö ewocamöni incædömönimpa. Iñæmpa mänömaī cæmöni inique mönitö Patowa mönö ææmæ cæyedë cænguī ædö cæte cænguimönii, ante wædinque guiddämaī inänitapa. ²⁹ Inique Pidato tömënäni weca oncö boyæ taodingue tömënäni inänite,

—Iñgä onguñængä iñömö quino wænæ wænæ cæcantawo.

³⁰ Äñongä tömënäni wæætë,

—Mäningä wii wënæ wënæ cæcä inte bai mönitö tömengä ingante wii ænte mämö pædæ godömöni æncædömiimpa.

³¹ Änani eñëninque Pidato,

—Minitö tömëmini tömengä ingante ænte godinque mini wææ yewæmongainö bai ante cædinque, Tömengä ingante pangæimpa, ante apænte ædäni.

Äñongä oodeoidi awënëidi,

—Iñæmpa munitö wææ ämini iñömini mönitö cöwë tacamöni wænäni möni cægainö bai ædö cæte æcämenque ingante wænömöni wænguingä, ante wædanitapa.

³² Odömänoidi mänñedë wënæ wënæ cædäni inänite awäa töö godömænte tim-podinque wææ tiwadinque godö wænönäni inönänimpa. Iñinque odömänoidi inänite pædæ godöninque oodeoidi wæætë Itota, Æbänö cædäni wænguimoo, ante do nänö angainö bai ñöwo iñque baquinque cædanitapa. ³³ Mäninö änäni eñëninque Pidato wæætë oncönë ñænæncönë guid-inque Itota ingante añecä pongä adinque, Pidato,

—Bitö oodeoidi Awënë Odeyebi imitawo.

³⁴ Angä eñente Itota wæætë,

—Bitö nämä pönëninque apænebitawo. Wabänö wacä botö imotedö ante bitö imite apæneca eñëmitawo.

³⁵ Ante äñongä Pidato,

—Botö dicæ oodeobo imogaa. Tömëmi guidënanäni tönö Wængongui qui, ante në godönäni ñænænäni iñömö bitö imite mämö pædæ pönönäni æntabopa töö. Bitö quinä wënæ wënæ cæbitawo.

³⁶ Äñongante Itota wæætë apænedinque,

—Wii inguipoga quëwënäni änäni beyæ botö Awënë Odeyebi në ingaimo imopa. Botö inguipoga quëwënäni Awënë Odeyebi inte në ämo imo bai botö nempo quëwënäni iñömö botö imote, Bæi ongonte ænte godämaï incædanimpa, ante wææ cædinque oodeoidi tönö guëa wæætedö wæætë cæcædönänimpa. Incæte wii inguipoga quëwënäni änäni beyæ wæætë edæ wayömö quëwengaimo inte botö tömëmo nämä incæ Awënë Odeyebi në ingaimo imopa.

³⁷ Mänömainö ante Itota apæneca iñinque Pidato,

—Iñæmpa Awënë Odeyebi bitö imitawo.

Äñongante Itota wæætë,

—Bitö tömëmi änö bai botö Awënë Odeyebi inömoimpa. Näwangä ämipa. Botö iñömö Wængongui nänö angainö ante, Näwangä impa, ante inguipoga quëwënäni inänite apæneceate ante edæ mäniü beyænque ante inguipoga iñömö pö eñagaimo imopa. Wængongui näwangä ante nänö angainö ante Ao ante eñente në cædäni iñömö edæ tömënäni tömänäni botö imote në eñënanäni inänipa, angantapa.

³⁸ Äñongante Pidato,

—Æcämë näwangä angä, angacäimpa.

Itota wæncæcäimpa, änänipa

(Mäateo 27.15-31; Mäadoco 15.6-20; Odoca 23.13-25)

Pidato mänömaï apænedinque wæætë oodeoidi weca oncö boyæ taodinque apænecantapa.

—Iñgä quinä wënæ wënæ cæcä ingampa, ante eñënamäi imopa. Iñinque botö dicæ tömengä ingante apænte anguimo imogaa. ³⁹ Wadepo iñö wadepo iñö Patowa mini ææmæ cæönæ munitö, Ædanidö tee mönete ongönänii, ante pönëninque adocanque emöwo ante botö imote apænedinque, Iñgä ingante ñimpo cæbi goqingä, ante cöwë äminipa. Iñinque adocanque ingante, Iñgä iñömö mini apænedongä ingampa, ante botö tömengä ingante ñimpo cæbo ate ænte gomini inöminimpa. Iñinque ñöwo diyæ. Minitö, Oodeomöni Odeye iñongante pönö ñimpo cæbi abæ tawænte goguinga, äminitawo.

⁴⁰ Äñongante tömënäni yedæ tedinque,

—Mäningä ingante dicæ ämöniyaa. Wæætë Badabato ingante ñimpo cæbi gocæ, ante tedewengadänimpa.

Badabato wëenënedë wädäni tönö, Odömäno tæiyæ awënë ingante wido cæcæimpa, ante cædingä inongäimpa.

19

¹ Ayæ Pidato angä ate Itota ingante bæi ongonte mäo æmontaiya tæi tæi pänänitapa. ² Tontadoidi daa mongæmenca æninque que que cædinque, Awënë poganta, ante pönö da wencadänitapa. Awënë weocoo wëñacæbiimpa, ante badete

tote bai cædinqwe Itota ingante opatawæ
ëmoncoo pönö daga wëñadänitapa. ³ Daga
wëñadinque tömënäni wæætë wæætë
tömengä weca ponte äninque,

—Badogaa, bitö oodeo awënë odehybi
ïmipææ.

Ante badete todirque tömengä ingante
tæi tamönänitapa.

⁴ Pidato tömënäni weca oncö boyæ
adopoque ayæ tadinque oodeoidi inänite
apænedinque,

—Ïngä iñömö æbänö cæcantawo, ante
ëñencæte ante cæbo ate tömengä wënæ
wënæ nänö cædö ante dicæ abogaa. Minitö
mänömainö ante ëñencæminimpa, ante
botö tömengä ingante minitö weca ænte
mantabo tacä aedäni, angantapa.

⁵ Itota daa mongæmenca poganta encad-
inque opatawæ ëmoncoo mongænte tay-
ongä Pidato tömënäni inänite,

—Ïngä onguiñængä ongongä aedäni.

⁶ Tömengä ingante adinque, Wængongui
qui, ante në godönäni ñænænäni tönö
adodäni inänite në wææ wänönäni iñömö
yedæ tedewëninque,

—Awæ ñænquedimæ cæte ämi wænönäni
wængæe. Ämi wænönäni wængæe.

Ante ancaa änewënäni ëñëninque Pidato
wæætë,

—Minitö iñæmpa tömengä ingante
æninque awæ ñænquedimæ cæte wænömini
wængæe. Botö guiquënë ïngä wënæ wënæ
nänö cædö ante dicæ abogaa.

⁷ Pidato añongä oodeoidi wæætë iimai
tedewënanitapa.

—Mönitö wææ yewæmongainö ante
ëñente quëwëmoni imönipa. Ïngä iñömö
edæ nämä ante edæ, Wængongui Wëmo
inömo imopa, ante cædinqwe edæ mäninö
möni wææ yewæmongainö ante ëñënamai
cæcampa. Mänömai ëñënamai inte cæcä
beyæ tömengä në wængüenengä ingampa.

⁸ Mänömainö änäni ëñëninque Pidato
godömenque guñente wædinque, ⁹ oncönë
ñænæncönë adodö pö guidinque Itota
ingante,

—Bitö ædönö quëwente pömi imii.

Ante añongä Itota guiquënë pæ wëenecä.

¹⁰ Adinque Pidato tömengä ingante,

—Bitö quinante botö imo tededämai imii.
Botö nämä në tæi piñænte ämo inömo inte
ämo ininque ñimpo cædäni gobaimipa. Botö
wadö ante ämo ininque bitö imite do awæ
ñænquedimæ cæte wænönäni wæmaimipa,
ante ëñënamai imitawo.

¹¹ Añongante Itota wæætë,

—Wængongui bitö tæi piñænte ämämo
ante godönämai ingä bai bitö tömömi
tæi ämi imi diyæ botö imote anguimiya.
Mänömai beyæ bitö imite, Wænömi
wæncæcäimpa, ante botö imote në pædæ
pönöningä iñömö edæ godömenque wënæ
wënæ cæcä ingampa, ante apænecantapa.

¹² Mänömainö angä ëñëninque Pidato,
Æbänö ñimpo cæbo goquingä, ante
cædongäimpa. Cæyongä oodeoidi wæætë
godömenque yedæ änönänimpa,

—Bitö mäningä ingante ñimpo cæbi bai
bitö odömäno tæiyæ awënë Tetædo æmigo
dicæ imiyya. Æcämenque iñömö edæ,
Botö awënë inömoimpa, ante në angä inte
tömengä iñömö Tetædo ingante në piinongä
ingampa.

¹³ Mäninö änäni ëñëninque Pidato iñömö,
Itota ingante ænte tao godinque awënë
nänö apænte äimpaa gote tæe contacantapa.
Pidato nänö tæe contayömö iñömö, Dica-
coo ayadi bai nani caayömö impa, ante
nani añömö ininque ebedeo tededö, Gabata,
nani añömö inönimpa. ¹⁴ Patowa nani
ææmæ cæyedë iinque bayö oodeoidi, Ìimö
ate guëmanguionæ inguimpa, ante mönö
ñöwoönæque cæcäimpa, ante nani cæönæ
inönimpa. Ìionæ wodo tæcæ bæcä bayonte
Pidato oodeoidi inänite,

—Ïngä iñömö minitö Odeye inongä
ingampa.

¹⁵ Añongante yedæ äninque tömënäni,

—Tömengä ingante wænömi wængæe.
Tömengä ingante wænömi wængæe. Awäa
timpote ämi wænönäni wængæe.

Ante ancaa änewëñönäni Pidato wæætë,

—Botö iñömö minitö Odeye iñongante
awäa timpote ämo wænönäni wængæe, ante
änewëminitawo.

Angä ëñëninque Wængongui qui, ante
godönäni ñænænäni iñömö,

—Tetædoque incæ mönitö awënë odehybi
inongä apa cæbii, änewëñönänimpa.

¹⁶ Ancaa änewëñönäni Pidato, Awäa ämo timpote wänömüni wængædäni, ante Itota ingante tontadoidi inänite pædæ godongä ængadänimpa. Ayæ tömënäni Itota ingante ænte gogadänimpa.

Itota ingante awäa timpodäni wængäimpa
(Mäateo 27.32-44; Mäadoco 15.21-32;
Odoca 23.26-43)

¹⁷ Itota incæ tömengä timpoquiwæ æninqe mongænte taodinqe “Ocatainö” mönö äñömö pongantapa. Mäniñömö ante ebedeo tededö, Godogota, näni äñömö impa. ¹⁸ Mäniñömö põñongante tömënäni awæ ñænquedimæ cædinque tömengä ingante töö godonte timpodinqe wææ tiwadinqe ængæ gantidënäni ongongantapa. Ayæ wada inate tömengä weca æmataæ inö æmataæ inö mämö adobai cæte ængæ gantidënäni wægöñöna Itota tæcæguedë wægongä ingantapa. ¹⁹ Pidato angä yewæmöinta, Näni ëñenguinta, ante yewæmonte æninqe ñænquedimæ iwäa wo cædänitapa. “Itota Näatadeta quëwëningä oodeoidi Awënë Odeye inongä ingampa,” ante yewæmonte wo cæte ongongatimpa. ²⁰ Itota ingante näni timpodiñömö eyequei i ininqe oodeoidi nangui inäni tömënäni näni quëwëñömö ta põninqe Pidatoidi näni yewæmöninta adänitapa. Mäninta iñömö ebedeo tededö datii tededö guidiego tededö ante yewæmonte ingatimpa. ²¹ Oodeoidi beyæ ante, Wængongui qui, ante në godönäni ñænänäni iñömö Pidato weca godinqe tömengä ingante,

—Bitö, “Oodeoidi Awënë Odeye inongampa,” ante yewæmönämaï inguënë quëwë. Wæætë tömengä nämä nänö angainö bai, “Botö oodeoidi Awënë Odeyebo inömoimpa, ante në änewëningä ingampa,” ante yewæmöe.

²² Ante änewëñönäni Pidato wæætë,
—Botö yewæmöninö ante yewæmönimo inte botö wæætë wadö ante yewæmönämaï incæboimpa.

²³ Tontadoidi iñömö tömengä ingante awäa timpote ængæ gantidënäni wægöñongä tömënäni tömengä wecoo ini æninqe mencooga go mencooga cönöninge adocanque adocooque adocanque adocooque æninqe tömänäni

ænonänimpa. Tänä mongæincoo guiquënë ayæ öñoncoopa. Mänincoo iñömö bæbængapaa badönämaï incoo tömancoo adocooque da wëñaque badöi inimpa. ²⁴ Adocooque wänä ñænämaï ingæimpa, ante adodäni godongämæ tededinqe,
—Æcänö quinca nö ta adinqe tömengä mänincoo æncæcäimpa, ante wææntodönänitapa.

Edæ Wængongui angä ëñente dodäni iïmaï ante näni yewæmongainö bai ñöwo iinqe baquinque tontadoidi mänömaï cædänitapa. “Edæ botö wecoo ini ö æninqe tömënäni näni caboque wacä ingä wacä ingä nënempodänitapa. Ayæ, Æcänö quinca nö ta adinqe tömengä mänincoo æncæcäimpa, ante wææntodöninge ænänitapa,” ante näni yewæmongainö bai tontadoidi ñöwo cædänitapa.

²⁵ Itota ingä näni ængæ gantidëñömö tömengä wäänä tönö wäänä töninacä nana caya ayæ Codeopato nänöogængä Mäadiya tönö wacä Mäadiya Mäagadadënä mäniñömö põninqe eyequei a ongönänitapa. ²⁶ Itota iñömö tömengä wäänä inante acantapa. Ayæ botö tömengä miñæ në godimo iñömö tömengä nänö në waadebo inömo inte tömënä weca ongömo adinqe Itota tömengä wäänä inante,

—Badä ëñëmi. Mäningä iñömö minö wengä bacæcäimpa.

²⁷ Äninqe tömengä ëmiñænimo iñömote,
—Botö ëmiñænimi ëñëmi, Mäninä iñömö botö badä incæ bitö badä bacædäimpa, angacäimpa.

Iinqe botö Itota nänö në ëmiñænimo inte tömengä nänö änöñedë täno ænte mämömo põninqe tömengä wäänä iñömö botö oncönë cöwë owodönäimpa.

Itota incæ wængäimpa
(Mäateo 27.45-56; Mäadoco 15.33-41;
Odoca 23.44-49)

²⁸ Quinö bacæimpa, ante ñöwo iinqe batimpa, ante në ëñëngä inte Itota iñömö edæ, Wængongui angä ëñente näni yewæmongainö bai ñöwo iinqe bacæimpa, ante cædinque,

—Botö gæwænte awædö, ante apænecantapa.

²⁹ Adoyömö biinömmæ näni ämæ bai wædænque godonte näni ænimæ owætadë

engate ongö adinque tömënäni dayömö bai æninque mänimænë pædæ guidonte aa beyonte wëä tadonte æninque iitopowænca nāni äwænca ongontoca goto wencadod- inque Itota önöne pædæ æænö pæ mänānitapa. ³⁰ Pæ mänönāni Itota oo guëmante bedinque,

—Ñowo iinque batimpa.

Ante apænedinque tömengä ocabo ædæ wææncadinque tömengä önöwoca wadæ goyöwoca do wængäimpa.

Itota betagonta inö tontado boo tænongä

³¹ Iimö ate, Mönö guëmanguïönæ iñömö Patowa inguiönæ beyæ godömenque waa eönæpa, ante oodeoidi, Ñowoönæque cæcæimpa, ante nāni cæönæ inimpa. Oodeoidi awënëidi, Awäa nē ongönāni baö mäniwäa guëmanguïönæ ongönāmaï incædänimpa, ante Pidato weca godinque tömengä ingante, Iināni nāni timpodiwäa nē ongönāni quingæ wæncædänimpa, ante cædinque bitö tömënāni önömënë bamë ämi wadāni taa mænāni do wæncædänimpa. Ayæ tömënāni baö o togænte pædæ wæænonte ämi ænānie, änānitapa. ³² Mänii beyæ tontadoidi pöninge Itota weca täno nāni nē ængæ gantidëningä önömënë bamë taa mæninque edæ ayæ nāni nē timpodingä wægongä önömënë bamë taa mænānitapa. ³³ Taa mæninque Itota weca pöninge tömengä do wængäi ad- inque tömengä önömënë taa mænāmaï inönänimpa.

³⁴ Wæætë tontado adocanque Itota betagonta inö boo tænongä wepæ tönö æpæ gui gotimpa. ³⁵ Botö mäninö bayonte nē adimo inte, Æbänö näwangä batimpa, ante nö apænebopa. Ayæ, Botö änö ante näwangä impa, ante do eñëmopa. Minitö adobaï eñente pönencæminimpa, ante apænebopa. ³⁶ Edæ, “Tömengä bamë adomenque incæ taa mænte wädāmaï incæcäimpa,” ante Wængongui angä eñente nāni yewæmongainö bai bacæimpa, ante mänömaï batimpa. ³⁷ Ayæ edæ, “Wadāni nāni nē boo tænoningä ingante aquināni inānipa,” ante Wængongui angä eñente

wataa nāni yewæmongainö bai iinque bacæimpa, ante mänömaï batimpa.

Itota wodi baö ini mäo daga wënänipa
(*Mäateo 27.57-61; Mäadoco 15.42-47; Odoca 23.50-56*)

³⁸ Ayæ ate Adimatea quëwengä Ootee iñömö oodeoidi awënëidi inānite guiñente awædö, ante awëmö Itota ëmiñæningä inongäimpa. Tömengä iñömö Pidato Awënë ingante, Itota wodi baö pönömi ænte wëmoe, angantapa. Pidato Ao angä eñëninge Ootee do pöninge Itota wodi baö timpodiwäa ongöñongante o togænte pædæ wæænonte ængantapa. ³⁹ Ayæ Niicodemö wëenëñedë Itota weca woy- owotæ eñacæ nē pöningä iñömö Ootee miñæ pongantapa. Tömengä miidamö nāni änömö nanguï ti nāmö tönö aadoemö nāni änömö nanguï ogui wamö tönö adoyömö nāni wempo cædimö todëinta quido ganca ænte pongantapa. ⁴⁰ Ootee tönö Niicodemö iñömö Itota wodi baö æninque ninocoo nāni ancoo guiancoo incæ doyæncoo mänincoo ogui wamö nāna ænte pönimö ænte wäne cædedatapa. Ayæ oodeoidi daga wencæte ante nāni cægäi bai adobaï cædinque tömëna nāna wäne cædincoo inte tömengä baö wini wini cægadäimpa. ⁴¹ Itota ingante nāni timpodiiñömö eyequei gönea inimpa. Adodea iñömö miintatodë nāni ææ wodiñömö önontatoque inimpa. ⁴² Iimö ate guëmanguïönæ inguimpa, ante oodeoidi, Ñowoönæque cæcæimpa, ante nāni cæönæ impa, ante beyæ, Ontato eyequei impa, ante tömënāni Itota wodi baö mäniñömö daga wengadänimpa.

20

Itota nē wæningä incæ ñāni ömæmonte quëwengä

(*Mäateo 28.1-10; Mäadoco 16.1-8; Odoca 24.1-12*)

¹ Oodeoidi guëmanguïönæ Tabado go ate mönö Dominco tæcæ ooque pönente bayedë Mäadiya Mäagadadënä Itota wodido ponte ayongä dicabo ontato tee mönocæte ante nāni da pæñæninca incæ do wëä godö concæi intapa. ² Botö Itota nänö nē waadedimo tönö Timönö Pegodo iñömö Itota miñæ möna nē godincaya iñömönate

Mäadiya Mäagadadēnā wæætē, Mänōmaī impa, ante adinque mōnatō weca pogodo ponte apænecantapa,

—Awēnē Itota wodi baō ontatodē ōñōñongante ænte taodinqe ædōnō māo ñō cædānii, ante ēñēnāmaī imōnipa.

³ Ante apæneyongā Pegodo tōnō botō Itota miñæ mōna nē godincaya iñōmō tōmengā wodido quingæ gote pogodo pontamōnapa. ⁴ Guēa pogodo gomōna incæte tōmengā ēmiñænimo botonque quingæ tōmengā wodido tāno pontabopa. Pegodo ayæ pongantapa. ⁵ Māniñōmō tāno pōninqe ædæ wæænte guiite ayōmo iñāna nāna wīni caadincooque ōñō abo incæte guidāmaī intabopa. ⁶ Timōnō Pegodo botō miñæ ayæ nē pōningā Itota wodido ontatodē ponte wāānē guicantapa. Wāānē guiyongante doyæncōoque iñāna nāna wīni caadincooque māniñōmō ōñō acantapa. ⁷ Ayæ Itota wodi ocabo nāna ñāni cæcadincoo adobaī ōñō acantapa. Mānincōo doyæncōo tōnō wīi adoyōmō ñōnonte intapa. Wæætē iincoo nāā wēnente nānēnē ñō cæte ōñō acantapa. ⁸ Iinque botō tōmengā wodido ontatodē tāno nē pōnimo incæte ñōwo tæcæ adobaī wāānē guitabopa. Guiite ayōmo, Itota nānō ōñōniñōmō æbānō i, ante adinque, Tōmengā ñāni ōmæmonte quēwengā ingampa, ante pōnentabopa. ⁹ Edæ Wængonguī angā ēñente yewæmōninqe dodāni, Mōnō Codito iñōmō do wæningā incæ ñāni ōmæmonte quēwenguēnengā incæcāimpa, ante mōnatō māniñedē ayæ ēñēnāmaī inōmōnaimpa. ¹⁰ Ayæ mōnatō tōmengā miñæ nē godimōna iñōmō wadæ godinque tōmēmōna oncōnē ocæ ēmænte gotamōnapa.

Itota iñōmō Mäadiya Mäagadadēnā weca pongā

(Mäadoco 16.9-11)

¹¹ Mäadiya guiquēnē Itota wodido ontatodē yabæ inō a ongonte wædongāimpa. Mänōmaī wædinque tōmengā, Abote, ante ædæ wæænte guiite ¹² adinque Wængonguī anquedoda nāāmæntacoo mongæna inte Itota wodi baō ōñōniñōmō tæ contada ina acantapa. Adocanque Itota wodi ocabo ōñōniñōmō tæ contayongā wacā Itota wodi onōwa ōñōniñōmō tæ contate ongongā

acantapa. ¹³ Tōmēna iñōmō tōmengā ingante,

—Onquiyæmi, minō quinante wæmintawo.

Äna ēñēninqe tōmengā wæætē,

—Botō Awēnē wodi baō inī ō ænte godāni awædō. Ædōnō māo ñō cædānii, ante ēñēnāmaī wæbopa.

¹⁴ Māniñō āninqe Mäadiya dadi ēmænte ayongā Itota māniñōmō a ongongā adinque Itota incæcā tōmengā ēñēnāmaī ingantapa. ¹⁵ Itota iñōmō,

Minō quinante wæmintawo. Æcānō ingante ante diqui diqui mīmintawo.

Ante angā ēñēninqe Mäadiya, Īngā iñōmō wabānō gōnea ōmæ wite nē aacā ingampa, ante onōwēnenque pōnēninqe,

—Ēñēmi, bitō tōmengā wodi baō inī wayōmō ænte māobi inte bai ædōnō gote ñō cæbitapa, ante apænebi ēñēmoe. Apænebi ēñēninqe botō tōmengā wodi baō do gote æmaimopa.

¹⁶ Äñongante Itota tōmengā ingante,

—Mäadiya, angantapa.

Angā ēñēninqe tōmengā weca dadi ēmænte ebedeo tededō āninqe,

—Adabōni, angantapa. Māniñō mōnō tededō, “Awēnē nē Odōmōmi imi,” ante impa.

¹⁷ Itota iñōmō,

—Edæ botō ayæ botō Mæmpo weca ocæ ēmænte godāmaī imopa, ante adinque minō botō imo pæ mānāmaī iedā, angantapa. Wæætē minō botō tōniñadāni weca godinque tōmēnāni inānite iīmaī apænebi ēñēcædānimpa. Botō ñōwo botō Mæmpo weca ocæ ēmænte goquimo imopa. Tōmengā iñōmō mīnitō Mæmpo adobaī inongampa. Botō ñōwo botō Wængonguī weca ocæ ēmænte goquimo imopa. Tōmengā iñōmō mīnitō Wængonguī adobaī inongampa, angantapa.

¹⁸ Itota angā ate Mäadiya Mäagadadēnā iñōmō Itota nānō nē ēmiñænīnāni weca pōninqe, Awēnē Itota ingante atabopa, āninqe, Tōmengā iīmainō ante apæncā ēñēntabopa, ante tōmēnāni inānite māo apænegacāimpa.

Itota iñömö tömengä emiñænināni weca pongä

(*Mäateo 28.16-20; Mäadoco 16.14-18; Odoca 24.36-49*)

¹⁹ Guëmanguiönæ go ate iimö ate wëmö bayö tömengä emiñænināni adoyömö pöningue, Oodeoidi awënëidi inānite ancai guiñente awædö, ante odemö tee mönete ongönānitapa. Itota tömēnāni weca pö guiite tæcæguedē a ongöningue,

—Guiñēnāmaï inte gänē pönencæminimpa, angantapa.

²⁰ Mäninö angä ate tömengä önompo odömöningue tömengä betagonta odömongä adānitapa. Ìningue mönö Awënē ingante adinque tömengä emiñænināni nangui watapæ todānitapa. ²¹ Itota wæætē adodö,

—Guiñēnāmaï inte gänē pönencæminimpa, angantapa. Botö Mæmpo iñömö botö imote nänö da pönongaimo imo bai botö adobai mīnitö imīnite da godömo goquimīni iminipa.

²² Ante apænedinque tömēnāni baonga woo öongate apæneçä,

—Botö ñöwo pöni mīnitonga Wængongui Tæiyæ Waëmö Önowoca ingante pönö pönömo æedāni. ²³ Nē wënæ wënæ cæcä ingante adinque mīnitö tömengä ingante godö ñimpo cæmīni ininque Wængongui adobai tömengä ingante godö ñimpo cæcä quëwëmaingampa. Mīnitö wæætē nē wënæ wënæ cæcä ingante godö ñimpo cædāmaï imīni ininque Wængongui adobai cædāmaï inte tömengä ingante pönö ñimpo cædāmaï imaingampa.

Itota ñāni ömæmonte nē quëwengä ingante Tömato açä

²⁴ Itota emiñænināni adoyömö a ongöñönāni tömengä pö guiite tömēnāni weca tæcæguedē a ongöñongä tömengä emiñæningä adocanque Tömato mēwoga emongä Åancadēnaque iñömö dæ angampa. ²⁵ Ayæ ate Itota nänö nē emiñænināni wadāni iñömö,

—Mönö Awënē ingante atamönipa, ante Tömato ingante apænedāni ëñëningue tömengä wæætē,

Botö iñömö tömengä önönempe nāni daagö timpodifñömö, Æyömönö empocä, ante adinque öngompoca gampod- inque ayæ tömengä betagonta inö nāni

tapa tænonte codiñömö botö tömēmo öngompoca gampote ate pönēmaï wædö, angantapa.

²⁶ Wacä tēmāna go ate Itota emiñænināni wæætē oncönē adoyömö pö guiite a ongöñönāni Tömato tömēnāni tönö godongämæ pö guiite a ongongan- tapa. Odemö tee mönete ongö incæte Itota iñontobæ pö guiite tömēnāni weca tæcæguedē a ongöningue,

—Guiñēnāmaï inte gänē pönencæminimpa, angantapa.

²⁷ Ayæ Tömato ingante,

—Bitö tömēmi öngompoca pædæ pom- podinque botö önompo æe. Pædæ guiipote botö betagonta inö gampoe. Ayæ, Wabänö incædö, ante änāmaï incæbiimpa. Wæætē pönēe.

²⁸ Ante añongä Tömato,

—Botö Awënē inömi imipa. Ayæ adobai botö Wængongui inömi imipa, angantapa.

²⁹ Ayæ Itota tömengä ingante,

—Botö imote ate pönēmi imipa. Wæætē nē adāmaï ināni incæ botö imote pönēnāni ininque tömēnāni nāni toquinque ingæimpa, angacäimpa.

Wäo nänö yewæmongainta quinante yewæmongacäi

³⁰ Tömengä emiñænināni weca Itota, Eñencædānimpa, ante wadö wadö cædinque tömengä nänö bamönengæ ayæ godömenque nangui pöni cægacäimpa. Botö iñömö iintaa yewæmöninque mäninö tömengä nänö cægainö ante wiï tömää yewæmontabopa. ³¹ Wæætē mäninö ante yewæmöninque botö, Itota mönö Codito inongäimpa, ante ayæ, Tömengä Wængongui Wengä inongä ingampa, ante mīnitö pönencæminimpa, ante yewæmontabopa. Edæ tömengä emöwo beyænque mīnitö mänömainö ante pönëningue cöwë wænāmaï quëwencæminimpa, ante botö iinta yewæmömopa.

21

Itota tömengä emiñænināni 7 ganca ināni weca pongä

¹ Ayæ ate tömengä emiñænināni Tibedi- apæ nāni ämæ yæwedeca emönaiboga ongöñönāni Itota iñömö tömēnāni weca

pöninge a ongongä adänitapa. Edæ iïmai batimpa. ² Timönö Pegodo adocanque, Tömato Äancadënaque nãni äongä tönö Gadideabæ Cãnaa nê quëwengä Näatãnaedo mënaa, Tebedeo wëna nãna caya mënaa, ayæ Itota nãno nê ëmiñænina wada mënaa mänimpodäni adoyömö ongönönänimpa. ³ Timönö Pegodo iñömö tömengä tönö ongönäni inänite,

—Botö ñowo gæyæ dadoncæ tao gobopa.

Angä ëñëninge tömënäni iñömö,

—Bitö miñæ gocæmönimpa.

Äninqe, Ægodödäni gomompa, ante tao godinque wipodë godongämæ guiddinque tömäa woyowotæ gæyæ dadoncæ cædäni incæte gæyæ dæ ænämaï inönänimpa. ⁴ Não bayonte Itota iñömö ëmönaiya yæwedeca a ongongä adinque, Itota ingampa, ante tömengä ëmiñæninäni incæ ëñënämaï inänitapa. ⁵ Ayæ tömengä tömënäni inänite yedæ aa pedinque,

—Iñänäni, gæyæ æmïnitawo.

Äñongante,

—Ænämaï imönipa.

⁶ Änäni ëñëninge tömengä wæætë,

—Mïnitö dicamonca wipo tömëmæ inö æpænë wo guitodonte gæyæ dadonte æedäni.

Tömengä nãno ämaï cædinque tömënäni nanguï pönï gæyæ dicamonca date owo adinque ædö cæte dicamonca wëa pönonte ænguïnänii. ⁷ Itota ëmiñænimo tömengä nãno nê waadebo inömo inte botö Pegodo ingante apænedinque,

—Iingä iñömö mönö Awënë Itota ingampa.

Ämo ëñëninge Timönö Pegodo iñömö tömengä yabæcoo nãno gä tadongate cönönincoo æninque daga wëñate æpænë to go ti wææninque ömaa taocantapa. ⁸ Wadäni Itota nãno nê ëmiñæninäni iñömö yæwedeca obo pönï tiëë mëetodo ganca bai iñömö wäi wocædäni ininque wipodë ayæ owodäni iñömö Pegodo miñæ wogaa godinque dicamö gæyæ eyede pönï wëa pönö pönänitapa. ⁹ Tömënäni wipodë inte pædæ æænoncado ponte ayönäni, Æænonguï, ante gonga ëmönömö gæyæ öñö adinque adoyömö wædænque pão

cö cæte öñö adänitapa. ¹⁰ Itota tömënäni inänite,

—Gæyæ mïni ñowo æni wædænque ænte pödäni.

¹¹ Angä ëñëninge Timönö Pegodo wipodë pö guiddinque dicamö ænte ëmönaiya wëa tadongantapa. Edæ tiento tincoenta i todee ganca inäni mänimpodäni gæyæ ñænængade dicamö iñömö eyede owodäni incæte dicamö wangö tëmönämaï inimpa. ¹² Itota iñömö tömënäni inänite,

—Pö cæedäni,

Äñongante tömengä ëmiñæninäni tömänäni, Mönö Awënë Itota ingampa, ante ëñëninge, Æbidö imii, ante tömengä ingante ædö cæte anguïnänii. ¹³ Itota gongapamö iñömö pöninge pão ænte tömënäni inänite pædæ godongä ænäni ininque tömengä ayæ gæyæ öñö æninque tömënäni inänite pædæ godongä cænänitapa.

¹⁴ Mänömaï cædinque Itota do wæningä incæ ñäni ömæmonte quëwente mempoga do ponte a ongöningä inte ñowo tömengä ëmiñæninäni weca mempoga go adopoque pongacäimpa.

Timönö Pegodo ingante Itota apænecä

¹⁵ Tömënäni iinque cænäni ate Itota iñömö Timönö Pegodo ingante,

—Timönö Wäo wëmi ëñëmi. Botö imo mäninäni pönömenque waadete pönëñönäni bitö iñömö näwangä botö imote godömenque waadete pönëmitawo.

Äñongä,

—Awënë, Ao ämopa. Bitö imite botö waadedö ante bitö do ëñëmipa.

Angä ëñëninge Itota,

—Waadäni iñömö botö obegaidi wënäni bai iñönänite bitö tömënäni inänite botö angainö ante odömonte apænebi ëñencædänimpa, angantapa.

¹⁶ Ayæ wæætë,

—Timönö Wäo wëmi ëñëmi. Bitö näwangä botö imote waadete pönëmitawo.

Äñongä,

—Awënë, Ao ämopa. Bitö imite botö waadedö ante bitö do ëñëmipa.

Angä ëñëninge Itota,

—Waadäni botö obegaidi bai iñönänite bitö tömënäni inänite aacæbiimpa, angantapa.

¹⁷ Itota mempoga go adopoque tömengä ingante,

—Timönö Wäo wëmi ëñëmi. Bitö botö ïmote waadete pönëmitawo, ante angantapa.

Itota mempoga go adopoque tömengä ingante, Bitö botö ïmote waadete pönëmitawo, ante angä ëñëninge Pegodo wæwente ïnongäimpa. Incæte Itota ingante,

—Awënë bitö tömäa ëñëmi ïmipa. Bitö ïmite botö waadedö ante bitö do ëñëmipa.

Ante wæyongä Itota wæætë,

—Waodäni ïñömö në botö obegaidi bai ïñönänite bitö tömënanï inänite botö angainö ante odömonte apænebi ëñencädänimpa. ¹⁸ Bitö ïmite näwangä ämopa. Bitö wëñæmiyedë tömëmi nämä daga wëñadique, Ædönö goinëmo, ante bitö goinënonque do gobi imitapa. Nöwo ïñömö bitö picæmi bayedë bitö pædæ gopoyömi wacä incæ bitö ïmite godö daga wëñadique bitö goinënamä ïñömö mänïñömö bitö ïmite mäocä gocæbiimpa.

¹⁹ Pegodo ingante mänömainö ante apænedingue Itota ïñömö, Tömengä ingante æbänö wænönäni wæñongä Wængongui ñäö apäite bai nänö ëmönö edonque bacæimpa, ante odömoncæte ante apænegacäimpa. Ayæ godömenque tömengä ingante,

Botö miñæ tee empo pöe, angacäimpa.

Itota ëmiñæningä nänö në waadecä

²⁰ Pegodo guiquënë dadi ëmænte botö Itota ëmiñænimo nänö në waadebo ïñömö tömëna miñæ tee empo pömo acantapa. Mänimo ïñömö do möni cæñedë Itota tönö äänömonque tæ contadique, “Awënë bitö ïmi æcänö godö odömonguinaa, apænebi ëñëmönie,” ante në apænedimo ïnömoimpa.

²¹ Pegodo botö ïmo adingue Itota ingante,

—Ïngä ïñömö në tee empo pongä diyæ æbänö tömengä beyæ bacæimpa.

²² Äñongä Itota wæætë,

—Botö ocæ ëmænte ponguinganca tömengä ayæ quëwencæcäimpa, ämo bai bitö wæætë ædö cæte në ämi inguimii. Botö ïñömö në anguimo ïmopa. Bitö guiquënë botö miñæ tee empo ponguënëmi ïmipa, angantapa.

²³ Mänömaï beyæ pancadäniya möni tönïñadäni weca godingue gode ä gode ä

cædinque botö ïmotedö ante apænedingue, Ïngä ïñömö cöwë wænämaï quëwengingä ingampa, ante tedewengadänimpa. Itota ïñæmpa, Ïngä ïñömö wænämaï quëwencæcäimpa, ante änämaï ingacäimpa. Wæætë, “Botö ocæ ëmænte ponguinganca tömengä ayæ quëwencæcäimpa, ante ämo bai bitö ædö cæte anguimii. Botö anguimo ïmopa,” ante mäningue angacäimpa.

²⁴ Tömënanï, Ïngä wænämaï quëwengä ingampa, ante nänï në apænedimo ïñömö edæ botö tömengä nänö në ëmiñænimo adobo ïmopa. Tömëmo, Æbänö batimpa, ante botö apænedö ïñömö näwangä ante në apænedimo inte botö adodö ante tömänö ante në yewæmönimo ïmopa. Mäninö ante botö angainö ïñömö näwangä impa, ante mönitö ëñëmönipa.

²⁵ Itota ïñömö nanguï pönï godömenque wadö wadö cægacäimpa. Æbänö cæcää, ante tömäa nänö cægainö ante adingue yewæmömöni bai mänintacoo möni yewæmönintacoo ñönongui ante edæ inguipoga tömäo incæ wii eyepæ incädönimpa, ante pönëmopa. Mäningue ante yewæmömopa.

Itota nānō da godongaināni Nāni Cægainō

Wængonguī Tæiyæ Waëmō Ōnōwoca poncæcäimpa, ante

¹ Teopido bitō acæbiimpa, ante botō do yewæmōninque, Itota æbānō mā cægacāi, ante, Itota æbānō mā odōmonte apænegacāi, ante yewæmontabopa. Mānōmainō ante do yewæmōnimo inte botō adobo Odoca inōmo inte ñōwo godōmenque yewæmōmo ae. ² Itota do iñōmō, Īināni botō ĩmotedō ante nē apænequīnāni ĩnānipa, ante cædinque tōmēnāni ĩnānite apænte æninque da godongacäimpa. Īinque tōmengā nānō æite goquīōnæ iñonte tōmēnāni tōnō godongāmæ ongōninque Itota iñōmō Wængonguī Tæiyæ Waëmō Ōnōwoca tōnō cædinque tōmēnāni ĩnānite, Botō dæ gobo ate mīnitō ĩmaī cæcæmīnimpa, ante apænegacäimpa. Īinque apænecā ate tōmengā ingante Wængonguī do ænte mæicā inque ingā æigacäimpa. Īinque māninganca tōmengā nānō cægainō ante do yewæmōnimo inte botō iñōmō, Bitō Teopidobi godōmenque acæbiimpa, ante ñōwo wæætē yewæmōmopa.

³ Itota adocā incæ nantate wægaingā inte ñāni ōmæmonte ate coadenta eōnæ manimpoōnæ inguipoga quēwēninque tōmēnāni weca mīngā inte wæætē pō wæætē pō cædinque mā pōni cædongäimpa. Īinque, Tōmengā nāwangā mīngā inte mānōmaī cæcampa, ante adinque tōmēnāni ædō cæte wadō ante pōnenguīnāni. Ayæ tōmēnāni weca a ongōninque tōmengā tōmēnāni ĩnānite, Wængonguī Awēnē Odeye nempo quēwencæmīnimpa, ante tōmānō ante adodō adodō ante apænecā eñengadānimpa.

⁴ Tōmēnāni tōnō godongāmæ ongōninque Itota ĩmaī angantapa.

—Wīi wayōmō goedāni, Eedotadēe iñōmō ee quēwēedāni, angantapa. Botō Mæmpo iñōmō, Wacā ingante da pōnōmo æninque ēwocacæmīnimpa, ante do apænebo eñēmīnitawo. Tōmengā, Da

pōnonguīmo, ante nānō nē angaingā ingante ante ænte ēwocacæte ante mīnitō ñōwo wānō cōedāni. ⁵ Edæ Wāo wodi iñōmō æpænē guidongacäimpa. Wængonguī Tæiyæ Waëmō Ōnōwoca guiquēnē mīnitō baonga wantæ iñō pō guicæcäimpa, ante Itota apænegacäimpa.

Itota öönædē æicampa

⁶ Ayæ Itota tōnō godongāmæ ponte ongōnāni iñōmō tōmengā ingante ānānitapa. —Itota eñēmi. Mōnō idægocabo mōnō quēwengāimæ iñonte wadāni do ō ænāni incæte bitō ñōwo wæætē adobæ æninque mōnitō Awēnē Odeyebi oo bacæ cæbitawo. Edæ, Bitō nempo oo pōni godongāmæ quēwencæmōnimpa, ante cæbitawo, ante eñencæte ante wæmōnipa.

⁷ Ancaa āñōnāni,

—Īñæmpa mīnitō ante wæinō bai, Æyedēnō baquīi, ante, Æpogadō baquīi, ante mīnitō wīi eñenguēnēmīni ĩmīnipa. Mæmpoque nē angaingā inte mānīnō ante eñengampa. ⁸ Wæætē Wængonguī Tæiyæ Waëmō Ōnōwoca pō guīdinque pōnō cæcā ate mīnitō wæætē tæi piñænte ēwocamīni edæ bacæmīnimpa. Īinque, Botō æbānō cægaboī, ante nē adīmīni inte mānīnō botō cægainō ante mīnitō tāno Eedotadēe iñōmō quēwente apænedinque ayæ Oodeabæ māo apænedinque godōmenque tōmāmæ māo apænemīni eñencædānimpa, ante Itota angacäimpa.

⁹ Mānōmainō ante apænecā eñente a ongōñōnāni Itota māniñōmō ongonte æi boguīmancodē ingæ æicā æmō agadānimpa.

¹⁰ Öönædē æite ingæ gocā æmō ayōnāni edæ onguīñæna nāāmænta wecoo mongæna tōmēnāni weca a ongōninque edæ, ¹¹ tōmēnāni ĩnānite apænedinque,

—Gadideabæ quēwēmīni inte onguīñæmīni eñēedāni. Quīnante æmonga a cōmīni. Edæ Itota mīnitō tōnō ongōninque öönædē æicā amīnitawo. Edæ öönædē æicā mīni adī bai adocā Itota ĩncayæ ate ocæ emænte poncæcäimpa, ante apænedatapa.

Codaa nānō cæquēnēnō wacā cæcæcäimpa, ante cædāni

¹² Oodeoidi nāni guēmanguīōnæ cōwē nāni goganca māningancaque ĩ ĩnque wīi

gobæ ī īnīnque tōmēnāni Odibowænquidi nāni anquidi ongōnīnque ocæ ēmænte wææ Eedotadēē pōnānitapa. ¹³ Tōmēnāni ēmōwo Pegodo tōnō Wāō, Tantiago tōnō Æntade, Pedipe tōnō Tōmato, Batodōmēē tōnō Māateo, Adepeo wengā Tantiago, wacā, Mōnō ōmæ ingæīmpa, ante nē ānongā Timōnō, Tantiago wengā Codaa. Mānōmaī ēmōnāni inte pō guīdīnque tōmēnāni nāni wānoncōnē æmongapaa æi guīdānitapa. ¹⁴ Ayæ īīnāni tōnō wadāni Wængonguī ingante godongāmæ apæncæte ante cōwē pō pō cægadānīmpa. Onquiyænāni adobaī Itota badā Māadiya tōnō ayæ Itota biwīidi tōnō cōwē ponte apænedōnānīmpa.

¹⁵ Māniñedē Itota ingante nāni tee empote quēwēnāni tiento bæinte ganca īnāni inte ongōñōnāni Pegodo tæcæguedē ængæ gantite apæncantapa. ¹⁶ “Īnānāni ēñēedāni. Nōwocā Codaa wodi Itota wodi ingante nē æncædāni īnānite nē godō odōmongā ingantawo. Edæ tōmengā ingante ante Wængonguī Tæiyæ Waēmō Ōnōwoca wēēñēdē apæncā ēñēnīnque awēnē Dabii wodi nānō yewæmongainō baī cōwē īīnque baquīnō anguēnē. ¹⁷ Edæ Itota mōnitō īmōnite apænte ænīnque Codaa ingante adobaī apænte ængacāīmpa. Īnīnque mōnō cabo mōnō nē cæquēnēnō ante Codaa wodi adocā incæ mōnō tōnō godongāmæ cæcā ingacāīmpa. ¹⁸ Tōmengā wīwa cæte tīguitamō nānō ænīntamō incæ adodō godongā ænānitapa. Tōmēnāni wæætē tīguitamō ænīnque, Waodānido bacāīmpa, ante ōmæ godonte ænānitapa. Tōmengā īñōmō guīdōmēmæ wæænte ōmengō tæi æbæ godente æmæwo wængantapa. ¹⁹ Mānōmaī wængā ēñēnīnque Eedotadēē quēwēnāni tōmānāni, ‘Wepæ onguipo ba awædō,’ ante tōmēnāni nāni tededō Atedāmæ pemōnānitapa. ²⁰ Edæ Āmotamīni nāni Angaintaa īīmaī ante dobæyedē yewæmongatīmpa.

‘Tōmengā oncō æmæwo ōnonconque bacāīmpa.

Wacā mānīncōnē cōwē quēwēnāmaī incæcāīmpa.’

Ante nāni Āmotamīni Angainta baī do batīmpa. Ayæ,

‘Tōmengā nē aacā bate nānō cæquēnēnō incæ wacā badīnque cæcæcāīmpa,’ ante yewæmonte ongompa,”

²¹ Ante apænedīnque Pegodo godōmenque īīmaī ante apæncantapa. “Mānōmaī īī īnīnque Codaa wodi nē nānō cæquēnēnō incæ edæ wacā cæcæcāīmpa, ante ñōwo mōnō apænte angæīmpa. Awēnē Itota īmæca mōnō tōnō guēa cægongāñedē wadāni godongāmæ nē cægōnīnāni īnānite adīnque mōnō īīmaīnō ante apænte ængæīmpa. ²² Wāō wodi nānō guīdōñedē cægōnīnque ñōwoōnæ Itota nānō æite goōnæ ganca æcānō æcānō mōnō tōnō godongāmæ cægōnīnāni īnānīi, ante adīnque mōnō adocanque ingante apænte ængæīmpa. Apænte æmō ate tōmengā, Itota dobæ ñāni ōmæmongantapa, ante nē agaīngā inte wæætē mōnō tōnō godongāmæ apæncā incæcāīmpa.” ²³ Ante Pegodo angā ēñēnte cædīnque tōmēnāni wæætē, Æcānō æcānō nē agaīnāni īnānīi, ante adīnque mēnaa īnate apænte ænānitapa. Adocanque Ootee, Badatabato nāni ānongā inte tōmengā mæmæ beyæ, Yoto, ante nāni pemongaīngā īñongante tōmēnāni tōmengā ingante apænte ænīnque edæ wacā ingante Māatiya ingante apænte ænte gōnōnānitapa. ²⁴ Mānōmaī apænte ænīnque Wængonguī ingante apænedānitapa. “Awēnē ēñēmi. Mōnitō æbānō pōnēmōnīi, ante tōmāā ēñēmi inte bitō īīna īnate adīnque æcānō ingante do apænte ængabīi, ante odōmōmi amōnīi. ²⁵ Edæ Codaa wodi tōmengā nānō pante wængūnque oda cæcantapa. Īnīnque bitō ñōwo wacā ingante da godōmi godīnque Codaa wodi nānō cæquēnēnō ante cæcæcāīmpa, ante āmīi, ante wæmōnīpa.”

²⁶ Ante Wængonguī ingante apænedīnque tōmēnāni, Æcānō īnaa, ante ēñēncæte ante cædīnque dicamō ænīnque, Wo godō wo godō cæyōmō to ta wææ acæi, ante cæte ayōnāni Māatiya nānō cæ to ta wæænca adīnque, Mōnō īmonte Itota da godongā nē godīmō ōnōmpo tipæmpoga go adocanque īñōmonte tōmengā mōnō cabo badīnque godongāmæ cæcæcāīmpa, ante cægadānīmpa.

2

Wængonguī Tæiyæ Waēmō Ōnōwoca pongampa

¹ Tömēmō incadepo ba ate Pentecotee ææmænoca nāni äönæ iñonte tömēnāni nāni cabo adoyōmō ponte godongāmæ ongōnānitapa. ² Ongonte ēñēñōnāni woboyæ nanguī pæmænte ä bai iñontobæ öönædē pō ēñēñōnāni oncōnē nāni ongoncōnē tōmancōnē wææ guite bai woboyæ nanguī pæmænte ä bai ēñēnānitapa. ³ Ayæ waodāniya incæ gonga bai onguēnē onguēnē bæco adānitapa. ⁴ Ayōnāni Wængonguī Tæiyæ Waēmō Ōnōwoca incæ tōmānāniya pō guicā ewocadānitapa. Pō guidinque Wængonguī Ōnōwoca pōnō cæcā beyænque tömēnāni wadāni nāni tededō bai wadāni nāni tededō bai mā apænedānitapa.

⁵ Māniñedē oodeoidi Wængonguī ingante guñente quēwēnāni inte edæ wabæca wabæca tōmāmæ quēwēninquē ñōwo Eedotadēē ponte quēwēnōnānimpa. ⁶ Iñāni iñōmō woboyæ nanguī pæmænte bai ä ēñente wædinque ponte ēñēñōnāni Itota ingante nē pōnēnāni iñōmō ñōwo pōnāni nāni tededō bai tededāni ēñēnānitapa. Adocanque nānō tededō bai wacā nānō tededō bai tededāni ēñēninquē tömēnāni, Æbānō cæte tōmāmō tededō bai tededāni ēñēmōnii, ante wædānitapa. ⁷ Tömēnāni nāmāneque apænedinque,

—Iñæmpa Gadideabæ quēwēnāniquē inte iñāni mānōmaī tededāni awædō. ⁸ Iñinquē ædō cæte mōnō ēñagaïōmæ mōnō tededō bai tededāni ēñēmōō, ante ancaī guñente wædānitapa. ⁹ Edæ iñōmō nē ongōmō iñomonte pancadāniya Pada tiabæ quēwente pōñōmō wadāni guiquēnē Mēediabæ, Edāmæ, Mēetopotāmiabæ, Oodeabæ, Capadotiabæ, Pontobæ, Atiabæ quēwente pōnāni inānipa. ¹⁰ Wadāni guiquēnē Pidiguiabæ, Pampidiabæ, Equitobæ quēwente pōnāni inānipa. Wadāni guiquēnē dibiabæidi ināni inte Tidēne iñōmō quēwente pōnānipa. Wadāni guiquēnē Odōmā iñōmō quēwēninquē ēñacæ ante ponte owodānipa. ¹¹ Odōmā

iñōmō nē quēwēnāni iñōmō pancadāniya oodeoidi ēñagaīnāni iñōnāni pancadāniya wæætē wadāni incæ oodeoidi pōnēnāni bai adodō pōnente oodeoidi bai bagaīnāni inānipa. Ayæ wadāni guiquēnē codetenteidi tōnō adabeidi inte pōnāni inānipa. Iñinquē mōnō wabæca wabæca quēwēninquē wadāni nāni tededō bai wadāni nāni tededō bai nē tedemō imompa. Incæte iñāni guiquēnē, Wængonguī waa pōni cæcā ingampa, ante mōnō tededō bai mā pōni tededinque apænedāni ēñēmompa tōō.

¹² Ante wædinque tömēnāni nāni cabo nāmāneque apænedinque,

—Æbānō ēñēmōō, ante wæmōnipa tōō.

¹³ Ante wæyōnāni pancadāniya babæ apænedinque,

—Biinōmæ müimæ tōmo pōni bedinque dowænāni inte tededānipa, ante badete togadānimpa.

Pegodo tömēnāni inānite apænecampa

¹⁴ Mānōmaī tedeyōnāni Pegodo iñōmō ōnompō tipæmpoga go adocanque ināni tōnō ængæ gantidinque nanguī tedecā ēñengadānimpa. “Oodeoidi ēñēedāni. Ayæ wamīni guiquēnē Eedotadēē iñōmō ñōwo ponte owomīni inte mīnitō oodeoidi tōnō tōmāmīni ēamonca ongonte ēñēedāni. Botō, Æbānō i, ante edonque apænebo ēñencæmīnimpa,” angantapa.

¹⁵ “Gāwadecæ impa diyæ tī nāmæ bete dowænte baquīnānii. Iñæmpa nænque ayaōnāa ææñongā ædō cæte mīni änō bai bete dowænte baquīnānii. ¹⁶ Wæætē Wængonguī beyæ nē apænegaingā Oedo wodi do nānō angaīnō bai ñōwo cædānipa, ante apænebo ēñēedāni. Oedo wodi iñōmō iñmaīnō ante yewæmongacāimpa.

¹⁷ Wængonguī iñmaī angampa, angacāimpa. Iñinquē bayedē botō Ōnōwoca ingante tōmānāniya ämo pō guicā ewocacædānimpa.

Māniñedē onquiyænāni incæ onguīñænāni incæ mīnitō wēnāni inōnāni inte botō beyæ apænecædānimpa.

Edēnāni iñōmō ate bai mā pōni acædānimpa.

Picænāni guiquēnē nō wīimonte bai acædānimpa.

18 Ayæ botō Ōnōwoca ingante ämo pō guicä
 ēwocadinque
 onguīñænāni incæ onquiyænāni incæ
 botō beyænque nē cædāni īnōnāni inte botō
 beyæ apænecædānimpa.

19 Edæ mīni ææmō ate pōnenguinque ante
 botō öönædē mā cæbo acæmīnimpa.
 Ayæ īmæca adobaī pōnō cæbo ate wepæ
 gonga tēemā nanguī mongæ ad-
 inque ēñencæmīnimpa.

20 Edæ nænque tāno wentamō bayō apāicä
 wepæ emō ba acæimpa.

Ayæ ate tōmengä nānō ponguīönæ īñonte
 Wængonguī Awënē incæ tæī piñængä
 īnongä inte

ñāō apāite baī emōninque poncæcäimpa.

21 Īninque botō emōwo ante nē aa pedāni
 īñömō

tömānāni botō æmo beyænque quēwencædāni
 Ante Wængonguī Awënē cæcæcäimpa, ante
 Oedo wodi yewæmongacäimpa.”

22 Ante apænedinque Pegodo godömenque
 īmaī ante apænecantapa. “Idægoidi,
 apænebo ēñēdāni. Itota Nāatadeta
 nē quēwengaingä nāwangä botō nē da
 pōnongä ingampa, ante pōnencæmīnimpa,
 ante mā cædinque Wængonguī Itota tōnō
 godongāmæ tæī piñænte nanguī cæcä ate
 Itota mīnitō weca bamōnengæ cædinque
 nanguī cægacäimpa. Īninque mänōmaī cæcä
 nē agaīmīni inte mīnitō, Nāwangä Itota
 ingante Wængonguī da pōnongä ponte
 cæcampa, ante do ēñēmīnipa. 23 Wængonguī
 nāmā pōnēninque, Codito ingante tōmēnāni
 nempo pædæ godoncæboimpa, ante do
 angaingä inte, Mīnitō tōmengä ingante
 æninque mänōmaī cæcæmīnimpa, ante
 do ēñengacäimpa. Īninque mīnitō īñömō
 Itota ingante bæi ongonte æninque ēñente
 cædāmaī īnāni nempo pædæ godōninque,
 Mīnitō tōmengä ingante awāa timpod-
 inque wææ tiwate wænōedāni, ante āmīni
 wænōnānitapa. Mänōmaī önōnecaque tedete
 beyæ mīnitō tōmēmīni edæ nē wænōmīni
 baī bamīnipa tōō. 24 Mīnitō mänōmaī
 wadāni tōnō cædinque wænōmīni beyæ
 Itota īñömō mōnō wænguēnemāmo tēemē
 mongænte caate wædinque wængacäimpa.
 Ayæ pæ opate öñöñongante Wængonguī
 wæætē, Idæwaa, ante wi ænote baī

cædinque angä ate Itota ñāni ömæmonte ta
 pongantapa. 25 Adocä Codito beyæ ante
 apænedinque awënē Dabii wodi īmaī ante
 yewæmongacäimpa.

‘Botō, Mōnō Awënē cōwē botō weca mā
 ongongampa, ante atabopa.

Īninque tōmengä botō tōmēmæ inō tōō
 æmænte ongongä Īninque botō imote
 ædō cæte bæ tadāni wæquīmoo.

26 Mänōmaī beyæ botō, Watapæ bacæimpa,
 ante mīmōnē pōnēmo inte botō
 önōneca ämotamīni ante baī nanguī
 tobopa.

Botō ñāni ömæmonguinque nē wæwocabo
 imopa, ante pōnēmo inte botō
 guīñēñate wædāmaī inte baō ēñate
 quēwencæboimpa.

27 Wængonguī ēñēmi. Botō waodāni nāni
 wænte ongōñömō öñöñömote bitō
 emō cæte godāmaī incæbiimpa.

Bitō imite nē cæbo inte botō tōmēmi cædō
 ante cōwē cæbo īñömote bitō ædæmō
 wææ aabi ate botō baō ñömāadāmaī
 incæboimpa, ante edæ botō do
 ēñēmopa.

28 Taadō botō quēwenguīnō ante bitō do
 odömōmi agaboimpa.

Bitō weca æidinque bitō awinca adinque
 watapæ tocæboimpa,’

ante awënē Dabii wodi ämotamīni ante baī
 apænegacäimpa.”

29 Ante apænedinque Pegodo godömenque
 apænecantapa. “Īñānāni ñōwo edonque
 apænebo ēñenguēnē quēwēmīni. Mōnō
 mæmæ Dabii wodi do wængacäimpa.
 Tōmengä māo do daga wengadānimpa.
 Edæ tōmengä wodido nāni wengaiñömō
 ñōwo ganca a ongō amīnipa. 30 Incæte
 tōmengä ingante Wængonguī, Dabii ēñēmi,
 angacäimpa. Bitō pæināni wææ pæyōnāni
 adocanque ingante botō bitō awënē
 contaimpaa pōnō cōnōmo contadinque
 tōmengä īñömō nē Awënē bacæcäimpa,
 ante apænecä ēñēninque awënē Dabii
 wodi Wængonguī beyæ nē apænegaingä
 īnongä inte edæ, Wængonguī tōmengä
 nānō änō baī cōwē cæcæcäimpa, ante do
 ēñengacäimpa. 31 Ayæ, Æbānō cæquiringä,
 ante do ēñengaingä inte tōmengä, Mōnō
 Codito īñömō waodāni nāni wænte
 ongōñömō öñöñongante Wængonguī emō

cæte godāmaī inte wææ aacā beyænque tōmengā baō incæ ñōmāadāmaī ingæimpa, ante apænegacäimpa. Mänōmainō ante apænedinque awēnē Dabii wodi, Mönō Codito ñāni ömæmoncæcäimpa, ante do apænegacäimpa. ³² Itota ingante Wængonguī, Ñāni ömæmōe, angā ñāni ömæmongantapa. Ìninqe mäninō tōmengā nānō ñāni ömæmongainō ante nē adimōni inte mōnitō tōmāmōni edæ, Nāwangā impa, ante nē apænemōni imōnīpa.”

³³ “Ìninqe Wængonguī angā beyænque Itota inque ingā öönædē æidinque Wængonguī tōmēmæ inō tæ contate ongongampa. Ayæ Mæmpo Wængonguī, Botō Önōwoca ingante æncædänimpa, ante nānō nē angaingā ingante do godongā æninqe Itota wæætē mōnitō imōnite ñōwo da pōnongā ænte ewocamōnīpa. Ìninqe mīnitō guiquēnē gonga bæco ate wæmīnitawo. Wadāni nāni tede bai tedemōni eñente wæmīnitawo. Edæ Wængonguī Önōwoca pōnō cæcā beyænque gonga bæco amīnīpa. Wængonguī Önōwoca pōnō cæcā beyænque wadāni nāni tede bai tedemōni eñēmīnīpa. ³⁴ Itota öönædē inque ingā æicā bai awēnē Dabii wodi wīi adobaī æigacäimpa. Incæte tōmengā godōmenque apænedinque ïmaī ante yewæmongacäimpa.

‘Awēnē Wængonguī incæ botō Awēnē ingante apænedinque, Nē Awēnē ïmi eñēmi. Botō tōmēmæ inō tæ contayōmi,

³⁵ botō bitō ïmite nē pīinte cædāni inānite bæ tabo ate bitō tōmēnāni inānite pinā gāwate bai cæcæbiimpa,’ ante Awēnē Wængonguī angacäimpa,” ante Dabii wodi yewæmongacäimpa.

³⁶ Ante apænedinque Pegodo godōmenque ïmaī angantapa. “Mänōmaī beyæ mīni idægocabo tōmāmīni, Ìmaīnō ante nāwangā pōnī impa, ante eñencæmīnīpa. Māningā Itota ingante mīnitō ñænquedīmæ gönonte wænōmīni nē wæningā ingante ante apænedinque Wængonguī incæ, Itota nē Awēnē inongā ingampa, ante ayæ, Nē Codito inongā ingampa, ante edæ do cægacäimpa.”

³⁷ Ante Pegodo apænecā eñēninqe tōmēnāni, Æ, wænæ wænæ cæte awædō,

ante ancai guiñente wædinque Pegodoidi inānite,

—Ìñānāni, æbānō cæquēnemōni imōnīi.

³⁸ Æñōnānite Pegodo wæætē,

—Ïmaī cæedāni. Mīnitō wænæ wænæ mīni cædinō ante Wængonguī pōnō ñimpo cæcæcäimpa, ante cædinque, Æmæwo wænæ wænæ cætabopa, ante Itota Codito emōwo ante apænedinque æpænē guiedāni. Mänōmaī cæmīni adinque Wængonguī tōmengā Önōwoca ingante da pōnongā ænte ewocacæmīnīpa. ³⁹ Edæ mīnitō imīnite aa pecā incæ mīni wēnāni inānite aa pecā incæ gobæ quēwēnāni inānite aa pecā incæ ayæ ate quēwēnāni inānite aa pecā incæ mōnō Awēnē Wængonguī nānō nē aa pedāni inānite apænedinque, Botō änō bai cōwē cæcæboimpa, angampa.

⁴⁰ Ante apænedinque Pegodo godōmenque nanguī äninqe, Ëñenguēnē quēwēnāni, ante wantæpiyæ apænecantapa.

—Ñōwodāni iñōmō nāmanque nāni cæinēnō ante idiquibæ nāni cæi bai mīnitō adobaī cædāmaī inte nōingā cæte waa quēwēdāni.

⁴¹ Ante Pegodo ancaa angā eñēninqe pancadāniya Ao äninqe æpænē do guīdānitapa. Ìninqe edæ mānīönæ todee mīido ganca ināni mānīpodāni wede pōnēninqe do pōnengaināni tōnō adocabodāni bagadānīpa. ⁴² Ìināni iñōmō adocabodāni badīnāni inte cōwē ñimpo cædāmaī ïninqe godongāmæ pō pō cæyōnānite Itota nānō da godongaināni apænedāni eñēnōnānīpa. Ayæ nāni pōnencabo inōnāni inte wacā ingā wacā ingā watapæ apænedinque pāō pā ænte godongāmæ cæninqe Wængonguī ingante cōwē apænete quēwēnōnānīpa.

Nāni pōnencabo godongāmæ waa cæte quēwēnānīpa

⁴³ Ìninqe edæ tōmānāni guiñente wædinque ee quēwēnōnānīpa. Ayæ Itota nānō da godongaināni iñōmō, Tōmānāni pōnencædānīpa, ante cædinque Wængonguī Tæiyæ Waēmō Önōwoca tōnō cædinque tōmēnāni nāni pōnēninqe ante mā cædinque bamōnengæ nanguī

cædonānimpa. ⁴⁴ Nē pōnēnāni tōmānāni adoyōmō pō pō cædinque tōmēnāni nāni mānincōo incæ, Tōmāmō qui impa, ante nē pōnēninque, Wacā ingā wacā ingā mōnō godongāmæ godonguinque māmompa, ante cædonānimpa. ⁴⁵ Māincōo tōnō ōmæ nāni ēadincoo incæ godonte æ godonte æ cædinque wadāni nē ōmadāni inte wædāni inānite pancæ pancæ godōnānimpa. ⁴⁶ Ī ĩnque ĩimō ĩñō ĩimō ĩñō adoyōmō pōninque Wængonguī oncō ñænæncōnē yabæcōnē nē guī guī cædāni inte mīmōno nō pōnēninque tōmēnāni oncōnē adobāi pāō pā ænte watapæ todinque godongāmæ cænōnānimpa. ⁴⁷ Tōmēnāni edæ Wængonguī ingante, Waa pōnī nē cæbi ĩmipa, ante ancaa añōnāni wadāni edæ tōmēnāni inānite waa adōnānimpa. Ayæ mōnō Awēnē pōnō cæcā ate tōmēnāni edæ, Itota Codito ængā beyænque mōnō quēwengæimpa, ante pōnēninque ĩimō ĩñō wacabomō ĩimō ĩñō wacabomō nē pōnēnāni badinque edæ tæiyænāni bagadānimpa.

3

Cōmāwaingā ingante āna waa bawacampa

¹ ĩncayæ ate nænque ædæ wæicā ate oodeoidi nāni cōwē Wængonguī ingante apænedōñedē Pegodo tōnō Wāō ĩñōmō Wængonguī oncōnē ñænæncō yabæcōnē guīcæte ante æidatapa. ² Æite ayōna wadāni pōninque cōmāwaingā ēñate nē pædingā ingante næænte māmōnāni pongā adatapa. ĩngā cōmāwaingā ĩñōmō nē pō guīdāni inānite, Pōnōmi æmoe pōnōmi æmoe, ancæcāimpa, ante cædinque tōmēnāni tōmengā ingante ĩimō ĩñō ĩimō ĩñō næænte pō næænte pō cædinque edæ Wængonguī oncō ñænæncō boyæ yabædemō, Wainemō, nāni ānemō yabæque cō cædonānimpa. ³ ĩnque ñōwo Pegodo tōnō Wāō Wængonguī oncō ñænæncōnē yabæcōnē pō guīcæ cæda adinque tōmengā tōmēna ĩnate, Pōnōmīna æmoeda, angantapa. ⁴ Angā ēñēninque Wāō tōnō tōmengā ingante cōwā adinque Pegodoque apænecantapa.

—Mōnatō ĩmōnate ææmō ae.

⁵ Angā ēñēninque cōmāwaingā, Botō ĩmote wabānō pōnōna ænguīmo, ante pōnēninque ææmō ayongā ⁶ Pegodo ĩñōmō,

—Quīnō māmopa pōnōmo ænguīmī. Edæ oodo incæ tīguitamō incæ ōmæpobo ĩmopa. Wæætē tæiyæ waēmō botō ēwocadō ante bitō ĩmite pōnō apænebo ate bitō æe. Nāatadeta quēwengaingā Itota Codito ēmōwo beyænque bitō dao dao goe, angacāimpa.

⁷ Āninque Pegodo cōmāwaingā tōmēmæ ĩnō pædæ wææmpo bæi ongonte tōō æmængā ate cōmāwadingā ōnōwa tōnō ōnoncaiwa tæi piñæwacā. ⁸ Ate ĩñontobæ ængæ gantite dao dao gocantapa. Ayæ Wāō tōnō Pegodo miñæ Wængonguī oncō ñænæncōnē yabæcōnē godongāmæ go guī-idinque dao dao togæi togæi godinque Wængonguī ingante waa ate apænedinque, Wængonguī, bitō cōwē waa pōnī ĩnōmi inte pōnō cæbi æmopa, ante nangui apænecantapa. ⁹ Wængonguī mānōmaī waa cæcampa, ante nangui pōnī tededinque dao dao gocā adinque edæ tōmānāni, ¹⁰ Æ, ĩngā ĩñōmō, Pōnōmi æmoe pōnōmi æmoe, ante Wængonguī oncō ñænæncō boyæ yabædemō, Wainemō, mōnō ānemō gāānē mōnō nē ānecōningā adocā ingampa. Ante adinque, Quīnō baī cæte waa bacāi, ante ancaī guīñente wægadānimpa.

Tadōmōō yabætaa ongonte Pegodo apænecampa

¹¹ Mānī cōmāwaingā ĩningā incæ Pegodo tōnō Wāō ĩnate wīnīmā wīnīmā cæcā adinque wadāni tōmānāni guīñente wædinque Tadōmōō yabætaa nāni añōmō pogodo ponte tōmēnāni weca guīdānitapa. ¹² Guīdāni adinque Pegodo, “Mīni idægocabo ēñēdāni. Mōnatō ĩmōnate quīnante waa amīnī. Mānōmaī waa bawacā adinque edæ quīnante guīñente wæmīnī. Mōnatō edæ, Tōmengā dao dao gocæcāimpa, ante cædinque tæiyæ waēmōna ĩmōnāpa diyæ tæi piñænte cæquīmōnaa. ¹³ Abadāō wodi Itæca wodi Aacobo wodi tōmēnāni, Mōnō Wængonguī ĩnongā ingampa, ante nāni nē angaingā inte Wængonguinque cæcā ate waa bawacampa. Mōnō wæmæidi Wængonguī incæ, Itota botō ĩmote nē cædongā ñāō baī ēmōñongante tōmengā ingante waa acædānimpa, ante

mānōmaï cæcampa. Adocā Itota ingante mīnitō iñōmō, Wængongæimpa, ānīnque pædæ godōmīnitapa. Ayæ Pidato, Ñimpo cæbo gocæcāimpa, ante apænte angā ate mīnitō wæætē Pidato weca ongōnīnque adocā ingante ante Baa āmīnitapa. ¹⁴ Īnīnque nē Tæiyæ Waēmō īnongā inte nō cæyongante mīnitō Baa ānīnque wæætē nē wænōningā ingante ante ānīnque, Īngā ingante ñimpo cæbi pongæ, āmīnitapa tōō. ¹⁵ Īnīnque mōnō quēwenguīmāmo nē pōnongā ingante Baa ānīnque mīnitō nē wænōnīmīni īmīnīpa. Incæte Wængonguī tōmengā ingante, Ñāni ōmæmōe, angā ñāni ōmæmongantapa. Īnīnque tōmengā ñāni ōmæmongā nē adīmōni inte mōnitō, Æbānō cægacāimpa, ante adodō ante nē apænemōni īmōnīpa. ¹⁶ Adocā Itota ēmōwo ante apænemōna ēñente pōnēnīnque māningā cōmāwadingā mīni nē adingā iñōmō ñōwo tæi piñæwacampa. Edæ Itota pōnō cæcā beyæ māniī onguīñægā nē pōnægā badīnque Itota ēmōwo beyænque ædæmō waa bawate tæi piñægā bacā amīnīpa,” ante Pegodo apænecantapa.

¹⁷ Ayæ godōmenque apænedīnque Pegodo, “Ñōwo botō tōniñamīni ēñēdāni. Mīnitō awēnēidi ēñēnāmaï nāni cæi bai cædīnque mīnitō iñōmō adobaï, Æbānō nō cæquī, ante ēñēnāmaï inte cæmīnitapa, ante awædō. ¹⁸ Incæte mīnitō mānōmaï ēñēnāmaï cædīnque Wængonguī beyæ nē apænegāināni tōmānāni nāni apænegaï bai do īinque cæmīnīpa. Tōmēnāni, Mōnō Codito caate wæte wæncæcāimpa, ante nāni angāinō bai mīnitō cædī beyæ ñōwo īinque batīmpa. ¹⁹ Īnīnque mīnitō wēnæ wēnæ mīni cædīnō ante wæwente pōnente ñimpo cædīnque wentamō mīni mongæñō mīni ñā mēnongaquinque Wængonguī gāmæñō pōedāni. ²⁰ Mōnō Awēnē weca mīni wampo pōnenguīnque pōedāni. Ayæ Wængonguī, Mīnitō Codito poncæcāimpa, ante do nānō angāingā īnongā inte Itota mīnitō weca poncæcāimpa, ante tōmengā gāmæñō pōedāni.”

²¹ “Incæte edæ, Tōmancoo do ingāi bai adobaï bacoocæimpa, ante Wængonguī badoncæcāimpa, ante tæiyæ waēmō ingāināni Wængonguī beyæ doyedē

apænegadānīmpa. Wængonguī mānōmaï nānō badompoga Itota iñōmō mānīmpoga ōōnædē quēwencæcāimpa anguēnē. ²² Edæ Mōitee wodi, ‘Botō wænte gobo ate mīnitō Awēnē Wængonguī wæætē mīnitō beyæ cædīnque mīni cabo iñōmīnīte adocanque ingante apænte Ao ante æncæcāimpa. Tōmengā ingante ānīnque, Mōitee wodi botō beyæ nē apænecā ingāingā bai bitō adobaï edæ botō beyæ nē apænebi bacæbiīmpa, ancæcāimpa. Wængonguī mōnō Codito ingante mānōmaï angā īnīnque tōmengā wæætē nē apænecā bagacāimpa. Īnīnque mīnitō iñōmō tōmengā quīēmē ante apæneyongā ēamonca ongonte tōmānō ante ēñencæmīnīmpa. ²³ Īnīnque edæ māningā Wængonguī beyæ nē apænecā ingante æcānō ēñēnāmaï īna iñōmō, tōmengā guīdēnāni weca quēwēnāmaï edæ wæncæcāimpa,’ ante Mōitee wodi apænegacāimpa,” ante Pegodo apænecantapa.

²⁴ Ayæ apænedīnque Pegodo, “Æpodānidō Wængonguī beyæ nē apænegāināni īnāni. Edæ tōmēnāni Tāmoedo tōnō ayæ pōnāni tōnō tōmānāni adoyōmō apænedīnque Codito ñōwoōnæ nānō cædō ante apænegadānīmpa. ²⁵ Īnīnque mīnitō guīquēnē Wængonguī beyæ nē apænegāināni wēmīni īnōmīni inte tōmēnāni nāni angāinō ante nē ænguīmīni īmīnīpa. Ayæ edæ Wængonguī, Botō pōnō cæbo ate Ao āmīni Īnīnque mōnō godongāmæ waa cæcæimpa, ante nānō angāinō ante mīnitō edæ mīni quēwenguīnque ēñente quēwencæmīnīmpa. Abadāō wodi ingante apænedīnque Wængonguī, ‘Abadāō ēñēmi. Mīnitō mīni quēwencabo tōnō wadāni tōmāmæ quēwēnāni nāni cabo nāni cabo tōnō tōmāmīni iñōmīnīte bitō Pæingā pōnō waadete cæcā beyænque waa quēwēnīnque tocæmīnīmpa,’ ante apænegacāimpa. ²⁶ Wængonguī, Botō Wengā pōnō aa pecā ēñēnīnque mīnitō wæætē wēnæ wēnæ cæte mīni gogāinō ocæ ēmænte wadæ pōnīnque wæætē waa quēwenguīnō cægōnīnque waa tocæmīnīmpa. Ante cædīnque tōmengā tāno mīnitō beyæ ante tōmengā ingante nē cædongā mōnō Codito ingante da pōnongā pongacāimpa,” Ante Pegodo īinque

apænegacāimpa.

4

Pegodo tōnō Wāō awēnēidi weca gongcænte apænedapa

¹ Pegodo tōnō Wāō tōmānāni inānite tæcæ apæneyōna wadāni tōmēna weca māo godongāmæ pōnānitapa. ² Īnāni ĩñōmō nē, Wængonguī quī, ante godōnāni tōnō Tado-teoidi tōnō Wængonguī oncō ñænæncō ante nē wææ wānōnāni awēnē tōnō mānīnāni pongadānimpa.

³ Pōnīnque tōmēnāni ĩñāna ĩnate bæi ongōnānitapa. Ayæ wēmō ba ĩnīnque baānæ ate nāna taquinque tōmēna ĩnate tee mōnedāni guīdatapa. ⁴ Incæte tōmēna āna nē ēñēnīnāni guīquēnē pancadāniya nanguī ĩnāni incæ nē pōnēnāni bagadānimpa. ĩnīnque onguīñænāni nāni nē pōnencabo ĩñōmō wodo tinco mīido ganca ĩnāni mānimpodāni bæi bagadānimpa.

⁵ Baānæ ate oodeoidi awēnēidi tōnō tōmēnāni inānite nē aadāni nāni Picæncabo tōnō nē odōmōnāni tōnō Eedotadēē ĩñōmō godongāmæ ponte ongōnānitapa.

⁶ Wængonguī quī, ante nē godongā ñænængā pōnī Ānato ponte a ongōñongā tōmengā guīdēnāni Caiapato Wāō Ade-cantodo tōnō wadāni tōmengā guīdēnāni incæ tōmengā weca godongāmæ pō guī-idānitapa. ⁷ Pō guīdīnque edæ Wāō tōnō Pegodo ĩnate tæcæguedē māmō gōnōnāni gongæñōna ānānitapa.

—Mīnatō æcānō tōnō tæi pīñænte cæmīna ate cōmāwadingā waa bawacantawo. Edæ æcānō ēmōwo apænete cæmīnāi.

⁸ Ante āñōnāni Pegodo ĩñōmō Wængonguī Tæiyæ Waēmō Ōnōwoca tōnō apænedīnque,

—Awēnēidi ĩmīni ēñēedāni, nē aamīni mīni Picæncabo ēñēedāni. ⁹ Cōmāwaingā æbānō cæte waa bawacāi, āmīnitawo. Edæ cōmāwaingā ingante mōna waa cædi beyænque mīnitō ñōwoōnæ pōnō apænte āmīni awædō. ¹⁰ ĩnīnque mīnitō tōnō idægoidi wadāni tōnō botō tōmāmīni ĩmīnite adoyōmō apænebo ēñencæmīnimpa.

Itota Codito Nāatadeta quēwēningā ingante awæ ñænquedīmæ cæte mīni nē wænōningā ingante Wængonguī angā do ñāni ōmæmongacāimpa. Tōmengā adocā Itota ēmōwo beyænque cōmāwaingā ĩningā tæi pīñængā badīnque mīnitō weca a ongongā apa ānewēmīnīi. ¹¹ Edæ wainca nē mænōnāni nāni wido cædinca incæ wacā, Tæcæ manca pōnī tæi manguīmpa, ante cōnongampa. Itota ĩñōmō mānīnca bæi ææmōnga pōnī ongongampa.

¹² ĩnīnque Itota, Quēwencæmīnimpa, ante mōnō ĩmonte ængā bæi wacā ædō cæte adobāi ænguingā. Itota ēmōwo beyænque quēwencæmīnimpa, ante pōnō cægaingā ĩnte Wængonguī wæætē, Wawo adobāi ĩ, ante dicæ pōnō cæcantawogaa. ĩñæmpa ĩngui-poga tōmāmæ ĩñōmō edæ æcāmenque incæ adobāi nē tæi pīñænte ēmōnongā ĩñōmō edæ dæ angampa, ante apænedatapa.

¹³ Ayæ Pegodo tōnō Wāō ōnōnaque ĩna ĩnte nanguī adāmaī ĩna incæte edæ guīñēnāmaī edonque apænedapa, ante adīnque tōmēnāni, Æbānō cæte edæ do ēñēnatawoo, ante wædīnque, Itota mīñæ nē godīna ĩnte do ēñēnāpa. Nāwangā ĩmpa, ante wædānitapa. ¹⁴ Edæ cōmāwadingā ĩningā tōmēnāni weca a ongongā adīnque tōmēnāni ædō cæte wadō ante tedequīnānīi.

¹⁵ ĩnīnque tōmēna ĩnate, Mōnitō godongāmæ Apænte Āincabo weca ongōnāmaī godōmenque goeda, ānāni goda ĩnīnque, Tōmēna ĩnate æbānō cæquīi, ante pōnēnīnque godongāmæ tedecōnānitapa.

¹⁶ ĩmaī ante apænedānitapa.

—Mānīna ĩnate quīnō cæquīmōō. ĩñæmpa tōmēna tæi pīñænte bamōnengæ cædatapa, ante Eedotadēē quēwēnāni, Nāwangā ĩmpa, ante tōmānāni do ēñēnānīpa. ĩnīnque, Waa cædāmaī ĩnatapa, ante mōnō ædō cæte anguīi. ¹⁷ Incæte mānīnō nāni apænedō ante wadāni wīi godōmenque ēñencædānimpa, ante wææ cædīnque mōnō tōmēna ĩnate wææ angæīmpa. Mānīi ēmōwo ante mīnatō mīna wæquīnque apænemīnāpa. Wacā æcāmenque ingante apænedāmaī ĩmāeweda, ante mōnō wææ angæīmpa, ante nāmāneque tededānitapa.

¹⁸ Ayæ ĩnīnque tededīnque Wāō tōnō Pegodo ĩnate āñēte māmōnāni pōna ad-

inque tōmēna īnate wæætē, Eñnguēnē quēwēmīnaa, ānānitapa. Edæ mīna panguinque ante Itota ēmōwo ante apænemīna. Īncayæ ate tōmengā ēmōwo ante apænedinque edæ adopoque incæ odōmōnāmaī īmāeweda. ¹⁹ Ante āñōnānite Pegodo tōnō Wāō wæætē,

—Īñæmpa æcānō ingante eñente cæquīmōna, ante pōnēmīni. Mīnitō ānō eñēninque wæætē Wængonguī nānō ānō eñēnāmaī inte cāmōna adinque Wængonguī edæ, Nō cāmīna abopa, anguingāā. ²⁰ Edæ mōna adinō ante mōna eñēnō ante ædō cæte apænedāmaī inguīmōnaa.

²¹ Ante apæneda eñente wædinque awēnēidi wæætē, Mīni panguinque, ante ancaa apænedānitapa. Incæte wadāni, Cōmāīningā ingante Wængonguī waa pōnī cæcantapa, ante watapæ apænedāni ate wædinque awēnēidi wæætē Wāō tōnō Pegodo īnate pancæte ante cædināni inte, Īñæmpa waodāni pīnāni īninque mōnō æbānō cæte panguīmōō, ante guīñente wædinque pānāmaī inte nīmpo cædāni godatapa. ²² Edæ waa nē bawad-ingā īñōmō do coadenta wadepo ayæ godōmenque tōmengā nānō eñādī īñonte Wængonguī bamōnengæ cæcā waa bacā adinque tōmānāni ædō cæte wadō ante pōnenguīnāni.

Wede pōnente tæī pīñænte cæcæmōnīmpa, ante Wængonguī ingante apænedānīpa

²³ Mānīī nīmpo cædāni godinque Pegodo tōnō Wāō īñōmō tōmēna tōnō godongāmæ pōnēnāni weca ponte apænedinque, Wængonguī quī, ante nē godōnāni nānānāni tōnō nē aadāni nāni Picæncabo īñōmō mōnatō īmōnate īmaī ānāni wætāmōnāpa, ante tōmānō ante adodō ante apæneda. ²⁴ Eñēninque tōmēnāni nāni pōnencabo adoyōmō pōnēninque Wængonguī ingante adotedæ tedete apænegadānīmpa. “Awēnē Wængonguī eñēmi. Tæiyæ Awēnē īnōmi inte bitō oōnæ owocoo tōmancoo inguipoga tōmāmæ gāwapæntibæ tōmāmæ badōninque oōnædē owodāni yæipodē quēwēnāni gāwapāa owodāni æyōmōmē quēwēnāni tōmānāni īnānite bitō adobique badongabiīmpa. ²⁵ Īninque mōnitō mæmæ Dabii wodi ingante apænedinque bitō,

Dabii eñēmi, Bitō botō īmote nē cædōmi īñōmite botō Tæiyæ Waēmō Ōnōwoca apæncæ eñēninque bitō wæætē īmaī ante apæncæbiīmpa.

“Wadāni nē eñēnāmaī īnāni incæ quīnante ænguī badinque wido cæcæte ante cædāni.

Waodāni nāni cabo waodāni nāni cabo incæ idiquibæ ante quīnante pōnēnānitawo.

²⁶ Inguipoga awēnē odeyeidi, Wido cæcæīmpa, ante tæī gongænte ongōnānīpa.

Pancabaa awēnēidi adobaī, Æbānō cæquīmōō, ante godongāmæ pōnēninque

mōnō Awēnē ingante ayæ tōmengā nānō nē ōni pæcadongā Codito ingante pīinte ānewēnānīpa tōō, ante apænebi eñēninque mæmæ Dabii wodi wæætē bitō beyæ apænegacāīmpa.”

²⁷ Ante Wængonguī ingante apænedinque nōwodāni nāni pōnencabo godōmenque apænedānitapa. “Wængonguī eñēmi. Tōmēmi Wengā bitō Tæiyæ Waēmō īnongā īñongante bitō, Botō īmote nē cæbi bacæbiīmpa, ante ōni pæcagabiīmpa. Nāwangā īmpa. Incæte bitō īmite nē cædongā īñongante Itota bitō nē ōni pæcadongā ingante edæ Edode tōnō Pontio Pidato tōnō idægoidi tōnō wadāni tōnō pīinte adoyōmō ponte mōni quēwēñōmō incæ ongōninque bitō īmite nē cædongā ingante, Æbānō cæte wido cæquīī, ante do cædānitapa. ²⁸ Edæ bitō tæī pīñæmi īnōmi inte nāmā pōnēninque edæ, Īmaī baquīnō anguēnē, ante do angabiīmpa. Tōmēnāni guīquēnē bitō angāinō baī wæætē cædinque pīinte pō gongænte cædānitapa. ²⁹ Nōwo īñōmō bitō īmite nē cāmōni īñōmōnite nōwodāni pōnō pīinte ānāni ate wædinque bitō wæætē pōnō cæbi ate mōnitō tæī pīñæninque bitō ānō ante guīñēnāmaī apæncæmōnīmpa. ³⁰ Ayæ nē wēnæ wēnæ īnāni īnānite bitō ōnompoca pōnō gampobi ate waa bacædānīmpa, āmōnīpa. Ayæ bitō Wengā Itota Tæiyæ Waēmō īñongante mōnitō tōmengā ēmōwo apænedinque, Wadāni pōnencædānīmpa, ante mā cædinque bamōnengæ cāmōni adinque tōmēnāni guīñente wæcædānīmpa

āmōnīpa,” ante Wængonguī ingante apænedānitapa.

³¹ Īnque apænedāni ate tōmēnāni nāni godāmæ ongōñōmō incæ īñontobæ ocæ ocæ cætapa. Cæyō tōmānāni īnānīte Wængonguī Tæiyæ Waēmō Ōnōwoca pō guīcā ænīnque ædæmō ēwocadīnque tōmēnāni Wængonguī nānō ānō ante guīñēnedāmaī inte edonque apænegadānīmpa.

Tōmāmō mōnō quīncoo impa, ante cædānīpa

³² Ayæ tōmānāni nāni pōnencabo incæ tōmēnāni nāni ēwocadō adodō ēwocate baī īnāni inte mīmōnē adodō ante pōnēnīnque tōmēnāni ēadīncoo incæ, Botō quī impa, ante ānāmaī īnāni inte, Tōmāmō mōnō quī impa, ante pæ gompodāmaī īnōnānīmpa.

³³ Ayæ Itota nānō da godongāināni īñōmō tæī pīñænte apænedīnque, Itota Codito ñāni ōmæmongantapa, ante cōwē nāni apænedī baī apænedōnānīmpa. Edæ Wængonguī tōmēnāni īnānīte waadete pōnō cæcā ate watapæ quēwēnōnānīmpa.

³⁴ Ayæ tōmēnāni nāni cabo incæ æcāmenque ōmæpocā ī īñōmō edæ dæ angantapa. Edæ ōmæ nāni ēadī incæ godonte ænīnque oncō mænonte nāni ēadī incæ godonte ænīnque tōmēnāni nāni godonte ænīnta ænte pōnīnque ³⁵ Itota nānō da godongāināni weca ænte māmō ñō cædāni ænīnque tōmēnāni wæætē ōmæpodāni īnānīte godōnāni eyepæ eyepæ ænōnānīmpa.

³⁶ Īnque Itota nānō da godongāināni īñōnāni adocanque Debīi wodi pæingā Ootee ingacāimpa. Tōmengā īñōmō, Wadāni wampo pōnente quēwencædānīmpa, ante nē ædæmō apænedongā īñongante wadāni tōmengā ingante Bedēnabee ante pōnō pemongadānīmpa. Īngā Ootee Bedēnabee nāni pemōningā īñōmō Tipidebæ quēwente pōningā inte edæ, ³⁷ tōmengā ōmæ ēadī godonte ænīnque tōmengā nānō godonte ænīnta Itota nānō da godongāināni weca māmō ñō cægacāimpa.

5

Ānāniya tōnō Tapidæ

¹ Māniñedē Ānāniya nāni ānongā tōmengā nānōogængā Tapidæ tōnō tōmēnāni nāni

cæī baī cædīnque ōmæ nāna ēadīmæ godonte ænatapa. ² Ayæ nānōogængā ēñēñongā tōmēna godonte nāna ænīnta incæ Ānāniya īñōmō pancataa pæ gompote ænīnque wæætē pancataa ænte māmō Itota nānō da godongāināni weca ñō cæcantapa. ³ Ñō cæcā adīnque Pegodo,

—Ānāniya ēñēmi. Tatāna ingante ædæmō entawēmi inte ōmæ beyæ bitō ænīnta pancataa, Botō quī, ante awēmō ñō cædīnque edæ pancataa ænte māmō ñō cædīnque bitō, Tōmanta impa, ante quīmæ ānewēē. Īñæmpa, babæ cædīmi inte bitō Wængonguī Tæiyæ Waēmō Ōnōwoca ingante babæ āmīpa tōō. ⁴ Edæ bitō ōmæ īni incæ bitō quī cōwē intapa. Ayæ ñōwo mānīnta ænīnque, Æbānō cæquīī, ante tōmēmi nē āmi īmitapa. Īnīnque edæ mīmōno pōnēnīnque quīmæ wapitīcæ cæbitawo. Bitō mānōmaī cædīnque waodāni īnānīte wīī babæ apænedīnque Wængonguī ingante babæ apænebitapa tōō.

⁵ Angā ēñēnte wædīnque Ānāniya īñōmō tæ wæænte æmæwo wængantapa. Wængā adīnque tededāni ēñēnīnque tōmānāni guīñēnte wædānitapa. ⁶ Wængā īnīnque edēnīnāni ponte wīni caate næænte māo daga wēnānitapa. ⁷ Dobæ wængā ate todee ooda go ate tōmengā æbānō wængā ante ēñēnāmaī īningā inte tōmengā nānōogængā incæ pō guīcā. ⁸ Adīnque Pegodo tōmengā ingante,

—Apænebi ēñēmoe. Mīnatō ōmæ godōnīnque mānīmpota æmīnatawo. Āñongā,

Ao, mānīmpota.

⁹ Angā ēñēnīnque Pegodo wæætē,

Mīnatō īñæmpa edæ guēa pōnēnīnque, Mōnō Awēnē Ōnōwoca æbānō pangūingāā, ante quīmæ cæmīnatawo. Edæ bitō nānōogængā baō īni nē daga wēnīnāni incæ do dao dao pōnāni ēñēmīi. Edæ bitō baō adobaī ænte gocædānīmpa tōō.

¹⁰ Tæcæ ante āñongā onquiyængā īñōmō tōmengā ōnōwa gāānē tæ wæænīnque nāñe wængantapa. Wængā ate mānīī edēnīnāni pō guīite ayōnāni dobæ wænte a ōñongā adīnque tōmengā baō īni ænīnque tōmengā nānōogængā wodīdo gāānē māo daga

wēnānitapa. ¹¹ Mānōmaī nāñe wænāpa, ante tededāni ēñēnīque Codito ingante nāni nē godongāmæ pōnencabo tōnō wadāni tōmānāni ancaī guīñente wægadānimpa.

Ate ēñencædānimpa, ante bamōnengæ nanguī cædānīpa

¹² Māniñedē Itota nānō da godongaināni iñōmō Wængonguī Ōnōwoca tōnō cædinque, Ate pōnencædānimpa, ante wadāni ayōnāni mā cædinque bamōnengæ nanguī cædōnānimpa. Ayæ adoyōmō pōnēnīque tōmānāni Wængonguī oncō Tadōmōō yabæcōnē nāni ānōncōnē pō guī pō guī cædōnānimpa. ¹³ Wadāni tōmēnāni inānite adinque, Nē pōnēnāni waa quēwēnāni inānīpa, ante pōnēnāni incæte guīñente wædinque godongāmæ pō guīdāmaī gomō adōnānimpa. ¹⁴ Pancadāniya guīquēnē onguīñænāni tōnō onquiyænāni tōnō nanguī ināni mōnō Awēnē ingante ñōwo pōnēnānitapa. Iñāni iñōmō do pōnēnāni tōnō adocabodāni bacoo ināni bagadānimpa. ¹⁵ Iñique māniī bamōnengæ cædāni adinque wadāni wēnæ wēnæ ināni inānite ænte pōnīque mōimoga mōincodē ñō cædānitapa. Edæ, Pegodo nænque pāmo wodo pænta goyongā tōmengā gāñēñōmō ōñōnīque adocanque adocanque waa bacædānimpa, ante cædinque Pegodo nānō goquīnō ante ænte māmō ñō cædāni ōñōnānitapa. ¹⁶ Ayæ adobaī Eedotadēē eyequeī wayōmō nāni quēwēñōmō wayōmō nāni quēwēñōmō quēwēnīque wadāni wēnæ wēnæ ināni inānite næænte māmō næænte māmō cōnōnāni ate tōmānāni waa badānitapa. Ayæ wēnæ nē wentamō ēwocadāni inte yewænte wæwēnāni inānite adobaī ænte māmō pōnīque waa badānitapa.

Itota nānō da godongaināni inānite pūinte tee mōnedānīpa

¹⁷ Wængonguī quī, ante nē godongā ñænængā pōni inongā tōnō wadāni tōmengā tōnō godongāmæ cædāni incæ Tado-teoidi inōnāni inte, Nāni ōmæmōnāmaī ingæimpa, ante nē pōnēnāni inōnānimpa. Iñique Itota nānō da godongaināni mānōmaī waa cædāni ate wædinque awēnē tōnō Tadoteoidi iñōmō tōmēnāni

inānite pūinte agadānimpa. ¹⁸ Iñique Itota nānō da godongaināni inānite yao ongonde ænīque tōmānāni ayōnāni tee mōnedānitapa. ¹⁹ Tee mōnedāni wæcōñōnānite Wængonguī anquedo woyowotæ ponte odemō wi ænete mantacā tayōnānite apænecantapa. ²⁰ “Goedāni. Wængonguī oncō ñænæncō yabæcōnē go guīte næ gongænīque mīnitō māniñōmō pōnāni inānite apænedīque, Wængonguī pōnō cæcā beyænque mōnō quēwengæimpa, ante ædæmō apænemīni ēñencædānimpa.” ²¹ Angā ēñente cædinque tōmēnāni baōnæ ñāō bayonte Wængonguī oncō ñænæncō yabæcōnē do go guīdinque odōmonte apænedāni ēñēnānitapa.

Mānōmaī do go guīte apænedānīpa, ante ēñēnāmaī ināni inte edæ, Wængonguī quī, ante nē godongā ñænængā pōni inongā guīquēnē tōmengā tōnō godongāmæ cædāni tōnō adoyōmō pō guīdānitapa. Pōnīque tōmēnāni idægoidi inānite nē aadāni Picænāni godongāmæ nāni Apænte Ānōncabo tōmānāni inānite āñete pōnānitapa. Iñāni wæætē tontadoidi awēnēidi inānite ānīque, Mīnitō tee mōneincōnē gote Itota nānō da godongaināni inānite āñete māmōmīni poncædānimpa. ²² Ānāni tee mōneincōnē gote ayōnāni edæ dæ ānāni ante wædinque wææ wānōnāni awēnēidi gode ancæ pōnīque, ²³ iīmaī ante apænedānitapa.

—Gote ayōmōni oncō ædæmō tee mōnete intapa. Ayæ tontadoidi odemō pōni a ongōnāni adinque mōnitō go wi ænete guīyōmōni edæ dæ ānāni ate wædinque wadæ pōmōnīpa. ²⁴ Ante tededāni ēñēnīque, Wængonguī quī, ante nē godōnāni ñænænāni tōnō Wængonguī oncō ñænæncō ante nē wææ wānōnāni tæiyæ awēnē tōnō guīñente wædinque, Ñōwo quīēmē baī bacæimpa. ²⁵ Ante wæyōnāni wacā do pō guīdinque tōmēnāni inānite,

—Aquēnē quēwēmīni. Māniñāni mīni tee mōnedīnāni incæ Wængonguī oncō ñænæncō yabæcōnē go guīte a ongōnīque māniñōmō pōnāni inānite odōmonte apænedāni ēñēnāni ataquēdāni.

²⁶ Ante apænecā ēñente wædinque wææ wānōnāni awēnē tōmengā nānō wææ

wānoncabo tōnō Itota nānō da godongaināni inānite æncæ godinque, Godongāmæ ongōnāni incæ piinte tacadāni wæcæ wæ, āninqe pānāmaī inte ee ænte pōnānitapa. ²⁷ Ænte pōninqe nē aadāni Picænāni godongāmæ nāni Apænte Ānoncabo weca ænte māmō gōnōnāni gongæññōnānite, Wængonguī quī, ante nē godongā ñænængā pōni inongā iñōmō tōmēnāni inānite angantapa.

²⁸ —Māningā Itota emōwo apænedinque wadāni inānite odōmōnāmaī imæewedāni, ante ancaa antamōnipa tōō. Incæte mīnitō mānīne mīni odōmonte ānewēnō ante Eedotadēē tōmāo odōmonte apænemīnipa. Ayæ godōmenque tedewēninqe mīnitō, Māningā nē wængaingā ingante awēnēidi nē wēnæ wēnæ cædināni inānipa, ante mōnitō imōnitedō ante ānewēmīnipa tōō.

²⁹ Ante nē ñænængā pīiñongā Pegodoidi wæætē,

—Mōnitō guiquēnē waomīni imīnite eñēnāmaī inte Wængonguī ingante eñente cæquēnemōni imōnipa. ³⁰ Mīnitō Itota ingante ñænquedimæ timpote wænōmīni wængā ate mōnō wæmæidi Wængonguī incæ angā ñāni omæmongantapa. ³¹ Ayæ nē ñāni omæmōningā ingante apænedinque Wængonguī, Bitō, Quēwencædānimpā, ante nē Æmi bacæbiimpa, angacāimpa. Nē Æmi iñōmite idægoidi tōmānāni, Idæwaa wēnæ wēnæ cæte quēwente awædō, ante botō gāmænō poncædānimpā, ante cæcæbiimpa. Bitō æmi beyænque botō tōmēnāni inānite pōnō waadete ñimpo cæcæboimpa. Ante cædinque edæ Itota nānō Awēnē baquinque Wængonguī æmōnga ænte mæicā æidinque Wængonguī tōmēmæ inō tæ contate ongongampa. ³² Itota ingante Wængonguī ænte mæicā æigacāimpa, ante nē adimōni inte mōnitō mānīnō ante nē apænemōni imōnipa. Ayæ nē eñēmō cæmō iñōmonte Wængonguī tōmengā Tæiyæ Waēmō Ōnōwoca ingante da pōnongā ænte ewocamōmpa. Tōmengā Ōnōwoca adobaī mōnitō tōnō godongāmæ nē apænecā ingampa, ante Pegodoidi apænedānitapa.

³³ Mānōmaī apænedāni eñēninqe awēnēidi ænguī badinque tōmēnāni inānite edæ wænoncæ cædānitapa. ³⁴ Māniñedē adocanque Paditeocā incæ tōmengā emōwo

Gāmadedo tōmēnāni nāni wææ angainō ante nē eñengā iñongante tōmānāni tōmengā ingante waa adōnānimpa. Ininqe tōmēnāni nāni Apænte Āncabo wænoncæ cæyōnāni māningā iñōmō tōmēnāni nāni nē waadecā inongā inte ængæ gantidinque, Itota nānō da godongaināni inānite oncodo mantamīni wantæ ongoncædānimpā. ³⁵ Angā dæ godāni ininqe Gāmadedo wæætē awēnēidi inānite apænecantapa.

—Idægoidi eñēedāni. Mānīnāni inānite æbānō cæquīi, ante ædæmō pōnente ate edæ ee cædāni. ³⁶ Edæ doyedē wacā Teodo adobaingā ængæ gantidinque, Botō nē nanguī cæbo imopa, ante āñongante edæ tōmengā miñæ coatodo tiento ganca ināni godānitapa, ante pōnēedāni. Tōmengā ingante wadāni māo wænōnāni wængā ate tōmengā emiñænīnāni wæætē nāwæ godāni ate edæ dæ batimpa. ³⁷ Ayæ ate edæ awēnē, Mīnitō emōwo ponte yewæmoncæmīnimpā, ante nānō āniñedē wacā Gadideabæ quēwēningā Oodaa adobaī awēnē ingante wido cæcæte ante ængæ gantiyongā nanguī ināni tōmengā miñæ goyōnāni tōmengā ingante wænōnāni wængā ate nāwæ adobaī gogadānimpā. ³⁸ Ininqe, Mānōmaī batimpa, ante pōnente cædāni. Nōwo iñōmō iināni adobaī ængæ gantidāni adinque mīnitō tōmēnāni inānite ee ate gomō aedāni āmopa. Tōmēnāni waodānique inte cædāni baī ædō cæte cæquīnānīi. Edæ dæ bacæimpa. ³⁹ Wæætē Wængonguī angā eñente cædāni baī mīnitō ædō cæte Baa ante wido cæquīmīnīi. Edæ mīnitō mānōmaī cædinque Wængonguī ingante pīimīni inte wæbaīmīnipa.

Ante wææ angā eñente wædinque Ao ante tōmengā nānō ānō baī cædānitapa. ⁴⁰ Itota nānō da godongaināni inānite aa pedāni pōnāni ate awēnēidi, Pædāni, ānāni eñēninqe nē wææ wānōnāni æmontaimenca tæi tæi pānānitapa. Ayæ awēnēidi godōmenque, Itota emōwo ante apænedāmaī imæewedāni, ante āninqe Itota nānō da godongaināni inānite ñimpo cædāni godānitapa. ⁴¹ Nē Apænte nāni Āncabo weca ongote tao godinque tōmēnāni wæætē, Wængonguī mōnō imonte adinque, Botō Wēñængā emōwo beyæ

wadāni wēnæ wēnæ ānāni ate mīnitō eyepæ inte caate wæcæminimpa, ante do cæcampa, ante pōnēnīnque edæ nangui togadānīmpa. ⁴² Īnīnque Wængongui oncō ñænæncō yabæcōnē incæ woadāni oncōnē incæ tōmēnāni ñīmpo cædāmaī inte cōwē go guī go guī cædinque cōwē odōmonte apænedīnque, Itota tōmengā nāwangā mōnō Codito ingampa, ante watapæ apænedāni eñengadānīmpa.

6

Tiæte ganca īnāni nē nēnempodāni badānīpa

¹ Itota ingante nē tee empote quēwēnāni māñīñedē nangui īnāni badāni ate pancadāniya guidiego tededō nē tededāni īñōmō ebedeo tededō nē tededāni īnānite pīinte ānīnque, Mīnitō mīni cabo owæmpoīnāni īnānite īmō īñō īmō īñō cængui eyepæ godōnīnque mōni cabo owæmpoīnāni īnānite pōnōnāmaī īmīnīpa tōō, ante ānāni. ² Itota nānō nē da godongāināni īñōmō dote ganca īnāni īñōnānite wadāni, Dote īnānīpa, ante pemonte baī apænedōnānīmpa. Īnāni īñōmō guidiegoidi mānōmaīnō ante wædānīpa, ante eñente wædinque wadāni Itota ingante nē tee empote quēwēnāni īnānite āñete godongāmæ pōnāni ate tōmēnāni īnānite,

—Wængongui nānō apænedō ante nē apænequēnēmōni inte mōnitō ædō cæte mōni cæquēnēnō ante ñīmpo cædinque cænguinque ante godonguīmōnīi.

³ Īnīnque botō tōñīñāmīni eñēedāni. Mīni pōnencabo nāmā cōwā adīnque, Æcānō æcānō Wængongui Ōnōwoca tōnō āawocaque baī ewocate nō cædāni īnānīi, ante adīnque mīnitō tiæte ganca īnāni mānīmpodāni īnānite apænte æedāni. Apænte æmīni adīnque mōnitō tōmēnāni īnānite, Cængui nē godōmīni bacæminimpa, āmōni eñente cæcædānīmpa.

⁴ Mōnitō wæætē Wængongui ingante cōwē apænedīnque Wængongui nānō apænedō ante godōmenque odōmonte apænedīnque māñīnonque cæte quēwencæmōnīmpa.

⁵ Mānōmaīnō ante eñēnīnque tōmēnāni nangui īnāni īñōnāni inte tōmānāni Ao ante edæ, Īnāni mānōmaī īnānīpa, ante adīnque

īmaī emōnāni īnānite apænte ængadānīmpa. Adocanque Etebā nē wede pōnengā inte Wængongui Tæiyæ Waēmō Ōnōwoca tōnō āawocaque baī ewocacā īnongāīmpa. Tōmengā tōnō Pedipe, Podocodo tōnō Nīicānodo, Timōnō tōnō Padōmēna, ayæ Antioquiya īñōmō nē quēwēningā Nīicodato. Īngā īñōmō oodeoidi nāni pōnēnō baī pōnengā inte do oodeo baī bacā īnongāīmpa. Mānīmpodāni īnānite apænte ænānītapa. ⁶ Apænte ænīnque Itota nānō nē da godongāināni weca ænte māmō gōnōnāni ongōñōnānite īnāni īñōmō, Mīnitō nē godōmīni bacæminimpa, ante cædinque tōmēnāni īnānite gampodīnque Wængongui ingante apænedānītapa.

⁷ Īnīnque Wængongui nānō apænedō ante gode ā gode ā cædinque māo apænedāni eñēnōnānīmpa. Īnīnque Eedotadēē īñōmō Codito mīñæ nāni tee empote quēwencabo tæiyænāni yebænte bagadānīmpa. Wængongui quī, ante nē godōnāni incæ adobāi nangui īnāni wede pōnēnīnque eñente bagadānīmpa.

Etebā ingante bæi ongōnānīpa

⁸ Etebā īñōmō Wængongui waadete pōnō cæcā ate tæi pīñænte ewocadongā inte bamōnengæ nangui cædongāīmpa. Ayæ, Cæbo ate pōnencædānīmpa, ante mā cæcā adīnque godongāmæ ongōnāni pancadāniya, Æbānō cæcāā, ante wædānītapa.

⁹ Wadāni guiquēnē Etebā tōnō guēa wæætedō wæætē ancæte ante cædānītapa. Īnāni īñōmō oodeoidi īñōnāni incæ pancadāniya Tidēnebæ quēwēñīnāni īñōnāni pancadāniya Adecantodia īñōmō quēwēñīnāni īñōnāni pancadāniya Tidi-tiabæ quēwēñīnāni īñōnāni pancadāniya Atiabæ quēwēñīnāni īñōnānīmpa. Tōmēnāni doyedē wadāni īnānite nē cægaīnāni īñōnāni inte ñōwo abæ tawænte godīnāni īñōnāni inte godongāmæ pōnīnque adocabodāni baī badīnāni īñōnānīmpa. Tōmēnāni odōmōincō ante, Mōni nē Abæ Tawænte Gocabo Odōmōincō impa, ante pemōnōnānīmpa. Īnīnque tōmēnāni pancadāniya Etebā ingante wæætedō wæætē ante cæyōnāni, ¹⁰ tōmengā nē nō eñēnongā inte Wængongui Ōnōwoca tōnō godongāmæ apænecā

ēñēninque tōmēnāni, Æ mōnō wæætē ædō cæte wææ anguii, ante wædānitapa.

¹¹ Īninque nē wæætedō wæætē ānāni adodāni incæ wadāni ĩnānite godō awēmō ānānitapa. Mīnitō babæ ante ĩ incæte, Mōitee wodi ingante ante Etebā godō wēnæ wēnæ apæneccā ēñentamōnīpa, ante ōnonque ædāni. Ayæ Wængonguī ingante adobaī tōmengā godō wēnæ wēnæ ante babæ apæneccā ēñentamōnīpa tōō, ante incæ ædāni, ante nē abæ tawænte godīnāni ānānitapa. Mānōmaīnō ānāni Ao ante tōmēnāni nāni angaīnō baī cædinque Etebā ingante ante babæ ante pīnānitapa.

¹² Mānōmaīnō ante babæ ante pīnāni ēñēninque wadāni ōnōnānique incæ nē aadāni nāni Picæncabo incæ nē odōmōnāni incæ tōmānāni ænguī badānitapa. Mānōmaī ænguī badinque tōmēnāni Etebā wodi ingante bæi ongonte nē Apænte nāni Āincabo weca ænte māo gōnōnāni ongongantapa. ¹³ Pancadāniya Etebā ingante ante babæ apænedinque ĩmaī ānānitapa. Īngā ĩñōmō ñimpo cædāmaī inte cōwē Wængonguī oncō tæiyæ waēmō oncō ĩñonte wīwa tedewēninque tōmengā godōmenque Mōitee wodi nānō wææ angaīnō ante godō wīwa ante babæ apæneccā ēñentamōnīpa.

¹⁴ Īñōmō oncō ante apænedinque adocā Etebā ĩñōmō, Itota Nāatadeta nē quēwēningā ĩi oncō bæ tadete wido cæcæcāimpa, ante ānewengampa. Ayæ adocā Itota ĩñōmō, ĩmaī cædāni, ante Mōitee wodi nānō wææ angaīnō ante Ao ānāmaī inte edæ, Wadō ante cæquēnēmīni ĩmīnīpa, ante odōmongampa, ante ĩngā Etebā ĩñōmō adobaī ānewengā ēñentamōnīpa tōō, ante babæ apænegadānīpa.

¹⁵ Mānōmaī babæ apænedāni ēñēninque nē Apænte nāni Āincabo incæ Etebā ingante cōwā ayōnāni tōmengā awīnca Wængonguī anquedo nānō ēmōnō baī ēmongā agadānīpa.

7

Etebā nāmā wææ apæneccampa

¹ Īninque, Wængonguī quī, ante nē godongā ñænængā pōnī ĩnongā ĩñōmō Etebā ingante āninque, Bitō ĩmitedō nāni ānīnō nāwangā intawoo. ² Āñongante

Etebā wæætē ĩmaī ante nāmā wææ apæneccantapa. “Botō wæmpoidi ēñēdāni. Botō tōñīñamīni ēñēdāni. Mōnō wæmæ Abadāō wodi Mēetopotāmiabæ ayæ quēwēninque Cadāna ĩñōmō ayæ quēwēncæ godāmaī ĩñongante Wængonguī nē ñāō apāite baī ēmōnongā inte Abadāō weca ponte a ongongā agacāimpa. ³ Ayæ Abadāō ingante apænedinque Wængonguī, ‘Bitō guīdēnāni ĩnānite ēmō cæte bitō ōmæ ēmō cæte godinque wabæca botō odōmonguīmæca æmæwo wadæ goe,’ angacāimpa. ⁴ Angā ēñēnte cædinque Abadāō wodi māñīōmæ Cadeabæ ēmō cæte wadæ godinque Cadāna nāni quēwēñōmō ganca pōninque quēwengacāimpa. Ayæ tōmengā wæmpo wodi wængā ate Wængonguī tōmengā ingante angā ēñēninque Abadāō ĩmæca mōnō ñōwo quēwēmæ ponte quēwengacāimpa.”

⁵ “Incæte Wængonguī, Tōmēmi ōmæ, ante Abadāō wodi ingante cabo incæ ōmæ pōnōnāmaī ingacāimpa. Wæætē Abadāō wodi wēñængā mæmpo ĩnāmaī ĩñongante Wængonguī, ĩmæ incæ bitō ænguīmæ ĩñonte bitō pæīnāni adobæ tōmāo quēwēncædānīpa, ante odōmongacāimpa. ⁶ Ayæ godōmenque apænedinque Wængonguī, Bitō pæīnāni ĩñōmō wabæca gote māñīmæ quēwēnāni weca quēwēñōnānite ĩnāni wæætē bitō pæīnāni ĩnānite edæ ō ænte baī cædinque, Mōnitō beyænque cæedāni, ante nanguī ānāni wæcædānīpa. Ayæ tōmēnāni nempo wantæpiyæ coatodo tiento wadepo ganca māñimpoga quēwēñōnānite adodāni wēnæ wēnæ cædāni beyæ caate wæcædānīpa. ⁷ Ante Wængonguī godōmenque apænedinque, ‘Bitō pæīnāni ĩnānite nē ō ænte wēnæ wēnæ cædāni ĩnānite botō wæætē apænte āninque pancæboīpa. Ayæ ĩncayæ ate bitō pæīnāni māñīōmæ tōmēnāni nāni caate wædiōmæ ēmō cæte wadæ pōninque ĩmæca wæætē pōninque botō Wængonguīmo ĩñōmote botō beyæ cæquīnāni ĩnānīpa.’ ⁸ Āninque Wængonguī, Mōnō godongāmæ cæcæīpa, ante pōnō cæbo ate mīnitō wæætē Ao ante ēñēnte cæcæmīnīpa. Mānōmaī ante cædinque mīnitō onguīñæmīnique eō togænte caate wædinque ēñencæmīnīpa. Angā ēñēninque Abadāō wodi wēñængā

Itæca eñacā ate tōmengā nānō eñadi adoque Wængonguī itædē go ate tōmengā ingante eō togængacāimpa. Itæca wodi pæte wææ Aacobo wæmpo bagacāimpa. Aacobo wodi pæte wææ dote ganca ināni tapæicā wææ mōnō wæmæidi wodi baquinque pægadānimpa.”

⁹ Ante apænedinque Etebā godōmenque, “Mānināni mōnō wæmæidi ingaināni iñōmō tōmēnāni biwī Ootee ingante ante adinque piinte wædinque tigitamō beyænque pædæ godōnāni o æninque Equitobæ ænte mæodāni gogacāimpa. Equitobæ pōninque tōmēnāni godonte æncæte ante cædinque Ootee wodi ingante māniñōmō quēwengā nempo pædæ godōnāni awēnē beyænque cæte quēwengantapa. Mānōmaī quēwengā incæte tōmengā tōnō godongāmæ Wængonguī cōwē cægacāimpa. ¹⁰ Īninque Ootee wodi ingante nanguī wiwa cædāni wæyongante Wængonguī cōwē wææ aacā quēwengacāimpa. Ayæ Wængonguī pōnō apænecā eñēninque nē eñente bayongante Equitobæ tæiyæ awēnē Padaōnō incæ tōmengā ingante waa adinque, Botō tæiyæ awēnē imo bai bitō wodo adobai badinque Equitobæ wædænque awēnē bacæbiimpa. Ayæ adobai botō awēnē onconcoo bitō aacæbiimpa, angacāimpa.”

¹¹ Ante apænecā eñēñōnāni Etebā godōmenque, “Māniñedē Equitobæ tōmāo Cānaāmæ tōmāo to aminte bayonte tepæmpo gæwænte wædōnānimpa. Mōnō wæmæidi cænguī æncæte ante cædinque ænāmaī inōnānimpa. ¹² Īninque, Equitobæ cænguī ayæ mæ oñōmpa, ante tededāni eñēninque wæmpocā Aacobo wodi mōnō mæmæidi nē baquināni inānite āninque, Botō wēmīni, Equitobæ godinque cænguī ænte pōedāni, angā mā gogadānimpa. ¹³ Gote pōninque ayæ wæætē mempoga gote a ongōnāni adinque Ootee wodi incæ tōmengā mēmōidi inānite, Botō mīnitō biwīmo eñagaimō imopa, angā wægadānimpa. Ayæ, Ootee guīdēnāni do pōnānipa, ante tededāni eñēninque awēnē Padaōnō ingante gode ānāni edonque eñengacāimpa. ¹⁴ Ayæ ate Ootee wodi tōmengā wæmpo Aacobo wodi nāni pæincabo tetenta i tinco

ganca mānimpodāni añecā gogadānimpa. ¹⁵ Aacobo wodi mānōmaī Equitobæ gote quēwēninque wængacāimpa. Ayæ tōmengā pæināni wææ mōnō wæmæidi ingaināni inte adobai māniñōmō gote quēwente wængadānimpa. ¹⁶ Abadāo wodi wēnēñedē, Mōnitō wodido, ante Caāmōdo wēnāni nāni ānimpota mānimpota godonte æninque Tiquemō iñōmō omæ godonte ænongāimpa. Ante do agāināni inte mōnō wæmæidi ñōwo Aacobo wodi bayetoca ingai Cānaāmæ ænte pōninque, ayæ iincayæ ate wææ tōmengā wēnāni bayetoca ingai Abadāo wodi nānō ængaimæ tōmēnāni wodido ingaiñōmō māmō daga wengadānimpa.”

¹⁷ Ante apænedinque Etebā godōmenque apænecantapa. “Abadāo wodi ingante Wængonguī wēnēñedē nānō, Botō wantæpiyæ ate bitō pæināni inānite adodō ænte māmōmo poncædānimpa, ante nānō angaiñedē wodo iinque bayonte tōmēnāni Equitobæ quēwēninque nanguī bacoo yebænte bagadānimpa. ¹⁸ Māniñedē wacā onguīñængā ñōwocā incæ, Ootee wodi æcānō ingacāi, ante eñēnāmaī inongā inte Equitobæ awēnē bagacāimpa. ¹⁹ Tōmengā iñōmō mōnō guīdēnāni wodi inānite wapiticæ ante wēnæ wēnæ cægacāimpa. Tōmengā, Mīnitō wēñænāni tæcæ eñadāni inānite wido cædāni, ante piingā eñente wædinque mōnō wæmæidi wodi incæ tæcæ eñadāni inānite yabæque wido yabæque wido cædāni wængadānimpa.”

²⁰ “Tōmēnāni mānōmaī nāni cægaīñedē incæ Mōitee wodi eñate pægacāimpa. Tōmengā waēmō wēñæ iñongante Wængonguī waa acampa, ante pōnēninque mēa go adoque apæicā go ate tōmengā ingante mæmpo oncōnē pæ gompote pæpogada pæcantapa. ²¹ Ayæ, Wænōnāni wæncæ wæ, ante guīñente cædinque tōmēna tōmengā ingante yabæque gāwapæ yædopæ wo cæda ongōñongante awēnē Padaōnō wengā onquiyængā adinque, Botō wē, ante cædinque Mōitee ingante ænte pæpogacā pægacāimpa. ²² Mānōmaī cæcā beyæ equitoidi nāni eñengainō ante tōmānō ante odōmōnāni eñente pædinque Mōitee wodi nē angā baquinque nanguī cæcā baquinque tæi

pīñænongä inte pægaicäimpa.”

²³ Ante Etebä godömenque apænedinque, “Ayæ æmæwo pædinque coadenta wadepo nānō ēñagaiñedē Möitee wodi, Idægoidi botō tōniñadāni inānite ēñacæ gobote, ante ēñacæ gocantapa. ²⁴ Gote ēñayongä, Equito onguīñængä incæ botō guīdengä ingante wiwa cæcä caate wæcampa, ante adinque Möitee wodi tōmengä guīdengä ingante wææ cæcæte ante cædinque tiyænō tiyæ cædinque Equito onguīñængä ingante wænongä wængacäimpa. ²⁵ Edæ, Wængonguī botō imote äninque, Bitō idægoidi inānite ö ænte mäobi wadæ gocædänimpa, ante do angä ēñentabopa, ante do ēñëningä inte Möitee wodi, Idægoidi adobaī ante ēñente pönencædänimpa, ante pönente cæyongä tōmënāni wæætē mäninō ante ēñënamāi ingadänimpa. ²⁶ Mänōmaī i ininque Möitee wodi iimō ate ponte ayongä idægoda wæætēdō wæætē cæda adinque, ‘Iñāna, mīna guīdencaya incæ wacä ingante quīmæ wënæ wënæ cæte quëwëminaa.’ ²⁷ Ante, Guëa waa waadete quëwencædaimpa, ante cæyongä adocanque tōmengä guīdengä ingante nē wënæ wënæ cædingä guīquënë Möitee wodi ingante bæ tadinque angantapa. ‘Iñæmpa, Bitō mönitō awënë inōmi imipa, ante, Nē apænte ämi imipa, ante æcänō bitō imite nē änaī. ²⁸ Edæ Equito ingante iimō bitō wænōmi bai ñōwoñnæ adobaī botō imote wænoncæte ante pönëmi awædō.’ ²⁹ Angä ēñente wædinque Möitee wæætē wodii winongacäimpa. Wodii winonte wabæca Mäadiāmæ gote wadāni ömæ quëwëninque wëñæna mënaa wæmpocä bagacäimpa.”

³⁰ Ante apænedinque Etebä godömenque awënëidi inānite iimāi ante apænecantapa.

“Ayæ wæætē coadenta wadepo go ate Möitee wodi önömæca cægōninque onquiyabo Tinaiquidi gämænō gote dadi emænte ayongä ocäñequiwæ gonga bæcoyömō Wængonguī anquedo ponte a ongongä agacäimpa. ³¹ Ate wædinque Möitee wodi, Quinō bai inte bæco ante botō wiimonte bai aboo, ante acæte ante pönömenque pōñongante mönō Awënë tōmengä ingante iimāi ante apænegacäimpa. ³² ‘Bitō wæmæidi

Wængonguīmo inōmo inte botō Abadäo wodi Itæca wodi Aacobo wodi Wængonguīmo inōmo imopa.’ Ante apænecä ēñente wædinque Möitee wodi do do wäate guīñente wædinque, Wīi äinente awædō, ante cægacäimpa. ³³ Mänōmaī cæyongante mönō Awënë wæætē, ‘Bitō næ gongænte ongōñömō botō adoyömō ongōmo beyænque onguipoi tæiyæ waëmō impa, ante pönëninque bitō awæncata gä tadōwæe ämopa. ³⁴ Botō edæ cōwä adinque, Botō quīnāni inānite equitoidi æbänō wënæ wënæ cædāni, ante do abopa. Tōmënāni caate ö ö wædāni do ēñente wædinque botō, Ñimpo cæbo ate abæ tawænte gocædänimpa, ante wææ pōmo imopa. Ñōwo iñömō edæ ægodöe. Botō, Equitobæ gocæbiimpa, ante bitō imite adodō da godōmo gocæbiimpa,’ ante Wængonguī Möitee wodi ingante angacäimpa.”

³⁵ Ante apænedinque Etebä iimāi ante godömenque apænecantapa. “Adocä Möitee ingante pīininque idægoidi doyedē, ‘Iñæmpa, Bitō mönitō awënë inōmi imipa, Nē apænte änōmi imipa, ante æcänō bitō imite nē änaī,’ ante änönänimpa. Ñōwo iñömō Wængonguī anquedo ocäñequi iñömō pōninque tōmënāni nāni nē pīingängä adocä Möitee ingante, Bitō idægoidi awënë bacæbiimpa, angacäimpa. Bitō tōmënāni inānite ö æninque ænte mäobi abæ tawænte gocædänimpa, ante cædinque Wængonguī bitō imite da godongä gocæbiimpa, ante Wængonguī beyæ apænedinque Wængonguī anquedo angacäimpa. ³⁶ Möitee iñömō, Ate pönencædänimpa, ante mä cædinque ayæ Wængonguī tönō bamönengæ nanguī cædinque idægoidi inānite ænte mäocä gogadänimpa. Equitobæ emō cæte wadæ pōninque gäwapæntibæ Opatawæmæ yæwedecapæ pō ongōninque adocä Möitee mantacä imæmāa pongadänimpa. Önömæca ta pōninque coadenta wadepo ganca cægōñönāni tōmengä, Ate pönencædänimpa, ante mä cædinque bamönengæ nanguī cægacäimpa,” ante Etebä wodi apænecantapa.

³⁷ Ayæ, “Adocä Möitee, Idægoidi ēñeedāni. Botō Wængonguī beyæ nē apænebo imo bai wacä edæ mīnitō

tōniñacā incæ adobaī edæ Wængonguī beyæ nē apæneacā bacæcāimpa. Tōmengā ponte apæneacā ēñēninque mīnitō tōmengā ingante ædæmō ēñente cæcæmīnīmpa, ante Mōitee wodi apænegacāimpa.
³⁸ Godongāmæ nāni Wængonguī ingante apæneincabo tōnō Mōitee wodi ōnōmæca cægōnongāimpa. Mōnō wæmæidi tōnō cægōñōnāni Wængonguī anquedo wēēnēñedē Tinaiquidi nē ponte āningā incæ adocā tōnō Mōitee wodi ōnōmæca cægōnongāimpa. Māniñedē mōnō imonte ante pōnō cædinque Wængonguī, Mōitee ēñēmi, angacāimpa. Īncayæ quēwenguīnāni ēñente quēwencædānīmpa, ante cædinque botō, Mīnitō cæte quēwenguīmīnī, ante apænebo ēñēninque bitō adodō ante yewæmoncæbiīmpa, ante apænegacāimpa,” ante Etebā apænecantapa.

³⁹ Ayæ, “Mōitee wodi mānōmaī cæyongante mōnō wæmæidi guiquēnē ēñēnāmaī ināni inte tōmengā ingante Baa āninque Equitobæ mōnō adodō gocæimpa, ante ōnōwēnenque pōnente wægadānīmpa.

⁴⁰ Mānōmaī nē wædōnāni inte tōmēnāni wæætē Aadōō wodi ingante apænedinque, ‘Aadōō ēñēmi. Māningā, Equitobæ nē emō cæte mōnō imonte māmōningā Mōitee wodi ædōnō gote dæ angāā, ante adāmaī imōnīpa cæbīi. Wængonguīdi inānīpa, ante mōnō imonte nē tōō æmæante ænte goquīnāni ante bitō badōmi æmōnie.’

⁴¹ Āninque māniñedē, Mōnō wængonguī ingampa, ante cædinque tōmēnāni wagada wē bai badongadānīmpa. Ayæ, Mōnō wængonguī quī impa, ante cædinque cænīnāni wænōninque baō tōmēnāni nāni badōinca gāānē ænte māmō ñō cædinque ōnompoca nāni badōinca adinque ææmæ bai cæte togadānīmpa. ⁴² Mānōmaī cædāni ate wædinque Wængonguī nāemæ, Pōnē cæmīniyaa, ante piingacāimpa. Ayæ, Īnāni ōōnædē owocooque ante, Wængonguīdi inānīpa, ante oda cæcædānīmpa, ante cædinque idægoidi inānite ñimpo cædinque dadi emæninque aadāmaī ingacāimpa. Edæ māniñō tōmēnāni nāni cægāinō bai ante pōnente yewæmōninque wacā wantæpiyæ ate Wængonguī beyæ ĩmaī ante yewæmongacāimpa.

‘Idægoidi ēñēdāni. Ōnōmæca gote coadenta wadepo ganca cægōninque mīnitō,

Wængonguī quī, ante pōnoncæte ante cædinque cænīnāni wænōninque baō tōnō māincoo ænte pō ænte pō cæmīnī incæte

dica botō imote ante pōnēninque pōnōmīni æntawogaa.

⁴³ Īñæmpa, Mōnō wængonguīdi ĩñōnānite ædæ wææante apæneacāimpa, ante cædinque mīnitō mīni badōinca adoca Mōnoco mīni ānonca beyæ æmontaicō oncō næænte godinque wocæ wocæ cædōmīni awædō.

Ayæ waca, Mōni wængonguī Adempaō nēmō bai owocæimpa, ante mīni badōinca nææante æmonga cō cæ cō cæ cædōmīnīmpa tōō.

Ante adinque Wængonguī, Mānōmaī cæmīni beyæ botō mīnitō imīnite

Babidōnia ganca da godōninque godōmenque gobæ da godōmo gocæmīnīmpa,’

angampa, ante yewæmongatīmpa.” Ante apænedinque Etebā, Mōnō wæmæidi ĩmaī cægadānīmpa, ante godōmenque apænecantapa.

⁴⁴ “Wængonguī doyedē Mōitee wodi ingante apænedinque, Mīnitō æmontaicō mænonte ate botō wææ ante yewæmōninca cō cæte mancæmīnīmpa. ĩmaī mænoncæmīnīmpa, ante odōmongā adinque Mōitee wodi wæætē mōnō wæmæidi inānite odōmongā ate ēñēninque tōmēnāni wæætē Wængonguī nānō odōmōnō bai mānōmaīnonque æmontaicō mængadānīmpa. Mānōmaī mænonte ate dica wææ ante Wængonguī nānō yewæmongainca incæ mānīncōnē cō cægadānīmpa. Ayæ ōnōmæca wayōmō wayōmō gocæte ante æmontaicō capote mongænte māo wocæ wocæ cægadānīmpa.

⁴⁵ Ayæ wadāni māniñōmæ nē quēwēnāni ĩñōnānite Wængonguī wido cæcā ate mōnō wæmæidi Ootowee wodi mīñæ ponte ōmæ æninque Wængonguī oncō æmontaicō nāni ænte mongængaincō māmō wodon-gadānīmpa. Wodōnāni ate Awēnē Dabīi wodi nānō ēñate quēwenguīmpoga mānīncō æmontaicō incæ ayæ a owogatīmpa.

⁴⁶ Awēnē Dabīi ingante Wængonguī pōnō waa agacāimpa. Īninque Dabīi wæætē

Wængonguī ingante apænedinque, Bitō Aacobo wodi Wængonguī īnōmi īmipa, ante adinque botō, Bitō quēwenguīñōmō, ante oncō āmi mænonguīmo, āñongante Wængonguī Baa angacāimpa. ⁴⁷ Wæætē Tadōmōō wodi Wængonguī beyæ nē oncō mænongā ingacāimpa. ⁴⁸ Mānōmaī cægaīnāni incæte Wængonguī īñōmō edæ æmōnga pōni nē ongongā inte waocā nānō ōnompoca mænōnincōnē ædō cæte pōnō Ao ante guīite quēwenguingāā. Mānōmainō ante pōnente wædinque Wængonguī beyæ nē apænegaingā īmaī ante apænegacāimpa.

⁴⁹ ‘Botō nē Tæiyæ Awēnē īnōmo īñōmote ōōnæ incæ botō Awēnē tæ contaqui bai impa,

inguipoga wæætē botō ōnōwa podōwate qui bai impa.

Mānōmaī nē ongōmo beyæ mīnitō botō oncō ante ædō cæte mænonguīmīni.

Inguipoga æcōnēnō guīidinque guēmanguīmo ante Wængonguī angampa.

⁵⁰ Botō īñæmpa tōmēmo ōnompoca tōmāā nē badongaīmo īnōmo īmopa,’ ante Wængonguī Awēnē angampa, ante wacā yewæmōngacāimpa.”

⁵¹ Ante apænedinque Etebā godōmenque īmaī ante apænecantapa. “Nōwo ēñēdāni. Mīnitō mīmō ōmædē īmīni inte wīi pōnencædō. Ōnōmoncaque ēñēninque wīi ædæmō ēñēmīni īmīni awædō. Mīnitō wæmæīdi nāni cægaīnō ante ēñēmīnitawo. Īñæmpa tōmēnāni nāni cægaī bai adobaī cædinque mīnitō Wængonguī Tæiyæ Waēmō Ōnōwoca ingante Baa āninque cōwē wææ āmīnīpa tōō. ⁵² Mīnitō wæmæīdi doyedē Wængonguī beyæ nē apænegāināni īnānite togænte pāninque adocanque ingante ata cæpodāmaī inte tōmānāni īnānite togænte pangadānimpa. Edæ nē apænedāni, Nē nō entawēnongā inte ponguingā ingampa, ante apæneyōnānite tōmēnāni īnānite do wænōnāni wængadānimpa. Nōwo īñōmō tōmēnāni nāni, Ponguingā, angaingā incæ do pongā adinque mīnitō godō wænōmīnitapa tōō. ⁵³ Edæ, Īmaī cædāni, ante Wængonguī wææ angampa, ante Wængonguī anquedoidi ānāni ēñēninque yewæmōnāni ate mīnitō nē adōmīni incæ

Baa āninque ēñēnāmaī cōwē cæmīnīpa tōō,” ante Etebā īinque apænecantapa.

Etebā ingante wænōnāni wængampa

⁵⁴ Mānīi awēnēidi guīquēnē Etebā nānō apænedō ante ēñente wædinque āināni badinque бага wentoquēnē wentoquēnē angate pīinānitapa. ⁵⁵ Etebā īñōmō Wængonguī Tæiyæ Waēmō Ōnōwoca ingante ædæmō ēwocadinque ōōnædē īnō æmō adinque Wængonguī ñāō apāite bai nānō ēmōnō acantapa. Ayæ nē Waocā ēñagaingā inte Itota incæ Wængonguī tōmēmæ īnō adiyæ ongongā acantapa. ⁵⁶ Adinque,

—Badogaa, ōōnædē wi ænete bai ba abopa. Waocā nē ēñagaingā incæ Wængonguī tōmēmæ īnō adiyæ ongongā abopa.

⁵⁷ Ante apænecā ēñente wædinque tōmēnāni pīinte Yæ yæ āninque ēñēnāmaī cæcæte ante ōnōmonca ñī māmoncate cædānitapa. Godongāmæ pīinte quingæ tōmengā weca pogodo pōninque, ⁵⁸ tōmengā ingante bæi ongōninque tōmēnāni nāni quēwēñōmō yabæque ænte māo dicaca tæi tacacæ cædānitapa. Tōmengā æbānō angāā, ante ēnēnāni inte nē apænedāni īñōmō edæ tacacæ cædinque tōmēnāni weocoo yabæcooque gā tadongate tæcæ æmæwo pædingā Taodo nāni ānongā ōnōwoca īnō ñō cædōnānimpa. ⁵⁹ Dicaca tacayōnāni Etebā īñōmō Wængonguī ingante apænedinque, “Awēnē Itota, bitō botō ōnōwoca æncæbiimpa.” ⁶⁰ Ante da guicapodinque yedæ āninque, “Awēnē, tōmēnāni nāni wēnæ wēnæ cædōnō ante ee ae,” āninque edæ mō ñonte bai wængacāimpa.

8

¹ Etebā wodi ingante wænōncæte ante dicaca tacadāni adinque Taodo guīquēnē, Waa wænōmīni wængampa, ante Ao ante ongongacāimpa.

Nē godongāmæ pōnēināni īnānite Taodo togænte pangā

Mānīōnæ incæ mā togænte pāninque Eedotadēē īñōmō Codito ingante nāni nē godongāmæ pōnencabo īnānite godōmenque nangūi togænte pīinte pangadānimpa.

Ate wædinque Itota nānō nē da godon-
gainānique godāmaī ongōñōnāni wadāni
iñōmō nāwæ wodii winōninque Oodeabæ
Tāmadiabæ æmænō æmænō gogadānimpa.
² Mānīi Etebā wodi ingante æmæwo
wænōnāni wængā ate Wængonguī ingante
nē waa adāni incæ Ca ca wædinque māo
daga wenānitapa. ³ Taodo guiquēnē,
Itota ingante nē pōnēnāni inānite wido
cæcæimpa, ante nanguī wēnæ wēnæ
cædinque wacōnē pō guīi wacōnē pō
guīi cædinque onguīñænāni tōnō on-
quiyænāni inānite bæi ongonte wēā māo
tee mōnegadānimpa.

*Tāmadiabæ godinque Pedipe apænecā
ēñēnānīpa*

⁴ Mānīi nē wodii winōnāni iñōmō
ædōmē godinque Codito ingantedō ante
cōwē watapæ apænedāni ēñēnōnānimpa.
⁵ Īninque Pedipe iñōmō Tāmadia nāni nanguī
quēwēñōmō gote apænedinque, Mōnō
Codito æbānō do ponte cægacāi, ante
apænecā ēñēnānitapa. ⁶ Mānōmaīnō ante
apænedinque tōmengā, Ate pōnencædānimpa,
ante mā cæcā adinque nanguī ināni
adoyōmō pōnēninque, Mōnō ēñengæimpa,
ante cædānitapa. ⁷ Waodāni nanguī
ināni wēnæidi wentamō ēwocadāni tōnō
quēwēnāni adinque Pedipe angā ēñēninque
wēnæidi incæ Yæ āninque dæ tao godāni
ate onōnānique badānitapa. Ayæ cōmāināni
incæ cabæināni incæ tæiyænāni inānite
Pedipe cæcā ate waa badānitapa. ⁸ Ante
adinque māniñōmō quēwēnāni wæætē
watapæ togadānimpa.

⁹ Wacā idō tōmengā emōwo Timōnō iñōmō
tōmengā adoyōmō quēwēninque wēnæ tōnō
wantæpiyæ cæcā inongāimpa. Īninque
Tāmadiabæ quēwēnāni tōmānāni, Æbānō
nanguī cæcāā, ante guīñente wæyōnānite
tōmengā, Nē idōmo inōmo inte botō iñōmō
edæ nanguī cæte beyæ ñæñæmo pōnī
īmo aedāni. ¹⁰ Angā ēñēninque awēnēidi
incæ onōnānique incæ tōmānāni adoyōmō
pōnēninque, “Wængonguī nānō tæi piñænō
baī entawēninque ingā idō iñōmō nē Tæi
Piñængā ingampa,” ante pōnēwēninque,
Nē Ñænængā pōnī inongā ingampa, ante
pemongadinque tōmengā apænecā ate
ædæmō ēñēnōnānimpa.

¹¹ Ayæ tōmengā wantæpiyæ wēnæ tōnō
wæætē wæætē mā cæcā adinque tōmēnāni,
Tōmengā ingante mōnō ēñengæimpa,
ante tee empo tee empo godōnānimpa.

¹² Mānōmaī cæyōnānite Pedipe guiquēnē,
Wængonguī Awēnē Odeye nempo mōnō
quēwengæimpa, ante watapæ apænecā
ēñēnānitapa. Ayæ, Mōnō Codito iñōmō
tōmengā emōwo Itota emongampa, ante
apænebo ēñēdāni. Ante apænecā
ēñēninque onguīñænāni incæ onquiyænāni
incæ wede pōnēninque æpænē guīdānitapa.
¹³ Īninque Timōnō incæ adobāi pōnēninque
æpænē guīdinque Pedipe miñæ tee
empo tee empo gocantapa. Pedipe, Ate
pōnencædānimpa, ante mā cædinque tæi
piñænte nanguī cæcā ate wædinque Timōnō
adocā cōwē guīñente wægacāimpa.

¹⁴ Īninque, Tāmadiabæ quēwēnāni
Wængonguī nānō apænedō ante ēñēninque
do Ao ānānīpa, ante Eedotadēē ponte
tedeyōnānite Itota tōmengā nānō da godon-
gaināni incæ do ēñēnānitapa. Ēñēninque
Pegodo tōnō Wāo inate Tāmadiabæ
da godōnāni godatapa. ¹⁵ Godinque
Tāmadiabæ pōninque tæcæ mā pōnēnāni
beyæ ante tōmēna Wængonguī ingante
iīmaī ante apænedatapa. Wængonguī
ēñēmi. Bitō Tæiyæ Waēmō Ōnōwoca
ingante tōmēnāniya da pōnōmi pō guīcā ate
ēwocacædānimpa, amōnāpa. ¹⁶ Edæ Awēnē
Itota emōwo apænedinque tōmēnāni mā
æpænē guīyōnānite bitō Tæiyæ Waēmō
Ōnōwoca tōmēnāniya wææ guīdāmaī in-
gantapa cæbii. Ñōwo āmi pō guīcæcāimpa.
¹⁷ Ante apænedinque Pegodo tōnō Wāo
tōmēnāniya pōnō gampote apæneyōna
Wængonguī Tæiyæ Waēmō Ōnōwoca pō
tōmēnāni baonga guīcantapa.

¹⁸ Mānōmaī pōnō gampoyōna Wængonguī
Tæiyæ Waēmō Ōnōwoca tōmēnāniya pō
guīcā ate wædinque Timōnō guiquēnē
tōmēnāni godonte æinta pædæ pōnōninque,
¹⁹ tōmēna inate,

—Mīnatō baī botō adobāi nē cæbo
bacæboimpa amōpa. Pōnō cæmīna ate
botō nē cæbo badinque wadāniya pōnō
gampobo ate Wængonguī Ōnōwoca adobāi
pō guīcæcāimpa, amōpa.

²⁰ Āñongante Pegodo,

—Bitō mīni godonte æintaque pædæ godōninque, Wængonguī Ōnōwoca nānō da pōnōngā ingante æncæboimpa, ante pōnēwēmii. Edæ tōmēmi tigitamonque nææninqe edæ bitō ōmæe ēwenguinque gobāwe. ²¹ Īñæmpa, Wængonguī Ōnōwoca nānō da pōnōngā ingante æninque godongāmæ cæcæboimpa, āmitawoo. Wængonguī ayongā nō pōnente cæbipa ænguīmii. Edæ mōnatō tōnō ædō cæte cæquīmii. ²² Nōwo edæ mānīnō bitō wīwa cædinō ante wæwente pōnēninque ñimpo cæe. Ayæ mōnitō Awēnē ingante apænebi ēñēninque tōmengā wabānō pōnō waadete cædinque mīmōno bitō pōnēwēnō ante wadæ cædinque ñimpo cæbaingampa. ²³ Bitō nāmā beyænque ante nē æinēmi inte bitō mīmōnē guīnæmæ entawente bai quēwēmipa. Ayæ bitō tōmēmi wīwa cædō beyænque ñā cæyænte bai quēwēmipa, ante awædō.

²⁴ Angā ēñēninque Timōnō wæætē,

—Æ āmi awædō, āninque Pegodo ingante, Botō mīnatō ānō bai wīi bacæboimpa, ante cædinque mīnatō botō beyæ Wængonguī ingante apæneeda, angantapa.

²⁵ Ayæ Wāō tōnō Pegodo iñōmō, Itota incæ mōnō Codito ingaingā ingampa, ante māniñōmō quēwēnāni inānite mōnō Awēnē nānō ānō ante apæneda ēñēnānitapa. Īnque apænedinque adodō Eedotadēe gocæte ante wadæ gote Tāmadiabæ godinque tōmēna wayōmō wayōmō māo wædænque quēwēnāni weca pō pō cædinque nanguī ināni inānite apænedinque Codito ingantedō ante watapæ apæneda ēñēnānitapa.

Etiopæbæ awēnē ingante Pedipe bee tengampa

²⁶ Māningā Pedipe ingante anquedo ayæ ate ponte āninque, “Bitō ægodōe, Eedotadēe wæi Gata goquīnō pædæ taoquinque betamonca gocæbiimpa,” angantapa. Mānīnō ōnōmæcaque wæidō inōmpa. ²⁷ Mānōmāinō angā ēñēninque Pedipe ængæ gantidinqe wadæ godinque anquedo nānō ānīnonque cægonte ayongā onguīñængā Etiopæbæ quēwēningā pō eyepæ bee tengā acantapa. Īngā iñōmō Etiopæbæ tæiyæ awēnē onquiyængā Cantate beyæ

tōmēnāni godonte æinta nē aacā inongā inte ñænæ awēnē inongāimpa. Tōmengā ñōwo Wængonguī weca ædæ wææninqe watapæ apænecæte ante Eedotadēe æidingā inte ocæ ēmænte pōninque Pedipe ingante eyepæ māmō bee tengantapa. ²⁸ Īngā iñōmō cabayo nānō wēā pōnoncadea æi tæ contate ocæ ēmænte pōninque Itaiya wodi Wængonguī beyæ nē apænegaingā nānō yewæmongainta næænte a congantapa.

²⁹ Mānōmāi a conte pōñongante Pedipe ingante Wængonguī Ōnōwoca, “Goe, Īi cabayo nānō wēā pōnoncade eyepæ godinque guēa goe,” angantapa. ³⁰ Angā ēñēninque Pedipe pogodo godinque obo ponte ēñēñongā Etiopæbæ awēnē iñōmō Itaiya wodi nānō Wængonguī beyæ yewæmongainta adinque apænecā ēñēninque,

—Bitō ate apænedō ante ædæmō ēñēmitawo.

³¹ Āñongante,

—Īñæmpa ēñēmogaa. Botō imote apænedānīpa ēñēnguīmoo.

Ante apænedinque Pedipe ingante, Bitō botō weca ææ guīte tæ contae, angā ææ guī tæ contacantapa.

³² Mānīnta Wængonguī angā ēñente nāni yewæmongainta Etiopæbæ awēnē nānō aintaa ĩmāi ante yewæmonte ongōnōnimpa.

“Codotado ingante wænongæimpa, ante bæi ongonte æninque tōō godonte bai cædinque

tōmengā ingante adobai wænoncæte ante bæi ongonte ænte godānitapa.

Obegaidi ocaguincoo eō toyōnāni wædāmai pæ wēenecā bai

tōmengā adobai wædāmai inte pæ wēenecantapa.

³³ Pīinte ānāni wæyongante nē apænte anguēnēnāni incæ, Pangæimpa, ante cædinque nōingā ante ānāmai inānitapa.

Tōmengā ingante æmæwo wænōnāni wængaingā iñongante,

Tōmengā nānō pæināni, ante ædō cæte apænequīi.”

³⁴ Ante nāni yewæmongainō adingā inte Etiopæbæ awēnē ñōwo Pedipe ingante,

—Apænebi eñēmoe. Nē Wængonguī beyæ apænegaingā iñōmō æcānō ingante ante nē apænegacāi. Tōmengā nāmā ingante ante yewæmongantawo. Edæ wacā ingante ante yewæmongantawo, ante eñencæte ante wæbopa.

³⁵ Ante añongante Pedipe iñōmō Etiopæbæ awënë nānō adinta adotaa ate apænedinque ayæ wataa wataa adinque Itota ingantedō ante watapæ apæneccā eñengantapa. ³⁶ Apæneyongā taadō godinque wapæ ganca pōnatapa. Equitobæ awënë mānimæ adinque Pedipe ingante, Waa ae. Iñōmō gāwapæ impa. Æpænē guidāmaī inguīmo, āmitawoo.

³⁷ Angā eñēninque,

—Bitō mīmōno wede pōnēmi ate botō Ao āmaīmopa, angantapa. Añongante,

—Ao botō, Itota Codito nāwangā Wængonguī Wengā inongā ingampa, ante wede pōnēmopa.

³⁸ Äninque Etiopæbæ awënë angā cabayo næ gongæ ate Pedipe tōnō guēa æpænē ti wææna ate Pedipe tōmengā ingante æpænē guidongā guicantapa. ³⁹ Ayæ æpænē guiite ate tōmengā tao gongæñongā Wængonguī Awënë Önōwoca Pedipe ingante iñæ æænonte ö ængā. Ate æmæwo adinque Etiopæbæ awënë watapæ todinque oncōnē goinō gocantapa. ⁴⁰ Pedipe guiquēnē Atota iñōmō iñontobæ a ongōninque godōmenque wadāni nāni quēwēñōmō go apænedinque wayōmō nāni quēwēñōmō go apænedinque Tetadea ganca godinque Codito ingantedō ante watapæ apæneccā eñengadānimpa.

9

Awënë Itota ingante Taodo acampa (Nāni Cægainō 22.6-16, 26.12-18)

¹ Taodo guiquēnē mōnō Awënë ingante nē tee empote quēwēnāni inānite pīininque, Wænongæimpa, ante bæi ongō bæi ongō cædinque cōwē ñimpo cædāmaī ingacāimpa. Nōwo godōmenque cæcæte ante Wængonguī oncōnē gote nē godongā ñænængā pōni inongā ingante apænedinque, ² Awënë eñēmi, angantapa. Bitō Ao āmi ininque botō Daāmaco nāni quēwēñōmō gote ayōmo,

Onguīñænāni incæ onquiyænāni incæ æcāmenque Itota Taadō ante nē godāni ināni, ante adinque tōmēnāni inānite bæi ongote goti winte Eedotadēē ænte pōmaīmopa. Ininque bitō, Taodo mānōmaī cæcæcāimpa, ante botō beyæ cadota ante yewæmōninque pædæ pōnōmi æninque botō wæætē Daāmaco iñōmō māo ood-eoidi odōmōincōnē awënëidi weca gote pædæ godōmo ænte adinque tōmēnāni Ao añōnāni mānōmaī cæbāimopa. ³ Añongā awënë Ao ante yewæmōninque pædæ pōnongā æninque Taodo Daāmaco obo gote ayongante iñontobæ öönædē inō nāinte bai cædinque tōmengā nānō ongōñōmō tōmāo guīnæ gongæ. ⁴ Adinque Taodo guidōmēmæ tæ go wæængantapa. Ayæ wæænte öñöñongante tōmengā ingante, “Taodo. Taodo. Quinante botō imote togænte pāmii.”

⁵ Angā eñente wædinque Taodo wæætē, “Awënë, æmōmidō inōmi imii.” Ante eñēñongā, “Botō Itotabo inōmo inte bitō nē togænte pānimo mānimotō imopa cæbii. Iñæmpa wagada päntoca bai bitō nāmā iñæ æwate bai cædinque cowate bai edæ caate bai wæbipa tōö.” ⁶ Mānōmaī apæneccā eñēninque Taodo ancai guīñente do do wæadinque, “Awënë, æbānō cæquīmo āmii.” Añongante mōnō Awënë wæætē apæneccantapa. “Bitō ængæ gantidinque iñāni nāni quēwēñōmō goe. Botō, Taodo iñmaī cæcæcāimpa, ante wacā ingante Daāmaco iñōmō nē quēwengā ingante do apænebo eñengampa cæbii. Bitō Daāmaco iñōmō gote ongōñōmi tōmengā wæætē bitō imite apæneccā eñente cæcæbiimpa.”

⁷ Taodo tōnō godongāmæ godāni guiquēnē waocā ingante adāmaī ināni incæte, Önonque tempa, ante pōnēninque ancai guīñente wædānitapa. ⁸ Taodo iñōmō onguipoga ayæ a öñongā inte ængæ gantidinque awinca adāmaī ingā adinque wadāni tōmengā ingante önonpo bæi ongōninque Daāmaco ganca ænte mādāni gocantapa. ⁹ Māniñōmō gote ongōninque tōmengā adāmaī inongā inte cænāmaī bedāmaī mēōnaa go adoönæque iñonte wæwengacāimpa.

¹⁰ Ayæ wacā nē pōnengā Änāniya Daāmaco

iñōmō quēwengā inte mā pōnī wīimonte bai ayongā mōnō Awēnē, “Ānāniya,” angā ēñēnīnque, “Awēnē, botō ēñēe cōmopa.”

11 Āñongā mōnō Awēnē wæætē, “Taodo ñōwo Wængonguī ingante apæneccampa cæbii. Bitō ængæ gantidīnque taadō nāni Tōinō ānōnō godīnque Codaa oncōnē gote ānīnque, Tadoto nē quēwēningā Taodo iñōmō owocantawo, ante acæbiimpa. 12 Wængonguī ingante ñōwo apænedīnque ate bai ayongā wacā Ānāniya pō guīdīnque, Ñōwo edonque acæbiimpa, ante gampocampa, ante ate bai Taodo wæcantapa cæbii. Tōmengā wīimonte bai adīnque nānō wædō bai cædīnque bitō ñōwo gote cæcæbiimpa.”

13 Angā ēñēnte wædīnque Ānāniya wæætē, “Awēnē iñæmpa botō, Māningā Taodo iñōmō quīnō bai onguīñængā ingāā, ante nanguī tededāni do ēñēmopa. Ayæ, Eedotadēē iñōmō tōmengā bitō quīnāni inānite wēnæ wēnæ cæcampa, ante tededāni ēñēnte wæbopa. 14 Ayæ nē godōnāni ñænænāni Ao ante yewæmōnāni ænīnque tōmengā iñæmpa nē angā badīnque bitō emōwo ante nē apænemōni iñōmōnite bæi ongonte tee mōnecæte ante pongampa cæbii.”

15 Ante wæyongante mōnō Awēnē wæætē Ānāniya ingante, “Īngā ingante do apænte æmo apa ānewēē. Tōmengā ingante, Bitō wabæca gote wadāni inānite botō emōwo ante apænedīnque ayæ tōmēnāni awēnēidi inānite botō emōwo ante apænedīnque idægoidi inānite adobaī botō emōwo apænebi ēñencædānīmpa, ante tōmengā ingante do antabopa cæbii. Ñōwo tōmengā weca gobāwe. 16 Ayæ botō nē æningā inte tōmengā æbānō botō emōwo beyæ nanguī caate wæquēnengā ingāā, ante odōmōmo ate ēñencæcāīmpa.”

17 Angā ēñēnīnque Taodo nānō owoyōmo go guīdīnque Ānāniya tōmengā ingante gampomōnīnque,

—Taodo botō tōniñabi ēñēmi. Bitō taadō pōnīnque Itota ingante abitawo. Tōmengā iñōmō nē Awēnē inongā inte botō imote apænecantapa. Bitō Taodo weca godīnque cæbi ate tōmengā wēēnēñedē nānō emōnō bai adīnque Wængonguī Tæiyæ Waēmō

Ōnōwoca ingante da pōnōmo ænīnque ēwocacæcāīmpa, ante mōnō Awēnē angā ēñēnīnque botō bitō weca pontabopa.

18 Ante Ānāniya tæcæ apæneyongā Taodo tōmentagæ nānō emōnīntagæ tæ wæænte iñontobæ edonque acantapa. Ayæ ængæ gantiyongante Ānāniya tōmengā ingante apænē guidongā guīcantapa. 19 Ayæ cænguī cænīnque tōmengā baō wæætē tæī piñængā bacantapa. Ayæ Daāmaco iñōmō Itota ingante nē tee empote quēwēnāni weca godōmenque tæōnæ quēwengantapa.

Daāmaco iñōmō Taodo apæneccā ēñēnānīpa

20 Māniñōmō quēwēnīnque Taodo do oodeoidi odōmōincōnē go guī go guī cædīnque, Itota Codito nāwangā Wængonguī Wengā ingampa, ante apæneccā ēñēnānitapa. 21 Mānōmāi apæneccā ēñēnīnque tōmengā ingante nē ēñēnāni iñōmō ancaī guīñēnīnque, “Æ. Īngā adocā Eedotadēē iñōmō Itota emōwo ante nē apænedāni inānite nē wido cæcā īmaingampa. Tōmengā adocā nē wido cæcā incæ adodāni inānite bæi ongonte ænīnque, Wængonguī quī, ante nē godōnāni ñænænāni weca māo pædæ godoncæte ante ñōwo iñōmō pōnīnque cæcā awædō. Edæ adocā ingānō anguēnē.”

22 Ante wædāni incæte Taodo godōmenque tæī piñænte entawēnīnque īmāi ante apænecantapa. Awēnē bacæcāīmpa, ante Wængonguī nānō nē gao cæcadongā iñōmō mōnō Codito iñōmō edæ Itota adocā īnongā ingampa, ante, Nāwangā īmpa, ante nōingā pōnī apæneccā. Adīnque Oodeoidi Daāmaco iñōmō quēwēnāni guīquēnē, Ædō cæte wadō anguī, ante wægadānīmpa.

Oodeoidi wænoncæ cæyōnāni Taodo aamō cæte gocampa

23 Īnīnque tæōnæ go ate oodeoidi godongāmæ pōnēnte Ao ānīnque, Taodo ingante wænongæīmpa, ante cædānitapa.

24 Mānōmāi ante cæyōnāni Taodo mānīnō nāni ānīnō do ēñēngantapa. Tōmēnāni guīquēnē, Mōnō quēwēñōmō wææ cæinēmō tacā ate wænōmō wæncæcāīmpa, ante itædē woyowotæ wææ wānōnānitapa. 25 Wææ wānōñōnāni tōmengā ingante nē tee empote quēwēnāni wæætē yabæ wææ

cæte iñōmō Taodo ingante woyowotæ mæi ayacōmoyāa inō otodē pædæ wæænōnāni ti wæænte gocantapa.

Taodo Eedotadēe ponte apænecampa

²⁶ Mānōmaī godinque Taodo Eedotadēe pōninque, Itota ingante nē tee empote quēwēnāni weca gobote, ante pongā. Adinque tōmānāni, Nāwangā Itota ingante nē pōnengā ingantawogaa, ante guiñente awædō, ante pōnēninque wææ adānitapa. ²⁷ Bedēnabee guiquēnē Taodo ingante bæi ongōmænte æninque Itota nānō nē da godongaināni weca ænte māmōngā pongantapa. Ayæ tōmēnāni inānite Bedēnabee apænecantapa. Taodo ñōwo taadō godinque mōnō Awēnē ingante dobæ acāimpa. Mōnō Awēnē tōmengā ingante do apænecantapa. Daāmaco gote quēwēninque Itota emōwo ante tōmengā guiñēnāmaī apænedingā inte ñōwo iñōmō pongā apa quēwēmīni. ²⁸ Bedēnabee mānōmaī angā ēñēninque Ao añōnāni Taodo Eedotadēe iñōmō quēwēninque tao guiite ta tao guiite ta cædinque tōmēnāni tōnō godongāmæ cædinque mōnō Awēnē emōwo ante guiñēnedāmaī apænecantapa. ²⁹ Ayæ wadāni oodeoidi incæ guidiego tededō nē tededāni māniñōmō quēwēnōnānimpa. Ināni inānite Pabodo mōnō Awēnē emōwo ante nangui apænedinque wæætedō wæætē añōngante tōmēnāni wæætē wænoncæte ante cædānitapa. ³⁰ Mānōmaī cædānipa, ante ēñente wædinque tōmengā nānō tōniñadāni bai badināni inte pancadāniya Taodo ingante Tetadea ganca māo emōninque, Godōmenque Tadoto iñōmō wodii winonte goe, ante da godōnāni gogacāimpa.

³¹ Ininque Codito ingante nāni godongāmæ pōnencabo incæ Oodeabæ Gadideabæ Tāmadiabæ tōmāo quēwēninque māniñedē wædāmaī inte guēmānānitapa. Ayæ tæi piñænte entawēnāni badānitapa. Ayæ Wængongui Tæiyæ Waēmō Önōwoca ædæmō apænecā ate tōmēnāni wampo pōnēnāni badinque yebænte nangui ināni bagadānimpa. Ayæ mōnō Awēnē ingante ædō cæte ēñēnāmaī cæquīi, ante guiñente wægadānimpa.

Ēnea ingante Pegodo angā waa bacampa

³² Mānōmaī tōmēnāni nāni pōnencabo nangui yebænte bayōnāni Pegodo guiquēnē wayōmō wayōmō wodo tebæ wodo tebæ godinque Dida iñōmō pōninque mōnō Awēnē quīnāni weca ēñacæ pongantapa. ³³ Māniñōmō ponte apæneyongā wacā tōmengā emōwo Ēnea do ocho wadepo ganca mōimoga cōmāingā inte nē ongōningā ingā. ³⁴ Adinque Pegodo tōmengā ingante, —Ēnea ēñēmi. Itota Codito cæcā ate waa babipa cæbii. Ængæ gantidinque tōmēmi mōimo ni capoe.

Añōngā Ēnea iñōmō do edæ ængæ ganticā. ³⁵ Adinque Dida quēwēnāni tōnō Tadōo quēwēnāni tōnō wēenē nāni pōnēwengainō ante emō cædinque Wængongui Awēnē gāmænō pōnānitapa.

Dodoca wodi ingante Pegodo angā ñāni omæmongampa

³⁶ Māniñedē wacā onquiyængā nē pōnengā Tabita iñōmō Cope nāni quēwēñōmō quēwēnōngāimpa. Tōmengā emōwo guidiego tededō Dodoca incæ mōnō tededō Cowāñe emōngā inōngāimpa. Tōmengā iñōmō nē waa cædongā inte omæpodāni wæwēnāni inānite nangui waa cædongā inte Cope iñōmō quēwēnōngāimpa. ³⁷ Tōmengā māniñedē nangæ badinque æmæwo wængā. Ate tōmengā baō ini æpæ āadēninque wænōmēnæcapaa mæi ñō cædānitapa. ³⁸ Cope iñōmō quēwēninque Dida wīi gobæ impa, eyequei impa. Mānōmaī beyæ, Pegodo Dida iñōmō ongongampa, ante tededāni ēñente wædinque Itota ingante do tee empote quēwēnāni iñōmō onguiñæna mēnaa inate da godōninque, Cope iñōmō gote Pegodo ingante, “Quingæ pōe, ante æeda.”

³⁹ Anāni gote añete pōñōnate Pegodo godongāmæ pongā adinque tōmengā ingante wænōmēnæcapaa mæidāni guiite acantapa. Owæmpoīnāni godongāmæ pōninque doycæncōo tōnō yabæcōo Dodoca mīingā quēwēngāñedē nānō badongaincōo odōmōninque Ca ca wædāni. ⁴⁰ Adinque Pegodo tōmānāni inānite angā tao godāni adinque da guicapote Wængongui ingante apænecantapa. Ayæ dobæ wænte onguite a oñōngā gāmænō dadi emænte adinque, —Tabita, ængæ gantibi amo.

Åñongā Tabita wodi awinca wi æmōninque Pegodo ingante adinque ængæ gantite contacantapa. ⁴¹Ængæ ganti contayongante tōmengā ōnompō bæi ongōninque Pegodo tōō æmængā ate ædæmō ængæ gantite adiyæ gongægantapa. Ayæ owæmpōināni tōnō mōnō Awēnē quīnāni inānite Pegodo aa pecā pō guīdāni ate mīngā ingā odōmongā adānitapa. ⁴²Īninque, Mōnō Awēnē mānōmaī cæcantapa, ante Cope iñōmō nāni quēwēñōmō tōmāo gote tededāni ēñēninque nangūi ināni mōnō Awēnē ingante nē pōnēnāni badānitapa. ⁴³Pegodo māniñedē æmontai nē amīnengā Timōnō weca owodinque Cope iñōmō tæōnæ quēwengacāimpa.

10

Pegodo tōnō Codōnedio

¹Tetadea nāni quēwēñōmō odōmāno tontadoidi Itadiaidi nāni ānoncabo inte quēwengadānimpā. Īninque tontadoidi tiē ganca nāni cabo tiē ganca nāni cabo iñōnānite adocabodāni capitāo tōmengā ēmōwo Codōnedio ēmongacāimpa. ²Tōmengā nāni wencabo nāni owocabo owodinque, Mōnō wadō pōnēñōmonte Wængonguī pangā wæcæ wæ, āninque Wængonguī nānō ānō ante ēñente quēwēnōnānimpā. Ayæ pæ gompodāmaī inte Codōnedio, Ōmæpodāni wæwēnāni quī, ante pædæ godō pædæ godō cæcā ænōnānimpā. Ayæ Wængonguī ingante ñimpo cædāmaī cōwē apænedongāimpa. ³Tōmengā iñōmō ædæ wæicā ate mā pōni wīimonte bai acantapa.

Edonque wīimonte bai ayongante Wængonguī anquedo tōmengā weca pō guīdinque, “Codōnedio bitō imi.” ⁴Angā wædinque Codōnedio tōmengā ingante cōwā adinque ancai guīñente wædinque, “Awēnē, æbānō ante āmii. Āmi ēñēmoe.” Åñongante, “Bitō Wængonguī ingante nē apænebi imitawo, ōmæpodāni wæwēnāni inānite nē godōmi imitawo. Māniñō bitō apænedō ante māniñō bitō godōnō ante adinque bitō imite waa abopa, Wængonguī angampa, angantapa. ⁵Ñōwo wadāni inānite āmi Cope iñōmō gote Timōnō Pegodo nāni ānongā ingante āñete poncædānimpā. ⁶Adowo ēmōnongā Timōnō weca Timōnō Pegodo gāwapæntibæ

wedeca owocampa. Māningā Timōnō æmontai nē amīnēnongā ingampa.”

⁷Ante apænedingā inte Wængonguī anquedo ingæ gocā adinque Codōnedio wæætē tōmengā ingante nē cæda mēnaa inate aa pecā pōnatapa. Ayæ tontadoidi incæ pancadāniya tōmengā ingante nē cædāni inōnānimpā. Īninque adocanque tontado incæ Codōnedio ingante nē cæcā incæ Wængonguī ingante nē ēñengā inongāimpa. Tōmengā ingante Codōnedio adobai aa pecā pongantapa. ⁸Mānōmaī aa pecā ate tōmēnāni godongāmæ pōnāni ate Codōnedio, Wængonguī æbānō angantawoo, ante tōmānō ante adodō apænedinque, Ñōwo Cope iñōmō goedāni, angantapa.

⁹Angā godinque iimō wææñō taadō godinque Cope iñōmō obo pōñōnāni māniñedē incæ tæcæbæcā incæ Pegodo guīquēnē Wængonguī ingante apænecæte ante oncōmanca æicantapa. ¹⁰Ayæ ate gue ænente wædinque wadāni inānite, Cæinente awædō, āñongante cænguī linque æænōnāmaī inte cōnōnāmaī iñōnānite tōmengā wīimonte ate bai cæwēnengantapa. ¹¹Ate bai æmō ayongante oōnædē wi ænete bai bayō mōincoo bai ñænæncoo pōni iñonte æmænecoo bæi æmænecoo bæi ongōnete bai inguipoga pædæ wæænonte bai wææ wāi wocæ acantapa. ¹²Wāi wocæñō nē ocaguī mongænāni incæ, nē ocaguī ōmaadāni incæ, nē oōmā ēmænte æidāmæ godāni incæ babæidi tōmānāni weocoo cæncadencoō inō ongōnāni acantapa. ¹³Ayongante wacā āninque, “Pegodo, ængæ gantidinque wænonte cæe.”

¹⁴Angā ēñēninque Pegodo, “Awēnē, ēñēmi. Ōnōnānique iñōnānite botō, Baacā awædō, āninque cōwē cænāmaī imo apa ānewēe.” ¹⁵Āninque wæætē ēñēñongā, “Wængonguī nānō ædæmō mēnongadongā incæ bitō ædō cæte baacā āmii.”

¹⁶Āninque nē apænedingā iñōmō wæætē adodō adodō angā ēñēninque Pegodo wæætē, Baacā awædō, ante Baa angantapa. Ayæ mempoga go adopoque wæætedō wæætē adodō āna ate ñænæncoo pōni weocoo incæ oōnædē inō wēā æænongā bai acantapa. ¹⁷Īninque, Mānōmainō ante wīimonte bai adimo inte

botō quīnō baī cæquīmoo, ante Timōnō Pegodo pōnēē congantapa. Pōnēē cōñongā Codōnedio nē nānō da pōnōnīnāni guiquēnē, Timōnō oncō æyōmōnō ī, ante diqui diqui minte adinque yabædemō īnō næ gongæninque, ¹⁸ Timōnō Pegodo nāni ānongā īñōmō owocāā, ante ēñencæte ante aa pedānitapa.

¹⁹ Pegodo wīlmonē baī nānō adīnō ante ayæ pōnēē cōñongante Wængonguī Ōnōwoca, “Timōnō ēñēmi, bitō īmite ante onguīñænāni mengāa go adocanque diqui diqui mīnānīpa quēwēmīi. ²⁰ Tōmēmō āmo pōnānīpa cæbīi. Bitō ængæ gantīdinque yæipodē wæīdinque tōmēnāni tōnō ee goe,” angantapa.

²¹ Angā ēñēninque Pegodo yæipodē wæīdinque tōmēnāni īnānite, Botō mīnitō nē diqui diqui mīnōmo adobo īmopa. Mīnitō quīnante pōmīnīi.

²² Āñongante,

—Mōnitō awēnē capitāō Codōnedio incæ angā pōmōnīpa. Tōmengā īñōmō Wængonguī ayongante nō cæcā īnongā īnte Wængonguī ingante guīñente quēwengampa. Nē nō cæcā ingampa, ante pōnēninque oodeoidi tōmānāni tōmengā ingante waa adānīpa. Īninque Wængonguī anquedo tæiyæ waēmō īnongā īnte wæætē Codōnedio ingante, Bitō wadāni īnānite āmi gote Pegodo ingante āñete poncædānīpa. Tōmengā īñōmō bitō weca pōninque apæncā ēñencæbiīpa, angā ēñente wæīdinque Codōnedio wæætē mōnitō īmōnite da pōnongā pōmōni ae.

²³ Ante apænedāni ēñēninque Pegodo angā pō guīte tōmengā weca owodānitapa. Īmō ate Pegodo tōmēnāni tōnō tao goyongante Cope īñōmō quēwente nē pōnēnāni incæ pancadāniya godongāmæ tao wadæ godānitapa.

²⁴ Mānōmaī godinque Pegodo īñabæ wæængā Tetadea pongantapa. Codōnedio guīquēnē, Oo ponguingā, ante pōnēninque tōmengā guīdēnāni tōnō tōmengā æmigoidi īnānite do āñecā ponte godongāmæ ongōnānitapa. ²⁵ Īninque Pegodo īñōmō oncōnē pō guīicæ cæyongā Codōnedio wæætē oncodo tao bee tēninque, Æ, bitō Wængonguī anquedo īnōmi īmīpa, ante baī cæīdinque ædæ wæænte Pegodo ōnōwa

gāānē guīdōmēmæ ñongængā. ²⁶ Adinque Pegodo wææ āninque,

—Īñæmpa bitō waobi īmi baī botō adobaī waobo īnōmo īmopa. Ængæ gantībi, āninque Pegodo angā ængæ ganticantapa.

²⁷ Ayæ Codōnedio tōnō guēa tededinque Pegodo oncōnē guīte ayongante nangū īnāni godongāmæ mæ ongōnāni. ²⁸ Adinque tōmēnāni īnānite,

—Mīnitō do ēñēmīnīpa. Oodeoidi īnōmōni īnte mōnitō Mōitee wodi nānō wææ angāīnō ante Ao ante ēñente cæmōnīpa. Īninque, Oodeo īnāmaī īnāni tōnō godongāmæ cædāmaī incæmīnīpa, ante ayæ, Tōmēnāni weca go guīdāmaī incæmīnīpa, ante mōnitō ēñengāīnō ante cæmōnīpa, ante mīnitō do ēñēmīnitawoo. Incæte Wængonguī wæætē botō īmote īmaī ante odōmongantapa. Bitō, Baacā awædō, ante tedete baī waocā ingantedō ante tededinque, Wentamō mongængampa, ante ānāmaī incæbiīpa. Ayæ, Ōnonganque ingampa, ante ānāmaī incæbiīpa, ante Wængonguī botō īmote do odōmongā atabopa. ²⁹ Āñete pōnāni ate botō, Wængonguī mānōmaīnō ante odōmongā atabopa, ante pōnēninque ee pontabopa. Īninque quīnante botō īmote aa pemīnīi, ante ēñencæte ante wæbopa.

³⁰ Āñongante Codōnedio wæætē,

—Do mēōnaa go mēōnaa īñonte botō tōmēmō oncōnē cænāmaī īnte Wængonguī ingante apænetabopa. Botō mānōmaī ñōwo baī ædæ wæicā apæneyōmo onguīñængā weocoo nāāmænta pōnī mongængā ponte botō weca a ongongā atabopa. ³¹ Ayæ botō īmote apænedinque, “Codōnedio, bitō Wængonguī ingante apænebitawo, angantapa. Mānīnō bitō apænedō ante Wængonguī do ēñengantapa. Ōmæpodāni wæwēnāni quī, ante bitō godōmitawo. Mānīnō bitō godōnō ante adinque Wængonguī cōwē pōnengampa cæbīi. ³² Ñōwo āmi Cope gote Timōnō Pegodo nāni ānongā ingante āñete poncædānīpa. Tōmengā wacā Timōnō æmontai nē aminengā weca gāwapæntibæ wedeca owocampa.” ³³ Angā ēñēninque botō wæætē bitō īmite ante, Āñete pōedāni, antabopa. Ñōwo bitō do

pōmi waa abopa. Īnīnque ñōwo īñōmō Wængonguī ayongā tōmāmōni godongāmæ a ongōñōmōni bitō, Wængonguī Awēnē mōnitō beyæ ante bitō ĩmite æbānō angāā, ante apænebi ēñencæte ante ongōmōnīpa, angantapa.

Codōnedio oncōnē ongōnīnque Pegodo apænecampa

³⁴Codōnedio mǎnōmaī apænecā ēñēnīnque Pegodo īīmaī ante apænecantapa.

—Wængonguī, Adoyōmō pōnī ĩmīnīpa, ante tōmāmō ĩmonte pōnō adoyōmō pōnī cæcampa, ante botō, Nāwangā ĩmpa, ante ñōwo tæcæ ēñēmopa. ³⁵ Īnīnque īīmæca quēwēnāni incæ wayōmō wabæca wabæca quēwēnāni incæ æcānō Wængonguī ingante guīñente wædīnque nō cæte quēwēna ante adīnque Wængonguī māningā ingante Ao ante do ængampa. ³⁶ Mǎnōmaī cæbopa, ante idægoidi ĩnānīte apænemīni ēñencædānīpa, ante Wængonguī mōnitō ĩmōnīte da godongā gote īīmaī ante apænemōni ēñēnānīpa. Tōmāmæ quēwēmō ĩñōmonte mōnō Tæiyæ Awēnē ĩñōmō Itota Codito ingampa. Tōmengā waa pōnī pōnō cæcā beyænque Wængonguī piyænē nānō cægaīnō ante watapæ mōni apænedō ĩmpa. ³⁷ Wǎo wodi, Æpænē mōnō guidongæīmpa, ante apænecā ēñēnāni ate Itota Codito ĩñōmō Gadideabæ ĩñōmō mā cædīnque Oodeabæ tōmāo cægonte æbānō cægacāī, ante do ēñēmīnīpa. ³⁸ Īīmaī ingatīmpa. Wængonguī tōmengā Ōnōwoca ingante angā Itota Nāatadeta nē quēwengāngā baonga wææ guīgacāīmpa. Wææ guīcā ate Itota tæī piñante entawēnīnque wayōmō wayōmō gote tōmāo cægōnīnque waa cægacāīmpa. Edæ Wængonguī tōmengā tōnō godongāmæ quēwente cæcā beyæ Itota ĩñōmō, Wadāni wēnæ angā ēñēnīnque goti wīnte baī wæwēnānīpa, ante adīnque wēnæīdi ĩnānīte angā tao godānīta. Ayæ wadāni wēnæ wēnæ ĩnte wæyōnānīte tōmengā godō cæcā ate edæ waa ĩnāni bagadānīpa.

³⁹ Pabodo mǎnōmaīnō ante godōmenque apænecantapa. “Oodeoidi ōmæ cægōnīnque ayæ Eedotadēē ĩñōmō quēwēnīnque, Itota Codito æbānō cægacāī, ante nē adīmōni ĩnte mōnitō ĩñōmō mānīnō tōmānō

ante nē apænemōni ĩmōnīpa. Tōmengā ingante awæ ñænquedīmæ cæte godō wænōnāni wængacāīmpa. ⁴⁰ Incæte Itota do wæningā ĩnte mēōnaa go adoōnæque ōñongante Wængonguī angā ñāni ōmæmonte mīngā ĩnte edonque pōnī a ongongā agadānīpa. ⁴¹ Wīī tōmānāni adānīta. Pancamōnīya atamōnīpa. Itota ñāni ōmæmongā ate tōmengā tōnō nē godongāmæ cæte bedīmōni ĩñōmōnīte Wængonguī, Mānīmpodānīque Itota mīngā ongongā ĩngampa, ante nē adīnāni ĩnte nē apænedāni incædānīpa, ante mōnitō ĩmōnīte apænte ængacāīmpa. Mōnitō adomōnīque tōmengā ingante atamōnīpa. ⁴² Ayæ mōnitō ĩmōnīte ānīnque Wængonguī, Mīnītō ĩñōmō do ēñēnīmīni ĩnte nē apænemīni badīnque waodāni ĩnānīte mǎnōmaīnō ante apænedīnque īīmaī ante apænecāmīnīpa. Mīī quēwēnāni ĩnānīte do wænīnāni ĩnānīte Itota Codito ĩñōmō edæ tōmānāni ĩnānīte edæ nē apænte angūngānō angūēnē, ante apænemīni ēñencædānīpa, ante Wængonguī mōnitō ĩmōnīte angacāīmpa. ⁴³ Ayæ, Mōnō Codito poncæcāīmpa, ante do ēñengāīnāni ĩnte tōmānāni Wængonguī beyæ adoyōmō apænegadānīpa. Tōmēnāni, Codito ingante nē pōnēnāni wēnæ wēnæ nāni cædō ante adocā Codito ēmōwo beyænque Wængonguī pōnō waadedīnque ñīmpo cæcā quēwencædānīpa, ante doyedē apænegadānīpa,” ante Pegodo Codōnedioidi ĩnānīte apænecā ēñēnānīta.

Oodeoidi ĩnāmaī ĩnāni Wængonguī Ōnōwoca ingante cēnāni

⁴⁴ Pegodo mānīnō ante tæcæ apænecā ēñēē cōñōnānīte Wængonguī Tæiyæ Waēmō Ōnōwoca tōmēnāni tōmānāni baonga wææ guīcāntapa. ⁴⁵ Pegodo tōnō godongāmæ pōnīnāni guīquēnē nē pōnēnāni ĩnāni incæte, Mōnō ēō togænte quēwengæīmpa, ante nē ānōnāni ĩngadānīpa. Īnīnque tōmēnāni, Oodeoidi ĩnāmaī ĩnāni ĩnānīte Wængonguī Tæiyæ Waēmō Ōnōwoca do wææ guīcāmpa, ante adīnque edæ guīñente wædānīta. ⁴⁶ Edæ Codōnedioidi Wængonguī Ōnōwoca ingante ēwocadīnque wadāni nāni tede baī wadāni nāni tede baī ĩñontobæ apænedīnque Wængonguī

ingante waa adinque waa todāni eñente wædinque oodeoidi mǎnōmaī guiñente wædānitapa. ⁴⁷ Adinque Pegodo tōmengā tōnō nē pōnīnāni inānite,

—Tōmēnāni mōnō bai Wængonguī Tæiyæ Waēmō Ōnōwoca do ænīnāni inānite adinque tōmēnāni, Æpænē guidōmi guiboē, añōnānite mōnō ædō cæte wææ anguiī. ⁴⁸ Änīnque Pegodo angā eñēnīnque tōmēnāni Itota Codito emōwo apænedinque æpænē guidōnāni guidānitapa. Æpænē nē guidēnāni iñōmō ayæ Pegodo ingante, Tæōnæ mōnitō weca quēwencæbiimpa, änāni Ao ante quēwengacāimpa.

11

Eedotadēe iñōmō nē pōnēnāni inānite Pegodo apænecā

¹ Oodeoidi ināmaī ināni incæ Wængonguī nānō änō ante do Ao ante eñēnānīpa, ante wadāni Oodeabæ tōmāo cægonte tedēdānitapa. Inīnque Itota nānō da gogaīnāni tōnō wadāni nē pōnēnāni tōnō mǎnīnō ante do eñēnānitapa. ² Inīnque Pegodo Eedotadēe iñōmō æite quēwēñongante nē pōnēnāni incæ pancadāniya, Mōnō eō togængæimpa, ante nē änōnāni inte tōmengā ingante pīinīnque, ³ iīmaī ante änānitapa.

—Quīmæ bitō togænāmaī ināni weca incæ go guidinque cæmitapa tōō.

⁴ Äñōnānite Pegodo, Æbānō cæte ī, ante adodō adodō ante apænecā eñēnānitapa.

⁵ —Botō Cope nāni quēwēñōmō gote quēwēnīnque Wængonguī ingante apænedinque cæwēnente ongōnīnque wīimonte bai atabopa. Wīimonte bai ayōmote wecoo ñænæncoo mōincoo bai æmænecoo yao æmænecoo yao oncōnete bai öönædē inō pædæ wæænonte bai ayōmote botō weca wææ wāi wocæ atabopa. ⁶ Wāi wocæñō botō acæte ante guimō ayōmo babæidi bai ināni inte ocaguī mongænāni, æmontaique mongænāni, öömā emænāni yæmiñæncoo inō ongōnāni bai atabopa. ⁷ Ayæ wacā botimote, “Pegodo, ængæ gantidinque wænonte cæe.” ⁸ Angā eñēnīnque botō, “Awēnē eñēmi. Baacā ingā anewēē. Nāwāaquinā ināmaī iñongante cōwē cænāmaī imoi ae.” ⁹ Ante wæyōmote öönædē apænecā

botō nē eñēningā godōmenque änīnque, “Wængonguī nānō ædæmō mēnongadongā ædō cæte baacā ämii.” ¹⁰ Änīnque tōmengā wæætē wæætē mempoga go adopoque adodō angā ate ñænæncoo bai adodō öönædē ingæ æi atabopa. ¹¹ Māniñedē Tetadea nē quēwengā da pōnongā pōnīnque onguīñænāni mengāa go adocanque botō imote ante diqui mincæte ante botō owocō boyæ tæcæ pōnīnque næ gongænānitapa.

¹² Ayæ Wængonguī Ōnōwoca incæ botō imote angā eñēnīnque botō, Wadāni inānīpa, ante pīināmaī imo inte guīñēnāmaī tōmēnāni tōnō ee gotabopa. Ayæ botō tōnō iīnāni iñōmō tei ganca ināni mǎnimpodāni godongāmæ godānitapa. Gote ayōmōni, Codōnedio oncō impa, ante adinque go guitamōnīpa, ante Pegodo apænecantapa. ¹³ Ayæ, Go guīite eñēñōmōnite Codōnedio iñōmō, Æbānō cætimpa, ante apænedinque mōnitō imōnite iīmaī ante apænecantapa. Botō oncōnē Wængonguī anquedo a ongongā atabopa. Ayæ botō imote änīnque anquedo iñōmō, “Bitō Cope iñōmō ämi wadāni gote Timōnō Pegodo nāni änongā ingante añete poncædānīmpa. ¹⁴ Tōmengā pōnīnque, Mīni quēwencabo æbānō cæte wænāmaī quēwenguimīni, ante bitō imite apænecā eñencæbiimpa.” Mānōmainō ante Wængonguī anquedo apænecā eñente cætabopa, ante Codōnedio mōnitō imōnite apænecā eñentamōnīpa.

¹⁵ Māninganca apænedinque Pegodo iīmaī angantapa. “Wængonguī Tæiyæ Waēmō Ōnōwoca mā pōnīnque mōnitō imōnite nānō guidō bai ñōwo iñōmō botō tæcæ apænecæ cæyōmo adocā edæ tōmēnāniya adobāi wææ guicantapa. ¹⁶ Inīnque botō, Mōnō Awēnē Itota æbānō angacāi, ante adodō ante pōnentabopa. “Wāo wodi iñōmō æpænē guidongacāimpa. Wængonguī Tæiyæ Waēmō Ōnōwoca guiquēnē mīnitō baonga pō guicæcāimpa, ante Itota do apænegacāimpa, ante botō öñōwēnenque pōnentabopa. ¹⁷ Ayæ, Mōnō Awēnē Itota Codito ingante wede pōnēmōni ate Wængonguī tōmengā Tæiyæ Waēmō Ōnōwoca ingante da pōnongā æntamōnīpa. Ñōwo tōmēnāni adobāi wede pōnēnāni

ate Wængonguī mōnitō imōnite nānō da pōnongaingā ingante tōmēnāniya adobaī da pōnongā ænānīpa, ante pōnentabopa. Mānōmaī cæcampa, ante pōnēninque botō, Ædō cæte Wængonguī ingante Baa anguīmoo.”

18 Ante Pegodo, Æbānō cætīmpa, ante tōmānō ante edonque apæneccā ēñēninque tōmēnāni wæætē, Mōnō ædō cæte godōmenque piinte anguīi, ante piyæñē cæte apænedānitapa.

—Ñōwo idæwaa āmōnīpa. Wadāni oodeoidi ināmaī ināni incæ mōnō baī, Idæwaa wēnæ wēnæ cæte awædō, ante guingo imonte wædāni ate Wængonguī pōnō waadete cæcā ate quēwēnānīpa, ante ñōwo tæcæ mā ēñēmōnīpa, ante todinque Wængonguī ingante edæ watapæ apænegadānīmpa.

Antioquiya iñōmō Itota ingante nāni pōnencabo

19 Māningā Etebā wodi ingante wænōninque oodeoidi godōmenque wadāni nē pōnēnāni inānite wēnæ wēnæ togænte pānāni wædinque nē pōnēnāni iñōmō wodii wīnōninque nāwæ gote Pēnitia ganca Tipidebæ ganca Antioquiya ganca godānitapa. Godinque tōmēnāni, Itota Codito æbānō cægacāi, ante oodeoidique inānite apænedinque wadāni inānite apænedāmaī ingadānīmpa. 20 Incæte Tipidebæ iñōmō quēwēnāni tōnō Tidēnebæ iñōmō quēwēnāni pancadāniya Antioquiya iñōmō godinque guidiegoidi inānite adobaī Itota Codito ingantedō ante watapæ apænedāni ēñēnānitapa. 21 Īninque mōnō Awēnē tōmēnāni tōnō godongāmæ cæcā beyænque nanguī ināni tæcæ pōnēninque tōmengā gāmænō pōnānitapa.

22 Mānōmaī pōnēnānīpa, ante tededāni ēñēninque Eedotadēē iñōmō Codito ingante nāni godongāmæ pōnencabo incæ Bedēnabee ingante, Bitō Antioquiya iñōmō godinque ate pōe, ānāni. 23 Māniñōmō gote pōninque Bedēnabee iñōmō, Antioquiya iñōmō quēwēnāni inānite Wængonguī waadete pōnō cæcampa, ante adinque nanguī todinque tōmānāni inānite, Mīnitō mīmōno wede pōnēninque mōnō Awēnē

mīñæ cōwē quēwēedāni, ante nanguī angantapa. 24 Bedēnabee iñōmō Wængonguī Tæiyæ Waēmō Ōnōwoca ingante ēwocadinque nē wede pōnengā inongā inte nē waa cæcā inongāimpa. Īninque tōmengā apæneccā ēñēninque tōmēnāni nanguī ināni mōnō Awēnē gāmænō pōngadānīmpa.

25 Bedēnabee wæætē Taodo ingante diqui mincæte ante Tadoto iñōmō gote, 26 adinque tōmengā ingante Antioquiya iñōmō ænte pongantapa. Pōninque adoque wadepo quēwēninque tōmēnāni Codito ingante nē tee empote quēwencabo tōnō cōwē godongāmæ ponte apænedinque nanguī ināni inānite odōmonte apænedā ēñēnānitapa. Ayæ Antioquiya iñōmō quēwēnāni Codito ingante nē tee empote quēwēnāni inānitedō ante apænedinque, Coditoidi inānīpa, ante mā pemōninque apænedōnānīmpa.

27 Ayæ Wængonguī beyæ nē apænedāni pancadāniya māniñedē Eedotadēē quēwēninque Antioquiya pōnānitapa. 28 Tōmēnāni nāni Wængonguī beyæ apæneincabo incæ adocanque Agabo nāni ānongā iñōmō Wængonguī Ōnōwoca ingante ēwocate apænedinque, Mōnō waocabo quēwēñōmō tōmāmæ cænguī oo dæ ba adinque mōnō gæwænte wæquīmāmo baquinō anguēnē, ante angacāimpa. Īninque ĩncayæ ate Codaodio Awēnē ingāñedē Agabo nō nānō ānīnō baī do batīmpa. 29 Ba adinque Antioquiya nāni pōnencabo godongāmæ pōnēninque, Mōnō tōniñadāni iñōmō Oodeabæ quēwēninque edæ tepæmpo gæwænte wædānīpa cæmōō. Tōmēnāni beyæ mōnō godonte æinta pædæ godōninque adocanque eyepæ inte nānō godonganca wacā eyepæ inte nānō godonganca godongāimpa, ante godongāmæ Ao ānānitapa. 30 Āninque eyepæ pædæ pōnōninque Bedēnabee tōnō Taodo inate, Ænte māo godinque nē pōnēnāni inānite nē aadāni nē Picænāni nempo pædæ godōmīna æncædānīmpa, ante da pōnōnāni ænte gote godōna ængadānīmpa.

Tantiago wængä ate Pegodo ingante tee mönedänipa

1 Māniñedē Codito ingante nāni godongāmæ pōnencabo iñōnānite awēnē odeye Edode iñōmō pancadāniya inānite wēnæ wēnæ cæcæte ante angä bæi ongonte ængadānimpa. 2 Mānōmaī cædinque tōmengä angä eñēninque Wäo tōniñacä Santiago ingante yaēmenca wænōnāni wængacäimpa. 3 Santiago wodi mānōmaī wængä adinque oodeoidi todāni ate wædinque Edode, Godōmenque cæbo ate nanguī todinque botō imote waa acædānimpa, ante cædinque Pegodo ingante adobaī bæi ongongantapa. Edæ päo yedæ æmpoquī ömæmō i nāni ææmæ cæyedē māniñedē tōmengä ingante bæi ongonte ængantapa. 4 Mānōmaī æninque Edode iñōmō, Oodeoidi Patowa ææmæ iinque bedāni ate botō Pegodo ingante ænte tadonte tōmānāni ayōnānite apænte ancæboimpa, ante pōnēninque tōmengä ingante tee mönecantapa. Tee mönedinque Edode godōmenque angä eñēninque tontadoidi mengäa go mengäa nāni cabo pō wææ wānonte goyōnāni wacabo adopodāni pō wææ wānonte godōnānimpa. Mānōmaī wacabo pō wacabo pō cædinque mencabodāniya go menca-bodāniya wæætē wæætē ponte wææ wānonte godōnānimpa. 5 İninque Pegodo ayæ tee mönete ongōnongäimpa. Incæte tōmēnāni Codito ingante godongāmæ nāni pōnencabo Wængonguī ingante tōmengä beyæ cōwē nanguī apænegadānimpa.

Pegodo ingante Wængonguī incæ ñimpo cæcä gocampa

6 Pegodo ingante tontadoda mēnaa tōnō æmæncaipo æmæncaipo yaēmengō tæi goti wincapodāni wæyongante wada odemō cōwē wānō cōnōnaimpa. İninque Edode tōmengä nānō apænte anguiōnæ ado woyowotæ Pegodo mānōmaī goti winte wædongä inte mö ñongantapa. 7 İñontobæ Wængonguī Awēnē nānō da pōnōningä anquedo a ongongantapa. Tee mönete oncōnē ñāo gongæntapa. Pegodo mö ñōñongante Wængonguī nānō da pōnōningä iñōmō æmætæ inō tao cædinque, “Pegodo, ñāni

ömæmonte quingæ ængæ gantibi.” Äñongä daagömē nāni tæi wini incæ tōmenque ñimæncæ tæ wæængatimpa. 8 Ayæ, “Bitō weocooga pacadeyænta pacadeyænte awæncata wēwabi.” Angä eñente cæcä adinque Wængonguī anquedo godōmenque, “Yacoo wini caadinque botō miñæ pōe.”

9 Angä eñēninque Pegodo, Awii cæmonte awædō. Anquedo dicæ ponte cæcää. Mānōmaī ponte cæcampa, ante botō wiiimonte bai aboimpa, ante wawique pōnengä incæte anquedo miñæ tee empote tao gocantapa. 10 Mānōmaī tao godinque guicōnē nē wānōna ongōñōna wodo tebæ tao godinque yabæcōnē tamongademō nē wānōna ongōñōna wodo tebæ tao godinque yaēmewæ odemō tōmēnāni quēwēñōmō ante nāni tao goquinemō ganca pōnatapa. Māninemō ganca ponte ongōñōna yaēmewæ odemō incæ tōmenque æ ænete bayō tao godinque taadō adodonque cægōna ate anquedo iñōmō ingæ gocä ate Pegodo guiquēnē adocanque a ongongan-tapa.

11 Adoboque a ongōmopa, ante wædinque tōmengä wæætē nāmā pōnengä badinque, “Æ. Nāwangä incæ do tate eñēmopa. Edode nempo wæwēninque botō oodeoidi nāni piinō wæquēnēmo imo adinque Wængonguī angä eñēninque tōmengä anquedo ponte botō imote gä pe æmpote ö ængä ate aamō cæbopa, ante tæcæ pōnēmopa.”

12 Ante pōnente wædinque Pegodo wadæ godinque Wäo Mäadoco nāni änongä tōmengä badä Mäadiya oncō boyæ ponte næ gongængantapa. Mānincōnē wadāni nē pōnēnāni incæ do pōninque Wængonguī ingante godongāmæ apænee cōnōnānimpa. 13 Pegodo iñōmō yabædemō ongonte aa peyongä baquecä nē èacä ingante nē cæcä inte tōmengä emōwo Adoda iñōmō eñencæte ante pongantapa. 14 Ponte eñēñongä Pegodo incæ aa pecä eñēninque watapæ tote wædinque tōmengä wii pōnēninque odemō wi ænedāmaī pogodo gote edæ wadæ guidinque, Pegodo incæ oncodo a ongongä tamēñedāni. 15 Ante apænecä eñēninque tōmēnāni wæætē,

—Adoque antedō amini.

Ante wæyōnāni tōmengā, Nāwangā impa, ante ancaa angā eñēninque tōmēnāni,

—Wa. Pegodo ingante nē aacā anquedo īmaingampa.

¹⁶ Ante tedeyōnāni Pegodo iñōmō ayæ aa pete ongōnongāimpa. Ayæ ponte wi ænete ayōnāni Pegodo ingante adinque ancai guīñente wædānitapa. ¹⁷ Tōmengā wæætē, Apocænē iedāni, ante ōnompocaque compo cæcā adinque pæ wēneyōnāni tōmēnāni inānite apænecantapa. Botō tee mōnete wæyōmote Wængonguī æbānō pōnō cæcā ate tate pōmoo, ante tōmānō ante adodō ante apænedinque,

—Botō apænebo mīni eñēnō ante mīnitō wæætē wacā Tantiago ingante apænedinque wadāni mōnō tōniñadāni inānite apænemīni eñencædānimpa.

Āninque Pegodo wayōmō wadæ gocantapa.

¹⁸ Īimō wæñō ñāō bayonte tontadoidi guiquēnē, Pegodo ædōnō gote dæ angāā, ante nanguī Yæ yæ ante cædānitapa.

¹⁹ Mānōmaī cætimpā, ante apænedāni eñente wædinque Edode angā diqui diqui mīñōnāni Pegodo ayæ dæ angantapa. Īinque nē wææ wānōnināni inānite Edode, Ābānō cætīi, ante ancaa angā wædinque tōmēnāni, Mōnō ædō cæte anguīi, ante wæyōnānite tōmengā wadāni inānite angā capo wænōnāni wængadānimpa. Edode tōmē Oodeabæ wadæ tao godinque Tetadea gote quēwengacāimpa.

Edode wængampa

²⁰ Tido iñōmō quēwēnāni tōnō Tidōō iñōmō quēwēnāni inānite awēnē Edode wodi māniñedē ēnagate ænguī bacā adinque tōmēnāni wæætē godongāmæ pōnente Ao āninque Edode weca apænece pōnānitapa. Tōmēnāni, Mōnō iñōmō awēnē odeye Edode ōmæ quēwēnāni pōnōnāni æninque māniñonque cænte quēwēmōmpa, ante wædōnāni inte tōmengā ingante, Bitō pīināmaī inte piyænē cæbi quēwēmōnie, ante ancæte ante pōnānitapa. Pōninque tōmēnāni Edode oncōnē owodāni inānite nē aacā Bodato ingante waa cædinque tōmengā ingante ānāni Ao ante tōmengā wæætē Awēnē Edode ingante tōmēnāni beyæ apænece eñengacāimpa. ²¹ Edode iñōmō,

Īiōnæ ba ate botō ponte apæneceboimpa, ante tōmengā nānō āniōnæ ĩnque ba ate tōmengā awēnē weocoo waēmōncoo wēñate pōninque awēnē nānō apænte ante contaimpaa tæ contadinque tōmānāni ayōnāni tōmēnāni inānite apænecantapa. ²² Apænece eñēninque tōmānāni Yæ yæ āninque, “Wīi waocanque tedecā eñēmōmpa. Wængonguīdi nāni tedepāmo baī tedecā eñēmōmpa.” ²³ Ante Yæ āñōnāni Edode wodi wæætē, Nāwā Wængonguinque nē waa cæcampa, ante anguēnengā incæte ānāmaī pæ wēnece adinque tōmengā ingante Wængonguī anquedo wæætē godō cæcā ate ayago cæ æmæwo wængacāimpa.

²⁴ Incæte Wængonguī nānō angāinō ante māniñedē wayōmō māo wayōmō māo apænedāni eñēninque nanguī ināni mōnō Awēnē ingante nē wede pōnēnāni badānitapa.

²⁵ Bedēnabee tōnō Taodo iñōmō Eedotadēē iñōmō godinque tōmēna nāna cæquēnēnō tōmānō ĩnque cædinque wadæ godinque Wāō Māadoco nāni ānongā ingante tōmēna tōnō æninque adodō godānitapa.

13

Wængonguī angā eñente Bedēnabee tōnō Taodo godapa

¹ Antioquiya iñōmō Itota Codito ingante nāni godongāmæ pōnencabo inōnāni iñōmō pancadāniya Wængonguī beyæ nē apænedāni iñōnāni pancadāniya guiquēnē nē odōmonte apænedāni inōnānimpa. Bedēnabee tōnō wacā Timōnō Nēegodo nāni ānongā inōnaimpa. Tidēnebæ nē quēwēningā Dotio inongāimpa. Pancabaa awēnē Edode tōnō godongāmæ nē pædingā Mānāēnē tōnō Taodo inōnaimpa. Mānimpodāni ingadānimpa. ² Īinque tōmānāni godongāmæ mōnō Awēnē ingante, Tæiyæ Waēmō ĩmipa, ante watapæ apænece ante cænāmaī apæneyōnānite Wængonguī Tæiyæ Waēmō Ōnōwoca incæ ĩmaī angacāimpa. “Bedēnabee tōnō Taodo mīnitō tōnō nē cæda iñōnate āmīni botō beyænque cædinque nānēnē godinque botō ānīnō ante cæcædaimpa,” angacāimpa.

³ Īnque īinque cænāmaī inte apænedinque tōmēnāni Bedēnabee tōnō Taodo īnate gampocadinque Wængonguī ingante apænedinque ānāni ate wadæ gogadaimpa.

Wāā tēiwæne Tipidebæ gote apæneda eñēnāni

⁴ Bedēnabee tōnō Taodo īñōmō Wængonguī Tæiyæ Waēmō Ōnōwoca mǎnōmaī angā godīna inte Tedeotia īñōmō wæi wipodē ñænæmpodē go guīdinque wogaa godinque wāā tēiwæne Tipidebæ nāni āmæ godatapa. ⁵ Tadamīna nāni quēwēñōmō pōninque oodeoidi odōmōincōnē wacōnē go guī wacōnē go guī cædinque Wængonguī nānō apænedō ante nōingā apæneda eñengadānimpā. Ayæ Wāō tōmēna mīñæ godinque tōmēna beyæ nē cæcā īnongāimpā.

⁶ Mǎnōmaī wāā tēiwæne tæcæguedē wodo tebæ cægōninque yæcado godinque Papo nāni quēwēñōmō ganca pōnānitapa. Pōninque tōmēnāni wacā idō tōmengā ēmōwo Baditota ingante māmō bee tēnānitapa. Tōmengā īñōmō oodeocā īnongā inte, Wængonguī beyæ nē apænebo īmopa, āninque nē babæ ānongā īnongāimpā. ⁷ Tōmengā wāā tēimæ awēnē Tedeguio Pabodo nāni ānongā tōnō godongāmæ nē cædongā īnongāimpā. Awēnē Tedeguio guiquēnē nē ocai encadongā inte Wængonguī nānō ānō ante eñēinente wædinque Bedēnabee tōnō Taodo īnate āñete māmōngā pōnatapa. ⁸ Tōmēna ponte apæneyōnate idō Baditota guiquēnē guidiego tededō Edīma nāni ānongā īnongā inte edæ, Awēnē nē pōnengā badāmaī incæcāimpā, ante wææ cæcæte ante piinte cæcantapa. ⁹ Īnque Taodo Pabodo nāni ānongā īñōmō Wængonguī Tæiyæ Waēmō Ōnōwocaque ēwocadinque idō ingante gomō adinque, ¹⁰ tōmengā ingante angantapa.

—Bitō īñōmō wēnæ awēnē nānōmōmi baī īmidō anguēnē. Īñæmpā, Wadāni quiēmē nō impā, ante oda cæcædānimpā, ante bitō piinte pōnēwēnonque entawēninque bitō nē babæ cædōmi īmipa tōō. Wængonguī nānō tōinō ponguīnō ante idiquibæ bacæimpā, ante bitō æpogamē incæ cæbii. ¹¹ Nōwo īñōmō Wængonguī Awēnē nē piñængā īnongā inte bitō īmite pancæcāimpā. Tōmengā pōnō gampomōngā ate bitō

babetamōmi badinque nænque ñāō tamōnō wantæpiyæ tōmengā nānō ānimpoga adāmaī incæbiimpā.

Āñongā boguīmā baī do wææ īnque wēmō ēmōninque Edīma Baditota nāni ānongā gampo gampo cædinque, Æcānō botō īmote tōō æmænte māoda goquīmoo, ante diqui diqui mingantapa. ¹² Mǎnōmaī bacā adinque wāā tēimæ awēnē wæætē Wængonguī Awēnē ingantedō ante īñāna nāna odōmonte apænedō ante pōnente guīñente wædinque nē pōnengā bagacāimpā.

Pitidiabæ Antioquiya godinque cædapa

¹³ Pabodoidi īñōmō Papo īñōmō wadæ godinque wipodē ñænæmpodē wogaa taodinque Pampidiabæ pōninque Pedegue īñōmō ti wææñōnāni Wāō wæætē adodō Eedotadēē gocæte ante tōmēna īnate ēmō cæte wadæ gogacāimpā. ¹⁴ Tōmēna wæætē Pedegue wadæ godinque Pitidiabæ pōninque Antioquiya nāni quēwēñōmō pōnatapa. Ayæ tōmēnāni guēmanguīōnæ īnque bayō oodeoidi odōmōincōnē pō guīte tæ contadatapa. ¹⁵ Tæ contate a cōñōna Mōitee wodi nānō yewæmongainta adinque Wængonguī beyæ nē apænegaināni nāni yewæmongainta ate apænedānitapa. Ayæ māniñōmō awēnēidi īñōmō tōmēnāni weca ongongā adocanque ingante apænedinque,

—Bitō ñōwo pōna īnate māō āninque īmaī apænecæbiimpā, Īñāna, mōni tōniñamīna eñēmīna. Īñōmō ongōnāni wampo pōnēninque tæi gongænte ongoncædānimpā, ante cædinque mīnatō ædæmō apænemīna eñenguīnāni, ante āmi apænebaīnāpa.

¹⁶ Ānāni eñente māō angā eñēninque Pabodo īñōmō ængæ gantidinque ōnompoca compo compo cædinque tōmēnāni īnānite apænecantapa.

—Mīnitō, pancamīniya idægoidi īñōmīnite pancamīniya wamīni incæ, Nāwā Wængonguī īnongā ingampa, ante nē guīñente wæmīni īñōmīnite botō tōmāmīni īmīnite apænebo eñēedāni. ¹⁷ Idægoidi, mīnitō īmīnite tāno apænebo eñēedāni. Mōnō idægocabo Wængonguī incæ mōnō mæmæidi īnānite apænte ængā ate wadāni nēmæ Equitobæ īñōmō quēwēñōnānite tōmengā pōnō cæcā ate tōmēnāni tæiyænāni yebængadānimpā.

Ayæ Wængonguī tæi piñænongā inte ingæ æmæninque tōō æmænte māocā wadæ gogadānimpa. ¹⁸ Godinque tōmēnāni coadenta wadepo mānimpoga ōnōmæca cægōninque æbāmē wēnæ wēnæ cæte quēwēnāni ate wæcā incæte tōmengā pānāmaī inte ata cæpote ænte māocā gogadānimpa. ¹⁹ Ayæ wadāni Cānaāmæ quēwēnāni ōnōmpo æmæmpoque go men-cabodāniya iñōnānite wido cædinque Wængonguī, Tōmēnāni ōmæ iñi mīnitō ōmæ wæætē bacæimpa, ante mōnō wæmæidi inānite pōnongā ængadānimpa. ²⁰ Edæ coatodo tiento tincoenta wadepo mānimpoga wabæca quēwēnāni ate māniñedē ate Wængonguī, Mīnitō ōmæ, āninque mōnō wæmæidi inānite pōnongā æninque quēwengadānimpa.

Ante apænedinque Pabodo, Idægoidi dodāni æbānō cægadāni, ante godōmenque apænecantapa. “Mānimæca ponte wantæpiyæ quēwēnāni ate pancadāniya nē apænte ānāni iñōnānite Wængonguī angā ate adodāni awēnēidi bai badinque wayedē wacā adocanque wayedē wacā adocanque wayedē wacā adocanque aagadānimpa. Tāmoedo Wængonguī beyæ nē apænecā nānō ponte apæneganca māninānique aagadānimpa. ²¹ Iñcayæ ate mōnitō dodāni iñōmō Wængonguī ingante apænedinque, Bitō adocanque ingante āmi ate tōmengā tæiyæ awēnē bacæcāimpa, ante ancaā ānāni ēñente wædinque tōmengā wæætē Beencaminō wodi pæingā incæ Titæ wengā Taodo ingante angā bagacāimpa. Tæiyæ awēnē badinque tōmengā coadenta wadepo mānimpoga iñonte aagacāimpa. ²² Ayæ ate Wængonguī wæætē, Idæwaa, ante Taodo wodi ingante wido cædinque Dabii wodi ingante wæætē angā tæiyæ awēnē bagacāimpa. Adocā Dabii ingantedō ante apænedinque Wængonguī, Botō waa pōni entawēmo bai Yæte wengā Dabii iñōmō adobai entawengā abopa. Tōmengā iñōmō botō ānō bai edæ tōmānō cæquingā ingampa, ante apænegacāimpa.”

²³ “Wængonguī doyedē, Codito ængā beyænque idægoidi quēwencædānimpa, ante do nānō angainō bai ñowo cædinque adocā Dabii pæingā Itota Codito ingante da

pōnongā pongacāimpa. ²⁴ Itota ayæ pōnāmaī iñongā Wāō wodi idægoidi tōmānāni inānite apænedinque, Mīnitō, Idæwaa wēnæ wēnæ cæte awædō, ante Wængonguī gāmænō wadæ pōninque æpænē guiedāni, ante apænecā ēñengadānimpa. ²⁵ Ayæ adocā Wāō incæ, ‘Botō æbodō imoo, ante pōnēmīni. Mīnitō pōnēnō bai wīi imopa. Botō do pōniimo iñōmote mīni nē pōnēnongā iñōmō ayæ poncæcāimpa. Tōmengā ingante adinque botō waēmō imopa diyæ tōmengā awæncata godō ñi cæquimoo.’ Ante Wāō tōmengā nānō cæquēnēnō wodo iinque cæyedē apænegacāimpa.”

²⁶ Ante apænedinque Pabodo godōmenque apænecantapa. “Iñānāni, pancamīniya Abadāō wodi pæimīni iñōmīni pancamīniya wamīni incæ Wængonguī ingante guiñēmīni iñōmīni edæ botō tōmāmīni imīnite apænebo ēñeedāni. Māninō, Codito ængā beyænque quēwencæmīnimpa, ante Wængonguī tōmāmō beyæ pōnō apænegacāimpa. ²⁷ Eedotadēē quēwēnāni tōnō tōmēnāni awēnēidi iñōmō, Itota æcānō ingāā, ante pōnēnāmaī ingadānimpa. Iñinque guēmanguiōnæ iñō guēmanguiōnæ iñō Wængonguī beyæ nē apænegaināni nāni yewæmongainta cōwē adāni incæte tōmēnāni, Itota nānō wænguinque wēnæ wēnæ cæcā ingampa tōō, ante babæ ante apænte ānewēninque edæ dodāni nāni yewæmonte angainō bai iinque cædānitapa. ²⁸ Tōmēnāni, Itota nānō wænguinque æbānō wentamō mongængāā, ante cōwā ayōnāni edæ dæ ampa. Ante wædinque awēnē Pidato ingante apænedinque tōmēnāni, Itota ingante āmi wænōnāni wængæe, ante ancaā ānāni ēñēninque Pidato Ao angā wænōnāni wængacāimpa. ²⁹ Iñinque Itota ingante awāa timpote wænōninque tōmēnāni dodāni tōmengā ingante ante nāni yewæmonte angainō bai tōmānō ante iinque cædānitapa. Mānōmaī cædāni ate wængā ate tōmēnāni ānāni ate tōmengā miñæ godināni wæætē tōmengā nānō ongōwāa pædæ æmpodinque ōnōmpo o togæmpote wæi ōnōwa o togæwadinque pædæ wæænōninque edæ ænte māo daga wengadānimpa.”

³⁰ “Incæte Wængonguī guiquēnē do

wæningā ingante, Nāni òmæmøe, angā ñāni òmæmøte quëwengampa. ³¹ Nāni òmæmøninge tòmengā tæönæ iñonte pō pō cædinque a ongōñongante edæ tòmengā tönō wëenëñedë Gadideabæ quëwëninge Ee-dotadëe iñömō nē pongaināni iñömō edæ tòmengā ingante wæætë adānitapa. Ìninqe tòmënāni iñömō nē adināni inte waodāni inānite, Itota nāwangā ñāni òmæmøte mīngā quëwengampa, ante nē apænedāni inānipa.”

³² Ante apænedinque Pabodo, “Dodāni inānite Wængonguī, Mīnitō beyæ botō cōwë pönō cæcæboimpa, ante apænegacāimpa, ante ëñëmīnitawo. Mānīnō ante watapæ nānō apænegainō ante mōnitō ñōwo iīmaī ante apænemōnipa. ³³ Mānīnō tòmengā dodāni inānite nānō angainō bai ñōwo tòmënāni mōmōidi beyæ iinque cædinque Wængonguī Itota ingante, Nāni òmæmøe, angā ñāni òmæmøngacāimpa. Tòmengā ñōwo iinque cæcampa, ante Ámotamīni nāni Angainta tānota gao wæintaa Wængonguī beyæ iīmaī ante yewæmongatimpa. ‘Botō Wëmi inōmi iīmpa. Nōwoönæ bitō Mæmpobo babopa.’ ³⁴ Ayæ mānīnō, Tòmengā Wengā do wæningā iñongante Wængonguī angā ñāni òmæmøninge baō ñömāadāmaī incæcāimpa, ante pönëninge Itaiya wodi iīmaī ante Wængonguī beyæ ante yewæmongacāimpa. ‘Awënë Dabii wodi ingante apænedinque botō, Tæiyæ waëmō botō cædō bai cædinque cōwë ædæmō aate cæcæboimpa, ante nō botō angainō bai cædinque mīnitō imīnite pönō adobai cæcæboimpa,’ ante Wængonguī angampa, ante yewæmongacāimpa. ³⁵ Ayæ mānīnō ante wataa adobai Wængonguī ingante apænete bai Dabii wodi yewæmongacāimpa. ‘Bitō imite nē Cæcā iñömō bitō cædō ante cōwë cædongā inte wængā adinque bitō ædō cæte tòmengā ingante ænāmaī inte ee abi baō ñömāaquingā,’ ante yewæmongacāimpa.”

³⁶ “Awënë Dabii wodi guiquënë Wængonguī nānō änönō ante ëñëninge adoyedë quëwënāni beyæ waa cædingā inte edæ nāñe wæninge tòmengā mæmæidi weca æiyongā tòmengā baō inī ñömænte bagatimpa. ³⁷ Wæætë

Wængonguī, Nāni òmæmøe, angā ëñente nē òmæmøngaingā iñömō tòmengā baō ñömāadāmaī ingatimpa. ³⁸ Ìninqe onguīñæmīni botō tōññamīni ëñeedāni. Itota pönō cæcā beyænque mōnitō mīnitō imīnite apænedinque, Wënæ wënæ mōnō cædō ante adinque Wængonguī pönō ñimpo cæcā ate quëwëmōmpa, ante apænemōni ëñëmīnipa. Mōitee wodi nānō wææ angainō ante ëñente beyænque mōnō iñömō dicæ nō cæte quëwëmō imongaa. ³⁹ Wæætë māningā onguīñængā iñömō Itota iñömō tòmengā nō pōni nānō entawënō ante pönongā ænte entawëmō beyænque mōnō nē pönëmō tōmāmō wæætë Wængonguī ayongā edæ nō cæte quëwëmō inömō imōmpa. ⁴⁰ Ìninqe Wængonguī beyæ nē apænegaināni iīmaī ante nāni apænegainō ante pönëninge mīnitō iñömō, Mōnitō imōnite wīi bacæimpa, ante nāmā wææ aquënë quëwëedāni. Iīmaī ante edæ ämotamīni ante bai yewæmongadānimpā.

⁴¹ ‘Mīnitō nē badete towëmīni inte cōwä aquënë quëwëedāni.

Botō cæbo adinque mīnitō ancai guīñente wæcæmīnimpā.

Mīnitō ayæ mīimīni quëwëñömīni edæ botō mā pōni cæcæboimpa, ante pönëmīniyaa.

Wængonguī mānōmaī cæcæcāimpa, ante edonque pōni apænedāni bai mīnitō wæætë, Babæ ancædō, ante wæcædōmīnimpā.’

Ante nāni yewæmongainō ante adinque edæ badete todāmaī iedāni,” ante Pabodo apænecantapa.

⁴² Mānōmainō ante iinque apænedinque Pabodo tönō Bedënabee tòmënāni odömōincōnë ongonte oncodo tao goyōnate Antioquiya iñömō quëwënāni iñömō, Wacā guëmanguīönæ bayonte minatō ñōwoönæ mīna apænedō bai godōmenque apænemīna ëñencæmōnimpā, änānitapa. ⁴³ Ayæ godongāmæ nāni ponte ongōnincabo tao goyōnāni oodeoidi pancadāniya ayæ oodeoidi bai nē bagaināni adobai Wængonguī ingante guīñente quëwënāni nangui ināni iñömō Pabodo tönō Bedënabee inate edæ tee empote godāni. Adinque iñāna wæætë tòmënāni inānite apænedinque, Wængonguī waadete nānō

pönō cædönō ante pönëninque mīnitō cōwē ñimpo cædāmaī tæī ongōninque edæ waa quëwëedāni, ante nanguī apænedatapa.

⁴⁴ Ayæ adoque Wængonguī itædē go ate tōmënāni nāni guëmanguiōnæ bayonte māniñōmō quëwënāni wodo tōmānāni Wængonguī Awënë nānō änō ëñencæte ante godongāmæ pönānitapa. ⁴⁵ Nanguī ināni mānōmaī pönāni ate wædinque oodeoidi guiquënë piinte badinque, Babæ ante ānewengampa, ante Pabodo ingante godō piinte tedewënānitapa. ⁴⁶ Mānōmaī tedewëñōnānite Pabodo tönō Bedënabee wæætē guiñenedāmaī inte apænedatapa.

—Mīnitō oodeoidi imīni inte edæ tāno ëñencæmīnīmpa, ante cædinque mōnatō Wængonguī nānō änō ante edæ mā apænedinque mīnitō imīnite tāno apænequënēmōna intamōnāpa. Mīnitō iñæmpa mīni cōwē wænāmaī quëwenguīnō ante apæneyōmōna mīni apænte pangā wæquinque edæ Baa āmīnīpa. Ante wæmōna inte mōnatō ñōwo ëmō cæte godinque edæ oodeoidi ināmaī ināni weca edæ apænecæ gomōna tamëñedāni. ⁴⁷ Mōnitō Awënë iīmaī ante mōnatō imōnate angacāimpa.

“Quëwencæmīnīmpa, ante botō cægainō ante bitō inguipoga tōmāmæ māo apænedinque

Oodeoidi ināmaī ināni beyæ tica ënente bai cæcæbiimpa,

ante cædinque botō bitō imite da godōmo apænecæ gocæbiimpa.”

Ante nē apænegaingā inte Wængonguī mōnatō imōnate angā ëñente apænemōnāpa.

⁴⁸ Mānōmaīnō ante apæneda ëñëninque oodeoidi ināmaī ināni iñōmō, Awënë nānō apænedō waa ëñëmōnīpa, ante watapæ apænedānitapa. Ayæ mōnō Awënë doyedē apænedinque, Mānimpodānique wede pönëninque cōwē wædāmaī quëwenguīnāni incædānīmpa, ante tōmengā nānō nē angāinānique ñōwo pönënanitapa. ⁴⁹ İninque mōnō Awënë tōmengā nānō apænedō ante māo apæneyōnāni māniōmæ tōmāo quëwënāni ëñënanitapa.

⁵⁰ Oodeoidi guiquënë, Pabodo tönō Bedënabee inate mōnō wido cæcæimpa, ante cædinque iīmaī cædānitapa. Onquiyænāni nāni nē waa adāni inte Wængonguī ingante guiñente quëwënāni

iñōnānite tōmënāni tönō onguīñænāni māniñōmō quëwënāni awënëidi bai inte ñænænāni iñōnānite oodeoidi, Bado-gaa, ante nanguī ānāni ëñënanitapa. Oodeoidi nanguī ānāni ëñente cædinque māniñāni wæætē Pabodo tönō Bedënabee inate togænte pāninque, Mōnitō omæ quëwënāmaī, ante wido cædāni godatapa.

⁵¹ Mānōmaī cædāni godinque tōmēna iñōmō, Mānimæ nāwate awædō, ante bai cædinque piwacæ piwacæ cædinque Icōnio iñōmō gocæte ante wadæ godatapa. ⁵² Itota ingante nē tee empote quëwënāni guiquënë watapæ todāni badinque Wængonguī Tæiyæ Waëmō Önōwoca ingante ænte ëwocadinque edæ waa quëwengadānīmpa.

14

Pabodo tönō Bedënabee Icōnio iñōmō godapa

¹ Māniī godinque Icōnio nāni quëwëñōmō pōninque Pabodo tönō Bedënabee cōwē nāna cæī bai cædinque oodeoidi odōmōincōnē go guīdatapa. Go guīte apæneyōna, Nō apæneda, ante pönëninque oodeoidi tönō oodeoidi ināmaī ināni tönō nanguī ināni nāni wede pönenguīnque ëñënanitapa. ² Wæætē oodeoidi incæ pancadāniya nē Baa ānāni inte babæ wapiticæ apænedinque, İñāna nē wënæ wënæ apæneda inate wīi ëñengæimpa.

Ante tedewënāni ëñente wædinque wadāni oodeoidi ināmaī ināni wæætē piinte badinque mōnō tōniñada inate ante wīwa adānitapa. ³ Incæte iñāna wantæpiyæ māniñōmō quëwëninque guiñenedāmaī inte mōnō Awënë beyæ apænedatapa. Apæneyōna mōnō Awënë incæ, Pabodo tönō Bedënabee iñōmō botō pönō waadete cægainō ante nē nō apæneda inōnāpa, ante wadāni pōnencædānīmpa, ante cædinque tōmēna tönō godongāmæ cæcā ate tōmēna, Ate pōnencædānīmpa, ante mā cædinque bamōnengæ cædatapa.

⁴ Mānōmaī cæda incæte māniñōmō quëwënāni pancadāniya, Oodeoidi bai pōnëmōnīpa, āñōnānite wadāni guiquënë, Itota da godongā nē pōna bai pōnëmōnīpa, ante pancadāniya wadō pancadāniya wadō cædānitapa. ⁵ İninque oodeoidi tönō oodeoidi ināmaī ināni tönō tōmënāni awënëidi

tönō godongāmæ pönëninque, Pabodo tönō Bedënabee inate mönō piinte cædinque dicaca tacamō wæncædaimpa. ⁶ Ante Ao ante cæyönāni Pabodo tönō Bedënabee iñömō, Mänōmaī ante cædānīpa, ante eñente wædinque wodii wīnōnatapa. Wodii wīnonte godinque Dicaōniabæ pōninque tōmēna Ditada nāni quēwēñōmō Dedebe nāni quēwēñōmō wayōmō wayōmō godinque, ⁷ mönō Awēnē ingantedō ante watapæ mǎo godōmenque apæneda eñēnōnānīpa.

Ditada iñömō Pabodo ingante tacadānīpa

⁸ Māniñōmō Ditada iñömō edæ wacā cabæwaingā tōmengā önōwa tipæwaa wēnæ wēnæ ēwacā eñagāingā inte dao dao godāmaingā pægaingā inte tæ contate a ongongantapa. ⁹ A ongōñongā Pabodo ponte apænecā eñēe congantapa. Pabodo wææmō adinque önōwēnenque pönëninque, ĩngā nānō waa bawāquinque nē pönengā ingampa, ante do pōnente wædinque, ¹⁰ tōmengā ingante ogæ tedete,

—Ængæ gantidinque adiyæ gongæmi āmopa.

Angā eñëninque nē cabæwaingā incæ quingæ ængæ gantidinque dao dao go-cantapa. ¹¹ Māniñōmō ongōnāni guiquēnē Pabodo mǎnōmaī cæcā ate wædinque dicaōniaidi tōmēnāni tededō yedæ āninque,

—Īñāna iñömō wængonguīna incæ waoda baī bate mönō weca wæænte ongōna abaimpa.

¹² Ante pōnente wædinque Bedënabee ingantedō ante apænedinque, Mönō wængonguī Deoto ingānō anguēnē, ante Deoto pōnō pemōninque, ĩngā wæætē nē apænecā ingampa, ante pönëninque Pabodo ingante, Mönō wængonguī Edēme ingānō anguēnē, ante pemōnānitapa. ¹³ Ayæ tōmēnāni quēwēñōmō yæcado tōmēnāni wængonguī Deoto oncō mænonte ongōnīmpa. Deoto quī, ante nē godongā iñömō edæ, Pabodo tönō Bedënabee nē wængonguīna ĩnāpa, ante wapiticæ pönëninque, Mönō wængonguīna quī, ante tōmānāni tönō godoncæ cæcantapa. Mǎnōmaīnō ante cædinque tōmengā nāni que cædi ongai ænte pōninque wagadaidi onguīñænāni ĩnānite yabædemō ænte ponte wænoncæ cæcantapa. ¹⁴ Mǎnōmaī cæcā ate

wædinque nē ponte apæneda Bedënabee tönō Pabodo iñömō, Wiwa cæmīnīpa, ante baī cædinque nāmā weocoo wānā ñæninque pogodo māmō nanguī ongōnāni weca tæcæguedē næ gongæninque,

¹⁵ —Īñānāni, quīmæ quēwēmīnīi. Mīnitō waomīni ĩmīnīpa, mönatō mīnitō baī adobaī waomōna ĩmōna apa quēwēmīnīi. Mönatō iñæmpa watapæ mōna eñēnō ante apænecæte ante pōnimōna inte mīnitō ĩmīnite ĩmaī ante āmōnāpa. ĩncoo mīni waa adincoo incæ edæ, Önoncooque ĩmpa, ante adinque mīnitō mānincooque wido cædinque Wængonguī nē Quēwengā gāmænō pōedāni. Tōmengā iñömō öönæ ĩngui-poga gāwapæntibæ nē badongaingā inte öönædē quēwēnāni tōmānāni ĩngui-poga quēwēnāni tōmānāni gāwapāa quēwēnāni tōmānāni ĩnānite nē badongaingā Wængonguī ĩnongā ingampa. ¹⁶ Tōmengā wēenēñedē tōmāmæ quēwēnāni nāmā pönëninque nāni go-quīnonque ee acā gogadānīmpa. ¹⁷ Incæte tōmēnāni ĩnānite wīi æmæwo ēmō cæte gogacāimpa. Wæætē edæ, Wængonguī æbānō ingāā, ante eñencædānīmpa, ante cædinque tōmengā ñimpo cædāmaī cōwē odōmongacāimpa. Edæ mīnitō ĩmīnite pōnō waadete cædinque Wængonguī cōönæ angā ĩngui-poga wææ ĩninque incadepo incadepo cænguī eyepæ pōnongā cæninque mīnitō watapæ todinque quēwēmīnīpa.

¹⁸ Mǎnōmaīnō ante Pabodo tönō Bedënabee wææ cæcæte ante apæneda eñēnāni incæte godongāmæ ongōnāni guiquēnē, Mīnatō wængonguīmīna quī, ante cōwē pōnoncæmōnīmpa, ante wawīque pönëninque cædānitapa. Wodo edæ pōnōñōnānite ĩñāna godōmenque wææ āna eñëninque ñimpo cæte wīi pōnōnānitapa.

¹⁹ Ayæ ate oodeoidi Antioquiya iñömō quēwēninque Icōnio iñömō quēwēninque pō Ditada iñömō pōninque māniñōmō godongāmæ ongōnāni ĩnānite, ĩñā onguīñænāna inate mönō wīi eñengæimpa, ante ānāni. Eñëninque godongāmæ Ao āninque Pabodo ingante dicaca tacadāni wæyongā, Æmæwo wængampa, ante pönëninque tōmēnāni nāni quēwēñōmō yabæ ĩnō wēā mǎo wido cædānitapa. ²⁰ Incæte Itota ingante tee empote

quēwēnāni godongāmæ ponte æænīmæ gongænte ayōnāni Pabodo yabæque æmæwo wænte bai ōñōningā inte ængæ gantidīnque adodō tōmēnāni quēwēñōmō pongantapa. Ayæ iīmō ate tōmengā Bedēnabee tōnō wæætē Dedebe nāni quēwēñōmō adodō gocæte ante wadæ godatapa.

²¹ Godinque Dedebe iñōmō pōninque Codito ingantedō ante watapæ apæneda ēñēninque tōmēnāni nanguī ināni Itota miñæ quēwēnāni bagadānimpa. Iñinque tōmēna māniñōmō idæwaa apænete wadæ godinque Ditada iñōmō adodō pō godinque Icōnio iñōmō adodō pō godinque Antioquiya nāni quēwēñōmō wæætē pōnatapa. ²² Mānōmaī wayōmō wayōmō godinque Itota ingante nē tee empote quēwēnāni inānite bee tēninque Pabodo tōnō Bedēnabee nanguī apæneda ēñēninque iñāni godōmenque tæi piñænte entawēnāni badānitapa. Ayæ tōmēnāni inānite, Mīni pōnēnō ante ñimpo cædāmaī inte godōmenque wede pōnēninque tæi ongoncæminimpa, ante ædæmō apæneda ēñēnānitapa. Ayæ waadete apænedinque, Mōnō nanguī nantate wædinque Wængonguī Awēnē Odeye nempo guicæimpa, ante apænedatapa. ²³ Ayæ wayōmō wayōmō tōmāo godinque Itota ingante godongāmæ nāni pōnencabo weca go guiite ongōninque Pabodo tōnō Bedēnabee iñōmō iīmaī cædatapa. Nē nō cædāni inānite adinque tōmēna, Itota Codito ingante mīni godongāmæ pōnencabo iñōmīnite iñānique edæ nē aadāni bacædānimpa, ante āna ate mānīnānique nē Picænāni nāni ānōnāni badānitapa. Ayæ cænāmaī inte Wængonguī ingante apænete ate tōmēnāni inānite iñāna, Mīnitō mōnō Awēnē ingante wede pōnēmīnitawoo. Tōmengā mīni nē pōnēnongā incæ mīnitō imīnite wææ aacæcāimpa, ante apænedatapa.

Tidiabæ Antioquiya iñōmō occæ emæente godapa

²⁴ Pabodo tōnō Bedēnabee ayæ Pitidiabæ wodo tebæ godinque Pampidiabæ pōnatapa. ²⁵ Māniñōmō ponte Pedegue nāni quēwēñōmō mōnō Awēnē nānō angaiñō ante apænedinque Ataya nāni quēwēñōmō

wææ pōnatapa. ²⁶ Māniñōmō pōninque tōmēna imæmāa Antioquiya iñōmō adodō tacæte ante ñænæ wipodē guiddatapa. Doyedē iñōmō tōmēna nāna māniñōmō quēwēnte tao goyedē wadāni nē pōnēnāni inte tōmēna inate, Wængonguī pōnō waadete godongāmæ cæcā ate mīnatō eyepæ cæcæmīnaimpa, ante da godongaiñāni inōnānimpa. Nōwo iñōmō tōmēnāni nāni ānīnō do iinque eyepæ cædīna inte tōmēna adoyōmō nāni da godiñōmō occæ emæente pōnatapa. ²⁷ Māniñōmō pōninque tōmēnā Itota ingante godongāmæ nāni pōnencabo inānite āñete pōnāni ate tōmēnāni inānite apænedinque Wængonguī tōmēna tōnō nānō cædīnō ante adodō adodō tōmānō ante apænedatapa. Oodeoidi ināmaī ināni wede pōnēninque guicædānimpa, ante Wængonguī odemō wi ænete bai cæcā ate do pōnente badānipa, ante apæneda ēñēnānitapa. ²⁸ Ayæ māniñōmō Itota ingate nē tee empote quēwēnāni tōnō wantæpiyæ quēwengadaimpa.

15

Eedotadēē iñōmō pōninque wæætēdō wæætē ānāni

¹ Māniñedē onguiñænāni Oodeabæ quēwēnāni pancadāniya Antioquiya iñōmō wææ pōninque nē pōnēnāni inānite iīmaī ante odōmonte wææ angadānimpa. Mīnitō bagāamīni inte Mōitee wodi nānō wææ angaiñō bai wīi cæmīni adinque Wængonguī dicæ ængampa quēwenguimīni. ² Ante wææ ānewēnāni ēñente wædinque Pabodo tōnō Bedēnabee iñōmō, Quimæ ānewēmīni, ante nāemæ wææ ānatapa. Iñinque Antioquiya iñōmō quēwēnāni guiquēnē Pabodo tōnō Bedēnabee tōnō wadāni nē pōnēnāni inānite, Mīnitō Eedotadēē godinque Itota nānō da godongaiñāni tōnō nē aadāni Picænāni inānite bee tēninque, Oodeabæ quēwēnāni nāni wææ ānōnō ante æbānō cæquiī, ante ēñencæte ante ædāni.

³ Āninque Itota Codito ingante godongāmæ nāni pōnencabo incæ Pabodoidi inānite da godōnāni wadæ godānitapa. Ayæ godinque Pēnitiabæ wodo tebæ godinque mānimæ quēwēnāni inānite apænedinque godōmenque Tāmadiabæ adobai wodo

tebæ gote apænedinque, Wængonguī pōnō cæcā ate oodeoidi ināmaī ināni incæ mōnō Awēnē gāmænō do pōnānīpa, ante Pabodoidi apænedāni. Eñēninque mōnō tōniñadāni mānīmæ quēwēnāni incæ watapæ todānitapa.

⁴ Pabodoidi Eedotadēē iñōmō pōnāni adinque Codito ingante nāni godongāmæ pōnencabo tōnō Itota nānō da godongaināni tōnō nē pōnēnāni inānite nē aadāni nē Picænāni tōnō godongāmæ ponte ongōninque Pabodoidi inānite, Waa pōmīni amōnīpa. Ante añōnānite Pabodo tōnō Bedēnabee iñōmō, Wængonguī iīmaī mōnatō tōnō godongāmæ cæcampa, ante tōmānō ante adodō adodō apænedā eñēnānitapa. ⁵ Māniñedē Paditeoidi incæ pancadāniya nē pōnēnāni badīnāni inte ængæ gantidinque iīmaī ante apænedānitapa.

—Iñæmpa oodeoidi ināmaī ināni inānite, Cōwē ēō togænguēnēmīni imīnīpa, ante mōnō wææ angæimpa. Ayæ Mōitee wodi, iīmaī cædāni, ante nānō angainō ante eñēnguēnēmīni imīnīpa, ante mōnō cōwē angæimpa.

⁶ Anāni ate Itota nānō da godongaināni tōnō nē pōnēnāni inānite nē aadāni Picænāni tōnō godongāmæ pōninque, Oodeoidi ināmaī ināni inānite mōnō æbānō anguīi, ante tedecōnānitapa. ⁷ Mānīnō ante wæætedō wææte apænedāni adinque Pegodo guiquēnē ængæ gantidinque godongāmæ ongōnāni inānite iīmaī ante apænecantapa.

—Botō mēmōidi, mīnitō iīmainō ante do eñēmīnīpa. Wængonguī do inōñedē, Oodeoidi ināmaī ināni incæ Codito ingantedō ante watapæ eñēninque edæ nē pōnēnāni bacædānīmpa, ante cædinque mōnō imonte apænte ænīnque botō imote angā gote mānīnō ante apænebo eñēnānitapa. ⁸ Da godongā gote apæneyōmo Wængonguī, Waocā æbānō mīmōno pōnengā ingāā, ante nē eñēnongā inte edæ tōmengā Tæiyæ Waēmō Onōwoca ingante oodeoidi ināmaī ināni inānite da pōnongā ænte ēwocadānīpa. Inīnque mōnō imonte pōnō cæcā baī tōmēnāni inānite adobaī cædinque tōmengā edæ, Oodeoidi ināmaī ināni inānite botō Ao ante do æmōpa, ante

odōmongā abaimpa. ⁹ Tōmēnāni wede nāni pōnēnō beyænque Wængonguī tōmēnāni mīmō ñā mēnongadinque, Oodeoidi ināmaī ināni incæ mīnitō baī adobaī ināni apa ānewēmīnīi, angampa. ¹⁰ Mōnō iñōmō mōnō mæmæidi tōnō teēmē mongænte baī wædinque edæ, Mōitee wodi nānō wææ angainō ante mōnō ædō cæte eñēnte cæquīi, ante godongāmæ wægamōimpa. Nōwo guiquēnē Oodeoidi ināmaī ināni incæ tæcæ pōnēñōnānite mīnitō iñōmō teēmē cōnōnāncapænte baī cædinque tōmēnāni inānite, Cædāni, ante wææ āmīnīpa tōō. Mānōmaī cædinque mīnitō, Wængonguī ōnonque cæcampa, ante baī cæmīnīpa tōō. ¹¹ Iñæmpa mōnō Awēnē Itota pōnō waadete ængā beyænque tōmēnāni wænāmaī inte quēwēnāni baī mōnō adobaī mānīnō beyænque wænāmaī inte quēwēmōmpa, ante pōnēmōnīpa. Mānōmainō ante Pegodo iīnque apænecā eñēnānitapa.

¹² Ayæ Bedēnabee tōnō Pabodo wææte tōmēnāni inānite apænedā eñēninque godongāmæ ongōnāni tōmānāni edæ tededāmaī inte eñēē cōnānitapa. Tōmēna iñōmō, Wængonguī mōnatō tōnō godongāmæ cædinque edæ, Mīnatō mā cæmīna adinque Oodeoidi ināmaī ināni incæ pōnencædānīmpa, ante cædinque bamōnengæ wææte wææte cæcantapa, ante adodō adodō ante apænedatapa. ¹³ Inīnque apænedā ate Tantiago wææte tōmangā apænecantapa.

—Botō biwīidi, botō ñōwo apænebo eñēdāni. ¹⁴ Wængonguī tāno waadete pōnō cædinque oodeoidi ināmaī ināni pancadāniya inānite apænte ænīnque, Botō quīmīni bacæmīnīmpa, ante cæcantapa, ante Timōnō do apænecā eñēntamōmpa. ¹⁵ Ayæ Wængonguī beyæ nē apænegaināni incæ, Iīncayæ ate Wængonguī mānōmaī cæcæcāimpa, ante pōnēninque adoyōmō ante iīmainō ante do yewæmongadānīmpa. ¹⁶ “Awēnē Dabii nempo nē quēwengaināni nāwæ godāni adinque botō iñōmō oncō wodintai wææte tæi mænōnte baī cædinque, iīncayæ ate adodō pōninque pōnō cæbo ate nāwæ gogaināni iñōmō Awēnē nempo adodō pōninque quēwencædānīmpa.

17 Mānōmaī cæbo ate edæ wadāni tōmāmæ quēwēninque oodeoidi ināmaī ināni incæ botō emōwo ante nē ewocadāni inte nāwā Awēnē ingante ante diqui diqui minte acædānimpa,

18 ante mōnō Awēnē iñōmō edæ māninō ante nē cægaingā inongā inte, do cæcā nāni eñengainō ante apænecampa.”

19 Ante yewæmongatimpa, ante Tantiago godōmenque apænecantapa. “Botō Wængonguī nānō apænegaīnō ante pōnente wædinque, Īimaī cæcæimpa, ante pōnēropa. Oodeoidi ināmaī ināni, Idæwaa wapiticæ pōnente awædō, ante wædinque ocæ emænte nāwā Wængonguī gāmænō pōñōnānite mōnō edæ ee cædinque tōmēnāni taadō ganta cædedāmaī ingæimpa. 20 Ōnonque, Tōmēnāni acædānimpa, ante Īimaī ante yewæmongæimpa, Wadāni, Wængonguīdi quī, ante cænguī nāni cōnōnī cænāmaī incæminimpa. Ayæ nānōogængā ināmaī iñongante godō mōnāmaī incæminimpa. Ōōingā ñē wēmencate wæningā ate cænāmaī incæminimpa. Baō wepæ owemōingā i adinque cænāmaī incæminimpa, ante mōnō yewæmongæimpa, amopa. 21 Edæ doyedē pōnī oodeoidi nāni quēwēñōmō nāni quēwēñōmō tōmāā iñōmō māo Mōitee wodi nānō wææ angainō ante apænedāni eñengadānimpa. Ayæ ñōwo ganca adobainō ante guēmanguīōnæ iñō guēmanguīōnæ iñō mōnō odōmōincōnē go guīte apænedāni eñente mānōmainō ante eñente cæquēnēnāni inānipa. Māninonque ante mōnō yewæmongæimpa, amopa,” ante Tantiago ĩinque apænecantapa.

Oodeoidi ināmaī ināni acædānimpa, ante yewæmōnānipa

22 Mānōmainō ante apænecā eñēninque Itota nānō da godongaināni tōnō nē aadāni Picænāni tōnō Itota Codito ingante godongāmæ nāni pōnencabo tōmancabo tōnō godongāmæ pōnēninque, Mōnō cabo incæ mēnaa inate apænte æninque tōmēna inate, Mīnatō Pabodo tōnō Bedēnabee mīñæ Antioquiya goeda, amō gocædaimpa. Ante Ao āninque tōmēnāni, Mōnō pōnencabo iñōmonte Codaa Badatabato mōnō ānongā

tōnō Tidato iñōmō nē āna inapa, ante adinque tōmēna inate apænte ænānitapa. 23 Ayæ, Cadota ante ænte gocædānimpa, ante Īimaī ante yewæmongadānimpa.

Mōnitō pancamōniya Itota nānō da godongaīmōni iñōmōni pancamōniya nē pōnēnāni inānite nē aamōni Picæmōni imōnipa. Mānōmaī imōni inte mōnitō mīnitō tōñiñamōni imōnipa. Mīnitō oodeoidi ināmaī imīni inte Antioquiya iñōmō Tidiabæ iñōmō Tiditiabæ iñōmō quēwēninque mīni pōnencabo mīni pōnencabo iñōmīnite mōnitō, Waa quēwencæminimpa, amōnipa.

24 Īimaī ante tededāni eñentamōnipa. Mōnitō, Goedāni, ānāmaī iñōmōni wadāni mōni cabo incæ pancadāniya wadæ gote mīnitō weca pōninque mīnitō imīnite, Eō togæedāni, ante wææ ānāni. Eñēninque mīnitō tōmēnāni nāni wææ ānīnō beyænque teēmē mongænte baī, Æbānō cæquī, ante wæminipa, ante tededāni eñēmōnipa. 25 Mānōmainō ante tededāni eñente wædinque mōnitō godongāmæ pōnēninque onguīñæna mēnaa inate apænte æninque tōmēna inate Īimaī antamōnipa. Mīnatō Bedēnabee tōnō Pabodo mōnō nē waadeda tōnō godongāmæ godinque oodeoidi ināmaī ināni weca goeda, ante cætāmōnipa. 26 Bedēnabee tōnō Pabodo iñōmō mōnō Awēnē Itota Codito emōwo beyænque cædinque nāna nāmā wodo wænguinque cædatapa. 27 Īinque, Īi cadota mōni yewæmōnō nāwangā impa, ante adodō ante apænecædaimpa, ante cædinque mōnitō Codaa tōnō Tidato inate da godōmōni godinque mīnitō weca pōna aedāni. 28 Edæ, mōnitō Wængonguī Tæiyæ Waēmō Ōnōwoca tōnō godongāmæ pōnēninque, Mīnitō godōmenque teēmē mongænāmaī incæminimpa, antamōnipa. Īinque, Mīnitō Īimaī cædinque idæwaa, ante pōnēmōnipa.

29 Wadāni, Wængonguīdi quī, ante cænguī nāni cōnōnincoo ante cænāmaī gomō aedāni. Wepæ owemōingā adinque oōingā ñē wēmencate wæningā adinque cænāmaī iedāni. Ayæ nānōogængā ināmaī iñongante godō mōnāmaī iedāni.

Mīnitō mānīnque ante ee ate cædāmaī
īmīni īnīnque waa quēwēmaīmīnīpa.
Mānīnque ante yewæmōmōnīpa.

³⁰ Ante yewæmōnte pædæ pōnōnāni
ænte wadæ godīnque Antioquiya īñōmō
wæīdīnque nē pōnēnāni īnānīte añete
godongāmæ pōnāni ate Eedotadēē
quēwēnte pōnāni tōmēnāni nāni yewæmōnīnta
pædæ pōnōnāni ænte adānītapa. ³¹ Eedotadēē
quēwēnāni, Mīnitō godōmenque teēmē
mongænāmaī incæmīnīmpa, ante nāni
yewæmōnte ānīnō adīnque oodeoidi
īnāmaī īnāni īñōmō wampo pōnīnque
todānītapa. ³² Codaa tōnō Tidato īñōmō
Wængonguī beyæ nē apænedā inte adobaī,
Tæī pīñænte entawencæmīnīmpa, ante
cædīnque ædæmō apænedā ēñēnīnque
tōmēnāni nāni pōnencabo mīmōnē gancæ
batawente wede pōnēnānītapa. ³³ Īnīnque
tæōnæ quēwēna ate mānīñōmō quēwēnāni
nāni pōnencabo wæætē tōmēna īnate waa
apænedīnque, Ñōwo gānē pōnēnīnque waa
goeda, ante tōmēna īnate nē da pōnōnāni
weca wæætē adodō da godōnāni godatapa.
³⁴ Tidato guīquēnē, Īñōmō ongoncæboīmpa,
ante ayæ ongongantapa. ³⁵ Pabodo tōnō
Bedēnabee guīquēnē Antioquiya īñōmō
ayæ quēwēnīnque wadāni nangūī īnāni tōnō
godongāmæ odōmōnīnque Wængonguī nānō
ānō ante watapæ apænedā ēñēngadānīmpa.

Pabodo ingante wæætē da godōnāni go- campa

³⁶ Īncayæ ate Bedēnabee ingante Pabodo,
—Wēēnēñedē Wængonguī nānō ānō
ante mōna gote apænedīñōmō wæætē
adoyōmō gote mōnatō tōnīñadāni weca
gote ēñadīnque, Æbānō quēwēnānīi, ante
acæmōnāīmpa.

³⁷ Āñongā Bedēnabee Ao angantapa. Ayæ
tōmengā, Wāō Māadoco nāni ānongā ingante
mōnatō tōnō godongāmæ gocæcāīmpa,
ante cæcantapa. ³⁸ Pabodo guīquēnē,
Īñæmpa wēēnēñedē Pampidiabæ īñōmō
pōñōmōnate īngā Māadoco īñōmō mōnatō
tōnō godōmenque cædāmaī inte edæ
wadæ gocantapa, ānīnque, Ñōwo wīī
ænte gocæīmpa, ante Baa angantapa.

³⁹ Īnīnque tōmēna wæætēdō wæætē

ānīnque tōmēna wadō wadō gote pan-
guīmæ godatapa. Bedēnabee guīquēnē
Māadoco ingante ænte ñænæ gāwapāa
gote wīpodē ñænæmpodē guīte wogaa
godīnque wāā tēīwænē Tipidebæ tao
gocantapa. ⁴⁰ Pabodo guīquēnē Tidato
ingante apænte ænte gocæ cæyongante
tōmēnāni nāni pōnencabo īñōmō tōmēna
īnate apænedīnque, Wængonguī mīnatō
beyæ pōnō waadete cæcæcāīmpa, ānāni
ēñēnīnque wadæ godatapa. ⁴¹ Ayæ Tidiabæ
tōmāo godīnque Tiditiabæ tōmāo god-
īnque Pabodo īñōmō Codito ingante nāni
godongāmæ pōnencabo īnānīte apænecā
ēñēnīnque tōmēnāni wede pōnēnīnque tæī
pīñænte batawengadānīmpa.

16

Pabodo tōnō Tidato mīñæ Tīmoteo go- campa

¹ Mānīī godīnque Pabodo Dedebe īñōmō
ponganque go Ditada īñōmō pongantapa.
Itota ingante tee empote nē gocā Tīmoteo
mānīñōmō quēwengacāīmpa. Tōmengā
wāānā oodea īnōna incæ nē ædæmō cæte
pōnēnā īnōnāīmpa. Tīmoteo mæmpo wæætē
guidiego īnongāīmpa. ² Tīmoteo īñōmō Itota
ingante pōnente quēwengā adīnque nē
pōnēnāni Ditada īñōmō quēwēnāni incæ
Icōnio īñōmō quēwēnāni incæ, Tīmoteo nē
waa quēwēnongā īngampa, ante adoyōmō
apænedānītapa. ³ Īnīnque Pabodo, Botō
tōnō Tīmoteo guēa gocæcāīmpa, angantapa.
Wæætē, Oodeoidi mānīmæ quēwēnāni
tōmānāni, Tīmoteo mæmpo guidiego
īngampa, ante do ēñēnāni inte pīnāni
wæcæ wæ. Ānīnque Pabodo angā yæcadogæ
ēō togænāni ate Tīmoteo ingante ænte
gocantapa. ⁴ Godīnque Pabodoidi wayōmō
nāni quēwēñōmō wayōmō nāni quēwēñōmō
godīnque īīmaī ante apænedānītapa. Mīnitō
oodeoidi īnāmaī īmīni inte æbānō ēñente
cæte quēwenguīmīnīi, ante Eedotadēē
īñōmō nē aadāni Picænāni tōnō Itota
nānō da godongānāni tōnō godongāmæ
pōnēnīnque do ānānīpa. Ante apænedīnque
Pabodoidi wæætē tōmēnāni nāni ānīnō
ante adodō ante apænedāni ēñēnānītapa.
⁵ Mānōmaī apænedāni ēñente wædīnque
Codito ingante nāni godongāmæ pōnencabo
īñōmō wayōmō nāni cabo wayōmō nāni

cabo tōmānāni wede pōnēninque edæ tæi pīñænte badinque iīmō iñō godōmenque iīmō iñō godōmenque nanguī yebænte bagadānīpa.

Māatedōniabæ quēwengā ingante Pabodo wīimonte acā

⁶ Pabodoidi Atiabæ gocæ cæyōnānīte Wængonguī Tæiyæ Waēmō Ōnōwoca iīmaī ante apænecantapa. Mīnitō botō ānō ante mānīmæ apænecæ godāmaī incæmīnīpa, ante wææ angā ēñente wædinque tōmēnāni wæætē Gadatiabæ incæ pancabaa Pidiquiabæ tōmāo cægōnīnque godānitapa. ⁷ Mānīmæ cægōnaque go Mīitiyabæ ganca pōnīnque Bitīniabæ gocæ cæyōnānīte Itota Tæiyæ Waēmō Ōnōwoca incæ, Godāmaī, Baa angā wædinque tōmēnāni māniñōmō ñimpo cæte godōmenque godāmaī inānitapa. ⁸ Mānōmaī beyæ tōmēnāni Mīitiyabæ wodo pænta go Todoa iñōmō wæi godānitapa.

⁹ Māniñōmō wæi gote ongōnīnque woyowotæ ba ate Pabodo wīimonte bai ayongā Māatedōniabæ onguīñængā a ongōnīnque tōmengā ingante iīmaī ante apænecantapa. “Māatedōniabæ pōnīnque bitō mōnitō imōnīte pōnō cæquīmi āmōnīpa,” ante Pabodo ingante angā ēñengantapa. ¹⁰ Inīnque Pabodo, Mānōmaī wīimonte bai atabopa, ante apænecā ēñente wædinque mōnitō wæætē, Mīnitō Māatedōniabæ gote māo apænemīni ēñencædānīpa, ante Wængonguī incæ cæbaingampa. Ante pōnente wædinque botō Odocabo tōnō wadāni Pabodo tōnō nē godongāmæ cædāni tōnō wæætē, Mōnō māniñōmō gote Codito ingantedō ante watapæ apænecæīmpa, ante pōnēninque gocæte ante cætāmōnīpa.

Pabodo tōnō Tidato Pidipoto iñōmō ponte cædapa

¹¹ Mānōmaīnō ante pōnēmōni inte mōnitō Todoa iñōmō gāwapæ wedeca quēwēninque ñænæ wipodē guiite wogaa tao godīnque wāā tēiwænē Tāmotadate tōingā gote mōnīnque iīmō ate tao Nēapodi pontāmōnīpa. ¹² Māniñōmō pō ti wææninque taadonque godīnque mōnitō Pidipoto odōmānoidi nāni ponte quēwēñōmō adoyōmō pōnīnque tæōnæ

quēwentāmōnīpa. Māatedōniabæ incæ pancabaa quēwēnāni nāni yæcado quēwēñōmō Pidipoto impa. ¹³ Mōnitō māniñōmō ponte quēwēninque guēmanguīōnæ iīnque bayonte tōmēnāni nāni quēwēñōmō yabædemō tao godīnque, Ōnō wedeca Wængonguī ingante godongāmæ apænebainānīpa, ante ōnōwēnenque pōnēninque māniñōmō gotāmōnīpa. Māniñōmō ponte ayōmōni onquiyænāni do godongāmæ ponte a ongōnāni adīnque mōnitō tæ contadīnque tōmēnāni inānīte apænetāmōnīpa. ¹⁴ Māniñōmō nē ēñēnāni tōnō adodanque tōmēnā emōwo Didia iñōmō Tiatida quēwēnōnā inte weocoo awēnēidi nāni opatawæ ēmoncoo godonte ænte quēwēnōnāīmpa. Tōmēnā Wængonguī ingante nē waa ate pōnēnā inonāīmpa. Inīnque Pabodo apænecā ēamonca ongote ēñēñōnante mōnō Awēnē tōmēnā mīmō wi ænete bai cæcā ate tōmēnā wede pōnēnantapa. ¹⁵ Inīnque tōmēnā nāni owocabo pōnēninque godongāmæ æpænē guīdāni ate tōmēnā iñōmō mōnitō imōnīte apænedantapa.

—Botō imote ante adīnque mīnitō, Mōnō Awēnē ingante Didia ædæmō cæte pōnengā ingampa, ante pōnēmīnitawoo. Mānōmaīnō ante pōnēmīni inte mīnitō botō oncōnē ponte owoedāni, āmopa.

Ante ancaa apænedā ēñente wædinque mōnitō Ao ante gote owotāmōnīpa.

¹⁶ Māniñedē wacā onquiyængā obe badā inongā inte wadāni nempo quēwēninque tōmēnāni beyænque nē cæte quēwengā inongāīmpa. Tōmengā iñōmō nē cæwēnengā inte wadāni inānīte, Inīcayæ ate æbānō baquīi, ante yewænte tedecā inongāīmpa. Tedecā ēñēninque nē ēñēnāni wæætē tōmēnāni nāni godonte æīnta bacoo pædæ pōnō pædæ pōnō cædāni incæte tōmengā awēnēidi wæætē ō æ ō æ cædōnānīpa. Inīnque māniñōmō quēwēninque mōnitō ayæ ate Wængonguī ingante nāni apæneiñōmō adodō gocæ cæyōmōnīte māningā onquiyængā māmō bee tengantapa. ¹⁷ Mānōmaī bee tēnīnque tōmengā mōnitō Pabodo tōnō mōni gocabo iñōmōnīte tee empo tee empo pōnīnque yedæ angantapa.

—Īināni Wængonguī Æibæ pōni Quēwengā ingante nē cædāni inte mīnitō imīnite apænedinque, Æcānō ængā beyænque quēwenguī, ante apænedānīpa.

18 Āninque tæōnæ iñonte tōmengā tōmēnāni inānite tee empote godinque Yæ yæ ānewengā ēñente wædinque Pabodo, Ancaa ēñente awædō, ante dadi ēmænte wēnæ ingante āninque,

—Bitō ĩmite botō Itota Codito ěmōwo apænedinque, Tao gobāwe, āmopa.

Ante tæcæ apæneyongā wēnæ incæ baquecā ingante ěmō cæte tao gocantapa.

19 Pabodo mǎnōmaī angā ate tao go ate wædinque onquiyængā awēnēidi guiquēnē, Æ tōmengā yewængā beyæ mōnō æincædō incæ dæ gotimpa. Nōwo æbānō cæte nanguī ænguīmōō. Ante piinte wædinque tōmēnāni, Mōnō tōmēna ĩnate odōmāno awēnēidi weca ænte gocæimpa, ante Pabodo tōnō Tidato ĩnate bæi ongonte wēā mǎo tōmēnāni nāni godonte æiñōmō ænte godānitapa. 20 Ayæ odōmāno awēnēna tōmēnāni quēwēñōmō nē apænte āna iñōnate nē piinte cædāni mǎnīna awēnēna weca Pabododa ĩnate ænte mǎmō gō cædinque,

—Īina iñōmō edæ oodeoda ĩnōna inte mōnitō quēwēñōmō ponte wēnæ wēnæ apæneda ēñēninque tōmānāni ænguī badinque Yæ yæ ānānīpa. 21 Mōnō odōmānocabo mōnō wīi cæquēnēnō ante odōmonte apænedinque tōmēna iñōmō, Mǎnīnonque cædāni, ante ancaa ānewēnāpa.

22 Ante tæcæ apæneyōnāni godongāmæ ongōnāni iñacabo cædinque Pabodo tōnō Tidato ĩnate piinte cædānitapa. Ayæ odōmāno awēnēna iñōmō, Tōmēna weooco gā tadongate tæi tæi pædāni. 23 Āna ēñente tæi tæi pānāni wæyōnate awēnēna godōmenque āna ēñente cædinque tōmēna ĩnate bæi ongonte mǎo tee mōnedinque tee mōneincō nē aacā ingante, Īina ĩnate bitō ædæmō wææ ae, ānatapa. 24 Īinque mǎnōmaī ānāni ēñente wædinque nē wææ wānongā wæætē Pabodo tōnō Tidato ĩnate guimongacōnē manguiçā guiidatapa. Ayæ godōmenque tōmēna ōnōwa awæmpaa goti guidōwate tæi tee mōnecā ongōñōna wadæ taocantapa.

25 Ayaōnænēña bayō Pabodo tōnō Tidato mǎnōmaī goti guidōwate wægōninque Wængonguī ingante apænedinque āmotamīni ānecōñōnate wadāni nē tee mōnete ongōnāni ēñēē cōnānitapa. 26 Īñontobæ goinque nanguī ocæ ocæ pōninque tee mōneincō tæñōninca incæ wançæ wançæ cæyō odemō tōmānemō wi æmænete gotapa. Ayæ tōmānāni inānite nāni tæi pōni yaēmengō nāni ñāni ñænīmē incæ ñīmæncæ ñīmæncæ wææntapa. 27 Tee mōneincō nē aacā guiquēnē iñontobæ ñāni ōmæmonte ayongā, Odemō dobæ wi æmænete gotimpa, ante wædinque tōmengā, Æ tee mōnete ongōnīnāni dobæ tao wodii winōnānīpa, ante pōnente wædinque, Botō awēnēidi piinte pānāni wænguī wæ, ante pōnēninque nāmā wænonte wæncæte ante yaēmē o togænte ængā. 28 Ate wædinque Pabodo iñontobæ ogæ tededinque,

—Nāmā wēnæ wēnæ cædāmāi. Ee ae. Tōmāmōni ayæ ongōmōni apa quēwēē.

29 Angā ēñēninque nē wææ wānongā iñōmō edæ, Tica wodōnoī ænte pōedāni, angā ænte pōnāni æninque tōmengā pogodo pōninque ançai guīñente wædinque do do wāate wædinque Pabodo tōnō Tidato ōnōwa ĩnō wæængantapa. 30 Ayæ ængæ gantidinque edæ tōmēna ĩnate oncodo ænte māocā tayōnate,

—Mīnatō nē āmīna inte apænemīna ēñēmoeda. Botō æbānō cæte quēwenguīmoō, ante wæcā.

31 Ēñēninque tōmēna wæætē,

—Awēnē Itota ingante edæ wede pōnēmi ate tōmengā ængā beyænque quēwencæbiimpa. Mīni owocabo tōmāmīni adobaī wede pōnente quēwencæmīnīmpa, ānatapa.

32 Āninque tōmēna nē wææ wānongā ingante godōmenque Wængonguī Awēnē nānō apænegainō ante apænedinque tōmengā oncōnē nāni owocabo tōmānāni inānite apæneda ēñēnānitapa. 33 Ayæ woyowotæ incæ tōmēna ĩnate æninque nē wææ wānongā iñōmō tōmēna ĩnate tæi tæi pānāni nāna æbāate wædiñōmō ñā mēnongacantapa. Ayæ tōmengā nāni wencabo do æpænē guiidānitapa. 34 Ayæ tōmengā oncōnē ænte mængā ææ guiyōna tōmēna ĩnate cænguī godongā cænatapa.

Ayæ tōmengā nāni wencabo nē Wængonguī ingante pōnēnāni badināni inte watapæ todānitapa.

³⁵ Baānæ ate odōmāno awēnēna guiquēnē poditiyaidi inānite nē wææ wānongā weca da godōninque, Pabodo tōnō Tidato inate nīmpo cæbi gocædaimpa, āmini ēñengæda, angā ēñēninque godānitapa. ³⁶ Ponte odōmāno awēnēna ēmōwo ante apænedāni ēñēninque nē wææ wānongā wæætē Pabodo ingante apænedinque,

—Poditiyaidi nōwo ponte apænedinque, Pabodo tōnō Tidato inate nīmpo cæbi gocædaimpa, ante odōmāno awēnēna ānapa, ante apænedānīpa. Inique mīnatō nōwo taote godinque piyænē cæte ee goeda.

³⁷ Angā ēñēninque Pabodo wæætē poditiyaidi inānite apænedinque,

—Mōnatō odōmānomōna imōna incæte nē apænte āna weca apænedāmaī iñōmōnate tōmēna āna tōmānāni ayōnāni edæ mōnatō imōnate tæi tæi pāninque tee mōnedānitapa tōō. Tee mōnedāni wæyōmōna nōwo wæætē mōnatō imōnate awēmō wido cæcæte ante cædānīpa tōō. Mōnatō iñæmpa edæ Baa āmōnapa. Awēnēna incæ iñōmō pōninque mōnatō imōnate ænte māoda gocæmōnaimpa.

³⁸ Mānōmaīnō ante apænecā ēñente wædinque poditiyaidi tōmēnāni awēnēna weca adodō godinque Pabodo nānō apænedō ante adodō ante apænedānitapa. Ayæ, Pabodo tōnō Tidato odōmānoda inapa, ante apænedāni ēñēninque odōmāno awēnēna guiquēnē guīñente wædatapa. ³⁹ Ayæ guīñente wædinque awēnēna incæ Pabodo tōnō Tidato weca ponte waadete apænedinque, Mōnatō oda cædinō ante mīnatō odōmānomīna imīna inte piinte ānāmaī ieda, ante āninque Pabodo tōnō Tidato inate ænte māoda taoda adinque tōmēna inate, Nōwo mōnitō quēwēñōmō ēmō cæte wadæ goeda, āmōnapa. ⁴⁰ Āna ēñente taodinque onquiyænā Didia oncōnē go guīdinque Pabodo tōnō Tidato iñōmō, Nē pōnēnāni wampo pōnēninque tæi ongoncædānīmpa, ante cædinque ædæmō apænedinque wadæ gogadaimpa.

17

Tetadōnica iñōmō quēwēnāni Yæ yæ ānānīpa

¹ Mānīi godinque Pabodo tōnō Tidato Ampipodi nāni quēwēñōmō wodo tebæ godaque go Apodōnia nāni quēwēñōmō wodo tebæ godaque go Tetadōnica nāni quēwēñōmō pōnatapa. Māniñōmō oodeoidi Wængonguī apænecā nāni ēñente yewæmongainta ate odōmōincō nāni mænongaincō mæ ongō. ² Adinque Pabodo cōwē nānō cæi bai cædinque guēmanguīōnæ bayō guēmanguīōnæ bayō mēōnaa go adoōnæque iñonte tōmēnāni odōmōincōnē go guīdinque edæ Wængonguī angā ēñente nāni yewæmongaintaa ate adinque tōmēnāni inānite, Iīmaī impa quēwēmīni, ante nō apænecantapa. ³ Tōmēnāni inānite edonque apænedinque Pabodo, Wængonguī beyæ nē apænegāināni iīmaī ante do yewæmongadānīmpa, angantapa. Mōnō Codito iīncayæ ate pōninque cōwē caate wæquēnengā ingampa. Ayæ adocā wænte ate cōwē nāni omæmonte quēwenguēnengā ingampa, ante yewæmongadānīmpa, ante Pabodo apænecantapa. Ayæ godōmenque apænedinque,

—Itota botō nē ānongā incæ adocā mōnō Codito inongā ingampa, ante apænecantapa.

⁴ Mānōmaī apænecā ēñēninque oodeoidi pancadāniya, Nō impa, ante pōnēninque Pabodo tōnō Tidato miñæ godānitapa. Ayæ guidiegoidi nanguī ināni Wængonguī ingante nē guīñēnāni inte adobai pōnēninque tōmēna miñæ godānitapa. Ayæ awēnēidi bai ināni onquiyænāni incæ nanguī ināni adobai pōnēninque tōmēna miñæ godānitapa. ⁵ Mānōmaī pōnēnānīpa, ante wædinque oodeoidi guiquēnē piinte wædinque iīmaī cædānitapa. Tōmēnāni nāni godonte æiñōmō gote ayōnāni nē wīwa cædāni ongōnāni adinque tōmēnāni inānite ānāni Ao ante godongāmæ pōninque oodeoidi tōnō iñacabo cædinque Yæ yæ ante piinānitapa. Mānōmaī yedæ ānāni ēñente wædinque māniñōmō quēwēnāni tōmānāni godongāmæ piinte badinque Yæ yæ ānānitapa. Oodeoidi iñōmō, Mōnō

Yatōnō oncōnē guidineque Pabodo tōnō Tidato īnate da tadōninque nē piinte cædāni īnānite da godōmō æncædānimpā, ante cædīnque diqui diqui mincæte ante tee gāwade guiddānitapa. ⁶ Wāānē guidineque tōmēna īnate adāmaī īnāni inte oodeoidi wæætē oncō nē ēacā Yatōnō ingante yao ongōninque wadāni nē pōnēnāni īnānite yao ongonte wēā tadō māo tōmēnāni nāni quēwēñōmō awēnēidi weca ænte godānitapa. Ayæ, ogæ tededīnque,

—īina onguīñæna īñōmō tōmāmæ quēwēnāni īnānite wapiticæ nē apænedīna inte ñōwo wæætē īñōmō pōna tamēñedāni. ⁷ Ayæ Yatōnō guiquēnē, Botō oncōnē pōeda, ante manguicā guiddatapa. īnāni tōmānāni edæ odōmāno tæiyæ awēnē Tetædo nānō ānīnō ante Baa ānīnque wacā Itota nāni ānongā ingantedō ante, Tōmengā nē Awēnē Odeye ingampa, ante ānewēnānīpa cæmīnīi.

⁸ Ante piināni ēñente wædīnque godongāmæ ongōnāni tōnō awēnēidi adobaī piinīnque, Quīnō cæquīi, ante wædīnque Yæ yæ ānānitapa. ⁹ īnīnque Yatōnōidi īnānite ānīnque awēnēidi, Mīnitō ñōwo mānīmpota pōnōmīni ænte māñōmōni mīnitō wēnæ wēnæ cædāmaī īmīni adīnque mōnitō īncayæ ate wæætē adodō pōnōmōni æmāimīnīpa, ante tōmēnāni godonte æinta ānāni pædæ godōnāni ænīnque ñīmpo cædāni abæ tawænte gogadānimpā.

Bedea īñōmō quēwēnāni ēñente pōnēnānīpa

¹⁰ Ayæ tæcæ wēmō bayonte nē pōnēnāni wæætē Pabodo tōnō Tidato īnate, Bedea īñōmō goeda, ante da godōnāni godatapa. Māniñōmō gote pōnīnque tōmēna oodeoidi odōmōincōnē go guiddatapa. ¹¹ Māniī Tetadōnica īñōmō quēwēnāni nē piinte cædāni īñōnānite bedeaīdi guiquēnē piināmaī īnāni inte mōnō Awēnē nānō apænedō ante do ēñēnānitapa. Ayæ ēñēnīnque, Wængonguī angā ēñente nāni yewæmongaīnō baī Pabodo nō apænecantawo, ante pōnente wædīnque bedeaīdi īñōmō, Wængonguī æbānō angā ēñente yewæmongadānīi, ante ēñencæte ante īimō īñō īimō īñō mānīnta ænīnque cōwā adānitapa. ¹² Mānōmaī cædīnque oodeoidi tæiyæñāni wede pōnēnāni badānitapa. Ayæ guidiegoidi awēnēidi

baī īnāni onquiyæñāni incæ nanguī īnāni pōnēñōnāni guidiegoidi onguīñæñāni adobaī tæiyæñāni nē wede pōnēnāni badānitapa.

¹³ Incæte wadāni Tetadōnica īñōmō godīnque oodeoidi īnānite apænedīnque, Pabodo ñōwo Bedea godīnque māniñōmō quēwēnāni īnānite apænecā ēñēnānīpa, ante tededāni. ēñēnīnque oodeoidi wæætē Bedea īñōmō pōnīnque, Pabodo wīwa apænecā apa ēñencæ quēwēmīnīi, ānīnque wapiticæ tededāni ēñēnīnque godongāmæ ongōnāni guiquēnē ænguī badānitapa. ¹⁴ Mānōmaī ænguī badāni adīnque nē nāni pōnencabo īñōmō Pabodo ingante æpæ yæwedeca do ænte māodāni godīnque tōmengā wipodē ñæñæmpodē go guidineque godōmenque wogaa goyongante Tidato tōnō Tīmoteo wæætē Bedea īñōmō ayæ ongōnatapa. ¹⁵ Pabodo tōnō godongāmæ godāni īñōmō Atēna ganca māodāni gocā ate tōmengā wæætē, Mīnitō adodō Bedea īñōmō godīnque Tidato tōnō Tīmoteo īnate apænedīnque tōmēna eyepæ inte ate botō weca quingæ āmīni pōnae, angā ēñēnīnque tōmēnāni adodō Bedea īñōmō godīnque Pabodo nānō ānīnō baī īñāna īnate apænedānitapa.

Atēna īñōmō Pabodo apænecā ēñēnānīpa

¹⁶ Mānōmaīnō ante āningā inte Pabodo tōmēna nāna ponguīnō ante ee ongongan-tapa. Ee ongōnīnque ayongā māniñōmō quēwēnāni, Wængonguīdi īnānīpa, ante badonte nāni cō cægainca bacoo mæ ongō ate wædīnque Pabodo wæwēwocate quēwengantapa. ¹⁷ Mānōmaī beyæ oodeoidi odōmōincōnē go guidineque oodeoidi īnānite apænedīnque ayæ guidiegoidi incæ Wængonguī ingante nē guīñēnāni īnānite apænedīnque Pabodo, Mānōmaī impā. Apænebo ēñēmaimīnīpa, ante apænecantapa. Ayæ tōmēnāni nāni godonte æīñōmō adobaī īimō īñō īimō īñō godīnque māniñōmō ponte ongōnāni īnānite adobaī nō apænecā ēñēnānitapa. ¹⁸ Mānōmaī cæyongā wadāni Epicodeoidi, Mōnō tote quēwengæimpā, ante nē ānewēnāni nāni cabo tōnō wadāni Etoicoidi, Waa īimō incæ caate wæmō incæ mōnō piyænē cæte quēwengæimpā, ante

nē quēwēnāni nāni cabo tōnō tōmānāni adoyōmō ponte bee tēnīque Pabodo ingante wæætēdō wæætē ānānitapa.

Pabodo īñōmō Itota ēmōwo ante apæneca beyæ ayæ Itota nānō ñāni ōmæmongainō ante apæneca beyæ Epi-codeoidi nāni cabo tōnō Etoicoidi nāni cabo tōnō pancadāniya guiquēnē,

—Īngā īñōmō ōnonque ante tedewēnongā inte æbāmē ante tedewengā.

Ante wæyōnāni adodāni incæ pancadāniya guiquēnē,

—Tōmengā wabānō, Wabæca wængonguīdi īnānite pōnencæmīnīmpa, ante cæcā īmaingampa, ante wædānitapa.

¹⁹ Īnīque Pabodo ingante bæi ongonte tōō æmænte ænte godīque tōmēnāni Adeopagoidi nāni ānōnāni nāni godongāmæ ēñente pōnencōñōmō māodāni gocantapa. Go guiite ongōñongante,

—Mā bitō odōmonte apænedō æbānō īi. Edæ apænebi ēñēmōnie. ²⁰ Edæ bitō odōmonte apænedō ante tæcæ ēñēmōni inte mōnitō, Æbānō ante apænebīi, ante ēñencæte ante wæmōnīpa, ānānitapa.

²¹ Edæ atēnāidi tōnō wadāni Atēna īñōmō ñōwo ponte quēwēnāni tōnō tōmānāni wadō cædāmaī inte ōnonque, Wadāni æbānō mā apænete pōnēnānīi, ante wædinque mānīnonque ante tedete quēwēnōnānīmpa.

²² Pabodo īñōmō Adeopagoidi godongāmæ nāni ēñente pōnenconcabo tæcæguedē ængæ gantīdinque tōmēnāni īnānite apænedīnque,

“Atēnāidi, ēñēedāni. Wængonguīdi, mīni ānōnāni īnānite waa ate baī mīnitō nanguī pōnī cæmīni abopa. ²³ Botō mīnitō quēwēñōmō tōmāo cægonte ayōmo, Wængonguīdi īnānīpa, ante mīni waa adoncaco nanguī ongō atabopa. Ayæ mīni waa adonca adocaque īñōmō mīni pōnō yewæmōnīmpaa īmaī ante yewæmonte ongō atabopa. ‘Wacā wængonguī æcāmē ingāā, ante mōnō ēñēnāmaī nē īnongā beyæ mōnō waa adonca īmpa,’ ante mānīmpaa yewæmōi ongō atabopa. Mānīmpaa yewæmōi ongō adīmo inte botō mīni, Æcāmē ingāā, ante ēñēnāmaī inte mīni waa adongā ingante ante ñōwo, Æcānō ingāā, ante ñōwo apænebo ēñēedāni.”

²⁴ Ante apænedīnque Pabodo godōmenque, “Wængonguī inguīpoga nē badongāingā īnongā inte tōmāā īñōmō ongoncoo nē badongāingā īnongā inte tōmengā inguīpoga tōmāmæ Awēnē īnongā ingampa. Tōmengā adocā īñōmō ōōnædē Awēnē ingampa. Īnīque Tæiyæ Awēnē īnongā inte tōmengā waomō ōnompoca mænōnīncōnē ædō cæte guiite quēwengūngāā. ²⁵ Ayæ waomō īñōmonte tōmengā mōnō quēwengūmāmo pōnongā æmompaa. Ayæ mōnō guēmanguīmāmo adocā pōnongā guēmāmompaa. Ayæ tōmengā adocā nānō pōnōnonque tōmānō ænīnque quēwēmompaa. Mānōmaī nē pōnōnongā inte tōmengā mōnō waocabo īñōmonte, Pōnōmī æmoe, ante ædō cæte angūngāā. Īnīque tōmengā beyæ ante mōnō waomō ōnompoca ædō cæte cæquīmō.”

²⁶ Ante apænedīnque Pabodo godōmenque apænecantapa. “Wængonguī waocā adocanque ingante badōnīnque, Tōmengā nānō pæīnāni nanguī īnāni yebænīnque nāni cabo nāni cabo tōmancabodāni bacædānīmpa, angacāīmpa. Ayæ edæ, Adocanque pæīnāni īnōnāni inte mānīncabodāni īñōmō nānēneto nānēnē godīnque adocaboque wabæca wacabo wabæca godīnque inguīpoga tōmāo go go cædinque wayōmō wayōmō quēwencædānīmpa, ante cægacāīmpa. Mānōmaīnō ante badōnīnque tōmengā tōmancabodāni īnānite ante pōnēnīnque, Æyōmōnō quēwengūnānīi, ante cædinque, Īnāni īmæca mānīmpoga quēwencædānīmpa, ānīnque, Wadāni wabæca mānīmpoga quēwencædānīmpa, ante doyedē angacāīmpa. ²⁷ Edæ tōmāmæ quēwēnāni botō īmote ante dīqui dīqui mīncædānīmpa. Ayæ botō īmote ante pædæ æmpo cædinque wabānō bee tengūnāni, ante cædinque Wængonguī mānōmaī badōnīnque angacāīmpa. Incæte Wængonguī mōnō tōmāmō weca ongōnīnque wīi gobæque quēwengampa. ²⁸ Wængonguī tōmāo quēwengā īñongante mōnō waomō īñōmō inte wayōmō wayōmō gomō incæte tōmengā nempo edæ cōwē quēwēmompaa. Mīni cabo incæ āmotamīni ante baī nē tededāni pancadāniya, ‘Wængonguī pæīmō adomō īmompaa,’ ante do nāni ānō

baī edæ mǎnōmaī impa,” ante Pabodo apænecantapa.

²⁹ Ayæ, “Mǎnōmaī beyæ mōnō Wængonguī pæimō inōmō inte edæ iīmaīnō ante wīī pōnenguēnēmō īmōmpa. Mōnō, Waocā nangūī pōnēnīnque dicaa yewæmōnīnque waa pōnī nānō badōinca baī Wængonguī adobaī ingampa, ante ædō cæte ānewenguīī. Oodo tōnō padata waocā nānō badōī baī Wængonguī ingampa, ante mōnō wīī mǎnōmaīnō ante pōnenguēnēmō īmōmpa. ³⁰ Incæte wēēnēñedē mǎnīnō nāni ēñēnāmaī ingaīnō ante adīnque Wængonguī pōnō waadete ata cæpogacāimpā. Nōwo guīquēnē tōmāmæ quēwēnāni inānite, Mīnitō ēñēnāmaī cædō ante, Ancaa wæwente awædō, ante ñimpo cæedāni. ³¹ Ante Wængonguī nē apænte angūingā inongā inte iīmaī angampa. Iīonæ īnque bayonte botō inguīpoga tōmāmæ quēwēnāni inānite apænte ancæboimpā, ante māniōnæ æonædō ī, ante do angacāimpā. Ayæ, Waocā adocanque tōnō botō godongāmæ cæyōmo tōmengā nōingā ante apænte ancæcāimpā, ante Wængonguī māningā onguīñængā ingante do apænte ængacāimpā. Ayæ tōmānāni, Wængonguī nānō angaīnō baī cōwē bacæimpā, ante pōnencædānimpā, ante cædinque Wængonguī māningā Onguīñængā dobæ wængā ate, Nāni ōmæmōe, angā īnque māningā iñōmō edæ do ñāni ōmæmonte quēwengampa.”

³² Ante Pabodo mǎnīnō Itota nānō ñāni ōmæmongaīnō ante apæncæ ēñēnīnque pancadāniya, Babæ ancædō, ante badete todānitapa. Wadāni guīquēnē,

—Iīncayæ ate mǎnīnō ante adodō apænebi ēñēmōnie, ānānitapa.

³³ Mǎnōmaīnō ante cædāni adīnque Pabodo iñōmō tōmēnāni inānite ēmō cæte godīnque tao gogacāimpā. ³⁴ Incæte pancadāniya tōmengā miñæ godīnque nē pōnēnāni badānitapa. Adeopagoidi nāni ēñente pōnēē concabo iñōnānite adocanque Diōnitio adobaī nē pōnengā bacantapa. Ayæ onquiyængā tōmengā ēmōwo Daāmadi tōnō wadāni adobaī nē pōnēnāni bagadānimpā.

18

Coodinto iñōmō pōnīnque Pabodo apænecampa

¹ Atēna iñōmō ongonte apæncæ ēñēnīnque mǎnōmaī cædāni ate Pabodo wadæ godīnque Coodinto nāni quēwēñōmō pongantapa. ² Doyedē iñōmō odōmānoidi tæiyæ awēnē Co-daodio oodeoidi inānite pīinte ānīnque, Mōnitō quēwēñōmō Odōmā iñōmō ñōwo quēwēnāmaī inte tōmāmīni wadæ goedāni, angā ēñente wædinque tōmānāni nāwæ wadæ godōnānimpā. Adocanque tōmengā ēmōwo Aquidæ Pontobæ ēñagaingā inte Itadiabæ gote māniñedē quēwēnongāimpā. Tōmengā adocā oodeocā inongā inte awēnē nānō ānō ante ēñente wadæ godīnque tōmengā nānōogængā Pīditida tōnō ñōwo Coodinto iñōmō wadæ ponte quēwēnōnāimpā. Iīnque Pabodo ñōwo Aquidæ ingante tæcæ adīnque tōmēna weca ēñacæ pongantapa. ³ Tōmēna weca ponte ayongā tōmēna tōmengā nānō tadōmōnō baī adobaī æmontai cadopa tadōmonte godonte ænte quēwēna adīnque Pabodo tōmēna weca ee owodīnque tōmēna tōnō godongāmæ tadōmōnānitapa. ⁴ Mǎnōmaī cæte quēwēnīnque Pabodo guēmanguīōnæ iñō guēmanguīōnæ iñō oodeoidi odōmōincōnē go guīdīnque, Oodeoidi incæ oodeoidi ināmaī ināni incæ ēñente pōnencædānimpā, ante cædinque, Iīmaī impa ante apænebo ēñēmaīmīnīpa, ante nangūī apænecantapa.

⁵ Ayæ Tidato tōnō Tīmoteo Māatedōniabæ quēwente wadæ pōnīnque Coodinto iñōmō nāna wææ pōñedē Pabodo māniñedē æmontaicō nānō badōnīnō ñimpo cædinque wæætē, Wængonguī nānō apænedō ante ēñencædānimpā, ante nangūī cæinente wædinque nangūī apænedīnque mānīnque cæte quēwengantapa. Mǎnōmaī cædinque tōmengā, Codito mōnō nē ānongā incæ Itota adocā inongā ingampa, ante botō nē agaīmo inte apænebo ēñēmaīmīnīpa, ante oodeoidi inānite apænecantapa.

⁶ Mǎnōmaī apæneyongante oodeoidi wæætedō wæætē godō wēnæ wēnæ ante pīināni wædinque Pabodo wæætē, Wīī ēñēinē wædō, ante baī cædinque nāmā

weocoo wancæ wancæ cæcantapa. Ayæ tōmēnāni inānite,

—Wængonguī weca mīni goquēnēnō ante apænebo ēñēninque mīnitō pōnō wææ āninque tōmēmīni wænguinque wentamō mongæmīnīpa. Botō wæætē mīnitō imīnite edonque pōnī apænedīmo inte mīni cædō wentamō mongænāmaī imopa tōō. Īninque botō Wængonguī taadō mīnitō imīnite idæwaa odōmōninque edæ oodeoidi ināmaī ināni weca ñōwo wadæ gobo tamēñedāni.

⁷ Āninque Pabodo wadæ tao godinque oodeoidi odōmōincō gāānē wacā oncōnē go guī go guī cædinque cōwē apænecantapa. Mānīncō nē ēacā Titio Yoto nāni ānongā iñōmō Wængonguī ingante nē waa ate pōnengā inongāimpa. ⁸ Oodeoidi odōmōincōnē nē aacā Codipo guiquēnē mōnō Awēnē ingante nē pōnengā bayongā tōmengā oncōnē nē owodāni tōmānāni pōnēnānitapa. Ayæ coodintoidi nanguī ināni pō ēñēē pō ēñēē cædinque adobaī wede pōnēninque æpænē guīgādānīpa. ⁹ Māñīñedē woyowotæ iñō Pabodo wīlmonē baī ayongante mōnō Awēnē tōmengā ingante apænecantapa. “Bitō guīñēnedāmaī inte apænebi ēñencædānīpa. Pæ wēēnedāmaī incæbiīpa. ¹⁰ Coodinto iñōmō botō quīnāni nanguī ināni inānīpa, ante cædinque botō iñōmō edæ bitō tōnō godongāmæ cōwē cæcæboīpa. Īninque wadāni bitō imite māmō pīninque wēnæ wēnæ cædāmaī incædānīpa.” ¹¹ Ante mōnō Awēnē tōmengā ingante apænecā ēñēninque Pabodo adoque wadepo go tæcæ iñonte Coodinto iñōmō ongōninque Wængonguī nānō apænedō ante tōmēnāni inānite odōmonte apænecā ēñēnōnānīpa.

¹² Māñīñedē odōmānoidi ānāni ate Acayabæ awēnē Gadiōno inongāimpa. Tōmengā awēnē nānō inōñedē oodeoidi godongāmæ pōnēninque Ao āninque Pabodo ingante quingæ māmō bæi ongonte æninque awēnē Gadiōno nānō cōwē apænte ānōñōmō ænte māodāni gocantapa. ¹³ Awēnē weca pōninque Pabodo ingantedō ante pīinte āninque,

—Īngā iñōmō, Mōnō wadō baī cædinque Wængonguī ingante waa ate

apænecāīpa, ante odōmōninque mōnitō awēnēidi nāni wææ ānōnō ante wido cæcampa. Mānōmaī wapiticæ cædinque ancaa ānewengā ēñēninque tōmānāni adobaī wapiticæ cædānīpa cæbīi.

¹⁴ Ānāni ate Pabodo tæcæ apænecæ cæyongante Gadiōno oodeoidi inānite iīmaī ante wææ apænecantapa.

—Oodeoidi ēñēedāni. Mīnitō botō weca ponte apænedinque, Odōmāno awēnē nānō wææ ānō baī Īngā ēñēnāmaī cæcampa, āmīni baī, Waocā ingante ædæmō wīwa cæcampa, ante āmīni baī botō mīni ānō do ēñēninque apænte ancædōmoīpa. ¹⁵ Mīnitō iñæmpa, Tōmengā tededonque ante oda cæcampa, āmīnīpa. Mīnitō emōwo ante oda cæcampa, āmīni. Mīnitō wææ angāinō ante oda cæcampa, ante pīmīnīpa. Māñīnonque ante oda cæcampa, ante ancaa tedewēmīni wædinque botō wæætē tōmengā ingante apænte ānāmaī incæboīpa. Tōmēmīninque tōmengā ingante apænte æedāni.

¹⁶ Ante pīinte āninque awēnē tōmēnāni inānite, Botō apænte āñōmō ongōnāmaī gobæwedāni. ¹⁷ Ante wido cæcā tao godinque tōmānāni oodeoidi odōmōincōnē nē aacā Totēnē ingante wæætē bæi ongonte tæi tæi pānāni incæte nē apænte anguēnengā incæ Gadiōno iñōmō ononque adāmaī inte baī ee acā pangādānīpa.

Pabodo Antioquiya ponte gocampa

¹⁸ Īninque tæōnæ quēwente ate Pabodo Coodinto iñōmō nāni pōnencabo inānite, Gobopa, āninque wadæ godinque Tidiabæ gocæte ante Tencodea ganca pongantapa. Tōmengā do apænedinque, Botō mānīmpoga ocaguī tocadāmaī inte Wængonguī beyænque cædinque botō tōmēmo ānīnō ante cōwē cæcæboīpa, ante doyedē ānongāimpa. Ñōwo iñōmō tōmengā nānō ānīnō baī Īnque cædingā inte Tencodea iñōmō pōninque ocaguī eō toacantapa. Ayæ eō toacā ate tōmengā Pidotida tōnō Aquidæ nāna gæncaya tōnō godongāmæ ñænæ wipodē go guīdinque tōmēnāni Tidiabæ gocæte ante wogaa godānitapa. ¹⁹ Mānōmaī godinque Epeto iñōmō go ti wæænānitapa. Tōmēna nāna gæncaya māñīñōmō ti wæænīnque tæ contayōna Pabodo iñōmō

oodeoidi nāni odömöincönē go guidinque oodeoidi inānite, Iīmaī impa apænebo eñencæminimpa, ante apænecā. ²⁰ Eñēninque tōmēnāni, Bitō mōnitō weca wantæpiyæ quēwenguīmi, añōnāni tōmengā Baa āninqe, ²¹ wæætē, Gobopa, angantapa. Ayæ, “Ñōwo Eedotadēē iñōmō ææmæ bequinque goquēnēmo imo incæte Wængonguī Ao angā ate botō mīnitō weca ayæ ate wæætē ocæ emænte poncæboimpa. Ñōwo gobo tamēñedāni.”

Āninqe Epeto iñōmō ñænæ wipodē go guī tæ contadinque Pabodo wogaa gocantapa. ²² Godinque Tetadea pō ti wææninque Eedotadēē iñōmō Itota Codito ingante godongāmæ nāni pōnencabo weca eñacæte ante æicantapa. Ayæ ate Antioquiya wæicantapa. ²³ Ayæ ate māniñōmō tæōnæ quēwēninque wadæ godinque Gadatiabæ adodō godinque Pidiquiabæ tōmāo wayōmō wayōmō cægonte godinque Itota miñæ nē tee empote quēwēnāni tōmānāni inānite māo apænedinque, Mōnō ñimpo cædāmaī inte tæi piñænte cæcæimpa, ante apænecā eñēninque tōmēnāni tæi piñænte entawēninque quēwengadānimpa.

Epeto iñōmō Apodo apænecā eñēnānīpa

²⁴ Māniñedē wacā oodeo tōmengā emōwo Apodo iñōmō Equitobæ Adecantodia nāni quēwēñōmō eñate pægaingā inte ñōwo Epeto nāni quēwēñōmō pongantapa. Tōmengā iñōmō nanguī adinque nē eñēnongā inte Wængonguī angā eñente nāni yewæmongainō ante do eñēninque waa pōni apænecā inongāimpa. ²⁵ Mōnō Awēnē taadō ante apæneyōnāni do eñēningā inte māniñō ante ædæmō ewocadinque tōmengā, Eñencædānimpa, ante nanguī apænecantapa. Ayæ Itota nānō cægaïnō ante nō ante odōmonte apænecā incæte Apodo iñōmō Wāo æpænē nānō guidongainonque ante māningancaque eñēningā inte māningancaque ante tōingā odōmongā eñēnōnānimpa. ²⁶ Tōmengā ñōwo oodeoidi odömöincönē go guī go guī cædinque guīñēdāmaī inte apænecantapa. Piditida tōnō Aquidæ nāna gæncaya guiquēnē tōmengā mānōmaī apænecā tæcæ eñēninque edæ Apodo

ingante, Mōnatō weca pōe, āna pōñongante, Wængonguī taadō iīmaī inompa, ante tōingā apæneda tæcæ mā eñengantapa.

²⁷ Mānōmaī cæda ate Apodo wæætē Acayabæ gocæte ante cæyongante tōmēnāni nāni pōnencabo tōmengā ingante, Waa goe, ānānitapa. Ayæ, Acayabæ iñōmō Itota ingante nē tee empote quēwēnāni acædānimpa, ante iīmaī ante cadota ante yewæmōnānitapa. Mīnitō, Apodo pongā adinque tōmengā ingante waa cædāni, ante yewæmōninque tōmengā ingante pædæ pōnōnāni ænte godinque māo Acayabæ quēwēnāni inānite pædæ godongā adānitapa. Tōmēnāni Wængonguī waadete pōnō cæcā ate nē pōnēnāni iñōnānite Apodo nē waa pōni apænedongā inte māniñōmō ponte apænedinque tōmēnāni tōnō godongāmæ cægacāimpa. ²⁸ Edæ tōmānāni ayōnāni Apodo oodeoidi inānite nanguī wæætedō wæætē apænedinque gomonga apænecā wædānitapa. Tōmengā, Mōnō Codito æbānō cæquingā, ante Wængonguī angā eñente nāni yewæmongainta adinque mōnō eñengæimpa, angantapa. Ayæ, Itota māniñō nāni yewæmongainō bai nē cædongā inte nāwangā mōnō Codito inongā ingampa, ante nō apænecā eñēninque tōmēnāni ædō cæte wadō ante apænequināni.

19

Epeto iñōmō Pabodo ponte apænecampa

¹ Apodo ayæ Coodinto iñōmō ee ongōñongā Pabodo nānō cægōnimæ tæcæguedē ānanquidi owēñaque pō Epeto iñōmō wæængantapa. Ponte ayongā Itota ingante nē tee empote quēwēnāni pancadāniya a ongōnāni. ² Adinque tōmengā tōmēnāni inānite,

—Mīnitō pōnente bayōmīni Wængonguī tōmengā Tæiyæ Waēmō Ōnōwoca ingante da pōnongā æmīnitawo.

—Añongā tōmēnāni wæætē,

—Iñæmpa māningā Tæiyæ Waēmō Ōnōwoca ingantedō ante apænedānīpa eñenguīmōnīi.

³ Ante apænedāni eñēninque Pabodo wæætē,

—Īninqe æcānō emōwo ante æpænē guimīnitawo.

Āñongante,

—Wäo wodi nānō æpænē guidongainō ante guitamōnipa.

⁴ Mānōmaīnō ante apænedāni eñēninqe Pabodo wæætē,

—Wäo wodi nānō guidongainō ante guigaimīni inte mīnitō, Idæwaa wænæ wænæ cæte awædō, ante Wængonguī Awēnē gāmænō ocæ emænte pongaimīni imīnipa. Incæte Wäo wodi, Īncayæ ate nē Ponguingā ingante pōnencæmīnipa, āninqe tōmēnāni inānite æpænē guidongacāimpa. Māningā iñōmō Wäo nānō, Nē Ponguingā, ānongā iñōmō Itota inongā ingampa.

⁵ Ante apænecā eñente wæyōnāni Pabodo wæætē mōnō Awēnē Itota emōwo apænedinque æpænē guidongā guidānitapa. ⁶ Ayæ tōmengā gampocā ongōñōnāni Wængonguī Tæiyæ Waēmō Ōnōwoca wææ tōmēnāni baonga guicantapa. Guicā ate tōmēnāni wadāni nāni tede bai mā tēdēdinqe Wængonguī beyæ apænedānitapa. ⁷ Mānīnāni onguīñænāni æpænē nē guidēnāni iñōmō ōnompō tipæmpoga go mengāa inōnānimpa.

⁸ Pabodo apāicā mengāa go adocanque pāmonque adoyōmō quēwēninqe oodeoidi odōmōincōnē go guī go guī cædinque guīñēdāmaī apænedinque, Wængonguī Awēnē Odeye do pongāimpa, ante apænebo eñēedani, ante nōingā ante apænecā eñēnānitapa. ⁹ Apænecā eñēñōnāni pancadāniya guiquēnē, Wīi pōnēinente awædō, ante Baa āninqe Wængonguī Awēnē taadō ante wīwa tedewēnānitapa. Mānōmaī tedewēnāni eñente wædinque Pabodo iñōmō emō cæte godinque Itota ingante nē tee empote quēwēnāni inānite ænte wadæ gocantapa. Ayæ iīmō iñō iīmō iñō Tidānō nānō apæneincōnē go guī go guī cæte apænedinque Pabodo māniñōmō pō guidāni tōnō guēadō guēa apænedānitapa. ¹⁰ Ayæ mēnepoga wadepo ganca Pabodo mānōmaī cæyongā oodeoidi incæ guidiegoidi incæ Atiabæ quēwēnāni tōmānāni mōnō Awēnē nānō apænedō ante eñēnānitapa.

¹¹ Ayæ Pabodo tōnō godongāmæ cædinque Wængonguī tæi piñænongā inte nanguī cæcantapa. ¹² Īninqe tōmēnāni Pabodo weocoo wadæ cæcadoquincoo incæ padēincoo incæ æninqe wænæ wænæ ināni inānite ænte māmō wo caayōnāni waa badānitapa. Ayæ mānōmaī cæyōnāni wænæidi nē wīwa ewocadāni tōmēnāni nāni nē ewēnēnīnāni tao godānitapa.

¹³ Māniñedē oodeoidi Itota ingante pōnēnāmaī ināni incæ pancadāniya wayōmō wayōmō godinque wænæidi nē wīwa ewocadāni inānite nē wido cædāni inōnānimpa. Tōmēnāni nāmā mā pōnēwēninqe, Nōwo Awēnē Itota emōwo apænedinque mōnō wænæ ingante wido cæcæimpa, ante cædinque wænæidi inānite iīmaī ānōnānimpa. Pabodo nānō nē apænedongā Itota emōwo apænedinque botō, Wēnæbi tao gobāwe āmopa, ānewēnōnānimpa.

¹⁴ Māniñedē oodeoidi beyæ, Wængonguī quī, ante nē godongā ñænængā adocanque Etequeba iñongā tōmengā wēnāni tiæte ganca inānitapa. Īnāni iñōmō Itota ingante pōnēnāmaī ināni incæte adobai cæcæ cædānitapa. ¹⁵ Tæcæ cæcæ cæyōnānite wænæ nē wīwa ewocadongā incæ tōmēnāni inānite nāemæ tēdēdinqe, “Itota ingante do abopa. Ayæ Pabodo æcānō ingāa, ante do eñēmopa. Wæætē mīnitō guiquēnē æmīnidō imīnii.”

¹⁶ Āñongā wænæ wīwa inongā ingante nē ewēnengā inte wiyaemæ tōmēnāni inānite to māo yao ongōninqe bæ tacantapa. Mānōmaī cædinque tōmēnāni weocoo gā tadongadinque tæi tæi pangā ate tōmēnāni weocoo ōmaadāni inte wēpæ taate wædinque oncodo tao wodii wīnōnānitapa. ¹⁷ Mānōmaī batimpa, ante tedeyōnāni Epeto iñōmō quēwēnāni oodeoidi incæ guidiegoidi incæ tōmānāni eñēninqe ancaī guīñente wædānitapa. Īninqe mōnō Awēnē Itota emōwo wīi ōnonque ante tēdēdāni inte tōmengā emōwo æwocæte bai cædinque, Tæi piñængā inte emongampa, ante wædānitapa.

¹⁸ Ayæ nanguī ināni ñōwo wede pōnente badinque adoyōmō pōninqe tōmānāni eñēñōnāni tōmēnāni nāni wænæ wænæ cædinō ante tōmānō ante edonque

apænedinque, Idæwaa wënæ wënæ cæte awædö, ante wido cædänitapa. ¹⁹ Ayæ idö inte nê yewænïnäni incæ pancadäniya adobaï pönente badinque tömënäni näni, Æbänö cæte yewænguï, ante yewæmöninta incæ adoyömö ænte pöninque tömänäni äñönäni nê tänänitapa. Mänintacoo æpodö itædê cædinque padata näni æinta beyæ godonte ænänii, ante cöwä ayönäni tincoenta mïdo ganca mänimpota näni godonte æninta incæ nê tänäni agadänimpa. ²⁰ Mänömaï nê pönënäni badinque waa cædäni ininque mönö Awënë nänö änö ante godömenque wayömö wayömö mao gode änäni ëñëninque tömengä ingante näni pönencabo incæ yebæninque tæï piñænäni bagadänimpa.

²¹ Mänömaï cædäni ate Pabodo önöwënenque pönëninque, Mäatedöniabæ ëñacæ godinque botö Acayabæ ëñacæ godinque Eedotadëe gocæboimpa, ante pönëninque, ayæ, Mäniñömö gote ate Odömä näni quëwëñömö cöwë goquënëmo imopa, angantapa. ²² Äninque tömengä beyæ nê cædäni iñönänite mënaa inate Tïmoteo tönö Edaato inate apænedinque, Mäatedöniabæ gote ongöñömïna botö Atiabæ wantæ quëwente pömoeda, ante da godongä godatäpa.

Epetoidi nanguï Yæ yæ änänipa

²³ Mäniñedê Epeto iñömö quëwënäni iñömö, Itota Taadö mönö wido cæcæimpa, ante nanguï Yæ yæ änänitapa. ²⁴ Tömënäni, Mönitö wængonguïnä Diänä inampa, ante onquiyænä emönö bai badöninque mäninca weca ædæ wæænte nê apænedäni inönänimpa. Tömënäni quëwëñömö adocanque Deëmetedio näni änogä iñömö padata aca podonte nê badongä inongäimpa. Tömengä iñömö padatagæ æninque aca podonte badöninque, Mini wængonguïnä Diänä inante mïni tæiyæ waëmö apæneincö bai impa, ante guiyanconque badonte quëwënogäimpa. Mänömaï badöñongä tömengä tönö godongämæ cædäni wæætê wadäni inänite godonte æninque mänincoo beyæ tömënäni godonte æinta nanguï æninque quëwënonänimpa. ²⁵ Ininque tömengä tönö nê cædäni inänite ayæ wadäni adobaï cædäni inänite äñete pönäni

ate Deëmetedio iñömö tömënäni inänite apænecantapa.

“Iñänäni, do ëñëminipa. Mönö badonte godöninque wadäni näni pönöninta nanguï æmompä. ²⁶ Ayæ nanguï inäni Epeto inömö quëwënäni incæ Atiabæ wodo tömämæ quëwënäni incæ iingä Pabodo guiquënë wapiticæ apænecä ëñëninque edæ oda cædinque tömengä miñæ godänipa, ante do ëñëminipa. Tömengä iñömö, Önompoca badöninca wïi wængonguïdi inänipa, ante tedecä apa quëwëminii. ²⁷ Mänömaï tedecä beyæ mönö badönö ante wadäni nanguï inäni piinte anguïnäni awædö. Ayæ Diänä ñænænä wængonguïnä iñönante tömengä ingante mönö apæneincö incæ, Önönconque impa, anguïnäni awædö. Ayæ godömenque, Mönö wængonguïnä Diänä waa pönï wængonguïnä inampa, ante Atiabæ tömão quëwënäni tönö inguipoga tömão quëwënäni näni waa adönä iñönante wabänö wapiticæ tededinque godö piinguïnäni badänipa, ante awædö.”

²⁸ Ante Deëmetedio mänömainö ante apænecä ëñëninque tömënäni ænguï badinque ogæ tededinque, “Epetoidi wængonguïnä Diänä ñænænä inampa,” ante wæætê wæætê ancaa änänitapa.

²⁹ Mänömaï padata nê badönäni Yæ yæ änäni ëñente wædinque mäniñömö quëwënäni tömänäni, Quiëmê bai cædänipa, ante acæte ante wadö pö wadö pö pogodo pönänitapa. Ponte ayönäni Mäatedöniabæ quëwente Pabodo tönö godongämæ nê pönina Gayo tönö Aditadoco a ongöna adinque tömënäni tömëna inate bæi ongonte quingæ mao tömënäni näni aincönë ñænæncönë go guidänitapa. ³⁰ Pabodo guiquënë mänömaï cædäni ate wædinque, Godongämæ ongönäni weca go guidäninque apænecæboimpa, ante cæyongante Itota ingante nê tee empote quëwënäni wæætê, Wænompä, ante, Go guidämaï incæbiimpa, ante wææ cædänitapa. ³¹ Ayæ mänimæ awënëidi pancadäniya Pabodo æmigoidi inäni inte adobaï mämö tömengä ingante gode äninque, Bitö ædö cæte mäniñömö go guiquimii, ante wææ änänitapa.

³² Iñonte godongämæ ongönäni guiquënë, Quinante pömoï, ante wodo tömänäni

ēñēnāmaī inānitapa. Pancadāniya, Īimaī cæcæimpa, aññōnānite wadāni guiquēnē, Wadō bai cæcæimpa, ante wæætedō wæætē ante ogæ tededinque nanguī pōnī Yæ yæ ānānitapa. ³³ Yæ yæ aññōnāni oodeoidi guiquēnē Adecantodo ingante yæcado gö cædāni ongongā adinque godongāmæ ongōnāni pancadāniya tōmengā ingante, Īimaī cæcæimpa, ānānitapa. Tōmengā guiquēnē tōmēnāni inānite wææ apæncæte ante, Apocænē iedāni, ante bai cædinque pipo pipo cæcantapa. ³⁴ Oodeo inongā inte mănōmaī cæcampa, ante wædinque tōmengā ingante ēñēnāmaī inte tōmānāni adoyōmō ogæ tededinque, “Epetoidi wængonguinā Diānā ñænænā inampa,” ante mēa ooda ganca adodō adodō adodō ante nanguī ānānitapa.

³⁵ Ayæ ate tōmēnāni awēnē Tequedetadio incæ anca tōmēnāni inānite angā ēñente apocænē cæyōnāni tōmengā, “Epetoidi ēñēmīni. Tōmāo quēwēnāni mănōmainō ante do ēñēnānipa. Mōnō Epeto iñōmō quēwencabo mōnō wængonguinā Diānā apæneincō nē aamō imōmpa. Ayæ tōmengā awinca bai yewæmōinca oōnædē mōnō wæængainca adobai nē wææ cæmō imōmpa, ante adinque tōmāmæ quēwēnāni do ēñēnānipa cæmīnii. ³⁶ Mānīnō ante nāwangā pōnī impa, ante adinque, Babæ impa, ante ædō cæte anguinānii. Īinque mīnitō ēñēnāmaī mīni Yæ yæ ānewēnō ñimpo cædinque piyænē cæquēnēmīni imīnipa. ³⁷ Īina mīni bæi ongonte ænte pōnōnīna iñōmō mōnō wængonguinā Diānā apæneincōnē guidāmaī ina inte wēnæ wēnæ cædāmaī inapa. Ayæ mōnō wængonguinā Diānā inantedō ante wīi wēnæ wēnæ ante pīina apa quēwēnānii.”

³⁸ “Deēmetedio padatagæ nāni badoncabo incæ wacā ingante, Wiwa cæbitapa, pīinte wædānitawo. Edæ nē apænte nāni āincō cōwē wi ænete ongōmpa. Mānīncōnē nē apænte ānāni cōwē ongōnānipa. Īinque Deēmetedioidi nē nāni pīinongā ingante mānīñōmō ænte gote ānāni ēñēninque nē apænte ānāni wæætē tōmengā ingante do apænte anguēnēnāni inānipa. ³⁹ Ayæ apænte ānāni, Īiōnæ tōmāmīni godongāmæ pōedāni, nāni āniōnæ bayonte mīnitō

godōmenque pīinte ānēmīni inte māniōnæ ponte āmīni ēñente apænte ānāni ate mīnitō piyænē cæquēnēmīni imīnipa. ⁴⁰ Edæ ñōwoōnæ mīni Yæ yæ ānewēnīnō ante awēnēidi pōninque, Quīnante mānōmaī cæmīnii, ante aññōnāni wæætē, Quiēmē beyæ cætimpa, ante mōnō angæimpa. Tōmēnāni wæætē mōnō imonte āninque, Mīnitō awēnē ingante wido cæcæte ante cæmīnipa, ante pīināni wæcæ wæ.”

⁴¹ Āninque godongāmæ ponte ongōnāni inānite tōmengā angā gogadānimpa.

20

Māatedōniabæ godinque Pabodo Guidetiabæ gocampa

¹ Mānīi Yæ yæ ante nāni ānewēnō ĩinque cædāni ate Itota ingante nē tee empote quēwēnāni inānite wæætē añete pōññōnānite Pabodo, Mīnitō ganca pōnente godōmenque cæcæmīnimpa, ante godō ædæmō apæncantapa. Ayæ, Nōwo gobopa, ante Māatedōniabæ gocantapa. ² Godinque tōmengā māniñōmō quēwēnāni inānite, Mīnitō ganca pōnente godōmenque cæcæmīnimpa, ante godō ædæmō apæncæ ēñēnānitapa. Mānōmaī nanguī apænedinque tōmengā mānimæ tōmāo cægōninque wayōmō māo wayōmō māo apæncæ ēñēnāni ate Guidetiabæ gote pongantapa. ³ Māniñōmō pōninque mēa go adoque apāicā quēwengantapa.

Ayæ, Tidiabæ goquīmo, ante tæcæ ñænæ wipodē guicæ cæyongante wadāni, Oodeoidi bitō ĩimite wænoncæte ante cædānipa атаque. Ante wææ ānāni wædinque tōmengā, Botō wæætē adodō godinque Māatedōniabæ wodo tebæ gocæboimpa, āninque taadonque gocantapa. ⁴ Goyongā tōmengā tōnō godongāmæ godāni iñōmō, adocanque Bedea quēwēningā inte Pidido wengā Topatede, ayæ wææ Tetadōnica quēwēnīna Aditadoco tōnō Tegonto mēnaa, ayæ wææ Dedebe quēwēningā Gayo tōnō Tīmoteo mēnaa, ayæ wææ Atiabæ quēwēnīna Tiquico tōnō Todopīmo mēnaa, mānimpodāni inānitapa. ⁵ Tōmēnāni tāno godinque Todoa nāni quēwēñōmō pōninque mōnitō wipodē ponguīmōni ante ee ongōnānitapa. ⁶ Mōnitō guiquēnē

oodeoidi pāo yedæ æmpoquī ōmæmō ī nāni cænguīōnæ īinque baganca Pidipo īñōmō quēwēninque wipodē ñænæmpodē go guīdinque wogaa godinque ōnompō æmæmpoque ēōnæ gote ate tōmēnāni weca Todoa pōninque ōnompō æmæmpoque go mēōnaa quēwentamōnipa.

Todoa īñōmō Pabodo ponte apæncampa

⁷ Tōmēnāni nāni guēmanguīōnæ go ate mōnitō, Ñōwo gāwadecæ bayō Wængonguī itædē impa, ante pāo godongāmæ cæncæte ante æmongapaa æi wænōmēnæcapaa æi guīdinque tæ contatamōnipa. Pabodo īñōmō baānæ ate gocæ cædingā inte æi guī tæ contadinque wantæpiyæ ayaōnænēña pōnī ayæ apæncæ ēñentamōnipa. ⁸ Wænōmēnæcapaa mōni godongāmæ ēñengoncōnē gongapæncada bacoo tī wodōnote mæ ongōnimpa. ⁹ Adocanque edēningā tōmengā ēmōwo Eotico ayamōnecāa tæ contate ongongantapa. Īnīnque Pabodo wantæpiyæ apæneyongā edēningā īñōmō mōwocodē nangui mōinente ayæ wangæ monte wænōmēnæcapaa ongōninque yæipodē tæ go wæængantapa. Go wæænte do wængā adinque tōmengā ingante yao ongonte mānānitapa. ¹⁰ Nāñe wænte ōñōñongā Pabodo yæipodē wææninque, Quēwencæcāimpa, ante cædinque wīni ænte pæ mangantapa. Ayæ nē pōnēmōni mōni caipæ īmōnite apænedinque,

—Mīi quēwengā ingampa. Guīñente wædāmaī īedāni, angantapa.

¹¹ Ānīnque Pabodo wæætē adodō æmongapaa æidinque pāo ænte pā ænte mōnitō tōnō godongāmæ cæninque wantæpiyæ godōmenque apæncōñongā edæ ñāo batimpa. Ñāo ba ate Pabodo ñimpo cæte wadæ gocantapa. ¹² Ayæ, Edēningā mīngā quēwengampa, ante ænte wadæ godinque tōmēnāni wampo pōnēninque nangui togadānimpa.

Ōmaaque godinque Pabodo Mīideto ganca pongampa

¹³ Pabodo guīquēnē taadonque gocæ cædinque mōnitō īmōnite apæncantapa. Mīnitō wipodē ñænæmpodē go guīdinque māodāmæ wipodenque godāmæ

goyōmīni, botō ōmaaque nāñe tebæ pōmoedāni. Atōnō īñōmō pō wāi wocænte owoyōmīni botō īñōmō ōmaaque pō adopodē guīibo ate gocæimpa, angā Ao ante mōnitō tāno go guī tæ contadinque ōme tagamōnimpa. ¹⁴ Mānōmaī godinque Atōnō īñōmō pō wāi wocænte owoyōmōni tōmengā ōmaaque pō bee tēninque ñænæ wipodē adopodē pō guīite tæ contacā ate mōnitō godongāmæ wogaa godinque Mīitidēne nāni quēwēñōmō pontamōnipa. ¹⁵ Māñiñōmō wāi wocænte monte ate ñāo ba wogaa godinque mōnitō Quiyoganca pōninque waōnæ ate wodo pænta godinque wæætē Tāmo īñōmō pōmōnique go Todoguidio īñōmō pōmōnique go īñabæ guingā ate Mīideto pontamōnipa. ¹⁶ Edæ, Ææmæ Pentecotee nāni ānōmæ botō bequinque Eedotadēē eyepæ poncæte ante quingæ goquēnēmo īmopa, ante do āningā inte Pabodo ñōwo, Atiabæ wantæpiyæ ongōninque ædō cæte Eedotadēē eyepæ pōmaīmo. Ante pōnente wædinque, Epeto īñōmō ti wæænāmaī yaatænque gocæboimpa. Āñongā mōnitō tōmengā tōnō Epeto wodo tebæ godinque Mīideto īñōmō pontamōnipa.

Epeto īñōmō nē Picænāni inānite Pabodo apæncampa

¹⁷ Māñi wipo ñænæmpo Mīideto īñōmō wogaa pō wāi wocæ ate ti wææninque Pabodo wadāni inānite da godōninque, Mīnitō Epeto īñōmō tōmæwæ æidinque Itota Codito ingante nē godongāmæ pōnēnāni weca godinque tōmēnāni inānite nē aadāni Picænāni inānite āñete pōedāni. ¹⁸ Angā āñete pōñōnānite tōmengā, “Botō Atiabæ mā ponte quēwēninque botō goganca æbānō mīnitō weca waa cæte quēwēnōmoī, ante do ēñēmīnipa. ¹⁹ Edæ oodeoidi, Wænoncæ, ānāni ēñēninque nangui guīñente wæbo incæte botō, Ōnōmoque baī īmopa, ante pōnēninque Wængonguī beyænque nangui cædinque Ca ca wædinque ee cætabopa. ²⁰ Īnīnque botō, Mīnitō beyænque quīnō waa inguīī, ante pōnēninque pæ wēenedāmaī inte do apænebo ēñēmīnitapa. Ayæ edæ tōmānāni ayōnāni odōmonte apænedinque

botō wacōnē mǎo wacōnē mǎo go gu-
 idinque apænebo eñēmīnitapa. ²¹ Ayæ
 pancamīniya oodeoidi iñōmīnite pan-
 camīniya guidiegoidi iñōmīnite botō
 tōmāmīni imīnite apænedinque iīmaī ante
 apænetabopa. Mīnitō, Idæwaa wēnæ
 wēnæ cæte awædō, ante pōnente wædinque
 Wængonguī gāmænō pōninque mōnō Awēnē
 Itota Codito ingante pōnencæmīnimpa, ante
 āmo eñēmīnitapa. Mānōmaī tōmāā cætabopa,
 ante do eñēmīnipa.”

²² “Nōwo guiquēnē Wængonguī Ōnōwoca
 angā eñēninque Eedotadēē gocæboimpa.
 Māniñōmō pōñōmote quiēmē bai bacæimpa,
 ante pōnente wædīmo incæte ee gocæboimpa.
²³ Ōnonque botō ñōwo wayōmō wayōmō
 nāni quēwēñōmō pōñōmote wadāni
 Wængonguī Tæiyæ Waēmō Ōnōwoca tōnō
 apænecā eñēnāni inte do botō imote
 iīmaī ante wææ ānānipa. Bitō tee
 mōnete nanguī caate wæquinque Eedo-
 tadēē gobipa, ānāni eñēninque māninque
 ante eñēmopa. ²⁴ Incæte, Wængonguī
 waadete pōnō cædinque nānō cægaīnō
 ante watapæ apænedinque bitō, Nō pōni
 impa, ante apænebi eñencædānimpa, ante
 mōnō Awēnē Itota doyedē botō imote
 angacāimpa. Iñinque tōmengā nānō anganca
 iñinque cæcæte ante cæyōmote wænōnāni
 wæmo incæte botō, Godōmenque ingui-
 poga quēwenguēnēmo intabopa, ante
 wædāmaī incæboimpa. Ayæ pogodo gote
 bai botō goquīnō tōmānō gocæte ante
 nanguī cæcæboimpa, āmopa,” ante Pabodo
 apæñecantapa.

²⁵ Ante apænedinque tōmengā ayæ
 godōmenque apæñecantapa. “Botō,
 Mōnō Awēnē Odeye do pongāimpa, ante
 apænedinque wayōmō mǎo wayōmō mǎo
 apænebo eñēmīnitapa. Idæwaa apænebo
 eñēnīmīni inte mīnitō ñōwo æmæwo botō
 awinca amīnipa. ²⁶ Mānōmaī beyæ botō
 ñōwoōnæ apænedinque mīnitō imīnite
 iīmaī āmopa. Botō, Quēwencæmīnimpa,
 ante cædinque ancaa apænebo incæte
 pancadāniya tōmēnāni nāni wīī eñēnō
 beyænque wentamō mongænte nāni
 wænguinque goyōnāni botō wæætē māniñō
 beyæ wentamō mongænāmaī imopa.
²⁷ Wængonguī, iīmaī cæbo bacæimpa,

ante nānō ānō ante botō iñōmō edæ pæ
 wēenedāmaī inte mīnitō imīnite tōmānō
 edonque pōni apænebo eñēmīnitapa.”

²⁸ “Mīnitō iñōmō edæ nāmā wææ aad-
 inque waa cæte quēwēedāni. Wængonguī
 Ōnōwoca mīnitō imīnite āninque, Iñāni
 cæningāidi bai inānipa, ante nānō nē an-
 gaināni iñōnānite mīnitō wæætē nē aamīni
 iñōmīni inte tōmēnāni inānite ædæmō wææ
 aadāni. Mōnō Awēnē Codito ingante nāni
 godongāmæ pōnencabo inānite æncæte ante
 tōmengā nāmā wepæ godonte ængā ate
 Wængonguī quīnāni bagadānimpa cæmīni.
 Mīnitō tōmēnāni inānite nē aamīni inte waa
 aadāni. ²⁹ Edæ botō do eñēmopa. Babæidi
 gāwæi ecate ade cænāni amīnipa. Edæ botō
 emō cæte gobo ate waodāni incæ babæidi
 cædāni mīni abaī adobaī wēnæ wēnæ
 cædinque mīni pōnencabo iñōmīnite ata
 cæpodāmaī incædānimpa. Tōmēnāni babæ
 wapiticæ ānāni eñēninque mīni cabo incæ
 pancadāniya eñēnāmaī badinque wadæ
 godāni wæcæmīnimpa. ³⁰ Ayæ tōmēmīni
 mīni pōnencabo incæ pancadāniya, Mōnitō
 miñæ poncæmīnimpa, ante cædinque
 babæ wapiticæ odōmoncædānimpa cæmīni.
³¹ Edæ wææ cæedāni. Botō, Mānōmaī
 bacæimpa, ante wadepo mēnepoga go
 adodepoque iñonte itædē incæ woy-
 owotæ incæ ñimpo cædāmaī inte Ca
 ca wædinque mīnitō tōmāmīni imīnite
 apænebo eñēnōmīnimpa. Mānōmaīnō
 ante pōnēedāni,” ante Pabodo apæñecā
 eñēnānitapa.

³² Āninque tōmengā, “Iñānāni, botō
 mīnitō imīnite Wængonguī nempo ñōwo
 emō cæte gobo tamēñedāni. Tōmengā
 waadete nānō pōnō cædinō ante mōni
 apænedō ante eñente ewocamīni iñōmīnite
 tōmengā mīnitō imīnite godongāmæ cæcā
 ate tæi piñænte bacæmīnimpa. Ayæ
 Wængonguī quīmōni tōmāmōni tōnō mīnitō
 adocabomīni bayōmīnite tōmengā eyepæ
 da pōnogā ate mīnitō mōnitō tōnō
 godongāmæ æncæmīnimpa. ³³ Botō iñōmō
 æbānō quēwēmoī aedāni. Edæ wacā qui
 tigitamō incæ oodo incæ weocoo incæ,
 Botō qui bacæimpa, ante cōwē æinēnāmaī
 inōmoimpa. ³⁴ Edæ tōmēmo ōnompoca
 botō cædinō beyænque quiēmē ænguēnēmo
 ante eyepæ æninque quēwēnōmoimpa.

Ayæ botō tönō godongāmæ cædāni nāni ænguēnēnō ante adinque adobaī botō tōmēmo ōnompoca cædinō beyænque æninque tōmēnāni inānite da godō da godō cæbo æninque quēwēnōnānīmpa. Mānōmaī botō cædinō ante do ēñēmīnīpa. ³⁵ Mōnō Awēnē Itota incæ iūmaī ante apænegacāīmpa. ‘Māincoo æninque mōnō wædænque tomōmpa. Wæætē wacā ingante pædæ godōninque mōnō nanguī toquinque impa.’ Ante Itota nānō apænegāinō ante pōnēninque botō, Mānōmaī mōnō ōnompoca nanguī cædinque æninque wadāni nē ænguēnēnāni inānite mōnō pædæ godongæīmpa, ante mīnitō imīnite cōwē odōmonte apænebo ēñēmīnitapa.”

³⁶ Mānōmaīnō ante iīnque apænedinque Pabodo tōmēnāni tönō da guicapodinque Wængonguī ingante apænecantapa. ³⁷ Ayæ tōmēnāni Ca ca wædinque, Waa goe, ancæte ante godongāmæ goto pōninque tōmengā ingante yaagō yaagō cædānitapa. ³⁸ Tōmengā nānō, Botō imote æmæwo aminīpa, nānō ānīnō beyæ godōmenque nanguī wædānitapa. Ayæ tōmengā ingante ñænæ wipo ganca ænte māodāni gogacāīmpa.

21

Pabodo Eedotadēē gocampa

¹ Mōnitō tōniñadāni tönō godongāmæ wægōninque Pabodo tönō mōni goquin-cabo iñōmō, Wipo ñænæmpo do wogaa gocæ cæpa, ante adinque edæ, Nōwo gomōnīpa, ante tōmēnāni inānite emō cæte godinque mānimpodē go guītamōnīpa. Guīdinque mōnitō tōingā wogaa godinque Coto nāni quēwēñōmō ponte tōmæwæ æite monte ate iūmō ate Ododata gomōnique go Patada nāni quēwēñōmō pontamōnīpa. ² Patada iñōmō pō ti wæænte ayōmōni, Wipo ñænæmpo Pēnitīa goquīmpo impopa, ante adinque mānimpodē go guīdinque wogaa gotamōnīpa. ³ Wogaa godinque dipæmæ inō gomō ayōmōni wāā tēiwæñē Tipidebæ a ongō adinque tæcæpæ inō wodo tebæ wogaa gomōnique go Tidiabæ pontamōnīpa. Ayæ ñænæmpo mōni goīmpo Tido iñōmō māincoo ōwāaquī impa, ante

ēñēninque mōnitō māniñōmō adobaī ti wææntamōnīpa.

⁴ Ti wææninque mōnitō tōmēnāni quēwēñōmō ponte ayōmōni Itota ingante nē tee empote quēwēnāni a ongōnāni adinque mōnitō ōnompō æmæmpoque go mēōnaa iñonte tōmēnāni tönō godongāmæ quēwentamōnīpa. Tōmēnāni guīquēnē, Wængonguī Tæiyæ Waēmō Ōnōwoca apænecā ēñēnīnāni inte Pabodo ingante, Bitō wæquinque Eedotadēē iñōmō gocæ cæbīpa, ante wææ ānānitapa. ⁵ Mānōmaī ante wææ ānāni ēñēmōni incæte mōnitō, Mānimpoōnæque quēwenguēnēmōni in-tamōnīpa, ante adinque wadæ gotamōnīpa. Iīnque tōmēnāni nāni quēwēñōmō yabæ inō tōmēnāni nāni wencabo tōmānāni ænte māodāni godinque mōnitō emōnaiya pōninque godongāmæ da guicapodinque Wængonguī ingante apænetamōnīpa. ⁶ Apænete ate mōnitō, Gomōnīpa, āninque go ñænæ wipodē adopodē guīdinque wogaa gocæ cæyōmōnite tōmēnāni wæætē, Waa goedāni, āninque ocæ emænte tōmēnāni oncō godānitapa.

⁷ Mōnitō iñōmō Tido iñōmō wadæ tao wogaa godinque Todēmaida iñōmō pō tōmæwæ æidinque māniñōmō nāni pōnencabo inānite adinque mōnitō, Pōmōnīpa, āninque tōmēnāni tönō adoōnæque quēwentamōnīpa. ⁸ Iīmō ate wadæ godinque Tetadea nāni quēwēñōmō pōninque Pedipe oncōnē pō guīte quēwentamōnīpa. Wēēñēñedē Itota nānō nē emīñænāni, Mōnō pōnencabo beyæ ante nē cædāni tiæte ganca ināni incædānīmpa, ante nāni Tiæte ānōnāni iñōnāni adocā Pedipe tōmēnāni nāni pōnencabo beyæ ante nē cæcā inongā inte Codito waa pōni nānō pōnō cægaīnō ante nē apænecā inongāīmpa. ⁹ Tōmengā wēnāni baquedānique mengāa go mengāa iñōnānite Wængonguī Ōnōwoca pōnō cæcā ate tōmēnāni Wængonguī beyæ nē apænedāni inōnānīmpa. ¹⁰ Mōnitō Pedipe weca tæōnæ quēwēmōni ate wacā onguīñægā tōmengā emōwo Agabo Wængonguī beyæ nē apænedongā inte Oodeabæ quēwente wææ pongantapa. ¹¹ Mōnitō weca pōninque tōmengā Pabodo pacadeyænta æninque nāmā ōnompō goti

wimpote wæi ōnōwa goti wēwadinque iīmaī ante apænecantapa.

—Wængonguī Tæiyæ Waēmō Ōnōwoca botō imote æbānō ante apænecāā, ante apænebo eñēedāni. Oodeoidi Eedotadēē nē quēwēnāni iñōmō iī pacadeyænta nē ēadingā ingante mǎnōmaī goti wīninqe oodeoidi ināmaī ināni nempo pædæ godōnāni æncædānimpa, ante do apænecā eñēmopa, ante Agabo apænecantapa.

¹² Mǎnōmaī apænecā eñēninqe mōnitō Tetadea quēwēnāni tōnō Pabodo ingante wææ wææ apænedinqe, Eedotadēē godāmaī imāwe. ¹³ Ante wææ añōmōnite Pabodo wæætē,

—Mīnitō iñæmpa Ca ca wæmīni eñente wædinque wætawente awædō. Edæ Eedotadēē goyōmote bæi ongonte goti wīnāni incæte wænōnāni wæmo incæte botō iñōmō ñimpo cædāmaī inte mōnō Awēnē Itota emōwo beyænque cōwē gocæboimpa.

¹⁴ Ante mǎnōmaī apænecā eñēninqe mōnitō ancaa wææ añōmōnite Pabodo, Cōwē gocæboimpa, ante ñimpo cædāmaī inte angā wædinque mōnitō wæætē edæ, Wængonguī nānō ānō bai bacæimpa, ante adinqe mōnitō ee ate pæ wēenetamōnīpa.

¹⁵ Iīninqe mǎnīmpoōnæ mǎniñōmō quēwēninqe, Ñōwo mōnō Eedotadēē gocæimpa, ante cædinque Pabodo tōnō godongāmæ ee gotamōnīpa. ¹⁶ Goyōmōni Tetadea iñōmō quēwēnāni inte Itota ingante nē tee empote quēwēnāni pancadāniya mōnitō tōnō godongāmæ godinqe, Nāatōō oncōnē owocæmīnīmpa, ante mǎninganca ænte māmōnāni pō guītamōnīpa. Tōmengā iñōmō wāā tēiwæñē Tipidebæ nē quēwēningā inte dobæyedē Itota nānō nē emīñængā badingā inte quēwēnongāimpa.

Tantiago weca Pabodo eñacæ gocampa

¹⁷ Tōmengā oncōnē pō guī mōmōnīque go Eedotadēē pōñōmōni mǎniñōmō quēwente nē pōnēnāni iñōmō, Waa pōmīni amōnīpa, ante todānitapa. ¹⁸ Ayæ iīmō ate Pabodo tōnō godongāmæ mōni poncabo Tantiago weca eñacæ gotamōnīpa. Tōmengā weca pōñōmōnite nē pōnēnāni inānite nē aadāni nē Picænāni tōmānāni adoyōmō pōnānitapa. ¹⁹ Adinqe Pabodo, Waa

quēwēmīni, āninqe godōmenque iīmaī ante apænecantapa. Mēmōidi eñēedāni, āninqe, Botō oodeoidi ināmaī ināni weca gote cæyōmote Wængonguī iīmaī godongāmæ waa cæcantapa, ante Wængonguī nānō cædinō ante tōmengā adodō adodō ante apænecā eñēnānitapa. ²⁰ Eñēninqe nē aadāni Picænāni guiquēnē, Wængonguī, Bitō waa pōni cæbitapa, ante godongāmæ watapæ apænedānitapa. Ayæ Pabodo ingante wæætē apænedinqe,

—Biwī eñēmi. Oodeoidi æpodō mīido ganca ināni ñōwo do pōnente badāni abitapa. Tōmēnāni iñōmō Wængonguī nānō wææ angainō ante tōmānāni eñente cōwē cædāni abitawo. ²¹ Ayæ edæ bitō Pabodobi wēnæ wēnæ cædāmaī iñōmite wadāni bitō imitedō ante babæ wapiticæ godō oodeoidi inānite iīmaī ante tedewēnāni eñēnānīpa. Tōmēnāni, Pabodo wayōmō wayōmō godinqe oodeoidi wabæca quēwēnāni inānite bee tente odōmōninqe iīmaī ante apænecampa, ante tedewēnānīpa. Pabodo, Mīnitō wēnāni inānite eō togænāmaī iedāni, āninqe, Dodāni nāni angainō mīni eñēnō ante ñimpo cædāni, ante ānewengampa, ante tedewēnānīpa. Ayæ godōmenque āninqe, Mōitee wodi nānō wææ angainō ante wido cædāni, ante Pabodo ānewengampa tōō. Ante tōmēnāni bitō imitedō ante babæ ante tedewēnānīpa. Iñæmpa bitō mǎnōmainō ante ānāmaī iñōmite tōmēnāni oodeoidi inānite babæ ante apænedāni eñēnānīpa cæbii. ²² Iīninqe, Pabodo do pongāimpa, ante oodeoidi do eñenguīnāni inānīpa, ante pōnente wædinque mōnitō ñōwo, Æbānō cæte wææ cæquīī, ante wæmōnīpa. ²³ Iīninqe, Pabodo nō cæcā iñongante wadāni babæ wapiticæ tededānīpa, ante oodeoidi eñencædānīmpa, ante wææ cædinque bitō iīmaī cæcæbiīmpa amōnīpa.

“Pabodo eñēmi, ānānitapa. Mōnitō weca onguīñænāni mengāa go mengāa ināni ñōwo ongōninqe, Wængonguī beyænque ante cōwē cæcæmōnīmpa, ante nē ānīnāni inte tōmēnāni nāni ānīnō bai iīnque cæquīnāni inānīpa. ²⁴ Tōmēnāni, Mōnitō ānīnō ante do iīnque cædīmōni inte wentamō mongænāmaī imōni acædānīmpa,

ante cædinque, Wængonguī qui, ante godoncæ cædānīpa. Īnīnque bitō īñōmō mānīnāni īnānite ænte godinque tōmēnāni tōnō godongāmæ, Wængonguī qui, ante godōe. Ayæ bitō eyepæ pædæ godōmi ænīnque tōmēnāni nāni godonguēnencoo godonte ænīnque, Wængonguī qui, ante godōnīnque tōmēnāni ocaguī tōmanguī ocāa pōnī ēō tocate incædānīmpa. Bitō mānōmaī tōmēnāni tōnō īñacabo cædinque Mōitee wodi nānō angāinō baī cæbi adīnque oodeoidi wæætē, Æ, Pabodo nō cæcā īñongante wadāni īñōmō babæ wapiticæ tededānīpa, ante ēñencædānīmpa,” ante nē Picænāni ānānitapa.

²⁵ “Ayæ oodeoidi īnāmaī īnāni guiquēnē nē pōnēnāni badīnque æbānō cæquēnēnāni īnānīpa, ante pōnente wædinque mōnitō do godongāmæ pōnēnīnque tōmēnāni īnānite īmaī ante yewæmontamōnīpa. Wadāni, Wængonguīdi qui, ante cænguī nāni cōnōnīncoo ante mīnitō cænāmaī gomō aedāni. Wepæ owemōingā adīnque cæningā nē wīmencate wæningā adīnque cænāmaī iedāni. Ayæ nānōogængā īnāmaī īñongante mīnitō godō guēa mōnāmaī iedāni, ante do yewæmontamōnīpa,” ante nē aadāni Picænāni Pabodo ingante apænegadānīmpa.

Wængonguī oncōnē Pabodo ingante bæi ongōnānīpa

²⁶ Īimō ate nāō bayonte nē aadāni Picænāni nāni ānīnō baī ēñente cædinque Pabodo mengāa go mengāa īnāni īnānite ænte māocā gote cæyōnāni tōmengā nānō tæiyæ waēmō baquinque ante tōmēnāni tōnō Mōitee wodi nānō wææ angāinō ante ēñente cæcantapa. Mānōmaī cædingā inte tōmengā Wængonguī oncō nēñæncō yabæcōnē go guīdīnque mānīñōmō cædāni īnānite apænedīnque, Mōnitō adoque Wængonguī itædē go ate Mōitee wodi nānō angāinō īnque cæmōni ate īnāni īñōmō, Wængonguī qui, ante baō pædæ pōnōnāni ænīnque tancæmīnīmpa, ante Pabodo tōmēnāni beyæ ante apænecantapa.

²⁷ Ayæ ōnōmpo æmæmpoque go mēōnaa nānō ānīmpōnæ wodo īnque ba ate oodeoidi Atiabæ quēwente nē pōnīnāni guīquēnē Wængonguī oncō nēñæncō

yabæcōnē ponte ayōnāni Pabodo a ongōngā. Adīnque mānīñōmō ōnonque ongōnāni īnānite, Mōnō pīnte cæcæīmpa, ante ānāni ēñēnīnque īnāni wæætē ænguī badānitapa. Ayæ Pabodo ingante bæi ongonte, ²⁸ aa pedīnque tōmengā ingante nē pīnte ānāni īñōmō, “Idægoidi cōwā aedāni” ante, “Īngā ingampa cæmīnī. Pō godongāmæ cædāni. Tōmengā inguīpoga tōmāo godinque tōmāmæ quēwēnāni īnānite māo apænedīnque īmāinō ante tedewengampa. Idægoidi wēnæ wēnæ cædāni īnānīpa, ante cōwē ānewengampa. Wængonguī oncō nēñæncō incæ ōnonconque īmpa, angampa. Ayæ Wængonguī nānō wææ angāinō ante mōnō ēñēnāmaī ingæīmpa, ante tōmengā ānewengampa tōō. Ayæ īñōmō oncō tæiyæ waēmō oncō īñonte tōmengā wæætē guīdiegoidi īnānite ænte māmō īncōnē guīdīnque otæñē ōñō baī cæcantapa cæmīnī,” ante pīnānitapa.

²⁹ Do edæ wacā Todopīmo īñōmō Epeto īñōmō quēwēningā inte Eedotadēē pōnīnque Pabodo tōnō cægōna īnōnāīmpa. Mānōmaī guēa cægōna adīnque oodeoidi, Æ, īngā oodeocā īnāmaī īñongante Pabodo do Wængonguī oncō nēñæncō yabæcōnē ænte māmongā wāānē guībaīngampa, ante wawīque pōnēnīnque mānīnō ante wapiticæ apænedānitapa.

³⁰ Mānōmaī ante ānewēnāni ēñēnīnque Eedotadēē quēwēnāni tōmāo īñōmō Yæ yæ ānīnque pogodo pōnānitapa. Ponte Wængonguī oncō nēñæncō yabæcōnē māo pō guīdīnque Pabodo ingante bæi ongonte ænīnque oncodo wēā mantao godinque odemō do tee mōnedānitapa.

³¹ Ayæ godōmenque, Wænongæīmpa, ante tæcæ cæyōnāni adocanque mæī odōmāno tontadoidi awēnē cōmantante ingante apænecantapa. Eedotadēē tōmāo Yæ yæ ānīnque pogodo pōnānīpa cæbī.

³² Ante mæī angā ēñente wædinque awēnē cōmantante īñōmō tontado capitāoidi tontadoidi īnānite, Pōedāni, ānīnque nē Yæ ānāni weca pogodo wææ do pōnānitapa. Īnīnque awēnē cōmantante tōnō tontadoidi do wæænte pōnānīpa, ante adīnque wadāni wæætē Pabodo ingante nē tæi tæi pānīnāni

inte ñōwo ñimpo cædinque ee adānitapa. ³³ Pabodo weca pōninque awēnē cōmantante angā ēñēninque tontadoidi wæætē Pabodo ingante bæi ongōninque yaēmengō mēmēña goti wīnānitapa.

Awēnē cōmantante iñōmō, Æcānō ingāi, ante ayæ, Quīnō wēnæ wēnæ cæcāi.

³⁴ Añongante pancadāniya, Īmaī cæcantapa, añōnāni wadāni wæætē, Wīi Īmaī wadō cæcantapa, āninque wææ wææ añōnānite tontadoidi awēnē cōmantante iñōmō, Nōingā ante æbānō cæte ēñenguimoo, ante wædinque tontadoidi inānite angā ēñēninque Pabodo ingante tōmēnāni wææ cæte iñōmō ænte mæicæte ante cædānitapa. ³⁵ Ænte godinque tēwaimpa ganca tæcæ pōñongante godongāmæ ongōnāni godōmenque ænguī badinque wīwa cæcæ cædāni wædinque tontadoidi wæætē Pabodo ingante wææ cædinque ōnōnancapæ ængō cædinque adīmōngā næænte mæidāni tēwaimpa æicantapa. ³⁶ Ayæ tōmānāni edæ tee empote pōnāni iñōmō Yæ yæ āninque, “Cōwē wido cæcæimpa,” ante ancaa ānānitapa.

Pabodo nāmā wææ apæneccampa

³⁷ Wææ cætiñōmō tæcæ mangui guicæte ante cæyōnāni Pabodo iñōmō tontadoidi awēnē cōmantante ingante apænedinque, —Bitō Ao āmi ēñente ate botō adodeque bitō ĩmite apæneccæboimpa.

Añongante,

—Īñæmpa bitō guidiego tededō tedebe ĩmitawo. ³⁸ Bitō iñæmpa equitobi inōmi inte edæ doyedē, Wido cæcæimpa, ante cædinque nē, Wæñongæimpa, ante nāni ānincabo iñōnānite coatodo mīdo ganca ināni inānite ōnōmæca ænte māobi godānitapa. Botō ayōmo bitō adobi ĩmitapa tōō.

³⁹ Añongante Pabodo wæætē,

—Īñæmpa botō waobo ēñagaīmo inte oodebo inōmo ĩmopa. Botō wīi ōnōñōmonque ēñagaīmo ĩmopa. Tiditiabæ Tadoto nāni nanguī quēwēñōmō ēñagaīmo ĩmopa cæbii. Ao āmi ate botō iñāni inānite apænebo ēñēmaīnānīpa.

⁴⁰ Añongante Ao angā ate tēwaimpa adiyæ gongæninque godongāmæ ongōnāni inānite Pabodo, Apocænē ĩedāni, ante bai

cædinque compo compo cæcā. Adinque tededāmaī ongōnāni ate tōmengā ebedeoidi nāni tededō tededinque ĩmaī ante apæneccā ēñēnānitapa.

22

¹ “Botō tōniñamīni ĩmīni ēñēedāni. Botō wæmpomīni ĩmīni botō nāmā wææ apænebo ēñēedāni.”

² Ante Pabodo ebedeo tededō apæneccā ēñēninque tōmēnāni, Æ mōnō tededō apæneccampa, ante wædinque godōmenque ēamonca nōwæ ongōñōnāni tōmengā ĩmaī ante apæneccantapa.

³ “Botō iñōmō oodeobo ingaīmo ĩmopa. Tiditiabæ Tadoto iñōmō ēñagaīmo inte botō Eedotadēe ponte pægaboī aedāni. Iñōmō pædinque Gāmadiēdo nē odōmōngā weca adīmo inte botō mōnō mæmæidi nāni wææ angaīnō ante ædæmō ēñēninque adodō ante ēñente cæte pægaboimpa. Mīnitō, Wængonguī beyæ ante mōnō cōwē cæcæimpa, ante ñōwoōnæ cæmīnīpa. Mīnitō cæmīni bai botō adobai Wængonguī beyæ ante cæcæte ante cōwē nanguī cædinque quēwengaboimpa. ⁴ Īninque, Itota ōnædē godō Taadō bai ingampa, ante nē pōnēnāni inānite botō, Pāmo wæncædānimpa, ante togænte pangaboimpa. Onguīñænāni incæ onquiyænāni incæ tōmānāni inānite bæi ongōninque botō wadāni nempo pædæ godōmo æninque tōmēnāni wæætē nē pōnēnāni inānite māo tee mōnedāni wægadānimpa.”

⁵ “Mānōmaī cædinque botō, Godōmenque Daāmaco iñōmō godinque botō, Taadō, ante nē pōnēnāni inānite bæi ongonte goti winte adodō Eedotadēe iñōmō ænte māmō pædæ godōmo æninque awēnēidi wæætē tōmēnāni inānite pānāni wæcædānimpa, ante cætabopa. Mānōmaī cæcæte ante cæbo adinque, Wængonguī quī, ante nē godōngā ñænængā pōni inōngā tōnō nē aadāni nāni Picæncabo tōnō Ao āninque, Mōnitō tōniñadāni Daāmaco iñōmō quēwēnāni acædānimpa, ante cadota ante yewæmōnāni ænte gotabopa. Īninque, Botō æbānō cæboo, ante nē agaīnāni inte awēnēidi incæ edæ, Pabodo nāwangā

angampa, ante ñōwo nē apænequēnēnāni inānīpa,” ante Pabodo angantapa.

Botō wēēnē pōnēwengāinō ante ñimpo cædinque wadō ante pōnēmopa, ante Pabodo apænecampa

(Nāni Cægaīnō 9.1-19, 26.12-18)

⁶ Änīnque Pabodo, Iīmaī cægaboimpa, ante godōmenque apænecantapa, “Botō taadō godinque tæcæbæcä iñonte Daāmaco obo ponte ayōmote oönædē iñontobæ ñāō botō weca pō godongāmæ guīnæ gongæ ate wædinque, ⁷ botō guidōmēmæ tæ go wææntabopa. Ayæ eñēñōmote, ‘Taodo, Taodo. Botō imote quīnante togænte pāmīi.’ ⁸ Äñongante, ‘Awēnē, æbidō inōmi imīi.’ Ante wæyōmote tōmengä, ‘Itota Nāatadeta quēwēnīmo inte mānīmodō bitō nē togænte pānōmo imopa,’ ante apænecantapa. ⁹ Mānōmaī apæneyongä botō tōnō godongāmæ godāni guīquēnē ñāō gongænque adinque botō imote nē apænecä nānō tededō ante eñēnāmaī inānitapa. ¹⁰ Botō iñōmō, ‘Awēnē, quīnō cæquēnēmo imoo, ante āmi eñēmoe.’ Äñōmote mōnitō Awēnē wæætē, ‘Bitō ængæ gantidinque Daāmaco iñōmō goe. Botō, Taodo iīmaī cæcæcäimpa, ante wacä ingante Daāmaco iñōmō nē quēwengä ingante do apænebo eñengampa cæbīi. Bitō Daāmaco iñōmō gote ongōñōmi tōmengä wæætē bitō imite apænecä eñente cæcæbiimpa,’ angantapa. ¹¹ Ayæ ñāō gongæ adinque botō bee wodōmonte baī bayōmote botō tōnō godongāmæ godīnāni wæætē tōō æmænte Daāmaco iñōmō māodāni gotabopa,” ante Pabodo apænecantapa.

¹² Mānōmaīnō ante apænedinque Pabodo godōmenque apænecantapa. “Māniñōmō gote ongōñōmo wacä tōmengä emōwo Änāniya botō weca pongantapa. Tōmengä iñōmō Wængonguī ingante guīñente wædongä inte dodāni nāni wææ angāinō ante cōwē eñente cæcä inongäimpa. Iñinque oodeoidi māniñōmō quēwēnāni tōmānāni tōmengä ingante waa adōnānimpa. ¹³ Tōmengä iñōmō botō weca pō næ gongæninque, ‘Taodo, bitō botō biwī imi, ñōwo waa bamonte ae.’ Tæcæ äñongante botō æmō adinque

tōmengä ingante waa atabopa. ¹⁴ Tōmengä ayæ apænedinque, ‘Mönō mæmæidi Wængonguī incæ, Botō æbānō cæquīmo imoo, ante botō pōnente angāinō ante bitō eñencæbiimpa, ante cædinque bitō imite apænte ængampa. Ayæ, Mönō nō cædongä ingante tōmēmi acæbiimpa. Adocä apænecä eñencæbiimpa, ante cædinque Wængonguī bitō imite do apænte ængampa. ¹⁵ Iñinque nē adīmi inte nē eñēmi inte bitō iñōmō edæ bitō adīnō ante bitō eñēnīnō ante, Nāwangä impa, ante tōmāmæ quēwēnāni inānite māō apænebi eñencædānimpa. ¹⁶ Ñōwo iñōmō quīnante a ongōmīi. Ængæ gantidinque Itota emōwo apænedinque, Wēnæ wēnæ botō cædō pōnō ñā mēnongabi quēwēmoe, äninque æpænē guīe.’ Ante Änāniya angä eñēninque botō æpænē guīitabopa,” ante Pabodo apænecantapa.

Oodeoidi weca gotabopa, ante Pabodo apænecampa

¹⁷ “Ayæ ate adodō Eedotadēē pontabopa. Ayæ Wængonguī oncō ñæñæncō yabæcōnē go guīidinque Wængonguī ingante apænedinque botō ate baī cæwēnente ayōmō, ¹⁸ mönō Awēnē botō imote iīmaī ante apænecantapa. ‘Bitō botō imote ante nō apænebi incæte iñāni eñēnāmaī ināni inte Baa anguīnāni inānīpa cæbīi. Ñōwo Eedotadēē quingæ wodīi tao gobāwe.’ ¹⁹ Äñongante botō, ‘Awēnē eñēmi, antabopa. Oodeoidi odōmōincōnē wacōnē go guīidinque botō bitō imite nē pōnēnāni inānite māō tee mōnedinque tæi tæi pānīmo imopa. Mānōmaī impa, ante iñāni do eñēnānīpa. ²⁰ Ayæ, Itota incæ nāwā Awēnē inongä ingampa, ante nē apænecä iñongante Etebā wodi ingante wænōnāni wæñongä botō edæ Ao äninque nē wænōnāni weocoo aate a ongontabopa, ante tōmēnāni do agāināni inte botō imote waa aquīnāni inānīpa.’ ²¹ Ante wææ apænebo incæte Wængonguī Awēnē wæætē, ‘Ñōwo goe, ämopa, angantapa. Gobæ oodeoidi ināmaī ināni weca bitō imite da godōmo gocæbiimpa,’ ante da godongä gotabopa,” ante Pabodo apænecantapa.

Pabodo tontadoidi awēnē cōmantante weca ongongampa

²² Pabodo, Oodeoidi ināmaī ināni weca angā gotabopa, ante nānō apænedi ganca godongāmæ ongōnāni ēñēē gōnānitapa. Wæætē mānīne apænecā ēñente wædinque tōmānāni yedæ ānīnque, “Oodeoidi ināmaī ināni weca godingā iñōmō edæ quēwēnāmaī inguēnengā awædō. Tōmengā ingante mōnō wo ēwengæimpa.” ²³ Ānīnque tōmēnāni godōmenque ænguī badīnque Yæ yæ ānīnque nāmā weocoo yabæcooque gāni tadongadīnque wancæ wancæ cædinque onguīpo guidīmō ō ænīnque wo ææntodō wo ææntodō ancaa cædānitapa. ²⁴ Mānōmaī ænguī bate wēnæ wēnæ cædāni adīnque tontadoidi awēnē cōmantante angā ēñēnīnque Pabodo ingante wææ cæte iñōmō manguidāni guiicantapa. Ayæ, Quīnō wēnæ wēnæ cæcāi ante pīinte ānānīi, ante ēñencæte ante tontadoidi inānite apænedīnque, Mīnitō cōwē cædinō bai cædinque tæi tæi pāmīni caate wædinque Pabodo tōmāā tōmengā cædinō edonque pōnī apænecā ēñencæboīmpa, angantapa. ²⁵ Ēñēnīnque tōmengā ingante pancæte ante æmontaimenca tæcæ goti wīnīnque ñō cæyōnāni Pabodo iñōmō tontado awēnē capitāō māniñōmō ongongā ingante apænedīnque,

—Iñæmpa apænte ānāmaī iñōnāni botō odōmāno onguīñæmo iñōmote quīmæ pāwēmīnīi. Mānōmaīnō cædinque mīnitō awēnēidi nāni wææ angāinō ante dicæ ēñente cæmīniyaa.

²⁶ Āñongā capitāō wæætē awēnē cōmantante weca godīnque,

—Iñgā iñōmō odōmāno onguīñængā iñongā ingā атаque. Ñōwo æbānō cæquīmīi.

²⁷ Angā ēñente wædinque cōmantante iñōmō Pabodo weca pōnīnque tōmengā ingante,

—Bitō nāwangā odōmāno onguīñæmi īmitawo.

Āñongante Pabodo,

—Ao, bitō ā bai botō mānīmodō īmopa, angantapa.

²⁸ Pabodo apænecā ēñēnīnque cōmantante wæætē,

—Botō guiquēnē odōmāno ināmaī ēñagaīmo inte mānīnō bacæte ante cædinque nangūi godōmo ænīnque

odōmānoidi wæætē botō īmote, Odōmānobi īmīpa, ante yewæmōnāni bagaboīmpa.

Apænecā ēñēnīnque Pabodo wæætē,

—Botō guiquēnē odōmānobo ēñagaīmo inte edæ odōmānobo inōmo īmopa, ante apænecantapa.

²⁹ Mānōmaī apæneyongā nē pancæ cædināni guiquēnē do tōmengā ingante emō cæte wadæ godānitapa. Ayæ cōmantante iñōmō, Pabodo odōmāno onguīñængā iñongante botō āmo yaēmengonca goti wīnānīpa tōō, ante guīñente wædinque, Botō awēnēidi pīināni wæcæ wæ, ante wægacāīmpa.

Oodeoidi nāni Apænte Āincabo weca Pabodo ongongā

³⁰ Īimō ate cōmantante iñōmō, Quīnō Pabodo wēnæ wēnæ cæcāi ante oodeoidi pīinte ānānīi, ante ēñencæte ante Pabodo ingante āñecā ta pongantapa. Ayæ, Wængonguī quī, ante nē godōnāni ñænænāni tōnō oodeoidi tōmēnāni nāni nē Apænte Āincabo inānite āñete godongāmæ ponte ongōñōnāni Pabodo ingante ænte māwæ tōmēnāni weca gō cæcā gongængantapa.

23

¹ Pabodo iñōmō oodeoidi nāni nē Apænte Āincabo inānite gomō adīnque,

—Botō mēmōidi ēñēedāni. Botō mīmō entawente nāmā apænte cædinque Wængonguī beyæ botō cæquēnēnō ante wēēnēñedē iīnque cædinque cōwē ñōwo ganca adobaī cædinque quēwēmopa.

² Ante mānōmaī apænecā ēñente wædinque, Wængonguī quī, ante nē godongā ñænængā pōnī iñongā Ānāniya guiquēnē Pabodo gāānē ongōnāni inānite apænedīnque, Ōnōneca tæi tæi tadeedāni, angantapa. ³ Āñongā Pabodo wæætē,

—Bitō iñæmpa botō īmote apænte ancæte ante Mōitee wodi nānō wææ angāinō ante cæbitawo. Incæte adode nānō wææ angāinō ante ēñēnāmaī inte bitō edæ, Tæi tadeedāni, ante pōnō āmi awædō. Bitō weocoo waēmoncoo ēñabi incæte mīmō wēntamō entawēnīnque cæyōmite Wængonguī bitō īmite nāēmæ tæi tadecæcāīmpa tōō.

⁴ Ante apænecā ēñēnīnque Pabodo gāānē ongōnāni wæætē,

—Bitō iñæmpa, Wængonguī quī, ante nē godongā ñænængā pōnī iñongante quimæ tedewēmii.

⁵ Äñönānite Pabodo wæætē,

—Botō tōññadāni ēñēedāni. Botō, “Waodāni awēnē iñongante tōmengā ingante wēnæ wēnæ tededāmaī incæbiimpa,” ante do wææ yewæmongatimpa, ante do ēñēmopa. İninqe botō, İñömō ongongā, Wængonguī quī, ante nē godongā ñænængā pōnī iñongā ingampa, ante ēñēnāmaī inte botō mănōmaīnō ante apænetabopa.

⁶ Ante apænedinqe Pabodo, İñāni pancadāniya Tadoteoidi iñönānite pancadāniya Paditeoidi inānipa, ante adinqe tōmēnāni nāni nē Apænte Äincabo inānite aa pedinqe,

—Botō mēmōidi ēñēedāni. Botō Paditeo wēmo nē ēñagaīmo inte botō mæmpo Paditeo nānō ingaī baī botō adobaī Paditeobo inōmo imopa. Māñimodō inōmo inte botō, Mönō ñāni ömæmonte watapæ quēwengæimpa, ante pönēmopa. İninqe mănīne botō pönēnō beyænque botō imote apænte āninqe mīnitō pancæ cæmīni awædō, angantapa.

⁷ Pabodo mănōmaīnō ante apæneçā ēñente wædinque Paditeoidi tönō Tadoteoidi dodāni nāni pönengainō ante wæætedō wæætē ānewēninqe Paditeoidi nānēnē Tadoteoidi nānēnē nāni cabo nāni cabo badānitapa. ⁸ İmaī impa. Tadoteoidi guiquēnē, Mēwoga waomō ēwocamō inte mönō ñāni ömæmongæimpa, ante, Babæ ancædō, ante Baa āninqe, Önōwocaidi tönō anquedoidi Wængonguī weca owodānipa, ante adobaī edæ Baa ānāni inönānimpa. Paditeoidi guiquēnē mēnea ante pönēninqe Ao ānāni inönānimpa. ⁹ İninqe wadō wadō tedete ogæ tedeyönānite Paditeoidi tōmēnāni nē odömönāni pancadāniya ængæ gantidinqe,

—İngā iñömō mōnitō ayömōni wēnæ wēnæ cædāmaī ingampa tōö. Wæætē edæ anquedo incæ wacā önōwoca incæ Wængonguī weca owocā inongā inte tōmengā ingante apæneçā imaingampa ānewēmīni.

¹⁰ Ante nanguī ogæ tedeyönāni tōmānāni godōmenque Yæ yæ ānāni ate wædinque

tontadoidi awēnē cōmantante iñömō, Pabodo ingante æmæmæ inō tōö godō æmæmæ inō tōö godō cædinque æi guīñænāni wæmaingampa. Ante pönente guīñente wædinque tontadoidi inānite angā wæænāni ate, Pabodo ingante bæi ongonte ö æninqe wææ cæte iñömō ænte mæi tee möneedāni, angā ēñente tee mönedānitapa.

¹¹ İimō ate woyowotæ mönō Awēnē iñömō Pabodo weca ponte apæneçantapa. “Pabodo, Guīñente wædāmaī incæbiimpa. Bitō doyedē Eedotadēē iñömō botō imotedō ante apænedinqe, Nāwā Awēnē inongā ingampa, ante apænebitawo. Ñōwo iñömō do bitō apænedō baī Odömā iñömō godinqe adobaī apæneçæbiimpa,” angantapa.

Pabodo ingante wænongæimpa, ante cædānipa

¹² Ñāö bayonte Oodeoidi pancadāniya guiquēnē godongāmæ pönēninqe iīmaīnō ante Ao ānānitapa. Cænāmaī bedāmaī inīmo inte mönō Pabodo ingante wænongæimpa, ante cædinque, Pabodo mīi quēwēñongante mönō cabo incæ æcānō cæna æcānō beda māningā nānō wænguinque cæcampa.

¹³ Onguīñænāni nē ānāni iñömō coadenta ganca ināni ayæ godōmenque nanguī ināni godongāmæ pönēninqe mănōmaī ānewēninqe cædāni inānitapa. ¹⁴ İñāni iñömō, Wængonguī quī, ante nē godönāni ñænænāni tönō nē aadāni nāni Picæncabo weca godinqe iīmaī ante apænedānitapa.

—Mōnitō godongāmæ Ao āninqe, Pabodo ingante wænongæimpa. Edæ mīi quēwēñongante æcānō cæna æcānō beda nānō wænguinque, ante ämōnipa cæmīni.

¹⁵ Mīnitō tönō wadāni mīni Apænte Äincabo inōmīni inte mīnitō iñömō, Pabodo æbānō cæcāi, ante ædæmō ēñencæte ante wæte baī apænedinqe tontado awēnē cōmantante ingante babæ ante ämīni ēñēninqe tōmengā wæætē Pabodo ingante mīnitō weca ænte poncæ cæcæcāimpa, ämōnipa. Mānōmaī babæ ämīni ēñente cædinque cōmantante wæætē Pabodo ingante māwængā tæcæ wææñongante mōnitō guiquēnē taadō wææ wänōninqe bæi ongonte edæ wænömōni wæncæcāimpa ämōnipa.

16 Āñōnāni Pabodo nānōwāa iñōmō edæ do eñengantapa. Eñēninque tōmengā tontadoidi nāni wææ cæte iñōmō do go guiddinque Pabodo ingante apæneçä.

17 Eñēninque Pabodo wæætē tontadoidi awēnē capitāō ingante apænedinque,

—Īngā edēningā ingante mīnitō awēnē cōmantante weca ænte manguibi guicæe. Tōmengā cōmantante ingante adodeque apæneçæcäimpa.

18 Angā Ao āninque capitāō wæætē māningā edēningā ingante ænte guiddinque cōmantante ingante apæneçantapa.

—Pabodo mōnō nē tee mōnedongā iñōmō botō ĩmote aa pedinque ĩmaī angantapa. Īngā edēningā ingante awēnē cōmantante weca ænte māobi guiddinque tōmengā awēnē ingante adodeque apæneçæcäimpa, angantapa.

19 Ante apæneçä eñēninque cōmantante iñōmō edēningā ingante tōō æmænte nānēnē māocā goyongante,

—Botō ĩmote æbānō apæneçæte ante pōmii.

20 Āñongante,

—Awēnē eñēmi. Oodeoidi godongāmæ pōnēninque ĩmaī babæ cæcæte ante cædānipa. Tōmēnāni, Pabodo æbānō cæcāi, ante ædæmō eñencæte ante bai apænedinque bitō ĩmite babæ ante apæneçæ cædānipa. Bitō ĩmō ate Pabodo ingante tōmēnāni nāni nē Apænte Āincabo weca ænte poncæbiimpa, ante cædinque babæ cæcæte ante cædānipa. 21 Tōmēnāni iñōmō, Pabodo mīingā quēwēñongante æcānō cæna æcānō beda nānō wænguinque, ante nē ānōnāni inte edæ, Wæningæimpa, āninque cædānipa. Adodāni nāni cabo incæ coadenta ganca onguñænāni wænoncæte ante taadō do wææ wānōninque edæ, Wæñōmō wæncæcäimpa, ante edæ a ongōnānipa cæbii. Tōmēnāni, Bitō æbānō Ao anguimi, ante eñencæte ante ponte ānewēñōnāni bitō iñōmō wæætē tōmēnāni nāni ānō bai cædāmaī incæbiimpa āmopa.

22 Ante edēningā apæneçä eñēninque cōmantante iñōmō, Bitō, Awēnē ingante ante mānōmaī apænetabopa, ante wacā ingante apænedāmaī pæ wēenecæbiimpa. Nōwo edæ goe, angantapa.

Pedique weca Pabodo ingante ænte māodāni gocampa

23 Edēningā ingante mānōmaī angā gocā ate cōmantante wæætē awēnēna capitāōna mēnaa ĩnate aa pecā pōñōnate tōmēna ĩnate ĩmaī angantapa. Mīnatō nōwo tontadoidi ōnōwa nē godāni dotiento ganca ĩnāni tōnō cabayo mongænte nē godāni tetenta ganca ĩnāni ayæ tapa nē næænāni dotiento ganca ĩnāni tōnō mānimpodāni ĩnānite ĩmaī ancæmīnaimpa. Mīnitō nōwoñæ eyepæ cædinque wantæ wantæ guñongā wadæ godinque Tetadea ganca goedāni, ante da godōmīna tao gocædānimpa. 24 Ayæ Pabodo beyæ cabayoidi āmi ænte gocædānimpa. Tōmengā ingante wææ aadinque pancabaa awēnē gobedōnadodo Pedique weca āmīna ænte māodāni cabayo mongænte adīmōngā gocæcäimpa. 25 Āninque awēnē cōmantante iñōmō cadota ante ĩmaī ante yewæmongantapa.

26 Pedique eñēmi.

Bitō acæbiimpa, ante botō Codaodio Ditia ĩnōmo inte nōwo yewæmōmopa. Bitō nē gobedōnadodo awēnē ĩnōmi inte waēmō pōnī ĩmipa, āmopa. Waa quēwencæbiimpa, āmopa.

27 Īngā ingante oodeoidi bæi ongonte wænoncæ cæyōnānite botō wæætē, Īñæmpa ĩngā iñōmō odōmāno onguñængā ingampa, ante do eñente wædīmo inte tontadoidi tōnō godinque tōmengā ingante gā pe æmpote ō ænte wææ aatabopa. 28 Ayæ oodeoidi, Pabodo wēnæ wēnæ cæcāi, ante quīnante piinte ānāni. Ante eñencæte ante cædinque botō tōmengā ingante tōmēnāni nāni nē Apænte Āincabo weca ænte gotabopa. 29 Ānte gote eñēñōmo tōmēnāni dodānique nāni angāinonque ante, Pabodo eñēnāmaī cæcampa, ante piinte ānāni wætabopa. Īninque botō ayōmote tōmēnāni, Pabodo nānō wænguinque nānō tee mōnequinque wēnæ wēnæ cæcampa, ante piīninque ōnonquedō ante cædānipa, ante awædō. 30 Nōwo iñōmō, Īngā onguñængā ingante wænoncæte ante oodeoidi awēmō cædānipa, ante tededāni eñēnīmo inte botō tōmengā ingante bitō weca do da

godōmo gocampa. Tōmengā ingante nē piinte ānināni inānite bitō weca adobaī da godōmo godānīpa. Mānīnque ante yewæmōmopa.

Ante cadota ante yewæmōnīnque, Awēnē gobedōnadodo Pedique acæcāimpa, ante tontado awēnē cōmantante da godongā ænte godānitapa.

³¹ Īnīnque cōmantante nānō āninō ēñente cædinque tontadoidi woyowotæ tao godīnque Pabodo ingante Antipati ganca adīmongā māodāni gocantapa. ³² Īmō ate, Cabayo mongænte nē godāni tōnō Pabodo adīmongā gocæcāimpa, ānīnque tōmēnāni nempo ēmō cæte godīnque ōnōwa nē godānīque tōmēnāni nāni cæte quēwencōnē ocæ ēmænte godānitapa. ³³ Cabayo mongænte nē godāni wæætē Pabodo ingante godōmenque ænte godīnque Tetadea iñōmō pōnīnque awēnē gobedōnadodo ingante cadota pædæ godōnīnque Pabodo ingante awēnē nempo pædæ godōnāni ængantapa. ³⁴ Awēnē gobedōnadodo iñōmō cadota ænte adīnque, Bitō æbædō ēñagabiimpa. Āñongā Pabodo, Tiditiabæ ēñagaboimpa. ³⁵ Ante apænecā ēñēnīnque gobedōnadodo wæætē,

—Bitō imite nē piinte ānināni pōnāni ate māniñedē ate botō, Bitō æbānō apænequimi, ante ēñencæboimpa.

Ānīnque wææ wānōnāni inānite apænedīnque Mīnitō Awēnē Edode wodi nānō apænte angaincōnē Pabodo ingante ænte gote wææ wānōedāni, ante gobedōnadodo angā ænte godānitapa.

24

Pedique weca ongōnīnque Pabodo nāmā wææ apænecā

¹ Ōnōmpo æmæmpoque iñōnæ go ate, Wængonguī quī, ante nē godongā ñænængā pōnī inongā Ānāniya iñōmō Eedotadēē quēwēnīnque wææ Tetadea gocantapa. Ayæ wacā tōmengā ēmōwo Tedetodo tōmēnāni nāni wææ angāinō ante ædæmō adingā inte wadāni beyæ ante nē wææ apænecā inongā inte nē abogado nāni

ānongā inongāimpa. Tōmengā tōnō ood-eoidi nē aadāni nāni Picæncabo pancadāniya adobaī Ānāniya tōnō godongāmæ godānitapa. Godīnque pancabaa awēnē gobedōnadodo weca ponte apænedīnque, Pabodo nē wēnæ wēnæ cædongā ingampa tōō, ānānitapa. ² Pabodo ingante āñete māmōnāni pongā ate nē abogado Tedetodo iñōmō gobedōnadodo Pedique weca ongōnīnque apænecantapa.

—Awēnē gobedōnadodo ēñēmi. Bitō nempo quēwēnīnque mōnitō wantæpiyæ wæætedō wæætē cædāmaī inte godongāmæ piyænē cæte waa quēwēmōnīpa. Ayæ bitō nē aabi inōmi inte, Æbānō cæcæimpa, ante do ēñēnīnque mōnitō ōmæ iñōmō waa cæbi ate mōnitō godōmenque waa pōnī quēwēmōnīpa. ³ Awēnē Pedique, bitō waēmō pōnī inōmi inte imæca tōmāo waa cæbi ænīnque mōnitō bitō imite cōwē waa ate pōnēnīnque waa apænemōnīpa. ⁴ Incæte, Botō wantæpiyæ apænebo baī bitō wæcædōmiimpa, ante pōnente wædinque botō, Ao āmi ate wantæ iñō apænebo pōnō ēñēe, ante abogado Tedetodo angantapa.

⁵ Ayæ, “Mōnitō ayōmōni iñōmō ongongā iñōmō nē wēnæ wēnæ cædongā inte tōmāo godīnque wapiticæ apænecā ēñēnīnque oodeoidi ænguī badīnque Yæ yæ ānāni wæmōnīpa. Edæ Nāatadēnōidi wapiticæ nāni cæcabo iñōnānite iingā iñōmō adocā inongā inte nē angā ingampa tōō.

⁶ Ayæ Wængonguī oncō ñænæncō incæ ōnonconque baī baquinque tōmengā wēnæ wēnæ cæcā adīnque mōnitō tōmengā ingante bæi ongontamōnīpa. Ayæ mōnitō mæmæidi nāni wææ angāinō ante Pabodo æbānō ēñente cæcāi, ante mōnitō apænte ancæte ante cætamōnīpa. ⁷ Mānōmaī ante tæcæ cæyōmōni tōmengā mōnitō nempo ongōñongante cōmantante Ditia iñōmō māmō gā pe æmpote ō ængantapa. ⁸ Ayæ mōnitō adocā Pabodo ingantedō ante nē piinte āmōni iñōmōnīte adocā cōmantante Ditia angā ēñēnīnque bitō weca ponte ongōmōni ae. Bitō Pabodo ingante āmi ēñēnīnque tōmengā, Æbānō cæboī, ante nāmā wææ apænecæcāimpa. Tōmengā mānōmaī wææ apænecā ēñēnīnque bitō,

Mōnitō æbānō nāwangā āmōnīpa, ante do ēñencæbiimpa.”

⁹ Ante Tedetodo mǎnōmǎinō ante apæneyongante oodeoidi godongāmæ apænedinque, Tedetodo nāwangā angampa. Pabodo wēnæ wēnæ cæcā ingampa tōō, ante adoyōmō ante apænedānitapa. ¹⁰ Gobedōnadodo Pedique guiquēnē Pabodo gāmænō opo cæpoyongante Pabodo wæætē īīmaī apænecantapa.

—Awēnē Pedique ēñēmi. Tæiyæ wadepo īñonte bitō īīmæca nē apænte angāimi inte mōni oodeocabo æbānō cæmōni imōnii, ante do ēñēmīpa, ante adinque botō, Bitō weca ponte nāmā beyæ wææ apæncæboimpa, ante tobopa. ¹¹ Bitō īñōmō ēñencæte ante cæbi īinque īīmǎinō ante do ēñenguīmi īīmaīmīpa. Botō ōnompō tipæmpoga go mēōnaa mǎnīmpōnæque īñonte Wængonguī weca ædæ wæænīnque tōmēngā ingante waa apæncæte ante Eedotadēē æitabopa. ¹² Mǎniñōmō æi pōninque botō tōmēnāni ayōnāni quīnō wēnæ wēnæ cæboī ae. Botō Wængonguī oncōnē ñænæncō yabæcōnē go guiibo incæ, oodeoidi odōmōincōnē go guiibo incæ taadō gobo incæ wadāni tōnō guēadō guēa pīinte āmo dicæ adāniyaa. Botō ædōmē godinque Yæ yæ āmo dicæ ēñēnāniyaa. ¹³ Īinque tōmēnāni nāni, Pabodo wēnæ wēnæ cæcampa, ante nāni pīinte ānewēnō ante edæ, Nāwangā impa, ante quīnō impa odōmonguīnānii. Edæ dæ ampa, ante Pabodo nāmā wææ apæncantapa.

¹⁴ “Incæte mōnitō, Quēwenguīnō Taadō impa, ante mōni pōnēnōnō ante oodeoidi wæætē, Wapiticæ goquīnō impa, ante pīīnānīpa. Īinque, Pabodo mǎnīnōnō ante pōnēngampa, ante īīnāni nō ante apænedānīpa. Nāwangā impa, ante bitō īīmite āmopa. Botō mǎnīnōnō ante pōnēnīnque mōnitō mæmæidi Wængonguī ingante waa ate cædinque quēwēmopa. Ayæ Mōitee wodi nānō wææ angāinō ante botō Ao ānīnque Wængonguī beyæ nē apænedāni nāni yewæmongāinō ante adobaī Ao ānīnque quēwēmopa. ¹⁵ Wængonguī angā ate mōnō waocabo edæ nō cæmō incæ wīwa cæmō incæ tōmāmō wænte ate ñāni ōmæmōnīnque mōnō quēwēngæīmpa, ante īīnāni pōnēnānīpa. Botō tōmēnāni nāni

pōnēnō baī adobaī ante pōnente tobopa.

¹⁶ Mǎnōmaī beyæ botō, Wængonguī ayōngā incæ waodāni ayōnāni incæ botō nāmā apænte botō pōnēnō tæiyæ waēmō entawencæboimpa, ante cōwē nanguī cæbopa.”

¹⁷ Ānīnque Pabodo godōmenque apæncantapa. “Botō wayōmō gote tæiyæ wadepo quēwente ate tōmēmo ōmæ adodō pōninque, Ōmæpodāni wæwēnāni quī, ante ænte pōninque botō guīdēnāni oodeoidi īnānite wæætē pædæ godōmo ænānitapa. Ayæ, Wængonguī quī, ante baō pædæ godontabopa. ¹⁸ Mǎnōmaī cæyōmo ayōnāni botō īñōmō tæiyæ waēmō bacæte ante Mōitee wodi nānō angāinō baī do eyepæ cædīmo inte Wængonguī oncō ñænæncō yabæcōnē pō guīdinque, botō, Wængonguī quī, ante godōmo adānitapa. Wīī nanguī īnāni tōnō cædinque botō Yæ yæ ānāmaī inte cæbo adānitapa. ¹⁹ Incæte botō īmotēdō ante nāni pīinte ānīnō nāwangā ī baī wadāni guīquēnē oodeoidi incæ Atiabæ quēwente pōnāni īñōmō, tōmēnāni wæætē bitō weca do ponte anguēnēnāni īnānīpa. ²⁰ Botō oodeoidi nāni nē Apænte Āncabo weca ongōñōmote, Pabodo æbānō nō cædāmaī ingāā, ante apænte āñōnānite bitō weca ñōwo ongōnāni guīquēnē mǎnīnō ante nē ēñēnāni īnānīpa. Īinque wadāni dæ ānāni adinque īīnāni wæætē edæ tōmēnāni nāni ēñēnīnō ante nē anguēnēnāni īnānīpa. ²¹ Botō awēnēidi weca ongōnīnque yedæ ānīnque, ‘Mōnō wænte ate ñāni ōmæmongæīmpa, ante botō apænedō beyænque mīnitō ñōwoōnæ botō īmote apænte ānīnque pīīmīnīpa,’ ante apænetabopa. Īinque īñōmō ongōnāni wabānō adobaī adode botō ānīnō beyænque pīinte ānānīpa,” ante Pabodo nāmā wææ ante īīnque apæncantapa.

²² Pabodo mǎnīnganca apæncæ ēñēnīnque Pedique, Taadō ante nē quēwēnāni æbānō ante pōnēnānii, ante do ēñēngā inte, Idæwaa, ānīnque tōmēnāni īnānite,

—Cōmantante Ditia pongā ate wæætēdō wæætē mīni ānīnō ante apænte ancæboimpa.

²³ Ānīnque tontadoidi capitāō ingante apænedinque, Pabodo ingante tee mōnedāmaī inte wææ wānōedāni. Ayæ

tömengä quiēmē ante ænguēnengä ingä adinque tömengä æmigoidi ponte pædæ pönönāni ængä ïninqe mīnitō ee amīni æncæcäimpa, angantapa.

²⁴ Tæönæ go ate Awēnē Pedique tömengä nänöogængä Dodotida tönō nāna gæncaya pönatapa. Tömengä nänöogængä oodea onquiyængä ïnongäimpa. Pedique ïñömō Pabodo ingante añete māmönāni pöninque Pabodo wæætē, Codito Itota ingante mönō wede pönente quēwengæimpa, ante apænecä ēñē cönatapa. ²⁵ Ayæ Pabodo godömenque apænedinque, Mönō nō cæte quēwengæimpa, äninque, Mönō nāmā wææ aate waa cæte quēwengæimpa, angantapa. Ayæ, Wængonguī Awēnē nänō apænte anguïönæ oo baquïnō anguēnē, ante apænecä ēñēninque Pedique wæætē guïñente wædinque, Idæwaa, äninque,

—Nöwo gobæwe, angantapa. Waönæ ate botō eyepæ imo inte ämo bitō ïmite añete māmönāni ponte apænebi ēñēmaïmopa, angantapa.

²⁶ Mänömaï äninque tömengä, Pabodo wabänō, Nïmpo cæbi gocæboimpa, ante cædinque godonte æinta pönömaingampa, ante pönengantapa. ïninqe tömengä wantæ wantæ ïñō Pabodo ingante angä pönongä guëa tededatapa. ²⁷ Mänömaï ancaa cæyongä wadepo mēnepoga ba ate Pedique gobedönadodo awēnē ïninqe bayongante wacä Pontio Peto nāni änongä pöninque wæætē awēnē gobedönadodo bacantapa. ïninqe Pedique ïninqe awēnē bayedē, Botō ïmaï cæbo ate oodeoidi botō ïmote waa acædänimpa, ante pönente cædinque Pabodo ingante tee möneincönē oncodo tadönāmaï ee adinque wadæ gogacäimpa.

25

Gobedönadodo Peto weca Pabodo ongonte apænecampa

¹ Peto ïñömō pancabaa awēnē gobedönadodo tæcæ badingä inte mänimæ pöninque Tetadea nāni quēwēñömō mēönaa go adoönæque quēwēninque Eedotadēē go æicantapa. ² Eedotadēē ïñömō ponte ongönongante, Wængonguī quī, ante nē godönāni ñænænāni tönō oodeoidi awēnēidi tömengä weca pöninque, Pabodo

ïmaï wēnæ wēnæ cæcantapa töö, ante apænedāni ēñengantapa. ³ Tömēnāni doyedē adoyömō pönēninque, Gobedönadodo Peto ingante ämō ate tömengä wæætē Pabodo ingante Eedotadēē ïñömō da pönongä pönongante mönō taadō wææ wänonte ö ænte wænongæimpa. Ante nē pönēwēnāni inte tömēnāni ñöwo Peto weca pöninque ïmaï änānitapa. Gobedönadodo Peto ēñēmi, Bitō Ao ante möni ämaï pönō cæquïmi. Bitō Pabodo ingante ämi Eedotadēē ïñömō ænte māmönāni pongæ, ante ancaa änāni. ⁴ Eñēninque Peto wæætē tömēnāni ïnānite edæ, Pabodo ïñæmpa Tetadea ïñömō tee mönete ongongantawo. Botō tömēmo edæ oo adoyömō wæi gocæboimpa. ⁵ Äninque,

—Mänömaï beyæ mīnitō mīni cabo ïñömīnite nē änāni pancadāniya ïnānite da godömīni botō tönō godongämæ Tetadea wæi gocædänimpa. Pabodo wēnæ wēnæ cæcä ingä ïninqe tömēnāni mänīñömō pöninque ancædänimpa.

⁶ Äninque tömēnāni tönō wodo önonpo tipæmpoga ïönæ godömenque quēwēninque Peto wadæ godinque Tetadea wæi gocantapa. Pöninque tömengä ïmō ate awēnēidi apæncæte ante nāni containpaa tæ contadinque angä ate Pabodo ingante ænte māmönāni pongä. ⁷ Ate oodeoidi Eedotadēē quēwente ñöwo wææ pönināni inte pö godongämæ gongæninque, Pabodo mänömainö wīwa cæcampa, wadō wīwa cæcampa, ïmainö wīwa cæcampa, ante ancaa änewēnānitapa. Incæte Petoidi ïnānite, Nāwangä ante apænemönipa, ante odömoncæte ante tömēnāni quïnō impa ante odömönāni aquīnāni. ⁸ Pabodo ïñömō nāmā wææ apænedinque,

—Oodeoidi nāni wææ angäinö ante Baa änāmaï ïnōmo inte botō ēñente cæte quēwēnīmo ïmopa. Wængonguī oncö ñænæncö waa adinque botō mänincönē yabæcönē guiite wēnæ wēnæ cædāmaï intabopa. Odömänoidi tæiyæ awēnē Tetædo nänō änō ante ēñente cædinque wadō ante cöwē cædāmaï intabopa.

⁹ Äñongante Peto, Oodeoidi tömēnāni nāni änīnō baï cæbo ate botō ïmote waa acædänimpa, ante babæ cædinque Pabodo ingante,

—Botō Eedotadēē go æibo ate adinque bitō botō weca pōñōmi iīnāni piīnte nāni āninō ante apænte ancæboimpa. Bitō Ao ante, Gocæboimpa, āmitawo.

¹⁰ Āñongante Pabodo wæætē,

—Botō iīnæmpa odōmāno tæiyæ awēnē Tetædo nānō Apænte ante Contaimpaa gāānē ñōwo incæ ongōmo ae. Mīnitō iīñōmō Tetædo beyæ ante nē apænte āmīni inōmīni inte edæ botō imote nē apænte anguēnēmīni imīnitapa tōō. Bitō tōmēmi iīñōmō edæ, Pabodo oodeoidi inānite wēnæ wēnæ cædāmaī iningā ingampa, ante edæ do ēñēmīpa. ¹¹ Īnīnque wēnæ wēnæ cædinque botō tente wænguēnēmo imo baī botō edæ Baa ānāmaī inte edæ dobæ wæncædōmoimpa. Wæætē edæ, Wēnæ wēnæ cæbīpa, ante iīnāni oodeoidi nāni ānewēnō guiquēnē ōnonquedō ante ĩ inīnque waocā æcāmenque incæ ædō cæte tōmēnāni nempo pædæ godonguēnengā ingāā. Īnīnque botō, Odōmāno tæiyæ awēnē Tetædo ingante āmo botō imote pōnō apænte ancæcāimpa, angantapa.

¹² Pabodo mānōmaī angā ēñente wædinque Peto tōmengā tōnō godongāmæ nē apænte ānāni tōnō, Æbānō cæquīmōō, ante adoyōmō pōnēnāni ate tōmengā Pabodo ingante,

—Ao āmōnīpa. Tæiyæ awēnē Tetædo incæ apænte ancæcāimpa, ante do ānīmi inte bitō Tetædo weca edæ gocæbiimpa, angacāimpa.

Awēnē odeye Agodīpa ingante Peto apæñecampa

¹³ Tæōnæ go ate wacā awēnē odeye Agodīpa tōnō onquiyængā Bedēnite iīñōmō gobedōnadodo awēnē Peto ingante, Bitō iīmæca waa pōmi amōnāpa, ante apæñecæte ante Tetadea iīñōmō pōnīnque Peto weca ēñacæ pōnatapa. ¹⁴ Pōnīnque tæōnæ quēwēna ate awēnē Peto guiquēnē awēnē odeye Agodīpa ingante, Pabodo ingante iīmaī cætāmōnīpa, ante apæñedinque,

—Gobedōnadodo awēnē Pedīque wodi nānō nē tee mōnete ēmō cæte godingā iīñōmō onguīñængā adocanque ayæ a ongongampa. ¹⁵ Īnīnque botō Eedotadēē æite quēwēñōmote, Wængonguī quī, ante nē godōnāni ñænænāni tōnō oodeoidi inānite

nē aadāni nāni Picæncabo guiquēnē botō imote ānīnque, Māningā iīñōmō wīwa cæcā ingā adinque bitō tōmengā ingante apænte ānīnque āmi wænōnāni wæncæcāimpa, ānānitapa. ¹⁶ Ēñēnīnque tōmēnāni inānite botō wæætē iīmaī antabopa. Waocā nāmā beyæ apæñedāmaī iīñongante mōnitō mōni odōmānocabo iīñōmō nē pānāni inānite pædæ godōnāmaī imōnīpa. Wæætē wadāni, Īngā iīmaī cæte wēnæ wēnæ cæcampa, ante piīnte ānāni ēñente wædinque mōnitō māningā tōnō nē piīnāni inānite āmōni godongāmæ pōnānīpa. Ponte awīncadō awīnca adinque wæætēdō wæætē āñōnānite mōnitō iīñōmō, Tōmēnāni nāni piīnte ānīnō ante tōmengā æbānō nāmā wææ apæñecāā, ante ædæmō ēñente ate nōingā ante apænte āmōnīpa. Mānōmānō ante botō tōmēnāni inānite apæñetabopa, ante awēnē Peto apæñecantapa.

¹⁷ Ayæ, “Mānōmaī ante apænebo ēñēnīnque nē piīnte ānāni botō tōnō wææ Tetadea iīñōmō godongāmæ pōnānitapa. Īnīnque botō a ongōnāmaī do mōni apænte āimpaa iīmō ate go tæ contadinque, Māningā ingante ænte pōedāni, āmo ænte pōnānitapa. ¹⁸ Botō iīñōmō, Pabodo wadāni inānite wīwa cæcampa, ante piīnguīnāni imānānīpa, ante pōnentabopa. Incæte nē piīnte ānāni ængæ gantite apæñedinque edæ botō ante pōnēnīnō baī wīi piīnānitapa. ¹⁹ Wæætē edæ wadō ante piīnāni ēñente wætābopa. Wængonguī ingante æbānō cæte waa aquīi, ante tōmēnāni Pabodo tōnō wæætēdō wæætē piīnānitapa. Ayæ tōmēnāni mæmæīdi nāni wææ angāīnō ante tōmēnāni, Pabodo ēñēnāmaī ingampa tōō, ante piīnānitapa. Ayæ adocanque Itota wodi do wængāngā incæte Pabodo, Mīngā quēwēngampa, ante tedecampa tōō, ante piīnānitapa. ²⁰ Īnīnque botō, Quiēmē baī ānewēnāni, Æbānō cæte nō ēñente apænte anguīmoo, ante wædinque botō Pabodo ingante iīmaī antabopa. Tōmēnāni nāni piīnte ānīnō ante bitō Ao ānīnque Eedotadēē gote ongōñōmīte botō apænte ancæboimpa, antabopa.”

²¹ “Āñōmō tōmengā wæætē, Botō imote ee wææ wānōñōmīni, Botō æbānō cætawoo, ante tæiyæ awēnē Empedadodo mōnō

ānongā apænte ancæcāimpa, āmopa. Angā ēñēninque botō, Æyedēmē eyepæ ī ate Pabodo ingante tæiyæ awēnē Tetædo weca da godōmo gocæcāimpa, ante pōnēninque, Tōmengā ingante mānimpoga wææ wānōedāni, antabopa,” ante Peto apænegacāimpa.

²² Mānōmaī apænegā ēñēninque awēnē Agodipa wæætē,

—Īngā onguīñængā æbānō apænegā, ante tōmēmo ēñēnente wætabopa.

Āñongante Peto,

—Īmō ate tōmengā apænegā ēñencæbiimpa, angantapa.

²³ Īmō ate awēnē odeye Agodipa tōnō Bedānite iñōmō waēmō pōnī weocoo wēñate mongæninque tōmēnāni nāni ēñēincōnē ñænæncōnē pōninque, Mōnatō awēnēmōna iñōmōnate waa aedāni, ante baī cædinque wæñee da da pō guiidatapa. Ayæ tontadoidi tæiyæ awēnēidi tōnō māniñōmō quēwēnāni awēnēidi ñænænāni tōnō tōmēna miñæ dao dao pōnānitapa. Ayæ Peto angā ēñēninque nē wææ wānōnāni wæætē Pabodo ingante ænte māmōnāni pō guiite ongōñongante, ²⁴ Peto iñōmō,

—Awēnē odeye Agodipa ēñēmi, angantapa. Iñōmō ongōmīni tōmāmīni edæ ēñēedāni. Īngā ingante amīni. Tōmengā ingante āninque Eedotadēē quēwēnāni incæ iñōmō quēwēnāni incæ oodeoidi tōmānāni botō imote yedæ āninque, Īngā nē wēnæ wēnæ cæcā inte godōmenque wīī quēwenguēnengā ingampa cæbii, āninque, Bitō apænte ancæbiimpa, ante wædānīpa. ²⁵ Īninque, Adocā Pabodo nānō wænguinque wēnæ wēnæ cæcantawoo, ante botō cōwā ayōmo edæ dæ antapa. Ante wæyōmo tōmengā guiquēnē, Tæiyæ awēnē empedadodo incæ botō imote apænte ancæcāimpa, angā ēñente pōnēninque botō, Ao, tæiyæ awēnē Tetædo weca da godōmo gocæbiimpa, antabopa.

²⁶ Incæte, Īngā nānō cædinō ante tæiyæ awēnē aquinō ante botō ædō cæte yewæmonguimoo, ante wæbopa. Mānōmaī beyæ botō, Mīnitō tōmāmīni apænte āmīni ēñencæboimpa, antabopa. Ayæ, odeye Agodipa bitō tōmēmi apænte āmi nō ēñente ate yewæmoncæboimpa, ante cædinque

botō ñōwo Pabodo ingante ænte māmōmo ponte a ongongā aedāni. ²⁷ Īñæmpa botō, Mōnō nē tee mōnete ongongā wēnæ wēnæ nānō cædinō ante yewæmōnāmaī inte mōnō ædō cæte da godonguīī, ante awædō, ante Peto apænegacāimpa.

26

Agodipa weca ongonte Pabodo nāmā wææ apænegacāimpa

¹ Awēnē odeye Agodipa wæætē Pabodo ingante,

—Bitō ñōwo nāmā beyænque wææ apænegacæbiimpa, āmopa.

Angā ēñēninque Pabodo compo compo cædinque nāmā beyænque ante wææ apænegacæ cæcantapa. ² “Awēnē odeye Agodipa, ēñēmi. Oodeoidi nāni pīinte āninō tōmānō ante nāmā beyænque wææ apænedinque botō bitō awēnē imi weca ongonte apænebopa, ante adinque botō waa edæ tobopa. ³ Mōni oodeocabo dodāni nāni cægaī baī mōni cæinō ante bitō iñōmō edæ do ēñēmīpa, ante tobopa. Ayæ adobaī, Oodeoidi ñōwodāni æbānō ante wæætedō wæætē ante tededāni, ante do ēñēmi inōmi inte bitō botō wææ apænedō ante edonque ēñenguīmi imīpa, ante pōnēninque botō godōmenque tobopa. Īninque bitō Ao ante ee ongōninque ēñencæbiimpa, āmopa.”

Īmaī quēwengaboimpa, ante Pabodo apænegacāimpa

⁴ Ante apænedinque, “Botō ñōwo ganca æbānō quēwēmoī, ante oodeoidi tōmānāni do ēñēnānīpa. Edæ do wēñæmoyedē botō ēñagaīmæ quēwente pædinque botō edēnimoyedē ñōwo ganca æbānō Eedotadēē iñōmō quēwengaboī, ante do ēñēnānīpa. ⁵ Mōni oodeocabo incæ pancadāniya Wængonguī ingante wædænque ēñente quēwēñōnāni mōni Paditeocaboque wæætē, Dodāni nāni wææ angāinō ante mōnō ēñente cæcæimpa, ante ēñente quēwēmōnīpa. Botō iñōmō Paditeobo inōmo inte mānīnō ante cōwē Ao ante godōmenque nanguī cæte quēwentabopa. Īninque oodeoidi do agāināni inōnāni inte Ao ante baī, Nāwangā Pabodo ēñente quēwengampa, ante apænegacædōnānīpa. ⁶ Mōnitō mæmæidi inānite apænedinque Wængonguī, Mīnitō

beyæ cōwē pōnō waa cæcæboimpa, ante nānō angaiñō bai cæcā beyænque mōnō watapæ bacæimpa, ante botō pōnēmopa.”

“Nōwo iñōmō māniñe botō pōnēnō beyænque iñāni, Pabodo ingante apænte ancæminimpa, ante ænte māmōnāni pōninqe botō mīnitō weca a ongōmo aedāni. ⁷ Wængonguī, Mīnitō beyæ pōnō waa cæcæboimpa, ante nānō angaiñō ante iinqe bacæimpa, ante mōni pōnēnō beyænque mōni oodeo pægaincabo ōnompō tipæmpoga go mencaboga mānimpomōni imōni iñōmō woyowotæ itæde, Wængonguī ingampa, ante tōmengā beyæ cæte quēwēmōnīpa. Incæte awēnē odeyebi, ēñēmi. Wængonguī, Cōwē cæcæboimpa, ante nānō angaiñō ante mōni pōnēnō beyænque oodeoidi incæ botō imote, Wiwa cæbīpa tōō, ante pīinānīpa. ⁸ Mīnitō imīnite āmo apænemīni ēñēmoedāni. Do wænīnāni iñōnānite Wængonguī, Botō pōnō cæbo ate ñāni ōmæmoncædānīpa, angacāimpa. Mīnitō iñæmpa, Wængonguī ædō cæte mānōmaī cæquingāā, ante pōnente wædinque quīnante Baa ānewēmīni,” ante Pabodo angacāimpa.

Pabodo, Coditoidi inānite togænte pantabopa, angampa

⁹ Āninqe Pabodo godōmenque apænecantapa. “Botō wēenēñedē edæ oodeoidi nāni pōnēwēnō bai pōnengaboimpa. Māniñedē botō Itota wodi Nāatadeta quēwengāingā ēmōwo ante nāni pōnēnō ante pīinte cædinque nanguī wido cæquēnēmo imopa, ante pōnēwentabopa. ¹⁰ Īninqe botō Eedotadēē iñōmō quēwēninqe māniñonque ante cægaboimpa. Māniñedē edæ, Wængonguī quī, ante nē godōnāni ñænænāni inānite antabopa. Āmo Ao ante tōmēnāni nē ānāni inte yewæmonte pædæ pōnōnāni æninqe botō Wængonguī Awēnē quīnāni nanguī ināni inānite bæi ongonte æninqe nē tee mōnebo ingaboimpa. Ayæ tōmēnāni inānite wænōncæ cæyōnāni botō cōwē godō Ao angaboimpa. ¹¹ Botō wayōmō wayōmō godinque oodeoidi odōmōincōnē wantæ wantæ iñō go guidinque, Wængonguī Awēnē quīnāni tōmengā ingante godō wēnæ wēnæ ante pīincædānīpa, ante

cædinque pædāni, ante nanguī āmo pangadānīpa. Ayæ tōmēnāni inānite nanguī pīininqe godōmenque ænguī badinque botō tōmēnāni inānite pancæte ante wabæca nāni quēwēñōmō wabæca nāni quēwēñōmō incæ togænte gogaboimpa,” ante Pabodo wææ apænecantapa.

Wadō ante pōnente babopa, ante Pabodo adodō angampa

(Näni Cægaïnö 9.1-19, 22.6-16)

¹² Ante apænedinque Pabodo godōmenque, “Mānōmaī wabæca go wabæca go cædōmo inte Daāmaco iñōmō gocæte ante cætabopa. Cæyōmō, Pabodo iīmaī cæcæcāimpa, ante Ao āmōnīpa, ante, Wængonguī quī, ante nē godōnāni ñænænāni nē ānāni inōnāni inte botō beyæ cadota ante yewæmōninqe pædæ pōnōnāni ænte gotabopa. ¹³ Awēnē odeyebi, ēñēmi. Mānōmaī gote idōmæ goyōmo tæcæ bæcā pōni bayonte nænque nānō nāwā bai godōmenque nāwā ōōnæde īnō botonga mōni godongāmæ gocaboga pō tōmāo guīnæ gongæ. ¹⁴ Ate wædinque tōmāmōni guidōmēmæ go go wææñōmōni adocanque mōni ebedeo tededō tedete ōōnæde apænecā botō adoboque ēñentabopa. ‘Taodo. Taodo āmo. Botō imote quīnante togænte pāmīi. Īñæmpa wagada pāntoca bai bitō nāmā iñæ æwate wææñōmōni adocanque mōni ebedeo tededō tedete ōōnæde apænecā botō adoboque ēñentabopa. ‘Taodo. Taodo āmo. Botō imote quīnante togænte pāmīi. Īñæmpa wagada pāntoca bai bitō nāmā iñæ æwate wææñōmōni adocanque mōni ebedeo tededō tedete ōōnæde apænecā botō adoboque ēñentabopa. ‘Taodo. Taodo āmo. Botō imote quīnante togænte pāmīi. Īñæmpa wagada pāntoca bai bitō nāmā iñæ æwate wææñōmōni adocanque mōni ebedeo tededō tedete ōōnæde apænecā botō adoboque ēñentabopa.’

¹⁵ “Angā ēñente wædinque botō, ‘Awēnē, æbidō inōmi imīi.’ Ante ēñente wæyōmote, ‘Botō Itota inōmo inte bitō nē togænte pānīmo māniñmodō imopa cæbīi. ¹⁶ Nōwo edæ ængæ gantidinque adiyæ næ gongæmi āmopa. Botō beyæ nē pōnō cæbi āmo edæ bacæbiimpa. Ayæ, Botō imote æbānō abīi, ante bitō adīnō ante nē apænēbi āmo bayōmite botō īncayæ ate godōmenque odōmōmo ate bitō aquīnō ante bitō nē apænēbi āmo bacæbiimpa. Mānōmaīnō ante āmo bacæbiimpa, ante apænecæte ante botō bitō weca ponte a ongōmopa. ¹⁷ Ayæ bitō guīdēnāni oodeoidi incæ wadāni wabæca quēwēnāni incæ bitō imite wēnæ wēnæ cæcæ cæyōnāni ate botō bitō imite gā pe æmpote wææ gompobo beyænque bitō wæætē quēwēncæbiimpa. Tōmēnāni weca botō bitō imite da godōmo gocæbiimpa.

18 Tömēnāni botō imote wede pōnēnāni ate botō wēnæ wēnæ nāni cædinō ante godō ñimpo cæbo ate tōmēnāni do botō tæiyæ waēmō badongāināni tōnō adocabodāni baī badōmo badinque quēwencædānimpa, ante cæbopa. Mānōmainō cæcæte ante botō, Bitō Taodobi iñōmō tōmēnāni awinca wi æmōnte baī cædinque apænebi ēñēninque tōmēnāni wæætē edonque adinque ñāō inō gāmænō poncædānimpa, ante cæbopa. Tatāna nempo quēwēñōnānite bitō wæætē gā pe æmpote baī cædinque odōmōnte apænebi ēñēninque tōmēnāni wæætē edæ ocæ ēmænte pōninque Wængonguī nempo quēwencædānimpa, ante bitō imite da godōmo gocæbiimpa.’ Ante Awēnē Itota botō imote angā ēñente gotabopa,” ante Pabodo apænecantapa.

Pabodo, Öönædē apænecā ēñente cætabopa, angampa

19 Mānōmaī apænedinque Pabodo godōmenque, “Awēnē odeyebi Agodipa, ēñēmi. Botō wīimōnte baī ayōmo öönædē inō nē angā nānō angāinō ante botō ædō cæte ēñēnāmaī cæquīmoo. Edæ do cætabopa. 20 Tāno Daāmaco iñōmō quēwēnāni inānite apænedinque botō ayæ Eedotadēē iñōmō godinque māniñōmō quēwēnāni inānite apænedinque Oodeabæ quēwēnāni inānite go apæneboque go wayōmō oodeo ināmaī ināni inānite māo apænedinque iīmainō ante apænebo ēñēnānitapa. Mīnitō wēnæ wēnæ mīni cædō ante, Ancaa wæwente awædō, ante ñimpo cædinque Wængonguī gāmænō edæ pōedāni. Ayæ pōninque mīnitō, Māninō wēnæ wēnæ botō cædinō edæ æmæwo ñimpo cæbopa, ante edonque acæimpa, ante cædinque waa cæte quēwēedāni, ante āmo ēñēnānitapa.”

21 “Īninque botō mānōmaī cæbo beyænque Wængonguī oncō ñænæncō boyæ ongōñōmote oodeoidi botō imote bæi ongōninque edæ wænoncæ cædānitapa. 22 Mānōmaī wēnæ wēnæ cædāni incæte Wængonguī ñōwoönæ ganca botō tōnō cōwē godongāmæ cæcampa. Īninque botō, Wængonguī Awēnē æbānō cæcāā, ante guīñēnāmaī inte næ gongæninque awēnēidi inānite önōnānique inānite apænedinque apæneboī aedāni. Mōitee wodi tōnō wadāni Wængonguī

beyæ nē apænegāināni tōnō, Æbānō baquīi, ante apænegadānimpa, ante apænebopa. Mānīne tōmēnāni nāni apænegāineque adodō ante apænedinque botō godōmenque apænedāmaī imo inte edæ iīmainō ante apænebopa. 23 Mōiteeidi iñōmō, Mōnō Codito cōwē caate wæquingā ingampa, ante apænegadānimpa. Ayæ, Wænte ate tōmengā tānocā nē ñāni ömæmōningā inongā inte, Acædānimpa, ante cædinque ñāō tica ēnente baī tōmengā guīdēnāni inānite wadāni inānite edæ odōmoncæcāimpa, ante yewæmongadānimpa. Botō iñōmō, Mōiteeidi nāni angāinō do edæ ĩnque batimpa, ante apænedinque wadō ante apænedāmaī imopa,” ante Pabodo apænegacāimpa.

Agodipa, bitō Codito ingante pōnenguēñēmi ĩmipa, angā

24 Pabodo mānōmaī nāmā beyænque tæcæ wææ apæneyongante awēnē Peto do ogæ tededinque,

—Īñæmpa Pabodo ocai ömæcabi inte tedebe awædō. Nanguī wantæpiyæ dibodo adīmi inte idiquibæ pōnente babiimpa tōō.

25 Ante wææ tedecā ēñēninque Pabodo,

—Awēnē Peto bitō waa pōni awēnē gobedōnadodo ĩmi incæte botō wīi bitō ānō baī imopa. Botō wīi idiquibæ pōnēmo inte tōingā pōnēninque nāwangā ante apænebopa. 26 Awēnē odeye Agodipa guiquēnē tōmengā māninō botō apænedō ante tōmāā ēñengā ĩñongante tōmengā ingante edonque apænebo ēñengampa. Edæ māninō botō āninō wīi awēmō cætimpā, ante pōnēninque botō, Awēnē odeye incæ do adingā inte ædō cæte ēñēnāmaī inguīngāā, ante awædō. 27 Awēnē odeyebi Agodipa, ñōwo bitō imite apænebo ēñē. Wængonguī beyæ nāni apænegāinō ante bitō pōnēmitawo. Do pōnēmi ĩmitapa, ante ēñēmopa.

28 Āñongante Agodipa wæætē,

—Īñæmpa bitō botō imote wantæ ĩñō tededinque, Agodipa bitō Codito ingante do pōnencæbiimpa, ante cæcæte ante cæbitawo.

29 Āñongā Pabodo wæætē,

—Wantæ iñō apænebo incæ wantæpiyæ apænebo incæ bitō botō bai pōnēmi waa tobaīmopa. Edæ bitō tōnō godongāmæ ēñēē cōnāni tōnō mīnitō tōmāmīni botō bai entawencæmīnimpa, ante botō Wængonguī ingante apænebopa. Incæte, Botō bai baedāni, ānīnque botō, Yaēmengoncoo empocæmīnimpa, ante apænedāmaī intabopa.

³⁰ Ante Pabodo mǎnōmaī apæneca ēñēnīnque awēnē odeye Agodipa ængæ ganticantapa. Ayæ pancabaa awēnē Peto, Bedānite, godongāmæ ongōnāni adobaī tōmengā tōnō ængæ gantīnque, ³¹ mǎnīncōnē tao godīnque iīmaī ante tededānitapa.

—Īngā Pabodo wēnæ wēnæ cædāmaī iñongante quīnante wææ wānonguī. Quīnante apænte wænonguī. Edæ wēnæ wēnæ nānō cædīnō dæ ampa.

³² Ante tedeyōnāni Peto ingante Agodipa apænecantapa.

—Tetædo incæ botō imote apænte ancæcāimpa, ante Pabodo wīī angā bai botō edæ tōmengā ingante do ñimpo cæcædōmoimpa, angacāimpa.

27

Pabodo ingante Odōmā iñōmō da godōnāni gocampa

¹ Mǎnōmaīnō ante wædīnque mǎnīmæ awēnēidi, Pabodoidi inānite ñōwo Itadiabæ āmō wogaa gocædānimpa, ante godongāmæ Ao ānānitapa. Mǎniñōmō ton-tadoidi iñōmō tæiyæ awēnē empedadodo beyænque nāni wææ wānoncabo inōnāni inte Empedadodoidi nāni ānoncabo inōnānimpa. Tōmēnāni capitāo Codio nempo Pabodo tōnō wadāni nē tee mōnete ongōnīnāni inānite pædæ godōnāni ō ænīnque ænte gocantapa. Ayæ botō Odocabo nē yewæmōmo tōnō wadāni adobaī Pabodo tōnō godongāmæ gotamōnipa. ² Gāwapæntibæ wedeca gote ayōmōni wipo ñæñæmpo Adadāmitio wāi wocænte nāni ænte pōnimpo inte ñōwo Atiabæ godīnque wayōmō go ti wææ wayōmō go ti wææ nāni goquimpo adīnque mōnitō mǎnimpodē go guiite gāwapæntibæ wogaa gotamōnipa. Ayæ wacā Aditadoco Māatedōniabæ Tetadōnica iñōmō quēwēningā inte mōnitō tōnō pō

āampodenque gocantapa. ³ Īimō ate Tidōo nāni quēwēñōmō pō wāi wocæñōmōni Pabodo ingante capitāo Codio waa cædīnque pōnō apænecantapa. Bitō æmigoidi weca quiēmē bitō ænguēnēnō ante gote ænte pōe, ānīnque ee acā tōmæwæ gote ēñadīnque ænte pongantapa. ⁴ Ayæ mǎniī Tidōo iñōmō ēñate wogaa goyōmōnite mōni nē gocæ cædō woboyæ betamonca pæmæ ate wædīnque mōnitō wāa tēiwæñē Tipidebæ nāni āniwæñē wææ cæteīnō wogaa gotamōnipa. ⁵ Wāa tēiwæñē go wodo tebæ gomōnique go tæcæpæ pōni wogaa godīnque Tiditiabæ wodo tebæ pōmōnique go Pampidiabæ wodo tebæ pōmōnique go Ditiabæ godīnque Mīida nāni quēwēñōmō pō wāi wocæntamōnipa.

⁶ Mǎniñōmō wacā wipo ñæñæmpo Adecantodia nāni ænte pōnimpo adīnque capitāo Codio, Itadiabæ goquimpo impa, ānīnque mōnitō imōnite angā godongāmæ guiite wogaa gotamōnipa. ⁷ Tæōnæ iñonte wæñee godīnque mōnitō, Æiquedō goquimōniī, ante ancaa cæmōnique go Gōnido nāni quēwēñōmō go wodo tebæ gotamōnipa. Ayæ woboyæ cōwē mōnitō gocæ cædō inō nanguī pōni pō ate wæmōnique go wāa tēiwæñē Tadamōne wodo tebæ godīnque wawæñē Cædeta nāni ānōwæñē yaatænque gotamōnipa. ⁸ Mǎniwæñē wææ cæteīnō yæwedecaque ancaa cædīnque wæñee godīnque mōnitō Datea wēmonca wodōiñōmō nāni Waa Wodōiñōmō nāni āniñōmō pontamōnipa. Mǎniñōmō pōmōni ate wipodē nē cædāni iñōmō, Wipo ñæñæmpo wāi wocæñōmpo nāmā godāmaī ingæimpa, ante cædīnque teēmenca gæguincamē inte nāni ñā cæcadodīnca guitodōnāni nāñe ñongæ ate wipo godāmaī wāi wocæntapa.

⁹ Mǎniñōmō wāi wocænte owodīnque mōnitō, Quīngæ pongamō incæ wæñee pōmōmpa, ante wædīnque mōnitō, Woboyæ nanguī pæmæ tedæ baquinque mōnitō Wængonguī beyæ ante mōnō cænāmaī eōnæ do iīnque batimpa, ante pōnentamōnipa. Īnīnque mōnitō, Ñōwo mōnō wænguīnque wipodē godōmenque gomōmpa, ante wæyōmōni wipo ñæñæmpo nē ænte godāni inānite Pabodo nō pōnēnīnque wææ angantapa.

10 —Īñānāni, botō ayōmo mōnō ēwente wæquinque godōmenque gomompa. Māincoo mīni ænte gocoo wido cæquinque wipo nā tobæ go ate mōnō becadote wænguinque impa cæmīni.

11 Āñongā wipo ñænæmpo nē ēacā tōnō wipo capitāo wadō ante apæneda ēñēninque tontado capitāo Codio īñōmō Pabodo nānō ānīnō ante ēñēnāmaī cæcantapa.

12 Wæætē edæ, Īñōmō ponte mōnō wodōīñōmō woboyæ pæmæ tedæ īñonte wīi owoīnente wæmompā. Ante wædinque wodo tōmānāni, Pēnite nāni wēmonca wodōīñōmō nænque tamōnō imætæ īnō ongōninque woboyæ ante wææ cæte impa cæmōō. Nōwo wadæ godinque Pēnique nāni wēmonca wodōīñōmō go ti wæænte quēwēninque woboyæ pæmæ tedæ īnque pæmænte go ate mōnō gomonga gocæimpa, ante adoyōmō ānānitapa.

Wīni cai pompa

13 Mānōmaīnō, Gocæimpa, āñōnāni ñænæ wipo goquinque woboyæ dipæmæ īnō betamonca wædænque pæmæ ate wædinque, Mōnō ānīnō baī nōwo mōnō waa goquinque impa, ante todānitapa. Ayæ wipo ñænæmpo wāi wocæñō teēmenca nāni guitodōninca nōwo gæguincamenca quingæ īñæ æænō ñænæ wipodē cō cædāni ate mōnitō wogaa go Cædeta nāni ānōwænē yæwedecaque gotamōnipa.

14 Mānīnō tæcæ gocæ cæyōmōni do woboyæ wīni cai Yodocodōno nāni ānō wāā tēiwænē ayaēnēmāa īnō māmō pæmæ pōninque, 15 wipo ñænæmpo māmō ō ænimpā. Mōnitō, Mōnō wodōīñōmō adodō gocæimpa, ante cædinque woboyæ pōnō gāmænō ædō cæte wiya wēnente goquīi. Ante wædinque mōnitō ee amōni woboyæ betamonca īnō quingæ māmō dadi wēnente da godō māo gotamōnipa.

16 Wāā tēiwænē guiyāwænē Caoda nāni ānōwænē dipæmæ īnō yæwedeca woboyæ wææ cæteīnō godinque mōnitō guiyampo mōni wēā wēā ænte pōnimpō ante, Tobænāmaī impacæimpa, ante pæ pagænte ancaa cædinque wēā pōnonte pæ mantamōnipa. 17 Ayæ nē cædāni guiyæmpo gæguincamenca wēā æænonte ñænæmpodē da wēnānitapa. Guiyæmpo

da wēnente ate tōmēnāni, Ñænæmpo awæmpacoo wīi bedē wænecæimpa, ante cædinque ñænæ wipo incæ gæguincamenca wīni wīni cæte goto winānitapa. Ayæ, Ōnætāmō Tidite nāni ānontāmō impa, ante adinque tōmēnāni, Æ quingæ gomō baī mōnō wænguinque Tidite ēmōnaiboga go nāñe ñongæncædōnimpa. Ante pōnente guīñente wædinque wæñee gocæte ante cædinque weocoo ñænæmpodē pæmænte māo nāni gocoo incæ wēā wænonte ñō cædinque ee adāni woboyænque wæñee māo gotamōnipa.

18 Wīni cai īñōmō godōmenque woboyæ pæmæninque æpæ mængonta mængonta ante cæ wædinque wipo ñænæmpo incæ æmætæ dadiimæ æmætæ dadiimæ go wætāmōnipa. Īninque īimō ate tōmēnāni, Wipo ōmædē bate wodæī bacæimpa, ante cædinque māincoo ñænæmpodē ongōnincoo incæ æpænē edæ wido wido cædāni gotapa. 19 Waōnæ bayonte tōmēnāni, Ñænæ wipo quincōo, ante nāni cæincoo incæ nāmā ōnompoca pancacooga æpænē wido cædāni gotapa. 20 Ayæ tæōnæ īñonte nænque edæ tamōnāmaī nēmō tamōnāmaī ī ate mōnō, Ædōmē gomompa, ante ēñēnāmaī inte edæ wætāmōnipa. Ayæ woboyæ godōmenque māmō pæmæñō æpæ nanguī mængonta mængonta cæ wædinque mōnitō, Nōwo quēwenguīnāmaī imompa, ante edæ pōnēninque wætāmōnipa.

21 Mānīnāni wantæpiyæ cænāmaī īnāni adinque Pabodo tæcæguedē ængæ gantidinque tōmāmōni ayōmōni tōmēnāni īnānite īmaī apænecantapa.

—Īñānāni, botō āmo ēñēninque Cædeta nāni ānōwænē ēmō cæte pōnāmaī inte ee owoquēnēmīni imīnitapa. Edæ mānōmaī ee ongōmīni baī wipo tobænāmaī īñonte mīnitō māincoo ēwēnāmaī inte wædāmaī incædōmīnimpa. 22 Nōwo guiquēnē guīñēnāmaī piyænē cæte quēwēedāni. Ñænæ wipo mōnō goimpo incæ tobænte bacæimpa. Nāwangā impa. Incæte waomō īñōmō wænāmaī tōmāmō mīimō quēwenguīmō imompa. 23 Botō īñōmō edæ Wængonguī quīmo īnōmo inte botō, Wængonguī ingampa, ante tōmēngā beyæ cæbopa. Nōwoōnæ woyowotæ tōmēngā

anquedo botō weca pōnīnque, ²⁴ botō īmote apæneca ēñentabopa. “Pabodo, guīñēnāmaī īe. Tæiyæ awēnē Tetædo weca bitō cōwē gote gongæncæbiimpa. Ayæ bitō beyæ waadete pōnō cædinque Wængonguī bitō tōnō adopodē godongāmæ godāni īnānite do angā quēwencædānimpa.” ²⁵ Ante mǎnōmaī pōnō apæneca ēñēnīmo inte botō wæætē mīnitō īmīnite, Guīñēnāmaī īmīni inte pōnencæmīnimpa, āmopa. Tōmengā nānō apænedō baquīnō anguēnē, ante botō Wængonguī ingante nē wede pōnēmo inte āmopa. ²⁶ Incæte wipo ñænæmpoque wāā tēiwænē wawænē godinque tobænte ba wæcæimpa, ante Pabodo angantapa.

²⁷ Īnīnque mēa Wængonguī itædē īñonte woboyæ ayæ pæmæ māo godinque mōnitō Adodiaticopæ nāni ānōmāa wadō wadō wogaa gotamōnipa. Mānimpoōnæ īnīnque go ate woyowotæ ayaōnænēña īñonte wipo ñænæmpodē nē cædāni īñōmō, Onguipoīya obo pōmōmpa, ante pōnēnānitapa. ²⁸ Tōmēnāni, Ēgancadō īi, ante acæte ante cædinque pædæ guidonte adīnque todēinta i tei mēetodo impa, ante adīnque ayæ godōmenque godinque pædæ guidonte adīnque tōmēnāni, Nōwo edæ pōnōmenque bæintitiæte mēetodo impa, ante wædānitapa. ²⁹ Dicaboga pōnī edæ gomō tamēñedāni, ante guīñente wædinque, Nænæ wipo wāī wocængæimpa, ante teēmenca nāni guitodōnīnca menca go menca yāmīñæmpo īnō edæ guitodōnānitapa. Ayæ, Nāō ba waa tobaimpa, ante Wængonguī ingante apænedīnque edæ wāī wocænte a owotamōnipa. ³⁰ Wipo ñænæmpo nē cædāni guīquēnē, Mōnō wodīi wīnongæimpa, ante awēmō cædinque waca nāni guitodōnīnca yæcadopo īnō guitodoncæte ante cæte baī babæ cædinque, Mōnō awēmō goquimpo, ante guiyā wipo incæ pædæ wæænoncæ cædānitapa. ³¹ Guiyæmpo tæcæ pædæ wæænōñōnāni Pabodo īñōmō tontado capitāo tōnō tontadoidi īnānite angantapa.

—Īnāni wipo ñænæmpo nē cædāni inte ñænæ wipodē ongōnāmaī īnāni baī mīnitō ædō cæte nāmā cæte quēwenguīmīni.

³² Angā ēñente wædinque tontadoidi guīquēnē ñænæ wipo nē cædāni nāni

awēmō gocæ cædimpo gæguīncamē aa wiyænāni īnīnque guiyæmpo tæi guīte æmæwo gotimpa.

³³ Tæcæ oque pōnente īñonte Pabodo īñōmō, Tōmāmīni cænguī cæedāni, ante nanguī ānīnque,

—Nōwo mēa Wængonguī itædē īñonte mīnitō ancaī guīñente wædinque ee ate cænāmaī quēwēmīni abopa. ³⁴ Nōwo īñōmō mīnitō īmīnite, Cæedāni, āmopa. Cænte quēwenguēnē cæmīni, āmopa. Mīnitō æcāmenque incæ tōmāmīni wænāmaī incæmīnimpa.

³⁵ Ānīnque tōmānāni waa ayōnāni Pabodo pāo ænīnque Wængonguī ingante, Waa pōnōmī cæmōnipa. Ante apænedīnque ao mænte cængā. ³⁶ Adīnque tōmēnāni, Mōnō quēwengæimpa, ante gancæ pōnente wædinque tōmānāni cænānitapa. ³⁷ Wipodē mōni adopodē gocabo īñōmō dotiento tetenta i tei mānīmpomōni intamōnipa. ³⁸ Mānōmaī cædinque tōmēnāni eyepæ cænāni ate edæ, Wipo teēmē ēmīñænte ōnætāmō īñōmō gobaimpa, ante guīñente wædinque, Wodæī bacæimpa, ante cædinque mōnitō cænguī tōmēmō incæ æpænē gāwapænē wido cægadānimpa.

Wipo ñænæmpo incæ goyæ guīpa

³⁹ Mānīī ñāō bayō ōmæ adīnque ñænæ wipo nē cædāni īñōmō, Īimæ quīmæmē impa, ante ēñēnāmaī īnāni īnānitapa. Wæætē cōwā ayōnāni, Ēpæ wedeca togaa paodāmæ īñōmō ēmōnai impa, ante adīnque, Eyepæ īmō īnīnque mōnō ēmōnaiboga wipo nāñe ñongæimpa. ⁴⁰ Ante cædinque teēmenca nāni guitodōnīncacoo ēmō cæte gocæte ante gæguīncamē aa wiyænīnque ñimpo cædāni tadōmengadæ ee ongontapa. Ayæ wiyaimpa mēmpaa tōmēnāni wāī wocæñedē yāmīñæmpoya īnō nāni goti wīnimpa incæ ñōwo wæætē edæ, Wipo tōō gocæimpa, ante ñī cædinque æpænē wæætē pædæ guidōnānitapa. Ayæ, Woboyæ pæmænte māo gocæimpa, ante ñænæ wipo weocoo adocooque yæcadopo pædæ æænonte wo cædāni ate ēmōnaiboga togaa paodāmæ īñōmō tōingā māo gotamōnipa. ⁴¹ Incæte tæcæ goyōmōni ōnætāmō īñōmō nāñe ñongæntapa. Wipo

yæcado nāñe ñongæ adinque mōnitō, Mōnō ædō cæte goquī, ante wæyōmōni æpæ nanguī mængonta mængonta cæ beyænque yæmiñæmpo nā tobæninque panguimæ panguimæ æmæwo gopotapa.

⁴² Tæcæ tobæñō tontadoidi guiquēnē, Nē tee mōnete ongōnāni wīi tæi tæi pante wodii wīnonguīnāni, ante wææ cædinque tōmēnāni inānite wænōncæ cædānitapa.

⁴³ Adinque tontado capitāo iñōmō, Pabodo cōwē quēwencæcāimpa, ante cædinque tōmēnāni nāni cæcæ cædinō ante wææ angā ēñente ñimpo cædānitapa. Ayæ mōnitō imōnite, Nē ipo cæmīni iñōmō tāno æpæñē tæi guidinque ōnompoca compo compo go tōmæwæ ōmaa goedāni, angā ēñente gotamōnipa. ⁴⁴ Wadāni ipo cædāmaī ināni inānite tōmengā, Mīnitō guiquēnē awæmpaa incæ wipopa tobænimpaa incæ nāñe ñongæninque wiyacæ wiyacæ goedāni, angā ēñente godānitapa. Mānōmaī ēñente cædinque mōnitō edæ tōmāmōni æpæmpo becadote wænāmaī inte ōmaa edæ tōmæwæ pongamōnimpaa.

28

Wāā tēiwæñē Mānatabæ Pabodo ponte quēwengampa

¹ Æpæmpo becadote wænāmaī inte tōmāmōni ōmaa taote ēñēñōmōnite, Wāā tēiwæñē iīwæñē Mānatabæ impa, ante apænedāni ēñentamōnipa. ² Māniōmæ quēwēnāni iñōmō wīi wadāni baī cædinque mōnitō imōnite waadete cædānitapa. Cōönæ ayæ nanguī cæ ate yoguite wæyōmōnite tōmēnāni gonga tånōninque, Pō ootoedāni, ānāni gonga tōmāmōni bæcoyōmō oototamōnipa. ³ Pabodo iñōmō ōnompoca gæte tēnewæ bacoo ænte māmō ñō cæyongā gonga ocoi ā wædinque tæntæ gongapamō manta Pabodo ōnompō æo pocænte ñinga cædāmaī ee engate owo wæcā.

⁴ Adinque iñōmō quēwēnāni wæætē nāni cabo nāmāneque tededinque, “Iingā iñōmō waocā ingante nē wæningā ingā awædō. Tōmengā æpæmpo becadote wænāmaī iñongante edæ mōnō nō cæte pānongā incæ tōmengā ingante ata cæpodāmaī inte angā ate ñōwo quēwenguīnāmaī incæcāimpa.”

⁵ Ante wapiticæ ante pōnente tedeyōnānite Pabodo iñōmō pongadāmaī ingā inte pipo cæcā tæntæ ñingacæ gongapamō togodo guite gonga gonte wængantapa.

⁶ Adinque tōmēnāni, Tincadō pæncæ pæncæ mempoquingāā, ante ayæ, Tincadō iñontobæ tæi go wæænte wænguingāā, ante acæte ante wantæpiyæ cōwā ayōnāni, Ayæ dæ pongadāmaī i inque ingampa, ante adinque tōmēnāni wæætē edæ, Æ iingā wacā wængonguī inongā inte ponte a ongongampa, ante wapiticæ ante pōnēnānitapa.

⁷ Ayæ māniwæñē awēnē Pobidio iñōmō tōmengā quincodē mōni ōmaa pōñōmō eyequeī intapa. Tōmengā, Oncōnē pō guite quēwēdāni, angā pō guite mōnitō mēōnaa go adoñæque quēwēñōmōni tōmengā waadete pōnō cæcā ate waa quēwentamōnipa. ⁸ Pobidio mānōmaī waa cæcā quēwēñōmōni, Tōmengā mæmpo wepæ tōnō gōmæ cæte daicawo gawænte mōimoga a ōñongampa. Ante apænedāni wædinque Pabodo tōmengā weca guidinque Wængonguī ingante apænedinque gampocā ate waa bacantapa. ⁹ Pabodo mānōmaī cæcā adinque māniwæñē tōmāo gode ānāni ēñente wædinque nē wēnæ wēnæ ināni inānite Pabodo weca ænte māmō ænte māmō cæyōnāni tōmānāni Wængonguī cæcā waa badānitapa.

¹⁰ Māniñōmō quēwēnāni mōnitō imōnite wæætē pōnō waa apænedinque cōwē waa cædānitapa. Ayæ wogaa tæcæ gocæ cæmōni adinque quiēmē mōni ænguēnēnō ante adinque tōmēnāni, Mīnitō ænte goquī, ante eyepæ pōni ænte māmō da wēnāni ænte gotamōnipa.

Odōmā iñōmō Pabodo pongampa

¹¹ Ayæ mōnitō Mānatabæ iñōmō mengāa go adocanque māmonque quēwēninque gocæte ante cædinque, Åancadēnaquepo, Adecantodia iñōmō quēwēnāni nāni pemonte ānimpodē go guitamōnipa. Tōmēnāni wængonguīna Catodo tōnō Podoco awinca baī ante badōninque tōmēnāni ñænæ wipocado gō cædinque wipo ñænæmpo emōwo, Åancadēnaquepo impopa, ante pemōnōnānimpaa. Mānimpo Mānatabæ wēmonca wodōiñōmō do

pōninque pæmæ tedæ wāi wocæ adinque mōnitō iñōmō mānimpodē go guiidique wogaa gotamōnipa. ¹² Godinque Tida-cota iñōmō nāni wēmonca wodōiñōmō pō wāi wocæninque mōnitō mēōnaa go adoönæque quēwentamōnipa. ¹³ Ayæ wadæ godinque Odeguio nāni quēwēñōmō pontamōnipa. Iimō ate dipæmæ gāmæñō woboyæ betamonca wædænque pæmæ wædinque mōnitō wadæ godinque waōnæ ate Poteodi quēwēnāni nāni wēmonca wodōiñōmō æmæwo pō ti wææninque tōmæwæ gotamōnipa.

¹⁴ Tōmæwæ godinque Poteodi nāni quēwēñōmō ponte ayōmōni nē pōnēnāni nāni cabo ongōnāni atamōnipa. Tōmēnāni, Adoque Wængonguī itædē mōnitō tōnō ee owoedāni, ānāni Ao ante mōnitō tōmēnāni nāni ānimpoga māniñōmō quēwentamōnipa. Ayæ ate Odōmā taadonque gotamōnipa. ¹⁵ Odōmā iñōmō quēwente nē pōnēnāni iñōmō, Pabodoidi oo pōnānipa, ante do ēñēnāni inte doönæ tadinque mōnitō imōnite bee tencæte ante pōnānitapa. Pancadāniya iñōmō Apio nāni godonte æiñōmō ganca pōninque mōnitō imōnite māmō bee tēnāni ate godongāmæ gotamōnipa. Godinque, Cæincō, ante Menconga go Adoconque, nāni āñōmō māniñōmō pōñōmōni wadāni māmō bee tēnānitapa. Māniñāni inānite adinque Pabodo iñōmō, Nōwo iñōmō wampo pōnēmopa, āninque Wængonguī ingante waa ate pōnēninque apænecantapa. ¹⁶ Ayæ odōmānoidi nāni nangui quēwēñōmō Odōmā nāni āñōmō pōñōmōni tontado capitāo iñōmō nē tee mōnedīnāni wadāni inānite tōmengā awēnē nempo pædæ godōninque Pabodo ingante tee mōnedāmaī ingantapa. Wæætē wacōnē nānēnē ænte māodāni quēwēñongante tontado adocanque tōmengā ingante wææ wānōnongāimpa.

Odōmā iñōmō Pabodo quēwengampa

¹⁷ Māniñōmō ponte ate Pabodo mēōnaa go adoönæque ate oodeoidi nē ānāni inānite āñecā godongāmæ pōnāni ate tōmēnāni inānite,

—Botō tōniñamīni, ēñēdāni. Mōnō guidēnāni inānite wēnæ wēnæ cædāmaī inte botō dodāni nāni angāinō ante wido

cædāmaī iñōmote oodeoidi incæ Eedotadēe iñōmō botō imote bæi ongōninque æninque odōmānoidi nempo pædæ godōnāni gotabopa. ¹⁸ Odōmānoidi guiquēnē botō imote apænte āninque, Æbānō cæcantawo, ante ancaa ante adinque, Pabodo dicæ tōmengā nānō wænguinque wēnæ wēnæ cæcāa, ante adinque botō imote ñimpo cæcæte ante cædānitapa. ¹⁹ Odōmānoidi botō imote ñimpo cæcæte ante cæyōnāni oodeoidi wæætē ancaa Baa ānāni ēñente wædinque botō iñōmō edæ, Odōmānoidi tæiyæ awēnē Tetædo incæ botō imote apænte anguēnengā ingampa, antabopa. Mānōmaī ānimo incæte botō awēnē Tetædo weca ongōninque, Botō guidēnāni wēnæ wēnæ cædānitapa, ante wæætē pīinte ānāmaī incæboimpa. ²⁰ Mānōmaī beyæ mīnitō imīnite apænecæte ante botō, Pōedāni, antabopa. Nōwo apænebo ēñēdāni. Mōnō idægocabo iñōmō, Mōnō nē ponguingā Codito pōnō cæcā beyænque watapæ bacæimpa, ante mōnō pōnēmompa. Māniñō mōnō pōnengāinō beyænque botō daagōmē ñānoncapoīmo a ongōmo aedāni.

²¹ Ante apæneyongante tōmēnāni wæætē Pabodo ingante apænedinque,

—Oodeabæ quēwēnāni bitō imite ante yewæmōninque cadota pædæ pōnōnāni dicæ æmōniyaa. Mōnitō tōniñadāni Oodeabæ quēwente pōninque bitō imitedō ante dicæ wīwa ānāniyaa. Bitō wīwa cædīnō ante yewæmōninque odōmōnāmaī inōnānimpa. ²² Mānōmaī i incæte wayōmō wayōmō tōmāmæ quēwēnāni, Māniñāni Coditoidi iñōmō wēnæ wēnæ cædāni inānipa, ante pīinte tededāni do ēñēmōni ininque mōnitō, Bitō ayōmi Coditoidi æbānō cædāni ināni. Æbānō pōnēmīi, ante ēñencæte ante wæmōnipa.

²³ Āninque tōmēnāni, Iiōnæ godongāmæ bee tēninque ēñengæimpa, āninque wadæ godānitapa. Ayæ wæætē māniñōnæ nāni āniñōnæ iinque ba ate ocæ emænte pōñōnāni tæiyæñāni bee tēninque Pabodo weca godongāmæ pōnānitapa. Pōnāni adinque Pabodo iñōmō baānæ contadingā gāwadecæ pōni apænedinque, Wængonguī Awēnē Odeye nempo mōnō quēwengæimpa, ante apænecantapa.

Ayæ, Mōitee wodi tönō Wængonguī beyæ nē apænegaināni, Mönō Codito ponte cæcæcäimpa, ante nāni angainō bai Itota iñōmō ñōwo ponte tōmānō ante do iinque cægacäimpa. Nāwangä impa, ante botō apænebo eñēmaimīnīpa, ante Pabodo oodeoidi inānite apænecantapa. ²⁴ Angä eñēninque pancadāniya, Pabodo nāwangä angampa, änānitapa. Pancadāniya guiquēnē, Wīi pönēinente awædō, änānitapa. ²⁵ Nāni cabo incæ mänōmaī wæætedō wææte apænete wadæ gocæ cæyōnānite Pabodo wææte æmæwo apænecantapa.

—Wængonguī Tæiyæ Waēmō Önōwoca apænecä eñēninque Itaiya wodi doyedē mīnitō mæmæidi inānite nāwangä ante apænegacäimpa.

²⁶ “Itaiya eñēmi, bitō oodeoidi weca godinque iīmaī ante apænebi eñencædānimpa.

Mīnitō önōmoncaque eñēninque eñēnāmaī incæmīnimpa.

Awıncaque adinque cōwē adāmaī incæmīnimpa, ante apænebi eñencædānimpa.

²⁷ Iināni edæ mīmō ömædēnāni inte wīi eñēinente wæwædō, äninque ædō cæte eñenguīnāni.

Awınca wīi äinente awædō, änāni inte ædō cæte aquīnāni.

Edæ mīmō enēnāni inte bai tōmēnāni awınca wi æmonte adinque

önōmonca wi æmoncate eñencædōnānimpa.

Edæ mīmō nō pönēninque dadi emænte botō gāmænō pönāni bai

botō do godō cæbo waa bacædōnānimpa.”

Ante Itaiya wodi mīnitō mæmæidi beyæ ämotamīni ante bai yewæmongacäimpa.

²⁸ Iinque mīnitō oodeoidi inōmīni inte eñēnāmaī imīni adinque Wængonguī ñōwo wææte, Botō pönō æmo beyænque quēwencæmīnimpa, ante oodeo ināmaī ināni inānite do apænecæ cæcampa. Tōmēnāni guiquēnē ædæmō waa eñenguīnāni inānīpa, ante apænebo eñēmaimīnīpa, ante Pabodo apænecantapa.

²⁹ Mänōmaī apænecä eñente wædinque oodeoidi nāni cabo nanguī pōnī wæætedō wææte äninque wadæ godānitapa.

³⁰ Pabodo iñōmō oncō ænte quēwencæte

ante tōmēnāni nāni godonte æinta pædæ godōninque wacä oncō incæ tōmengä oncō bai bayō mänincōnē wadepo mēnepoga quēwengantapa. Ayæ, Æcānō eñacæ pōinēna cōwē botō weca waa ponguīmīni, ante quēwēninque tōmengä nē pönāni inānite apænecä eñēnōnānimpa. ³¹ Ayæ nē wææ wänōnāni cōwē Baa änāmaī iñōnāni tōmengä guīñēnāmaī apænedinque, Wængonguī Awēnē Odeye nempō mönō quēwengæimpa, ante apænedinque, Mönō Awēnē Itota Codito æbānō cægacäi, ante edonque odōmonte apænecä eñengadānimpa.

Odömānoidi inānite Pabodo nānō cadota ante yewæmongainta

Waa quēwencæminimpa, ante

¹ Itota Codito ingante nē cædōmo inte botō Pabodobo inōmo inte iī cadota ante nē yewæmōmo imopa. Wængonguī botō imote apænte æninque iīmainō ante aa pegacāimpa. Bitō Pabodobi gote botō pōnō cædō ante watapæ apænebi eñencædānimpa, ante angacāimpa.

² Māninō, Wængonguī æbānō pōnō cæquingā, ante watapæ apænedinque tōmengā beyæ nē apænegaināni wēenēñedē pōni nāni tæiyæ waemō yewæmongainō ante botō māninō ante nē apænebo imopa.

³ Māninō waa pōni nānō cæquinō ante iinque cæcæte ante cædinque Wængonguī tōmengā Wengā ingante da pōnongā pongacāimpa. Tōmengā iñōmō waocā onguiñængā nānō baquinque Awēnē Dabii wodi Pæingā inte eñagacāimpa. ⁴ Adocā Itota iñōmō botō Wengā inongā ingampa, ante tōmānāni edonque acædānimpa, ante odōmoncæte ante cædinque Wængonguī tæi piñænongā inte iīmaī cægacāimpa. Iingā Itota Codito mōnō Awēnē iñōmō Tæiyæ Waemō ewocā inte do wæningā iñongante Mæmpo Wængonguī wæætē nanguī angā ate ñāni omæmongacāimpa.

⁵ Ayæ adocā tōnō godongāmæ cædinque tōmengā emōwo beyæ mōnitō imōnite Wængonguī pōnō waadete cægacāimpa. Ayæ, Minitō wabæca wabæca gote apænemini eñēninque tōmāmæ quēwēnāni Itota Codito emōwo ante wede pōnēninque nē eñente cæte quēwēnāni bacædānimpa, ante cædinque Wængonguī adobaī Itota onompo inte mōnitō imōnite da godongā gotamōnipa. ⁶ Iinque tōmāmæ quēwēnāni inānite Itota Codito, Botō gāmænō pōedāni, ante aa pedinque mīnitō imīnite adobaī aa pecampa. ⁷ Minitō botō quimīni badinque botō ayōmō tæiyæ waemō ewocate quēwēmini bacæminimpa, ante Wængonguī cægacāimpa. Iinque mīnitō Odōmā iñōmō quēwēninque Wængonguī quimīni

iñōmīnite botō, Acæminimpa, ante iīmaī ante yewæmōmopa. Mōnō Mæmpo Wængonguī tōnō Awēnē Itota Codito waadete pōnō cæyōnate mīnitō wæætē gānē pōnente bacæminimpa, āninque yewæmōmopa.

Odōmā iñōmō eñacæ pōinēmopa, ante

⁸ Minitō æbānō wede pōnēmīni, ante tōmāmæ quēwēnāni tededāni eñēnānipa. Iinque botō iñōmō Itota Codito emōwo apænedinque Wængonguī ingante waa ate apænebopa. Wængonguī bitō adobique pōnō cæbi ate odömānoidi wede pōnēnānipa, ante apænebopa. ⁹ Wængonguī Wengā ingantedō ante watapæ apænedinque botō Wængonguī ingante nē cædōmo inte tōmengā nānō ānō ante ædæmō ewocadinque apænebo eñēnānipa. Botō mānōmaī cæbopa, ante nē adingā inte Wængonguī iñōmō edæ, Odömānoidi beyæ ante Pabodo botō imote woyowotæ incæ itædē incæ apænecampa, ante nē eñengā ingampa. ¹⁰ Edæ, Wængonguī, bitō Ao āmi ate botō ñōwo odömānoidi weca eñacæ gobaīmopa, ante Wængonguī ingante mīnitō beyæ ante botō cōwē apænebopa. ¹¹ Wængonguī Onōwoca beyæ apænebo eñēninque mīnitō tæi piñænte ewocæminimpa, ante cæcæte ante botō mīnitō weca eñacæboimpa, ante wæbopa. ¹² Edæ mīnitō botō wede pōnēnō beyæ wampo pōnente bayōmīni botō wæætē, Minitō wede pōnēmīnipa, ante adinque adobaī wampo pōnēmo iinque mōnō pōnencabo godongāmæ wampo pōnēninque godōmenque tæi piñænte entawengæimpa, ante pōnēninque botō mīnitō imīnite aīnente wæbopa.

¹³ Botō wabæca quēwēnāni weca gote apænebo eñēninque pancadāniya wede pōnēnāni badānitapa. Iinque, Botō mīnitō weca gote apæneyōmo wadāni pancadāniya adobaī wede pōnencædānimpa, ante cædinque botō æpogamē incæ poncæ cæyōmo edæ wææ cæte intapa. Iinque botō, Tæmpo poncæ cætabopa, ante yewæmōmo ate eñencæminimpa, ante yewæmōmopa. ¹⁴ Edæ guidiegoidi incæ wadāni incæ, ocai encadāni incæ ocai omæcadāni incæ ædānimē iñōnānite botō debe inte bai edæ tōmānāni inānite odōmonte apænequēnēmo inōmo imopa.

15 Mänömaï beyæ mīnitō Odömā iñōmō quēwēmīni iñōmīnite botō mīnitō imīnite adobaï mōnō Codito ingantedō ante watapæ apænecæte ante nanguï cæinente wæbopa.

Mōnō tæi piñænte ewocadō Codito beyænque impa, ante

16 Mōnitō oodeomōni iñōmōnite tāno apænedinque Wængonguï iñōmō mīnitō oodeoidi ināmaï iñōmīnite ayæ adobaï apænedinque, Mīnitō wede pōnēmīni adinque Codito waa pōni pōnō ængā beyænque quēwencæmīnimpā, ante tæi piñænte cægacāimpā. Ìnīnque mānīnō Codito ingantedō ante botō iñōmō watapæ apænedinque, Wængonguï tæi piñænte nānō cægāinō impā, ante pōnente wædinque edæ guññenedāmaï inte do apænebopa. 17 Mōnō wede pōnēmō iñōmonte Wængonguï mānīne ante odōmonte watapæ apænecā beyænque mōnō nō cæte quēwēmō bagamōimpā. Mānīne beyænque godōmenque wede pōnente badinque mōnō wede pōnēnō beyænque quēwēmompā. Ìnīnque docā iñōmō Wængonguï beyæ yewæmōninque, “Nē nō cæte quēwēnongā incæ tōmengā nānō wede pōnēnō beyænque quēwencæcāimpā,”²⁴ Mänömaï cædāni ate wædinque Wængonguï, Mīnitō mīni cæinente wædō ante ee abo cæcæmīnimpā, ante da godongā wadæ godinque tōmēnāni baonga nāni ñōmæi mongænte quēwenguinque cædōnānimpā. Ìnīnque nāna gæncaya nāna gæncaya nāni monguēnēnō ante Baa ante guññēñadāmaï inte cædinque wacā ingā wacā ingā godō wīwa cædōnānimpā. 25 Wængonguï nāwangā pōni nānō apænegainō ante tōmēnāni Baa āninque mā pōnēninque nāni babæ apænegainonque ante Ao ānōnānimpā. Mänömaï cædōnāni inte tōmēnāni wæætē Wængonguï nānō nē badongaincoo weca ædæ wæænīnque, Mōnitō wængonguï impā, ante cædinque nē Badongaingā ingante edæ emō cæte wadæ gogadānimpā. Incæte tōmengā nē Badongaingā iñongante mōnō wao-cabo inguipoga mōnō quēwēñedē ayæ ate mīnguipo bayonte wantæpiyæ mōnō quēwēñedē Wængonguï ingante, Bitō tōmēmi toquinque pōnō waa cæbi æmōnīpa,

Mōnō waocabo wentamō mongænte wæmompā, ante

18 Nē wīwa cædāni guiquēnē wīwa nāni cædō beyænque wadāni edæ Wængonguï nō pōni nānō apænegainō ante ædō cæte eñenguīnāni. Ìnīnque Wængonguï ingante nē wīwa cædāni nāni eñēnāmaï inīnō ante godō piīninque tōmengā oōnædē ongōninque wīwa nāni cædinō beyænque do pangā wædāni edonque amompā. 19 Wængonguï, Botō æbodō imoo, ante tōmāmīni edonque pōni eñencæmīnimpā, ante cædinque tōmāmō imonte odōmōninque tōmēnāni inānite adobaï edonque pōni odōmongā wægadānimpā. 20 Wēēnēñedē pōni nē quēwengaināni tōnō ñōwo ganca quēwēmō adobaï, Wængonguï mōnō nē adāmaï inongā inte æbānō quēwengāā, ante eñencæte ante wægāimō inōmō inte mōnō tōmengā nānō badongaincooque adinque edæ edonque

pōni acæimpā. Edæ, Tōmengā ñimpo cædāmaï inte cōwē nē tæi piñænongā ingampa, ante ayæ, Nē Wængonguï inongā ingampa, ante wædinque mōnō waocabo edonque aquēnēmō imompā. Ìñæmpā eñēnāmaï intabopa, ante ædō cæte anguīi.

21 Wængonguï ingante do ate baï in-gaināni incæte waodāni tōmengā ingante edæ, Bitō Wængonguï ñāō emōnōmi imīpa, ante edæ ānāmaï inōnānimpā. Wængonguï ingante waa ate pōnente apænedāmaï inōnānimpā. Mänömaï ocai omæcadāni baï mīmō omædēnāni baï badinque tōmēnāni wentamō entawēnāni bagadānimpā. 22 Ocai encamōni imōnīpa, ante ānāni incæte tōmēnāni wæætē mänömaï cædinque ocai omæcadāni bagadānimpā. 23 Edæ Wængonguï wænāmaï nē Quēwengaingā iñongante tōmēnāni wæætē godō Baa angadānimpā. Tōmengā nānō ñāō emōnō ante piīnte cædinque tōmēnāni wæætē waomō nē wæwocamō mōnō emōnō baï badōninque, oōmā eñadāni nāni emōnō baï badōninque, ocaguï eñadāni nāni emōnō baï badōninque, ocaguï omaadāni nāni emōnō baï badōninque tōmēnāni, Mōnitō wængonguï ingampa, ante cædōnānimpā.

24 Mänömaï cædāni ate wædinque Wængonguï, Mīnitō mīni cæinente wædō ante ee abo cæcæmīnimpā, ante da godongā wadæ godinque tōmēnāni baonga nāni ñōmæi mongænte quēwenguinque cædōnānimpā. Ìnīnque nāna gæncaya nāna gæncaya nāni monguēnēnō ante Baa ante guññēñadāmaï inte cædinque wacā ingā wacā ingā godō wīwa cædōnānimpā. 25 Wængonguï nāwangā pōni nānō apænegainō ante tōmēnāni Baa āninque mā pōnēninque nāni babæ apænegainonque ante Ao ānōnānimpā. Mänömaï cædōnāni inte tōmēnāni wæætē Wængonguï nānō nē badongaincoo weca ædæ wæænīnque, Mōnitō wængonguï impā, ante cædinque nē Badongaingā ingante edæ emō cæte wadæ gogadānimpā. Incæte tōmengā nē Badongaingā iñongante mōnō wao-cabo inguipoga mōnō quēwēñedē ayæ ate mīnguipo bayonte wantæpiyæ mōnō quēwēñedē Wængonguï ingante, Bitō tōmēmi toquinque pōnō waa cæbi æmōnīpa,

ante mōnō apænecæimpa. Mānōmaī impa, ante Amēē, āmopa.

²⁶ Mānōmaī cæyōnānite Wængonguī, Mīnitō guīñēñadāmaī mīni toīnente wædonque gobæwedāni, ante da godongā gogadānimpa. Īnīnque onquiyæñāni incæ, Nē onquiyæmo īnōmo inte botō onguīñængā tōnō monguēnēmo īmopa, ante ānāmaī īnāni inte godō wacā onquiyængā tōnō towente mōwēnōnānimpa. ²⁷ Ayæ onguīñæñāni incæ adobaī cædinque, Botō onguīñæmo īnōmo inte onquiyængā tōnō monguēnēmo īmopa, ānāmaī īnāni inte godō wacā onguīñængā tōnō mōīnente gonga bæco bai toīnente wædāni bagadānimpa. Īnīnque cōwē nāni waa quēwenguēnēnō ante Baa ānīnque nāni onguīñæncabo īnōnāni inte wīwa cædōnānimpa. Mānōmaī cæyōnānite Wængonguī eyepæ pōnī godō pangā wædinque tōmēnāni wīwa nāni cædō beyænque nāmā baonga caate wæwengadānimpa.

²⁸ Wængonguī ingante mōnō pōnente ēñengæimpa, ante tōmēnāni, Ōnonquedō ante impa, ante tedeyōnānite Wængonguī wæætē, Ocaidē wentamō encadōmīni inte edæ waomīni mīni wīi cæquēnēnō incæ ee abo cæbæwedāni, ante da godongā gogadānimpa.

²⁹ Tōmēnāni īñōmō nō cæquīnāmaī īnāni inte do wīwa cædānique badīnque īīmaī cædānipa. Wacā ingā godō towēnīnque tōmēnāni wadāni īnānite nē wēnæ wēnæ cædānique īnānipa. Māīncoo ante æīnente wæwēnāni inte tōmēnāni, Wacā gomonga ængā ingante godō pīinte adānipa. Ayæ edæ, Mōnō godō wænongæimpa, ante cædinque do cædānipa. Guēadō guēa pīinte cædānipa. Wacā oda cæcæcāimpa, ante ancaa cædinque tōmēnāni godō babæ cædānipa. Ayæ nē wīwa pōnēwēnāni inte tōmēnāni, Wadāni wæcædānimpa, ante godō pīinte cædānipa. Godō wæntaa godō wæntaa tedewēnāni īnānipa. ³⁰ Ayæ wadāni īnānite pīīnīnque īīnāni īñōmō godō babæ ante tedewēnāni īnānipa. Wængonguī ingante pīinte cædāni īnānipa. Ayæ, Tōmēmoque waēmō īmopa, ante nāmā ængō cæte bai cædinque wadāni īnānite wææntodonte bai ānīnque, Ōnonquedō

cæcantedō abii, ante godō pīinte todāni īnānipa. Edæ, Æbānō godōmenque wēnæ wēnæ cæte toquīmoo, ante edæ pōnēē cōnīnque edæ nanguī cædānipa. Mæmpocā tōnō badā, Cæedāni, āñōnate tōmēnāni ēñēnāmaī cædānipa. ³¹ Mīmō ōmædēnāni inte tōmēnāni ocai ōmæcadāni bagadānimpa. Cæcæboimpa, ānīnque edæ īīnque cædāmaī īnōnānimpa. Wacā caate wæcā adīnque godō waadedāmaī īnōnāni inte tōmēnāni edæ godōmenque pīīnāni inte cædōnānimpa.

³² Mānōmaī cædāni īñōmō nāni wængūīnque cædānipa, ante Wængonguī nō pōnī nānō angāīnō ante tōmēnāni ōnōmoncaque nē ēñēnāni inte tōmēnāni nāni wēnæ wēnæ cæīnēnonque ante cædānipa. Ayæ tōmēnāni wīwa nāni cædō bai wadāni adobaī cædāni adīnque tōmēnāni, Waa cæmīnīpa, ānīnque nē cædāni īnānite waa adānipa.

2

Nōīngā ante Wængonguī apænte angampa, ante

¹ Tōmēnāni mānōmaī cædānipa. Incæte bitō adobaī wīwa cædōmi inte tōmēmi pante wæquinque tōmēnāni īnānite apænte āmīpa. Īnīnque bitō wacā ingante, Bitō pante wæquinque wīwa cæbīpa, ante apænte āmi inte bitō īñæmpa adobaī wīwa cædōmi inte edæ æbānō cæte nāmā ante wææ angūīmīi. ² Wīwa cædāni īnānite apænte ānīnque Wængonguī cōwē nōīngā ante apænte angampa, ante edæ do ēñēmōmpa. ³ Īnīnque waobi ōnōmīque īnōmi inte bitō īñæmpa tōmēnāni īnānite apænte āmi incæte tōmēnāni nāni cædō bai adobaī cædōmi inte edæ, Wængonguī botō īmote pānāmaī inte ata cæpocæcāimpa, ante pōnēmitawo. ⁴ Bitō wīwa cæbi inte Ca ca wæquēnēmi īñōmite Wængonguī wæætē ee pānāmaī inte nanguī waadete pōnō cæyongante bitō wæætē edæ pīīnīnque Baa āmitawo. Īñæmpa tōmēngā, Bitō, Æmæwo wēnæ wēnæ cætabopa, ante wædinque botō gāmænō poncæbīimpa, ante Wængonguī pōnō waadete cæcampa, ante pōnēmīyaa.

⁵ Incæte bitō mīmō ōmædēmi inte ancaa Baa ānīnque edæ wēnæ wēnæ bitō cædō ante ñīmpo cædāmaī īñōmite Wængonguī nānō ænguī baquīōnæ īīnque bayonte

tömengä ænguī pōni badinque godömenque pangä wæcæbiimpa. Tömengä æbänö nō apænte angää, ante mǎniñedē ate edæ edonque acæimpa. ⁶ Edæ, Tömämö mönō cægai ganca ante Wængonguī eyepæ pōni pædæ pōnongä æncæmöimpa, ante dodäni nāni yewæmongainö bai edæ iinque bacæimpa.

⁷ Iinque, Mönō ñäö bai entawengæimpa, ante cædinque ayæ, Wængonguī mönō imonte waa adinque pōnō cæcä ate mönō wæwocadämaī ewocacæimpa, ante cædinque mönō wæntædämaī inte ee waa cæte quëwëmö iinque Wængonguī pōnō cæcä ate mönō cöwë wænāmaī quëwëmaïmompä. ⁸ Wæætë, Wængonguī nāwangä nānō apænedö ante Baa äninque, Tömëmo beyænque quëwencæboimpa, ante nē änäni inänite ayæ wadäni wiwa nāni cæquinonque ante nē tee empote godäni inänite Wængonguī ænguī badinque godö piinte cæcæcäimpa. ⁹ Edæ mönō waocabo wënæ wënæ cæmö adinque Wængonguī oodeomöni iñömönite täno päninque oodeomini ināmaī imini iminite adobai päñongä nē wënæ wënæ cæmö tömämö iñömö edæ caate wæwencæmöimpa. ¹⁰ Wæætë waa cæmö adinque Wængonguī oodeomöni imönite täno pōnō waadete cædinque oodeomini ināmaī imini iminite adobai pōnō waadete cæyongä nē waa cæmö wæætë gänë entawëninque ñäö apäite bai entawëñömonte edæ Wængonguī tömämö imonte waa acæcäimpa.

¹¹ Edæ mönitö oodeomöni imöni incæ munitö oodeomini ināmaī imini incæ Wængonguī tömämö imonte adoyömö pōni adinque wadö wadö ate pönente cædämaī ingampa. ¹² Möitee wodi, Iimaī cæedäni, ante nānō wææ angainö ante ömæmoncadäni inte wiwa cædäni iinque tömengä nānō wææ angainö dæ ante bai mǎnināni wæncædänimpa. Wæætë Möitee wodi nānō wææ angainö ante do ëñente ëmoncadänäni incæte wiwa cædäni adinque Wængonguī mǎnine ante ëñënämaī cædäni beyænque apænte äninque pangä wæcædänimpa. ¹³ Edæ Möitee wodi nānō wææ angainö ante önömoncaque ëñënäni inte tömënäni nāni önömoncaque ëñëno beyænque Wængonguī ayongä dicæ nō

cædäni badäniyaa.

Wæætë edæ mǎnine ante ëñente cædäni inänite guiquënë Wængonguī pōnō angä ate tömënäni iñömö nō cædäni bacædänimpa. ¹⁴ Edæ Möitee wodi nānō wææ angainö ante ömæmoncadäni inte oodeoidi ināmaī inäni incæ pancadäniya tömënäni dodäni nāni wææ angainonque ante Ao ante cædinque Wængonguī nānō wææ angainö bai edæ do cædänipa. Mänömaī ëñente bai cædinque tömënäni mimö entawënäni inte mǎnine ante ömæmoncadäni inäni incæte nāmä nāni wææ änonque ëñente cædänipa. ¹⁵ Edæ, Tömënäni dodäni nāni wææ angainö ëñëninque waa cædäni inte tömënäni Wængonguī nānō wææ angainö bai do entawënäni, ante edonque acæimpa. Mimö entawënäni inte tömënäni nāni caboque godongämæ pönëninque wënæ wënæ nāni cædönö ante näëmæ apænte wææ änanipa. Ayæ wæætë waa cædäni ate tömënäni näëmæ apænte ñimpo cædänipa.

¹⁶ Codito ingantedö ante watapæ ëñengaimo inte botö iimaī ante apænebopa. Wængonguī angä ëñente cædinque Itota Codito wæætë waomö mönō awëmö entawëno ante edonque pōni adinque apænte ancæcäimpa. Tömengä nānō apænte anguiönæ iinque bayedë edæ mǎninö ante botö yewæmonte apænedö bai edæ iinque bacæimpa.

Möitee nānō wææ angainta adinque oodeoidi wii ëñënäni

¹⁷ Bitö iñömö edæ, Oodeobo inömo imopa, ante ämipa. Ayæ, Möitee wodi nānō wææ angainta nē ëñëmo inte botö Wængonguī ayongante waa quëwëmö imopa, ante edæ nāmä ængö cædinque ämipa. ¹⁸ Wængonguī æbänö angää, ante do ëñëmipa. Ayæ tömengä nānō wææ angainö ante do ëñëmi inte bitö, Quinö waa i, ante do ëñëninque Ao ante æmipa. ¹⁹ Bitö, Wadäni babetamö bai ewocayönänite botö töö æmænte mäobo godänipa. Wëmö iñömö quëwente bai adämaī iñönänite botö iñömö, Acæminimpa, ante tica ënente bai odömonte apænebopa, ante edæ, Nāwangä ämopa, ante bitö apænebitawo. ²⁰ Ayæ adobai, Mönö Möitee wodi nānō wææ angainö ante ëñente beyænque mönō ëñënguënëno ante entawëninque mönö nō cæquënëno

ante adobaī tōmānō ante entawengæimpa, ante bitō pōnēmitawo. Ayæ mǎnōmāinō ante bitō pōnēnō beyæ bitō, Nē oda cædāni inānite botō nē tōingā odōmōmo imopa, ante pōnēmitawo. Wēñænāni baī wædænque eñēnāni iñōnānite botō nē odōmonte apænebo imopa, ante pōnēmitawo.

²¹ Iñæmpa mǎnōmaī inōmi inte bitō edæ dicæ nāmā odōmonte apænete eñēmitawogaa. Wadāni inānite odōmonte apænedinque, Awēmō ænāmaī iedāni, ante odōmonte apænedōmi inte tōmēmi awēmō æmitawo. ²² Bitō wadāni inānite odōmonte apænedinque, Nānōogængā ināmaī iñongante godō guēa mōnāmaī ie, ante nē wææ āmi inte bitō adobaī wacā tōnō guēa mōmitawoo. Ayæ, Wængonguī ingampa, ante nāni badōinca ante nē pīimi inte bitō edæ tōmēnāni nāni apæneincōnē go guiddinque edæ o æmitawoo. ²³ Iñæmpa bitō, Mōitee wodi nānō wææ angainō ante botō eñente cæbo imopa, ante tededinque nāmā ængō cædōmi inte edæ mǎnine ante eñēnāmaī cæbi adinque wadāni wæætē Wængonguī ingante waa adāmaī inānipa tōo. ²⁴ Edæ, “Mīnitō cædinō beyæ oodeoidi ināmaī ināni incæ Wængonguī emōwo ante godō babæ ante wēnæ wēnæ ānewēnānipa,” ante tōmengā beyæ dodāni nāni yewæmongainō baī do batimpa.

²⁵ Edæ Wængonguī nānō wææ angainō ante eñente cæbi ininque bitō, Nāwā oodeobo imopa, ante nē eō togæimi badinque waa imaimpa. Wæætē edæ eñēnāmaī cæbi ininque oodeo ināmaī ingā bagāacā ingā baī bitō iñōmō edæ do babaimipa. ²⁶ Oodeoidi ināmaī ināni guiquēnē bagādāni ināni incæte tōmēnāni Wængonguī nānō wææ angainō ante eñente cædāni ininque Wængonguī ayongā tōmēnāni do eō togæināni baī inōnāni inte oodeoidi baī inānipa. ²⁷ Bitō iñōmō Mōitee wodi nānō wææ yewæmongainta mǎnimi inte nē eō togæimi imitawo. Bitō mǎnōmaī imi incæte eñēnāmaī cæbi iñōmi wacā wæætē bagāacā inongā inte eñente cæcā ininque tōmengā eñente nānō cædō beyænque Wængonguī wæætē bitō imite apænte āninque pancæcāimpa.

²⁸ Iñæmpa oodeo eñagāingā inte baō beyænque oodeocā ingā incæte tōmengā

wīi mǎnōmaī ingā beyænque nāwā oodeocā ingampa. Adobaī nē eō togæingā iñōmō baonque nānō eō togæinō beyænque tōmengā Wængonguī ayongā ædæmō eō togæingā baī wīi ingampa. ²⁹ Wængonguī Ōnōwoca ingante nē ewocacā guiquēnē tōmengā iñōmō edæ nāwā oodeo baī badinque Wængonguī wēñængā ingampa. Edæ Mōitee wodi nānō wææ yewæmongainō ante eñente eō togæinque waocā tōmengā wentamō nānō entawēnō dicæ wido cæquiringā. Wængonguī Ōnōwoca guiquēnē pōnō wido cæcā beyænque waocā wæætē waēmō entawengampa. Mǎnōmaī entawengā ingante wadāni waa adāmaī ināni incæte Wængonguī wæætē, Bitō waa entawēmi abopa, āninque tōmengā ingante waa apænecampa.

3

¹ Iinque oodeocā iñōmō edæ, Oodeobo imopa, ante toquēnengā ingantawo. Ayæ adobaī, Botō eō togæimo imopa, ante toquēnengā ingantawo. ² Ao āmopa. Nē oodeoidi inōnāni inte tōmēnāni cōwē nanguī toquēnēnāni inānipa. Edæ Wængonguī apæncā eñengaināni inte edæ oodeoidi tōmengā nānō apænedō ante nē mangaināni inte nē toquēnēnāni inānipa. ³ Mǎnōmaī i incæte pancādāniya iñōmō edæ wede pōnēnāmaī inānipa. Iinque mōnō æbānō anguīi. Tōmēnāni nāni pōnēnāmaī inō beyænque Wængonguī tōmēnāni inānite dicæ ñimpo cædinque ædæmō aadāmaī ingantawogaa. ⁴ Edō cæte mǎnōmaī inguīi. Mōnō waocabo tōmāmō nē babæ apænemō iñōmonte Wængonguī iñōmō nō pōni cæcā ingainō anguēnē. Edæ tōmengā beyæ iīmaī ante yewæmongatimpa.

“Wængonguī bitō æbānō apænebi, ante apænte ancæ cædāni incæte tōmēnāni, Wængonguī nō pōni ante apænecampa, ante edonque acædānimpa.

Bitō nē tæi emōmi inte edæ bitō imite nē apænte ancæ cædāni inānite nāemæ edæ wææntodonte baī cædinque edæ gānā cæcæbiimpa.”

Ante nāni yewæmongainō baī edæ bacæimpa.

5 Waodāni mā pönēninque iīmaī ante tedewēnānīpa. Mōnitō wīwa cæyōmōnite Wængonguī nō cæcā adinque wadāni, Wængonguinque nē nō cædongā ingampa, ante godōmenque edonque acædānīpa. Īnīnque wīwa cæyōmōnite Wængonguī quīnante piīnte pangāā, ante tedewēnānīpa. Mānōmaī tedewēnāni adinque mōnō wæætē æbānō anguēnēmō imōō. Īñæmpa waodānīque nāni ānewēnō baī dicæ anguēnēmō imongaa. 6 Ædō cæte mānōmaī ānewenguīī. Mānīnō nāni tedewēnō nāwangā ī baī inguīpoga quēwēmō imonte Wængonguī apænte ānāmaī inguēnengā.

7 Wadāni guīquēnē iīmaī ante tedewēnānīpa. Wængonguī cōwē nāwangā ante apæneyongante botō babæ apænebo adinque wadāni, Wængonguinque nāwangā ante apænecampā, ante tōmengā ingante godōmenque waa acædānīpa. Īnīnque babæ botō apænedō beyænque Wængonguī godōmenque ñāō apāite baī ēmongā ingampa. Īnīnque, Bitō nē wēnæ wēnæ cæbi imīpa, ante Wængonguī quīnante botō imote apænte angāā, ante tedewēnānīpa. 8 Tōmēnāni, Wængonguī ingante godōmenque waa acædānīpa, ante mōnō godōmenque wēnæ wēnæ cæcæimpā, ante tedewēnānīpa. Tōmēnāni nāni tedewēnō nāwangā ī baī mōnitō adobaī ante ancædōmōnīpa. Edæ, Tōmēnāni nāni tedewēnō baī edæ Pabodoidi adobaī ante apænedānīpa, ante pancadāniya pōnō wēnæ wēnæ ante babæ apænedānīpa. Mānōmaī ante nē apænewēnāni inānite pānīnque Wængonguī nō cæte pangampa.

Tōmāmō mōnō pante wæquinque wentamō mongæmompā

9 Īnīnque æbānō ante anguīī. Mīnitō oodeoidi ināmaī ōnōmīnīque iīñōmīnīte mōnitō mōni oodeocabo dicæ godōmenque waa pōnī imōniyaa. Īñæmpa mōnitō oodeomōni incæ mīnitō oodeomīni ināmaī imīni incæ tōmāmō nē wēnæ wēnæ cædōmō imompā, ante do odōmōnte yewæmōmōni abaīmīnīpa. 10 Edæ iīmaī ante Wængonguī beyæ ante āmotamīni ante baī yewæmongatimpā.

“Nē nō cædongā iīñōmō edæ dæ angampa. Adocanque incæ edæ dæ angampa.

11 Nē ēñente pōnengā iīñōmō edæ dæ angampa.

Wængonguī ingante ante nē diqui diqui mīnongā iīñōmō edæ dæ angampa.

12 Tōmānāni edæ oda cæte wapiticæ godīnque,

nāni waa cædāmaī incaboque badānitapa.

Nē waa cædongā iīñōmō edæ dæ angampa.

Adocanque incæ edæ dæ angampa.

13 Waodāni inānite wænoncæte ante ææ ænete baī ēmencadinque,

tōmānāni babæ ante enguēnēwate tedewēnānīpa.

Edæ tæntæ tōmēmæ ēnete baī, Wænongæimpā, ante ēnedānīpa.

14 Tōmēnāni piīnte nāni tedewēnō beyænque moncapæ tī nā baī enguēnēwadānīpa.

15 Tōmēnāni wænonguīwaque pogodo goquīwaque ēwadānīpa.

16 Tōmēnāni nē godō wænōnāni inte māincoo wido cæte wodii godāni ate edæ mīi quēwēnāni ponte adinque caate baī wæwēnānīpa.

17 Nē piīnte cædōnāni inte tōmēnāni Wængonguī taadō tōmengā gānē entawente nānō godōnō ante adāmaī inte cædānīpa.

18 Tōmēnāni, Wængonguī ingante mōnō guīñente ēñengæimpā, ante pōnēnāmaī inānīpa.”

Ante dodāni nāni yewæmongainō baī impā.

19 Æcānō Mōitee wodi nānō wææ angainō ante nē ēñente quēwenguēnēna īnaa tōmengā beyænque ante wææ yewæmongatimpā. Mānōmaī ī beyæ, Botō eyepæ cæbo imōpa, ante mōnō ædō cæte anguīī. Edæ guīñēnete mōnō pæ wēenecæimpā. Ayæ inguīpoga tōmāo quēwēmō tōmāmō Wængonguī nē apænte angā weca ongōnīnque edæ, Æbānō cætaboo, ante Wængonguī ingante mōnō edonque apænequēnēmō imompā. Mānōmainō ante edæ do ēñēmompā.

20 Mānōmaī beyæ Wængonguī, Mōitee wodi nānō wææ angainō ædæmō ēñente cæbi beyæ bitō botō ayōmo nē nō cæbi babīpa, ante adocanque ingante edæ ānāmaī incæcāimpā. Wæætē mānīne nānō wææ angainō ēñente beyæ mōnō, Nē

wēnæ wēnæ cæmō ïmōmpa, ante edonque amōmpa.

Mönō wede pönēnō beyænque nō cæte quēwēmōmpa, ante

²¹ Wīi Mōitee wodi nānō wææ angainō ante ēñēmīni beyæ wæætē edæ Wængonguī incæ pönō badongā beyænque mōnō tōmengā ayongā nō cæmō bamōmpa, ante ñōwo pōnī odōmongatimpa. Dodāni Mōitee wodi tōnō Wængonguī beyæ nē apænegaināni ïñōmō, ïncayæ ate mǎnōmaī bacæimpa, ante do yewæmongadānimpa.

²² Wængonguī pönō badongā ate mōnō nē wede pönēmō ïñōmō Itota Codito ingante mōnō wede pönēnō beyænque edæ tōmāmō tōmengā ayongā nō cæmō bamōmpa. Edæ mōnō adoyōmō ingaimō inte önōmonque ïmōmpa.

²³ ïnīnque mōnō tōmāmō wēnæ wēnæ cæmō inte Wængonguī nānō ñāō bai quēwēñōmō guicæte ante cædinque wīi eyepæ cæmō inte wīi guimōmpa.

²⁴ Incæte Itota Codito ængā beyænque abæ tawænte gote bai quēwēmō ïñōmōnte Wængonguī önōnque ānāmaī inte waadete pönō badongā ate mōnō tōmengā ayongā nō cæmō bamōmpa. ²⁵ Wængonguī ïñōmō Itota Codito ingante da pönōnīnque, Tōmengā mīnitō wēnæ wēnæ cædō ante teēmente wængā beyænque botō wæætē piyænē cædinque mīnitō ïmīnite pānāmaī incæboimpa, ante cægacāimpa. ïnīnque tōmengā, Mǎnōmaī pönō cæbo ate mīnitō, Itota wepæ mōnō beyæ pe tæ pe tæ wæænimpa, ante wede pönēnīnque wede mīni pönēnō beyænque quēwencæmīnimpa, ante pönō cægacāimpa.

Mǎnōmaī cædinque Wængonguī wēēnēñedē mōnō waocabo mōnō wēnæ wēnæ cægainō ante ee adīnque nē pānāmaī ingaingā incæte edæ, Botō cōwē nōingā ante apænte ānōmo ïmōpa, ante ēñencæmīnimpa, ante odōmongacāimpa. ²⁶ ïnīnque, Wængonguī nē nō cæcā ïnongā ingampa, ante mōnō acæimpa. Ayæ adobaī, Itota ingante nē pönēmō ïñōmōnte Wængonguī nē pangūēnengā ingā incæ mōnō ïmōnte ata cæpodīnque pönō badongā ate mōnō wæætē tōmengā ayongā edæ nē nō cæmō bamōmpa, ante mōnō acæimpa. ïnīnque

tōmengā mǎnōmaī cædinque tōmengā nō nānō cædō ante odōmoncæte ante ñōwo cægacāimpa.

²⁷ ïnīnque mōnō waocabo ïñōmō nāmā ængō cæte bai cædinque mōnō, Nāmā cædinque nō cæmō bamōmpa, ante ædō cæte angūimōō. ïñæmpa mǎnōmaī ānīnque cædāmaī ingæimpa. Quīnante nāmā wīi ængō cæquīi, ante wæmīnitawo. Mōitee wodi nānō wææ angainō ædæmō ēñente cæmō inte bai mōnō, Tōmēmō cætāmōmpa, ancædōmōimpa. Incæte ædæmō ēñente dicæ cæmongaa. Wæætē tōmengā ingante wede mōnō pönēnō beyænque tōmengā ayongā nō cædōmō bamōmpa, ante adīnque mōnō, Tōmēmō cætāmōmpa, ante ædō cæte angūiī. ²⁸ ïñæmpa waocā Wængonguī nānō wææ angainō ante ēñente cæcā incæ wīi tōmengā nānō ēñente cædō beyæ nē nō cæcā bacampa. Wæætē wede nānō pönēnō beyænque Wængonguī ayongā edæ nē nō cæcā bacampa, ante do edæ apænebo ēñēmaīmīnīpa.

²⁹ Oodeomōni ïñōmōnite Wængonguī mōnitō Wængonguī ïnongā ingampa. Oodeomīni ïnāmaī ïmīni guiquēnē, Wīi mōnitō Wængonguī ingampa, ante pönēmīnitawo. ïñæmpa oodeomīni ïnāmaī ïñōmīnite adocā Wængonguī mīnitō Wængonguī ingampa. ³⁰ Edæ adocanque Wængonguī ïnongā ingampa. ïnīnque nē eō togæimōni ïmōni mōni wede pönēnō beyænque tōmengā pönō badongā ate tōmengā ayongā edæ nō cæmōni bamōnīpa. Adobaī bagāamīni mīni wede pönēnō beyænque Wængonguī adocanque ïnongā inte pönō badongā ate mīnitō adobaī tōmengā ayongā nō cæmīni bamīnīpa. ³¹ Mōnō pönēnō beyænque ïmpa, ante apænedīnque mōnitō Wængonguī nānō wææ angainō ante dicæ wēā godonte bai cæmōniyaa. Wīi mǎnōmaī cæmōnīpa. Wæætē mǎnōmainō ante apænedīnque tōmengā nānō wææ angainō ante Ao ānīnque mōnitō, Eñēedāni, ante odōmōnte apænēmōnīpa.

4

Abadāō wodi æbānō cægacāi, ante pōnengæimpa

1 Mäninö ante mönitö mæmæ Abadäo wodi iñomö æbänö ante eñengacäi, ante mönö ñowo pönente apænecæimpa. 2 Abadäo wodi nē eñente cæcä ingaingä incæte tömengä nänö eñente cædö beyænque dicæ nö pönī entawengä bācantawogaa. Mänömaī cædinque nö cæcä bagacäimpa, ante nāwangä i bāi tömengä waodāni eñēñönānite, Waa cæbo imopa, ante do ancægacäimpa. Incæte tömengä Wængonguī eñēñongante mäninö ante cōwē änāmaī inguēnengä ingacäimpa. 3 Wængonguī æbänö ante apænecä eñente yewæmongadāni, ante amīnii. Edæ iīmaī ante apænecä eñente yewæmongadānimpa. “Wængonguī nöingä ante apænecampa, ante Abadäo wede pönengacäimpa. İninqe tömengä wede nänö pönēnö beyænque Wængonguī wæætē edæ, Botö ayömo Abadäo nē nö entawengä ingä abopa, angacäimpa,” ante yewæmongadānimpa.

4 Edæ wadāni beyæ waocä nanguī cæcä ate tömēnāni debe badīnāni inte edæ, Önonque pönömōni æe, ante ædö cæte anguīnānii. İñæmpa wīi önonque godonte impa. Wæætē tömengä nänö nanguī cædinö beyænque paga ante nē godonguēnēnāni inte awēnēidi, Bitö nanguī cæbitapa, ante godönāni ængampa. 5 Wængonguī guiquēnē önonque pönö cæcä æmōimpa. Waocä wīwa cæcä incæ wede pönengä adinqe Wængonguī pönö badongä ate tömengä Wængonguī ayongante wæætē nö cæcä bacampa. İninqe waocä waa cædāmaī incæ edæ wede pönengä adinqe Wængonguī wæætē tömengä ingante pönö badöninge, Nö pönī bitö entawengūnque bitö wede pönēmi abopa, angampa. 6 Waocä waa cædāmaī iñongante Wængonguī pönö badongä ate tömengä Wængonguī ayongä nö pönī entawengä ininqe tömengä watapæ quēwencæcäimpa, ante apænedinqe Dabii wodi adobāi ämotamīni ante bāi yewæmongacäimpa.

7 Adocä yewæmöninqe,

“Waodāni eñēnāmaī cædāni inānite
Wængonguī pönö ñimpo cæcä ate

tömēnāni wæætē watapæ quēwencædānimpa.

Edæ tömēnāni eñēnāmaī nāni cædö ante ö ænte māo tee moncate bāi cæcä ad-
inque nanguī tocædānimpa.

8 Æcänö ingante Wængonguī, Bitö pante wæquinque wēnæ wēnæ cæbipa, ante cōwē piinte änāmaī ingä ininqe māningä waocä wæætē nanguī tocæcäimpa.”

9 Ante Awēnē Dabii wodi, Eö togæñinānique tocædānimpa, ante dicæ yewæmongantawogaa. Bagäadāni adobāi tocædānimpa, ante ancæte ante yewæmongacäimpa. Abadäo wodi Wængonguī ingante wede nänö pönēnö beyænque Wængonguī, Botö ayömo Abadäo nē nö entawengä ingä abopa, angacäimpa. Mänömainö ante edæ botö do yewæmōmo abāimīnīpa. 10 Abadäo wodi æbänö engæñongante Wængonguī mänömaī angacäi. Dicæ eö togæningä iñongante angantawogaa. Wæætē bagäacä iñongante angacäimpa. 11 İninqe, Abadäo bagäacä inte wede pönengä beyænque botö pönö badömo ate nö cæcä bacampa, ante eñencædānimpa, ante cædinque Wængonguī angä eö togænte bagacäimpa.

Mänömaī cæcä beyæ mīnitö bagämīni inte wede pönēmīni iñömīni Abadäo wodi mīnitö wæmængä bāi bagacäimpa. Abadäo wodi pæimīni bāi wede pönēmīni adinqe Wængonguī adobāi, Nö entawēmīni bamīni acæboimpa, ante pönö badongacäimpa. 12 Mönitö wæmæ Abadäo wodi doyedē bagäacä ingäñedē incæ wede pönengä ingacäimpa. Möni idægocabo iñomö nē eö togæimōni inte edæ tömengä wede pönente nänö cægongainö adodö tee empote gomōnīpa. İninqe mäninönö möni wede pönente godönö gomōni beyænque möni eö togæncabo wæmængä adocä Abadäo wodi ingacäimpa.

*Mönö wede pönēnö beyænque Wængonguī
nänö angainö ante cæcampa, ante*

13 Wængonguī, Inguipoga incæ bitö nē ænguīmi incæbiimpa, äninqe Abadäo wodi tönö tömengä nänömōidi inānite pönö angä ængadānimpa. Mänömainö äninqe Wængonguī dicæ, Botö wææ angainö ante eñente cædānique æncædānimpa, ante angantawogaa. Wæætē edæ wede pönente tömengä ayongä nö entawēnāni

badāni beyænque Wængonguī, Ingui-poga incæ pönömo æncæminimpa, ante apænegacäimpa. ¹⁴ Wængonguī dicæ, Botö wææ angainö eñente nē cædānique nē ænguīnāni inānīpa, ante angantawogaa. Edæ mänömainö angä bai mönö wede pönönö ante önonque pönencædömöimpa. Tömengä nänö angainö incæ wo ewente bai bacædönimpa. ¹⁵ Edæ mäninö tömengä nänö wææ angainö ante eñenāmaī cædāni beyænque Wængonguī ænguī badinque pangampa. Wæætē wææ änāmaī inte bai Wængonguī, Botö wææ angainö ante eñenāmaī cæbīpa, ante ædö cæte anguingä. Edæ dæ ancædönimpa.

¹⁶ Mänömaī beyæ Wængonguī, Botö waadete pönö cædö beyænque æminīpa, ante edonque acäimpa, ante cædinque Abadäo wodi wede nänö pönönö beyænque ante, Pönömo æncæminimpa, angacäimpa. Mönitö Möitee wodi nänö wææ angainö ante nē eñemöni inñömönite wīi adomönique imönite angacäimpa. Wæætē Abadäo wodi nänö wede pönengai bai adobai wede pönömö inñömönte mönö tömämö imonte Wængonguī, Cöwē pönömo æncæminimpa, angacäimpa. Edæ mönö wede pönencabo inñömönte Abadäo wodi tömämö wæmængä bai ingacäimpa. ¹⁷ Wængonguī edæ do wængaināni inānite pönö cæcä ate tömēnāni inñömö nāni ömæmönte edæ müināni quēwēnānīpa. Dæ angaincoo incæ tömengä do badongä ate edæ a ongoncoopa. Wængonguī mänömaī nē badongä inñongante Abadäo wodi tömengä ingante nē wede pönengä ingacäimpa. Inique Wængonguī, “Abadäo eñemi. Botö pönö badömo ate bitö pæināni yebæninque wacabodāni nāni cabo wacabodāni nāni cabo nanguī ināni inñönānite edæ bitö adobique tömēnāni wæmæmi incæbiimpa.” Ante Wængonguī beyæ ante yewæmongatimpa. Inique Wængonguī ayongante mönö wede pönömö inñömönte Abadäo wodi mönö wæmængä bagacäimpa.

¹⁸ Tömengä ingante, “Bitö pæināni edæ mänimpodāni bacædänimpa,” ante Wængonguī do angacäimpa. Mänömainö angä eñeninque, Ædö cæte baquīi, ante wædongä incæ Abadäo wodi, Wængonguī

cöwē cæcä beyæ watapæ bacäimpa, ante wede pönengä ingacäimpa. Inique tömengä wede nänö pönönö beyænque “wacabodāni nāni cabo wacabodāni nāni cabo nanguī ināni bayönānite tömēnāni wæmængä” Abadäo bagacäimpa.

¹⁹ Tömengä, Botö picængadebo wodo tiēē wadepo quēwengaimo inte edæ botö baö wænte bai eñabo inte edæ ædö cæte wēñæ tapæiquimoo, ante eñengacäimpa. Ayæ, Tada adobai wēñæ cöwē mänāmaī ingaingä inte picængadecä badinque ædö cæte wēñæ manguingä, ante pönengacäimpa. Incæte mäninö nänö wædö beyænque guñēñadāmaī inte Abadäo wodi Wængonguī nänö äninö ante godömenque pönengacäimpa. ²⁰ Tömengä, Wængonguī wabänö cæbaingä, ante wædāmaī inte wæætē Wængonguī nänö, Cöwē pönö cæcæboimpa, äninö ante wede pönengacäimpa. Ayæ, Wængonguī bitö nāö entawēmi inte tæi emonte waa cæcæbiimpa, ante godömenque tæi piñænte entawēninque Abadäo wodi wede pönengacäimpa. ²¹ Edæ, Wængonguī nē tæi piñængongä inte, Cöwē cæcæboimpa, ante nē angaingä inte edæ cöwē cæcæcäimpa, ante Abadäo do eñeninque edæ wede pönengacäimpa. ²² Tömengä mänömaī wede pönengä beyænque Wængonguī, Abadäo bitö nō entawēmi imi abopa, angacäimpa.

²³ Mänine, Bitö nō cæbi imi abopa, ante nänö angaine inñömö wīi tömengä beyænque yewæmongatimpa. ²⁴ Wæætē mönö beyæ adobai yewæmongatimpa. Edæ, Mönö Awēnē Itota ingante Wængonguī angä nāni ömæmongacäimpa, ante nē angaingä ingante wede pönömö inñömönte Wængonguī, Botö ayömo mīnitö nō cæmīni imīni abopa, ante badongampa. ²⁵ Wēnæ wēnæ mönö cædö beyænque mönö Awēnē Itota ingante Wængonguī pædæ godongä wængacäimpa. Ayæ mönö beyæ ante cædinque tömengä mönö Awēnē Itota ingante, Bitö nē nō cædömi inte nāni ömæmömi beyænque tömēnāni botö ayömo nō entawēnāni bacædänimpa, ante cædinque angä nāni ömæmongacäimpa.

Wængonguī badongä ate mönō nō cæmō bamompa

¹ Mönō wede pönēnō beyænque Wængonguī pönō badongä ate mönō tömengä ayongante edæ nō cæmō bamompa. İnıne mönō Awēnē Itota Codito nänō cægäinō beyænque Wængonguī piyænē cæcä ate mönō tömengä tönō godongämæ gänē entawente quëwëmompa.

² Mönō wede pönēnō beyæ adocä Codito mönō imonte pönō ænte mämongä ate Wængonguī waadete pönō cædinque mönō imonte ængampa. Ayæ Wængonguī nē ñäö ëmongä weca ongöñömō tömengä pönō badongä ate mönō godongämæ ñäö ëmonte mönō watapæ bacæimpa, ante wede pönëninque tomompa.

³ Ayæ wii mänınque beyæ tomompa. İñæmpa, Waocä nänō wæntädämaï inte ee cæquinque caate wæcampa, ante ëñëmō İnıne mönō caate wæmō incæte caate mönō wædö beyæ adobaï tomompa. ⁴ Ayæ nē wæntädämaï inte ee cæmō adınque mönō Wængonguī ayongä nē waa cæmō edæ bamompa. Mänömaï bamō İnıne mönō, Watapæ bacæimpa, ante pönente tomompa. ⁵ Mänömainō ante nē pönente tomō İñömō edæ mönō ænguënēnō ante do ænıne mönō guıngo imonte wædämaï İmompä. Edæ Wængonguī tömengä Tæiyæ Waëmō Önöwoca ingante da pönöninque tömengä nänō waadete pönēnō adobaï do pönongä ænıne mımönē entawëmompa.

⁶ Edæ İımaï İmpä. Mönō aquıımō pönı İnömo inte, Ædö cæte cæmöö, ante wæyömonte mönō Codito İñömō eyepæ pönı pönınque, Mınitö Wængonguī ayongante wıwa cæmıni İmınıpa, ante adınque wıwa mönō cædö ante teëmente wæætē wængacäimpa. ⁷ Waocä guıquënē wacä nē nō cædongä İngä adınque tömengä beyæ wæætē dicæ wængıngäa. Incæte, Nē waa cædongä wæætē quëwencæcäimpa, ante cædinque adocanque adocanque wabänō Ao ante tömengä beyæ wæætē wæmainänıpa. ⁸ Incæte, Wængonguī mınitö İmınıte nangıı waadete pönengampa, ante odömoncæte ante cædinque mönō Codito İñömō nē wënæ wënæ cæmō İñömönte mönō beyænque wæætē wængacäimpa.

⁹ Codito wepæ mönō beyæ pe tæ pe tæ wææ beyænque mönō Wængonguī ayongante nō entawëmō do batamompa. Codito mönō beyæ mänömaï wængaingä inte cöwë godömenque cæcæcäimpa.

Ämo ëñëedäni. Wængonguī nē pıınte panguënengä İñongante adocä Codito gä pe æmpote ængä beyænque Wængonguī wæætē mönō imonte edæ ata cæpocä quëwencæmöımpä. ¹⁰ Mönō edæ Wængonguī tönō mönō godongämæ pııncabo İñömönte tömengä Wengä mönō beyæ wæætē wængä beyænque mönō Wængonguī tönō godongämæ piyænē cæmō bagamöımpä. Mönō Wængonguī tönō godongämæ piyænē cæmō İnıne tömengä Wengä İñömō cöwë godömenque cæcæcäimpa. Ämo ëñëedäni. Tömengä adocä do wængaingä inte ñäni ömæmonte mııngä quëwëninque mönō imonte ængä beyænque mönō wænämaï inte cöwë quëwencæmöımpä. ¹¹ Ayæ mönō godömenque İımainō ante ëñengæımpä. Mönō Awēnē Itota Codito ængä beyænque Wængonguī piyænē cæcä İnıne mönō ñöwo Wængonguī nempo quëwëninque edæ Itota Codito beyæ ante watapæ tomompa.

Tänocä Adäö wodi baï Codito adobaï Tănocä İngampa

¹² Docä mæmæ adocanque tänocä incæ ëñënämaï cæcä İnıne mönō wënæ wënæ cæpämō İnguıpoga do pongatımpä. Ayæ tömengä nänō ëñënämaï cægäinō beyænque nē wæwocacä bagacäimpa. Tömengä wënæ wënæ cæcä İngaingä baï mönō tömämō adobaï nē wënæ wënæ cæmō İmō İnıne edæ mönō waocabo tömämō nē wæwocamö edæ do bagamöımpä.

¹³ Edæ wëñëñedē Möıtee wodi nänō wææ änämaï İñedē incæ waodäni do wënæ wënæ cædäni İngadänımpä. Wënæ wënæ cædäni incæte Wængonguī, Botö wææ änö ante ëñënämaï cæmınıpa, ante ædö cæte apænte angıngäa. İñæmpa mänıñedē ayæ wææ änämaï İngacäimpa.

¹⁴ Nē Pongıngä, ante dodäni näni nē angaingä İñömō Tănocä nänō İngäi baï docä Adäö wodi adobaï tänocä İngacäimpa. Incæte Adäö wodi Wængonguī nänō wææ änö ante ëñënämaï cædinque wënæ wënæ cægacäimpa. Wæætē Wængonguī

edæ Möitee wodi nänö quëwenganca wææ änämaï iñongante Adäo wodi pæināni guiquēnē wēnæ wēnæ cædāni incæte tōmengä nänö eñēnāmaï cægai bai wii adobai eñēnāmaï cægadānimpa. Incæte tōmēnāni nē wæwocadāni inte wægadānimpa.

¹⁵ Incæte Wængongui nänö wææ angainö ante adocanque nänö eñēnāmaï cægai bai Wængongui nänö pōnongai iñömö wii adobai impa. Edæ adocanque nänö eñēnāmaï cægai beyænque nangui ināni inte wængadānimpa. Incæte Wængongui guiquēnē nangui pōni waadete pōnō cædinque Itota Codito ingante da pōnongä pōninqe tōmengä adocanque inongä waadete eyepæ pōni pōnō cæcä ate mōnō nangui pōni imö inte quëwēmompā. ¹⁶ Onguiñængä adocanque wēnæ wēnæ nänö cægai beyæ nē wæwocadāni bagadānimpa. Wængongui nänö pōnongai iñömö edæ wii adobai impa. Adocanque nänö adopoque eñēnāmaï cægainö ante adinque Wængongui tōmengä ingante apænte äninque edæ, Bitö tente wæquinque impa, angacäimpa. Wæætē Wængongui nänö wææ angainö ante eñēnāmaï wæætē wæætē cæmō incæte tōmengä, Botö ayömo mīni nō entawenguinque impa, ante önonque pōnongä ænte entawēmompā.

¹⁷ Waocä adocanque incæ Wængongui nänö wææ angainö ante eñēnāmaï cæcä ininque tōmengä adocanque nänö eñēnāmaï cægai beyænque mōnō wæwocamō do bagamōimpa. Wængongui guiquēnē godōmenque eyepæ pōni waadete pōnō badongä ate tōmengä ayongä mōnō nō entawēmō bagamōimpa. Ininque Itota Codito adobai Adocanque iñongante mōnō tōmengä nempo wæwocadāmaï inte quëwēninque awēnēidi bai badinque quëwēmompā.

¹⁸ Mänömaï beyæ adocanque adopoque eñēnāmaï cæcä beyænque Wængongui mōnō tōmämö imonte apænte äninque, Mīni wænguinque wēnæ wēnæ cæminipa, angampa. Ayæ adobai Adocanque adopoque nänö nō cægainö beyænque mōnō Wængongui ayongä nō cæmō bamō ininque Wængongui apænte äninque mōnō

tōmämö imonte, Mīni quëwenguinque mīnitö botö ayömo nō entawēmīni bamīnipa, angampa. ¹⁹ Edæ adocanque nänö adopoque eñēnāmaï cægai beyænque mōnō nangui imö incæ edæ nē wēnæ wēnæ cæmō bagamōimpa. Adobai Adocanque nänö adopoque eñēnte cægai beyænque mōnō nangui imö incæ edæ Wængongui ayongä nō cæmō bagamōimpa.

²⁰ Mōnō waocabo wēnæ wēnæ cæyömönte Wængongui, Botö wææ änö eñēnāmaï inte cæminipa, ante edonque acæminipa, ante wææ angacäimpa. Wææ angä ate edonque adinque mōnō waocabo wæætē, Nangui eñēnāmaï inte cæte awædö, ante wæyömönte Adocä incæ godōmenque nangui waadete pōnō cæcä æmompā. ²¹ Ininque mōnō eñēnāmaï cægai beyæ mōnō nē wæwocamō bagamōimpa. Wæætē mōnō Awēnē Itota Codito waadete pōnō nō cæte badongä ate mōnō cōwē wænāmaï quëwenguinque Wængongui ayongä nō entawēmō bagamōimpa.

6

Codito nempo quëwēninque mōnō nē wiwa cædongä nempo wii quëwēmompā

¹ Ininque mōnō æbänö anguii. Pan-cadāniya iimaï änewēnānipa. Wængongui godōmenque waadete pōnō cæcæcäimpa, ante cædinque mōnō godōmenque wēnæ wēnæ cæcæimpa, ante tedewēnānipa. Mōnō iñömö dicæ mänömainö ante tedewengüenēmö imongaa. ² Inämpa ædö cæte mänömainö ante tedewenguii. Wēnæ wēnæ mōnō cæte quëwēmāmo pædæ godōmo æninque Codito teēmē mongæninque wæñongante mōnō tōmengä tönö godongämæ wænte bai inömo inte ædö cæte godōmenque wēnæ wēnæ cæte quëwenguii. ³ Mōnō Itota Codito nempo quëwengæimpa, ante æpænē guidinque mōnō tōmengä tönö godongämæ wængaimö bai batamompā, ante mīnitö iñömö eñēnāmaï iminitawo. ⁴ Tōmengä wænte öñöñongante Mæmpo Wængongui nē ñäö entawēnongä inte tæi emōnongä inte, Ñāni ömæmōe, angä ñāni ömæmongacäimpa. Ininque mōnō iñömö edæ, Codito tönö ñāni ömæmönte bai mōnō mīimö

quëwengæimpa, ante cædinque æpænë guïdinque tõmengä wodido godongämæ guïte bai wænte bai õñontamompa.

⁵ Edæ tõmengä wængä ate godongämæ wænte bai bagaimö inique mönõ tõmengä ñäni õmæmongä ate tõmengä tõnõ äawocaque bai ewocate ñäni õmæmonte bai quëwëmaïmompä. ⁶ Waocä nänõ në õ æninäni inte tõmengä beyænque cæte në quëwënanï bai mönõ adobai wënæ wënæ mönõ cædõ beyænque wægämõimpa. Mänõmaï inte wæyõmonte mönõ Codito iñõmõ, Aamõ cæte gocæminïmpä, ante cædinque wënæ wënæ cæte mönõ wentamõ mongæñõ õ ænte teëmë mongængantapa. Ee mongæñongante tõmengä ingante awäa timpodäni wængä adinque baonque ante mönõ wënæ wënæ cæpämõ iñõmõ ewente bai ba inique mönõ do aamõ cæte bai mäninõ ante emõ cæte gomompä. ⁷ Waocä æmæwo wængaingä inte edæ ædõ cæte wënæ wënæ cæquingä. Edæ tõmengä nänõ wënæ wënæ cægäinõ ante emõ cæte aamõ cæte bai gogaingä ingampa.

⁸ Mönõ Codito tõnõ äawocaque bai ewocadinque adopoque wængaimõ inte mönõ tõmengä tõnõ godongämæ quëwengæimpa, ante wede pönëmompä. ⁹ Edæ do wænte ñäni õmæmonte mïingä quëwëningä inte Codito wæætë mempoga wænguingä inämaï ingampa. Tõmengä ñõwo wæwocadämaï iñongante tõmengä ingante, Wæmäwe, ante ædõ cæte anguii. Iñæmpä, wænämaï incæcäimpa, ante do eñëmompä. ¹⁰ Tõmengä adopoque wænïnque mönõ wënæ wënæ cægäinõ ante æmæwo wido cæcæte ante teëmë mongænte wængacäimpa. Wæætë ñäni õmæmonte mïingä quëwëninque tõmengä, Wængongui beyænque cæte quëwencæboïmpä, ante quëwengampa. ¹¹ Minitõ adobai Codito nempo quëwënomïni inte wiwa mïni cægäinõ ante æmæwo wido cæcæte ante cædinque, Itota Codito tõnõ adopoque wængaimõ imompä, ante wæætë, Mönõ Wængongui beyænque cæte quëwengæimpa, ante pönëninque quëwëedäni.

¹² Mänõmaï beyæ mïnitõ, Baonga mönõ ñõmænguiñõ quëwëninque mönõ wënæ wënæ cæinënõ ante mönõ eñente

cædämaï ingæimpa, ante nämä wææ aad- inque edæ wënæ wënæ mïni cæinëwënõ ante edæ eñënämaï inte quëwëedäni. ¹³ Ayæ mïnitõ, Bado, ante edæ, Botõ baonca wiwa cæcæïmpä, ante edæ mïnitõ baõ quïomë i incæ wënæ wënæ cæquinque ante edæ godõ cædämaï iedäni. Wæætë do wæwocagaimïni inte ñäni õmæmonte mïmïni quëwëninque mïnitõ wæætë Wængongui ingante nämä godõmïni æncæcäïmpä. Edæ, Botõ baõ inï edæ tõmão Wængongui quï impä, ante pædæ godõninque mïmïni quëwëñõmïnite tõmengä wæætë mïnitõ tõnõ godongämæ cædinque nõ pönï cæcæcäïmpä. ¹⁴ Edæ Mõitee wodi nänõ wææ angäinõ ante eñëmïni incæte wïi mäninõ beyænque quëwëminïpa. Wæætë Wængongui waadete pönõ cæcä beyænque quëwëmïni inte mïnitõ wënæ wënæ mïni cæinëwënõ ante eñente cædämaï inte quëwencæminïmpä.

Wiwa mönõ cæinëwënõ ante mönõ eñënämaï ingæimpa

¹⁵ Mõitee wodi nänõ wææ angäinõ ante eñente beyænque wïi quëwëmõ inte mönõ Wængongui waadete pönõ cæcä beyænque quëwëmompä. Näwangä impä. Inique mönõ æbänõ cæquii. Wadäni iñõmõ idiquibæ ante pönëninque, Wængongui pönõ cæcä beyænque në quëwënomõ inte mönõ wæætë wënæ wënæ cæcæïmpä, ante tedewënanïpa. Mönõ iñõmõ ædõ cæte mänõmainõ ante cæquimõõ.

¹⁶ Wacä ingante në cæte quëwëmïni bacæte ante cædinque mïnitõ, Bado, bitõ botõ awënë badinque edæ ämi eñente në cæbo baboe, ämïni inique edæ mäningä mïnitõ imïnite õ ængä ate tõmengä beyænque cæte quëwëmaïminïpa. Mäninõ ante pönëmïniyaa. Ayæ adobai mïnitõ wënæ wënæ cæinente mïni wædõ ante Ao ante cæmïni inique mïni wænguinque edæ mäninõ beyænque cæte në quëwëmïni inte wæbaimïnïpa. Wæætë Wængongui ingante, Bado, bitõ botõ Awënë inõmi inte edæ ämi eñente në cæbo baboe, äninque mïnitõ nõ cæte mïni quëwënguinque tõmengä beyænque në cæmïni babaïminïpa. ¹⁷ Mïnitõ doyedë mïni wënæ wënæ cæinëwënonque ante cædinque mïnitõ awënë beyænque

cæte nē quēwēmīni bai ingamīnīmpa. Nōwo guiquēnē Wængonguī nō nānō ānō ante odōmōmōni ēñēnīnque mīnitō īnonque ante edæ nē ēñente cæmīni bamīnitapa. Mānōmaī bamīnīpa, ante adīnque botō Wængonguī ingante waa ate pōnēnīnque apænebopa. ¹⁸ Ayæ wēnæ wēnæ mīni cædō beyænque cæte nē quēwēmīni inte wæyōmīnīte Wængonguī ñīmpo cæcā ate mīnitō abæ tawænte ee gote bai quēwēmīnīpa. Nōwo wæætē tōmengā nānō nō cædonque ante ēñente cæmīni īnīnque mīnitō edæ nē nō cædongā nempo quēwēnīnque tōmengā beyænque cæte nē quēwēmīni bamīnīpa.

¹⁹ Mīnitō ōnōmīnīque inte æīquedō ædæmō ēñēnguīmīnīi, ante wædīnque botō, Waocā nānō cæī bai īmpa, ante tēdēdīnque odōmōmo aedāni. Wēēnēñedē wēnæ wēnæ cædīnque godōmenque quīngāmē bai quēwēncæte ante mīnitō, Bado, ante quīomē incæ mīni baonga wīwa cæquīnque pædæ godō cæmīnitapa. Mānōmaī beyænque ēñēnāmaī mīni cæīnēwēnō ante ēñente cædīnque edæ mīnitō mānīnonque ante nē cæte quēwēmīni ingamīnīmpa. Nōwo guiquēnē tæiyæ waēmō mīni ēwocate quēwēngūnque ante mīnitō baō īnī edæ, Wængonguī quī īmpa, ante tōmāo pædæ godōedāni. Ayæ mīni nō cæquīnque ante edæ tōmengā beyænque nē cæmīni inte quēwēedāni. ²⁰ Wēēnēñedē īñōmō mīnitō wēnæ wēnæ mīni cæīnēnō beyænque cæte nē quēwēmīni bai inte wægāmīnīmpa. Mānīñedē mīnitō nē nō cædongā nempo quēwēnāmaī ingāmīnī inte tōmengā nānō angāīnō ante edæ ēñēnāmaī ingamīnīmpa. ²¹ Mānīñedē quīngāmē bai mīni cægāīnō ante pōnente wædīnque mīnitō ñōwo īñōmō guīngo īmonte bamīnīpa. Edæ mānīnō mīni wīwa cægāīnō beyæ ante dicæ watapæ tote bamīnīyaa. Īñæmpa edæ mīni wængūnque mānōmaī cægāmīnīmpa.

²² Nōwo guiquēnē, Wēnæ wēnæ mīni cæīnēwēnō ante idæwaa ēñēncæmīnīmpa, ante cædīnque Wængonguī gā pe æmpote ængā ate mīnitō abæ tawænte bai Wængonguī nempo wæætē ee pongāmīnīmpa. Īnīnque nē gā pe æmpocā nempo quēwēnīnque mīnitō tōmengā ingante cæte nē quēwēmīni inte mīni cōwē wænāmaī

quēwēngūnque tæiyæ waēmō ēwocāmīni bamīnīpa. ²³ Mōnō waocabo mōnō wēnæ wēnæ cædō beyæ ante paga cæte bai cædīnque Wængonguī mōnō īmonte pōnō pangā wængūēnēmō īmōmpa. Wæætē, Wantæpiyæ quēwēncæmīnīmpa, ante adocā incæ mōnō Awēnē Itota Codito tōnō godongāmæ cædīnque mōnō īmonte ōnonque pōnō ængā beyænque mōnō cōwē wænāmaī quēwēmōmpa.

7

Ēñente cæquēnēmō inte ñā cæyænte bai ingamōīmpa

¹ Īñānāni ēñēedāni. Mōitee wodi nānō wææ ante yewæmongāīnō ante do adīmīni īmīni incæte mīnitō īmaī ante ēñēmīnīyaa. Edæ, Ēñente cæedāni, ante tōmengā mīīnāni quēwēnānīque īnānīte wææ ante yewæmongacāīmpa. Īnīnque waocā do wæningā īñongante, Cæe, āñōmō tōmengā mīīngā ingampa diyæ cæquīngāā. Edæ dobæ wængāīmpa.

² Īīmāīnō ante pōnēedāni. Onquiyængā ingante ñānōnāni mongā ate tōmengā nānōogængā mīīngā nānō quēwēnganca onquiyængā īñōmō tōmengā nānōogængā ingante ēñente quēwēncæcāīmpa, ante wææ ante yewæmongatīmpa. Wæætē edæ tōmengā nānōogængā wængā ate onquiyængā owæmpoīngā inte adocanque quēwēñongante mānōmāīnō ante edæ ædō cæte wææ angūīī. ³ Īnīnque nānōogængā ayæ mīīngā quēwēñongante onquiyængā wacā ingante godō guēa mongā adīnque, Bitō nānōogængā mīīngā īñongante bitō wacā ingante guēa godō mōmīpa tōō, ante pīīnānīpa. Incæte tōmengā nānōogængā wængā ate abæ tawænte gote bai tōmengā adocanque quēwēñongante, Wacā ingante mōnāmaī incæbīīmpa, ante ædō cæte wææ angūīnānīi. Do owæmpoīngā inte wacā ingante mongā adīnque tānocā quēwēngampa diyæ wææ angūīnānīi. Edæ owæmpoīngā inte tōmengā do mongampa.

⁴ Mānōmaī beyæ botō tōnīñamīni, Mōnō adobāī īmōmpa, ante āmo ēñēedāni. Nānōnāni nē mōīngā īñōmō ēñente cæquēnēngā ingā bai mīnitō wēēnēñedē

adobai Möitee wodi nänö wææ angainö ante eñente cæquënemini inte ñä cæyænte bai ingaminimpa. Mänömai inte wæyöminite Codito iñömö, Minitö botö nempo quëwëninque waincate bai cæmini badingue Wængongui beyænque ante eñente cæcæminimpa, ante pönö cægacäimpa. Tömengä baonga ponte eñadingue mönö beyæ wæninque ñäni ömæmongacäimpa. İninque mönö tömengä tönö adobai wænte bai ingaimö inte mönö wëenëñedë mönö eñenguëngainö ante edæ ædö cæte wæætë eñenguënemö inguimöö. Wæætë edæ nê ñäni ömæmongaingä nempo quëwënömo inte mönö tömengä quimö inömö imompa.

⁵ Doyedë iñömö mönö nê wæwocamö inömö inte baonque ante pönente mönö quëwëñedë Möitee wodi nänö wææ angainö ante eñente wædinque godömenque wiwa cæinëwente wæmö batamompa. İninque mönö baaca incate bai cædinque mönö wænguinque wënæ wënæ cætamompa. ⁶ Wëenëñedë wææ änäni ate mönö, Ædö cæte eñente cæquüi, ante ñä cæyænte bai wægaimö inte mönö edæ Codito tönö adopoque wænte bai ñi cæyænte bai bagamöimpa. Nöwo guiquënë adopoque wængaimö inte mönö Möitee wodi pedæne ante nänö wææ ante yewæmongainö ante wii eñente cæquënemö inte abæ tawænte bai gomompa. Wæætë edæ Wængongui Tæiyæ Waëmö Önöwoca beyæ quëwëmö inömö inte mönö tömengä miine nänö änonque ante eñente cæmö imompa.

Wënæ wënæ botö cædö beyæ ante wæbopa, ante

⁷ İninque æbänö ante anguimoo. Möitee wodi, Wënæ wënæ cæqui, ante yewæmongacäimpa, ante botö dicæ antawogaa. Ædö cæte edæ mänömai anguii. İñæmpa tömengä wææ änämai ingä bai botö, Quinö wënæ wënæ cæte i, ante eñënëmai incädömoimpa. Botö edæ, Wacä qui æinente wæbo incæte botö ænämai inte ee abo inte waa cæbopa, ante pönengaboimpa. Möitee wæætë, “Wacä qui ante æinente wædämai ie,” ante wææ angä

beyænque botö, Æ æinente botö wædö incæ wënæ wënæ impa, ante tæcæ eñentabopa. Mäninö ante änämai ingä bai botö, Wënæ wënæ impa, ante eñënëmai incädömoimpa. ⁸ İninque nê wënæ wënæ cædömo inte botö Möitee nänö wææ angainö ante önömoncaque eñente ate botö quingämë bai tömancoo ante godömenque æinente wætabopa. Edæ tömengä wææ änämai ingä bai mönö wënæ wënæ cædö iñömö edonque inämai inte edæ dæ ante bai incädönimpa.

⁹ Möitee wodi wææ ante nänö yewæmongainö ante botö adämai imoyedë botö önönque wædämai quëwengaboimpa. Wæætë, İimai wææ ante yewæmonte ongompa, ante adinque botö, Æ, wënæ wënæ cæbo imopa, ante tæcæ eñëninque, ¹⁰ edæ näñe wænte bai botö, Wæwocabo imopa, ante wætabopa. Edæ, İimai cædinque quëwencæminimpa, ante wææ ante nänö yewæmongainta adinque botö edæ, Botö wænguinque wii eñente cæbopa, ante tæcæ eñëninque wætabopa. ¹¹ Edæ Möitee wodi wææ ante nänö yewæmongainta do adimo inte mäninö ante eñënëmai cædinque botö pante wænguinque wënæ wënæ cætabopa. Edæ, Önönque wënæ wënæ cæte tocæi, ante wapiticæ pönente cæyömete tömengä nänö wææ angainö ante odömönäni eñëmo beyænque botö, Æ, botö wænguinque wënæ wënæ cæbopa, ante wægaboimpa.

¹² Wængongui nänö wææ angainö iñömö tæiyæ waëmö inepa. Ayæ Möitee wodi adobai mänine tæiyæ waëmö inedö ante apænedinque, İimai cædäni, ante wææ äninque, Mini waa cæte quëwënguinque eñente cæcæminimpa, ante nöingä pönä angacäimpa.

¹³ İninque tömengä, Mini waa quëwënguinque impa, ante nänö wææ angainö incæ botö imote ædö cæte wænonguii. Wængongui wæætë, Quinö wënæ wënæ cæte i, ante edonque acæminimpa, ante pönö waa cædinque, Minitö eñënëmai imini beyænque mini wænguinque impa, ante wææ angacäimpa. İninque Wængongui nänö wææ angainö beyænque botö iñömö, Wënæ wënæ cægaboimpa, ante edonque atabopa.

14 Mīnitō tæiyæ waēmō ēwocacæmīnimpa, ante Wængonguī mōnō ōnōwoca beyænque ante wææ angacāimpa, ante do ēñēmōmpa. Incæte botō wīwa cædōnō beyænque cæte nē quēwēmo inte botō edæ ōmæwocate bai inte wæbopa. 15 Edæ botō waa cæinente wædō ante cædāmaī inte botō wæætē edæ, Wīī cæinente awædō, ante botō piinte adō incæ edæ do cæte wæbopa. Īnīnque botō, Æbānō cæboo, ante ēñēnāmaī ĩmopa.

16 Wængonguī nānō wææ angainō ante ēñēnāmaī cæbo incæte botō ēñēnāmaī botō cædō ante wīī cæinēmōpa. Mānōmaī botō wīī cæinēnō beyænque botō, Wængonguī waa cædinque wææ angacāimpa, ante bai cædinque tōmengā nānō wææ angainō ante edæ Ao ante bai cæbopa. 17 Incæte botō wodi wīī tōmēmō ānō ante cæbopa. Wæætē edæ botō wīwa entawēnō beyæ wīī cæinente botō wædō ante do ēñente cædinque wæbopa. 18 Edæ ancaa waa cæinente wæbo incæte botō dicæ waa cæbogaa. Mānōmaī beyæ botō, Botō baonga quēwēninque botō waa cæquīnō ĩñōmō edæ dæ ampa, ante do ēñēmōpa. 19 Waa pōnī botō cæinēnō incæ cædāmaī inte wæbopa. Wæætē edæ wēnæ wēnæ cæte botō wīī cæinente wædō ante ancaa cæte wæbopa. 20 Īnīnque botō wīī cæinēmō inte do cæbo ĩnīnque wīī tōmēmō cæbopa. Wæætē wīwa cæquīnque botō entawēnō beyænque edæ wēnæ wēnæ cæte wæbopa.

21 Waa cæinente wæbo incæte botō wēnæ wēnæ cæquīnō edæ do entawente wæbopa. Īnīnque botō ñā cæyænte bai ĩmopa, ante do abopa. 22 Edæ botō Wængonguī nānō wææ angainō ante mīmōnē pōnēninque watapæ tobopa. 23 Incæte, Wængonguī nānō wææ angainō ante botō pōnēnō incæ ēñēnāmaī ingæīmpa, ante botō edæ wade wææ ante entawente bai inte wæbopa. Īnīnque nāmā wææ ante bai mīmōnē botō pōnēnō tōnō wade, Ēñēnāmaī ingæīmpa, ante wææ ante botō entawēnō tōnō nāēmæ guēadō guēa cæ bai inte wæbopa. Edæ mānīne beyæ wīwa botō cæquīnō entawēninque botō yæguīncamenca ñā cæyænte bai inte wæwēmōpa.

24 Edæ cætawente wænguī wæ. Botō wīwa cæquīnō entawente beyæ botō wænguīñō ēñate wæyōmote æcānō edæ æna beyænque

quēwēmaīmoo, ante wæbopa. 25 Edæ, Itota Codito beyænque quēwēnguīmo ĩmopa, ante botō Wængonguī ingante waa ate pōnente apænebopa. Īnīnque Wængonguī nānō wææ angainō ante ēñēninque botō tōmēmō mīmōno tōmengā beyænque cæte nē quēwēmo ĩnōmo ĩmopa. Incæte botō ēñayō beyæ botō wīwa cæinēnō beyænque cæte nē quēwēmo inte wæbopa.

8

Wængonguī Ōnōwoca ingante ēwocate quēwēngæīmpa

1 Īnīnque mōnō Itota Codito nempo quēwēninque mōnō wīwa cæinente wæwēnō ante cædāmaī ĩnōmō inte wæætē tōmengā Ōnōwoca pōnō angā ēñēninque cæte quēwēmō adīnque Wængonguī ĩñōmō, Mīni wænguīnque, ante apænte ānāmaī ingampa. 2 Edæ wīwa cæinente mōnō wæwēnō ante mōnō wænguīnque ēñente cæyōmōnte Itota Codito ĩñōmō pōnō gā peyæmpote bai ō ængā beyænque mōnō abæ tawænte ee gote bai quēwēmōmpa. Ayæ tōmengā Ōnōwoca nē quēwēnōngā nānō wææ ānō ante wæætē mōnō ēñente cæinente quēwēmōmpa.

3 Edæ Mōītee wodi, Īīmaī cæedāni, ante wææ āñongā mōnō ĩñōmō wīwa cæinente mōnō wæwēnō beyænque aquīī piñænāmaī ēñadōmō inte, Mōnō ædō cæte ēñente cæquīī, ante wægāmōīmpa. Mōnō waocabo mānōmaī wēnæ wēnæ cædōmō inte wæyōmō Wængonguī wæætē, Waocā bacæcāimpa, ante tōmengā Wēngā ingante da pōnōngā pōnīnque mōnō wīwa cæinentai bai adotai bai ēñate pægacāīmpa. Ēñate pædinque tōmengā nāmā baō nānō ēñayō ante edæ, Wængonguī quī ĩmpa, ante pædæ godonte bai cædinque wēnæ wēnæ mōnō cædō beyænque ante wægacāīmpa. Mānōmaī cædinque Wængonguī mōnītō ĩmōnīte apænedīnque, Mīni wænguīnque mīnītō baonga ēñadīnque wēnæ wēnæ cæmīni awædō, ante apænte angacāīmpa. 4 Mānōmaī pōnō cædinque tōmengā, Wīwa cæinente mīni wæwēnō ante ēñente cædāmaī inte mīnītō ñōwo wæætē botō Ōnōwoca ingante ēwocadīnque tōmengā beyænque quēwēmīnīpa. Īnīnque nō pōnī botō wææ angainō ante tōmānō ante

ēñēninque nō cæte quēwencæminimpa, ante cægacāimpa.

⁵ Adopoque ēñadinque baonque nē ēñadāni guiquēnē wīwa cæinente nāni wæwēnō ante pōnente cædānīpa. Mempoga ēñadinque Wængonguī Ōnōwoca ingante nē ēwocadāni guiquēnē tōmengā nānō ānonque ante pōnente cædānīpa. ⁶ Wīwa cæinente nāni wæwēnō ante cæcæte ante nē pōnēwēnāni guiquēnē tōmēnāni nāni wænguinque māninō ante pōnēwēnānīpa. Wæætē Wængonguī Ōnōwoca angā ēñente nē pōnēnāni guiquēnē tōmēnāni nāni gānē entawente quēwenguinque edæ mānōmaī pōnēnānīpa. ⁷ Waodāni wīwa nāni cæinente wæwēnō ante cæcæte ante nē pōnēwēnāni iñōmō edæ Wængonguī ingante piinte cædānīpa. Wængonguī nānō wææ ānō ante tōmēnāni ōnōmoncaque ēñēnāni inte edæ wīi ēñente cædānīpa. Iñæmpa tōmengā Ōnōwoca ingante ēwocadānīpa diyæ ēñente cæquīnānīi. ⁸ Wīwa cæinente nāni wæwēnō ante cæcæte ante nē cædāni iñōmō, Wængonguī waa acæcāimpa, ante ancaa cædāni incæte Wængonguī wæætē edæ waa todāmaī incæcāimpa.

⁹ Mīnitō guiquēnē Wængonguī Ōnōwoca ingante ēwocamīni iñinque edæ wīwa cæinente mīni wæwēnīnō ante cædāmaī inte quēwēmīni imaimīnīpa. Wæætē edæ tōmengā Ōnōwoca angā ēñente cæte quēwēmaīmīnīpa. Incæte waocā æcāmenque incæ Codito Ōnōwoca ingante ēwocadāmaī ingā iñinque tōmengā wæætē Codito nempo quēwēnāmaī imaingampa. ¹⁰ Mīnitō guiquēnē Codito ingante entawēmīni iñinque wēnæ wēnæ mīni cægāinō beyænque mīnitō baō incæ tōmengā tōnō adopoque wænte baī ēñamīnīpa. Incæte Codito nānō nō cædōnō entawēmīni inte mīnitō ōnōwoca mempoga ēñate baī mīiwoca ēwocamīnīpa. ¹¹ Itota ingante Wæmpocā, Nāni ōmæmōe, angā ēñēninque ñāni ōmæmongacāimpa. Ayæ mīni baō ñōmæintai ēñayōmīnite tōmengā Ōnōwoca pō guidinque quēwengā iñinque Wæmpocā wæætē mīnitō imīnite, Nāni ōmæmōe, ante adobaī angā ñāni ōmæmoncæmīnīpa. Edæ tōmengā Ōnōwoca mīni nē ēwocadongā tōnō tōmengā pōnō cæcā ate mīnitō baō

incæ ñōmæñāmaī intai bacæimpa.

¹² Iñinque botō tōnīñamīni ēñēedāni. Wængonguī Ōnōwoca angā ate mōnō ēñente cæquēnēmō imompa. Wæætē wīwa cæinente mōnō wæwēnō ante wīi ēñente cæte quēwenguēnēmō inōmō imompa. ¹³ Iñæmpa wīwa cæinente mīni wæwēnō ante ēñente cæmīni iñinque mīni æmæwo wænguinque cæbaīmīnīpa. Wæætē Wængonguī Ōnōwoca ingante ēwocadinque mīnitō wīwa mīni cædīnō ante wido cæmīni iñinque mīni quēwenguinque imaimpa.

¹⁴ Ædānidō inānite Wængonguī Ōnōwoca tōō æmænte angā ate ēñente goda iñōmō tōmēnāni iñōmō edæ Wængonguī wēnāni inānīpa. ¹⁵ Mīnitō guīñente mīni wægāinō beyænque ñā cæyænte baī nē quēwengāimīni inte ñōwo wæætē Wængonguī Ōnōwoca ingante æninque wīi adobaī guīñente wæmīni imīnīpa. Wæætē Wængonguī Ōnōwoca pōnō cæcā beyænque mīnitō nāwā wēmīni bamīnīpa. Ayæ tōmengā Ōnōwoca pōnō cæcā ænte ēwocadinque mōnō guīñēnedāmaī inte edæ, Mæmpo, botō Wæmpo, ante apænemompa. ¹⁶ Edæ mōnō mīmōnē ponte apænedinque Wængonguī Ōnōwoca incæ, Bitō Wængonguī nāwā wēmi inōmi imīpa, ante apænecampa. ¹⁷ Iñinque mōnō Wængonguī wēmō inōmō inte tōmengā nānō pōnonguincoo nē ænguīmō imompa. Edæ Codito tōnō āanque baī caate wæmō iñinque mōnō tōmengā ñāō baī nānō emō baī ñāō adobaī emōninque tōmengā tōnō edæ godongāmæ ænguīmō imaimompa.

Ñāō baī mōnō entawenguīmāmo

¹⁸ Botō iūmaī ante pōnēmopa. Nōwo caate mōnō wæpāmo iñōmō pōnōmenque iñonte iñcayæ ate ñāō baī mōnō emonguīmāmo guiquēnē wīi adobaī wædænque inte godōmenque nangūi pōnī ingæimpa. ¹⁹ Æyedēnō Wængonguī wēnāni tæī emonte badinque edonque a ongonguīnānīi, ante acæte ante edæ Wængonguī nānō badongaincoo incæ nangūi aīnente wædinque wānō conte baī ongoncoopa. ²⁰ Edæ wēnæ wēnæ cædāmaī incoo iñonte mōnō waocabo mōnō ēñēnāmaī cægāinō beyæ Wængonguī nānō badongaincoo ōnoncooque baī

bagatimpa. Wīi nāmā ānō beyæ mǎnōmaī bagatimpa. Wæætē Wængonguī nē, Īncayæ ate watapæ bacæimpa, ante angaingā inte adocā angā beyænque ōnoncooque baī bagatimpa. ²¹ Edæ Wængonguī nānō badongaincoo ñōmænguīncooque inte yæguīncamenca ñā cæyænte baī wæyoncoote Wængonguī gā pe æmpote baī godō cæcā beyænque ñōmænāmaī inguīncooque bacæcoimpa. Mōnō Wængonguī wēñæmō iñōmonte tōmengā pōnō ñimpo cæcā ate mōnō abæ tawænte baī tæi ēmonte bamō baī tōmengā nānō badongaincoo adobaī abæ tawænte baī miīncooque bacæcoimpa. ²² Wēñæ nantate, Æiquedō ēñaquingāā, ante nāni wæ baī Wængonguī nānō badongaincoo incæ ñōwo ganca godongāmæ nantate baī, Æiquedō waa baquīi, ante ō ō wæconcoopa.

²³ Ayæ Wængonguī mōnō imonte mā pōnōninque tōmengā Ōnōwoca ingante pōnongā ænte do ēwocamō inōmō inte mōnō adobaī, Mōnō baō miīñō ēñaquinque æiquedō Wængonguī wēñæmō ædæmō baquīi, ante nanguī æinente wānō conte ō ō wæmompā. ²⁴ Edæ Codito, Botō ĩncayæ ate badōmo ate watapæ bacæimpa, ante pōnēdāni, āninque mōnō imonte edæ ængā beyænque quēwēmompā. Īninque mǎnīnō edæ, Watapæ bacæimpa, ante nānō angainō iñōmō ĩnque ba acæte ante mōnō ayæ wānō cōmompā. Mǎnīnō watapæ do ba amō baī mōnō, Ayæ ate watapæ ba acæimpa, ante ānāmaī incædōmōimpa. Waocā do æningā inte, Æinente wæbopa, ante quīnante anguingāā. Īñæmpā edæ dobæ ængantapa. ²⁵ Īninque mōnō æinente wædō ante mōnō cōwē ængæimpa, ante wede pōnēmō ĩninque mōnō wæntædāmaī inte ee wānō cōmompā.

²⁶ Ayæ adobaī mōnō aquīimō pōni iñōmonte Wængonguī Ōnōwoca mōnō beyæ cæcampa. Æbānō cæte Wængonguī ingante apænequīi, ante ēñēnāmaī inte wæyōmonte tōmengā wīi waomō tededō ante apænedinque tōmengā ōnōwēnenque mōnō beyæ apænecampa. Mǎnīnō tōmengā nānō tededōnō ante mōnō guīquēnēnō inte ōnōneca ædō cæte tedequīi. ²⁷ Mōnō Wængonguī quīmō tæiyæ waēmō ēwocamō

iñōmonte Wængonguī Ōnōwoca iñōmō mōnō beyæ apænedinque, Mæmpo Wængonguī nānō angainō baī bacæimpa, ante pōnēninque apænecampa. Īninque mōnō mīmōno do adongā inte Mæmpo Wængonguī iñōmō edæ, Botō Ōnōwoca æbānō pōnēninque apænecāā, ante do ēñengampa.

Nē tæi ēmōninque mōnō gānā cæmō imompā, ante

²⁸ Wængonguī, Botō ānō baī ĩnque bacæimpa ante cæcæminimpa, ante mōnō imonte aa pegacāimpa. Īninque tōmengā nānō ānō baī nē cæmō inte mōnō tōmengā ingante waadete pōnēmō iñōmonte Wængonguī wæætē mōnō beyænque cōwē waa pōnō cæcā ate mōnō edæ, Inguipoga æbāmē ba incæte mōnō waa pōni quēwenguīnque impā, ante edæ do ēñēmompā. ²⁹ Doyedē badōninque Wængonguī iñōmō, Botō Wengā Bamoncā-dengā iñongante ĩnāni tōmengā biwīidi badinque nanguī ĩnāni yebænte bacædānimpā, angacāimpa. Īninque tōmengā mǎnōmaī cæcæte ante cædinque, Do botō nē agāināni iñōmō tōmēnānique botō Wengā nānō entawēnō baī adobaī entawencædānimpā, ante badongacāimpa. ³⁰ Ayæ, Botō Wengā nānō entawēnō baī entawencæminimpā, ante nānō nē angāināni iñōnānite do aa pegacāimpa. Ayæ tōmengā nānō aa pegāināni adodāni ĩnānite, Botō ayōmo mīnitō nō cæmīni bacæminimpā, ante badongacāimpa. Tōmengā ayongā nō cædāni nē bagāināni ĩnānite tōmengā, Mīnitō tæi ēmonte badinque ñāō baī ēmonte bacæminimpā, ante do badongacāimpa.

³¹ Īninque æbānō ante angūimoo. Edæ Wængonguī mōnō tōnō godongāmæ cæcā iñongante æcānō mōnō imonte bæ taquingāā. Edæ dæ angampa. ³² Tōmengā Wengā adocanque iñongante Wængonguī pæ gompodāmaī inte da pōnongā pōninque tōmengā wæætē mōnō tōmāmō beyæ teēmente wæætē wængacāimpa. Māningā ingante da pōnōninque Wængonguī tōmengā nānō ēagaincoo ante ædō cæte pōnōnāmaī inguingāā. Edæ, Botō Wengā tōnō godongāmæ entawencæminimpā, ante

Wængonguī tōmancoo do pōnongā æmompā.
³³ Wængonguī mōnō imonte apænte ængā ongōñōmonte æcānō, Wiwa cæbipa tōō, ante apænte anguingāā. Īñæmpā Wængonguī incæ, Botō ayōmo mīnitō edæ nō cæmīni imīnīpā, ante badongā bamōimpā. ³⁴ Itota Codito nē wængaingā inte godōmenque ñāni ōmæmongaingā inte Wængonguī tōmēmæ ĩnō do tæ contate a ongongampā. Ayæ mōnō beyæ Wængonguī ingante cōwē apænecampā. Tōmengā mǎnōmāi cæcā adinque mōnō imonte æcānō, Bitō wænguinque, ante apænte anguingāā. Īñæmpā wīi eyepæ ĩnānīpā.

³⁵ Codito mōnō imonte waadete pōnente aayongā æcānō gā pe æmpote ō ænguingāā. Edæ, Ædō cæte cæquīmōō, ante wæmō incæ caate wæwēmō incæ mōnō imonte togænte pānāni wæmō incæ mǎnōmāi wæyōmonte mōnō Codito dicæ mǎniñedē edæ waadedāmāi inguingāā. Mōnō wænguinque gue ænente wæmō incæ weocoo ōmaamō inte wæmō incæ tōmengā mōnō imonte dicæ waadedāmāi inguingāā. Quiēmē beyæ, Mīni wænguinque, ante wææ ānāni wæyōmonte yaēmenca tacadāni wæyōmonte Codito mǎniñedē dicæ waadedāmāi inguingāā. ³⁶ Edæ Wængonguī ingante āmotamīni ante bai yewæmongatimpā. “Bitō beyænque wænōnāni wænguī wæ, ante mōnitō tōmāā itædē wæmōnīpā. Obegaidi ĩnānite, Wænongæimpā, ante ānāni bai, mōnitō ĩmōnite adobai, Wænongæimpā, ante pīināni wæmōnīpā,” ante yewæmonte ongō aedāni.

³⁷ Edæ mǎnimāmo mōnō wæpāmo tōmāmāmo pō ate wædōmō incæte mōnō imonte nē waadete pōnengā nempo ongōninque mōnō tæi ēmonte godōmenque gānā cæte ongōmompā. ³⁸ Botō do ēñente pōnēmopā. Mōnō nē waadete pōnengā nempo ongōñōmonte mōnō wænguīmāmo incæ mōnō quēwenguīmāmo incæ anquedoidi incæ wænæidi incæ ñōwopāmo incæ ĩncayæ ponguīmāmo incæ tæi nāni pīñæmāmo incæ mǎnimāmo tōmāmāmo ædō cæte mōnō imonte gā pe æmpote ō ænguīi. ³⁹ Ayæ edæ æibæ mōnō æite wæquīmāmo incæ guībæ mōnō wæænte

wæquīmāmo incæ quiēmē Wængonguī nānō badongaimāmo incæ mǎnimāmo tōmāmāmo ĩñōmō mōnō Codito nempo ongōñōmonte ædō cæte gā pe æmpote ō ænguīi. Edæ Wængonguī nānō waadete pōnēnō entawēninque mōnō Awēnē Itota Codito ĩñōmō mōnō imonte waadete pōnēninque pæ gompoyongante mǎnimāmo tōmāmāmo incæ gā pe æmpote ō ænāmāi ingæimpā. Amo ēñēmāimīnīpā.

9

Idægoidi ĩnānite Wængonguī apænte an-gacāimpā, ante

¹ Botō ĩñōmō edæ mīmō entawēmo inte nāmā apænte pōnēñōmote Wængonguī Tæiyæ Waēmō Ōnōwoca adoyōmō ante apænecā ĩninque botō ædō cæte babæ wapiticæ anguīmoo. Edæ Codito nempo quēwēnōmo inte botō nō pōni apænedinque ĩmāi āmopā. ² Mīmōno cōwē cæwēnente wæwēmo inte botō ĩmāi ante pōnēninque nanguī wæbopā. ³ Botō guidēnāni botō tōnō adodāni ĩnōnāni ĩñōnānite Wængonguī ængā beyænque quēwencædānīmpā, ante botō nanguī āninque wæbopā. ĩninque Wængonguī tōmēnāni ĩnānite, Quēwencæmīnīmpā, ante æninque wæætē botō Codito nempo quēwēñōmote botō imote pīinīnque tatodonte wido cæcā bai botō Ao ante piyænē cæcædōmoimpā.

⁴ Tōmēnāni ĩñōmō idægoidi ĩnānīpā. Wængonguī pæpogacā pædāni ĩninque tōmēnānique tōmengā wēnāni ingadānīmpā. Tōmēnāni ĩnānite Wængonguī ñāō entawente nānō tæi ēmōnō ante odōmongā adinque tōmēnānique nē agāināni ĩnānīpā. Tōmēnāni ĩnānite apænedinque Wængonguī, Botō pōnō cæbo ate mīnitō Ao āmīni ĩninque mōnō godongāmæ wāa cæcæimpā, ante cægacāimpā. ĩmāi cæedāni, ante tōmengā tōmēnāni ĩnānite tāno wææ angā ēñente mǎnīnō nānō wææ angāinō ante tōmēnānique nē mangāināni ĩnānīpā. Wængonguī oncōnē ñænæncōnē wadāni guidāmāi ĩñōnānite idægoidique guite tōmengā ingante wāa ate ædæ wæænte apænedānīpā. Tōmēnānique ĩnānite Wængonguī, Cōwē wāa cæcæboimpā, ante

mā apænecäimpa. ⁵ Mönitō, Mæmæidi, ante möni nē angaināni incæ idægoidi mæmæidi adodāni inānipa. İninque tōmēnāni Pæingā badinque mönō Codito inguipoga eñagacäimpa. Tömengä iñömō tōmāmō Wængonguī inongä ingampa, ante adinque mönō tōmengä ingante apænedinque, Tömēmi toquinque pönō waa cæbi æmönipa, ante mönō cōwē ñimpo cædāmaī apænecäimpa. Mänōmaī impa, ante botō, Amēē, ämopa.

⁶ Idægoidi quēwencädänimpa, ante nānō angainō bai Wængonguī cædāmaī ingacäimpa, ante botō dicæ ämogaa. Wæætē edæ iīmaī impa. Nāwä idægoidi nāni wede pönēnō bai pancadāniya pönēnāmaī ināni iñönānite botō tōmēnāni inānite, Nāwä idægoidi inānipa, ante apænedāmaī imopa. ⁷ Edæ Abadäō wodi pæināni incæ pancadāniya iñömō, Abadäō wodi wēnāni, mönō änönāni wīi inānipa. Wæætē, “Botō ayōmo Itæca wēnānique bitō pæināni inguināni inānipa,” ante mæmæ Abadäō ingante Wængonguī angampa, ante yewæmongatimpa. ⁸ Mänōmaī i ininque Abadäō tapæicā nē eñate pædāni inānite Wængonguī, Abadäō wēnāni, ante angantawogaa. Wæætē Abadäō wodi ingante apænedinque, Bitō wēnāni bacädänimpa, ante Wængonguī nānō nē angaināni guiquēnē tōmēnānique tōmengä wēnāni inānipa. ⁹ Edæ, “Iñedē impa, ante botō änōñedē botō adodō pōmo ate māniñedē ate edæ Tada incæ wēñængä onguīñængä ingante mancæcäimpa,” äninque Wængonguī, Mäninō botō änō bai cōwē cæcæboimpa, angacäimpa.

¹⁰ Wīi māninque impa, ante eñengæimpa. Godōmenque iīmaī ante mönō pönengæimpa. Wæmpocā adocanque tapæicā ate Adebeca wodi wēna äancadēnaque eñagadaimpa. Mänina wæmpocā iñömō mönō wæmæ Itæca wodi ingacäimpa. ¹¹ Tömēnā wēna ayæ eñadāmaī iñedē ædō cæte wēnæ wēnæ cæquīnaa, ædō cæte waa cæquīnaa. Incæte edæ Wængonguī, İingä ingante apænte æncæboimpa, ante nānō angainō ante cōwē bacæimpa, ante cædinque, ¹² tōmēna ayæ cædāmaī iñönate Wængonguī nē aa pedongä inte, “Bamoncadengä incæ ayæmengä

ingante nē cæcä incæcäimpa,” ante Adebeca wodi ingante apænecäimpa. ¹³ Adobainō ante Wængonguī beyæ yewæmongadänimpa. “Aacobo ingante waadete pönengaboimpa. Etawoo ingante guiquēnē piinte agaboimpa,” ante yewæmongatimpa.

¹⁴ İninque mönō æbänō anguii. Wængonguī dicæ nō cædāmaī ingantawogaa. ¹⁵ Wæætē Möitee wodi ingante apænedinque Wængonguī iīmaī angacäimpa. “Waacā adocanque ingante botō, Wīi pāinēwædō, äninque tōmengä ingante do godō ñimpo cædinque pänāmaī incæboimpa. Adocanque ingante nē waadete cæinēmo inte botō tōmengä ingante do godō waadete waa cæcæboimpa,” angacäimpa, ante yewæmongatimpa. ¹⁶ İninque waocā nanguī cæinengä incæte waocā nanguī cæcä incæte Wængonguī wīi waocā nānō cædō beyænque apænte ængampa. Wæætē nāmā nānō waadete waa cæinēnō beyænque Wængonguī waocā ingante godō apænte ængampa. ¹⁷ Edæ awēnē Padaönō wodi ingante apænedinque Wængonguī, “Botō iīmaī ante cæcæte ante bitō imite ængō cætabopa. Edæ bitō imite ængō cædinque tæi piñænte pönō cæbo adinque woadāni, Wængonguī tæi piñængä inte mänōmaī cæcampa, ante botō emōwo ante inguipoga tōmāo apænedāni do eñencädänimpa, ante cætabopa.” Wængonguī mänōmainō ante Padaönō ingante apænecantapa, ante yewæmongatimpa. ¹⁸ İninque Wængonguī, Adocanque ingante godō waadete ñimpo cæcæboimpa, äninque tōmengä ingante do godō waadete ñimpo cæcampa. Wæætē wacā ingante guiquēnē, Godō cæbo ate mīmō ömædengä bacæcäimpa, äninque Wængonguī tōmengä ingante do cæcä ate edæ mīmō ömædengä bate wæcampa.

¹⁹ Mänōmainō ante yewæmōmo adinque bitō wabänō iīmaī anguiimi, ante awædō. “Iñæmpa mönitō Wængonguī nānō änō ante Baa änāmaī iñömönite tōmengä, Minitō beyænque impa, ante quīnante piinte angää.” Mänōmainō ante ämitawoo. ²⁰ Bitō iñæmpa önömique inōmi inte Wængonguī ingante wæætēdō wæætē ämii. Nē badongä ingante tōmengä nānō nē

badōnca incæ dicæ, “Botō ïmote quīnante mǎnōmaī badōwēmii,” ante dicæ anguii.
²¹ Nē bǎdongǎ ïñōmō daibo pancaiya æninq̄ue waa pōnī wamoncade bǎdinq̄ue ado daibo pancaiya æninq̄ue ōnonque ēwenguincade bǎyongante æcǎnō nē bǎdingǎ ingante Baa anguingǎǎ. Nē bǎdongǎ ïñōmō nē ānongǎ inte bǎcampa. Edæ Baa anguimii.

²² Wǎngonguī nǎnō nē pīināni ïñōmō tōmēnāni nāni ōmǎe ēwente wǎquinque wīwa cǎyōnānite tōmengǎ piyǎnē cǎdinq̄ue wantǎpiyǎ pǎnāmaī inte ee ongongantawo. ïñampa tōmengǎ nǎnō pīimāmo ante adinq̄ue do wǎcǎdānimp̄a, ante cǎdinq̄ue ayǎ tōmengǎ nǎnō tǎi pīñǎmāmo ante edonque acǎdānimp̄a, ante cǎdinq̄ue Wǎngonguī mǎnōmaī ee ongongǎ apa ānewēē. ²³ Ayǎ wǎætē, Botō waadete godō waa cǎbo ænāni inte edæ tōmēnāni ïñōmō botō ñāō baī botō ēmōnō ante acǎdānimp̄a, ante cǎdinq̄ue Wǎngonguī mǎnōmaī pǎnāmaī inte edæ ee cǎcampa. Wǎætē, Tōmēnāni ñāō ïñōmō quēwencǎdānimp̄a, ante tōmengǎ godō badongǎ ate tōmēnāni ñāō baī ēmōnānīpa. ²⁴ Edæ mōni oodeo-cabo ïñōmōnite mīnitō oodeomīni ināmaī ïñōmīnite Wǎngonguī mōnō tōmāmō ïmonte mǎnōmaī cǎcǎte ante aa pegacāimp̄a. ²⁵ Wǎngonguī ïmaī angampa, ante Ootea wodi yewǎmongacāimp̄a.

“Botō guīdēnāni ināmaī ïñōnānite botō wǎætē,

Botō guīdēmīni, ante apǎnecǎboimp̄a.

Onquiyǎngǎ botō nē waadedāmaī ingaingǎ ïñongante botō wǎætē,

Botō nē waadebi ïmīpa, ancǎboimp̄a.

²⁶ Ayǎ, ‘Botō guīdēmīni ināmaī ïmīnīpa,’ ante botō ongonte āñōmō adoyōmō ongōninq̄ue

botō wǎætē edæ, ‘Botō Wǎngonguīmo nē Quēwēmo wēmīni ïmīnīpa,’ ancǎboimp̄a.”

Ante adocǎ Wǎngonguī nǎnō ānō ante yewǎmongacāimp̄a. ²⁷ Idǎgoidi ïnānitedō ante yedæ āninq̄ue Itaiya wodi ïmaī apǎnegacāimp̄a. “Gǎwapǎ wedeca ēmōnaicoo nangui pōnī ōñō baī idǎgoidi adopodāni nangui pōnī ināni incǎte pancadāniya guiyǎ wǎæntodōnī baī mǎnimpodānīque quēwencǎdānimp̄a. ²⁸ Edæ Wǎngonguī, Inguīpoga quēwēnāni ïnānite

apǎnte āninq̄ue botō angainō baī do edæ cǎcǎboimp̄a, ante nē apǎnegaingǎ inte tōmengǎ adocǎ, Idǎwaa, ante quingǎ pōnī edæ ïninq̄ue cǎcǎcāimp̄a,” ante Itaiya wodi yewǎmongacāimp̄a. ²⁹ Adocǎ Itaiya wēēnē ïmaīnō ante nǎnō apǎnegainō baī imp̄a.

“Mōnō Awēnē nē Tǎiyǎ Awēnē tǎi pīñǎnongǎ inte dodāni ïnānite, Mīnitō pǎināni yebǎnte nangui ïnāni bacǎdānimp̄a, ante cǎdinq̄ue pancadāniya ïnānite ata cǎpocǎ quēwengadānimp̄a. Mǎnōmaī ante cǎdāmaī ingǎ baī,

mōnō wǎætē Todōmǎ quēwengāināni baī dæ badinq̄ue Gōmoda nāni quēwēñōmō dæ ba baī mōnō adobaī edæ dæ bacǎdōmōimp̄a,” ante nǎnō angainō baī imp̄a.

Idǎgoidi adobaī pōnēninq̄ue quēwenguēnēnāni ïnānīpa

³⁰ ïninq̄ue æbānō ante anguii. Oodeo ïnāmaī ïnāni guīquēnē, Nō entawēmōni bacǎmōnimp̄a, ante ānāmaī ingadānimp̄a. Incǎte Wǎngonguī godō cǎcǎ beyǎnque tōmēnāni wede pōnēninq̄ue wede nāni pōnēnō beyǎnque Wǎngonguī ayongǎ nō entawēnāni do badānīpa. ³¹ Idǎgoidi guīquēnē, Nō cǎedāni, ante mōni wǎæ angainō beyǎnque nō entawēmōni bacǎmīnimp̄a, ante nē angaināni inte eyepǎ cǎdāmaī ïnānīpa. ³² Quīnante eyepǎ cǎdāmaī ïnānī. Tōmēnāni wede pōnēnāmaī ïnāni inte wǎætē edæ, Mōnō nangui cǎdinq̄ue nō cǎmōni bacǎmōnimp̄a, āninq̄ue oda cǎte nāni pōnēnō beyǎnque dicaboga tee tēwate baī cǎdinq̄ue eyepǎ cǎdāmaī ingadānimp̄a. ³³ Edæ do Wǎngonguī beyǎ yewǎmongatimp̄a.

“Aquēnē quēwēnānī. Botō Codito ingante Tīōno nāni quēwēñōmō dica baī gō cǎbo gongǎngǎ adinq̄ue edæ

waodāni dicaboga tee tēwate baī pōnēnāmaī ïnāni inte tǎ go wǎæncǎdānimp̄a.

Tōmengǎ adocǎ ingante nē pōnengǎ guīquēnē cōwē edæ guingo ïmōnāmaī inte quēwencǎcāimp̄a,” ante yewǎmongatimp̄a.

10

1 Botö tönĩñamĩni eñeedani. Idægoidi quëwencädänimpa, ante botö mĩmönë nangui aĩnente wëdĩnque Wængongui ingante apænedĩnque botö, Bitö æmi beyænque quëwencädänimpa, ante cöwë apænebopa. 2 Wængongui beyæ nõ cæcæimpa, ante cæĩnente wëdänipa, ante nãwängä impa. Incæte tömënäni, Wængongui beyæ nõ cæcæte ante æbänö cæquĩ, ante eñëñamãĩ inäni inte õnonque cæte wëdänipa. Botö, Mãnömaĩ impa, ante në apænebo inömo imopa. 3 Edæ Wængongui pönö badongä ate mönö tömengä ayongä nõ entawëmö bamompa, ante eñëñamãĩ inäni inte idægoidi inömo, Nãmã mönö cädö beyænque nõ cæmö bacæimpa, ante cædĩnque edæ oda cægadänimpa. Mãnömaĩ cædĩnque tömënäni Wængongui nãnö nõ cægäinö ante edæ Baa angadänimpa. 4 Nö cæmö bacæte ante Wængongui nãnö wææ angäinö ante eñente cæquënëmö inte mönö tömãmö wĩ eyepæ inte wægãmöimpa. Mãnömaĩ inte wæyömonte Codito inömo, Mĩni pönencabo Wængongui ayongä nõ entawëmĩni bacæmĩnimpa, ante cædĩnque mãnĩnö Wængongui nãnö wææ angäinö ante tömãnö ante inque cægacäimpa. Inique tömengä mãnömaĩ inque cæcä adĩnque Wængongui mönö imonte wæætë wææ änãmaĩ ingampa.

5 Iĩmaĩ cæedäni, ante botö wææ angäinö eñente cædĩnque nõ cædäni badänipa, ante Möĩtee wodi iĩmaĩ ante yewæmongacäimpa. “Në eñente cæcä inömo tömengä nãnö eñente cädö beyænque quëwencæcäimpa,” ante yewæmongacäimpa. 6 Wæætë, Mönö wede pönencabo æbänö cæte Wængongui ayongä nõ entawëmö imöo, ante iĩmaĩ ante adocä yewæmongacäimpa. “Bitö, ‘Æcänö õõnædë æi añete wæænguingää,’ ante nãmãneque änãmaĩ ie.” Mãnömaĩ ante tömengä, Codito ingante æi añete wææncæte ante mönö pönëñamãĩ ingæimpa, ante ancæte ante yewæmongacäimpa. Inæmpa Codito pönãmaĩ ingampa diyæ æite mãwæmi wæænguingää. Dobæ edæ inguipoga pongacäimpa. 7 “Ayæ, ‘Æcänö tadömengadæ wæi añete ænguingää,’ ante änãmaĩ ie.”

Inæmpa Codito ayæ õñongampa diyæ wæite mãmi æænguingää. Edæ Codito dobæ ñãni õmæmonte quëwengampa.

8 Inique, Mönö wede pönencabo æbänö nõ cæmö bamöo, ante æbänö ante yewæmongacäi. Edæ, Wede pönengæimpa, ante mönitö apænemöni mĩni eñëñine ante adode ante iĩmaĩ ante yewæmongacäimpa. “Wængongui nãnö nõ änöne inömo edæ bitö weca eyequei pönĩ ënepa. Edæ bitö önöne tedeyömi bitö mĩmönö pönëñömi tömengä nãnö nõ änöne edæ adoyömo pönĩ ënepa.” 9 Æbänö cæte quëwenguĩ, ante iĩmaĩ ante ënepa. Itota Codito Tæiyæ Awënë inongä ingampa, ante bitö önöneca apænedĩnque, Itota Codito wænte õñõñongante Wængongui angä ñãni õmæmongacäimpa, ante bitö mĩmönö pönëmi adĩnque tömengä ængä beyænque quëwencæbiimpa, ante adode incæ ënepa. 10 Mĩmönö edæ wede pönëninque mönö Wængongui ayongä nõ entawëmö bamompa. Mãnömainö ante wede pönëmopa, ante önöneca apæneyömonte tömengä ængä beyænque mönö quëwëmompa.

11 Codito ingantedö ante apænedĩnque, “Tömengä ingante në wede pönengä inömo tömengä edæ guingo imönãmaĩ incæcäimpa,” ante Wængongui angä eñente yewæmongadänimpa. 12 Edæ mönitö oodeomöni inömonite mĩnitö wæætë oodeomĩni inãmaĩ inöminite mönö tömãmö imonte adĩnque mönö Awënë inömo edæ, Adoyömo pönĩ imĩnipa, ante acampa. Inique tömengä adocä tömãmö Awënë inongä ingampa. Ayæ tömengä ingante aa pemö eñëninque tömengä inömo edæ tömãmö imonte nangui pönĩ pönö cæcä æmompä.

13 Iĩmaĩ ante Wængongui beyæ ante yewæmongatimpa. “Mönö Awënë ëmöwo ante apænedĩnque aa pedäni eñëninque mönö Awënë inömo edæ tömënäni tömãnäni inãnite ængä beyænque quëwencädänimpa.” 14 Inique tömengä ingante në pönëñamãĩ inäni inömo ædö cæte tömengä ingante aa pequĩnãni. Ayæ tömengä ëmöwo ante eñëñamãĩ inäni inömo tömengä ingante ædö cæte pönenguĩnãni. Ayæ tömengä ëmöwo ante wadäni gote

apænedāmaī iññōnāni tōmēnāni ædō cæte
ēñenguīnānii. ¹⁵ Ayæ edæ wadāni da
godōnāmaī iññōnāni nē apænequēnēnāni
wæætē ædō cæte gote apænequīnānii.
Īimainō ante edæ Wængonguī beyæ ante
yewæmongatimpa. “Tōmengā waa pōni
nānō cægainō ante nē watapæ apænedāni
iññōmō tōmēnāni nāni apænecæ gote
cægōniwa iññōmō edæ waa pōni ēwadānīpa,”
ante nāni yewæmonte angainō bai
impa. Edæ nē apænecæ godāni inānite
Wængonguī waa acampa.

¹⁶ Mōnō Awēnē ingantedō ante wat-
apæ apænedāni ēñēnīnque idægoidi pan-
cadāniya Ao angadānīpa. Pancadāniya
guiquēnē Baa angadānīpa. Tōmēnāni
mānōmainō nāni cædinō ante Itaiya wodi
īmaī ante yewæmongacāimpa. “Awēnē
Wængonguī ēñēmi. Mōnitō apænemōni
tōmēnāni nāni ēñēnō ante edæ æcānō
ēñente pōnengā. Īñæmpa nē pōnengā
iññōmō edæ dæ angā awædō,” ante
yewæmongacāimpa. ¹⁷ Īnīnque gode ānāni
ate nē ēñēnānīque wede pōnēnāni badānīpa.
Ayæ Codito nānō ānōnō ante gode ante
apænedāni beyænque nē ēñēnāni badānīpa.
¹⁸ Īnīnque botō, Mānīnō ante idægoidi gobæ
ongōnānīpa diyæ ēñēnāmaī inguīnānii,
āmopa. Do ēñēnānitapa, ante edæ īmaī ante
Wængonguī beyæ yewæmongatimpa.

“Nē apænedāni inguīpoga tōmāo gote ted-
edāni ēñēnānīpa.

Wadāni inguīpoga nāni quēwenganca
quēwēñōnānīte mānīnō tōmēnāni
nāni apænedō ante do ēñēnānīpa,”
ante yewæmongatimpa.

¹⁹ Ayæ wæætē, Idægoidi onōmonca
ēñēnīnque omæcadāni inānīpa diyæ
ēñēnāmaī inguīnānii. Do ēñēnānitapa.
Edæ Mōitee wodi incæ īmaī ante
yewæmongacāimpa.

“Wadāni onōnānīque iññōnānīte botō godō
waa cæbo adīnque

mīni idægocabo wæætē, Mōnitō imōnīte
wīi pōnō cæbii, ante pīnte
wæcæmīnīpa.

Ayæ wadāni ocai omæcadāni iññōnānīte
botō godō waa cæbo adīnque mīnitō
wæætē nē pīnte amīni bacæmīnīpa,”

Ante cæcæte ante Wængonguī pōnō
cægacāimpa. ²⁰ Itaiya wodi guiquēnē
Wængonguī beyæ ante guīñēnāmaī inte
apænegacāimpa.

“Wadāni iññōmō botō imote ante diqui diqui
mīnāmaī ināni incæte do adānitapa.

Ayæ, Wængonguī ingante aīnēmōnīpa, ante
ānāmaī iññōnānīte, Botō imote aedāni,
ante botō odōmōmo adānitapa.”

²¹ Ānīnque Itaiya wodi idægoidi inānītedō
ante apænedīnque, “Ēñēnāmaī inte Baa
ānōnāni iññōnānīte botō, Pōedāni, ante tōmāā
itædē onōmpo compo compo cæbo incæte
pōnāmaī inānitapa.”

11

*Idægoidi pancadāniya inānīte Wængonguī
apcente ængā*

¹ Īnīnque botō īmaī ante apænebopa.
Tōmengā quīnāni iññōnānīte Wængonguī
dicæ idægoidi inānīte Baa angantawogaa.
Īñæmpa botō adobo nāwā idægobo imopa.
Abadāo wodi pæīmo inōmo inte botō
edæ Beencamīnō wodi pæīmo inōmo
inte tōmengā pæīnāni tōnō adocabobo
tōmēmo inōmo imopa. ² Idægoidi botō
quīnāni incædānīpa, ānīnque Wængonguī
wēēnēñedē pōni mōnitō imōnīte adīnque
do apænte ængacāimpa. Īnīnque mōnitō
tōmengā nānō nē agāimōni iññōmōnīte
tōmengā cōwē Baa ānāmaī ingacāimpa.
Idægoidi inānīte pīnte ānīnque Edīya wodi
Wængonguī ingante apænegacāimpa, ante
æbānō yewæmonte ongōmpa, ante mīnitō
adāmaī imīnitawo.

³ “Awēnē ēñēmi. Bitō beyæ nē
apænedāni inānīte wænōnīnque idægoidi
godōmenque cædīnque, Wængonguī quī,
ante nāni iya tāinca bæ tādīnque edæ
wido cædānitapa. Ayæ botō adoboque
inte edæ ayæ quēwēñōmote botō imote
wænōncæte ante cædāni wæbo abi.”

⁴ Āñongante Wængonguī, “Īñæmpa botō
tiæte mīido ganca mānimpodāni inānīte,
Botō quīnāni inānīpa, ante wææ gom-
pobo quēwēnāni apa quēwēe. Wadāni
nāni, Mōnitō wængonguī Baado ingampa,
nāni ānongā weca botō quīnāni iññōmō
edæ da guīcapodāmaī inānīpa cæbii,”

angacäimpa, ante nāni yewæmongainta adāmaï imīnitawoo.

⁵ Nōwo iñōmō edæ adobaï impa. Idægomōni mōni cabo incæ mēa pōni imōni inte Wængonguï ingante Baa änāmaï iñōmōnite tömengä mōnitō imōnite waadete pōnō cædinque, Botō quimīni imīnīpa, ante apænte ængampa. ⁶ İninque, Wængonguï waadete pōnō cædinque apænte ængampa, ante adinque tömēmonque waa cæmō beyæ ædō cæte Wængonguï apænte ænguīgää. İñæmpa tömēmonque waa cæmō beyæ Wængonguï mōnō imonte apænte ængä bai, Wængonguï waadete pōnō cæcampa, ante ædō cæte anguēnē i. Wæætē edæ tömēmonque waa cæmō beyæ Wængonguï apænte ængä bai tömengä adocä ædō cæte nānō waadete pōnō cædō beyænque mōnō imonte apænte ænguēnengää. İñæmpa Wængonguï waadete pōnō cædinque apænte ængä İninque, Tömēmonque waa cæmōmpa, ante ædō cæte anguïi.

⁷ Mänōmaï i İninque æbānō ante anguïi. Edæ idægoidi tömēnāni nāni nanguï æinēnō ante diqui diqui minte ænāmaï iñōnāni mōnō iñōmō Wængonguï nānō nē apænte ængaïmō imō iñōmō edæ do æntamōmpa. Nē ænāmaï ināni inānite Wængonguï ee ayongante mīmō ömædēnāni bagadānīmpa. ⁸ İimaï ante Wængonguï beyæ nāni yewæmongainō bai ingatīmpa. “Tömēnāni inānite Wængonguï godō cæcä ate möwo möinente bai wædāni inte tömēnāni awinca emōnāni incæ nōwo ganca adāmaï inte wædānīpa. Önōmonca emoncadāni incæ edæ eñēnāmaï inte wædānīpa,” ante yewæmongatīmpa. ⁹ Ayæ awēnē odeye Dabii wodi Wængonguï ingante apænedinque iimainō ante apænegacäimpa.

“Wængonguï eñēmi. Waodāni nāni wænguinque gote ææmæ bedāni bai cædinque ināni iñōmō edæ wapiticæ nāni towēnōnō ante gote towēnānīpa. Incæte bitō godō cæbi ate tömēnāni nāni towēnō beyæ edæ wæncædānīmpa, ämōpa.

Tömēnāni tee tēwate bai oda cæte wæyōnāni bitō godō pämi wæcædānīmpa, ämōpa.

¹⁰ Bitō godō cæbi ate tömēnāni awinca edæ mæ māmōnte bai bamōninque adāmaï incædānīmpa.

Ayæ teemē mongæninque bocæ ñongænte cōwē wæcædānīmpa, ämōpa,” ante awēnē Dabii wodi Wængonguï ingante apænegacäimpa.

Idægoidi ināmaï ināni quēwēnānīpa, ante

¹¹ Nōwo wæætē iimaï ämōpa. Do oda cædāni incæ idægoidi iñōmō dicæ æmæwo tæ go wæænguīnāni inānitawogaa. İñæmpa ayæ ate ængæ gantidinque tömēnāni nē quēwenguīnāni inānīpa. Incæte Wængonguï, Tömēnāni eñēnāmaï cædāni beyæ wadāni quēwēnāni adinque idægoidi wæætē, Mōnō quēwengade impa, ante pīinte wæcædānīmpa, ante godō cæcä ate idægoidi edæ oda cægadānīmpa. ¹² İninque idægoidi eñēnāmaï cædinque ænāmaï ināni beyæ mōnō inguipoga tömāmæ mōnō quēwencabo wæætē edæ nanguï pōni æmōmpa. Tömēnāni ænāmaï inte ömæpodāni wædāni beyænque mīnitō idægomīni ināmaï imīni wæætē nanguï pōni æmīnīpa. İninque idægoidi nāni quēwenguīmāmo iincayæ ate eyepæ pōni ænāni ate edæ æbānō baquïi. Edæ idægoidi iincayæ ate eyepæ pōni ænte entawēnāni beyænque mōnō waocabo tömāmō godōmenque nanguï pōni ænte entawengæimpa.

¹³ Idægomīni ināmaï imīni imīnite apænebo eñēedāni. Botō imote Codito, Idægoidi ināmaï ināni inānite apænecæbiimpā, ante da godongä gotabōpa. İninque botō, Mīnitō imīnite nē apænebo inte tobōpa, ante nanguï tedebo. ¹⁴ Edæ, Idægoidi ināmaï ināni incæ do quēwēnānīpa, ante botō tedebo eñēnte wædinque botō guidēnāni idægoidi wæætē, Mōnitō adobaï quēwencæmōnīmpa, ante pīinte wæcædānīmpa, ante tedebo. Ayæ adodāni pancadāniya godōmenque pōnēninque quēwencædānīmpa, ante cædinque botō edæ nanguï tedebo.

¹⁵ Idægoidi inānite Baa ante wido cædinque Wængonguï wæætē inguipoga tömāmæ quēwēmō iñōmōnte piyænē cædinque edæ waadete pōnō cægacäimpa.

Īninqe tōmengä ĩncayæ ate idægoidi ĩnānite Ao ante ængä ate edæ æbänö baquũ. Māniñedē ate edæ mōnō wænte õñonte bai ĩnōmō inte edæ mōnō ñāni õmæmonte quēwengæimpa. ¹⁶ Īmaĩ ante pōnengæimpa. Pāo pancaboga pancæte bai wædænque ĩnāni inte tāno nāni pōnente quēwencabo ĩñōmō tæiyæ waēmō ĩnāni ĩninqe ĩncayæ nāni pōnente quēwencabo guiquēnē pāo babo bai adobai ĩnāni inte tōmēnāni adobai tæiyæ waēmō ĩnānipa, ante pōnengæimpa. Tāno pōnengaināni guiquēnē tæcæguinto bai ĩnōnāni inte tæiyæ waēmō ĩnāni ĩninqe edæ ĩncayæ pōnēnāni guiquēnē yæpænto bai ĩnōnāni inte adobai tæiyæ waēmō ĩnānipa.

¹⁷ Odibowæ õnonque pæwæ incæ wainca incacæimpa, ante cædinque waocä tōmengä nānō mingaiwæ waa pōni incawæ adinque yæpængö nāmænte godö õnonque pæwæ yæpæntoga mīne tīmongä amīnipa. Idægoidi ĩñōmō waocä nānō minte pæwæ bai ĩñōnānite Wængonguĩ pancadāniya ĩnānite yæpængö wæi ñæmænte bai wido cæcä wædānipa. Tōmēnāni mānōmaĩ wæyōnāni bitö guiquēnē õnonque pæwæ yæpængö bai ĩmitapa. Incæte Wængonguĩ, Odibowæ yæpængoncoo bai tæcæguinto beyænque odæ yate bai pæte incacæimpa, ante odibowāa yæpæntoga godö mīni tinte bai cædinque bitö ĩmite waadete pōnō cæcä ate bitö idægoidi beyænque mīimi inte ongōmipa. ¹⁸ Mānōmaĩ ĩ ĩninqe bitö wæætē edæ, Wængonguĩ botö ĩmote pōnō cæcæte ante tōmēnāni ĩnānite wido cæcampa, ante bitö nāmä ængö cæcæte ante cædinque idægoidi ĩnānite ante wīi pīinte ancæbiimpa. Īñæmpa tæcæguinto ēwa bai ĩnāni inte idægoidi ĩñōmō edæ bitö beyæ dicæ quēwēnāniyaa. Wæætē edæ tæcæguinto ēwa bai ĩnāni beyænque bitö quēwēmipa, ante apænebo ēñēninqe bitö pīimi ĩninqe, Mānōmaĩ impa, ante tāno pōnēe.

¹⁹ Īninqe bitö, “Odæ yacæimpa, ante cædinque godö mīne tīmōnāni bai Wængonguĩ botö ĩmote pōnō cæcæte ante cædinque idægoidi ĩnānite wæætē wido cæcampa,” ante pōnēmitawoo. ²⁰ Bitö pōnēnō edæ nāwangä impa. Incæte edæ tōmēnāni nāni pōnēnāmaĩ ĩnō

beyænque Wængonguĩ tōmēnāni ĩnānite wido cægacæimpa. Bitö guiquēnē wede bitö pōnēnō beyænque mīimi inte ongōmipa. Īninqe bitö guīñente wædinque edæ nāmä ængö cædāmaĩ inte edæ, Botö waēmō ĩmo beyæ cæcantapa, ante pōnēnāmaĩ ĩmāwe. ²¹ Īñæmpa nāwä yæpængö bai ĩnāni ĩnānite Wængonguĩ tapodāmaĩ ĩnongä inte bitö õñōmique ĩñōmite dicæ ata cæpoquingää.

²² Īninqe, Wængonguĩ nē waadete cædongä incæ cōwē nē apænte pangä ingampa, ante pōnēe. Tōmengä ĩñōmō nē oda cædāni ĩnānite pangampa. Wæætē bitö nē waadete cædongä nempo quēwēmi ĩninqe tōmengä bitö ĩmite waadete cæbaingampa. Incæte tōmengä nempo wīi quēwēmi ĩninqe tōmengä wæætē bitö ĩmite edæ wæi ñæmænte bai wido cæbaingampa. ²³ Idægoidi guiquēnē, Idæwaa pōnēnāmaĩ inte awædö, ante ocæ ēmænte pōnāni adinque Wængonguĩ nē tæi pīñænongä inte tōmēnāni ĩnānite wæætē ado awæ yæpæntoga godö mīni tīmōnte bai pōnō cæcä ate mīināni edæ ongōmāinānipa. ²⁴ Waodāni waa incawæ yæpængö nāmænte õnonque pæwæ yæpæntoga godö nāni mīne tīmōnō bai Wængonguĩ wīi adobai cæcampa. Wæætē edæ bitö õnonque pædiwæ yæpængö bai ĩñōmite tōmengä waadete pōnō nāmænte bai cædinque, Nāwä idægobi babipa, ante waa pæwæ yæpæntoga godö mīni tīmōnte bai cæcampa. Bitö ĩmite mānōmaĩ waa cæcä ĩnongä inte tōmengä idægoidi ĩnānite æbänö godōmenque waa cæbaingää. Tōmēnāni ĩñōmō waa pōni pæwæ yæpængoncoo tōmengä nānō wæi ñæmæncoo bai inte wæyōnānite adowænē yæpæntoga godö mīne tīmōnte bai cædinque tōmengä tōmēnāni ĩnānite, Nāwä idægomīni inte mīnitö wæætē mīimīni ongoncæmīnimpa, ante do cæcæcæimpa.

Idægoidi ĩninqe bayonte quēwencædānimpa, ante

²⁵ Īñānāni ēñēedāni. Mīnitö nāmä ængö cædāmaĩ incæmīnimpa, ante cædinque botö wēenēñedē mīni ēñēnāmaĩ ĩngainō ante edæ wææ ämopa. Mīnitö idægomīni ĩnāmaĩ ĩmīni mīni pōnencabo eyepæ pōni mīni yebænganca idægoidi ĩñōmō ñōwo

mimō ömædēnāni inte wædōnāni inte edæ māninganca cōwē mimō ömædēnāni inte wæcædānimpa. ²⁶ Īncayæ ate guiquēnē idægoidi tōmānāni quēwenguīnāni inānīpa. Edæ ĩmaī ante yewæmonte ongompa.

“Mōnō ñā cæyænte bai tee mōnete bai wæwēñōmonte nē Ñimpo Cæcā ĩñōmō Tiōno ĩñōmō quēwente poncæcāimpa.

Aacobo wodi pæināni Wængonguī ingante ēñēnāmaī cæte quēwēnāni adinque nē Ñimpo Cæcā ĩñōmō tōmēnāni nāni ēñēnāmaī entawēnō wadæ cæcā ate tōmēnāni wæætē ēñente cæte quēwencædānimpa.

²⁷ Īnīnque wēnæ wēnæ nāni cægāinō ante wadæ cæte wido cædinque Wængonguī tōmēnāni inānite ĩmaī angampa.

Botō pōnō cæbo ate mīnitō Ao ämīni ĩnīnque edæ mōnō godongāmæ waa cæte quēwengæimpa, ante Wængonguī angampa,” ante yewæmongadānimpa.

²⁸ Codito ingantedō ante watapæ ēñente pōnēnīnque mīnitō idægōmīni ināmaī ĩmīni do quēwēmīni beyæ idægoidi wæætē Wængonguī ingante piinte adānīpa. Incæte tōmēnāni mæmæidi inānite nē apænte ængaingā inte Wængonguī wæætē mæmæidi beyænque ante pōnēnīnque ñōwodāni inānite waadete pōnengampa.

²⁹ Edæ waomō ĩmonte quincoomē pōnongā æñōmonte Wængonguī adodō ö ænāmaī ingampa. Ayæ adobaī waomō ĩmonte aa pedinque tōmengā wadō ante änāmaī inte edæ adodō ante edæ cōwē aa pecampa. ³⁰ Mīnitō wēēnēñedē ēñēnāmaī cæmīni incæte Wængonguī ĩñōmō idægoidi ēñēnāmaī cædāni beyæ mīnitō ĩmīnite wæætē waadete cædinque pōnō ata cæpocā quēwēmīnīpa. ³¹ Ayæ adobaī mīnitō ĩmīnite pōnō waadete ata cæpocā quēwēmīni beyæ idægoidi ēñēnāmaī cædāni ĩñōnānite Wængonguī ñōwo tōmēnāni inānite adobaī waadete cædinque godō ata cæpocā quēwēnānimpa. ³² Īnīnque tōmengā, Mīni waocabo tōmāmīni ĩmīnite botō waadete cædinque pōnō ata cæpocæboimpa, ante cædinque, Mīni ēñēnāmaī cæcabo ĩnōmīni inte mīnitō nāmā öō toyænte aamō cædāmaī

incæmīnimpa, ante tōmāmō ĩmonte ñā cæyænte bai cæcā wæcongamōimpa.

³³ Īnīnque Wængonguī nanguī pōnī waadete entawēnongā ĩñongante tōmengā nānō pōnō cædōnō ante mōnō ædō cæte tee mante aquīi. Tōmengā tōmancoo do adongā inte nanguī pōnī ēñēnongā inte cæcā ingānō anguēnē. Tōmengā edæ, Æbānō ĩ, ante do againgā inte edæ, Æbānō cæquīi, ante do apænte āñongante mōnō waocabo wæætē tōmengā nānō cædō ante ædō cæte ēñenguīi. Tōmengā ædōnō ponte ædōnō gocāā, ante pōnente wædinque mōnō tōmengā önōwa amompa diyæ taadō aquīi. ³⁴ Edæ ĩmaī ante nāni yewæmongāinō bai impa. “Mōnō Awēnē æbānō pōnengāā, ante pōnente wædinque æcānō ēñengāā. Ayæ, ĩmaī cæquī impa, ante mōnō tōmengā ingante edæ ædō cæte odōmonte apænequīi. ³⁵ Wængonguī ingante æcānō do godongā inte wæætē, Bitō debe ĩmīpa, ante anguingāā. ĩñæmpa tōmengā ingante godōmōmpa diyæ debe inguingāā,” ante Itaiya wodi nānō yewæmongāinō bai impa. ³⁶ Edæ tōmengā nānō pōnongaincooque inte edæ tōmancoo ongompa. Mōnō waocabo ĩñōmō tōmengā badongā beyænque tōmengā quīmō baquinque ongōmōmpa. Ayæ adobaī edæ tōmengā badongā beyænque tōmancoo tōmengā quincooque edæ baquinque ongoncoopa. Edæ tōmengā adocanque pōnī ñāō entawente edæ cōwē tæi ēmoncæcāimpa. Mānōmaī impa, ante mōnō, Amēē, ante apænecæimpa.

12

Wængonguī quīmō ĩmōmpa, ante cæte quēwengcēimpa

¹ Botō tōnīñamīni ēñēdāni. Wængonguī waadete pōnō waa cæcā ængāimīni inte mīnitō ĩmaī cædāni, ante botō nanguī ämōpa. Wængonguī quī, ante baō pædæ godōnāni waa ængā bai mīnitō adobaī edæ, Wængonguī quīmōni ĩmōnīpa, ante mīmīni inte edæ tōmengā ingante nāmā pædæ godōmīni ængædāni. Mānōmaī cædinque mīnitō tōmengā önōwa ĩnō mīni ædæ wæænte nanguī cæquēnēnō ante edæ do cæmīni incæmīnimpa. Mānōmaī godōmīni

æninque tõmengä wæætë edæ, Botö ayömo tæiyæ waëmö pönömini æmopa, ante tocæcäimpa. ² Inguipogaque ante pönente mini cægainö ante ñöwo ñimpo cædinque minitö müimäni mini quëwenguinque ante edæ ocai müinque encate bai nõingä ante pönëedäni. Mänömaï cædinque minitö, Wængonguï waa pönï nänö änonö ante, Æbänö i, ante ædæmö eñëninque, Tömengä nänö äno iñömö eyepæ pönï impa, ante eñencæminimpa. Mäninö ante eñente cæte quëwëmö inte mönö tõmengä tönö godongämæ waa tocæimpa.

³ Wængonguï waadete pönö cæcä ate botö nê apænebo badimo inte iïmaï ante apænebopa. Minitö nämä pönëninque, Ñænæmo imopa, ante pönënamäi iedäni. Wængonguï pönö badongä ate minitö wede pönëmini badimäni inte mini wede pönenganca mäningancaque pönëninque iïmainö ante pönëedäni. Botö önömoque bai inömo imopa, ante ocai encamäni inte töö pönï pönëedäni. ⁴ Mönö baö adoyonque pönï eñamö incæte wii adodonque mönö cæquënëno ante eñamompa. Ìninqe mönö aquinö ante awinca emöninque mönö dao dao goquinö ante önöwa ewamompa. Ayæ wadö mönö cæquinö ante wayö eñadinque mönö wæætë wadö mönö cæquinö ante wayö eñadinque wayö wayö mönö eñacoo eñamompa. ⁵ Ìninqe wayö wayö eñamö incæ mönö baö pæ pagænguincöo adoyonque i bai mönö adobai Codito nempo mönö quëwencabo nanguï pönï imö incæte adocabomö inömö imompa.

⁶ Ìninqe mönö adocabomö iñömönte Wængonguï waadete pönö cædinque mönö imönte wadö wadö mönö cæquinö ante tömänö pönongä æmompa. Ìninqe mönö tõmengä da pönongä mönö ænganca edæ adoganca wadö wadö cæmompä. Mänömaï ænte cædömö iñömönte pancamäniya iminite Wængonguï pönö apænecä eñëninque minitö tõmengä beyæ nê apænemäni do badinque wede mini pönenganca apæneedäni. ⁷ Wæætë wamäni iminite Wængonguï pönö cæcä æninque minitö wadäni inänite nê cæmäni do badinque wadäni beyæ cæcæminimpa. Wæætë wamäni iminite tõmengä pönö cædinque

odömönte apænecä eñëninque minitö nê odömönte apænemäni do badinque odömönte apænecæminimpa. ⁸ Ayæ wæætë wamäni iminite Wængonguï pönö waadete apænecä eñëninque nê waadete apænemäni badinque minitö iñömö wëntæye inte wädäni inänite ædæmö apænemäni eñëninque tõmënäni wæætë edæ wampo pönëninque tæi piñænte cæcædänimpa. Wamäni iminite Wængonguï pönongä æninque nê nënempomäni badinque minitö, Tömëmöni quï, ante wädämaï inte wæætë wadäni nänï ænguënëno ante eyepæ godömäni æncædänimpa. Wamäni iminite Wængonguï pönö angä eñëninque minitö wæætë awënëidi bai nê ämäni badinque wadäni inänite nõingä cæte awënëidi bai ancæminimpa. Wamäni iminite Wængonguï ædæmö waadete pönö waa cæcä æninque minitö wæætë ædæmö waadete cæmäni do badinque wadäni inänite ædæmö waadete godö waa cædinque edæ wädämaï inte tocæminimpa.

Codito nempo quëwëninque iïmaï cæcæimpa, ante

⁹ Botö waadete pönëmopa, ante tedemäni ininqe minitö nõinö cæte waadete pönencæminimpa. Wiwa mini cædönö ante piïninque wido cæedäni. Wæætë, Quinö waa cæquii, ante adinque mäninö ante ænte minitö mimönë ædæmö entawëninque cöwë waa cæte quëwëedäni. ¹⁰ Mönö waadete pönencabo imompa, ante pönëninque wacä ingä wacä ingä waadete pönente cæedäni. Wadäni ñænænäni inänipa, ante minitö tõmënäni inänite ængö cæte bai cædinque wæætë, Botö wädämo imopa, ante nämä ængö cædämaï iedäni.

¹¹ Tæi piñænte ewocadinque mönö Awënë beyæ ante wëntædämaï inte cæedäni.

¹² Watapæ bacæimpa, ante pönëninque tocæminimpa. Caate wæwëmäni incæte wëntæye badämaï inte ee cæedäni. Ñimpo cædämaï inte Wængonguï ingante cöwë apæneedäni.

¹³ Wængonguï quinäni ænguënënäni inte wädäni adinque minitö mäincoo wæætë nënempomäni æncædänimpa. Ayæ, Botö oncönë pö guite cænte möedäni, ante wadäni inänite waadete cæedäni.

¹⁴ Minitö iminite në piinte cædäni iñönånite minitö tömënäni inånite waadete godö apæneedäni. Edæ tömënäni inånite waadete apænedinque, Wængongui minitö iminite waa cæcæcäimpa, ante apænedinque wæætë piinte änämaï iedäni.

¹⁵ Nè watapæ todäni tönö godongämæ watapæ toedäni. Nè Ca wædäni tönö minitö godongämæ Ca ca wæedäni.

¹⁶ Mönö pönencabo imompa, ante adoyömö pönente quëwëedäni. Önönånique nani në änönäni tönö godongämæ cædinque, Botö ñænæmo imopa, ante pönënämaï iedäni. Minitö, Wadäni pönömenque ocai encayönäni botö godömenque nanguï pönï encabo imopa, ante nämä ante pönënämaï iedäni.

¹⁷ Wadäni minitö iminite pönö wënæ wënæ cædäni adinque minitö wæætë godö wënæ wënæ cædämaï iedäni. Ayæ, Quinö waa cæquiï, ante tömänäni nani waa adönö ante adinque minitö mäninonque ante cæedäni.

¹⁸ Eyepæ imini inte minitö cæganca cædinque tömänäni tönö godongämæ piyænë cæte quëwëedäni.

¹⁹ Botö në waademini ëñeedäni. Mönö Awënë beyæ iïmaï ante yewæmongatimpa.

“Wënæ wënæ cædäni adinque botö wënæ wënæ nani cædinö beyæ ante në apænte panguënemo inte tömëmo eyepæ wæætë godö cæbo wæcædänimpa, ante Awënë angampa,” ante yewæmonte ongompa cæminii. Minitö iminite pönö wënæ wënæ cædäni wæmini ininque edæ wæætë godö cædämaï ee aedäni. Edæ në äingä bate pänongä inte Wængongui incæ pancæcäimpa. ²⁰ Wæætë, “Bitö imite në piinte cædongä incæ gæwænte wæcä adinque godömi cængæe. Gue ænente wæcä adinque godömi becæe. Edæ mänömaï waa cædinque edæ tömengä guingo imonte nänö wæwenguinque bitö tömengä ingante waa cæcæbiimpa,” ante Wængongui beyæ yewæmonte ongö apa cæbii. ²¹ Tömënäni wënæ wënæ nani cædö beyæ oda cædämaï inte wæætë mäninö ante wido cæte bai cædinque bitö waa cædinque edæ tæï emonte gänä cæe.

13

¹ Gobiedöno awënë nempo waodäni

ëñente cæte quëwencædänimpa, ante Wængongui incæ godö gö cæcä beyænque gobiedöno awënëidi badänipa. Edæ Wængongui mänömaï ante gö cædämaï ingä bai quingänö awënë inguënengä. Edæ dæ ancædönimpa. Ininque gobiedöno awënëidi inånite mönö tömämö Ao äninque ëñente cæcæimpa. ² Ininque awënë ingante æcänö Baa änaa tömengä nänö apænte pante wæquinque Wængongui nänö goncægäinö ante ëñënämaï inte edæ Baa angampa. ³ Nè waa cædäni guiquënë awënëidi inånite waa ate todinque guiñënämaï inånipa. Wæætë wënæ wënæ cædäni guiquënë awënëidi inånite guiñente wædänipa. Gobiedöno awënë ingante guiñënämaï inte quëwencæboimpa, ante bitö ämitawoo. Ininque bitö guiñënämaï inte quëwencæte ante waa cæcæbiimpa. Waa cæbi adinque tömengä, Bitö waa cæbi abopa, ante pönö waa cæcä ininque bitö guiñënämaï imaimipa.

⁴ Botö imote në cædongä inte minitö beyæ waa cæcæcäimpa, ante Wængongui gobiedöno awënë ingante godö gö cæcä ongongampa. Edæ Wængongui ingante në cæcä inongä inte tömengä në wënæ wënæ cæcä ingante nö cæte në panguënengä ingampa. Ininque awënë yaëmë në næængä inte wii önonque næængampa cæbii. Wënæ wënæ cæbi ininque edæ guiñente wæcæbiimpa. ⁵ Ininque mönö, Pangä wæcæ wæ, äninque awënë ingante ëñente cæcæimpa. Ayæ pangä wæmö incæ wii pangä wæmö incæ mönö mimö në entawente nämä apænte änömö inte mönö awënë ingante Ao ante ëñente edæ nöingä cæcæimpa. ⁶ Wængongui beyæ në cædönäni inte awënëidi iñömö tömënäni nempo quëwënäni inånite cöwë aadinque mäninque cæte quëwënänipa. Mänömaï i ininque minitö, Awënëidi eyepæ æninque mönitö beyæ cæcædänimpa, ante tömënäni nani äinta pædæ godömini ænänipa.

⁷ Æcämenque ingante cæquënëmini imini inte minitö tömänäni inånite mini cæquënenanca do godö cæminii æncædänimpa. Awënë nempo quëwëñömönte tömengä eyepæ æninque mönö beyæ cæcæcäimpa, ante minitö awënë nänö äinta godonguënëmini inte do godömini

ængæedäni. Waocä ingante mīnitō guīñente ēñenguēnēmīni īmīni īnīnque tōmengä ingante guīñente ēñēedäni. Waocä ingante mīnitō waa aquēnēmīni īmīni īnīnque edæ tōmengä ingante waa aedäni.

⁸ Wacä ingante mīni cæquēnēnō ante edæ ee ongōnāmaī inte godō cæmīni ængä ate abæ tawænte gocæbiimpa. Wæætē wacä ingä wacä ingä waadete mīni pōnenguēnēnō ante edæ godongāmæ cōwē waadete pōnenguēnēmīni īmīnipa. Wadäni īnānite nē waadete pōnengä īñōmō tōmengä īñōmō Wængonguī nānō, īmaī cæedäni, ante nānō wææ angainō ante do ēñente cæcä ingampa. ⁹ Tōmēmi nāmā bitō waadete pōnēnō ganca wacä ingante adoganca waadete pōnencæbiimpa, ante Mōitee wodi yewæmongacäimpa. Mānīne adodeque ante ēñente cædinque waocä Wængonguī nānō wææ angainō ante tōmānō do īnque cæcampa. Edæ, “Bitō nānōogængä īnāmaī īñongante godō guēa mōnāmaī īe. Wacä ingante godō wænōnāmaī īe. Wacä nānō ēadincoo adinque godō ænāmaī īe. Wacä wēnæ wēnæ cæcä atabopa, ante godō babæ wapiticæ apænedāmaī īe. Wacä quī ante æīnente wædāmaī īe.” Mānīnecoo Wængonguī nānō wææ angainecoo ante bitō waadete pōnēmi beyænque tōmāne do īnque cætīmpa. Ayæ quīnemē godōmenque wææ ante ī mānīne adobāi bitō waadete pōnēmi beyænque tōmāne do īnque cætīmpa. ¹⁰ Nē waadete pōnengä īñōmō edæ wacä ingante cōwē wīwa cædāmaī ingampa. Mānōmaī beyæ nē ædæmō waadete pōnēnānique Wængonguī nānō wææ angainō ante īnque cædānipa.

¹¹ Īnīnque, Nōwoyedē æbānō oo baquīi, ante do ēñēnīnque mīnitō waadete pōnente quēwēedäni. Edæ wēenēñedē mā mōnō wede pōnēñedē mīnguipo mōnō quēwēnguīmāmo īñōmō edæ māniñedē edæ oo bacæ cædāmaī ingatīmpa. Nōwo guīquēnē, Oo pōni bacæiimpa, ante pōnente wædinque mīnitō mōwocodē ōñōmīni inte edæ ñāni ōmæmōnīnque mīimīni quēwēedäni. ¹² Wēmō īñōmō mōnō wæwēmāmo idæwaa edæ bapa. Mīnguipoga ñāo bai baquinque edæ oque pōnente īmpa cæmōō. Wēmō īñonte mōnō wēnæ

wēnæ cædō æmæwo wido cædinque, mōnō wæætē ñāo īñōmō quēwēnīnque edæ wææ cæquincoo wēñate bai cædinque nāmā wææ gompotawengæiimpa. ¹³ Mānōmaī cædinque mōnō itædē quēwēnōmō inte nō pōni cæcæiimpa. Baonque ante mōnō cæinēwēnō ante towēnāmaī inte mōnō tī nāmæ nangui bete quidi quidi dowænāmaī ingæiimpa. Mōnō wacä tōnō godō guēa mōnāmaī, cænguī eyepæ cænīnque godōmenque nangui cænāmaī ingæiimpa. Wæætedō wæætē pīinte cædāmaī inte mōnō, Wacä bai bacæboiimpa, ante pīinte adāmaī ingæiimpa. ¹⁴ Wæætē wææ cæquincoo entawente bai cædinque mīnitō nāmā wææ gompotawencæte ante cædinque mōnō Awēnē Itota Codito ingante entawente quēwēedäni. Ayæ baonque ante mīni cæinēwēnō ante wido cædinque, Æbānō cæte wēnæ wēnæ cæquīmoo, ante cæcæte ante wædāmaī iedäni.

14

Mīnitō tōniñadāni īnānite pīinte ānāmaī iedäni, ante

¹ Wacä wīi ædæmō pōnengä incæte mīnitō, Mōnō pōnencabo īmōmpa, ante pōnēnīnque tōmengä adocabocä nānō baquinque āmīni pongæedäni. Tōmengä nānō pōnēnō ante wæætedō wæætē ānāmaī iedäni. ² Pancadāniya wede pōnēnāni inte cænguī adinque, Nāwā cænguī impa, ante guīñēnāmaī inte quīēmē cænguī incæ edæ dobæ ade cænānipa. Wadäni guīquēnē æmæ pōnente beyæ, Tōmāā baō baacä impa, ante awente bai cædinque quingāmenque baō incæ cænāmaī inte onguipoīya pæcooque edæ cænānipa. ³ Incæte tōmāā cænguī nē cænongä īñōmō onguipoīya pæcooque nē cænongä ingante pīinte adāmaī incæcæiimpa. Wacä ingante, Bitō ōnōmīque bai īnōmi inte edæ awente cænāmaī īmīpa, ante ānāmaī incæcæiimpa. Ayæ wæætē onguipoīya pæcooque nē cænongä guīquēnē baō nē cænongä ingante, Baacä apa cæwēe, ante apænte ante pīināmaī incæcæiimpa. Edæ nē cænongä ingante Wængonguī Ao ānīnque, Botō quīmi īmīpa, ante do ængampa. ⁴ Īñæmpa tōmengä wacä awēnē ingante nē cæcä īñongante bitō ædō cæte apænte āmīi. Edæ tōmengä

awēnē incæ, Waa cæbipa, angä wædinque edæ tömengä adiyæ tæi ongömaingampa. Wæætē adocä tömengä awēnē, Wēnæ wēnæ cæbipa, angä wædinque edæ tæ go wææmaingampa. Incæte edæ tömengä mönō Awēnē ingante nē cæcä iñongante mönō Awēnē adocä incæ tæi piñænongä inte eyepæ cædinque edæ æænō gö cæcä tæi ongoncæcäimpa.

⁵ Ayæ wacä guiquēnē, Pancaōnaa godōmenque waa eönæpa, ante cæcäimpa, ante pönēñongante wacä guiquēnē, Tömää itædē önönæque impa, ante pönengampa. Ìnque mönō pönencabo wacä wadō wacä wadō pönēmō incæte mönō tömämō iñömō edæ, Nämä botō pönēnonque ante botō nō pönente cæcæboimpa, ante edæ mäninonque ante cæcæcäimpa. ⁶ Edæ, Pancaōnaa godōmenque waa eönæpa, ante nē pönengä guiquēnē tömengä mönō Awēnē ingante waa adinque mänömainō ante cæcampa. Pancaōnaa wii godōmenque waa eönæpa, ante nē pönengä guiquēnē tömengä adobai mönō Awēnē ingante waa adinque mänömainō ante cæcampa. Baö nē cænongä guiquēnē Wængongui ingante, Waa pönömi cæmopa, ante adobai mönō Awēnē ingante waa adinque cængampa. Baö ate nē awente cænāmai inongä guiquēnē tömengä adobai Wængongui ingante, Waa pönömi cæmopa, ante onguipoiya pæcooque cæninque mönō Awēnē ingante waa adinque baö cænāmai ingampa.

⁷ Mönō pönencabo iñömōnte æcämenque incæ nämä beyænque dicæ quēwengää. Dicæ nämä beyænque wængää. ⁸ Wæætē edæ quēwēmō ìnque mönō Awēnē beyænque quēwēmōmpa. Wæætē edæ wæmō ìnque mönō Awēnē beyænque wæmōmpa. Ìnque quēwēmō incæ wæmō incæ mönō Awēnē quimō inömō inte quēwēninque tömengä quimō inte edæ wæmōmpa. ⁹ Edæ do wængaināni beyæ ante miimō quēwēmō beyæ ante Codito tömämō Awēnē nänō baquinque edæ wænte ñāni ömæmongacäimpa.

¹⁰ Bitō guiquēnē bitō tönñacä ingante ædō cæte apænte ämii. Ayæ bitō tönñacä ingante, Önömique bai ìmipa, ante quinante ämii. Edæ Wængongui nänō apænte

anguimpaa gäänē ongöñömōnte tömengä tömämō ìmōnte apænte ancæcäimpa cæbii. ¹¹ Edæ Wængongui beyæ ante iimāi ante yewæmōnte ongōmpa.

“Mönō Awēnē incæ, ‘Nē Quēwēmo ìnömō inte edæ ämo eñēedāni,’ angampa. Ayæ, ‘Minitō tömāmini botō önöwa ìnō da guicapodinque,

Bitō Wængongui ìnōmi ìmipa, ante adoyömō apænecæminimpa,’ angampa.”

¹² Ante nāni yewæmongainō bai ìnque cædinque mönō tömämō Wængongui weca ponte ongöninque mönō pönengainō ante mönō apænegainō ante mönō cægainō ante tömengä ingante edonque pönì apænecäimpa.

Wacä oda cæcæcäimpa, ante cædāmai incæbiimpa, ante

¹³ Mänömai beyæ mönō wacä ingante apænte änāmai ingäimpa. Wæætē minitō, Waa cæcæboimpa, ante nämä wææ cædinque, Botō tönñacä taadō nänō goquinō ante ee acæboimpa, ante pönēedāni. Tömengä tee tēwate bai oda cædāmai incæcäimpa, ante nöngä cæquinque ante pönencæminimpa. ¹⁴ Botō iñömō Itota Codito nempo quēwēmo inte edæ nöngä pönēninque, Tömää cængui nämä incæ nāwāaquinä impa, ante do eñēmopa. Incæte wacä, Pancaa cængui baacä impa, ante nē pönengä inte tömengä beyæ baacä iñonte tömengä nänō, Baacä impa, äno cænāmai inguēnengä ingampa.

¹⁵ Bitō quingämē cæmi adinque bitō tönñacä, Baacä apa cæwēe, ante wæwente bacä ìnque bitō waadedāmai inte godōmenque cæmāimipa. Edæ bitō tönñacä beyæ Codito wængacäi apa quēwēe. Bitō tönñacä nänō pönēnāmai bate wænguinque baö cæmipa, ante wædinque bitō tömengä ingante nāwangä waadete pönēmi inte tömengä beyænque ante cōwē baö cænāmai incæbiimpa. ¹⁶ Botō mänömai cædinque waa pönì cæbopa, ante pönēmi incæte wadāni bitō waa cædō ante, Wiwa cæbipa, ante pönō babæ ante tedewēnāni ate wædinque bitō wæætē waadete pönēninque wææ ämi tedewēnāmai incædānimpa. ¹⁷ Wii cænguinque ante wii bequinque ante Wængongui nempo quēwēmōmpa.

Wæætē Wængonguī Tæiyæ Waēmō Ōnōwoca nempo quēwēñōmonte tōmengā pōnō cæcā æninque mōnō nō entawenguinque impa. Ayæ mōnō gānē pōnenguinque ante mōnō watapæ tote quēwenguinque ante tōmengā nempo quēwēmōmpa. ¹⁸ Edæ Codito nempo quēwēninque waocā mǎnōmaī cæcā adinque Wængonguī tōmengā ingante waa ate tocampa. Waodāni adobaī, Waa cæbipa, ante waa adānipa.

¹⁹ Mǎnōmaī impa, ante adinque, Mōnō pōnencabo godongāmæ piyænē cæte quēwengæimpa, ante, Ayæ mōnō godongāmæ wede pōnēninque tæī mænonte baī ongongæimpa, ante mōnō nanguī cæcæimpa. ²⁰ Īninque cænguī cæīnente beyænque bitō Wængonguī nānō nē badongāināni inānite bæ tadāmaī incæbiimpa. Tōmāā cænguī edæ nāwāaquinḡā impa. Incæte bitō cæninō beyænque wacā ēñēnāmaī inte tee tēwate baī oda cæbaingampa, ante do ēñēmi inte bitō godōmenque cæmi ĩninque wīwa cæbaīmipa tōō. ²¹ Waa cæcæte ante bitō ĩmaī cæcæbiimpa. Bitō baō cæmi beyæ, biinōmæ nāni wædænque tī nāmæ bebi beyæ, quiēmē cæbi beyæ bitō tōniñacā oda cæte wæcantawo. Īninque bitō ĩñōmō, Botō tōniñacā oda cædāmaī incæcāimpa, ante wææ cædinque ee cædāmaī ĩmi ĩninque waa ĩmaimpa.

²² Mǎnīnō, Æbānō cæte waa inguīī, ante bitō pōnēnō beyænque wadāni inānite apænte ānāmaī inte bitō adobique inte Wængonguī ayongante cæcæbiimpa. Waa cæqui impa, ante mīmōno bitō pōnēnonque ante mǎnīnonque cædinque bitō tente wæquinque cædāmaī inte waa tobaīmipa. ²³ Wæætē nē æmæ pōnengā guiquēnē, Cæmo beyæ Wængonguī pangā wæcæ wæ, ante wædingā inte tōmengā nāmā nānō apænte pante wæquinque ade cængampa. Edæ æcānō wede pōnēnāmaī inte cæda tōmengā nānō cædōnō tōmānō edæ wīwa cætimpa. Īninque bitō cædō tōmānō wede pōnente cæcæbiimpa.

15

Wadāni incæ watapæ quēwēncædānimpā, ante cæe, ante

¹ Mōnō nē wede pōnēmō ĩñōmō tæī piñænte entawēmō ĩnōmō inte nāmanque ante mōnō cæīnēnō ante edæ wædāmaī ingæimpa. Wæætē edæ nē æmæ pōnēnāni guiquēnē tōmēnāni aquīī pōnī ĩnāni inte, Ædō cæte cæquīmoo, ante wædāni adinque mōnō tōmēnāni wædō ante ænte mongænte baī cædinque tōmēnāni tōnō ĩñacabo cæcæimpa. ² Godongāmæ godō cæmō æninque waa todinque tōmēnāni wæætē wede pōnēninque oncō tæī mænonte baī tæī ongoncædānimpā, ante mōnō ædæmō cæcæimpa. ³ Edæ mōnō Codito incæ nāmanque ante nānō cæīnēnō ante cæcæte ante edæ wædāmaī inte piyænē cægacāimpa. Wængonguī ingante do nāni apænegainō baī tōmengā wadāni beyænque ante cægacāimpa. “Wængonguī ēñēmi. Wadāni bitō ĩmite piinte badete tocæte ante cædinque botō ĩmote wæætē piinte badete todānipa,” ante apænete baī Codito ee cægacāimpa. ⁴ Edæ mōnō ĩmonte odōmonte apænecæte ante Wængonguī angā ēñēninque dodāni tōmantāa yewæmongadānimpā. Īninque mǎnīntā ædæmō adinque wampo pōnēninque wæntædāmaī inte ee cæmō ĩninque edæ mōnō, Watapæ bacæimpa, ante pōnente tocæimpa.

⁵ Īninque Codito Itota miñæ tee empote goyōmonte Wængonguī ĩñōmō edæ, Mīnitō wampo pōnēninque wæntædāmaī inte ee cæcæmīnimpā, ante nē ædæmō cæcā ingampa. Tōmengā mǎnōmaī pōnō cæcā ate mīnitō ĩñōmō adoyōmō ante mīni pōnencabo bacæmīnimpā, āmopa. ⁶ Mǎnōmaī bamīni ĩninque mīnitō āanque baī adodō ante pōnēninque ĩmaī ante Wængonguī ingante apænecæmīnimpā. Mōnitō Awēnē Itota Codito Mæmpobi ĩnōmi inte bitō tōmengā Wængonguī adobi ĩmi ĩñōmō bitō tæī ēmōmi inte ñāō apāite baī ĩmi amōnīpa, ante adoyōmō ante apænecæmīnimpā, ante botō mǎnōmainō ante yewæmōmopa.

Oodeoidi ĩnāmaī ĩnāni ēñēncædānimpā, ante

⁷ Codito mīnitō ĩmīnite Ao ante ængacāimpa. Īninque tōmengā mīnitō ĩmīnite nānō ængāī baī mīnitō adobaī wacā ingā wacā ingā godongāmæ Ao

ante æedāni. Mānōmaī cæmīni adinque wadāni Wængonguī ingante apænedinque, Bitō waa pōni cæbi amōnipa, ante watapæ pōni apæneedānimpa. ⁸ Edæ apænebo eñēedāni.

Mōnitō mæmæidi inānite Wængonguī, Mīnitō beyæ pōnō waa cæcæboimpa, angacāimpa. Īninque, Wængonguī tōmengā nānō angainō ante cōwē cæcæcāimpa, ante oodeoidi eñencædānimpa, ante cædinque mōnō Codito tōmēnāni beyæ nē cæcā bagacāimpa.

⁹ Tōmengā iñōmō, Idægoidi ināmaī ināni incæ Wængonguī ingante, Bitō nāō bai ēmōmi inte pōnō waadete waa cæbi æmōnipa, ante apæneedānimpa, ante mānōmaī cægacāimpa. Īlmaī ante Wængonguī beyæ nāni yewæmongainō bai impa.

“Botō mānōmaī beyæ, Bitō æbānō nē waa cæbi imii, ante idægo ināmaī ināni weca gote apæneedæboimpa.

Bitō ēmōwo ante āmotamīni watapæ pōni ancæboimpa,” ante nāni yewæmongainō bai Codito cægacāimpa.

¹⁰ Ayæ wataa iñōmō Īlmaī ante yewæmongatimpæ. “Idægoidi ināmaī imīni incæ mīnitō Wængonguī quīnāni tōnō godongāmæ watapæ toedāni.”

¹¹ Ayæ wæætē,

“Idægoidi ināmaī imīni mōnō Awēnē ingante apænedinque, Bitō waa pōni cæbi amōnipa, ante watapæ pōni apæneedāni.

Wamīni mīni cabo mīni cabo tōmāmīni āmotamīni ante bai apænedinque, Waa pōni cæbi amōnipa, ante watapæ pōni apæneedāni.”

¹² Itaiya wodi adobainō ante yewæmongacāimpa. “Inguipoga quēwēnāni tōmānāni Awēnē baquinque

Awænguinto tā bocate bai cædinque Yæte Pæingā iñōmō ængæ ganticæcāimpa.

Tōmengā cæcā beyænque watapæ bacæimpa, ante idægoidi ināmaī ināni incæ pōnencædānimpa,” ante Itaiya wodi yewæmongacāimpa.

¹³ Wængonguī iñōmō, Watapæ bacæimpa, ante nē badongaingā inongā inte Īlmaī cæcæcāimpa, āmopa. Tōmengā Tæiyæ Waēmō Ōnōwoca tæi piñænte cæcā

ate mīnitō, Watapæ bacæimpa, ante godōmenque wede pōnencæmīnimpa. Mānōmaī cæcæte ante cædinque Wængonguī pōnō apæneedāni eñēninque mīnitō tōmengā ingante wede pōnēninque edæ gānē entawēninque watapæ tocæmīnimpa, āmopa.

¹⁴ Botō tōniñamīni eñēedāni. Botō tōmēmo ayōmote mīnitō nē waa cæmīni imīni abopa. Ayæ, Æbānō waa cæquī, ante do eñēmīni imīnipa. Ayæ adobai mīnitō eyepæ imīni inte wacā ingā wacā ingā do odōmonte apænemīni imīnipa, ante pōnēmopa. ¹⁵ Īninque botō, Mīnitō eñēnīnō

ante mīnitō ocai encadōmīni inte edæ adodō ante pōnencæmīnimpa, ante bai cædinque pancadea ante yewæmontabopa. Botō iñōmō Wængonguī waadete pōnō cæcā ænte nē entawēmo inte mānōmainō ante yewæmōninque edæ guīñēnāmaī inte nanguī ante yewæmōmopa. ¹⁶ Edæ tōmengā waadete pōnō cæcā ænte entawēninque botō Itota Codito beyænque ante idægoidi ināmaī ināni inānite nē cæbo badinque

Wængonguī ingantedō ante watapæ

apænebo eñēnānipa. Mānōmainō ante

apænebo eñēnōmīnite Wængonguī Tæiyæ

Waēmō Ōnōwoca pōnō badongā ate

idægoidi ināmaī ināni incæ tæiyæ waēmō

ēwocate quēwēnāni badānipa. Mānōmaī

bayōnānite botō iñōmō, Wængonguī quī,

ante pædæ godōnāni bai cædinque tōmēnāni

inānite ante edæ, Wængonguī quīmīni

bacæmīnimpa, ante pædæ godōmo æninque

Wængonguī wæætē waa tocampa.

¹⁷ Mānōmaī beyæ botō Itota Codito

nempo quēwēninque Wængonguī beyæ

cædinque edæ nanguī tobopa. ¹⁸ Codito

botō tōnō guēa cæcā beyænque botō

nanguī apænedinque nanguī cæbo ate

tōmengā iñōmō tōō æmængā pōninque edæ

idægoidi ināmaī ināni incæ edæ Wængonguī

ingante eñēnte cædāni badānitapa. Botō

Codito mānōmaī botō tōnō nānō cædinō

ante apænedinque edæ māninque

ante apænedinque guīñēnete wædinque

godōmenque apænedāmaī incæboimpa.

¹⁹ Wængonguī Tæiyæ Waēmō Ōnōwoca tæi

piñængā inte botō tōnō godongāmæ

cæcā ate botō, Eñencædānimpa, ante

bamōnengæ cæbo ate nē pōnēnāni

badänitapa. Mänömaï Eedotadëe iñömö mä cæte godinque Ididiabæ ganca tömão godämæ godinque botö Codito ingantedö ante watapæ apænedinque adodö adodö ante tömänö ante apænebo eñenänitapa.

²⁰ Botö, Codito emöwo ante wadäni nani apænedämaï iñömö gote tömengä ingantedö ante watapæ apænebo eñencädänimpa, ante cöwë goïente wætabopa. Wacä onguitanca nänö tæñönincönë æmonga mænönämaï incæboimpa, ante bai cædinque botö, Wacä do nänö apænediñömö botö wæætë apænedämaï incæboimpa, ante cætabopa. ²¹ Wæætë iïmaï ante Itaiya wodi nänö yewæmongainö bai cætabopa.

“Tömengä ingante ante eñenämaï ininani incæ edæ do ate bai ewocacädänimpa. Önömonca eñenämaï ininani incæ edæ, ‘Æbänö i,’ ante do eñencädänimpa.” Ante nänö yewæmongainö bai botö, Eñencädänimpa, ante cætabopa.

Odömä iñömö pöinëmopa, Pabodo angampa

²² Mänömaï beyæ botö minitö weca poncæ cæyömote edæ, Wææ cæte i, ate wædinque pönämaï intabopa. ²³ Iñömö ömæ idæwaa cæbo inte botö æpomë wadepo iñonte minitö iminite aïente wædömopa. ²⁴ Ininque botö, Iincayæ ate Epäñabæ gocæ cædinque wodo tebæ godinque minitö weca eñate aboque gocæboimpa, ämopa. Edæ botö wantæpiyæ eñate tote quëwente ate godömenque Epäñabæ gote cæyömo minitö botö beyæ cædinque da godömini gocæboimpa.

²⁵ Nöwo guiquënë botö täno Eedotadëe iñömö Wængongui quinäni beyæ godö cæcæte ante gobopa. ²⁶ Wængongui quinäni incæ Eedotadëe quëwënäni pancädäniya ömæpodäni inte wædänipa, ante pönente wædinque wabæca Mäatedöniabæ quëwënäni tönö Acayabæ quëwënäni tönö, Mönö da godö da godö cæcæimpa, ante pönëninque watapæ todinque tömënäni, Wængongui quinäni qui, ante do godönänitapa. ²⁷ Mänömainö ante watapæ pönente cädäni incæte tömënäni Eedotadëe iñömö quëwënäni inänite në godonguënänäni inte da godönänimpa. Edæ

Wængongui Önöwoca nänö pönongaincoo ante idægoidi pönö apænedäni eñente ænte ewocadinäni inte wabæca quëwënäni iñömö tömënäni nani eadincoo incæ idægoidi beyæ ante wæætë godonguënänäni badänäni inänipa. ²⁸ Ininque botö iñömö mänincoo tömënäni nani da godönincoo idægoidi weca ænte gocæboimpa. Godinque botö cöwä adinque, Në ömæpodäni inte në wædänique æncädänimpa, ante wææ cæcæboimpa. Ædæmö cæbo ænäni ate botö mäniñedë ate Epäñabæ gocæte ante cædinque minitö ömæ wodo tebæ godinque minitö weca eñacæ poncæboimpa. ²⁹ Codito pönö waa cædinque da pönongä pöninque botö cöwë tömengä tönö waa pöni botö cæquinque minitö weca poncæboimpa, ante do eñëmopa.

³⁰ Botö töninamini eñeedäni. Botö pæ pagænte bai nanguï cæyömote minitö iñacabo cædinque botö beyæ Wængongui ingante nanguï apæneedäni, ante botö mönö Awënë Itota Codito beyænque äninque ayæ Wængongui Önöwoca në waadete pönengä beyænque äninque minitö iminite nanguï ämopa. ³¹ Oodeabæ pönënamäi inäni iñömö Pabodo ingante wënæ wënæ cädämaï incädänimpa, ante botö beyæ ante apæneedäni. Ayæ, Eedotadëe iñömö botö gote cæbo adinque Wængongui quinäni incæ botö cædö ate Ao ancädänimpa, ante apæneedäni. ³² Mänömaï i adinque botö, Awënë Wængongui angä ate botö watapæ todinque minitö weca pömo ate mönö godongämæ guëmäninque wampo pönengæimpa, ämopa. ³³ Wængongui në gänë pönengä inte minitö tönö godongämæ ongöninque pönö cæcä ate gänë pönencæminimpa, ämopa. Mänömaï impa diyæ, ante botö, Amëë, ämopa.

16

Waa quëwencæminimpa, ante

¹ Botö iïmaï ämopa. Mönö töninacä tömengä emöwo Pebe minitö weca ñöwo poncæ cæcampa. Tencodea iñömö Codito ingante nani godongämæ pönencabo iñönänite tömënäni beyæ në waa cæcä inte iingä onquiyängä iñömö waingä pöni ingampa. ² Tömengä nanguï inäni beyæ wææ gompodinque waa cædongä

inte botö beyæ adobaï nanguï cæcantapa. Ìninqe edæ botö mìnito ìmìnite ìmaï àmopa. Wængonguï quìmö ìnomö inte mönö Awënè nempo quëwëñomonte Pebe adocä inte adobaï ingampa, ante adinqe mìnito tömengä ingante waa adinqe Ao ante æedäni. Ayæ tömengä quiëmè æinente wæcä ìñongante mìnito wæætè edæ godö cæedäni àmopa.

³ Ayæ wada Pidotida tönö Aquidæ nana gæncaya ìñomö Itota Codito nempo quëwëninque edæ botö tönö godongämæ cæda ìnapa. Ìninqe mìnito tömëna ìnate, Waa quëwencæmìnaimpa, ante botö beyæ ante apænemini ëñëcædaimpa. ⁴ Wadäni botö ìmote wænoncæ cædäni wæyömate tömëna nana wodo wænguinque edæ botö ìmote wææ cædatapa. Mänömaï cædapa, ante botö tömëna ìnate waa ate pönente apænebopa. Ayæ idægoidi ìnamäi ìnani Codito ingante nani wayömö pönencabo wayömö nani pönencabo adobaï tömånäni Aquidæda nana cædinö ante ëñëninque tömëna ìnate waa ate pönëninque apænedänipa.

⁵ Ayæ Itota Codito ingante në pönënanäni Aquidæda oncönè godongämæ pö guidäni ìnänite, Waa quëwëedäni, ante apænemini ëñëncædänimpa. Botö æmigo Epëneto botö në waadecä ìñongante mìnito botö beyæ apænedinqe, Waa quëwencæbiimpa, ante apæneedäni. Atiabæ ìñomö Codito ingante wadäni pönënamäi ìñönäni tömengä ìñomö täno pönengantapa. ⁶ Ayæ Mäadiya mìnito beyæ nanguï cædingä ìñongante mìnito wæætè tömengä ingante Waa quëwencæbiimpa, ante apæneedäni. ⁷ Botö guidëna Antodönico tönö Ñöniato ìñomö botö tönö godongämæ tee mönete wædina ìnapa. Tömëna ìñomö botö pönënamäi ìñomote wëenëñedë Itota Codito nempo quëwëna ìñonate Codito incæ tömëna ìnate da godongacäimpa. Ìninqe, Itota Codito nänö në da godongäina tänoda ìna adinqe mìnito botö beyæ ante tömëna ìnate waa apæneedäni.

⁸ Ayæ wacä mönö Awënè nempo quëwëninque Ampidiato ingante waadete pönëmo inte edæ botö, Waa quëwencæbiimpa, àmopa. ⁹ Ayæ adobaï Odömäno mönitö

tönö godongämæ Codito nempo quëwente në cæcä ìñongante, Waa quëwencæbiimpa, ante botö beyæ ante apæneedäni. Botö në waadecä Etaquito ingante adobaï ante apæneedäni. ¹⁰ Ayæ Apede ìñomö Codito nempo quëwëñongante tömengä æbänö cæcää, ante adinqe Codito tömengä ingante wæætè, Waa cæbi abopa, angampa. Tömengä ingante botö beyæ ante waa apæneedäni. Ayæ Aditobodo nani quëwencabo ìnänite adobaï waa apæneedäni. ¹¹ Botö guidengä Edodiyaönö ingante waa apæneedäni. Ayæ Näadotito guidënanäni incæ æcänö mönö Awënè nempo quëwëna tömënanäni ìnänite adobaï, Waa quëwencæmìnimpa, æedäni.

¹² Ayæ wada mönö Awënè nempo quëwëna onquiyæna Tidipina tönö Tidipota ìñomö në nanguï cæda ìnapa. Tömëna ìnate botö beyæ ante waa apæneedäni. Ayæ wacä onquiyængä mönö në waadecä Pedetida ìñomö tömengä mönö Awënè nempo quëwëninque nanguï cæcantapa. Tömengä ingante adobaï, Waa quëwencæbiimpa, æedäni. ¹³ Ayæ mönö Awënè nänö në apænte ængaingä Odopo ingante waa apæneedäni. Tömengä badä incæ adobaï botö badä bai ìñönante tömëna ìnate botö beyæ ante waa apæneedäni. ¹⁴ Ayæ adobaï Atincodito, Pedegonte, Edëme, Patodobato, Edëma tömënanäni nani pönencabo tömånäni ìnänite, Waa quëwencæmìnimpa, ante apæneedäni. ¹⁵ Ayæ wadäni Pidodogo tönö Oodia, Nèedeo tömengä mængä tönö, Odimpa tönö Wængonguï quinäni tömånäni ìnänite, Waa quëwencæmìnimpa, ante apæneedäni.

¹⁶ Edæ, Waa quëwencæmìnimpa, ante mìnincabo incæ tömämini godongämæ waa waadete apænecæmìnimpa. Codito ingante wayömö nani pönencabo wayömö nani pönencabo tömånäni mìnito ìmìnite wæætè, Waa quëwencæmìnimpa, ante änänipa.

¹⁷ Botö tönñamini ëñëedäni. Mìnito adocabomini ìñomìnite wadäni æmæmoncadö æmæmonca pä cædäni ìnänite cöwä adinqe edæ Baa æedäni. Doyedë mìnito ëñënö ante ëñënamäi ìnani inte tömënanäni, Mìnito tee tëwate bai oda cæcæmìnimpa, ante cædinque wadö ante edæ odömönänipa

cæminii. Tömänäni inänite gomö aquënë cæminii. ¹⁸ Mänömaï cædäni iñömö mönö Awënë Codito ingante cædämaï inte nämä nani cæinënouque ante cædänipa. Tömänäni ante, Minitö iminite waa amönipa, ante waa tedete bai tededäni eñëninque pancadäniya guiquënë, Babæ wapiticæ impa, ante cöwä adämaï inäni inte, Nö impa, ante do pönänäni. ¹⁹ Minitö cöwë eñente cæmini iminipa, ante tömänäni do eñänäni. Mänömaï beyæ botö iñömö nanguï tobopa. Incæte, Quinö waa cæquï, ante minitö ædæmö eñencæminimpa, ante ainëmopa. Quinö wënæ wënæ cæquï, ante edæ ædæmö eñänämaï inte edæ gomö acæminimpa, ante ainëmopa. ²⁰ Wængonguï, Gänë pönente quëwencæminimpa, ante nê pönö cæcä iñömö edæ Tatäna ingante minitö önöwa gäänë wææntodongä ate minitö wæætë do pinä gäwate bai cæcæminimpa. Nöwo iñömö mönö Awënë Codito nänö waadete pönö cædö incæ entawencæminimpa, ämopa.

²¹ Botö tönö guëa cædongä Timoteo iñömö minitö iminite, Waa quëwencæminimpa, angampa. Ayæ botö guidänäni Dotio tönö Yatönö adobaï Totipatedo adobaï minitö iminite, Waa quëwencæminimpa, änänipa.

²² Nöwo botö Tedetiyobo iñömö Pabodo önöneque tedecä eñëninque ii cadota ante nê yewæmönimo inte botö adobaï, Waa quëwencæminimpa, ämopa.

²³ Gayo adobaï minitö iminite, Waa quëwencæminimpa, angampa. Tömengä oncönë Codito ingante nani pönencabo cöwë godongämæ ponte apænedänipa. Ayæ tömengä botö imote adobaï, Pöe, angä eñëninque edæ botö nöwo tömengä oncönë owobopa. Ayæ iñömö quëwänäni awënë nänö äinta æninque adocanque Edaato nani änongä iñömö tömengä, Tömänäni beyæ æbänö cæquï, ante nê angä iñömö tömengä tönö mönö töninacä Coadoto adobaï, Waa quëwëedäni, änapa.

²⁴ Mönö Awënë Itota Codito minitö iminite pönö waadete cæcæcäimpa. Mänömaï impa, ante botö, Amëë, ante ämopa.

²⁵ Nöwo iñömö Wængonguï ingantedö ante watapæ botö apænedö ante ayæ Itota Codito ingantedö ante mönö apænedö ante nê pönëmini inte minitö tæi pinænte ongoncæminimpa. Wængonguï eyepæ inte mänömaï pönö cæcæcäimpa. Tömengä mäninö ante nöwo tæcæ nänö odömönö ante wëenënedë pedæmämö iñonte cöwë wantæpiyæ wë wodonte bai cægacäimpa. ²⁶ Nöwo guiquënë, Codito æbänö cægacäi, ante inguipoga tömämæ quëwänäni eñente wede pönëninque botö imote eñente cæcædänimpa, ante cædinque Wængonguï cöwë nê Quëwëngä inte do odömongä acæimpa. Tömengä angä eñëninque tömengä beyæ nê apænegainäni wæætë edonque pönö yewæmönäni acæimpa.

²⁷ Ininque Wængonguï nê pönö eñëngä inte adocanque Wængonguï ingampa, ante adinque mönö, Bitö adobique nää bai emömi inte edæ waa cæbi amönipa, ante mönö Itota Codito emöwo apænedinque Wængonguï ingante edæ cöwë apænecæimpa. Mänömaï impa diyæ, ante botö, Amëë, ämopa.

Wængonguï ingante waa ate apænecæimpa, ante

1 Coodintoidi inānite Pabodo cadota ante tänota nānō yewæmongainta

*Coodinto iñömō Codito ingante nāni
pōnencabo*

¹ Wængonguī angā ēñēninque Itota Codito botō imote aa pedinque da godongā godōmo inte botō Pabodobo yewæmōmopa. Mōnō tōniñacā Totēnē tōnō guēa apænete ate yewæmōmo aedāni. ² Coodinto iñömō mīnitō Codito ingante mīni godongāmæ pōnencabo inōmīni inte ēñēedāni. Wængonguī, Botō quīmīni badinque mīnitō Itota Codito nempo quēwēninque tæiyæ waēmō ewocate quēwencæmīnimpa, ante cædinque añēcā pōnimīni inte mīnitō acæmīnimpa, ante yewæmōmopa. Ayæ adobaī, Mōnō Awēnē Itota Codito emōwo ante nē aa pedāni tōmāmæ quēwēnāni incæ acædānimpa, ante yewæmōmopa. Itota Codito iñömō mōnō Awēnē ingā incæ tōmēnāni Awēnē adocā ingampa. ³ Mōnō Mæmpo Wængonguī tōnō mōnō Awēnē Itota Codito godongāmæ waadete pōnō cæda ate mīnitō gānē pōnente quēwencæmīnimpa, ante botō Totēnē tōnō āmōnāpa.

*Codito nānō entawēnō bai nanguī
entawēmōmpa, ante*

⁴ Wængonguī waadete pōnō cæcā ate mīnitō Codito Itota nempo quēwēninque tōmengā nānō entawēnō bai nanguī entawēmīnīpa, ante adinque botō mīnitō beyæ ante Wængonguī ingante waa ate pōnēninque cōwē apænebopa. ⁵ Edæ Codito nempo quēwēñōmīnite tōmengā nānō ate ēñengainō ante pōnō apænecā ēñēninque mīnitō do entawēmīnīpa. Ininque mānīnō nānō ate ēñengainō ante eyepæ entawēmīni ininque mīnitō nō apænemīni bamīnīpa. ⁶ Edæ mōnitō, Itota iñömō adocā mōnō Codito inongā ingampa, ante apænemōni ēñēninque mīnitō Ao āninque, Nāwangā impa, ante wede pōnēninque waa cæte quēwēmīni acæimpā.

⁷ Mānīnō beyæ, Mōnō Awēnē Itota Codito æyedēnō pōninque edonque pōni

a ongonguingā, ante wānō cōninque mīnitō wæntæye badāmaī incæmīnimpa, ante cædinque Wængonguī Ōnōwoca pōnō apænecā ēñēninque mīnitō eyepæ inte waa cæquīmīni imīnīpa. ⁸ Mīnitō cōwē ininque baganca tæi ongonde oda cædāmaī incæmīnimpa, ante Wængonguī pōnō cæcā ate mōnō Awēnē Itota Codito pōñedē māniñedē ate mīnitō wentamō ædō cæte entawenguīmīnīi. Edæ dæ ampa. ⁹ Wængonguī, Botō Wengā Itota Codito iñömō mīnitō Awēnē inongā ingampa. Ininque mīnitō tōmengā nempo quēwēninque tōmengā tōnō godongāmæ cæte quēwencæmīnimpa, ante mīnitō imīnite añēte aa pecantapa. Mānōmaī ante nē aa pecā iñömō tōmengā nānō angainō bai edæ cōwē nē ædæmō cæcā ingampa cæmīnīi.

*Wæætē godō wæætē godō cædāmaī
iedāni, ante*

¹⁰ Botō tōniñamīni, botō mōnō Awēnē Itota Codito emōwo apænedinque iīmaī ante āmo ēñēmaīmīnīpa. Mōnō pōnencabo imōmpa, ante adodō pōnēninque mīnitō tōmāmīni godongāmæ Ao ante adodonque cædinque nāwæ godāmaī iedāni. ¹¹ Botō tōniñamīni apænebo ēñēedāni. Codoēidi mīnitō imīnitedō ante apænedinque, Coodintoidi nāni pōnencabo incæ wæætē godō wæætē godō tedewēnānīpa. ¹² Ante apænedāni ēñēninque botō, iīmaī impa, ante apænebo ēñēedāni. Pancamīniya, “Mōnitō Pabodo nānō nē emīñæmōni imōnīpa,” ante cæmīnīpa. Pancamīniya guiquēnē, “Apodo nānō nē emīñæmōni imōnīpa,” ante cæmīnīpa. Pancamīniya guiquēnē, “Pegodo nānō nē emīñæmōni imōnīpa,” ante cæmīnīpa. Ayæ wæætē pancamīniya guiquēnē, “Codito nānō nē emīñæmōni imōnīpa,” ante cæmīnīpa. Mānōmainō ante mīnitō wadō wadō ante tedewēmīni awædō.

¹³ Iñæmpa Codito nāmā incæ ante dicæ wadō wadō ante apænecantawogaa. Incæte Codito nempo quēwēmīni inte mīnitō, Pabodo emīñæmōni imōnīpa, āmīni. Apodo emīñæmōni imōnīpa, āmīni. Pegodo emīñæmōni imōnīpa, āmīni. Ayæ botō Pabodobo iñōmote wadāni awæ ñænquedimæ gōnōninque mīnitō beyæ wænōnāni dicæ wæntawogaa. Ayæ botō

Pabodobo emöwo apænedinque minitö dicæ æpænë guiminitawogaa. ¹⁴ Botö minicabo weca quëwëninque Codipo tönö Gayo inate mäninaque inate æpænë guidömo guidatapa, ante pönëninque waa tobopa. ¹⁵ Mänömaï i adinque minitö, Pabodo emöwo apænedinque æpænë guitamönipa, ante ædö cæte anguimïni, ante tobopa.

¹⁶ Æ, tæcæ pönëmopa. Etepänäidi inänite adobaï guidömo guidänitapa. Wadäni inänite wabänö guidömoï, ante wii pönëmopa. ¹⁷ Edæ Codito, Bitö æpænë guidömi guicädänimpa, ante botö imote änämaï ingacäimpa. Wæætë, Tæï piñængä inte Codito mönö wädö ante teëmë mongænte ñænquedimæ wængä beyænque mönö quëwengäimpa, ante apænebi ëñencädänimpa. Ayæ, Mänine ante wadäni, Önonque impa, ante änämaï incädänimpa, ante wææ cædinque bitö waodänique nani nanguï ëñente apænedö ante apænedämaï incæbiimpa. Wæætë, Codito ingantedö ante watapæ apænebi ëñencädänimpa, äninque Codito botö imote da godongä gobo imopa.

Codito Wængonguï nänö ëñënö entawëninque tæï nänö piñænö entawengampa

¹⁸ Itota ingante nani timpogaiwæ ante apænemöni adinque në wænguinäni guiquënë, Mäniwæ ante apænete wädänitedö abi, ante badete todänipa. Codito ængä beyænque në quëwëmöni guiquënë, Codito mäniwäa wængä beyænque Wængonguï tæï piñænte pönö cæcampa, ante wede pönente apænemönipa. ¹⁹ Edæ Wængonguï, Iïmaï cæcæboimpa, angampa, ante yewæmonte ongompa.

“Në adäni önonquedö ante ëñënanipa, ante botö nanguï nani ëñënö ante wido cæcæboimpa.

Në nämä mä pönente ëñënanipa guiquënë önonque ëñënanipa, ante botö nämä nani ëñënö ante Baa ancæboimpa,”

ante Wængonguï cæcampa, ante yewæmonte ongompa.

²⁰ Mänömaï cædinque Wængonguï, Inguipogaque quëwënäni nani nanguï ëñënö incæ önonque impa, ante ëñenguënë quëwëmini, ante do odömongampa. Ininque adocanque ingante, Nanguï ëñëmipa, ante Wængonguï dicæ anguingäa. Dodäni nani

wææ angainö ante në nö odömömi imipa, ante Wængonguï dicæ anguingäa. Nämä mä pönëninque në nö apænebi imipa, ante Wængonguï dicæ anguingäa. Edæ dæ ampa. ²¹ Edæ, Inguipogaque quëwënäni ocaidë nanguï ëñënanäni incæ önonque nani ëñënö beyænque botö imote ædö cæte ate bai pönenguinänii, ante Wængonguï në nö ëñëngä inte cæcampa. Codito nänö cægainö ante apænemöni adinque iinäni iñömö, Önonque tedewënantedö abi, ante badete todänipa. Iñæmpa Codito nänö cægainö ante badete nani todö beyænque minitö wæætë në wede pönëmini inte quëwencæminimpa, ante Wængonguï nöingä pönëninque pönö cæcampa.

²² Oodeoidi, Öönädë nani mä cæï bai bamönengæ cæmini ate ëñëmaïmönipa, ante änewënanipa. Guidiegoidi guiquënë, Nämä mä pönëninque ëñëmaïmönipa, ante cädänipa. ²³ Mönitö guiquënë, Codito ingante awænëmæ timpote wænönäni wængacäimpa, ante mäninonque ante apænemöni ëñëmïnipa. Mänömainö ante apænemöni ëñëninque oodeoidi guiquënë Baa ante tee tewater bai oda cädänipa. Guidiegoidi guiquënë mänine ante ëñëninque badete todänipa. ²⁴ Mönitö oodeomöni iñömönite minitö guidiegomïni iñömönite cädänimë inänite Wængonguï apænte ængä ingaimö inte mönö iñömö edæ iïmaï ante pönëmompä. Wængonguï nänö nö ëñënö incæ Codito encacampa, Wængonguï nänö tæï piñænö incæ Codito entawengampa, ante do edæ ëñente pönëmompä.

²⁵ Wængonguï önonque ante cæcampa, ante pönëwëmïnitawoo. Mönö waocabo nanguï ëñëmö imompa, ante pönëmïnitawoo. Iñæmpa, Nanguï ëñëmö, ante tedewëmö incæ önonque wädämö inte cæmompä. Wæætë Wængonguï guiquënë önonque cæte bai cæcä incæ godömenque gomonga nanguï ëñengä inte cæcampa. Ayæ, Wængonguï aquingä inte cæcampa, ante pönëmïnitawoo. Iñæmpa mönö waocabo tæï piñæmö imompa, ante tedewëmö incæ mönö önonque aquïimö inte cæmompä. Wæætë Wængonguï guiquënë në önonque cæte bai cæcä incæ godömenque gomonga tæï piñængä inte cæcampa.

26 Ìñānāni, æbānō ìñōmīnite Wængonguī aa pecantapa, ante pōnēdāni. Tōmāmīni dicæ nanguī ēñēmīni ingamīniyaa. Inguipogaque quēwēnāni nanguī nāni encadō bai mīnitō tōmāmīni dicæ adobai nanguī encamīni ingamīniyaa. Tōmāmīni dicæ nanguī tæi piñæmīni ingamīniyaa. Awēnēidi pæingā nānō awēnē baquinque ēñacā bai mīnitō tōmāmīni dicæ adobai awēnē baquinque ēñamīniyaa. Mānōmai ìñōmīnite Wængonguī dicæ aa pecantawogaa. Incæte adocanque adocanque mānōmai ìñōmīnite Wængonguī aa pegacāimpa.

27 Wæætē, Nē nanguī ēñēnāni incæ guīñente wæcædānimpa, ante cædinque Wængonguī iīmai cægacāimpa. Inguipoga quēwēnāni ìnānite cōwā adinque nē ōnonque cæi bai cædāni ìnānite apænte ængacāimpa. Ayæ, Nē tæi piñænāni incæ guīñente wæcædānimpa, ante cædinque Wængonguī inguipoga nē wæntæte cædāni ìnānite apænte ængacāimpa. Ìninqe tōmengā mānōmai cæcā ate waa cædānipa, ante adinque nē tæi piñænāni wæætē guīñente wædānipa. 28 Wængonguī inguipoga quēwēnāni nāni waa pōni mīnīcoo ēwente bai bacæimpa, ante cædinque, Inguipoga pancacooga wīwa incoo impa, ante adinque mānīcooque æninqe waa cægacāimpa. Ayæ, Ōnoncooque impa, ante mōnō ānoncoo adinque tōmengā ingante do æninqe nō cægacāimpa. Ayæ, Dæ ampa, mōnō ānoncoo incæ do adinque Wængonguī mānīcoo æninqe nanguī cægacāimpa. 29 Ìninqe Wængonguī weca ongōninqe waocā adocanque incæ, Waēmō ìmopa, ante ædō cæte anguingā.

30 Wængonguī pōnō ængā beyænque mīnitō Codito Itota nempo quēwēmīnipa. Wængonguī Codito Itota ingante da pōnongā æninqe mōnō Codito nānō ēñēnō bai ænte entawēmompa. Tōmengā nempo quēwēninqe mōnō tōmengā nānō nō cæte quēwēnō bai adobai ænte entawēmompa. Ayæ tōmengā tæiyæ waēmō nānō ēwocadō adobai pōnongā æninqe tæiyæ waēmō ēwocate quēwēmompa. Ayæ Codito ængā beyænque mōnō abæ tawænte gote bai quēwēmompa. 31 Ìninqe Wængonguī beyæ nāni yewæmongainō bai iīmai ante

bacæimpa. “Waocā, botō nanguī waēmō pōni ìmopa, ante nāmā waa ate apæneinente wædongā ìñōmō tōmengā wæætē, Mōnō Awēnē adocanque waēmō pōni ingampa, ante apænecā ìninqe waa cæbaingampa.”

2

Itota Codito ingante awāa timpodāni wængacāimpa, ante

1 Ìñānāni botō mīnitō weca apænecæte ante mā pōninqe nē nanguī ēñēnāni nāni waa ēñēnō bai ēñēnāmai ìmo inte bai pontabopa. Waodāni nāni waa tede bai tededāmai ìmo incæ pontabopa. Wæætē, Wængonguī nāwangā waa pōni cægacāimpa, ante mānīnonque ante apænecæte ante pontabopa. 2 Itota Codito ingante do adīmo inte botō, Tōmenganque nānō cægāinonque ante ēñente bai cædinque botō coodintoidi weca gote apænebote, ante godāmai ìñedē do ānōmoimpa. Ìninqe, Wadō nāni nanguī ēñēnō ante ēñēnāmai inte bai cædinque botō, Itota Codito ingante awāa timpodāni wængacāimpa, ante mānīnonque ante ēñente bai gote apænebote, ante pōnēninqe mīnitō weca pontabopa. 3 Ayæ botō aquīmo pōni ìnōmo inte mīnitō weca pōninqe, Ædō cæte apænequīmoo, ante guīñēnete wædinque nanguī do do wāate pōmo amīnitapa. 4 Pōninqe botō, Mānōmai impa, ante dicæ tōmēmo nanguī ēñēnō ante tedetabogaa. Wængonguī beyæ apænebo ēñēdāni, ante ānīmo incæ botō dicæ waa pōni tedete bai apænetabogaa. Wæætē Wængonguī Ōnōwoca tōnō āawocaque bai ēwocadinque botō tōmengā nānō tæi piñænō beyænque apænebo amīnitapa. 5 Mānōmai cædinque botō, Waomō mōnō nanguī ēñēnō beyænque ante wīi pōnencāmīnimpa. Wæætē Wængonguī nānō tæi piñænō beyænque wede pōnēmīni bacāmīnimpa, ante cæcæte ante mānōmai ponte apænetabopa.

Wængonguī cæbānō ēmongā, ante tōmengā Ōnōwoca odōmongā ēñēmompa, ante

6 Wæætē ædæmō pōnēnāni æmæwo pæte bai ìñōnānite mōnitō tōmēnāni weca ongōninqe mōni nanguī ēñēnīnō ante apænemōnipa. Incæte ñōwodāni nāmā nāni ēñēnō ante apænedāmai ìmōnipa.

Ayæ imæca awënëidi nāni dæ goquincabo tōmēnāni nāni eñēnō ante apænedāmaī imōnipa.

⁷ Wæætē Wængonguī awēmō iñonte nānō eñengainō ante apænemōnipa. Tōmengā iñōmō, Botō nanguī eñēnōmo inte pōnō cæbo beyænque botō nē apænte ænānique ñāō apāite bai entawencædānimpa, ante inguipoga dæ añedē wēēnēñedē pōni incæ mōnō imonte ante pōnō cægacāimpa. Incæte, Mānōmaī cæcæboimpa, ante tōmengā nānō eñēnō ante wadāni eñēnāmaī incædānimpa, ante wææ cædinque wē wodonte bai cædinque tōmengā nānō eñengainō ante ñōwo ganca awēmō iñōmō entawēnongāimpa. Ñōwo iñōmō tōmengā awēmō nānō eñengainō ante tæcæ apænecā eñēnimōni inte mōnitō wæætē mānīnō ante ñōwo apænemōnipa. ⁸ Inguipoga awënëidi guiquēnē Wængonguī nānō wē wodonte eñengainō ante dicæ eñēnāniyaa. Edæ mānīnō ante eñente bai tōmēnāni mōnō Awēnē ñāō bai entawēnongā iñongante awāa timpote wænōnāmaī incædōnānimpa.

⁹ Wæætē iīmaī ante yewæmongatimpa. “Botō imote nē waadete pōnēnāni iñōmō watapæ quēwencædānimpa, ante Wængonguī do pōnō badongacāimpa. Mānīnō nānō pōnō cægainō ante waocā dicæ acāa. Mānīnō ante dicæ eñengāa. Edæ waocā nāmanque mā pōnēninque dicæ eñengāa,”

ante nāni yewæmongaī bai iīnque bacæimpa, ante mōnitō apænemōnipa. ¹⁰ Wængonguī Ōnōwoca guiquēnē tōmāā cōwā adinque Wængonguī awēmō nānō pōnō badongainō ante edonque adinque do eñengampa. Iñinque mōnonga pō guidinque tōmengā mōnō imonte edonque odōmongā eñēmompā.

¹¹ Edæ mōnō waocabo incæ, Adocanque ōnōwēnenque pōnēē cōñongante wacā, Æbānō ante pōnēē congāā, ante ædō cæte eñenguingāā. Edæ nē pōnēē congā guiquēnē, Botō æbānō ante pōnēē cōmoo, ante tōmengā adocanque ōnōwēnenque pōnente eñengampa. Wængonguī adobai ingampa. Wængonguī æbānō ante awēmō pōnēē congāā, ante waocā ædō cæte

eñenguingāā. Wængonguī æbānō ante pōnēē congāā, ante tōmengā Ōnōwoca adocanque eñēñongā wadāni eñēnāmaī inānipa. ¹² Wængonguī iñōmō, Botō æbānō pōnōmo æmīnīi, ante edonque acæmīnīmpa, ante cædinque tōmengā Ōnōwoca ingante da pōnongā ænte ewocate amompā. Iñinque inguipogaque quēwēnāni nāni pōnēnō bai entawēnāmaī inōmō inte mōnō Wængonguī tōmengā Ōnōwoca tōnō āawocaque bai ewocamō inte do eñēmompā.

¹³ Mōnitō iñōmō, Wængonguī mānōmaī pōnō cæcampa, ante odōmoncæte ante mā pōnente mōni eñēnō ante apænedāmaī imōnipa. Wæætē Wængonguī Ōnōwoca pōnō odōmōnte apænecā eñente ewocadinque tōmengā nānō odōmōnō mōni eñēnō ante apænemōnipa. Edæ Wængonguī Ōnōwoca nānō pōnēnō ante eñencæte ante Wængonguī Ōnōwocaque nānō apænede ante apænete eñente ewocacæimpa, ante pōnēninque mōnitō mānīneque ante apænemōnipa.

¹⁴ Edæ, Wængonguī Ōnōwoca nānō pōnēnō æbānō i, ante tōmengā Ōnōwoca tōnō āawocaque bai nē ewocadānique pōnente eñēnānipa. Iñinque nē ōmæwocacā bai ingā guiquēnē tōmengā ædō cæte edonque eñenguingāā. Edæ oda cæcampa. Mānīnō ante apænemōni eñēninque tōmengā, Ōnonquedō ante apænete wæcantedō abi, ante badete todinque edæ, Baa angampa. ¹⁵ Wængonguī Ōnōwoca tōnō āawocaque bai nē ewocacā guiquēnē, Tōmāā æbānō i, ante cōwā adinque edonque pōni eñengampa. Wæætē edæ, Tōmengā æbānō ewocacāā, ante wadāni cōwā adāni incæte ædō cæte apænte anguīnānīi. ¹⁶ Ayæ, “Wængonguī Awēnē æbānō nanguī eñente pōnengāā, ante æcānō eñenguingāā. Edæ Wængonguī ingante godōmenque odōmōnānipa diyæ eñente baquingāā,” ante yewæmongatimpa. Mōnō guiquēnē Codito eñente nānō pōnēnō ante entawēmompā.

3

Wængonguī ingante nē cæmō mōnō godongāmæ cæcabo

1 *Īñānāni ēñēdāni. Codito Ōnōwoca tōnō nē ædæmō ēwocadāni inānite botō Wængonguī Ōnōwoca nānō apænedō ante do apænebopa. Minitō guiquēnē mempoga ēñamīni inte Codito nempo quēwēmīni incæ tæcæ ēñadāni bai pædāmaī inōmīni inte mīnitō inguipogaque ante pōnēmīni awædō. Mānōmaī beyæ botō adobainō ante ædō cæte mīnitō imīnite apænequīmoo.* 2 *Edæ tæcæ ēñadāni iñōmō tæēmō mōnō cænguī capo capo cænāmaī inānipa. Minitō iñōmō tōmēnāni bai adobai imīni inte Wængonguī Ōnōwoca nānō apænedō ante ædō cæte ēñenguīmīni. Īnīnque tæcæ ēñadingā ingante goōmæ di godōnete bai cædinque botō mīnitō imīnite apænedinque adodeque adodeque apænebo ēñēmīnitapa. Īñæmpa ñōwo ganca tæcæ ēñadāni bai inōmīni inte mīnitō æiquedō ēñenguīmīni.* 3 *Edæ cōwē inguipogaque ante pōnēmīni inte pancamīniya, Wacā gomonga cæcampa, ante piinte wæmīnipa. Pancamīniya guiquēnē wæætē godō wæætē godō piinte ānewēmīnipa. Mānōmaī cæte quēwēnīnque mīnitō ōmæwocadāni bai imīni inte inguipogaque ante pōnente quēwēmīni abopa.* 4 *Edæ iīmaī ante tedewēmīnipa. Adocanque, “Botō Pabodo nānō nē ēmīñæmo imopa,” ante cæcampa. Wacā, “Botō guiquēnē Apodo nānō nē ēmīñæmo imopa,” ante cæcampa. Mānōmainō ante mīnitō ōmæwocamīni inte bai cæmīni awædō.*

5 *Īñæmpa, Apodo æcānō ingāā, ante pōnēmīni. Pabodo æcānō ingāā, ante pōnēmīni. Edæ botō mōnō Awēnē nānō pōnō anganca tōmēngā ingante nē cæbo bagaboimpa. Apodo adobai mōnō Awēnē nānō pōnō anganca Awēnē ingante nē cæcā bagacāimpa. Īnīnque tōmēngā beyæ nē cæmōnaque imōna inte mōnatō mīnitō imīnite apænemōna ēñente pōnēmīnitapa.* 6 *Tōmēmō minte bai cædinque botō mā apænebo ate mīnitō tæcæ ēñēmīnitapa. Apodo guiquēnē, Cōñe bate pæcæimpa, ante æpæ gao caadāni bai cædinque mīnitō imīnite godōmenque nanguī odōmonte apænecā ēñēmīnitapa. Incæte mōnatō apænemōna beyænque ædō cæte tā bocate bai pæwoquīmīni. Wængonguī ado-*

canque nē apænecā beyænque mīnitō tā bocate bai pæwocate ēwocamīnipa. 7 *Īnīnque minte bai nē apænebo inte botō tōnō Apodo æpæ gao cæte bai nē odōmonte apænecā tōnō mōnatō iñōmō ōnōmōnaque imōnapa. Wængonguī tōmenganque, Pæe, ante nē ānongā ingampa. Tōmēngā adocanque angā beyænque pæmīnitapa.*

8 *Botō nē apænebo tōnō Apodo nē odōmonte apænecā tōnō mōnatō, Pæcæimpa, ante āanque bai Wængonguī beyænque cæmōnapa. Īnīnque botō nē apænebo iñōmote tōmēngā nē odōmonte apænecā iñongante Wængonguī iñōmō, Mīnatō apænegainō beyæ æeda, ante eyepæ pōnī pōnongā æncæmōnaimpa.* 9 *Mōnatō iñōmō Wængonguī tōnō godongāmæ cæmōni inte mōni nē cæcabo imōnipa. Mīnitō guiquēnē Wængonguī quīmīni inōmīni inte tōmēngā gōnea bai pæwocamīni imīnipa.*

Ayæ adobai tōmēngā nānō mænōincō bai imīnipa. 10 *Nē ēñente mænongā iñōmō, Wænōmēnæca inō mænongæimpa, ante cædinque dicaco cō cō cæcampa. Botō iñōmō Wængonguī waadete pōnō cæcā ate nē ēñente mænongā bai adobai bagaimo inte botō mīnitō weca mā ponte apænebo ēñēmīnitapa. Ñōwo guiquēnē botō mānōmaī cō cæte bai mā apænebo ēñēmīni ate wadāni ponte botō cō cædinca wænōmēnæca mænonte bai cædinque godōmenque odōmonte apænedāni ēñēmīnipa. Īnīnque edæ æcānō mānīnca mænonte bai odōmōna tōmēngā tōingā mænonte bai nō ēñente odōmonte apænequēnēngā ingampa.* 11 *Wadāni, Dica adocaa wænōmēnæca inō mænongæimpa, ante tāno nāni cō cædinca bai Itota Codito adocanque Tānocā ingampa. Īnīnque, Wacā tānocā ingampa, ante bai cædinque mīnitō ædō cæte wacā mīñæ gomīni. Īñæmpa, Dica wacaa wænōmēnæca inō mænonte bai babaimpa.*

12 *Ayæ tānoca nāni gō cædinca bai Itota Codito Tānocā iñongante mōnitō, Mānīnca adocaa wænōmēnæca mænongæimpa, ante bai cædinque odōmonte apænemōnipa. Nē mænōnāni iñōmō oodo ænīnque padata ænīnque dica nāni waa pōnī adinca*

æninque, Quincamē ewēnāmaī inguinca, ante æninque tōmēnāni nāni mænōnō baī cædinque pancamōniya nō pōni odōmonte apænemōni ate mōnitō apænedō wido cædāmaī ingæimpa. Wadāni guiquēnē awæ æninque gaguimæ amimō i æninque ayawāa amiwæ æninque quincōomē ewenguincoo æninque godō mænōnāni baī cædinque tōmēnāni ōnonque odōmonte baī apænedānipa. ¹³ Edæ Wængonguī nānō apænte anguīōnæ iinque ba ate gonga nāni angā nangui bæcocæimpa. Māniñedē ate edæ, Mōnitō æbānō ñowo odōmonte apænemōnii, ante ñāo gongæ edonque acæimpa. Wængonguī māniñedē mōnitō apænedō apænte ancæte ante cædinque nē tante baī cæcā ate pancadea æmæwo montæ göne ate pancadea ongō æncæcæimpa.

¹⁴ Īninque, Æcānō mænongaincō montæ gönāmaī i, ante adinque Wængonguī eyepæ pōnongā æninque nē mænongaingā wæætē watapæ quēwencæcæimpa. ¹⁵ Wacā guiquēnē tōmengā nānō mænongaincō do montæ gö adinque Wængonguī mānincō nē mænongaingā ingante pōnōnāmaī incæcæimpa. Incæte māningā waocā gonga bæcōyōmō wodii tao wīnongā baī ōmæpocā wæyongante Wængonguī ængā beyænque tōmenganque quēwencæcæimpa.

¹⁶ Mīnitō iñōmō, Wængonguī Ōnōwoca ingante do æninque tōmengā ingante ewocamōmpa, ante eñēnāmaī imīnitawo. Wængonguī tæiyæ waēmō oncō baī mōnō baō eñamōmpa, ante eñēnāmaī inte baī cæmīni awædō. ¹⁷ Wængonguī oncō tæiyæ waēmō oncō i iñonte waocā bæ tate wido cæcā adinque Wængonguī nāēmæ tōmengā ingante edæ ōmæe ewencæcæimpa. Ayæ adobaī Wængonguī tæiyæ waēmō oncō baī baō eñayōmīnite waocā wapiticæ odōmonte apænecā beyæ mīni godongāmæ apænedincabo incæ oda cæte nāwæ gomīni adinque nē wapiticæ apænecā ingante Wængonguī adobaī wido cæcæcæimpa.

¹⁸ Mīnitō, Ñōwodāni nāni eñēnō ante do nangui eñēmōnipa, ante pōnēmīnitawoo. Īñæmpa mānōmānō ante mīnitō nāmā babæ pōnēwēninque apænemīni awædō.

Nē nō eñēmīni bacæte ante mīnitō ñōwodāni nāni nangui eñēwēnō ante wido cædinque ōmæcamīni badinque nē eñēmīni bacæmīnimpa. ¹⁹ Inguipogaque quēwēnāni nangui eñēnāni incæte Wængonguī, Ōnonquedō ante eñēmīni awædō, angampa. Edæ Wængonguī beyæ apænedinque iūmaī ante yewæmongadānimpa. “Ōmē nāmā nānō ñōnōmē incæ waocā nāēmæ wīni wīni dawacā baī nē nangui eñēnāni adobaī nāmā nāni eñēnō beyænque nāēmæ oda cædānipa, ante cæbopa,” Wængonguī angampa. ²⁰ Ayæ adobaī, “Nē eñēnāni iñōmō tōmēnāni nāni nangui eñēnte pōnēnō incæ idiquibæ impa, ante edæ mōnō Awēnē do eñengampa,” ante yewæmonte ongōmpa.

²¹ Īninque, Botō waocā adocanque nānō nē emīñæmo inte tobopa, ante ānāmaī incæmīnimpa. Īñæmpa mōnitō waomīni inte tōmāmōni mīnitō beyæ ante cæte quēwēmōnipa. ²² Botō Pabodobo iñōmo incæ Apodo ingā incæ Pegodo ingā incæ mīnitō beyæ ante cæte tōmāmōni quēwēmōnipa. Inguipo incæ inguipoga ongoncoo incæ mīnitō beyæ ongōmpa. Mōnō quēwēmāmo incæ mōnō wænguimāmo incæ mīnitō beyæ ongōmpa. Ñōwopāmo incæ mīlmāmo iincayæ ponguimāmo incæ quincōomē incæ edæ mīnitō beyæ tōmancoo ongōmpa. ²³ Ayæ mīnitō wæætē Codito beyænque quēwēmīni imīnipa. Codito wæætē Wængonguī beyænque quēwengā ingampa, ante āmo eñēmaimīnipa.

4

Itota nānō nē da godongaimōni inte iūmaī cæmōnipa

¹ Īninque mōnatō Pabodobo tōnō Apodo iñōmōnate mīnitō iūmaī ante eñēnguēnēmīni imīnipa. Codito tōnō godongāmæ cædinque tōmengā beyæ ante Pabodo tōnō Apodo nē cæda iñapa. Ayæ godōmenque, Wængonguī tōmengā nānō awēmō eñēngainō ante pōnō apænecā eñēna inte tōmēna mānīnō ante nē apæneda iñapa, ante eñēnguēnēmīni imīnipa. ² Īninque Awēnē Wængonguī iūmaī angampa. Botō waocā ingante quīēmē pōnō cæbo æninque tōmengā botō pōnōnonque entawēninque nō pōnente

ædæmō aaquēnengā ingampa, ante Wængonguī cōwā adinque, Æbānō botō beyæ wææ aabii, ante apænte angampa. ³ Ìninqe mīnitō, Pabodo æbānō cæcāā, ante apænte ancæte ante cōwā amīni incæte botō wædāmaī ìmaīmopa. Nē apænte nāni ānoncabo incæ botō ìmote adobaī cōwā adinque apænte ānāni ēñēninqe botō wædāmaī ìmaīmopa. Tōmēmo incæ, Æbānō botō cōwē wede pōnente cæbo ìmoo, ante ædō cæte nāmā anguīmoo. ⁴ Botō, Tōmēmo wēnæ wēnæ cædāmaī ìnōmo ìmopa, ante pōnēmopa. Incæte, Wentamō mongænāmaī ìmopa, ante ædō cæte botō nāmā anguīmoo. Mōnō Awēnē adocanque botō ìmote nē apænte angā ingampa.

⁵ Mānīnō beyæ mīnitō, Ìninqe bayedē tōmāā apænte angæimpa, ante mōnō Awēnē ponganca ee adinque apænte ānāmaī ìedāni. Tōmengā ìñōmō waomō mōnō awēmō cægāinō ante, Edonque pōnī acæimpa, ante ñāō ìñōmō māo odōmoncæcāimpa. Ayæ, Æbānō cæcæboimpa, ante mōnō ònōwēnēnque pōnengāinō incæ edonque odōmongā gongæ nāwæ acæimpa. Ayæ, Adocanque æbānō waa cægacāi, ante, Wacā æbānō waa cægacāi, ante watapæ apænedinque tōmāmō mōnō cægāinō ante Wængonguī pōnō apænecā ēñente mōnō tocæimpa.

⁶ Ìñānāni ēñēedāni. Waocā adocanque ingante, Waingā ingampa, āninqe wacā ingante wīi pīincæmīnīmpa, ante yewæmongatimpa. Ìninqe botō mīnitō beyæ ante, Mōnatō æbānō cæmōna, ante yewæmontabopa. Mīnitō, Apodo tōnō Pabodo æbānō cæda ìnaa, ante pōnēninqe Wængonguī beyæ nāni yewæmongāinonque ante mānīnonque ēñente cædinque godōmenque cædāmaī incæmīnīmpa, ante cætabopa. ⁷ Ìñæmpa tōmāmō ònōmonque ìñōmonte Wængonguī, Bitō gomonga waēmōmi pōnī ìmīpa, ante dicæ apænte angantawogaa. Bitō entawēnō ìñōmō tōmēmi ocaidē mā bitō pōnēnō beyænque dicæ entawēmitawogaa. Mōnō Codito adocanque edæ pōnō apænecā ēñente nē ænte entawēmi ìnōmi inte bitō, Tōmēmoque nāmā beyænque entawēmopa, ante ædō cæte ānewēmīi.

⁸ Mīnitō, Eyepæ pōnī do entawēmōnīpa, ante baī cæmīni awædō. Mīnitō waa quēwēninqe ante do eyepæ ænte baī cæmīni awædō. Edæ Pabodoidi mōnitō beyæ cædāmaī ìñōnānīte tōmēmōni nāmā beyænque awēnē odehyemōni bamōnīpa, ante cæte baī cæmīni awædō. Ìñæmpa mīnitō nāwangā awēnē odehyemīni bamīni baī mōnitō adobaī awēnē odehyemōni badinque nanguī tocædōmōnīmpa. ⁹ Wæætē Itota nānō nē da godongaincabo ìñōmōnīte Wængonguī incæ, Yæmīñæ pōnī gote nāni wænguinque godānitedō amīni, ante badete tote baī odōmongā awædō. Mānōmaī cæcā adinque waodāni incæ anquedoidi incæ Wængonguī nānō nē badongāināni tōmānāni mōnitō ìmōnīte adinque badete todānīpa, ante awædō.

¹⁰ Edæ mīnitō adobaī cædinque ìmaī pīimīni wæmōnīpa. Mōnitō Codito beyæ cæyōmōnīte mīnitō, Ocai òmæcamīni inte cæmīnīpa, ante pōnēmīnitawoo. Wæætē nāmanque ante pōnēninqe, Codito nempo quēwēninqe mōnitō ocai encamōni inte nanguī ēñēmōnīpa, ante tedewēmīni awædō. Ayæ, Pabodoidi aquīi pōnī ìñōnānīte mōnitō wæætē tæēmō pīñæmōni ìmōnīpa, ante pōnēmīni awædō. Wadāni adobaī mīnitō ìmīnīte ante apænedinque, Wāimīni pōnī ìmīnīpa, āninqe mōnitō ìmōnīte ante wæætē, Ònōmīnīque ìmīnīpa, ante pīinānīpa.

¹¹ Ayæ mōnitō ñōwo ganca cænguī cænāmaī inte gue ænente awædō. Tepæ bedāmaī inte gæwænte awædō. Weocoo wāā tēincoo mongænte awædō. Ayæ tæi tæi pānāni caate wæmōnīpa. Ayæ oncō òmaamōni inte ¹² mōnitō ònompoca nanguī cædinque ænte quēwēmōnīpa. Wēnæ wēnæ ìmīnīpa, ante pīināni wædinque mōnitō wæætē, Mīnitō ìmīnīte Wængonguī pōnō waadete cæcæcāimpa, ante cæmōnīpa. Ayæ togænte pānāni ate wædinque mōnitō wæætē pīināmaī piyænē cæmōnīpa. ¹³ Mōnitō ìmōnīte ante apænedinque, Wīwa cædānīpa tōō, ante babæ ānāni ēñente wædinque mōnitō wæætē waadete apænēmōnīpa. Edæ, Èwēmōimæ gadonguīmæ baī ìmīnīpa. Òmæpocoo wido cæquincoo baī ìmīnīpa tōō,

ante piinque inguipogaque quëwënäni iñömö mönitö imönite ñowo ganca cöwë wido cädäni wädömöni imönipa.

¹⁴ Mönitö beyæ cædinque Pabodoidi wæwente quëwënäni, ante adinque mïnitö wæætë guingo imonte wæcæminimpa, ante botö dicæ mänömainö ante yewæmömogaa. Wæætë botö wëmïni bai iñöminite botö, Mänömai cædinque mïni wæquinque impa, ante wææ yewæmömopa. ¹⁵ Mïnitö imïnite në aadäni iñömö diete miido ganca mänimpodäni iñönänite mönitö mïnitö mæmpoidi bai imöni guiquënë mëmöniya pönï imönipa. Edæ, Itota Codito nempo quëwëninque botö, Itota Codito pönö cæcä beyænque mönö watapæ quëwengæimpa, ante apænebo ëñëmïnitapa. Mänömainö ante apænebo ëñëninque mïnitö mem-poga ëñamïni ate botö mïnitö mæmpo bai bagaboimpa. ¹⁶ Mänömai beyæ botö mïnitö imïnite waadete apænedinque, Botö mæmpobo cädö bai mïnitö adobai cæcæminimpa, ante nanguï ämopa.

¹⁷ Botö tömämæ godinque wayömö Codito ingante nani godongämæ pönencabo weca wayömö nani pönencabo weca go guidinque iïmai ante apænebopa. Mönö Itota nempo quëwëninque nö ëñëninque waa cæte quëwengæimpa, ante odömönte apænebopa. Mänömainö ante botö odömönte apænedö bai botö tömëmö adodö ëñente quëwëmö abaimpa. Ìnque mïnitö, Pabodo mänömai quëwengampa, ante ëñencæminimpa, ante botö në waadecä Timoteo ingante da godömo mïnitö weca ponte apænecæcäimpa. Tömengä iñömö botö wengä bai inongä inte Codito nempo quëwëninque cöwë nö pönente cæcä ingampa. Tömengä mïnitö weca ponte apænedinque, Pabodo nänö odömönte apænedö bai tömengä nämä adodönte ante cöwë ëñente quëwengampa, ante apænecä ëñëninque adodö ante pönencæminimpa.

¹⁸ Pancaminiya, Pabodo wïi pongä awædö, ante, Tömëmönique wæætë në ämöni incæmönimpa, ante botö imote piinte tedewëmïni. ¹⁹ Incæte mönö Awënë Ao angä ate botö oo poncæboimpa. Ponte adinque botö, Tömëmönique në ämöni

incæmönimpa, ante në tedewëmïni æbänö tedewëmïni, ante änämai incæboimpa. Wæætë adomïni mïni tæi piñænö ante cöwä adinque apænte ancæboimpa. ²⁰ Wængongui Awënë Odeye nempo në quëwëmö iñömö wïi önonque mönö ted-eguïnö beyænque quëwëmompä. Wæætë edæ tæi piñænte mönö quëwenguïnö ante mönö tömengä nempo quëwëmompä. ²¹ Mïnitö æbänö cæmïni ate mïnitö weca ponguïmo. Edæ mïni cædinö adinque botö panguënëmo inguïmo, ämïnitawo. Wæætë waadete pönëninque ædæmö cæquënëmo inguïmo, ämïnitawo.

5

Në wiwa towengä ingante apænte angæimpa, ante

¹ Edæ, Në wiwa towengä incæ cood-intoidi nani pönencabo tönö godongämæ ongongampa, ante tededäni ëñentamönipa. Mïnitö weca ongongä adocanque tömengä wæmpo nänöogængä incæ manguïwengampa töö. Iñæmpa Wængongui ingante në ëñënamai inäni incæ mänömai wënæ wënæ cädämai iñönäni mïnitö weca ongonganque do cæcä apa cæmïni. ² Në wiwa towengä tönö godongämæ ongömïni incæte mïnitö, Tömëmönique waa cæmöni imönipa, ante tedewëmïni awædö. Incæte Ca ca wëmïni bai waa incædönimpa. Në wiwa cæcä ingante, Mönitö weca ongönämai gobæwe, ante da godömïni gocä bai waa incædönimpa. ³ Botö guiquënë nänënë quëwëmö incæte mïnitö weca owote bai önöwënenque pönëmö imopa. Ìnque mïnitö weca owote bai botö në wiwa cæcä ingante do apænte ämopa. ⁴ Mïnitö Awënë Itota ëmöwo apænedinque godongämæ pönömïni botö nänënë quëwëmö incæte adoyömö owote bai pönencæboimpa. Ayæ Awënë Itota tæi piñængä inte mïnitö tönö adoyömö ongoncæcäimpa. Ìnque mïnitö iïmai cæedäni. ⁵ Awënë nänö ponguïönæ iñedë në wiwa cædongä tömengä önöwoca quëwencæcäimpa, ante iïmai cæedäni. Tömengä nänö wiwa ëñayö ewente bacæimpa, ante cædinque mïnitö tömengä ingante Tatäna nempo pædæ godömïni æncæcäimpa.

⁶ Minitō, Waa imōni imōnipa, ante teded-
inque wiwa tedewēmīnipa tōō. Edæ dodāni
nāni yewæmongainō ante adāmaī inte
baī tedewēmīnipa. “Pāō tōmāo yedæ
æmpoquinque wædænque da wēnāni” baī
mīnitō adobaī adocanque wiwa cæcā
ingante mīni oda cæquinque ee amīni
ongongampa. ⁷ Mīni pōnencabo waēmō
pōni mīni entawenguinque pāō yedæ
æmpoquī wido cæte baī cædinque nē wiwa
cædongā ingante da tadōmīni gocæcāimpa.
Edæ mōnō Codito iñōmō wiwa mōnō
cædinō ante ñā mēnongacæte ante nāmā
wepæ godongacāimpa. Edæ dodāni, Nē
wænonguēnengā wænōnāmaī inte wodo
pænta gocæcāimpa, ante, Patowa, ante
codotedo nāni nē wænongaingā baī
mōnō Codito iñōmō adobaī inongā inte
wængacāimpa. ⁸ Īnīnque mōnō pāō yedæ
æmpoquī ōmæmō ī cænte baī cædinque wiwa
mōnō cædō ante wido cædinque mōnō pīinte
cædāmaī inte waa cæte quēwengæīmpa.
Ayæ ææmæ watapæ bete baī cædinque,
Quīnō nāwangā pōni ī, ante Ao ante
æninque mōnō nō pōnente quēwengæīmpa.

⁹ Nē wiwa towēnāni tōnō godongāmæ
cædāmaī iedāni, ante botō cadota ante
do yewæmōmo amīnitawo. ¹⁰ Mānōmaīnō
ante yewæmōninque botō, Inguipogaque
quēwēnāni tōnō godongāmæ cædāmaī
iedāni, ante dicæ antabogaa. Īñæmpa
wiwa towēnānique, wacā quī nē æīnente
wædānique, wacā quī nē ō ænānique
inguipoga quēwēnānipa. Ayæ, Wængonguī
impa, ante badōninque nē ædæ wæænte
quēwēnānique mānimpodānique inguipoga
quēwēnānipa. Īnīnque ædō cæte tōmēnāni
weca cædāmaī inguīī. Edæ inguipo emō
cæte gote baī tōmēnāni weca ongōnāmaī
inguīī.

¹¹ Wæætē mānīnō ante yewæmōninque
botō, Mīni pōnencabo incæ adocanque
wiwa cæcā adinque mīnitō tōmengā tōnō
godongāmæ cædāmaī iedāni, ante wææ
āmopa. Edæ, Nē pōnengā incæ wiwa
towengantawo. Nē pōnengā incæ wacā quī
æīnente wæcantawo. Wængonguī impa, ante
badonte nē pōnengā ædæ wæængantawo.
Wacā ingante, Wēnæ wēnæ imīpa, ante
angantawo. Tī nāmæ bete nē pōnengā

incæ quidi quidi dowængantawo. Wacā quī
æncæte ante babæ cædinque ō ængantawo.
Īnīnque tōmengā, Nē pōnēmo imōpa, ānongā
incæ mānōmaī wiwa cæcā adinque mīnitō
tōmengā tōnō godongāmæ cædāmaī inte
godōmenque tōmengā tōnō godongāmæ
contate cænāmaī iedāni, ante botō wææ
ancæte ante āmopa.

¹² Mīnitō Codito nempo mīni quēwencabo
incæ nāēmæ apænte ānāmaī imīni inte oda
cæmīnipa. Wadāni inānite Codito nempo
quēwēnāmaī iñōnānite botō, Tōmēnāni
æbānō wēnæ wēnæ cædānīī, ante ædō
cæte apænte anguīmoo. ¹³ Wængonguinque
tōmēnāni inānite apænte ancæcāimpa.
Incæte mīni cabo incæ adocanque wiwa
cæcā adinque mīnitō tōmēmīni, Mōnitō
weca ongōnāmaī gobāwe, ante da tadōmīni
tao gocæcāimpa.

6

*Nē pōnēnāmaī ingā apænte ancæcāimpa,
ante ānāmaī īe*

¹ Mīni pōnencabo iñōmīnite adocanque
bitō imīte wēnæ wēnæ cæcantawo.
Īnīnque bitō, Tōmengā ingante apænte
ancædānīmpa, ante cædinque eñēnāmaī
ināni weca ædō cæte ænte gobīī. Wæætē
Wængonguī quīnāni inānite angā eñēnīnque
tōmēnāni wæætē, Tōmengā æbānō wēnæ
wēnæ cæcāā, ante apænte adinque nō
ancædānīmpa. ² Edæ mōnō Wængonguī
quīmō iñōmō edæ, Inguipoga tōmāmæ
quēwēnāni æbānō wēnæ wēnæ cædānīī,
ante nē apænte anguīmō imōmpa. Incæte
mīnitō, Mānōmaī cæcæmōnīmpa, ante
eñēnāmaī inte baī cæmīni awædō. Tōmāmæ
quēwēnāni inānite nē apænte anguīmīni
inte mīnitō ñōwo wædænque mīni apænte
anguēnēnō incæ quīnante ānāmaī imīnīī.
³ Mōnō iñōmō Wængonguī anquedoidi
inānite nē apænte anguīmō inōmōīmpa,
ante eñēnāmaī imīnitawo. Mānīnāni inānite
nē apænte anguīmō inōmō inte mōnō
pōnencabo ñōwo mōnō wædō ante mōnō
godōmenque apænte angæīmpa, ante
pōnēmīniyaa.

⁴ Codito ingante mīni godongāmæ
pōnencabo incæ mīni wædō ante apænte
ancædānīmpa, ante mīnitō ædānidō inānite
āmīni apænte ānānīī. Īñæmpa, Ōnōnānique

inānīpa, ante mīni ānōnāni incæ mānīnō ante nē apænte ānāni badānitawo. ⁵ Mīnitō guingo imonte mīni wæquinque cæmīnīpa, āmo ēñēmaīmīnīpa. Nāna pōnencaya incæ nāēmæ wæætedō wæætē āna wædinque mīnitō, Mōnō pōnencabo incæ æcānō nē nō ēñēnongā inte apænte anguingāā, ante adinque tōmengā ingante anguēnēmīni imīnīpa. Īñæmpa mīnitō weca nē nō ēñengā adocanque dæ angantawogaa. ⁶ Wæætē nāna pōnencaya incæ nāēmæ pīinīnque adocanque, Botō beyæ apænte ānīnque īngā ingante pancædānīmpa, angampa. Ayæ godōmenque wēnæ wēnæ cædinque tōmengā nānō tōniñacā ingante nē pōnēnāmaī īnāni weca ænte godīnque, Apænte ānīnque pancæmīnīmpa, angā pānānīpa.

⁷ Īñæmpa mīni pōnencabo incæ nāēmæ pīinīnque, Apænte ante pangæīmpa, ante dobæ oda cæmīnīpa tōō. Edæ wacā wīwa cæcā ate wædinque bitō wæætē piyænē cæbi waa īmāīmpa. Tōmengā babæ wapiticæ ānīnque ō ængā wædinque bitō piyænē cæbi waa īmāīmpa. ⁸ Incæte piyænē cæquēnēmīni incæ mīnitō wæætē babæ cædinque ō æmīni awædō. Wacā ingante wīwa cæmīni awædō. Mānōmaī cædinque mīnitō mīni pōnencabo incæ wæætē godō wæætē godō wīwa cæmīnīpa tōō.

⁹ Wīi ēñente cædāni īñōmō Wængonguī Awēnē Odeye nempo cōwē guīdāmaī inguīnāni inānīpa, ante mīnitō īñōmō ēñēnāmaī inte baī cæmīnīpa tōō. Mānōmaīnō ante pōnēnīnque mīni oda cæquinque ī apa cæmīni. Nōwo godōmenque āmo ēñēdāni. Pancadāniya towente cædānīpa. Pancadāniya guīquēnē, Wængonguī impa, ante nāni badōniñōmō gāānē ædæ wæænānīpa. Pancadāniya guīquēnē nānōogæ īnāmaī īñongante godō guēa mōwēnānīpa. Pancadāniya guīquēnē nāna onguīñæncaya incæ nāna gæncaya inte baī cædinque guēa monte quēwēnāpa. ¹⁰ Pancadāniya guīquēnē awēmō ænānīpa. Pancadāniya guīquēnē wacā māīncoo ante æīnente wædānīpa. Pancadāniya guīquēnē tī nāmæ bete quīdī quīdī dowænānīpa. Pancadāniya guīquēnē wacā ingante, Bitō wēnæ wēnæ īmīpa tōō, ante pīinīnque babæ ānānīpa. Pancadāniya guīquēnē babæ apænedīnque

ō ænānīpa. Mānōmaī wīwa cædōnāni inte tōmēnāni Wængonguī Awēnē Odeye nempo cōwē guīdāmaī inguīnāni inānīpa, āmo ēñēmaīmīnīpa. ¹¹ Mīni pōnencabo incæ pancamīniya mānōmaī ingāīmīni inte nōwo īñōmō æbānō imīni. Edæ mōnō Awēnē Itota Codito ēmōwo beyænque Wængonguī Ōnōwoca pōnō nā mēnongacā ate mīnitō tæiyæ waēmō ēwocate quēwēmīni adinque Wængonguī, Botō ayōmo mīnitō waa cæmīni imīnīpa, angampa.

Baonga quēwēnīnque mōnō tæiyæ waēmō entawente quēwēngæīmpa

¹² “Botō cæīnēnonque ante cæbo incæ Wængonguī wææ ānāmaī ingampa,” ante apænedānīpa. Incæte botō cæīnēnonque ante quēwēmo baī wīi botō waa quēwēngūnque incædōmoīmpa. Botō cæīnēnonque ante cæbo incæ Wængonguī wææ ānāmaī ingampa, ante nāni ānō īñōmō edæ nāwangā īmpa. Incæte botō cæīnēnonque ante cæbo baī botō nā cæyænte baī wæwēnguēnēmo inte awædō. ¹³ Ayæ cænguī īñōmō. “Mōnō cæncadē guīquinque cænguī æmōmpa. Ayæ adobaī mōnō cæncadē cæī cænguī beyænque ēnēmōmpa,” āmīnitawo. Īñæmpa cænguī incæ cæīnca incæ, Idæwaa īmpa, ante Wængonguī wo ēwēncæcāīmpa. Ayæ adobaī mōnō baō īñōmō wīi towēngūnque beyæ ēñamōmpa. Wæætē mōnō Awēnē beyænque mōnō baō ēñate quēwēmōmpa. Ayæ mōnō baō beyæ ante mōnō Awēnē pō guīcā ate tōmengā tōnō āawocaque baī ēwocamōmpa. ¹⁴ Īnīnque edæ mōnō Awēnē ingante Wængonguī tæēmō pīñænīnque angā nāni ōmæmōngā baī mōnō imonte adobaī tæēmō pīñænīnque angā nāni ōmæmōngūīmō īmōmpa.

¹⁵ Edæ, Codito quī, ante mōnō baō incæ godōmō ængā ate mōnō tōmengā baō baī ēñamōmpa, ante ēñēnāmaī imīnitawo. Īnīnque Codito baō baī ēñabo inte botō īñōmō edæ onquiyængā māīncoo beyæ ante nē towente quēwēngā tōnō edæ ædō cæte godō mōngūīmoo. ¹⁶ Edæ, Æcānō mānōmaī godō mōna tōmengā nē tote quēwēngā tōnō adocanque baī bacampa, ante ēñēnāmaī imīnitawo. Edæ, “Mēnaa īnīna incæ tōmēna wæætē

nāna gæncaya mōninque adocanque bai bacædaimpa,” ante apænete yewæmonte ongompa. ¹⁷ Ayæ mōnō Awēnē nempo quēwengā tōmengā iñōmō mōnō Awēnē tōnō āawocaque bai ēwocacampa cæmīnii.

¹⁸ Æcānō godō towēna tōmengā nāmā baō cædingā inte nāmā baō nānō wæwenguinque wēnæ wēnæ cæcampa. Wæætē yabæque mōnō wēnæ wēnæ cædō beyæ mōnō baō ædō cæte wæwenguī. Mānōmaī i iñinque mīnitō iñōmō wodii wīnonte towēnāmaī quēwēdāni. ¹⁹ Edæ Wængonguī tōmengā Tæiyæ Waēmō Ōnōwoca ingante mīnitonga da pōnongā pō guite owocampa. Iñinque mīnitō, Botō baō tōmēmo qui ēñabopa, ante ædō cæte āmīnii. Iñæmpa Wængonguī Ōnōwoca tæiyæ waēmō oncō bai ēñate apa ānewēmīnii. ²⁰ Wængonguī nangui pōni godonte ængā beyænque mīnitō baō tōmengā qui ēñapa. Mānōmaī beyæ mīnitō, Tōmānāni Wængonguī ingante waa ate ēñencædānimpa, ante cædinque mīnitō baonga quēwēninque edæ waa cæedāni.

7

Nāna gæncaya iñōna inte iīmaī cæbainapa

¹ Nōwo iñōmō mīni wædō ante yewæmōmīni ænte adinque botō iīmaī āmopa. Onguiñængā iñōmō onquiyængā ingante mōnāmaī ingā waa tobaimpa. ² Incæte, Wīi towēinente wæcæcāimpa, ante cædinque onguiñænāni tōmānāni, Botō nānōogængā incæcāimpa, ante mōnāni waa imaimpa. Ayæ onquiyænāni adobaī tōmānāni, Botō nānōogængā incæcāimpa, ante mōnāni waa imaimpa. ³ Onguiñængā iñōmō tōmengā nānōogængā āñongante, Botō nānōogæmi imipa, ante Ao āninque āāodenque moncæcāimpa. Ayæ onquiyængā adobaī, Botō nānōogæmi imipa, ante āninque tōmengā nānōogængā āñongante āāodenque moncæcāimpa. ⁴ Monte ate nānōogængā tōnō adocanque bai ba adinque onquiyængā wæætē, Onguiñængā qui, ante ēñadinque, Tōmēmo baonque ēñabopa, ante ædō cæte anguingāā. Ayæ adobaī onguiñængā wæætē, Onquiyængā qui, ante ēñadinque, Tōmēmo baonque ēñabopa, ante ædō cæte anguingāā. ⁵ Nānōogængā angā ēñente edæ Baa

ānāmaī. Pancaguēnēa Wængonguī ingante nangui apænecæte ante guēa Ao āninque nānēneto nānēnē wantæ iñō mōninque idæwaa. Edæ, Tatāna angā wacā ingante towēinente wæcæ wæ, ante wææ cædinque adodē iñōmō wæætē moncædaimpa.

⁶ Incæte mānōmaī āninque botō, Mīnitō botō ānō bai cōwē cæcæmīnimpa, ante wææ ānāmaī imopa. Wæætē, Mīnitō mānōmaī cæmīni waa imaimpa, ante mānīnonque ante apænebopa. ⁷ Onguiñænāni tōmānāni botō bai wēmō cædāni quēwēnāni bai waa incædōnimpa, ante pōnēmopa. Incæte Wængonguī pancadāniya inānite pōnō apænedinque, Bitō mōnāmaī inte adobique wēmō cæte botō beyæ cæcæbiimpa, āninque wadāni inānite, Bitō mōmi ate mīna gæncaya botō beyæ cæcæmīnaimpa, angampa.

⁸ Botō, edēningā ingante apænedinque ayæ owæmpoingā ingante apænedinque, Botō bai wēmō cæbi waa imaimpa, āmopa. ⁹ Incæte adocanque, Onquiyængā ingante cōwē moncæboimpa, ante wæcā adinque botō, Bitō cōwē moncæbiimpa, āmopa. Edæ tōmengā towēinente wædāmaī incæcāimpa, ante wææ āninque botō, Tōmengā godōmenque waa quēwencæcāimpa, ante ee abo moncæcāimpa.

¹⁰ Do mōningā ingante edæ botō iīmaī āmopa. Æ, wadō āmopa. Wīi botō āmopa. Mōnō Awēnē incæ iīmaī angampa. Onquiyængā incæ tōmengā nānōogængā ingante emō cæte godāmaī incæcāimpa, angampa. ¹¹ Incæte emō cæte gocā iñinque wæætē adodō pōninque adocā ingante mongā waa imaimpa. Wæætē adodō pōnāmaī ingā iñinque tōmengā ee quēwēninque wacā ingante cōwē mōnāmaī incæcāimpa. Ayæ onguiñængā incæ nānōogængā ingante pāmænte godāmaī incæcāimpa, ante mōnō Awēnē angampa.

¹² Wamīni imīnite guiquēnē mōnō Awēnē ānāmaī iñongā botō wæætē iīmaī āmopa. Onguiñænganque nē pōnengā inte, Botō nānōogængā pōnēnāmaī ingā incæ botō tōnō ee quēwengampa, ante adinque tōmengā nānōogængā ingante pāmænāmaī incæcāimpa. ¹³ Onquiyænganque nē pōnengā inte, Botō nānōogængā pōnēnāmaī incæ botō tōnō ee quēwengampa, ante

adinque tömengä nänöogængä ingante pämänaimai incäcäimpa. ¹⁴ Onquiyænganque nē pönengä iñongante tömengä adocanque nänö pönönö beyænque Wængongui, Mina gæncaya botö quimina iminapa, ante onguiñængä ingante edæ do ængampa. Ayæ adobai onguiñænganque nē pönengä iñongante tömengä nänö pönönö beyænque Wængongui, Mina gæncaya botö quimina iminapa, ante onquiyængä ingante adobai do ængampa. Wængongui mänömai cæcä beyænque minatö wënäni nani waa quëwenguinque Wængongui quinäni badäni. Wængongui wii mänömai cæcä bai minatö wënäni iñömö Wængongui quinäni inämai inte nöwadäni bai nänënë pæcädönänimpa.

¹⁵ Bitö adobique nē pönemi iñömite bitö nänöogængä pämente gocä wædinque ee abi gocæ. Mänömai emö cæte gocä adinque bitö tömengä ingante ñänönämai inte bai badinque ee quëwencæbiimpa. Edæ, Piyænē cæte quëwëdäni, ante Wængongui tömämö imonte aa pegacäimpa. ¹⁶ Bitö onquiyæmi tömëmi waa cæbi adinque bitö nänöogængä wabänö waa pönente quëwëmaingä, ante ædö cæte ëñëmi. Edæ onguiñæmi adobai tömëmi waa cæbi adinque bitö nänöogængä wabänö waa pönente quëwëmaingä, ante ædö cæte ëñëmi.

¹⁷ Incæte mönö Awënë, Iimai cæe, angä ate ëñente wædinque bitö tömengä nänö änononque ante cæte quëwencæbiimpa. Ayæ, Æbänö botö nänöogængä äyömo mönö Awënë aa pecantapa, ante pönëninque bitö mäniñedë bitö nänöogængä ägai bai adobi inte quëwencæbiimpa. Botö iñömö Codito ingante nani pönencabo wayömö nani godongämæ poncabo wayömö nani godongämæ poncabo weca gote apænedinque, Mänömai cæedäni, ante tömänäni inänite ante apænebopa.

¹⁸ Onguiñæmi imi do ëö togænimi iñömite Wængongui aa pecantawo. Ininque bitö, Bagäcä bai babote, ante cædämai incæbiimpa. Eö togæmi inte ee quëwëe. Wæætë ëö togænämai iñömite Wængongui aa pecantawo. Ininque bagäabi inte ee quëwëe. ¹⁹ Edæ ëö togæmö incæ

bagäamö incæ waomö önömonque imompa. Wii mäninö beyænque waa quëwëmö imompa. Wæætë Wængongui nänö wææ angainö ëñente beyænque waa quëwëmompä. ²⁰ Ininque, Æbänö engæñömo Wængongui aa pecantawoo, ante pönëninque bitö adobi inte cöwë quëwëe. ²¹ Bitö wacä beyænque cæte nē quëwëmi iñömite Wængongui bitö imite aa pecantawo. Ininque bitö nē cæbi inte piyænē cæte wädämai incæbiimpa. Incæte bitö imite ñimpo cædinque, Abæ tawænte goe, angä ëñëninque ee goe.

²² Waocä beyænque cæte nē quëwëmi iñömite mönö Awënë aa pecantawo. Ininque mönö Awënë incæ pönö ñimpo cædinque, Abæ tawænte goe, angä ëñëninque ee gote bai ewocabipa. Wæætë bitö waocä beyænque nē cæbi inämai iñömite mönö Awënë aa pecantawo. Ininque Codito nē aa pete ængä beyænque bitö cæte nē quëwëmi babipa. ²³ Edæ Wængongui tömengä nänö Tæiyæ Waëmö Wengä ingante godongä beyænque mönö wæætë tömengä quimö bagamöimpa, ante pönëninque minitö wæætë waocä beyænque nē cæte quëwëmini badämai iedäni. ²⁴ Iñänäni iimai ante cæedäni. Botö Wængongui Awënë nempo quëwëninque tömengä nänö änonque ëñente cæcæboimpa, ante cædinque minitö Wængongui nänö aa peyedë mini ägai bai adomini inte quëwëdäni.

²⁵ Ayæ, Mönämai inäni æbänö quëwenguënänäni inänii, ante mönö Awënë angampa diyæ ëñenguimoo. Incæte Wængongui waadete pönö apæncä ëñëninque botö nē ëñënömo bagaimo inte mä pönëninque ämo ëñëmaiminipa. ²⁶ Mönö wæwenguimämo oo pönö impa, ante pönëninque bitö, Nöwo botö nänöogængä ingante æbänö äte quëwëmoo, ante pönëninque ñöwo bitö ädö bai adobi inte cöwë quëwenguënëmi imipa, ante pönëmopa. ²⁷ Onguiñæmi ëñëmi, Bitö nänöogængä ingante do mömitawo. Ininque, Pämæncæboimpa, ante änämai ie. Wæætë wacä ingante ämopa. Bitö wëmö cæbitawo. Ininque, Botö nänöogængä, ante diqui diqui minämai imi waa imaimpa. ²⁸ Incæte ñöwo mömi incæ wënæ wënæ cædämai inte mömipa. Ayæ baquécä

adobaï do mongä incæ wënæ wënæ cædämaï inte mongampa. Incæte æcänö möna tömengä inguipoga quëwente nänö caate wæquinque mongampa. Mänömainö ante yewæmöninque botö, Minitö caate wädämaï incæminimpa, ante wææ ämopa.

²⁹ Iñänäni, Ñowopämo wii wantæpiyæ ingæimpa, ante wædinque ämopa. Edëningä nänö pönëno bai nê manguiwengä incæ adobaï pönengä bai waa imaimpa. ³⁰ Æcänö Ca ca wæda tömengä iñömö wii wæcä bai bacä ininque waa imaimpa. Æcänö Ca ca toda tömengä wii tocä bai bacä ininque waa imaimpa. Æcänö godonte æna tömengä ömæpocä bai bacä ininque waa imaimpa. ³¹ Inguipoga mönö cædö ante æcänö cæda tömengä mäninö ante änämaï inte bai cæcä ininque waa imaimpa. Edæ inguipoga quëwëninque mönö cædö oo pönï ewente baquinö angüenë.

³² Edæ minitö, Æbänö cæquimoo, ante wädämaï incæminimpa, ante botö iïmaï ante wææ ämopa. Nê wëmö cæcä guiquënë, Æbänö cæbo ate mönö Awënë waa toqingä, ante pönëninque tömengä mönö Awënë beyænque ante quëwengampa. ³³ Do möingä guiquënë inguipoga nänö quëwenguinö ante pönëninque, Æbänö cæbo ate botö nänöogængä waa toqingä, ante wæcampa. ³⁴ Ininque tæcæ tæcæ pönente cæcampa. Onquiyængä guiquënë owæmpoingä ingä incæ baquécä ingä incæ mönö Awënë beyæ ante pönëninque, Æbänö botö baö tæiyæ waëmö ëñaquimoo, ayæ, Æbänö botö önöwoca tæiyæ waëmö ewocaquimoo, ante cæcampa. Do möingä guiquënë, Æbänö cæbo ate botö nänöogængä waa toqingä, ante inguipogaque nänö quëwenguinö ante wæcampa.

³⁵ Mäninö ante botö wii minitö iminite wææ cæcæte ante ämopa. Wæætë minitö mini watapæ quëwenguinque ante botö, Mönö Awënë ingante æmæ pönënamäi inte nöingä cæte quëwencæminimpa, ante ämopa.

³⁶ Onguiñængä adocanque guiquënë, Botö wengä baquécä do picængä bacampa, ante adinque botö tömengä ingante godongüenëmo imopa, angä ininque tömengä nänö änö bai cædinque ee godongä

moncæcäimpa. Edæ mänömaï godöninque tömengä wii wënæ wënæ cæcä ingampa. ³⁷ Wacä guiquënë mïmöno ædæmö nö pönëninque, Botö wengä baquécä picængä bacä incæte botö piyænë cæte godönämaï incæboimpa, angampa. Ininque wadäni tömengä ingante wææ änämaï iñönäni tömengä, Tömëmoque botö äninö bai cæcæboimpa, ante nê ëñente pönëninque godönämaï ingampa. Tömengä adobaï waa cæcampa. ³⁸ Ininque tömengä wengä baquécä iñongante edæ, Moncæcäimpa, ante nê godongä guiquënë waa cæcampa. Wæætë wacä, Mönämaï incæcäimpa, ante wii godongä guiquënë tömengä godömenque waa cæcampa.

³⁹ Nänöogængä ayæ mïingä quëwëñongante onquiyængä iñömö tömengä tönö cöwë quëwenguënëngä ingampa. Wæætë nänöogængä wængä owæmpote ate tömengä abæ tawænte bai adocanque quëwengampa. Do owæmpoingä inte, Wacä ingante möinëmopa, angä ëñëninque minitö, Tömëna mönö Awënë nempo nana quëwencaya inapa, ante adinque möinente nänö wædö ante ee godömini moncædaimpa. ⁴⁰ Incæte botö, Owæmpoingä ee wëmö cædinque godömenque watapæ quëwëmaingampa, ante pönëmopa. Edæ Pabodo imo Wængongui Önöwoca tönö ääwocaque bai ewocabo inte mänömainö ante pönëmopa.

8

Mönitö wængongui cængui, ante wadäni nani cönönï ante

¹ Wadäni, Mönitö wængongui cængui impa, ante nani cönönincoo ante adinque minitö, Önonque cængui impa, ante abaimpa, äminitawo. Näwangä tömämö mini änö bai do ëñëmompä. Incæte, Tömëmoque do ëñëmopa, ante nê angä iñömö tömengä nämä ængö cæte bai cædinque wadäni inänite piinte bai cæcampa. Wæætë nê waadecä guiquënë wadäni inänite ængö cæte bai cædinque tömënanäni inänite waadete cæcampa. ² Waocä, Tömëmo do ëñëmopa, ante nê anewengä guiquënë tömengä nö nänö ëñënguënëno ante ayæ ëñënamäi inte cæcampa. ³ Wæætë Wængongui ingante nê

waadedäni inänite do againgä inte tömengä tömënäni inänite pönengampa.

⁴ İninque, Mönitö wængonguï cænguï impa, ante wadäni nāni cönönincoo ante ñöwo apænebo eñëedäni. Tömënäni nāni, Mönitö wængonguï impa, ante nāni cönöninca önoncaque impa, ante mönö do eñëmompā. Ayæ adobaï, Nāwā Wængonguï adocanque pönï ingampa, ante do eñëmompā. ⁵ Wængonguïdi nāni änönāni incæ awënëidi nāni änönāni incæ nanguï pönï inänipa. Nāwangä impa. Incæte tömënäni, Wængonguïdi inänipa, ante nāni änönāni inguipoga incæ öönædë incæ ongönāni incæte, ⁶ Wængonguï mönö Wæmpocä iñömö adocanque pönï ingampa. Öönæ incæ inguipo incæ öönædë ongoncoo incæ inguipoga ongoncoo incæ tömancoo incæ tömengä adocanque badonte aacä beyænque edæ ongoncoopā. Ayæ adobaï mönö tömengä nempoque quëwëmompā. Ayæ Itota Codito mönö Awënë adocanque pönï ingampa. Tömengä tönö godongämæ cædinque Wængonguï tömancoo badongacäimpā. Adocä Codito tönö godongämæ cædinque Wængonguï pönö cæcä ate mönö quëwëmompā.

⁷ Mäninö ante pancamonga guiquënë eñëmompā. Pancadäniya guiquënë nē pönënäni incæ mäninö ante eñënāmaï inänipa. İinäni Codito ingante tæcæ pönënäni iñömö tömënäni wëenëñedë, Mönitö wængonguï impa, ante badonte cönonte ædæ wæænte cægäināni inänipa. Ñöwo iñömö tömënäni Codito ingante tæcæ pönente ate, Wadäni wængonguï cænguï incæ cæninque wentamö mongænte wæcæ wæ, ante guïñente wädäni incæte do edæ cænänipa. Mänömaï Codito ingante æmæ pönënäni inte tömënäni wadäni nāni wængonguï cænguï cæninque nāmanque nāni æmæ pönënö beyænque nāmā apænte do wentamö entawënäni inänipa. ⁸ Incæte cænguï önonque iñonte mönö cænāmaï imö beyænque ædö cæte wiwa entawenguïi. Wæætë mönö cæmö beyænque ædö cæte waa entawenguïi. Edæ mönö imonte cænguï beyænque Wængonguï dicæ waa aquingäa.

⁹ Wængonguï wææ änāmaï ingä ad-

inque minitö do cæminitawoo. İñæmpa mänömaï cæmini adinque wadäni nē æmæ pönënäni adobaï cænāni İninque tömënäni tee tëwate baï oda cæbainänipa. Mänömaï impa, ante pönëinque minitö, Oda cædāmaï incædänimpa, ante cædinque ee cænāmaï imæwedäni ämopa. ¹⁰ Edæ, Mönitö wængonguïdi oncö impa, ante tömënäni nāni änincönë bitö nē eñëmi inte go guidinque cængömitawo. İñæmpa bitö mänömaï go guï cængömi adinque wacä nē æmæ pönengä guiquënë bitö cæbaï adobaï do cædinque nāmā apænte änāmaï inte tömengä nänö oda cæquinque do go guïte cæmaingampa. ¹¹ Codito tömämö beyæ wæninque nē æmæ pönengä beyæ adobaï wængacäimpā cæbii. Bitö tömënäni nāni wængonguï oncö ante, Önonconque impa, ante nē eñëmi inte do guïte cæmi beyænque bitö tönïñacä nē æmæ pönengä iñongante wapiticæ mäobi oda cæte wæwente bacampa töö. ¹² Mänömaï cædinque minitö tönïñadäni inänite minitö waadedāmaï inte wënæ wënæ cæminipa. Tömënäni nāni nāmā apænte æmæ pönënö ante wido cæte baï cædinque minitö mönö Codito ingante do wiwa cæmini iminipa. ¹³ İninque botö cæmo beyænque botö tönïñacä oda cæcä adinque botö, Tömengä oda cædāmaï incæcäimpā, ante cædinque baö incæ cöwë cænāmaï incæboimpā.

9

Codito nänö da godongainäni ümaï cæquënëñäni inänipa

¹ Botö Pabodobo æbänö imoo, ante minitö æbänö ante pönëmini. Edæ, Botö Itota nänö nē da godongaïmo imopa. Tömengä botö imote pönö ñimpo cæcä beyænque quëwëmopa. Mönö Awënë Itota ingante do agaïmo imopa. Minitö guiquënë, Pabodo mänömaï ingampa, ante pönëminiyaa. Ayæ mönö Awënë nempo quëwëninque botö Pabodobo tömengä beyæ apænebo eñëmini inte minitö wæætë, Pabodo apænecä beyænque mönitö nē pönëmöni imönipa, ante pönëminiyaa. ² Wadäni guiquënë, Pabodo ingante Awënë Itota da godönāmaï ingacäimpā, änänitawo. Tömënäni mänömainö ante tedewënäni

incæte mīnitō guiquēnē, Pabodo ingante mōnō Awēnē Itota nāwangā da godongacāimpa, ante apænequēnēmīni imīnīpa. Edæ botō pōnō apænebo beyænque mīnitō wede pōnēnīnque mōnō Awēnē nempo quēwēmīnīpa, ante edonque abaimpa.

³ Pancamīniya botō imote apænte ancæte ante cæyōmīni botō nāmā wææ cæcæte ante īīmaī āmopa. ⁴ Mōnatō apænemōna ēñēmīni incæte mīnitō īñōmō, Mīnatō eyepæ cæmīnāpa diyæ cænguī tōnō bequī ænguīmīnaa, ante wææ ante baī tēdemīni awædō. ⁵ Wadāni mōnō Awēnē Itota nānō nē da godongaināni īñōmō nāna gæncaya nāna gæncaya godānīpa. Mōnō Awēnē tōniñadāni adobāi Pegodo adobāi tōmēnāni nāna gæncaya nāna gæncaya godānīpa. Mōnatō imōnate guiquēnē mīnitō, Mīnatō godīnque nānōogængā ænāmaī inte goeda, ante wææ ante baī tēdemīni awædō. ⁶ Wadāni ōnompoca cædāmaī inte quēwēñōnāni botō tōnō Bedēnabee adomōnaque ōnompoca mōna cædō beyænque ænte quēwenguēnēmōna imōnatawo.

⁷ Tontadoidi guiquēnē dicæ tōmēnāni nāmā nāni godonte æinta beyæ quēwēnāniyaa. Ayæ æcānō yowementacoo mingā pæ inca ate nē mīningā īñōmō ædō cæte yowepæ ænte bedāmaī inguingāā. Edæ dobæ ade becampa. Cænīnāni nē aacā guiquēnē dicæ goōmæ yopænte ænāmaī inguingāā. Edæ do yopænte ænte becā apa ānewēmīni.

⁸ Mānōmainō ante apænedīnque botō waodānīque nāni ānōnō ante wīī āmopa. Wæætē Wængonguī nānō wææ angainō ante mānīnonque ante āmopa. ⁹ “Wagada onguīñængā nē cæcā inte tōmentapo æ yacæīmpa, ante āmi pīnā pīnā gāwate cægōñongā bitō tōmengā ōnōne wææ wodōnedāmaī inte ee abi cæncæcāīmpa,” ante Mōitee wodi wææ yewæmongacāīmpa. Īnīnque Wængonguī dicæ wagada beyænque ante pōnēnīnque mānōmainō ante angantawogaa. ¹⁰ Wæætē mōnō beyænque ante Wængonguī angampa, ante pōnengæīmpa. Nāwangā mōnō beyænque yewæmongatīmpa.

Waocā dicæ, Wadānīque cæncædānīmpa, ante onguīpoi mangæ mangæ tæñongāā. Wæætē, Mōnitō godongāmæ cæncæmōnīmpa,

ante mangæ mangæ tæñongampa. Ayæ tōmēmō nē æ yeyacā guiquēnē dicæ, Wadānīque cæncædānīmpa, ante æ yeyacāā. Wæætē edæ, Mōnitō godongāmæ cæncæmōnīmpa, ante pōnengā inte æ yeyacampa. ¹¹ Īnīnque, Mīnitō mīmōno cænte baī ēwocacæmīnīmpa, ante cædinque mōnatō tōmēmō mīnte pæ baī pōnō apænemōna do ēñente ēwocamīnitapa. Incæte mōnatō imōnate wæætē māincooque pōnōmīni wēnæ wēnæ ænguēnēmōna āmīnitawo. ¹² Īñæmpa wadāni inānite māincoo ee godōmīni ænānīpa. Mōnatō īñōmō godōmenque apænedīnque godōmenque ænguēnēmōna īñōmōnate mīnitō Baa āmīnitawo.

Mōnatō nē ænguēnēmōna incæte cōwē ænāmaī imōnāpa. Edæ, Mōnō Codito ingantedō ante watapæ apænedīnque mōnatō māincoo æmōna baī wadāni, Pabodoidi māincoo æncæte ante apænedapa, ante pīīnīnque wææ ancædōnānīmpa. Īnīnque, Wææ ānāmaī incædānīmpa, ante cædinque mōnatō, Cōwē ænāmaī incæmōnāīmpa, ante piyænē cæte ee apænemōnāpa. ¹³ Nāwā Wængonguī cænguī, ante ænte māmō cōñōnāni ongō adīnque Wængonguī oncōnē ñænæncōnē nē cædāni incæ pancaa ænte ade cænte quēwēnānīpa. Ayæ, Wængonguī quī, ante baō nāni iya tāīmpaa nē cædāni adobāi iya tāīmpaa nāni cōñōningā incæ pancacāā ænte cænte quēwēnānīpa, ante pōnēmīniyaa. ¹⁴ Mōnō Awēnē adobāi, Botō imotedō ante watapæ apænedāni ate nē ēñēnāni wæætē nē apænedāni inānite cænguī pædæ godōnāni ænte cænte quēwencædānīmpa, angampa. ¹⁵ Botō guiquēnē nē ænguēnēmō incæte cænguī ante ānāmaī inte cōwē apænebo inōmoīmpa. Ñōwo mīnitō imīnite yewæmōnīnque botō dicæ, Pōnōmīni æncæboīmpa, ante yewæmōmogaa. Cænguī ante ānāmaī inte botō Wængonguī beyænque apænebo ēñēmīnīpa, ante pōnēnīnque mānīnō beyænque tobopa. Mānōmainō ante todōmo inte botō, Gæwænte wædinque nāñe wæmo incæ wacā māincoo edæ ænāmaī incæboīmpa.

¹⁶ Itota Codito ingantedō ante apænebi ēñencædānīmpa, angā ēñente botō nē apænebo bagāimo inte edæ ædō cæte

wadō cæquimoo. Ìninqe botō mǎnōmǎinō ante nē apǎnedōmo inte edǎ, Tōmēmo waa cædinque apǎnebopa, ante ædō cæte tedequimoo. Edǎ botō Itota ingantedō ante mōni watapǎ apǎnedō ante wīi apǎnebo bai edǎ botō wæquinque incædōnimpa. ¹⁷Edǎ Itota Codito, Apǎnebi ēñencædānimpa, angǎ ēñēninque botō Ao ante watapǎ todinque apǎnebo adinque tōmengǎ, Waa cæbi ïmipa, ante eyepǎ pōnongǎ æmǎimopa. Wæætē, Wīi apǎneinente wæbo incæte botō cōwē apǎnebo ïninqe edǎ tōmengǎ nǎnō angainonque cæte apǎnebopa. Edǎ botō nē apǎnequēnēmo inte ædō cæte apǎnedāmaï inguimoo. ¹⁸ Ìninqe botō ēñente cæbo beyænque quīnō ænguimoo. Botō Itota Codito ingantedō ante watapǎ apǎnebo beyænque Wængonguï ïmaï pōnō cæcǎ æninque tocæboimpa. Botō apǎnebo beyǎ mīnitō nē pōnonguēnēmīni incæte pōnōnāmaï ïmīni ïninqe botō wæætē ænāmaï inte tocæboimpa.

¹⁹ Ayǎ waodāni wīi botō awēnēidi ïnānipa. Ayǎ botō wacǎ ingante nē cæbo ïnāmaï inte abǎ tawænte bai quēwēmopa. Incæte botō, Waodāni godōmenque nangui ïnāni Codito gāmænō poncædānimpa, ante cædinque tōmānāni ïnānite nē cæte quēwēmo bai botō baquinque nāmǎ pædæ godonte bai quēwēmopa. ²⁰ Godongāmǎ cæbo ate oodeoidi incæ Itota gāmænō poncædānimpa, ante cædinque botō oodeoidi nāni pōnēnō bai pōnēninque tōmēnāni nāni quēwēnō bai quēwēmopa. Pancadāniya, Mōitee wodi nānō wææ angainō ēñēmō beyænque mōnō quēwengǎimpa, ante pōnēninque mǎnīnonque ante ēñente cædānipa. Botō guiquēnē, Wīi Mōitee wodi nānō wææ angainō ēñēmō beyænque mōnō quēwengǎimpa, ante pōnēmopa. Incæte, Godongāmǎ cæbo ate mǎnīnonque ante nē ēñente cædāni adobaï Itota Codito gāmænō poncædānimpa, ante cædinque botō tōmēnāni ēñēnō bai adobaï ēñente bai cæbopa.

²¹ Wadāni guiquēnē Mōitee wodi wææ ante nānō yewæmongainta adāmaï ïnānipa. Botō guiquēnē, Wængonguï, ïmaï cædāni, ante nānō wææ angainō ante cōwē ēñēnguēnēmo inte botō

mōnō Awēnē Codito nempo quēwēninque tōmengǎ nānō angainō ante cōwē ēñente quēwēmopa. Incæte godongāmǎ cæbo ate nē adāmaï ïnāni adobaï Itota Codito gāmænō poncædānimpa, ante cædinque botō wadō pōnēmo incæ tōmēnāni adāmaï inte nāni quēwēnō bai adobaï inte bai quēwēmopa. ²² Ayǎ, Godongāmǎ cæbo ate æmǎ pōnēnāni adobaï Codito gāmænō poncædānimpa, ante cædinque botō tōmēnāni æmǎ pōnente quēwēnāni bai æmǎ pōnēmo inte bai quēwēmopa. Ìninqe, Godongāmǎ cæbo ate pancadāniya Codito gāmænō ponte quēwencædānimpa, ante cæcæte ante botō æbānō cæquimoo, ante wædinque ïmaï cæbopa. Wadāni nāni quēwēnō bai wadāni nāni quēwēnō bai wadāni nāni quēwēnō bai adobaï cædinque botō tōmānāni nāni quēwēnō bai adodō ante pōnēmo inte bai quēwēmopa. ²³ Edǎ, Itota Codito watapǎ pōnō cæcǎ beyænque tōmāmō tōmengǎ nempo quēwēninque godongāmǎ watapǎ tocæimpa, ante cædinque mǎnīnō wadāni nāni quēwēnō bai wadāni nāni quēwēnō adodō ante pōnēmo inte bai quēwēmopa.

²⁴ Edǎ nē quingǎ pogodo godāni ïñōmō tōmēnāni nāni pogodo goimancadē tōmānāni pogodo godānipa. Incæte adocanque quingǎ pogodo gocǎ inte tāno gote næ gongængǎ adinque edǎ, Bitō adobique quingǎ pogodo gote gānǎ cæbipa, ante pædæ pōnōnāni ængampa, amīnitawoo. Mīnitō guiquēnē quingǎ pogodo gote bai gānǎ cæte æncæte ante tǎi piñænte cædāni. ²⁵ Gānǎ cæcæimpa, ante cædinque tōmēnāni wadō nāni cæinēnō ante cædāmaï inte wæntæye ïnāmaï inte mǎnīnonque ante cædānipa. Tōmēnāni guiquēnē gānǎ cædinque poganta aquīi guīñē wænguīñabo nāni que cædintaque ænte wencacæte ante mǎnōmaï cædānipa. Mōnō guiquēnē poganta guīñē wænāmaï inta mōnō cōwē encaquinta æncæte ante mǎnōmaï cæmompā. ²⁶ Mǎnōmaï impa, ante pōnēninque edǎ wiñatǎ wiñatǎ guīdāmaï inte pogodo godāni bai botō tōingǎ gobopa. Ayǎ, Æcānō gānǎ cæcǎā, ante tiyǎmāa tamonte guēa cæda bai cædinque botō, Gānǎ cæcæboimpa, ante

tæimö piñænte nö cæbopa. ²⁷ Ìninqe godömenque godömenque apænebo eñenani ate tömëmo oda cædamaï incæboimpa, ante cædinque botö, Tæi piñænte quingæ gobawe, ante bai cædinque botö nämä incæ da godö da godö godoncæte ante nämä tæi tæi pante bai cæbopa.

10

Wængongui impa, ante nani cönöinca

¹ Botö töninamini iïmai ante apænebo eñeedani. Mönö wæmæidi wodi tömänani boguimä gänëñömö quëwente cægongadänimpa. Ayæ tömänani gawapæntibæ tæcæguedëmæ ti wææ tao gogadänimpa.

² Ìninqe æpænë guite bai cædinque tömënani Möitee wodi nempo tömänani nani quëwenguinque edæ boguimämodë godinque gawapæntibæ tæcægüidëmæ gogadänimpa. ³ Ayæ cængüi Wængongui öönædë da pönongä wææ nani cæ bai tömengä Önöwoca nänö apænedö adobaï eñente ëwocate quëwengadänimpa.

⁴ Wængongui Önöwoca apænecä eñëninque tömänani godongämæ bete bai ëwocate quëwengadänimpa. Edæ dicabo tæëmonca iñonte Möitee wodi ongonto tæi tæi äayongä æpæ ompade ba begadänimpa. Ìncayæ Ponguingä mönö Codito adobaï tæi piñænongå inte tömënani tönö godongämæ godinque tömengä Önöwoca ingante pönongä æninque tömënani ompade bete bai äawocaque bai ëwocagadänimpa. ⁵ Incæte wodo tömänani eñenamaï cædani adinque Wængongui wii togacäimpa. Edæ piinque wænöninque önömæca yabæque wido cæcä ñömængadänimpa.

⁶ Ìninqe, Tömënani wænæ wænæ cæcæte ante nani toinente wædö bai minitö wii adobaï toinente wæcæminimpa, ante mönö imonte wææ odömoncæte ante Wængongui tömënani nani toinënö beyæ ante pangä wængadänimpa, ante abaimpa.

⁷ Pancadäniya nani badonte cönöinca weca ædæ wæænte, Wængongui impa, ante babæ apænete towengadänimpa. Edæ, “Cæncæte ante becæte ante tæ contadinque tömënani Yæ yæ owempocæte ante ængæ gantidänitapa,” ante yewæmongatimpa cæminii. Minitö iñömö edæ, Wængongui

impa, ante nani babæ towengai bai wii adobaï cæedani. ⁸ Pancadäniya guiquënë nänöogængä inämai iñongante wiwa towengadänimpa. Edæ bæintitodee müido ganca inäni mänimpodani edæ mänömaï towënani inte adoönæque iñonte näñe wængadänimpa, ante adinque pönente wædinque mönö wæætë towënamaï ingæimpa. ⁹ Pancadäniya guiquënë, Quiëmë cæmö iñömonte Awënë dicæ pangäa, ante ancaa wænæ wænæ cædani adinque Wængongui tæntæ angä pocæ wængadänimpa. Ìninqe tömënani nani wænæ wænæ cægainö ante mönö Baa ante wænæ wænæ cædamaï ingæimpa.

¹⁰ Pancadäniya guiquënë Wængongui nänö pönöincoo adinque, Wængongui wii waëmö pönongä awædö, ante piinte tededani ate Wængongui anquedo në wido cædongä inongä inte tömënani inänite wænonte edæ wido cægacäimpa. Mänömaï cæcä ante adinque minitö, Pangä wæncæ wæ, ante wædinque tömënani nani piinte tedewengai bai adobaï piinte tededamaï imæwedani.

¹¹ Ìninqe, Wamini mini adobaï panquinque cæminipa, ante wææ odömoncæte ante pancadäniya inänite Wængongui mänömaï pangacäimpa. Ayæ iimämo wodo iinque bayonte quëwëmö iñömonte dodani mönö imonte wææ ancæte ante yewæmöninque, Wænæ wænæ cædani ate Wængongui æbänö pangacäi, ante aedani, ante wææ yewæmongadänimpa.

¹² Mänömaï impa, ante adimini incæte minitö, Mönitö nämä ongonte cöwë oda cædamaï incæmönimpa, ante pönëminitawo. Edæ mini ædocæ tæ go wæænguinque mänömaï anewëminipa töö. ¹³ Minitö wænæ wænæ cæinente wæminitawo. Edæ wii minitö adominique mänömaï wænæ wænæ cæinente wæminipa. Mönö wacabo mönö wænæ wænæ cæinente wæcabo tömämö imompa. Incæte minitö mini oda cæquinque wænæ wænæ cæinente wæmini adinque Wængongui mönö imonte cöwë në pönengä inongä inte, Oda cædamaï incæminimpa, ante wææ äninque edæ, Idæwaa, angampa. Ayæ wænæ wænæ cæinente wæmini incæte tömengä töö æmænte ængä beyænque minitö eyepæ inte

ate adiyæ næ gongæninque oda cædāmai inguimīni imīnīpa.

¹⁴ Mānīnō beyænque botō nē waademīni, āmo eñēedāni. Wængonguī impa, ante nāni babæ ante gōnōnīnca gomō adīnque ocæmæ wodii winōedāni āmopa. ¹⁵ Mīnitō ocai encadōmīni imīnīpa, ante adīnque botō mānōmainō ante yewæmōmopa. Īnīnque botō ānō ante, Nō intawo, babæ intawo, ante mīnitō nē encadōmīni inte apænte ante bai eñencæmīnīpa. ¹⁶ Mōnō pōnencabo owæta ænīnque Wængonguī ingante waa ate pōnente apænedīnque, Mōnō Codito wepæ tōmāmō beyæ godonte impa, ante pōnēnīnque mōnō pōnencabo iñōmō godongāmæ bemompa. Ayæ pāo mōnō pā ænō ænīnque, Mōnō Codito tōnō godongāmæ caate wængaīmō bai imompa, ante pōnēnīnque mōnō godongāmæ cæmompā. ¹⁷ Mōnō pāo adocaque ænīnque pā ænte godongāmæ cænīnque mōnō, Pāo adocaque ī bai mōnō tæiyæmō pōnī imō incæte adocabomō imompa, ante pōnengæimpa.

¹⁸ Idægoidi eñagāināni iñōmō, Wængonguī quī, ante baō ænte māmō ñōnōnīnque iya tānānīpa. Mānīī baō tōmēnāni nāni iya tāimpā ñōnōningā pancacāa ænīnque tōmēnāni, Baō Wængonguī quī ī bai mōnō adobai Wængonguī quīmō imompa, ante bai cædīnque godongāmæ cænānīpa, ante do eñēmīnīpa. ¹⁹ Mānōmai ānīnque botō æbānō āmoo, ante pōnēmīni. Nē eñēnāmai ināni nāni babæ cōnōnīnca iñōmō edæ nāwā Wængonguī ingampa diyæ tōmēnāni tōmengā quīnāni ināniyāa. Ayæ, Wængonguī cænguī impa, ante babæ nāni ānongā iñōmō nāwā Wængonguī cænguī impa diyæ tōmēnāni Wængonguī tōnō godongāmæ cænāniyāa. Botō iñōmō edæ mānōmainō ante dicæ āmogāa.

²⁰ Mānōmai ānāmai imo inte botō iīmai āmopa. Tōmēnāni, Wængonguī quī, ante babæ cōnōnīnque dicæ nāwā Wængonguī ingante godōnāniyāa. Īñæmpa wænæidi inānite godōnānīpa cæmīnī. Wænæ tōnō cædāni awædō, ante mīnitō gomō adīnque godongāmæ cænāmai imæwedāni, āmopa. ²¹ Edæ mōnō Awēnē bepæ godongāmæ bemīni inte mīnitō wænæidi bepæ ædō

cæte godongāmæ bequimīnī. Mōnō Awēnē cæimpāa tæ contate godongāmæ cæmīni inte mīnitō wænæidi cæimpāa ædō cæte godongāmæ tæ contate cænguimīnī.

²² Æmæ pōnente bai wænæidi nāni bepæ bemō adīnque mōnō Awēnē piinte badīnque pāmaingampa, ante eñēnīmō inte mōnō ædō cæte wænæidi bepæ bequimōō. Tæī piñænte wææ cæmompā mōnō Awēnē pānāmai inguingāa.

Ñi cæyænte gote bai quēwente waadete pōnengæimpa

²³ Mīnitō iīmai apænedīnque, “Mōnō quīēmē bai cæinēmo incæ Wængonguī wææ ānāmai ingampa,” āmīnitawo. Īñæmpa mōnō cæinēnonque cæte quēwēmō bai wīī mōnō waa quēwenguīnque incædōnīmpa. Ayæ adobai, “Mōnō cæinōnque cæmō incæ Wængonguī wææ ānāmai ingampa,” āmīnitawo. Īñæmpa mōnō cæinēnonque cæte quēwēmō bai wacā, Botō adobai cæbote, ante oda cæcædongāimpa cæmōō. Oda cædāmai incæcāimpa, ante wææ cædīnque mōnō Wængonguī nānō ānōnonque ante eñente cæcæimpa. ²⁴ Edæ, Mōnō æbānō cæte eyepæ ænīnque quēwenguīmōō, ante nāmā beyænque wædāmai inte wæætē wadāni beyæ ante pōnēnīnque, Tōmēnāni nōingā ante eñente waa quēwencædānīmpa, ante mōnō nanguī cæcæimpa.

²⁵ Īnīnque baō godonte æncæte ante nē mānāni nāni æī pancadē gote ænīnque mīnitō mīmō entawēmīni incæte, Baacā bai intawo, nāwāaquiringā intawo, ante apænte ānāmai inte guīñēnedāmai ade cæedāni. ²⁶ Edæ, Inguipo Wængonguī quī impa. Īnīnque inguipoga ongoncoo tōmancoo adobai Wængonguī quī inte nāwāaquincoo impa, ante yewæmongatīī apa guīñēwēmīnī.

²⁷ Ayæ nē pōnēnāmai ingā mīnitō imīnite, Pō cæedāni, angā eñēnīnque mīnitō goinēmīni inte godīnque tæ contayōmīni cænguī pædæ pōnongā adīnque ee ō ænte cæedāni. Baacā intawo, Nāwāaquiringā intawo, ante nāmanque apænte ānāmai inte ade cæedāni. ²⁸ Wæætē wacā tōmengā nānō mīmō pōnēnō beyænque ante wææ ānīnque, “Wadāni tōmēnāni, Mōnitō wængonguī

cænguī impa, ante do nāni godōni impa iñæmpa cæmīni,” angantawo. Mānōmāinō wææ angā ēñente wædinque mīnitō nē wææ āningā beyæ ante ayæ tōmengā nānō nāmā apænte æmæ pōnēnō beyæ ante edæ cænāmaī iedāni. Iñæmpa inguipo incæ inguipoga ongoncoo tōmancoo incæ mōnō Awēnē qui impa cæmīni. ²⁹ Wīi tōmēmīni mīmō entawēnō beyæ ante nāmā apænte ānīnque wæætē nē wææ āningā beyæ ante tōmengā nānō nāmā apænte æmæ pōnēnō beyænque ante mīnitō cænāmaī incæmīnīmpa.

Incæte bitō wabi iīmaī ante wæbitawo. “Mōitee wodi nānō wææ angāinō beyæ ñā cæyænte wægāimo bai inte botō ñōwo ñī cæyænte gote bai īmo adīnque wacā tōmengā nānō nāmā apænte æmæ pōnēnō beyænque ædō cæte botō imote apænte anguingā,” ante wæbitawoo. ³⁰ Ayæ, “Wængonguī ōnonque pōnongā ænīnque botō tōmengā ingante waa ate pōnente apænedīnque ade cæmo adīnque wadāni iñōmō edæ, Baacā incæ iñæmpa cæmīi, ante quīnante pōnō babæ ante tedewēnāni,” ante bitō wæbitawoo. ³¹ Incæte mīnitō cæmīni incæ bemīni incæ quiēmē bai cæmīni incæ mīnitō cædinō adīnque wadāni, Wængonguī ñāō apāite bai emōnongā ingampa, ante acædānīmpa, ante cædinque waa cæedāni. ³² Edæ mīnitō iñōmō, Waa cæmōni adīnque wadāni oodeoidi incæ guidiegoidi incæ Codito ingante nē godongāmæ pōnēināni incæ tōmānāni tee tēwadāmaī inte oda cædāmaī incædānīmpa, ante pōnēnīnque edæ waa cæedāni. ³³ Botō adobaī, Botō tōmēmō ænguīnō ante wædāmaī imopa. Wæætē, Botō waa cæbo adīnque wadāni Itota gāmænō pōnīnque tōmengā ængā beyænque quēwencædānīmpa, ante pōnēnīnque botō quiēmē cæbo incæ cōwē waa cæbopa.

11

¹ Mōnō Codito tōmengā nānō cæi bai botō adobaī cæbo adīnque mīnitō botō cæi bai adobaī cæbāimīnīpa.

Iīmaī cæte Wængonguī ingante apænecæīmpa

² Mīnitō botō imote cōwē pōnēmīni adīnque botō mīnitō imīnite waa adīnque apænebopa. Ayæ do pōnengāināni

nāni apænegāinō ante botō adodō ante apænebo ēñēnīnque mīnitō, Nāwangā impa, ante ēñente cæmīnīpa, ante adīnque botō mīnitō imīnite waa ate pōnēnīnque apænebopa.

³ Ñōwo iñōmō iīmaī āmo ēñēedāni. Mōnō Codito ñænængā inongā inte onguīñængā ingante nē angā ingampa. Waoda nāna gæncaya adīnque onguīñængā ñænængā bai inongā inte onquiyængā ingante nē angā ingampa. Mæmpo Wængonguī guiquēnē ñænængā pōni inongā inte mōnō Codito ingante nē angā ingampa. ⁴ Iñīnque onguīñængā iñōmō Wængonguī ingante apænedīnque ayæ, Wængonguī æbānō angāā, ante apænedīnque wencadāmaī apænecæcāīmpa. Edæ bee ocadīnque tōmengā nāmā ocabo ante guīñencate bai apænebaingampa.

⁵ Onquiyængā guiquēnē bee ocadīnque Wængonguī beyæ apænecæcāīmpa. Bee ocadīnque tōmengā, Wængonguī æbānō angāā, ante apænecæcāīmpa. Edæ bee ocadāmaī inte nāmā ocamō ante guīñencate bai onquiyængā apænebaingampa. Mānōmaī cædinque tōmengā nē ēñēnāmaī cædingā ingante nāni eō tocadīngā bai inongā inte encabaingampa. ⁶ Edæ onquiyængā bee ocadāmaī ingā inte godōmenque eō tocacā bai waa incædōnīmpa. Wæætē, Eō tocate wæcæ wæ, ante wæcā īnīnque tōmengā iñōmō edæ bee ocabaingampa. ⁷ Edæ onguīñængā ingante badōnīnque Wængonguī tōmengā nānō emōnō bai adobaī badongā emongacāīmpa. Iñīnque Wængonguī nānō ñāō apāidō bai adobaī emōnongā inte onguīñængā bee ocadāmaī incæcāīmpa. Onquiyængā guiquēnē onguīñængā nānō emōnō mānīnque emōnongā ingampa. ⁸ Onguīñængā ingante tāno badōnīnque Wængonguī ayæ onquiyængā ingante badoncæte ante onguīñængā iyapa ænte badongacāīmpa. ⁹ Edæ wīi onquiyængā beyæ ante onguīñængā ingante Wængonguī badongacāīmpa. Wæætē, Bitō onguīñængā beyæ quēwencæbiīmpa, ante onquiyængā ingante badongacāīmpa. ¹⁰ Iñīnque onquiyængā iñōmō, Botō nānōogængā beyæ Wængonguī botō imote

badongacäimpa, ante pönente wædinqe bee ocacæcäimpa. Ayæ, Bee ocabo adinqe Wængongui anquedoidi incæ, Botö nänöogængä nē angä ingampa, ante eñencædänimpa, ante cædinqe onquiyængä waa cædinqe bee ocacæcäimpa.

¹¹ Incæte mönō Awēnē nempo quēwēninqe onguiñængä dæ angä bai onquiyængä önonganque baquēnengainō anguēnē. Wæætē onquiyængä dæ angä bai onguiñængä wæætē önonganque baquēnengainō anguēnē. ¹² Edæ onquiyængä ayæ dæ añongante tömengä ingante badoncæte ante Wængongui onguiñængä iyapa æninqe badongacäimpa. Wæætē wēñængä onguiñængä ingante onquiyængä mangä beyænque eñacampa. Incæte Wængongui beyænque tömämö quēwēmompä.

¹³ Onquiyængä bee ocadämaï inte Wængongui ingante apænecä ininqe waa intawoo, ante mīnitö tömēmīni godongämæ pönēē cōninqe ædäni.

¹⁴ Edæ dodäni nāni cægai bai cæquēnēmö inte mönō iïmaï ante pönengæimpa. Onguiñængä doyænguï encadinqe guiñencate wæquēnengä ingampa, ante edonque ate pönēmaimpa. ¹⁵ Onquiyængä guiquēnē tömengä doyænguï pæ ininqe edæ waa impa. Edæ, Doyænguï bee ocacæbiimpä, ante onquiyængä ingante Wængongui badongä encacampa. ¹⁶ Botö mänömainö ante apænebo eñēninqe mīnitö pancamīniya wæætedö wæætē äinēmīnitawo. Iñæmpä botö äninö bai mönitö cōwē cæmōnipa. Ayæ Codito ingante godongämæ nāni pönencabo adobai Wængongui quināni inönāni inte edæ cōwē mänömaï cædänipa cæmīni.

Awēnē ææmæ ante bedinqe pancamīniya wīwa cæmīni

¹⁷ Mīnitö mīni waa quēwēninqe ante godongämæ ponguēnēmīni incæte mīni godōmenque wīwa quēwēninqe godongämæ pōmīni awædö. Ininqe botö, Waa cæmīnipa, ante ædö cæte anguïmoo. ¹⁸ Iïmainö ante ñōwo tāno apænebo eñēdäni. Codito ingante mīni pönencabo godongämæ pōninqe mīnitö iñömö mīni caipæ incæ wæætē godö wæætē godö tedewēninqe wacabo nänēnē

wacabo nänēnē bamīnipa. Ante apænedäni eñēninqe botö, Wabänö nöingä ante apænedänipa, ante pönēmopa. ¹⁹ Nāwangä impa, ante pönēmopa. Edæ, Ædänidö inänite Wængongui waa acää, ante edonque acæimpa, ante tömengä angä ate mīnitö mīni cabo wadö ante mīni cabo wadö ante tedemīnipa, ante awædö.

²⁰ Ininqe, Awēnē ææmæ impa, ante godongämæ pōninqe mīnitö wīi mönō Awēnē ææmæ bete bai cæmīni awædö.

²¹ Edæ mīni godongämæ cæñedē incæ mīnitö, Wadäni adobai cæncædänimpa, ante ee ongönämaï imīni inte tömämīni cænguï ade cæmīnipa. Pancadäniya ayæ gæwænte ongöñönāni edæ pancamīniya do tömo bete dowænte wæmīni awædö. ²² Iñæmpä oncö ömaamīni bai inte mīnitö tömēmīni oncōnē cænte wīi bemīni. Edæ Codito ingante mönō godongämæ pönencabo Wængongui quimö imö incæte mīnitö näēmæ piinte cæmīni awædö. Ömæpodäni incæ tömēnāni nāni guingo imonte wæquinque ante mīnitö pæ gompote ade cæmīnipa töö. Mänömaï cæmīni adinqe botö dicæ, Waa cæmīnipa, ämogaa.

Mönö Awēnē ææmæ

(Mäateo 26.26-29; Mäadoco 14.22-25; Odoca 22.14-20)

²³ Edæ mönō Awēnē botö imote pönö apænecä eñēninqe botö wæætē iïmaï ante mīnitö imīnite pönö apænetabopa. Mönö Awēnē Itota ingante Codaa nänö odōmonte godongaïönæ woyowotæ iñonte Itota päö æninqe, ²⁴ Wængongui ingante waa ate pönente apænedinqe päö pä æninqe angacäimpa. “Iï päö botö baö bai impa. Botö, Mīnitö quēwencæmīnipa, ante botö baö godonte bai cædinqe wæncæboimpä. Botö pä ænte pædæ pönömo bai mīnitö adobai iïncayæ ate botö imote ante pönēninqe godongämæ cæedäni,” angantapa.

²⁵ Mänömaï angä inque cænāni ate owæta adobai æninqe tömengä, “Botö wepæ iïmæ bai impa. Wængongui do apænedinqe, Botö pönö cæbo ate mīnitö Ao ämīni ininqe mönō godongämæ waa cæte quēwengæimpa, angacäimpa. Ñōwo adobai miïne äninqe apænebopa. Botö wepæ ante Ao ante æmīni inte mönō

godongāmæ waa cæte quëwengæimpa. Ìninqe mìnito wantæ wantæ iño bedinque botō ìmote ante pōnente becæmìnimpa.” Ante Itota angä begadänimpa. ²⁶ Ìninqe Itota nänō ponguionæ ganca mìnito mänōmaï pāo wæætē wæætē cæninque mänimæ bai wæætē wæætē bedinque, Mönō Awënë tōmāmō beyæ wængacäimpa, ante odōmonte bai cæmīni adinque wadāni eñencädänimpa.

Nöingä ante pōnëninque mönō Awënë æcæmæ becäimpa

²⁷ Mänōmaï i ìninqe waocä pōnënamāi inte mönō Awënë pāo ònonque cæninque Awënë nänō bequimæ ònonque bedinque tōmengä nänō wentamō mongænguinque mönō Awënë baō ante, Ònonque impa, ante pūinte bai cædinque tōmengä wepæ ònonque wido cæte bai cæcampa. ²⁸ Ìninqe, Æbänō entawëmōō, ante mìnito nāmā nāëmænte cōwä adinque nöingä ante pōnëninque pāo cæninque mänimæ bequënëmīni ìminipa. ²⁹ Edæ, Mönō Awënë baō bai impa, ante æcänō pōnënamāi inte cænte beda iñömō tōmengä nāmā nänō apænte pante wæquinque mänōmaï cænte becampa. ³⁰ Edæ mänōmaï cæmīni beyænque pancamīniya aquimīni badinque wæntæye bamīnipa. Pancamīniya wīi pōnente wæmīnipa. Ayæ wadāni æpodänimë mäninō beyænque do æmæwo wænänimpa.

³¹ Incæte mönō cōwä adinque nāmanque apænte äninque nöingä cæmō ìninqe mönō Awënë wæætē mönō ìmote apænte ante pūināmaï ìmaingampa. ³² Mönō Awënë mìnito ìminite apænte ante pūingantawo. Edæ mönō Awënë, Inguipogaque quëwënäni ìnänite apænte äninque botō päñedë mìnito wīi adobaï pante wæquimīni, ante wææ cædinque ñowo iñömō edæ, Eñenguënë quëwëedäni, ante wædænque pangä wæmompä.

³³ Botō tōniñamīni eñëedäni. Mänōmaï i, ante pōnëninque mìnito cæncæte ante pōninque ee ongōñömīni tōmänäni adoyōmō pōnāni ate godongāmæ cæedäni. ³⁴ Godongāmæ pōninque mönō wīi apænte panguënëmō bacäimpa, ante wææ cædinque mìnito nē gæwænte wæcä ingante ämīni oncönë täno cæncæcäimpa.

Ñowo mäninque ante yewæmōninque botō mìnito weca ìncayæ ate pōninque wadō mīni äninō ante godōmenque apænebo eñencæmìnimpa.

12

Wængonguï Önōwoca pönō cæcä æninque cæccäimpa

¹ Ìñänäni eñëedäni. Wængonguï Önōwoca mönō ìmote pönō cæcä ate tōmengä nänō pönōnoncoo eyepæ ænte ëwocadinque mönō æbänō cæquīi, ante eñëninque mìnito oda cädämaï incæmìnimpa, ante ñowo yewæmōmo aedäni.

² Doyedë iñömō mìnito eñënamāi iñömīnite wadāni, Mönitō miñæ pōedäni, ante æbämë cæte ænte mäodäni gogamīnimpa. Tömënäni miñæ mänōmaï go go cædinque mìnito do oda cædinque babetade nāni badōninca weca ædæ wææninqe, Mönitō wængonguï impa, ante cædinque quëwengamīnimpa. ³ Ìninqe mìnito ìminite botō ñowo, Eñenguënë quëwëminii, ante iïmaï ante apænebopa. Æcänō Wængonguï Önōwoca tönō äawocaque bai ëwocacä guiquënë tōmengä, Itota nänō panguinque nē wentamō mongængä ingampa, ante ædō cæte tedewenguingää. Ayæ wæætē Wængonguï Tæiyæ Waëmō Önōwoca tönō ëwocadāmaï ingä guiquënë tōmengä, Itota Tæiyæ Awënë ingampa, ante ædō cæte apænequingää.

⁴ Adocanque ingante wadō pönō cædinque Wængonguï Önōwoca wacä ingante wadō pönō cædinque tōmengä nänō pönōnincoo nënempote bai cæcä æninque mönō wadō wadō nē cæmō ìmompä. Wængonguï Önōwoca adocanque pōni ìnongä incæ mänōmaï wadō wadō pönō cæcampa. ⁵ Ayæ mönō Awënë adocanque pōni ìnongä inte waocä adocanque ingante, iïmaï cæe, äninque wacä ingante, Wadō bai cæe, angä eñëninque mönō tōmāmō wadō wadō nē cæmō ìmompä. ⁶ Ayæ Wængonguï adobaï adocanque pōni incæ tæi piñængä ìnongä inte waocä adocanque ingante pönō cæcä æninque tōmengä tæi piñængä badinque inte wadō cæcampa. Wacä ingante wadō pönō cæcä æninque

tömengä tæi piñængä badinque wadö wadö cæcampa. Ìninqe Wængonguï mänömaï wadö wadö pönö cæcä æninqe mönö tömämö eyepæ badinque cæmompä.

⁷ Wængonguï Önöwoca, Tömänäni waa quëwencædänimpa, ante cæedäni, ante tömämö ìmonte wadö wadö pönö odömonte apænecä ëñëninque tömämö mönö waa quëwenguinque ante godongämæ cæmompä.

⁸ Ìninqe Wængonguï Önöwoca pancadäniya inänite, Wængonguï nö nänö ëñënö ante apænecä ëñëninque tömënäni nê nö ante apænedäni badänipa. Ayæ adocä Önöwoca iñömö Wængonguï nänö cædö ante edonque odömongä adinque pancadäniya nê adinäni badinque, Wængonguï mänömaï cæcampa, ante nö apænedänipa.

⁹ Adocä Wængonguï Önöwoca apænecä ëñëninque pancadäniya, Wængonguï eyepæ pönö cæcampa, ante wede pönënäni inte tömënäni wede nani pönënö beyænque nanguï cædänipa. Ayæ Wængonguï Önöwoca adocanque inongä inte pönö cæcä æninqe pancadäniya wënæ wënæ inäni inänite gampote apænedäni ate waa badänipa. ¹⁰ Pancadäniya inänite

guiquënë Wængonguï Önöwoca godö cæcä æninqe tömënäni tæi piñænäni badinque nanguï pönö cædänipa. Wængonguï Önöwoca apænecä ëñëninque wadäni Wængonguï beyæ nê apænedäni inänipa. Ayæ wacä yewænte bai tedecä adinque, Wængonguï Önöwoca tedecantawo, wënæ tedecantawo, ante wæyönäni Wængonguï Önöwoca pancadäniya inänite edonque odömongä adinque tömënäni, Æcänö önöwoca nê tedecä, ante do ëñënänipa. Pancadäniya guiquënë Wængonguï Önöwoca tönö apænedinque wadäni nani tede bai nê tededäni inänipa. Ayæ iñäni wadäni nani tede bai tededäni ëñëninque pancadäniya Wængonguï Önöwoca apænecä ëñëninque, Nê tededäni æbänö ante tededänii, ante do ëñënäni inte wadäni inänite edonque pönö apænedäni ëñënänipa.

¹¹ Ìninqe adocä Önöwoca adocanque inongä inte tömengä nänö nö angai bai cædinque mönö ìmonte apænte æninqe, Pancaminiya iïmaï cæcæminimpa, wamini

iïmaï cæcæminimpa, ante pönö cæcä æninqe adocanque nänö cæquënënte ante wacä nänö cæquënënte ante edæ tömämö mönö cæquënënte ante cæmompä.

Adocabomö bai ìmompä

¹² Mönö baö adoyonque pönö ëñamö incæ mönö wii adodanque cæquënënte ante ëñamö inte mönö pæ pagænguincö watai watai ëñamompä. Edæ wadö mönö cæquënënte ante watai ëñadinque mönö wæætë wadö cæquënënte ante watai watai ëñamompä. Ìninqe watai watai nanguï mönö ëñacö iñömö adoyonque pönö impä. Ayæ Codito nempo quëwëninque mönö adobai adocabomö ìmompä. ¹³ Mönö adocabomö mönö tömämö baquinque Wængonguï Önöwoca mönonga pö guite owocampa. Ìninqe oodeocä incæ guidiegocä incæ wacä ingante nê cæcä incæ abæ tawænte ee gote bai nämä beyænque nê cæcä incæ mönö tömämö adotaca bete bai Wængonguï Önöwoca tönö äawocaque bai tömämö ewocampä.

¹⁴ Mönö baö adoyonque pönö ëñamö incæ mönö wii adodanque cæquënënte ante ëñamö inte mönö ëñacö watai watai nanguï ëñamompä. ¹⁵ Ìninqe mönö önöwa incæ, “Önompö ömæpobo inte botö waocä baö ömaabo ìmopa,” ante ædö cæte anguingää. Ìñæmpä mänömaï wæte tedecä incæ önöwa cöwë waocä baö ëñate ewocampä. ¹⁶ Ayæ mönö önömonca incæ, “Awinca ömæmömo inte botö waocä baö ömaabo ìmopa,” ante ædö cæte anguingää. Ìñæmpä mänömaï ante tedecä incæ önömonca cöwë waocä baö ëñate ëmoncacampä. ¹⁷ Ìñæmpä mönö baö tömäñö awincaque emömö bai edæ quimoncadö ëñenguënë. Ëñënamai incædömöimpä. Ayæ mönö baö tömäñö önömoncaque ëmoncamö bai quincadodö ongoncadoquënë.

¹⁸ Incæte Wængonguï iñömö edæ, Waomini mini cæquënënte ante eyepæ cæcæminimpa, ante badoncæboimpä, ante Wængonguï angacäimpä. Ìninqe tömengä nämä nänö angainö bai badöninque mönö pæ pagænguincö adoyonque baquinque ante wadö cæquënënte ante wadö cæquënënte ante tömäñö badongacäimpä. ¹⁹ Edæ

adodonque pōni mōnō cæquēnēnō ante Wængonguī badongā bai mōnō wadō mōnō cæquēnēnō ante quīdō pæ pagænte cæquēnēi. ²⁰ Wængonguī nānō nē badongaimō inōmō inte wadō mōnō cæquīnō ante watai wadō mōnō cæquīnō ante watai nanguī mōnō ēñacoo ēñamō incæ mōnō baō adoyonque pōni ēñamompa.

²¹ Mānōmaī ēñamō iñōmonte edæ mōnō awinca incæ ōnompō inte apænedinque, “Bitō dæ āmi bai botō tōmēmo eyepæ cæcædōmoimpa,” ante ædō cæte anguīi. Ayæ wæætē mōnō ocamō incæ ōnōwa inte apænedinque, “Bitō dæ āmi bai botō tōmēmo eyepæ cæcædōmoimpa,” ante ædō cæte anguīi. ²² Wæætē mōnō baō pancayonga pæ pagænāmaī i incæte māniñō ante mōnō godōmenque waa adinque, Mōnō quēwenguīñō impa, ante angæimpa. ²³ Wayō guiquēnē, Wīi waēmongā awædō, ante mōnō añō ante, Waa acædānimpa, ante cædinque waēmoncoo pōnō dadi ompogate māniñō beyæ godōmenque waa ate bai cæmompā. Wayō guiquēnē mōnō guīñēñate wædō ante, Wīi edonque acæimpa, ante pōnō bee ogate cædinque mōnō guīñēñayō beyæ godōmenque waa cæmompā. ²⁴ Waēmō mōnō ayō guiquēnē, Edonque acæimpa, ante bee ogadāmaī cæmompā.

Incæte, Adoyonque bacæimpa, ante mōnō baō wayō wayō badōninque Wængonguī, Wīi waēmongā, ante mōnō wæyō ante pōnēninque, Māniñō botō godōmenque waa abopa, ante badongacāimpa. ²⁵ Iñinque, Mīnitō baoncoo nāēmæ piñāmaī incæmīnimpa, ante cædinque Wængonguī mōnō baō adoyonque badongacāimpa. Wæætē mīnitō nāmā baoncoo incæ nāēmæ waadete waa cæcæmīnimpa, āninque Wængonguī tōmāñō waa acampa. ²⁶ Iñinque mōnō baō adoyōmonque nantate wæyōmō tōmāo wootæ wootæ nantate wæmompā. Ayæ wæætē adoyōmonque adinque, Waēmō impa, ānāni ēñente wædinque tōmāo watapæ tomompā.

²⁷ Mīnitō iñōmō, Wayō wayō ēñamō incæ adoyonque ēñamompā, ante do pōnēninque, Mōnō adobai nānēnē nānēnē ingaimō inte ñōwo wæætē Codito nempo quēwēninque

adocabomō imompa, ante pōnencæmīnimpa. ²⁸ Iñinque Codito ingante godongāmæ mōnō pōnencabo imō adinque Wængonguī angā ēñēninque iīmaī cæmompā. Yæcadomōni imōni iñōmō Codito nānō da godongaimōni imōnipa. Gao wæi ināni iñōmō Wængonguī beyæ nē apænedāni inānipa. Ayæ tæcægedēnāni ināni iñōmō nē odōmonte apænedāni inānipa. Wæænōmenque ināni iñōmō tæi piñænte entawente nē nanguī cædāni inānipa. Yæmiñæ gao ædinque ināni iñōmō Wængonguī Ōnōwoca tōnō āawocaque bai ēwocadinque iīmaī cædānipa. Pancadāniya, Wēnæ wēnæ ināni waa bacædānimpa, ante nē waa cædāni inānipa. Pancadāniya wadāni beyæ nē waa cædāni inānipa. Pancadāniya nē ānāni inōnāni inte awēnēidi inānipa. Ayæ yæmiñæ pōni ināni iñōmō wadāni nāni tede bai nē tededāni inānipa.

²⁹ Mānōmaī imō incæte edæ Codito nānō nē da godongaimō dicæ tōmāmō imongaa. Ayæ Wængonguī beyæ nē apæneimō dicæ tōmāmō imongaa. Nē odōmōnōmō dicæ tōmāmō imongaa. Nē tæi piñænte entawente nanguī cædōmō dicæ tōmāmō imongaa. ³⁰ Ayæ Wængonguī Awēnē pōnō cæcā incæte wēnæ wēnæ ināni nāni waa baquinque ante dicæ tōmāmō nē waa cæmongaa. Edæ wadāni nāni tede bai dicæ tōmāmō tedemongaa. Wacā mānōmaī wadāni nāni tede bai tedecā ēñēninque tōmāmō dicæ mōnō tededō adodō edonque apænemongaa. ³¹ Incæte mīnitō Wængonguī ingante, Bitō Ōnōwoca pōnō cæcā ate mōnitō eyepæ inte ate yæcado ongōnāni nāni cæi bai adobai cæcæte ante nanguī wæmōnipa, ante apænedinque nanguī cæedāni.

Mōnō waadete pōnente cæcæimpa, ante

Ñōwo iñōmō botō, Æbānō godōmenque waa pōni cæquīi, ante yewæmonte odōmōmo aedāni.

13

¹ Botō waodāni nāni tede bai tedebopa, āmīnitawo. Wængonguī anquedoidi nāni tede bai tedebopa, ante tomīnitawo. Iñæmpa mōnō wadāni inānite waadedāmaī inte tedemō iñinque ampoincade ōnonque ampoi bai imaimpa. Waadedāmaī inte

tedemö ïninqe adoyömö pönö wo pönö wo pönö wæcainta bai mönö adobai önonque tedewëmö ïmaïmompä.

² Wængonguï Önöwoca pönongä æninqe botö tömengä beyæ nê apænebo ïmopa, ante tomïnitawo. Waodäni nãni wê wodonte êñengainö tömänö ante edonque pönï ate êñëmopa, ante tomïnitawo. Waodäni nãni nangui êñënö ante adinqe tömänö ante êñëmopa, ante tomïnitawo. Edæ nê wede pönëmini inte mïnitö änanquidi incæ ämini êñente cabænte gotawo. Ìñæmpa mäninö tömänö waa pönï cæmö incæ mönö wadäni ïnãnite waadedämaï inte cæmö ïninqe wæætê önömonque edæ mönö babaimpa.

³ Ömæpodäni ïnãnite botö mäincoo tömää nënempote godömopa, ante tomïnitawo. Wængonguï beyæ ante cæyömote wadäni botö baö botö êñayö incæ iya tancæ cædäni ate wædinque botö piyænê cæbaimopa, ante mïnitö, Waa cæbopa, ante tomïnitawo. Ìñæmpa mänii tömää waa cædinque mönö waadedämaï inte cæmö ïninqe mönö waa cædö beyæ ænämaï ïmaïmompä.

⁴ Nê waadete pönengä ïñömö tömengä piinämaï inte edæ piyænê cædinque godö waadete cæcampa. Wadäni gomonga cædinque godömenque nangui ænäni adinqe nê waadecä wæætê waadete pönëninque piinte wædämaï inte piyænê cæcampa. Nämä nãno cædinö ante pönëninque nê waadete pönengä ïñömö, Botö gomonga cæbopa, ante tededämaï ingampa. Tömëmoque waëmö ïmopa, ante nämä waa adämaï ingampa. ⁵ Wacä tæcæ cæyongante nê waadete pönengä ïñömö, Tãno cæbote, ante wææ cædämaï ingampa. Nämä nãno æinënö ante cædämaï inte tömengä wadäni beyænque cæcampa. Wæætê wii ïñontobæ ængui bacampa. Wadäni wënæ wënæ cædäni ate wædinque tömengä nê waadecä ïnongä inte wæætê piyænê cæcampa.

⁶ Ìninqe, Wacä wënæ wënæ cæcampa, ante tededäni êñente wædinque nê waadete pönengä ïñömö mäninö ante todämaï ingampa. Wæætê, Wacä nöingä cæcampa, ante tededäni êñëninque tömengä watapæ pönï tocampa. ⁷ Æbämê cædäni

incæ nê waadete pönengä ïñömö piyænê cædinque tömänäni ïnãnite wææ gom-pocampa. Wæætê, Waa cædänipa, änäni êñëninque tömengä, Nawangä impa, ante do êñengampa. Æbämê ba incæte tömengä, Ayæ ate watapæ bacæimpa, ante cöwê pönëninque wæntædämaï inte ee cæcampa.

⁸ Mönö waadete pönëmämo ïñömö cöwê dæ badämaï ingæimpa. Wæætê Wængonguï ïincayæ ate, Idæwaa, angä ïninqe inguipoga tömengä beyæ mönö apænedö guiquënë edæ dæ angæimpa. Wadäni nãni tede bai mönö tededö incæ pæ wëenecæimpa. Inguipoga nangui adinqe mönö êñënö ante Wængonguï, Idæwaa, ancæcæimpa. ⁹ Nöwo mönö êñënö ïñömö pancaa êñëninque pancaa wæætê oda cæmompä. Wængonguï beyæ mönö apænedö ïñömö pancaa apænedinque mäninque apænemompä. ¹⁰ Ìninqe bayedê guiquënë Wængonguï nãno apænedö ædæmö êñëninque mönö nöingä pönï odömonte apænecæmöimpa. Oda cæte mönö êñënö ante, Idæwaa, äninque Wængonguï mäniñedê edæ mönö wii eyepæ apænete wædö ante, Idæwaa, ancæcæimpa.

¹¹ Botö ïñömö wëñæmoyedê wëñængä nãno tede bai tededinque wëñængä nãno ocai êñënö bai êñengäimo inte wëñængä, Ìimaï impa, ante nãno pönënö bai botö mäniñedê adobai pönengaboimpa. Nöwo guiquënë picæmo badinque wëñæmoyedê botö cægäinö ante ñimpo cæbopa. ¹² Awocawænta wëmö ate bai cædinque mönö ñöwo Wængonguï Önöwoca nãno odömönö ante edæ wii edonque amompä. Ayæ ate guiquënë mönö aw-incadö awinca edonque pönï acæimpa. Botö ñöwo pancaa adinqe oda cæte êñëmo ïmopa. Ayæ ate guiquënë Wængonguï pönö odömongä adinqe tömengä botö ïmote edonque pönï acä bai botö adobai tömää eyepæ pönï acæboimpa.

¹³ Ìninqe mönö entawënoncoo ante adinqe mënonque go adodonque mänimpodonque ayæ ongompä. Mönö wede pönënö ante ædæmö entawengæimpa. Watapæ bacæimpa, ante mönö pönënö ante ædæmö entawengæimpa. Mönö waadete pönënö ante ædæmö entawengæimpa.

Īnque mānimpodonque ayæ ongō incæte mōnō waadete pōnēnō iñōmō edæ ñænænō pōni i ĩnque mōnō mānīnō ante tāno ædæmō entawengæimpa.

14

Wadāni nāni tede bai æbānō tedequī, ante

¹ Īnque mīnitō, Nē waadete pōnēmō bacæimpa, ante mānīnonque ante pogodo gote bai nanguī cædāni. Ayæ adobai, Wængonguī Ōnōwoca mōnō imonte nānō pōnōnō bai mōnō eyepæ ēwocadinque cæcæimpa, ante nanguī æīnente wæedāni. Mānīnō Wængonguī Ōnōwoca nānō pōnōnoncoo ate adinque mīnitō, Wængonguī beyæ nē apænemō mōnō tāno adodonque ante bacæimpa, ante godōmenque æīnente wædinque cædāni. ² Edæ wadāni nāni tede bai æcānō tededā tōmengā wīi waodāni inānite apænecampa. Wængonguinque ingante apænecampa. Edæ tōmengā Ōnōwocaque tedecā ĩnque tōmengā ingante Wængonguī æbānō awēmō apænecāā, ante ædō cæte eñenguī. ³ Wængonguī beyæ nē apænecā guiquēnē waodāni inānite waadete pōnēninque iīmaī cæcæte ante apænecā eñēnānīpa. Mīnitō tæi piñæmīni mīni entawenguinque wede pōnencæmīnīpa, ante apænecampa. Ayæ, Wæwente quēwēmīni incæ mīnitō wampo bawēnente tæi piñænte cōwē cæcæmīnīpa, ante tōmengā Wængonguī beyæ ante pōnō apænecampa. ⁴ Wadāni nāni tede bai nē tedecā guiquēnē, Tōmēmo tæi piñæmo botō entawenguinque ante nanguī eñencæboimpa, ante nāmā beyænque ante tedecampa. Wængonguī beyæ nē apænecā guiquēnē Codito ingante nāni godongāmæ pōnencabo beyæ ante apænedinque, Mīnitō tæi piñænte mīni entawenguinque eñencæmīnīpa, ante apænecampa.

⁵ Īnque mīnitō tōmāmīni wadāni nāni tede bai apænemīni adinque botō wædænque tobaimopa. Wæætē tōmāmīni Wængonguī beyæ apænemīni adinque botō godōmenque watapæ tobaimopa. Wængonguī beyæ nē apænecā iñōmō ñænængā iñongā wacā tededō

nē tedecā guiquēnē wædangā ingampa. Incæte, Codito ingante mīni godongāmæ pōnencabo tæi piñænte entawencæmīnīpa, ante cædinque tōmengā wacā tededō tedete ate, Iīmaī ante tedetabopa, ante mīnitō tededō adodō ante edonque apænecā ĩnque tōmengā adobai ñænængā iñongā imaingampa. ⁶ Iñānāni eñēedāni. Wængonguī nānō wē wodōnō incæ tōmengā nānō nō eñēnō incæ tōmengā nānō nō odōmōnō incæ ante botō mīnitō weca pōninque odōmonte apænebo eñēninque mīnitō godōmenque pōnēmaīmīnīpa. Wængonguī iīmaī cæcæcāimpa, ante apænebo eñēninque mīnitō guīñente wædinque waa cæbaimīnīpa. Wæætē mīnitō weca pōninque botō wadāni nāni tede bai tedete apænebo bai mīnitō ædō cæte godōmenque nē pōnēmīni baquēnēmīni.

⁷ Edæ gobæ ongonte aa pedinque ōnonque ante pedāni eñēninque mōnō wæætē, Ædemē ante pedānīpa, ante ædō cæte eñenguī. Nē ampoinca ampodāni adobai āmotamīni ināmaī ōnonquedō ante ampodāni eñēninque mōnō, Ædemē ante ampodānīpa, ante ædō cæte eñenguī. ⁸ Ayæ tontado adobai, Wæætēdō wæætē cæcæimpa, ante todompeta nāni ancadeca we ōninque idiquibæ we ōngā ĩnque wadāni, Æbāmē cæcæte ante we ōngāā, ante wædinque oda cæte ee ongonte wæætēdō wæætē cædāmaī imāinānīpa. ⁹ Ayæ mīni cabo adobai wīi edonque apænemīni eñēninque wadāni, Æbāmē ante tedecāā, ante wædinque oda cæte wæbainānīpa. Woboyæ māmōque iñæmpa tedewēmaīmīnīpa.

¹⁰ Waodāni inguipoga tōmāo quēwēninque nanguī nāni tededoncoo tededānīpa. Nāwangā impa. Incæte wadāni nāni tededō wadāni nāni tededō tōmāā tedequīnō i ĩnque adodeque incæ ōnonque tedete ināmaī impa. ¹¹ Īnque wacā apænecā eñēninque botō, Æbānō ante tedecāā, ante eñēnāmaī imo adinque tōmengā wæætē, Wabi inte wīi eñēmīpa, ancædongāimpa. Tōmengā ingante botō adobai, Wabi inte botō tededō wīi tede-bīpa, ante ancædōmoimpa. ¹² Īnque mīnitō, Wængonguī Ōnōwoca pōnō cæcā æninque

mönö eyepæ ewocadinque cæcæimpa, ämīnitawo. Mänömainö äninque mīnitö, Wængonguī Ōnōwoca pönö cæcä ænte ewocadinque cædomö inte mönö Codito ingante mönö godongämæ pönencabo godömenque tæi piñænte entawengæimpa, ante pönëninque mīnitö, Mäninonque ante botö ewocate cæquinö ante pönongä æncæboimpa, ante täno æinente cæedäni.

13 Mänömaī beyæ wadäni nāni tede bai nē tedemīni iñömö mīnitö tönīñadāni adobaī eñencædānimpa, ante cædinque Wængonguī ingante iīmaī ante äedāni. Wængonguī eñëmi. Wadäni nāni tede bai do tededinque botö æbänö ante tedetawoo, ante bitö odömonte apænebi eñëmoe. Mänömainö ante apænebi eñëninque botö wæætë mōnitö tededö adodö ante edonque apænebo eñëninque mīnitö Wængonguī ingante apænete cæedäni. 14 Wadäni nāni tede bai tededinque Wængonguī ingante apænebo inte botö önōwocaque pönente apænedinque ocai ömædæcabo bai inte apænebaīmpa.

15 Mänömaī impa, ante adinque æbänö cæquimoo. Edæ önōwoca pönente apænedinque botö ocai adobaī eñente pönëninque Wængonguī ingante apæneboimpa. Ayæ Wængonguī ingante waa pönī apæneceæte ante önōwoca pönente ämotamīni äninque adobaī ocai eñente pönëninque ämotamīni ancæboimpa. 16 Bitö, Wængonguī ingante waa pönī cæcampa, ante önōwocaque pönëninque apænebitawoo. Iñæmpa Wængonguī ingante waa ate pönëninque önōwocaque pönente apænebi eñëninque wacä nē önonganque ingä guiquënë, Bitö æbänö apænebi, ante eñënamāi inte, Ædö cæte Ao anguimoo, ante wæbaingampa. 17 Bitö waa ate pönëninque önōwocaque waa apænebi eñëninque tömengä wæætë, Bitö æbänö ancæte ante tedebii, ante eñënamāi inte ædö cæte godömenque tæi piñænte entawengüingä. 18 Botö iñömö, Mīnitö wadäni nāni tede bai wædænque tedeyöminī botö godömenque nanguī tedebopa, ante Wængonguī ingante waa ate pönëninque apænebopa. 19 Incæte Codito ingante mönö pönencabo tönö godongämæ pöninque botö wadäni nāni tede bai tæne

tinco mīido ganca tedequī incæ wīi tededinque wæætë, Wadäni eñencædānimpa, ante mēnea pönī edonque apænedinque waa tobaīmpa.

20 Iñänāni eñëedäni. Tæcæ eñadāni iñömö wænæ wænæ mönö cæpāmo ante eñënamāi inānīpa. Mīnitö adobaī mäninö wænæ wænæ mönö cæpāmo ante eñënamāi inte bai pönëedäni. Wæætë ocai mönö pönëno guiquënë mīnitö mäninö ante wëñænānique wædænque nāni encadö bai wīi pönëninque wæætë picænāni nāni nanguī encadö bai adobaī nanguī encate pönëedäni. 21 Dodäni mönö Awënë beyæ ante wææ äninque iīmaī ante yewæmongadānimpa. “Wadäni nāni tede bai nē tededäni inānite botö ämo eñëninque tömënāni wæætë botö quīnāni inānite apæneceædānimpa. Incæte iñänāni guiquënë botö imote cöwë eñënamāi inguīnāni awædö, ante mönö Awënë angampa,” ante yewæmongatimpa.

22 Iñinque, Wadäni nāni tede bai tedemīni eñëninque nē pönënāni wædāmaī iñönāni nē pönënamāi ināni guiquënë mänömaī tedemīni eñëninque guīñente wæcædānimpa, ante cædinque Wængonguī önōwoca pönö cægacäimpa. Wæætë Wængonguī beyæ ante edonque apænemīni eñëninque nē pönënamāi ināni wædāmaī iñönāni nē pönënāni guiquënë do eñencædānimpa, ante cædinque Wængonguī önōwoca pönö cægacäimpa. 23 Codito ingante mīni pönencabo godongämæ pöninque tömämīni wadäni nāni tede bai wadäni nāni tede bai tedemīni adinque ayæ pönāni guiquënë nē eñënamāi ināni incæ nē pönënamāi ināni incæ æbänö anguīnāni. Mänömainonque tedemīni eñëninque tömënāni wæætë, Mīnitö ömædæcamīni inte önonque tedewëminīpa, ante wæbaīnānīpa.

24 Tömämīni wæætë Wængonguī beyæ edonque apæneyöminī nē pönënamāi ingä incæ nē eñënamāi ingä incæ ponte eñëninque tömämīni mīni apænedö beyæ tömengä, Botö wænæ wænæ cætabopa, ante wæbaingampa. Ayæ Wængonguī beyæ ämīni eñente wædinque tömengä, Botö näwangä wænæ wænæ cædomo inte wentamö mongænte awædö, ante nāmā apænte

ämaingampa. ²⁵ Ayæ tömengä mīmōno nānō wentamō wē wodōnincoo da tadonte ate bai edonque ate wædinqe tömengä ædæ wæænte guidōmēmæ ñongæninque Wængonguī ingante, Bitō adobique nē waa cæbi imipa, ante waa apænebaingampa. Ayæ mīnitō imīnite, Nāwangä Wængonguī Önōwoca tōnō äawocaque bai ewocamīnīpa, ante apænebaingampa.

Quiēmē cæmīni incæ nōingä pōnente ædcæmō cæedāni

²⁶ Mänōmaī īīninqe īñānāni, mōnō æbānō cæquīī. Wængonguī Önōwoca pōnō cæcā æninqe eyepæ inte mīnitō tōmāmīni godongāmæ pōninqe īīmaī cæmīni incæmīnīpa. Adocanque ämotamīni adodeque angä ingampa. Wacä odōmoncæte ante adodeque apænecä ingampa. Wacä ingante Wængonguī edonque odōmonte apænecä eñëningä inte tömengä adodō ante adodeque ante odōmonte apænecä ingampa. Wacä guiquēnē wadāni nāni tede bai adodeque tedecä ingampa. Tömengä æbānō ante tedecä, ante wacä do eñëninque mīnitō tededō wæætē edonque apænecä ingampa. Mänōmaī wade wade ante nē apænemīni inte mīnitō tōmāmīni, Godongāmæ tæī piñænte entawengæimpa, ante īīmaī cæte tedecæmīnīpa. ²⁷ Wadāni nāni tede bai tedeyongä wacä adotedæ wææ tededāmaī incæcäimpa. Māningä īīninqe tedecä ate wacä tedecæcäimpa. Ayæ wæætē wacä, Tedecæboimpa, angä Ao ämīni tedecä ate idæwaa. Mānimpodānique tedete ñīne cædāni adinqe wacä eñëninque, Æbānō ante tededānīi, ante mīnitō tededō edonque apænecä eñencæmīnīpa. ²⁸ Codito ingante mīni pōnencabo weca nē eñente adodō apænequēnengä dæ angä īīninqe edæ wadāni nāni tede bai nē tedeīnente wæcä īñōmō wæætē ee adinqe tededāmaī inte pæ wëenecæcäimpa. Tömengä nāmā incæ önōwēnēnque tedete Wængonguī ingante tedecæcäimpa.

²⁹ Wængonguī beyæ nē apænedāni adobai mengāa pōnī apænedāni ate idæwaa. Mānimpodānique apænedāni eñëninque mīnitō, Nō ante apænedānīi, idiqubæ ante apænedānīi, ante apænte

ante eñencæmīnīpa. ³⁰ Ayæ adocanque tæcæ apænee göñongä wacä nē eñëe congä ingante Wængonguī Önōwoca īñontobæ apænecä eñëninque tömengä, Botō apænecæboimpa, angä eñëninque nē apænedingä wæætē apocænē edæ äamonca eñëe concæcäimpa. ³¹ Edæ Wængonguī beyæ apænedinqe adocanque tāno apænete ñīne cæcä ate wæætē wacä wæætē wacä apænete ñīne cæcæcäimpa. Mänōmaī cædinqe mīnitō godongāmæ eñente badinqe wampo bawēnente ongoncæmīnīpa. ³² Wængonguī beyæ nē apænedāni īñōmō tōmēnāni nāmā önōwoca wææ āninqe önōwēnēnque wädāmaī inte ocai pōnente apænedānīpa. ³³ Edæ Wængonguī incæ nē gänē pōnēnongä inte Yæ yæ wapiticæ godō tededāmaī ingampa cæmīnīi.

Wængonguī quīnāni Codito ingante nāni pōnencabo tōmānāni wayōmō nāni cabo wayōmō nāni cabo godongāmæ pōninqe nāni cæī bai cædinqe, ³⁴ mīnitō adobai Codito ingante mīni pōnencabo godongāmæ pōñōmīni onquiyænāni īñānīte ämīni tededāmaī incædānīpa. Edæ, Apocænē eñēmæwedāni, ante Möitee wodi nānō wææ angai bai cædinqe onquiyænāni wæætedō wæætē ānāmaī inte onguīñænāni nāni ānonque eñëninque edæ eñëe concædānīpa. ³⁵ Æbānō ante apænedānīi, ante eñencæte ante wædinqe onquiyængä oncōnē gote ate angä eñëninque tömengä nānōogængä wæætē adodō apænecä eñencæcäimpa. Edæ Codito ingante mīni pōnencabo godongāmæ pōñōmīni onquiyængä īñōmō, Guīñēnete awædō, āninqe ee tededāmaī incæcäimpa.

³⁶ Īñæmpa, Wængonguī nānō angainō ante mīnitō adomīnique dicæ mā pōnēninque odōmōmīnitawogaa. Wadāni eñënāmaī īñōnānīte mīnitō dicæ adomīnique Wængonguī nānō apænedō ante eñēmīnitawogaa.

³⁷ Bitō, Wængonguī beyæ nē apænebo imopa, ämitawo. Wængonguī Önōwoca pōnō cæcä æninqe botō eyepæ ewocadinqe nē nangūī cæbo imopa, ämitawo. Mänōmaī ewocabi inte do eñëmi īīninqe bitō, Mōnō Awēnē nānō wææ angainō ante Pa-

bodo mäninonque ante yewæmongampa, ante, Näwangä impa, ante apænebaïmipa. ³⁸ Wæætë mäninö ante æcänö eñenāmaï ina tömengä ingante wæætë mönö eñenāmaï ingæïmpa.

³⁹ Iñänäni, Mänömaï impa, ante pönëninque mīnitö, Wængonguï beyæ apænecaïmpa, ante cæcæte ante cöwë nanguï cæedäni. Ayæ, Pancadäniya wadäni nāni tede baï apænedänipa, ante adinque mīnitö Baa änāmaï iedäni. ⁴⁰ Incæte quëwëmë cæmīni incæ mīni pönencabo mīni godongämæ watapæ quëwënguinque ante nöingä pönente ædæmö cæedäni.

15

Codito ñäni ömæmongacäïmpa, ante

¹ Nöwo botö tönīñamīni eñeedäni. Codito ingantedö ante botö do watapæ apænebo eñëninque mīnitö mänineque ante Ao ante wede pönëninque edæ tæï ongömīnitapa. Nöwo guiquënë mīnitö, Mänine ante æbänö intawoo, ante oda cædāmaï incæmīnimpa, ante botö adodö ante ædæmö odömönte yewæmömöi aedäni. ² Mänine ante watapæ apænebo eñëninque edæ mīnitö adode ante wede pönëninque tæï ongömīni inte edæ mänine beyænque quëwëmaïmīnipa. Wæætë mänine botö watapæ apænedö ante æmæ pönëmīni iñinque mīni pönënimāmo incæ önömāmoque pönī babaimpa.

³ Edæ mönö Codito tömengä nänö pönö cægäinö ante botö eñenö ante botö doyedë, Mänine ante mönö täno pönengæïmpa, ante pönö apænebo eñëmīnitapa. Nöwo wæætë, Eñencæmīnimpa, ante botö adode ante yewæmömö acæmīnimpa. Wængonguï angä eñente nāni yewæmongainö baï iñinque cædinque mönö Codito iñömö wënæ wënæ mönö cægäinö ante teëmë mongænte wæætë wængacäïmpa, ante impa.

⁴ Ayæ, Wängä ate tömengä baö iñi ö ænte mäo daga wengadänipa. Ayæ Wængonguï angä eñente nāni yewæmongainö baï cædinque Codito mëönaa go adoönæque iñonte do ñäni ömæmönöte mīingä quëwëngacäïmpa, ante mänine ante impa. ⁵ Ayæ ñäni ömæmönöte quëwëngongä inte tömengä dobæ Pegodo weca ponte a

ongongä acantapa. Ayæ ate tömengä nänö nē emīñængainäni, Dote, nāni änönäni weca dobæ ponte a ongongä adänitapa. ⁶ Ayæ ate mönö tönīñadäni quīniento ganca ayæ godömenque nanguï inäni godongämæ ongöñönäni tömengä tömënäni weca do ponte edæ a ongongä adotedæ agadänipa. Iñäni iñömö pancadäniya ñöwo do wængadänipa. Pancadäniya nanguï inäni nē agäinäni incæ ayæ mīinäni quëwënanipa. ⁷ Mäninäni adäni ate Itota wæætë Tantiago weca a ongongä agacäïmpa. Ayæ ate tömengä nänö nē da godongainäni weca adocä Itota ponte a ongongä agadänipa. Itota mänömaï cægacäïmpa, ante botö, Mänine täno pönengæïmpa, ante yewæmömömpa.

⁸ Botö guiquënë nē wæmpodingä baï inte wæyömöte tömengä ñöwo pönī botö weca a ongongä atabopa. ⁹ Edæ Codito tömengä nänö nē da godongaimö imo incæ botö wadäni tömengä nänö nē da godongainäni baï wīi adobai imopa. Edæ Itota ingante godongämæ nāni pönencabo inänite nē togænte pangaimö inte botö wädämo pönī imopa. ¹⁰ Edæ æbämë imo incæte Wængonguï waadete pönö cæcä beyænque botö mänömaï imopa. Edæ tömengä nänö pönö cædö ante botö wīi önonque cæcæte ante æmoïmpa. Wæætë wadäni wædænque cæyönäni tömengä waadete pönö cæcä æninque botö godömenque nanguï cætabopa. Incæte botö dicæ tömëmöque adoboque cæbogaa. Wæætë Wængonguï nänö waadete pönö cædö ænimo inte botö tömengä tönö cædinque nanguï cæbo imopa. ¹¹ Iñinque botö apænebo incæ tömënäni apænedäni incæ mönö Codito tömengä nänö pönö cægäinonque ante tömämöni apænemönipa. Mänineque ante apænemöni eñëninque mīnitö mänineque ante pönëmīnitapa.

Do wængainäni incæ ñäni ömæmoncædänipa, ante

¹² Iñinque, Codito do ñäni ömæmongacäïmpa, ante apænemöni eñëmīni incæte pancamīniya, Nē wængainäni dicæ ñäni ömæmönäniyaa, ante ædö cæte änewëmīnii. ¹³ Iñæmpa, Cöwë ñäni ömæmönāmaï inäni baï mönö Codito incæ adobai ñäni

ömæmönāmaī incædongäimpa. ¹⁴ Ayæ Codito ñāni ömæmönāmaī ingä bai tömengä waa pōni nānō pōnō cægainō ante quīnante apænequēnēmōnii. Edæ önonque pōni bacædōnimpa. Ayæ önonquedō ante apænemōni bai mīnitō mänine ante pōnēmīni incæ ædō cæte quēwenguēnēmīnii. ¹⁵ Mōnitō godōmenque Wængonguī ingante ante apænedinque, Codito ingante Wængonguī incæ angä ñāni ömæmongacäimpa, ante apænetamōnipa. Ìninqe, Nē wængaināni cōwē ñāni ömæmönāmaī inānipa, ante mīni ānewēnō iñōmō nāwangä i bai mōnitō Wængonguī nānō cægainō ante babæ wapiticæ ante edæ apæneædōmōnimpa. Edæ, Cōwē ñāni ömæmönāmaī inānipa, ante mīni ānewēnō nāwangä i bai Wængonguī, Ñāni ömæmōe, ante ædō cæte anguēnengä.

¹⁶ Ìñæmpa, Ñāni ömæmönāmaī inānipa, ante mīni ānewēnō nāwangä i bai Codito incæ adobai ñāni ömæmönāmaī incægacäimpa. ¹⁷ Ayæ Codito ñāni ömæmönāmaī ingä bai mīnitō mīni wede pōnēnō incæ önonque pōni pōnente incædōnimpa. Ìninqe wentamō mīni mongæñō ædō cæte ñā mēnongaquēnēmīnii. Mīni wēnæ wēnæ cædinō beyæ wentamō mongænte wæcædōmīnimpa. ¹⁸ Māninō ante mīni ānewēnō nāwangä i bai Codito nempo quēwēninqe do wængaināni incæ do mempoga wæninque ædō cæte quēwenguēnēñānii. Quēwēnāmaī incædōnānimpa. ¹⁹ Codito pōnō ængä beyænque mōnō adopoque wæninque wæætē wænāmaī quēwengæimpa, ante mōnō inguipogaque pōnēninque wæmo bai wadāni wædænque wæwēñōnāni mōnō godōmenque nanguī wæwenguēnē incædōnimpa.

²⁰ Incæte Codito dobæ ñāni ömæmongacäi apa ānewēmīnii. Edæ woadāni tānomō amiñayonte tā pedāni bai cædinque Wængonguī adobai, Do wængaināni inānite ämo ñāni ömæmoncædānimpa, ante cæcæte ante cædinque Codito Tānocä ingante do angä eñēninque ñāni ömæmongacäimpa. Nāwangä impa, ante ämo eñēmaimīnipa. ²¹ Edæ waocä incæ adocanque eñēnāmaī cæcä beyænque mōnō wænguimāmo pon-

gatimpa. Ayæ nē wænguēnēmō inte wæyōmonte Ñōwocä Waocä eñagaingä inte wæninque ñāni ömæmongä beyænque mōnō ñāni ömæmonte quēwenguimāmo adobai pongatimpa. ²² Edæ mæmæ Adäo wodi tömengä tōnō tömāmō godongämæ nē wænguēnēmō bagaimō inte mōnō tömāmō adobai Codito tōnō godongämæ nē ñāni ömæmonguimō bagamōimpa. ²³ Incæte to amiñayedē tānomō nāni tā pedōmō bai inongä inte mōnō Codito adobai Tānocä inongä inte edæ tāno ñāni ömæmongacäimpa. Codito nempo nē quēwēnōmō guiquēnē mōnō ayæmō inōmō inte edæ tömengä nānō ponguionæ iinque ba ate mōnō māniñedē ate nē ñāni ömæmonguimō imompa.

²⁴ Māniñedē ate inguipoga awēnē odeyēdi nempo ongoncoo incæ Codito tömancoo ö ænte ömæe ewencæcäimpa. Ñænænāni nāni ānōmāmo adobai tömāmāmo ömæe ewencæcäimpa. Tæi piñænāni nāni nanguī cædoncoo incæ Codito adocä incæ tömancoo wido cæcæcäimpa. Ayæ adocä nē Awēnē Odeye inongä inte tömengä nempo ongoncoo wæætē edæ Mæmpo Wængonguī nempo edæ pædæ godongä æninque Mæmpo Wængonguinque tömenganque adocanque Awēnē Odeye inongä incæcäimpa. Māniñedē ate edæ ñōwo mōnō quēwēmāmo iñōmō edæ iinque baquinō anguēnē. ²⁵ Incæte Wængonguī Codito ingante, Bitō imite nē piinte cægaināni tömānāni inānite mō gongæncæbiimpa, ante cædinque tömengä öñōwa gäänē nānō wææntodonganca edæ adocä Codito incæ māninō nānō iinque cæganca nē Awēnē inongä ingampa.

²⁶ Ayæ tömengä ingante nē piinte cædāni inānite æmæwo bæ tacä adinque adoque pōni mōnō wænguimāmo incæ ayæ ongō adinque Wængonguī, Mānimāmo dæ bacæimpa, ante māo ömæe ewencæcäimpa. ²⁷ Tömengä nempo Wængonguī tömancoo pædæ godongä æninque tömengä nē Awēnē bacæcäimpa, ante do yewæmongatimpa. Mānōmainō ante yewæmonte ongō incæte Wængonguī nē pædæ godōnongä inte ædō cæte, Nāmā pædæ godōmopa, anguingä, ante edonque

acæimpa. ²⁸ Ayæ ate Wængonguī Wengā incæ, Mæmpo Wængonguī botō nempo tōmancoo nē pædæ pōnongā inte tōmengā adocanque pōnī Tæiyæ Awēnē badinque tōmenganque tōmancoo ēnempocæcæimpa, ante cæcæcæimpa. Mänōmaī cæte ate tōmengā adobaī Mæmpo Wængonguī nempo quēwēninque Mæmpo nänō ānonque ante ēñente cæcæcæimpa.

²⁹ Pancadāniya edæ, Do wængaināni beyænque cæmōnipa, ante cædinque tōmēnāni beyæ æpænē guidānipa. Īninque, Nāni ōmæmōnāmaī ingæimpa, ante mīni ānewēnō nāwangā ī baī tōmēnāni æbānō cæquēnēnāni ĩnānī. Edæ, Nāni ōmæmōnāmaī ingæimpa, ante nāwangā ī baī edæ tōmēnāni nē wængaināni beyæ quīnante æpænē guīquēnēnānī. ³⁰ Ayæ mīni ānewēnō nāwangā ī baī mōnitō ĩñōmō quīnante mōni wantæ ĩñō wantæ ĩñō wodo wænguīnō ante wæquēnēmōnī. ³¹ Botō ĩmō ĩñō ĩmō ĩñō do wæwocabo ĩnōmō ĩmopa, ante nāwangā āmopa. Botō mōnō Awēnē Itota Codito nempo quēwēninque mīnitō ĩmīnite ante pōnēninque watapæ tobopa, ante nāwangā antawoo. Edæ botō tōnīñamīni ĩñōmīnite botō mānīnō ante nāwangā ānīmo inte, Wæwocabo ĩmopa, ante adobaī, Nāwangā ĩmpa, ante āmo ēñēmaīmīnipa. ³² Waomō mōnō æīnēnō æncæte ante botō epetoidi babæidi baī ĩnāni tōnō guēa wæætedō wææte cæbo baī ōnonque cæte incædōnīmpa. Edæ, Do wængaināni nāni ōmæmōnāmaī incædānīmpa, ante nāwangā ī baī botō, “Īmō ate mōnō æmæwo wænguīnque ante cænte bete tocæimpa,” ante nāni ānewēnō baī ante ee quēwencædōmoīmpa.

³³ Īñæmpa mänōmainō ante tedewēnāni ēñēninque mīnitō wææte oda cædāmaī ĩmæwedāni. Edæ do yewæmōninque, “Wīwa cædāni tōnō guēa cædinque bitō adobaī wapiticæ quēwēnguīnque godongāmæ cæbipa.” ³⁴ Ante wææ ānāni ēñēdāni. Edæ, mīnitō wēnæ wēnæ cæmīni adinque Wængonguī ingante ante ēñēnāmaī ĩnāni ĩñōmō oda cæbainānipa. Mänōmaī beyæ mīnitō guingo ĩmonte wæquēnēmīni ĩnōmīni inte nō cæte quēwēninque edæ wēnæ wēnæ cædāmaī ĩedāni.

Do wængaināni ĩmaī nāni ōmæmoncædānīmpa, ante

³⁵ Bitō, Do wængaināni æbānō cæte nāni ōmæmonguīnānī, ante āmitawo. Ayæ, Nāni ōmæmōninque mōnō baō quīnō baī ēñate ponguīmōō, ante ēñencæte ante wæbitawo. ³⁶ Īñæmpa ōnonquedō ante wæbi awædō. Edæ waocā tōmēmō quiyacā ate yabæque nōmāate ate tā bocate pædimō baī mōnō baō adobaī inte nōmængæīmpa. ³⁷ Īñæmpa todigo incæ wawæ incæ bitō, Tā bocate pæcæīmpa, ante cædinque do pædiwæ tōmēwæ ænāmaī inte tōmēmonque ænte godō quiyabi ate tā bocate pæpa. ³⁸ Incæte, Tōmēwæ æbānō ĩwæ pæquīwæ, ante nāmā nänō angainō baī cædinque Wængonguīnque pōnō badongā ate tā bocate pæpa. Wamō tā bocate pædinque æbānō incaquīi, wamō æbānō incaquīi, ante do ēñengaingā inte Wængonguī pōnō badongā ate wainca wainca incapa.

³⁹ Tōmāñō baō wīi adoyō baī ēñōmpa. Mōnō waomō baō wayō ēñamōmpa. Ōōingāidi baō wayō ēñadānipa. Ayamōidi baō wayō ēñadānipa. Gæyæidi baō wayō ēñadānipa. ⁴⁰ Ayæ ōönædē quēwēnāni wayō mongæñōnāni ĩnguipoga quēwēmō ĩñōmō wayō ēñamōmpa. Īninque ōönædē quēwēnāni waa nāni ēñadō wayō ĩñonte ĩnguipoga quēwēmō waa pōnī mōnō ēñayō guīquēnē wīi adobaī ēñamō ĩmōmpa. ⁴¹ Woyowotæ apāicā ĩñōmō itædē nænque nänō apāi baī wīi apāicampa. Pōnōmenque pōnī apāicampa. Nēmōidi guīquēnē wadō baī apāidānipa. Edæ nēmōidi incæ pancadāniya nāmōināni inte wædænque apāiyōnāni pancadāniya waa pōnī ēmōnāni inte guīnæ nanguī apāidānipa.

⁴² Mānīi quiyadīmō yabæque nōmāate ate tā bocate pædimō baī mōnō adopoque wæmō ate mōnō baō adobaī aquīñō inte nōmæmpa. Wææte ĩncayæ ate mōnō baō nōmāadāmaī ĩnguinque wææte nāni ōmæmonguīmō ĩmōīmpa. ⁴³ Ayæ mōnō guīñēñate wægañō wido cæte ate mōnō waa pōnī ēñāquinque nāni ōmæmongæīmpa. Edæ mōnō aquīñō wido cædinque mōnō tæi pīñæñō baaquinque nāni ōmæmongæīmpa. ⁴⁴ Edæ ĩnguipogaque quēwēninque mōnō ēñayō wido

cæte ate mōnō ōōnædē pōnīwoca ēñate ēwocadinque mōnō waiñō pōnī ēñate ñāni ōmæmongæimpa.

⁴⁵ “Adāō wodi tānocā īnongā inte nē ēwocacā badinque quēwengacāimpa,” ante yewæmongatimpa. Ayæ adobaī Adāō wodi baī Nōwocā mōnō Codito incæ nē ēwocacā inte quēwēninque mōnō īmote pōnongā æninque ēwocate quēwēmompā.

⁴⁶ Inguipogaque nē quēwengā guiquēnē tāno pongacāimpa. Mempoga nē Quēwēnongā guiquēnē ñōwoque ayæ pōningā inte nē Quēwengā ingampa. ⁴⁷ Tānocā ingante badoncæte ante Wængonguī onguipoi guidimōi æninque badongacāimpa. Nōwocā guiquēnē ōōnædē quēwengaingā inte pongacāimpa. ⁴⁸ Inguipogaque ante quēwēnāni guiquēnē inguipoga tāno quēwengaingā baī adobaī īnānīpā. Ōōnædē mōnō goquincabo guiquēnē ōōnædē quēwente Pongaingā baī adobaī īmompā.

⁴⁹ Inguipogaque quēwengā nānō ēñayō baī mōnō adobaī ñōwo ēñamompā. Īncayæ ate guiquēnē ōōnædē quēwente nē Pongaingā nānō ēñayō baī mōnō adobaī ēñaquimō īmompā.

⁵⁰ Botō tōnīñamīni apænebo ēñēedāni. Adopoque ēñagaingā inte Wængonguī Awēnē Odeye nempo ædō cæte guite quēwenguingāā. Nē aquīñō ñōmænguīñō ēñadongā incæ tōmengā mempoga ēñadāmaī inte ædō cæte baō ñōmāadāmaī īñō ēñaquingāā. ⁵¹ Mōnō waocabo wēēnēñedē mōnō ēñēnāmaī ingainō ante botō tæcæ ēñēnīmo inte ñōwo edonque apænebo ēñēedāni.

Wīi tōmāmō wænguīmō īmompā. Incæte tōmāmō īñontobæ wayonque ēñaquimō īmompā. ⁵² Edæ todompeta mōnō ancadeca æmæwo pōnī nanguī ōōnāni ate mōnō awīnca adopoque bomō cæyōmonte īñontobæ bacæimpa. Edæ todompeta tæcæ we ōōñōnāni do wængaināni incæ ñōmænāmaī nāni inguinque ñāni ōmæmoncædānīmpā. Māniñedē edæ wayonque pōnī mōnō tōmāmō ēñacæmōimpā. ⁵³ Edæ mōnō baō mōnō aquī ñōmænguīñonque wido cæte ate mōnō ñōmænāmaī inguīñonque ēñaquinque impā. Ayæ mōnō aquī wænguīñō

ēwente ate waiñonque mōnō wænāmaī inguīñō ēñacæimpa. ⁵⁴ Mōnō ñōmænguīñō ēñamō adinque Codito waiñō pōnongā ænte ēñadinque mōnō baō ñōmænāmaī ingæimpa. Ayæ mōnō wænguīñō ēñamō adinque tōmengā mōnō wænāmaī inguīñō ante waiñō pōnī pōnongā ēñacæimpa. Mānōmaī cæcā ate dodāni nāni yewæmonte angainō tōmāā īnque cæte ingæimpa. Edæ īmaī ante yewæmongadānīmpā. “Mōnō Codito nē tæi piñænongā inte mōnō wænguīmāmo godō ōmæe ēwēninque gānā cæcæcāimpā. ⁵⁵ Īninque ōnonque bagaī inte mōnō wænguīmāmo īñōmō dicæ tæi piñænte cæpa æmæwo wænguīmōō. Mōnō wænguīmāmo incæ dicæ daapa ēmiñæmpā guī wænguīmōō.”

⁵⁶ Mōnō wēnæ wēnæ cægāinō beyænque mōnō daapa guite baī pante wæquinque nē wænguēnēmō ingamōimpā. Ayæ ēñēnāmaī cæyōmonte Wængonguī wææ angā beyænque mōnō nē pante wæquinque nē wænguēnēmō bagamōimpā. ⁵⁷ Wæætē mōnō Awēnē Itota Codito gānā cædinque mōnō wænguēnēmāmo ante godō ōmæe ēwengā beyænque Wængonguī mōnō īmonte pōnō cæcā ate gānā cæmōimpā. Īninque, Mānōmaī waa pōnī cæcampa, ante pōnēninque mōnō Wængonguī ingante waa ate pōnēninque apænecæimpa.

⁵⁸ Mānōmaī beyæ botō nē waadete tōnīñamīni ēñēedāni. Mīnitō, Mōnō īmonte bæ tadāmaī incædānīmpā, ante adiyæ tæi ongonte wææ cæedāni. Edæ, Mōnō Awēnē nempo quēwēninque nanguī cæmō īninque mōnō cædinō īñōmō edæ cōwē ēwēnāmaī ingæimpa, ante pōnēninque mīnitō mōnō Awēnē beyæ ante cōwē godōmenque gomonga cæcæmīnīmpā, āmopā.

16

Wængonguī quīnāni beyæ īmaī cæte godongæimpa, ante

¹ Nōwo īñōmō mīnitō godonte æinta ante, Wængonguī quīnāni beyæ impā, ante mīni godonguēnēnō ante apænebo ēñēedāni. Gadatiabæ īñōmō Itota ingante godongāmæ nāni pōnencabo īnānite do ānimo inte botō mīnitō īmīnite adobaī ante īmaī āmo cæedāni. ² Mīnitō tōmāmīni, Botō

ænincoo æpodö i, ante adinque, Pancaa Wængongui quinäni qui baquimpa, ante cædinque Wængongui itæde iñö pancacooga nänënë cö cædinque wacä Wængongui itæde iñö pancacooga nänënë cö cædinque ee mäedäni. İninqe wæætë wæætë cö cæte eyepæ mämîni adinque botö mînitö weca ponte adinque, Godömenque cöo cæedäni, ante änämaï inguënëmo imopa. ³ Edæ botö mînitö weca ponte añömo mînitö, İinäni nö cædönäni inte mönitö godönincoo ænte mäo godoncædänimpa, ante odömöminî adinque botö wæætë tömënäni beyæ cadota ante yewæmoncæboimpa. Ayæ cadota tönö mînitö pönönoncoo tönö botö iinäni inänite pædæ godöninque da godömo ænte mäo Eedotadëe gote nënempocædänimpa. ⁴ Ayæ Wængongui Ao angä ate botö tömënäni bai adobaï gobo adinque tömënäni botö tönö godongämæ edæ gobainänipa.

İimai gocæboimpa, ante

⁵ Cöwë Mäatedöniabæ wodo pænta gocæboimpa. İninqe mämîmæ täno wodo pænta gote ate botö ayæ wæætë mînitö weca poncæboimpa. ⁶ Ayæ mînitö weca pöninque wabänö wantæ iñö quëwente goquimo. Æbämë cæcæboimpa. Edæ, Quëwente ate ædömë gomonga gocæ cæyömo mînitö botö tönö godongämæ waa cæmîni ate waa gocæboimpa, ante pönëninque botö wabänö godömenque quëwëninque tömäa mönö yoguiintedæ incæ mînitö weca quëwencæboimpa. ⁷ Edæ, Botö wodo pænta gocæ cædinque mînitö weca ñöwo pömo bai wantæ iñö ëñaquinque incædönimpa, ante pönente wædinque botö wii ñöwo pöinëmo imopa. Wæætë, Wængongui Ao angä ate botö iincayæ ate mînitö weca ponte wantæpiyæ quëwëninque tocæboimpa, ante pönëmopa. ⁸ Wæætë möni oodeocabo ææmæ Pentecotee möni änömæ iinque beganca botö Epeto adoyömö quëwencæboimpa. ⁹ Edæ Epeto iñömö quëwënäni wede pönente bacædänimpa, ante botö guiite apænequinque odemö bai wi ænete bai ongö abopa. Ayæ adobaï, Në piinte cædäni nanguï inäni mæ ongönänipa, ante adinque botö adoyömö quëwëninque nanguï wææ apænecæboimpa.

¹⁰ Timoteo mînitö weca wabänö ponguingä. Pongä ininqe mînitö wæætë, Mönitö weca guiñenämaï inte quëwencæbiimpa, äninque tömengä ingante waa cæedäni. Edæ botö në cæbo imo bai tömengä adobaï Wængongui beyænque në cæcä ingampa. ¹¹ İninqe, Timoteo önonque cæcampa, ante tedewënëmaï inte mînitö tömengä ingante Baa änämaï incæmînimpa. Wæætë waadete cædinque da pönömîni ate tömengä piyænë cæte botö weca adodö poncæcäimpa, ämopa. Edæ, Mönö tönöñadäni tönö Timoteo godongämæ poncæcäimpa, ante pönëninque botö wänö cömopa.

¹² Botö mönö tönöñacä Apodo ingante guiquënë, Mönö tönöñadäni tönö bitö coodintoidi weca ëñate pöe, ante ancaa ämo incæte tömengä wæætë, Ñöwo wii goquimo, ante Baa angantapa. Incæte Wængongui Ao angä ate tömengä iincayæ ate mînitö weca cöwë poncæcäimpa.

Waa quëwencæmînimpa, ante

¹³ Mînitö guiquënë cöwä ate nämä wææ aedäni. Wede pönëmîni inte tæi gongænte ongöedäni. Æmæwo pægaimîni inte tæi piñænte entawëninque guiñenämaï inte ee cæedäni. ¹⁴ Ayæ tömäa quiëmë cæmîni inte waadete pönëninque cæedäni ämopa.

¹⁵ Botö tönöñamîni mînitö iimai ante do ëñëmînipa. Acayabæ iñömö täno pönengainäni inte Etepänä nani quëwencabo iñömö, Wængongui quinäni inänite në cæmöni bacæmönimpa, ante ñöwo cædänipa cæmîni. ¹⁶ İninqe mînitö Wængongui quinäni beyæ në cædinäni inänite Ao äninque piyænë cædinque tömënäni nani änö bai do ëñente cæedäni. Ayæ, Wadäni adobaï, Mönö tönö godongämæ nanguï cædänipa, ante adinque mînitö tömënäni nani änö bai do ëñente cæedäni.

¹⁷ Etepänä tönö Podotönato ayæ Acaico botö weca pöninque mînitö botö beyæ mîni cæinënö ante do cædäni ate nanguï totabopa. ¹⁸ Edæ tömënäni pönö apænedäni ëñëninque mînitö wampo pönente tæi piñænte ëwocamînitawo. Ayæ adobaï pönö apænedäni ëñëninque mönitö wampo pönente tæi piñænte ëwocamönipa. Mänömaï në pönö cædinäni inänite mînitö

wæætē waa ate pönēninque cæquēnēmīni
imīnīpa.

¹⁹ Atiabæ iñömö Codito ingante
godongāmæ nāni pönencabo nāni cabo
nāni cabo tōmānāni mīnitō imīnite ante
pönēninque, Waa quēwencæmīnimpa, ante
apænedānīpa. Aquidæ tönö Pidica nāna
gæncaya adobaī ayæ tōmēna oncōnē
Codito ingante pōnente godongāmæ
pōninque nāni pönencabo adobaī mīnitō
imīnite waadete pönēninque, Mönö Awēnē
nempo waa quēwencæmīnimpa, ānānīpa.

²⁰ Mönö tōniñadāni tōmānāni, Waa
quēwencæmīnimpa, ante apænedānīpa.
Mīnitō guiquēnē mīni cabo godongāmæ
pō bee tēninque waadete pōnente waa
apæneedāni, āmopa.

²¹ Botō Pabodobo iñömö tæcæ tōmēmo
önompoca yewæmōninque, Waa quēwencæmīnimpa,
ante tōmēmo yewæmōmopa.

²² Æcānō mönö Awēnē ingante waadete
pönēnāmaī ina iñömö tōmengā nānō
wænguinque mānōmaī cæcampa tōö. Botō
iñömö wæætē, Mōnitō Awēnē imi pōe, ante
wæbopa.

²³ Mönö Awēnē Itota waadete pönö
cæcā æninque mīnitō tōmengā nānō
waadete pönö cædö entawēninque waa
quēwencæmīnimpa. ²⁴ Codito Itota nempo
mönö quēwencabo imompa, ante pönēninque
botō mīnitō imīnite waadete pönēmopa.
Māninque ante yewæmōmopa.

2 Coodintoidi inänite Pabodo cadota ante ayænta nänö yewæmongainta

Waa quëwencæminimpa, ante

¹ Wængonguï pönö angä beyæ Itota Codito botö Pabodobo imote da godongä godongaïmo inte botö mönö tönifnacä Tímoteo tönö guëa apænemöna ate botö iïmaï ante yewæmömopa. Coodinto iïömö quëwëmini inte mïnitö iïömö Codito ingante mïni godongämæ pönencabo incæ acæminimpa, ante yewæmömopa. Ayæ Acayabæ tömäo iïömö quëwente Wængonguï quïnäni inte tömënäni adobaï adota acæðänimpa, ante yewæmömopa. ² Mönö Awënë Itota Codito tönö Mæmpo Wængonguï tönö guëa waadete pönö cæda adinque mïnitö gänë pönente waa quëwencæminimpa, ämönapa, ante yewæmömopa.

Codito iïmaï waadete pönö cæcampa, ante

³ Mönö Awënë Itota Codito Wæmpocä iïongante Itota iïömö adocä ingante, Botö Wængonguï inongä ingampa. Ayæ Itota Wængonguï adocä inongä inte tömengä mönö wæwënö ante adinque godongämæ wæte bai pönö waadete apænecä ëñëninque mönö wampo pönëmö imopa. Mänömaï beyæ, Itota Mæmpo Wængonguï cöwë waa cæcampa, ante mönö watapæ apænecæimpa. ⁴ Adocä Wængonguï mönö imonte äninque, Wënæ wënæ wæwëmini adinque botö waadete pönö apænebo ëñëninque mïnitö wampo pönëmïnitapa. Ìninque wadäni wënæ wënæ wæwënäni adinque mïnitö botö apænedö ante waadete godö apænemïni ëñëninque tömënäni wæætë wampo pönencæðänimpa, ante botö mïnitö imïnite pönö cætabopa, Wængonguï angampa.

⁵ Edæ iïmaï beyæ mänömaï angampa. Codito në nantate wægaingä beyæ nantate wæwëninque mönö tömengä tönö äanque bai nantate wæwëmompä. Ayæ adobaï nantate wæwëmö adinque adocä Codito waadete pönö apænecä ëñëninque mönö tömengä tönö äanque bai ëwocadinque

wampo pönëmompä. ⁶ Mönitö nantate wæwëmöni amïnitawo. Edæ mönitö nantate wæwente apænemöni beyæ Wængonguï mïnitö imïnite wæætë pönö waadete apænecampa. Apænecä ëñëninque mïnitö wæætë wampo pönëninque wænämaï quëwencæminimpa, ante Wængonguï cæcampa. Ayæ mönitö wæwëñömönite tömengä pönö waadete apænecä ëñente wampo pönëmöni amïnitawo. Edæ mïnitö nantate wæwëmini inte wampo pönencæminimpa, ante Wængonguï mänömaï cæcampa. Ayæ wampo pönëmïni badingue mïnitö iïncayæ ate mönitö nantate wæwënö bai adobaï nantate wæwëmini incæte piyænë cæte ee cæte quëwencæminimpa, ante Wængonguï pönö cæcampa. ⁷ Ayæ mönitö tönö äanque bai mïnitö nantate wæwëmïnitawo. Edæ tömengä waadete pönö apænecä ëñëmini ate mïnitö adobaï mönitö tönö äanque bai wampo pönenguïmïni imïnipa. Ante do ëñëninque mönitö, Näwangä mïnitö watapæ quëwencæminimpa, ante do pönëmönipa.

⁸ Iñänäni, mönitö Atiabæ quëwëninque æbänö wënæ wënæ bate wætämönii, ante ñowo yewæmömo aedäni. Tæi piñæmöni inämaï inte mönitö godömenque teëmë mongænte bai nanguï wënæ wënæ bate wædinque, Nangæ bate wænguï wæ, ante wætämönipa. ⁹ Wængonguï do angä wænguënëmöni imönipa, ante nämäneque pönente wætämönipa. Incæte mönitö, Tömëmöni nämä tæi piñænö beyænque quëwencæmönimpa, ante pönënämaï incæmönimpa, ante odömoncæte ante Wængonguï pönö cæcä wætämönipa. Wæætë tömengä, Do wængaïnäni quëwencæðänimpa, ante botö në ämo iïömote mïnitö wæætë botö imote wede pönente quëwencæminimpa, ante cæcæte ante Wængonguï mänömaï pönö cæcä wætämönipa. ¹⁰ Mönitö mäninö möni oo wænguinque ante wæyömönite tömengä do bæi ongonte ængä beyænque quëwentämönipa. Ayæ ate wæyömönite tömengä ængä beyænque quëwencæmönimpa. Ayæ, Adocä wæætë wæætë ængä beyænque quëwencæmönimpa, ante pönëninque mönitö tömengä ingante wede pönente tomönipa. ¹¹ Ìninque mïnitö iïnacabo gongænte bai mönitö beyæ

Wængonguī ingante apænemīni ēñēnīnque tōmengā cōwē bæi ongonte ængā beyænque quēwencæmōnīmpa. Mānōmaī cæcā adīnque nanguī īnāni wæætē Wængonguī ingante waa ate pōnente īīmaī ante apænecædānīmpa. Wængonguī ēñēmi. Nanguī īnāni apænedāni ēñēnīnque bitō Pabodoidi beyæ pōnō waa cæbi amōnīpa, ante apænequīnāni īnānīpa.

Coodinto iñōmō quīnante pōnāmaī īmoī, Pabodo angampa

¹² Mōnitō īīmaī ante nāmā waa ate pōnēnīnque apænemōnīpa. Wængonguī quīmōni īnōmōni inte mōnitō tōmengā, Tæiyæ waēmō ēwocacæmīnīmpa, ante ænte entawēmōnīpa. Mānōmaī beyæ Wængonguī nō cæcā baī mōnitō adobaī inguīpoga quēwēnīnque nō cæte quēwēmōnīpa. Ayæ mīnitō weca pōnīnque mōnitō godōmenque waa cætāmōnīpa. Mānōmaī cædinque mōnitō inguīpoga quēwēnānīque nāni ēñēnō beyænque dicæ cætāmōnīyaa. Wæætē mīmō entawēmōni inte nāmā apænte ānīnque mōnitō Wængonguī waadete pōnō apænecā ēñēnīnque eyepæ cætāmōnīpa, ante tomōnīpa. ¹³ Mīnitō acæmīnīmpa, ante yewæmōnīnque mōnitō dicæ idīquībæ ante yewæmōmōnīyaa. Wæætē, Edonque adīnque do ēñencæmīnīmpa, ante edonque yewæmōmōni abāīmīnīpa. Ayæ botō, Mīnitō nāwangā godōmenque ēñencæmīnīmpa, ante īīmaī ante pōnēmōpa. ¹⁴ Mōnitō æbānō īmōnīi, ante mīnitō pancaa ante do ēñēmīnīpa. Ayæ, Mōnō Awēnē Itota tōmengā nānō ponguīōnæ īīnque bayonte mōnitō mīnitō īmīnīte adīnque, Mīnitō nē wede pōnengāīmīni īmīnīpa, ante adīnque tocæmōnīmpa, ante do ēñēmīnītawo. Ayæ mānīōnæ bayonte mōnitō īmōnīte adīnque mīnitō adobaī, Waa nē cægāīmīni īmīnīpa, ante tocæmīnīmpa, ante āmo ēñēmaīmīnīpa.

¹⁵ Mānōmaī īmpa, ante pōnēnīnque botō, īīmaī cæcæboīmpa, ante pōnentabōpa. Wayōmō ayæ godāmaī inte botō tāno mīnitō weca ponte waadete apænecæboīmpa. Apænebo ēñēnīnque mīnitō wæætē mēmpoga tocæmīnīmpa, ante īīmaī cædīmo īntabōpa. ¹⁶ Mīnitō weca tāno ponte ēñadīnque godōmenque godīnque botō Māatedōniabæ gote pōnīnque wæætē mīnitō

weca adodō ocæ ēmænte poncæ cædīmo īntabōpa. Ayæ pōmo ate mīnitō botō īmote godongāmæ cædinque da godōmīni godōmenque Oodeabæ gocæ cædīmo īntabōpa. ¹⁷ Incæte botō, Mānōmaī cæquīmo īmpa, ante pōnēnīnque dicæ ōnonque ante pōnentawogaa. Mānōmaī pōinēmo inte botō ñīmpo cæte pōnāmaī īmo adīnque mīnitō, Pabodo æmæ pōnente, Wīī pōinente wabānō wīī pongā, ante pōnēmīnītawo. Īñæmpa inguīpogaque quēwēnāni mānōmaīnō ante nāni æmæ pōnēnō baī botō iñōmō edæ dicæ adobaī pōnentawogaa.

¹⁸ Wængonguī nāwangā mōnō īmonte cōwē pōnēnīnque nē aacā ingampa, ante nō pōnī īmpa. Mānōmaīnō ante nō pōnī ī baī mīnitō īmīnīte mōnitō apænedō iñōmō adobaī nō pōnī īmpa. Īnīnque mōnitō ædō cæte wadō ante apænequīmōnīi. ¹⁹ Tidibānō tōnō Tīmoteo botō tōnō mīnitō weca pōnīnque, Wængonguī Wengā Itota Codito ingampa, ante nō īmpa, ante apænemōni ēñēmīnītawo. Īnīnque mōnitō Itota Codito nēmpo quēwēnīnque nē Ao āmōni inte ædō cæte æmæ pōnente baī wadō ante apænequīmōnīi. ²⁰ Īīmaī īmpa. Wængonguī, Cōwē cæcæboīmpa, ante æpogamē wæætē wæætē angacāīmpa. Wæætē wæætē angā incæte Codito iñōmō edæ cōwē Ao ānīnque, Wængonguī nānō angāinō tōmānō īīnque cæcæīmpa, ante cæcampa. Īnīnque mōnitō tōmengā tōnō cædinque, Wængonguī ñāō apāite baī emōñongante tōmānāni tōmengā ingante waa acædānīmpa, ante cædinque, Ao, mānōmaī īmpa, ante, Amēē, ante watapæ apænemōnīpa. ²¹ Wængonguī incæ mōnitō īmōnīte apænte ænīnque ayæ mīnitō īmīnīte apænte ænīnque, Mīnitō Codito nēmpo quēwēnīnque nē tæī pīñæmīni bacæmīnīmpa, ante mōnō tōmāmō īmonte pōnō ōni pæte baī cædinque īīmaī cæcampa. ²² Tōmengā emōwo yewæmonte baī cædinque, Botō quīmīni īmīnīpa, ante pōnō cæcampa. Ayæ, Īīncayæ ate mīni godōmenque nanguī ængūinque mīnitō ñōwo botō Ōnōwoca ingante ænte ēwocædāni, ante tōmengā Ōnōwoca ingante ñōwo da pōnongā ænte ēwocāmīnīpa.

²³ Ìninqe Coodinto ìñömö botö quínante wæætë pönämaï ingaboï. Edæ wënæ wënæ cæmîni adinque mînitö ìmînite nè panguënëmo incæ botö, Wîi päinente awædö, ante wîi pontabopa. Wængonguï ayongante botö, Mänömaï impa, ante nõ apænebo ëñëmaïmînipa. ²⁴ Ìimaï ante wede pönencæmînimpa, ante mönitö dicæ nè wææ ämöni ìmöniyaa. Wæætë edæ, Mînitö mîni wede pönëno beyænque tæi ongöninge edæ nanguï cæmînipa, ante adinque mönitö wæætë, Mînitö watapæ tocæmînimpa, ante cædinque mînitö tönö godongämæ cæmönipa.

2

¹ Botö wëenëñedë mînitö weca ëñacæ pöninqe nanguï ämo wæmînitapa. Ìninqe, Wîi wæætë ämo wæcæmînimpa, ante ñöwo ëñacæ pönämaï incæboimpa, ante nãmäneque pönëninge antabopa. ² Edæ pîimo wæwëmîni bai æcänö wæætë, Tocæbiimpa, ante botö ìmote waadete pönente apænequëngä. Ìñæmpa botö pîimo beyæ nè wæwënimînique ongömîni bai botö ìmote nè waadete pönente apænequëngä ìñömö edæ dæ ancædongäimpa. ³ Botö quiëmë beyæ tobo adinque mînitö godongämæ watapæ toquënëmîni ìmînipa, ante pönentabopa. Mînitö botö beyæ äninge, Pabodo mönö weca pongä adinque mönö cæmö tocæcäimpa, ante nè cæquënëmîni ìmînipa, ante awædö. Ìninqe, Mînitö weca pöninqe botö mînitö wæwënö ante wædämaï incæboimpa, ante cædinque botö, Botö cadota ante yewæmömo adinque mînitö ëñente cæcæmînimpa, ante wæbopa. ⁴ Botö nanguï caate wædömo inte mîmönoque pönente wæwëninge yabæque adobaï Ca ca nanguï pönente wædinque mänömainö ante wæbopa. Incæte botö, Mînitö wæwencæmînimpa, ante dicæ ämogaa. Wæætë, Botö æbänö mînitö ìmînite nanguï waadete pönëmpa, ante ëñencæmînimpa, ante odömoncæte ante yewæmömpa.

Në wiwa cæcä ingante æbänö godö waadete ñimpo cæquï

⁵ Adocanque wiwa cæcä adinque botö tömengä nänö wiwa cædö beyæ wæwëmo

incæte mînitö tömämîni wædænque incæ nanguï incæ wæwëmîni adobaï ìmînipa. Botö, Tömengä ingante pîinämaï incæboimpa, ante pönëninge, Wædænque wæwëmînipa, ante apænebopa. ⁶ Në ëñënämaï cædingä ingante mînitö pancämîniya wodo tömämîni do pämînitapa. Ìninqe botö, Idæwaa pämînipa, ämopa. ⁷ Tömengä, Ancaa pämîni awædö, ante godömenque wæwente bacantawo. Ìninqe mînitö pönö ñimpo cædinque tömengä ingante, Idæwaa pämöni wæbipa, ante ædæmö waadete apænemîni ëñëninge tömengä ìninqe wædinque wampo pönencæcäimpa. ⁸ Mînitö wæætë, Bitö ìmite nãwangä waadete pönëmönipa, ante adodö apænemîni ëñencæcäimpa, ante botö mînitö ìmînite nanguï ämopa. ⁹ Botö äno ante æbänö tömänö ante ëñente cæmîni, ante ëñencæte ante botö wëenëñedë yewæmontabopa. Eyepæ cæmîni ate wædinque botö, Eyepæ cæmînipa, ämopa. ¹⁰ Në ëñënämaï cæcä ingante mînitö ñimpo cæmîni ee gocantawo. Mänömaï cæmîni ìninqe botö ñöwo adobaï ñimpo cæbopa. Waocä æcämenque ëñënämaï cæcä adinque godö pönö ñimpo cæbo ìninqe botö Codito ayongante mînitö beyænque ante mänömaï godö ñimpo cæbo intabopa. ¹¹ Ìñæmpa Tatäna incæ angä ëñente beyænque mönö oda cæte wæquinque edæ godömenque pîimaïmompä, ante aquënë quëwëedäni. Tatäna æbänö, Oda cæte wæcædänimpa, ante cæcampa, ante edæ do ëñëmompä.

Tito beyæ ante Pabodo wæcampa

¹² Botö Todoa nãni quëwëñömö täno pöninqe, Mönö Codito ingantedö ante watapæ apænecæte ante cæyömo mönö Awënë, Botö beyæ guiite apænee, ante odemö wi ænete bai do cæcä atabopa. ¹³ Incæte botö tönîñacä Tito dæ angä wædinque botö, Ædö cæte ìñömö a ongonte apænequïmoo, ante tömënäni ìnänite, Gobopa, ante Mäatedöniabæ gocæte ante wadæ gotabopa.

Codito nempo quëwëninge tæi ëmömönipa, ante

¹⁴ Në tæi ëmongä inte mönö Codito ìñömö nè pîinte cædäni ìnänite gänä cæcampa. Ìninqe mönitö Codito nempo

quëwëñömönite Wængonguï, Në tæi ëmongä ingante waa acædänimpa, ante cædinque mönitö imönite në tæi ëmongä miñæ ænte mäocä dao dao godinque mönitö tömengä nänö ëmönö bai adobai tæi ëmömönipa. Ayæ oguï wa woboyæ wodo wodo cædinque tömäo mäo oguï wa bai Wængonguï adobai cædinque mönitö imönite angä ëñëninque mönitö wæætë, Mönö Codito æbänö ingää, ante wayömö wayömö mäo apænemöni ëñënanipa. Wængonguï mänömai cæcä beyæ mönö Wængonguï ingante waa ate pönëninque apæncæimpa.

¹⁵ Iïmai edæ impa. Codito ængä beyænque në quëwenguïnäni weca quëwëmöni incæ në wænguinäni weca quëwëmöni incæ mönitö Codito nempo quëwëninque tömengä nänö oguï wamönedö bai mönitö adobai, Wængonguï wë ongonte bai tocæcäimpa, ante oguï wamönete bai apænemönipa. ¹⁶ Mönitö öö wa wamönete bai cædinque në wænguinäni inänite tömënäni nänï wænguimämo ante apænemöni ëñëninque tömënäni nänï wænguinque wë ongonte ocado cæte bai ëñënanipa. Wæætë oguï wamönete bai mönitö në quëwenguïnäni inänite guiquënë tömënäni nänï quëwenguimämo ante apænemöni ëñëninque tömënäni wæætë nänï quëwenguinque wë ongonte ocado cæte bai ëñënanipa.

Ïinque mäninö mönitö cæquënëno ante æcänö eyepæ cæquiringä. ¹⁷ Edæ nangui inäni nämä beyænque ante æncæte ante cædinque Wængonguï nänö apænedö ante apænewënäni bai mönitö wii adobai wënæ wënæ cæcæte ante apænemöni imönipa. Wæætë Wængonguï mönitö imönite da godongä godinque mäo në apænemöni inte mönitö Wængonguï ayongä mönö Codito nempo quëwëninque nö pönente apænemönipa.

3

Wængonguï müne pönö angä beyænque quëwëmompä

¹ Mönitö imönitedö ante pönëninque mïnitö, Pabodoidi, Waa cæmöni aedäni, ante tedewënanipa, ante wëenëñedë ämïnitawo. Ayæ, Nöwo wæætë adodö ante

tedewënanipa, ante pïimïnitawo. Mönitö iñæmpa nämanque ante, Waa cæmöni aedäni, ante dicæ ämöniyaa. Wadäni mönitö imönite waa acædänimpa, ante cædinque pancadäniya guiquënë mïnitö imïnite äninque, Cadota ante pönö yewæmöedäni, änäni ëñëninque yewæmömïni ate tömënäni ænte mäo odömönäni adänipa. Ayæ wadäni inänite adobai, Cadota, änäni ëñente yewæmönäni æninque mïnitö imïnite odömönäni. Mönitö guiquënë, Cadota ante pönö yewæmöedäni, ante dicæ ämöniyaa. ² Wæætë mïnitö guiquënë waa quëwëmïni adinque wadäni, Pabodoidi tömënäni inänite apænedäni beyænque coodintoidi wede pönënäni inte waa quëwënäni amönipa, ante pönëninque cadota ate bai do ëñënanipa. Mänömai pönö cæmïni æninque mönitö cadota næænte odömönte bai cædinque, Coodintoidi æbänö waa cædänii, ante tömänäni inänite odömömöni adinque ëñënanipa. ³ Ïinque, Pabodoidi apænedäni beyænque waa cædänipa, ante edonque acædänimpa, ante cædinque Codito iñömö Wængonguï në Quëwengä Önöwoca ingante da pönongä ænte ëwocamïnipa. Mänömai cædinque Codito cadota ante yewæmönte bai pönö cædinque wii tömengonca yewæmongampa. Wii dicaboga yewæmöninque tömengä Önöwoca ingante mïnitö baonga da pönongä ænte ëwocamïnipa.

⁴ Codito godongämæ cæcä beyænque mönitö Wængonguï ayongä nöingä ante apænemönipa, ante pönëninque mönitö guïñënedämai inte do edæ apænemönipa.

⁵ Mönitö nämanque ante, Æbänö waa cæmöni, ante eyepæ imönipa diyæ apænte anguimönii. Wæætë Wængonguinque pönö godongämæ cæcä ate mönitö eyepæ badinque cæmönipa. ⁶ Wængonguï,

Botö pönö cæbo ate mïnitö Ao ämïni ïinque mönö godongämæ waa cæte quëwengæimpa, ante cöwë angampa. Tömengä doyedë iñömö, Botö wææ angainö ante ëñente cædinque quëwencæmïninipa, ante nänö wææ angaine ante ñöwo wæætë änämai ingampa. Mänine ante ñöwo ganca wææ angä bai mönö wænguinque incædönipa. Nöwo guiquënë Wængonguï

wæætē, Botō Ōnōwoca ingante ænte ēwocadinque quēwencæmīnīmpa, ante mīine ante apæneca ēñēnīnque mōnō quēwenguīnque Wængonguī Ōnōwoca ingante ænte ēwocamōmpa edæ. Mōnitō īñōmō tōmengā Ōnōwoca ingante nē ēwocamōni inte eyepæ badīnque mīine Wængonguī ñōwo nānō pōnō apænece ante nē apænemōni īmōnīpa.

7 Wængonguī, Īīmaī cædāni, ante dicaboga wææ yewæmongā ate mōnō ēñēnāmaī īmō beyænque mānīne tōmengā nānō wææ yewæmongāine beyænque mōnō wænguīmāmo bagatīmpa. Incæte mānīne beyæ edæ ñāō nanguī apāigatīmpa. Īīnīnque mānīne ænte godōmenque wææ ānīnque Mōitee wodi awīnca ñāō apāite baī ēmongacāīmpa. Mānīī ñāō wodēmæmō ēmongā incæte idægoidi tōmengā awīnca adīnque, Ædō cæte Mōitee awīnca cōwā aquīmōnīī, ante wægadānīmpa.

8 Mōnitō guīquēnē, Wængonguī Ōnōwoca ingante ænte mōnō quēwengæīmpa, ante mōni apænedō beyænque quīēmē baī godōmenque nanguī apāite baī apāicæīmpa. 9 Mōnō apænte tente wænguīnque edæ mānīne pedæne ante ēñēnāmaī cægāmōīmpa. Incæte mānīne ante nānō wææ angāīnō beyænque Mōitee wodi awīnca ñāō apāite baī ēmongacāīmpa. Īīnīnque ñōwo īñōmō, Mōnō nō cæte quēwenguīnque ante Wængonguī Ōnōwoca ingante ængæīmpa, ante mōni apænedō guīquēnē ñāō quīēmē baī godōmenque nanguī nāwante baī ēnēpa. 10 Wængonguī Tæiyæ Wæmō Ōnōwoca ingante ante mōni apænedō īñōmō godōmenque ñāō nānō apāidō beyænque Mōitee wodi nānō wææ angāīnō guīquēnē pōnōmenque apāidīnque edæ wodēmāa badīnque edæ dæ bapa. 11 Edæ mānīne mōnō wodēmāa baquēnēmāmo incæ ñāō apāite baī īñōnte Mōitee wodi ænte apænēgacāīmpa. Wængonguī ñōwo nānō pōnō āne guīquēnē cōwē wodēmāa badāmaī ēne inte godōmenque nanguī guīnæ nāwante baī ēnēpa.

12 Īīnīnque, Wængonguī Tæiyæ Wæmō Ōnōwoca pōnō cæcā beyænque mōnō nō

cæte watapæ quēwengæīmpa, ante pōnente quēwēmōni inte mōnitō guīñēnedāmaī inte do apænemōnīpa. 13 Mōitee wodi guīquēnē, Ñāō apāi baī botō ēmōnō incæ wodēmāa bamōñōmote idægoidi adāmaī incædānīmpa, ante cædīnque weocōo ñāne cæmongacāīmpa. Mōnitō guīquēnē Mōitee wodi nānō ñāne cæmongāi baī cædāmaī īmōni inte edonque apænemōnīpa.

14 Mānīnta, Botō wææ angāīnō ante ēñēnte cædīnque quēwencæmīnīmpa, ante Wængonguī nānō pedænta ante adīnque idægoidi do nāni ñāne cæmongāīncoo ñōwo ganca edæ ñāne cæmonte baī ēmōnānīpa. Īīnīnque tōmēnāni ocāi ōmæcadāni baī bagadānīmpa. Edæ Codito nempo quēwēnānīque mānīncoo wī cæmonte baī ēmōnāni inte tōmēnānīque edonque adāni īnānīpa. Īīnīnque idægoidi wæætē Codito nempo quēwēnāmaī īnāni inte ayæ edæ wī cæmōnāmaī inte wædānīpa.

15 Īīnīnque idægoidi ñōwo ganca mīmō bee otawente baī īnōnāni inte Mōitee wodi nānō yewæmongāīnta adīnque ēñēnāmaī īnānīpa.

16 Incæte Awēnē gāmæñō æcānō pōna tōmengā Mōitee wodi nānō wī cæmōnō baī badīnque do wī cætawente baī bacāmpa.

17 Mōnō Awēnē incæ Wængonguī Ōnōwoca īngāmpa. Ayæ waocā mōnō Awēnē Ōnōwoca ingante ēwocacā īnīnque tōmengā wī cætawente baī entawente quēwēnōngā inte wīī tee mōnete wæcā baī īngāmpa.

18 Mōnō tōmāmō īñōmō awīnca wī cæmonte baī ēmōnōmō inte mōnō awocawænta baī bamōmpa. Īīnīnque wadāni mōnō īmonte adīnque, Mōnō Awēnē æbānō ñāō apāite baī ēmongāā, ante awocawænta ate baī edonque acædānīmpa. Ayæ godōmenque ayæ godōmenque mōnō ñāō apāidō mōnō ēwocāquīnque mōnō Awēnē nānō ēwocadō baī mōnō ayæ godōmenque ayæ godōmenque ēwocāmō īmōmpa. Mōnō Awēnē incæ Wængonguī Ōnōwoca īnōngā inte mānōmaī pōnō cæcā entawēmōmpa.

4

1 Wængonguī, Botō pōnō cægāīnō ante mīnitō nē apænēmīnī incæmīnīmpa, ante waadete pōnō angā beyænque mōnitō

mānīnō ante nē apænemōni bagaiṃōni inte ṅōwo wæ guemōnāmaī inte cōwē apænemōnipa. ² Wadāni guiquēnē tōmēnāni nāni guingo imonte wæquinque awēmō cædānipa. Mōnitō iñōmō tōmēnāni nāni cæwēnō bai cædāmaī incæmōnipa, ante do ānimōni inte babæ cædāmaī imōnipa. Wængonguī nānō apænedō ante idiquibæ apænedāmaī imōnipa. Wæætē Wængonguī ayongā mōnitō tōmengā nō nānō apænegainō ante edonque pōni odōmonte apænemōni ēñēninque tōmānāni mīmō entawēnāni iñinque edæ, Pabodoidi nō ante cædānipa, ante apænebainānipa. ³ Incæte mōnō Codito ingantedō ante watapæ mōni apænedō iñōmō ṅāne cædete bai intawo. Iñæmpa ṅāne cædete bai i iñinque nē wē womonte wænguināni beyænque ṅāne cædete bai impa. ⁴ Wængonguī nānō ēmōnō nē ēmōnongā inte mōnō Codito iñōmō mōnō beyæ ṅāo apāite bai cæcampa, ante watapæ mōnō ēñente pōnēnō ante apænemōnipa. Nōwoguipogaque quēwēnāni beyæ guiquēnē tōmēnāni awēnē wængonguī bai Tatāna nē cæcā ingampa. Tōmengā iñōmō mānīne watapæ mōni apænedō ante piīninque, Nē pōnēnāmaī ināni adāmaī incædānipa, ante tōmēnāni awinca ṅāne cæmonte bai wææ cæcampa. ⁵ Mōnitō iñōmō, Nāmā incæ waa cæmōnipa, ante tededāmaī imōnipa. Wæætē, Itota Codito incæ mōnō Awēnē ingampa, ante mōnitō, Tōmengā beyænque mōnitō mīnitō imīnite nē cæmōni imōnipa, ante māninque ante apænemōnipa. ⁶ Wēmō iñōmō ṅāo apāicæimpa, ante Wængonguī incæ badongacāimpa. Adocā ṅāo ante nē angaingā inte ṅōwo wæætē mōnitō mīmōno tica ēnente bai cædinque iīmaī ante odōmongā amōnipa. Tōmengā iñōmō, Botō æbānō guīnæ nāwante bai ēmōmoo, ante mīnitō Codito awinca adinque edonque pōni acæmīnipa, ante pōnō tica ēnente bai odōmongā amōnipa.

Itota ingante mōnō wede pōnēnō beyænque quēwēmō

⁷ Nanguī ṅāo apāite bai ēwocamōni incæ ōnoncadedē mante bai edæ ēwocamōnipa. Edæ daigænē cængæmoncadenque bai mōnitō baō mongæñōmōnite Wængonguī,

Wii mīnitō nāmā tæi piñænō beyænque ēwocamīnipa, wæætē botō tæi piñænō beyænque ēwocamīnipa, ante acædānipa, ante badongampa. Iñinque tōmengā tæi piñænte pōnō badongā æninque mōnitō ṅāo apāidō mōni mānō iñōmō ōnoncadedē mante bai ēwocamōnipa. ⁸ Mōnitō imōnite tōmānō mānō mō ongote bai cædāni wæmōni incæ gueogæ godāmaī imōnipa. Æbānō cæte quēwēmō imōo, ante wæmōni incæ mōnitō guīñente wædāmaī imōnipa. ⁹ Ancaa togænte pānāni wæyōmōni Wængonguī mōnitō imōnite cōwē ēmō cæte godāmaī ingampa. Ayæ wænoncæte ante bæ tadāni incæte æmæwo wænāmaī imōnipa.

¹⁰ Itota tōmengā nānō quēwēnō pōnongā æmōni beyænque mōnitō, Baō ayæ mongænte quēwēmōni acædānipa, ante cæmōnipa. Tōmengā nānō wængainō bai mōnitō adobai wæætē wæætē wænte bai baō mongæmōnipa. ¹¹ Mōnitō nē quēwēmōni iñōmōnite wadāni wæætē mōnitō imōnite bæi ongote æninque, Itota beyænque wæncæmīnipa, ante nanguī cædānipa. Iñinque mōnitō baō ṅōmænguīñō ēñayōmōnite wadāni, Itota tōmengā nānō quēwēnō ēñate beyænque ayæ quēwēnānipa, ante edonque acædānipa, ante mōnitō wæncæ cæte bai ēñate wæmōnipa. ¹² Iñinque mōnitō mōni wænguīmāmo beyæ ante wæyōmōni mīnitō wæætē mīni quēwenguīmāmo ēñate quēwēmīnipa.

¹³ Docā do apænedinque, Botō nē wede pōnēmo inte apænetabopa, ante yewæmongacāimpa. Tōmengā wede nānō pōnengainō bai adobai ēwocadinque mōnitō nē wede pōnēmōni inte adobai apænemōnipa. ¹⁴ Iīmainō ante ēñēninque wede pōnēmōni inte mōnitō apænemōnipa. Itota ingante, Nāni ōmæmōe, ante nē cægaingā adocā mōnitō imōnite angā ate mōnitō Itota tōnō godongāmæ ṅāni ōmæmoncæmōnipa, ante do ēñēmōnipa. Ayæ mīnitō tōnō mōnitō tōmāmō iñōmonte Wængonguī ænte mānō gōnongā ate mōnō tōmengā weca godongāmæ gongænguīmō imōmpa. Mānōmainō ante do ēñēmōni inte mōnitō nē wede pōnēmōni inte apænemōni

imönipa. ¹⁵ Wængonguī godömenque nan-
guī ināni inānite waadete pönö cæcā
ate tömēnāni wæætē Wængonguī ingante
waa ate pönēninque apæncædānimpa.
Ayæ mänōmaī pönö cæcā adinque,
Wængonguī ñäö apäite bai emönongä inte
mänōmaī cæcampa, ante mönö tömämö
watapæ apæncæximpa. Ìninque, Mänōmaī
bacæimpa, ante mīnitö beyæ ante mönitö
tömää edæ cæmönipa.

¹⁶ Mänōmaī beyæ mönitö, Æbänö
cæquimönii, ante wædāmaī imönipa. Edæ
iimö iñö iimö iñö mönö baö godömenque
wænguīñö bai mongæñömö mönö önöwoca
wæætē iimö iñö godömenque iimö
iñö godömenque miīwoca badonte bai
ewocamompa. ¹⁷ Ìñæmpa wēnæ wēnæ mönö
wæwēnö incæ wantæ iñö wodēmāa pönī
badinque wodæi bai bapa. Incæte mänīī
mönö wæwēnö beyæ mönö godömenque
ñäö apäite bai ewocacæximpa. Ìninque
mönö wæwēnö wodæi pönī inte dæ
bayö mönö ñäö apäidö mönö ewocadö
wæætē cöwē wodēmāa badāmaī ingæximpa.
Wæætē mönö watapæ quēwenguinque
godömenque nanguī apäite bai bacæximpa.
¹⁸ Inguipogaque mönö quēwēnö guiquēnē
wantæ iñö dæ gocoopa. Öönædē ñöwo
mönö adāmaī incoo guiquēnē cöwē dæ
badāmaī inte ongongæximpa. Ìninque
inguipogaque mönö quēwēnö ante mönö
adāmaī inte bai pönengæximpa. Wæætē
öönædē mönö adāmaī incoo ante mönö
cöwē ate bai pönengæximpa.

5

¹ Oncontai wido cæquintai bai mönö
æmontai mongænte quēwēmompa. Ìninque
mänintai wido cæmö incæte Wængonguī
wæætē, Öönædē miintai mīni cöwē
owoquintai, ante do mænongacæximpa.
Mänintai iñömö waocā önompoca mænönāmaī
intai iñonte mönö öönædē æite owoquimö
imompa, ante do eñēmompa. ² Ñöwo iñömö
mönö wido cæquintai mongæninque ö ö
ante nantate wæwēmompa. Mänōmaī beyæ
mönö öönædē æidinque mönö owoquintai
eñacæte ante wæmompā. ³ Edæ, Baö
ömaamö inte wæcæ wæ, ante guīñewocate
wædinque mönö, Miintai eñacæximpa, ante

wæmompā. ⁴ Mönö iintaique eñadinque, Baö
ömaamö inte wædāmaī incæmönimpa, ante
guīñewocate wæmompā. Mönö wænguintai
mongænte nantate wæmö inte ö ö ante
wæmompā. Wængonguī, Mīnitö eñate
quēwenguintaique, ante yabæque wīni caate
bai pönongä eñayömö mönö wænguēnēñö
edæ dæ bacæximpa, ante æncæte ante
wæmompā.

⁵ Ñöwo ämo eñēedāni. Wængonguī incæ
edæ, Mīni miintai wēñate mongænguinque,
ante mönö imonte badongacæximpa. Ayæ,
Mīnitö miintai cöwē pönömo æncæminimpa,
ante, Nāwangä impa, ante odömoncæte ante
Wængonguī tömengä Önöwoca ingante ñöwo
da pönongä æmompā. Ìninque tömengä
Önöwoca ingante ænte ewocadinque mönö,
Miintai eñate mongænguinque ewocamompa,
ante do eñēmompa.

⁶ Mänōmaī beyæ mönitö cöwē, Wængonguī
cæcæcæximpa, ante wede pönente tomönipa.
Oncönē owote bai iintaidē mönö quēwenganca
mönö Awēnē oncönē owodāmaī imompa,
ante do eñente wædinque, ⁷ mönitö
mäninö ante ayæ adāmaī emömöni inte
wīi möni adinö beyæ quēwēmönipa.
Wæætē möni wede pönēnö beyænque
quēwēmönipa. ⁸ Ìninque edæ, Wængonguī
cöwē cæcæcæximpa, ante wede pönēmöni
inte mönitö, Ìintaidē owodāmaī inte wæætē
mönö Awēnē oncönē gote owote waa to-
baimpa, ante pönēmönipa. ⁹ Ìninque oncönē
owote bai tomöni incæ oncönē owodāmaī
inte bai wæmöni incæ mönitö, Mönö Awēnē
waa tocæcæximpa, ante cædinque cöwē nö
cæte quēwēmönipa. ¹⁰ Codito tömengä nänö
apænte anguimpāa gäänē mönö tömämö
ponte edæ a ongonguēnēmö imompa. Mönö
edæ inguipoga iintai eñate quēwēninque
mönö cædö ante do againgä inte tömengä
iñömö apænte ancæcæximpa. Edæ waa
cægaimö imö adinque tömengä mönö imonte
edæ eyepæ pönī pædæ pönongä ænguimö
imaimompa. Wæætē edæ wēnæ wēnæ
cægaimö imö adinque tömengä wæætē
eyepæ pönī pangä wæbaimompa.

*Wængonguī piycēnē cædinque, Pöedāni,
angampa*

¹¹ Ìninque mönö Awēnē ingante guīñente
wæmöni inte mönitö waodāni inānite

godö waadete apænemönipa. Codito gämænö pöninque watapæ quëwengæimpa, ante pönencædänimpa, ante mönitö godö waadete apænemönipa. Edæ, Mönitö æbänö ewocamönii, ante Wængongui do edonque acampa. Ayæ adobai mīnitö mīmō entawēmīni inte mönitö ewocadö ante edonque amīni īnīnque botö waa tobaimopa.

¹² Mänömainö ante apænedinque mönitö, Waëmö pönī imönipa, ante nämä ante dicæ ämönīyaa. Wæætē iīmaī ante apænemönipa. Pancadāniya iñömö mönitö awincaque adinque, Pabodoidi æbänö ewocadāni, ante adāmaī ināni inte tömēnāni nāni adōnonque ante pönēninque nämä ængö cæte bai todānīpa. Mīnitö guiquēnē, Mönitö æbänö ewocamönii, ante do amīnitapa. Īnīnque tömēnāni mönitö imönite ante pīinte änāni eñēninque mīnitö wæætē edæ, Pabodoidi nö ewocadāni inte waa cædāni amönipa, ante wææ apænecæmīnīpa, ante cæbopa. ¹³ Edæ ömæcamöni bai cæmōni incæte Wængongui beyænque ante mänömaī cæmönipa. Wæætē nö pönente cæmōni incæ mīnitö beyæ ante cæmönipa.

¹⁴ Īimainö ante pönente wædinque edæ mänömaī cæmönipa. Tömämö beyæ adocanque wængacäimpa, ante adinque mönitö, Mönö tömämö do wængamöimpa, ante edonque eñēmönipa. Īnīnque, Mönö Codito nanguī waadete pönengä inte pönö cæcampa, ante pönēninque mönitö ædö cæte wapiticæ cæquimönii. ¹⁵ Mönö Codito iñömö tömämö beyæ wæninque, Mīnitö idæwaa nämä beyænque quëwēmīnīpa, ante wængacäimpa. Ayæ, Botö nē wænte ñāni ömæmongaimo iñömote mīnitö botö beyæ ante quëwencæmīnīpa, ante cædinque tömengä tömämö beyæ wængacäimpa.

¹⁶ Mänömaī impa, ante pönēninque mönitö ñöwo iīncayæ ate waodāni inānite adinque, Inguipogaque eñate quëwēnānīpa, ante pönēnāmaī imönipa. Edæ mönö Codito incæ inguipoga eñate quëwēñongante mönitö mänömainö ante pönengaimōni incæte mönitö ñöwo wæætē mänömainö ante wīi pönēmönipa. ¹⁷ Īnīnque Codito nempo æcānö quëwēnaa tömengä ingante Wængongui mīngä badongä ate mīngä bate quëwengampa. Tömengä nānō inguipogaque nānō quëwēnimāmo edæ dæ

gotimpa. Ñöwo wæætē edæ mīimāmoque ewocacampa.

¹⁸ Mäninö botö änö ante tömänö nē pönö badongä iñömö edæ Wængongui adocanque ingampa. Tömengä iñömö, Mīnitö eñēnāmaī cæmīni incæte Codito pönö cæcä beyænque botö piyænē cæcæboimpa, angampa. Īnīnque botö piyænē cæbo adinque mīnitö botö gämænö pödāni, angampa. Ayæ mönitö imönite pönö angä eñēninque mönitö wæætē edæ wadāni inānite, Wængongui piyænē cædinque, Pödāni, angampa, ante nē cæmōni batamönipa. ¹⁹ Īnīnque iīmaī ante apænemönipa. Codito tönö godongāmæ cædinque Wængongui iñömö piyænē cædinque, Inguipoga quëwēmīni tömāmīni botö gämænö pödāni, angampa. Pōmīni adinque botö, Æpogadö wēnæ wēnæ cæmīnitawo, ante tee mante adāmaī inte pīināmaī incæboimpa, angampa.

Tömengä mänömaī angä eñēninque mönitö wæætē mänīne ante nē waadete apænemōni badinque edæ, Wængongui piyænē cæcä adinque pödāni, ante apænemönipa. ²⁰ Īnīnque Wængongui mönitö imönite änīnque, Mīnitö wæætē botö beyæ wadāni inānite waadete apænemīni eñēninque poncædänimpa, angä eñēninque mönitö wæætē Codito beyænque nē waadete apænemōni bamönipa. Īnīnque mīnitö imīnite waadete pönö apænedinque mönitö, Wængongui gämænö pödāni, ante Codito beyænque ante apænemönipa.

²¹ Wængongui, Mīnitö Codito nö nānō ewocadö ænte ewocacæmīnīpa, ante pönö cædinque Codito ingante angä eñēninque tömengä iñömö edæ wēnæ wēnæ ewocadāmaī inte wæætē edæ mönö beyæ ante nē wēnæ wēnæ cæcä bai badinque mönö wentamö ewocadö incæ mongængacäimpa. Īnīnque mönitö tömengä nempo quëwēninque nö pönī tömengä nānō ewocadö wæætē ænte ewocamompa.

6

¹ Tömengä tönö godongāmæ nē cæmōni inte mönitö mīnitö imīnite iīmaī ante waadete apænemönipa. Wængongui waadete pönö cæcä æmīni inte mīnitö wīi önonque oda cæcæte ante æncæmīnīpa,

ante nanguï ämöni eñëmaïminipa. ² Edæ Wængonguï do angacäimpa,

“Minitö iminite botö waadete pönö cæyedë mäniñedë minitö apænemini eñentabopa.

Ayæ, Mini quëwenguïönæ impa, ante Codito nänö bæi ongonte æñedë botö mäniñedë minitö beyæ pönö cægaboimpa.”

Ante yewæmongatimpa. Ìninqe botö iïmaï ämo eñëedäni. Wængonguï tömengä nänö waadete pönö cæyedë do ba apa quëwëminii. Codito edæ ængä beyænque mïni quëwenguïönæ iñömö edæ do batimpa cæminii.

³ Mönö quëwenguïnö ante adocanque incæ Wængonguï beyæ möni apænedö ante pïinämaï incæcäimpa, ante wææ cædinque mönitö iñömö idiquibæ cädämaï imönipa. ⁴ Wæætë minitö, Pabodoidi Wængonguï beyæ nè cädäni inänipa,

ante acæminimpa, ante odömoncæte ante mönitö cöwë iïmaï cæmönipa. Cöwë nantate wæmöni incæ wënæ wënæ cädäni wæmöni incæ mö ongonte wææ cädäni wæmöni incæ æbämenque wæmöni incæte mönitö cöwë wæntæye badämaï inte ee cæmönipa. Ædö cæte quëwenguï, ante wæmöni incæ Wængonguï beyæ nè cæmöni inte mönitö godömenque cæmöni aedäni.

⁵ Ayæ tæi tæi pänäni wæmöni incæ tee mönedäni wæmöni incæ Yæ yæ ante mönitö imönite wido cädäni incæte mönitö wæætë Wængonguï ingante nè cæmöni inte edæ nanguï cæmönipa. Ayæ woyowotæ nanguï cædinque mönitö möwo mönämaï inte cæmöni incæ cænguï cænämaï inte gæwænte wædinque cæmöni incæ mönitö godömenque cæmöni aedäni.

⁶ Mänömaï cædinque mönitö wentamö mongænämaï inte cæmönipa. Ayæ wadäni æbämenque cädäni incæ mönitö nö eñëmöni inte edæ piyænë cæte pïinte änämaï imönipa. Wæætë waadete cæmönipa. Edæ Wængonguï Tæiyæ Waëmö Önöwoca nempo quëwëninque näwangä waadete pönëmönipa. ⁷ Wængonguï nänö tæi piñænö ewocadinque mönitö Wængonguï nö nänö angainö ante apænemönipa. Ayæ tontadoidi guëadö guëa wænnoncæte ante tipæmäa næænäni bæi cædinque mönitö

nö pönö cæcæte ante Wængonguï nänö tæi piñænö ante eyepæ næænte bæi cæmönipa.

⁸ Mönitö imönite waa adäni incæ wiwa adäni incæte mönitö Wængonguï beyænque ante cæmönipa. Pabodoidi waa pönö cädänipa, ante nö apænedäni incæ wæætë, Pabodoidi wënæ wënæ cädänipa, ante tedewënäni incæ mönitö cöwë godömenque cæmönipa. Pabodoidi babæ cädänipa, ante pïinäni incæte mönitö nöngä pönente Wængonguï beyænque ante cæmöni aedäni. ⁹ Edæ tömänäni mönitö imönite do edonque pönö adäni incæ adämaï inte bæi cædinque, Önöminique iminipa, ante tededänipa. Wæncæ cæmöni incæte ee quëwëmönipa. Pänäni wæmöni incæte mönitö imönite wænönämaï inänipa. ¹⁰ Wæwëmöni incæte mönitö cöwë mïmöno watapæ towocamönipa. Mönitö mäincoo ömæpomöni incæ wadäni inänite godö cæmöni æninque tömënäni mäincoo nanguï pönö ænte bæi eyepæ pönö entawënänipa. Edæ nè ömæpomöni inte wæmöni incæte mönitö tömancoo pönö entawëmöni inte Wængonguï ingante nè cæmöni imöni aedäni.

¹¹ Coodintoidi eñëedäni. Minitö iminite mönitö edonque pönö apænetamönipa. Minitö iminite nanguï pönö waadete pönëmönipa. ¹² Mönitö dicæ pæ gom-pote minitö iminite waadedämaï imöniyaa. Wæætë edæ tömëmïni pæ gom-podique edæ mönitö imönite waadedämaï imïni inte wæwëminipa. ¹³ Ìninqe botö wëñæmïni bæi iñöminite iïmaï ämopa. Minitö iminite waadete pönëmöni adinque minitö næëmæ waadete pönëedäni.

Wængonguï nè Quëwengä nänö owocö bæi imompa, ante

¹⁴ Guëa mangæ mangæ woquïna, ante wagada tönö bodo guëa goti wëmencädämaï iedäni, ante do yewæmongatimpa cæminii. Pönënämaï inäni tönö godongämæ cädämaï iedäni. Ìñæmpa nè nö cæcä tönö guëa äantawente bæi nè eñënämaï cæcä guiquënë dicæ adobäi entawengä. Ayæ ñäö entawengä tönö guëa gocæte ante cædinque nè wëmö entawengä iñömö mïmö ñäö entawengampa diyæ guëa goquingä. ¹⁵ Codito nänö pönënö ante edæ wënæ awënë Bediado iñömö edæ adodö ante

pönengampa diyæ guëa cæquingää. Nē wede pönengä nänö pönënö ante nē pönënämaï ingä iñömö edæ adobaï pönengampa diyæ adobaï quëwenguingää. ¹⁶ Ayæ, Wængonguï impa, ante waodäni nāni badöninca æninque edæ näwä Wængonguï tæiyæ waëmö oncönë ædö cæte mangui cö cæquü. Mönö guiquënë Wængonguï nē Quëwengä nänö tæiyæ waëmö owoquincö bai iñömonte tömengä Önöwoca mönonga pö guiite owocampa. Ìninqe tömënäni tönö mönö ædö cæte godongämæ cæquü. Wængonguï incæ, Mänömaï impa, ante ancæte ante iïmaï angacäimpa.

“Waodäni weca owodinqe botö tömënäni tönö godongämæ cægoncæboimpa. Botö tömënäni Wængonguï iñömote tömënäni wæætë botö quïnäni incædänimpa, angacäimpa.”

¹⁷ Mänömainö ante apænedinqe mönö Awënë adobaï ante,

“Wadäni inänite taayænte pöninqe nänënë ponte quëwëedäni, angampa.

Wentamö i adinqe gampodämaï iedäni.

Mänömaï cæmïni adinqe botö mïnitö imïnite, Pöedäni, ante ee æncæboimpa.

¹⁸ Æninque, Mïnitö Wæmpobo inömo inte botö,

onguïñæmïni incæ onquiyæmïni incæ, Botö wëmïni imïnipa, ante æncæboimpa, ante nē Tæï Piñænogä inte Awënë Wængonguï angampa.”

Ante Wængonguï beyæ yewæmongatimpa.

7

¹ Ìninqe botö nē waademini ëñëedäni. Mönö iñömö, Wængonguï, Cöwë cæcæboimpa, ante nänö angainö ante do ëñengamöimpa. Ìninqe baonga wentamö mönö ëñadö tönö mïmö mönö wentamö entawënö adobaï nā mënongate bai cædinque edæ mönö tæiyæ waëmö ëwocate quëwengæimpa. Ayæ, Wængonguï ingampa, ante guïñente wædinque mönö, Cöwë nō cæte waa quëwengæimpa, ante nanguï cæcæimpa.

Coodintoidi Codito gämænö pönänipa

² Mönitö dicæ wacä ingante wënæ wënæ cæmönïyaa. Wacä wentamö nänö mongænguinque mönitö dicæ wënæ wënæ cæmönïyaa. Dicæ wapiticæ apænedinqe

wacä quï ö æmönïyaa. Ìninqe, Pabodoidi mänömaï cædämaï inänipa, ante adinqe mïnitö wæætë mönitö imönite waadete pönëninque ëñëedäni, ämopa. ³ Mänömainö ante ämo incæte botö, Mïni pante wæquinque, ante dicæ apænte ämogaa. Edæ botö do antabopa. Mïnitö tönö möni quëwenguinque incæ mïnitö tönö möni wænguinque incæ mönitö mïnitö tönö äanque bai entawente mïnitö imïnite cöwë waadete pönëmönipa, antabopa. ⁴ Edæ, Mïnitö nō pönente cæmïni imïnipa, ante pönëmopa. Mönitö apænemöni ëñëninque mïnitö nē waa cæmïni bamïnitapa, ante adinqe botö mönitö apænedö ante nanguï tobopa. Mïnitö mänömaï cæmïni imïnipa, ante ëñente wædinque botö gancæ pönëmopa. Ìninqe mönitö wënæ wënæ inte wæwëmöni incæte botö wæætë godömenque watapæ tobopa.

⁵ Iïmaï edæ Mäatedöniabæ pöninqe cætamönipa. Æmætæ æmætæ gote apæncæte ante cæyömönite wadäni bæ ta bæ ta cædäni wædinque mönitö ædö cæte guëmanguïmönii. Edæ nanguï piñte cædäni wædinque mönitö baonga nantate wædinque önöwoca adobaï guïñente wæwocatamönipa. ⁶ Incæte mönitö wæwëñömönite, Nē wæwënäni gancæ bacædänimpa, ante nē pönö cæcä inongä Wængonguï iñömö Tito ingante da pönongä pongä adinqe mönitö wæætë gancæ pönentamönipa. ⁷ Tömengä ponte a ongongä beyæ gancæ pönëñömönite tömengä, Coodintoidi botö imote waa cædäni adinqe botö wæætë gancæ pönentabopa, ante apæncæ ëñente mönitö godömenque totamönipa. Ayæ botö imote ante apænedinqe tömengä, Bitö imite ante nanguï aïñente wædinque coodintoidi Ca ca wædänipa. Tömënäni iñömö, Mönö ñöwo Pabodo beyæ ante nanguï cæcæimpa, ante wædänipa, ante Tito tedecä ëñëninque botö godömenque nanguï totabopa.

⁸ Botö doyedë cadota ante yewæmöninqe da godömo æninque mïnitö wæwente bamïnitawo. Näwangä botö cadota beyæ wæwente bamïnitapa, ante wædinque botö, Quïnante mänömaï yewæmömoï, ante wætabopa. Incæte ayæ ate, Coodintoidi wantæ iñö wæwëninque ñöwo iñömö edæ

wæwënāmaī inānīpa, ante adinque botō ñōwo edæ, Nō cædinque yewæmōmoīmpa, ante piyænē cæbopa. ⁹ Edæ mīnitō wæwēmīni beyæ todāmaī inīmo inte botō wæætē, Mīni wënæ wënæ cædinō ñīmpo cædinque mīnitō Codito gāmænō mīni ponguinque wæwente bamīnitapa, ante adinque mǎnōmaī beyænque totabopa. Edæ Wængonguī nānō ānōnō mīni ēñenguinque wæwente bamīni ininque mōnitō cædō beyæ dicæ wæmīniyaa.

¹⁰ Edæ Wængonguī nānō ānōnō ante wæwēmō bai mōnō ocæ ēmænte ponte quēwenguinque impa. Ininque, Quīnante mǎnōmaī wæwēmoī, ante wædāmaī imōmpa. Wæætē inguipoga mōnō quēwenguīmāmo ante wæwēmō bai mōnō wænguinque impa. ¹¹ Edæ Wængonguī nānō ānōnō ante do wæwēnimīni inte mīnitō ñōwo, Mǎninō mōni wæwēnō beyæ æbānō entawēmōnīi, ante nāmā aedāni. Edæ mǎnōmaī wæwēmīni inte mīnitō, Mōnō ee ongōnāmaī inte cæcæīmpa, ante do cæmīnitapa. Cædinque, Mōnō pōnencabo wentamō mongænāmaī ingæīmpa, ante nanguī cædinque mīnitō nē wënæ wënæ cædingā ingante edæ do pīimīnitapa. Ayæ, Pabodo æbānō anguingāā, ante guīñente wæmīni incæte botō imote ante ainente wæmīnitapa. Ayæ, Nē wënæ wënæ cædingā ingante mōnō nō ante pangæīmpa, ante do cæmīnitapa. Mǎnōmaī eyepæ cædimīni inte mīnitō wentamō mongænāmaī imīnīpa, ante edonque abaimpa.

¹² Ininque mīnitō imīnite yewæmōninque botō nē wënæ wënæ cædingā beyæ ante wīi yewæmontabopa. Tōmengā wënæ wënæ cæcā wædingā beyæ ante adobai yewæmōnāmaī intabopa. Wæætē mīnitō Wængonguī ayongā nāmā adinque, Mōnitō Pabodoidi inānite waadete amōnīpa, ante, Nāwangā impa, ante edonque acæmīnīmpa, ante botō mīnitō beyænque ante yewæmontabopa. ¹³ Mīnitō mǎnōmaī cæmīni adinque mōnitō wēenēñedē nē wæwēmōni inte ñōwo iñōmō gancæ pōnēmōnīpa.

Mīnitō waa cæmīni beyæ wēenēñedē wæwēningā inte Tito adobai gancæ pōnente ñōwo watapæ pōnengampa, ante adinque

mōnitō do gancæ pōnēmōni inte ñōwo godōmenque nanguī tomōni imōnīpa. ¹⁴ Botō do inōñedē Tito ingante apænedinque, Coodintoidi waa cædāni abopa, antabopa. Ñōwo mīnitō waa cæmīni adinque botō, Tito ingante botō apænedinō nō impa, ante adinque botō guingo imōnāmaī imopa. Edæ botō mīnitō imīnite nōinō ante apænetawo. Edæ mīnitō imīnite nōinō ante apænebo bai botō Tito ingante, Coodintoidi waa cædānīpa, ante apænedinque adobai nōinō ante apænetabopa. ¹⁵ Ayæ Tito iñōmō, Coodintoidi tōmānāni botō imote waa adinque guīñente wædānitapa. Ayæ, Pōe, ānīnque tōmēnāni botō apænebo ēñēninque Ao ante ēñente cædānitapa, ante pōnēninque tōmengā mīnitō imīnite godōmenque waadete pōnengampa. ¹⁶ Ayæ, Mīnitō cōwē waa cæmīni imīnīpa, ante pōnēninque edæ botō adobai watapæ tobopa.

8

Mōnō godōmenque nanguī godongæīmpa, ante

¹ Ñōwo botō tōniñadāni apænebo ēñēdāni. Māatedōniabæ iñōmō Codito ingante godongāmæ nāni pōnencabo wayōmō nāni cabo wayōmō nāni cabo ongōñōnānite Wængonguī Ōnōwoca pōnō apænecā ēñēninque tōmēnāni wæætē waadete cædinque iīmaī cædānīpa. ² Nanguī wënæ wënæ nantate wæwēnāni incæ tōmēnāni cōwē piyænē cæte watapæ todānīpa. Ininque ōmæpodāni incæte tōmēnāni nanguī mǎnāni bai cædinque, Wængonguī quīnāni quī, ante godōmenque todinque nanguī gomonga godōnānitapa. ³ Tōmēnāni edæ nāni godonguēnēnō ganca do godōninque ayæ godōmenque nanguī godōnāni adīmo inte botō, Nāwangā impa, ante apænebopa. Ayæ edæ tōmēnāni nāni nāmā pōnēnō bai cædinque, ⁴ Wængonguī quīnāni beyæ impa, ante mōnitō wadāni tōnō godongāmæ godoncæmōnīmpa, ante tōmēnāni mōnitō imōnite nanguī ānīnque ancaa ānānitapa. ⁵ Mōnitō guīquēnē, Māatedōniabæ quēwēnāni tōmēnāni nāni godonte æīntaque godonguīnāni inānīpa, ante edæ pōnentamōnīpa. Incæte tōmēnāni,

Wængonguī quīmōni imōnipa, ante edæ Wængonguī ingante nāmā godōninque ayæ, Mīnitō imīnite nē cæmōni bacæmōnimpā, āninque mōnitō imōnite edæ adobaī nāmā pōnōnānitapa. Ayæ mōnitō pōnēnō ganca adobaī godōninque tōmēnāni nāni godonte æinta ayæ godōmenque godōnānitapa.

⁶ Māatedōniabæ quēwēnāni mānōmaī cædāni adinque mōnitō Tito ingante iīmaī antamōnipa. Bitō doyedē āmi ēñēninque coodintoidi waadete pōnēninque tæcæ godoncæ cædānitapa cæbii. Nōwo wæætē āmi ēñēninque tōmēnāni nē waadete godōnāni badinque eyepæ godoncædānimpā, ante mōnitō Tito ingante nanguī antamōnipa. ⁷ Mīnitō iñōmō wede pōnēmīni inte edæ nē waa pōni apænēmīni imīnipa. Ayæ godōmenque gomonga ēñēmīni inte mīnitō, Mōnō cōwē cæcæimpā, ante nanguī cædōmīni imīnipa. Ayæ mōnitō imōnite nē waadete pōnēmīni imīnipa. Mānōmaī tōmānō ante do cædōmīni inte mīnitō nōwo adobaī, Wængonguī qui, ante mōnō nē waadete godōmō bacæimpā, ante edæ nanguī cædāni, āmopa.

⁸ Mānōmaīnō āninque botō, Cædāni, ante wææ ānāmaī imopa. Wæætē, Mīnitō æbānō cæmīnii, ante ēñencæte ante cædinque botō wadāni nāni nanguī cædinō ante apænetabopa. Mānōmaīnō ante apænedinque botō, Mīnitō adobaī tōmēnāni nāni cæbaī nanguī waadete pōnente cæmīnitawo, ante acæte ante cædinque, Nē godōmīni baedāni, antabopa. ⁹ Mīnitō do ēñēmīnipa. Mōnō Awēnē Itota Codito oōnædē quēwēninque nanguī gomonga ēnemogaingā inte mōnō imonte waadete pōnēninque iīmaī ante pōnō cægacāimpā. Botō omæpobo babo beyænque mīnitō nanguī wæætē entawencæmīnimpā, ante cædinque tōmengā edæ mīnitō beyænque ante inguipoga pōninque edæ omæpocā bagacāimpā.

¹⁰ Ayæ, Mānīnō mīni godonguīnō ante æbānō cæquēnēmīni imīnii, ante botō nāmā pōnēninque iīmaī āmopa. Wadepō inōñedē wadāni godōnāmaī iñōnāni mīnitō iñōmō edæ do tāno godōmīnitawo. Mōnō godongæimpā, ante edæ mīnitō cōwē tāno cæinēmīni imīnitawo. ¹¹ Īninque, Mōnō

godongæimpā, ante quingæ ānimīni inte nōwo edæ ĩnque cædāni. Mīni ēadincōo adinque mīnitō, Eyepæ inte botō panca-cooga godoncæboimpā, ante mīni ānincōo edæ godōmīni adinque, Eyepæ godōmīnipa, ante acæimpā. ¹² Edæ æcānō godōinengā tōmengā nānō godonte æinta tōmanta adinque, Æpotadō botō godonguēnēmo imoo, ante adinque mānimpotaque godōninque idæwaa. Godōmenque nanguī mangampā diyæ nanguī godonguingā.

¹³ Mānōmaī āninque botō, Wadāni pōnōmenque godōninque guēmāñōnāni mīnitō wæætē mīni eyepote wæquinque godōmenque nanguī godoncæmīnimpā, ante dicæ āmogaa. ¹⁴ Wæætē, Cōwē eyepæ bacæimpā, ante āmopa. Edæ māincōo nōwo eyepæ māninque mīnitō nē ænguēnente wædāni inānite godōmīni ænānipa. Īninque ĩncayæ ate mīnitō wæætē nē ænguēnēmīni bamīni ate tōmēnāni wæætē eyepæ mante ate mīnitō imīnite pōnōnāni æñōmīni adopo adopo edæ eyepæ babaimpā. Mānōmaīnō ancæte ante āmopa. ¹⁵ Edæ do yewæmongatimpā. “Cænguī gomonga wææmpo æningā incæ tōmengā nānō ænguēnenganca ænte baī māninque godōmenque mānāmaī ingantapa. Wæætē edæ wædænque wææmpo æningā guiquēnē tōmengā nānō ænguēnenganca eyepæ ænte baī eyepæ mangantapa.” Ante nāni yewæmongainō baī ĩnque bacæimpā, ante mīnitō imīnite āmopa.

Mīnitō weca Titoidi poncædānimpā, ante

¹⁶ Botō cōwē, Coodintoidi beyæ cæcæimpā, ante mīnitō imīnite waadete pōnēmopa. Ayæ, Wængonguī pōnō apænecā ēñēninque Tito iñōmō botō pōnēmo baī adobaī pōnente cæcampa, ante adinque botō wæætē Wængonguī ingante waa ate pōnēninque apænebopa. ¹⁷ Edæ mōnitō, Coodintoidi weca goe, āmōni ēñēninque edæ Tito do Ao ante pongā aedāni. Incæte wīi mōnitō ānīnō beyænque pongampā. Wæætē nāmanque pōinente wædinque tōmengā nanguī todinque mīnitō weca pongampā.

¹⁸ Ayæ Tito tōnō wacā mōnō tōniñacā ingante da pōnōmōni pongampā. Īngā Tito tōnō nē pongā iñōmō tōmengā Codito

ingantedö ante watapæ möni apænedö ante nē apænecā ingampa. Īnque Codito ingante godongāmæ nāni pōnencabo wayōmō nāni cabo wayōmō nāni cabo tōmānāni tōmengā ingante waa ate waa apænedānīpa. ¹⁹ Codito ingante nāni pōnencabo incæ adocā ingante apænte ænque, Pabodoidi tōnō gocæbiimpa, ante da godōnāni ate tōmengā mōnitō tōnō godongāmæ goquingā ingampa. Edæ mōnitō, Mōnō Awēnē ñāō apāite bai ēmongā ingampa, ante acædānīpa, ante cædinque ayæ, Mōnitō wadāni beyæ cæinēmōnīpa, ante acædānīpa, ante cædinque mīnitō da godonguīcoo ænte goquīmōni imōnīpa. Mānōmaī cæcæte ante goyōmōni, Tōmengā godongāmæ gote cæcæcāimpa, ante da godōnāni gocæcāimpa. ²⁰ Edæ wadāni, Pabodoidi babæ cædānīpa, ante ānāmaī incædānīpa, ante wææ cædinque mōnitō nō pōnī cædinque nanguī pōnī mīnitō godonguīcoo ænte godinque pædæ godoncæmōnīpa. ²¹ Edæ, Mōnitō Wængonguī ayongā nō cæmōni inte waodāni ayōnāni adobāi edonque pōnī cædinque nō pōnī cæcæimpa, ante cæmōnīpa.

²² Ayæ wacā mōnō tōniñacā iñongante mōnitō æpogamē cōwā ayōmōni tōmengā cōwē tōmāā nō cæcā inongampa. Ayæ ñōwo tōmengā, Coodintoidi nō cædānīpa, ante pōnengā inte godōmenque waa cædongā ingampa. Mānōmaī ingampa, ante adinque mōnitō ñōwo tōmengā ingante da godōmōni godinque tōmengā iñāna tōnō mīnitō weca poncæcāimpa. ²³ Tito iñōmō botō tōnō godongāmæ cōwē cæcampa. Īnque mīnitō beyæ guēa nē cæmōna imōnāpa. Codito ingante nāni godongāmæ pōnencabo incæ mōnitō tōniñada Tito tōnō wada inate da godōnāni godinque tōmēnāni, Mōnō Codito ingante waa acædānīpa, ante nanguī cæda ināpa. ²⁴ Īnāni inānite apænedinque mōnitō, Coodintoidi nē waa cædāni inānīpa, ante do apænetamōnīpa. Īnque mīnitō eyepæ godōmīni adinque tōmēnāni, Nāwangā impa, ante edonque acædānīpa. Ayæ adobāi, Mīnitō waadete pōnō cæmīni adinque Pabodoidi wæætē mīnitō imīnite waa

adānīpa, ante acædānīpa, ante cædāni. Mānōmaī cæmīni adinque Codito ingante godongāmæ nāni pōnencabo wayōmō nāni cabo wayōmō nāni cabo tōmānāni adobāinō ante edonque acædānīpa.

9

Mōnō wædāmaī eyepæ pōnī godongæimpa, ante

¹ Ñōwo mānīnō, Wængonguī quīnāni beyæ mīnitō godoncæmīnīpa, ante botō idæwaa yewæmōmopa. ² Edæ, Mīnitō wædāmaī inte do cæmīnīpa, ante ēñēnque botō Māatedōniabæ quēwēnāni inānite apænedinque, Acayabæ quēwēnāni iñōmō wadepo inōñedē do godoncæte ante cædōnānīpa, ante do apænetabopa. Apænebo ēñēnque tōmēnāni wodo tōmānāni, Æ Acayabæ quēwēnāni nāni quingæ cæbai mōnō adobāi cæcæimpa, ante cædānīpa.

³ Incæte botō ñōwo mōnō tōniñadāni inānite da godōmo pōnque tōmēnāni mīnitō imīnite apænedāni ēñēnque mīnitō wæætē eyepæ godoncæmīnīpa. Mānōmaī cæmīni ate botō babæ apænedāmaī imōi, ante edonque ēñengæimpa. ⁴ Īñæmpa Māatedōniabæ quēwēnāni botō tōnō godongāmæ ponte ayōnāni mīnitō wīi eyepæ cæmīni adinque tōmēnāni wæætē, Mīnitō dicæ cæmīniyaa, ante badete tobainānīpa. Ayæ mōnitō guiquēnē, Coodintoidi iñque cæcædānīpa, ante nē ānīmōni inte odadete guingo imonte wæbaīmōnīpa. Mīnitō adobāi, Mōni cæquēnēnō cædāmaī imōnīpa, ante guingo imonte wæbaīmīnīpa. ⁵ Īnque mīnitō, Godoncæmōnīpa, ante mīni ānīnō bai eyepæ godoncæmīnīpa. Ante cædinque botō mōnō tōniñadāni inānite ānque, Mīnitō gote apænemīni ēñēnque coodintoidi ædæmō pōnente cæcædānīpa, ante da pōnōmo pōnāni aedāni. Īnque mīnitō tōnō godongāmæ cædāni ate mīnitō ædæmō pōnēnque, Botō wææ gompodāmaī inte waa todinque godōmopa, ante godoncæmīnīpa.

⁶ Īmaī ante pōnēedāni. Wædænque quiyadingā iñōmō amīñāimō wædænque pete æncæcāimpa. Nanguī quiyadingā guiquēnē amīñāimō nanguī pete

æncæcäimpa. ⁷ Wadäni qui, ante æcänö watapæ toduque godönaa, ante adinque Wængongui tömengä ingante waadete pönengampa. Ìninqe wadäni wææ änämaï iñönäni mīnitō, Botō æpotadō godonguimoo, ante pönēninque tömämini wädämaï inte mīni änimota adopota godöninque do godonguēnēmīni imīnīpa. ⁸ Ayæ, Eyepæ pōni ēamīni inte mīnitō quiēmē cämīni incæ tömānāni beyæ ante cōwē godō waa cæcæmīnimpa, ante Wængongui cæcampa. Ìninqe, Mīnitō eyepæ ænte ēadinque mänōmaï cæcæmīnimpa, ante tömengä nanguï cædongä inte cōwē eyede tate bai waadete pönö cæcä ingampa. ⁹ Edæ docä ingante ante iīmaï ante yewæmongatimpa. “Yepanca quiyacä bai ñongä inte tömengä, Ömæpodäni qui, ante wayömö wayömö godongantapa.

Ìninqe tömengä nö nänö cædinö iñömö edæ cōwē ewēnāmaï ongongæimpa.”

¹⁰ Ante yewæmongatimpa. Nē quiyacä ingante Wængongui, Tömēmö quiyaquimö, ante eyepæ pönöninque adobai, Cængui, ante tömämo imonte eyepæ pönongä ænte cæmompā. Mīnitō iñömö eyepæ ēamīni inte wacä ingä wacä ingä quiyate bai nēnempocæmīnimpa, ante cædinque Wængongui mīni godonganca da pönöninque godömenque gomonga da pönongä æncæmīnimpa. Mänōmaï eyepæ da pönongä æninque mīnitō wæætē nö cædinque wadäni nanguï inäni inänite nēnempomīni æninque tömēnāni wæætē amiñāimö tā pete bai watapæ quēwencædānimpa. ¹¹ Mīnitō pæ gompodāmaï inte wadäni inänite cōwē pædæ godoncæmīnimpa, ante cædinque mīnitō imīnite Wængongui nanguï pōni pönongä æncæmīnimpa. Æninque mīnitō pæ gompodāmaï inte pædæ godō pædæ godō cämīni adinque mönitō wæætē, Coodintoidi mänōmaï cædānīpa, ante tedemōni ēñēninque wadäni wæætē Wængongui ingante waa ate pönēninque apænecædānimpa.

¹² Wadäni qui, ante do godömīni æninque Wængongui quīnāni tömēnāni nāni ænguēnēnō ante eyepæ pōni æncædānimpa. Ayæ mīni godönö æninque tömēnāni

mīmōno eyede tate bai Wængongui ingante waa ate pönēninque nanguï apænecædānimpa. ¹³ Mönö Codito ingant-edö ante watapæ ēñēninque mīnitō Ao ante do pönēmīnitapa. Ìninqe Wængongui nänö änönö ante do ēñente cædinque mīnitō, Ömæpodäni qui, ante pædæ godömīni æninque nē ænāni wæætē Wængongui ingante, Bitō ñäö bai nö pōni cæbi ate coodintoidi bitō änönö ante ēñente cædānīpa, ante watapæ apænecædānimpa. Ayæ nē ænināni inte adodāni godömenque apænedinque, Nē ömæpodäni tömānāni inänite da godöninque coodintoidi iñömö mönitō imönite adobai eyepæ pönönāni æmönīpa, ante Wængongui ingante godömenque waa ate apænecædānimpa. ¹⁴ Ayæ, Coodintoidi inänite Wængongui godömenque nanguï waadete pönö cæcä beyænque tömēnāni waa cædāni inänīpa, ante pönēninque nē ænināni iñömö edæ mīnitō imīnite waadete pönēninque mīnitō beyæ ante Wængongui ingante apænecædānimpa.

¹⁵ Wængongui iñömö godömenque waa cædinque mönö Codito ingante da pönongä ængamöimpa. Ìninqe mönö, Wængongui, bitō waa pōni pönö cægabiimpa, ante mönitō ædö cæte eyepæ inte waa ate pönente apænequimōnīi, ante mönö Wængongui ingante apænecæimpa.

10

Pabodo, Itota nänö nē da godönimo imopa, angampa

¹ Mīnitō, Wayömonque quēwēninque Pabodo nanguï pīnte angampa, ante pönēmīnitawo. Wæætē mönitō weca pöninque awincadō awinca adinque tömengä guiñēnete wædinque pæ wēēnecampa, ante pönēmīnitawo. Ìñæmpa mīni änömo mänimotō inte iīmaï ämopa. Codito iñömö edæ gänē pönengä ñongä inte pönö piyænē cæcantawo. Botō adobai ñöwo piyænē cædinque mīnitō imīnite pönö waadete apænebopa. ² Pabodoidi iñömö inguipogaque ante pönente cædānīpa, ante pancadāniya odadete änewēnānīpa. Tömēnāni inänite botō guiñēnedāmaï inte nanguï ancæboimpa. Mīnitō quiquēnē

adobaï odadete ämïni ïnïnque botö mïnitö weca pönïnque pïinte angüenëmo ïmaïmopa. ïnïnque, Wïï pïinte angüïmo bacæboïmpa, ante wææ cæcæte ante botö ñöwo mïnitö ïmïnite, Ee aquenë quëwëminii, ante waadete pönente yewæmömopa.

³ Edæ inguipoga quëwëmöni incæte mönitö Wængonguï beyæ ante wæætedö wæætë cæcæte ante cædinque inguipogaque quëwënäni nïni wæætedö wæætë cæï baï cædämaï ïmönipa.

⁴ Wæætë edæ mönitö Wængonguï beyæ ante wæætedö wæætë cæcæte ante cædinque inguipogaque quëwënäni nïni wænnoncaquincoo næænämaï inte cæmönipa. Wæætë Wængonguï tömengä nänö tæï piñæmämo ænte mïmöno entawëninque eyepæ næænte baï badinque mönitö tömënäni nïni tæï mænöincö bæ tate baï cædinque wæætedö wæætë nïni godö änewënö ante wido cæte baï cæmönipa. ⁵ Wængonguï ingante pönënämaï ingæïmpa, ante në pönëwënäni inte ængæ gantidinque tömënäni ïñömö, Wadäni tömänäni adobaï Wængonguï ingante pönënämaï incædänïmpa, ante cædinque babæ wapiticæ cædänipa. Mänïï babæ wapiticæ nïni cædönö ante mönitö wæætë bæ tate wido cæmönipa. Edæ, Codito ingante mönö eñengæïmpa, ante nö apænemöni eñëninque wadäni idiquibæ pönëwënäni ïñönäni mönitö wæætë mäninö nïni pönëwënö tömänö ö ænte baï wido cæmönipa. ⁶ Ayæ mïnitö ædæmö në eñente cæmïni bamïni ate adocanque incæ eñënämaï cæcä adinque mönitö wæætë tömengä ingante do panguïmöni ïmönipa.

⁷ Æbänö ï, ante edonque ongö abaiïmïnipa. Pancamïniya, Botö näwangä Codito nempo quëwëmo ïmopa, ante pönëmïnitawo. Mïnitö mänömaï pönëmïni inte godömenque ïïmaï ante pönenguënëmïni ïmïnipa. Botö Codito nempo quëwëmo ïmo baï Pabodoidi adobaï Codito nempo quëwënäni ïnänipa, ante näwangä ïmpa, ante pönenguënëmïni ïmïnipa. ⁸ ïñæmpa Wængonguï mönitö ïmönite äninque, Mïnitö në ämïni badinque coodintoidi ïnänite bæ tate wido cædämaï incæmïnïmpa. Wæætë ædæmö ämïni eñëninque cood-

intoidi wæætë oncö tæï mænonte baï gongæncædänïmpa, ante cæedäni, ante Wængonguï pönö angä eñëninque mönitö në ämöni batamönipa. ïnïnque botö, Në ämo inte nämä tocæboïmpa, ante tedebo incæte guïñenedämaï tedecæboïmpa.

⁹ Botö, Cadota ante botö yewæmöinta adinque mïnitö guïñente wæcæmïnïmpa, ante dicæ ämogaa. ¹⁰ Pancamïniya, Pabodo tæï piñænongä baï inte cadota ante yewæmöninque nanguï angä awædö, ante wæmïnipa. Wæætë edæ adocä incæ mönitö weca ponte ongöninque edæ aquïï ingä amönipa. Tömengä nänö tedepämo önömämoque baï ïmpa, ante pönëmïni awædö. ¹¹ ïñæmpa, Tæï piñæmöni inte cadota ante në yewæmömöni incæ mönitö adomöni inte mïnitö weca ponte ongöninque adobaï tæï piñænte cæcæmönïmpa, ämo eñëmaïmïnipa.

¹² Pancadäniya nämä incæ, Waëmö pönï ïmopa, ante tededäni incæte tömënäni nämä nïni tede baï mönitö ædö cæte adobainö ante tedequïmöni. Tömënäni ïñömö, Ægancadö waa cæbo eyepæ inguïï, ante nämä nïni cægancaque ante adinque edæ, Eyepæ cætabopa, ante pönëwënänipa. Tömënäni nïni cædö ante, Waa cætawo, ante tee mancæte ante, Do botö cædinö baï adobaï cæbopa, ante adinque, Eyepæ ïmpa, ante pönëwënänipa. Mänömaï nämä nïni pönëwënonque ante cædinque tömënäni eñënämaï inte oda cæte cædänipa.

¹³ Mönitö guiquënë, ïingancaque goedäni, ante Wængonguï nänö angancaque cöwë gomönipa. ïnïnque tömengä, Coodintoidi ganca godinque apæneedäni, angä eñëninque mönitö do gote apænedinque, Mäningancaque waa cæmönipa, ante nämä waa ate tedemönipa. Godömenque ante tededämaï ïmönipa. ¹⁴ Mïnitö ganca pönämaï inte baï mönitö, Coodintoidi weca gote do cætamönipa, ante tedemöni baï babæ wapiticæ incædönïmpa. Incæte mïnitö ganca do pöninque Codito ingantedö ante mönitö watapæ möni eñënö ante apænetamönipa. ïnïnque edæ, Mäninganca cætamönipa, ante mäninque ante tedemönipa. ¹⁵ Ayæ wadäni nïni cædinö ante adinque mönitö, Tömëmöni

cædinō impa, ante änāmaī imōnipa. Wæætē mīnitō godōmenque godōmenque wede pōnēñōmīni mōnitō wæætē adodō mīnitō weca ponte quēwēnīnque godōmenque gomonga cæyōmōni mōnō watapæ bacæimpa, ante pōnēmōnipa. ¹⁶ Ayæ mīnitō weca iīnque cædinque mōnitō godōmenque gomonga godinque mōnō Codito ingantedō ante watapæ mōni ēñēnō ante apænecæmōnipa, ante pōnēmōnipa. Mänōmaī cædinque mōnitō wacā nānō cædiñōmō ante, Mōnitō māniñōmō cætāmōnipa, ante tededāmaī incæmōnipa.

¹⁷ Æcānō, Botō waēmō pōni inōmo inte waa cæbopa, ante toinēna tōmengā wæætē, Mōnō Awēnē waēmō pōni inongā inte pōnō waa cæcampa, ante toquēnengā ingampa. ¹⁸ Edæ, Waēmō inōmo imopa, ante nāmā ānongā ingante Wængonguī waa adāmaī ingampa. Wæætē, Iīngā waēmō inongā ingampa, ante mōnō Awēnē nānō ānongā ingante ante Wængonguī wæætē waa acampa.

11

Wængonguī beyæ, ante pancadāniya babæ apænedānipa

¹ Nōwo botō adodeque ōnonque tedete baī yewæmōmo adinque mīnitō ee amīni iīnque botō waa tobaīmopa. Wadō āmo, Mīnitō ee ayōmīni edæ botō ōnonque tedete baī do yewæmōmopa. Iīnque iīmaī ante odōmoncæte ante yewæmōmoī aedāni. ² Wængonguī wææ gompocā baī botō adobaī mīnitō beyæ ante wææ gompote āmopa. Mīnitō baquēcā mōnāmaingā baī iñōmīnite Codito ængā beyænque mīni pōnencabo tōmengā nempo nō cæte quēwencæmīnipa, ante pædæ godoncæte ante cædinque botō tōmengā adocanque ingante, Bitō quīnāni inānite æe, antabopa. ³ Mīnitō nōingā cædinque wacā miñæ godāmaī inte Codito ingante waadete pōnēmīni incæte botō, Mīnitō oda cæmīni wæcæ wæ, ante guīñente wæbopa. Eba wodi ingante Tæntæbo nanguī ēñengā inte babæ cædinque apænecā ēñēnīnque tōmengā nānō oda cægāi baī mīnitō wīi adobaī oda cæcæmīnipa, ante botō wææ ante apænebopa.

⁴ Mōnitō, Itota ingante pōnengæimpa, ante do apænemōni ēñēmīnitapa. Incæte wacā mīnitō weca pōnīnque nāwā Itota ingante apænedāmaī inte, Wacā Itota ingante pōnēedāni, ante babæ apæneyongante mīnitō edæ ēñēē cōmīni awædō. Adobaī Wængonguī Ōnōwoca do ængāimīni iñōmīnite wacā ōnōwoca pō guīyongante mīnitō ee æmīni guīicā awædō. Ayæ wadāni mōnō Codito ingante ante apænedāmaī ināni inte, Wacā ængā beyæ quēwengæimpa, ante babæ apæneyōnāni mīnitō edæ ēñēē cōmīni awædō. ⁵ Mänōmaīnō ante nē tededāni iñōmō nāmā ante pōnēnīnque, Nē gode āmōni inte mōnitō ñænæmōni pōni imōnipa, ante edæ babæ ānewēnānipa. Tōmēnāni nāwangā ñænænāni ināni baī botō dicæ wædāmo inguēnēmogaa, ante pōnēmopa. ⁶ Botō æbānō tedeboo, ante ēñēnīnque mīnitō iñōmō, Ōnōnepāmoque tedecampa, ante pīimīnitawo. Incæte botō ædæmō adīmo inte nē ēñēnīmo inte apænebopa. Pabodo mänōmaī inongā inte apænecampa, ante acæmīnipa, ante mōnitō cōwē mīnitō imīnite edonque odōmōmōni amīnitapa.

⁷ Mīnitō imīnite ængō cæte baī cæcæte ante botō Wængonguī ingantedō ante watapæ apænebo beyæ ænāmaī intabopa. Mänōmaī ænāmaī inte botō nāmā edæ pīinte baī cædinque dicæ wīwa cætabogaa. ⁸ Codito ingante godongāmæ nāni pōnencabo wayōmō nāni cabo wayōmō nāni cabo da pōnōnāni ō ænīnque botō mānīntaque godonte ænte quēwēnīnque mīnitō beyæ cætabopa. ⁹ Ayæ mīnitō weca ongōnīnque botō quiēmē æīnente wæbo incæ edæ waa atabopa. Wadāni edæ mōnō tōniñadāni incæ Māatedōniabæ quēwente pōnīnque tōmēnāni botō ænguēnēnō ante eyepæ pōnōnāni æntabopa. Iīnque coodintoidi botō ānō beyæ wædāmaī incædānipa, ante wææ cædinque botō iñōmō edæ, Pōnōmīni æmoedāni, ante cōwē änāmaī intabopa. Ayæ iīncayæ ate cōwē änāmaī incæboimpa. ¹⁰ Mōnō Codito nō nānō apænedō ante ēñente entawēmo inte āmopa. Botō, Mänōmaī cædinque waa cæbopa, ante cōwē edæ tedeyōmote mīnitō Acayabæ quēwēmīni inte edæ wææ cædāmaī

incæminimpa. ¹¹ Quinante mänömaï ante tedeboï. Minitö iminite waadedämaï inte mänömaï ante tedeboï. Iñempa botö æbänö minitö iminite waadete pönemoo, ante do againgä inte Wængongui tömengä ancæcäimpa.

¹² Wadäni guiquënë, Mönitö Codito nänö nē godongaïmöni imönipa, ante nē änäni guiquënë, Æbänö cæte odömömöni adinque wadäni Pabodoidi inänite waa adö bai mönitö imönite adobaï waa acædänimpa, ante wædänipa. Ininque botö iñömö, Iinäni mänömainö ante odömönämaï incædänimpa, ante mänömaï tedete wææ cæbo inte edæ cöwē godömenque wææ cæcæboimpa. ¹³ Tömënäni iñömö edæ, Wadäni oda cæcædänimpa, ante awēmö cædäni inänipa. Mönö Codito tömënäni inänite da godönämaï ingä incæte tömënäni iñömö edæ, Codito nänö da godongaïmöni imönipa, ante babæ apænedänipa. Ayæ edæ mönitö Codito nänö da godongaïmöni möni emönö bai önömoque emöninque babæ cædänipa. ¹⁴ Minitö, Tömënäni quinate wacä bai emönänii, ante wæminitawo. Iñempa tömënäni awënë Tatäna incæ babæ cædinque Wængongui anquedoidi ñäö nani emönö bai ñäö emonte bai emongampa. ¹⁵ Ininque Tatäna beyæ nē cædäni iñömö tömënäni awënë Tatäna nänö babæ cædö bai adobaï babæ cædinque, Nē nō Cædongä ingante nē cæmöni imönipa, ante önömoque emönänipa. Ininque tömënäni nē önömoque emönäni inte önönque ewente baquïnänidö anguënë.

Æbänö caate wæboo, ante Pabodo yewæmongampa

¹⁶ Botö ñöwo adodö ante yewæmömopa. Minitö, Pabodo ocai ömædæcacä inongä inte önönque tedecampa, aminitawo. Mänömainö ante änämaï imæwedäni. Incæte wacä ocai ömædæcacä tedeyongante minitö ee amini tedecä bai botö adobaï ocai ömædæcabo inte bai, Nämä waa cæbo imopa, ante adodeque tedebo ininque ee amini tedebodäni. ¹⁷ Botö ñöwo mänömaï nämä waa ate bai tedete yewæmöninque mönö Awënë nänö ämaï wii yewæmömopa. Wæætē ocai ömædæcacä mä nänö pönente tede bai adobaï önönque tedete bai yewæmömopa. ¹⁸ Pancadäniya nanguï inäni incæ, Mönitö

nämä waa cæmönipa, ante edæ ingui-pogaque quëwënäni tededäni bai adobaï tededänipa. Tömënäni mänömaï tededäni ininque botö adobaï, Nämä waa cæbopa, ante tedecæboimpa. ¹⁹ Nē eñēmöni imönipa, ante nē amini inte minitö iñömö ocai ömædæcadäni önönque tedeyönänite ee eñē cöminipa töö. ²⁰ Wacä edæ minitö iminite bæi ongongä wædinque minitö tömengä ingante ee nē cæmini bawëmini awædö. Wacä babæ wapiticæ cædinque minitö qui inguënë incæ ö ængä incæte minitö edæ ee aminipa. Wacä minitö awënë bai nämä ængö cæte angä incæ ee eñëminipa. Wacä minitö iminite pönö tamongä incæte minitö ee ate wæmini awædö. ²¹ Botö wæætē aquïmo inte, Tömënäni nani nanguï cædö bai ædö cæte cæquïmoo, ante botö guingo imonguinque önönque tedebopa töö.

Tömënäni nämanque waa adinque edæ guiñänämaï inte tededänitawo. Botö adobaï nämanque waa adinque edæ guiñänämaï inte tedecæboimpa. Incæte mänömaï tededinque botö önönque badete tote bai tedebopa. ²² Tömënäni guiquënë ebedeoidi inänitawo, ante pönëmini. Botö iñömö edæ tömënäni nani imai adobo imopa. Tömënäni idægoidi inänitawo. Edæ botö tömënäni nani imai adobo imopa. Tömënäni Abadäo wodi pæinäni inänitawo. Edæ botö tömënäni nani inö bai adobo Abadäo wodi pæïmo imopa. ²³ Mönö Codito beyæ nē cædönäni inänipa, ante pönëmini. Botö edæ tömënäni nani imai inte edæ gomonga imopa. Incæte mänömainö ante tededinque botö ocai ömædæcacä bai inte önönque tedebopa. Tömënäni inänite adopoque adopoque wædænque cæyönäni botö godömenque nanguï cægaboimpa. Tömënäni inänite wædænque tee mönedäni wæyönäni botö imote godömenque wæætē wæætē tee mönedäni wægaboimpa. Tömënäni inänite wædænque tæi pänäni wæyönäni botö imote godömenque nanguï tæi pänäni wægaboimpa. Ayæ botö wæætē wæætē wodo wængaboimpa.

²⁴ Oodeoidi æmontaimenca wodo coadenta ganca adoyedē nani cöwē tæi päimpoga botö imote adoyedē mänimpoga tæi tæi päninque önönpo æmæmpogoncaque

wæætē adopoga adopoga tæi tæi pānāni wægaboimpa. ²⁵ Ayæ cantaca mempoga go adopoque botō imote tæi tæi pānāni wægaboimpa. Ayæ adopoque botō imote dicaca tacadāni wangæ wængaboimpa. Ayæ wipodē wogaa godinque mempoga go adopoque wipo tente tobæmpo wægaboimpa. Edæ wīi eyepæ gote botō tōmāā itædē tōmāā woyowotæ tæcæpæno pōnī wæwogaboimpa. ²⁶ Wayōmō wayōmō botō ancaa godinque wætabopa. Ōnō æpæmpo wodo bete wæntabopa. Nē ō ænāni incæ botō guidēnāni incæ wadāni incæ wodo wænōnāni wæmo adinque botō wænguinque ante wægaboimpa. Ayæ tōmēnāni nāni quēwēñōmō quēwēninque, Ōnōmæca quēwēninque, gāwapæno owod- inque botō wænguinque ante wægaboimpa. Ayæ wadāni incæ, Mōnō pōnencabo imompa, ante babæ ānāni adinque botō iñōmō edæ, Babæ cædāni wæncæ wæ, ante wægaboī aedāni. ²⁷ Botō pancaōnaa tōmāā woyowotæ mīlmo inte nanguī cædinque wægaboimpa. Tepæ pancaōnaa gæwænte wægaboimpa. Pancaōnaa cænguī dæ ā ate gue ænente wægaboimpa. Edæ æpogamē pōnī cænāmaī inte wægaboimpa. Pan- cayedēña botō weocoo ōmaabo inte yoguite wægaboimpa.

²⁸ Mānōmaī wædōmo inte botō, Codito ingante godongāmæ nāni pōnencabo tōmancabodāniya nāni wædō ante æbānō cæquimoo, ante wædinque iimō iñō iimō iñō nanguī cæbopa. ²⁹ Edæ wacā aquīngā inte wæcā iinque botō adobaī aquīlmo inte baī wæbopa. Ayæ, Wēnæ wēnæ cæe, ānāni ēñēninque adocanque oda cæcā ēñente wædinque botō ædō cæte wæwēnāmaī inguimoo.

³⁰ Iinque, Nāmā tæēmō inte cæbopa, ante tededāmaī incæboimpa. Wæætē, Æbānō aquīlmo inte cæbopa, ante acædānimpa, ante botō māniinque ante tedecæboimpa.

³¹ Wængonguī iñōmō mōnō Awēnē Itota Wæmpocā inongā inte edæ tōmengā adocā iñōmō Itota Wængonguī ingampa. Tōmengā wæmō pōnī inongā inte cōwē waa pōnī cæcampa, ante mōnō tōmengā ingante cōwē apæneceāimpa. Tōmengā iñōmō edæ, Pabodo nō angampa, ante do ēñengampa.

³² Ayæ iimaī cædāni wægaboimpa. Adeto Tidiabæ awēnē nānō inōñedē māniñedē botō imote bæi ongoncæte ante cædinque tōmengā nānō ēmiñængā wædænque awēnē iñōmō iimaī cæcantapa. Tōmengā wadāni inānite angā ēñēninque tōmēnāni wæætē Daāmaco iñōmō tōmēnāni nāni wīni wææ cæincō boyæ yabædemō gāānē wānō cōñōnāni, ³³ botō tōnō cædāni guiquēnē Daāmaco nāni wīni wææ cæincō boyæ cæimpiticæ inō otodē ñā cædete botō imote pædæ wæænōnāni ti wææ aamō cæte wodii wīnongaboimpa.

12

Pabodo, Iimaī wūimonte baī atabopa, angampa

¹ Ōnonque tedebo incæte botō, Waa cætabopa, ante cōwē tedequēnēmo imopa. Iinque botō ñōwo edæ, Wūimonte baī ayōmo mōnō awēnē mā pōnī odōmongā atabopa, ante yewæmoncæboimpa. Ayæ tōmengā, Æbānō i, ante edonque pōnī nānō odōmōnōnō ante godōmenque yewæmoncæ cæbopa. ² Codito nempo nē quēwēmo iñōmote Wængonguī do catodote wadepo iñonte botō imote ōnædē wænōmēnæcaōnæ mæicā æigaboimpa. Incæte wacā æicā ate baī nāmā incæ agaboimpa. Wabānō ōnōwocaque inte æigaboī. Iintai ēñate wabānō inque inte æigaboī, ante botō adāmaī imopa. Wængonguinque nē ænte mæigaingā inte tōmenganque ēñengampa. ³ Edæ baō ēñate æibo incæ baō ōmaabo inte æibo incæ Wængonguinque ēñēñongā botō, Iimaī ingatimpa, ante māninque ēñēmopa. ⁴ Wæmōnædē tōmengā ōmæ iñōmō Wængonguī ænte mæicā æigaboimpa. Māniñōmō waa pōnī apænedāni ēñēmo incæte tōmengā, Iñōmō mōni apænedō ante mīni waocabo apænedāmaī incæminimpa, ante wææ angā ēñēninque botō waobo inte ædō cæte apænequimoo.

⁵ Iinque wacā mānōmaī ōnædē æite ēñengā iinque botō, Tōmengā waa pōnī cæcampa, ante do apænebaīmopa. Wæætē nāmā botō waa cædōnō ante apænedāmaī incæboimpa. Incæte, Tōmēmo aquīlmo inte ōnonque cætabopa, ante māniinque ante

botö nämä waa ate bai apænenecæboimpa. ⁶Waa cægaboimpa, ante tedebo inique botö wii ocai ömæcabo inte edæ tedebaimopa. Ìñæmpa näwangä waa cægaimo inömo inte botö nö ante edæ tedebaimopa. Incæte botö wædænque apænete pönömenque cæyömote æcämenque incæ, Pabodo godömenque waa pöni cæcampa, ante änämaï incæcäimpa, ante wææ cædinque botö waa cægainö ante tededämaï inte edæ pæ wëenebopa.

⁷Wængonguï mä nänö odömongainö æbänö waa pöni ingateï, ante wadäni adämaï iñönäni botö adoboque atabopa. Ìnique, Pabodo, Botö adoboque nê agaimo imopa, ante nämä waa adämaï incæcäimpa, ante wææ cædinque Wængonguï angä ate Tatäna botö imote pönö da boo codongate ocæ ocæ coingä bai cæcä wætabopa. ⁸Mänömaï cæcä wædinque botö mem-poga go adopoque Wængonguï Awënë ingante apænedinque, Botö daa cogate bai wæyömote o tongaate bai cæbi quëwëmoe, ante nanguï ante wætabopa. ⁹Ca wæyömote mönö Awënë wæætë, “Nê aquïi pöni inäni iñönänite botö tæi piñæmämo eyepæ pöni pönömo æninque tömënanique wæætë tæi piñænte entawencædänimpa. Ìnique bitö nê aquïimi imi beyænque botö waadete pönö cædö iñömö edæ eyepæ pöni impa.”

Ìnique mönö Codito nänö tæi piñænte cæpämö ænte entawencæte ante cædinque botö iñömö edæ, Nämä aquïimo inte botö wædinö beyæ ante botö nämä waa ate tobopa, ante tededinque godömenque tocæboimpa. ¹⁰Æyedënö aquïimo imoi mäniñedë edæ tæi ewocaboimpa. Mänömaï beyæ aquïimo inte botö Codito beyænque nanguï tobopa. Badete tote piinte cædäni wæbo incæte botö piyænë cædinque tobopa. Ancaa nanguï caate wædinque nangæ babo incæ, togænte pänäni wæbo incæ, Ædö cæte quëwenguïmoo, ante wæbo incæ mäninö tömäa beyæ wædömo inte botö Codito beyænque ante piyænë cæte nanguï tobopa.

Coodintoidi æbämë cædäni, ante wæbopa, Pabodo angä

¹¹Ocai ömædæcacä ingä bai Pabodo önonque tedete yewæmongampa, ante

pönëminitawo. Ìñæmpa tömëmini botö beyæ wææ apænedämaï imini beyænque botö tömëmo nämä wææ cæcæte ante cædinque mänömaï tedete yewæmömopa. Wadäni nê gode änäni guiquënë nämä nani waa acabo inänipa. Incæte tömënanäni näwangä ñænænäni inäni inique botö iñömö dicæ wædämo imogaa. Ìnique minitö tömëmini, Pabodo waa cæcä ingampa, ante tedequënëmini iminipa töö.

¹²Wacä minitö weca pöninque æbänö cæcä ate minitö, Ìngä iñömö mönö Codito nänö nê da godongaingä ingampa, ante ëñëminii. Ìimaï impa. Tömengä, Æñencæminimpa, ante mä pöni cæcä ate do ëñëminipa. Tömengä bamönengæ nanguï odömongä ate ëñëminipa. Wadäni cædämaï iñönäni tömengä tæi piñænte cæcä ate wædinque minitö wæætë edæ, Codito nänö nê da godongaingä ingampa, ante do ëñëminipa. Ìnique botö minitö weca quëwëninque edæ Codito nänö nê da godongaingä mä cæte nani odömöni bai adobai odömöninque edæ wæntædämaï inte ee cæbo abaïminipa. ¹³Ìnique wadäni Codito ingante nani godongämæ pönencabo inänite waa cædinque botö minitö iminite dicæ pönömenque cætabogaa. Wabänö minitö iminite, Pönömini æmoedäni, ante änämaï inte botö minitö iminite wiwa cæbopææ.

¹⁴Botö do minitö weca mem-poga pönimo inte ñöwo wæætë poncæ cæbopa. Pöninque botö minitö mäincoo ante änämaï incæboimpa. Wæætë, Minitö botö wëmini bacæminimpa, ante cæbopa. Wëñænäni tömënanäni mæmpoidi beyæ ante dicæ godonguënänäni inäniyaa. Wæætë edæ mæmpoidi iñömö wëñænäni beyæ ante nê godonguënänäni inänipa. ¹⁵Ìnique, Minitö quëwencæminimpa, ante botö mäincoo tömancoo godöninque waa tocæboimpa. Ayæ, Minitö quëwencæminimpa, ante cæte wæmo inique waa tobaïmopa. Botö mänömaï minitö iminite gomonga waadete pönëmo inique minitö wæætë botö imote pönömenque waadete pönëmini iminitawo.

¹⁶Incæte edæ idæwaa ämopa. Minitö mäincoo ante botö änämaï intabopa. Incæte minitö, Pabodo nê wënæ wënæ pönengä inte awëmö æncæte ante babæ cæcampa,

ante pönewēmīni awædō. ¹⁷ Wadāni inānite mīnitō weca da godōninque botō awēmō æntawo, ante pönēmīnitawo. ¹⁸ Tito ingante, Coodintoidi weca ate pōe, nanguī āninque botō wacā mōnō tōnīñacā tōnō tōmengā tōnō da godōmo guēa godatapa. Inique Tito mīnitō weca pōninque dicæ wīwa cædinque māincoo ò ængantawogaa. Inæmpa tōmengā tōnō botō guēa āawocaque bai ēwocamōna inte mōnatō guēa cægōmōna adinque mīnitō adāmaī inte bai tedewēmīni awædō.

¹⁹ Mīnitō, Pabodoidi nāmā wææ cæcæte ante apænedānīpa, ante pōnēmīni awædō. Inæmpa mōnō Codito nempo quēwēnōmo inte mōnitō Wængonguī ayongante apænetamōnīpa. Edæ, Botō nē waademīni imīni inte mīnitō tæī piñænte bacæmīnīpa, ante cædinque mōnitō mǎnōmaīnō ante apænetamōnīpa. ²⁰ Botō iñōmō edæ mīnitō waa cæmīni acæte ante ponte ayōmo mīnitō wadō cæmīni bai botō nanguī wæcædōmoīpa, ante guīñente wæbopa. Ayæ mīnitō wæætē, Pabodo waa cæcæte ante pongampa, ante pōnēñōmīni botō wadō cæbo bai mīnitō nanguī wæcædōmīnīpa, ante pōnente wædinque botō, Mōnō mǎnōmaī wædāmaī ingæīpa, ante wææ cæcæte ante cæbopa. Edæ mīnitō wæætedō wæætē piinte amīnitawo. Wacā ingante waa cædāni wædinque mīnitō godō piinte amīnitawo. Inontobæ ænguī bamīnitawo. Nāmanque pōnente cæmīnitawo. Wacā ingante piīninque godō babæ ante tedewēmīnitawo. Godō wæntaa wæntaa amīnitawo. Nāmā waa adinque cæmīnitawo. Wīī ēñente cædinque mīnitō Yæ yæ tedemīnitawo. Mānīnō tōmānō wabānō cæmīnī, ante guīñente wædinque botō mǎnōmaīnō ante edæ yewæmontabopa.

²¹ Inique botō ponte ayōmo pancamīniya wēēnēñedē mīni cægāi bai ñōwo adobai cæmīni adinque botō guingo imonte wæconguēnēmo ante awædō. Edæ pancamīniya wēēnēñedē wentamō mīni mongæñō ee mongæmīni adinque botō Ca ca wæbaīmopa. Wēēnēñedē mīni godō towengāinō ayæ towēmīni intawo. Wēēnēñedē ēñēnāmaī inte mīni wīwa cædinō ayæ cæmīni intawo. Edæ wentamō mongæmīni inte guingo imōnāmaī imīni

inte pancamīniya Wængonguī gāmæñō ocæ ēmænte pōnāmaī imīnīpa, ante guīñente wæbopa.

13

Idæwaa māninque yewæmōmopa, ante

¹ Botō mīnitō weca mempoga do pongāimo inte ñōwo wæætē poncæ cæbopa. Iīmaī ante do yewæmongatīpa. Nō nō æbānō cætīpa, ante ēñencæte ante waoda mēnaa incæ mengāa go adocanque incæ nē adīnāni inte adodō ante apænedāni ēñēninque do apænte angæīpa, ante nāni yewæmongāinō ante ēñēninque cæcæboīpa. ² Wēēnēñedē wēnæ wēnæ cædināni tōnō wadāni tōmānāni inānite botō mīnitō weca doyedē pōninque, Amo ēñēdāni, ante wææ āninque ñōwo wæætē wayōmō ongōninque adodō ante wææ ante yewæmōmopa. Ayæ ate wæætē mīnitō weca ponte ongōninque tōmanga apænte āninque adodāni inānite ata cæpodāmaī incæboīpa.

³ Pabodo wabānō mōnō Codito tōnō godongāmæ cæte apænecāā, ante wæmīnitawo. Mānīnō ante mīni wædō ante edæ, Nāwangā īpa, ante odōmoncæte ante botō mǎnōmaī apænte ancæboīpa. Mōnō Codito incæ botō tōnō godongāmæ nē cædongā iñōmō tōmengā iñōmō aquīngā ināmaī inte mīnitō imīnite apænte angā abāīmīnīpa. Tōmengā iñōmō nanguī tæī piñæñongā inte mīnitō weca cæcā apa ānewēmīnī. ⁴ Nāwangā īpa. Mōnō Codito adocā incæ aquīngā bai inte cæyongante waodāni wæætē ñænquedīmæ cæte māo timpodāni wængacāīpa. Incæte Wængonguī nānō tæī piñæñō beyænque adocā ñāni omæmonte quēwengampa. Mōnitō adobai tōmengā nempo quēwēninque aquīīmōni inte edæ Wængonguī nānō tæī piñæñō beyænque mōnō Codito tōnō godongāmæ quēwēninque mīnitō beyæ ante cæquīmōni imōnīpa.

⁵ Mīnitō tōmēmīni iñōmō, Æbānō wede pōnēmo imoo, ante nāmā waa aedāni. Mīni cædinō adinque, Æbānō nōingā cæbo imoo, ante aedāni. Inæmpa, Itota Codito ingante entawēmōmpa, ante ēñēnāmaī imīnitawo. Wabānō mīnitō pancamīniya

nämä adinque, Botö nöingä cädämaimo inte edæ wede pönänämaimo inte awædö, ante eñencæte ante aquënemini iminipa. ⁶ Ayæ nämä mini a bai mönitö imönite adobai apænte adinque minitö, Pabodoidi guiquënë nöingä cädönäni inte nê wede pönänäni inänipa, ante edonque amini waa tobaimopa. ⁷ Minitö beyæ ante mönitö Wængonguï ingante apænedinque, Coodintoidi cöwë wënæ wënæ cädämaï incädänimpa, ante apænemönipa. Incæte mönitö, Minitö wënæ wënæ cädämaï imini ate wadäni, Pabodoidi ædæmö cädäni beyænque impa, ante mönitö imönite waa acädänimpa, ante wii cæmönipa. Wæætë wadäni, Pabodoidi wii eyepæ cädänipa, ante piinte änäni incæte minitö wæætë nöingä cæcæminimpa, ante mönitö mäninonque ante cöwë cæmönipa.

⁸ Edæ Wængonguï nöingä nänö änö ante nê cæmöni inte mönitö adode ante ædö cæte wido cæquimönii. ⁹ Ininque mönitö æyedemë aquüimöni iñömöni minitö wæætë tæi piñænte cæmini adinque mönitö nanguï tomönipa. Minitö beyæ edæ Wængonguï ingante apænedinque mönitö, Coodintoidi eyepæ entawëninque picænäni bai nö cæcädänimpa, ante apænemönipa. ¹⁰ Botö imote apænedinque Wængonguï, Bitö wadäni inänite bæ tadämaï inte tæi mænonte bai pönö cæcæbiimpa, ante pönö cæcä ate botö tæi piñæmo badinque nê ämo batäbopa. Nê ämo imo incæte botö minitö weca ponte ayömo wiwa cæmini adinque piinte panguënemo inämaï incæboimpa, ante wææ cædinque botö ñöwo wayömö quëwëninque, Nämä apænte æedäni, ante wææ yewæmömopa.

¹¹ Iñänäni, mäninque ante ñöwo yewæmömopa. Minitö eyepæ entawëninque, Mönö picænäni bai badinque nö cæcæimpa, ante nanguï cædäni, ämopa. Wæntädämaï inte tæi piñænte cædäni. Mini cabo incæ adoyömö pönëninque gänë pönente quëwëedäni. Wængonguï incæ nê Waadecä inte nê gänë entawengä inte minitö tönö cöwë quëwencæcäimpa, ämopa. ¹² Mini cabo incæ godongämæ pö bee téninque waadete pönente waa apæneedäni. ¹³ Wængonguï quinäni eyequei quëwënäni iñömö, Minitö waa

quëwencæminimpa, ante apænedäni eñente yewæmömopa.

¹⁴ Minitö tömämini mönö Awënë Itota Codito waadete nänö pönö cægainö ante entawencæminimpa, ämopa. Mæmpo Wængonguï tömengä nänö waadete pönönö ante entawencæminimpa, ämopa. Wængonguï Tæiyæ Waëmö Önöwoca tönö äawocaque bai ewocadinque tömämini godongämæ waa quëwencæminimpa, ante botö Pabodobo mäninque ante yewæmömopa.

Gadataidi inänite Pabodo nänö cadota ante yewæmongainta

Gadataidi inänite Pabodo, Waa quëwëedäni, angampa

¹ Botö Pabodobo inömo inte, Minitö acæminimpa, ante yewæmömopa. Mæmpo Wængonguï incæ Itota Codito ingante, Nñani ömæmöe, angä nñani ömæmongacäimpa. Mæmpocä iñömö Itota Codito tönö guëa cædinqe botö imote da godonga gotabopa. Ininqe botö dicæ waodänique änäni ëñente gotabogaa. Botö imote edæ dicæ wao-canque da godongä gotabogaa. ² Minitö Gadatiabæ wayömö wacabo wayömö wacabo quëwëmini inte Codito ingante mïni godongämæ pönencabo inömini inte edæ ëñencæminimpa, ante mönitö möni pönencabo tömämöni iïmaï ante apænemönipa.

³ Wængonguï mönö Mæmpo tönö mönö Awënë Itota Codito godongämæ pönö waadete cæda ate mïnitö gänë pönente waa quëwencæminimpa, ämönipa.

⁴ Adocä mönö Mæmpo Wængonguï iñömö, Minitö pedænguipogaque wiwa cæte mïni wæwëñömö edæ abæ tawænte ponte bai botö gämænö ponte quëwëedäni, angampa. Ininqe, Wængonguï nänö angainö bai cæcæminimpa, ante cædinqe mönö Awënë Itota Codito mönö imonte ö æncæte ante cægacäimpa. Mïni wënæ wënæ cæpämö mongæncæboimpa, ante tömengä nämä wepæ pædæ godonte bai cædinqe pönö ængä beyænque mönö wæætë quëwëmompä. ⁵ Edæ pedænguipoga iñonte mïnguipoga bayonte edæ, Mänömaï bacæimpa, ante në angaingä inongä inte mönö Mæmpo Wængonguï iñömö edæ cöwë nñäo apäite bai waëmö pönï emönongä ingänö anguënë. Mänömaï impa, ante botö, Amëë, ämopa.

Codito ingantedö ante watapæ ëñengcæimpa

⁶ Minitö iñömö æbämë pönï cæmïni awædö. Mönö Codito waadete pönö cæcä beyænque mïnitö Wængonguï añecä pömïnitawo. Nñowo guiquënë në añecä

iñongante quïmæ panguïmæ gomïni. Wadäni, Quëwenguï taadö wadö inompa, ante tededäni ëñëninque mïnitö do Ao änewëmini awædö. ⁷ Iñæmpa wadö incæ wïi quëwenguïnö inompa. Wæætë edæ, Minitö oda cæcæminimpa, ante cædinqe wadäni pancadäniya, Codito ingantedö ante watapæ möni apænedö ante edæ, Idiquibæ bacæimpa, ante cædäni apa ëñëwëminii.

⁸ Mönitö Codito ingantedö ante watapæ apænemöni ëñëmïnitapa. Incæte mönitö adomöni incæ wadö ante apænemöni bai Wængonguï wæætë pönö pïinte apænte angä wæquïmönidö anguënë. Ayæ adobaï Wængonguï anquedo incæ öönæde owod-inque wææ pöninqe wadö ante apænecä bai Wængonguï tömengä ingante wæætë godö pïinte apænte angä wæquingänö anguënë. ⁹ Edæ doyedë möni äninö bai botö nñowo wæætë adodö ante ämopa. Codito ingantedö ante watapæ apænemöni ëñëninque mïnitö Ao ämïnitawo. Ininqe mäninö ante æcämenque pönënamäi inte wadö ante apænecä ëñëninque Wængonguï tömengä ingante wæætë godö pïinte apænte angä wæquingänö anguënë.

¹⁰ Botö dicæ, Minitö waomïnique botö imote Ao ancæminimpa, ante apænëbogaa. Wængonguinque, Ao ancæcäimpa, ante apænëbo aedäni. Ayæ, Waomïnique tocæminimpa, ante dicæ cæbogaa. Waomïnique tocæminimpa, ante cæbo inte bai edæ Codito ingante në cædömo inämaï incædömoimpa.

Pabodo Wængonguinque da godongä gotabopa, angampa

¹¹ Botö tönïñamïni ëñëedäni. Codito ingantedö ante watapæ botö apænedö iñömö edæ wïi waodänique nñani mä pönengainö impa, ante ämo ëñëedäni.

¹² Mäninö ante waocanque dicæ pönö apænecä ëñente æntabogaa. Waocanque dicæ odömonte apænecä ëñëninque apænëtabogaa. Wæætë Itota Codito edonque odömonte apænecä ëñëninque botö në æmo inte adodö ante apænëbopa.

¹³ Oodeobo inömo inte botö iñömö edæ möni oodeocabo pönengainö ante wëenëñedë mäninonque ante ëñëninque

quëwengaboï aedäni. Botö mänïñedë edæ Codito ingante nani godongämæ pönencabo inänite wido cæcæte ante cædinque ancaa togænte edæ nanguï pöni pämo wægadänimpa, ante do ëñëminipa. ¹⁴ Ayæ botö tönö guëa pægäinäni incæ nanguï inäni guiquënë möni oodeocabo möni ëñengainö ante wædænque ëñente cæyönäni botö iñömö godömenque nanguï pöni ëñente cægaboimpa. Edæ mönitö mæmæidi nani odömonte angainö ante botö, Mönö Ao ante adodö ëñente cæte quëwengæimpa, ante nanguï cæbo ingaboimpa.

¹⁵ Incæte botö badä cæncadë ongöñömote Wængonguï, Botö beyæ cæcæbiimpa, äninque edæ mänïñedë botö imote apænte ængaingä inte ñöwo botö imote pönö waadedinque añecantapa. Ayæ ñöwo pöni tömengä nämä nänö pönönö ante cæte todinque edæ, ¹⁶ botö imote pönö angantapa. Bitö oodeoidi inämaï inäni inänite apænebi ëñëninque tömënäni botö Wengä ingante edonque ate bai ëwocacædänimpa, ante täno botö imote edonque odömongä adinque botö tömengä Wengä ingante do ëwocabo inte apænebo ëñënanitapa. Inique botö waocä ingante, Æbänö cæquimoo, ante edæ änämaï intabopa. ¹⁷ Botö imote da godongä ate botö Codito täno nänö në da godongäinäni inänite apæneceæte ante Eedotadëë iñömö æidämaï intabopa. Wæætë edæ wadæ godinque botö wayömö Adabiabæ do godinque ayæ ate Daämaco iñömö ocæ ëmænte gotabopa.

¹⁸ Ayæ wadepo mënepoga go adodepoque iinque go ate botö Pegodo weca mä ëñacæte ante Eedotadëë æidinque mäa Wængonguï itæde tömengä weca quëwentabopa. ¹⁹ Ayæ wadäni Itota nänö në da godongäinäni iñönänite botö adocanque ingante mönö Awënë Itota biwi Tantiago ingante adinque wadäni inänite adämaï intabopa. ²⁰ Mänömainö ante botö Wængonguï ayongä babæ änämaï inte näwangä ante yewæmömo aedäni.

²¹ Mänüi gote ëñate ate botö Tidiabæ godinque godömenque Tiditiabæ gotabopa. ²² Inique Oodeabæ quëwente Codito ingante nani godongämæ pönencabo mönö Codito nempo në quëwënäni iñömö

botö awinca cöwë adämaï inäni inte önöwënenque pönengadänimpa. ²³ Tömënäni iñömö iimainö ante önömoncaque ëñengadänimpa. “Wëenëñedë mönö imonte në togænte pangaingä iñömö mönö pönente quëwenguine ante, Mänine ante wido cæcæimpa, angantawo. Ñöwo guiquënë tömengä, Wido cæquine, ante nänö angaine incæ adode ante edæ watapæ apæneceä ëñënanipa,” ante tededäni ëñengadänimpa. ²⁴ Inique, Pabodo ñöwo waa cæcampa, ante adinque tömënäni Wængonguï ingante apænedinque, Bitö waëmö pöni ëmönömi inte në waa cæbi imipa, ante watapæ apænegadänimpa.

2

Itota nänö në da godongäinäni Pabodo ingante Ao änäni

¹ Ayæ mänüi pö godinque iincayæ ate catodote wadepo go ate botö Bedënabee tönö Eedotadëë iñömö adodö æidinque Tito ingante mäomöna gocantapa. ² Wængonguï do botö imote apænete bai edonque odömongä adinque botö Eedotadëë iñömö æidinque iimäi ante apænetabopa. Botö iñömö oodeoidi inämaï inäni weca godinque, Codito ingantedö ante cöwë watapæ apænebopa, ante botö ñænænänique inänite awëmö apænebo ëñënanitapa. Mänömaï cædinque botö, Æbänö cæboï, ante adodö adodö ante apænebo ëñëninque tömënäni püinämaï incædänimpa, ante cætabopa.

³ Ayæ, Botö tönö guëa pöningä Tito ingante adinque pancadäniya, Ingä iñömö Guidiego inongä iñongante ämini ëö togæncædänimpa, ante püinte änäni incæte në änäni guiquënë, Eö togæedäni, ante änämaï inänitapa. ⁴ Eö togængæimpa, ante në püinte änäni nani wææ angainö ante mönitö iñömö Codito Itota gä pe æmpote æængä beyænque abæ tawænte ee gote bai quëwëmönipa. Mänömaï iñömö pancadäniya, Æbänö quëwënänii, ante edæ awëmö acæte ante cædinque edæ, Mönö caipæ imopa, ante bai babæ cædinque mönitö weca pönäni wætämönipa. Ayæ edæ mönitö tömënäni nani wææ änö beyænque në cæte quëwëmöni bacæmönimpa, ante

cædinqe tōmēnāni godōmenque, Cæedāni cæedāni, ante wææ ānewēnāni wætāmōnīpa. ⁵ Incæte edæ, Mōnō Codito ingantedō ante watapæ mōni apænedō nāwangā ante impa, ante mīnitō oda cædāmaī incæmīnīmpa, ante wææ cædinqe mōnitō wantæ iñō incæ nē wææ ānewēnāni inānite eñente cædāmaī intāmōnīpa.

⁶ Ñænænāni inānīpa, ante wadāni nāni nē waa adōnāni iñōmō æbāmē emōnāni, ante botō iñōmō edæ wædāmaī imopa. Edæ Wængonguī incæ waocā ingante apænte acæte ante cædinqe adāmaī ingampa. Mīmōnoque acampa. Ininqe botō idæwaa apænebo ate iināni incæ ædō cæte godōmenque apænequīnāni. ⁷ Iñæmpa iināni incæ edæ do eñēnānitapa. Pegodo ingante mōnō Awēnē incæ pōnō angā ate tōmengā oodeoidi inānite mōnō Awēnē ingantedō ante nē watapæ apænecā ingampa. Botō imote adobaī mōnō Awēnē incæ pōnō angā ate botō wæætē oodeoidi ināmaī ināni inānite nē apænebo imopa. Ininqe botō mănōmaīnō ante apænebo ate nē ānāni iñōmō, Pegodo cæcā baī Pabodo adobaī cæcampa, ante do eñēnānitapa. ⁸ Pegodo oodeoidi weca gote cæyongante Wængonguī tōmengā tōnō godongāmæ cæcā baī botō guiquēnē oodeoidi ināmaī ināni weca edæ gote cæyōmote adocā incæ botō tōnō adobaī edæ godongāmæ cæcampa, ante do eñēnānitapa.

⁹ Tantiago, Pegodo, Wāo iñōmō nē tæī emōnāni inānīpa, ante adinqe wadāni, Gōnōniwæ onguitanca baī inānīpa, ante apænedānīpa. Ininqe botō apænebo eñēninqe mănīnāni, Onguitancāidi, nāni ānāni iñōmō edæ, Pabodo ingante Wængonguī mănōmaī pōnō waadete cæcampa, ante adinqe botō imote ayæ Bedēnabee ingante, Mōnitō tōniñamīna imīnāpa, ante tōmēmæ inō pædæ pompote bæi ongompodānitapa. Ayæ, Mōnitō oodeoidi weca gote apæneyōmōni mīnitō wæætē oodeoidi ināmaī ināni weca gote apænecæmīnīmpa, ante godongāmæ Ao ānānitapa. ¹⁰ Ayæ, Mīnitō nē ōmaadāni inte wædāni inānite ante cōwē pōnēninqe waa cæcæmīnīmpa, āninqe māninqe ante wææ ānānitapa. Mānīnō nāni ānīnō incæ

botō cōwē pōnēninqe edæ nanguī cæinente wæbo intabopa.

Pegodo ingante Pabodo angā wæcampa

¹¹ Ayæ Pegodo Antioquiya iñōmō pōninqe wīī nō cæcā adinqe botō tōmengā awinca waa adinqe, Bitō pante wæquinque wēnæ wēnæ cæbi imīpa, āmo wæcantapa. ¹² Iīmaī edæ Pegodo cæcā inongāimpā. Tæcæ Antioquiya pōninqe tōmengā oodeoidi ināmaī ināni weca wæætē wæætē pō guīī pō guīī ongōninqe godongāmæ cænongāimpā. Incæte Tantiago nānō da pōnōnīnāni pōnāni ate Pegodo iñōmō edæ, Mōnō eō togængæimpā, ante nē ānōnāni pīīnāni wæcæ wæ, ante guīīnōngā inte edæ oodeoidi ināmaī ināni weca ñōwo cænāmaī inte edæ gomonga gote cænongāimpā. ¹³ Mānōmaī wadonque cædingā inte ñōwo wadonque cæyongante tōmengā tōnō oodeoidi tōmānāni wadonque cædīnāni inte edæ ñōwo wæætē wadonque cædānīpa, ante adinqe Bedēnabee incæ oda cæte wapiticæ cæcantapa.

¹⁴ Ininqe edæ Codito ingantedō ante watapæ mōnō eñēnō nō pōnī i incæte tōmēnāni nō cædāmaī inte wapiticæ cædānīpa, ante adinqe botō tōmānāni ayōnāni edæ Pegodo ingante iīmaī ante āmo wæcantapa. “Bitō iñōmō oodeobi inōmi inte edæ oodeo ināmaī ināni baī ñimpo cæte quēwēninqe edæ wīī oodeoidi nāni wææ angāinō ante eñente quēwēmīpa. Incæte bitō, Oodeo ināmaī ināni incæ oodeoidi nāni wææ angāinō ante eñente quēwencædānīmpa, ante quīmæ wææ ānewēmīi,” āmo wæcantapa.

Mōnō pōnēnō beyænque mōnō tōmāmō quēwēmōmpa

¹⁵ Oodeoidi ināmaī ināni nāni eñēnāmaī quēwencabo baī ināmaī imōni inte mōnitō iñōmō edæ oodeomōni nē eñagāimōni imōnīpa. ¹⁶ Incæte edæ iīmaī ante do eñēmōnīpa. Iīmaī cæedāni, ante Mōitee wodi nānō wææ angāinō ante eñente cæcā beyænque waocā dicæ Wængonguī ayongā edæ nō cæcā baquingāā. Wæætē Itota Codito ingante wede nānō pōnēnō beyænque waocā nō cæcā bacampa, ante mōnitō do eñēmōnīpa. Ininqe, Waocā

æcāmenque incæ mǎnīnō Mōitee wodi nānō wææ angainō ante tōmengā nānō ēñente cædō beyænque edæ nō cæcā badāmaī incæcāimpa, ante do ēñēmōni inte mōnitō adobai, Ædō cæte mǎnīnō beyænque nō cæmōni baquimōnii, ante ēñēmōnipa. Wæætē, Codito ingante mōni wede pōnēnō beyænque nō cæmōni bacæte ante mōnitō adobai tōmengā ingante wede pōnēmōnipa.

17 Ìnīnque mōnitō oodeoidi ìmōni ìñōmō, Mōnō Codito nempo quēwēnīnque Wængonguī ayongā mōnō nō cæmō bacæimpa, ante cæmōnipa. Mǎnōmainō ante cædinque mōnitō nē wēnæ wēnæ cæmōni inte wæmōni incæte dicæ Codito angā beyæ wēnæ wēnæ cætamōniyaa.

18 Mǎnīnō Mōitee wodi nānō wææ angainō ante ēñente cæte quēwengæimpa, ante botō pōnengainō ante do wido cægaboimpa. Mǎnōmainō ante botō pōnengainō ante nē wido cægaimo inte botō ædō cæte wæætē adodō ænte bai cædinque, Mǎnīnō ante ēñente mōnō quēwengæimpa, ante anguimoo. Mǎnōmainō ante āmo inte bai botō Wængonguī nānō wææ angainō ante edæ nē ēñēnāmaī ìmo bacædōmoimpa.

19 Edæ, Wængonguī nānō wææ angainō ante ædō cæte tōmānō ante ēñente cæquimoo, ante botō wædō beyænque nē wæwocaimo bagaboimpa. Ìnīnque botō nē wæwocagaimo ìnōmo inte mǎnīne ante ēñente cæcæte ante quīnante wæquimoo. Wæætē edæ Wængonguī beyænque ante botō quēwengūnque ìmpa.

20 Mōnō Codito ingante awāa timpodāni wæñongante botō tōmengā tōnō godongāmæ wænte bai bagaboimpa. Ìnīnque botō baonga ēñate quēwēmo incæte botō wīi tōmēmo quēwengūimāmo ēwocate quēwēmopa. Wæætē Codito nānō quēwengūimāmo ēwocate quēwēmopa. Ìnīnque adocā Codito Wængonguī Wengā botō ìmote waadete pōnēnīnque nāmā tōmengā wepæ ante, Wængonguī quī, ante botō beyæ pædæ godongā adīnque botō baō ēñate quēwēnīnque tōmengā ingante wede pōnēnīnque quēwēmopa.

21 Ìnīnque, Ìmaī cæedāni, ante Mōitee wodi nānō wææ angainō ante ēñente cædinque mǎnōmainō cæmō beyænque ñā mēnongate

nō entawēmō bamō bai mōnō Codito ònonque pōnī wæncægacāimpa. Mǎnōmaī beyæ Wængonguī nānō pōnō waadete cægainō ante botō Ao ante ò ænīnque cōwē wido cædāmaī ìmpa.

3

Mōnō pōnēnō beyænque mōnō quēwengæimpa, ante

1 Gadataidi ònonque pōnī mīni cæcabo ìnōmīni inte ēñēedāni. Æcānō wadō ante apæncēā ēñēnīnque mīnitō dowænte bai ònonque tedewēmīnipa. Ìñæmpa botō doyedē, Itota ingante æbānō awāa timpodāni wængacāi, ante botō edonque pōnī odōmonte apænebo ēñēnīnque mīnitō ònōwēnenque ante bai do pōnēmīnitapa. 2 Adodeque āmo ate apænemīni ēñēmoedāni. Mīnitō Wængonguī Ònōwoca ingante æbānō cæte æmīnīi. Mōitee wodi wææ nānō angainō ante ēñente mīni cædō beyæ mīnitō tōmengā ingante æmīnitawogaa. Wæætē edæ mōnitō apænemōni ēñēnīnque wede pōnēmīni inte æmīnitawo.

3 Ìñæmpa mīmō òmædē ìmīni inte ēñēnāmaī incædō. Mīnitō wēēnēñedē mā pōnī pōnēnīnque Wængonguī Ònōwoca tōnō nē cægaimīni inte ñōwo wæætē edæ òmæwocamīni inte bai edæ baonga ēñadinque nāmanque cædinque ìinque cæmīnīi. 4 Wængonguī nanguī pōnī pōnō cæcā caate wædinque mīnitō ònonque beyæ caate wæmīnitawo. Tōmengā dicæ ònonquedō ante cæcæte ante pōnō cæcā wæmīniyaa. 5 Wængonguī tōmengā Ònōwoca ingante da pōnōnīnque mīnitō weca bamōnengæ pōnī cæcampa. Quīnante mǎnōmaī cæcāā. Edæ, Mōitee wodi nānō wææ angainō ante ēñente mīni cædō beyæ ante dicæ cæcāā. Wæætē mōnitō apænemōni mīni ēñente pōnēnō beyæ Wængonguī tōmengā Ònōwoca ingante da pōnōnīnque mīnitō weca bamōnengæ pōnī pōnō cæcā æmīnipa.

6 Wængonguī apæncēā ēñēnīnque Abadāo wodi, Nōingā ante apæncēampa, ante wede pōnengacāimpa. Ìnīnque tōmengā wede nānō pōnēnō beyænque Wængonguī, Botō ayōmo Abadāo ìñōmō nē nō cæte quēwēnongā ingampa, angacāimpa, ante

yewæmongatimpa. ⁷ Mänömainö ante adinque mīnitō iīmaī ante eñēedāni. Mönō nē wede pönēmō iñōmō Abadäō wodi pæimō bai adomō imompa, ante eñente pönēedāni. ⁸ Wængonguī, Oodeoidi ināmaī ināni incæ wede nāni pönēnō beyænque botō ayōmo edæ nē nō cæte quēwēnāni bacædānimpa, ante badoncæcäimpa, ante dodāni edonque adinque Wængonguī beyæ yewæmongadānimpa. Ayæ Abadäō wodi ingante apænedinque tōmengä, “Botō bitō imite pönō waa pōni cæbo æmi ininque bitō beyænque wadāni nāni cabo wadāni nāni cabo tōmancabodāniya edæ watapæ quēwenguīnānidō anguēnē,” ante apænegacäimpa. Mänōmaī impa, ante yewæmōninque dodāni wēēnēñedē pōni Wængonguī waa pōni nānō cæquinō ante yewæmongadānimpa. ⁹ Abadäō wodi cōwē ædæmō cæte pönengaingä iñongante Wængonguī pönō waa pōni cægacäimpa. Mönō nē wede pönēmō iñōmōnte tōmengä adobai pönō waa pōni cæcä æninque mōnō iñōmō edæ Abadäō wodi tōnō godongāmæ watapæ quēwēmō imōnō anguēnē.

¹⁰ Wæætē edæ, “Wææ ante botō yewæmongainta adinque æcänō tōmānō ante dicæ cæcää tōmengä iñōmō Wængonguī piinte angä wæwocaingä ingänō anguēnē,” ante Möitee wodi incæ do yewæmongacäimpa. Ininque Wængonguī edæ nānō wææ angainō ante waodāni, Botō eñente cædō beyænque quēwencæboimpa, ante nē anewēnāni incæ wīi eyepæ eñente cædāni inōnāni inte tōmēnāni tōmānāni inānite Wængonguī piinte angä wæwocaināni inānidō anguēnē. ¹¹ Ayæ wacä Wængonguī beyæ yewæmōninque, “Nē nō cæte quēwēnongä incæ tōmengä nānō wede pönēnō beyænque quēwencæcäimpa angacäimpa. Ininque iīmaī ante mōnō edonque eñengæimpa. Möitee wodi nānō wææ angainō ante eñente cæte beyænque waocä dicæ Wængonguī ayongä nē nō cæcä badinque quēwenguīgää. ¹² Wængonguī nānō wææ angainō ante eñente quēwengæimpa, ante nē cædōnāni iñōmō tōmēnāni dicæ nāni wede pönēnō beyæ quēwēnāniyaa. Wæætē, “Mäninō ante nē eñente cæcä iñōmō tōmengä nānō eñente

cædō beyænque quēwencæcäimpa,” ante Möitee wodi nānō yewæmonte angainō bai impa.

¹³ Ayæ adobai, “Æcänō ingante awāa wodoncædāni a ongōna tōmengä ingante Wængonguī piingä wæwocaingä ingänō anguēnē,” ante Möitee wodi yewæmongacäimpa. Ininque Wængonguī nānō wææ angainō ante wīi eyepæ eñente cæmō beyæ mōnō wæwocaimō inte wæyōmōnte mōnō Codito iñōmō, Abæ tawænte gote bai quēwencæminimpa, ante cædinque mōnō beyæ wæætē wæwocaingä badinque edæ awāa wæninque a ongongacäimpa. ¹⁴ Abadäō wodi ingante Wængonguī waa pōni pönō cægacäimpa. Ayæ, mīnitō oodeoidi ināmaī iñōmīnite Itota Codito pönō cæcä beyænque Abadäō tōnō godongāmæ watapæ quēwencæminimpa, ante Wængonguī adobai pönō waa cæcampa. Mänōmaī bacæimpa, ante cædinque Codito tōmāmō imonte, Mīnitō wede pönēninque botō Önōwoca ingante ænte ewocacæminimpa, ante cædinque mōnō imonte æncæte ante nāmā wepæ godonte ængä beyænque quēwēmompa.

Wængonguī tāno, Cæquimo, aninque ayæ ate wææ angacäimpa

¹⁵ Botō tōniñamīni eñēedāni. Botō, Waomō mōnō cæi bai Wængonguī mōnō beyæ wodo adobai cæcampa, ante odōmoncæte ante iīmaī ante yewæmōmo aedāni. Waoda, Mōna guēa cæcaya imōnapa, ante Ao äna ate adocanque inte ædō cæte wadō ante cæquēnengää. Ayæ, Mōnō godōmenque cæcæimpa, ante waocä adocanque inte ædō cæte edæ ante cæquēnengää. Nōwo edæ ämo eñēedāni. Wængonguī, Mōnō godongāmæ cæcabo bacæimpa, ante botō pönō cæcæboimpa, angä eñēninque mōnō Ao ante cæquēnēnō iñōmō edæ wodo adobai impa. ¹⁶ Mæmæ Abadäō wodi ingante apænedinque Wængonguī, Bitō Pæingä ingante botō cōwē pönō waa cæcæboimpa, angacäimpa. Mänōmaī äninque tōmengä Abadäō wodi ingante, “Bitō pæināni,” ante änāmaī ingacäimpa. Wæætē, “Bitō Pæingä ingante pönō cæcæboimpa,” äninque Abadäō wodi

Pæingä adocanque Codito ingante ante pönëninque angacäimpa.

¹⁷ Mänömainö ante apænedinque botö iïmainö ante odömoncæte ante apænetabopa. Abadäo wodi ingante Wængongui, Botö pönö cæbo ate mïnitö Ao ämini iïninque mönö godongämæ waa cæcæimpa, ante wëenëñedë cægacäimpa. Ayæ wantæpiyæ coatodo tiento todëinta wadepo go ate Möitee wodi ingante apænedinque adocä, Iïmai cæedäni, ante pönö wææ änogäimpa. Iïninque Wængongui wantæpiyæ ate wææ äninque do nänö angaine ante wëä godönämai ingacäimpa. Edæ, Cöwë pönö cæcæboimpa, ante doyedë në angaingä inte tömengä ñowo wææ äninque mänine ante dicæ wëä godongantawogaa. ¹⁸ Möitee wodi nänö wææ angainö ëñente cæmö beyænque mönö ænguënecoo do æmö bai Wængongui, Cöwë pönö cæcæboimpa, ante önonque ancægacäimpa. Incæte Wængongui pönö waadete cædinque mæmæ Abadäo wodi ingante apænedinque, Cöwë pönömo æncæminimpa, ante nänö angainö bai cædinque do cægacäimpa.

¹⁹ Iïninque, Cöwë pönömo æedäni, ante në angaingä inte Wængongui quïnante ñowo wæætë, Iïmai cæedäni, ante wææ angacäi. Iïnæmpa tömengä, Mïnitö botö änö ante ëñenämai cædinque wënæ wënæ mïni cædinö edonque bacæimpa, ante odömoncæte ante wææ angacäimpa. Mänömai cædinque tömengä, Abadäo wodi Pæingä botö në angaingä incæ tömengä nänö ponganca mïnitö ëñente cædinque quëwencæminimpa, ante wææ angacäimpa. Mänine nänö wææ angaine ëñente cæcædänimpa, ante Wængongui tömengä anquedoidi inänite da pönongä pöninque tömënäni Möitee wodi ingante mämö odömönäni agacäimpa. Tömengä iïnömö tæcæguedë ongonte bai në angaingä badinque Wængongui nänö angaine ante idægoidi inänite wæætë angä ëñengadänimpa. ²⁰ Ñowo apænebo ëñeedäni. Adocanque eyepæ cæcä adinque tömengä beyæ ancæte ante wacä tæcæguedë ongönämai imaingampa. Wængongui iïnömö, Cöwë pönö cæcæboimpa, në angaingä inte

adocanque incæ eyepæ cædongä ingampa.

Iïmai cæedäni, ante quïnante angacäi, ante

²¹ Iïninque Wængongui, Cöwë pönö cæcæboimpa, ante në angaingä inte wantæpiyæ ate, Iïmai cæedäni, ante wææ äninque tömengä doyedë nänö angaine dicæ wëä godongantawogaa. Edæ tömengä mönö imonte apænedinque, Botö wææ angainö beyæ quëwencæminimpa, ante mänine pönongä ænte quëwëmö bai mänine beyænque edæ në nö quëwëmö bacædömöimpa. Wæætë edæ wii mänömai impa. Wængongui, Cöwë pönö cæcæboimpa, angä ëñëninque mönö quëwenguinque edæ në nö cæmö bamompa. ²² Iïninque Wængongui, Cöwë pönömo æncædänimpa, ante në angaingä inte iïmai ante cæcampa. Botö angaincoo ante Itota Codito ingante në pönënanäni inänite da pönömo ate tömënäni wede nänö pönëno beyænque ænte ëwocacædänimpa, ante iïmai cæcampa. Tömengä mönö inguipoga tömão quëwëmö mönö wënæ wënæ cædimämo adinque mönö imonte pönö tee mönete bai cæcä ongömompa. Mänömai pönö cæcä ongongaimö iïnömönte Wængongui mönö wede pönencabo adomonque iïnömönte tömengä nänö angaincoo ante pönongä ænte ëwocamompa. Wængongui, Mänömai cæbopa, ante apænecä ëñëninque yewæmongadänimpa.

²³ Doyedë iïnömö mönö, Möitee wodi nänö wææ angainö tömänö ante mönö ædö cæte eyepæ cæquii, ante tee mönete bai wægämöimpa. Edæ Itota Codito mönö në wede pönënogä edonque pönö nänö ponte a ongonganca mönö tee mönete bai wægämöimpa. ²⁴ Iïninque, Mïnitö Codito ingante wede pönëninque në nö cæmïni bacæminimpa, ante cædinque Wængongui Codito gämænö töö æmænte bai cædinque wææ angacäimpa. Mänömai i iïninque tömengä nänö wææ angainö beyænque mönö wapiticæ godämai inte Codito gämænö pongämöimpa. ²⁵ Ayæ ñowo iïnömö, Mönö në wede pönënogä do pongäimpa, ante adinque Wængongui ñowo wæætë wææ änämai ingampa.

26 Minitö Itota Codito ingante wede pönemini inte tömämni Wængongui wëñæmini iminipa. 27 Edæ tömämni mönö Codito tönö godongämæ guiite bai æpænë guidique tömengä nänö ewocadö adodö ewocadinque tömengä nempo quëwëminipa. 28 Tömengä nempo adocabomö inömö inte mönö adocanque ingantedö ante apænedinque, Oodeocä ingampa, ante änämaï ingæimpa. Ayæ wacä ingantedö ante adobai, Guidiego ingampa, ante änämaï ingæimpa. Ayæ, Waocä nänö nê ö æningä inte awënë beyænque cæte nê quëwengä ingampa, ante mönö änämaï ingæimpa. Wacä ingantedö ante, Abæ tawænte gocä ingampa, ante mönö änämaï ingæimpa. Ayæ adocanque ingantedö ante, Onguiñængä ingampa, ante mönö änämaï inte wacä ingantedö ante adobai edæ, Onquiyængä ingampa, ante änämaï ingæimpa. Iñæmpa Codito Itota nempo quëwëninque adocabomö imompa. 29 Ayæ minitö iñömö Codito nempo quëwëmini inte mæmæ Abadäo wodi pæimini bai iminipa. Inique Wængongui nänö, Cöwë pönömo æncæminimipa, ante nänö angaincoo ante minitö nê ænguimni iminipa.

4

1 Mäninö ante yewæmöninque botö, Waodäni æbänö cädänii, ante odömöninque iïmaï ante apænecæte ante yewæmömopa. Wæmpocä wængä ate tömengä wengä iñömö wæmpocä nänö éadincoo nê ænguingä ingampa. Inique wæmpocä ayæ mïingä quëwengäñedë mänincoo tömancoo do ænte bai tömengä wengä nê éacä ingampa. Incæte tömengä wengä tömancoo nê éacä incæ edæ tömengä wëñængäñedë guiquënë wæmpocä beyænque cæte nê quëwengä bai inongä ingampa. 2 Inique wæmpocä do äninque, Iïönæ iïnque bayonte botö wengä do picængä badinque nämä nê angä bacæcäimpa, ante nänö angaiönæ iïnque baganca nê aadäni inänite wæmpocä angä ëñëninque tömënäni wæætë wëñængä ingante wææ aadänipa. Ayæ, Wëñængä nänö manguincoo ante æbänö cæquii, ante nê aadänique änäni ëñente wëñængä incæ cæcampa.

3 Mönö iñömö doyedë mäningä wëñængä bai adobai picæmö inämaï mönö ingaiñedë inguipogaque nani wææ angaiönque ante ëñente cægamöimpa. Waocä beyænque cæte nê quëwengä bai mönö adobai inguipogaque nani wææ angaiönque ante ëñencæte ante cædinque mäninö beyænque cæte nê quëwëmö bai inte wægamöimpa.

4 Incæte Mæmpo Wængongui iñömö, Iïönæ da pönömo poncæcäimpa, ante doyedë nänö angaiönæ iïnque bayonte tömengä Wengä ingante da pönongä pongacäimpa. Iïngä Wëñængä ingante onquiyængä mangä ëñadinque tömengä Wængongui nänö wææ angainö ante nê ëñente cæquëwengä nänö baquinque pægacäimpa.

5 Inique mönö Möitee wodi nänö wææ angainö beyæ tee mönete bai wæyömonte adocä Wængongui Wengä incæ, Minitö abæ tawænte bai picæmini badinque näwä wëmini bate quëwencæminimipa, ante mönö imonte ængä beyænque mönö abæ tawænte bai quëwëmompa. 6 Mæmpo Wængongui iñömö, Minitö näwä wëmini imini beyæ, ante tömengä Wengä Önöwoca ingante mönonga da pönongantapa. Inique tömengä Önöwoca iñömö, “Mæmpo, botö Wæmpo,” ante nê apænecä inongä inte mönö mïmönë owodinque adodö ante mönö beyæ apænecampa. 7 Inique bitö iñömö bitö imite nê wææ angaingä beyænque idæwaa cæte quëwengäimni inte ñöwo abæ tawænte bai æmæwo pædimi inte näwä wëmi inömi imipa. Ayæ näwä wëmi iñömite Wængongui pönö cæcä ate bitö tömengä nänö éagaincoo ante nê ænguimi babipa.

Në pönemini cëbämë cæte quëwëmini, ante wæcampa

8 Wængongulidi inämaï iñönänite wadäni iñömö, Wængongulidi inänipa, ante babæ apænëdänipa. Minitö wëñëñedë Wængongui ingante mïni adämaï iñedë, Wængongulidi, ante tömënäni babæ ante nani nê änönäni beyænque cæte nê quëwëmini inte ñæ cæyænte bai wægamimipa. 9 Ñöwo iñömö minitö Wængongui ingante ate bai nê pönemini imini inte ædö cæte wapiticæ ante ëñëminii.

Æ wadö ante godömenque ämo. Wængongui incæ mīnitō imīnite do ate pōnengaingā ingā incæte mīnitō ædō cæte ingui-pogaque quēwēnāni nāni ōnonquedō ante wææ angainō ante ēñente quēwēmīnii. Īñæmpa, Mānīne nāni wææ angainō ante wæætē ēñengæimpa, ānīnque mīni ñā cæpote wæquinque āmīni awædō. ¹⁰ Edæ Wængongui ānāmaī Īñongante mīnitō mā pōnēnīnque, Wængongui beyæ, ante mōnō ĩōnæ cædāmaī inte ongōnīnque ææmæ cæte becæimpa, ānewēmīnīpa. Ayæ, Īi apāicā ĩñonte adobaī, ĩntedæ ĩñonte adobaī, ĩnepo ĩñonte adobaī, Wængongui beyæ, ante mōnō cædāmaī inte ææmæ cæte becæimpa, ante ōnonque pōnī ante cæmīnīpa tōō. ¹¹ Īnīnque, Mīnitō ēñēnāmaī inte mīni wæquinque cæmīnīpa, ante adīnque botō mīnitō beyæ ante guīñente wæbopa. Botō pōnō nanguī cæbo incæte edæ ōnonque wabānō cægaboimpa, ante wæbopa.

¹² Botō tōnīñamīni ēñēedāni. Botō wēēnēñedē mīnitō baī Mōitee wodi nānō wææ angainō nē cæbo baī inte wæbo amīnitawo. Wæætē botō nē wææ angaingā ingante idæwaa ēñente cædinque abæ tawænte gobo baī mīnitō adobaī cæmīni waa tobaimopa. Mīnitō dicæ botō imote wēnæ wēnæ cæmīnitawogaa. ¹³ Wēēnēñedē wēnæ wēnæ mānīmo inte botō mānōmaī beyæ mīnitō weca pōnīnque mōnō Codito ingantedō ante watapæ apænedīnque mā apænebo ēñēmīnitapa. ¹⁴ Īnīnque mānōmaī wēnæ wēnæ bate pōmo ate wædīmīni incæte mīnitō guīñēñate wædāmaī inte towæ tānongadāmaī imīnitapa. Wæætē edæ botō imote adīnque mīnitō, Wængongui anquedo ingampa, ante pōnente baī cædinque watapæ todīnque, Pōe, āmīnitapa. Ayæ edæ, Itota Codito ingampa, ante pōnente baī cædinque, Pōe, āmīnitapa. ¹⁵ Mīnitō mānīñedē watapæ mīni todīnō baī ñōwo guīquēnē quīmæ todāmaī imīnii. Mīnitō mānīñedē edæ eyepæ inte baī nāmā awīnca o togæmōnīnque botō imo pōnō mīne tīmoncædōmīnīpa, ante pōnēnīnque apænebopa.

¹⁶ Īñæmpa mīnitō imīnite nāwangā apænebo beyænque mīnitō ñōwo wæætē

botō imote pīinte bamīnitawo. ¹⁷ Wadāni ĩñōmō, Mōnitō gāmænō ponte ēñēedāni, ante nanguī cædāni ĩñōmō mīnitō imīnite wēnæ wēnæ cæcæte ante ānewēnānīpa. Tōmēnāni ĩñōmō, Pabodoidi ĩnānīte ēñēnāmaī inte mīnitō wæætē mōnitō tōnō godongāmæ cædinque mōnitō cæīnēnonque ante āmōni ēñēnīnque cæcæmīnīpa, ante babæ cædānīpa.

¹⁸ Wacā nānō cæīnēnō ante godongāmæ cæmīni cōwē waa imaimpa. Nāwangā impa. Incæte tōmengā nānō waa cæquēnēnonque ante cæcā adīnque mīnitō, Mānīnonque edæ cæcæimpa, ante nanguī cæquēnēmīni imīnīpa. Ayæ edæ botō mīnitō weca quēwēmoyedē cæmīni baī mīnitō botō dæ ämo ĩñedē cōwē adobaī cæmīni waa imaimpa. ¹⁹ Botō wēmīni ēñēedāni. Yædēmadā inte nantate wædā baī botō ĩñōmō wæætē nantate wædinque edæ, Mīnitō mīmōnē Codito ingante ædæmō entawencæmīnīpa, ante nanguī pōnī cædinque wæbopa. ²⁰ Edæ, Mīnitō æbāmē cæmīnīi, ante ēñēnāmaī imo inte botō mīnitō weca pōnīnque wīi gobæ tedete botō ānō baī tededīnque wæætē wadō baī tedecæte ante pōīnente nanguī wæbopa.

Tada wodi tōnō tōmēnā ĩnante nē cægāingā Agada

²¹ Mīnitō, Mōitee wodi nānō wææ angainō ante mōnō ēñengæimpa, ante nē āmīni inte apænemīni ēñēmoedāni. Mīnitō wææ ante tōmengā nānō yewæmongainta incæ adāmaī inte ēñēnāmaī imīnitawo. ²² Īīmaī ante yewæmongatimpa. Abadāo wodi ĩñōmō wēñæna onguīñæna mēnaa ĩnate tapæīgacāimpa. Adocanque guīquēnē nānōogængā beyænque nē cæte quēwengā wēñængā ĩñongā wacā guīquēnē nāwā nānōogængā wēñængā ĩngacāimpa. ²³ Nē cæte quēwengā wēñængā guīquēnē cōwē mōnō ēñadō baī adobaī ōnonque ēñagacāimpa. Nāwā nānōogængā wēñængā guīquēnē Wængongui, Cōwē pōnōmo æncæbiimpa, ante nānō ānīnō beyænque ēñagacāimpa.

²⁴ Wængongui ĩñōmō, Botō pōnō cæbo ate mīnitō Ao āmīni ĩnīnque mōnō godongāmæ waa cæcæimpa, ante mem-poga apænegacāimpa. Īnīnque, Wængongui mēnea nānō apænegainō æbānō ĩnēi,

ante eñencæte ante mönō mänīna on-
 quiyæna inate adinque pönengæimpa.
 Wængonguī iñömō adopoque apænecæte
 ante Tinaiquidi wæænte ongöningue wææ
 angacäimpa. Mänīneque tömengä nänō
 wææ angaineque ante nē eñente cædāni
 iñömō Agada wodi wēnāni mänīne
 beyænque nē cæte quēwēnāni bai nāni
 baquinque eñadānīpa. ²⁵ Mänīngä Agada
 tömengä nāni wencabo iñömō wacā ingante
 nē cædönāni inte cæningä ñā cæyænte bai
 inte wægadānīpa. İninque Adabiabæ on-
 gonquidi Tinaiquidi ongöningue Wængonguī
 wææ angä ate mönō iñömō Agada bai
 wacā ingante nē cæmō bagamöimpa. Edæ
 Agada wodi nāni wencabo wacā beyænque
 nē cæte quēwēnāni inte nāni wægainō bai
 ñowo Eedotadēē quēwēnāni adobai wacā
 beyænque nē cæte quēwēnāni bai inönāni
 inte wæwente quēwēnānīpa. ²⁶ Eedotadēē
 inguipoga ongöñömō bai mönō öönædē
 æite Eedotadēē bai iñömō ongongæimpa.
 Mänīñömō Eedotadēē nāni añömō mönō
 badā Tada wodi bai impa. Tada iñömō wīi
 wacā ingante nē cæcā bai iñönante mönō
 tömēnā wēmō bai imompa. ²⁷ Edæ iūmaī ante
 Wængonguī beyæ yewæmongatimpa,
 “Bitō owæntabi eñēmi. Wēñæ mänāmaī
 inimi inte bitō, İncayæ ate
 mancæboimpa, ante watapæ
 tocæbiimpa.
 Bitō wēñæ nantadāmaī inimi inte, Botō
 iincayæ ate toquinque impa, ante
 yedæ ancæbiimpa.
 Edæ nänöogængä emō cæte gocā ate
 adocanque inte wēñæ mänāmaī
 iñongante,
 Wængonguī, Botō pönōmo æncæbiimpa,
 angä eñengä inte owæmpocā iñömō
 godömenque nanguī wēñænāni
 inānite māñongä nänöogængä eacā
 guiquēnē wēñænāni wædænque
 mancæcäimpa,” ante yewæmongatimpā.

²⁸ Botō tönīñamīni, eñēedāni. Wængonguī,
 Bitō wēñængä cōwē pönōmo æncæbiimpa,
 ante nänō angainō beyænque Itæca
 wodi eñagacäimpa. Wængonguī, Cōwē
 cæcæboimpa, ante mīnitō imīnite adobai
 angä beyænque mīnitō mempoga eñadinque
 tömengä wēmīni bagamīnīpa. ²⁹ Mänīñedē
 iñömō Wængonguī Öñowoca beyænque

eñacā iñongante Itæca ingante önonque
 nē eñagaingä Itimædo guiquēnē pīinte
 cægacäimpa. Mänōmaī nänō pīinte cægāi
 bai inguipogaque quēwēnāni Wængonguī
 wēnāni inānite ñowo adobai cædānīpa.
³⁰ İninque Wængonguī æbänō angä eñente
 yewæmongadānīi. İūmaī impa. “Nāwā
 nänöogængä wēñængä mæmpocā eadīncoo
 æñongä nänöogængä beyænque cæte
 nē quēwengä wēñængä wæætē ænāmaī
 incæcäimpa. İninque nē cæte quēwengä nāna
 wencaya inate mönō wido cæcæimpa.”
 Ante yewæmongatimpa. ³¹ İninque botō
 tönīñamīni eñēedāni. Mönō iñömō nāwā
 nänöogænā wēñæmō bai inömō inte mönō
 nänöogænā beyænque nē cæte quēwengä
 wēñæmō bai wīi inömō imompa, ante ämo
 eñēedāni.

5

Abæ tawænte bai mönō quēwēnō ante

¹ Mönō iūne Möitee wodi nänō wææ an-
 gainō ante eñente nē cæmō inte ñā cæyænte
 bai wæyömonte Codito, Abæ tawænte bai
 inte quēwencæmīnīpa, ante pönō ö ænte
 ñimpo cæcā beyænque mönō abæ tawænte
 gote bai ee quēwēmō imompa. İninque
 mīnitō iñömō nē abæ tawænte gogaīmīni
 inte tæi ongöningue edæ wæætē mänīne
 beyænque ñā cæyænte bai badāmaī iedāni.

² İñānāni, botō Pabodobo apænebo
 eñenguēnē quēwēmīnīi. Mīnitō, Mönō
 eö togæimō inte quēwengæimpa, ante
 cæmīni ininque ædō cæte Codito ængä
 beyænque quēwenguēnēmīnīi. İñæmpa
 mänōmaī cæmīni ininque Codito mīnitō
 beyæ ædō cæte pönō cæquingää. ³ Bitō,
 Botō eö togæimo inte quēwencæboimpa,
 ante cæbitawo. Edæ botō bitō imite iūmaī
 ante apænebo eñēe. Bitō quēwencæte
 ante cædinque eö togæimi babi ininque
 Möitee wodi nänō wææ angainō tömānō
 ante bitō eñente cæte quēwenguēnēmi
 babaīmīpa töö. ⁴ Pancamīniya, Nō cæmō
 mönō baquinque Möitee wodi nänō wææ
 angainō ante eñente cæcæimpa, ante
 ämīnitawo. İñæmpa mänōmaī ante nē
 ämīni inte mīnitō mönō Codito ingante do
 pango cæte bai cæmīnīpa töö. Edæ pango
 cæte nänēnē goyöminite tömengä ædō

cæte pönö waadete cæquiringää. ⁵ Mönitö guiquënë, Wængongui ayongä mönö nē nō entawēmō bacæmōimpa, ante nanguī pōni æinente wānō cōñmōnite Wængongui Ōnōwoca pönö apæneca ēñēninqe mōnitō, Mönö nē nō entawēmō badinque wat-apæ bacæimpa, ante wede pönēmōnipa. ⁶ Edæ Codito Itota nempo quēwēninqe ēō togæimō imō incæ bagæmō imō incæ tōmāmō adobaī ōnōmonque inōmō imōmpa. Wæætē edæ Codito ingante wede pönēninqe nē waadete pönēmō iñmō mōnō mōnō pönēnō beyænque waa pōni entawēmōmpa.

⁷ Minitö guiquënë wēēnēñedē godongāmæ pogodo gote bai nanguī cædinque waa cæmīnitapa. Edæ ñōwo guiquënë mīnitō waa pōni pogodo gote bai cæyōmīni æcāmē wææ āna ēñēnīmīni inte wæætē Wængongui nō ante nānō apænegainō ante ēñēnāmaī cæmīnitawo. ⁸ Wængongui mīnitō imīnite nē aa pegaingā inte tōmengā iñmō edæ, Eñēnāmaī cædāni, ante dicæ wææ angantawogaa. ⁹ Edæ, “Yedæ æmpocæimpa, ante cædinque guiyā pōni da wente ate pāo cæquimo tōmāo guipæñō pāo yedæ æmpopa,” ante pönēninqe iīmaī ante ēñengæimpa. Adocanque wapiticæ wææ angā ēñēninqe nanguī ināni wæætē oda cæte wæcædānimpā. ¹⁰ Mönö Awēnē nempo mönō quēwencabo imōmpa, ante pönēninqe botō, Minitö botō pönēnō bai pönēmīni inte wīi wapiticæ ante pönenguīmīni imīnīpa, ante pönēmōpa. Wæætē edæ æcāmenque mīnitō imīnite wapiticæ ante wææ angā, ante adinque Wængongui nē apænte angā ingante cōwē godō pangā wæcæcæimpa.

¹¹ Botō tōniñamīni ēñēdāni. Botō Itota awāa wængacæimpa, ante apænebo ēñēninqe, Eō togæimīni baedāni, ante nē ānāni iñmō botō imote cōwē pīninqe pānāni wæbo aedāni. Incæte botō tōmēnāni nāni ānō bai, Eō togæimīni baedāni, ante āmo bai tōmēnāni botō imote wīi bæi ongōninqe pancædōnānimpā. Edæ mōnōmālnō āmo bai tōmēnāni wæætē pīnāmaī ināni inte, Pabodo Itota nānō wængaiwæ ante apæneca awædō, ante tee tēwate bai oda cædāmaī incædōnānimpā. ¹² Minitö imīnite nē wapiticæ ante wææ ānāni iñmō nāmā wido togænte bai

cædinque nāmā ta ñænte Codito ingante nē pönēmīni weca pönāmaī ināni inte waa imaimpa, ante awædō.

¹³ Minitö botō tōniñamīni abæ tawænte gote quēwencæmīnimpā, ante mönō Awēnē mīnitō imīnite apænte aa pegacæimpa. Incæte mīnitō, Abæ tawænte godīmōni inte inguipogaque mōni cæinēnō ante godōmenque cæcæmīnimpā, ante cædāmaī iedāni. Wæætē edæ wadāni inānite godō waadete pönēninqe tōmēnāni beyæ ante cædāni. ¹⁴ Edæ Itota, “Nāmā bitō waadete pönēnō bai pönēninqe bitō wacā ingante adobaī edæ waadete pönencæbiimpā,” angacæimpa. Iñe adodeque ēñente cæmō ininqe Wængongui nānō wææ angainō incæ tōmānō ante do nē cæmō edæ babaīmōmpa. ¹⁵ Edæ babæidi bai nāēmæ pocænte bai cædinque nāēmæ gāwæi cænte bai cæmīni bai mīnitō nāēmæ wido cædinque wantæ biquēnēmīnidō anguēnē, ante apa quēwēmīni.

Mönö Wængongui Ōnōwoca nempo quēwengæimpa, ante

¹⁶ Nōwo āmo ēñēdāni. Wængongui Ōnōwoca ewocadinque quēwēdāni. Mānōmaī quēwēninqe mīnitō inguipogaque mīni cæinēwēnō ante wīi ēñēninqe nāmā beyænque ante cædāmaī inguīmīni imīnīpa. ¹⁷ Edæ inguipogaque mönō cæinēwēnō ante adinque Wængongui Ōnōwoca iñmō edæ Baa angampa. Ayæ wæætē æcānō inguipogaque mönō cæinēwēnō ante cæte quēwēna tōmengā Wængongui Ōnōwoca ingante nāēmæ Baa angampa. Ininqe mönō inguipogaque cæinēwēnō ante wæyōmō Wængongui Ōnōwoca guiquënë, Wadō cædāni, angampa. Mānōmaī beyæ mīnitō mīmōnē wæætedō wæætē ante bai entawēmīni inte mīnitō nāmā mīni ānō ante ædō cæte cæquīmīni. ¹⁸ Incæte mīnitō imīnite Wængongui Ōnōwoca nōinō tōō æmænte māocā gomīni inte mīnitō Mōitee wodi nānō wææ angainō ante do abæ tawænte gomīni imīnīpa.

¹⁹ Inguipogaque mönō cæinēwēnō ante ēñēninqe nē cædāni iñmō æbānō cædāni, ante edonque abaimpa. Edæ iīmaī impa. Tōmēnāni nānōgængā ināmaī

iñongante do godö guëa towënänipa. Wen-
tamö pönëwëninque cædänipa. Önonque
guiñëñadämaï inte nämä baonque
pönëwëninque towënänipa. ²⁰ Wængonguïdi
inänipa, ante badöninque ædæ wæænte waa
adänipa. Idö bai yewëninque önonque
tedewënänipa. Pïinte quëwënänipa. Tiyañö
tiyañ tedewënänipa. Wacä godömenque
ængä ate wædinque pïinte awënänipa. Ænguï
bawënänipa. Nämä waa tobote, ante
änewënänipa. Wæætedö wæætë äninque
näwæ godänipa. Wadö ante näni cabo wadö
ante näni cabo badinque wæætedö wæætë
cædänipa. ²¹ Wacä gomonga ængä ingante
godö pïinte adänipa. Tï nämæ nanguï
bedinque dowænte badänipa. Ayæ nanguï
pöni godömenque bedinque nanguï pöni
cæninque guiñëñadämaï inte towënänipa.
Ayæ godömenque quiëmë bai në cæinäni
inänipa. Mänömaï cæte quëwënäni iñömö
Wængonguï Awënë Odeye nempo ædö cæte
edæ guiiquinänii, ante do botö äninö bai
ñöwo wæætë ämo ëñëedäni.

²² Wængonguï Önöwoca ingante ëñente
në cæmö guiquënë mönö waincawæ
incate bai iïmaï cæmompä. Waadete
pönëmompä. Watapæ tomompä. Gäne
entawente pönëmompä. Ee cæte pïinämaï
imompä. Waadete cæmompä. Wadäni beyæ
ante waa pöni cæmompä. Wæntædämaï
inte cöwë cæmompä. ²³ Gäne pönëninque
ædæmö cæmompä. Nämä wææ äninque
nö cæmö imompä. Wængonguï Önöwoca
ingante ëñëninque mänömaï cæmö ad-
inque Wængonguï mönö cædönö ante
wææ änämaï ingampä. ²⁴ Mönö Codito
quïmö inömö inte mönö baö tömengä
tönö awænëmæ timpote bai wængälmö
ininque inguipogaque mönö cæinëwengäinö
adobai awæ timpote bai iñonte mönö
abæ tawænte bai godïmo inte baonque
ante mönö cæinëwënö ante ëñënämaï inte
cæmompä. ²⁵ Edæ Wængonguï Önöwoca
ængä beyænque quëwëmö inte mönö
tömengä Önöwoca tönö guëa godongämæ
cægonte bai quëwengæimpä. ²⁶ Mänömaï
quëwëninque mönö nämä waa adämaï
ingæimpä. Edæ wacä tönö guëa wæætedö
wæætë änämaï ingæimpä. Wacä gomonga
ængä ingante mönö godö pïinte adämaï

ingæimpä.

6

*Mönö wacä ingä wacä ingä iñacabo
cæccæimpä, ante*

¹ Botö tönïñamini ëñëedäni. Wacä
ëñënämaï cædinque oda cæte wæcantawo.
Ïininque mïnitö Wængonguï Önöwoca in-
gante mïni ëwocacabo iñömö, Mäningä në
oda cædingä inte Wængonguï taadonque
adodö pö gocæcäimpä, ante cædinque
tömengä ingante ædæmö cæedäni. Mänömaï
cædinque në apænecä guiquënë, Botö
adobai ëñënämaï cæinente wïi bacæboimpä,
ante pönente wædinque nämä wææ
cæedäni. ² Wacä teëmente mongænte bai
entawengä ate wædinque mïnitö mönö
Codito nänö, Iïmaï cæedäni, angainö ëñente
cædinque tömengä nänö mongæncoo iñacabo
mongænte bai cædinque waa cæedäni.

³ Æcänö önonganque ina inte, Botö
ñænæmo inömo imopa, ante pönëna,
tömengä iñömö nämä babæ apænete bai
oda cæte pönengampä. ⁴ Ïininque ado-
canque nämä nänö cæinö cöwä adinque
adocanque nämä nänö cæinö cöwä ad-
inque tömämini, Tömëmo æbänö cæboo,
ante nämä apænte anguënëmini iminipa.
Mänömaï cædinque wacä nänö cæinö
adämaï inte waocä nämä nänö cæinonque
cöwä adinque apænte äninque, Tömëmo nö
cæbo imopa, ante adinque tobaingampä.
⁵ Edæ adocanque nämä nänö cæquënë
ante teëmente mongænte bai cædinque
adocanque nämä nänö cæquënë
ante teëmente mongænte bai cædinque tömämini
eyepæ cæbäiminipa.

⁶ Ayæ Wængonguï nänö apænedö ante
wacä apænecä ëñëninque në ëñengä iñömö
tömengä mäincoo pancacooga waincooga
æninque në apænecä ingante eyepæ
pædæ godongä æncæcäimpä.

⁷ Tömëmö tä bocate pæte incayö waocä
wäänä adomö bai tä pete ængampä.
Mänömaï ingæimpä, ante në angaingä
inte Wængonguï iñæmpä oda cæcampa
diyæ waocä wamö ænguingää. Ïininque,
Waocä æbänö cæcää, ante adinque
Wængonguï pönö cæcä ate waocä nänö
cægä bai adobai ænte wæcæcäimpä. Ämo

ēñēninque mīnitō wīī wacā wapiticæ nānō apænedō beyæ oda cæquēnēmīnidō anguēnē. ⁸ Edæ minte pædimō bai tā pete ængā bai cædinque imæcaque ante nāmā pōnente nē cæcā guiquēnē adobai imæcaque nānō ñōmænguinque æncæcāimpa. Wæætē Wængonguī Ōnōwocaque ante pōnēninque nē cæcā guiquēnē Wængonguī Ōnōwoca pōnō cæcā beyænque tōmengā nānō cōwē wænāmaī quēwenguinque æncæcāimpa. ⁹ Īninque mōnō wæntæye badāmaī inte wadāni beyæ godōmenque waa cæcæimpa. Ñimpo cædāmaī imō Īninque edæ Wængonguī, Īñedē æncæmīnimpa, ante nānō angaiñedē ĩnque bayonte māññedē mōnō edæ tā pete bai eyepæ pōñi æmaimompa. ¹⁰ Mānōmaī beyæ mōnō eyepæ imō ĩñedē tōmānāni ĩnānite mōnō waa cæcæimpa. Ayæ wadāni nē wede pōnēnāni ĩñōnānite mōnō, Adomō imompa, ante pōnēninque tōmēnāni ĩnānite godōmenque nanguī cædinque waa cæcæimpa.

Waa quēwencæmīnimpa, ante

¹¹ Botō ōnompoca yewæmōninque tōmēmo ñænæmōmo yewæmōmoī aedāni. ¹² Codito mōnō beyæ awāa wængacāimpa, ante nē pōnēnāni incæ pancadāniya, Māñne ante ēñēninque oodeoidi pūñāni wæcæ wæ, ante nāmā wææ cæcæte ante cædānipa. Īninque tōmēnāni, Eō togænte cæmōni ĩninque oodeoidi wæætē mōnitō imōnite waa acædānimpa, ante cædinque mīnitō imīnite, Eō togæimīni bacæmīnimpa, ānānipa. ¹³ Nē eō togæināni incæ edæ Wængonguī nānō wææ angainō ante dicæ ēñente cædāniyaa. Incæte tōmēnāni, Mōnitō ānō bai mīnitō do eō togæimīni bamīni ate wadāni mōnitō imōnite waa acædānimpa, ante cædinque mīnitō imīnite, Eō togæimīni baedāni, ante cædānipa.

¹⁴ Botō guiquēnē quiēmenque ante, Waa aedāni, ante dicæ āmogaa. Īñæmpa imæcaque ante botō cæinēmāmo ante botō, Codito nānō wængaiwāa tente bai wæinēmāmo impa, ante bai cædinque edæ māñimāmo ante æmæwo wido cætabopa. Ayæ tōmēmo adobai Codito tōnō āanque bai awāa wænte bai ingaimo inte edæ imæcaque

botō cæinēnō ante cædāmaī ĩnōmo imopa. Īninque, Mōnō Awēnē Itota Codito awāa wæninque mōnō beyæ waa pōñi pōnō cægacāimpa, ante pōnente wædinque botō māñiwænque tōmengā nānō wængaiwænque ante waa ate apænedinque edæ wade ante cōwē waa ate tededāmaī incæboimpa, āmopa. ¹⁵ Īninque eō togæimō incæ bagāamō incæ ōnonque pōñi edæ impa. Edæ Itota Codito badongā beyænque mōnō mīimō quēwēmompa. ¹⁶ Māñōmaīnō ante pōnente cæmīni ĩñōmīnite Wængonguī pōnō waadete piyænē cæcā adinque mīnitō gānē pōnente waa cæcæmīnimpa. Idægoidi imīnipa, ante Wængonguī nē nānō angaimīni incæ mīnitō māñōmaī cæte quēwencæmīnimpa.

¹⁷ Botō Itota beyæ ante cæyōmō wadāni pānāni wædīmo inte botō do baonga āmogate ee ēñabo ĩñōmote ñōwo ĩncayæ ate mīnitō tōmāmīni edæ ee amīni quēwēmoedāni. ¹⁸ Botō tōññamīni waa quēwencæmīnimpa, āmopa. Mōnō Awēnē Itota Codito pōnō waadete apæncæ ēñēninque mīnitō mīmōnē adobai waadete entawencæmīnimpa. Māninque ante yewæmōmopa, ante Amēē āmopa.

Epetoidi inänite Pabodo nänö cadota ante yewæmongainta

Waa quëwencæminimpa, ante

¹ Wængonguï angä eñëninque Itota Codito botö imote da godongä gogaïmo inte botö Pabodobo inömö inte yewæmömopa. Epeto inömö quëwëmini incæ mïnitö Wængonguï quïmini inte Itota Codito nempo quëwëninque në ædæmö cæte pönëmini inömïnite botö, Mïnitö acæminimpa, ante yewæmömopa. ² Mönö Mæmpo Wængonguï tönö mönö Awënë Itota Codito piyænë cæte waadete pönö cæda ate mïnitö gänë pönëninque waa quëwencæminimpa, ante yewæmömopa.

Codito nempo quëwëninque mönö eyepæ ëwocamopa

³ Mönö Awënë Itota Codito Wæmpocä inongante Itota inömö adocä ingantedö ante, Botö Wængonguï inongä ingampa, ante apænegacäimpa. Ininque mönö inömö Codito tönö do öönædë æite bai tömengä nempo quëwëñömonte adocä Itota Wængonguï incæ tæiyæ waëmoncoo në ëwocagaingä inte pönö cæcä æninque mönö tömengä nänö ëwocadoncoo tömancoo bai adobai eyepæ pönï ænte ëwocamopa. Mänömaï cæcä adinque mönö tömengä ingante apænedinque, Bitö waa pönï cæbi æmönipa, ante watapæ apænecæimpa. ⁴ Tömengä inömö edæ, Codito nempo quëwëninque mïnitö botö ayömo edæ tæiyæ waëmö ëwocamïni inte edæ wentamö mongænämaï incæminimpa, ante tömengä inguipoga nänö badönämaï inëdë incæ mönö imonte pönö apænte ængacäimpa. Ayæ mönö imonte waadete pönëninque tömengä, ⁵ Botö pæpogate bai æmo beyænque mïnitö inömö Itota Codito nempo quëwëninque botö wëmini baquïmini incæminimpa, ante cædinque tocæboimpa, angacäimpa. Ininque tömengä doyedë nänö angainö bai cædinque pönö angä ate mönö Wængonguï wëmö cöwë baquënëmö ingamöimpa.

⁶ Edæ nanguï waadete pönö cædinque tömengä nänö në Waadecä ingante da pönongä æmompä. Mänömaï beyæ mönö inömö tömengä ingante, Bitö ñäö apæite bai ëmönömi inte mänömaï waadete pönö cæbi æmönipa, ante watapæ apænecæimpa. ⁷ Edæ tömengä nänö në Waadecä inömö mönö imonte æncæte ante nämä wepæ godonte ængä beyænque mönö abæ tawænte quëwëmompä. Ayæ adobai tömengä wepæ inte ñä mënongacä beyænque eñënämaï mönö cædö ante Wængonguï nanguï waadete pönö cædinque ñimpo cæcä quëwëmöimpa. ⁸ Tömengä inömö edæ, Æbänö i, ante tömänö ante në eñëningä inte, Æbänö cæquïi, ante edæ nöingä eñëninque mönö beyæ ante godömenque nanguï pönö cæcä æmöimpa. ⁹ Ayæ edæ, Codito tönö guëa cædinque nämä botö änö bai cæte tocæboimpa, ante Wængonguï angacäimpa. Tömengä mänömainö ante nänö wëmö inömö angainö ante mönitö imönite ñöwo edonque pönï odömonte apænecä eñëmönipa. ¹⁰ Tömengä, Iinëdë cæcæboimpa, äninque tömengä nänö angaiñedë inque ba ate tömengä nänö angainö bai edæ inque cæcæcäimpa. Edæ öönædë ongoncoo tönö inguipoga ongoncoo tömancoo tē gæte mämö adocanque nempo Codito Awënë nempo godömo æncæcäimpa, ante cæcampa.

¹¹ Nämä pönente nänö angainö bai tömänö ante adobai pönï në cædongä inte Wængonguï, Iïmaï cæcæboimpa, ante pönente ate cöwë cæcampa. Ininque tömengä, Codito nempo quëwënanï inänite æncæboimpa, ante nänö pönente angainö bai cædinque, Mïnitö Codito nempo quëwënguïmini incæminimpa, ante pönëninque mönitö imönite apænte ængacäimpa. ¹² Mönitö, Codito beyæ watapæ bacæimpa, ante täno pönëmöni inömönite tömengä, Botö ñäö ëmönö ante watapæ apænëmini bacæminimpa, ante mönitö imönite pönö apænte ængacäimpa.

¹³ Ayæ, Codito pönö ængä beyænque mïnitö quëwencæminimpa, ante Wængonguï watapæ nänö apænegainö ante eñente pönëninque mïnitö epeteomïni adobai Codito nempo quëwëmini imïnipä. Wede

pönēmīni adinque Wængonguī, Botō wēmīni īmīnīpa, ante edonque acæīmpa, ante odōmoncæte ante tōmengā ēmōwo ante mīnitonga yewæmonte baī cædinque tōmengā Tæiyæ Waēmō Ōnōwoca ingante da pōnongā ænte ēwocamīnīpa. ¹⁴ Edæ Wængonguī, Botō quīmīni īnōmīni inte mīnitō abæ tawænte mīni goyedē mīnitō ænguincoo māniñedē ate eyepæ pōni æncæmīnīpa, angampa. Ānīnque tōmengā, Nō pōni īmpa, ante ēñencæmīnīpa, ante cædinque tōmengā Ōnōwoca ingante ñōwo da pōnongā ænte ēwocamōmpa. Īnīnque pancacooga do ænte baī ēwocamō inte mōnō, Īncayæ ate mōnō tōmancoo ænguinque īmpa, ante edonque ēñengæīmpa. Tōmengā mānōmaī cæcā adinque mōnō, Wængonguī bitō godōmenque ñāō apāite baī bitō ēmonguinque mānōmaī cæbīpa, ante watapæ apænecæīmpa.

Nō ēñēnāni bacædānīmpa, ante Pabodo apænecampa

¹⁵ Botō īñōmō, Epeteoidi mōnō Awēnē Itota ingante wede pōnēnāni īnānīpa, ante tededāni ēñentabopa. Ayæ adobaī, Wængonguī quīnāni tōmānāni īnānīte epeteoidi īñōmō waadete pōnēnāni īnānīpa, ante ēñēnīmo inte, ¹⁶ botō ñīmpo cædāmaī inte Wængonguī ingante cōwē waa ate pōnēnīnque apænebopa. Ayæ mīnitō beyæ ante cōwē apænebopa. ¹⁷ Itota Codito mōnō Awēnē īñongante Wængonguī īñōmō adocā Codito Wængonguī īnongā ingampa. Ayæ nē Mæmpocā īnongā inte tōmengā ñāō ēmōnongā ingampa. Tōmengā ingante apænedīnque botō, Bitō Ōnōwoca ingante da pōnōmī ænīnque epeteoidi īñōmō nē ēñēnāni bacædānīmpa, ante apænebopa. Ayæ, Bitō Ōnōwoca pōnō odōmongā adinque epeteoidi wæætē Itota Codito ingante do ate baī ædæmō pōnencædānīmpa, ante botō mīnitō beyæ ante Wængonguī ingante cōwē apænebopa.

¹⁸ Wængonguī pōnō cæcā beyænque watapæ bacæīmpa, ante mīnitō pōnente tocæmīnīpa, ante cædinque Wængonguī mīnitō īmīnīte aa pegacāīmpa. Ayæ adobaī, Mōnō tōmengā quīmō inte tæiyæ waēmō bayōmonte tōmengā nānō godōmenque ñāō

ēmonguinque mōnō īmonte ængacāīmpa. Mānīne mēnea edæ nāwangā īnepa, ante mīnitō ēñencæmīnīpa, ante botō, Wængonguī bitō tōmēnāni mīmōnē tīca ēnente baī odōmonte apænebi ate do ēñencædānīmpa, ante Wængonguī ingante apænebopa. ¹⁹ Mōnō nē pōnēmō īñōmonte Wængonguī nānō pōnō cæquīnō ante tōmengā nānō tæī piñæmāmo æpodō ī, ante mōnō ædō cæte tee mante aquīī. Incæte mīnitō, Mānīmāmo ante æpodō ī, ante epeteoidi ēñencædānīmpa, ante botō Wængonguī ingante apænebopa. Edæ, Tōmengā nānō tæī piñæmāmo īñōmō æbānō ī, ante ēñencæte ante mōnō, Tōmengā gomonga tæī piñænongā inte īīmaī cægacāīmpa, ante ēñengæīmpa.

²⁰ Nē tæī piñænongā inte Wængonguī angā ate mōnō Codito īñōmō do wæningā inte edæ do ñāni ōmæmongacāīmpa. Ayæ godōmenque tæī piñænīnque Codito ingante ōōnædē ænte mæīdīnque Wængonguī tōmēmæ īnō angā Codito tæ contagacāīmpa. ²¹ Edæ æcāmenque pedænguīpoga īñonte mīnguīpoga īñonte ñænængā inte nē angā īnaa, æcāmenque nē awēnē īnaa, æcāmenque tæī piñænte ongongā īnaa, æcāmenque ingante, Awēnē ingampa, ante godō pemōnānī mānīnāni tōmānāni ōnōnānīnque incædānīmpa. Mōnō Codito adocānque ingante ogæ æænonte baī cædinque Wængonguī angā ate tōmengā wæætē Tæiyæ Awēnē bacā acæīmpa. ²² Ayæ Wængonguī tōmāo īñōmō ongoncoo Codito ōnōwoca īnō pōnō wææntodōnīnque edæ, Bitō edæ Tæiyæ Awēnē īnōmī inte edæ æmonga pōnī ongoncæbīmpa, angacāīmpa. Ayæ, Bitō īmite godongāmæ nē pōnēnāni tōmēnāni Ocamō baī īñōmite, ²³ tōmēnāni wæætē bitō baō baī adoyonque baī incædānīmpa. Codito ingante mānōmaīnō ante apænedīnque Wængonguī, Bitō nē Awēnē īnōmī inte tōmāo īñōmō ongoncoo tōmancoo bitō nempo ongoncooque bacæīmpa. Ayæ bitō īmite nē pōnēnāni īñōmō bacoo īnāni yebænāni īnīnque bitō ēnempodō eyede pōnī bacæīmpa, ante Wængonguī Codito ingante pōnō cægacāīmpa.

2

Wængonguī nānō waadete pōnēnō beyænque quēwēmō

¹ Minitō guiquēnē wēēnēñedē ēñēnāmaī cæte quēwēmīni inte wēnæ wēnæ mīni cædō beyæ dobæ edæ wæwocaimīni ingaminimpa. ² Nē inguipogaque ante pōnēnāni taadō adodō cægonte bai minitō māniñedē edæ wēnæ wēnæ cæte quēwengaminimpa. Ayæ wēnæidi tæi piñænte nāni owocabo awēmō iñōmō nāni cægōnō adodō gote bai minitō tōmēnāni awēnē miñæ tee empote godinque wēnæ wēnæ cægaminimpa. Nōwo incæ Wængonguī nānō änō ante nē ēñēnāmaī cæte quēwēnāni guiquēnē adocā wēnæ awēnē nānō pōnēwēnō ante ēñente ēwocadinque cædānīpa. ³ Wēēnēñedē tōmēnāni tōnō godongāmæ quēwēninque mōnō tōmāmō adobai imæcaque ante pōnēninque mōnō towēmāmoque ante quēwengamōimpa. Quiēmenque ante towencæte ante mōnō cæinēwēnō ante cædinque mōnō ocaidē ædēmenque pōnēninque mōnō cæinēwēnonque cæte quēwengamōimpa. Inique wadāni nāni tente wæquēnēnō bai mōnō adobai imæcaque ante pōnente nē cæmō inōmō inte edæ Wængonguī nānō piinte pangūēnēmāmo ante edæ do tente wæquēnēmō ingamōimpa.

⁴ Mānōmaī ingaimō iñōmonte Wængonguī mōnō imonte nanguī waadete pōnēninque iīmaī nanguī waadedongā inte pōnō waa cægacāimpa. ⁵ Mōnō ēñēnāmaī cægainō beyæ ante wæwocate wæyōmonte tōmengā pōnō cæcā beyænque mōnō Codito tōnō godongāmæ quēwēmōmpa. Minitō edæ Wængonguī nānō waadete pōnō cægainō beyænque quēwēmīni imīnīpa. ⁶ Wængonguī angā Codito ñāni omæmōñongā mōnō tōmengā tōnō godongāmæ ñāni omæmonte bai miīmō badinque quēwengamōimpa. Ayæ mōnō tōmengā nempo quēwēmō iñōmonte Wængonguī iñōmō Itota Codito ingante ææntodōninque mōnō imonte oōnædē ææntodonte Itota tōnō pōnō gōnongā tæ contate bai ongōmōmpa. ⁷ Mānōmaī Itota Codito nempo quēwēñōmonte Wængonguī iñōmō, Botō pōnō waadete cædinque

godōmenque gomonga cæbo acædānīmpa, ante cægacāimpa. Ayæ, Miinguipo badōmo ate botō māniñedē ate odōmōmo adinque tōmānāni, Wængonguī nānō waadete pōnō cæganca wadāni dicæ adoganca cædāniyaa, ante wæcædānīmpa, ante cæcæte ante mānōmaī cægacāimpa.

⁸ Edæ Wængonguī nānō waadete pōnō cægainō beyænque minitō mīni quēwenguinque wede pōnēmīni bamīnitapa. Incæte minitō dicæ nāmā mīni cæinō beyænque nē wede pōnēmīni bamīnitawogaa. Wæætē edæ Wængonguī pōnongā æninque minitō nē wede pōnēmīni bamīnitapa. ⁹ Inique, Nāmanque cæte quēwēmō aedāni, ante mōnō edæ änāmaī ingæimpa. Iñæmpa wīi mōnō cædō beyæ quēwēmōmpa. ¹⁰ Edæ Wængonguī nānō nē badongaimō inōmō imōmpa. Ayæ, Codito nempo nē quēwēnāni iīmaī cædinque waa cæcædānīmpa, ante tōmengā wēēnēñedē mōnō cæquēnēnō ante eyepæ badongacāimpa. Inique mōnō imonte badōninque tōmengā, Codito Itota nempo quēwēninque minitō mīni waa cæquēnēnō ante edæ cæte quēwencæmīnīmpa, ante pōnō badongā bagamōimpa.

Codito beyænque ganccæ pōnēmōmpa, ante

¹¹ Mānōmaī beyæ minitō, Doyedē iīmaī ingatīmpa, ante pōnēedāni. Oodeoidi iñōmō onompoca æmontaique eō togæināni inte nāmanque ante edæ, “Nē eō togæimōni imōnīpa,” ante pemonte bai apænedānīpa. Wæætē minitō oodeomīni ināmaī nē ēñagaimīni iñōmīnite, “Bagāamīni imīnipææ,” ante mānīnāni piīwēnāni wægaminimpa. Inique minitō māniñedē æbānō ingaimīni inōmīni, ante yewæmōmo ate pōnēedāni. ¹² Māniñedē edæ mōnō Codito nempo quēwēnāmaī ingaimīni inte minitō mōni idægocabo nempo adobai edæ quēwēnāmaī inte nānēnē quēwengaminimpa. Inique Wængonguī, iīmaī cōwē pōnō cæcæboimpa, ante nānō angainō ante mōnitō godongāmæ Ao ante ēñente quēwēñōmōnite minitō wæætē gobæ nānēnē quēwēninque Wængonguī nānō angainō ante edæ ænāmaī ingaminimpa. Watapæ bacæimpa, ante mōnitō pōnēnō

ante mīnitō iñōmō nānēnē quēwente ædō cæte watapæ pōnente toquīmīni. Gobæ quēwēnīnque mīnitō Wængonguī nempo edæ quēwēnāmaī ingamīnīmpa. ¹³ Incæte mīnitō gobæ nē quēwēnōmīni iñōmīnite Itota Codito nāmā wepæ godonte ænīnque mīnitō imīnite ænte māmōngā eyequeī pōni pōnīnque mīnitō ñōwo tōmengā nempo quēwēmīnīpa.

¹⁴ Wēēnēñedē mōnitō tōnō mīnitō guēadō guēa cædōmō ingaīmō inte mōnō, Nānēnē incāmīnīmpa, ante wææ cæ impa tæcæguedē wææ gōnōnte baī cægāmōimpā. Codito iñōmō nē piyænē cædongā inte, Wææ cæ impa, mōnō ānōmpa bæ tate wido cæte baī cædinque mōnō imonte āāñōmonque badōngā bamōimpā. Īnīnque tōmengā mīmōnē nē piyænē cæte entawēnōngā ingā beyænque mōnō adobaī gānē pōnēmōmpa. ¹⁵ Edæ Wængonguī, Īīmaī cæedāni, ante wade wade ante nānō wææ angainō ante ēñēnīnque dodāni godōmenque wææ angadānīmpa. Mōnō Codito iñōmō inguīpoga pōnīnque mānīne ante tōmānō ante ēñēnte cæte quēwengacāimpā. Ayæ, Idæwaa wææ ante impa, ante baī cædinque tōmengā mānīne ante nāmā baonga mongænte wænīnque tee moncate baī cægacāimpā.

Mānōmaī cædinque tōmengā, Mīnitō men-caboga inte nānēnē quēwēmīni incæte ñōwo piyænē cæte botō nempo godōngāmæ quēwencāmīnīmpa, ante cædinque mōnō imonte ænte wempo cægacāimpā. Īnīnque mōnō edæ piyænē cæte quēwēngūnque edæ āāñōmonque bagāmōimpā. ¹⁶ Itota Codito ingante awāa timpodāni wængā ĩnīnque tōmengā mōnō guēadō guēa piinte cægāimāmo ante ænte mongænte wido cæte baī wængā beyænque mōnō piyænē cæmō bagāmōimpā. Ayæ ado tōmengā awāa nānō wængainō beyænque mōnō tōmāmō adocabomō bamō adīnque Wængonguī wæætē piyænē cædinque mōnō imonte Ao ānīnque ængacāimpā. ¹⁷ Mīnitō guīquēnē gobæ nānēnē quēwēñōmīnite mōnitō guīquēnē Wængonguī weca eyequeī quēwēñōmōnite Codito iñōmō inguīpoga pōnīnque mōnō tōmāmō imonte apænedīnque, Piyænē cæte gānē pōnente quēwēedāni, ante pōnō apænecā ēñēntamōmpa. ¹⁸ Tōmengā nānō

pōnō cægāinō beyænque mōni oodeo-cabo adobaī mīnitō wamīni adobaī mōnō tōmāmō Wængonguī Ōnōwoca adowocaque ingante ēwocamō inte mōnō Wæmpocā weca tōmāmō do pōmōmpa.

¹⁹ Īnīnque mōnitō Wængonguī quīmōni do bagāimōni inte Wængonguī nempo quēwēmōni ingaīmōni baī Codito nānō pōnō cægāinō beyænque mīnitō adobaī mōnitō tōnō adocabomīni do badīnque edæ Wængonguī nempo quēwēmīni imīnīpa. Īnīnque mīnitō ñōwo idæwaa wamīni ingamīnīmpa. Wīī wabæca quēwente baī edæ tōmēmīni oncōnē ponte owote baī mīnitō ñōwo Wængonguī nempo quēwēmīnīpa. ²⁰ Waodāni dica tāno gōnōnīnque tānocaa wænōmēnæca mænōnāni baī Wængonguī adobaī cædinque Itota Codito ingante tāno gōnōngā ongōñōngante tōmengāa godō mænōnte baī cædinque mōnō imonte ĩīmaī cædinque pōnō gōnōngā gōngæmōmpa. Codito nānō nē da godōngāimōni tōnō tōmengā beyæ nē apænēmōni tōnō iñōmōnite Wængonguī mōnitō imōnite ænīnque wænōmēnæca gōnōngā gōngæñōmōnite wadāni inānīte gā æænō tæī mænōnte baī gōnōngā gōngæñānīpa. ²¹ Codito nempo quēwēñōmōnite Wængonguī mōnitō imōnite adocooga gō cæte baī pōnō tæī mænōngā ate mōnitō æicō baī bacō baī bamōnīpa. Edæ Wængonguī Tæiyæ Waēmō Ōnōwoca ingante āanque baī ēwocadīnque mōnitō godōngāmæ Awēnē tæiyæ waēmō oncō baī bamōnīmpa. ²² Bayōmōnite mīnitō adobaī tōmengā nempo ongōñōmīnite Wængonguī mīnitō imīnite ænīnque mōnitō tōnō godōngāmæ māmō adocooga gō cæte tæī mænōnte baī cædinque, Mīnitō botō Ōnōwoca tōnō āawocaque baī ēwocadīnque botō owoquincō baī bamīnīpa, ante pōnō badōngacāimpā.

3

Oodeoidi ināmaī ināni inānīte apænece gotabopa, ante

¹ Mānīnō beyæ ĩīmaī ante apænebopa. Botō Pabodobo iñōmō Codito beyæ ante oodeomīni ināmaī imīni imīnite apænecæte

ante cæyömote botö imote edæ tee mönedäni wædömo inte yewæmömopa.

² Minitö oodeomini inämaï imini iñömö iïmaï ante wabänö eñëminitawo. Wængongui pönö angä eñëninque botö minitö beyæ tömengä nänö waadete cædönö ante nē apænequënēmo batabopa. ³ Mäninö ante botö, Wængongui awëmö nänö cægäinö ante botö imote edonque odömongä atabopa, ante do wædænque yewæmömö aminitawo. Edæ adodö ante ñöwo yewæmömopa. ⁴ Ìninque mänömainö ante botö do yewæmöninta adinque minitö, Mönö Codito awëmö nänö cægäinö ante Pabodo do ate bai eñengampa, ante eñëmaïminipa. ⁵ Mönitö wæmæidi nani quëwëñedë nē quëwengäinani iñömö, Mönö Codito iincayæ ate pöninque æbänö awëmö cæquingää, ante eñënämaï inte wægadänimpa. Ñöwo guiquënë Codito beyæ nē apænedäni tönö mönitö tömengä nänö nē da godönimöni tæiyæ waëmö bamöni iñömönite Wængongui Önöwoca mäninö ante edonque odömonte apænecä eñëmönipa.

⁶ Iïmaï ante impa. Mönitö Wængongui nänö pönonguincoo nē ænguimöni iñömönite minitö oodeoidi inämaï imini inte mönitö tönö adocabomini badinque edæ mönitö tönö godongämæ nē ænguimini adobai baminipa. Ayæ, Itota Codito tönö pönö cædinque Wængongui nänö, Cöwë cæcæboimpa, ante angäinö do cægacaimpa, ante watapæ pönëninque minitö mönitö tönö edæ godongämæ quëwencæminimpa.

⁷ Wængongui nē tæi piñænongä inte waadete pönö nanguï cæcä adinque edæ tömengä beyæ nē cæbo badinque botö Codito ingantedö ante nē watapæ apænebo batabopa. ⁸ Mönö tömämö Wængongui quimö iñömönte botö iñömö wamini bai wii imopa. Botö adoboque wædämo pönï imo incæte Wængongui waadete cædinque pönö angä eñëmo inte botö minitö iminite nē apænebo batabopa. Codito nänö pönö cægäinö ante æpodö i, ante mönö ædö cæte tee mante eñenguüi. Incæte Wængongui waadete pönö cæcä beyænque botö iñömö Codito waa pönï nänö pönö cægäinö ante edæ oodeo

inämaï imini iminite nē apænequënēmo batabopa. ⁹ Ayæ Wængongui tömancoo nē badongaingä inte wëenëñedë nāmanque entawëninque awëmö nänö wë wodongäinö ante botö imote odömonte apænecantapa. Ayæ, Pabodo mäninö ante edonque odömonte apænequënengä ingampa, ante tömänäni eñencædänimpa, ante pönö apænecä æntabopa.

¹⁰ Codito ingante mönö godongämæ pönencabo iñömönte tömengä wadö wadö ante tömänö ante nē eñengaingä inte mönö tönö godongämæ cæcampa. Mönö tönö mänömaï cædinque tömengä, Botö wadö wadö ante tömänö ante botö eñengäinö ante adinque öönædë quëwënäni awënëidi tönö mäniñömö nē änäni tönö wæcædänimpa, ante cægacäimpa. ¹¹ Wëenëñedë pedæmämö iñönte Wængongui, Cæbo ate awënëidi incæ wæcædänimpa, ante cöwë pönengacäimpa. Ñöwo iñömö tömengä mäninö ante nänö pönengäinö ante tömengä mönö Awënë Itota Codito tönö godongämæ cædinque do cægacäimpa. ¹² Codito nempo nē quëwëmö inte mönö tömengä ingante wede mönö pönënö beyænque guiñënämaï inte Wængongui weca do pöninque apænemompa. ¹³ Mänömaï impa, ante edæ minitö do eñëminipa. Ìninque botö minitö beyæ ante cædinque botö caate wædö ante pönëninque minitö wæætë wædämaï iedäni. Wæætë, Mönitö godömenque ñäö bai ëmoncæmönimpa, ante Pabodo caate wæcampa, ante pönëninque minitö wædämaï incæminimpa ämopa.

Codito nänö pönënö ante

¹⁴ Mäninö beyæ mönö Awënë Itota Codito Wæmpocä iñongante botö tömengä önöwaca inö da guicapodinque apænebopa. ¹⁵ Tömengä iñömö edæ adocanique näwä Wæmpocä ingampa. Ìninque ingui-poga quëwëmö incæ öönædë quëwënäni incæ tömengä ingante, Mæmpo, ante nē tedemö iñömö mönö tömengä tönö mönö wæmpocabo bai imompa.

¹⁶ Ìninque mönö Wæmpocä ingante apænedinque botö minitö beyæ ante iïmaï ante apænebopa. Wængongui bitö nē ñäö bai entawëmi inömi inte bitö Tæiyæ

Waëmö Önöwoca ingante epeteoidi inänite da pönömi æninque tömënäni wæætē edæ mīmō tæi piñænte entawencædänimpa, ante apænebopa. ¹⁷ Ayæ, Mönö Codito adobai mīnitō weca pōñongante mīnitō mīmönē wede pönëninque tömengä ingante ædæmō entawencæmīnimpa, ante mönō Wæmpocä ingante apænebopa. Ayæ, Awæ ædæmō guiwa inte tömëmæ äwäate pæwæ bai cædinque mīnitō iñömō adobai tömengä nänō waadete pönëmāmo entawëninque edæ mīmönē tæi ongömīni bacæmīnimpa. ¹⁸ Ayæ mönitō Wængonguī quīmōni tönō mīnitō adocabomīni inte tæi piñæmīni badinque, Itota Codito nänō waadete pönënō ante ægancadō owoo, ante eñencædänimpa, ämopa. Ayæ, Tömengä nänō waadete pönënō iñömō edæ yepanca pōni owopa, oopänō pōni owopa, æibæ pōni owopa, wincamō pōni owopa, ante eñencædänimpa, ante apænebopa. ¹⁹ Ayæ edæ, Mönö Codito waadete nänō pönënō æbänō gomonga pōni owoo, ante mönō ædō cæte eñenguī, ante mönō wædō incæte mīnitō mäninō ante eñencæmīnimpa. Ayæ edæ, Mäninō ante eñëmīni inte mīnitō Wængonguī nänō nanguī entawënō edæ eyepæ pōni entawencæmīnimpa, ante botō mönō Wæmpocä ingante apænebopa.

²⁰ Mönö änō ante ayæ mönō pönënō ante eyepæ cædongä inte Wængonguī iñömō mönō imonte tæi piñænte nänō cæpāmo ganca cædinque nanguī gomonga cæcä ingampa. Ìninque ñöwo iñömō mönō Wængonguī ingante waa ate pönente apænecæimpa. ²¹ Edæ do wænte æigainäni tönō ayæ ate eñate quëwenguinäni tönō mönō tömämō Codito ingante godongämæ mönō pönencabo inömō inte Itota Codito ingante ewocadinque mönō godongämæ apænecæimpa. Mæmpo Wængonguī eñëmi. Bitō adobique ñäo emongaīmi inōmi imipa, ante mönō ñimpo cædāmaī inte cōwē waa ate apænecæimpa. Mänōmaī impa, ante botō, Amëë, ämopa.

4

Codito nempo quëwëninque adocabomö imompa

¹ Waa cæte quëwencæmīnimpa, ante Wængonguī aa pecantapa, ante eñëmīni inte mīnitō tömengä nänō änonque ante eñente cædinque quëwencæmīnimpa. Botō mönō Awënē beyæ tee mönete wæcōmo incæ ämo eñëedäni. ² Mīnitō nämä ængö cædāmaī inte, Önömoque bai imopa, ante pönëninque wadäni inänite edæ ædæmō cæedäni. Æiquedō waa cæquinänii, ante wædāmaī inte edæ piyænē cæte quëwëedäni. Ayæ wadäni mīnitō imīnite wënæ wënæ cædäni wædinque tömënäni inänite wæætē piñāmaī inte ædæmō waadete cæedäni. ³ Mīnitō, Mönö pönencabo piyænē cædinque cōwē adodō ante pönente edæ Wængonguī Önöwoca tönō äanque bai ee ewocacæimpa, ante nanguī cædinque wacä ingä wacä ingä edæ waa cæedäni.

⁴ Mönö Awënē pönō cæcä ate watapæ bacæimpa, ante mīnitō adodeque ante pönente tocæmīnimpa, ante Wængonguī mīnitō imīnite edæ adodeque ante aa pegacäimpa. Ìninque mänine, Watapæ bacæimpa, ante mīni pönëne adodeque i bai Wængonguī Önöwoca edæ adobai adowocaque inte quëwengampa. Tömengä adowocaque nempo quëwënömō inte mönō adobai edæ adocabomonque inömō imompa. ⁵ Mönö Awënē edæ adocanque pōni inongä iñongante tömengä ingante mönō wede pönënō adobai adodeque pōni inepa. Ayæ adodō ante pönëninque æpænē guiidique mönō adopænenque guiite bai guitamompa. ⁶ Wængonguī adocanque pōni inongä inte tömengä tömämō Wæmpocä adocanque ingampa. Tömengä iñömō edæ Tæiyæ Awënē pōni inongä inte tömämō imonte nē aacä ingampa. Tömengä adocanque pōni nempo quëwëñomonte tömengä wæætē mönō tömämō mīmönē quëwengampa.

⁷ Incæte mönō Codito, Mīmönē bitō entawenganca ænte cæe, ante tee mante bai cædinque adocanque ingante waadete pönō cædinque wacä ingante waadete pönō cædinque edæ tömämō imonte tömengä nänō pönō cæcoo eyepæ pönongä æninque entawëmompa. ⁸ Codito mänōmaī cæcæcäimpa, ante pönëninque awënē Dabii wodi iīmaī ante yewæmongacäimpa.

“Tömengä æibæ æicæ cædinque wadäni inänite bæi ongonte ñä cæyænte tömengä miñæ ænte mæicä æigadänimpa.

Ayæ æidique tömengä mönō waocabo iñōmonte, Minitō entawenguinō, ante eyepæ pædæ pōnongä ænte entawengamōimpa,”

ante Dabii nänō yewæmonte angainō bai impa.

⁹ Mänine, “Æigacäimpa,” ante nani angaine iñōmō quinate yewæmongatü. Edæ, Tömengä inguipoga tadömengadæ do wææningä inte æigacäimpa, ante odōmoncæte ante yewæmongatimpa.

¹⁰ Nē wæængaingä inongä iñōmō adocä do öönædē gōmōnga æidique inguipoga tömāo öönædē tömāo tömāo iñōmō edæ godōmenque æibæ pōni quēwengä inongä ingampa.

¹¹ Tömengä tömancoo nē enempocä inongä inte adocä mönō waomō imonte pōnō angä ænte entawēninque mönō iñāi cæmō bamōimpa.

Pancamōniya imōnite tömengä angä eñēninque tömengä nänō nē da godongaimōni batamōnipa.

Pancamōniya guiquēnē Wængonguī waa pōni nänō pōnō cægainō ante nē apænemōni batamōnipa.

Pancamōniya guiquēnē Wængonguī beyæ nē apænemōni batamōnipa.

Pancadāniya guiquēnē nē aadāni badānitapa. Ayæ pancadāniya guiquēnē nē odōmonte apænedāni badānitapa.

¹² Mänōmaī pōnō cædinque mönō Codito mönō ocamō bai inongä inte, Botō baō bai adoyonque bai ināni iñōmō ñancæ äate bai tæi piñænāni ewocacædänimpa, ante pōnō cægacäimpa. Mönō imonte tömengä, Minitō Wængonguī quimīni inōmīni inte tömānāni inänite nē cæmīni inte godō cæcæminimpa, ante pōnō cægacäimpa.

¹³ Mīni wede pōnēnō ante mīnitō tömāmīni adoyōmō ante pōnencæminimpa, ante mönō Codito pōnō cægacäimpa. Ayæ, Botō Wængonguī Wēmo iñōmote mīnitō botō imote ate bai pōnencæminimpa, ante tömengä pōnō cæcampa. Ayæ æmæwo pæmīni bai mīni baquinque mīnitō botō entawēnō ædæmō entawencæminimpa, ante Codito edæ da pōnongä eyepæ

æmompa. ¹⁴ Īninque æmæwo pædimō inte wēñæmō ināmaī imō ininque mönō edæ oda cædāmaī ingæimpa. Wadāni guiquēnē mā pōnēninque, Æbānō cæmō ate oda cæquīnānii, ante edæ nāmāneque tedewēnānipa. Tömēnāni iñōmō edæ babæ cæcæte ante cædinque waa cæte bai cædāni атақеdāni. Woboyæ ædæ go ædæ go pæmænte bai cædinque tömēnāni wadō ante odōmonte tedewēnānipa. Mänōmaī wido piñænte bai cædāni incæte mönō iñōmō Codito nänō entawēnoncoo ænte entawēninque äā mænāmaī ingæimpa.

¹⁵ Wæætē Wængonguī, Nāwangä pōni impa, ante nänō apænegainō ante mönō tömānāni inänite waadete pōnēninque apænecæimpa. Mänōmaī cædinque mönō Codito baō bai iñōmonte tömengä nē Ocamō bai inte pōnō angä beyænque mönō ñancæ äadinque godōmenque picæmō bamompa. ¹⁶ Mönō baonga wepæ eyepæ eñadinque ñancæ äadinque tæi piñænte pæte quēwēmompa. Adobaī mönō Codito baō tōnō adoyonque bai inōmō inte mönō tömengä nänō apænedō ante eñēnōmo inte ñancæ äate pæte bai quēwēmompa. Ayæ wæætē ocai encamō inte mönō pæ pagænguinque wangō tēnāmaī oguincai bamē impa. Ayæ adobaī mönō Codito nänō waadete pōnēnō ante mīmōnē entawēmō inte mönō wacä ingä wacä ingä godō aamō inte mönō pōnencabo incæ edæ tæi piñænte entawēmompa.

Codito nempo mönō iñāi quēwēmompa, ante

¹⁷ Īninque mönō Awēnē nempo quēwēnōmo inte botō nō ämo eñēedāni. Wadāni nē eñēnāmaī ināni önonquedō ante pōnēninque quēwēnānipa. Minitō guiquēnē adobaī quēwengaimīni inte ñōwo wæætē ñimpo cædinque mänōmaī cædāmaī inguēnē quēwēmīnii.

¹⁸ Tömēnāni guiquēnē mīmō enēnānipa diyæ Wængonguī weca ponguīnānii. Mīmō ömædēnāni inte tömēnāni ocai eñēnāmaī badāni beyænque Wængonguī weca pōnāmaī inānipa. Edæ wentamō mongæninque tömēnāni ocai wēmō encadāni inte idiquibæ ante pōnēnānipa.

¹⁹ Īnāni iñōmō tömēnāni nāni cæquēnēnō ante ñimpo cædinque

ñowo wæætē guññēnāmaī inte baō nāni towēinēnō ante cæcæte ante nāmā pædæ godonte baī edæ cædānīpa. Edæ, Quiēmē wīwa cæquīī, ante mǎnīnonque cæcæte ante godōmenque cæinente wædānīpa.

²⁰ Wæætē mīnitō guiquēnē, Mōnō Codito æbānō ingāā, ante pōnēninque edæ wīī tōmēnāni nāni cæinēwēnō baī mīni cæquinque edæ pōnēmīnitapa.

²¹ Tōmengā apænegā edæ wīī ēñēmīnitawo. Īñæmpa, Wængonguī nō pōnī nānō apænegainō ēñēninque Itota iñōmō mīmōnē entawengampa, ante mīnitō tōmengā nempo quēwēñōmīnite tōmengā mǎnōmainō ante adodō ante edæ do odōmonte apænegā ēñēmīnitapa. ²² Mīnitō wēēnēñedē mīni cæte quēwengainō ante tōmengā iīmaī ante odōmonte apænegacāimpa. Babæ pōnente mīni cæinente wæwēnō beyæ mīnitō mīmōnē wentamō mongænte wæwēmīni inte do mīni entawengainō ante edæ wido cæedāni, ante odōmonte apænegacāimpa.

²³ Edæ mempoga ēñagāimīni inte mīnitō ēñēnō do mīī pōnī encamīni inte mīīnonque ante pōnencæmīnīpa, ante odōmonte apænegā ēñēmīnitapa. ²⁴ Ayæ, Botō pōnō badōmo ate mīnitō botō baī tæiyæ waēmō ēwocadinque nō pōnī cæte quēwencæmīnīpa, ante Wængonguī pōnō badongā ate mīnitō mīimīni bagamīnīpa. Īninque tōmengā, Mǎnīnō Wængonguī nō pōnī nānō entawēnō æninque mīnitō ædæmō entawencæmīnīpa, ante odōmonte apænegā do ēñēmīnitapa.

²⁵ Mǎnōmaī beyæ mīnitō tōmāmīni, Mōnō adocabomō imōmpa, ante adinque babæ mīni tedewēnīnō ante ñimpo cædinque wacā ingante wacā ingante nāwangā ante apæneedāni.

²⁶ Ænguī bamīni incæte mīnitō piyænē cædinque wacā ingante wēnæ wēnæ cædāmaī ee aedāni. Edæ gāwadecæ ganca nanguī piīninque edæ mīni wæquinque imāimpa. ²⁷ Mǎnōmaī cædinque mīnitō, Wēnæ incæ pōnō cæcā ate botō ænguī batabopa, ante pōnente wædinque ñowo wæætē, Wēnæ botō weca pōnāmaī incæcāimpa, ante nāmā wææ cæedāni.

²⁸ Nē awēmō æningā iñōmō ñowo edæ

ee cædinque awēmō ænāmaī incæcāimpa. Wæætē, Botō ōnompoca nanguī cædinque ænte quēwēninque nē ænguēñēnāni inānite adobaī godōmo æncædānīpa, ante cæcæcāimpa.

²⁹ Mīnitō nāmā ōnōne wææ aadinque wīwa ante tededāmaī iedāni. Wæætē edæ, Wadāni æbānō ante ēñinguēñēnāni ināni, ante pōnēninque mīnitō, Tōmēnāni tæī piñænte entawencædānīpa, ante cædinque nē ēñēnāni beyænque ante waadete godō cædinque apæneedāni.

³⁰ Wængonguī Tæiyæ Waēmō Ōnōwoca iñōmō mīnitonga pō guīdinque, Botō æmo beyænque mīnitō iīncayæ ate æmæwo abæ tawænte gote baī quēwencæmīnīpa, ante odōmoncæte ante yewæmonte baī cægacāimpa. Īninque mīnitō, Wēnæ wēnæ mōni cædō beyæ ante Wængonguī Ōnōwoca wæwente badāmaī incæcāimpa, ante wææ cædinque edæ ēñente cæedāni.

³¹ Ayæ, Wīī waēmō awædō, ante mīni piūwēnīnō ante edæ ñimpo cæedāni. Āimō ante mīni pōnēwēmāmo adobaī ñimpo cædinque ænguī pōnī mīni badīmāmo edæ ñimpo cæedāni. Yæ ante mīni piīnte ogæ tedewēmāmo, wacā ingante ante mīni piīnte tedewēmāmo edæ ñimpo cæedāni. Ayæ piīnte cæquinque ante mīni entawēnīnō ante tōmānō edæ wido cæedāni. ³² Wæætē godongāmæ waadete cædinque wacā caate wæcā adinque mīnitō godongāmæ Ca ca wæcæmīnīpa. Ayæ Codito ængā beyænque Wængonguī mīnitō imīnite pōnō ñimpo cæcampa cæmīni. Tōmengā ñimpo cæcā quēwēmīni baī mīnitō adobaī cædinque wadāni wēnæ wēnæ cæyōnānite wacā ingā wacā ingā ñimpo cæmīni quēwēnāni.

5

Wængonguī wēmīni, iīmaī cæte quēwēedāni, ante

¹ Īninque Wængonguī wēmīni iñōmō mīnitō tōmengā nānō nē waademīni inōmīni inte Wæmpocā nānō cæī baī ante cōwā adinque adobaī cæedāni. ² Baō, Wængonguī quī, ante godōninque, Oguī wacæimpa, ante iya tǎnāni baī cædinque Codito mōnō imonte waadete pōnēninque edæ adobaī cægacāimpa. Tōmengā iñōmō,

Botō Wængonguī quīmo īmopa, ante nāmā wepæ pædæ godōninque mōnō īmonte wæætē ængacāimpa. Īninque tōmengā nānō waadete pōnēnō bai mīnitō adobai waadete pōnēninque quēwēedāni.

³ Wæætē edæ mīni pōnencabo īñōmīnīte waocā adocanque incæ nānōogængā īnāmaī īñongante godō guēa mōnāmaī īedāni. Wentamō mongæ wæcæ wæ, ante edæ wīwa cædāmaī īedāni. Nanguī māincoo ante æīnente wædāmaī īedāni. Mānīnō tōmānō cædāmaī īmīni inte mānīnō ante edæ adopoque incæ tededāmaī īmāewedāni. Edæ Wængonguī quīmīni tæiyæ waēmō entawēmīni inte mīnitō mānīnō tōmānō cædāmaī incæmīnīmpa. ⁴ Wentamō ante nāni pōnēwēnō bai mīnitō wæætē adobainō ante pōnēnāmaī īedāni. Ōnonque ante nāni tedewēnō bai mīnitō wæætē adobai tededāmaī īedāni. Wēnæ wēnæ ante pōnente nāni badete towēnō bai mīnitō wæætē adobai badete todāmaī īedāni. Īñæmpa Wængonguī quīmīni īnōmīni inte mīnitō mānīnō ante wīi pōnenguēnēmīni īmīnīpa. Wæætē Wængonguī ingante waa ate pōnēninque apænequēnēmīni īmīnīpa.

⁵ Awēnē Odeye Wængonguī nempo ayæ Awēnē Odeye Codito nempo edæ ædānidō nē guīte ænguīnāni īnānīi. Nānōogængā īnāmaī īñongante nē towēnāni tōnō wentamō pōnente nē cædāni īñōmō tōmēnāni edæ dicæ guīte ænguīnāniyaa. Ayæ māincoo ante wacā quī nē æīnente wæwēnāni īñōmō edæ, Māincoo incæ mōnitō wængonguī impa, ante bai cædāni īnōnāni inte tōmēnāni adobai edæ guīte ænāmaī incædānīmpa. Ante āmo ēñēedāni.

⁶ Wadāni, Mīnitō oda cæcæmīnīmpa, ante ōnonquedō ante tedete cæyōnānīte mīnitō wæætē tōmēnāni nāni tededō ante edæ ēñēnāmaī īedāni. Edæ tōmēnāni ēñēnāmaī inte nāni wēnæ wēnæ cædō beyæ Wængonguī ænguī badīnque tōmēnāni īnānīte pancæcāimpa. ⁷ Īninque mīnitō gooque gomō adīnque tōmēnāni tōnō godongāmæ cædāmaī īedāni.

⁸ Mīnitō īñōmō wēēnēñedē wentamō mongæmīni ingaīmīni inte ñōwo wæætē edæ mōnō Awēnē nempo quēwēninque edæ ñāō bai entawēmīnīpa. Īninque Mæmpo nānō ñāō ēmōnō bai entawēmīni inte mīnitō ñāō īñōmō cægonte bai

edæ waa quēwēedāni. ⁹ Edæ waiwæ waincate bai cædinque mōnō wadāni īnānīte godō waa cæquinque mōnō edæ ñāō īñōmō quēwēmōmpa. Ayæ nō pōnī mōnō cæquinque nāwangā pōnī ante mōnō apænequinque edæ ñāō īñōmō quēwēmōmpa. ¹⁰ Ayæ, Æbānō cæmō ate mōnō Awēnē, Waa cæmīni abopa, ante apænequingā, ante ēñencæte ante cædinque do ēñēnīmi inte tōmengā nānō waa adonque cæedāni. ¹¹ Wadāni wēmo īñōmō ōnonque nāni cædō ante adīnque mīnitō īñōmō edæ gooque gomō aedāni. Ayæ tīca ēnente bai cædinque, Tōmēnāni nāni cædō wēnæ wēnæ impa, ante edonque odōmōmīni acædānīmpa.

¹² Awēmō nāni cædō beyæ guingo imonte wæquēnēnāni īñōnāni mōnō īñōmō edæ guīñēnēte wædinque mānīnō ante edæ tededāmaī ingæīmpa. ¹³ Wæætē edæ, Awēmō īñōmō æbānō cædānīi, ante tōmānō ante edæ tīca ēnente edonque acæīmpa.

¹⁴ Ñāō beyænque edæ edonque amōmpa. Mānōmaī ī beyæ īīmaī ante āmotamīni ante bai apænedānīpa.

“Bitō wangæ mōīmi inte ñāni ōmæmonte ængæ gantie.

Edæ ængæ gantiyōmite

Codito incæ pōnō tīca ēnente bai cæcā ate ñāō entawencæbiīmpa,” ante apænedānīpa.

¹⁵ Mānōmaī beyæ mīnitō ocāi ōmæcamīni īnāmaī īnōmīni inte wæætē ocāi nē encamīni inte cædinque, Æbānō waa cæte quēwēnguīmo, ante nāmā waa ate waa cæedāni. ¹⁶ Wadāni ñōwo incæ godōmenque wīwa cædānīpa cæmīnīi. Eyepæ īñonte mīni cæquēnēnonque ante edæ do cæedāni. ¹⁷ Edæ wēñænāni owempote cædāni bai mīnitō adobai cædāmaī īedāni. Wæætē, Wængonguī æbānō angantawo, ante ēñēninque mānīnonque ante ēñente cæedāni. ¹⁸ Wadāni biīnōmæ nāni āmæ bedīnque dowænte badīnque godōmenque pōnēnāmaī cædinque tōmēnāni nāni ēwente wæwēngūnque bewēnānīpa. Īninque mīnitō īñōmō betē dowænte badāmaī īedāni. Wæætē Wængonguī Ōnōwoca ingante ædæmō ēwocate quēwēedāni.

¹⁹ Āmotamīni ante bai godongāmæ watapæ ante tededāni. Awēnē Dabīi wodi nānō

āmotamīni angaintaa adinque edæ adodō æedāni. Ayæ mīnitō nāmā mā pōnēninque, Īīmaī Wængonguī beyæ mōnō āmotamīni angæimpa, ante adodō æedāni. Wængonguī Ōnōwoca angā ēñente ēwocadinque tōmengā āmotamīni nānō ānōnō ante adodō æedāni. Mīmōno āmotamīni ante bai pōnēninque mīnitō mōnō Awēnē ingante watapæ pōnente æedāni. ²⁰ Æbāmē bayonte mīnitō tōmānō beyæ ante edæ Mæmpo Wængonguī ingante cōwē waa ate pōnēninque mōnō Awēnē Codito ēmōwo ante apæneedāni.

Mæmpoidi nāni wencabo ūīmaī quēwencædānimpa.

²¹ Mōnō Codito ingante guīñente wædinque mīnitō wīī nāmā mīni pōnēnonque bai cædinque wæætē edæ, Nē ānāni æbānō ānāni, ante Ao ate nōinō ante cæedāni.

²² Onquiyæmīni ēñeedāni. Mīnitō, Mōnō Awēnē nānō angainō bai mōnō ēñente cæcæimpa, ante tōmēmīni nānōogæñāni inānite Ao ante ēñente cæedāni. ²³ Edæ Codito ingante mōnō godongāmæ pōnencabo iñōmonte mōnō Codito adocā iñōmō, Quēwencæmīnimpa, ante nē Ængaingā inongā ingampa. Tōmengā tōnō mōnō adoyonque bai iñōmonte tōmengā iñōmō mōnō Ocamō bai inongā ingampa. Ayæ onquiyængā tōnō onguīñængā adobai adoyonque bai iñōnate onguīñængā iñōmō nē ocamō bai inongā ingampa.

²⁴ Īinque Codito ingante mōnō godongāmæ pōnencabo incæ tōmengā ingante Ao ante ēñente cæmō bai onquiyæñāni adobai tōmēnāni nānōogæñāni inānite cōwē edæ Ao ante ēñente cæquēnēnāni inānīpa.

²⁵ Wæætē onguīñæmīni ēñeedāni. Mīnitō Codito nānō waadete pōnēnō bai tōmēmīni nānōogæñāni inānite adobai waadete pōneedāni. Tōmengā ingante mōnō godongāmæ pōnencabo iñōmonte tōmengā iñōmō mōnō imonte waadete pōnēninque mōnō imonte æncæte ante pōnō cædinque nāmā wepæ godongacāimpa. ²⁶ Ayæ, Wængonguī nānō apænedō waēmōmæ imæ bai iñonte mīnitō iñōmō mānīnō ante ēñēninque tæiyæ waēmō ēwocate quēwencæmīnimpa, ante mōnō Codito adocā mōnō imonte edæ nā mēnongate bai cægacāimpa. ²⁷ Mānōmaī

tæiyæ waēmō badinque mōnō wentamō mongænāmaī inte Codito ingante mōnō pōnencabo adocabomō iñōmonte tōmengā iñōmō edæ nānōogængā ænte bai cædinque mōnō pōnencabo imonte, Bitō, ante apænegacāimpa. Ayæ mōnō cabo iñōmonte tōmengā, Bitō idiquibæ entawēnāmaī iñōmite ædō cæte bitō imite piinte anguīī, ante pōnō cægacāimpa. Ayæ wæætē edæ, Nā mēnongate bai tæiyæ waēmō ēmōmi ĩnque mōnō edæ guēa nāō apāite bai ēmongæimpa, ante Codito nānōogængā ænte bai mōnō imonte pōnō ængacāimpa.

²⁸ Onguīñæñāni iñōmō adobai tōmēnāni, Botō baō, ante nāni pōnē bai tōmēnāni nānōogæñāni inānite adobai waadete edæ pōnenguēnēnāni inānīpa. Æcānō tōmengā nānōogængā ingante waadete pōnēna iñōmō tōmengā nāmā baō ante waadete pōnente bai edæ cæcampa. ²⁹ Īñæmpa waocā nāmā baō cōwē piināmaī ingampa. Wæætē, Botō baō, ante edæ pæ gompodinque pōnō aacampa. Ayæ adobai Codito ingante mōnō godongāmæ pōnencabo iñōmonte edæ tōmengā adobai, Botō baō, ante bai cædinque mōnō imonte wææ gompodinque pōnō aacampa. ³⁰ Edæ mōnō Codito nē Ocamō bai inongā inte nē angā iñongante mōnō wæætē tōmengā tōnō adoyonque bai inte ēñente quēwēmompā. ³¹ “Mānōmaī beyæ onguīñængā mæmpo tōnō badā inate ēmō cæte godinque onquiyængā ingante, Botō nānōogængā, ante æmæwo monte quēwencæcāimpa. Mēnaa ĩnīna incæ tōmēna wæætē nāna gæncaya badinque adocanque bai bacædaimpa,” ante yewæmongatimpa.

³² Mānōmainō ante nāni yewæmongainō ante edæ wē wodonte bai ĩ iñonte wīī tōmānō ante ēñēmompā. Incæte, Codito ingante mōnō godongāmæ pōnencabo iñōmonte mōnō tōmengā tōnō adocanque bai imōimpa, ante mīnitō ēñencæmīnimpa, ante botō apænetabopa. ³³ Incæte onguīñæmi nāmā bitō waadete pōnēnonganca tōmēmi nānōogængā ingante edæ adoganca waadete pōnencæbiimpa. Onquiyæmi adobai, Botō nānōogængā ingampa, ante adinque edæ ēñente cæcæbiimpa.

6

¹ Wēñæmīni guiquēnē ēñēedāni. Mīnitō mōnō Awēnē nempo quēwēnōmīni inte tōmēmīni mæmpoidi inānite edæ ædæmō ēñente cæedāni. Æcānō edæ mænōmaī cædaa tōmengā edæ nō pōni cæcampa. ² “Wæmpocā ingante wāānā inante waa adinque tōmēna inate godō waadete cæe,” ante Wængonguī incæ wææ angacāimpa. Tōmengā wade nānō wææ angainō ānīnque, Mīni waa quēwenguīnque cæcæmīnīmpa, ante apænedāmaī ingaingā inte ñōwo iīne ante wææ ānīnque, Mīni waa quēwenguīnque cæcæmīnīmpa, ante mā apænegacāimpa. ³ Edæ iīne ante wææ ānīnque tōmengā, “Mænōmaī cæmīni īnīnque mīnitō watapæ quēwēnīnque iīmæca wantæpiyæ quēwēncæmīnīmpa,” ante mā apænegacāimpa.

⁴ Wæmpomīni guiquēnē ēñēedāni. Mīnitō wēnāni wīi āināni bacædānīmpa, ante wææ cædinque mīnitō tōmēnāni inānite pīnte cædāmaī iedāni. Wæætē, Mōnō Awēnē wææ aadinque mōnō imonte pānīnque odōmonte apænecampa, ante adinque mīnitō tōmengā nānō cæi bai adobaī cædinque wēñænāni inānite ædæmō wææ aadinque mōnō Awēnē nānō apænedō ante odōmonte apænemīni ate tōmēnāni waa pæcædānīmpa.

⁵ Woadāni mīnitō imīnite ò ænāni inte tōmēnāni beyænque cæte nē quēwēmīni iñōmīnīte apænebo ēñēedāni. Iīmæca mīnitō awēnēidi inānite mīnitō waa adinque guīñente wædinque tōmēnāni nāni ānō ante ēñente cæedāni. Mīnitō Codito angā ēñente mīmōnē nō pōnente cæmīnitawo. Inīnque edæ iīmæca awēnē angā ēñente edæ adobaī mīmōnē nō pōnente cæedāni. ⁶ Mīnitō edæ, Awēnē botō imote waa acæcāimpa, ante tōmengā ayongante ēñente cæmīnitawo. Iñæmpa awēnē dæ goyongante adobaī cōwē ēñente cæedāni. Codito botō imote nē godonte Ængaingā ingante nē cæte quēwēmō imōmpa, ante pōnēnīnque mīnitō edæ Wængonguī nānō ānōnō ante mīmōnoque pōnente cæedāni.

⁷ Mīnitō mīmōno piyænē cædinque iīmaī ante pōnente cæedāni. Iīmæca awēnē ingante cædinque botō wīi waocā beyænque ante cæbopa. Wæætē Wængonguī Awēnē

beyænque ante botō iīmæca awēnē ingante cæbopa, ante pōnēnīnque pæ piñante bai cæedāni. ⁸ Mīnitō iīmaī ante edæ do ēñēmīnīpa. Mīnitō wacā nānō ò ænīmīni inte tōmengā beyænque nē cæte quēwēmīni incæ abæ tawænte ee gote bai nāmā beyænque cæte quēwēmīni incæ mīnitō imīnite mōnō Awēnē iñōmō, Bitō ægancadō waa cæbīi, ante adinque wæætē eyepæ pōni pædæ pōnongā ænguīmīni imīnīpa.

⁹ Waocā ingante nē ò æmīni guiquēnē ēñēedāni. Mīni nē ò ængaināni inānite adobaī waa cæedāni. Tōmēmīni Awēnē incæ tōmēnāni Awēnē adocā inongā inte òōnædē owocampa cæmīnī. Tōmengā iñōmō wacā ingante wadō wacā ingante wadō ate pōnente cædāmaī ingampa. Mænōmainō ante do ēñēmīni inte mīnitō beyænque cæte nē quēwēnāni inānite edæ pīnte ānīnque edæ pæmēnēnāmaī iedāni.

Tæinta wēñate bai mōnō tæi piñante ewocacæimpa

¹⁰ Ñōwo iīmaī yewæmōnīnque botō idæwaa yewæmōmopa. Mīnitō mōnō Awēnē nempo nē quēwēnōmīni iñōmīnīte tōmengā nānō tæi piñænō pædæ pōnongā ænīnque tæi piñante entawente quēwēedāni. ¹¹ Mīnitō wææ caaquincoo, ante Wængonguī eyepæ pōni nānō da pōnōnīncoo tōmancoo ænīnque wēñate bai cædinque tæi ongōedāni. Edæ mānīncoo tōmancoo wēñate ongōñōmīni wēnæ awēnē, Oda cæcæmīnīmpa, ante nangūi ēñente cæcā incæte mīnitō wæætē oda cædāmaī inte edæ tæi ongoncæmīnīmpa.

¹² Edæ wīi woadāni inānite mōnō guēadō guēa cæcæimpa. Wæætē wēnæidi awēnēidi tōnō wēnæidi inānite nē ānāni iñōnānīte mōnō tōmēnāni inānite wæætē guēadō guēa cæcæimpa. Inguipoga wēmō iñōmō tæi piñante enempodāni tōnō òōnædē iñōmō wēnæcoo nē wīwa ewocate cædāni tōnō mānīmpodāni māmō ti gotodoncæ cæyōnānīte mōnō wæætē guēadō guēa cæcæimpa. ¹³ Inīnque tōmēnāni pīnte māmō nāni wīwa cæōnæ iīnque bayonte mōnō wodīi wīnōnāmaī inte tōmēnāni inānite wæætē da godongæimpa. Ante ayæ, Tōmāā edæ eyepæ cæte ate mōnō edæ tæ go wæænāmaī inte adiyæ ongoncæimpa, ante cædinque mīnitō Wængonguī nānō,

Wææ caaquincoo, ante tæinta bai nänö da pönönincoo edæ do eyepæ æninque tömancoo edæ da wēñaedäni.

¹⁴ Wēñadinque edæ wodii winönāmaï inte edæ næ gongænte tæi ongöedäni. Edæ, Tæi wææ caaquincoo, ante pönö tæi pacadeyænte bai cædinque minitö Wængongui nänö nö pönönö entawëninque adobai nö entawente quëwëedäni. Tæcætawë inö tæineta mini wææ wodontawëinta ante wēñate bai cædinque Wængongui tæiyæ waëmö nänö cædö ante edæ entawente tæi cæte ongöedäni. ¹⁵ Mönö Codito pönö cæcä beyænque mönö godongämæ piyænë cæcæimpa, ante watapæ mönö eñenö beyæ pogodo gote apænecæte ante cædinque minitö awæncata tæi wææ cæwainta wëwate bai cædinque gänë pönente cæedäni.

¹⁶ Yabæque pönï wææ cæquinta tæinta bai næænte bai cædinque mini wede pönönö ædæmö entawëninque quëwëedäni. Ìninque në wiwa cædongä ponte gonga encado bai to piyæncate bai cædinque, Minitö oda cæcæminimpa, ante cæcä ate minitö mini wede pönönö beyænque tömengä wiwa nänö änö ante edæ eñenāmaï incæminimpa. ¹⁷ Ayæ, Ocamö incainta tæinta bai impa, ante wææ wencate bai cædinque minitö Codito pönö ængä beyænque mini quëwenguinö ante ænte entawencæminimpa. Minitö yaëmë wææ næænte bai cædinque Wængongui Önöwoca apænecä eñëninque nāni yewæmongainta ate ædæmö eñëninque edæ cöwë entawëedäni.

¹⁸ Ayæ Wængongui Önöwoca ingante ëwocadinque minitö tömengä ingante, Wængongui bitö cöwë cæcæbiimpa, ante godömenque nanguï apænedinque ñine cædāmaï iedäni. Mänömaï cæcæte ante minitö müimini ongöninque wæntæte badāmaï inte Wængongui quināni tömānāni beyæ ante cöwë apæneedäni. ¹⁹ Ayæ botö beyæ ante adobai apænemini eñëninque Wængongui pönö cæcä ate botö edonque tedecæboimpa, ämopa. Edæ Codito ingantedö ante wëenëñedë mönö eñenāmaï ingäine ante botö ñöwo watapæ eñëninque guiñenedāmaï inte apænebo

eñencædänimpa, ämopa. Mänömainö ante minitö Wængongui ingante apæneedäni, ämopa. ²⁰ Mänine ante botö wadāni weca në gote apænebo beyænque ñöwo gæguincamë encaipobo inte wæbopa. Ìninque, Mänine ante në apænequëngä inte Pabodo cöwë guiñenedāmaï inte apænecæcäimpa, ante minitö botö beyæ ante apæneedäni.

Waa quëwencæminimpa, ante

²¹ Botö Pabodo iñömö æbänö quëwëmoo, ante, Quinö bai cæboo, ante eñencæte ante wæminitawo. Edæ Tiquico mönö tönñacä mönö në waadecä inongä inte tömengä ñöwo pöninque minitö iminite mäninö tömānö ante apænecä eñencæminimpa. Tömengä iñömö mönö Awënë nempo quëwëninque tömengä beyæ në cædongä inte cöwë në pönengä inte ædæmö cæcä acæimpa. ²² Ìninque, Pabodoidi æbänö quëwënanii, ante tömengä pönö apænecä eñëninque minitö wampo pönëninque tæi piñænte entawencæminimpa. Ante cædinque botö, Ædæmö apænebi eñencædänimpa, ante tömengä ingante minitö weca da godömo pongä aedäni.

²³ Mæmpo Wængongui tönö mönö Awënë Itota Codito minitö iminite waadete pönö cæda ate minitö mini caipæ incæ gänë entawëninque wede pönëninque godongämæ edæ waadete pönencæminimpa, ämopa. ²⁴ Æcänö mönö Awënë Itota Codito ingante cöwë waadete pönente ñimpo cædāmaï ina iñömö tömengä ingante Wængongui pönö waadete cæcæcäimpa, ante botö Wængongui ingante apænebopa. Mäninque ante yewæmömopa.

Pidipenteidi inänite Pabodo nänö cadota ante yewæmongainta

Waa quëwëedäni, ante

¹ Itota Codito ingante nê cæmōna inte botō tōnō Tīmoteo guëa apænemōna ininque botō Pabodobo adoboque yewæmōmopa. Minitō Pidipoto iñōmō quëwëninque Wængonguï quimīni inōmīni inte Itota Codito nempo nê quëwëmīni iñōmīnite botō, Acæminimpa, ante yewæmōmopa. Mīni pōnencabo beyænque ante pancamīniya nê aamīni iñōmīnite pancamīniya guiquënë nê cæmīni iñōmīnite pancamīniya guiquënë onōmīnique iñōmīnite botō edæ, Tōmāmini edæ acæminimpa, ante yewæmōmopa. ² Mōnō Mæmpo Wængonguï mōnō Awënë Itota Codito tōnō waadete pōnō cæda ate gānē pōnëninque waa quëwëedäni, ämopa.

Nê pōnëmīni beyæ Wængonguï ingante apænebopa, ante

³ Æyedēmē mīnitō imīnite ante pōnëmo inte botō Wængonguï ingante waa ate pōnëninque apænebopa. ⁴ Ininque mīnitō beyæ ante Wængonguï ingante wantæ iñō wantæ iñō apænedinque botō, Waa quëwëminipa, ante watapæ todinque apænebopa. ⁵ Edæ, Botō tāno goyedē mīnitō godongāmæ cæmīnitapa. Ayæ, Mōnō Codito ingantedō ante mīnitō ñōwo ganca godōmenque watapæ apænemīnipa, ante pōnëninque botō, Wængonguï bitō pōnō cæbi ate pidipenteidi waa cædānipa, ante apænebopa. ⁶ Mīnitō botō ayōmo tæiyæ waëmō entawencæminimpa, ante nê mā badongaingā inongā inte Wængonguï ñōwo Itota Codito nänō ponguinganca godōmenque pōnō badōninque cōwë iinque badongā ate mīnitō ædæmō pæimīni bacæminimpa. Mänōmaï impa, ante botō, Nāwangā impa, ante do ëñēmopa.

⁷ Mōnō Codito ingantedō ante watapæ mōni ëñëninō ante botō wææ äninque, Nāwangā impa, ante apænebopa. Mänine botō apænede beyænque pancayedëña

botō imote tee mōnedäni wæbopa. Incæte tee mōnedäni wæbo incæ, Nāwangā impa, ante wææ ämo incæ Wængonguï nänō waadete pōnō cægainō ante ænte entawëñōmo mīnitō adobai mäninō ante æninque botō tōnō godongāmæ entawëminipa. Ininque, Mōnō mäninō ante äanque bai entawëmō imompa, ante mīnitō imīnite waadete pōnëninque botō, Mīnitō ædæmō pæimīni bacæminimpa, ante nōngā cæte pōnëmopa. ⁸ Itota Codito mōnō imonte nanguï waadete pōnengantawo. Edæ tōmengā waadete nänō pōnëno ante entawëninque botō mīnitō imīnite waadete pōnëmopa, ante adinque Wængonguï incæ, Pabodo nāwangā mīnitō imīnite nanguï waadete pōnengampa, ante apænebaingampa.

⁹ Ininque mīnitō beyæ ante botō Wængonguï ingante iïmaï ante apænebopa. Mīni waadete pōnencabo iñōmīnite Wængonguï pōnō cæcā ate godōmenque waadete pōnencæminimpa. Ayæ waadete pōnëmīni inte mīnitō, Quinō wënæ wënæ i, Quinō waa i, ante edonque adinque nō apænte ämīni bacæminimpa. ¹⁰ Mōnō æbänō cæte waa quëwënguï, ante edonque adinque mīnitō Ao ante waa quëwëninque Itota Codito nänō ponguinganca wentamō mongænāmaï inte tee tēwadāmaï imīni incæminimpa. ¹¹ Ayæ Itota Codito pōnō cæcā ate mīnitō nō cædinque waa quëwëmīni adinque wadāni Wængonguï ingante waa ate pōnëninque apænecædānimpa, ante botō Wængonguï ingante apænebopa. Ayæ mīnitō mänōmaï inte waa cæmīni adinque tōmānāni wæætē Wængonguï ingante apænedinque, Wængonguï ëñëmi. Bitō ñāo bai ëmōnōmi inte waa pōni cæbipa, ante apænecædānimpa, ante cædinque botō mīnitō beyæ ante Wængonguï ingante apænebopa.

Pabodo, Codito beyænque quëwëmopa, angampa

¹² Iñānāni apænebo ëñëedäni. Mänōmaï cædāni botō wædō incæ wīi ononque cætimpa. Wæætē, Codito beyænque Pabodo caate wæcampa, ante adinque wadāni godōmenque nanguï ināni Codito

ingantedö ante watapæ möni apænedö
 eñëningue wede pönënanî badänîpa. ¹³ Edæ,
 Codito emöwo apæneçä beyænque Pabodo
 ingante tee mönedänîpa, ante tededäni
 eñëningue odömäno täiyæ awënë oncö
 wææ wänönäni incæ wadäni wayömö
 quëwënanî incæ tömänäni do eñënanîpa.
¹⁴ Mönö Awënë nempo quëwënanî incæ,
 Pabodo tee mönete wæçampa, ante
 wædinque wodo tömänäni godömenque
 wede pönente badänîpa. Ìnînque wede
 pönëningue tæi piñænte entawëningue
 tömënanî guiñënamai inte Wængongui nänö
 apænedö ante godömenque apænedänîpa.

¹⁵ Pancadäniya, Pabodo miñæ godömenque
 nanguï inäni godänîpa, ante pönö
 piinte adînque Codito emöwo ante
 apænedäni incæte botö imote guëadö guëa
 piincæte ante apænedänîpa. Mänömai i
 incæte wadäni guiquënë, Pabodo tönö
 mönö godongämæ çæçäimpa, ante
 gänë pönëningue Codito emöwo ante
 apænedänîpa. ¹⁶ Në gänë pönente
 apænedäni guiquënë, Codito ingantedö
 ante watapæ mini eñëninö ante Pabodo
 wææ ancæçäimpa, ante botö imote godö
 gö çæçampa, ante do eñënanîpa. Ìnînque
 tömënanî botö imote waadete pönëningue
 apænedänîpa. ¹⁷ Në wæætedö wæætë
 tededäni guiquënë, Pabodo tee mönete
 wæyongante mönö apænete tomö wæçä
 tocæi, ante çädänîpa. Tömënanî nämä
 beyænque ante çädäni incæte waa çæte bai
 çædinque Codito emöwo ante apænedänîpa.
¹⁸ Incæte pancadäniya nämä beyænque ante
 apænedäni incæ pancadäniya nö pönente
 apænedäni incæ mäninäni tömänäni Codito
 nänö çægäinö ante näwangä ante do
 edæ apænedänîpa. Mänömai impa, ante
 pönëningue botö watapæ tobopa.

Ayæ iïmai ante pönëningue cöwë
 godömenque nanguï tocæboimpa. ¹⁹ Minitö
 Wængongui ingante botö beyæ nanguï
 apænemini eñëningue Itota Codito Önöwoca
 pönö çæçäçäimpa, ante eñente tobopa.
 Ìnînque ñöwo botö caate wädö ante edæ
 iincayæ ate ñimpo çädäni ate edæ botö
 abæ tawænte gote quëwëningue edæ
 impa, ante do eñëningue tobopa. ²⁰ Botö
 wëenëñedë botö çæbo bai ñöwo adobai

çæinëmo imopa. Ìntai eñate miïmö quëwëmo
 incæ baonque wænönäni wæmo incæ,
 Mönö Codito ingante waa açädänîmpa,
 ante çædinque botö cöwë guiñënamai inte
 tæi ongöningue nanguï çædinque watapæ
 edæ bacæboimpa, ante pönëmopa. ²¹ Edæ
 inguipoga quëwëmo incæ botö Codito
 ingante entawëningue tömengä beyænque
 ante quëwëmopa. Wæætë wæmo incæ
 tömengä beyæ botö godömenque nanguï
 entawënguïmo imopa.

²² Incæte, Waiwæ nanguï incæte bai botö
 çæquinque inguipoga ayæ quëwënguënmö
 imopa, ante pönëningue botö, Æbänö
 anguïmoo, ante eñencæte ante wæbopa.
 Edæ, Wæncæboimpa, ante anguënëmö
 imoo. Wæætë, Ayæ quëwëncæboimpa, ante
 anguënëmö imoo. Edæ, Æbänö anguënëmö
 imoo, ante botö edæ eñënamai imopa. ²³ Edæ
 wada bæi ongönte æmataæ töö æmataæ
 töö godöna wæçä bai wädömo inte botö,
 Ædönö gämænö goquïmoo, ante wæbopa.
 Codito weca godömenque waëmö pönî
 quëwëncæboimpa, ante botö wadæ goinëmö
 imopa. ²⁴ Incæte inguipoga quëwëningue
 minitö beyænque ante çæquënëmö inte
 botö ædö çæte wayömö goquïmoo. ²⁵ Ante
 pönente wædinque botö, Minitö mönö
 pönëno ante godömenque wede pönëningue
 watapæ tote quëwëncæminimpa, ante
 çæquïmo imopa, ante eñëmopa. Ayæ,
 Ñöwo wænämai inte botö minitö weca
 quëwënguïmo imopa, ante do eñëmopa.
²⁶ Ìnînque botö miïmo inte minitö weca
 pömo adînque minitö Itota Codito ingante
 waa adînque botö beyænque nanguï
 tocæminimpa.

²⁷ Codito ingantedö ante watapæ mönö
 eñëninö beyæ ante mönö waa çæquënëmö
 imopa, ante eñëmini inte minitö edæ
 waa çæte quëwëedäni. Mänömai çæmini
 inînque botö önömonçaque eñëmö incæ
 minitö weca ponte abo incæ, Pidipenteidi
 adoyömö pönëningue tæi ongönänîpa, ante
 tededäni eñëningue tobaimopa. Ayæ,
 Codito ingantedö ante watapæ mönö
 eñëninö ante wadäni eñencädänîmpa,
 ante pidipenteidi iñacabo çædinque nan-
 guï çädänîpa, ante botö edæ eñente to-
 baimopa. ²⁸ Ayæ piinte çädäni incæte minitö

wæætē guīñēnāmaī inte tæī ongōmīnīpa, ante adīnque botō tobāīmōpa. Mīnitō mǎnōmaī guīñēnāmaī inte tæī ongōmīni ate wædīnque nē pīinte ānāni wæætē, Mōnitō wængūnque īmpa, ante wæcædānīmpa. Nē pōnēmīni mīni quēwēngūnque īmpa, ante adīnque tōmēnāni godōmenque wæcædānīmpa. Edæ Wængonguī ængā beyænque quēwēncæmīnīmpa.

²⁹ Wængonguī waadete pōnō cæcā ate mīnitō Codito ingante wede pōnēmīnitawo. Edæ adocā pōnō cæcā ate mīnitō Codito beyænque cædīnque cōwē caate wæquīmīni īmīnīpa. ³⁰ Pabodobo doyedē Codito beyæ ante wææ ancæte ante caate wætābōpa, ante amīnitawo. Ñōwo godōmenque wææ cædīnque caate wæbōpa, ante ōnōmoncaque ēñēmīnitawo. Īnīnque botō wææ ānīnque caate wæbo baī mīnitō adobāī botō tōnō godongāmæ wææ ānīnque caate wæmīni īmīnīpa.

2

Codito ōnonganque bayongante Wængonguī da cæænongā

¹ Mōnō Codito nempo quēwēnīnque mīnitō wampo pōnēmīnitawo. Tōmengā waadete pōnengā beyænque gancæ pōnēmīnitawo. Mōnō Codito Ōnōwoca tōnō āāwocaque baī ēwocadīnque godongāmæ watapæ quēwēmīnitawo. Nē wæcā ingante godō waadete pōnēmīnitawo. Adocanque wæwengā adīnque mīnitō āanque baī wæwēnīnque tōmengā beyæ cæmīnitawo. ² Mǎnōmaī ĩ ĩnīnque adodonque pōnēnīnque mīnitō waa waademīni adīnque botō watapæ pōnī tobāīmōpa. Tōmāmīni āanque baī ēwocadīnque, Mōnō adoyōmō cæcæīmpa, ante godongāmæ cæmīni adīnque botō godōmenque nangūī watapæ tobāīmōpa. ³ Īnīnque mīnitō nāmanque ante pōnēnīnque, Botō ĩmote waa acædānīmpa, ante cædāmaī īedāni. Yæcado ongoncæboīmpa, ante cædāmaī īedāni. Wæætē, Botō ōnōmoque baī ĩñōmote wadāni wæætē waa pōnī ĩnānīpa, ante pōnēnīnque wadānīque ĩnānīte ængō cæedāni. ⁴ Nāmā mīni cæīnēnō ante cædīnque mīnitō wīī mǎnīnonque ante cædīnque wæætē edæ wadāni nāni cæīnēnō adobāī ante cæedāni.

⁵ Mǎnōmaī cædīnque mīnitō Itota Codito nānō pōnengānō baī adodō ante pōnēedāni.

⁶ Tōmengā ĩñōmō cōwē nāwā Wængonguī ĩnongā ingampa. Incæte, Botō nāwā Wængonguīmo ingāimo inte Mæmpo Wængonguī ganca botō ingāinō ante ñīmpo cædāmaī incæboīmpa, ante tōmengā ānāmaī ingacāīmpa.

⁷ Wæætē edæ, Mǎnīnō botō ingāinō incæ botō edæ ñīmpo cæcæboīmpa, ānīnque wææ,

ōnonganque baī bagacāīmpa.

Ayæ, Wængonguī ingante nē cædōmo edæ bacæboīmpa, ante badīnque wææ, tōmengā waomō mōnō ēmōnō baī nānō ēmongūnque waocā ēñagacāīmpa.

⁸ Mǎnōmaī ēñate pæte wææ tōmengā ōnonganque inte baī cæyongā Wæmpocā,

Bitō wængūīnō taadō gocæbiīmpa, angā ēñēnīnque edæ Ao ante goyongante wææ,

tōmengā nānō guīñēñāquinque awæ ñāenquedīmæ cæte māo timpodāni wææ tīwadāni ate tōmengā caate wægōnīnque wææ bacaa edæ wængacāīmpa.

⁹ Mǎnōmaī cæcā adīnque Wængonguī wæætē tōmengā ingante æmōnga pōnī da æænongacāīmpa.

Ayæ wadāni ēmōwo ōnōwoque ēmōnāni baī tōmengā Tæiyæ Awēnē ĩnongā inte wīī adobāī ōnōwoque baī ēmoncæcāīmpa, ante cædīnque Wængonguī edæ, Itota Codito ingampa, ante pōnō pemongacāīmpa.

¹⁰ Edæ ōōnædē quēwēnāni incæ ingūipoga quēwēnāni incæ guīmōnga quēwēnāni incæ

tōmānāni edæ Itota ēmōwo ēñente waa adīnque

da guīcapocædānīmpa, ante Wængonguī tōmengā ingante pōnō pemongacāīmpa.

¹¹ Ayæ, Itota Codito ingante adīnque tōmānāni,

Mōnō Tæiyæ Awēnē ĩnongā ingampa, ante edæ Ao ancædānīmpa, ante Wæmpocā cægacāīmpa.

Mänömaï cæcä adinque, Mæmpo Wængongui waa pöni cæcampa, ante mönō edæ watapæ apænecaïmpa.

Nëmoncoo äo äo cædote bai nöinō cæte quëwëedäni

¹² Mänömaï beyæ botō nē waademini iñömīnīte botō apænebo eñëedäni. Minitō weca botō quëwëñedē mīnitō do eñente cædimīni inte ñōwo botō wayōmō quëwëmo incæ godōmenque eñente cæmīni abopa. İnīnque cōwē mīni eñente cædinō bai adobai cædinque ñōwo mönō watapæ quëwenguinō taadonque gocæte ante cædinque, Oda cæte wæcæ wæ, ante cōwä aquënë quëwëmīnī. ¹³ Wīi cæinente awædō, ante wæmīnitawo. Edæ Wængonguinque apæneca eñente entawëninque mīnitō tōmengä waa pöni nänō äno ante nē eñente cæinēmīni bamīnīpa. Oda cæte awædō, ante wæmīnitawo. Adocä Wængonguinque mongæncadæ mongæncadæ cæcä ate tæi piñæmīni bate ate eyepæ cæmīnīpa.

¹⁴ İnīnque, Wīi cæinente awædō, ante änämaï inte mīnitō piyænē cæte mīni cæquënëno ante do cæedäni. ¹⁵ Edæ mänömaï cæmīni adinque wadäni, Wentamō mongænämaï imīnīpa, ante abainānīpa. Ayæ inguipogaque quëwënāni eñënāmaï inte idiquibæ pönente cæyönāni mīnitō wæætē Wængongui wëñæmīni inōmīni inte tōmënāni weca quëwëninque nëmoncoo äo äo cædote bai nöingä cæte quëwencæmīnīpa. ¹⁶ Edæ, Codito pönō cæcä beyænque mönō quëwengæïmpa, ante edonque apænemīni eñencædänīpa. İnīnque, Doyedē botō apænedō ante mīnitō nē eñente cæmīnīpa, ante adinque botō nangui todinque iïmaï ante pönëmopa. Minitō beyæ pæ pagænte cædōmo incæte botō wīi önonque cæboïmpa. Wæætē mönō Codito nänō ponguionæ iñonte botō, Minitō nō apænemīnitapa, ante adinque botō tocæboïmpa. ¹⁷ Ayæ, Wængongui qui, ante baö godöninque waodäni baonga tepæ gao caadänīpa. Minitō iñömō wede pönëmīni inte, Wængongui qui, ante nāmā godō cæyömīni botō quëwenguimāmo incæ mīni godönincooga gao caate bai ba edæ waa tobaimopa. Minitō tönō godongämæ edæ tobaimopa. ¹⁸ Minitō adobai, Pabodo mönō

beyæ cæcampa, ante tocæmīnīpa. Edæ mönō edæ godongämæ tocæïmpa.

Timoteo tönō Epapododito

¹⁹ Minitō æbänō quëwëmīnī, ante eñëninque Timoteo wæætē apæneca eñente tocæboïmpa, ante cædinque botō, Itota Codito Ao angä ate Timoteo ingante oo da pönōmo mīnitō weca poncæcäïmpa, ante pönëmopa. ²⁰ Minitō æbänō quëwëmīnī, ante wæyōmo tōmengä adocanque mīnitō beyæ ante botō tönō guëa wæcampa. Wadäni guiquënë mīnitō beyæ ante wædämaï inānīpa. ²¹ Tömänāni edæ nāmā beyænque ante cæinente wædinque Itota Codito nänō änönō ante wīi cæinënāni inānīpa. ²² Cōwä ayömīni, Timoteo iñömō cōwē waa cæcampa, ante do eñëmīnitapa. Ayæ mönō Codito ingantedō ante watapæ apænedinque Timoteo tönō möna wencaya bai guëa cæmönapa, ante do eñëmīnitapa. ²³ İnīnque, Botō imote awënëidi æbänō apænte anguñānī, ante eñente ate botō Timoteo ingante māniñedē ate mīnitō weca do da pönōmo poncæcäïmpa, ante pönëmopa. ²⁴ Ayæ mönō Tæiyæ Awënë Ao angä ate tōmëmo do pōmaïmopa.

²⁵ Ayæ Epapododito mönō tönīñacä incæ botō tönō guëa cæmōna imönapa. Wadäni pīinte cædäni adinque mönatō guëa wææ cæmönapa. Tōmengä ingante mīnitō, Pabodo beyæ ante godō cæcæbiïmpa, ante do da pönömīni ponte cæcä æntabopa. Tōmengä ingante ñōwo wæætē adodō mīnitō weca edæ da pönōmo ponguënegä ingampa, ante pönëmopa. ²⁶ Adocä Epapododito iñömō mīnitō pidipenteidi imīnīte acæte ante edæ nangui wæcampa. Ayæ, Epapododito daicawo gawængampa, ante apænedäni eñëninque pidipenteidi do wædänīpa, ante eñente wædinque tōmengä wæætē mīnitō beyæ ante nangui wæwente bacampa. ²⁷ Näwangä impa edæ. Tōmengä daicawo gawænte wodo wængantapa. Incæte Wængongui tōmengä ingante waadete pönō gampocä waa bacantapa. Mänömaï cædinque Wængongui botō beyæ adobai ante pönëninque, Pabodo wīi godōmenque wæcæcäïmpa, ante pönengä inte edæ Epapododito ingante gampocä waa bacantapa.

²⁸ Mänömaï beyæ, Epapododito wæætë pongä adinque tocæminimpa, ante cædinque ayæ, Minitö tomïni adinque botö wæwënämaï bacæboimpa, ante cædinque botö tömengä ingante ñowo da godoncæboimpa, ämopa. ²⁹ Pongä ate mïnitö, Mönö Awënë nempo quëwënömi inte pöe, äninque Epapododito ingante waa adinque godongämæ watapæ tote cæedäni. Ayæ wadäni tömengä bai adobai waa cædänipa, ante adinque tömënäni inänite waa adinque waa cæedäni. ³⁰ Minitö, Pabodo beyæ ædö cæte cæquïmönii, ante, Gobæ awædö, ante wæyöminite Epapododito iñömö edæ, Wæmo incæ cöwë cæcæboimpa, ante mïnitö cæquënënö ante cæcantapa. Codito beyæ ante cæcæte ante edæ tömengä wodo wængantapa cæmïni. Tömengä ingante edæ waa cæedäni, ämopa.

3

Tæi piñænte cæcæimpa, ante

¹ Ñowo iñömö botö tönïñamïni ëñëedäni. Mönö Awënë nempo quëwëninque mïni watapæ toquinque imïnipa. Minitö oda cædämaï incæminimpa, ante botö adodö adodö ante ancaa yewæmömo incæte wædämaï imopa.

² Iïmaï ämopa. Wadäni iñömö, Mönö ëö togænte quëwengæimpa, ante në änewënäni inte guintaidi bai wënæ wënæ cædinque nämä baö ëö ëö towënänipa. Ante adinque mïnitö tömënäni inänite gomö adinque wææ cæedäni. ³ Edæ tömënäni inänite ee adinque Wængongui mönö imonte wæætë pönö ëö togænte bai cædinque mönö wentamö mongænö do wido cægacäimpa. Wængongui Önöwoca ingante ænte ëwocamö inömö inte mönonque edæ, Wængongui ingampa, ante tömengä beyæ cæmompä. Itota Codito nempo quëwëmö inte mönonque wïi inguipoga beyænque quëwëmö imopa, ante mönö tömengä ingante waa ate apænemompä. ⁴ Tömënäni guiquënë inguipogaque ante pönëninque, Mönitö cædö beyænque quëwencæmönimpa, ante pönëwënäni. Tömënäni nani pönëwënö bai adobai pönente bai botö, Tömënäni wædænque cæyönäni botö godömenque nanguï cædömo imopa, ante

pönëwencædömoimpa. Edæ, Nanguï botö cædö beyænque quëwencæboimpa, ante pönëwencædömoimpa.

⁵ Edæ tömënäni në ëö togæinäni inänitawo. Botö iñömö adobai imopa. Tæcæ ëñayömete önompo æmæmpoque go mëönaa go adoönæque mänimpoönæ iñonte botö imote do ëö togænäni wægaboimpa. Tömënäni idægoidi inänitawo. Botö iñömö idægo wodi pæimo inömo inte tömengä nänömocä Beencaminö wodi pæimo inömo imopa. Tömënäni ebedeoidi inänitawo. Botö iñömö ebedeobo ëñagaïmo inte näwä ebedeobo inömo imopa. Tömënäni Paditeoidi inänitawogaa. Edæ botö Paditeobo inömo inte Möitee wodi nänö wææ angainö ante möni Paditeocabo wædö ante tömää ëñente cædömo imoi aedäni. ⁶ Ayæ tömënäni, Wængongui beyæ nanguï cæcæimpa, ante apænëdänitawo. Edæ, Wængongui beyæ cæbote, ante edæ botö iñömö doyedë Codito ingante nani pönengaincabo inänite ancaa togænte pancæte ante cægaboï aedäni. Ayæ oodeoidi guiquënë, Mönitö wææ angainö ante në ëñente cædänique në nö cædäni inänipa, ante änänitawo. Botö iñömö edæ mäninonque ante cöwë cædömo inte wentamö mongænämaï inömo imopa.

⁷ Doyedë iñömö botö mänömaï godömenque waa cædimo inte, Botö toquinque waa pönï cægaboimpa, ante pönëwentabopa. Ñowo guiquënë botö waa cægainö ante, Önonquedö ante cægaboï, ante do ëñëmopa. ⁸ Ayæ wææ, Itota Codito botö Awënë ingante adimo inte botö tömengä ingante pönëninque tömengä tönö godömenque waa pönï quëwencæboimpa, ante botö, Wëenëñedë botö entawengaincoo botö waa againcoo incæ edæ ëwenguincooque impa, ante pönëmopa. Edæ Codito beyæ ante cæyömo botö wëenë mänincoo tömancoo edæ dæ ba wætabopa. Iñinque, Codito ingante godömenque ëwocacæboimpa, ante nanguï cædinque botö, Wëenë botö entawengainö ompotacoo bai impa, ante wido cæbopa.

⁹ Edæ, Iïmaï cæedäni, ante nani wææ angainö ante ëñente cæbo incæte Wængongui ayongante botö ædö cæte mäninö beyænque nö entawëmo baquïmo. Wæætë

Codito mōnō nē nō cædongā ingante wede pōnēmo inte tōmengā nempo quēwēñōmote Wængonguī pōnō badongā ate nō cæbo bacæboimpa, ante nanguī cæbopa. ¹⁰ Mōnō Codito ingante ate bai pōnencæboimpa, ante cæbopa. Ayæ tōmengā adocā nanguī tæi piñæninqe ñāni òmæmongacäimpa, ante wede pōnēninque botō mäninō tōmengā nē ñāni òmæmongaingā nānō tæi piñænō bai adobai entawencæboimpa, ante cæbopa. Ayæ adobai, Tōmengā caate nānō wængai bai botō tōmengā beyæ wæncæboimpa, ante pōnēninque botō tōmengā tōnō godongāmæ caate wænte bai tōmengā nānō ewocadō bai ewocacæboimpa, ante cæbopa. ¹¹ Mänōmai cædinque botō, Tōmengā wænte ate ñāni òmæmonte nānō quēwengai bai botō adobai wænte ate ñāni òmæmoncæboimpa, ante nanguī cæbopa.

Mänōmai bacæboimpa, ante nanguī cæbopa, ante

¹² Mänōmainō ante apænedinque botō, Codito nānō entawēnō bai do entawēmopa, ante dicæ apænebogaa. Picænāni bai do badinque nō cædinque oda cædāmai imopa, ante dicæ apænebogaa. Incæte Itota Codito incæ edæ, Botō ewocadō bai adobai ewocacæbiimpa, ante botō imote do bæi ongongacäimpa. Ìninqe botō wæætē, Tōmengā waa pōni nānō ewocadō bai adobai ewocacæboimpa, ante bæi ongoncæte ante nanguī cæbopa. ¹³ Ìñānāni eñeedāni. Botō Codito nānō ewocadō ante dicæ eyepæ æmogaa, ante wæbopa. Incæte, Eyepæ ænāmai imopa, ante adinque wæwēnāmai imopa. Wæætē, Ìncayæ ate Codito nānō ewocadō bai ædæmō ewocacæboimpa, ante cædinque botō mäninonque ante pōnēninque pogodo gote bai cōwē cæbopa. ¹⁴ Wængonguī do, Bitō Itota Codito nempo quēwēnōmi inte eyepæ cædinque æmonga ponte æe, ante botō imote aa pegacäimpa. Ìninqe tōmengā, Pædæ pōnōmo æncæbiimpa, ante nānō angaincoo ante ænte ewocacæte ante botō gänā cæcæte ante pogodo gote bai edæ nanguī cæbopa.

¹⁵ Mōnō æmæwo picæmō badōmō iñōmō tōmāmō adobainō ante pōnenguēnēmō imopa. Pancamīniya guiquēnē mänōmainō

ante wīi pōnēmīni adinque Wængonguī, Minitō æbānō nō pōnenguēnēmīni imīni, ante pōnō odōmongā ate eñencæminimpa. ¹⁶ Mōnō do eñente quēwenganca māninganca mōnō cōwē nō cæte quēwengæimpa.

¹⁷ Ìñānāni eñeedāni. Botō Pabodobo æbānō cæboo, ante adinque mīnitō botō cædō bai adobai godongāmæ cæedāni. Ayæ, Mōnitō cæmōni bai mīnitō adobai cæedāni, ante odōmōmōni bai pancadāniya adobai cædāni adinque mīnitō iñōmō, Adobai cæcæimpa, ante tōmēnāni inānite cōwā aedāni. ¹⁸ Mīnitō imīnite wantæ wantæ iñō wantæ wantæ iñō apænedimo inte botō ñōwo Ca ca wædinque adodō ante iīmai ante godōmenque apænebopa. Mōnō Codito awāa wængā incæte nanguī ināni tōmengā ingante Baa āninque tōmengā nānō wængaiwæ ante piinte bai cædānīpa, ante awædō. ¹⁹ Tōmēnāni nāni òmæe ewente wæquinque mänōmai cædānīpa. Cænguī beyænque ante pōnente quēwēnānīpa. Wēnæ wēnæ nāni cædō beyæ guingo imonte wæquēnēnāni incæ tōmēnāni wæætē guiñēñadāmai inte edæ, Waa pōni cæmōnīpa, ante nāmā incæ waa adānīpa. Edæ inguipoga beyænque ante cæinente wædānīpa.

²⁰ Mōnō iñōmō mempoga eñagaimō inte mōnō öönædē òmæ do eāmō edæ imopa. Ìninqe mōnō Awēnē Itota Codito, Quēwencæminimpa, ante nē Ængaingā ingante nanguī aīnente wædinque mōnō, Tōmengā æyedēnō öönædē edæ wææ ponguingāa, ante wānō cōmompā. ²¹ Tōmengā iñōmō tæi piñænongā inte tōmancoo edæ bæ tadinque ö æninque Tæiyæ Awēnē incæcäimpa. Ìninqe, Mōnō quēwenguīnāmai aquiñō eñamompā, ante adinque tōmengā tæi piñænongā inte, Botō baō bai tæiñō mongæncæminimpa, ante badongā eñaquīmō imopa.

4

Mōnō Awēnē nempo quēwēninque watapæ toccäimpa

¹ Wængonguī botō imote poganta pōnō wencate bai cædinque, Bitō waa apænebi eñente beyænque pidipenteidi eñente waa cædāni abopa, angā eñēninque botō mīnitō

beyæ ante watapæ tobopa. Minitö iminite ædæmō waadedinque botō, Æyedēnō bee tenguimoo, ante wæbopa. Ininque botō nē waademini āmo eñēedāni. Māninō botō āninō eñente cædinque mīnitō mōnō Awēnē nempo quēwēninque tæi ongōedāni.

² Nōwo Eodia, Tintique, mīna onquiyæncaya iminate āmo eñēeda. Mōnō Awēnē nempo quēwēninque mīnatō piyænē cæte adodonque ante cæbæweda, āmopa.

³ Botō mōnō Awēnē ingantedō ante watapæ apæneccæte ante nanguī cæyōmote Codēmente tōnō wadāni botō tōnō iñacabo cædānitapa. Wængonguī, Nāni quēwenguīta, ante tōmengā nānō yewæmongaintaa tōmēnāni emōwo dobæ yewæmonte mæ õñompa. Tōmēnāni botō tōnō cæyōnāni iina onquiyæna Eodia tōnō Tintique iñōmō botō tōnō adobaī iñacabo nanguī cæda inatapa. Ininque bitō cōwē botō tōnō guēa cædōmi iñōmite bitō imite āmopa. Iina inate bitō waadete apænebi eñēninque piyænē cæte quēwencædaimpa.

⁴ Ayæ tōmāmīni iminite, Mōnō Awēnē nempo quēwēninque watapæ tote quēwēedāni āmopa. Edæ, Watapæ pōni tote quēwēedāni, ante adodō ante āmo eñēedāni. ⁵ Mōnō Awēnē edæ oo pōni poncæcāimpa cæmīnii. Ee ædæmō cæte quēwēñōmīni tōmānāni waadete mīni cædōnō ante edonque acædānimpa.

⁶ Ayæ, Quiēmē bacæ wæ, ante mīni wædō ante guīñente wædāmaī iedāni. Wængonguinque ingante apæneedāni. Apænedinque, Wængonguī, bitō pōnō cæbi ate eyepæ inte quēwencæmōnimpa, ante quiēmē mīni æncæ wædō incæ ante apæneccæmīnimpa. Ayæ tōmengā pōnō cæcā adinque mīnitō, Bitō pōnō cæbi waa æmōnipa, ante Wængonguī ingante wæætē waa ate pōnente apæneedāni.

⁷ Ayæ, Wængonguī piyænē cædinque pōnō aacā beyæ mīnitō Itota Codito nempo quēwēninque piyænē cædinque mīmōnē wædāmaī inte nō pōnēninque quēwencæmīnimpa. Edæ mōnō, Æbāmē cæte Wængonguī pōnō piyænē cæte aacā, ante mōnō waocabo eñēnāmaī imō incæte tōmengā cōwē godōmenque aacā ate wædāmaī inte quēwēmōmpa.

Quinō waa i, ante māninonque ante pōnēē cōedāni, ante

⁸ Iñānāni eñēedāni. Mīnitō æbānō ante pōnēē conguēnēmini iminipa, ante yewæmōninque botō nōwo æmæwo pōni yewæmōmoī aedāni. Nāwangā nāni apænedō ante pōnēē cōedāni. Æbānō waa cæquīi, æbānō nō cæquīi, ante pōnēē cōedāni. Quiēnō nō i, ante māninō ante pōnēē cōedāni. Mōnō æbānō waadete pōnenguīi, ante pōnēninque mōnō waa adoncoo ante adobaī pōnēē cōedāni. Wadāni waa nāni cædinō ante pōnēē cōedāni. Mānōmaī cædāni ate wadāni waa adānitawo. Ininque tōmēnāni nāni waa adinō ante mīnitō māninō ante pōnēē cōedāni. Ininque, Quiēmē waa pōni i, ante adinque māninonque ante pōnēē cōedāni.

⁹ Botō odōmonte apænebo eñēmīnitawo. Ininque botō pōnō apænebo eñēninque mīni eñēnīnō baī tōmānō ante edæ cæedāni. Botō pædæ pōnōmo æmīnitawo. Ininque botō pædæ pōnōmo mīni ænīnō incæ ee mæedāni. Botō entawēnō ante, Æbānō entawēmoo, ante edonque amīnitawo. Ininque botō entawēnō mīni adinō baī mīnitō adobaī entawēninque edæ waa cæedāni. Mānōmaī cæmīni adinque Wængonguī nē gānē pōnēnongā inte mīnitō tōnō godongāmæ quēwēninque pōnō cæcā ate mīnitō wæætē gānē pōnēmīni bacæmīnimpa.

Pidipenteidi mīni pōnōni waa æntabopa, Pabodo angampa

¹⁰ Botō wædō ante mīnitō doyedē pōnō cædīmīni inte nōwo wæætē tæcæ pōnente wædinque wæætē pōnō cæmīni æninque botō, Mōnō Awēnē beyænque pōnō cæmīnipa, ante adinque nanguī waa tobopa. Edæ botō wædō ante cōwē waadete pōnēmīni incæte mīnitō da pōnoncæ cæyōmīnite wææ cæte i æiquedō da pōnonguīmīnii. ¹¹ Incæte mānōmaī apænedinque botō wīi ænguēnēmo inte apænetabopa. Edæ wædænque ēabo incæ nanguī ēabo incæ quiēmē ēabo incæ botō, Æbānō quēwenguīi, ante do eñēmo inte edæ piyænē cæte wædāmaī cōwē quēwēmōmpa.

¹² Ōmæpobo wædīmo inte botō, Ōmaadāni æbānō quēwēnānii, ante do eñēmōmpa. Adobaī nanguī ēate quēwēnīmo inte botō,

Nangui eadani ebanö quewenani, ante do enemopa. Edæ tömo cæmo incæ, gæwænte wæbo incæ, nangui eabo incæ, omæpobo incæ maninö tömänö ante wægaimo inte botö mänömaï ingaimo beyænque enente batabopa. Inique æyömömë quewemo incæ quiemë bai quewemo incæ piyænë cæte wædämaï quewemopa. ¹³ Edæ quiemë beyæ wæbo incæ mönö Codito pönö cæcä ate botö wæætë edæ eyepæ entawëninque tömäa edæ cæbopa.

¹⁴ Incæte botö omæpobo inte wæyömote minitö pönö cæmini waa æntabopa. ¹⁵ Ayæ adobaï mönö Codito ingantedö ante watapæ möni apænedö ante tæcæ enemini ate botö Mäatedöniabæ iinque apænedinque wadæ goyömote wadani Codito ingante nani godongamæ pönencabo pönönamaï inönänite minitö adominique da pönömini æntabopa, ante minitö pidipenteidi do enemini. ¹⁶ Edæ, Tetadönica nani quewenömö quewëninque Pabodo omæpocä bacampa, ante tededani enente wædinque minitö wii adopoque wæætë wæætë da pönömini æntabopa.

¹⁷ Botö dicæ botö æncæ wædö ante apænetabopa. Wæætë, Pidipenteidi wadani inänite në godönani inänipa, ante adinque Wængongui wæætë minitö iminite godömenque pönongä æncæminimpa, ante apænetabopa. ¹⁸ Inique botö inömö idæwaa æntabopa. Botö ænguënënö æninque godömenque nangui ænte eabopa. Edæ, Pabodo qui, ante mini da pönönincoo Epapododito wæætë botö imote pædæ pönongä æninque botö eyepæ pönö eate quewemopa. Minitö, Wængongui qui, ante ogui waqui bai pönö iya tante bai cædinque, Pabodo qui, ante da pönömini adinque, Waa pönö pönöminipa, ante Wængongui incæ waa acampa. ¹⁹ Botö Wængongui nãö bai entawëninque tæi emongä inongä inte tömengä nänö eadoncoo inömö edæ baco pönö ongompa. Inique, Minitö ænguënemini iminipa, ante adinque tömengä Itota Codito beyænque cædinque eyepæ pönö edæ da pönongä æncæminimpa.

²⁰ Mönö Wængongui mönö Mæmpo inongante, Bitö wæmö pönö inömi imipa, ante mönö cöwë watapæ apænecæimpa.

Edæ nówopämo incæ mümämö incæ mönö cöwë mänömaï apænecæimpa. Mänömaï impa, äninque botö, Amëë, ämopa.

Mäinique ante yewæmömopa, ante

²¹ Wængongui quinäni Itota Codito nempo quewenönani inönänite minitö, Waa quewencæminimpa, ante botö beyæ ancæminimpa. Ayæ botö tönö godongamæ ongönani incæ, Minitö ebanö quewëminii, ante wædanipa. ²² Edæ Tæiyæ Awënë Tetædo oncönë quewenani tönö wadani Odömä inömö wayömö quewenani tönö Wængongui quinäni incæ tömänani adobaï minitö iminite, Waa quewencæminimpa, änänipa.

²³ Mönö Awënë Itota Codito minitö iminite waadete pönö cæcæcäimpa, ämopa. Mäinique ante yewæmömopa.

Codotenteidi inānite Pabodo nānō cadota ante yewæmongainta

Waa quēwencæminimpa, ante

¹ Wængonguī angā ēñēninque Itota Codito botō imote da godongā gogaīmo inte botō Pabodobo inōmo inte yewæmōmopa. Mōnō tōniñacā Timoteo tōnō guēa tedete ate botō, Acæminimpa, ante yewæmōmopa. ² Mōnitō tōniñamini ēñēdāni. Codota iñōmō quēwēninque Wængonguī quīmīni inte mīnitō mōnō Codito nempo quēwēninque ædæmō cæte pōnēmīni iñōmīnite botō iīmaī ante yewæmōmopa. Mōnō Mæmpo Wængonguī tōnō mōnō Awēnē Itota Codito waadete pōnō cæda ænte entawēninque mīnitō gānē pōnēninque watapæ quēwencæminimpa, āmopa.

Nē pōnēnāni beyæ Pabodo Wængonguī ingante apæneca

³ Mōnō Awēnē Itota Codito Wæmpocā iñongante mōnitō mīnitō beyæ ante apænedinque Wængonguī ingante waa ate pōnente apænemōnīpa. ⁴ Edæ, Mīnitō Itota Codito ingante wede pōnēmīni imīnīpa, ante do ēñēmōnīpa. Ayæ, Wængonguī quīnāni inānite tōmānāni inānite mīnitō waadete pōnēmīnīpa, ante mōnitō do ēñēmōnīpa. ⁵ Edæ, Öönædē æidinque mīnitō watapæ quēwēnguinque impa, ante edæ Codito do badongampa. Mānōmaīnō ante, Nāwangā impa, ante watapæ mīni ēñēnō ante mīnitō godōmenque wede pōnēmīni badinque godongāmæ waadete pōnēmīni imīnīpa. Inīnque, Mīnitō mānōmaī imīnīpa, ante adinque mōnitō wæætē Wængonguī ingante waa ate pōnēninque apænemōnīpa.

⁶ Doyedē mīnitō weca ponte apænedinque mōnitō, Mōnō Codito ingantedō ante watapæ apænemōni ēñēninque mīnitō, Wængonguī nāwangā waadete pōnō cæcampa, ante do ēñēmīnitapa. Mānōmaīnō ante mīni ēñēniōnæ incæ mīnitō waincawæ nanguī incawæ bai tæcæ badinque ñowo ganca nanguī apænemīni ēñēninque wadāni mīnitō weca nē pōnēnāni tæiyæñāni

badānīpa. Ayæ tæiyæñāni badāni bai mōnō pōnencabo adobai tōmāmæca tæiyæmō pōni bamōmpa. ⁷ Erapada mōni nē waadedongā incæ, Codito waa pōni nānō pōnō cægāinō ante do odōmonte apæneca ēñēmīnitapa. Tōmengā iñōmō Itota Codito beyæ nē cæcā inongā inte mōnō imōnite pōnēninque ædæmō cæcā ingampa. ⁸ Ayæ mōnitō imōnite apænedinque tōmengā, Codotenteidi iñōmō Wængonguī Öñowoca nempo quēwēninque nē waadete pōnēnāni inānīpa, ante do apæneca ēñentamōnīpa.

⁹ Mānōmaī beyæ mōnitō, Mīnitō æbānō imīnī, ante tæcæ ēñēninque mīnitō beyæ ante Wængonguī ingante apænedinque ñimpo cædāmaī inte cōwē apænemōnīpa. Edæ, Wængonguī æbānō angāā, ante mīnitō ēñēnte ēwocacæminimpa, ante mōnitō, Wængonguī ēñēmi. Bitō ēñēnō ante apænebi ēñēnte ēwocadinque Codotenteidi wæætē, Æbānō waa cæte quēwēnguiī, ante ēñēncædānīpa, ante apænemōnīpa. ¹⁰ Wængonguī apæneca ēñēninque mīnitō, Mōnō Awēnē tocæcāimpa, ante cædinque tōmengā nānō waa cædō bai mīnitō adobai waa pōni cæcæminimpa, ante apænemōnīpa. Ayæ Wængonguī ingante mīnitō doyedē æmæ ate bai æmæ pōnēmīni inte ñowo wæætē ædæmō ate bai ædæmō pōnencæminimpa. Ayæ waa incawæ bai mīnitō adobai bate cædinque nō mīni waa cæquēnēnonque cæcæminimpa, ante apænemōnīpa. ¹¹ Wængonguī ñāō emōninque tæ piñængōngā inte pōnō cæcā ate mīnitō edæ tōmengā nānō tæi piñæñō bai adobai tæi piñæmīni ēwocacæminimpa, ante apænemōnīpa. Ayæ, Tōmengā mānōmaī pōnō cæcā ænte ēwocamīni inte mīnitō wæntæye badāmaī inte ee cædinque piyæñē cæte ee cæcæminimpa, ante āmōnīpa. Ayæ watapæ todinque, ¹² mīnitō mōnō Mæmpo ingante waa ate pōnēninque apæneca minimpa, ante mōnitō Wængonguī ingante apænemōnīpa.

Edæ Wængonguī quīmōni imōni bai tōmengā mīnitō imīnite pōnō badongā ate mīnitō tōmengā quīmīni do bamīnīpa. Inīnque mīnitō tōmengā ñāō emōmāmodē mōnitō tōnō godongāmæ pōñōmīnite tōmengā nanguī pōni pōnongā æninque

mīnitō mōnitō tōnō godongāmæ nē ēamīni incāmīnīmpa. ¹³ Edæ nē wēmō ēnempodongā nempo wæwēñōmonte Wængonguī wæætē mōnō imonte gā pe æmpote o ænīnque, Botō Wengā botō nē Waadedongā iñōmō nē Awēnē Odeye iñongante mīnitō tōmengā nempo quēwencāmīnīmpa, ante māmongā pongamōim ¹⁴ Tōmengā Wengā nāmā wepæ petæ petæ wææ beyænque mōnō wēnæ wēnæ cægainō ante Wængonguī pōnō ñīmpo cæcā ænīnque mōnō abæ tawænte bai quēwēmōmpa.

Codito wængā beyænque Wængonguī piyænē cæcampa

¹⁵ Mōnō adāmaī ingaingā Wængonguī æbānō ēmongāā, ante adāmaī iñōmonte Wængonguī Wengā iñōmō Mæmpocā bai nē ēmongā inte mōnō weca pōnīnque, Mæmpocā æbānō ēmongāā, ante do odōmongacāīmpa. Wēēnēñedē Wængonguī nānō badōnāmaī ingāñedē adocā incæ Bamocadengā bai inongā inte do quēwengacāīmpa. ¹⁶ İnīnque Mæmpocā pōnō angā ēñēnīnque tōmengā Wengā incæ tōmancoo edæ badongacāīmpa. Mōnō nē adīncoo incæ mōnō adāmaī incoo awēmō ongoncoo incæ adocā tōmancoo badongacāīmpa. Awēnēidi incæ nē ānāni incæ, awēnēidi nāni ēnempodō incæ nē tæi pīñænāni incæ, oōnædē owodōnāni incæ inguīpoga quēwēnōnāni incæ mānīnāni edæ tōmānāni inānite Mæmpocā pōnō angā ēñēnīnque Wængonguī Wengā iñōmō badongacāīmpa. Badōñongante Wæmpocā, Bitō qui bacæīmpa, angā Ao ante badongacāīmpa. ¹⁷ Adocā Wængonguī Wengā incæ Tānocā quēwengaingā ingampa. Tōmengā pōnō angā beyænque tōmengā nānō badongaincoo iñōmō adoyōmō pōnente bai cædīnque tōmengā nempo godongāmæ gongænte cægōmpa.

¹⁸ Ayæ tōmengā nē Ōnoncamō bai nē angā iñongante mōnō tōmengā ingante mōnō godongāmæ pōnencabo wæætē tōmengā tōnō adoyonque bai inōmō imōmpa. Adocā tōmengā nānō Tæiyæ Awēnē baquinque nē badongaingā inongā inte tānocā pōnī ingacāīmpa. Ayæ æmōnga pōnī nānō ongonguīnque tōmengā wænte ate tānocā nē ñāni omæmongaingā inongā ingampa.

¹⁹ Edæ, Botō entawēnō incæ botō Wengā tōmānō entawencæcāīmpa, ante pōnō cædīnque Mæmpocā iñōmō nanguī togacāīmpa. ²⁰ Ayæ tōmengā Wengā wepæ awāa gowete wædīnque wængā beyænque Wængonguī mōnō tōmāmō beyæ pōnō cædīnque piyænē cægacāīmpa. Tōmengā Wengā tōnō mānōmaī pōnō cæcā beyænque mōnō inguīpoga tōmāo quēwēmō tōnō oōnædē tōmāo quēwēnāni tōnō tōmengā ingante Ao ānīnque tōmengā tōnō godongāmæ piyænē cæte quēwēmō adīnque Wængonguī iñōmō nanguī togacāīmpa.

²¹ Ayæ mīnitō guīquēnē Wængonguī ingante nāwæ pāmænte gogaīmīni inte wīwa cædīmīni inte ocaidē nē pīinte bagaīmīni iñōmīnite, ²² Wængonguī wæætē, Adocā Codito tōmengā baō ēwēnente wængā beyænque mīnitō botō quīmīni badīnque botō ayōmo tæiyæ wæēmō entawencāmīnīmpa, ante cæcampa. İnīnque tōmengā ñā mēnongacā ate mīnitō tōmengā ayongā wentamō mongænāmaī imīni adīnque, Wēnæ wēnæ cæbitapa, ante ædō cæte pīinte anguīi. ²³ Edæ mīnitō tæi mænonte bai ongōnīnque do mīni wede pōnēnonque ante cōwē godōmenque pōnēmīni inīnque tōmengā weca ponte ongōmaīmīnīpa. Mōnitō mōnō Codito ingantedō ante mōnō pōnēnō beyæ mōnō watapæ bacæīmpa, ante apænemōni ēñēmīnitawo. Mānīne ante ñīmpo cædāmaī imīni inte mīnitō tōmengā weca cōwē ongōmaīmīnīpa. Mānīne mīni ēñēnīne ante mōnitō ñōwo inguīpoga tōmāo quēwēnāni inānite apænemōni ēñēnānīpa. Mānīne beyænque ante botō Pabodobo nē cæbo batabopa.

Mōnō pōnencabo beyæ botō nē cæbo batabopa, ante

²⁴ Mīnitō beyæ nanguī cædīnque nantate wædīmo incæte botō nanguī tobopa. Ayæ Codito beyæ ante godōmenque wæquēnēmō inte botō tōmengā tōnō guēa baonque nantate wæbopa. Codito mōnō Ōnoncamō bai nē angā iñongante mōnō tōmengā ingante mōnō godongāmæ pōnencabo iñōmō tōmengā tōnō adoyonque bai imōmpa. Botō iñōmō edæ mōnō cabo beyænque caate wæbopa. ²⁵ Ayæ, Codito ingante

nē pōnēnāni beyæ bitō nē cæbi badinque botō angaine ante adodō adodō ante tōmānō ante edonque pōni apænebi ēñencædānimpa, ante Wængongui angā ēñēninque botō mīnitō beyæ nē cæquēnēmo do bagaboimpa.

²⁶ Mānīne Wængongui nānō angaine ante wantæpiyæ wē wodonte bai iñonte mōnō mæmæidi cōwē ēñēnāmai ingadānimpa. Nōwo guiquēnē Wængongui tōmengā quīmō iñōmonte mānīne ante edonque pōni odōmonte apænecā ēñēmōmpa. ²⁷ Īninque mōnitō imōnite āninque, Waa pōni botō angaine ante mīni waocabo wēēnēñedē mīni ēñēnāmai ingaine ante mīnitō nōwo tæcæ ēñēmīni inte oodeoidi ināmai ināni inānite odōmonte apænemīni ēñencædānimpa, ante Wængongui cæcampa. Mānōmai beyæ mānīne ante apænemōni ēñēninque mīni waa pōni nāō bai entawenguinque ēñencæmīnimpa. Edæ, Mīnitō mōnō Codito ingante ēwocadinque mīni nāō emāmodē æiyōmīni watapæ bacæimpa, ante mōnō pōnēnō ante mānīneque impa.

²⁸ Mōnō Codito tōmengā nānō ēñēnō ante entawēninque mōnitō adocā ingante mōnō Codito ingante ante apænemōnipa. Tōmengā nempo quēwēninque mīnitō picænāni bai nē ēñēmīni bayōmīnite Wængongui mīnitō imīnite waa acæcāimpa, ante mōnitō tōmānāni inānite waadete odōmonte apænemōnipa. Ayæ, Eñenguēnē quēwēdāni, ante tōmānāni inānite wææ ante apænemōnipa. ²⁹ Mōnō Codito nānō tæi piñænō pōnongā ænte entawēninque botō, Nē ēñēmīni bacæmīnimpa, ante cædinque tæi pæ pagænte cōwē nangui cæbo imopa.

2

¹ Botō mīnitō beyæ nangui cædinque Daoditea iñōmō quēwēnāni beyæ adobai nangui cæbo aedāni. Ayæ wadāni botō awinca adāmai ināni beyæ adobai tæi pæ pagænte cædinque nangui cæbopa, ante apænebo ēñēdāni. ² Botō, Tōmānāni wæwēnāmai inte wampo pōnēninque godongāmæ waadete pōnēninque adocabodāni bai bacædānimpa, ante ædæmō cæbopa. Edæ, Mānōmai badinque tōmēnāni Codito nānō ēñēnō ædæmō pōni nāni

entawenguinque impa, ante pōnēninque cæbopa. Ayæ, Mānōmai badinque tōmēnāni Wængongui nānō nē wē wodongaingā ingante Codito ingante edonque acædānimpa, ante botō mānōmai beyæ ante ædæmō pōni odōmonte apænebopa.

³ Edæ, Æbānō ī, ante, Æbānō waa cæquūi, ante Wængonguinque nānō nō pōnēnō inçæ mōnō Codito mānīnō tōmānō ante ēñēninque waemō pōni inçoo bai wē wodonte mante bai entawengampa.

⁴ Mānōmainō ante apænedinque botō, Mīnitō oda cædāmai incæmīnimpa, ante yewæmonte apænebopa. Edæ wadāni waa pōni tededāni inçæ babæ wapiticæ odōmoncæte ante tededāni ināni adinque ēñēnāmai iedāni, ante wææ amopa. ⁵ Edæ wayōmō quēwēmo inçæ mīnitō weca owote bai botō onōwoca pōnēmōpa. Īninque botō ayōmo mīnitō mōnō Codito ingante wede pōnente tæi piñænte ongōninque iñacabo cædinque tōingā pōni cæmīnipa, ante pōnēmōpa. Mānōmai imīnipa, ante ate bai adinque botō nangui tobopa.

Codito nempo quēwēninque mīimō quēwēmōmpa, ante

⁶ Mānōmai beyæ botō iīmai amopa. Mīnitō Itota Codito ingante mōnō Awēnē ingante Ao ante do æmīnitawo. Īninque tōmengā ingante do Ao ante ænimīni inte mīnitō nōwo adobai tōmengā ingante cōwē Ao ante tōmengā nempo quēwēdāni. ⁷ Mīnitō waomīni inçæ awæ tæimōwæ ædæmō guiwate pæwæ bai Codito nempo quēwēninque cōwē godōmenque picæmīni bacæmīnimpa. Ayæ mōnitō odōmonte apænemōni mīni ēñēnō bai cædinque godōmenque wede pōnēninque tæi piñænte ongōdāni. Ayæ Wængongui ingante waa ate pōnēninque watapæ apæneedāni.

⁸ Wadāni mā pōnente ononquedō ante apænedāni ēñente wædinque mīnitō, Mōnō imonte o æncæte ante babæ apænedānipa, āninque wææ cæedāni. Edæ tōmēnāni dicæ Codito nānō odōmonte apænegainō ante apænedāniyaa. Wæætē waodānique nāni odōmonte apænegainonque ante Ao āninque tōmēnāni inguipogaque ante nē pōnēnāni nāni pōnēnō baiñonque ante cædānipa tōō.

9 Edæ Wængonguī tōmengā nānō entawēnoncoo incæ mōnō Codito Waocā nē ēñagāingā inongā inte mānincoo tōmancoo entawēninque nāmā baonga ēñacampa. 10 Öönædē awēnēidi incæ inguipoga awēnēidi incæ nanguī ināni iñōnāni mōnō Codito adocanque Nænængā pōni inongā inte Tæiyæ Awēnē inongā ingampa. Incæte tōmengā nempo quēwēmīni inte mīnitō tōmengā nānō entawēnō incæ ædæmō entawēmīnīpa. 11 İnīnque tōmengā nempo quēwēninque mīnitō wao önompoca eö togænāmaī imīni incæte mōnō Codito iñōmō eö togænte baī cædinque mīnitō baonque ante mīni wīwa cægāinō ante wido cæcā ate mīnitō tæiyæ waēmō entawente quēwēmīnīpa. 12 Wængonguī nē tæi piñængā ingante Itota ingante angā ñāni ömæmongacäimpa, ante wede pōnēmīni inte mīnitō, Itota tōnō godongāmæ nāñe wænte baī imōmpa, ante æpænē guīimīnitapa. Ayæ adobaī adocā nē tæi piñængā ingante wede pōnēninque mīnitō æpænē guīidinque Itota tōnō ñāni ömæmonte godongāmæ tao gongænte quēwēmīnīpa.

13 Doyedē ēñēnāmaī cædinque do wænguēnēmīni ingāimīni inte mīnitō inguipogaque ante mīni cæinēwēnō ante ee mongæñōmīnite Wængonguī angā ate mīnitō Itota tōnō ñāni ömæmonte quēwengamīnīpa. Edæ wēnæ wēnæ mīni cægāinō ante adinque Wængonguī pōnō ñimpo cæcā quēwēmīnīpa. 14 Mīnitō pante wæquinque ēñēnāmaī cæmīnīpa, ante Wængonguī wade wade ante wææ angā ēñēninque dodāni adodō adodō ante yewæmōnāni ate wægāmōimpa. Mānōmaī mōnō imonte ancaa wææ ānāni wæmō adinque Codito iñōmō mānīnecoo mōnō wægāinecoo ante wēä godonte baī cæcā ate dæ batimpa. Edæ awæ timpodāni wæninque Itota Codito mānīnō ante do teēmente mongæ māo wido cægacäimpa. 15 Ayæ māniwāa wæninque adocā tæi emongā inte wēnæidi awēnēidi tōnō nē ānāni nāni wænonguēnencacoo gā pe æmpote ö æninque tōmengā, Wænoncaincoo nææmīnīpa wænonguimīni, ante baī wadāni ayōnānite badete tote baī

cægacäimpa.

Öönædē mōnō entawēnō ante cæcæte ante cæedāni, ante

16 Mōnō ee aquēnēnō incæ bitō quīmæ cæmīi, Quīmæ bebii, ante pōnō apænte piinte ānānitawo. Wængonguī beyæ ante ææmæ cæcæimpa, ante apænte ancæ piinānitawo. Wacā māmō i ate becæimpa, ante wææ ānānitawo. Guēmanguiōnæ incæ quīmæ cæbii, ante mīnitō imīnite apænte pancæ cædānitawo. Edæ æcāmenque mānōmāinō ante apænte ancæ cæyōnānite mīnitō wæætē, Tömēnāni nāni wææ ānīnō ante Codito wēä godonte baī cægacäimpa, ante pōnēninque guīñente wædāmaī incæmīnīpa. 17 Cænguī cænte baī bequī bete baī mōnō önōwoca beyæ Codito incæ mōnō guēmanguimāmo baī inongā ingampa. İnīnque Codito ingante ænte entawēninque mōnō æbānō cænte baī guēmante baī quēwenguīi, ante odōmoncæte ante cædinque dodāni iñōmō öwocodenganque odōmonte baī cædinque wææ angadānīpa. Mānōmaī beyænque tōmēnāni, İimaī cæedāni, İimaī beedāni, İimaī guēmæedāni, ante wææ angadānīpa.

18 Pancadāniya mā pōnēninque, Önōmonque baī inōmō inte mōnō anquedoidi inānite waa adinque waa cæcæimpa, ante babæ ante wææ ānewēnānīpa. Ayæ mōnitō ānō baī cædāmaī inīnque edæ mīnitō ænte entawēnō ænāmaī inte wæbaīmīnīpa, ante ānewēñōnāni mīnitō wæætē guīñente wædāmaī iedāni. Edæ, Mōnitō ate baī do adīmōni inte āmōni ēñēedāni, ante tōmēnāni Codito Önōwoca ingante ewocadāmaī ināni inte mā pōnēninque ānewēnānīpa. Edæ, Nāmāneque ante pōnēninque tōmēnāni, Mōnitō adomōnique waa cæmōni imōnīpa, ante nāmā waa adānīpa. 19 Mōnō ocāi encamō inte cænguī cæninque mōnō baonga wepæmē tōmāo gogadinque pæmōmpa. Ayæ adobaī mōnō ocāi encadinque oguēmē tōnō baö beyæ cōñe pō cōñe pō cæmōmpa. Mōnō pōnencabo adobaī Codito tōnō adoyonque baī iñōmonte tōmengā Önoncamō baī inongā inte nē angā ingampa. Mōnō mānōmaī imō incæte tōmēnāni wæætē nē Önoncamō baī inongā ingante Baa āninque nāmā wido tote wææiñō baī

edæ wadæ godänipa. İninque wææiñö bai inäni incæ minitö iminite wææ änäni apa quëwëminii.

²⁰ Wëenëñedë inguipogaque ante näni wææ angainö ante nê ëñengaimini incæte ñöwo wæætë Codito tönö godongämæ wænimini inte minitö wænte bai imini inte mänine ante ædö cæte ëñenguimiiii. Inguipogaque quëwëmini iminipa diyæ mänine ante ëñente cæquënëmini inguimiiii. ²¹ “Gampodämaï, Yædæ bedämaï, Bæi ongönämaï,” ante tömënäni näni wææ anewënö ante quinante ëñente cæminii. ²² İñæmpa waodänique edæ, Gampodämaï, ante näni anoncoo iñömö tæcæ ænte cæyömini edæ dobæ wote ba apa ëñëwëminii. Inguipogaque quëwënäni näni anewengainö ante ëñëninque tömënäni wææ änänipa. Dodäni näni odömönte apænegainö ante ëñëninque wææ änänipa. ²³ Tömënäni, Önömonque bai inömö inte mönö anquedoidi inänite waa adinque waa cæcæimpa, ante wææ anewënanipa. Ayæ mä pönëninque, Cædämaï, Cædämaï, ante nämä baö incæ pänänipa. İnänäni ocai encadönäni inte wææ änänipa, ante pönëninque wadäni edæ wæætë oda cædänipa. İñæmpa, Cædämaï, Cædämaï, ante näni wææ anewënö wii eyepæ iiniqu nê ëñënäni inguipogaque näni cæinëwënö ante godömenque wiwa cædänipa, ante ämo ëñëmaimnipa.

3

¹ İninque mönö Codito nê ñäni ömæmongaingä tönö nê ñäni ömæmongaimini inte minitö æmonga ongoncoo edæ æinente pönëdäni. Codito ñöwo Mæmpo Wængongui tömëmængä inö æi tæ contate ongongampa, ante pönëninque edæ minitö, Æmonga pöni nê quëwengä tömengä nänö entawënö bai adobai entawengæimpa, ante æinente wædinque quëwëdäni. ² Inguipogaque mönö quëwëmämo ante edæ wædämaï inte wæætë æmonga mönö quëwenguinö ante cöwë pönente quëwëdäni. ³ Edæ do wænte bai ingaimini inte minitö ñöwo Codito tönö Wængongui nempo awëmö quëwëñöminite minitö quëwenguinö ante wii edonque acæimpa.

⁴ Mönö Codito minitö quëwenguinö ante nê pönongaingä inte ponte a ongöñongä mäniñedë tömengä ñäö entawëninque nänö tæi emömämöde minitö adobai tömengä tönö a ongömini acæimpa.

Inguipogaque ante wægaimö inte mönö mümö quëwëmö

⁵ Mänömaï impa, ante wædinque minitö inguipogaque ante mini cæinëwënö ante wænonte bai æmæwo wido cædäni. Nänöogængä inämaï iñongante godö mönämaï ee aedäni. Wiwa mini pönëwënö ante æmæwo wido cædäni. Wacä ingante mini töinente wædö ante æmæwo wido cædäni. Wiwa mini cæinëwënö ante æmæwo wido cædinque ee ate quëwëdäni. Mini mäincooque ante æinëwënö ante æmæwo wido cæte ñimpo cædäni. Edæ mäincoo ante æinente nê wæcä iñömö tömengä, Mäincoo incæ botö wængongui impa, ante bai wæcä apa cæminii. ⁶ Nê ëñënämaï cædäni inguipogaque näni cæinëwënönque ante cæyönänite Wængongui nänö piinguimämo oo ponguinö angüenë. ⁷ Minitö incæ doyedë inguipogaque ante quëwëninque adobai mini cæinëwënönque ante cægaimini iminipa. ⁸ Nöwo guiquenë ænguï badämaï iedäni. Äimini badämaï iedäni. Pinte cædämaï iedäni. Babæ godö wënæ wënæ anewënamäi iedäni. Wiwa apænedämaï iedäni. Wæætë, Idæwaa wënæ wënæ cæte awædö, ante mäninö tömänö ñimpo cæte ee aedäni. ⁹ Wëenëñedë mini entawengaimämo ante wido cædinque mäniñedë mini cægainö ante edæ wacä ingä wacä ingä babæ wapiticæ apænedämaï iedäni. ¹⁰ Wæætë mümini edæ quëwencæminimpa, ante Wængongui do pönö badongä entawëminipa. Ayæ mäninö ante nê Badongaingä iñömö cöwë pönö odömönte apæneca ëñëninque minitö mümini quëwëmini inte tömengä nänö entawënö bai godömenque godömenque adobai entawëmini baminipa. ¹¹ Mönö Codito nempo adoyömö pöni inömö inte mönö guidiegoidi incæ oodeoidi incæ adomö inömö imompa. Nê eö togæinäni incæ bagädäni incæ adomö inömö imompa. Wadäni incæ cowodëidi incæ adomö

inömö imompa. Wacä beyænque nē cæte quēwēnāni incæ abæ tawænte ee gote bai nāmā beyænque nē cæmōni incæ mōnō tōmāmō adomō pōnī inömö imompa. Edæ mōnō tōmāmō Codito adocanque nempo quēwēnīnque tōmengā adocanque ingante nē ēwocamō imompa.

¹² Wængonguī, Mīnitō botō quīmīni badīnque tæiyæ waēmō bacæmīnīmpa, ante mīnitō imīnite waadete pōnēnīnque do apænte ængacāīmpa. Īnīnque tōmengā nānō nē apænte ængāīmīni inte mīnitō wadāni inānite waadete pōnente godō waa cæedāni. Nāmā ōnōmoque bai imopa, ante pōnēedāni. Wadāni inānite ædæmō cæedāni. Æīquedō waa cæquīnānīi, ante wædāmaī inte piyænē cæte quēwēedāni. ¹³ Ayæ wacā nānō cæinēnō ante cæcā adīnque mīnitō pīināmaī ee amīni cæcæedāni. Wacā adobaī mīnitō imīnite wīwa cæcā ate wædīnque mīnitō godō ñīmpo cæmīni quēwēncæcāīmpa. Edæ mōnō imonte mōnō Awēnē nānō ñīmpo cægāī bai mīnitō adobaī pīināmaī inte godō ñīmpo cæedāni. ¹⁴ Ayæ, Adocabomō mōnō baquinque mōnō waadete pōnengæīmpa, ante pōnēnīnque mīnitō tāno wadāni inānite waadete pōnēnīnque ayæ tōmēnāni inānite mīni godōmenque cæquēnēnō ante cæedāni. ¹⁵ Mīnitō adocabomīni badīnque piyænē cæte quēwēncæmīnīmpa, ante Wængonguī mīnitō imīnite aa pegacāīmpa cæmīnīi. Mōnō Awēnē Codito nānō piyænē cædō pōnongā ænīnque mīnitō piyænē cæte quēwēedāni. Ayæ Wængonguī ingante cōwē waa ate pōnente quēwēedāni.

¹⁶ Mōnō Codito nānō apænegainō ante ēñēnīnque mīnitō ædæmō entawēnīnque nanguī ēñente baedāni. Īnīnque nanguī ēñēmīni badīnque mīni cabo incæ wacā ingā wacā ingā godongāmæ odōmonte apæneedāni. Ayæ nanguī ēñēmīni inte mīnitō wacā ingā wacā ingā waadete pōnēnīnque, Īīmaī cæcæīmpa, ante apæneedāni. Ayæ dodāni Wængonguī ingante waa adīnque āmotamīni ante nāni yewæmongainta adīnque mīnitō wæætē adodō tee empote æedāni. Ayæ Itota Codito nānō cægāinō ante pōnēnīnque āmotamīni æedāni. Ayæ adobaī Wængonguī Ōnōwoca

pōnō apænecā ēñente ēwocadīnque mīnitō āmotamīni ante adodō tee empote æedāni. Mānōmaī āmotamīni ānīnque Wængonguī ingante cōwē waa ate pōnēnīnque æedāni. ¹⁷ Ayæ æbāmenque ante apænēmīni incæ æbāmenque cæmīni incæ mīnitō, Mōnō Awēnē Itota ēmōwo beyæ īmpa, ante tōmāā cæedāni. Ayæ tōmengā pōnō cæcā beyænque mīnitō eyepæ inte Mæmpo Wængonguī weca pōnīnque tōmengā ingante waa ate pōnēnīnque apæneedāni.

Mōnō godongāmæ quēwēncabo īīmaī cæte quēwēngæīmpa

¹⁸ Onquiyæmīni ēñēedāni. Mōnō Awēnē nempo quēwēnīnque mōnō ēñente cæcæīmpa, ante wædīnque mīnitō nānōogænāni inānite Ao ante ēñente cæedāni. ¹⁹ Onguīñæmīni ēñēedāni. Mīnitō nānōogænāni inānite ædæmō waadete pōnēnīnque tōmēnāni inānite pīinte cædāmaī iedāni.

²⁰ Wēñæmīni ēñēedāni. Mīnitō mæmpoidi inānite ædæmō ēñente cæedāni. Edæ mānōmaī cæmīni adīnque mōnō Awēnē, Waa pōnī cæbi abopa, ancæcāīmpa. ²¹ Wæmpomīni ēñēedāni. Mīnitō, Ancaa āmo bai botō wēñængā ænguī badīnque guingo imonte wæquēnengā, ante pōnente wædīnque wæætē wēñænāni inānite nanguī ānāmaī inte waadete pōnō cæedāni.

²² Wacā nānō nē ō ænīmīni inte tōmengā beyænque nē cæte quēwēmīni īñōmō ēñēedāni. Mīnitō imīnite nē ō ængaingā ingante nē cæmīni inte mīnitō tōmengā nānō ā bai tōmāā ēñente cæedāni. Edæ, Awēnē Wængonguī incæ botō imote cōwē acampa diyæ, ante guīñente wædīnque mīnitō imīnite nē ō ængaingā nānō ayedē incæ tōmengā nānō adāmaī īñedē incæ cōwē ēñente cæedāni. Waodānīque botō imote waa acædānīmpa, ante pōnēnāmaī inte mīnitō nō pōnēnīnque cōwē ēñente cæedāni. ²³ Æbāmenque cædīnque mīnitō, Wīī waocā beyænque ante cædīnque botō Wængonguī Awēnē beyænque ante cæcæboīmpa, ante pōnēnīnque tæī ēwocadīnque ee cæedāni. ²⁴ Mōnō Awēnē īñōmō tōmengā do nānō angāinō bai cædīnque mīnitō cægāinō beyæ ante eyepæ pōnī pōnongā æncæmīnīmpa. Mānōmainō ante pōnente cæedāni. Edæ,

Mönö Awënë Codito ingante adocanque ingante nē cæmīni imīnīpa, ante ämo eñēmaimīnīpa. ²⁵ Nē wēnæ wēnæ cæcä guiquēnē tömengä nänö wēnæ wēnæ cægainganca eyepæ æncæcäimpa. Edæ Wængonguī iñömö wacä ingante wadö wacä ingante wadö ate pönēnāmaī inte tömämö imonte apænte äninque pönö nö pönī paga cæcæcäimpa.

4

¹ Awënëidi eñēedāni. Mīnitö waocä ingante nē ö ænimīni inte eñēedāni ämopa. Edæ mīnitö Awënëidi imīni bai mīnitö imīnite nē Ængaingä incæ adobai mīnitö Awënë inongä inte öönæde quēwengampa cæmīnī. Mīnitö beyænque cæte nē quēwēnāni inānite mīnitö nöingä cædinque tömēnāni nāni ænguēnēnö ante adinque eyepæ pædæ godöminī æncædänimpa.

² Wængonguī ingante cöwē apænedinque, Tömengä æbänö cæcää, ante cöwä adinque tömengä ingante waa ate pönēninque apæneedāni. ³ Codito æbänö cæcää, ante dodāni nāni eñēnāmaī ingaine incæ botö mänīne ante do eñēnīmo inte apænebo beyænque botö imote tee mönedāni wæbopa. Incæte mönitö mänīne ante apæneyömöni mīnitö wæætē mönitö beyæ ante Wængonguī ingante apænedinque iīmaī ante apæneedāni ämopa. Wængonguī eñēmi. Bitö wi ænete bai cæbi ate Pabodoidi nāni apænebo wadāni mimönē guicæimpa, ante apæneedāni. ⁴ Codito æbänö cæcää, ante botö edonque apænequēnēmo imopa. İninque mīnitö botö beyæ ante apænedinque, Pabodo edonque apæncæcäimpa, ante Wængonguī ingante apæneedāni ämopa. ⁵ Wadāni inānite bee tēninque mīnitö ocai encamīni inte eñente cædāni. Pönēnāmaī ināni do eñencædänimpa, ante waa apænete cædāni. ⁶ Ayæ Wængonguī waadete pönö apæncä eñēninque mīnitö adobai wadāni inānite waadete pönö apænedinque waa pönī apæneedāni. Wadāni, Æbänö iī, ante eñencæte ante wæyönānite mīnitö wæætē nö pönī eñēmīni inte nöingä apænemīni eñencædänimpa.

Waa quēwencæmīnīpa, änānīpa

⁷ Botö Pabodobo æbänö quēwēmoo, ante nē eñēningä inte Tiquico ñöwo mīnitö weca pöninque mänīnö ante apæncä eñencæmīnīpa. Tömengä mönö tönīñacä bai iñongante mönitö tömengä ingante waa waadete pönēmönīpa. Tömengä mönö Awënë nempo quēwēninque mönitö tönö godongämæ cæcä inongä inte mönö pönencabo tömämö imonte pönēninque mönö beyæ cöwē ædæmö cæcä ingampa. ⁸ Mīnitö, Pabodoidi æbänö quēwēnānī, ante eñencæte ante wæmīnitawo. Edæ, Tiquico mänīnö ante apænedinque mīnitö imīnite ædæmö apæncä eñēninque mīnitö wampo pönencæmīnīpa, ante cædinque botö ñöwo tömengä ingante mīnitö weca da godömo pongä aedāni. ⁹ Tiquico goyongä tömengä tönö Önetīmo mīni cabo nē inongä incæ guēa gocæcäimpa. Önetīmo cöwē ædæmö cæte nē pönengä ingampa, ante adinque mönitö tömengä ingante waadete pönēmönīpa. İninque tömēna iñömö, Pabodoidi weca æbänö cædānī, ante tömānö ante apænedä eñencæmīnīpa.

¹⁰ Botö tönö guēa tee mönete on-gongä Aditadoco iñömö tömengä mīnitö imīnite, Waa quēwēedāni, angampa. Ayæ Bedēnabee nänö wænquicä Mäadoco adobai, Waa quēwencæmīnīpa, angampa. Tömengä ingante æbänö waa cæquīi, ante do ämo eñēmīnitapa. İninque tömengä pongä adinque waa cædāni. ¹¹ Ayæ wacä Itota Yoto nāni änogä adobai, Waa quēwencæmīnīpa, angampa. Botö Wængonguī Awënë Odeye nempo quēwēnāni beyæ cæyömo oodeoidi incæ wadāni cædāmaī iñönānite mänīnānique botö tönö godongämæ cædinque pönö ædæmö cædāni æninque botö wampo pönentabopa.

¹² Ayæ mīni cabo inongä inte Epapada iñömö tömengä Itota Codito ingante nē cædongä inte adobai, Waa quēwēedāni, angampa. Tömengä Wængonguī ingante nanguī apænedinque, Codotenteidi inānite bitö godö cæbi ate tömēnāni picænāni bai bacædänimpa. Ayæ bitö angainö tömānö ante eñente cædāni inte tömēnāni tæi piñænte ewocædänimpa, ante tömengä mīnitö beyæ ante cöwē

apænecampa. ¹³ Minitö beyæ tömengä nangui cæcampa. Daoditea iñömö nani pönencabo beyæ adobai Yedapodi iñömö nani pönencabo beyæ adobai tömengä nangui cæcampa, ante botö näwangä apænebo eñeedäni. ¹⁴ Ayæ, Waa bacædänimpa, ante mönö nē cædongä tömengä emöwo Odoca tömengä iñömö mönö nē waadecä ingampa. Tömengä tönö Deëma, Waa quëwencæminimpa, ante adobai änapa.

¹⁵ Ayæ botö Pabodobo beyæ ante wæætë Daoditea iñömö mönö töninäädäni inänite minitö, Waa quëwëedäni, äedäni. Diimpa inante, Waa quëwëedä, äedäni. Ayæ Codito ingante nani pönencabo tömënä oncönë godongämæ ponte apæneyönänite minitö wæætë botö beyæ apænedingue, Pabodo, Waa quëwëedäni, angampa, äedäni.

¹⁶ Ayæ iinta botö cadota ante yewæmointa iinque adingue minitö, Daoditea iñömö Codito ingante nani godongämæ pönencabo adobai acædänimpa, ante cædinque da godömini ænte acædänimpa. Ayæ daoditeaidi inänite botö cadota ante yewæmöninta adobai ämini da pönönäni æninque äedäni.

¹⁷ Ayæ Adoquipo ingante apænedingue, Bitö mönö Awënë pönö angä eñëniimi inte bitö cæquënënö ante tömää ædæmö cæe, äedäni. ¹⁸ Botö Pabodobo tömëmo önompoca yewæmöninque, Waa quëwëedäni, ante tömëmo emöwo ante yewæmömopa. Botö æbänö yæguincamë encapote wæboi, ante pönëninque minitö Wængongui ingante apæneedäni ämopa. Wængongui waadete nänö pönö cædö ænte entawencæminimpa, ante mäninque ante yewæmömopa.

1 Tetadönitenteidi inänite Pabodo cadota ante tänota nänö yewæmongainta

Pabodo, Waa quëwëedäni, ante apæneccäimpa

1 Botö Pabodobo inömo imopa. Mönö töninäda Tidibänö tönö Timoteo tönö godongämæ apænete ate yewæmömo aedäni. Mönö Mæmpo Wængonguï nempo ayæ mönö Awënë Itota Codito nempo quëwëninque minitö Tetadönica iñömö quëwëninque Codito ingante godongämæ mini pönencabo ëñëedäni. Mönö Wængonguï waadete pönö cæcä ate minitö gänë entawencæminimpa, ante yewæmömönipa.

Tetadönitenteidi nani wede pönëno

2 Mönitö möni apæneyedë minitö tömämäni beyæ ante Wængonguï ingante cöwë waa ate pönëninque apænemönipa. 3 Minitö Itota ingante æbänö wede pönente cæmini iminipa, ante ayæ tömengä ingante waadete pönëninque æbänö cæmini iminipa, ante cöwë apænemönipa. Ayæ minitö wæwëmini incæ, Mönö Awënë Itota Codito pongä ate watapæ bacæimpa, ante pönëninque æbänö wæntæye inämaï ee cæmini iminipa, ante adinque mönitö Wængonguï mönö Mæmpo weca æyedëmë ponte apænedinque cöwë mäninö ante pönëninque apænemönipa. 4 Mönitö töninämani, minitö Wængonguï nänö në waademini inömini inte ëñëedäni. Tömengä minitö iminite apænte ængacäimpa, ante do ëñëmönipa. 5 Edæ Itota ingantedö ante mönitö watapæ möni apænedö ante wii önonquedö ante apænetamönipa. Wæætë Wængonguï nämä tæi piñænte në angä beyænque mönitö minitö iminite apænedinque Awënë inte bai apænetamönipa. Wængonguï Önöwoca mönitö tönö godongämæ cæcä beyænque mönitö mäninö möni watapæ apænedö ante, Nö impa, ante ædæmö pönëninque apænetamönipa. Mänömaï apænemöni ëñëmäni adinque mönitö, Wængonguï minitö iminite apænte ængacäimpa, ante do ëñëmönipa. Ayæ minitö weca

quëwëninque mönitö æbänö minitö beyæ ante quëwentamönii, ante do ëñëmönipa.

6 Wængonguï Önöwoca watapæ nänö topämo ante pönongä ænimäni inte minitö nanguï caate wæmini incæte Wængonguï nänö angainö ante ëñëninque Ao ante æminitapa. Mönitö æbänö cæmönii, ante adinque Awënë Itota Codito æbänö cæcää, ante adinque minitö adobaï möni cæbai cæmini baminitapa. 7 Ìninque Mäatedöniabæ quëwënanäni tönö Acayabæ quëwënanäni iñömö Itota Codito ingante në pönënanäni inönänäni inte tömënanäni tömänäni mini cædi adinque mini cæbai adobaï cædanitapa. 8 Minitö wede pönëninque apænemäni beyænque Wængonguï nänö angainö ante Mäatedöniabæ quëwënanäni tönö Acayabæ quëwënanäni ëñënanäni incæte wii mänii mëñömongaque iñömö quëwënanäni ëñënanäni. Wæætë ædömë quëwënanäni iñönänite wadäni minitö Wængonguï ingante mini wede pönëmämo ante tededäni do ëñënanäni.

Ìninque mönitö mänii beyæ quinante godömenque apænequii. 9 Edæ, Mönitö minitö weca ëñacæ pöninque apænemöni ëñëninque minitö æbänö watapæ ëñëmönitapa, ante mäninäni në pönënanäni incæ apænedäni ëñëmönipa. Ayæ adodäni minitö iminitedö ante iimaï ante apænedänipa. Minitö, Mönitö wængonguïdi impa, ante mini cönönincacoo incæ emö cæte wadæ pöninque mönö Wængonguï gämænö pömönitapa, ante apænedäni ëñëmönipa. Ayæ, Näwä Wængonguï në Quëwëngä ingante ëñente cæcæmönimpa, ante pömönitapa, ante apænedäni ëñëmönipa. 10 Ayæ tömengä Wengä öönæde në quëwëngä inte ocæ emænte poncæcäimpa, ante minitö wänö cömini iminipa, ante apænedäni ëñëmönipa. Tömengä do wængaingä iñongante Wængonguï, Nänäni ömæmöe, angä në nänäni ömæmongaingä ingampa. Ìninque Wængonguï mönö imonte nänö piinte panguimämo ante wæyömonte tömengä Wengä iñömö ængä beyænque quëwënguimö imompa.

2

Pabodo Tetadönica iñömö nänö cædö

1 Mönitö töninamini eñeedäni. Mönitö minitö weca möni eñacæ pöñedë möni cædinö wii önonque impa, ante minitö do eñëminimpa. 2 Mönitö do mini eñëninö bai mönitö wëenëñedë Pidipoto inömö quëwëñömönite mäneñömö quëwëñäni mönitö imönite wënæ wënæ cædäni beyænque wæwente intamönipa. Adodäni mönitö imönite, Minitö wënæ wënæ cæmini iminipa, ante tedewëñäni eñëninque wætämönipa, ante minitö adobai eñëminipa. Ayæ minitö weca ponte quëwëñömönite waodäni tæiyænäni mönitö imönite Baa ante, Minitö apænedämai incæminimpa, ante wææ änäni incæte Wængongui mönitö tönö godongämæ cæcä beyænque tömengä ingantedö ante watapæ möni apænedö ante minitö iminite guiñenämai apænetamönipa.

3 Edæ mönitö, Wængongui ingante pönëmini inique waa imaimpa, ante minitö iminite nangui apænemöni inte wii babæ wapiticæ pönëninque apænemönipa. Wii wentamö entawëninque pönente apænemönipa cæminii. Ayæ adobai, Minitö oda cæcæminimpa, ante cædämai inte mönitö wii wapiticæ apænemönipa. 4 Wæætë Wængongui mönitö imönite apænedinque, Waa cæmini abopa, äninque, Minitö Itota ingantedö ante botö watapæ apænedö ante në apænemöni eñencædänimpa, ante angä eñëninque mönitö në apænemöni imönipa. Mönitö, Waodäni mönitö imönite waa acædänimpa, ante cædämai inte wæætë, Wængonguinque mönitö imönite waa acæcäimpa, ante cædinque apænemönipa. Edæ tömengä, Æbänö entawëminii, ante mönö entawëñömö ante në acä ingampa. 5 Wadäni nämä beyænque ante, Waa tedemöni eñëninque mönitö imönite wæætë pönö cæcædänimpa, ante babæ cædäni bai mönitö inömö dicæ mänömainö ante minitö iminite babæ cætamöniyaa. Mänömainö ante do eñëminipa. Ayæ, Mönitö wii minitö godonte æinta ante beyæ apænetamönipa, ante do eñëminipa. Æbänö cætämönipa, ante Wængongui në acä ingampa. 6 Waodäni mönitö imönite waa acædänimpa, ante mönitö dicæ ämönitawogaa.

Ayæ, Minitö incæ wadäni incæ

mönitö imönite waa acædänimpa, ante dicæ ämönitawogaa. 7 Edæ, Itota Codito nänö da godongaïmöni inömöni inte mönitö minitö iminite, Pönömini æninque quëwencæmönimpa, ämöni bai waa incædönimpa. Wæætë minitö weca quëwëninque mönitö wäänä nänö wëñænäni guiyanäni inänite ædæmö cædä bai adobai minitö iminite cætämönipa. 8 Minitö iminite nangui pöni waadete pönemöni inte mönitö, Itota ingantedö ante Wængongui nänö watapæ apænedö ante minitö iminite apænedinque watapæ totämönipa. Ayæ minitö nö möni në waademini inömönite mönitö minitö beyæ quëwentämönipa. Ayæ minitö beyæ wämöni incæ adobai watapæ tobaïmöni. 9 Mönitö töninamini eñeedäni. Nangui pöni möni cædinö ante minitö do eñëminipa. Itota ingantedö ante Wængongui nänö watapæ apænedö ante mönitö minitö weca quëwente apænedinque, Möni quëwengäimpa, ante wii eyepæ godö wædö ante dicæ antamöniyaa. Wæætë edæ, Minitö wædämai incæminimpa, ante mönitö itædë incæ woyowotæ incæ tömëmöni nangui cædinque ænte quëwentämönipa.

10 Minitö në wede pönëmini weca quëwëninque mönitö tæiyæ waëmö ëwocamöni inte nö cæte quëwëñömönite minitö, Wënæ wënæ cæminipa, ante ædö cæte angüminii. Wæætë mönitö cædinö adinque minitö, Mönitö æbänö quëwëmöni imönii, ante do amini inte në apænemöni iminipa. Wængongui adobai ante do acä ingampa. 11 Edæ waocä mæmpocä tömengä wëñænäni inönänite tömengä, Minitö eñënguimini, ante odömongä bai mönitö adobai minitö tömämöni inömönite adocanque adocanque ingante, Bitö eñënguimi, ante odömonte apænetamönipa. Mänömai cætämönipa, ante minitö do eñëminipa. 12 Mini quëwënö adinque Wængongui tocæcäimpa, ante cædinque minitö tæiyæ waëmö quëwencæminimpa, ante mönitö nangui apænetamönipa. Ayæ, minitö mänömai cæte quëwencæminimpa, ante waadete apænetamönipa. Ayæ adobai mönitö wæætë wæætë apænedinque minitö

iminite adodö ante ancaa apænetamönipa. Wængongui iñömö, Botö Awënë Od-eye nempo quëwëninque minitö botö ñäö ëmöñömö botö tönö godongämæ quëwencæminimpa, ante tömengä minitö iminite aa pedingue apænte ængampa.

¹³ Ayæ adobaï mönitö Wængongui nänö angainö ante minitö iminite apænemöni ëñëninque minitö ö ænte do pönëminitapa. Näwangä Wængongui nänö angainö impa, ante adingue minitö, Wii waodanique nani angainö impa, ante pönëninque wæætë, Näwangä Wængongui nänö angainö impa, ante pönëninque ö æminitapa. Inique minitö nê wede pönëmini inte Wængongui nänö angainö entawëmini beyænque nanguï cæmini iminipa, ante ëñëninque mönitö Wængongui ingante cöwë waa ate pönente apænemönipa.

¹⁴ Oodeabæ iñömö Wængongui ingante godongämæ nani pönencabo iñömö tömengä nempo quëwëñönänite oodeoidi tömënäni inänite togænte pänäni wädäni bai minitö mönitö tönïñamini iñömöni minitö ömæ iñömö nê quëwënäni incæ minitö iminite adobaï cädäni wæminitapa. Mänömaï cädäni wædinque minitö Oodeabæ iñömö Wængongui ingante godongämæ nani pönencabo wädäni bai adobaï wæmini baminitapa.

¹⁵ Oodeoidi iñömö Wængongui beyæ nê apænegainäni inänite wænönäni wængadänimpa. Ayæ ate tömënäni pæinäni iñömö Itota Codito ingante wænönäni wængacäimpa. Ayæ ñowodäni adocabodäni incæ mönitö imönite adobaï togænte wido cädänitapa. Mäninäni nani cædinö adingue Wængongui tömënäni inänite ædö cæte waa aquingäa. Adodäni incæ waodäni tömänäni inänite piinte quëwënönänimpa töö. ¹⁶ Edæ oodeoidi inämaï inäni inänite, Codito ængä beyænque minitö quëwencæminimpa, ante apænedämaï incæminimpa, ante cæcæte ante mäninäni oodeoidi incæ mönitö imönite Baa äninque wææ cädänipa töö. Mänömaï cöwë wënæ wënæ cædinque tömënäni wæætë wæætë nani wënæ wënæ cædincoo idæwaa cädänipa. Idæwaa i inique Wængongui nänö ænguï bate püimämo tömënäniya do pongatimpa.

Tetadönitenteidi weca Pabodo ëñacæ pöinente wæcampa

¹⁷ Incæte mönitö tönïñamini ëñëedäni. Tömënäni änäni beyæ mönitö minitö iminite ëmö cæte godinque wii wantæpiyæ ante gotamönipa. Godinque minitö iminite adämaï imöni incæte mönitö minitö beyæ ante cöwë pönentamönipa. Minitö iminite nanguï äinente wæmöni inte mönitö, Æbänö cæte goquimönii, ante pönëninque nanguï cætamönipa. ¹⁸ Edæ minitö weca pöinente wætamönipa. Botö Pabodobo inömo inte wæætë wæætë nö pöinëmo intabopa. Mönitö pöinëmöni incæte Tatäna wæætë mönitö imönite wææ cæcä wætamönipa. ¹⁹ Mönö Itota Codito nänö ponguïönæ tömengä weca ongöninque mönitö æbänö ante beyæ watapæ bacæimpa, ante pönëmöni imönii. Wii minitö beyænque toquimönii. Edæ nê pönëmini inömöni inte minitö do möni nê watapæ todömöni iminitapa. Ayæ waodäni tæi ëmonte gänä cædinque poganta ænte todäni bai minitö beyænque ante mönitö nê toquimöni imönipa. ²⁰ Näwangä impa. Waa pönï cæmini inique minitö möni nê waa amini inömöni inte möni nê watapæ todömöni iminipa.

3

¹ Mänömaï beyæ mönitö, Minitö iminite adämaï inte awædö, äninque, Ædö cæte godömenque wänö cömöni inguimönii, ante pönëninque mönatö adomönaque Atëna iñömö ongonguënëmöna imönäpa, ante pönente wætamönäpa. ² Ayæ Timoteo nê mönö tönïñacä ingante minitö weca ante da pönömöna pongantapa. Tömengä iñömö Wængongui tönö godongämæ cædongä iñongante Itota mönö Codito ingantedö ante mönö watapæ apænedö ante ëñencädänimpa, ante odömonte apænedongä ingampa. Tömengä minitö iminite, Mini wede pönëno ante tæi ongonte quëwëedäni, ante ayæ, Wampo pönëninque tæi piñænte cädäni, ante ædæmö apænecæcäimpa, ante mönatö tömengä ingante da pönömöna pongantapa. ³ Wädäni minitö iminite quiëmë cädäni caate wæmini incæte tömämöni wädö pönënamäi inte ñimpo cädämaï incæminimpa, ante

cædinque Tímoteo ingante da pönömöna pongantapa. Mönö imonte cöwë mänömaï cædäni caate wæquënëmö imompa, ante mīnitö do edonque pōni ēñēmīnīpa. ⁴ Ayæ mīnitö weca möni quëwëñedë mōnitö mīnitö imīnite apænedinque,

Mönö imonte quiëmë bai togænte pan-guīnānidö anguënë, ante wæætë wæætë apænetamōnīpa. Edæ mīnitö ēñënö bai mänīnö do batimpa. ⁵ Mänömaï beyæ botö, Ædö cæte godömenque wänö cōmo inguīmoo, ante, Mini wede pōnënö æbänö impa, ante botö ēñencæboimpa, ante Tímoteo ingante da pönömo pongantapa. Wënæ awënë, Oda cæe, ante nē ānewēnongā iñömö mīnitö imīnite, Oda cædāni, angā ēñēninque mīnitö wabänö ēñēmīnīpa, ante botö ancai guīñente wætabopa. Mänömaï ēñente cæmīni īninque mōnitö cædinö wo ewente babaimpa, ante pōnentabopa.

⁶ Incæte Tímoteo mīnitö weca quëwëninque ñöwoque mōnitö weca ocæ emænte pongantapa. Mini wede pōnënö ante apænedinque tōmengä, Wede pōnēnānīpa, angantapa. Ayæ, Nē waadete pōnēnāni īnānīpa, ante apæneçä ēñentamōnāpa. Mīnitö mōnatö beyæ cöwë waa pōnēmīni imīnīpa, ante tōmengä apæneçä ēñentamōnāpa. Ayæ mōnatö mīnitö imīnite aīnēmōna inte wæmōna bai mīnitö adobai mōnatö imōnate aīnēmīni inte wæmīni imīnīpa, angantapa. ⁷ Mänömaï beyæ mōnitö tōniñamīni ēñēedāni. Quiëmë beyæ wæmōna incæ ayæ mōnatö imōnate togænte pānāni wæwëmōna incæte mōnatö mīni wede pōnënö beyænque wæætë wampo pōnente batamōnāpa. ⁸ Mīnitö mönö Awënë ingante ñimpo cædāmaï pōnēmīni beyænque mōnatö ñöwo wampo pōnente bai quëwëmōna imōnāpa. ⁹ Mōnatö mönö Mæmpo Wængonguī weca ongōninque mīnitö beyæ nanguī watapæ tomōna inte wæætë apænemōnāpa. Incæte mīnitö beyæ ante Wængonguī ingante ædö cæte waa ate pōnente eyepæ apænequīmōnaa. ¹⁰ Mīnitö mīni wede pōnënö ante æbänö ayæ wīi eyepæ pōnēmīni, ante wæmōnīpa. Īninque, Mīnitö imīnite wæætë adinque mōnitö odömōnte apænemōni ēñēninque mīnitö eyepæ pōnencæmīnīpa, ante cædinque

mōnitö woyowotæ itædë Wængonguī ingante nö nanguī pōni apænemōni imōnīpa.

¹¹ Wængonguī mönö Mæmpo incæ mönö Awënë Itota Codito tönö möni goquīnö ante tōinö pīnonte bai cæda ate mīnitö weca gocæmōnīpa. ¹² Mōnitö mīnitö imīnite godömenque waadete pōnēmōni bai mönö Awënë Itota pōnö cæçä ate mīnitö adobai mīnitö weca wacä ingä wacä ingä godömenque godömenque waadete pōnencæmīnīpa, ämōnīpa. Ayæ waodāni tōmānāni īnānite godömenque waadete pōnencæmīnīpa, ämōnīpa. ¹³ Tōmengä pōnö cæçä beyænque mīnitö tæimö entawente incæmīnīpa, ämōnīpa. Edæ mönö Awënë Itota quīnāni nē tæiyæ waëmö ewocadāni tōmānāni tōmengä tönö godongāmæ poncædānīpa. Tōmēnāni nāni pōñedë mīnitö iñömö Wængonguī mönö Mæmpo weca pōmīni adinque tōmengä ædö cæte, Wënæ wënæ cæmīni imīnīpa, ante anguīngää. Mīnitö tæiyæ waëmö ewocamīni incæmīnīpa, ämōnīpa.

4

Wængonguī waa acæçäimpa, ante mönö quëwënö ante

¹ Mōnitö tōniñamīni ēñēedāni. Adodeque ayæ apænequīmōni imōnīpa. Mīni quëwënö ante Wængonguī waa acæçäimpa, ante mōnitö, Īmaï quëwëedāni, ante do wææ odömōnte apænemōni ēñēmīnitawo. Īninque mīnitö Ao ante quëwënömīni imīnīpa. Ñöwo iñömö mōnitö Awënë Itota emōwo ante apænedinque mīnitö imīnite, Mänīnonque ante gomonga cæte quëwencæmīnīpa, ante ancaa apænemōnīpa.

² Awënë Itota nānö änö ante ēñente cædinque mōnitö mīnitö imīnite wææ āninque, Īmaï cædāni, antamōnīpa. Mänīnö möni wææ ante odömōnte apænedö ante mīnitö do ēñēnīmīnīpa. ³ Wængonguī nānö änö iñömö Īmaï impa. Mīnitö iñömö tæiyæ waëmö ewocate quëwenguënēmīni imīnīpa. Wacä nānōogæ ingante godö towente cædāmaï inte edæ ononque mīni nānōogænque quëwenguënēmīni imīnīpa. ⁴ Onguīñæmīni tōmāmīni iñömö, Botö moncæboimpa, ante cædinque mīnitö, Æbänö cæte nānōogæ æmo ate Wængonguī

tönö waodäni waa aquinäni, ante eñenguēnēmini iminipa. Minitö, Tæiyæ waemö ewocadinque ængæimpa, ante eñenguēnēmini iminipa. ⁵ Wīi wadäni bai, Wængongui ingante æbänö ingaingä ingää, ante eñenāmai inäni bai onquiyænque ante nāni towēnonque ante pönēnāmai quēwencæminipa. ⁶ Mäninö ante nē pönengä iñömö, Botö tönifacä nänöogængä ingampa, ante pönēninque tömengä nänöogæ ingante towente cädāmai inique tömengä ingante wēnæ wēnæ cädāmai incæcäimpa.

Īimai wēnæ wēnæ cädäni inänite Awēnē Itota pancæcäimpa. Wēēnēhedē mäninö ante minitö iminite apænedinque do wææ angamönipa. ⁷ Edæ Wængongui mönö imonte wīi, Towencæminipa, ante apænte ængacäimpa. Wæætē, Minitö tæiyæ waemö ewocate quēwencæminipa, ante tömengä mönö imonte apænte ængacäimpa. ⁸ Mänömai beyæ æcänö mäninö ante Pabodo nänö, Īimai cædäni, ante nänö wææ odömonte apænedö eñēninque Baa äna iñömö tömengä wīi waodänique inänite eñenāmai inte Baa angä ingampa. Wæætē Wængongui minitö iminite nänö Tæiyæ Waemö Önöwoca nē pönongä ingante eñenāmai inte Baa angä apa quēwēminii.

⁹ Mini pönencabo mini tönifadäni iñönänite mini waadete pönēnö ante mönitö quinänte yewæmonguimönii. Edæ minitö tömēmini iminite, Wacä ingä wacä ingä waadete pönencæminipa, ante Wængongui odömonte apæneçä eñēmīnitapa töö. ¹⁰ Nö impa. Mäatedöniabæ tömämæ iñömö mönö pönencabo mönö tönifadäni tömänäni inänite do waadete pönēmini iminipa. Incæte möni tönifamini, Minitö mäninö ante gomonga cæte quēwencæminipa, ante anca apænemönipa. ¹¹ Minitö piyænē cæte quēwencæminipa. Wadäni, Æbänö cæquēnēnāni inänii, ante cōwē änāmai incæminipa. Ayæ, Wæntæye ināmai inte mini önompoca cæte quēwencæminipa. Mäninö do möni apænedö bai minitö, Cæinēmönipa, ante cæcæminipa, ämönipa. ¹² Mänömai cæmini bai iimö iñö iimö iñö mini quēwēnö adinque wadäni nē pönēnāmai inäni

wæætē minitö iminite waa acædänimpa. Ayæ adobai minitö waodäni inänite, Pönömini æncæmönimpa, ante änewēnāmai quēwencæminipa.

Mönö Awēnē Itota nänö ocæ emænte ponguionæ

¹³ Mönitö tönifamini eñēedäni. Nē æmæwo wængainäni iñömö æbänö baquinäni, ante minitö eñencæminipa, ante yewæmömönipa. Wadäni, Mönö ñäni ömæmongæimpa, ante pönēnāmai inäni inte wæwēnāni bai minitö wīi adobai wæwēmini incæminipa, ante yewæmömönipa. ¹⁴ Itota æmæwo wæningä incæ ñäni ömæmonte inongäimpa, ante pönēmö imompä. Itota ingante pönente nē wængainäni iñönänite Wængongui iñömö mäninäni inänite Itota tönö tömengä weca ænte mämongä poncædänimpa, ante adobai pönēmompä.

¹⁵ Wængongui nänö apænedö bai mönitö Īimai ante minitö iminite apænemönipa. Awēnē Itota nänö ponguionæ mönö nē müimö quēwēmö inte ayæ ongömö iñömö mönö wīi täno tömengä weca gocæmöimpa. Wæætē tömengä ingante pönēninque nē æmæwo wængainäni inte mäninäni iñömö täno goquinänidö anguēnē. ¹⁶ Edæ mönö Awēnē Wængongui nänö wææ änonque ante yedæ añongä Wængongui anquedoidi tæiyæ awēnē aa pecæcäimpa. Wængongui todompeta nāni ancadeca adocanque we we öoncæ cæyongä mönö Awēnē Codito incæ öönæde quēwente pö wææncæcäimpa. Pö wææñongä tömengä ingante nē pönente wængainäni tömēnāni täno ñäni ömæmoncædänimpa. ¹⁷ Ayæ ate Wængongui cæcä beyænque mönö nē müimö quēwēmö inte ayæ ongömö iñömö mönö tömēnāni tönö godongämæ boguimancodē æicæmöimpa. Boguimancodē æidique mönö Awēnē öönæde inö wææ pönongante mönö tömengä ingante bee tencæmöimpa. Inique cōwē Awēnē weca quēwencæmöimpa. ¹⁸ Mänömai beyæ, Mönö Awēnē Codito incæ öönæde quēwente pö wææncæcäimpa, ante pönēninque wampo pönencædänimpa, ante cædinque minitö wacä ingä wacä ingä ædæmö apæneedäni.

5

1 Nöwo mōnitō tōniñamīni eñēedāni. Æōnædō māniī baquīi, ante mīnitō imīnite ædō cæte yewæmōnguimōnii. 2 Edæ mōnō Awēnē Itota nānō ponguīōnæ iñōmō nē awēmō ængā woyowotæ iñontobæ pō guicā bai iñontobæ baquīnō anguēnē, ante mīnitō tōmēmīni waa eñēmīnīpa edæ. 3 Waodāni, Mōnō piyænē cæte guīñēnāmaī quēwēmōmpa, ante nāni tedeyedē ēnengā iñontobæ wēñæ nantate wæcā bai tōmēnāni adobai iñontobæ nāni ōmæ ewenguīnō baquīnō anguēnē. Inique ædō cæte wodii winonguīnāni.

4 Incæte mīnitō mōnitō tōniñamīni eñēedāni. Māniōnæ nāni wæwente eōnæ nē awēmō ænongā pō guicā bai iñontobæ inique bayonte mīnitō wīi wēmō iñōmō quēwēmīni inte guīñēnāmaī incæmīnīpa. 5 Mīnitō Wængonguī wēñæmīni imīni inique ñāō iñōmō tōmāmīni quēwēmīni imīnīpa. Mōnō cōwē wentamō iñōmō cædōnāni bai wīi imōimpa. 6 Mānōmaī beyæ mōnō wīi wadāni mō ñōnāni bai mongæimpa. Wæætē mōnō ñāni ōmæmōnīnque nāmā wææ ante quēwēmō ingæimpa. 7 Edæ tōmēnāni nē mōnāni iñōmō woyowotæ mōnāni inānīpa. Ayæ wadāni tī nāmæ bedīnque nē quidi quidi dowænte ināni iñōmō woyowotæ bete badānīpa. 8 Incæte mōnō ñāō iñōmō cægōmō inte nāmā wææ ante quēwēmō ingæimpa. Tæīneta wææ wēñate bai cædinque Itota ingante mōnō wede pōnēnō ante mōnō waadete pōnēnō ante mōnō entawente quēwengæimpa. Tæīneta ocabogata wææ encate bai cædinque mōnō edæ, Wængonguī ængā beyænque quēwencæmōimpa, ante pōnēnō ante mōnō ewocate quēwengæimpa. 9 Edæ Wængonguī nānō ænguī bate pīnguīmāmo ante tōmengā, Wīi wæwencæmīnīpa, ante mōnō imonte apænte ængacāimpa. Wæætē mōnō Awēnē Itota beyæ tōmengā mōnō imonte ængā beyænque quēwencæmōimpa. 10 Tōmengā, Botō tōnō quēwencæmīnīpa, ante mōnō beyæ wængacāimpa. Inique mīi imō incæ wænte imō incæ mōnō cōwē tōmengā weca quēwencæmōimpa. 11 Mānōmaī beyæ mīnitō iñōmō do cæmīni bai gomonga cædāni. Wampo pōnencædānīpa, ante cædinque mīnitō wacā ingā wacā ingā

ædæmō apænedīnque, Æmæwo pægāimīni inte tæi pīñænte cædāni, ante odōmonte apæneedāni.

Mōnō tōniñadāni inānite Pabodo nānō ānō

12 Nöwo mōnitō tōniñamīni eñēedāni. Mīnitō imīnite iīmaī apænemōnīpa. Mīnitō weca nē nanguī odōmonte apænedāni iñōnānite mīnitō tōmēnāni inānite waa acæmīnīpa, amōnīpa. Edæ Awēnē Itota apænte nānō ænīnāni inte tōmēnāni, Mīnitō iīmaī waa quēwēedāni, ante mīnitō imīnite nē aadāni inānīpa. 13 Tōmēnāni nāni cædō beyænque mīnitō tōmēnāni inānite godōmenque nanguī waa amīni inte waadete pōnēedāni. Mīnitō wacā ingā wacā ingā piyænē cæte quēwēedāni.

14 Mōnitō tōniñamīni eñēedāni. Mīnitō imīnite iīmaī ante ancaa amōnīpa. Wæntæye ināni inānite wææ ante apæneedāni. Guīñente ināni wampo pōnencædānīpa, ante tōmēnāni inānite ædæmō apæneedāni. Æmæ pōnēnāni tōnō godongāmæ cædāni. Wadāni tōmānāni inānite mīnitō waadete ee cædāni amōnīpa.

15 Æcāmenque ingante wadāni wēnæ wēnæ cædāni adīnque mīnitō Baa amīni beyænque mānīnāni wæætedō wæætē nāemæ wēnæ wēnæ cædāmaī incædānīpa. Wæætē wacā ingā wacā ingā cōwē waa cæcæmōnīpa, ante pōnēnīnque cædāni. Ayæ wadāni tōmānāni inānite adobai cædāni.

16 Mīnitō cōwē watapæ tote quēwēedāni. 17 Wængonguī ingante woyowotæ itædē apænete quēwēedāni. 18 Mīni quēwenganca quīēmē bai ba incæte mīnitō cōwē Wængonguī ingante waa ate pōnēnīnque apæneedāni. Edæ Itota Codito nempo nē quēwēmīni inte mānīnō ante mīnitō beyæ ante Wængonguī nānō ānō impa.

19 Wængonguī Ōnōwoca nānō cæīnō adīnque mīnitō tōmengā ingante ædō cæte, Cædāmaī iē, ante wææ anguīmīnīi. 20 Wængonguī beyæ nē apænedāni nāni apænedō eñēnīnque mīnitō badete todāmaī quēwēedāni. 21 Wæætē waodāni nāni apænedō tōmānō ante eñēnīnque, Æbānō i, ante edonque eñengæimpa, ante cædinque mīnitō, Nō nāni ānō i, Babæ nāni ānō i, ante pōnēnīnque do eñencæmīnīpa. Waa ānō impa, ante eñēnīnque mīnitō mānīnō ante

ö ænte bai quëwëedäni. ²² Quiëmë wënæ wënæ cæquii, ante adinque mīnitō Baa ante gomō aedäni.

²³ Wængonguī incæ nē piyænē cædongä inte pönō cæcä beyænque ædæmō tæiyæ waëmō entawëmīni incæmīnimpa. Awënë Itota mōnō Codito tōmengä nänō ponguinganca mīnitō iñömō Wængonguī pönō cæcä ate mīnitō mīmō incæ önōwoca incæ baonga incæ wënæ wënæ cædāmai incæmīnimpa. ²⁴ Wængonguī nänō nē apænte ænimīni iñōmīnite tōmengä mīnitō imīnite cōwë pönëninque tōmengä nänō änō bai ædæmō cæcæcäimpa.

Pabodo, Waa quëwencæmīnimpa, angampa

²⁵ Mōnitō tōniñamīni iñömō ëñëedäni. Mīnitō mōnitō beyæ ante Wængonguī ingante apæneedäni. ²⁶ Mīnitō pönencabo iñōmīnite mōnitō tōmämīni waa quëwencæmīnimpa, ante waadete pönëninque ämönipa. ²⁷ Edæ Awënë Itota ëñëñongä botō mīnitō imīnite wææ ante, ïi yewæmōinta adinque mīnitō mīni pönencabo iñōmīnite adocanque ingante ämīni tōmānāni ëñëñönāni tōmengä adotaa adinque apænecä ëñencædānimpa, ämopa. ²⁸ Awënë Itota mōnō Codito mīnitō imīnite waadete pönō cæcæcäimpa, ante botō mäninque ante yewæmōmopa.

2 Tetadönitenteidi inänite Pabodo cadota ante ayænta nänö yewæmongainta

Pabodo, Waa quëwëedäni, ante apæncamp

¹ Botö Pabodobo inömo imopa. Mönö töninada Tidibänö tönö Timoteo tönö godongämæ apænete ate yewæmömo aedäni. Tetadönica iñömö quëwëmini inte Codito ingante godongämæ mini pönencabo inömini inte ëñëedäni. Minitö mönö Mæmpo Wængongui nempo ayæ mönö Awënë Itota Codito nempo quëwëmini iminipa. ² Mönö Mæmpo Wængongui tönö mönö Awënë Itota Codito waadete pönö cæda ate minitö gänë entawencæminipa, ante yewæmömönipa.

Itota Codito pongä ate Wængongui apænte pancæcäimpa

³ Mönitö töninamini ëñëedäni. Mini wede pönönö godömenque pæte bai impa, ante ayæ tömämöni wacä ingä wacä ingä mini waadete pönönö waa pönö pæte bai iminipa. Mänömai beyæ mönitö minitö beyæ ante Wængongui ingante cöwë waa ate pönëninge apænequënemöni imönipa. ⁴ Wadäni minitö iminite quiëmë togæwëninge wënæ wënæ cædäni caate wæmini incæ quiëmë beyæ wæwëmini incæ minitö wæntæye inämai inte ee cæminipa. Mänömai beyæ Wængongui ingante godongämæ nani pönencabo wayömö wayömö quëwëñönänite mönitö incæ mini cæinö ante waa adingue cöwë apænemönipa. Ayæ mini wede pönönö ante cöwë apænemönipa. ⁵ Mäninö ante beyæ Wængongui apænte nänö panguinö ante, Tömengä cöwë nö panguingänö angüenë, ante do ëñëmompä. Mänömai beyæ minitö Wængongui Awënë Odeye nempo guicæte ante eyepæ waa pönö bacæminipa. Minitö do mäninö Wængongui nempo mini öönæde quëwënguinö beyæ wæwente quëwëminipa.

⁶ Wængongui nê nö cædongä ingampa. Edæ wadäni minitö iminite wënæ wënæ cædäni ate wæwëmini iñömini tömengä wæætë tömënäni inänite wënæ wënæ cæcä ate wæwencædänimpa. ⁷ Ayæ minitö nê wæwëmini iñöminite pönö cædinge

tömengä mönitö imönite adobai pönö cæcä ate tömämö mönö wæwënamai baquimö imompä.

Mönö Awënë Itota tönö tömengä anquedoidi nê tæi piñænte cædäni tönö öönæde ongonte pö gonga bæcote bai godongämæ wæëñönäni tömämö ayömö mänömai bacæimpa. ⁸ Mönö Awënë Itota ingantedö ante mönö watapæ apænedö ante nê ëñënamai cædäni iñömö, Wængongui æbänö ingaingä ingää, ante ëñënamai inäni iñönänite tömengä mäninäni inänite pante cæcæcäimpa. ⁹ Wængongui adodäni inänite päninge æmæwo wo ewencæcäimpa. Tömënäni iñömö Awënë Itota weca tömengä nänö tæi piñæmämö waëmö pönö nänö emöñömö mäninö pö guidämai incædänimpa, ante Wængongui wææ cæcæcäimpa. ¹⁰ Awënë Itota nänö ponguionæ Wængongui mänömai cæcæcäimpa. Mänionæ Itota quinäni iñömö nê tæiyæ waëmö ewocate quëwënanäni inte tömengä ingante waa acædänimpa, ante poncæcäimpa. Ayæ tömengä nê pönënanäni weca pönongante tömënäni tömänäni, Tömengä waa pönö cæcä amönipa, ante watapæ ancædänimpa, ante cæcæte ante poncæcäimpa. Ayæ minitö adobai mönitö apænedö ante ëñëninge pönëmini inte tömengä quimäni iñömö mönitö tönö adobai cæcæminimpa, ante cæcæte ante poncæcäimpa.

¹¹ Mänömai beyæ mönitö minitö beyæ ante woyowotæ itæde Wængongui ingante apænemönipa. Wængongui, Mini quëwënguino ante quëwencæminimpa, ante minitö iminite apænte ængä iningue mönitö, Minitö eyepæ waa pönö bacæminimpa, ante mönö Mæmpo Wængongui ingante apænemönipa. Minitö, Mönitö waa cæcæmönimpa, ante mini änö bai tömänö ante Wængongui nänö tæi piñæmämö inte iingue cæcæcäimpa, ante apænemönipa. Ayæ mini wede pönönö beyæ minitö cæquinö tömänö ante tömengä adobai iingue cæcæcäimpa. ¹² Mönö Awënë Itota pönö cæcä beyænque minitö waa pönö cæmini adingue wadäni tömengä emöwo ante waa ate apænecædänimpa. Ayæ tömengä mänömai cæcä beyænque wadäni, Minitö waa quëwëmini iminipa,

ante mīnitō imīnite waa acædānimpa. Mōnō Mæmpo Wængonguī tōnō mōnō Awēnē Itota waadete pōnō cæda bai mānōmaī bacæimpa, ante mōnitō māninō ante Wængonguī ingante apænemōnipa.

2

Mōnō Awēnē Itota nānō ponguīōnæ æbānō baquī, ante

¹ Mōnitō tōniñamīni ēñēedāni. Mōnō Awēnē Itota Codito nānō ponguīnō ante āmōnipa. Ayæ tōmengā æbānō, Botō weca pōedāni, ante gæcā goquīmō imōmpa, ante apænedinque mīnitō imīnite iīmaī āmōnipa. ² Mīnitō weca quēwēnāni pancadāniya iñōmō, Mōnō Awēnē nānō ponguīōnæ do batimpa, ante ānāni ēñēinque mīnitō idiquibæ pōnēnāmaī bacæmīnimpa, āmōnipa. Edæ mōnitō Wængonguī beyæ nē apænemōni inte mōni apæneyedē incæ mōni odōmonte apæneyedē incæ mōni yewæmōintaa yewæmōñedē incæ æyedēmē incæ apænemōnipa, ante mānināni iñōmō mōnitō imōnitedō ante apænedinque, Pabodoidi māninō ante apænedāni inānipa, ante tededāni ēñēinque mīnitō guiñente wædāmaī iedāni āmōnipa. ³ Æcāmenque angā æbāmē nānō ānō ēñēinque mīnitō oda cæte godāmaī iedāni.

Edæ waodāni tæiyæñāni Wængonguī ingante Baa ante wadæ godāni ate wacā nē wiwa cæcā inte pongā acæimpa. Ayæ tōmengā pongā ate mōnō Awēnē nānō ponguīōnæ bacæimpa. Māningā nē wiwa cædongā iñōmō Wængonguī æmæwo nānō nē wo ewenguingā ingampa. ⁴ Æcāmenque ingante, Wængonguī ingampa, ante waodāni waa adinque ædæ wæænīnque apænedāni incæ ayæ quiēmē adinque, Wængonguī impa, ante waa adinque apænedāni incæ māningā nē wiwa cædongā iñōmō wængonguīidi nāni nē ānōnāni tōmānāni inānite Baa ānīnque nāmā ængō cæte bai cæcā inongampa. Wængonguī oncō tæiyæ waēmō oncōnē adocā pō guīite tæ contadinque, Botō tōmēmo wængonguīmo inōmo imōpa, angā ingampa.

⁵ Botō mīnitō weca quēwēñedē māninō ante mīnitō imīnite apænetabopa. Wīi ēñēmīnitawo. ⁶ Adocā nē wiwa cædongā

iñōmō Wængonguī nānō äōnæ māniōnæque edonque pongā acædānimpa. Iñinque quīnō beyæ ante māningā ayæ pōnāmaī ingāā, ante mīnitō ñōwo do ēñēmīnipa. ⁷ Adocā awēmō nānō wiwa cæpāmo incæ do ēñente cædāni inte waodāni tæiyæñāni quiēmē wiwa i, ante do cædānipa. Incæte tōmēnāni inānite, Wiwa cædāmaī iedāni, ante nē wææ cædongā iñōmō adodō ante godōmenque wææ cæcā ingampa. Nē wææ cæcā ingante guīquēnē wacā wæætē, Māninganca idæwaa, ānīnque ō ængā wadæ gocæcāimpa. ⁸ Māniñedē nē wiwa cædongā iñōmō edonque pongā acædānimpa. Incæte Awēnē Itota pōnīnque tōmengā nānō ōō guēmāmāmo inte māningā ingante wænongā wænguingā ingampa. Tōmengā ñāō apāite emōnongā inte pongā adinque nē wiwa cædongā guīquēnē æmæwo wo ewente bacæcāimpa. ⁹ Wiwa cædongā ingante Tatāna nānō tæi piñæmāmo inte da pōnongā ponguingā ingampa. Tōmengā nānō mā cæ bai quiēmē bamōnengæ cæcā adinque waodāni, Æbānō cæcāā, ante oda cæte gocædānimpa. ¹⁰ Ayæ quiēmē wēnæ wēnæ nānō cæpāmo beyæ nē æmæwo wo ewente baquināni iñōmō oda cæte godānipa. Edæ Wængonguī nāwangā nānō angāinō ante waadete pōnēnāmaī iñōnānite Wængonguī tōmēnāni inānite, Quēwencæmīnimpa, ante ædō cæte ænguingāā. Mānōmaī beyæ tōmēnāni æmæwo wo ewente bacædānimpa.

¹¹ Mānōmaī beyæ, Tōmēnāni nē wiwa cædongā wapiticæ nānō angāinō ante pōnencædānimpa, ante cædinque Wængonguī tæi piñænte cæcā beyænque tōmēnāni babæ ante pōnente oda cædānipa. ¹² Edæ Wængonguī nāwangā nānō angāinō ante nē pōnēnāmaī inīnāni inte wæætē, Mōnō wentamō mongæmāmo incæ waa impa, ante watapæ todīnāni iñōnānite Wængonguī mānināni tōmānāni inānite apænte ante pancæte ante mānōmaī cæcampa.

Wængonguī, Quēwencæmīnimpa, ante nē apænte ænināni

¹³ Mōnitō tōniñamīni mīnitō mōnō Awēnē Itota nānō nē waademīni inte ēñēedāni. Inguipoga badōnāmaī iñedē Wængonguī

mīnitō imīnite do, Quēwencæmīnīmpa, ante apænte ængacāīmpa, ante mōnitō mīnitō beyæ ante tōmengā ingante waa ate pōnēninque cōwē apænequēnēmōni imōnīpa. Tōmengā iñōmō, Botō Ōnōwoca pōnō cæcā ate tæiyæ waēmō ēwocamīni inte mīnitō nāwangā botō angainō ante pōnēmīni beyæ quēwencæmīnīmpa, ante mīnitō imīnite ængacāīmpa. ¹⁴ Itota ingantedō ante mōnitō watapæ apænedō beyæ Wængonguī, Quēwencæmīnīmpa, ante mīnitō imīnite apænte ængacāīmpa. Tōmengā, Awēnē Itota Codito ñāō nānō emōnō bai mīnitō adobai ñāō bai entawencæmīnīmpa, ante cædinque mīnitō imīnite apænte ængacāīmpa.

¹⁵ Mōnitō tōniñamīni eñēedāni. Mānōmai beyæ tæi ongonte quēwēedāni. Edæ mōnitō ōnōne inte tedemōni eñēnimīni incæ yewæmōinta yewæmōmōni adinque eñēnimīni incæ mīnitō mōnitō odōmonte apænedīnō ante ñimpo cædāmai quēwēedāni. ¹⁶ Mōnō Mæmpo Wængonguī mōnō imonte nē waadecā inte pōnō ædæmō cæcā ate mōnō, Tōmengā weca cōwē quēwenguīmō imōmpa, ante pōnēninque wampo pōnēmō inte quēwēmōmpa. Ayæ, Waa bacæīmpa, ante mōnō pōnēmōmpa. Īnīnque tōmengā tōnō mōnō Awēnē Itota Codito, Īmai cæcædaīmpa, ante amōnīpa. ¹⁷ Tōmēna ædæmō apænedā beyænque mīnitō wampo pōnēninque tæi ongonte quēwencæmīnīmpa. Ayæ tōmēna cæda beyænque mīnitō æmæwo pægaimīni inte tōmāā mīni waa cædō ante mīni waa anō ante tæi piñænte cæcæmīnīmpa.

3

Mīnitō mōnitō beyæ ante Wængonguī ingante apæneedāni

¹ Adodeque ante ĩnque yewæmōmōnīpa. Mōnitō tōniñamīni eñēedāni. Mīnitō mōnitō beyæ ante Wængonguī ingante ĩmai apæneedāni. Mōnitō wayōmō wayōmō gote mōni apæneyōmō mōnō Awēnē nānō angainō ante nanguī ināni quingæ eñencædānīmpa, ante apæneedāni. Ayæ, Mīnitō bai wadāni adobai ĩ anō ante Wængonguī ingante waa ate pōnēninque æncædānīmpa, ante mānīnō ante Wængonguī ingante apæneedāni.

² Wadāni nē wēnæ wēnæ cædāni inte wīwa cædāni iñōmō tōmēnāni mōnitō imōnite wēnæ wēnæ cædāmai, ante mānīi beyæ ante mīnitō adobai Wængonguī ingante apæneedāni. Edæ wīi waodāni tōmānāni pōnēnāni inānīpa.

³ Incæte mōnō Awēnē cōwē ædæmō aacā ĩnongā ingampa. Tōmengā pōnō cæcā ate mīnitō æmæwo pægaimīni inte tæi piñænte cæcæmīnīmpa. Ayæ, Tatāna mīnitō imīnite wēnæ wēnæ cædāmai incæcāīmpa, ante Wængonguī adobai aacā incæcāīmpa.

⁴ Mīnitō imīnite mōni wææ anō ante eñēninque do cæmīni incæ godōmenque adodō cæcæmīnīmpa, ante Wængonguī pōnō cæcæcāīmpa, ante mōnitō do pōnēmōnīpa.

⁵ Wængonguī nānō waadete pōnēnō ante eñencæmīnīmpa, ante mōnō Awēnē taadō eñente odōmonte bai pōnō odōmongā ate mīnitō mīmōnē eñencæmīnīmpa. Itota Codito pōnō cæcā beyænque mīnitō wæntæye ināmai inte ee cæcæmīnīmpa.

Cæcæte ante mōnō cæquēnēnō

⁶ Mōnitō tōniñamīni eñēedāni. Mōnitō mōnō Awēnē Itota Codito emōwo ante mīnitō imīnite wææ amōnīpa. Mōnō tōniñadāni pancadāniya wæntæye ināni adinque ayæ mōni odōmonte apænedō mīni eñente ænīnō bai quēwēnāmai ināni adinque mīnitō iñōmō mānīnāni tōmānāni inānite gomō aedāni.

⁷ Mōnitō cægai bai mīnitō æbānō adobai cæquēnēmīni imīnīpa, ante edæ tōmēmīni do eñēmīnīpa. Mōnitō mīnitō weca quēwēñedē wæntæye ināmai quēwentamōnīpa. ⁸ Ayæ adobai æcāmenque cænguī ante nāni pōnōni ænīnque mōnitō ōnonque ænāmai inte wæætē paga cæte cæntamōnīpa. Ayæ, Mīnitō cængūnque ante pōnēninque wædāmai incæmīnīmpa, ante mōnitō, Tōmēmōni cænguī cæncæmōnīmpa, ante woyowotæ itædē nanguī cædinque quēwentamōnīpa.

⁹ Mōnitō mīnitō imīnite, Mōni quēwengæīmpa, ante, Cænguī tōnō mōnitō owoquincō pōnōmīni æncæmōnīmpa, ante anāmai intamōnīpa. Mōnitō mānōmai ante bai waa incædōnīmpa. Wæætē æbānō mōnitō cætamōnīi, ante adinque mīnitō adobai cæcæmīnīmpa, ante cætamōnīpa. ¹⁰ Edæ mōni mīnitō weca quēwēñedē incæ mōnitō mīnitō imīnite,

Īimaī cæedāni, ante wææ antamönipa. Adocanque nē mönō cæquēnēnō ante, Wīī cæinēmo, angā ĩñongante mīnitō tōmengā ingante cænguī godōnāmaī inguēnēmīni ĩmīnīpa.

¹¹ Mīnitō weca pancadāniya ōnonque cædāmaī a ongonte quēwēnāni ĩnānīpa, ante ānāni ēñēmönīpa. Adodāni nē Baa ānīnque cædāmaī ĩnāni inte wæætē, Wadāni æbānō quēwēnānīi, ante godō wæntæ godō wæntæ tededāni ĩnānīpa. ¹² Mōnitō mānīnāni ĩnānīte mönō Awēnē Itota Codito ēmōwo ānīnque, Mīnitō ĩmō ĩñō ĩmō ĩñō nangūī cæte quēwēedāni, ante wææ āmönīpa. Tōmēmīni cæte beyænque mīnitō cænguī ænte cæncæmīnīpa, ante ancaa apænemōni ĩmönīpa.

¹³ Mōnitō tōnīñamīni mīnitō guiquēnē, Quiēmē waa ĩmpa, ante wæntædāmaī inte cōwē cæedāni. ¹⁴ Mōnitō mīnitō ĩmīnīte ĩi yewæmōintaa möni yewæmongainō ate adocanque ēñēnāmaī cæcā ĩnīnque, Tōmengā æcānō ingāā, ante aedāni. Ayæ tōmengā guingo ĩmonte wæcæcāĩmpa, ante tōmengā ingante gomō aedāni. ¹⁵ Mīnitō adocā ingante, Wīī wacā ĩngampa, ante pōnēnīnque wæætē tōmēmīni biwīidi ĩnānīte ante baī tōmengā ingante wææ āmīni ēñencæcāĩmpa.

Waa quēwencæmīnīpa, ante Pabodo angampa

¹⁶ Mōnō Awēnē Itota nē piyænē cædongā incæ tōmengā pōnō cæcā ate mīnitō æbāmenque bamīni incæ cōwē piyænē cæte quēwencæmīnīpa. Mōnō Awēnē mīnitō tōmāmīni weca a ongoncæcāĩmpa, āmopa. ¹⁷ Botō Pabodobo ñōwo tōmēmo ōnompoca yewæmōnīnque, Mīnitō ĩmīnīte waa pōnēmopa, ante yewæmōmo aedāni. Pabodo nānō yewæmōinta ĩmpa, ante ēñencæmīnīpa, ante cædīnque botō tōmanta yewæmōnīnque mānōmaī baī yewæmōmopa. ¹⁸ Mōnō Awēnē Itota Codito mīnitō ĩmīnīte waadete pōnō cæcæcāĩmpa, ante botō mānīnque ante yewæmōmopa.

1 Timoteo ingante Pabodo cadota ante tänota nänö yewæmongainta

Timoteo ingante Pabodyewæmongampa

¹ Botö Pabodobo inömo imopa. Itota Codito nänö nē da godongaïmo imopa. Itota Codito waa pönī nänö inö bai mönō adobaï bacæmöimpa, ante pönēmompā. İinque Itota Codito mönō nē pönēnongä tönō Wængonguï mönō imonte nē Ængaingä tönō botö imote äna eññēmote da godöna godïmo imopa. ² Timoteo eññemi, Bitö acæbiimpa, ante bitö imite yewæmömopa. Edæ mönō wede pönēnō ante apænebo nē eññimi inte bitö Itota Codito quïmi badinque näwä botö wēmi bai inömi imipa. İinque botö, Mæmpo Wængonguï tönō Awēnē Itota mönō Codito tönō bitö imite waadete pönō waa cæda ate bitö gänē entawencæbiimpa, ämopa.

Wadäni wapiticæ nāni odömonte apænedö

³ Botö Mäatedöniabæ inömo pöninque bitö imite, Epeto inömo ee ongöe, nanguï antabopa. Mäniñömö wadäni babæ wapiticæ nāni odömonte apænedö ante nē odömonte apænedönāni inänite bitö, Minitö godömenque mäninö ante odömonte apænedämaï iedäni, ante ämi eññecædänimpa. Mänömainö ante do botö äninö bai nōwo adodö ante bitö imite ämopa. ⁴ Ayæ, Dodäni önonque ante nāni tedegainö ante pönēnāmaï quēwēdäni, ante bitö ancæbiimpa. Ayæ adobaï tömēnāni wæmæidi tæiyænāni ante pönēninqe, Æmönänidö ingaināni, ante ancaa änewēñönāni bitö tömēnāni inänite, Minitö mäninö ante pönēnāmaï iedäni, ancæbiimpa. Edæ mäninö nāni tedewēnō beyæ tömēnāni, Æbänö i, ante nanguï wæætedö wæætē änewēnānipa töö. Wæætē edæ, Wængonguï nänö cædö ante wede pönēninqe mönō cæquēnēnō guiquēnē tömēnāni nāni tedewēnō beyæ pönömenque cætimpā.

⁵ Mänömainö ante äninque botö, Tömēnāni mīmō iïmaï entawēninqe waadete

pönencædänimpa, ante ämopa. Edæ mīmō waemö pönī entawēninqe tömēnāni Wængonguï ingante wede nāni pönēnō beyæ waadete pönencædänimpa. Ayæ adobaï nämä apænte adinque wentamö mongænāmaï entawēnāni inte tömēnāni waadete pönencædänimpa. ⁶ İñæmpa pancadāniya mäninö ante eññēninqe Baa ante ñimpo cæte wadæ godinque önonque ante quēwēnānipa. ⁷ Möitee wodi nänö wææ yewæmongainö ante odömonte apæneinēmönipa, ante nē änāni incæ tömēnāni nāni odömonte apæneyedē quinö apænedāni, ante eññēnāmaï inänipa töö. Adobaï quïemē ante apænedinque tömēnāni, İïmaï impa, iïmaï impa, ante apænedāni incæte eññēnāmaï ināni inte apænedänipa.

⁸ Möitee wodi nänö wææ yewæmongainö ante adinque nöingä cæmō ininque mäninö tömengä nänö wææ angainö inömo waa ante imaimpa, ante do eññēmompā. ⁹ Möitee wodi nänö wææ yewæmongainö ante Wængonguï wii nē nö cædäni beyæ pönö wææ angacäimpa. Wæætē nē eññēnāmaï cædäni tönö wadäni mäninö ante eññēnāni incæ nē godömenque wēnæ wēnæ cædäni tönö tömēnāni beyæ pönö wææ angacäimpa, ante do eññēmompā. Ayæ adobaï Wængonguï ingante Baa ante nē quēwēnāni tönö wēnæ wēnæ cædäni beyæ wææ angatimpā. Nē tæiyæ waemö entawēnāmaï inönāni beyæ ayæ adobaï Wængonguï ingante nē badete todönāni beyæ wææ angatimpā. Mæmpocä ingante wäänä inante nē wænönāni beyæ ayæ adobaï waocä ingante nē piinte wænönāni beyæ wææ angatimpā. ¹⁰ Nänöogængä ināmaï inöngante nē towēnāni beyæ ayæ adobaï onguinænāni nāna onguinæncaya guëa towēnāni beyæ wææ angatimpā. Nē cæte quēwengä bacæcäimpa, ante waocä ingante nē godonte ænāni beyæ ayæ adobaï nē babæ änāni beyæ wææ angatimpā. Wadäni inänite, Nö ämönipa eññēdäni, ante nē babæ änewēnāni beyæ ayæ adobaï nö odömonte apænedö incæ nē wadö ante cædäni beyæ wææ angatimpā. Mänināni tömānāni eññecædänimpa, ante Wængonguï mäninö ante pönö wææ angacäimpa, ante

ēñēmompa.

¹¹ Edæ Wængongui ñäo apäite emongampa, ante odömönte apænecæbiimpa, ante tömengä nē waa inongä inte edæ tömengä watapæ nänö apænedö ante pönongä æntabopa. Ayæ nō nänö odömönte apænedö ante Wængongui nänö pönö angainö ante adodö änö impa.

Wængongui waadete nänö pönö cædö ante

¹² Itota Codito mönö Awënë pönö cæcä beyænque botö tæi ewocabo batatabopa. Tömengä iñömö botö imote waa adinque, Bitö nē pönemi inte cöwē ædæmö cæbi imipa. Inique bitö botö beyæ wadäni inänite nē cæbi bacæbiimpa, ante pönö cægacäimpa. Mänömaï beyæ botö tömengä ingante waa ate pönente apænebopa.

¹³ Botö wëenëñedë Itota Codito ingante nē godö babæ ante anewengäimo imopa. Tömengä ingante nē pönëñäni inänite wënæ wënæ cæquimo, ante nē togænömo inte botö nē püinte quëwengäimo imopa. Incæte botö nē pönëñämaï inömo inte, Quinö cæquii, ante eñëñämaï inte cæbo adinque Wængongui, Quëwencæbiimpa, ante pönö waadete waa cægacäimpa. ¹⁴ Mönö Awënë botö imo nanguï waadete pönö cæcä adinque botö Itota Codito nempo quëwëninque nē wede pönëmo badinque nē waadete pönëmo bagaboimpa.

¹⁵ Iïmaï ante nō pönï nänï änö näwangä ante impa, ante ämo eñëmaïminipa. Itota Codito iñömö, Wënæ wënæ cæmïni iminite æmo beyænque quëwenguïmini, ante inguipoga wææ pongacäimpa. Tömengä mänömaï cæcä incæte wadäni wënæ wënæ cædäni iñönäni botö tömëmoque godömenque wënæ wënæ nē cægäimo imopa. ¹⁶ Mänömaï beyænque tömëmoque godömenque wënæ wënæ cægäimo iñömöte Itota Codito pönö waadete angä beyænque quëwengaboimpa. Wëenëñedë botö bai nē wënæ wënæ cægäinäni inänite adinque Itota Codito, Botö weca cöwē wantæpiyæ nänï quëwënguinque pancadäniya botö imote pönënguinäni inänipa, ante do eñengacäimpa. Inique tömengä, Botö nē waadete cædinque ee abo imopa, ante tömëñäni inänite odömoncæte ante cædinque tömengä botö

Pabodobo imote mänömaï pönö waadete waa cægacäimpa.

¹⁷ Mönö Wængongui iñömö cöwē wënämaï nē quëwengäingä inongä inte tömengä iincayæ ate adobai cöwē wënämaï inte Awënë Odeye inongä ingampa. Tömengä awëmö iñömö quëwënongä iñongante mönö waocabo tömengä ingante ædö cæte aquii. Tömengä wæætë tömäa nē eñengäingä inongä ingampa. Inique tömengä adocanque Wængongui inongä iñongante mönö tömengä ingante cöwē waa aquimö anguënë. Tömengä ingante, Bitö ñäo bai emömi inömi imipa, ante apænedinque mönö ñine cædämaï inte cöwē watapæ angäimpa. Cöwē iïmaï babaiimpa, ante Amëe, ämopa.

¹⁸ Timoteo, botö wëmi eñëmi. Nē pönëñäni wëenëñedë Wængongui beyæ apænedinque bitö imitedö ante nänï angainö bai adobainö ante apænedinque botö iïmaï ämopa. Edæ tömëñäni nänï angainö ante eñente cædinque bitö tontadoidi nänï cæbai adobai bitö cæquënëno ante guiñëñämaï inte wæætë tæi ewocate nanguï cæcæbiimpa. ¹⁹ Wængongui ingante cöwē wede pönente incæbiimpa. Adobai mimö entawëmi inte nämä apænte pönëninque wentamö mongëñämaï inte bitö cöwē quëwencæbiimpa. Edæ mini pönencabo iñöminite pancadäniya nämä apænte änämaï inänï inte Codito ingante nänï pönëñinö ante dobæ ñimpo cæte wadæ godänimpa. ²⁰ Iïmëneo tönö Adecantodo adobai Wængongui ingante ñimpo cædinque wadæ godatapa. Inique, Tömëna, Wængongui ingante mönö wënæ wënæ ante babæ änämaï ingäimpa, ante eñencædäimpa, ante cædinque tömëna inate Tatäna nempo pædæ godontabopa.

2

Wængongui ingante mönö iïmaï apænecæcäimpa

¹ Mini pönencabo iñöminite botö täno iïmaï ämopa. Wængongui ingante mini apæneyedë quiëmë mini æinënö ante apænecæminimpa. Tömengä ingante waa ate pönente apænedinque waodäni tömëñäni beyæ ante apænecæminimpa ämopa. ² Awënë odeyeidi incæ pönömenque

awënëidi tōmānāni incæ mōnō imonte waa aayōnāni mōnō piyænē cæte quëwengæimpa, ante cædinque mīnitō tōmēnāni beyæ ante Wængonguī ingante apænecæmīnimpa. Edæ Wængonguī ingante mōnō cæquēnēnō ante ayæ waodāni inānite mōnō cæquēnēnō ante mōnō waa cæte quëwencæmōimpa, ante Wængonguī ingante awënëidi beyæ ante apænecæmīnimpa. ³ Mānōmainō ante mōnō apænedō iñōmō waa impa. Wængonguī mōnō imonte nē Ængāingā inongā inte mānīnō mōnō apænedō ante waa acampa. ⁴ Waodāni tōmānāni nāwangā botō angainō ante ēñencædānimpa, ante Wængonguī pōnō ængā beyænque quëwencædānimpa, ante nē waa cæinēnongā ingampa.

⁵ Edæ adocanque Wængonguī inongā ingacāimpa. Tōmengā waodāni inānite adinque, Wadāni bai inānipa, ante nānēnē quëwengacāimpa. Ininque Itota Codito nē Waocā ēñagaingā inte tæcæguedē adocanque nē pongā inte, Waodāni Wængonguī guīdēnāni badinque adoyōmō bee tente godongāmæ quëwencædānimpa, ante pōnō cægacāimpa. ⁶ Tōmengā iñōmō mōnō imonte ante godonte æncæte ante cædinque nāmā wepæ incæ godoncæte ante nē pongā ingacāimpa. Wængonguī, Iīōnæ, ante nānō angaiōnæ incæ iinque bayonte mānīnō Codito nānō cægainō ante, Nō impa, ante tōmānāni inānite nē odōmongā ingacāimpa. ⁷ Mānīnō ante bitō nē apænebi bacæbiimpa, ante Wængonguī botō imote angā ēñēninque botō tōmengā nānō nē da godōmo batabopa, ante nāwangā āmopa. Edæ babæ ānāmaī imopa. Ayæ nāwangā mōnō pōnēnō ante Wængonguī, Wadāni oodeoidi ināmaī ināni adobai pōnencædānimpa, ante cædinque botō imote angā ēñēninque botō tōmengā nānō nē odōmonte apænedōmo imopa.

⁸ Wayōmō wayōmō godongāmæ mīni pōnencabo ongonte mīnitō onquiyæmīni iñōmō nē pīināmaī imīni inte Wængonguī ingante apænemīni adinque botō waa tobaīmopa. Wadāni inānite nē pīinte wæætedō wææte ānāmaī inte wææte tæiyæ waēmō entawēmīni inte Wængonguī ingante pædæ æmpote apænecæmīnimpa, ante ainēmopa.

⁹ Ayæ onquiyæmīni iñōmō waēmō

weocoo mongæmīni incæte mīnitō, Botō waēmō weocoo mongæmo adinque wadāni botō imote waa acædānimpa, ante ānāmaī inte nāmā baō ante guīñēñate pōnēninque weocoo ædæmō wēñate mongæncæmīnimpa. Mīnitō ocaguī que que cæmīni incæte oodo badōi tōnō pededamō nāni āmō wente cædāmaī incæmīnimpa. Waëmoncoo nāni nanguī godonte ænincoo nāni waa acoo ante mīnitō mongænāmaī incæmīnimpa. ¹⁰ Wææte edæ Wængonguī ingante, Bitō Wængonguī Awënē imidō anguēnē, ante nē watapæ apænemīni imīni ininque mīnitō mīni apænei bai cædinque mīni waa cæquēnēnō ante pōnencæmīnimpa. Mānōmainō ante pōnente quëwencæmīnimpa, ante adobai ainēmopa. ¹¹ Wadāni apæneyōnāni mīnitō onquiyæmīni tededāmaī inte ēamonca ongonte ēñencæmīnimpa. Ayæ nē āmōni mōni ānō ante ēñēninque wadō pōnēnāmaī inte do ēñente cæcæmīnimpa, āmopa.

¹² Godongāmæ mīni pōnencabo weca ongonte mīnitō onquiyæmīni iñōmō odōmonte apænedāmaī incæmīnimpa, ante botō wææ āmopa. Ayæ adobai onguīñæmīni imīnite onquiyæmīni iñōmō, Iīmaī cæedāni, ante ānāmaī incæmīnimpa, ante wææ āmopa. Wææte tededāmaī ēñencæmīnimpa. ¹³ Wængonguī edæ onguīñængā Adāo ingante tāno badōninque ayæ onquiyængā Eba ingante badongacāimpa. ¹⁴ Ayæ Tatāna wīi Adāo ingante wapiticæ māocā oda cægacāi. Wææte Eba ingante æpiticæmē māocā oda cædinque do wænæ wænæ cæcā bagacāimpa. ¹⁵ Incæte onquiyænāni Wængonguī ingante godōmenque pōnēninque cōwē waadete pōnēnāni inōnāni inte nē nō pōnente tæiyæ waēmō entawēnāni ininque tōmēnāni wēñænāni inānite māñōnānite Wængonguī wææ aacā beyænque quëwencædānimpa, āmopa.

3

Godongāmæ mōnō pōnencabo iñōmonte nē aadāni

¹ Iīmaī ante nāni ānō nō pōni ante impa. Godongāmæ mōnō pōnencabo iñōmonte, Aacæboimpa, ante nē angā

iñömö tömengä waa cæquinö ante pönö cæinengä ingampa. ² Incæte wadäni, Wënæ wënæ cæcä ingampa, ante änämaï incædänimpa, ante cædinque nē aacä wæætē waa quēwenguēnengä ingampa. Edæ tömengä nänöogænä adodanque nē manguiwengä incæcäimpa. Tömengä töö pönente nō quēwengä incæcäimpa. Nöinö cæcæimpa, ante pönēninque nämä wææ ante nē cæcä incæcäimpa. Waodäni botö imote waa acædänimpa, ante cædinque waa quēwencæcäimpa. Waodäni inänite, Botö oncönē pö cæedäni, ante cōwē nē watapæ angä incæcäimpa. Ayæ tömengä nē waa odömonte apæ necä incæcäimpa. ³ Nē aacä tī nämæ bete beyæ quidi quidi dowænämaï quēwenguēnengä ingampa. Wacä ingä do piinte cædämaï inongä inte wæætē ædæmō cæcä inte quēwencæcäimpa. Tömengä piyænē cæcä incæcäimpa. Tömengä godonte nāni æinta ante waadete pönente wædämaï incæcäimpa ämopa.

⁴ Nē aacä tönö godongämæ quēwēnāni inänite tömengä waa aaquēnengä ingampa. Tömengä wēñænāni inänite ædæmō aacä beyæ tömēnāni wæætē tömengä ingante waa adinque tömengä nänö änö ante ēñente cæte quēwencædänimpa. ⁵ Edæ nē aacä tönö godongämæ quēwēnāni inänite tömengä wii waa aacä ininque Codito ingante godongämæ mönö pönencabo iñömonte ædö cæte waa aacä inguingä.

⁶ Itota Codito ingante ñöwo tæcæ pönēningä wii nē aacä baquēnengä ingampa. Edæ mänömaï inongä iñongante mīnitö, Nē aabi imipa, ämīni ininque tömengä nämä incæ, Adoboque waa cæbo imopa, ante pönengä imaingampa. Wënæ awēnē mänömaï pönengä beyænque Wængongui tömengä ingante apænte nänö panguinö bai nē aacä ingante adobai apænte pämaingampa. ⁷ Ayæ adobai Itota Codito ingante nē pönēnāmaï ināni nē aacä ingante adinque, Tömengä nē waa cæcä ingampa, ante acædänimpa, ante cædinque tömengä waa quēwenguēnengä ingampa. Tömengä waa cædämaï ingä adinque tömēnāni wæætē, Tömengä wënæ wënæ cæcä ingampa, ante piimainanipa. Tömengä waa cædämaï ingä piināni ininque wënæ

awēnē iñömö, Tömengä oda cæcæcäimpa, ante godö cæcä ate tömengä do wënæ wënæ cæcä babaingampa.

Mönö pönencabo tönö godongämæ nē cædäni

⁸ Mönö pönencabo tönö godongämæ nē cædäni iñömö adobai, Mönö eyepæ cæte quēwēmō ininque wadäni mönö imonte waa acædänimpa, ante cædinque waa quēwenguēnēnāni inänipa. Nē cædäni nämä nāni änö bai ante nō cæcædänimpa. Tömēnāni yowepæ wædænque tī nämæ biinömæ nāni ämæ wii nangui becædänimpa. Babæ cæmöni incæte godonte nāni æinta cōwē godömenque æncæmönimpa, ante wadäni nāni pönēwēnonque ante iināni wæætē mäninö ante pönēnāmaï incædänimpa. ⁹ Edæ nämä apænte pönēninque wentamö mongænāmaï entawēnāni inte tömēnāni Wængongui nänö wē wodonte angainö ante tæcæ ēñēninque tömēnāni, Nö pönī mönö pönēnō impa, ante cōwē wede pönenguēnēnāni inänipa. ¹⁰ Ayæ mänināni inänite mīnitö, Quinö cæmīni imīni, ante ēñencæte ante cōwä acæmīnimpā. Ayömīni tömēnāni cōwē waa cæte quēwēnāni adinque mīnitö wæætē tömēnāni inänite, Mīnitö mönö pönencabo tönö godongämæ nē cæmīni bacæmīnimpā, ante ämīni bacædänimpā.

¹¹ Tömēnāni nänöogæidi inänite wadäni waa acædänimpa, ante cædinque adobai eyepæ cæte waa quēwenguēnēnāni inänipa. Mänināni iñömö wadäni inänitedö ante babæ änämaï incædänimpa. Wæætē adodäni cōwē töö pönente nō quēwēnāni incædänimpa. Tömēnāni cōwē pönēninque, Iimāi cæcæmönimpa, ante nāni äninö bai ædæmō cæcædänimpa. ¹² Mönö pönencabo tönö godongämæ nē cæcä iñömö tömengä nänöogænä adodanque nē manguiwengä incæcäimpa. Tömengä wēñænāni inänite ayæ tömengä tönö godongämæ quēwēnāni inänite tömengä nē waa aaquēnengä ingampa. ¹³ Mönö pönencabo tönö godongämæ nē cædäni iñömö, Nē waa cædināni inänipa, ante adinque mönö tömēnāni inänite waa ämompā. Ayæ mänömaï waa cædināni inte mänināni, Itota

Codito ingante pönēdāni, ante guññēnāmai apænecædānimpa.

Wē wodonte nāni angainō edonque pōni batimpa, ante

¹⁴ Quingæ bitō weca acæ poncæboimpa, ante pönēmo incæte botō, Īmaī cæe, ante bitō ĩmite yewæmōmopa. ¹⁵ Botō wæætē wīi quingæ pōmo ĩninqe bitō, Mōnō Wængonguī tōnō godongāmæ quēwencabo ĩnōmō inte mōnō æbānō cæquīi, ante bitō ēñencæbiimpa, ante yewæmōmopa. Edæ Wængonguī nē Quēwengāngā quīmō ĩnōmō inte mōnō Codito ingante godongāmæ mōnō pōnencabo ĩñōmō mōnō cobacadewæ tæi ongō bai tōmengā nō nānō angainō ante ñimpo cædāmai inte wæætē wææ cæmō ĩmopa. ¹⁶ Īmaī ante nō pōni impa. Wængonguī ayongā mōnō æbānō waa cæte quēwenguīi, ante Wængonguī wē wodonte nō nānō angainō incæ ñōwoyedē edonque pōni mōnō ēñēnō ĩñōmō waa pōni impa. Īmaī impa.

Wængonguī inguipoga ĩñōmō ponte ēñadinque Waocā bacā agadānimpa.

Tōmengā ingantedō ante Wængonguī Onōwoca, Māningā waēmō quēwēnongā ingampa, angacāimpa.

Tōmengā ingante Wængonguī anquedoidi do agadānimpa.

Wabæca wabæca nāni quēwencabo ĩnānite Itota nānō cægāinō ante apænegatimpa.

Tōmāmæ quēwēnāni pancadāniya tōmengā ingante pōnente bagadānimpa.

Ayæ tōmengā ñāō bai ēmōninqe oōnædē ĩñōmō ocæ ēmænte gogacāimpa.

Mānōmainō ante nāni āmotamīni ānō bai impa.

4

Nē pōnēnāni pancadāniya wadæ goquīnāni ĩnānipa, ante

¹ Wængonguī Onōwoca ĩmaī ante edonque pōni apænecampa. ĩninqe ĩñōnæidi bayonte Codito ingante nē pōnēnāni incæ pancadāniya ñimpo cæte tōmengā ingante pōnēnāmai bacædānimpa. ĩninqe onōwocaidi incæ nē, Wapiticæ oda cæcædānimpa, ante nē wēnæ wēnæ

cædōnāni miñæ tee empo gocædānimpa. Goyōnāni wēnæidi nāni odōmonte apænewēnō ēñente cæquīnāni ĩnānipa. ² Nē babæ ānāni nē wadō tedete wadō cædāni ĩñōmō tōmēnāni mānīnō wēnæidi nāni odōmonte apænewēnō ante nē odōmonte apænedāni ĩnānipa. ĩnāni guiquēnē tōmēnāni nāmā nāni apænte pōnēnō ante omætawēnāni inte wēnæ wēnæ nāni cædinō ante wædāmai quēwēnānipa. ³ Mānīnāni ĩñōmō waodāni ĩnānite wææ āninqe, Mīnitō, Botō nānōogængā, ante onquiyængā ingante mōnāmai ĩedāni, ānānipa. Ayæ adobai mōnō waa cænguī adinqe pancaa ante, Cænāmai ĩedāni, ante wææ ānānipa. ĩñæmpa Wængonguī edæ tōmāā cænguī badongacāimpa. Tōmengā, Botō ĩmote waa ate pōnente apænedinqe nē pōnēnāni ĩñōmō botō nō angainō ante ēñēnōnāni inte cænguī ænte cæncædānimpa, angampa.

⁴ Edæ Wængonguī nānō badongaincoo tōmancoo waa pōni i ĩñonte mōnō Wængonguī ingante waa ate pōnente apænedinqe tōmāā cænguī æmō ĩninqe pancaa ante ædō cæte Baa ante ænāmai inguīi. ⁵ ĩñæmpa Wængonguī nānō angainō beyænque ayæ tōmengā ingante waa ate pōnente apænemō beyænque tōmāā cænguī ĩñōmō tæiyæ waēmō cænguī bapa.

Itota Codito ingante nē waa cæcā

⁶ Bitō godongāmæ mīni pōnencabo ĩñōmīnite bitō mānīnō botō ānō ēñēninqe bitō tōññadāni ĩnānite wæætē odōmōmi ĩninqe Itota Codito beyæ nē waa cæquīmi incæbiimpa. Ayæ Wængonguī nānō angainō ante mōnō pōnēnō ante ēñente quēwēninqe bitō waa mōnō odōmonte apænedō ante nē ēñente cædimi inte edæ tōmo cænte bai nē nō cæbi incæbiimpa.

⁷ Babæidi bai nē tedewēnāni ĩnānite ēñēnāmai inte bitō onquiyænāni picænāni incæ ononquedō ante nāni tedewēnīnō ante ēñēnāmai incæbiimpa. Wæætē, Wængonguī ayongā mōnō waa cæte quēwencæte ante cædinque bitō ĩñōmō tæi ēwocabo badinqe cæcæboimpa, ante godōmenque godōmenque cæcæbiimpa. ⁸ Mōnō baō tææmō bacæimpa, ante cædinque mōnō ñimpo cædāmai inte adodō adodō cæmopa. Mānīnonque ante mōnō

cædō guiquēnē wædænque waa impa. Wæætē Wængonguī ayongā mōnō waa cæte quēwēmō ininque mōnō ñōwoyedē waa quēwēninque adobaī iincayæ ate waa quēwenguīmō incæmōimpa. Ininque māninō ante mōnō cæquīnō iñōmō tōmāā beyæ nō waa pōnī i ininque, Mōnō tæī ēwocaquīmō, ante cædinque mōnō ñimpo cædāmaī inte adodō adodō cæcæimpa.

⁹ Mānōmaīnō ante nō pōnī nāni ānō nāwangā ante impa, ante āmo ēñēmaīmīnīpa. ¹⁰ Mānōmaī beyæ tæī piñænīnque nanguī cæmō imompa. Edæ, Wængonguī nē Quēwengāingā beyænque mōnō watapæ quēwengæimpa, ante pōnengāimō imompa. Tōmengā iñōmō mōnō waocabo tōmāmō imonte, Quēwenguīmīni, ante nē Ængāingā incæ tōmengā ingante nē pōnēmō iñōmonte nō ængā beyænque mōnō quēwengæimpa.

¹¹ Māninō botō ānō ante bitō tōmēnāni inānite, iīmaī cædāni, ante odōmonte apænecæbiimpa, āmopa. ¹² Bitō wīī picæmi incæte æcāmenque iñongante bitō, Botō imote piinte adāmaī incæcāimpa, ante pōnente quēwencæbiimpa. Wæætē edæ bitō Wængonguī ingante nē pōnēnāni beyæ ante, Botō cæbaī tōmēnāni adobaī cæcædānīmpa, ante iīmaī cæcæbiimpa. Apænēbi incæ waa cæte quēwēmi incæ waadete pōnēmi incæ wede pōnēmi imi incæ nō pōnente waa cæbi incæ bitō, Botō baī bacædānīmpa, ante cædinque bitō cædō ante odōmōmi adinque tōmēnāni adobaī cæcædānīmpa. ¹³ Botō pōnāmaī inguin-ganca bitō ongōñōmō iñōmō Wængonguī angā ēñente nāni yewæmongainō adinque adodō ante ædæmō apænēbi ēñencædānīmpa. Ayæ Wængonguī ingantedō ante apænēbi inte odōmonte apænēbi ēñencædānīmpa. Māninonque cæte ongoncæbiimpa. ¹⁴ Mīni pōnencabo iñōmīnite nē aadāni nāni Picæncabo iñōmō bitonga gampo cædinque Wængonguī beyæ apænedinque bitō imite, Bitō nē aabi badinque nē odōmonte apænēbi bacæbiimpa, ante pōnō apænedānitapa. Ininque bitō do nē aabi badinque nē odōmonte apænēbi bagāimi inte godōmenque godōmenque cæcæbiimpa.

¹⁵ Edæ waodāni tōmānāni bitō æbānō godōmenque waa cæbi imi adinque ēñencædānīmpa, ante cædinque bitō māninonque ante pōnēninque godōmenque godōmenque cæcæbiimpa. ¹⁶ Bitō quēwēnō ante, Æbānō quēwēmoo, ante nāmā wææ aacæbiimpa. Ayæ bitō odōmonte apænedō ante, Botō nō pōnēninque odōmonte apænecæboimpa, ante wææ cæcæbiimpa. Edæ mānōmaī cæte wæntædāmaī inte cōwē cæcæbiimpa. Bitō mānōmaī cæbi ininque tōmēmi nāmā incæ wantæpiyæ quēwencæbiimpa. Bitō odōmonte apænēyōmi nē ēñēnāni iñōmō adobaī bitō cædō beyænque wantæpiyæ quēwencædānīmpa.

5

Nē pōnēnāni inānite cæbānō cæcæbiimpa, ante

¹ Onguīñængā picængā wēnæ wēnæ cæcā incæte tōmengā ingante piinte ānāmaī incæbiimpa. Wæætē tōmēmi mæmpocā ingante ante baī tōmengā ingante waadete āmi ēñencæcāimpa. Edēnīnāni iñōmō tōmēmi biwīdi inānite ante baī tōmēnāni inānite waadete āmi ēñencædānīmpa. ² Onquiyænāni picænāni iñōmō tōmēmi wānā inante ante baī bitō tōmēnāni inānite adobaī waadete āmi ēñencædānīmpa. Ayæ baquedāni iñōmō tōmēmi biwinqueidi inānite ante baī tōmēnāni inānite waēmō mīmōnē waadete ancæbiimpa.

³ Owæmpōināni nē nāwangā omæpodāni inte quēwēnānīpa, ante tōmēnāni inānite waa adinque pōnō cæcæbiimpa. ⁴ Incæte owæmpōingā wēñænāni næængā ininque nānōmōidi næængā ininque mānināni wæætē tōmengā beyæ cæquēnēnānīpa. Edæ mānināni tāno tōmēnāni tōnō godongāmæ quēwēnāni inānite waa adinque nāēmæ nāni cæquēnēnō ante, Æbānō cæquīī, ante ēñente cæcædānīmpa. Mānōmaī cædinque tōmēnāni mæmpōidi tōnō mæmæidi tōmēnāni inānite waadete nāni cædi baī iīnāni adobaī mæmpōidi tōnō mæmæidi inānite nāēmæ waadete cæcædānīmpa. Edæ mānōmaī cædāni adinque Wængonguī waa acæcāimpa.

⁵ Nē nō omæpocā inongā inte adodanque quēwengā ininque tōmengā nē owæmpōingā inongā inte Wængonguī beyænque watapæ

quëwengæimpa, ante pönengä ingampa. Itædë incæ woyowotæ incæ tōmengä ñimpo cædāmaï inte, Botō beyæ cæquïmi, ante Wængonguï ingante apænete quëwengampa. ⁶Wæætë owæmpoingä tote quëwengæimpa, ante nāmanque pönente nē quëwëngä guiquënë tōmengä mü quëwengä incæte do wænte bai ingampa töö.

⁷Tömënanï inänitedö ante wënæ wënæ änāmaï incædänimpa, ante wææ cædinque bitö mäninö botö änö ante adodö ante ämi ëñencædänimpa. ⁸Æcänö guidënanï inänite pönö cædāmaï inaa ayæ tōmengä nāni wencabo inänite pönö cædāmaï inaa tōmengä iñömö Wængonguï nänö angainö mönö pönënö ante do Baa äninque wïi ëñente cæcampa. Ayæ nē pönënamäi ingä wënæ wënæ cæcä iñongante mäningä iñömö godömenque wënæ wënæ cæcä ingampa töö.

⁹Owæmpoinä do tetenta wadepo ganca godömenque nē picænä inönä inte tōmënä nänöogængä wodi ingante nē möninanque quëwënä ingadäimpa, ante adinque bitö, Wængonguï quï, ante mönö godonte æninta mäninä owæmpoinä nē ænguïnä incædäimpa, ante tōmënä ëmowo ante yewæmoncæbiimpa. ¹⁰Edæ tōmënä wëñænänï inänite waa cædä pædäni inänitawo. Wadäni inänite tōmënä, Botö oncönë pö beedäni, ante waa apænedä inantawo. Wængonguï quïnäni iñönänite tōmënä nämä pönënamäi inte waa cædantawo. Nē wæwënanï inänite adinque tōmënä tōmënanï tönö godongämæ cædantawo. Ayæ, Quiëmë waa cæcæimpa, ante mäninonque ante pönëninque cæte quëwënantawo. Mänömaï quëwënä adinque waodäni, Mäninä nöinä waa cædä inönampa, ante do ëñënanï inänitawo, ante adinque bitö wæætë tōmënä ëmowo ante yewæmoncæbiimpa. Ayæ wadäni mäninä bai iñönänite bitö, Wængonguï quï, ante mönö godonte æninta mänimpodänique nē ænguïnäni incædänimpa, ante tōmënanï ëmowo ante yewæmoncæbiimpa.

¹¹Wæætë edæ owæmpoinäni wïi picænänï iñönänite bitö tōmënanï ëmowo ante yewæmönāmaï inte Baa ancæbiimpa. Ayæ toinente wæwëninque Codito ingante ñimpo cæte wadæ godinque wæætë, Wacä

nänöogængä ingante möinëmopa, ante quëwënanïpa. ¹²Edæ tōmënanï Codito ingante, Botö bitö beyænque cæcæboimpa, ante tāno nāni angainö ante ñimpo cædäni beyæ Wængonguï apænte pangä wæcædänimpa. ¹³Ayæ godömenque iïmaï cædänipa. Tömënanï cædāmaï inte wæntæye badinque adobai wacönë wacönë acæte ante önonque godäni inänipa töö. Ayæ wïi önonque wæntæyedänique badinque tōmënanï, Wadäni æbänö cædänii, ante gote adinque wadäni nāni cædönö ante godö wæntæ godö wæntæ tededäni inänipa. Edæ wïi nāni angüenënö ante do änewënanïpa. ¹⁴Mänömaï beyæ botö owæmpoinäni wïi picænänï inänite iïmaï ämopa. Minitö wæætë möninque wëñænänï mäedäni. Ayæ oncönë mini cæquënënö ante cædäni. Wadäni edæ mönö imontedö ante wënæ wënæ nāni tedewënö ante tededāmaï incædänimpa, ante minitö mänömaï cæte waa quëwëdäni, ämopa. ¹⁵Iñæmpa owæmpoinäni pancadäniya do Itota Codito ingante ëmö cæte godinque Tatāna miñæ tee empocæ godänitapa töö.

¹⁶Onquiyængä nē pönengä iñömö tōmengä guidënanï owæmpoinäni næængä ininque tōmengä tōmënanï beyæ cæcæcäimpa. Codito ingante godongämæ mini pönencabo iñöminite tōmengä, Botö guidënanï inänite godömini æncædänimpa, ante änāmaï incæcäimpa. Mänömaï cædinque Codito ingante mini godongämæ pönencabo wæætë, Owæmpoinäni näwangä ömæpodäni inänipa, ante adinque tōmënanï inänite godömini æncædänimpa, ämopa.

¹⁷Wængonguï ingante godongämæ mini pönencabo iñöminite nē aadäni nāni Picæncabo iñömö nö waa aadäni iñönänite minitö tōmënanï inänite waa aquënëmini iminipa. Mäninäni Wængonguï nänö angainö ante nē apænedäni inte ayæ nē odömönte apænedäni iñönänite minitö godömenque nanguï waa acæminimpa. ¹⁸Edæ Wængonguï iïmainö ante apæncä ëñëninque yewæmongadänimpa. “Wagada onguïñængä nē cæcä inte tōmentapo æ yacæimpa, ante ämi pinä pinä gäwate cægöñongä bitö tōmengä önöne wææ wodönedāmaï inte ee abi cæncæcäimpa,” ante yewæmongatimpa. Ayæ godömenque

iīmaī ante impa. “Nē cæcā iñōmō tōmengā nānō cædinō beyæ ante nē ænguēnengā ingampa.” Mānōmaī yewæmongadānimpā.

¹⁹ Godongāmæ mīni pōnencabo iñōmīni waocā adocanque iñōmō bitō imite apænedinque, Māningā nē aacā Picængā iñōmō wēnæ wēnæ cæcantapa tōō, ante āñongante bitō ēñēnāmaī incæbiimpā. Wæætē waoda mēnaa nē babæ wapiticæ ānāmaī ina inte bitō imite apænedinque, Tōmengā nē wēnæ wēnæ cæcantapa, ante adodō apæneda ēñēninque bitō nē āna inate ēñencæbiimpā. Ayæ waodāni mengāa go adocanque adobaī adodō apænedāni ēñēninque bitō nē ānāni inānite ēñencæbiimpā.

²⁰ Nē wēnæ wēnæ cædōnāni incæ ñimpo cædāmaī inānīpa, ante adinque bitō wæætē godongāmæ ongōnāni ēñēñōnāni mānīnāni inānite nanguī ancæbiimpā. Godongāmæ ongōnāni ēñēñōnāni bitō mānōmaī āmi ininque tōmēnāni wæætē guīñēninque, Wēnæ wēnæ mōnō cæquīnō ante cædāmaī incæmōimpā, ante pōnencædānimpā.

²¹ Mōnō Wængonguī ayongā Itota Codito ayongā Wængonguī nānō apænte ænīnāni anquedoidi ayōnāni botō iīmaī āmopa. Mānīnō botō ānīnō ante ēñente cædinque bitō, Adoyōmō pōnī inānīpa, ante tōmānāni inānite adoyōmō godō cæbi incæbiimpā. Wīi adocanque ingante, Botō nē waa adīmi imīpa, ante tōmengā ingante wadō cædāmaī incæbiimpā. ²² Æcāmenque ingante, Mōnō pōnencabo beyæ bitō nē cæbi baquīmi, ante pōnēmi inte bitō tōmengāa quingæ gampo cædāmaī iē. Edæ quingæ gampo cæbi nē cæcā badinque edæ tōmengā wēnæ wēnæ cæcā ininque bitō adobaī tōmengā tōnō wēnæ wēnæ cæbi baquēnēmi imīpa. Bitō tōmēmīque godōmenque wēnæ wēnæ nāni cæpāmo ante tōmānō ante Baa ante waa cæte quēwēe.

²³ Bitō cæinca cædente wæbitawo. Ayæ wantæ wantæ iñō wantæ wantæ iñō wēnæ wēnæ inte wæbitawo. Ininque wīi æpænque bee āmopa. Wæætē biinōmæ wædænque bete quēwencæbiimpā.

²⁴ Wængonguī nānō apænte anguīōnæ badāmaī iñedē incæ waodāni pancadāniya wēnæ wēnæ nāni cægāinō do edonque pōnī impa. Wadāni guīquēnē wēnæ wēnæ

nāni cægāinō wē wodonte i incæ mānīñedē edonque pōnī baquīnō anguēnē. ²⁵ Ayæ adobaī waodāni waa nāni cægāinō do edonque pōnī impa. Ayæ ñōwoyedē pancaa waa nāni cægāinō wīi edonque pōnī i incæte wīi cōwē wē wodonte ingæimpā. Wæætē edonque pōnī aquīnō anguēnē.

6

¹ Waodāni awēnēidi nāni nē ò ænīnāni inte awēnēidi beyænque cæte ñā cæyænte baī nē quēwēnāni iñōmō tōmēnāni tōmānāni awēnēidi inānite waa ēñente cæcædānimpā. Iñæmpa tōmēnāni nē pōnēnāni inte wīi waa ēñente cædāni baī wadāni wæætē Wængonguī émōwo ante wēnæ wēnæ ante babæ anguēnēnānimpā. Adobaī mōnō odōmonte apænedīnō ante, Wēnæ wēnæ impa, ante anguēnēnānimpā. ² Tōmēnāni awēnēidi iñōmō nē pōnēnāni ināni beyænque nē cædāni iñōmō, Botō tōñīñacanque inongā inte botō awēnē iñōmō ònonganque ingā awædō, ante pīināmaī incædānimpā. Wæætē edæ nē cædāni iñōmō, Botō cæbo nē ængā iñōmō nē pōnengā inongā inte Wængonguī nānō nē waadecā ingampa, ante adinque tōmēnāni awēnēidi inānite godōmenque waa ēñente cæcædānimpā.

Nāwā māincoo ante

Ininque Tímoteo ēñēmī. Mānīnō ante tōmēnāni inānite odōmonte apænedinque bitō adodō adodō ante ancaa ancæbiimpā, āmopa. ³ Pancadāniya wadō ante odōmonte apænedinque mōnō Awēnē Itota Codito nō pōnī nānō angāinō ante Baa ānānīpa. Ayæ mōnō odōmonte apænedō ante tōmēnāni Wængonguī ayongā mōnō waa cæte quēwenguēnēnō ante Baa ānānīpa. Ininque æcānō mānōmaī Baa āna iñōmō ⁴ tōmengā nāmā incæ, Botō gomonga waa ēñēmopa, ante nē pōnēnongā ingā incæte tōmāā ēñēnāmaingā ingampa. Tōmengā nāmanque nānō pōnēwēnō ante wæætēdō wæætē tēdedinque, Ædedō i, ante wacā tōnō guēadō guēa āinēwente wæcampa. Tōmengā mānōmaī tēdecā beyænque wadāni nē gomonga ēñengā ingante godō piinte adānīpa. Godongāmæ wadodō wadō piinte tēdewēnānīpa. Wacā

ingä wacä ingä, Bitö wënæ wënæ cæbi ïmipa, ante änewënänipa. Nämä nāni wënæ wënæ pönënonque ante, Wadāni wënæ wënæ cädānipa, ante pönëwënänipa. ⁵ Ayæ ocaidë pönente wentamö encadāni inte tömënāni Wængonguï nāwangä nānō angainō incæ ëñënamāi badānipa. Ìnque nāni cabo incæ wacä ingä wacä ingä guëadō guëa apænete nāni pīncabo ïnānipa. Ayæ mänināni adobāi, Wængonguï ayongä waa cæte quëwëmö beyænque nanguï ëate baquïmō, ante pönëwënänipa.

⁶ Ìñæmpa mänincoo quincoomë ëacä incæte, Mäninque ëabopa, ante piyænë cæte quëwënongä ïñömö tömengä Wængonguï ayongä waa cæte quëwengä beyænque watapæ quëwënongä inte nö nanguï ëacä ingampa. ⁷ Edæ mönō ïi inguipoga ïñömö ömaamö pontamompa. Adobāi ömaamö inte tao goquïmō ïmompā. ⁸ Incæte mönō cænguï tönö weocoo ëamö inte mäninque beyæ mönō watapæ quëwenguinque ïmompā. ⁹ Wadāni guiquënë, Mänincoo nanguï ëainëmönipa, ante quëwënāni inte tömënāni wënæ wënæ nāni cæinëmāmo badinque oda cæte goquïnānidö anguënë. Mänömaï cædinque tömënāni, Quïnö önonque impa, ante æinente badānipa. Ayæ wënæ wënæ nāni baquinque edæ æinëwënāni inte quïëmë incæ tömënāni æmæwo ömæ nāni ëwenguïnonque gocädānipa. ¹⁰ Wadāni nāni godonte æinta waadete pönente nāni wädö beyæ wädö wädö nāni wënæ wënæ cæpāmo pompa. Edæ pancadāniya, Mönö godonte ænguinta ængæïmpa, ante pönëninque tömënāni nāni wede pönenguënënö ñimpo cæte wadæ godinque nämä nāni cädö beyænque nanguï wæwente badānitapa.

Mönö wede pönënö ante mönö tæi ëwocate cæcæïmpa

¹¹ Bitö guiquënë Wængonguinque ingante në cädömi inte mäninö tömānö ante ñimpo cæte wodii gote baï quëwencæbiimpa, ämopa. Wæætë mönö nö cæquënënö ante cæte quëwencæbiimpa. Wængonguï ayongä mönö waa cæte quëwengæïmpa, ante cæcæbiimpa. Mönö wede pönëmāmo, ante godömenque pönente quëwencæbiimpa.

Wadāni ïnānite godömenque waadete pönencæte ante cæcæbiimpa. Ayæ tæi piñænte entawëninque wëntæye badāmaï inte ee cæcæbiimpa. Cöwë ædæmö cæte quëwencæbiimpa. ¹² Wængonguï ingante mönö wede pönënö ante mönö cæquënënö ante bitö tæi ëwocate cæcæbiimpa. Mönö wænāmaï quëwenguïnö goquïmō, ante pönente ñimpo cädāmaï incæbiimpa. Edæ wadāni tæiyænāni ëñëñönāni, bitö, Wængonguï ingante wede pönente babopa, ante äñömi Wængonguï edæ, Mäninö quëwenguïnö gocæbiimpa, ante bitö ïmite apænte aa pecantapa. ¹³ Wængonguï pönö cæcä beyænque quingämenque incæ tömānāni quëwënāni ïnānipa. Itota Codito ïñömö Pontio Pidato ingante apænedinque, Quïnö nö impa, ante edonque pönï apænegaingä ingampa. Edæ Wængonguï tönö Itota Codito mänömainö ingaina ïñöna botö tömëna ayöna bitö ïmite, ïmaï cæe, ämopa. ¹⁴ Mönö Awënë Itota Codito nānö ocæ ëmænte ponguinganca bitö mäninö botö wææ änö tömānö ante waa ëñente cæcæbiimpa, ämopa. Bitö ëñente cädö adinque wadāni ædö cæte, Wënæ wënæ impa, ante anguïnāni, ante pönente cöwë waa pönï cæcæbiimpa. Mänömaï ante ämopa.

¹⁵ Wængonguï nānö ainenguïönæ bayonte Itota ocæ ëmænte poncæcäimpa. Mönö Awënë Wængonguï ïñömö tömengä adocanque Wængonguinque ingaingä inte në waa pönï ïnongä ingampa. Tömënāni awënë odeyedi ïñönānite tömengä Tæiyæ Awënë Odeye ïnongä ingampa. Ayæ tömengä ïñömö awënëidi tömānāni Awënë ïnongä ingampa. ¹⁶ Tömengä adocanque në wantæpiyæ wænāmaï ïnongä inte në Quëwengä ingaingä ingampa. Tömengä tömää ñäö ïñömö quëwënongä ïñongante wadāni ædö cæte tömengä weca goquïnāni. Tömengä mönö waocabo mönö në adāmaï ingaingä ingampa. Edæ tömengä ingante mönö ædö cæte aquïi. Tömenganque ingante wadāni tömānāni waa aquïnānidö anguënë. Tömenganque cöwë në tæi piñænongä inte quingämenque quëwënāni ïñönānite tömengä tömānāni Awënë inguingänö anguënë. Mänömaï

babaimpa, ante, Amëe, ämopa.

¹⁷ Inguipogaque mäincoo nē nanguī ēādāni inānite bitō iīmaī ancæbiimpa. Nanguī ēamōni inte mōnitō godōmenque waa pōnī imōnipa, ante pōnēnāmaī iēdāni. Iñæmpa mäincoo mōnō ēadincoo iñōmō quingæ dæ ä apa quēwēnānii. İninqe mīni mäincooque ante wīi mänincooque ante pōnēdāni. Wæætē, Wængonguinque beyænque watapæ quēwengæimpa, ante pōnēdāni, ancæbiimpa, ämopa. Edæ, Mōnō qui quīnō dæ ä, ante wæmō adinqe tōmengä mōnō imonte, Mīni watapæ quēwenguinque, ante tōmäā nē pōnongä ænguimō imompa. ¹⁸ Mänināni nē nanguī ēādāni inānite bitō, Mīnitō quīnō waa cæquīi, ante mäninonque cæcæminimpa, ancæbiimpa. Waa mīni cæquīnō ante mīnitō nanguī cæte quēwencæminimpa. Ayæ do Ao ante mīnitō mäincoo mīni ēadincoo pancacooga pædæ godōmīni æncædānie, ancæbiimpa, ämopa. ¹⁹ Mäninō bai nē cædōnānique, Mōnō nāmā beyæ ēaquincoo, ante öönædē iñōmō do cō cæte bai cædānipa. Mänōmaī cædinque tōmēnāni, Nō pōnī mōnō quēwenguinque impa, ante iincayæ ate æncædānimpa.

Timoteo ingante, Pabodo iinqe wææ angampa

²⁰ Timoteo ēñēmi. Wængonguī, Wææ aacæbiimpa, ante bitō imite quīnō pōnongä bitō ö æninō ante wææ ae. Tæiyæ waēmō ewocadāmaī inte wadāni önonquedö ante nāni änōnō ante ēñēnāmaī iē. Adobai wadāni, Mōnitō ēñente ate nanguī encaimōni imōnipa, ante nē babæ änāni iñōnānite bitō wadodö wadö nāni anewēnō ante ēñēnāmaī iē. ²¹ Tōmēnāni nāni anewēnō ante pōnēninque waodāni pancadāniya Wængonguī ingante nāni pōnēninō ante do ñimpo cædinque wadæ godināni inānipa.

Wængonguī bitō imite waadete pōnō cæcæcäimpa, ante botō mäninque ante yewæmōmopa.

2 Timoteo ingante Pabodo cadota ante ayænta nänö yewæmongainta

Timoteo ingante Pabodo yewæmongampa

¹ Botö Pabodobo inömo imopa. Wængongui nänö änö bai Itota Codito nänö nē da godongaïmo imopa. Itota Codito nempo quëwënönäni inönänite Wængongui, Minitö wantæpiyæ mini quëwenguinö ante pönömo ænguimini iminipa, angacäimpa. Mänömai beyæ tömengä botö imo, Mäninö ante apænebi eñencädänimpa, angä eñëninque botö tömengä nänö nē da godongaïmo imopa. ² Timoteo eñëmi. Bitö botö wëmi bai inömi inte botö nē waadebi inömi imipa. Bitö acæbiimpa, ante bitö imite yewæmömopa. Mönö Mæmpo Wængongui tönö Awënë Itota mönö Codito tönö bitö imite waadete pönö waa cæda ate bitö gänë entawencæbiimpa, ämopa.

Itota Codito waa pönö nänö ingainö ante

³ Wëenëñedë botö wæmæidi nani cægai bai botö adobai nämä apænte pönente adinque wentamö mongænämai entawëmo inte Wængongui beyæ nē cæbo imopa. Botö itædë incæ woyowotæ incæ bitö beyæ ante mäningä Wængongui ingante botö apæneyedë adocä ingante cöwë waa ate pönente apænebopa. ⁴ Botö bitö æbänö wëñapæ tamömitapa, ante pönëninque, Botö watapæ tocæboimpa, ante bitö imite äinente imopa. ⁵ Bitö Wængongui ingante nö wede pönëmi imipa, ante adimo inte botö adodö ante wæætë pönëmopa. Edæ bitö ñæñæ Doida bitö wäänä Eönita tönö tömëna täno Wængongui ingante nö wede pönente nana ingai bai bitö inömo ñowo adobai imipa, ante do eñëmopa.

⁶ Mänömai beyæ bitö imite iïmai ämopa. Wængongui nänö cædönö ante bitö cæcæbiimpa, ante botö bitonga gampo cæyömo Wængongui pönö cæcä æninque ewocabi imipa. Ininque mäninö bitö ewocadö beyænque bitö godömenque godömenque cæcæbiimpa. ⁷ Wængongui tömengä Tæiyæ Waëmö Önöwoca ingante mönö imonte pönongä æmö ininque mönö wii tömengä

beyæ guiñente ewocamompa. Wæætë mäniwoca beyæ tæi ewocamö imompa. Ayæ adowoca ingante ewocadinque waodäni inänite waadete pönëmö imompa. Adowoca beyæ mönö, Nöinö cæcæimpa, ante pönëninque nämä wææ ante cæmö imompa.

⁸ Mönö Awënë Itota Codito nänö angainö bitö eñëninö ante bitö guingo imönämai inte apænecebiimpa. Botö adobai, Tömengä nänö angainö botö eñëninö ante botö apænebo beyæ botö imote tee mönedäni wæyömote bitö mäninö adinque guingo imönämai inte apænecebiimpa. Wæætë botö tönö Itota ingantedö ante möna watapæ apænedö ante apænedinque bitö Wængongui nänö tæi piñæmämö ante ewocadinque botö tönö adobai guëa caate wæcæbiimpa.

⁹ Wængongui, Quëwencæminimpa, ante mönö imonte æninque, Minitö tæiyæ waëmö entawente quëwencæminimpa, ante mönö imonte aa pegacäimpa. Mänömai cædinque tömengä wii mönö waa cædinö beyænque wæætë tömengä nänö äinënö ante cægacäimpa. Ayæ wëenëñedë inguipoga badönämai inedë tömengä, Itota Codito beyænque, ante pönëninque mönö imonte waadete pönö cægacäimpa. Mäninö nänö waadete pönö cægainö beyænque tömengä mönö imonte æninque aa pegacäimpa. ¹⁰ Incæte ñowoyedë mönö imonte, Quëwenguimini, ante nē Ængaingä Itota Codito pongä ininque tömengä waadete nänö pönö cægainö ante edonque odömongantapa. Ayæ Itota ingantedö ante mönö watapæ apænedö beyæ tömengä, Minitö mempoga wænämai incæminimpa, ante cædinque wantæpiyæ wænämai mönö quëwenguimämö ante edonque odömongacäimpa.

¹¹ Wængongui botö imote apænedinque, Itota ingantedö ante watapæ botö apænedö ante bitö apænebi eñencädänimpa, angantapa. Angä eñëninque botö adobai tömengä nänö nē da godömo imo inte ayæ nē odömonte apænebo imopa. ¹² Mänii beyæ botö mänömai wæwente quëwëmopa. Incæte, Æcänö ingante nē wede pönëmo imopa, ante do eñëmo inte botö guingo imönämai imopa. Edæ botö quinö tömengä ingante godönimo incæ tömengä mäninö

æninque nanguï tæi ewocacä inongä inte tömengä nänö apænte anguiönæ ganca wææ cæcæcäimpa. Mäninö ante botö ædæmö eñemopa.

¹³ Botö bitö imite odömönte apænebo bitö eñeninö ante bitö ñimpo cädämaï ee nææncæbiimpa. Wæætë, Mäninö nö ante mönö adodö adodö ante odömönte apænedö impa, ante bitö adobaï adodö ante odömönte apæncæbiimpa. Mönö Itota Codito nempo quëwëmi inte wede pönëninque waadete pönente odömönte apæncæbiimpa. ¹⁴ Wængongui, Wææ aacæbiimpa, ante bitö imite pönongä ænimi inte bitö tömengä waa pöni nänö pönongainö ante wææ aacæbiimpa. Edæ mönö Wængongui Önöwoca tönö ewocate quëwëmompä. Ininque bitö tömengä tönö cædinque wææ aacæbiimpa.

¹⁵ Atiabæ quëwënäni iñömö tömänäni botö imote emö cæte godänitapa, ante bitö do eñemipa. Edæ Piguëdo tönö Edömogænæ incæ tömënäni tönö botö imote emö cæte godatapa. ¹⁶ Önetipodo guiquënë botö wæwëmo adinque tömengä wæætë wæætë pönö cæcä beyænque botö wampo pönentabopa. Ayæ adobaï botö imote yæguincamë inte ñä cæyænte tee mönedäni wæyömote tömengä guingo imönämaï ingacäimpa. Ininque tömengä tönö godongämæ quëwënäni inänite mönö Awënë Itota Codito waadete pönö waa cæcæcäimpa, ämopa. ¹⁷ Edæ Odömä näni quëwëñömö iñömö pöninque Önetipodo botö imo ante nanguï diqui diqui mininque ate ate iinque mingacäimpa. ¹⁸ Botö Epeto näni quëwëñömö mäniñömö quëwëñömote tömengä æbänö botö beyæ pönö nanguï cæcantapa, ante bitö do ædæmö eñemipa. Mänömaï beyæ botö iinque baquiönæ iñonte Wængongui tömengä ingante pönö waadete waa cæcæcäimpa, ämopa.

2

Itota Codito beyæ waa tontado bai cæcæcäimpa

¹ Ayæ bitö botö wëmi bai inömi inte eñëmi. Itota Codito nempo quëwëñömite tömengä waadete pönö cæcä beyænque bitö tæi ewocabi incæbiimpa, ämopa.

² Waodäni tæiyænäni eñëñönäni botö æbänö ante apænebo bitö eñeninö ante bitö wæætë wadäni në pönënanite inte cöwë ædæmö cädäni iñönänite adodö ante odömönte apænebi eñencædänimpa. Eñëninque tömënäni në nö cädönäni inte adobaï wadäni inänite odömönte apænequinäni inänipa, ante tömënäni inänite ämi gocædänimpa.

³ Bitö Itota Codito beyæ waa tontado bai inömi inte bitö wæwëmi incæ ee ongönte godömenque cæcæbiimpa, ämopa. ⁴ Waocä tontado badinque nänö cæyedë tömengä, Botö awënë botö imote waa acæcäimpa, ante tömengä nänö änonque ante eñente cæcæboimpa, äninque wadäni tontado inämaï inäni näni cæbaï cädämaï inongä ingampa. ⁵ Gänä cæcæte ante në owempocä iñömö, Cöwë näni cægä bai owempoedäni, ante näni wææ angainö ante eñente cæcä iinque tömenganque godömenque waa owempodinque gänä cædinque poganta æmaingampa. ⁶ Amiña bayedë pancamonga pancamonga æñönäni gönea ante në nanguï cæcä iñömö tömengä täno ænguënengä ingampa. ⁷ Mäninö imæca quëwënäni näni cæ bai ante mënea go adodeque botö äninö ante pönëñömi mönö Awënë edæ bitö imite odömöngä eñëninque bitö edonque pöni eñencæbiimpa.

⁸ Itota Codito awënë Dabii wodi nänö præingä inongä inte do wæninque në ñäni ömæmongaingä ingante ante pönencæbiimpa. Mäninö ante watapæ botö apænedö impa. ⁹ Mänine beyænque botö caate wæwëmo imopa. Edæ në wënæ wënæ cæcä ingante tee mönecönë ñä cæyænäni bai botö imote adobaï mäniñe botö apænedö beyænque ñä cädäni wæbopa. Incæte Wængongui nänö angainö ædö cæte ñä cæyænte inguii. ¹⁰ Mänömaï beyæ Wængongui nänö apænte æninäni beyænque ante cæyömote wadäni anca wënæ wënæ cädäni wæbo incæte botö ñimpo cädämaï inte godömenque cæbopa. Edæ Wængongui nänö ñäö apäiyömö näni cöwë quëwënguinque mäniñäni Itota Codito ængä beyænque tömengä nempo quëwëncædänimpa, ante cædinque botö wæwëmo incæte godömenque cæbopa.

11 Iīmaī ante nāni ānō nāwangā ante impa. Mönō Itota Codito tönō godongāmæ wængaīmō inte adobaī tōmengā tönō cōwē wænāmaī quēwencæmōimpa.

12 Mönō tōmengā tönō ñimpo cædāmaī inte ee cæte wæwēmō inte adobaī tōmengā tönō nē awēnēidi badinque godongāmæ aacæmōimpa.

Mönō, Tōmengā ingā dicæ abogaa, ämō ñinque tōmengā adobaī nāēmæ mönō imonte, Dicæ abogaa, ämaingampa.

13 Mönō wede pönēnō ante ædæmō cædāmaī imō incæte tōmengā guiquēnē mönō imonte cōwē pönēninque cōwē ædæmō cædongā ingampa.

Iñæmpa tōmengā iñōmō nāmā nānō ingainō ante ñimpo cædāmaī ñongā inte tōmengā wadō ante pönēnāmaī ingampa.

Wængonguī bitō imi, Waa cæbi abopa, an-guingā, ante

14 Waodāni ñānite apænedinque bitō, Māninō ante pönēdāni, ante wæætē wæætē ancæbiimpa. Mönō Wængonguī ayongā iīmaī ante wææ ante nanguī apænebi eñencædānimpa. Mīnitō, Ædedō i, ante wadodō wadō ante piinte tededāmaī incæminimpa. Iñæmpa mǎnōmaī baī āninqe mönō ānō iñōmō ōnonque ante impa. Ayæ mǎnōmaī ante tedemō eñēninque nē eñēnāni iñōmō æmæ pönente babānānipa, ante bitō wææ ancæbiimpa, ämopa. 15 Bitō Wængonguī ayongā, Botō nē waa cæbo incæboimpa, ante nanguī cæcæbiimpa. Nē cæbo inte guingo imōnāmaī incæboimpa, ante cædinque Wængonguī nō nānō angainō ante tōmēmi nē ædæmō eñente entawēninque māninonque ante tōinō ante wadāni ñānite waa odōmonte apænecæbiimpa. 16 Tæiyæ waēmō ewocadāmaī inte wadāni ōnonquedō ante tedeyōnāni bitō tōmēnāni ñānite eñēnāmaī inte nānēnē wadæ goe. Edæ mānināni Wængonguī ingante emō cædinque cōwē godōmenque wiwa nāni cæquinque wadæ godānipa. 17 Baō ñōmæiñōmō aca podinque nanguī godōmenque baayō baī mānināni nāni odōmonte apænewēnō

adobaī wodo wodo go ñinque wadāni tæiyænāni eñēninque oda cæcædānimpa.

Mānināni nāni tedewencabo iñōnāni Iīmēneo tönō Pideto adodaque ñapa.

18 Tömēna Wængonguī nāwangā nānō angainō ante ñimpo cæte wadæ godāna ñapa. Ayæ, Mönō ñāni ōmæmōnō iñōmō ñinque bagatimpa, ante tedewēna eñēninque wadāni pancadāniya nāni wede pönēnō incæ wido cæte baī quēwēnānipa.

19 Incæte Wængonguī nāwangā nānō angainō mönō pönēnō iñōmō tæi gōnonte baī cōwē ongompa. Māninō ante mēnea ante iīmaī yewæmonte baī ongompa.

Edæ Wængonguī Awēnē tōmengā quīnāni ædānidō ñānii, ante do eñengampa. Ayæ tōmengā emōwo ante, Botō Awēnē ñongā ingampa, ante nē ānāni iñōmō tōmēnāni tōmānāni, Mönō wiwa cædimāmo ante wæte wædinque wadæ goquēnēnāni ñānipa.

20 Nē ēacā oncōnē ñæncōnē tōmengā nānō waa waa cō cæincade iñōmō odo inte padata inte nāni badōincade mæ ongompa. Adobaī wacade awæmpaincade daicade incade mæ ongompa. Pancacadea iñōmō waēmoncooque da wēincade incadepa. Wacade guiquēnē ōmæpocooque da wēincade incadepa. 21 Waocā wēnæ wēnæ nānō entawēnō ante ñimpo cædinque nāmā ñā mēnongate baī quēwengā ñinque tōmengā iñōmō waēmoncooque da wēincade baī ñongā inte Wængonguī beyæ waa cæcā ñaingampa. Tōmengā tæiyæ waēmō ewocate quēwengā babaingampa. ñinque tōmengā Awēnē nānō ānō ante do cæcā ñaingampa. Ayæ, Quīnō waa cæquīnō i, ante tōmengā do cæcā ñaingampa.

22 Edēnināni wiwa nāni cæinēnō ante bitō ñimpo cæte wodii gote baī quēwencæbiimpa. Wæætē waodāni mīmō ñā mēnongate entawēnāni inte Wængonguī ingante nē apænedāni tönō bitō nō cæquēnēnō ante cæte quēwencæbiimpa. Mönō wede pönēnō ante godōmenque pönente quēwencæbiimpa. Waodāni ñānite godōmenque waadete pönencæte ante cæcæbiimpa. Ayæ mönō piyænē cæte quēwenguīmāmo ante pönēninque cæcæbiimpa. 23 Ōnonquedō ante apænedinque nē, Ædedō i, ante wacā tönō guēadō guēa tedewengā mǎnōmaī tedecā beyænque wadodō wadō

piinte tedewënänipa, ante do eñëmipa. Ìnque tõmënäni nē pönënämaï inäni inte õnonquedö ante apæneyönäni bitö tõmënäni tõnõ godongämæ apænedämaï incæbiimpa.

²⁴ Mönö Awënë ingante nē cæcä iñömö tõmengä wadäni tõnõ wadodö wadö piinte tededämaï incæcäimpa. Wæætē tõmännäni inänite ædæmõ cæcæcäimpa. Ayæ wadäni tõmengä ingante wënæ wënæ cædäni adinque tõmengä wæætē piinämaï inte piyænē cæcæcäimpa. Ayæ tõmengä nē waa odömönte apænecä incæcäimpa. ²⁵ Tõmengä apænecä eñëninque nē eñënäni iñömö Baa ante wadö änäni inänite tõmengä ædæmõ cæte, Ìlmaï impa, ante odömönte apænecä eñencædänimpa. Edæ Wængonguï pönö cæcä ate tõmënäni nämä incæ, Wënæ wënæ cæmõ awædö, ante wædinque tõmengä näwangä nänö angainö ante eñencædänimpa, ante pönente cæcæcäimpa. ²⁶ Ayæ tõmënäni eñënämaï encadäni incæ nē eñenguinäni wæætē bacædänimpa, ante pönente cæcæcäimpa. Wënæ iñömö tõmënäni inänite bæi ongöninque tõmengä, Botö anö eñente quëwencæminimpa, ante godö cæcä ate tõmengä nänö nē bæi ongönäni wæætē aamõ cæte wodii gocædänimpa, ante adobaï pönente cæcæcäimpa.

3

Ìnque bayedë waodäni æbänö quëwenguinäni, ante

¹ Timoteo eñëmi. Ìnque eönæ bacæ cæyedë wënæ wënæ ba wæquinö anguënë. ² Mänïñedë edæ waodäni nämanque waadete pönenguinäni inänipa. Tõmënäni nänï godonte æninta waadete pönente nänï wædö ante quëwenguinäni inänipa. Tõmënäni nämanque, Botö gomonga waa cæbo imopa, ante pönenguinäni inänipa. Wængonguï ingante godö wënæ wënæ ante babæ anguinäni inänipa. Wadäni inänite badete toquinäni inänipa. Wëñænäni incæ wæmpoda inate eñënämaï cæquinäni inänipa. Wadäni pönö waa cædäni incæte tõmënäni nē waa cædäni inänite wæætē waa cædämaï inguinäni inänipa. Ayæ tæiyæ wæmõ entawënämaï inguinänimpa. ³ Adobaï waadete pönënämaï quëwenguinäni inänipa. Mäninäni inänite wënæ wënæ cædäni

adinque tõmënäni wæætē piininque ñimpo cædämaï inte wënæ wënæ cæquinäni inänipa. Wadäni inänitedö ante babæ ante anewenguinäni inänipa. Tõmënäni nänï cæinewënö ante nämä wææ änämaï inte do cæquinäni inänipa. Ayæ wadäni inänite ædæmõ cædämaï inte piinte cæquinäni inänipa. Wadäni, Quinö waa impa, ante piinguinäni inänipa. ⁴ Tõmënäni nänï guidänäni incæ, Wënæ wënæ bate wæcædänimpa, ante godö odömönguinanäni inänipa. Tõmënäni pönënämaï inte do wënæ wënæ cæquinäni inänipa. Tõmënäni nämä incæ, Botö gomonga waa eñëmopa, ante pönewenguinäni inänipa. Wængonguï ingante waadete pönënämaï inguinäni inte wæætē tote quëwengæimpa, ante nämanque waadete pönenguinäni inänipa. ⁵ Tõmënäni Wængonguï ayongä waa cæte quëwënäni bai adobaï cædäni incæte Wængonguï nänö tæi piñæmämö piwëninque nämanque cæte quëwënänipa töö.

Ìnque bitö mäninäni inänite gomö ae. ⁶ Mänömaï bai cædäni iñömö waa apænedinque waodäni oncönë wäänë guidänipa. Onquiyænäni wii tæimö entawënäni inte tõmënäni nänï wënæ wënæ cædi teëmëmö mongænte bai inäni iñönänite oncönë nē guidäni iñömö, Onquiyænäni mõnitö apænedö ante eñente cæcædänimpa, ante cædäni ate onquiyænäni wæætē oda cæte godänipa. Mäninäni onquiyænäni iñömö, Quiëmë nänï wënæ wënæ cæinëmämö, ante wadö gote wadö gote oda cædänipa. ⁷ Tõmënäni cöwë eñencæte ante cædäni incæte wapiti wapiti cædäni ininque Wængonguï näwangä nänö angainö ante cöwë eñente badämaï inänipa. ⁸ Wëenëñedë Mõitee wodi Equitobæ tæiyæ awënë ingante apæneyongä Aanee tõnõ Aämodee nē idöna inte Mõitee ingante piininque, Ononque angampa, äna ingadäimpa. Ìnque bayedë nē wënæ wënæ cædäni guiquënë iina inöna nänä cægaï bai adobaï cædinque Wængonguï näwangä nänö angainö ante Baa ante wadö änäni inänipa. Tõmënäni ocaidë pönente wentamö encadäni inte oda cæte godänipa. Ìnque Wængonguï ingante mõnõ pönëmämö incæ dicæ pönënäniyaa. Wængonguï tõmënäni

inänite Baa ancæcäimpa. ⁹ İñæmpa ædö cæte godömenque cæquïnänii. Mänina nē idöna nāna önonque cægainö ante edonque agadāni bai tömēnāni nāni önonque cædinö ante waodāni tömānāni adobai edonque pönī acædänimpa.

Timoteo ingante Pabodo iinque wææ angampa

¹⁰ Bitö iñömö, Æbänö botö odömonte apæneboo, ante, Æbänö waa quëwëmoo, ante, Æbänö pönente ante, İimai cæcæboimpa, ante cæboo, ante bitö tömānö ante do ëñēmipa. Ayæ Wængongui ingante botö pönēmāmo ante waodāni inänite botö ee cæpāmo ante botö waadete pönēmāmo ante botö wæntædāmai inte cæpāmo ante bitö adobai do ëñēmipa. ¹¹ Ayæ botö imote togænte pänāni botö wæpāmo ante ayæ botö wæwēmāmo ante bitö do ëñēmipa. Wadāni quiēmē wënæ wënæ cæcæte ante botö imote togænte pänāni wæbo incæ botö wæntæye ināmai intabopa. Antioquiya iñömö İcönio iñömö adobai Ditada nāni quëwëñömö māniñömö wënæ wënæ cædāni wæbo incæte mönö Awënë ö ængä beyænque ayæ quëwëmo imopa. ¹² Nö ante impa. Æcänö, Botö Itota Codito nempo quëwëmo inte Wængongui ayongä waa cæte quëwencæboimpa, ante äna tömengä ingante togæwëninque wënæ wënæ cædāni wæquingä ingampa. ¹³ Waodāni wënæ wënæ cædāni tönö, Oda cæcædänimpa, ante nē cædāni iñömö tömēnāni nē wënæ wënæ cædināni inte godömenque wënæ wënæ cæquïnāni inänipa. Edæ mänināni inänite wapiticæ mäodāni oda cæte cædināni inte tömēnāni wæætē wadāni inänite adodö, Æpiticæmē oda cæquïnānidö, ante cæcædänimpa.

¹⁴ Bitö guiquënë æbänö ëñēnīmi inte, Nö impa, ante pönēninque cöwē ñimpo cædāmai incæbiimpa. Edæ bitö imi ædānidö odömonte apænedāni, ante do ëñēmipa. ¹⁵ Wængongui angä ëñente tæiyæ waëmö nāni yewæmongainö ante bitö wëñæmiyedē mä ëñēninque ñöwo ganca do ëñēmitawo. Mäninö ante nāni yewæmongainta ate ëñēninque bitö Itota Codito ingante pönēñömi tömengä ængä beyænque quëwencæbiimpa.

¹⁶ Wængongui pönö apænecä ëñēninque waodāni tömēnāni nāni ëñēnonque ante Wængongui beyæ yewæmongadänimpa. Tömēnāni Wængongui nänö odömonte apænegainö ante nāni yewæmongainta adinque mönö, Æbänö waa impa, ante ëñēninque mönö odömonte apænecæimpa. Wængongui angä ëñente nāni yewæmongainta adinque, Quinö mönö wënæ wënæ cædinö ii, ante mönö do ëñēninque nē wënæ wënæ cæcä ingante mönö wææ angæimpa. Ayæ Wængongui angä ëñente nāni yewæmongainta adinque nē oda cæte wæcä ingante, Mönö nöinö cæquënēnö iimai impa, ante mönö odömonte apænecæimpa. Nö cæte quëwencæminimpa, ante odömonte apænete ongö ate mönö ëñēnö ante mönö waodāni inänite odömonte apænecæimpa. ¹⁷ Edæ Wængongui beyæ nē odömonte apænecä iñömö eyepæ ëñengä inte tömengä nänö waa cæquimāmo tömāmāmo ante cæcæcäimpa, ante odömonte apænecæte ante yewæmongadänimpa.

4

¹ Waodāni miināni quëwēnāni incæ do wængaināni incæ tömānāni inänite mönö Itota Codito nē apænte anguingä inte tömengä Awënë Odeye badinque ponte a ongongä acæimpa. Tömengä ayongä ayæ mönö Mæmpo Wængongui ayongä botö bitö imite, İimai cæe, ämopa. ² Wængongui nänö angainö ante apænebi ëñencædänimpa. Waodāni Ao ante, Æñēinēmöni ante änāni incæ Baa ante ëñēnāmai ināni incæ bitö cöwē apænebi ëñēnānie. Wængongui nänö angainö ante oda cæte wædāni adinque bitö, Mönö nöinö cæquënēnö ante cæcæminimpa, ancæbiimpa. Wënæ wënæ cædāni inänite, Ædö cæte mänömai cæminii, ante nangui ancæbiimpa. Ayæ adobai, Wampo pönencædänimpa, ante ædæmö apænebi ëñencædänimpa. Mäninö tömānö cædinque nangui waadete ee cædinque adodö adodö ante odömonte apænebi ëñencædänimpa.

³ İncayæ ate nö odömonte mönö apænedö ante waodāni Baa anguināni inänipa. Mäninö ante ëñēnāmai incæmönimpa, ante änāni inte tömēnāni wæætē, Mönö

ēñēinēnonque ante odōmonte apæneedāni, ante nē odōmonte apænedōnāni nanguī ināni inānite diqui diqui minte acædānimpa. Māninquedō ante ēñencæmōnimpa, ante anguināni inānipa. ⁴ Mānināni nāwangā angainō ante ēñēnāmaī inte wadæ godinque wæætē ōnonquedō ante dodāni nāni angainō ante ēñente cæquināni inānipa. ⁵ Bitō guiquēnē tōmēmi quēwenganca æbāmē baquī incæ godōmenque cæcæbiimpa. Caate wæbi incæte bitō ñimpo cædāmaī inte godōmenque cæcæbiimpa. Wængonguī waa pōnī nānō apænedō ante apænebi ēñencædānimpa. Bitō cæquēnēnō tōmāā iinque cæcæbiimpa.

⁶ Wængonguī quī, ante nāni godōnō bai botō adobai iñōmote wantæ iñonte wænōnāni wæncæboimpa. Edæ botō wænguionæ oo pōnī impa. ⁷ Botō tæi ewocabo inte Awēnē Itota beyæ botō cæquēnēnō waa pōnī iinque cætabopa. Gānā cæcæte ante nē pogodo godāni næ gongænāmaī nāni iinque goganca godāni bai botō adobai tōmēmo quēwenganca wæntæye ināmaī inte iinque cætabopa. Mōnō wede pōnēnō ante botō ñimpo cædāmaī inte cōwē pōnentabopa. ⁸ Mōnō Awēnē nē nō apænte anguingā iñōmō tōmengā nānō apænte anguionæ iñonte tōmengā, Bitō nō pōnente waa cædimi inte bitō waa cædinta ante poganta æncæbiimpa, ante botō imote pōnongā æncæboimpa. Wīi botō adoboque iñōmote pōnongā æncæboimpa. Wadāni adobai tōmengā nānō pongā aquionæ ante nanguī ainente nē wānō cōnāni ināni adinque tōmengā, Mīnitō nō cæte quēwēnimīni inte mīnitō waa cædinta ante poganta æncæminimpa, ante tōmēnāni tōmānāni inānite pōnongā æncædānimpa.

Tímoteo quīnō cæcæcāimpa, ante

⁹ Bitō eyepæ inte botō weca quingæ pōe, āmopa. ¹⁰ Deēma iñōmō inguipogaque ante botō imote emō cæte Tetadōnica nāni quēwēñōmō gocantapa. Ayæ Quedente iñōmō Gadatiabæ iñōmō gocantapa. Adobai Tito Dadāmatiabæ iñōmō gocantapa. ¹¹ Odoca adocanque botō weca ongongampa. Māadoco ingante adinque tōmengā ingante botō weca ænte māmōmi pongāi. Edæ botō cæquēnēnō ante

cæyōmote tōmengā botō tōnō guēa nanguī cæcā ingampa. ¹² Ayæ Tiquico ingante botō Epeto iñōmō da godōmo gocantapa. ¹³ Botō yacoo ocoi ā weocoo Todoa iñōmō Cadopo oncōnē botō emō cæte pōnincoo bitō ponte ate ænte pōe. Adobai botō dibodocoo ænte māmōmi æmoe. Botō tæinetacoo yewæmōintacoo, ante godōmenque wæbopa. Māninta cōwē māmōmi æncæboimpa, āmopa.

¹⁴ Adecantodo tæineta nē badongā iñongā iñōmō botō imote nanguī wænæ wænæ cæcā wætabopa. Mānōmaī cæcā adinque Wængonguī edæ tōmengā nānō wænæ wænæ cædinganca māninganca tōmengā ingante wæætē pancæcāimpa, āmopa. ¹⁵ Māningā bitō imite adobai wænæ wænæ cædāmaī incæcāimpa, ante bitō adobai wææ cæcæbiimpa. Edæ mōnō odōmonte apænedō ante tōmengā cōwē Baa ante wadō ante quēwēnongā ingampa.

¹⁶ Botō imote nē apænte ānongā weca ænte māodāni gote ongōninqe botō nāmā incæ wææ ancæte ante mā apæneyōmo æcānō botō tōnō godongāmæ āna edæ dæ ānāni wætabopa. Tōmānāni edæ botō imote emō cæte wadæ godānitapa. Mānōmaī nāni cædinō beyæ Wængonguī tōmēnāni inānite pīināmaī incæcāimpa, āmopa. ¹⁷ Incæte, Wadāni wīi oodeoidi ināni tōmāmæ quēwēnāni Wængonguī waa pōnī nānō apænedō ante ēñencædānimpa, ante cædinque mōnō Awēnē iñōmō botō gānē ongōninqe botō tōnō godongāmæ cæcā beyænque tæi ewocabo inte apænetabopa. Iimæca awēnē nempo wæwente quēwēñōmote mōnō Awēnē wæætē gā pe æmpote ō ængā beyænque quēwēmopa. ¹⁸ Mānōmaī bai cædinque botō imote quīēmē wænæ wænæ cædāni wæbo incæ mōnō Awēnē Odeye botō imote ænguingā beyænque quēwencæboimpa. Adobai tōmengā ōnædē nānō aayōmō botō imote adimongā ænte mæicā æite goquimo imopa. Wængonguī ñāō apāite bai emōnongā ingante mōnō cōwē waa acæimpa, āmopa. Mānōmaī babaimpa, ante Amēē, ante āmopa.

Tímoteo ingante Pabodo, Waa quēwencæbiimpa, angampa

¹⁹ Pidica tönö Aquidæ nāna gæncaya waa quēwencædaimpa, ämopa. Bitö tömēna inate adodö apænebi eñēnae. Adobaï Önetipodo tönö godongāmæ quēwēnāni waa quēwencædānimpa, ämopa. Bitö tömēnāni inānite adodö apænebi eñēnānie. ²⁰ Edaato Coodinto iñömö ayæ a ongongantapa. Ayæ Todopimo nē wēnæ wēnæ iñongā botö tömengä ingante Müideto iñömö emö cæte gotabopa. ²¹ Bitö eyepæ inte cöönædepo badāmaï iñedē botö weca quingæ pœe, ämopa. Eobodo iñömö tömengä, Bitö waa quēwencæbiimpa, angä eñēninque botö bitö imite adodö ämo eñēe. Podænta tönö Diino ayæ Codaodia tönö möni pönencabo tömāmöni bitö imite, Waa quēwencæbiimpa, ämönipa.

²² Mönö Awēnē Itota Codito bitö tönö on-gonte incæcäimpa, ämopa. Ayæ Wængonguï bitö imite waadete pönö cæcæcäimpa, ante mäninque ante yewæmömopa.

Tito ingante Pabodo cadota ante nänö yewæmongainta

Tito ingante Pabodo yewæmongampa

¹ Botö Pabodobo inömo imopa. Wængongui ingante nē cæbo iñömote Itota Codito, Bitö Wængongui nänö nē apænte æninäni inänite apænebi eñencædänimpa, ante da godongä ate botö tömengä nänö nē da godongaïmo imopa. Tömengä, Tömänäni botö imote nänö wede pönönö ante godömenque wede pönencædänimpa, ante cæcæbiimpa, ante da godongä gotabopa. Ayæ, Wængongui näwangä nänö angainö ante eñente entawëninque tömännäni tömengä ayongä waa cæte quëwencædänimpa, ante cædinque Itota Codito botö imote da godongä godïmo imopa. ² Edæ, Ìncayæ ate mönö wænämaï quëwenguinö gocæmöimpa, ante eñëninque pönencædänimpa, ante Wængongui nē babæ änämaï inongä inte wëenëñedë inguipoga badönämaï iñedë iïmaï angacäimpa. Mini wænämaï quëwenguimämo ante pönömo æninque mïnitö wæætë wantæpiyæ cöwë quëwencæmïnimpa, ante cægacäimpa. ³ Mänömaï cædinque tömengä, iñedë cæcæboimpa, ante nänö angaiñedë iinque bayedë tömengä nänö angainö ante edonque pönö odömonte apænegacäimpa. Edæ, Quëwencæmïnimpa, ante mönö imonte nē Ængaingä inte Wængongui mäninö nänö angainö ante, Bitö odömonte apænebi eñencædänimpa, ante botö imote angä eñëñömote da godongä godïmo imopa.

⁴ Tito eñëmi. Bitö acæbiimpa, ante yewæmömopa. Edæ godongämæ mönö wede pönönö ante apænebo nē eñëmi inte bitö Itota Codito quïmi badinque botö näwä wëmi bai inömi imipa. Ìninqe botö, Mæmpo Wængongui tönö Itota Codito mönö imonte nē Ængaingä tönö waadete pönö cæda ate bitö gänë entawencæbiimpa, ämopa.

Cædeta nänö änöwænë iñömö Tito nänö cædö ante

⁵ Cædeta nänö änöwænë iñömö botö cæquënönö ante wii eyepæ cæbo adinque botö, Bitö godömenque quëwëninque

tömänö iinque cæcæbiimpa, ante botö bitö imite emö cæte gotabopa. Adobaï wayömö wayömö nänö quëwëñömö godinque bitö botö äninö bai cædinque, Mini pönencabo iñömïnite iñänö nē aadäni Picännäni bacædänimpa, ante cæcæbiimpa, ante cædinque botö bitö imite mäniñömö emö cæte gotabopa. ⁶ Wadäni, Nē aacä Picængä wënæ wënæ cæcä ingampa, ante änämaï incædänimpa, ante wææ cædinque nē aacä Picængä wæætë waa quëwenguëngä ingampa. Edæ tömengä nänöogænä adodanque nē manguiwengä incæcäimpa. Tömengä wëñænäni Itota Codito ingante nē pönännäni incædänimpa. Ayæ tömännäni inänite adinque, Babæidi bai quëwännäni inänipa, ante ayæ, Eñënämaï cæte quëwännäni, ante wadäni änämaï incædänimpa, ante nē aacä Picængä iñömö wææ aacæcäimpa.

⁷ Mönö pönencabo iñömote nē aacä ingante Wængongui, Botö cædö ante cæcæbiimpa, ante pönö angä eñëninque tömengä Wængongui beyæ ante nē cæcä ingampa. Ìninqe waodäni, Nē aacä wënæ wënæ cæcä ingampa, ante änämaï incædänimpa, ante wææ cædinque nē aacä wæætë cöwë waa quëwenguëngä ingampa. Wadäni tömengä ingante apænedäni incæ tömengä wæætë, Botö ædö cæte eñënguimoo, ante änämaï incæcäimpa. Tömengä wii quingæ piïnte bacæcäimpa. Tömengä ti nämæ nē nanguï bewengä inämaï incæcäimpa. Tömengä piyænë cæcä incæcäimpa. Babæ cæbo incæte godonte nänö æinta cöwë godömenque æncæboimpa, ante wadäni nänö pönëwënonque ante nē aacä iñömö mäniñö ante pönännämaï incæcäimpa. ⁸ Wadäni inänite, Botö oncönë pö cædäni, ante cöwë nē watapæ angä incæcäimpa. Ayæ, Quinö waa impa, ante mäniñonque cæinengä incæcäimpa. Nöinö cæcæimpa, ante pönëninque nämä wææ ante cæcä incæcäimpa. Wængongui nänö cædö ante cöwë cædongä inte nē aacä wæætë nämä wææ äninque nämä nänö cæinëwënö ante cædämaï incæcäimpa.

⁹ Ayæ adobaï Wængongui nö pönö nänö angainö ante möni odömonte apænegainö bai adobaï entawëninque tömengä ñimpo

cædāmaī quēwenguēnengā ingampa. Edæ mōnō pōnencabo iñōmonte tōmengā ædæmō apænedinque nō pōni mōnō odōmonte apænedō ante odōmonte apænegacāimpa. Tōmengā odōmonte apænegā eñēninquē pancadāniya, Baa ante wadō ānāni incæ tōmengā wæætē tōmēnāni inānite, Mānīnō ante mīni odōmonte apænedinō wapiticæ ī apa quēwēmīni, ante nē aacā inongā inte wææ ancæcāimpa, āmopa.

¹⁰ Edæ nē odōmonte apænedāni inānite, Mōnitō eñēnāmaī cæinēmōnīpa, ante nē ānāni tæiyænāni inānīpa. Tōmēnāni iñōmō ōnonquedō ante tedewēnōnāni inte, Wadāni oda cæcædānīpa, ante nē cædōnāni inānīpa tōō. Pancadāniya, Mōnō eō togænte quēwengæīpa, ante nē pōnēnāni nāni cæcabo iñōmō godōmenque nanguī pōni mānōmaī babæ cæte quēwēnānīpa. ¹¹ Tōmēnāni, Babæ cæmōni incæte mōnitō odōmonte apænedō beyænque godonte nāni æinta cōwē æncæmōnīpa, ante pōnente cædānīpa. Mōnō odōmonte apænedāmaī inguēnēnō ante odōmonte apænedāni eñēninquē nē eñēnāni pancadāniya tōmēnāni nāni godongāmæ quēwencabo tōnō oda cæte wædānīpa cæbīi. Edæ mānīnō tōmēnāni babæ cæte nāni odōmonte apænewēnō ante odōmonte apænedāmaī incædānīpa, ante bitō, Apocænē inguēnē quēwēedāni, ante wææ ante cæquēnēmi īmīpa.

¹² Edæ Cædetabæ iñōmō nāni quēwencabo incæ adocanque tōmēnāni wængonguīdi beyæ nē apænegā iñōmō īmaī ante apænegacāimpa. “Cædetabæ quēwēnāni iñōmō cōwē babæ ante quēwēnāni inte babæidi baī wīwa cædānīpa. Tōmēnāni wæntæye ināni incæ cæowæodāni inte cænānīpa tōō.” ¹³ Mānīnō ante tōmengā nānō angainō nāwangā ante impa. Iniquē Itota ingante nē pōnēnāni incæ oda cæte wædāni adinque bitō, Nō pōnēnāni incædānīpa, ante tōmēnāni inānite nanguī ancæbiīpa. ¹⁴ Ayæ, Oodeoidi dodāni nāni ōnonquedō ante angainō ante pōnēnāmaī incædānīpa, ante bitō tōmēnāni inānite nanguī ancæbiīpa. Ayæ wadāni Wængonguī nāwangā nānō angainō ante Baa ante eñēnāmaī inōnāni incæ wadō ante wææ ānewēñōnāni bitō wæætē nē

pōnēnāni inānite, Mānīnō tōmēnāni nāni wææ ānewēnō ante mīnitō eñēnte cædāmaī iedāni, ante nanguī ancæbiīpa, āmopa.

¹⁵ Edæ nē wæmō entawente quēwēnāni iniquē edæ tōmēnāni ayōnāni quincōmē ī incæ tōmancoo edæ wæmoncoo īmaīpa. Wadāni guiquēnē nē wentamō entawente quēwēnāni inte Itota ingante pōnēnāmaī ināni iniquē edæ tōmēnāni ayōnāni quincōmē ī incæ tōmāancoo edæ wīi wæmoncoo īmaīpa. Iñæmpa adodāni nāmā nāni apænte pōnēnō incæ wentamō entawente quēwēnāni inte tōmēnāni nāni ocaidē pōnēnō adobaī wentamō encadāni inānīpa tōō. ¹⁶ Ināni iñōmō Wængonguī ingante, ate baī pōnēmōni īmōnīpa, ante ānāni incæte tōmēnāni cædō beyænque, Ināni Wængonguī ingante nē Baa ānāni inānīpa, ante edonque pōni bapa. Mānīnāni Wængonguī ingante eñēnāmaī cædōnāni inte edæ mōnō waa cæquēnēnō ante ædō cæte cæquīnāni. Iniquē tōmēnāni mōnō nē baacā baī inōnāni inānīpa.

2

Nō pōni mōnō odōmonte apænedō

¹ Bitō wæætē nō pōni mōnō odōmonte apænedō ante odōmonte apænegacābiīpa. ² Onguīñænāni picænāni inānite īmaī ante odōmonte apænebi eñencædānīpa. Tōmēnāni tī nāmæ nanguī bete quidi quidi dowænte badāmaī incædānīpa. Wadāni mōnitō īmōnite waa acædānīpa, ante onguīñænāni picænāni iñōmō nē eyepæ cæte quēwenguēnēnānīpa. Nōinō cæcæīpa, ante pōnēninquē nāmā wææ ante cæte quēwencædānīpa. Itota ingante mōnō pōnēnō ante wadāni inānite mōnō waadete pōnēnō ante tōmēnāni nōingā cædinque quēwencædānīpa. Wæntædāmaī inte ee mōnō cædō ante tōmēnāni adobaī nōingā cædinque quēwēnāni incædānīpa, ante bitō odōmonte apænebi eñencædānīpa, āmopa.

³ Ayæ onquiyænāni picænāni inānite adobaī īmaī ante odōmonte apænebi eñencædānīpa. Tōmēnāni, Wængonguī nānō angainō baī mōnō tæiyæ wæmō entawengæīpa, ante quēwencædānīpa. Wadāni inānitedō ante babæ ānāmaī

incædänimpa. Wadäni nangui yowepæ wædænque ti nämæ biinömæ nāni ämæ ante, Beboe beboe, ante nē bedāni bai iināni iñömö adobaï cæte quëwënāmaï incædänimpa. Adodāni, Quinö waa impa, ante mäninö ante odömönte apænecædänimpa, ante bitö onquiyænāni picænāni inänite odömönte apænebi eñencædänimpa, ämopa.

⁴ Mänömaï cæte quëwënāni inte tömënāni wæætë onquiyænāni wii picænāni inänite, iimaï cædāni, ante äninque, Minitö nänöogæidi inänite waadete pönëninque minitö wëñænāni inänite adobaï waadete pönente quëwëedāni, ante odömönte apænedāni eñencædänimpa. ⁵ Ayæ adobaï onquiyænāni wii picænāni inänite odömönte apænedinque, Nöinö cæcæimpa, ante pönëninque minitö nämä wææ ante cæte quëwencæminimpa. Minitö oncönë mini cæquënënö cöwë cædinque wadāni inänite ædæmö cæte quëwencæminimpa. Ayæ, Minitö nänöogæidi nāni änö ante eñente cædāni, ämi eñente odömönte apænecædänimpa. Edæ onquiyænāni picænāni mänömainö ante odömönte apænedāni eñëninque onquiyænāni wii picænāni wæætë waa cæte quëwënāni adinque wadāni Wængongui nänö angainö ante ædö cæte, Wënæ wënæ impa, ante babæ anguināni.

⁶ Onguiñænāni wii picænāni ināni iñömö adobaï tömënāni, Nöinö cæcæimpa, ante pönëninque nämä wææ ante cæte quëwencædänimpa, ante ædæmö apænebi eñencædänimpa. ⁷ Bitö tömënāni beyæ ante, Botö cæbaï tömënāni adobaï cæcædänimpa, ante bitö quiëmë cæbi incæ cöwë waa cæe. Ayæ bitö odömönte apænedö incæ nöingä ante odömönte apænedinque bitö önöneque änāmaï incæbiimpa. ⁸ Ayæ bitö imite nē Baa ante wadö änāni wæætë mönö imonte ante apænedinque, Mönitö ædö cæte wënæ wënæ anguimöni, ante wædinque edæ guingo imonte wæcædänimpa, ante cædinque bitö tömënāni inänite nöingä ante odömönte apænecæbiimpa. Edæ mänömaï nöinö odömönte apænebi eñëninque nē eñënāni wæætë, Wënæ wënæ odömönte apænedinö impa, ante änāmaï incædänimpa.

⁹ Waodāni inänite ö ænāni ate awënëidi beyænque cæte nē quëwënāni bate wæyönänite bitö tömënāni inänite iimaï ante odömönte apænebi eñencædänimpa. Edæ tömënāni awënëidi nāni änö ante tömänö eñente cæcædänimpa. Adobaï tömënāni, Mönitö imönite adinque awënëidi tocædänimpa, ante cæcædänimpa. Ayæ tömënāni awënëidi änāni eñëninque wæætedö wæætë änāmaï incædänimpa. ¹⁰ Adodāni iñömö awëmö ænāmaï quëwënāni inte wæætë, Mönitö cöwë nö eñente cæmöni imönipa, ante adinque mönitö awënëidi wæætë, Waa cæmini imönipa, ante pönencædänipa, ante nē cædāni iñömö waa cæcædänimpa. Tömënāni quiëmë cædāni incæ cöwë waa cædāni adinque wadāni Wængongui mönö imonte nē Ængaingä ingante nāni odömönte apænegainö waa impa, ante pönencædänimpa, ante bitö nē cædāni inänite mänömainö ante odömönte apænecæbiimpa, ämopa.

¹¹ Edæ waodāni quinänidö ināni incæte mönö Mæmpo Wængongui tömänāni inänite waadete pönö cædinque, Botö æmo beyænque quëwenguimini, ante odömöngä ininque edonque pönö ba agadänimpa. ¹² Tömengä nänö waadete pönö cædönö ante edonque pönö adinque mönö iimaï ante eñëmö imompa. Wængongui ingante wapiticæ pönëninque mönö cædö ante mönö Baa ante ñimpo cæte quëwengæimpa. Inguipoga ante nāni wënæ wënæ cæinëwënö ante mönö Baa ante ñimpo cæte quëwengæimpa. Nöwoyedë mönö, Nöinö cæcæimpa, ante pönëninque nämä wææ ante cæte quëwengæimpa. Wængongui ayongä waa cæte quëwëninque ¹³ mönö Itota Codito nänö pöönæ wat-apæ mönö toquiönæ ante wänö cömö imompa. Edæ Itota Codito adocä mönö Wængongui mönö nē tæi piñænongä inongä inte mönö imonte nē Ængaingä ingacäimpa. Tömengä iñömö nē ñäö apäite bai emönongä inte poncæcäimpa, ante wänö cömompa. ¹⁴ Mönö wiwa cægainö tömänö adinque tömengä iñömö, Botö æmo beyænque quëwenguimini, ante nämä wepæ godöninque wængacäimpa. Ayæ tömengä, Botö tömëmo beyæ ante minitö imönite

ñä mēnongate bai cæyōmote mīnitō botō quīmīni badinque, Quīnō waa impa, ante cæinente bacæmīnimpā, ante cægacāimpā.

¹⁵ Ayæ mānīnonque ante odōmonte apænedinque bitō waodāni inānite, ædæmō apænebi eñencædānimpā. Wadāni wēnæ wēnæ cædāni iñōnānite tōmēnāni inānite, Ædō cæte mānōmaī cæmīni, ante nanguī ānīnque awēnē bai inte apænebi eñencædānimpā. Bitō imite, Ædō cæte awēnē bai cæbii, ante pīinte anguinānii, ante pōnente quēwencæbiimpā.

3

Nē pōnēmō, Quīnō waa impa, ante mōnō cæquēnēnō

¹ Bitō weca nē pōnēnāni iñōnānite do mōnitō angainō nāni eñēnīnō incæ bitō tōmēnāni inānite adodō ante apænebi eñencædānimpā. Nē aadāni tōnō gobiedōno beyæ nē ānāni inānite eñēnīnque mīnitō tōmēnāni nāni ānō ante eñente cæcæmīnimpā, ante apænebi eñencædānimpā. Ayæ, Quīnō waa i, ante mānīnō do cæcæmīnimpā, ante apænebi eñencædānimpā.

² Ayæ æcāmenque ingante wēnæ wēnæ ante babæ ānāmaī incæmīnimpā. Piyænē cæte quēwēnīnque mīnitō wadāni tōnō wadodō wadō tedete pīināmaī incæmīnimpā. Waodāni tōmānāni inānite mīnitō ædæmō cæte quēwencæmīnimpā, ante bitō mānōmainō ante apænebi eñencædānimpā.

³ Edæ wēnēñedē mōnō adobai ocāi ōmædæca ingaimō inte eñēnāmaī cæte quēwengamōimpā. Mōnō wapiticæ pōnēnīnque oda cæte quēwengamōimpā. Quiēmē mōnō wēnæ wēnæ cæinēnō ante cæte quēwengamōimpā. Quiēmē nāmanque pōnente, Waa tote quēwengæimpā, ante cædinque mōnō cōwē ñimpo cædāmaī inte quēwengamōimpā. Waodāni inānite cōwē wīwa pōnente quēwengamōimpā. Wadāni godōmenque eadāni adīnque godō pīinte agamōimpā. Wadāni mōnō imonte pīiñōnāni mōnō wacā ingā wacā ingā pīinte quēwengamōimpā.

⁴ Incæte mōnō Wængonguī mōnō imonte, Quēwenguīmīni, ante nē Ængaingā pōnīnque tōmengā nānō waadete pōnēmāmo ante ayæ tōmengā nānō ædæmō cædōmāmo ante do odōmongacāimpā.

⁵ Tōmengā wīi mōnō

nō cægainō beyænque, Quēwenguīmīni, ante mōnō imonte ængacāimpā. Wæætē tōmengā nānō waadete pōnō waa cæinēnō beyænque mōnō imonte, Quēwenguīmīni, ante ængacāimpā. Mīnitō mempoga eñacæmīnimpā, ante Wængonguī mōnō mīmō mēnongacā entawēmompā. Ayæ Wængonguī mōnō imonte æñongā tōmengā Tæiyæ Waēmō Ōnōwoca pōnō cæcā beyænque mōnō mīmō entawente quēwēmompā.

⁶ Itota Codito mōnō imonte, Quēwenguīmīni, ante nē Ængaingā beyænque Wængonguī iñōmō mōnō imonte eyepæ pōni pōnō cædinque tōmengā Ōnōwoca ingante angā pō guicā ate entawente quēwēmompā.

⁷ Inīnque Wængonguī waadete pōnō cæcā ate mōnō tōmengā ayongā nō cæte quēwengaimō imompā. Ayæ tōmengā nānō waadete pōnō cægainō beyænque nē ænguīmō inte mōnō, Wænāmaī quēwengæimpā, ante ee pōnente quēwēmompā.

⁸ Mānōmainō ante nō ante impa. Edæ Wængonguī ingante do pōnēnāni iñōmō, Quīnō waa i, ante nāni pōnēnonque cōwē cæcædānimpā, ante bitō mānīnō ante wæætē wæætē adodō ante apænebi eñencædānimpā, amopa. Mānīnō ante waa pōni i inīnque tōmānāni beyæ adodō ante waa ingæimpā.

⁹ Wæætē, Æbānō i, ante nanguī wæætēdō wæætē ōnonquedō ante tedewēnāni bai bitō iñōmō tōmēnāni bai tededāmaī incæbiimpā. Dodāni, Æmōnānidō ingainānii, ante ancaa nāni ānewēnō ante pōnēnāmaī incæbiimpā. Ayæ wæætē godō wæætē godō tedewēnāni eñēnīnque bitō wæætē tededāmaī incæbiimpā. Ayæ idægoidi nāni wææ angainō ante godongāmæ wadodō wadō pīinte tedewēñōnāni bitō iñōmō iñāni tōnō tededāmaī incæbiimpā. Edæ mānōmaī nāni tededō iñōmō ōnonque tedete i inīnque edæ æcāmenque beyæ waa impa, ante dæ ampa cæbii.

¹⁰ Mīni pōnencabo incæ adocanque mānōmaī tedewengā beyænque wadāni nānēneto nānēnē godīnque wacabo wacabo badāni adīnque bitō wæætē nē tedewēnongā ingante adopoque wææ āmi eñencæcāimpā. Adopoque wææ āmi ate

tömengä eññämaï inte gomonga adobai cæte tedewengä adinque bitö tömengä ingante wæætë wææ ämi wæcæcäimpa. Mänömaï mempoga wææ ämi eññinque tömengä ñimpo cædämaï inte gomonga tedewengä ate wædinque bitö tömengä ingante Baa äninque gomö ae. ¹¹ Edæ mänömaï cædongä iñömö tömengä idiquibæ pönëongä inte nē wënæ wënæ cæcä ingampa. Tömengä nämä nänö apænte panguinque mänömaï cæcampa, ante do eññemipa.

Tito quïnö cæcæcäimpa, ante

¹² Botö cöönædepo iñonte Nincopodi nāni quëwëñömö quëwencæboimpa, ante pönentabopa. Ìninque Adotëma incæ Tiquico incæ æcänö bitö weca goquïnaa, ante pönëninque botö adocanque ingante ämo go pöñongä bitö eyepæ inte botö weca quingæ pöe, ämopa. ¹³ Abogado inte nē cæcä Teëna tönö Apodo gocæ cæyönote tömëna nāna goquïnö ante nāna ænguënënö wïi eyepæ ëada adinque bitö pædæ godömi ænte godæ. ¹⁴ Mönö tönö godongämæ nē pönënanï iñömö wïi önonque cæte quëwencædänimpa. Wæætë edæ wadäni wïi eyepæ ëadäni adinque tömënäni pædæ godönäni æncædänimpa, ante cædinque bitö apænebi eññinque tömënäni wæætë, Quïnö waa i, ante adinque mänïnonque ante cæte quëwencædänimpa.

Waa quëwencæmïnimpa, ante Pabodo yewæmongampa

¹⁵ Botö tönö nē ongönäni tömänäni bitö ïmite, Waa quëwencæbiimpa, ante apænedänipa, ante botö, Bitö acæbiimpa, ante yewæmömopa. Mönitö ïmönite nē waadete pönënanï inänite bitö, Waa quëwencæmïnimpa, ante mönitö beyæ ante apænebi eññencædänimpa. Wængonguï mïnitö tömämïni ïmïnite waadete pönö cæcæcäimpa, ante mäninque ante botö yewæmömopa.

Pidemöö ingante Pabodo cadota ante nänö yewæmongainta

Pidemöö ingante Pabodo yewæmongampa.

¹ Botö Pabodobo inömo inte Itota Codito ingantedö ante apænebo beyænque botö imote tee mönedäni tee mönegaïmo imopa. Mönö tönïñacä Timoteo tönö yewæmömönapa. Pidemöö möna nē waadebi inömi inte mönatö tönö godongämæ cædömi inömite mönatö, Bitö acæbiimpa, ante yewæmömönapa. ² Bitö oncönē inömo Itota Codito ingante mīni pönencabo godongämæ pönöminite mönatö mīnitö imīnite adobai yewæmömöna acæminimpa. Ayæ mönö mængä Apia tönö Adoquipo mönitö tönö godongämæ nē tontado bai cædongä tönö tömēna acædaimpa, ante yewæmömönapa. ³ Mönö Mæmpo Wængongui tönö Awēnē Itota Codito tönö godongämæ waadete pönö cæda ate mīnitö gänē entawencæminimpa, ämönapa.

Pidemöö nē waadete pönengä inte wede pönengä ingä

⁴⁻⁵ Bitö Awēnē Itota ingante wede pönēmi imipa, ante tömengä quīnāni inönāni inānite waadete pönēmi imipa, ante bitö imitedö ante änāni eñēnimo inte botö bitö beyæ ante Wængongui ingante botö apæneyedē adocä ingante cöwē waa ate pönente apænebopa. ⁶ Mäninö Itota Codito ingante bitö wede pönēnō ante wadāni inānite cöwē apænebi eñēninqe tömēnāni, Mönö tömengä waa pönī nänö entawēnoncoo incæ quincodö entawēmö imöö, ante ædæmō eñente bacædānimpa, ante nanguī cæcæbiimpa, ante botö bitö beyæ ante Wængongui ingante apænebopa. ⁷ Botö tönïñabi eñēmi. Itota Codito quīnāni inönāni inānite bitö waadete pönente cæbi ate tömēnāni gançæ entawente todānitapa, ante apænedāni eñēninqe botö nanguī watapæ todinqe wampo pönentabopa.

Pabodo Önetimo beyæ ante Pidemöö ingante angampa

⁸ Mänömaï beyæ mönö Awēnē Codito botö imote angä eñēninqe botö awēnē bai äninqe bitö cæquēnēnō ante, İmaï cæe, ante guīñēnāmaï inte bitö imite wææ ämo bai waa incædönimpa. ⁹ Incæte botö wææ änāmaï inte wæætē mönö waadete pönēmāmo beyænque ædæmō apænebopa. Botö Pabodobo inömo inte nē picæmo imopa. Ayæ nōwo botö Itota Codito ingantedö ante apænebo beyænque botö imote tee mönedäni tee mönegaïmo inte ämopa. ¹⁰ İninqe botö wengä onguīñängä Önetimo beyæ ante bitö imite ædæmō apænebopa. Edæ tee mönecönē botö quēwēñedē Önetimo ingante apænebo eñēninqe tömengä nē pönengä badinqe botö wengä bai bacä æntabopa cæbii.

¹¹ Wēēnēñedē tömengä bitö beyæ waa cædāmaï inte önonque quēwengacäimpa. Incæte tömengä nōwo inömo bitö beyæ incæ botö beyæ incæ nē waa cæcä bacäimpa. ¹² Tömengä botö nē waadecä ingä incæte tömengä ingante botö bitö weca ocæ emænte da godömo poncæcäimpa. ¹³ Itota ingantedö ante mönö watapæ apænedö beyænque botö imote tee mönedäni ongöninqe botö, Pidemöö dæ añonte Önetimo inömo tömengä beyæ botö weca ongöninqe botö tönö guēa cæcæcäimpa, ante pönēninqe ainentabopa. ¹⁴ Incæte æbāmenque pönö waa cæbi incæ wīi botö wææ änö beyænque cæcæbiimpa. Wæætē tömēmique pönente cæcæbiimpa, ante cætabopa. Bitö eñēnāmaï inte Ao änāmaï inömite botö ædö cæte Önetimo ingante, Bitö botö weca ongoncæbiimpa, ante anguimoo. ¹⁵ Önetimo bitö imite wantæyö wodii godingä inte nōwo adodö pönongante bitö tömengä ingante wæætē æñömi tömengä cöwē bitö tönö quēwencæcäimpa. Wabänö mänīi ante beyænque wantæyö wodii gocantawo. ¹⁶ Tömengä ingante bitö godonte ænte mami ate tömengä bitö beyænque cæte nē quēwēningä ingä incæte tömengä nōwo wīi nē cæte quēwēnāninqe bai inongä ingampa. Wæætē edæ Itota Codito ingante pönengä badinqe tömengä nōwo godömenque bitö tönïñacä inongä inte bitö nē waadecä ingampa. Edæ tömengä botö nē nanguī waadecä ingampa. Ayæ wīi

bitö nē cædonganque inongä inte tömengä wæætē mönō Awënē quingä ingampa. Mänōmaï beyæ tömengä godömenque bitö nē waadecä inongä ingampa.

¹⁷ Ìninqe bitö, Pabodo tönö guëa cæmöna ìmönapa, ante pönëmi ìninqe bitö botö ìmote æmi bai Önetimo ingante adobai æmaïmipa.

¹⁸ Bitö ìmite wënæ wënæ cæcantawo. Bitö ìmi quiëmë ante æninqe wæætē pönönämaï ingantawo. Ìninqe tömengä nänö pönönämaï ìninö ante bitö botö ìmote wæætē, Pönömi æmoe, ämi ëñëninque botö pædæ pönömo æmaïmipa.

¹⁹ Botö Pabodobo inömo inte tömömo önompoca inte ìmainö ante yewæmömopa. Tömengä quïnö nänö pönönämaï ìninö ante botö wæætē tömänö pönömo æncæbiimipa. Botö edæ bitö ìmite wii Itota Codito ingantedö ante odömonte apænebo bai bitö ayæ pönënämaï inte quëwencædömiimipa.

Ìninqe botö apænedö beyæ bitö botö ìmote wæætē pönönämaï ingä bai inömi ìmipa. Incæte botö mänömaï beyæ bitö ìmite wii ancæboimipa.

²⁰ Botö tönïñabi ëñëmi. Mönō Awënē beyænque bitö botö beyæ pönö cædinque Önetimo ingante waadete pönencæbiimipa, ante wæbopa. Edæ mönō Codito nempo quëwëmöna ìninqe bitö waadete pönente cæbi ate botö gancæ entawente tocæboimipa, ämopa.

²¹ Bitö cöwë ëñente cæquïmi ìmipa, ante do ëñënimo inte botö, Bitö acæbiimipa, ante yewæmömopa. Edæ botö änö ëñente cædinque bitö godömenque cæquïmi ìmipa, ante ëñëmopa.

²² Ìninqe adodeque ayæ äinëmopa. Minitö botö beyæ ante Wængongui ingante mïni apænedö beyæ botö ìmote ñimpo cædäni ate bitö weca acæ poncæboimipa, ante pönëmopa. Ìninqe bitö oncönë adocönë botö owoquincö ante tömäa ædæmö cö cæquïmi, ämopa.

Pidemöö ingante Pabodo, Waa quëwencæbiimipa, angä

²³ Epapada botö bai adobai Itota Codito beyænque nänö nē tee mönegaingä inömo tömengä botö ìmote, Pidemöö waa quëwencæcäimipa, ante angä ëñëninque botö bitö ìmite yewæmömopa.

²⁴ Mäadoco tönö Aditadoco ayæ Deëma tönö Odoca botö

tönö godongämæ cædäni inömo adobai botö ìmote, Pidemöö waa quëwencæcäimipa, ante änäni ëñëninque botö bitö ìmite yewæmömopa.

²⁵ Mönō Awënē Itota Codito bitö ìmite waadete pönö cæcæcäimipa. Mäninqe ante botö yewæmömopa.

Ebedeoidi inänite cadota ante nani yewæmongainta

Wængonguï beyæ tömengä Wengä pönö apænegacäimpa

¹ Wængonguï wëenëñedë wantæ wantæ iñö apænedinque wantæ iñö wadö bai cædinque wantæ iñö wadö bai cædinque tömengä beyæ nê apænedäni inänite tæmpo pönö apænecä ëñengadänimpa. Ëñëninque tömënäni wæætë adodö ante mönö mæmæidi inänite tæmpo apænegadänimpa.

² Nöwo guiquënë mäninö ante Wængonguï dodäni inänite nänö apænegaiönæ idæwaa bayonte tömengä apænecä ëñëninque tömengä Wengä wæætë mönö imonte pönö apænegacäimpa. Wëenë pönö ingui-poga dæ ii ëmönæ dæ añonte Wæmpocä tömengä Wengä ingante, Badöe, angä ëñente cæyongä tömengä nänö cædö beyæ Wæmpocä tömancoo badongacäimpa. Mänömai beyæ nê badongä iñongante Mæmpo Wængonguï wæætë, Tömancoo nê ænguingä iñömö botö Wengä adocanque nê ænguingä ingampa ämopa, angacäimpa.

³ Mæmpocä nê tæi ëmönongä inte ñäö ëmongä iñongä tömengä Wengä iñömö adobai nê tæi ëmönongä inte ñäö ëmongä ingampa. Ìninque, Wængonguï Wengä nö pönö entawëninque nänö quëwengainö bai Mæmpocä iñömö edæ adobai pönö entawëmongä inte edæ nöingä cæte quëwengä ingampa, ante mönö edonque ëñengæimpa. Ìnguipo incæ ii ëmönæ incæ a ongoncoo incæ awëmö iñömö ongoncoo incæ tömengä Wengä adocä tæi piñante nänö angäinö beyænque tömancoo edæ nöwo ganca cöwë ongoncoo incoopa. Ayæ nämä wepæ godonte wæninque adocä iñömö wënæ wënæ mönö cæpämö ante ñä mënongagacäimpa. Mänömai nê ñä mënongaingä inongä inte tömengä do æidinque Wængonguï nê tæi ëmongä tömëmængä inö tæ contadinque ongongampa.

Tömengä ñænængä iñongä anquedoidi pönömenque inäni

⁴ Mänömai æi contadinque tömengä nê ñænængä iñongante Wængonguï iñömö, Bitö ëmowo bitö cöwë ænguëngaiwo, ante pemongacäimpa. Wængonguï anquedoidi guiquënë wii adobai ñænænäni iñönänite Wængonguï tömënäni inänite adobai ante pemönämai ingacäimpa. ⁵ Edæ anquedoidi iñönänite æcämenque ingante Wængonguï dicæ,

“Botö Wëmi inömi imipa.

Nöwoönæ bitö Mæmpobo babopa,”

Ante angantawogaa. Ayæ adobai,

“Botö tömengä Mæmpobo incæboimpa.

Ìninque tömengä botö Wengä incæcäimpa,”
ante anquedo ingante änämai ingacäimpa.

⁶ Wæætë tömengä Wengä Tänocä iñongante ingui-poga da pönöninque Wængonguï,

“Botö anquedoidi tömänäni iingä önöwa inö ædæ wææninqe, Bitö Wængonguï Wëmi imidö anguënë, ante wat-apæ apænecädänimpa,” ante apænegacäimpa.

⁷ Ayæ wæætë anquedoidi inänitedö ante apænedinque,

“Tömengä godö cæcä ate tömengä anquedoidi iñömö woboyæ nanguï pæmæ bai quingæ pönö cæcädänimpa.

Ayæ tömengä godö cæcä ate tömengä beyæ nê waa cædäni iñömö gonga bæcoguënëwate bai nanguï cæcädänimpa.”

⁸ Ante apænedinque tömengä Wengä ingante guiquënë Wængonguï incæ iima ingacäimpa.

“Bitö nê Wængonguï inömi inte ëñëmi. Awënë Odeye badinque Awënë contaimpaa tæ contagaïmi inte bitö ñimpo cædämai inte cöwë Awënë Odeyebi inömi inte ongoncæbiimpa.

Ìninque Awënë Odeyebi inömi inte bitö nempo quëwënäni inänite nö pönö cæte aadinque yaëmë töëmë pönö næænte bai nê ämi incæbiimpa.

⁹ Nê Wængonguïmo inömo inte botö iñömö bitö Awënë Wængonguïmo imopa. Ìninque botö, Nö cæte mönö quëwenguinö ante nê waadebi inömi inte bitö ëñënamäi nani cæinö ante edæ wii ainëmi imipa.

Mänömaï ïmi ante adinque botö ïmaï pönö cæbopa. Bitö tönö godongämæ ongönäni Awënë badinque bitö watapæ tocæbiimpa, ante cædinque botö,

oguinguipæ pönö gao caate bai nanguï cægaboimpa.”

10 Ante Mæmpo Wængonguï angacäimpa. Ayæ adobai tömengä Wengä ingante apænedinque,

“Bitö Tæiyæ Awënë ïnömi inte wëenëñedë pönï inguipo mä cö cæte bai cædinque tömëmi badongabiimpa, angacäimpa.

Ayæ öönädë ongoncoo adobai tömëmi bitö öonmpoca badongaincoo inte ongoncoopa.

11 Mänincoo guiquënë ïincayæ ate wido cæte bai bayonte

Bitö guiquënë cöwë ongonguïmi ïmipa.

Mänincoo guiquënë mönö weocoo pedæncoo woincoo bai bayonte,

12 waocä yacooque æninque topo cæcä bai cædinque bitö wæætë bitö badongaincoo ænte topo cæte bai cæcæbiimpa.

Wæætë müncoo wëñacä bai cædinque bitö wæætë tömancoo müncoo badömi on-gongæimpa.

Bitö ïñömö do bitö ingai bai adobai cöwë inguïmi ïmipa.

Bitö quëwenguïmämo cöwë inguïnö an-guënë.”

13 Äninque Wængonguï tömengä Wengä in-gante ïmaï angacäimpa.

“Botö tömëmæ ïnö tæ contate ongöñömite, botö bitö ïmite në piinte cædäni ïnänite bæ tabo tæ wæænäni ate bitö tæi emömi inte pinä gawate bai godö cæbi wæcædänimpa,” angacäimpa.

Tömengä Wengä ingante mänömainö ante në angaingä inte Wængonguï dicæ anquedoidi ïnänite adobai an-gantawogaa. 14 ïñæmpa Wængonguï anquedoidi ïñömö baö ömaadäni inte

Wængonguï beyæ në waa cædäni ïnänipa. Mänömaï ïñönänite tömengä, Botö æmo beyænque në quëwënäni beyæ munitö godö cæcæminimpa, ante da pönongä pöninque tömënäni mönö beyæ pönö waa cædänipa.

2

Wængonguï cengä beyænque quëwëmompä, ante

1 Mänömaï beyæ mönö Awënë apænecä ëñëninque mönö ëñengainö ante mönö ñimpo cædämaï inguinque ante mönö wede pönente ædæmö ëñente cæcæimpa.

2 Edæ anquedoidi incæ Wængonguï beyæ apæneyönäni tömënäni nänï änö ante dodäni wæætë në ëñente cæquënänäni ingadänimpa. ïninque æcänö wüi ëñëninque wapiti cæda tömengä në tente wæquënegä ïñongante dodäni nö cædinque pan-gadänimpa.

3 ïñänäni ëñëedäni. Wængonguï nänö, Quëwencæminimpa, ante angainö ante æcänö mönö imonte täno apænecantawo, ante pönëedäni. Wængonguï Awënë ïnongä incæ tänocä apænegaingä inte, Botö tömëmo æmo beyænque quëwencæminimpa, ante apænegacäimpa. Ayæ Wængonguï nänö apænegainö ëñente Ao äninque wadäni godömenque mönö imonte, Näwangä impa, ante apænedäni ëñënimö inte mönö ædæmö ëñengæimpa. Edæ ëñënämaï inte bai ñimpo cæmö ïninque Wængonguï dicæ pänämaï inte ata cæpocampa quëwenguïmöö.

4 ïninque, Quëwencæminimpa, ante näwangä botö änö ante ëñencædänimpa, ante cædinque Wængonguï godömenque cægacäimpa. Tömengä, Æcänö tönö cæquïmoo, ante, Æyömönö cæquïmoo, ante, Æyedënö cæquïmoo, ante nämä nänö angainö bai cædinque ïmaï pönö cægacäimpa. Tömengä, Botö mä cæbo ate waodäni ëñencædänimpa, ante nanguï cægacäimpa. Ayæ, Æbänö cæcää, ante wæcædänimpa, ante tæi piñæninque wadö wadö cædinque bamönengæ edæ nanguï cægacäimpa. Tömengä Önöwoca ingante da pönongä pöninque tömengä wæætë Wængonguï nänö angainäni ïnänite pönö cæcä æninque tömënäni tömänäni Wængonguï Önöwoca nänö pönongä ænganca cægadänimpa. ïninque Wængonguï mänömaï pönö cæcä adimö incæ mönö ëñënämaï cæmö bai tömengä wæætë mönö imonte ædö cæte ata cæpoquënegä.

Itota Codito tömengä tönĩñadäni bai adobai bagacäimpa

⁵ Ayæ mĩngui-poga Awënë nempo mönõ quẽwenguimãmo ante apænemõnipa. Īninqe mĩngui-poga möni anongui-poga Wængongui, Æcãmenque ingante ämo awënë baquingã, ante cãdinqe, Anquedoidi incã awënëidi bacãdãnimpa, ante dicã angantawogaa. ⁶ Wacã wataa yewãmõninqe ĩĩmaĩ ante Wængongui ingante ämotamĩni ante bai yewãmongacäimpa.

“Wængongui eñẽmi. Waomõni õnõmõnique ĩñõmõnite bitõ ædõ cæte waadete cæbii.

Wao wẽmõni eñagaimõni ĩñõmõnite bitõ ædõ cæte põnõ waadete cæbii.

⁷ Anquedoidi ĩnãnite æmonga ææntodõninqe bitõ waocã ingante gao wænõ gö cæbi ate tömengã wantæ ĩñõ põnõmenque ongongantapa.

Ayæ, Waocã nẽ tæi emõnongã inte ñãõ emõñongante wadãni tömengã ingante waa acãdãnimpa, ante põnõ badongabiimpa.

⁸ Edæ bitõ badongaincoo tõmancoo waocã nempo põnõmi æninqe

waocã tæi emongã inte nẽ angã bagacäimpa.”

Ante nãnõ yewãmongaĩne bai cãdinqe Wængongui tömengã nãnõ badongaincoo tõmancoo Waocã nempo põnongã æninqe Waocã nẽ angã bayongã wacoo wayõmõ ongoncoo edæ dæ ampa. Incæte, Tõmengã nempo tõmancoo do ongompa, ante mönõ ñõwo ganca ayæ adãmaĩ ĩmompã. ⁹ Doyedẽ mönõ waocabo ĩñõmonte Wængongui waadete põnõ cãdinqe Itota ingante angã eñẽninqe tömengã wæætẽ mönõ tömãmõ wænguimãmo beyæ ante cõwẽ wæwocate wæquingã bagacäimpa. Mãnõmaĩ cãdinqe Wængongui anquedoidi ĩnãnite æmonga ææntodõninqe, Itota wæætẽ caate wæncæcäimpa, ante cãdinqe tömengã ingante gao wænõ ĩñõmõ gönongã ongongacäimpa. Incæte Itota caate wængã beyæ Wængongui poganta tæiyæ waemõ da wencate bai cãdinqe, Itota nẽ tæi emõnongã inte ñãõ emongã adinqe wadãni tömengã ingante waa acãdãnimpa, ante põnõ cægacäimpa. Īninqe Itota Tæiyæ Awënë wencate ongongã ingante do amompa.

¹⁰ Tõmancoo nẽ badongaingã ĩnongã inte Wængongui tõmancoo nẽ enempodongã inte ĩĩmaĩ angacäimpa. Botõ Wẽmi eñẽmi. Wadãni incã botõ wënãni nangui ĩnãni quẽwencãdãnimpa, ante nẽ badõmi bitõ baquinqe caate wæcæbiimpa. Mãnõmaĩ caate bitõ wædõ beyænque ædæmõ picæmi bate nẽ eñẽnĩmi inte bitõ botõ wënãni ĩnãnite ñãõ ĩñõmõ ænte mãmõmi poncãdãnimpa. Põninqe tömẽnãni botõ ñãõ emõmo bai adobai ñãõ emoncãdãnimpa, ante Wængongui nõ põni cægacäimpa. ¹¹ Itota mönõ ĩmonte, Tæiyæ waemõ ewocate quẽwencæmĩnimpa, ante nẽ badongã ĩñongã mönõ tömengã tönõ adomõ mönõ cabo ĩmompã. Mãnõmaĩ ĩmõ beyæ tömengã mönõ ĩmonte ante apænedinqe, Botõ tönĩñamĩni ĩmĩnipa, ante guĩñenedãmaĩ tedecampa. ¹² ĩĩmaĩ ante apænecampa.

“Wængongui eñẽmi. Bitõ emõwo ante

botõ tönĩñadãni ĩnãnite apænebo eñencãdãnimpa.

Tõmẽnãni godongãmæ ongonte eñẽñõnãni

botõ, Wængongui ĩñõmõ Tæiyæ

Waemõ ĩnongã inte waa põni cæcã

abopa, ante ämotamĩni ante bai

ancæboimpa.”

¹³ Ayæ adobai apænedinqe,

“Wængongui ingante botõ wede põnente

quẽwencæboimpa,” angacäimpa.

Ayæ wæætẽ adobai apænedinqe,

“Wængongui botõ ĩmote apænedinqe, Bitõ

wënãni, ante põnongã ænõmo inte

botõ, Mõni wencabo mæ ongõmõni

aedãni, ämopa.”

Itota incã Wængongui beyæ nãni

yewãmongainõ bai adobai apænecampa.

¹⁴ Mönõ wænguimãmo ante wënæ

awënë incã nẽ angã ĩñongante Itota,

Botõ nãñe wæninqe tömengã ingante

edæ õmæe ewencæboimpa, ante ĩĩmaĩ

cægacäimpa. Mönõ Itota wẽñæmõ ĩñõmõ

inte mönõ baõ tönõ wepæ ñõmænguĩñõ

eñamõ bai tömengã nãnõ wænguinque

adobai ñõmænguĩñõ eñagacäimpa. Īninqe

tõmengã nãmã nãnõ wænõ beyænque

wënæ awënë ingante bæ tacã ate tömengã

wæætẽ piñænãmaĩ aquĩĩ bate nẽ angã

ĩnãmaĩ ingampa. ¹⁵ Ayæ wënæ awënë

nempo ñã cæyænte bai quẽwẽninqe mönõ

wænguimãmo ante guĩñente wæyõmonte

Itota mönō beyæ ante wæætē wæninque mönō imonte gā pe æmpote ö ængā beyænque quēwēmōmpa.

¹⁶ Edæ wīi anquedoidi inānite ænte pæ mancæte ante cædinque tōmengā wæætē Abadäō wodi pæimō iñōmonte mönō imonte pönō æninque pæ mangampa. ¹⁷ Mäninō beyæ Wængonguī, Bitō tōniñadāni bai adobai badinque bitō, Wængonguī qui, ante nē nō Pönōmi Nænæmi pōni incæbiimpa. Ayæ bitō tōniñadāni inānite cōwē pönēninque waadete pönō waa cædinque ædæmō aacæbiimpa, ante tōmengā ingante da pōngā pongacäimpa. Ayæ adobai, Bitō tōmēnāni wēnæ wēnæ nāni cædō beyæ nāmā wepæ godoncæbiimpa, ante cædinque Wængonguī Itota ingante da pōngā pōninque tōmengā mönō ēñamō bai adobai ēñadinque waomō mönō inōmō bai adobai badinque Waocä inongā ingacäimpa. ¹⁸ Mönō inguipoga quēwēninque wēnæ wēnæ mönō cæinēnō beyæ wæwēmōmpa. Wēnæ awēnē, Itota oda cædinque Wængonguī ingante ēñēnāmai cæcæcäimpa, ante cæyongā Itota iñōmō mönō wæwēnō bai adobai wæwengā incæte oda cædāmai ingacäimpa. Inique wēnæ wēnæ cæinente wæwēñōmonte tōmengā adobai do wægaingā inte, Minitō tæi piñænte ongōninque oda cædāmai incæminimpa, ante pönō tōö æmænte cæcampa.

3

Itota Næncængā iñongā Möitee wodi wædangā ingacäimpa

¹ Mönitō imōnite aa pedinque Wængonguī mīnitō imīnite adobai aa pedinque, Tæiyæ waēmō entawencæminimpa, ante badongacäimpa. Inique botō tōniñamīni ēñēdāni. Itota iñōmō Wængonguī nānō nē da pōngaingā ingacäimpa, ante mönō pönēnō ante mönō, Nāwangā impa, ante apænemōmpa. Ayæ, Wængonguī qui, ante nē Godongā Nænængā pōni iñōmō Itota adocä ingampa, ante mönō pönēnō ante, Nāwangā impa, ante apænemōmpa. Inique mīnitō guiquēnē, Itota æbānō ingacäimpa, ante önōwēnenque pönente quēwēngūenēmīni imīnīpa. ² Wængonguī

angā ēñēninque Möitee wodi guiquēnē tōmengā ingante cōwē pönente cædinque Wængonguī tōnō nāni godongāmæ quēwencabo inānite ædæmō cæte aagacäimpa. Tōmengā nō cæte nānō aagai bai adobai cædinque Itota iñōmō Wængonguī angā ēñēninque tōmengā ingante cōwē pönente cædinque tōmengā tōnō mönō godongāmæ quēwencabo imonte ædæmō cæte aacantapa.

³ Edæ, Oncō waa ongōmpa, ante waa amō incæ mönō oncō nē badōningā ingante godōmenque waa ate apænecæimpa. Adobai, Möitee wodi nē waa aacā ingacäimpa, ante tōmengā ingante waa amō incæ mönō edæ Itota nē badongaingā ingante godōmenque nanguī waa ate apænecæimpa. ⁴ Waocä oncō guiquēnē wīi tōmenque ongōmpa. Edæ waocä mænongā ate oncō edæ ongō aminīpa. Inguipo incæ adobai öönædē ongōncoo adobai wīi tōmenque ongōncoopa. Mänincoo tōmancoo Wængonguī nānō badongaincooque ongōncoo acäimpa. ⁵ Möitee wodi guiquēnē Awēnē Wængonguī ingante nē cæcā inongā inte tōmengā tōnō nāni godongāmæ quēwencabo inānite cōwē pönēninque ædæmō cæte aagacäimpa. Mänōmai cædinque tōmengā, Wængonguī æbānō iincayæ ate apænēquingā, ante odömōninque, Nāwangā impa, ante apænegacäimpa. ⁶ Mönō Codito guiquēnē Wæmpocä Wengā Onguīñængā inongā inte Wæmpocä tōnō nāni godongāmæ quēwencabo inānite cōwē pönente nōingā pōni cæte pönō aacampa. Edæ mönō guiquēnē, Codito waa pōni pönō cæcā beyænque watapæ bacäimpa, ante mönō pönēnō ante wadāni ēñēñōnāni waa tote apænemōmpa. Inique mönō guīñēnāmai inte mäninō mönō pönēnō ante ædæmō entawēninque iinque baganca ñimpo cædāmai imō inique tōmengā tōnō mönō godongāmæ quēwencabo imaimōmpa.

Wængonguī quīnāni nāni guēmanguīmāmo ante

⁷ Mänōmai beyæ Wængonguī Tæiyæ Waēmō Önōwoca nānō angainō ante mönō ēñente cæcäimpa. Tōmengā

nänö apænegaïnö ante iïmainö ante yewæmongatimpa.

“Ñowoönæ incæ tömengä apæneçä eñëninque,

⁸ mïnitö, Mïmö ömæde bawënämaï incæmönimpa, ante cædinque Baa änämaï iedäni.

Dodäni iñömö, Wido cæcæimpa, ante nani önömæca quëwente cæyedë, Wængonguï ingampa diyæ panguingäa, ante pönëninque wiwa cægadänimpa. Mänömaï cædinque tömënäni Baa ante mïmö ömædënäni nani bawengai bai mïnitö adobai bawënämaï iedäni.

⁹ Mïnitö mæmæidi mäniñömö quëwëninque botö imote wiwa cædäni wægaboimpa.

Incæte botö mäniñedë coadenta wadepo iñonte waa cæbo agadänimpa.

¹⁰ Mäniñedë quëwënäni mänömaï cædäni beyæ botö tömënäni inänite piïninque iïmai angaboimpa.

‘Botö taadö goquënënäni incæ taadö cöwë adämaï inäni inte

tömënäni ancaa oda cædinque mïmö ömædënäni inte bai wadö godänipa.’

¹¹ Äninque botö ænguï badinque, Botö në Quëwëmo ingaïmo inte nöingä ämopa, äninque,

Guëmædäni, ante botö angaiñömö tömënäni cöwë guiite guëmänämaï incædänimpa, angaboimpa.”

Ante Wængonguï nänö angaiñö ante yewæmongadänimpa.

¹² Iñänäni eñëedäni. Mïni pönencabo iñöminite mïnitö wacä ingä wacä ingä waa adinque adocanque incæ mïmö ömædengä badämaï incæcäimpa, ante wææ aadäni. Ayæ adocanque incæ wënæ wënæ entawengä badinque wiya æmænte Wængonguï në Quëwengä ingante emö cæte godämaï incæcäimpa, ante wææ aadäni.

¹³ Ñowoönæ, ante në angä nänö angaiönæ iñömö ayæ ñowo ganca eönæpa. Iñinque mïnitö ñowoönæ incæ wacä ingä wacä ingä ædämö apænedinque, Æcämenque incæ wiwa nani cædö beyænque oda cæte wædinque mïmö ömædengä badämaï incæcäimpa, ante cædinque iïmö iñö iïmö iñö godongämæ iñacabo cædinque tæi ongödäni. ¹⁴ Edæ mönö wëenëñedë

wede pönengamöimpa. Ñowo adobai pönëninque iñinque baganca wede pönëmö iñinque mönö Codito nempo godongämæ quëwëmaïmompä.

¹⁵ Iñinque adode ante pönente cæcæimpa.

“Ñowoönæ incæ tömengä apæneçä eñëninque mïnitö, Mönitö mïmö ömædëmöni bawënämaï incæmönimpa, ante wææ cædinque Baa änämaï iedäni.

Edæ dodäni, Wido cæcæimpa, ante cædinque edæ Baa ante mïmö ömædënäni nani bawengai bai mïnitö adobai bawënämaï iedäni.”

¹⁶ Wængonguï angä önömoncaque eñëninque, Wido cæcæimpa, ante ædänidö cægadäni. Edæ Möitee wodi Equitobæ nänö në ænte gogainäni adodäni incæ, Wido cæcæimpa, ante cægadänimpa. ¹⁷ Ayæ adobai

Wængonguï coadenta wadepo iñonte ædänidö inänite piïninque ænguï bagacäi. Edæ në eñënämaï inte wënæ wënæ cædäni inänite Wængonguï piïnte ænguï bacä ate tömënäni baö ingai önömæca yabæque wæænte öñongatimpa. ¹⁸ Ayæ, Pö guiite

guëmædäni, ante botö angaiñömö cöwë guiite guëmänämaï incædänimpa, ante Wængonguï, Botö në Quëwëmo inömo inte nöingä angaboimpa, angacäimpa. Edæ ædänidö inänite mänömaï angacäi. Edæ në eñënämaï cædäni inänite mänömaï angacäimpa. ¹⁹ Iñinque në pönënämaï inäni inte tömënäni nani pönënämaï inö beyænque guiidämaï ingadänimpa.

4

¹ Botö nempo guidinque guëmancæmïnimpa, ante wëenëñedë nänö angaiñö ante Wængonguï ñowo incæ adodö ante cöwë angampa. Mänömaï beyæ mïni pönencabo tömämïni tömengä nempo guidinque guëmanguënëmïni iñöminite adocanque incæ oda cædämaï incæcäimpa, ante cædinque mönö godongämæ waa adinque wææ aacæimpa. ² Edæ dodäni inänite Wængonguï ingantedö ante watapæ nani apænegaïnö bai mönö imonte adobai ante watapæ apænedäni eñëmompä. Incæte dodäni guiquënë önömoncaque eñëninque wede pönënäni beyænque guëmänämaï inte wægadänimpa. ³ Mönö në wede pönëmö imö

guiquënë Wængonguī nempo guiidinque mīmōnē do guēmāmōmpa. Edæ Wængonguī nempo mōnō guēmanguēnēnō ante botō āninta adotaa iīmaīnō ante yewæmōnte ongō bai batimpa.

“Botō ænguī badinque, Botō nē Quēwēmo ingaīmo inte āmōpa, ānīnque,

Pō guīte guēmāedāni, ante botō angaiñōmō tōmēnāni cōwē guīdāmaī incædānīmpa, angaboīmpa.”

Ante Wængonguī beyæ ante yewæmōngadānīmpa. Incæte doyedē inguīpoga iī ēmōnæ badōnīnque Wængonguī tōmēngā nānō cæquēnēnō ante iīnque badōnīnque, Idæwaa, angacāīmpa. ⁴ Wængonguī ōnōmpo æmæmpoque go adoönæque iīnōnte iīnque cædinque iīmō wæiyō nānō guēmangaiñōnæ ingatīmpa, ante iīmaī ante wataa yewæmōnte ongōmpa.

“Ōnōmpo æmæmpoque go adoönæque iīnōnte iīnque cædinque iīmō wæiyō ñīmpo cædinque Wængonguī guēmangacāīmpa.”

⁵ Ayæ botō āninta adotaa iīmaī ante yewæmōnte ongōmpa.

“Pō guīte guēmāedāni, ante botō aññōmō tōmēnāni cōwē guīdāmaī incædānīmpa,” angāmpa, ante yewæmōngatīmpa.

⁶ Iīnīnque Wængonguī nānō pōnō cædō ante watapæ ante apænecā ēñēnīnque dodāni iññōmō ōnōmoncaque ēñēnāni inte tōmēnāni nāni ēñēnāmaī cægaiñō beyæ guīdāmaī ingadānīmpa. Iīnīnque, Wængonguī tōmēngā nānō angaiñō iīnque cæcæīmpa, ante cædinque iīncayæ quēwēnāni pancadāniya cōwē guīquēnēnāni iññōnānīmpa. ⁷ Mānōmaī beyæ, Æōnædō ēñēnguēnēmīni iīmīni, ante odōmoncæte ante cædinque Wængonguī, “Ñōwoönæ,” ante awēnē Dabii ingante wantæpiyæ ate apænecā ēñēngacāīmpa. Iīnīnque mānīnō botō do ante yewæmōmo mīni adīnō bai ante Dabii wodi iīmaīnō ante yewæmōngacāīmpa.

“Ñōwoönæ incæ tōmēngā apænecā ēñēnīnque mīnitō, Mīmō ōmædēmōni bawēnāmaī incæmōnīmpa, ante cædinque Baa ānāmaī iedāni,” ante yewæmōngacāīmpa.

⁸ Edæ docā Ootowee wodi tōmēnāni iññānite doyedē manguicā guīdinque

Cānāāmæ quēwēngadānīmpa. Incæte tōmēnāni mānīōmæ do guīdīnāni inte nāwangā guēmānāni bai Wængonguī iīncayæ ate, Ñōwoönæ guēmancæmīnīmpa, ante wæætē ānāmaī incædongāīmpa.

⁹ Iīnīnque mōnō Wængonguī quīmō iññōmō edæ guēmanguīñōnæ guēmante bai mōnō tōmēngā nempo quēwēnīnque mīmōnē guēmānīnque cætawente wædāmaī ingæīmpa. ¹⁰ Wængonguī iīnque badōnīnque tōmēngā nānō cæquēnēnō tōmāā cædinque ñīmpo cædinque guēmangacāīmpa. Tōmēngā nānō ñīmpo cæte guēmangai bai waocā iññōmō Wængonguī nempo guīdinque nē guēmangā iññōmō adobai tōmēngā nānō cæquēnēnō ante, Tōmānō do cætīmpa, ante adīnque ñīmpo cædinque guēmangāmpa.

¹¹ Dodāni nāni ēñēnāmaī cægai bai ñōwodāni adobai cædāni iīnīnque tōmēnāni nāni tæ go wæængūinque cæbainānīpa. Mānōmaī i iīnīnque, Adocanque incæ mānōmaī cæte tæ go wæænāmaī incæcāīmpa, ante wææ cædinque mōnō tōmāmō, Wængonguī nempo guīte mīmōnē guēmangæīmpa, ante nanguī cæcæīmpa.

¹² Wængonguī nānō ānō iññōmō mīlne quēwēne inte tæi piyænē ēnepa. Edæ yaēmē yægāmē tipængaa engāmē bamēncaā guīibæ watii co bai Wængonguī nānō ānō iññōmō adobai cædinque mōnō ōnōwoca incæ do cote bai guīipa. Ayæ bamē tadōmēngadæmē tæi guīñænte bamīi edonque a bai Wængonguī nānō ānō iññōmō adobai mōnō mīmō incæ tadōmēngadæ tæi guīñænte bai cædinque mōnō pōnēnō ante mōnō cæinēnō ante do edonque ba adīnque adode incæ apænte bai ampa.

¹³ Wængonguī nē apænte ānōngā iññōngante mōnō nāmā incæ, Æbānō cægāmōnīi, ante tōmēngā ingante tōingā apænequēnēmō iññōmpa. Edæ, Wængonguī ayōngā tōmēngā nānō badōngaincoo tōmancoo edæ gā ængate ōmægacoo bai inte wodōnāmaī ongōmpa.

Wængonguī ingante nē Godōngā Ñæncængā Itota ingāmpa

¹⁴ Mōnō beyæ, Wængonguī quī, ante nē Godōngā Ñænængā pōnī iññōmō Wængonguī Wēngā Itota ingāmpa. Tōmēngā iññōmō nāmā wēpæ godōnte do wængaiñgā inte

ñāni ömæmöninque öönæde æite on-gongampa. Ìninqe mönö, Tömengä ingante wede pönemönipa, ante nē apænemö inte mönö wede pönēnō ante ædæmō pæ mangæimpa. ¹⁵ Wængonguī quī, ante mönö beyæ nē Godongä Ñænængä pönī inongä iñömö wënæ wënæ cædāmaī ingacäimpa. Incæte aquīi imö inte wæmō adinque tömengä wæætē, Botö Waobo eñadinque aquīi bate wægäimo inte, Aquīi mini wædö æbänö i, ante do edæ eñēmopa, angampa. Edæ wënæ awënë tömengä ingante, Wënæ wënæ cæe, angä do wægäingä inte tömengä mönö wënæ wënæ cæinēnō, Æbänö i, ante do eñengampa. ¹⁶ Ìninqe mönö Awënë iñömö nanguī waadete pönengä inte Awënë containpaa ongongampa cæmöö. Mönö wënæ wënæ cædinö ante tömengä pönö ñimpo cæcæcäimpa, ante cædinque mönö tömengä weca ponte apænecæimpa. Mönö caate wæyedē tömengä pönö töö æmænte cæcæcäimpa, ante mönö tömengä weca ponte apænecæimpa. Mänömaī Awënë ongompaa gäänē pöninque mönö guiñenāmaī inte apænemö eñēninque tömengä waadete pönö waa cæcä ængæimpa.

5

¹ Wængonguī quī, ante bitö botö imote nē pönömi ñænæmi pönī bacæbiimpa, ante æcänö ingante Wængonguī angä bacää.

Edæ waocä adocanque ingante apænte æninque Wængonguī angä ate tömengä iñömö nē waocä inongä inte waodäni beyæ Wængonguī weca cæcampa. Ìninqe waodäni iingä weca pöninque, Wængonguī quī, ante pædæ pönönāni æninque tömengä wæætē Wængonguī ingante godongampa. Ayæ, Wënæ wënæ cæmōni incæte Wængonguī waadete pönö ñimpo cæcæcäimpa, ante cædinque waodäni, Wængonguī quī, ante cæningä ænte pöninque pædæ pönönāni ængampa. Æninque nē godongä ñænængä iñömö nē waocä inongä incæte cæningä ingante ænte wænöninque nē ænte pönāni nāni wënæ wënæ cædinö beyæ ante baö iya tangampa. ² Ìninqe wadäni, Æbämē impa, ante eñenāmaī nāni wædö ante nē godongä ñænængä iñömö nē waocä inongä inte

adobaī pancaa eñenāmaī inte wæcampa. Ayæ oda cæte nāni wædö ante tömengä adobaī oda cæte wæcampa. Ìninqe wadäni bai aquīingä inongä inte tömengä gänē pönēninque wadäni inānite ædæmō cæte odömongä adänipa. ³ Mänömaī inongä inte tömengä wadäni wënæ wënæ nāni cædinö beyæ ante, Wængonguī quī, ante iya täninque adobaī, Botö nāmā wënæ wënæ cædinö beyæ godömopa, ante iya tante Wængonguī ingante godongampa.

⁴ Waocä nāmā incæ, Botö, Wængonguī quī, ante nē godömo ñænæmo bayömete wadäni botö imote waa acædänimpa, ante ædö cæte anguingä. Ìñæmpa Wængonguī angä beyænque Aadöo wodi nē godongä ñænængä bacä bai wadäni adobaī Wængonguī angä beyænque nē godönāni ñænænāni badänipa. ⁵ Codito incæ, Nē godömo ñænæmo badinque nē tæi emömo inte ñäö emömo acædänimpa, ante nāmā ante wīi angacäimpa. Wængonguī incæ tömengä ingante,

“Bitö botö Wēmi inömi imipa.

Ñöwoönæ bitö Wæmpobo babopa.”

⁶ Angacäimpa. Ayæ godömenque Wængonguī nänö angainö ante wataa yewæmongatimpa.

“Wængonguī quī, ante nē pönongä Mëequitedeco nänö cöwē ingai bai, bitö adobaī ñimpo cædāmaī inte nē Pönömi cöwē incæbiimpa,” ante Codito ingante angacäimpa.

⁷ Codito iñömö Waocä eñate quëwëninque Ca ca wædinque Yæ yæ äninque Wængonguī ingante nanguī apænecäcäimpa. Wængonguī bitö adobique eyepæ imi inte wææ ämi ininque botö wænāmaī imaimopa, angacäimpa. Incæte, Bitö, Wæe, ämi ate botö wæncæboimpa, ante nänö Ao äninö beyænque Wængonguī tömengä ingante do eñengacäimpa. ⁸ Wæmpocä Wëñængä inongä incæte Itota nänö caate wæwëmāmo beyænque Wængonguī nänö änö ante ædæmō eñente cædinque picængä bagacäimpa. ⁹ Tömengä nänö änö ante nē eñente cædömö iñömönte tömengä ædæmō eñēninque picængä bagaingä inte edæ mönö imonte ængä beyænque mönö cöwē wænāmaī inte quëwëmompā. ¹⁰ Tömengä ingante Wængonguī apænte æninque,

Mēequitedeco nē pōnongā ñænængā pōni nānō ingai bai bitō adobai botō imote nē Pōnōmi Ñænæmi pōni inōmi imipa, angacāimpa.

Mōnō wede pōnēnō ante Baa ānāmai ingæimpa, ante

¹¹ Mānīnō ante botō mīnitō imīnite godōmenque nanguī apænequēnēmo imopa. Incæte, Æiquedō ēñenguīmīnī, ante pōnente wædinque botō, Æbānō cæte apænebo ēñenguīmīnī, ante wæbopa. ¹² Īñæmpa mīnitō doyedē mīni ēñengainō ante ñōwo nē odōmōmīni baquēnēmīni imīnīpa. Incæte wacā wæætē mīnitō imīnite Wængonguī nānō angainō ante adodeque adodeque ante odōmonte apæneca ēñenguēnēmīni adodō bamīni awædō. Edæ wēñænāni nē goömæ gānāni bai wæætē bamīni iñōmīnite botō ædō cæte tæēmō cænguī godonte bai apænebo ēñenguīmīnī. ¹³ Goömæ nē gangā bai ingā iñōmō tōmengā wēñængā bai iñongante mōnitō, Æbānō nō cæquī, ante odōmonte apænemōni incæte tōmengā iñōmō cōwē ēñēnāmai ingampa. ¹⁴ Wæætē æcānō cōwē waa cæda ina iñōmō tōmengā, Quīnō waa īi, ante, Quīnō wēnæ wēnæ īi, ante wæætē wæætē ante cædinque do ēñente badinque picængā bai bacampa. Īnīnque ædæmō picænāni nē badāni beyænque mōni nō odōmonte apænedō iñōmō cænguī tæēmō bai ongompā.

6

¹ Mōnō Codito inguipoga quēwēnīnque æbānō cægacāi, ante do ēñēmompā. Mōnō wænguīnō goquinque wēnæ wēnæ cæmompā, ante wædinque, Idæwaa wēnæ wēnæ cætabopa, ante mōnō Wængonguī gāmænō æbānō cæte ocæ ēmænte ponguī, ante do ēñēmompā. Tōmengā ingante æbānō cæte pōnenguī, ante do ēñēmompā. Īnīnque mānīnō tōmānō ante do ēñēnīmō inte mōnō mānīnō ante idæwaa tedetompā. Wæætē, Æbānō cæte godōmenque picæmō bai ēñente baquī, ante mōnō ñōwo apænecaēimpa. ² Adobai, Æpænē quīnante guīquī, ante, Ōnompoca quīnante godō gampoquī, ante do ēñēmō inte mōnō mānīnō ante godōmenque tededāmai ingæimpa. Ayæ, Wænte ate ñāni mōnō

ōmæmongæimpa, ante do ēñēmō īnīnque, Wængonguī cōwē apænte ancæcāimpa, ante do ēñēmō īnīnque mōnō mānīnō ante ñōwo godōmenque tededāmai ingæimpa. ³ Īnīnque Wængonguī Ao angā ate botō mānīnō mīnitō do ēñēnīnō ante tededāmai incæboimpa. Mīnitō ēñēnāmai īnīnō ante wæætē nanguī apænebo ēñencæmīnīmpā.

⁴ Wængonguī mōnō mīmōnē pōnō tīca ēnente bai cædinque edonque odōmonte apæneca ēñēnīnque mōnō ñāō bai entawēmompā. Tōmengā oōnæde waa pōni nānō da pōnongaincōo do ænte quēwēmompā. Ayæ tōmengā Tæiyæ Waēmō Ōnōwoca ingante da pōnongā ænīnque mōnō tōmengā tōnō āanque bai ēwocamompā. Mānōmai ēwocamō incæte pancadāniya wadæ godāni inte edæ ædō cæte, Wēnæ wēnæ cæte awædō, ante ocæ ēmænte ponguīnānī. ⁵ Tōmēnāni iñōmō, Wængonguī nānō ānō waa pōni impā, ante do ēñēnīnāni inte ayæ, Wængonguī mīnguipo nānō badōñedē māniñedē mīimāmoque ba ate tæi piñænte cæcæimpa, ante do ēñēnīnīpa. ⁶ Incæte mānīnō nāni wede pōnēnīnō ante Baa ante wadæ godāni bai tōmēnāni edæ ædō cæte īncayæ ate, Idæwaa wēnæ wēnæ cæte awædō, ante ocæ ēmænte ponguīnānī. Īñæmpa dodāni Wængonguī Wengā ingante awæ tīmpote wænōnāni bai cædinque īnāni wæætē tōmengā ingante adodō wænonte bai cædānīpa. Ayæ tōmēnāni nāni æmæwo ēwente wæquinque tōmānāni ayōnāni Wængonguī Wengā ingante badete tote bai cædānīpa.

⁷ Edæ cōōnæ wantæ wantæ cæ ate waodāni cōñe inguipoga tōmēmō quīyadāni wææ pæte incapa. Incate amīmō ba ate nē quīyadīnāni nanguī tā pete eyepæ ænāni īnīnque Wængonguī wæætē onguipo tōmenguipo waa pæ ate adinque, Waa pæguipo abopa, angampa. Adobai tōmengā nānō ānō ante wantæ wantæ iñō apænedāni ēñēnīnque waodāni gānē pōnēnāni badinque wadāni īnānīte waadete cædāni ate Wængonguī mānīnāni īnānīte, Mīnitō waa ēñente cæmīni abopa, ante pōnō waa cæcampa. ⁸ Ōmentacooque pæguipo daacamenque pæguipo guīquēnē nānō æmæwo tante ēwengūnque ōnongūpoque

impa. Mäninguipo iya tangui bai waocä adobai Wængongui nänö änö ante nê Baa angä iñömö tömengä nänö æmæwo êwenguinque Baa angampa.

Watapæ bacæimpa, ante pönëninque tæi ongömompä

9 Iñänäni êñeedäni. Wadäni mänömai inänipä, ante yewæmömöni incæte mönitö ayömöni minitö wii tömënäni bai imini amönipä. Wæætê Codito ængä beyænque nê quëwenguimini inömini inte minitö cöwê waa cæmini imini amönipä. 10 Edæ minitö cöwê waa cædinque Wængongui ingante waadete pönëninque tömengä quinäni beyæ godö waa cægaimini inte ñöwo godömenque cæminipä, ante adingä inte Wængongui dicæ mini cædö ante pönënamai inguingää. Wæætê nê nö cædongä inte tömengä mini cædö ante cöwê pönengampa. 11 Codito beyænque watapæ bacæimpa, ante minitö wede pönëminipä. Iñinque minitö mäninö mini wede pönënö ante iñinque baganca wede pönencæte ante cædinque mini waadete pönö cægainö bai adobai iñinque baganca cöwê cæedäni, amönipä. 12 Edæ nê wede pönënanäni wæntæye inämai inäni iñömö edæ Wængongui, Pönömo æedäni, ante nänö angaincoo cöwê æncædänimpa. Minitö iñömö, Tömënäni æbänö cædänii, ante adinque tömënäni nani cædö bai adobai cædinque wæntæye inämai inte Wængongui nänö angaincoo adobai æncæminimpa, amönipä.

13 Wængongui, Botö änö bai cöwê cæcæboimpa, ante Abadäo wodi ingante angacäimpa. Mänömainö ante näwangä impä, ante Abadäo êñencæcäimpa, ante cædinque tömengä, Wacä emöwo godömenque tæi piñængä emöwo ante apænebo êñëninque do êñencæcäimpa, ante cæyongante wacä nê tæi piñængä guiquënë edæ dæ angacäimpa. Iñinque Wængongui iñömö nämä emöwo ante apænedinque, Wængonguimo nê Quëwëmo inte nöingä ante ämo êñëe, äninque iñimai angacäimpa. 14 “Botö bitö imite pönö waa cæbo ate bitö pæinäni nangui yebæninque bacoo bacædänimpa. Botö Wængonguimo nê Quëwëmo inte ämopa.” 15 Ante do angä

êñengaingä inte Abadäo wodi wantæpiyæ ænämai inte wänö cöñongante Wængongui tömengä nänö angainö bai pönö cæcä ængacäimpa.

16 Waodäni guiquënë, Näwangä ämopa, ante êñencædänimpa, ante cædinque wacä emöwo godömenque tæi piñængä emöwo apænedinque änänipä. Mänömai cædinque waocä, Botö godömenque nê tæi piñængä tönö guëa cæte bai äñimo inte ædö cæte babæ ante wadö cæquimoo, ante bai apæneyongante wacä Ao angä ate tömëna nana guëa cæcaya badapä.

17 Wængongui iñömö, Botö wadö bai änämai inömo inte mänii botö angainö bai cöwê cæcæboimpa, angacäimpa. Ayæ, Mänömai impä, ante botö angaincoo nê ænguinäni ædæmö êñencædänimpa, ante cædinque Wængongui nämä emöwo apænedinque, Botö Wængonguimo nê Quëwënömo inte näwangä ämopa, angacäimpa. 18 Tömengä, Botö pönö cæbo beyænque watapæ bacæimpa, ante nänö angainö ante æncæte ante mönö Wængongui gämænö do wodii winonte pömöimpa. Iñinque tömengä weca do pönimö iñömönte tömengä wæætê, Mënea beyæ mönö watapæ bacæimpa, angampa. Ayæ, Minitö wampo pönëninque edæ botö tönö edæ godömenque cæcæminimpa, ante tömengä ædæmö apæncampa. Mënea ante apænebo êñëedäni. Botö Wængonguimo inömo inte nämä Wængongui emöwo apænebo beyæ nê êñëmini inte minitö mänine beyæ pönencæminimpa. Ayæ godömenque wade ante, Wængongui incæ ædö cæte babæ wapiticæ anguingää, ante pönencæminimpa. Mänömai Wængongui mënea ante cægacäimpa.

19 Iñinque wipo gæguincamë inte tæi ñänoncadodäni ate wai wocæ bai mönö iñömö edæ, Mänine mënea beyæ watapæ bacæimpa, ante mönö wede pönënö beyæ tæi ongömö inte mönö ædö cæte wadæ goquii. Mönö wede pönënö beyænque edæ Wængongui oncönë weocoo wææ owoyömo tadömengadæncönë guii öönædê ñä cæte bai i iñinque mönö öñowoca iñömö edæ tæi ongönte bai êwocamompä. 20 Itota iñömö täno beyænte öönædê æidinque

mönö beyæ ante mänincönë do wäänë guigacäimpa. İnıne Mëequitedeco në godongä ñænængä nänö ingai bai badınque Itota, Wængongui qui, ante nämä wepæ në Godongä Ñænængä pönı inongä inte edæ cöwë ongonampa.

7

Mëequitedeco bai Itota në Godongä Ñænængä ingampa

¹ Mëequitedeco guiquënë Tadeë nani añömö quëwënëni awënë odeye inongä inte tömengä, Wængongui Æibæ pönı në Quëwengä qui, ante në godongä ingacäimpa. İñongante Abadäo wodi wadäni awënë odeyeidi inänite wënonte pönongante Mëequitedeco eyepæ pö bee tënıne, Abadäo ëñëmi, angantapa. Bitö imite Wængongui pönö waa cæcæcäimpa. ² Ante pönö waa apæneyongante Abadäo inñömö awënëidi wodi nani mangaincoo tömengä nänö ö ænincoo bacoo pönı incoo adınque önonpo tipæmpoga mänımpocato cabo ti gæte cö cædinque, Wængongui qui, äınne Mëequitedeco ingante adocatoque pædæ godongä ængacäimpa.

Mëequitedeco në awënë odeye inñongante tömengä ëmowo pemonte bai cædinque wadäni, “Awënë inongä inte tömengä në nö cæcä ingampa,” ante angadänımpa. Ayæ, Tadeë “Gänë pönëñömö” nani angainñömö quëwënëni awënë odeye ingampa, ante pönëınne tömënëni, “Awënë odeye inongä inte tömengä në gänë pönengä ingampa,” ante wawo pemongadänımpa. ³ Tömengä badä ömacä ingä bai, tömengä wæmpocä ömacä ingä bai, tömengä nänö ëñagaiönæ ömacä ingä bai, tömengä nänö wængaiönæ ömacä ingä bai ante dodäni tömengä ingantedö ante yewæmongadänımpa. Mänömai i inıne mönö, Wængongui Wengä nänö cöwë ingai bai Mëequitedeco adobai, Wængongui qui, ante në cöwë godongä ingampa, ante pönengæımpa.

⁴ Tömengä ñænængä pönı ingacäimpa, ante botö imai ante apænebo pönëedäni. Wængongui qui, ante në godongä ñænængä pönı Mëequitedeco ingampa, ante pönëınne mönö wæmæ Abadäo wodi incæ tömengä nänö ö ænincoo önonpo

tipæmpoga mänımpocato ongö adınque adocatoque æınne Mëequitedeco ñænængä ingante pædæ godongä ængacäimpa. ⁵ Mönö Abadäo wodi pæimö inñömö tömancabomö inñömö incæte adocabodäniya mönö tönıñadäni Debiidi pancadäniya guiquënë, Wængongui qui, ante në godönäni bagadänımpa. Bayönänite Möitee wodi tömënëni inänite imai angacäimpa. Minitö tönıñadäni inänite ämini ëñëınne tömënëni wæetë tömënëni nani ænincoo önonpo tipæmpoga mänımpocato ongö adınque adocatoque pædæ pönönäni æncæminımpa, ante wææ angä ëñëınne tömënëni, Wængongui qui bacäımpa, ante në ænäni inänıpa. ⁶ Mëequitedeco guiquënë Debiı wodi pæingä inämai ingaingä incæte adocatoque angä ëñëınne Abadäo wodi pædæ godongä ængacäimpa. Do inñömö Wængongui incæ Abadäo ingante apænedinque, Bitö qui, ante botö cöwë pönömo æncæbiımpa, angacäimpa. Incæte wantæpiyæ ate Wængongui nänö në angaingä inñongante Abadäo ingante apænedinque Mëequitedeco inñömö, Wængongui bitö imite pönö waa cæcæcäımpa, ante pönö waa apænægacäımpa.

⁷ Mönö ayömö guiquënë, Ñænænäni inönäni inñömö tömënëni, önonänıne inänite në godö waa apænëdäni inänıpa, ante do ëñëınmo inte mönö wadö ante ædö cæte pönenguıı. İnıne, Abadäo wodi önonganque inñongante Mëequitedeco në ñænængä inongä inte edæ mänömai waa apænægacäımpa, ante mönö edonque ëñëmompä. ⁸ Mänınäni Debiidi guiquënë në ñömæıntai ëñadäni inänıpa. Incæte tömënëni inänite wadäni, Wængongui qui bacäımpa, ante adocatoque cöwë pönönäni ænäni. İngä Mëequitedeco guiquënë ñömæıntai ëñadämai bai ingaingä inte në quëwengä ingampa, ante yewæmongatımpa. Tömengä mänömai në quëwengä bai inñongante Abadäo wodi tömengä ingante, Wængongui qui, ante adocatoque godongä ængacäımpa.

⁹ Mänömai impa, ante pönëınne botö, Eñencæminımpa, ante ñöwo godömenque yewæmömo aedäni. Tömënëni nani æninö

önompo tipæmpoga ganca mänimpocato ongö adinque, Wængonguï qui, ante adocatoque pædæ godõñõnãni Debiï nãni pæincabo incæ nê ænãni inõnãnimpa. Incæte Debiï wodi wæmpocoo ingainga inongã inte Abadão wodi adocatoque do godongã ininque tõmengã pæingã inguingã Debiï iñõmõ wæmpocoo tõnõ åanque bai adocatoque do godonte bai ayæ ate eñate quëwengacãimpa. ¹⁰ Edæ Abadão wodi nãnõ pæinãni Debiïdi inãnipa. Ininque Debiï ayæ eñadãmaï iñongante tõmengã wæmpocoo Abadão wodi ingante Mëequitedeco põ bee tente adocatoque æninque Debiï nãnõ ænguënencoo incæ pancacooga adobai ængacãimpa.

¹¹ Wængonguï doyedë angã eñëninque Debiïdi pancadãniya, Wængonguï qui, ante nê godõnãni bagadãnimpa. Ayæ Wængonguï, Iïmaï cæedãni, ante angã eñente yewæmõninque Debiïdi wæætë wadãni inãnite odõmonte apænedãni eñengadãnimpa. Incæte Debiïdi, Wængonguï qui, ante nãni godõnõ beyænque mõnõ Wængonguï ayongã mõnõ ædæmõ pædãni bai edæ dicæ entawente bamongaa. Iñæmpa mãninãni nãni godõnõ beyænque nê picænãni bai bamõ bai ñõwo wacã nê Godongã ingante Wængonguï da põnõnãmaï incædongãimpa. Ayæ, Wængonguï qui, ante nê Põnongã incæcãimpa, ante Codito ingante da põnõninque Wængonguï, Debiï wodi pæingã Aadõo nãnõ põnongã bai Codito adobai põnoncæcãimpa, ante ånãmaï inte wæætë, Mëequitedeco nãnõ põnongã bai cædinque Codito põnongã beyænque woadãni botõ ayõmõ nê nõ cædãni bacædãnimpa, angacãimpa. ¹² Ayæ, Wængonguï qui, ante nãni godoncabo iñõnãnite Wængonguï, Idæwaa cæmïnipa, åninque wacã ingante, Bitõ wæætë botõ imote nê Põnõmi bacæbiimpa, angacãimpa. Ayæ wacã mãnõmaï nê Godongã bacã beyæ Wængonguï, Iïmaï cæedãni, ante nãnõ wææ angainõ ante wëã godonte bai cædinque wade åninque wææ angã ingacãimpa.

¹³ Ininque Wængonguï ñõwo, Nê Põnõmi bacæbiimpa, ante nãnõ nê angaingã iñõmõ Debiïdi nãni cabo inãmaï inte wæætë wacabocã inongã ingampa. Incæte ñõwocã

Codito guidënãni iñõmõ, Wængonguï qui, ante nãni iya tãimpaa cõwë godõnãmaï inõnãnimpa. ¹⁴ Edæ, Wængonguï qui, ante oodaaidi nãni cabo nê godõnãni incædãnimpa, ante Mõitee wodi dicæ angacãiñaa. Incæte, Mõnõ Awënë iñõmõ Oodaa wodi pæingã ingacãimpa, ante edonque acæimpa. ¹⁵ Ininque Mëequitedeco nãnõ ingã bai wacã wæætë, Wængonguï qui, ante nê Godongã bacã adimõ inte mõnõ godõmenque edonque eñengæimpa. ¹⁶ Edæ Ñõwocã tõmengã mæmæidi wïi nê godõnãni ingadãnimpa. Ininque, Bitõ mæmæidi nãni godongã bai bitõ adobai godonte eñëe, ante ædõ cæte anguïi. Wïi tõmengã mæmæidi nãni cægã bai cædinque tõmengã nê Godongã bagacãimpa. Wæætë cõwë nê wænãmaï Quëwenguingã inte tõmengã nãmã nãnõ tæi piñænõ beyænque nê Godongã bagacãimpa. ¹⁷ Edæ tõmengã ingante apænedinque Wængonguï,

“Mëequitedeco, Wængonguï qui, ante nê põnongã cõwë nãnõ ingã bai, bitõ adobai ñimpo cædãmaï inte nê Põnõmi cõwë incæbiimpa,” ante apænegacãimpa.

¹⁸ Ininque, Iïmaï cæedãni, ante Mõitee wodi wëenëñedë nãnõ wææ angaine incæ aquïine inte õnõneque bai iñonte wëã godonte bai bagatimpa. ¹⁹ Edæ Mõitee wodi, Iïmaï cæedãni, ante nãnõ wææ angainõ eñente beyænque mõnõ Wængonguï ayongã ædæmõ pædãni bai dicæ entawente baquimõo. Wængonguï wæætë, Codito põnõ cæcã beyænque watapæ quëwencæmïniipa, ante ñõwo põnõ apænegacãimpa. Ininque, Mãnõmaï impa, ante põnëninque mõnõ Wængonguï weca põmopa.

²⁰ Wængonguï wïi õnonque angacãimpa. Wæætë tõmengã nãmã emõwo apænedinque, Botõ Wængonguïmo nê Quëwënõmo inte nãwangã åmopa, åninque Codito ingante angã ate tõmengã wæætë, Wængonguï qui, ante nê Godongã bagacãimpa. Wæætë wadãni inãnite guiquënë tõmengã wïi nãmã emõwo apænedinque, Nãwangã åmopa, ante ånãmaï ingã incæte tõmënãni õnonque, Wængonguï qui, ante nê godõnãni

bagadänimpa. ²¹ Codito ingante guiquënë Wængongui iimaï ante apænegacäimpa.

“Bitö ñimpo cædämaï inte, Wængongui qui, ante nê Pönömi cöwê incæbiimpa.

Ante botö nê Tæiyæ Awënë inömo inte nöingä äninque

iincayæ ate wadö ante cöwê änämaï incæboimpa.”

²² Wængongui, Itota botö imote nê Pönongä inongä inte mînitö beyæ cæcä ate mînitö Ao ämîni ininque mönö godongämæ waa cæcæimpa, äninque Wængongui mönö imonte ñöwo godömenque waa pönî apænegacäimpa. Ininque Wængongui mänömaï nämä emöwo apænedinque, Nawangä ämopa, äninque Itota nänö nê angäingä iñongante mönö Itota ingante pönëninque, Wængongui nänö angainö bai cöwê cæcæcäimpa, ante do eñemompa.

²³ Mäninäni guiquënë nê ñömæintai eñagainäni inte ædö cæte ñimpo cædämaï inte Wængongui ingante nê godönäni cöwê inguinäni. Ininque wii adocanque nê godongä ingacäimpa. Wacä wacä nê godönäni bagadänimpa. ²⁴ Itota iñömö nê wænämaï quëwëningä inte tömengä, Wængongui qui, ante nê Godongä inongä inte cöwê quëwëngampa. ²⁵ Edæ tömengä nê wænämaï Quëwëningä inte Wængongui ingante mönö beyæ ante cöwê apænedinque, Botö bitö gämænö nê mämömo pönäni inänite bitö pönö waa cæcæbiimpa, ante ñimpo cædämaï inte cöwê apænecampa. Wængongui ingante cöwê apænecä inongä inte tömengä cöwê quëwëninque ædæmö pönö ængä beyænque mönö wæætê cöwê wænämaï quëwënguimö imompa.

²⁶ Wadäni nänî eñenämaï cæcabo bai wii inongä inte Itota iñömö tæiyæ waëmö inongä ingampa. Wentamö mongænämaï inongä iñongante tömengä ingante ædö cæte piinte apænte anguinäni. Mänömaï ingä adinque Wængongui tömengä ingante öönædê æmonga pönî ængö cæcä on-gongampa. Ininque tömengä adocanque pönî, Wængongui qui, ante nê nö Godongä Ñænængä pönî inongä inte mönö wædö ante eyepæ pönî pönö cæcampa. ²⁷ Wadäni nê godönäni ñænænäni pönî inäni guiquënë tömënäni täno godöninque nämä nänî wënæ

wënæ cædö beyæ ante, Wængongui botö imote waa acæcäimpa, ante cæningä wepæ iimö iñö iimö iñö godönänipa. Ayæ ate wadäni nänî wënæ wënæ cædö beyæ adobaï godönänipa. Itota guiquënë wënæ wënæ nänî cædö bai cædämaï inongä inte nämä beyænque godönämaï ingacäimpa. Ayæ wamö mönö wënæ wënæ cædö beyæ wæætê wæætê godönämaï inte tömengä eyepæ inongä inte adopoque pönî godongacäimpa. Ininque tömengä nämä wepæ godöninque eyepæ pönî godongä adinque Wængongui wæætê mönö imonte waa acampa.

²⁸ Möitee wodi nänö wææ angainö ante eñente cædinque waodäni aquii inäni nänî cabo iñönänite pancadäniya inänite änäni Wængongui ingante nê godönäni ñænænäni do badänipa. Wængongui guiquënë iincayæ ate nämä emöwo apænedinque, Botö Wengä ædæmö Picængä nê eñengä bagaingä ingante ämo ate tömengä nê Pönongä Ñænængä bacæcäimpa. Botö Wængonguimo nê Quëwënömo inte näwangä ämopa, angacäimpa.

8

Wængongui ñöwo nänö angainö ante Itota iinque cæcä

¹ Mänömainö ante quinante yewæmömöni.

Edæ, Mönö wædö beyæ ante, Wængongui qui, ante nê Godongä Ñænængä pönî inte ongongampa, ante, Nawangä impa, ante edonque eñencæminimpa, ante yewæmömönipa. Tömengä iñömö öönædê æidinque Awënë Wængongui tömëmængä inö tæ contadinque Tæiyæ Awënë inte ongongampa, ante yewæmömöni adinque eñencæminimpa. ² Mänömaï inongä inte tömengä wii waocä nänö mænongaincönê cæcampa. Wæætê Wængongui, Owocæboimpa, ante tæiyæ waëmö nänö mænongaincönê Itota iñömö mönö beyæ ante, Wængongui qui, ante nê Godongä Ñænængä pönî inte cæcampa.

³ Inguipoga quëwënäni guiquënë adocanque ingante, Wængongui qui, ante bitö nê godömi ñænæmi pönî bacæbiimpa, änäni badinque tömengä nê tä nê tä cædinque mäincoo cöwê godonguëningä ingampa.

Īninqe māningā Itota guiquēnē adobaī nē Godongā Nānāngā pōnī ĩnongā inte adobaī godonguēnengā ingampa. ⁴ Edæ, Īncooque godoncæminimpa, ante Mōitee wodi wææ angā ēñente cædinque ingui-poga nē godōnāni guiquēnē do eyepæ pōnī godōnāni ĩnānīpa. Īninqe tōmēnāni nāni godō baī Itota ĩñōmō ædō cæte godonguēnengā inguingāā. Inguipogaque quēwengā inte baī tōmengā ĩñōmō edæ Wængonguī ingante nē godongā ĩnāmaī incædongāimpa.

⁵ Tōmēnāni guiquēnē, Wængonguī ōōnædē nānō owocō cōwē ongō baī ingui-poga adobaī mænonte mānincō ōwocodenganque baī ĩñonte acæimpa, ante adobaī pōnī mænongadānīpa. Mānōmaī mænōninqe tōmēnāni mānincōnenque, Wængonguī quī, ante nē godōnāni inte cædānīpa. Īninqe Wængonguī, Adobaī pōnī mænōincō on-gongæimpa, ante cædinque Mōitee wodi nē mænongingā ingante doyedē angacāimpa. “Mōitee ēñēmi. Bitō, Æbānō mænonguī, ante, Æbānō badonguī, ante botō onquiyabo ĩñōmō bee tente odōmōmo adinque badoncæbiimpa. Bitō cōwā adinque botō odōmōnō baī ĩncō adobaī mænōninqe ĩncōnē ongoncoo tōmancoo adobaī pōnī badoncæbiimpa,” angacāimpa. ⁶ Wængonguī, Botō Mōitee tōnō wææ āninqe, Īmaī cædāni, āmo ate Ao āmīni ĩninqe mōnō godongāmæ waa cæte quēwengæimpa, ante wēēnēñedē nānō angainō wædænque waa ingatimpa. Nōwo guiquēnē tōmengā, Itota ængā beyænque quēwēmīni inte Ao āmīni ĩninqe mīnitō botō tōnō godongāmæ waa cæte quēwencæminimpa, ante nānō ānō ĩñōmō godōmenque waa pōnī impa. Edæ Wængonguī nānō ānō ĩnque bacæimpa, ante Itota incæ nō cægacāimpa. Ayæ adobaī mānīnō nē godōnāni nāni cædō guiquēnē wædænque waa ĩñonte Itota nānō nō cædō guiquēnē godōmenque waa pōnī impa.

⁷ Mānīne edæ, Mōnō godongāmæ waa cæte quēwengæimpa, ante Wængonguī wēēnēñedē nānō angāine ĩñōmō mōnō quēwenguīnō ante eyepæ ĩ baī Wængonguī nōwo wade ante ānāmaī incædongāimpa.

⁸ Incæte waodāni wentamō mongænāni adinque Wængonguī doyedē apænedinque, “Botō pōnō cæbo ate mīnitō Ao āmīni ĩninqe mōnō godongāmæ waa cæte quēwengæimpa,

Ante botō nē Awēnē ĩnōmo inte idægoidi ĩnānite oodaaidi ĩnānite ĩncayæ ate mīine ante mā pōnī apæne-cæboimpa.

⁹ Mæmæidi doyedē Equitobæ quēwēñōnānite botō tōō æmænte ænte poncæte ante cædinque,

tōmēnāni ĩnānite, Mōnō godongāmæ waa cæcæimpa, āñōmote tōmēnāni wæætē pango cæte gogadānīpa.

Pango cæte godāni ate botō wæætē dadi ēmæmonte tōmēnāni ĩnānite adāmaī ingaboimpa.

Mānōmaī beyæ botō wēēnēñedē botō angainō baī

nōwo wæætē adobainō ante ānāmaī incæboimpa, ante botō nē Awēnēmo ĩnōmo inte āmopa.

¹⁰ Mānīñedē ate edæ idægoidi ĩnānite botō, Īmaī pōnō cæbo ate mīnitō Ao āmīni ĩninqe mōnō godongāmæ waa cæte quēwengæimpa, āninqe edæ ĩmaī cæcæboimpa.

Īmaī cædāni, ante botō wææ ānō ante godō apænebo ēñēninqe

mānīne ante mīmōnē yewæmonte baī entawēninqe

tōmēnāni nē wede pōnēnāni incædānīpa.

Tōmēmo tōmēnāni Wængonguīmo ĩñōmote tōmēnāni wæætē botō quīnāni incædānīpa.

¹¹ Mānīñedē botō angaiñedē ba ate edæ waocā tōmengā guīdengā ingante ayæ wacā ingante odōmonte apænedinque, Bitō Wængonguī ingante ate baī pōnencæbiimpa, ante quīnante anguingāā.

Īñæmpa mānīñedē ate guīyanga pōnī ĩnongā incæ nānāngā pōnī ĩnongā incæ

tōmēnāni tōmānāni botō ĩmote do adinque pōnencædānīpa.

¹² Edæ tōmēnāni ēñēnāmaī nāni cædō ante botō pānāmaī inte waadete godō nīmpo cæcæboimpa.

Ayæ tōmēnāni wēnæ wēnæ nāni cægāinō ante adāmaī inte baī botō pōnēnāmaī incæboimpa,” ante Wængonguī apænegacāimpa.

¹³Äninqe ñöwo, Æmo beyænque quëwëmini inte mînitö Ao ämini ininqe mönö godongämæ waa cæte quëwengæimpa, ante mä pöni äninque Wængongui wëenëñedë, İimaï cædäni, ante nänö wææ angaine ante, Woïne inte eyepæ inämaï ingaine ënëpa, ante bai cæcampa. Woïne iñömö oo dæ baquïne ënëpa.

9

Wængongui Tæiyæ Waëmö oncö bai æmontaicö impa

¹ Wængongui wëenëñedë dodäni inänite, Botö pönö cæbo ate mînitö Ao ämini ininqe mönö godongämæ waa cæte quëwengæimpa, angacäimpa. İninque tömengä nänö wææ angainö bai cædinque tömënäni, Wængongui ingampa, ante tömengä beyæ cæquënänäni ingadänimpa. Ayæ inguipoga tömengä owoquincö tæiyæ waëmö oncö mænöninque tömengä weca pöninque cæquënänäni ingadänimpa. ² Angä ëñëninque dodäni, Wængongui nänö owoquincö, ante æmontaicö badöninque weocoo odemontai wodönedinque mencönea badongadänimpa. Yabæcönë, Tæiyæ Waëmö Oncö impa, ante nani ancönë iñömö mäniñömö gongapæncade doyæncade tæiyæ ti wodönoqui encadocade ongongatimpa. Ayæ awæmpaa badöninque tömënäni, Wængongui beyæ tæiyæ waëmö päö öñongæimpa, ante cædinque mänimpaa päö ñö cædäni öñongatimpa.

³ Weocoo wacoo nani guimongademö wodöiñömö guimongacö iñömö Tæiyæ Waëmoncö Pöni nani angaincö ingatimpa.

⁴ Mänincönë ogui wacæimpa, ante cædinque, Ogui waqui iya tangæimpa, ante awæmpa oodo nani pönö tee bæimpa badonte cö cædäni ongongatimpa. Ayæ, Mönö godongämæ waa cæcæimpa, ante wææ äninque Wængongui nänö yewæmongainca Tæiyæ Waëmoncönë Pöni ongongæimpa, ante cædinque awæmpa badöninque oodo yabæpa tee baadinque cæncadempa adobai tee baate nani cönöimpa ongongatimpa. Ayæ oodo æninque aca podonte wamoncade bai bædinque tömënäni önömæca nani cængaimö Mänää nani angaimö

æninque oodo nani bædincadedë da wëninque mänincade wæætë oodo ëmompaa cæncadë inö da wente cö cæte mangadänimpa. Ayæ adobai Aadöö wodi nänö ongonto tä bocagainto æninque ado oodo ëmompaa cæncadë inö da wente ñö cædäni öñongatimpa. Ayæ Wængongui dicaboga nänö, İimaï cædäni, ante yewæmongaine adoyömö ongongæimpa, ante cædinque mäninca æninque ado oodo ëmompaa cæncadë inö da wëninque cö cædäni ongongatimpa.

⁵ Mänimpaa yædopaa waomini mini wënæ wënæ cædö beyæ wepæ godonte impa, ante Wængongui, Botö pönö waadeimpa impapa, angacäimpa. Ayæ Wængongui në ñäö ëmongä weca në owoda iñömö adobai ñäö bai ëmöna iñönate tömöna nana ëmönö bai dodäni adobai badonte oodo ëmompaa æmataæ æmataæ tæi goncædäni ongongatimpa. Ayæ tömöna öömä tiyæmäa pömæna gänë iñömö Wængongui, Botö pönö waadeimpa, ante nänö angaimpa öñongatimpa. Mänimpacoo æbänö impaa, ante mäninque ñöwo yewæmömönipa.

⁶ Tömancoo mänömaï cöo cædäni ongöñonte, Wængongui qui, ante në godönäni iimö iñö iimö iñö yabæcönë pö guidinque, Wængongui ingampa, ante cægadänimpa. ⁷ Guiimongacönë guiquënë në godongä ñænængä iñömö wadepo iñö adopoque wadepo iñö adopoque pö guidinque tömengä adocanque guidongäimpa. Incæte tömengä në godongä ñænængä pöni inongä incæ wepæ næænämaï inte ædö cæte guiquingä. Edæ wepæ cöwë ænte guidinque tömengä nämä beyæ godö pipo pipo cædinque, Wadäni ëñënamäi inte nani wënæ wënæ cægainö incæ ñä mënongacæimpa, ante tömënäni beyæ adobai godö pipo pipo cædongäimpa. ⁸ Mänincö æmontaicö ayæ ongöñedë Tæiyæ Waëmoncönë Pöni wii önonque guigadänimpa. Wængongui nänö owodö æidö mäniñedë adobai wii edonque ingatimpa, ante odömoncæte ante Wængongui Tæiyæ Waëmö Önöwoca angä guidämaï ingadänimpa.

⁹ Mänömainö ante odömöninque tömengä mönö ñöwomö imonte wæætë, İimaï ante ëñencæminimpa, ante cægcäimpa.

Waocä, Wentamö mongænte awædö, ante nê wædongä inte waëmö iñömö pöninge, Wængongui qui, ante baö iya tangui tönö bequi cænguï godongampa. Mänömaï ancaa godongä incæte tömengä mimö nämä nänö apænte entawënö ñä mënongadämaï inte wentamö ayæ mongænte entawënongäimpa. ¹⁰ Mänömaï cænguinque bequinque ante wææ äninque, Æbänö cæte godonguii, ante ayæ, Æpænenque æbänö cæte mënongaquii, ante dodäni mänincooque ante nâni wææ angainö ante eñente cægadänimpa. Ìninque, Waguipo iinque bayonte önöwoca ædæmö mënongate quëwengæimpa, ante miinguipo iinque bagancaque tömënâni mänincooque ante cædönänimpa.

¹¹ Wapämo mini waa quëwenguinque pömämo, ante badoncæte ante mönö Codito iñömö, Wængongui qui, ante nê Godongä Ñænængä pöni inongä inte do pongacäimpa. Pöninge tömengä waodäni önompoca nâni mænongaincönë guidämaï inte Wængongui nänö badongainguipoga cædämaï ingacäimpa. Wæætë adodö go æidique tömengä öönæde Wængongui nänö owocönë ñænæncönë guidique näwä owocönë cægacäimpa. ¹² Caboda wepæ næænte guidämaï inte wagada wë wepæ næænte guidämaï inte mönö Codito iñömö edæ nämä wepæ godöninge öönæde Tæiyæ Waëmoncönë Pöni æmæwo guigacäimpa. Ìninque tömengä ængä beyænque mönö æmæwo pöni abæ tawænte bai cöwë quëwëmompä.

¹³ Ñömæi incæ gampodinque, do wæningä baö incæ gampodinque waocä näate bai wædongä inte edæ Wængongui weca ædö cæte ponguingä. Wæætë, Tömengä waiñacä bate poncæcäimpa, ante cædinque, Wængongui qui, ante nê godönâni iñömö caboda wepæ tönö wagada onguiñængä wepæ æninque nê näadingä baonga pipo pipo cædänipa. Ayæ wagada baquecä ingante wænonte nê täninque gönaique adobai æninque tömengä baonga pipo pipo cædinque, Bitö nê näadimi inte waiñabi babipa, ante cægadänimpa.

¹⁴ Mönö Codito guiquënë Tæiyæ Waëmö inongä inte nê cöwë Quëwengä Önöwoca

tönö guëa cædinque Wængongui ingante, Bitö quimo imopa, ante nämä wepæ godongacäimpa. Tömengä wepæ iñömö wii cæningä wepæ bai inte godömenque eyepæ pöni wepæ imæmpä. Ìninque mönö wænguinque wënæ wënæ cæyömonte tömengä, Minitö mimö entawëmini inte ñä mënongate entawente nämä apænte pönente quëwencæminimpa, ante nämä wepæ do godongacäimpa. Ayæ mönö wënæ wënæ cægainö ante wadæ cædinque godömenque pönö cæcä ate mönö Wængongui nê Quëwengä ingante nê cæmö badinque cæmompä.

¹⁵ Wængongui miine ante apænedinque, Mönö godongämæ waa cæte quëwengæimpa, äñongante mönö waocabo wæætë eñenämäi inte wënæ wënæ cæmö adinque Codito iñömö mönö wënæ wënæ cægainö beyæ ante wæætë wængä beyænque mönö abæ tawænte bai quëwëmompä. Nöwo iñömö Wængongui miine ante apænedinque, Botö pönö cæbo ate minitö Ao ämini iinque mini ænguincoo æmæwo æninque minitö cöwë mante quëwencæminimpa, ante aa pecä pongamönimpa. Ìninque mönö Codito wæætë, Wængongui nänö angaincoo æncæminimpa, ante cædinque iinque cæcä ate mönö nê pönimö inte do ænte quëwëmompä.

¹⁶ Waocä, Næne wæmo adinque botö mäincoo ini iinänique æncædänimpa, ante emöwo emöwo yewæmongä adinque wadäni wæætë, Näwangä æmæwo wængäimpa, ante eñente ate, Nê wængaingä nänö ante yewæmongainö bai bacæimpa, ante iinque cædänipa. ¹⁷ Ìnæmpä, Ìinâni qui bacæimpa, ante yewæmongä incæte nê yewæmönigä miingä quëwëñongante tömengä mäincoo ædö cæte tömënâni qui baquii. Wæætë tömengä æmæwo wængä ate mäniñedë ate tömengä nänö yewæmongai bai iinque cædänipa.

¹⁸ Mänömaï beyæ wëenëñedë Wængongui, Mönö godongämæ waa cæcæimpa, ante yewæmongä ate dodäni cæningä wænonte ate wepæ gowete ate godongämæ Ao äninque iinque cægadänimpa. ¹⁹ Wængongui, Ìimai cædäni, nänö wææ angainö tömanta

adinque Möitee wodi iñömö tömänäni inänite apænecä eññänäni ate wepæ gowete ate cægacäimpa. Wagada wänäni wepæ tönö caboda wepæ æninque æpæ tönö ænte wempo cædëninque iitopowæ nani äwæ yæpængö æninque obega ocagui opatawæmæ nani guipæningui ænte pæ dacadinque wepæ nani wempo cædënimænë bee podonte Möitee iñömö, Mäninta adinque eññengæimpa, ante cædinque mänintaa wepæ pipo pipo cægacäimpa. Ayæ nê eññänäni tömänäni baonga wepæ pipo pipo cædinque tömengä iimaï angacäimpa. ²⁰ “Wængongui, Botö pönö ämo eññëninque minitö Ao ante eññente cæmini ininque mönö godongämæ waa cæcæimpa, ante nänö wææ angainö beyænque ii wepæ impa. Ininque ii wepæ emontaa adinque mönö Ao ante mänine ante eññente cæcæimpa,” ante Möitee wodi apænecäimpa. ²¹ Ayæ æmontaiconga wepæ pipo pipo cædinque tömengä mänincönë Wængongui beyæ nani cæincooga wepæ pipo pipo cægacäimpa. ²² Ayæ wodo tömancooga ante Wængongui, Wepæ tönö ñä mënongacæimpa, äninque wææ angä cægadänimpa.

Iñæmpa wepæ gowedämaï iñonte mönö wënæ wënæ cæmö adinque Wængongui nê panguëngä inte ædö cæte pönö ata cæpoqingä.

Codito wepæ beyænque mönö mīmō mënongacæimpa

²³ Öönädë ongoncoo bai ingui-poga nani adobai badongaincoo incæ cæningä wænonte ate wepæ tönö ñä mënongaquëñänäni ingadänimpa. Wæætë näwä öönädë Wængongui weca gote mönö ongonguinque mönö adocanque nê waëmö pönö inongä wepæ beyænque ñä mënongaquëñëmö imompa. ²⁴ Edæ öönädë Wængongui nänö owocönë bai ante waodäni öonpoca nani tæiyæ waëmö pönö badongaincönë mönö Codito guidämaï ingacäimpa. Wæætë öönädë incæ æidinque tömengä mönö beyæ ante Wængongui weca guidinque a ongongampa.

²⁵ Wængongui qui, ante ingui-poga nê godongä ñænængä pönö inongä guiquënë wii nämä wepæ ænte pöninque cæningä

wepæ incæ ænte pöninque wadepo iñö adopoque wadepo iñö adopoque Tæiyæ Waëmoncönë Pönö guicampa. Mönö Codito guiquënë ingui-poga nê quëwengä bai wii adobai inongä inte wii wæætë wæætë godoncæte ante öönädë æi guigacäimpa. Wæætë öönädë adopoque æi guidinque tömengä nämä wepæ adopoque godongacäimpa. ²⁶ Edæ ingui-poga nê quëwänäni nani cæi bai cæcä bai tömengä Wængongui ingui-poga nänö badöñedë mä caate wædinque wantæ wantæ iñö cædinque ñöwo ganca tæmpo caate wæcædongäimpa. Wæætë mönö waocabo tömämö pedænguipoga mönö quëwënö wodo inque bayonte tömengä ñöwo pönö adopoque pönö pöninque wënæ wënæ mönö cædö ante æmæwo wido cæcæte ante nämä wepæ godongacäimpa.

²⁷ Mönö waocabo guiquënë nê wænguimö inömo inte adopoque wænte ate Wængongui weca pö gongæñömönte tömengä apænte ancæcäimpa. ²⁸ Mönö waocabo nanguï imö iñömönte mönö Codito iñömö wënæ wënæ mönö cædö ante mongæninque adopoque nämä godöninque wængacäimpa. Ayæ wæætë pöninque tömengä wii mönö wënæ wënæ cædö mongæncæte ante poncæcäimpa. Wæætë tömengä nänö ponguinö ante nê wänö cömö iñömönte tömengä, Quëwencæminimpa, ante mönö imönte æncæte ante poncæcäimpa.

10

¹ Iñcayæ ate nê Ponguingä iñömö, Wængongui qui, ante nämä wepæ eyepæ godoncæcäimpa, ante ödömoncæte ante cædinque Wængongui, Iimaï cæte cæningä wepæ pönödäni, ante do wææ angacäimpa. Incæte mänii wepæ Wængongui nänö wææ angaimæ iñömö wii eyepæ godongui ænguï impa. Ininque mänimæ tömengä nänö wææ angaimæ beyænque waocä ædö cæte ædæmö eññente picængä bai baquingä. Iñæmpa idægoidi iñömö wadepo iñö wadepo iñö wepæ ancaa godöninque Wængongui weca pö ædæ wææninque, Bitö Tæiyæ Waëmö imidö angüënë, ante apænecæte ante pönäni incæte tömëñäni tömengä nänö wææ angainö beyænque picænäni bai dicæ

badāniyaa. ² Tömengä nänö wææ angainö eyepæ i bai tömēnāni adopoque godōninque idæwaa godoncædōnānimpa. Edæ, Wængonguī ingampa, ante nē cædāni iñōmō māninque godōninque ædæmō ñā mēnongate bacædōnānimpa. Ayæ iincayæ ate tömēnāni, Wentamō entawente wænguī wæ, ante nāmā apænte wædāmaī incædōnānimpa.

³ Edæ wīi mănōmaī impa. Wæætē, Botō wēnæ wēnæ cæte awædō, ante wæætē wæætē nāni pōnente wæquinque tömēnāni wadepo iñō wadepo iñō godōnōnānimpa.

⁴ Edæ, Mōni wēnæ wēnæ cægāinō ante mēnongacæimpā, ante godōñōnāni wagada onguīñæ wepæ tōnō caboda wepæ eyepæ iimæmpa diyæ mēnongaquīi.

⁵ Cæningā wepæ wīi eyepæ impa, ante wædinque Codito inguipoga pōninque iīmaī ante apænegacæimpā.

“Wængonguī eñēmi. Cæningā baō nāni wænonte pōnōnō tōnō cænguī bequī nāni, Wængonguī quī, ante pōnōnō adinque bitō edæ wīi æinēmi ingabi-impā.

Wæætē botō Waobo baquinque bitō botō baō ante badongabiimpā.

⁶ Waodāni, Wængonguī quī, ante iya tāmōni ate Wængonguī waa acæcæimpā, ante tāñōnāni bitō wīi tobi ingabi-impā. Tömēnāni, Wēnæ wēnæ mōni cædō ante Wængonguī pōnō wido cæcæcæimpā, ante pōnōñōnānite bitō Baa angabiimpā.

⁷ Ante adinque botō, ‘Wængonguī eñēmi. Dodāni botō imotedō ante yewæmōninque, Tömengä inguipoga pōninque iīmaī cæcæcæimpā, ante nāni yewæmongainō bai cædinque botō bitō änō eñente cæcæte ante pōninque a ongōmoī ae,’ antabopa,”

⁸ Mōitee wodi guiquēnē, Cænīnāni inānite wænōninque mīnitō, Wængonguī quī, ante pædæ godōninque cænguī tōnō bequī godoncæmīnimpa, ante wææ angacæimpā. Incæte mōnō Codito Mæmpocā ingante tāno apænedinque, Waodāni cæningā nāni wænonte pōnōnō tōnō cænguī bequī nāni, Wængonguī quī, ante pōnōnō adinque bitō wīi æinēmi ingabiimpā. Wængonguī quī, ante iya tāmōni ate

Wængonguī waa acæcæimpā, ante ayæ, Wēnæ wēnæ mōni cædō ante Wængonguī pōnō wido cæcæcæimpā, ante pōnō tāñōnāni bitō Baa ante wīi tobi ingabiimpā, ante Codito apænegacæimpā. ⁹ Ayæ, “Bitō änō cæcæte ante pōninque a ongōmoī ae,” angacæimpā. Äninque tömengä, Iīne botō angainō iñōmō ædæmō eñenguīne bate ongongæimpā, ante cædinque Mōitee wodi wēenēñedē nänō angāine ante da godonte bai cægacæimpā. ¹⁰ Ayæ Wængonguī nänō änō ante nē eñente cæcā inte Itota Codito, Wængonguī quī, ante baonga eñadinque adopoque wæninque nāmā wepæ eyepæ godongä beyænque mōnō wæætē Wængonguī ayongä tæiyæ waēmō ewocamō bate quēwēmompā.

¹¹ Wængonguī quī, ante nē godōnāni guiquēnē tömānāni iīmō iñō iīmō iñō adiyæ gongænte Wængonguī beyæ ante cædānipā. Mănōmaī wæætē wæætē godōninque ado ado godōnāni beyænque tömēnāni wēnæ wēnæ nāni cædō ante ædō cæte wido cæte baquīi. ¹² Māningā mōnō beyæ nē nō Godongaingä guiquēnē adopoque godōninque iīnque baganca eyepæ pōni godōninque Wængonguī tömēmængä inō æi tæ contate ongongampa. ¹³ Mănōmaī ongōninque, Botō imote piinte cædāni inānite Wængonguī æyedēnō botō nempo pōnongä æninque botō tæi emōmō inte nē āmo baquīmoo, ante Codito ñōwo ganca wānō congampa. ¹⁴ Edæ tömengä pōnō badongä ate mōnō tæiyæ waēmō ewocate quēwēmō bayōmonte tömengä adoque pōni nänō godongainō beyænque, Ædæmō picæmīni bacæmīnimpa, ante do badongacæimpā. ¹⁵ Māninō ante Wængonguī Tæiyæ Waēmō Önōwoca mōnō imonte adobai apænecampa. Tömengä tāno apænegacæimpā.

¹⁶ “Mōnō Awēnē iīmaī angacæimpā. Māniñedē ate iincayæ ate,

botō pōnō cæbo ate Ao änāni iīnque mōnō godongāmæ waa cæte quēwengæimpā,

ante iīnque cæcæte ante iīmaī cæcæboimpā, angacæimpā.

Botō pōnō apænebo eñēninque tömēnāni,

Īimaī cæedāni, ante botō wææ an-gainō incæ mīmōnē entawencædānimpa. Botō pōnō apænebo ēñēninque mǎnīne ante ocai encate ēñencædānimpa.

17 Ayæ, Wēnæ wēnæ nāni cædō ante ñimpo cædinque botō pōnēnāmaī incæboimpa. Eñēnāmaī nāni cædō ante botō wæætē wæætē ānāmaī incæboimpa,” angampa.

18 Īinque tōmengā pōnō ñimpo cæcā ate mōnō edæ, Wēnæ wēnæ mōnō cædō beyæ pānāmaī incæcāimpa, ante quīnante godōmenque godonguī. Īñampa tōmengā dobæ ñimpo cægacāimpa.

Mōnō Wængonguī weca pongæimpa, ante

19 Īñānāni ēñēedāni. Tæiyæ Waēmō Pōnī Oncōnē pō guīte baī mōnō Itota wepæ beyænque guīñēnāmaī inte Wængonguī weca do guīquēnēmō ĩmompā. 20 Weocoo mǎnincōnē nāni wææ cægaincoo wægo tē baī Itota baō adobaī wangō cote ingatimpa. Mǎnōmaī beyæ odemō mīnemō wi ænete baī ĩ adinque mōnō quēwenguīnemō guīdinque Wængonguī weca edæ do guīimompā. 21 Wængonguī nānō godongāmæ owocabo ĩñōmonte, Wængonguī quī, ante nē Godongā Ñænægā pōnī ĩnongā ĩñōmō adocā Itota ĩñōmō mōnō ĩmonte nē aacā ĩnongā ingampa. 22 Mǎnōmaī beyæ mōnō Wængonguī weca pō guīicæimpa. Wēēñēdē wentamō mōnō entawēnō ante Itota nāmā wepæ inte ñā mēnongacā ate mōnō nāmā apænte nō cæinēmō inte guīicæimpa. Ayæ mōnō baō waēmōmæ āate baī ēmōmō ĩnque mōnō, Wængonguī tōmengā nānō ānō baī cōwē ædæmō cæcæcāimpa, ante wede pōnēninque mōnō guīñēnāmaī inte tōmengā weca do guīicæimpa. 23 Botō cōwē pōnō cæcæboimpa, ante nē angaingā ĩñōmō nē ædæmō cæcā ingampa, ante adinque mōnō, Tōmengā nānō ānō baī cæcā beyænque watapæ bacæimpa, ante mōnō pōnēnō ante cōwē wido cædāmaī inte mōnō pōnengæimpa.

24 Ayæ, Mōnō pōnencabo tōmāmō waadete pōnēninque waa cæte quēwengæimpa. 25 Pancadāniya Wængonguī ingante godongāmæ apænecæte ante pōnāmaī inte

wadæ godāni incæte tōmēnāni nāni cæi baī mōnō adobaī cædāmaī ingæimpa. Wæætē, Codito nānō ponguīōnæ oo pōnī impa, ate pōnente wædinque mōnō pōnencabo ĩñōmonte mōnō wacā ingā wacā ingā edæ waadete apænedinque, Wængonguī gāmēnō pōninque watapæ quēwēmini incæminimpa, ante apænecæimpa.

26 Wængonguī nō nānō ānō ante do ēñēnimō inte mōnō, Wīī ēñēinēwædō, āninque godōmenque wēnæ wēnæ cæmō ĩnque edæ wēnæ wēnæ mōnō cædō ante mēnongaquīmæ ante edæ wepæ dæ ā baī babaimpa. 27 Wæætē mǎnōmaī ancaa ēñēnāmaī cæmō ĩnque mōnō Wængonguī nānō apænte ante panguīmāmoque ante guīñente wæcōmaīmompā. Edæ mōnō Baa ante godōmenque wēnæ wēnæ cæmō ĩnque Wængonguī ingante nē pīināni nāni gonte wænguīmāmoque ante, Mōnō adobaī gonte wæncæ wæ, ante guīñente wæcōmaīmompā. 28 Mōitee wodi nānō wææ angainō ante, Wīī ēñēinēwædō, ante adocanque nē angā ĩñongante Waoda mēnaa ĩna incæ waodāni mengāa go adocanque ĩnāni incæ, Mǎnōmāinō ante apænecā ēñentamōnīpa, ante apænedāni ēñēninque nē āningā ingante waadedāmaī inte godō wænongadānimpa.

29 Īinque adocanque Wængonguī Wengā ingante pīnā gāwate baī cædinque Baa angā adinque tōmengā ingante Wængonguī ædō cæte pānāmaī inguingāā. Wængonguī, Botō pōnō æmo ate mīnitō Ao āmini ĩnque mōnō godongāmæ waa cæte quēwengæimpa, ante nānō angainō ĩnque bacæimpa, ante cædinque Itota nāmā wepæ inte mōnō ĩmonte ñā mēnongacā beyæ tōmengā ayongā tæiyæ waēmō ēwocamō bagamōimpa. Incæte adocanque Itota nānō nē ñā mēnongadingā ĩnongā inte, Itota wepæ wīī waēmō ĩ awædō, ante pīingā adinque Wængonguī ædō cæte apænte ante pānāmaī inguingāā. Ayæ Wængonguī Ōnōwoca nē waadete pōnō cædongā ĩñongante adocanque badete tocā adinque Wængonguī tōmengā ingante ædō cæte pānāmaī inguingāā. Edæ Mōitee wodi nānō wææ angainō ante Baa ānāni ĩnānite wædænque pāninque Wængonguī

īināni īinānite godōmenque nanguī pōni pancæcāimpa, ante pōnēmīniyaa.

³⁰ Wængonguī, “Botō tōmēmo nē pan-guīmo īmopa. Wīwa nāni cædinō beyæ eyepæ pōni godō pāmo wæcædānīmpa,” angacāimpa. Ayæ, “Botō nē Awēnē īnōmo inte botō quīnāni īinānite apænte ancæboīmpa,” angacāimpa. Mōnō īñōmō, Mānōmāinō ante nē apænte pancæ angaingā ingante æbānō ingāā, ante do ēñēmōmpa. ³¹ Edæ Wængonguī nē Quēwengā īnongā inte edæ ænguī badinque bæi ongonte pangā wæcæ wæ, ante mōnō nanguī guīñēñate wæcæīmpa.

³² Wēēnēñedē Wængonguī apænecā ēñēmīni inte mīnitō tæcæ ñāō baī entawēmīni ate wadāni pō pīinte guēadō guēa cæyōnāni mīnitō mīni caate wæquinque tæi ongōnīnque godōmenque cæmīnitapa. Mānōmāi mīni cædinō ante ñōwo pōnēedāni.

³³ Pancayedēña īñōmō nē pīinte cædāni tōmānāni ayōnāni mīnitō īmīnite badete todinque pānānitapa. Pancayedēña guīquēnē mīnitō tōniñadāni adobaī caate wæyōnānite mīnitō, Adocabomōni īmōnīpa, ante baī cædinque nē caate wædāni tōnō godongāmæ ongōmīnitapa. ³⁴ Wadāni īinānite tee mōnedāni adinque mīnitō tōmēnāni tee mōnete nāni wædō ante pōnēnīnque tōmēnāni tōnō godongāmæ wæmīnitapa. Ayæ, Mōnō māincoo oōnædē godōmenque waa pōni ongoncoo inte cōwē ongongæīmpa, ante ēñēmīni īñōmīnite wadāni inguīpoga mīnitō ēadincoo o ænāni adinque mīnitō wædāmāi inte watapæ tomīnitapa. ³⁵ Īinīnque, Mōnō wede pōnēnō beyænque eyepæ pōni ænguīmō īmōmpa, ante ēñēnīnque mānīnō mīni wede pōnēnō ante wido cædāmāi īedāni. ³⁶ Ayæ, Wængonguī nānō ānō ante ēñēnte cæmōni ate tōmengā, Pōnōmo æncæmīnīmpa, ante nānō angaincoo ante cōwē pōnongā æncæmōnīmpa, ante cædinque mīnitō wæntædāmāi inte ee cæquēnēmīni īmīnīpa. ³⁷ Edæ Wængonguī beyæ ante do yewæmongatīmpa.

“Wantæ wantæ ate nē Ponguingā mōnō ānongā īñōmō do poncæcāimpa. Edæ tōmengā nānō angaiōnæ īinque bay-
onte
tōmengā eyepæ pōni poncæcāimpa.

³⁸ Nē nō cæte quēwēnongā incæ tōmengā nānō wede pōnēnō beyænque quēwēncæcāimpa. Adocā wæætē guīñēnte wædinque wodii wīnongā adinque, botō tōmengā ingante adinque wīi to-baīmopa,” ante Wængonguī beyæ yewæmongatīmpa. ³⁹ Mōnō guīquēnē tōmēnāni nāni cæi baī cædāmāi īñōmō inte wīi guīñēnte wædōmō inte wodii wīnōnāmāi īmōmpa. Edæ wodii wīnōnte baī mōnō æmæwo ēwente baquēnēmō īmōmpa. Wæætē edæ tōmengā ængā beyænque mōnō quēwēngūinque tōmengā ingante wede pōnēmō īmōmpa.

11

Mōnō wede pōnēnō ante

¹ Wængonguī pōnō cæcā ate watapæ bacæīmpa, ante mōnō pōnēnō ante mōnō, Wængonguī ayæ cædāmāi ingā incæte cōwē cæquīngā ingampa, ante wede pōnēmōmpa. Awīnca adāmāi ēmōmō incæ mōnō mīmōno wede pōnēnīnque awīnca do ate ēmonte baī ēwocamō inte mōnō, Nāwangā bacæīmpa, ante do ēñēmō īmōmpa. ² Dodāni wede pōnēnāni īñōnānite Wængonguī, Mīni wede pōnēnō beyænque botō mīnitō īmīnite waa abopa, ante apænægacāīmpa.

³ Wængonguī inguīpo tōnō īīmōnæ tōmāo badoncæte ante cæyongā quīēmē impa ænte badonguingāā. Īñæmpa dæ angatīmpa. Īnīnque mōnō nē acoo dæ āñōnte mānīncoo ænāmāi inte tōmengā wæætē mā pōnēnīnque angā beyænque mōnō nē acoo do bagatīmpa. Mānōmāi ingatīmpa, ante wede pōnēnīnque mōnō Ao āmōmpa.

Dodāni nāni wede pōnengāinō

Abedo wodi

⁴ Abedo wodi īñōmō Wængonguī nānō angāinō ante wede pōnēnīnque, Wængonguī quī, ante nō cæte godōnīnque Cāinō wodi wæætē onōmonque nānō godōnō baī wīi godongacāīmpa. Tōmengā mānōmāi wede pōnēnte cæcā adinque Wængonguī, Abedo bitō nō cæte pōnōmi æmōpa, ante apænægacāīmpa. Īnīnque do wænte gogaingā īnongā incæte Abedo wodi, Botō wede pōnēnte cægāi baī adobaī wede

pönente cæedāni, ante ñōwo ganca ayæ apænete bai apænecampa.

Ēnoco wodi

⁵ Ēnoco wodi guiquēnē nē wede pönengä iñongante Wængonguī, Ēnoco ēñēmi. Bitō botō nē waa adōmi inte bitō wænguēnēmāmo ante wädāmaī inte pōe, āninqe inque iñongante ō ænte wo ææntodongä æigacäimpa. Æite gocä ate wadāni ancaa diqui diqui mīninqe Wængonguī nānō nē wo æntodongä ingante adāmaī ingadānimpa. Edæ tōmengä ingante Wængonguī ayæ ææntodōnāmaī iñongante wadāni, Ēnoco wede pönengä ingante Wængonguī waa acampa, ante do ēñēnōnānimpa. ⁶ Edæ Wængonguī weca poncæte ante cædinque waocä, Wængonguī nē Quēwengä ingampa, ante wede pönenguēnengä ingampa. Ayæ adobaī, Wængonguī ingante nē diqui diqui mīmō iñōmonte tōmengä, Pōe, āninqe pönō waa cæcampa, ante wede pönēninqe nē poncæ cæcä pongampa. Mänōmaīnō ante nē wede pönēnāninqe Wængonguī weca pönānipa. Mānīnō ante nē wede pönēnāmaī ingä guiquēnē tōmengä ingante Wængonguī ædō cæte waa aqingä. Edæ waa adāmaī ingampa.

Docä Nōwee wodi

⁷ Nōwee wodi Docä nāni ānongä guiquēnē, Æbānō baquī, ante adāmaī iñongante Wængonguī, Nōwee ēñēmi. Bitō adāmaī imāmo oo pongæimpa cæbii. Angä ēñente guīñente wædinque nē wede pönengä inte tōmengä nāni wencabo nāni guīte quēwenguīnque wipo ñænængade impo incæ ñænæ oncō bai badongä ate guīte quēwengadānimpa. Nē wede pönēnāninqe nāni nō entawēnō bai adobaī nō nānō entawenguīnque Nōwee wodi wede pönente cægacäimpa. Īninqe tōmengä adocanque wede pönēninqe mänōmaī cædingä iñongante wadāni guiquēnē nāni apænte wænguīnque Baa angadānimpa.

Abadäo wodi

⁸ Abadäo wodi guiquēnē tōmengä wede pönengä iñongante Wængonguī, Abadäo ēñēmi. Botō pönōmo bitō ænguīmæ ante botō odōmōmo goe. Angä ēñēninqe,

Æbæmē impa, ante adāmaī iñongä inte Abadäo wede pönēninqe ēñente cædinque do gogacäimpa. ⁹ Mänōmaī wede pönēninqe wadāni nēmæ gote wacä iñongä inte wantæ iñō quēwengä bai inte æmontaicōnē owogacäimpa. Ayæ Wængonguī nānō angaimæ nē ænguīna inōna inte tōmengä wengä Itæca wodi adobaī tōmengä wengä Aacobo wodi adobaī wantæ iñō quēwente bai æmontaicōnenque owote quēwengadäimpa. ¹⁰ Wængonguī doyedē pōni, Waodāni nāni öönädē quēwenguīñōmō ante botō iīmaī badoncæboimpa, ante nāmā nānō pönēnō bai tæi gōnonte mænongacäimpa. Abadäo iñōmō, Botō mānīi iñōmō owocæboimpa, ante nē wædongä inte wede pönēninqe piyænē cædinque æmontaicōnenque owote inguipoga quēwengacäimpa.

¹¹ Mönō imonte pönēninqe nē ædæmō aacä iñongä inte Wængonguī iñōmō tōmengä nānō ānīnō bai cōwē cæcæcäimpa, ante nē wede pönēnā iñōmō Tada wodi ingadäimpa. Mänōmaī beyæ tōmēnā owæntadä iñōnante Wængonguī pönō cæcä æninqe tōmēnā picængadedä inōnā inte tæi piñæninqe yædemädä bate wēñængä mangadäimpa. ¹² Abadäo wodi wede pönēninqe tæi piñænte tapæicä ate wēñængä ēñagacäimpa. Īninqe adocanque picængadecä inte nē wænte bai iñongä inte wede pönengä beyænque mönō tōmengä nānō pæimō yebæninqe nēmōncōo öönädē owocōo nanguī pōni i bai mönō iñōmō adobaī nanguī pōni imōmpa. Ēmōnaicōo gāwapæ yæwedeca öñoncoo nanguī pōni i bai mönō tōmengä pæimō imō adobaī nanguī pōni iñōmonte mönō, Mānimpomō imōmpa, ante ædō cæte anguīi.

¹³ Mānīnāni tōmānāni wede pönente quēwēnōnāni inte wængadānimpa. Wængonguī nānō, Pönō cæcæboimpa, angaincoo ayæ ænāmaī ināni inte tōmēnāni gobæ ongoncoo gomō ate bai, Cōwē æncæmōnimpa, ante wede pönente piyænē cæte quēwengadānimpa. Wadāni nēmæ wabæca quēwente bai quēwēninqe tōmēnāni, Wīi mōnitō omæ iñōnte mōnitō wamōni inte quēwēmōnipa, ante inguipoga owogadānimpa. ¹⁴ Mänōmaīnō

ante nē ānāni iñōmō, Tōmēmōni ōmæ
 ante diqui diqui mēmōni imōnipa,
 ante quēwēnānipa. ¹⁵ Dodāni iñōmō
 do nāni ēmō cæte pongaimæ ante
 pōnente wædāni inte bai tōmēnāni do
 adodō gocædōnānimpa. ¹⁶ Wæætē
 adodō māniōmæ nāni quēwengaimæ wii
 goinēninque tōmēnāni, Mōnō ōōnædē
 godōmenque waēmōmæ pōni gote quēwengaimōn
 ante goinente wægadānimpa. Ininque wadāni
 Wængonguī ingante, Bitō nē waēmōmæ
 goinente wædāni tōmēnāni Wængonguīmi
 imipa cæbii, ante ānāni incæ tōmengā
 wæætē, Iñæmpa nē wædōnāni tōmēnāni
 quēwenguīñōmō nāni wædō ante botō
 do eyepæ mænongaboimpa, āninque
 guīñēnāmaī inte nanguī tocampa.

Abadāo tōnō Itæca

¹⁷ Wængonguī, Abadāo æbānō botō
 imote ēñente cæquiringā, ante acæte ante
 angā ēñēninque Abadāo wodi nē wede
 pōnēnongā inte tōmengā wengā Itæca
 ingante, Wængonguī quī, ante godon-
 gacāimpa. Edæ Abadāo ingante doyedē
 apænedinque Wængonguī, Bitō pæināni
 nanguī ināni inte iimæ æncædānimpa, ante
 do angā ēñengacāimpa. Incæte Wængonguī
 mænōmainō angā ante nē ēñēningā
 incæ tōmengā wengā adocanque pōni
 inongā inte Abadāo, Wængonguī quingā
 ingampa, ante godoncæ cægacāimpa.
¹⁸ Adocā tōmengā wengā ingantedō
 ante Wængonguī doyedē Abadāo in-
 gante apænedinque, Bitō wengā Itæca
 pæinānique inānitedō ante botō, Abadāo
 pæināni inānipa, angacāimpa. ¹⁹ Incæte
 Itæca wodi adocanque pōni iñongante
 Abadāo wodi, Botō wengā do wængā
 incæte Wængonguī, Nāni ōmæmōe, angā
 ininque do nāni ōmæmōmaingampa, ante
 wede pōnēninque godoncæ cægacāimpa.
 Wængonguī guiquēnē, Ee ae, ante wææ
 angā beyænque tōmengā wengā ingante
 wænōnāmaī ingacāimpa. Ininque Itæca wodi
 do wæningā inte bai nāni ōmæmonte bai
 ayæ quēwengacāimpa.

Itæca, Aacobo, Ootee

²⁰ Itæca wodi adobai, Wængonguī æbānō
 cæquiringā, ante wede nānō pōnēnō

beyænque ēñēningā inte edæ picængadecā
 badinque Aacobo wodi tōnō Etawoo wodi
 inate apænedinque, Wængonguī minatō
 iminate iimāi pōnō waa cæcæcāimpa, ante
 waa apænegacāimpa.

²¹ Aacobo wodi iñōmō, Wængonguī
 æbānō cæquiringā, ante wede nānō pōnēnō
 beyænque do ēñēningā inte wæncæ cæte
 tōmēninque tōmengā nānōmoda Ootee wodi
 wēna inate, Minatō iminate Wængonguī
 pōnō waa cæcæcāimpa, ante waa
 apænegacāimpa. Ayæ ongontoca da cæte
 ongonte ædæ wææninque, Wængonguī
 bitō waēmō pōni inōmi inte cæquimidō
 anguēnē, ante watapæ apænegacāimpa.

²² Ootee wodi guiquēnē, Wantæ iñō
 wæncæboimpa, āninque, Mōnō idægocabo
 mōnō pæināni incæ Equitobæ wantæpiyæ
 quēwēnāni ate Wængonguī ænte māocā
 wadæ gocædānimpa, ante tōmengā nānō
 wede pōnēnō beyænque ēñēninque iimāi an-
 gacāimpa. Godinque botō bayetoca ingai ee
 ænte næænte godinque da wencæminimpa,
 angacāimpa.

Mōitee wodi

²³ Mōitee wodi mæmpoda guiquēnē
 wēñængā ēñacā ate, Wii ōnonganque
 ingampa. Waēmō wēñængā awædō, ante
 adinque iimāi cægadaiimpa. Māniñedē Eq-
 uitobæ awēnē odeye iñōmō, Onguīñængā
 ēñacā adinque do wænongæimpa, angā
 incæte tōmēna guīñēnāmaī inte tōmēna
 wede nāna pōnēnō beyænque wēñængā
 Mōitee ingante apāicā mengāa go ado-
 canque māmonque wē wodonte man-
 gadaiimpa.

²⁴ Mōitee wodi guiquēnē picængā bay-
 ongante wadāni, Awēnē Padaōnō wengā
 wææ Mōitee badā ingampa, ante Mōitee
 ingante waa ayōnāni tōmengā wæætē
 Wængonguī ingante nē wede pōnēnongā
 inte edæ Baa angacāimpa. ²⁵ Wæætē edæ,
 Botō caate wæquinque botō Wængonguī
 quīnāni tōnō godongāmæ cæcæboimpa,
 ante cædinque Mōitee wodi, Equitoidi nāni
 wiwa cæte tōinō adinque botō wantæ
 iñō incæ wii toinente awædō, ante wido
 cægacāimpa. ²⁶ Wængonguī iincayæ ate
 eyepæ pōni pōnongā æncæboimpa, ante
 wede pōnēninque tōmengā māniñō ante

mimōno gomō ate bai pōnengacāimpa. Ayæ Equitobæ quēwēnāni wæmoncoo pōni nāni māincoo ante adinque, Ōnoncooque ēwenguincooque i awædō, ante Mōitee edæ Baa angacāimpa. Wæætē edæ piinte badete todāni wæcā incæte tōmengā, Codito beyænque impa, ante pōnēninque godōmenque waa pōni togacāimpa.

²⁷ Tōmengā iñōmō, Awēnē odeye Padaōnō ænguī badinque piingā wæcæ wæ, ante guiñente wædāmaī inte wæætē wede pōnēninque Equitobæ emō cæte gogacāimpa. Ayæ Wængonguī nē Quēwengā mōnō awinca adāmaī inongā ingante Mōitee wodi iñōmō nē awinca gomō acā bai emongā inte wæntæye badāmaī inte godōmenque cægacāimpa. ²⁸ Ayæ, Bamoncadē ēñadāni inānite nē ēwēnongā incæ godō wænoncæcāimpa, ante Wængonguī angā ēñēninque Mōitee wodi wæætē, Nē ēwēnongā nānō wodo pænta goquī ingæimpa, ante wede pōnēninque cægacāimpa. Tōmengā wadāni idægoidi tōnō Patowa ææmæ mōnō cæmæ bai mā cængacāimpa. Ayæ, Nē ēwēnongā incæ mōnō idægocabo bamoncadē ēñadāni inānite wænōnāmaī incæcāimpa, ante wææ cæcæte ante cædinque Mōitee nē wede pōnēnongā inte wadāni tōnō godongāmæ odemompaa wepæ ōni paagacāimpa.

²⁹ Idægoidi guiquēnē wede pōnēninque gāwapæ Opatawæmæ nāni amæ goyæ go næ gongæmæ ate tæcæguedemæ pōni tao gogadānimpa. Equitoidi guiquēnē, Taadō bapa, mōnō taocæimpa, ante cæyōnānite æpæmpo becadote wængadānimpa.

Adacaba wodi

³⁰ Idægoidi nāni wede pōnēnō beyænque Eedicoo nāni quēwēñōmō yabæque nāni wææ cægainca incæ nāwæ cabænte wæængatimpa. Edæ idægoidi ōnompō æmæmpoque go mēōnaa mānimpoñæ iñonte yabæque godongāmæ cægonte godāni ate cabænte wæængatimpa.

³¹ Onquiyængā Adacaba iñōmō māincoo beyæ ante nē towente nē quēwengā inongā incæte tōmengā wede nānō pōnēnō beyænque iīmaī cæte mīingā quēwengacāimpa. Idægoda mēnaa, Eedicoo iñōmō æbānō quēwēnāni, ante acæte

ante awēmō pō guūda adinque Adacaba wodi, Ee pōeda, angā beyænque idægoidi wæætē ēñēnāmaī ināni inānite wænōninque tōmengā ingante ata cæpodāni quēwengacāimpa.

Wadāni nāni wede pōnengainō

³² Quinante godōmenque ante apænequūmoo. Iīnāni nē wede pōnēnāni nāni cægainō ante botō æiquedō apænequūmoo. Guedeōnō wodi tōnō Badaco wodi ingadāimpa. Ayæ wææ Tantōō wodi tōnō Yepetee wodi ingadāimpa. Ayæ wææ Awēnē Dabii wodi tōnō Tāmoedo wodi ingadāimpa. Mānināni tōnō Wængonguī beyæ nē apænegaināni wodi tōmānāni wede nāni pōnēnō beyænque iīmaī cædinque nanguī cægadānimpa.

³³ Nē wede pōnēnāni iñōmō tæi emonte badinque wabæca awēnē odeyeidi nempo quēwēnāni inānite bæ tadinque wido cægadānimpa. Pancadāniya wede pōnēninque wadāni beyæ wææ āninque nō cægadānimpa. Wacā, Cæcæboimpa, āninque do cæquēnengā incæ wīi cæcā ininque nē pōnēnāni pancadāniya, Bitō ānō cæcæbiimpa, ānāni ēñēninque do cægacāimpa. Pancadāniya nāni wede pōnēnō beyænque mēñeidi incæ eadāmaī ināni bagadānimpa. ³⁴ Gongā nanguī wo bæco adinque pancadāniya wede nāni pōnēnō beyænque mōnæ emongatimpa. Wadāni yaēmenca tamencacæ cædāni wædinque nē pōnēnāni pancadāniya aamō cædinque mīināni quēwengadānimpa. Aquīi pōni inināni inte nē wede pōnēnāni pancadāniya tæi piñænte bagadānimpa. Wabæca tontadoidi wænoncæ pōnāni adinque nē pōnēnāni pancadāniya wæætē tæi piñæninque wido cædāni gogadānimpa. ³⁵ Tōmēnāni guīdēnāni nāñe wænāni ate onquiyænāni wede nāni pōnēnō beyænque do wænīnāni quēwēnāni ate ængadānimpa.

Nāni caate wægainō

Ayæ adobai nē pōnēnāni inānite wīwa cædāni caate wæyōnānite wacā, Ata cæpobo goquīmi, angā incæte nē caate wædōnāni pancadāniya wæætē, Ee abi caate wæwēmoe, ānānitapa. Tōmēnāni, Botō iīncayæ ate ñāni ōmæmōninque caate

botö wædö beyænque godömenque waa quëwencæboimpa, ante wææ äninque Ao änamaï ingadänimpa. ³⁶ Tömënäni nani wede pönönö beyæ pancadäniya inänite wadäni badete togadänimpa. Wadäni inänite wæætë tæi tæi pangadänimpa. Wadäni inänite wæætë yaëmengö ñä cæyæninque tee mönedäni wægadänimpa. ³⁷ Pancadäniya inänite dicaca tacadäni wægadänimpa. Pancadäniya inänite ta wiyænäni wægadänimpa. Pancadäniya inänite yaëmenca yedäni wægadänimpa. Pancadäniya obega æmontai tönö caboda æmontai badöninque mäninque wëñate mongæninque ömæpodäni inte wæyönänite wadäni togænte päninque wiwa cægadänimpa. ³⁸ Tömënäni në wede pönënäni inte waa pönäni inäni iñönänite inguipogaque quëwënäni wæætë wii tömënäni bai inäni inte wënæ wënæ cægadänimpa. Në pönënäni iñömö pancadäniya, Æyömömë gote quëwenguimoo, ante pönente wædinque wodii winonte önömæca wayömö godinque änanquidi wayömö godinque oncontatodë guidinque pancadäniya wë womöñönäni pancadäniya onguipodë ææ wote wë womongadänimpa.

³⁹ İninque Wængongui tömënäni inänite, Wede mini pönönö adinque botö waa tobopa, ante apænegacäimpa. Incæte tömengä nänö, Pönö waa cæcæboimpa, angainö ante tömënäni mäniñedë ayæ ænämäi ingadänimpa. ⁴⁰ Edæ tömënäni adodänique wii æncædänimpa, angacäimpa. Wæætë Codito godömenque pönongä æninque mönö watapæ quëwëñömönte tömënäni mönö tönö godongämæ æninque ædæmö picænäni bai bacædänimpa, ante Wængongui mönö imonte waa cædinque tömënäni beyæ adobai waa cægacäimpa.

12

Itota ingante mönö cöwë adinque quëwengäimpa, ante

¹ İninque boguimä baco owo bai mäninäni iñömö, Wængongui cöwë pönö cæcæcäimpa, ante në wede pönengainäni iñömö adobai baco ongönäni. Edæ, Mönitö wede pönente möni cægai bai munitö

adobai wede pönëninque iimaï cæedäni, ante a ongonte bai apænedänipa cæmöö. Tömënäni quingæ pogodo gocæte ante cædäni teëmencoo gä äadäni bai cædinque mönö adobai oda caate mönö wædoncoo ante ñimpo cæcæimpa. Wënæ wënæ mönö cægaincoo ante, Ancaa cæte awædö, äninque mönö wido cæcæimpa. Ayæ taadö ante Itota nänö odömongainonque ante mönö edæ wæntædämaï inte tæi piñæninque pogodo gocæimpa. ² Mönö wede pönente æite godö taadö ante tömengä iñömö në täno beyænte gogaingä ingampa. Tömengä adocä incæ mönö wede pönönö ante, Cöwë mänömaï bacæimpa, ante ædæmö badongaingä ingampa. Tömengä iñömö wadäni tömengä ingante awæ timpodäni wæyongante badete todäni adinque tömengä, Mänömaï cædäni botö caate wædö beyænque botö iincayæ ate watapæ tocæboimpa, ante në ëñëningä inte piyænë cædinque caate wædinque wængacäimpa. Tömengä ñöwo iñömö ñäni ömæmonte æite godinque Awënë Wængongui nänö contaimpaa tömëmængä inö tæ contate Awënë bate ongöñongä mönö adocä Itota ingante æmö ate bai pönëninque edæ tömengä miñæ tee empote pogodo gocæimpa.

³ Tömengä iñömö në wiwa cædäni nangui piinte cædäni wæcä incæte piyænë cægacäimpa. İninque munitö iñömö, Wæntædämaï inte mimmö nangæ batawënämaï ingæimpa, ante cædinque, Tömengä æbänö cægacäi, ante pönëedäni.

⁴ Ñöwo ganca munitö wënæ wënæ mini cæinente wædö ante wido cæcæte ante munitö wængui beyæ wepæ dicæ gowete cæminiyaa. ⁵ Ayæ Wængongui mönö wampo pönencæmöimpa, ante mönö imonte, Botö wëmini godömenque cæcæminimpa, ante æbänö pönö angacäi, ante munitö dicæ pönëminiyaa. İimaï angacäimpa, ante yewæmongatimpa.

“Botö wëmi ëñëmi. Mönö Awënë bitö imite, Eñente cæcæbiimpa, ante pangä wædinque,

bitö wæætë badete todämaï incæbiimpa.

Bitö imite, Eñenguënë quëwëe, angä ëñente wædinque wæwënämaï incæbiimpa.

6 Ìñæmpa tōmengä nänö nē waadete pōnēnānique ìnānite pāninqe mōnō Awēnē ìñōmō, Èñencæminimpa, ante cæcampa.

Botō wēmīni, ante nänö nē ængainānique ìnānite tōmengä pangampa.”

7 Ante yewæmongatimpa cæminii. Mīnitō caate wæmīni ìmīnitawo. Ìñæmpa wēñænāni ìnānite wæmpoidi dicæ pānāmaï inguināniyaa. Mæmpo Wængonguï ìñōmō adobaï, Botō wēmīni ìmīnipa, ante edonque acæimpa, ante nanguï āninqe pangä caate wæmīnipa. Ìninqe tōmengä pangä wædinque mīnitō wæætē, Mōnō ēñente quēwenguinque ante Mæmpo Wængonguï pangampa, ante piyænē cæte ee amīni pancæcäimpa. 8 Tōmengä wēñæmō ìñōmonte tōmengä tōmāmō ìmonte edæ nanguï pante angampa. Incæte mīnitō pancamīniya ìmīnite tōmengä pante änāmaï ingantawo. Ìninqe mīnitō, Wīi Wængonguï wēmōni ìmōnipa. Wacä wēmōni ìmōnipa, ante wæquēnēmīni ìmīnipa.

9 Mōnō mæmpoidi waodānique ìnōnāni ìnte nanguï āninqe pānāni adinque mōnō, Mæmpocä ìnongä ìnte tōmengä nänö cæquēnēnonque cædinque mōnō ìmonte waa cæte pangantapa, ante tōmēnāni ìnānite waa atamompa. Mōnō Mæmpo Wængonguï adobaï mōnō ìmonte nanguï āninqe pangä adinque mōnō quēwenguinque mōnō tōmengä ingante godōmenque Ao ante ēñente cæcæimpa. 10 Mōnō mæmpoidi guiquēnē, Æbänō pōnō waa cæquimoo, ante pōnente ate mōnō ìmonte edæ, Èñencæminimpa, ante wantæ ìñō nanguï änāni ēñente cætamompa. Wængonguï ìñōmō edæ, Tæiyæ waēmō botō ewocabo baï mīnitō adobaï tæiyæ waēmō ewocadinque watapæ quēwencæminimpa, ante cædinque mōnō waa quēwenguinque ante pōnō pangampa. 11 Æcāmenque mōnō ìmonte nanguï āninqe pāna incæ tōmengä pangä ate mōnō caate wædinque dicæ quingæ watapæ tomongaa. Ìñæmpa, Caate awædō, ante cōwē ämompā. Wæætē ìincayæ ate edæ doyedē nāni pānō beyænque mōnō nē ēñente badōmo ate mōnō nō cæmō badinque gänē pōnente entawēmompā.

Mōnō wæquinque Wængonguï apænecä ēñēnāmaï ìmompā

12 Ìninqe mīnitō guepænte wædīmīni ìnte edæ tæi pīñæninque wæntædāmaï ìnte nanguï cæedāni. Önoncapo nanguï guecapote wædīmīni ìnte edæ guecapodāmaï ìnte ængæ gantite pogodo gote baï nanguï cæedāni. 13 Mōnō cægonguinō, ante mīnitō taadō ante enga womīni mæmō ba ate nē podä cædināni incæ podä cædāmaï ìnte tōmēnāni nāni waa baquinque mäninōnō tōinō gote waa cægoncædānimpā, ante godō waadete cæedāni.

14 Mōnō godongāmæ piyænē cæte quēwengæimpa, ante mīnitō nanguï tæi pīñæninque waodāni tōmānāni ìnānite gänē pōnente cæedāni. Ayæ, Æcänō tæiyæ waēmō ewocadāmaï ingää tōmengä ìñōmō mōnō Awēnē ingante cōwē adāmaï incæcäimpa, ante pōnente wædinque mīnitō, Mōnō tōmāmō Wængonguï ayongä tæiyæ waēmō ewocate quēwengæimpa, ante nanguï cæedāni. 15 Wængonguï pōnō waadete nänö cædō ante mōnō tōmāmō ænte entawengæimpa, ante cædinque mīnitō cōwä adinque, Adocanque incæ ömætawengä ìnāmaï incæcäimpa, ante wææ cæedāni. Adocanque wæwente nänö quēwēnō beyæ pīinte bate tedecä ēñēninque mīnitō, Wadāni nāni wentamō mongænguinque adobaï pīinte badāmaï incædānimpā, ante wææ cædinque nē pīingä ingante godō wææ ædāni. 16 Ayæ mīni cabo incæ, Nänōgængä ìnāmaï ìñongante adocanque incæ godō mōnāmaï incæcäimpa, ante cōwä adinque wææ cæedāni.

Etawoo wodi ìñōmō tōmengä bamoncadengä ìnongä ìnte nänö nanguï ænguēnencoo ante pīinte baï cædinque cænguinque æncæte ante tōmancoo godonte beyæ adopoque ænte cængacäimpa. Mīnitō guiquēnē, Inguipogaque ante ænte to wædō, ante Etawoo wodi nänö pōnēwente cægainō baï adocanque incæ cædāmaï incæcäimpa, ante edæ wææ cæedāni. 17 Bamoncadengä ìnte nänö ænguēnencoo ante do pīinte baï godōningä ìnte Etawoo wodi ìincayæ ate, Pōnōmi æmoe, äñongante mæmpocä wæætē Baa angacäimpa, ante do ēñēmīnipā. Edæ Ca ca wædinque tōmengä,

Æbänö cæte ænguimoo, ante ancaa angä incæte mæmpocä do Baa äningä inte ñowo wæætë wadö ante ædö cæte anguingä.

18 Onquiyabo Wængonguï nänö gonga tänongä bæcobo ñænoque dodäni ponte godongämæ ongonte cægönäni bai minitö wii onquiyabo ñænoque pöminipa. Tömënäni wëmö mä mämönte bai iñömö wini cai pæmämö iñömö nani ponte wægaiñömö bai minitö wii pöminipa. 19 Todompeta nani ancadeca nanguï we öömämö dodäni nani eñente wægaimämö bai minitö wii adopämo eñëminipa. Wængonguï wææ ante nänö tedepämo tömënäni nani eñente wægaimämö bai minitö wii adopämo eñëminipa. Mänimämö eñente guiñente wædinque tömënäni, Idæwaa ämipa. Ædö cæte godömenque eñenguimönii, ante wægadänimpa. 20 Edæ “Cæningä incæ onquiyaboga ponte cægongä adinque minitö tæi tacamini wæncæcäimpa,” ante wææ añongante tömënäni ancai guiñente wædinque, Wængonguï nänö wææ angainö ante minitö ædö cæte ædæmö eñente cæquimönii, ante wægadänimpa. 21 Onquiyaboga nani ate guiñëmämö adinque Möitee wodi incæ, “Ancai guiñente botö do do wäate bai wæbopa,” angacäimpa.

22 Minitö guiquënë Tiñoquidi nani änonquidi do ponte bai ewocaminipa. Edæ Wængonguï nê Quëwengä öönädë Eedotadë bai nänö waëmö pöni owoyömö minitö mäniñömö do ponte bai ewocaminipa. Wængonguï anquedoidi æpodö müido ganca inönäni inte nanguï pöni inäni godongämæ pö bee tente tömënäni nani watapæ ongöñömö minitö mäniñömö do ponte bai ewocaminipa. 23 Mönö Codito ingante godongämæ mönö pönencabo iñömö bamoncadënäni nê ænguimö bayömönte mönö emöwo ante öönädë yewæmointaa do yewæmönte ongompa. Ìninqe minitö adocabomini badinque Wængonguï weca mönö wacabo tömämö imönte nê apænte anguingä weca do pömini iminipa. Nê nö cæte quëwengainäni wænte goyönänite Wængonguï ìninqe badongä ate do ædæmö picænäni bai badänipa. Tömënäni önöwoca

weca minitö do ponte bai ewocaminipa. 24 Wængonguï, Botö pönö cæbo ate minitö Ao ämini ìninqe mönö godongämæ waa cæte quëwengæimpa, ante nänö angainö ante Itota, Ìninqe bacæimpa, ante ædæmö badongacäimpa. Minitö iñömö nê badongaingä weca do pömini iminipa. Abedo wodi wepæ onguipoiya gowecä adinque Wængonguï wæætë nê wænöningä ingante, Botö weca ongönämaï gobäwe, angacäimpa. Itota wepæ wii Abedo wodi wepæ bai imæ adinque Wængonguï wæætë, Itota wepæ petæ petæ gowedimæ beyænque botö weca pödäni, ante cægacäimpa. Mänimæ Itota wepæ nänö petæ petæ gowegaiñömö minitö do ponte bai ewocaminipa.

25 Mänömaï waëmö pöni iñömö do pömini inte minitö nê apænecä ingante Baa änämaï iedäni. Onquiyabo godongämæ ongönäni guiquënë inguipoga wææ angaingä ingante Baa äninäni iñönänite tömengä ata cæpodämaï inte pangacäimpa cæminii. Öönädë ongonte nê wææ angaingä ingante eñënämaï inte dadi emænte wadæ gomö bai mönö godömenque pante wæquënemö iñömönte tömengä cöwë ata cæpodämaï incæcäimpa.

26 Mäniñedë tömengä nänö tedepämo beyænque inguipo wancæ wancæ cægatimpa. Ñowo iñömö tömengä, “Botö ìncayæ ate inguipo adopoque pöni wancæ wancæ cædinque öönädë adobai wancæ wancæ edæ cæcæboimpa,” angacäimpa. 27 Tömengä, “Ìncayæ ate adopoque pöni cæcæboimpa,” angacäimpa, ante pönëninque mönö iïmaï ante eñengæimpa. Tömengä adopoque wancæ wancæ cæcä ate tömengä nänö badongaincoo oo pöni ongoncoo iñömö tömancoo adoyedë ewente bacæimpa. Quincodö oo ongönämaï tæi ongoncoo i mänincooque ayæ a ongongæimpa, 28 Ìninqe mönö Awënë Odeye nempo quëwëmö iñömö wancæ wancæ cædämaï inte tæi ongonguimö imompa, ante pönëninque mönö Wængonguï ingante waa ate pönente apænecæimpa. Mänömaï cædinque Wængonguï ñäö bai nänö tæi emömämö ate guiñente wædinque tömengä beyæ cæcæimpa. 29 Edæ mönö Wængonguï iñömö edæ gonga wo bæcoqui bai ingänö

anguenē, ante āmo ēñēmaimīnīpa.

13

Īmaī cæmō adinque Wængonguī waa tocæcāimpa, ante

¹ Mīnitō īñōmō, Mōnō caipæ īmōmpa, ante mīni waadete pōnēnō baī cædinque cōwē godongāmæ waadete pōnente cædāni.

² Tōmānāni inānite edæ, Pōedāni, ante waadete cædāni. Mānōmaī cædinque pancadāniya, Botō weca ædānidō ēñacæ pōnānī, ante ēñēnāmaī ināni incæte do waa cædāni ate edæ, Æ, Wængonguī nānō da pōnōnāni anquedoidi incæ botō weca pōnānitapa, ante tæcæ abopa, ante todānīpa.

³ Tee mōnete ongōnāni tōnō botō godongāmæ tee mōnete wæcōmo baī īmōpa, ante pōnēnīnque mīnitō tōmēnāni inānite ante cōwē pōnēedāni. Pancadāniya inānite wadāni wīwa godō cædāni ate caate wæwēñōnāni mīnitō adobaī pōnēnīnque, Mōnō baō adobaī ēñamō inte tōmēnāni tōnō godongāmæ caate wæmō baī īmōmpa, ante tōmēnāni inānite cōwē pōnēedāni.

⁴ Nānōogængā ināmaī īñongante waocā nē godō guēa mongā tōnō nē godō wīwa towēnāni īñōnānite Wængonguī mānīnāni tōmānāni inānite do apænte ante pancæcāimpa cæmīnī. Mīna gæncaya adomīnaque guēa moncæmīnīmpa. Ayæ ñānōnāni mōnīnque nāna gæncaya quēwēna ate, Waa īmpa, ante mōnō waa acæīmpa.

⁵ Wængonguī incæ, “Mīnitō īmīnīte cōwē emō cæte godāmaī inte botō cōwē aacæboīmpa,” angacāimpa. Mānōmaī beyæ mīnitō godonte æīnta ante æīnente wædāmaī inte mīni ēadincooque ēadinque piyænē cæte quēwēedāni.

⁶ Īnīnque Wængonguī beyæ īmaī ante nāni yewæmongāinō baī ante mōnō wede pōnente apænemōmpa.

“Mōnō Awēnē botō tōnō godongāmæ cæcā adīnque botō,

Waocā ædō cæte botō īmote wēnæ wēnæ cæquīngāā, ante ēñēmo inte guīñēnāmaī incæboīmpa.”

⁷ Nē aadāni īñōmō mīnitō īmīnīte Wængonguī nānō ānō ante nē apænedāni inānite ante pōnēnīnque mīnitō, Tōmēnāni īñōmō waa cædinque edæ watapæ

quēwēnānīpa, ante pōnēedāni. Ayæ tōmēnāni nāni wede pōnēnō baī adobaī wede pōnēedāni.

⁸ Itota Codito īñōmō wēēnēñedē nānō ingā baī ingā ñōwoōnæ adobaī ingā inte tōmēngā adocā īncayæ ate cōwē adobaī incæcāimpa.

⁹ Wadāni, Wacā taadō odōmonte apænebo ēñēe, āñōnānite tōmēnāni mīñæ godāmaī īedāni. Īñæmpa tōmēnāni cængūnque ante, Æbānō waa pōnī cō cæquī, ante wææ ānāni incæte mānī cængūncoo beyæ tōmēnāni wī godōmenque watapæ quēwēnānīpa. Īnīnque mānīncoo cænte beyæ mōnō mīmō ædō cæte tæī piñænte entawenguī.

Wæætē edæ Wængonguī nānō waadete pōnō cædō beyænque mōnō tæī piñænte entawengæīmpa.

¹⁰ Æmontaicōnē cædinque, Wængonguī quī, ante nē godōnāni īñōmō tōmēnāni nāni iya tāīmpaa godōnīnque panca cænguī ænte nē cænguēnēnāni inōnāni incæte tōmēnāni mōnō Codito mōnō beyæ nāmā nānō wepæ godongāinō guīquēnē ædō cæte ænguīnānī.

¹¹ Cænīnāni inānite wænōnāni ate nē godongā ñænængā pōnī īnongā īñōmō wepænque ænīnque, Wēnæ wēnæ mōnī cædīnō ante Wængonguī pōnō ñā mēnongacæcāimpa, ante cædinque Tæiyæ Waēmō Pōnī Oncōnē wāānē guīdīnque godongāmpa. Godongā ate baonque, Wentamō mongænte awædō, ante ænīnque tōmēnāni nāni quēwēñōmō yabæque māo iya tan-gadānīmpa.

¹² Itota adobaī, Botō wepæ pōnō mēnongabo ate botō quīmīnī īñōmō tæiyæ waēmō ewocate quēwēncæmīnīmpa, ante cædinque wentamō mōnō entawēnō ænte teēmē mongænte godīnque tōmēnāni quēwēñōmō wææ cædīnemō tao godīnque yabæque pōnī guīñēñate wædīnque caate wængacāimpa cæmōō.

¹³ Tōmēngā yabæque pōnī guīñēñate wædīnque nānō tao gogā baī mōnō adoyōmō tōmēngā weca tao gote ado guīñēñate wæcæīmpa.

¹⁴ Īñæmpa īnguīpoga mōnō quēwēñōmō tæī ongōmpa diyæ wantæpiyæ quēwenguī. Wæætē oōnædē īncayæ ate edæ mōnō cōwē quēwenguīñōmō ante æīnente wædīnque

wänö cömompa.

¹⁵ Ìninqe, Wængonguï qui, ante cænguï godönäni bai cædinqe mönö ìñömö edæ, Itota emöwo beyænque quëwëmönipa, ante nê apænemö inte tömengä emöwo ante Wængonguï ingante apænedinqe, Bitö tæi emömi inte waa pönì cæbipa, ante watapæ apænecæimpa. ¹⁶ Ayæ ñimpo cædämaï inte mînitö wadäni ìnänite cöwë waa cæedäni. Ayæ wadäni ìnänite mîni mänincoo godö nênepomîni æncædänimpa. Mînitö mänömaï, Wængonguï qui, ante godonte bai cædinqe nênepomîni adinqe Wængonguï mîni godönö ante waa acampa. ¹⁷ Mînitö, Mönö imonte nê änäni ìnänite mönö Ao ante ëñengæimpa, ante pönëninque nê aadäni ìnänite cöwë ëñente cæedäni. Tömënäni, Æbänö cæboo, ante adinqe Wængonguï apænte ancæcäimpa, ante ëñëninque guïñente wædäni inte nö cædinqe aadänipa cæmîni. Tömënäni mänömaï aadinqe watapæ tote quëwencædänimpa, ante mînitö wæætë tömënäni nâni änönö ante ëñente cæedäni. Mînitö wæætë ëñënamäi imîni adinqe tömënäni wæætë edæ, Ædö cæte aaquimönii, ante wæwente badäni ìninqe mînitö adobai todämaï imäimînipa.

¹⁸ Mönitö beyæ ante Wængonguï ingante apæneedäni. Mönitö mîmö entawëmöni inte wentamö entawënämaï imönipa, ante nâmä apænte pönëmönipa. Edæ, Quiëmë cæmö incæ mönö cöwë nö cæte quëwengæimpa, ante cæmönipa. ¹⁹ Botö mînitö weca ocæ emænte pönëmopa. Ìninqe mînitö Wængonguï ingante apænedinqe, Wængonguï, bitö pönö cæbi ate Pabodo mönitö weca poncæcäimpa, ante apæneedäni, ante nanguï ämopa.

Mînitö imînite Wængonguï waa cæccæcäimpa, ante

²⁰ Wængonguï inguipoga nänö badönämaï ìñedë wëenëñedë pönì äninque edæ, Mönö godongämæ waa cæte quëwengæimpa, ante tömengä nänö angainö bai cöwë nê badongäingä inte ìmaï pönö cægacäimpa. Edæ mönö obegaidi bai ìñömönte Awënë Itota ìñömö mönö imonte nê Aacä ñænængä inongä inte tömengä wepæ gowegaimæ eyepæ pönì godongä ate Wængonguï tömengä ingante, Eyepæ i, äninque, Ñäni ömæmöe, angä ñäni

ömæmongacäimpa. Mänömaï gänë pönente nê cægaingä inte Wængonguï ìñömö, ²¹ waa pönì pönongä ænte eyepæ entawëninque mînitö ìñömö tömengä nänö änö bai cæcæmînimpa. Tömengä Itota Codito tönö godongämæ cædinqe pönö cæcä æninque mönö tömengä nänö waa adoncooque entawengæimpa, ämopa. Itota Codito ìñömö ñowopämo incæ ìncayæmämo incæ cöwë nê tæi emönongä inte ñäö emongä amönipa, ante mönö tömengä ingante cöwë watapæ apænecæimpa. Mänömaï ingæimpa, ante botö, Amëe, ämopa.

²² Ìñänäni ëñëedäni. Botö mäninö tömänö ante apænecæte ante wædænque pönì yewæmömopa. Ìninqe mäninö botö ædæmö apænedinö ante mînitö piyænë cædinqe ëñëedäni, ämopa. ²³ Mönö tönñacä Timoteo tee mönete wæyongante ñöwo ñimpo cædäni gocantapa, ante apænebo ëñëedäni. Tömengä botö weca quingæ pongä ìninqe botö tömengä tönö guëa mînitö weca ëñacæ pömaimönapa. ²⁴ Mönitö beyæ apænedinqe mînitö imînite nê aadäni ìnänite, Waa quëwencæmînimpa, ante apæneedäni. Ayæ adobai Wængonguï quïnäni tömänäni ìnänite, Waa quëwencæmînimpa, ante mönitö beyæ äedäni. Ayæ, Mînitö imînite ante apænedinqe Itadiabæ quëwënäni adobai, Mînitö waa quëwencæmînimpa, ante apænedänipa, ante ämo ëñëedäni. ²⁵ Mînitö tömäminî imînite Wængonguï pönö waadete cæccæcäimpa. Mäninque ante yewæmömopa.

Tantiago cadota ante nänö yewæmongainta

Tantiago iümaï yewæmongacäimpa

¹ Botö Tantiagobo iñömö Mæmpo Wængonguï tönö mönö Awënë Itota Codito inate nē cædömo ïmopa. Idægoidi mīni cabo tipæmpoga go mencabomīniya inte wabæca nāni quēwencabo wabæca nāni quēwencabo weca pangocæte godimīni iñöminite botö waa pönemo inte iï yewæmointaa yewæmömopa.

Wængonguï nänö eñëmämo ante mönö ængcäimpa, ante

² Botö tönīñamīni eñëedāni. Quiēmē beyæ wæwente bamīni incæ mīnitö æyedēmē mänömaï bamīni ïnīnque edæ māniñedē incæ cōwē, Mönö watapæ toquinque impa, ante pönëedāni. ³ Mīni wede pönënö æbänö i, ante edonque acæimpa, ante cædāni ate caate wæmīni incæte mīnitö, Mönö caate wædö beyænque mönö godömenque pædinque wæntæye ināmaï inte ee cæquimö ïmopa, ante do eñëminīpa. ⁴ ïnīnque, Mönö æmæwo pæcæimpa, ante cædinque mīnitö wæntæye ināmaï inte ee cæedāni. Mänömaï cæte pæmīni ïnīnque, Mīni cædimämo æbänö cæmīni imīnīi, ante adīnque edæ, Tömänö waëmö cæmīni imīnīpa, ante abaimpa.

⁵ Mīnitö weca æcänö nänö eñëmämo wīi eyepæ ina adīnque tōmengä, Pönömi eñëmoe, ante Wængonguï ingante apænequēnangamō. Apæneyongä Wængonguï wæætē pönö cæcä æncæcäimpa. Edæ Wængonguï iñömö nē, Pönömi æmoe, ante änongä ingante wæætē pūinte änāmaï inte godönongä ingampa. Ayæ tōmānāni inānite pönö cædinque tōmäā godönongä ingampa. ⁶ ïñæmpa nē angä iñömö wede pönenguēnengä inte wīi æmæ pönëninque apænecæcäimpa. Edæ nē æmæ pönengä iñömö gāwapæ æpæ woboyæ pæmæninque mæ conta mæ conta gopæ ocæmæ pö cæpæ nänö cægaimæ bai tōmengä adobaï gocä ingampa. ⁷ Māningä iñömö Wængonguï pönongä æncæboimpa,

ante ædö cæte iïmaï ante pönenguingä. Wængonguï edæ tōmengä ingante tōmäā godönāmaï incæcäimpa. ⁸ Tōmengä mēnongä pönente quēwengä ingampa. Æbänö cæcäā, ante eñënāmaï inongä inte ædö cæte waa cæquingä.

⁹ Adocanque mönö tönīñacä incæ ïmæca quēwēnāni nāni ëadincoo nē wīi eyepæ ëacä incæte tōmengä Wængonguï pönö cæcä beyænque, Æbänö ëaboo, ante pönëninque watapæ toquēnengä ingampa.

¹⁰ Wacä mönö tönīñacä guiquēnē ïmæca quēwēnāni nāni ëadincoo nē ëacä incæte tōmengä wæætē, Botö önömoque ïmopa, ante pönëninque watapæ toquēnengä ingampa. Edæ ongai önonque pododīnque guīñē wæmpa bai tōmengä adobaï wæncæcäimpa.

¹¹ Edæ nænque tamö tī nāwāñonte awæ guingo icate to amīnte æmæwo wæmpa. Ongai yædoï gueo odote wænīnque nänö waëmö ënodī wo ëwente bapa bai nē ëacä iñömö adobaï ingampa. Tōmengä godonte æ godonte æ tæcæ cædinque quingæ wænīnque edæ dæ anguingä.

Mönö caate wæpämö

¹² Wængonguï ingante nē waadedāni inānite tōmengä wæætē, Mīni cōwē quēwenguīta, ante poganta bai mīnitö imīnīte pönömo æncæmīnīmpa, ante angacäimpa. Mānīnta Wængonguï weca cōwē mönö quēwenguīnö impa. ïnīnque waocä caate wæcä incæte tōmengä wæntæye badāmaï ingä iñömö tōmengä nänö toquinque. Wæntæye ināmaï inte ee cæcä adīnque Wængonguï, Mīni cōwē quēwenguīta, ante tōmengä nänö angainö bai māningä ingante pönongä æncæcäimpa. ¹³ Waocä nänö cæinēwente wædö beyæ, Wænæ wænæ cæboe, ante cædinque tōmengä, Wængonguï botö imote, Wænæ wænæ cæcæbiimpa, ante ingampa, ante wīi anguēnengä ingampa. Edæ Wængonguï ingante, Wænæ wænæ cæcæbiimpa, ante waocä ædö cæte anguingä. Wængonguï wæætē wadāni inānite, Wænæ wænæ cæcæmīnīmpa, ante änāmaï inongä ingampa cæmīnīi. ¹⁴ Æcāmenque incæ, Wænæ wænæ botö cæinente wædö incæ ante waëmö impa, ante pönëninque tōmengä do wænæ wænæ mönö cæinente wædö beyænque wænæ wænæ cæinengä

ingampa. ¹⁵ Yædëmadä wëñængä pæcä adinque ëñaquingä bai mönō cæinëwente wæpāmo adobai entawente pætawëmō ïinque mönō do wënæ wënæ cæmompā. Ayæ wënæ wënæ mönō cæpāmo beyæ mönō æmæwo wænguinque impa.

¹⁶ Botō nē waadete tōniñamini ëñëedäni. Minitō nāmā incæ oda cædāmaï incæminimpa.

¹⁷ Önonque mönō ænō ante mönō waëmō ñāō ëmönoncoo tōmancoo incæ mönō Mæmpo Wængonguï öönædë owote nē pönönongä ingampa. Mæmpo Wængonguï öönædë owodique apäidäni inäni badongacäimpa. Adocä nænque wëmō cæbai wayömō wayömō go bai entawënämaingä ingampa. Tömengä wæætë adodongue ingaingä ingampa. ¹⁸ Botō cæinëmopa, ante nē angaingä inte Wængonguï, Näwangä botō angainō beyænque minitō botō wëñämïni bacæminimpa, ante wäänä mangä bai cædique mönō imonte pönō badongacäimpa. Tömengä nänō badongaincoo tōmancoo ïñonte mönō tänomō ïnömō imompā.

Wængonguï ingante mönō nō ëñente cædō

¹⁹ Botō nē waadete tōniñamini ëñëedäni. Wacä añongä minitō tōmämïni quingæ ëñenguënëmïni iminipa. Minitō wæætë quingæ apænedämaï inte adobai quingæ pïinte inämaï inguënëmïni iminipa. ²⁰ Wængonguï, Nō cæte quëwëedäni, ante waa nänō cæinëmāmo ante waocä nänō pïimāmo beyæ wïi edæ cæcampa. ²¹ Mänömaï beyæ minitō wentamō entawëninque mïni wïwa cædō tōmāā ñimpo cæedäni. Adobai quiëmë mïni wënæ wënæ cæpāmo tōmāmāmo ñimpo cæte iedäni. Ayæ Wængonguï nänō angainō ante minitō mïmönë nänō mingainō ante Ao ante gänë pönente æncæminimpa. Edæ ïi angainō beyænque minitō quëwencæminimpa.

²² Minitō, Nāmā incæ oda cædāmaï ingæimpa, ante cædique Wængonguï nänō angainō ante wïi önonque ëñëmïnique inte wæætë, Æbänō ante ï, ante ëñente cæedäni. ²³⁻²⁴ Waocä nāmā awinca awocawæntaa adinque nāmā ate ate wadæ godinque, Quinō bai intawo, ante nänō adinca do oda cæte wæcampa. Mänömaï oda cæte wæcä bai Wængonguï nänō angainō ante nē ëñenganque wïi ëñente cæcä

ïñömō tömengä adobai oda cæte wæcä ingampa. ²⁵ Wængonguï nöingä nänō wææ angainō ante nāni yewæmongainō ante nē ædæmō cōwë acä guiquënë tömengä ïñömō nänō ëñëninō ante wïi pönente badāmaï inte wæætë cōwë ëñente cæcä ïinque tömengä mänömaï cædique nänō toquinque cæcampa. Wængonguï nöingä nänō wææ angainō beyænque waocä ñimpo cæte quëwengä ingampa.

²⁶ Wængonguï ingante botō nē ëñente cæbo imopa, ante pönengä incæte tömengä önonguënëwa ñä cæguënëwate bai cædāmaï inte wæætë wïwa tedecä ïinque tömengä nāmā incæ oda cæte gobaingampa. Ayæ Wængonguï ingante botō ëñente cæbo imopa, ante tömengä nänō änō ante önonque angä imaingampa. ²⁷ Nöwadäni tönō owæmpoinäni nāni wæwëñedë mönō tömënäni tönō godongämæ cæcæimpa. Ayæ adobai imæcaque ante quëwënäni nāni wënæ wënæ cædimāmo bai mönō, Wentamō badāmaï ingæimpa, ante wææ cæcæimpa. Mänömaï cæmō ïinque mönō Mæmpo Wængonguï ayongante mönō wapiticæ cædāmaï inte wæætë nō ëñente cæmō imompā.

2

Wacä ingante wadō wadō ate pönente cædāmaï ingæimpa

¹ Botō tōniñamini ëñëedäni. Mönō Awënë Itota Codito ñāō ëmonte nē apäigaingä ingante nē pönëmïni inte waodäni inänite wadō wadō ate pönente cædāmaï iedäni.

² ïimaï nāni cæbai ante önöwënenque pönëedäni. Edæ onguïñængä nē ëacä ïñömō tömengä nänō önongompo timpoi oodo badöi wempocä ïinque waëmoncoo mongængä inte mïni a ongöñömō guï pongampa. Ayæ onguïñængä nē wïi eyepæ ëacä ïñömō pedæncōo mongængä inte mïni a ongöñömō adobai pongampa.

³ Adinque minitō waëmoncoo mongængä ingante, “Bitō ïñömō waa tæ containpaa tæ contæ,” ante apænëmïni iminitawo. Wæætë wïi eyepæ ëacä ingante, “Bitō mänïñömō adiyæ ongöe. Botō önöwa ïñömō tepataa tæ contæ,” ante apænëmïni iminitawo. ⁴ Mänömaï apænedinque minitō weca wïi godongämæ wadō wadō ate

pönente cæbaiminitawo. Ayæ wænæ wænæ pönëninque apænte ämini babaïminitawo.

⁵ Botö nê waadete tönïñamini ëñëedäni. Wængongui Awënë Odeye ingante nê waadedäni inänite tömengä, Botö pönö cæbo ate minitö botö nempo cöwë quëwencæminimpa, angacäimpa. Ìmæca quëwënäni weca mäincoo wii eyepæ ëadäni iñönänite tömengä, Mini wede pönënö nanguï ewocadinque minitö botö angainö bai botö nempo quëwencæminimpa, ante tömënäni inänite wii apænte ængantawo. ⁶ Minitö wæætë wii eyepæ ëacä ingante piinte tedomini ate tömengä guingo imonte badingä ingampa. Ìñæmpa nê ëadäni guiquënë minitö iminite nani wænæ wænæ cædinö beyænque wii wæminitawo. Ayæ adodäni minitö iminite apænte anguinäni weca godoncæte ante wii ænte godänitawo. ⁷ Ayæ minitö, Coditoidi imönipa, ante Codito waa pönï ëmowo ante ëmömïni iñöminite tömënäni adodäni incæ mäniwo ante babæ äninque nê wænæ wænæ änäni wii inänitawo.

⁸ Wængongui angä ëñëninque nani yewæmongainö ante adinque minitö waa pönï Awënë nänö wææ angainö ante nê ëñente cæmini ininque waa cæbaimini iminipa. Ìimai ante yewæmonte impa. “Bitö nämä ante pönente, Nämä waadebo imopa, ante nämä bitö waadete pönenganca wadäni inänite adoganca waadete pönëe.” ⁹ Mänömaï cædinque minitö mäincoo ëacä ingante waa cæmini incæte wii eyepæ ëacä ingante wadö wadö ate pönëmini inte wiwa ämini ininque wænæ wænæ cæmini imaiminipa. Ayæ Wængongui nänö wææ angainö önonque wido cæte bai cædimini inte minitö wentamö mongæmini imaiminipa. ¹⁰ Wængongui beyæ Möitee wodi nänö wææ yewæmongainö ante tömänö ante æcämenque nê ëñente cæcä incæte mäninö adodanque pönï incæ ëñënamäi cæcä inte tömengä mäninö tömänö ante önonque wido cæte bai cædingä inte wentamö mongængä ingampa. ¹¹ Edæ Wængongui, “Nänöogæ inämaï iñongante godö guëa mönämäi iedäni,” ante nê angaingä inte tömengä adocä godömenque iimai angacäimpa, “Wacä ingä wænönämäi iedäni.” Minitö wacä nänöogæ iñongante

godö guëa mönämäi imini incæte wacä ingante wænömïni ininque minitö Wængongui nänö wææ angainö önonque wido cæte bai cædimini inte wentamö mongæmini imaiminipa.

¹² Wængongui nänö apænte anguiönæ mönö imonte tömengä nänö wææ angainö bai cæcæcäimpa. Mäninö nänö wææ angainö beyænque waocä ñimpo cæte quëwengä ingampa. Ininque minitö tedomini incæ cæmini incæ, Cöwë mänömaï impa, ante pönëninque tedecæminimpa. Adobai ante cæcæminimpa. ¹³ Wadäni wæwënäni iñönänite æcämenque wii waadete godö waa cædingä ingää, ante Wængongui wæætë tömengä ingante godö waadete waa cædämaï inte apænte äninque pancæcäimpa. Wadäni wæwënäni inänite æcämenque guiquënë nê godö waadete waa cædingä iñongante Wængongui wæætë tömengä ingante nänö apænte anguiönæ godö waadete waa cæcæcäimpa.

Wængongui ingante pönëninque mönö cæquënë

¹⁴ Botö tönïñamini ëñëedäni. Waocä, Botö Wængongui ingante wede pönëmo imopa, angä incæte tömengä nänö waa cædinö wæætë dæ ä ininque tömengä mäninö, Wede pönëmopa, ante nänö änö beyænque ædö cæte wænämäi quëwengüingä. ¹⁵ Iimai nani cæbai ante önöwënenque pönëedäni. Wængongui ingante wede pönengä iñömö onguiñængä incæ onquiyængä incæ æcämenque incæ tömengä weocoo tönö cængui ömaacä ingampa, ¹⁶ adinque minitö weca adocanque tömengä ingante, “Waa goe, ämopa. Bitö, Yoguidämaï, ante weocoo wëñæ, cængui eyepæ æninque cæe,” ante angä incæte nê ömaacä nänö ænguënë ante edæ tömengä ingante godönämäi ininque tömengä waa cæcantawogaa. ¹⁷ Adobai iimai impa. Mönö waa cædinö dæ ä ininque Wængongui ingante mönö wede pönënö incæ önonque bapa.

¹⁸ Incæte wacä iimai anguingä. “Bitö Wængongui ingante tömëmi wede pönënö ëabi imipa. Botö guiquënë tömëmo waa cædinö ëabo imopa,” ante äñongä botö wæætë, Bitö nê cædämaï inömi inte

Wængonguī ingante bitō wede pōnēnō ante botō imote odōmōmi aboe, āmopa. Odōmōmi adinque botō guiquēnē botō cædinō ante odōmōmo adinque bitō wæætē botō wede pōnēnō edonque pōni abaīmipa. ¹⁹ Wængonguī nāwangā adocanque ingaingā ingampa. Bitō mǎnōmaīnō ante pōnēmi inte waa pōni pōnēmi imipa. Wēnæidi diyæ adodō ante pōnēnānīpa tōō. Incæte ancaī guīñente do do wāate wædānīpa. ²⁰ Bitō mǎnōmaīnō ante nē ōnonque tedebi imi ēñēe. Botō, Mōnō waa cædāmaī imō ininque Wængonguī ingante mōnō wede pōnēnō incæ ōnonque imaimpa, ante odōmōmo ate bitō edæ Ao ante ēñenguīmiyaa. ²¹ Edæ mōnō docā Abadāō wodi Wængonguī nānō āmaī cædinque tōmengā wengā onguīñengā Itæca ingante æninque iya tāimoga cōnōninque wænoncæ cæyongante Wængonguī adinque, Bitō nō cæte entawēmi āmopa, ante apænegacāimpa. Abadāō wodi nānō cædinō beyænque Wængonguī mǎnōmaī angacāimpa. ²² Bitō ēñēnāmaī imitawo. Abadāō wodi edæ Wængonguī ingante wede pōnēninque ēñente cægacāimpa. Wīi ēñente cægaingā inte baī tōmengā Wængonguī ingante nānō wede pōnengainō ōnonque pōnēmaingā incægacāimpa. Ayæ waa nānō cægainō beyæ Abadāō wodi nānō wede pōnengainō eyepæ pōni bagatimpa. ²³ Wængonguī angā ēñente nāni yewæmongainō baī iinque batimpa. Iīmaī ante impa. “Abadāō iñōmō Wængonguī, Botō iīmaī pōnō cæcæboimpa, ante nānō angainō ante pōnengacāimpa. Ininque Wængonguī, Mǎnōmaī pōnēmi beyæ bitō botō ayōmo nō cæte entawēmi imipa,” ante tōmengā ingante wæætē pōnō angacāimpa. Ayæ Abadāō, Wængonguī æmigo ingampa, ante angadānīpa.

²⁴ Bitō ēñēnāmaī imitawo. Waocā Wængonguī ingante wīi nānō wede pōnēnō beyænque wæætē, Tōmengā æbānō waa cæcāā, ante adinque Wængonguī tōmengā ingante, Bitō nō cæte entawēmi abopa, ante cæcā ingampa. ²⁵ Idægoidi, Ōmæ awēmō ate pōeda, ante mēnaa inate da godōnāni gote pōñōnate Adacaba wodi nē towente quēwengā incæ, Botō oncōnē

guīieda, ante tōmēna inate wē wodongacāimpa. Ayæ, Wadāni tōmēna inate bæi ongōnāmaī incædānīpa, ante, Wadō taadō goeda, ante da godongā gogadāimpa. Mǎnōmaī cæcā adinque Wængonguī, Bitō cædinō beyænque bitō botō ayōmo nō cæte entawēmi imipa, ante Adacaba ingante adobainō ante pōnō angacāimpa. ²⁶ Mōnō baō ōmæwocāā inte do wænte i baī Wængonguī ingante mōnō waa cædāmaī wede pōnēnō adobaī do wæningā baī inte edæ ōnonque impa.

3

Mōnō ōnonguēnēwa

¹ Botō tōniñamīni ēñēedāni. Mīnitō weca wīi tæiyænāni, Nē odōmonte apænemōni bacæmōnīpa, ante bāinente wæquēnēnāni incædānīpa. Edæ wadāni inānite pōnōmenque apænte āninque Wængonguī wæætē mōnō nē odōmonte apænemō iñōmonte, Æbānō odōmonte apænemīni, ante mōnō imonte godōmenque apænte āninque pancæcāimpa. Mīnitō do ēñēmīnīpa. ² Mōnō tōmāmō nanguī ægodawate tæi go wæninque baī oda cæmō imōmpa. Nē tedecā iñōmō tōmengā, Æbānō ante tedeboo, ante tōmengā ōnonguēnēwa cōwē wææ aadinque tōmengā wēnæ wēnæ ānāmaī ininque nōingā cæbaingā ingampa. Ayæ wēnæ wēnæ cædāmaī incæboimpa, ante nāmā baonga tōmāo wææ aate quēwēnongā ingampa.

³ Cabayo mōnō imonte ēñente cæcæcāimpa, ante tæinta badōinta ōnōne da wēnemō ate, Cabayo baō tōmāñō incæ iñāimæ iñāimæ gocæcāimpa, ante cæmō ininque cabayo do ēñente gocampa. ⁴ Iīmaīnō ante ñænængade wipo ante adobaī ante pōnēedāni. Ñænængade pōni wipo incæ woboyæ nanguī pæmænte gopa incæte wipo nē dadongā nānō cæinēnō baī, Ædōnō dadīimæ ædōnō dadīimæ wiyate goquīi, ante guiyā awæmpa inte wiyate cæcā gopa. ⁵ Ayæ adobaī mōnō baō tōmāo ēñayōmō mōnō ōnonguēnēwa guiyā enguēnēwamō imōmpa. Incæte mōnō ōnonguēnēwa inte tededinque, Mōnō nanguī cæmōmpa, ante tedewēmōmpa. Ñænængade pōni ōmædē incæ amīmō bayedē guiyā gonga

beyæ ömæde tömão gonga bæcodote bapa. ⁶ Ayæ mönō önunguënëwa adobai gonga bæcodote bai tedepa. Mönō baö tömão eñayömō mönō önunguënëwa tömão mönō wiwa tedewenguinque wënæ wënæ enguënëwamō imompa. Waomō incæ mäninguënëwa beyænque mönō baö tömão inte eñenämäi cæmompä. Ayæ gonga wacæ tæñömönte bæcododäni bai ado önunguënëwa beyæ mönō quëwenganca tömanganca wo ewente imompa. Edæ ii gonga tadömengadænguipodë öñonte ö ænte wacæ tæñömönte bæcodote bai cædinque wënæ incæ mönō imonte cæcä beyænque mönō wiwa tedewëmō imompa.

⁷ Babæidi incæ öömä eadäni incæ tæntæidi incæ æpænë quëwënäni incæ quingänöidi incæ tömänäni inänite waocä, Botö pæpogate cæninäni bacæminimpa, ante cæcä ingampa. Waocä doyedë nänö cægai beyænque cæninäni bate quëwengadänimpa. ⁸ Iñæmpa æcänö, Mönō önunguënëwa pæpogate bai bacæimpa, ante cædaa edæ dæ angampa. Edæ, Babæidi cöwë incæmönimpa, ante cæninäni badämaï inäni bai mönō önunguënëwa adobai wënæ wënæ i ininque ædö cæte waa tedemöö. Wæætë mönō önunguënëwa nanguï wænguimæ enguënëwamō bai imompa.

⁹ Mäninguënëwa inte mönō Mæmpo Wængonguï ingante, Bitö tæiyæ waëmō imidö anguënë, ante waa apænemompa. Wæætë waodäni Wængonguï tömengä nänö ingai bai nänö në badongainäni iñönänite tömënäni inänite ante mönō adoguënëwa inte wënæ wënæ apænemompa. ¹⁰ Ado önöne incæ wade wade ante mënea ante apænemompa. Adodeque ante waa impa. Adodeque ante wënæ wënæ impa. Botö töninämini eñeedäni. Mäninö bai mönō edæ wii cæquënëmō ingæimpa. ¹¹ Æpæ tayömō ado tayömō ædö cæte waëmömæ wentamömæ äänömonque ta goquimææ. ¹² Botö töninämini eñeedäni. Igowæ nani äwæ incayö odibomö nani änömö ædö cæte incaquii. Yowewæ incayö iigo mæñeca ædö cæte incaquii. Adobai ado tayömō ædö cæte waëmömæ wentamömæ äänömonque ta goquimææ.

Mönö nö eñëmämö

¹³ Minitö weca æcänö nö eñengä ingantawo. Tömengä iñömö, Nö eñëmö imopa, ante wadäni eñencädänimpa, ante cædinque tömengä nänö waa quëwënö inte odömoncæcäimpa. Ayæ tömengä nö eñengä incæ, Botö önömoque imopa, ante pönëninque tömengä nänö cædinö beyæ odömongä acädänimpa. ¹⁴ Minitö guiquënë wacä quincöo adinque pïinte entawëmini ayæ nämanque ante, Mönō ñænæmö badinque waa quëwengæimpa, ante pönente entawëmini ininque minitö nö eñëmöni incæ, Mönō waa cæmompä, ante ædö cæte anguimäni. Ayæ mänömaï bai godömenque entawëmini ininque näwangä mini anguënënö ante edæ Baa änämäi iedäni. ¹⁵ Mäninö eñëmämö wii Wængonguï nänö nö eñëmämö i. Wæætë ii inguipogaque ante quëwengä inte waocä mä pönëninque wënæ nänö eñëmämö ante entawengä ingampa. ¹⁶ Edæ waocä æyedëmë wacä quincöo adinque pïinte entawengä ayæ nämanque ante, Botö ñænæmö badinque waa quëwencæboimpa, ante pönente entawengä iñömö tömengä ædö cæte töingä pönente cæcää. Iñæmpa quiemë nani wënæ wënæ cæpämö ante cæcampa.

¹⁷ Waocä Wængonguï nänö nö eñëmämö ante në entawengä guiquënë waëmö entawengä ingampa. Ayæ wacä ingante cöwë piyænë cæte quëwëngä ingampa. Tömengä në waadete pönengä inte wacä ingante waa eñëngä ingampa. Wacä ingante eñente cædongä ingampa. Tömengä, Wæwënämäi incæbiimpa, ante wacä ingante godö waadete waa cædongä ingampa. Ayæ, Quinö waa inguüi, ante mäninö ante cædongä ingampa. Në waodäni inänite wadö wadö ate pönente cædämaï inte tömengä nö pönente quëwëngä ingampa. ¹⁸ Wadäni inänite, Botö piyænë cæcæboimpa, ante në cæcä iñömö tömengä nänö piyænë cædinö beyæ tömëmö në minongä bai ingampa. Tömengä nänö piyænë cædinö beyæ waodäni wæætë, Quinö nö cæte impa, ante cædäni ininque tömengä edæ amiñayedë tömëmö tä pete ængä bai incæcäimpa.

4

Inguipoga nāni quincoo ante pōnēnāmaī incæmōimpa

¹ Mīni cabo quīnō beyæ ante guēa wæætedō wæætē pīnīnque wæætē godō wæætē godō ānewēmīnitawo. Mīnitō nāmā wadō wadō mīni cæinēnō ante entawente guēa cæte quēwēmīni beyænque cōwē godongāmæ mīni pīinte quēwengūnque īmīnīpa tōō. ² Mīnitō æīnente wæmīni incæte ænāmaī īmīnīpa. Īnīnque nē ēacā ingante wænōmīni incæ tōmengā nānō quincoo ante æīnēmīni incæte mīni æīnēnō, ante ænāmaī īmīnīpa. Mānōmaī beyæ mīnitō wæætē godō wæætē godō ānewēnīnque guēa wæætedō wæætē pīnīnque guēadō guēa cæte quēwēmīni īmīnīpa. Mīni ānō ante mīnitō, Pōnōmī æmōnie, ante mīnitō Wængonguī ingante apænedāmaī īmīni inte mīni ænāmaī quēwengūnque impa. ³ Mīnitō Wængonguī ingante mīni ānō ante apænēmīni incæte wænæ wænæ ante pōnēnīnque apænēmīni beyæ ænāmaī īmīnīpa. Edæ Wængonguī nānō pōnōnī ænīnque mōnō edæ nāmanque pōnente tote quēwengæīmpa, ante æīnente wæmīni inte ænāmaī īmīnīpa tōō.

⁴ Waocā nānōogæ ingante wido cæcā baī mīnitō adobaī Wængonguī ingante wido cæmīni īmīnīpa. Mīnitō ēñēnāmaī īmīnitawo. Inguipoga nāni quincoo ante mōnō pōnēnō beyæ mōnō Wængonguī ingante pīinte īmōmpa. Incæte, Inguipoga nāni quincoo ante nē pōnencæboīmpa, ante æcānō angā Wængonguī ingante pīinte bacæcāīmpa.

⁵ Wængonguī angā ēñēnīnque nāni yewæmongāinō īīmaī ante ōnonquedō ante intawogaa. “Wængonguī cæcā beyænque mōnō tōmengā Ōnōwoca ingante ēwocate quēwēmō īmōmpa. Īnīnque mānīwoca mōnō īmonte waadete pōnēnīnque, Botō īmote waadete pōnenguēnēmīni īmīnīpa, ante wæætē edæ godō pīinte acā ingampa.”

⁶ Incæte tōmengā mōnō īmonte godōmenque waadete pōnō cædīnque mōnō tōnō godongāmæ cædongā ingampa. Mānōmaī beyæ Wængonguī angā ēñēnte nāni yewæmongāinō īīmaī ante impa. “Nāmanque ante, Mōnitō gomonga waa cæmōni īmōnīpa, ante nē pōnēnāni īnānite

Wængonguī Baa angampa. Wæætē edæ, Mōnitō ōnōmōnique baī īmōnīpa, ante nē ānāni īnānite tōmengā pōnō waadete cæcampa.”

⁷ Mānōmaī beyæ mīnitō Wængonguī ingante ēñēnte cæedāni. Wænæ ingante Baa ante quēwēedāni. Baa āmīni īnīnque tōmengā nānēnē wodīi wīnōmaīngampa. ⁸ Wængonguī gāmæñō pōedāni. Pōmīni ate tōmengā wæætē mīnitō weca poncæcāīmpa. Mīnitō wænæ wænæ cæmīni īnōmīni inte ōnōmpo mēmpote baī waēmō pōnī quēwēedāni. Ayæ, Wængonguī ingante waadete pōnēmōpa, ante āmīni incæ adobaī inguipoga nāni quincoo pōnēmīni inte mīnitō mēnōnga ante pōnente quēwēnōmīni īmīnīpa. Īnīnque edæ mīmō ñā mēnōngate baī cædīnque tōingā pōnente entawēmīni baedāni. ⁹ Mīni nāmā wænæ wænæ cædīnō ante pōnēnīnque mīnitō, Ancaa wæwente awædō, ante wæedāni. Mīnitō Ca ca tote quēwēnō ñīmpo cædīnque Ca ca wædīnque edæ wæwente quēwēedāni. ¹⁰ Mīnitō incæ, Wænæ wænæ cæmōnīpa, ante ōnōmōnique īmōnīpa, ante Wængonguī ingante āñōmīni tōmengā wæætē, Wadāni mīnitō īmīnite waa acædānīmpa, ante mīnitō īmīnite ængō cæte baī cæquīngānō anguēnē.

Mōnō tōñīñacā ingante apænte ānāmaī incæmōimpa

¹¹ Botō tōñīñamīni ēñēedāni. Mīnitō wacā ingā wacā ingā wænæ wænæ ante apænedāmaī īedāni. Æcānō tōmengā tōñīñacā ingantedō ante wænæ wænæ āna ayæ tōmengā ingante, Wænæ wænæ cæbīpa, ante æcānō apænte āna īna māningā Wængonguī nānō wææ angāinō incæ wænæ wænæ ante apænecampa. Ayæ Wængonguī nānō wææ angāinō ante wænæ wænæ impa, ante apænte angampa. Wīi tōmengā nānō ēñēnte cæquīnque Wængonguī nānō wææ angāinō ante apænte angampa. Wæætē edæ, Mānīnō ante nē apænte āmo īmōpa, ante baī cæcampa. ¹² Wængonguī tōmenganque nānō wææ angāinō ante nē angāingā ingampa. Mānōmaī beyæ tōmengā adocanque nē apænte angūngā īnōngāīmpa. Adocā pōnō cæcā beyænque, Botō æmo beyænque quēwengūnāni, ante cædongā ingampa. Adobaī tōmengā apænte angā beyænque, Wadāni wo ēwente

bacædänimpa, ante cædongä ingampa. Bitö guiquenë nē angaïmi ïmipa diyæ wacä ingante apænte anguenëmi ïmii.

*Baänæ ate æbänö baquï, ante Wængonguinque
ëñengä*

¹³ Minitö ñowo botö ïmote ëñeedäni. Minitö nē ïmaï ante tedemini ïminipa. “Ñowoönæ incæ baänæ ate incæ mönitö ïi wadäni quëwëñömö goquïmöni ïmönipa, ante mäniñömö godinque adoque wadepo ïñonte mönitö godonte ænguinta æncæte ante cæquïmöni ïmönipa,” ante ämini ïminipa. ¹⁴ Ìñæmpa, Baänæ ate æbänö bacæïmpa, ante tömää ëñenämaï ïminipa. Cöwë quëwenguïmompä diyæ ëñenguïmöö. Awænæcaque owo boguïmä nænque tamöninque quingæ dæ ba baï mönö quëwënö adobaï do dæ bacæïmpa. ¹⁵ Minitö guiquenë ïmaï ante anguenëmini ïminipa. “Wængonguï Ao angä ïninque mönitö quëwenguïmöni ïmönipa. Ayæ Ao angä ïninque mönitö ïi waa cæquï cæcæmönimpa.” ¹⁶ Ìñæmpa minitö, Tömëmönique äninque cæcæmönimpa, ante pönëninque tedete quëwënömini ïminipa. Mäninö ante tömänö wënæ wënæ impa. ¹⁷ Waocä, Æbänö waa impa, ante ëñengä incæte cædämaï ingä inte mäningä wënæ wënæ cæcä ingampa.

5

Mäincoo nē eadäni nani pönenguënë

¹ Minitö mäincoo nē eamini ïñömö ñowo ëñeedäni. Minitö nanguï Ca ca wæedäni. Edæ, Mönö caate wæquinque nanguï ingæïmpa, ante tedecöninque Ca ca wæcæminimpa. ² Minitö mäincoo eadincoo do wote batimpa. Ayæ minitö waëmoncoo tömancoo cayæ ade cænimpa. ³ Minitö oodo tönö padata tæinta to tamöninque baï batimpa. Mänii to tamöni beyæ mini wënæ wënæ cædinö edonque pöni odömönte ingæïmpa. Ayæ quincöomë gonga bæcodöñömö concædinque æmæwo gonte ba baï minitö ïi to tamöni beyæ mini baö incæ adobaï æmæwo gonte ba baï bacæïmpa. Ìñæmpa ïimæca wodo ïinque bayedë incæ tömëmïni mäincoo eadincoo do wote baquincoo gæte da wente cæminipææ.

⁴ Aedäni. Wadäni edæ tömëmïni quëwencodenco cædinäni ïñönänite minitö, Paga, ante mini godonguënenta pæ gom-podinque godönämaï ïminitapa. Ìninque ænämaï ïnani minitö ïminitedö ante pïinte wædinque, Nē eadäni ïñömö, Mönitö cædinö beyæ ante dicæ pönönäni ætamöniyaa, ante wædönänimpa. Mönö Awënë nē adocanque Tömää Cægaingä ïñömö nē cædinäni nani wædinö do ëñeningä ingampa. ⁵ Ìimæca quëwëñedë minitö quincöo waëmoncoo tömancoo mante quëwëmïni inte minitö cöwë, Nämä möni watapæ tote quëwengæïmpa, ante quëwënimïni ïminipa. Waocä nänö wænongä wænguïönæ ïñonte cæningä nänö wænguinque oguïmo pöni ba baï minitö cæningä baï adobaï oguïmo pöni bamini ïminitapa töö. Mänionæ edæ do batimpa. ⁶ Wadäni nö cæte quëwënäni minitö ïminite Baa änämaï ïñönänite minitö ïñömö, Mini pante wæquinque wënæ wënæ cædänipa, ante wapiticæ apænte ämini inte tömënäni ïnänite wænömini wænänitapa.

*Mönö ee cæpämö ayæ Wængonguï ingante
mönö apænedö*

⁷ Mänömaï beyæ botö tönïñamini ëñeedäni. Minitö mönö Awënë nänö ponguinganca ante wæntædämaï inte ee cæte wänö cönöedäni. Aedäni, Nē quiyacä tömëmö wæænte ate onguipo cöñe ba ate, Tä bocate pæquï, ante cöönæ tedænque ee ongongampa. Cöönæ tedæ ïinque baganca amiña bayedë waëmö pöni nänö tömëmöncoo tä pete gæcæte ante wii ee ongongantawo. ⁸ Mönö Awënë nänö ponguïönæ oo pöni impa, ante minitö adobaï ee cæte wänö cönöedäni.

⁹ Botö tönïñamini ëñeedäni. Minitö wacä ingä wacä ingä wæætedö wæætë, Wiwa cæcampa, ante godö änämaï iedäni. Minitö mänömaï cæmini ïninque Wængonguï wæætë minitö ïminite apænte ante pämaingampa. Edæ mönö Apænte Anguingä oo poncæcäïmpa cæminii. ¹⁰ Botö tönïñamini ëñeedäni. Wëñëñedë Wængonguï beyæ nē apænegaïnäni ïñömö tömengä ëmöwo apænedinque wæwënäni incæte wæntædämaï inte ee cæte quëwengadänimpa, ante pönëninque minitö tömënäni nani cægaï baï adobaï cæedäni. ¹¹ Wadäni wæwënäni incæte

wæntæye ināmaī inte ee cædāni ininque nāni toquinque impa, ante mōnō pōnēnō ante do eñēmīnīpa. Docā Coba wodi iñōmō tōmengā nanguī pōnī wæwengā incæte wæntædāmaī inte pīnāmaī ingacāimpa. Mānīnō ante do eñēnīmīni inte ayæ tōmengā nānō wæwēñedē iinque ba ate Wængonguī æbānō tōmengā ingante nanguī godongā ængaingā ingacāimpa, ante adobai eñēmīnitawo. Edæ waodāni wæwēnāni iñōnānite mōnō Awēnē Wængonguī ædæmō waadete waa cædongā ingampa.

¹² Botō tōniñamīni eñēedāni. Wadō mīni pōnēnō ante pōnōmenque pōnēninque mīnitō iīmaī ante godōmenque pōnēedāni. Mīnitō ānō nāwangā impa, ante wadāni pōnencædānimpa, ante cædinque, Botō ānō nōingā baquīnō anguēnē, ante ānāmaī iedāni. Edæ, Öönæ beyænque imæca beyænque quiēmē beyænque mōnō apænemōnō nāwangā baquīnō anguēnē, ante tōmānō ante edæ apænedāmaī iedāni. Mīnitō wæætē Ao äinēmīni inte “Ao” ante māninque ædāni. Ayæ mīnitō Baa äinēmīni inte “Baa” ante māninque ædāni. Edæ wīi mānōmaī cæmīni ininque Wængonguī wæætē mīnitō imīnite apænte ante pāmaingampa.

¹³ Mīnitō wæwēmīni ininque Wængonguī ingante apænequēnēmīni imīnīpa. Mīnitō watapæ tomīni ininque Wængonguī ingante, Bitō tæiyæ waēmō imidō anguēnē, ante ämotamīni ancæmīnimpa. ¹⁴ Æcānō mīnitō weca wēnæ wēnæ ina iñōmō tōmengā Codito ingante mīni godongāmæ pōnencabo iñōmīnite nē aadāni nāni Picæncabo mīni ānāni inānite, Pōedāni, ante aa pequēnengā ingampa. Aa pecā pōnāni ate tōmēnāni Awēnē Itota emōwo ante apænedinque wædænque oguī wapæ æninque nē wēnæ wēnæ inongā ingante oo paacædānimpa. Ayæ adoyedē wēnæ wēnæ inongā ingante nāni oo paayedē tōmengā beyæ ante Wængonguī ingante apænecædānimpa. ¹⁵ Ayæ, Wængonguī ingante apæneyōmonte tōmengā eñengampa, ante wede pōnēninque apænemō beyænque waocā nē wēnæ wēnæ iningā incæ edæ gancæ bacæcāimpa. Wængonguī tōmengā ingante pōnō cæcā ate waa ba ñāni omæmoncæcāimpa. Ayæ adocā nānō wēnæ wēnæ cædinō beyæ

wēnæ wēnæ ingā ininque Wængonguī tōmengā nānō wēnæ wēnæ cædinō adinque ñimpo cæcā quēwēmaingampa. ¹⁶ Mānōmaī beyæ mīnitō wacā ingante wacā ingante apænedinque, Botō wīwa cædīmo inte wæbopa, ante ædāni. Mānōmaī cædinque mīnitō, Gancæ bacæmōnimpa, ante wacā beyæ ante wacā beyæ ante Wængonguī ingante apæneedāni. Waocā nē nō cæte quēwēnongā iñōmō Wængonguī ingante apænedinque edæ tæi pīñænte apænecā ingampa. Māningā nānō apænedō beyænque Wængonguī cæcæcāimpa. ¹⁷ Ediya wodi mōnō waomō imō bai tōmengā adobai ingacāimpa. Incæte tōmengā Wængonguī ingante, Cōönæ ämi cædāmaī ingæimpa, ante ædæmō apænecā ate mēa go adoque tæcæ wadepo ganca edæ cōönæ cædāmaī ingatimpa. ¹⁸ Ayæ ate tōmengā, Cōönæ ämi cæcæimpa, ante Wængonguī ingante wæætē apænecāimpa. Apænecā ate öönædē inō wææ cōönæ cægatimpa. Cōönæ wææ cæ ate onguipoga tōmēmō do tā bocate pægatimpa.

¹⁹ Botō tōniñamīni eñēedāni. Mīnitō weca æcāmenque nō taadō oda cæte gocā adinque wacā tōmengā ingante ocæ emænte māmongā ponguēnengā ingampa. ²⁰ Iīmaī pōnēedāni. Nē wēnæ wēnæ cæcā wapiticæ taadō gocā adinque æcāmenque tōmengā ingante nō taadō inō ocæ emænte nē māmongā ingāā tōmengā māmongā beyænque nē wapiticæ gocā iñōmō æmæwo nānō wænguēnēnō ñimpo cæte edæ quēwencæcāimpa. Ayæ nanguī pōnī nānō wēnæ wēnæ cædinō incæ wadæ cæte ingæimpa, ämopa. Māninque ante yewæmōmopa.

1 Pegodo cadota ante nänö tä^{nota} yewæmongainta

Waa quëwencæminimpa, ante

¹ Botö Pegodobo Itota Codito nänö nē da godongaïmo inömo inte nē yewæmömo ïmopa. Minitö iñömö tömëmini ömæ quëwënämaï ïmini inte nāwæ godinque wadäni nēmæ ponte quëwëmini inte pancaminiya Pontobæ quëwëñömöni wamini guiquënë Gada-tiabæ quëwëminipa. Wamini Capadotiabæ quëwëñömöni wamini guiquënë Atiabæ quëwëminipa. Wamini guiquënë Bitiniabæ quëwëminipa. Mänömaï wayömö wayömö quëwëmini iñöminite botö, Acæminimpa, ante yewæmömopa. ² Mæmpo Wængongui iñömö minitö iminite wëenëñedë pönö do adinque, Minitö Itota Codito ingante nē ëñente cæmini bacæminimpa, ante apænte ængacäimpa. Ayæ, Botö ayömo minitö tæiyæ waëmö ëwocamini bacæminimpa, ante cædinque Wængongui Önöwoca incæ Itota wepæ inte pönö ñä mënongacäimpa. Mänömaï cæcä bagaimini iñöminite botö ñöwo iñömö edæ, Wængongui nangui waadete pönö cæcä ate minitö nē gänë pönëmini bacæminimpa, ante yewæmömopa.

Watapæ bacæimpa, ante pönëninque quëwëmompä, ante

³ Itota Codito Wæmpocä iñongante Itota incæ, Botö Wængonguimi inömi ïmipa, ante Wængongui ingante waa apænecampa. Adocä iñömö mönö Awënë Itota Codito wænte öñöñongante, Nani ömæmöe, angä ñäni ömæmongacäimpa. Tömengä ñäni ömæmongä beyænque Wængongui mönö imonte adobai pönö cæcä ate mönö mepoga ëñate bai inömo inte edæ, Mönö miimö quëwëninque watapæ quëwengæimpa, ante pönente quëwëmompä. Ìninqe mönö iñömö Wængongui ingante apænedinque, Bitö tæi ëmönömi inte waa pönö cæbi æmönipa, ante edæ watapæ apænecäimpa. ⁴ Ayæ Wængongui, Ìncayæ ate mini ængincoo,

ante öönædë do edæ cö cæte mangampa. Mänincoo iñömö ñömädamai incoo ïninqe cöwë wentamö badamai incoo inte edæ wodamai inguincoo ingæimpa. ⁵ Ìnguipo pedænguipo ïninqe bayedë edæ Wængongui pönö ængä beyænque mönö cöwë quëwenguinö ante edonque pönö acæimpa. Ìninqe minitö wede pönëmini beyænque minitö quëwenguimämo ïninqe baquinganca Wængongui nē tæi piñænongä inte edæ minitö iminite wææ gompocampa.

⁶ Minitö ñöwo wantæ iñö incæ quiëmë beyænque wënæ wënæ bate wæmini incæte Wængongui pönö wææ gompocä beyænque edæ watapæ tomöni iminipa. ⁷ Oodo waëmö bamongæimpa, ante waodäni gongapamö godö aca podönäni ate oodoque badinque waëmonca pönö ongoncapa. Incæte oodo iñömö Ìncayæ ate ömæe ëwente ate edæ dæ bacæimpa. Oodo mini æinënonca waëmonca i iñönte mini wede pönëno iñömö edæ godömenque waëmö pönö impa. Ìninqe mini wede pönëno iñömö wii wido cæqui impa. Cöwë edæ ongongæimpa. Wæætë, Mini wentamö entawëninö edæ dæ go ate mini wede pönënonque edæ waëmö pönö entawencæminimpa, ante cædinque Wængongui pönö angä ate minitö gonga gonte caate bai wæminipa. Mänömaï mini caate wädö beyænque edæ godömenque wede pönëmini baminipa. Ìninqe Itota Codito mönö weca ponte a ongöñongante minitö cöwë wede pönëmini inte tömengä önöwa gäänë ædæ wæænte apænedinque, Nē tæi ëmönömi inte bitö waa pönö cæbi æmönipa, ante watapæ apænecæminimpa, ante Wængongui cæcampa.

⁸ Itota Codito ingante minitö awinca adamai inimi incæte tömengä ingante cöwë waadete pönëminipa. Edæ ñöwo ganca adamai inimi inte minitö tömengä ingante wede pönëninque mini ñäo bai entawenginque watapæ todinque æbämë ante tomöni iminipa. ⁹ Önöwoca mini ëwocate quëwenguinö ante æncæte ante wede pönëmini inte minitö ñöwo iñömö edæ do æmini iminipa.

¹⁰ Wængongui beyæ nē apænegaïnäni iñömö, Ìncayæ ate quëwenguinäni

inānite Wængonguī pönö cæcā beyænque quëwencædānimpā, ante ñōwomīni imīnitedō ante apænegadānimpā. Mānōmāinō ante apænedāni incæte tōmēnāni, Ædānidō inānite ante Wængonguī apænecāā, ante eñēnāmaī inte eñencæte ante nanguī cægadānimpā. ¹¹ Codito Ōnōwoca tōmēnāni ōnōwoca quëwēninque pönö apænedinque, Ìncayæ ate Codito nanguī caate wæcæcāimpā, angacāimpā. Ayæ, Caate wædingā inte tōmengā wæætē ñāö baī entawengā inte tæī emongā edæ bacæcāimpā, ante pönö apænecā eñēninque tōmēnāni wæætē adodö ante apænegadānimpā. Incæte tōmēnāni, Æyedēnō Codito mānōmaī cæquingāā, ante eñencæte ante wægadānimpā. Æbānō ba ate mānōmaī cæquingāā, ante eñencæte ante edæ nanguī cægadānimpā.

¹² Ñōwo iñōmō Wængonguī öönædē quëwēninque tōmengā Tæiyæ Waëmō Ōnōwoca ingante mōnitonga da pönongā pöninque apænecā eñēninque mōnitō wæætē Codito ingantedō ante mīnitō imīnite watapæ apænemōni eñēmīnitapa. Mānīne adode ante Wængonguī beyæ nē apænegaināni iñōmō, Codito waa cæcæcāimpā, ante apænegadānimpā. Incæte Wængonguī tōmēnāni inānite apænedinque, Wīi tōmēmīni beyæ ante apænemīnīpa, angacāimpā. Ìncayæ ate quëwēnāni beyæ ante apænemīnīpa, ante tōmēnāni inānite angacāimpā. Mānīnō ante Wængonguī beyæ ante æbānō apænedānīi, ante eñēnāmaī ināni inte Wængonguī anquedoidi incæ, Waodāni beyæ Wængonguī æbāmē waa pōnī cæcāā, ante eñēinente wædānīpa.

Wængonguī, Tæiyæ waëmō ëwocædāni, angampā

¹³ Mānōmaī beyæ mīnitō, Mōnō nanguī cæcæimpā, ante edæ tāno pōnente ate cæedāni. Nāmā wææ gompotawente baī eñente cæedāni. Itota Codito ponte a ongōninque mōnō imonte waadete pönö cæcā ate watapæ bacæimpā, ante edæ mānīnonque ante cōwē pōnente cæedāni. ¹⁴ Wēñænāni wæmpoidi inānite nāni eñente cæbaī edæ mīnitō adobaī eñente cæedāni. Mīnitō eñēnāmaī iñedē

mīni cæinēwēnō ante do cægāmīnimpā. Ñōwo iñōmō nē eñēmīni badinque mīni eñēnāmaī iñedē mīni cæinēwēnō ante edæ cædāmaī iedāni. ¹⁵ Mīnitō imīnite nē apænte aa pegaingā iñōmō edæ tæiyæ waëmō ëwocadongā ingampā cæmīnīi. Quiēmē cædinque edæ tōmengā baī adobaī tæiyæ waëmō ëwocadinque edæ tōmāā cæedāni. ¹⁶ Wængonguī incæ, “Botō tæiyæ waëmō ëwocabo imopa cæmīnīi. Botō ëwocabo baī mīnitō adobaī edæ tæiyæ waëmō ëwocacæmīnīimpā,” angampā, ante yewæmongatimpā.

¹⁷ Tōmāmō imonte adoyōmō pōnī cædinque mōnō Mæmpo iñōmō mōnō cædinō ante cōwā adinque nōingā pōnī ante apænte angampā. Ìninque, Botō Wæmpo, ante nē apænemīni inōmīni inte mīnitō iñōmō edæ nē nōingā ante apænte angā ingante edæ guīñente wædinque quëwēedāni. Inguipoga quëwēninque mīnitō, Wabæca baī ongonte awædō, āninque, Wængonguī weca edæ mōnō omæ ingæimpā, ante pōnente quëwēedāni. ¹⁸ Edæ, Dodāni nāni quëwengāī baī adobaī quëwengæimpā, ante ānāni eñēninque mīnitō Ao ante ōnonque pōnī cæte quëwengāmīnīimpā. Mānōmaī quëwēñōmīnite Codito wæætē, Mīnitō abæ tawænte baī quëwencæmīnīimpā, ante cædinque edæ, Quīnō godongantawo, ante mīnitō do eñēmīnīpa. Ìñæmpā oodo incæ padata incæ mōnō, Woquincoo, ancoo iñonte tōmengā dicæ mānīncooque godongantawogaa.

¹⁹ Wæætē quipi wē, Codotedo, nāni ānongā iñōmō quenta mongænāmaī wentamō eñadāmaī imāī Codito adobaī inongā inte edæ tōmengā nāmā wepæ tæiyæ waëmō wepæ godonte ængā beyænque quëwēmīnīpa. ²⁰ Inguipoga badoncæte ante cædinque Wængonguī ayæ gö cædāmaī ingāñedē wēēnēñedē pōnī incæ Codito ingante edæ, Mānōmaī cæcæbiimpā, ante do apænte ængacāimpā. Codito mīnitō beyæ ante edæ ñōwo pōnī incæ inguipoga pōninque ongongantapa. ²¹ Inguipoga pōninque tōmengā do wænte öñöñongante Wængonguī, Ñāni omæmōe, angā ñāni omæmongacāimpā. Ayæ tōmengā ingante godōmenque godō ææntodongā ate tōmengā

ñäo entawënungä inte tömengä nänö tæi ëmonguinque edæ æite gogacäimpa. Wængongui mänömai në cægaingä iñongante Codito minitö iminite pönö cæcä beyænque minitö wæætë Wængongui ingante pönëminitapa. Mänömai beyæ minitö, Wængongui pönö cæcä beyænque watapæ bacæimpa, ante pönëningue tömengä ingante wede pönëmini baminitapa.

²² Wængongui nö nänö änö ante ëñente cædinque minitö mimö ñä mënongate bai badinque minitö tönñadäni inänite në waadete pönëmini bagamïnimpa. Nöwo iñömö mimöno nö pönëningue minitö godongämæ ædæmö waadete pönëningue wacä ingä wacä ingä godö waa cæedäni.

²³ Edæ waomö mönö yate pöniwoca wæwocaqui iñonte wii mäninö beyænque mempoga ëñagamïnipa. Wæætë Wængongui nänö änönö müi quëwenguinö iñömö edæ wodämai inte cöwë ongongæimpa. Mäninö Wængongui nänö änönö beyænque minitö mempoga ëñagamïnipa. ²⁴ Edæ,

“Waomö gaguimænque bai iñömöte gaguimæ do to aminca bai mönö adobai aquii pönö inömö inte wæwocamömpa.

Waëmö pönö mönö ëmönö iñömö edæ ongai waëmö ængado bai iñönte ongai edæ do guinë wæno bai mönö ëmönö adobai bacæimpa.

²⁵ Incæte Wængongui nänö änö iñömö edæ cöwë wodämai ongongæimpa.”

Ante edæ ämotamini ante bai Wængongui beyæ nani yewæmongainö bai impa. Mäninö Wængongui nänö änönö ante minitö iminite do watapæ apænemöni ëñëminitapa.

2

¹ Mäninö beyæ minitö piinte mini pönëwënö edæ ñimpo cæedäni. Wacä adämai iñongante babæ mini cædö ante edæ cædämai ñimpo cæedäni. Minitö wadö apænete wadö mini cædö ante ñimpo cæedäni. Mänömai cæte mini quëwëninö ante edæ æmæwo ñimpo cæedäni. Wacä gomonga ængä ingante godö piinte adämai iedäni. Wacä ingantedö ante babæ ante mini piinte anewënö ante edæ ñimpo cæedäni. ² Wëñænäni tæcæ ëñadinäni

inte goömæ gäinente wædäni bai minitö adobai Wængongui nänö apænedonque ante ëñencæte ante wæedäni. Edæ tömengä ængä beyænque minitö në quëwëmini inte minitö önöwoca ædæmö picæmini mini pæquinque edæ tömengä nänö apænedö ante edæ goömæ waëmömæ beinente bai ëñencæte ante wæedäni. ³ Waëmepæ impa, ante adinque wëñængä goömæ wæætë wæætë becä bai minitö adobai, Mönö Awënë waingä pönö ingampa, ante do adimini inte tömengä weca wæætë wæætë ponte bete bai edæ ëñeedäni.

Në quëwengä inongä inte Codito wainca bai ingampa, ante

⁴ Oncö dicaca mænoncæte ante cædinque waodäni, Wiwa inca awædö, ante pancacaa wido cædäni bai waodäni pancadäniya mönö Awënë ingante adobai wido cædänipa. Wængongui guiquënë mönö Awënë në quëwengä ingante waa adinque, Botö owocö mænonguinca wainca pönö bai tömengä ingampa, ante tömengä ingante apænte æninque ee mangampa. Ininque minitö iñömö tömengä weca pönöiminite tömengä, ⁵ Minitö müimini quëwëñömini Wængongui minitö iminite ænte cabo tingæte adoconque mænonte bai cædinque edæ, Botö Önöwoca owoquincö, ante badongä quëwëminipa. Quëwëñöminite godömenque tæiyæ waëmö badongä badimini inte edæ minitö iñömö edæ Wængongui Önöwoca tönö äawocaque bai ewocadinque, Wængongui qui, ante në godömini bamïnipa. Ininque minitö Itota Codito ëmöwo ante apænedinque, Wængongui qui, ante godömini ate tömengä edæ waa ængampa. ⁶ Edæ Wængongui apænecä ëñëningue iïmai ante do yewæmongadänimpa.

“Tiönöquidi dæguimonga mænoncæte ante cædinque dica tänoca gö cæte bai cædinque,

Botö në waa adongä ingante ænte pönö Tänocä pönö gönömo gongæncæcäimpa.

Tömengä ingante në wede pönengä ingante wadäni ædö cæte bæ taquinäni guingo imonte wæquingäa,” angacäimpa.

⁷ Mini pönencabo iñömö, Tānocā nē ongongā iñömö waingā pōni ingampa, ante adinque tōmengā ingante æninque ee māmīnīpa. Wīi pōnēnāni guiquēnē tōmengā ingante Baa ānānīpa.

“Nē mænōnāni nāni wido cædinca incæ ñænænca pōni gōnōnīnca bate tānoca inte tæi gongæncapa,”

ante Wængonguī beyæ nāni yewæmongainō bai cædānīpa. ⁸ Ayæ adobai,

“Dīcaa nē tao tencawa tæ go wæængā bai iñāni inte

tōmēnāni nē Tānocā ingante pūinte adinque tæ go wæænte bai oda cædānīpa.”

Ante yewæmongatīmpa. Tōmengā nānō angainō ante ēñēnāmaī nāni cædō beyæ oda cædinque tæ edæ go wæænānīpa. Tōmēnāni edæ mānīnonque cædinque nē tæ go wæænguēnēnāni cōwē ingadānīpa.

⁹ Wængonguī nānō nē apænte ængāimīni guiquēnē wēmō iñömö quēwēñōmīnīte tōmengā aa pedīnque, Botō weca botō waēmō pōni ñāō ēmōñōmō pōedāni, ante cægacāīmpa. Mānōmaīnō cægāingā iñongante mīnitō, Bitō Wængonguī Waēmō pōni ēmōnōmī inte waa pōni cæbi edæ æmōnīpa, ante anguēnēmīni imīnīpa. Mānōmaīnō ante watapæ ancæmīnīpa, ante cædinque tōmengā mīnitō imīnīte do apænte ængacāīmpa. Īnīnque mīnitō Awēnē wēmīni iñōmīni inte, Wængonguī quī, ante mīnicabo nē godōmīni bai bamīnīpa. Wængonguī, Botō quīmīni imīnīpa, ānīnque tæiyæ waēmō badongā bagāimīni inte mīnitō Wængonguī nempo nē quēwēmīni imīnīpa. ¹⁰ Mīnitō wēēnēñedē adocabomīni iñāmaī ingāmīnīpa. Ñōwo guiquēnē Wængonguī tōnō godongāmæ quēwēmīni inte edæ adocabomīni imīnīpa. Wēēnēñedē guiquēnē tōmengā mīnitō imīnīte pōnō waadete cædāmaī ingacāīmpa. Ñōwo guiquēnē tōmengā pōnō waadete waa cæcā ate quēwēmīnīpa.

Wængonguī ingante nē cæmō imōmpa, ante quēwēedāni

¹¹ Botō nē waademīni edæ ēñēedāni. Mīnitō inguīpoga quēwēmīni incæte inguīpo wīi tōmēmīni omæ bai īmpa. Wæætē wabæca quēwēte bai quēwēmīni inte mīnitō onōwoca wentamō mongænāmaī

ingæīmpa, ante edæ wææ cædinque mīnitō baonque ante mīni cæinēwēnō ante ñīmpo cædinque edæ cædāmaī iedāni āmopa. ¹² Nē ēñēnāmaī iñāni weca quēwēnīnque mīnitō wæætē waa cæte quēwēedāni. Tōmēnāni guiquēnē mīnitō imīnīte pūīnīnque, Wēnæ wēnæ cæmīnīpa, ante babæ ānānītawo. Incæte mīnitō waa cæmīni īnīnque tōmēnāni, Waa cæcampa, ante do abāīnānīpa. Īnīnque Wængonguī Awēnē nānō apænte āñedē tōmēnāni do agāīnāni inte Wængonguī ingante, Bitō ñāō bai ēmōmī inte cæbi ate bitō wēnāni waa cædāni amōnīpa, āmaīnānīpa. Īnīnque tōmēnāni waa adīnque waa apænecædānīmpa, ante cædinque mīnitō ñōwo incæ waa cæte quēwēedāni.

¹³ Waodāni iñānīte wadāni edæ, Awēnēīdi iñānīpa, ante godō gōnōnāni ongōnānīpa. Æcāmē ingante ānāni bayōnānīte mīnitō wæætē Wængonguī Awēnē beyænque ante cædinque tōmēnāni iñānīte edæ ēñēte Ao ante cædāni. Adocanque ingante, Awēnē Odeye, ānīnque godō gōnōnāni ate mīnitō iñömö, Tōmengā tæiyæ awēnē inte nē angā īnongā ingampa, ante adīnque tōmengā ingante ēñēte cædāni. ¹⁴ Ayæ pancabaa awēnēīdi gobedōnadodoidi mīni ānōnāni iñānīte godō gōnōnīnque awēnē odeye wæætē īīmaī angampa. Mīnitō wēnæ wēnæ cædāni iñānīte edæ godō pædāni. Ayæ waa cædāni adīnque mīnitō, Waa cæmīni imīnīpa, ānīnque edæ godō waa cædāni, ante gobedōnadodoidi iñānīte godō gōnongā ongōnānīpa cæmīnīi. Mīnitō tōmēnāni iñānīte adobai ēñēte cædāni. ¹⁵ Eñēnāmaī iñāni wīwa tēdeyōnānīte mīnitō waa cæmīni ate wædinque tōmēnāni ædō cæte godōmenque wīwa tēdequīnānīi. Īnīnque, Tōmēnāni pæ wēēnedīnque tēdēdāmaī incædānīmpa, ante cædinque mīnitō iñömö edæ waa cæte quēwēedāni, ante edæ Wængonguī angampa cæmīnīi.

¹⁶ Tōmengā ñīmpo cæcā quēwēmīni inte mīnitō, Wacā wææ ānāmaī iñongante botō æbānō cæte waa quēwēnguīmoo, ante adīnque nāmā wææ ante cædāni. Incæte mīnitō wacā wææ ānāmaī ingā beyænque awēmō wēnæ wēnæ cæmīnītawo. Edæ cædāmaī iedāni. Wæætē Wængonguī ñīmpo cæcā quēwēmīni inte mīnitō tōmengā

ingante nē cæmīni inte edæ ēñente cæte quēwēedāni. ¹⁷ Tömānāni inānite mīnitō, Waodāni inānīpa, ante edæ waa aedāni. Mīni pōnencabo iñōmīnite edæ godongāmæ waadete pōnēedāni. Wængonguī ingante, Wængonguī ingampa, ante guñente wæedāni. Awēnē odeye ingante, Tæiyæ awēnē ingampa, ante edæ waa aedāni.

Codito æbānō caate wægacāi, ante pōnēedāni, ante

¹⁸ Pancamīniya imīnite wadāni ö ænāni wædimīni inte mīnitō tömēnāni beyænque cæmīni bamīnīpa. Inīnque nē ö ænāni iñōmō pōnō waa cædāni incæ pōnō piinte cædāni incæ mīnitō wæætē, Botō awēnē ingampa, ante piyænē cædinque tömēnāni nāni anganque edæ ēñente cæedāni. ¹⁹ Edæ waocā wēnæ wēnæ cædāmaī inongā inte quiēmē beyænque wæwente caate wæcā incæte tömengā, Wængonguī acampa, ante pōnēnīnque nangæ batawēnāmaī ingā inīnque edæ waa imaimpa.

²⁰ Wæætē mīnitō wēnæ wēnæ cæmīni beyæ pānāni ate mīnitō piyænē cæmīni inīnque Wængonguī mānīnō beyænque dicæ waa aquingāa. Waa adāmaī imaingampa. Wæætē waa cæmīni beyænque pānāni caate wædinque mīnitō piyænē cæte ee cæmīni adīnque Wængonguī edæ, Waa cæbīpa, āmaingampa. ²¹ Botō caate wædonō adodō taadō tee empote pōedāni, ānīnque mīnitō beyæ Codito caate wægacāimpa cæmīnīi. Botō caate cægongainō adodōnque cægōnte wæcæmīnīmpa, ante mīnitō imīnite do aa pecā pongamīnīmpa. ²² Tömengā iñōmō edæ cōwē wēnæ wēnæ cædāmaī ingacāimpa. Ayæ cōwā ayōnāni tömengā dicæ babæ ante cæcā agadāniyaa. ²³ Tömengā ingante piinte badete toyōnāni tömengā wæætedō wæætē pīnāmaī ingacāimpa. Caate wædinque tömengā wæætē piinte ānāmaī ingacāimpa. Wæætē, Nē nō apænte ānongā Wængonguī incæ botō beyæ cæcæcāimpa, ante pōnēnīnque piyænē edæ cægacāimpa. ²⁴ Mīnitō wēnæ wēnæ mīni cægānīcoo ante Baa ānīnque mongænāmaī inte nō pōnī cæte quēwencæmīnīmpa, ante cædinque tömengā nāmā baonga teēmē mongæñongante tömengā ingante awāa timpodāni edæ wængacāimpa. Inīnque tömengā mongænte

nānō wængainō beyæ mōnō wæætē mānīnō wēnæ wēnæ mōnō cægānīno ante wænte baī inōmō inte nō pōnī cæcæte ante quēwēmō inguēnēmō imōmpa. Tömengā ingante tæi pānāni nānō āmogate wægānīno beyænque mīnitō wæætē gançæ bamīnīpa. ²⁵ Edæ obegaidi pāmænte godāni baī ingāimīni inte mīnitō ñōwo nē aacā weca adodō ocæ emænte pōmīni adīnque tömengā iñōmō edæ mīnitō önōwoca beyæ ante wææ aacā ewocamīnīpa.

3

Mīna gæncaya iūmaī quēwencæmīnīmpa, ante

¹ Onquiyæmīni ēñēedāni. Mīnitō nānōogænāni nāni ānonque ante Ao ante ēñente cæedāni. Mīni nānōogænāni pancadāniya Wængonguī nānō ānō ante pōnēnāmaī inānitawo. Mānōmaī i inīnque mīnitō iñōmō, Wīi mōnitō tededō beyæ pōnāni inte tömēnāni wæætē ēñente mōni cædinō ante adīnque Wængonguī gāmænō poncædānīmpa, ante cædinque piyænē cæte edæ tömēnāni inānite ēñente cæedāni. ² Mīnitō Wængonguī ingante guñente wædinque waēmō entawēmīni inte ēñente cæte waa quēwēmīni adīnque tömēnāni wæætē Wængonguī ingante Ao ante pōmāinānīpa. ³ Mīnitō, Waēmō pōnī bacæboīmpa, ante cædinque ocaguī waa pōnī wao wīncate oodo mongænte wamoncoo mongænte weocoo waēmoncoo wēñate mongæmīnitawo. Iñæmpa mānōmaī cæmīni beyænque mīnitō dicæ wāimīni bamīniyaa. ⁴ Wæætē tömēmīni waa entawēnō beyænque wāimīni pōnī baquēnēmīni imīnīpa. Mīnitō önōwoca gānē pōnēnīnque ædæmō cæmīni beyæ mīni waa entawēnō edæ wodāmaī inte godōmenque waēmō pōnī ongongæīmpa. Mānīnō mīni waēmō entawēnō baī ante æncæte ante edæ quiēmē impa diyæ godōnte ænguī. Incæte Wængonguī mānīnō ante adīnque, Waēmō pōnī entawēmi abopa, ante nanguī tocampa.

⁵ Dodāni pōnī mōnō wængānāidi iñōmō, Wængonguī pōnō cæcā beyænque waa bacæīmpa, ante wede pōnēnīnque tæiyæ waēmō entawengadānīmpa. Tömēnāni waēmō pōnī bacæte ante tömēnāni

önöwoca gänë pönëninque ædæmō waadete cægadānimpa. Tömënanī nänöogæidi nāni ānonque ante eñëninque Ao ante cægadānimpa. ⁶ Dodā ñæñænā Tada wodi iñömō Abadāo wodi ingante eñente cædinque tōmengā ingante, Nē āmi imipa, angacāimpa. Minitō iñömō tōmënanā nānā cægai bai waa cædinque mīni guiñente wæpāmo æbāmë ba incæte guiñente wædāmaī imīni ininque nāwangā nō tōmënanā nänömomīni babaimīnīpa.

⁷ Onguiñæmīni guiquënë eñëedāni. Minitō gænāni tönō quëwëninque tōmënanī beyæ ante cōwë pönëninque waa cæedāni. Botō gængā onquiyængā inongā inte aquingā ingā incæte mōna guëa cæcaya imōnapa, ante eñente wædinque mīnitō gænāni inānite edæ cōwë waa aedāni. Ayæ, Mōna gæncaya Wængonguī ingante apæneyōmōna tōmengā do eñencæcāimpa, ante cædinque iīmaī pönente cæedāni. Wængonguī iñömō, Mīna quëwenguimāmo, ante waadete pönō cæcā beyænque mōna guëa ænguincaya imōnapa, ante edæ eñente cæedāni.

Mini waa cædō beyænque caate wæquimīni, ante

⁸ Tömāmīni guiquënë eñëedāni. Minitō adoyōmō pönëninque Ao ante cæedāni. Nē Ca ca wæcā tönō edæ adoyōmō Ca ca pönente wæedāni. Mönō pönencabo imōmpa, ante cædinque godongāmæ waadete pönëedāni. Wacā caate wæcā adinque mīnitō tōmengā tönō guëa wæte bai pönëedāni. Nāmā ængō cædāmaī imīni inte mīnitō wæætë edæ, Önömonque bai inömō imōmpa, ante piyænë cæte quëwëedāni. ⁹ Wënæ wënæ cædāni wæmīni incæte, Botō wæætë wënæ wënæ cæbo wæcā tocæi, ante cædāmaī iedāni. Wiwa ānāni wæmīni inte, Botō wæætë wiwa āmo wæcā tocæi, ante cædāmaī iedāni. Wæætë edæ, Tömënanī waa quëwencædānimpa, ante cædinque mīnitō tōmënanī inānite waa apænedinque godō waa cæedāni. Mänōmaī cæcæmīnimpa, ante Wængonguī mīnitō imīnite waa cædinque pönō aa pegacāimpa cæmīnī. ¹⁰ Edæ iīmaī ante Wængonguī beyæ ante yewæmongatimpa, “Waocā tōmengā nänō quëwenguimāmo ante nanguī æinente wædinque,

Tæönæ waa quëwente tocæi, ante nē angā iñömō tōmengā iñömō wënæ wënæ tededāmaī inte babæ wapiticæ ānāmaī inte tæönæ quëwente tocæcāimpa.

¹¹ Tæönæ quëwencæte ante cædinque tōmengā wënæ wënæ nänō cæinō ante emō cædinque dadi emæninque waa edæ cæquëngā ingampa.

Ayæ tōmengā piyænë cædinque, Mönō tōmāmō godongāmæ gänë pönente quëwengæimpa, ante nanguī cæquëngā ingampa.

¹² Mönō Awënë awinca emongā inte nē nō cædāni gämænō adinque tōmënanī inānite cōwë aacampa.

Ayæ, Botō imote æbānō ante apænedānī, ante tōmengā eamonca ongonte cōwë eñengampa.

Wënæ wënæ cædāni inānite guiquënë tōmengā piīninque awincaque acampa,”

ante yewæmongatimpa cæmīnī.

¹³ Minitō waa cæcæte ante edæ nanguī cæinëmīni bamīni adinque æcānō wæætë mīnitō imīnite wënæ wënæ cæquingā.

¹⁴ Incæte mīnitō nō pōnī mīni cædō beyænque caate wæmīni ininque edæ mīni waa quëwente toquinque imaimpa. Ininque iīmaī ante nāni yewæmongainō bai cæedāni. Tömënanī nāni guiñente wæpāmo beyæ ante mīnitō iñömō edæ guiñente wædāmaī iedāni. Edæ guiñëñate wædāmaī iedāni.

¹⁵ Wæætë, Tæiyæ Waëmō Awënë inongā ingampa, ante wede pönëninque edæ Codito ingante mīmōno entawëedāni. Ayæ, Watapæ bacæimpa, ante mīnitō quīnante pönëmīnī, ante eñencæte ante wadāni āñōnānite mīnitō wæætë a ongōnāmaī inte iīnonque ante edæ do apænemīni incæmīnimpa. Codito mōnitō Awënë pönō cæcā beyænque mōnitō, Watapæ bacæimpa, ante wede pönëmōnīpa, ante mānīnonque ante do apænemīni edæ eñencædānimpa. ¹⁶ Iīnāni iñömō eñencæte ante ānānīpa, ante pönëninque mīnitō, Botō wentamō entawënāmaī incæboimpa, ante nāmā apænte cædinque guiñente wædinque tōmënanī inānite ædæmō apænemīni eñencædānimpa. Mänōmaī cæyōmīni

wadāni guiquēnē mīnitō Codito nempo quēwēninque mīni waa cādōnō ante pīīnīnque babæ ante todānitawo. Īnīnque mīnitō wentamō entawēnāmaī inte ædæmō apænemīni adīnque tōmēnāni wæætē, Mōnitō babæ ante tedetamōnīpa, ante ēñēnīnque guīñēnete wæcādānīmpa.

17 Mīnitō wēnæ wēnæ cæmīni beyæ caate wæmīni ĩnīnque ōnonque ĩmaīmpa. Wæætē, Wængonguī, Caate wæcæmīnīmpa, angā ĩnīnque mīnitō waa pōnī mīni cādō beyænque caate wæmīni ĩnīnque edæ godōmenque waa ĩmaīmpa. 18 Mīnitō nō cādāmaī ĩñōmīnīte Codito ĩñōmō mōnō nē nō cādōngā inte mīnitō ĩmīnīte Wængonguī weca ænte poncæte ante cædīnque wēnæ wēnæ mīni cādō beyænque adopoque caate wængacāīmpa. Tōmengā baō ēñayongante tōmengā ingante wæñōnāni wængā ate Wængonguī Ōñōwoca angā ate ñāni ōmæmōnte edæ mīīngā quēwēngampa. 19 Ayæ adobāī Wængonguī Ōñōwoca tōmengā ingante ænte māocā godīnque tōmengā nē wænte gogaināni ōñōwocacoo tee mōnete ongoncoo weca gote apæñecā ēñēngadānīmpa. 20 Mānīnāni nē tee mōnete ongōnāni ĩnānīte Nōwee wodi Docā nāni ānōngā doyedē ancaa apæñecā incæte tōmēnāni ēñēnāmaī inte cægadānīmpa. Mānīnāni nē ēñēnāmaī cægāīnāni ĩñōnānīte Codito ñōwo tōmēnāni weca gote apæñegacāīmpa. Wængonguī ĩñōmō, Wīpo ñæñængade pōnī ĩmpo incæ oncō baī mænoncæbīīmpa, ante Nōwee ingante do angāīngā inte, ĩnīnque mænoncæcāīmpa, ante ee wānō congacāīmpa. Incæte mānīnāni ēñēnāmaī cæyōnāni ocho ganca ĩnāni mānīmpodānīque æpæno yædopāa wogaa gote quēwēngadānīmpa.

21 Mānīmæno edæ wogaa godīnque tōmēnāni nāni quēwēngāī baī mīnitō adobāī æpæñē guīdīnque quēwēmīnīpa. Incæte wīībaonque mēnōngate beyæ quēwēmīnīpa. Wæætē mīnitō, Wængonguī ayōngā botō mīmō ñā mēnōngate entawēmo inte quēwēmōpa, ante nāmā apænte pōnēnīnque æpæñē guīmīnīpa. Edæ guīdīnque mīni ængæ gantīdō baī Itota Codito ñāni ōmæmōnte quēwēngā beyænque mīnitō adobāī ñāni ōmæmōnte quēwēmīnīpa.

22 Tōmengā ĩñōmō do ōñædē æite Awēnē badīnque Wængonguī tōmēmængā ĩnō edæ tæ contayongante anquedoidī incæ nē ānāni incæ nē tæī pīñænte cādāni incæ tōmēnāni tōmānāni edæ tōmengā nānō ānō ante ēñēnte cādānīpa cæmīnīi.

4

Wængonguī nānō pōnō cæganca mōnō cæccæīmpa

1 Nē caate wædingā ĩñōmō, Botō idæwaa wēnæ wēnæ cæte awædō, ante tōmengā wīwa nānō cædīnō ante do wīdo cæcampa. ĩnīnque mīnitō, Codito incæ baonga quēwēninque caate wægacāīmpa, ante pōnēnīnque, Botō baonga caate wædīnque ēñēnte badīnque botō wēnæ wēnæ cædīnō ante wīdo cæcæboīmpa, ante pīyænē cæte tæī ongōedāni. 2 Edæ nē caate wædingā ĩñōmō, Mōnō wao-cabo baonque ante mōnō cæīnēwēnō ante botō ĩñōmō cādāmaī incæboīmpa, ante pōnēnīnque edæ ñīmpo cædīnque ĩnguīpoga tōmengā nānō quēwēngūnganca Wængonguī nānō ānōnonque ante ēñēnte quēwēngampa. 3 Eñēnāmaī ĩnāni cæīnēnte wæwēnte nāni ānōnō ante ēñēnte mīnitō wēēñēdē adobāī quīngāmē baī cæte quēwēngamīnīmpa. Edæ baonque ante mīni toīnēnte wæwēnonque ante do cædīnque mīnitō tōmēnāni nāni cæī baī cædīnque edæ tī nāmæ betē quīdī quīdī dowæñīnque beowæo inte cæowæo inte Yæ yæ angamīnīmpa. Ayæ mīnitō tōmēmīni badōnīnca incæ adīnque, Mōnitō wængonguī ingampa, ante ædæ wænte tedewēngamīnīmpa. Ñōwo ĩñōmō mīnitō māñōmaī cæte idæwaa cæmīni awædō.

4 Tōmēnāni ĩñōmō baonque ante nāni godō toīnēwēnō ante cæcæte ante pogodo gote baī cædīnque mīnitō ĩmīnīte, Ponguēnē quēwēnānīi, ante ancaa ānānīpa. Mīnitō gomō adīnque tōmēnāni tōnō godōngāmæ godāmaī ĩmīni adīnque tōmēnāni wæætē, Quīmæ awīncaque gomō awēmīnīi, ante edæ pīīnte ānewēnānīpa. 5 Incæte mōnō wao-cabo mīīmō quēwēmō incæ do wænte gogaināni incæ tōmāmō ĩmōnte nē oo apænte angūīngā ĩñōmō edæ Wængonguī ĩnōngā ingampa. ĩnīnque tōmengā, Æbānō

cægaminii, ante angä eñente wædinqwe mänömaï cægainäni wæætë aamö cædämaï inte tömënäni nāni cægainö ante edæ do apænequināni inānīpa. ⁶ Mänömaï beyæ do wængaināni inānite mönö Codito ingantedö ante watapæ apænegatimpa. Tömënāni baö eñate quëwëñönānite waodāni apænte äninque pänāni incæte Wængongui wæætë, Tömënāni önöwoca ewocadinque quëwencædānīpa, ante tömengä waa pönī nānö cægainö beyænque nāni quëwenguinö ante godö apænecä eñengadānīpa.

⁷ Nöwo iñömö tömancoo edæ oo iinque baquinö angüenë. Mänömaï impa, ante eñente wæmini inte mīnitö, Mönö töingä pönente Wængongui ingante apænecæimpa, ante cædinqwe nāmā wææ aadinque ocai encate pönëedāni. ⁸ Wënæ wënæ cæmö incæte waadete pönëmö iinque mönö waadete cædö beyænque wadāni piyænë cæte pīnāmaï inānīpa. Mänömaï impa, ante pönëninque mīnitö nē wede pönëmini inömini inte cöwë waadete pönente cæedāni. ⁹ Edæ wadāni inānite, Pöedāni, äninque wacä ingä wacä ingä pædæ godöninque edæ, Tömëmo qui impa, ante wædämaï iedāni.

¹⁰ Wængongui, Botö pönö waadete cæbo ate mīnitö ado botö waadete cædönö ante ænte ewocadinque godö waadete cæedāni, ante adocanque ingante wadö wacä ingante wadö pönö waadete cæcä ænte ewocaminīpa. Iinque mīnitö tömāmini mīni ænte ewocaganca cædinqwe mīni pönencabo beyæ godongāmæ waa cæquënëmini imīnīpa. ¹¹ Wængongui pönö cæcä æninque æcänö nānö apænequinganca ewocacä tömengä Wængongui nānö apænedonque ante apænequëngä ingampa. Æcänö wadāni beyæ ante nānö nē cæquinganca ewocacä tömengä Wængongui nānö tæi pīñænnonque entawëninque waa cæquëngä ingampa. Mänömaï cædinqwe mīnitö waa cæmini adinqwe mönö tömämö Itota Codito emöwo apænedinqwe Wængongui ingante, Bitö waëmö pönī inömi inte waa cæbīpa, ante apænecæimpa. Tömengä iñömö nē tæi emönongä inte ñäö emöninqwe nē nangui cædongä ingampa, ante mönö pedænguipoga quëwëmö incæ iincayæ ponte mīnguipoga quëwëmö

incæ cöwë watapæ pönī apænecæimpa. Mänömaï baquinö angüenë, ante botö, Amëe, ämopa.

Codito nempo quëwëninque caate wæccëminīpa, ante

¹² Botö nē waademini eñëedāni. Mīnitö ñöwo incæ gonga gonte caate bai wæmini incæte, Quiëmë beyæ mänömaï caate wæboi, ante guiñente wædämaï iedāni. Edæ wii önönque caate wæminīpa.

¹³ Wæætë, Codito nānö caate wægainonque godongāmæ ñöwo caate wæmönīpa, ante pönëninque watapæ toedāni. Mänömaï caate wædinqwe tomīni iinque Codito ñäö apāite bai nānö pönëdë godömenque gomonga watapæ toquimīni imāimīnīpa.

¹⁴ Mīnitö imīnite wadāni piinte äninque, Codito emöwo önönquedö waa adinqwe wæcantedö abi, ante badete todāni iinque Wængongui wæætë, Watapæ quëwencæminīpa, ante pönongä æninque mīnitö tömengä Önöwoca nē ñäö emönongä ingante ewocamini beyæ toquënëmini imīnīpa. ¹⁵ Wacä ingante nē godö wænongä ingante do pänāni wæcampa. Wacä qui nē awëmö ængä ingante nē wënæ wënæ cæcä ingante adobai pänāni wæcampa. Adocanque nē cæquëngä inte änāmaï iñongante wacä iñontobæ godö önönque cæcä ate nē önönque cæcä ingante pänāni wæcampa. Mīnitö wæætë nāmā wææ aadinque tömënāni nāni cædö bai cædämaï imīni iinque caate wæmini incæte ædö cæte mīni wiwa cædö beyæ pänāni caate wæquënëminii. Edæ dæ angüenë.

¹⁶ Wæætë wadāni mīnitö imīnite, Wææ, Codito emīñæmi imipææ, ante piinte cædāni caate wæmini incæte mīnitö guingo imonte wædämaï iedāni. Wæætë edæ Wængongui ingante apænedinqwe edæ, Bitö ñäö emömi inte pönö pemonte bai cæbi æninque mönitö Codito emöwo emonte bai adobai emömönīpa, ante waa apæneedāni.

¹⁷ Edæ iūmaï impa. Wængongui tönö mönö godongāmæ owocabo iñömönte tömengä oo apænte ancæcäimpa. Iinque mönö imonte tano apænte angä iinque tömengä wadāni inānite guiquënë æbänö cæquingäa. Tömengä ingantedö ante watapæ apænedāni ate nē eñente

cædāmaī ināni inānite apænte āninqwe Wængonguī quingāmē bai nanguī pangā wæquinānii. ¹⁸ Ayæ Wængonguī beyæ nāni yewæmongainō bai impa. Nē nō cæcā wodo wænguēnengā iñongante Wængonguī tingæ ængā beyænque quēwēñongā Wængonguī ingante eñēnāmaī ingā guiquēnē tōmengā ædō cæte quēwenguingāā. Nē wēnæ wēnæ cæcā adobaī edæ ædō cæte quēwenguingāā. ¹⁹ Minitō iñōmō Wængonguī nānō āninō beyænque caate wæmīnitawo. Ininqwe mǎnōmaī beyænque mīnitō, Mōnō imonte nē badongaingā cōwē pōnēninque ædæmō aaquingā ingampa, ante pōnēninque nāmā mīnitō ōnōwoca tōmengā nempo godōninque piyænē cæte godōmenque waa cæquēnēmīni imīnīpa.

5

Mīni pōnencabo æbānō cæte quēwengcæimpa, ante

¹ Mīni pōnencabo iñōmīnite pancamīniya nē aamīni Picæmīni mōnō āmīni imīnīpa. Botō iñōmō adobaī nē aabo Picæmo inōmo inte, Mōnō nē Picæncabo, ante mīnitō imīnite ædæmō apænedinque āmopa. Codito caate wæcā nē agaīmo inte botō edæ waadete āmopa. Ayæ Codito ñāō bai nānō ēmōnō edonque pōnī nānō odōmonguīnō ante botō tōmengā tōnō ñāō bai entawēmo inōmo inte edæ, Eñencæmīnīmpa, ante nanguī āmopa. ² Codito ingante nē pōnēnāni iñōmō mīnitō nempo cænīnāni bai ongōñōnānite mīnitō tōmēnāni inānite nē aamīni imīnīpa. Wængonguī, Nē pōnēnāni inānite aacæmīnīmpa, angā eñēninque mīnitō wæætē Baa āmōni ininqwe Wængonguī pangā wæcæ wæ, ante guīñente wæmīnitawo. Iñæmpa wīi guīñente beyænque aacæmīnīmpa. Wæætē Wængonguī, Mīnitō do Ao ante aacæmīnīmpa, ante tōmengā nānō ānōnonque ante edæ eñente cæte edæ tōmēnāni inānite ædæmō aadāni. Ayæ edæ godonte æinta ante æinente wæmīnitawo. Iñæmpa wīi æncæte ante wædinque mīnitō edæ, Nē pōnēnāni beyænque nanguī cæinente wædinque cæcæboīmpa, ante piyænē cæte aadāni. ³ Wadāni nē

cænīnāni bai mīnitō nempo ongōñōnānite mīnitō wæætē imæca awēnēidi nāni pīinte āmaī wīi adobaī pīinte ædāni. Wæætē edæ, Mōnō waa cæte quēwēmō adinque tōmēnāni mōnō bai adobaī waa cæte quēwencædānīmpa, ante cædinque edæ waa cæedāni.

⁴ Mǎnōmaī cæmīni ininqwe mōnō nē Aadongā Ñænængā pōnī inongā iñōmō iñcayæ ponte a ongōninque poganta ñāō ēmonta cōwē wodāmaī inta pædæ pōnonte bai cædinque mīnitō imīnite, Mīnitō nē aamīni inte botō ñāō ēmonte ongōñōmō ponte quēwencæmīnīmpa, ancæcāīmpa.

⁵ Tæcæ æmæwo pæimīni guiquēnē eñēedāni. Godōmenque picænāni nāni āninō eñēninque edæ Ao ante cæedāni. Ayæ gānē entawente pōnēninque, Ōnōmōnique bai mōnitō imōnīpa, ante pōnēninque wacā nānō āninō ante eñēninque Ao ante cæedāni. Edæ iīmaī ante yewæmonte ongōmpa.

“Nāmanque ante, Mōnitō gomonga waa cæmōni imōnīpa, ante nē pōnēnāni inānite edæ Wængonguī Baa angampa. Wæætē edæ, Mōnitō ōnōmōnique bai imōnīpa, ante nē ānāni inānite tōmengā pōnō waadete cæcampa.”

⁶ Ante yewæmongatīmpa cæmīnīi. Iñcayæ ate eyepæ pōnī bayonte Wængonguī incæ mōnitō imōnite ængō cæcā ongōncæmōnīmpa, ante cædinque mīnitō ñōwo iñōmō nē tæī piñængā ōnōnempo ongōninque nāmā ængō cædāmaī iedāni.

⁷ Codito mōnō imonte waadete pōnente cæcampa, ante eñente wædinque mīnitō guīñente mīni wædō ante tōmengā wo cæmīni mongængā ate mīnitō guīñēnāmaī ininqwe wæætē guēmancæmīnīmpa.

⁸ Nāmā incæ edæ wææ aadāni. Wēnæidi awēnē iñōmō edæ mēñebo nē pīinte angā bai inongā inte, Æcānō ingante ecate cænguīmoo, ante nē pīinte cædongā inte awēmō diqui diqui mingampa cæmīnīi. Ee aadāni. ⁹ Mīnitō caate wæmīni incæte, Mōnō tōniñadāni inguipoga tōmāmæ quēwēninque adobaī edæ caate wædānīpa, ante do eñēmīni inte Codito ingante wede pōnēninque adiyæ næ gongæninque wēnæ awēnē ingante cōwē Baa ædāni.

¹⁰ Mǎnōmaī cædinque wantæ iñō caate

wæmīni ate Wængonguī nē waadete pönö cædongä inte mīnitö imīnite pönö cæcä ate edæ gancæ bacæmīnimpa. Ayæ godömenque pönö cædinque tömengä mīnitö imīnite pönö tæi gönongä ate mīnitö tæi piñænte entawëninque wæntædämaī inte edæ cöwë tæi ongoncæmīnimpa. Tömengä adocä iñömö ñäö bai cöwë emönongä inte mīnitö imīnite aa pedinque, Mīnitö Codito nempo nē quëwënömīni inte botö ñäö emonte ongöñömö pö guiite quëwëedäni, angacäimpa. ¹¹ Tömengä iñömö cöwë tæi emöninque nē nanguī cædongä ingampa, ante mönö pedænguipoga quëwëmö incæ iñcayæ ponte mīnguipoga quëwëmö incæ cöwë watapæ pönī apænecæimpa. Mänömaī baquinö angüenë, ante botö, Amëë, ämopa.

Waa quëwencæmīnimpa, ante

¹² Botö tönīñacä bai inongä inte Tidibänö iñömö cöwë pönëninque ædæmö cæcä ingampa, ante adinque botö tömengä tönö godongämæ cædinque, Mīnitö acæmīnimpa, ante cadota ante ocanta yewæmömopa. Ii cadota adinque mīnitö gancæ pönëninque nanguī cæcæmīnimpa, ante cædinque botö Pegodobo iñömö, Wængonguī näwangä mänömaī pönö waadete cæcampa, ante yewæmömopa cæmīni. Tömengä nänö waadete cædonque ante entawëninque edæ mīnitö adiyæ tæi gongænte ongöedäni, ämopa.

¹³ Mīnitö imīnite apænte æninque Codito iñömö Babidönia iñömö tömengä ingante nāni godongämæ pönencabo inänite adobai apænte ængacäimpa. Tömënäni iñömö mīnitö imīnite, Waa quëwencæmīnimpa, ante apænedänipa. Botö wengä bai inongä inte Mäadoco adobai, Waa quëwencæmīnimpa, angampa. ¹⁴ Mīni pönencabo adobai godongämæ waadete pönëninque, Wængonguī bitö imite waa cæcæcäimpa, ante wacä ingä wacä ingä apæneedäni.

Codito nempo quëwëmīni inte tömämīni gänë pönente quëwencæmīnimpa, ante botö Pegodobo imo yewæmömopa.

2 Pegodo cadota ante nänö ayænta yewæmongainta

Wængonguï mīnitō imīnite waa cæcæcäimpa, ante

¹ Botō Timönō Pegodo inōmo inte Itota Codito ingante nē cædōmō iñōmote tōmengä botō imote da godongä godinque botō tōmengä beyæ nē apænebo bagaboimpa. Mönō Wængonguï inongä inte Itota Codito iñōmō mönō imonte, Quëwencæminimpa, ante nē Ængaingä ingampa. Tōmengä iñōmō mōnitō imōnite pönō cædinque, Mīni wede pönēnō ante waa pōni entawencæminimpa, ante pönongä ænimōni inte entawēmōnīpa. Ayæ adobai tōmengä nē nō pōni cædongä inte mīnitō imīnite pönongä æninque mīnitō mōnitō entawēnō bai ado mīni wede pönēnō ante edæ waa pōni entawēmīnīpa. Ininque mīnitō imīnite botō, Acæminimpa, ante yewæmōmopa. ² Mīnitō Wængonguï ingante pönēninque Itota Codito mönō Awēnē ingante adobai pönēninque tōmēna inate edæ ate bai pōnencæminimpa, ämopa. Ayæ tōmēna godōmenque pönō cæda ate mīnitō tōmēna nāna gānē pönēnō ante edæ eyepæ pōni entawencæminimpa, ante botō yewæmōmopa.

Codito nänö nē emiñæmō inte mönō iūmai entawēmōmpa

³ Itota Codito iñōmō, Nē waa cæbo inte botō ñäō emōmo iñōmote pōedāni, ante mönō imonte do aa pecä pōmōmpa. Mänōmai Itota Codito weca pōñōmōnte tōmengä Wængonguï nänō tæi piñæmāmo entawēnongä inte, Quëwēedāni, äninque eyepæ pönō cæcä ænte quëwēninque mönō tōmengä awinca ate bai pönēninque tōmengä nänō waa cædō bai edæ adobai mönō waa cæmō bamōmpa. ⁴ Tōmengä nē waa cædongä inte edæ ñäō bai emōninque, Botō godōmenque nanguï cædinque waa pōni edæ pönō cæcæboimpa, ante edæ wæætē wæætē angacäimpa. Ininque mīnitō iñōmō tōmengä nänō angāinō ante wede pönēñōmīnite Wængonguï tōmengä nänō entawēnō pönongä æninque

mīnitō Wængonguï nänō entawēnō bai adobai entawencæminimpa. Ayæ mänine ante wede pönēninque mīnitō ingui-poga quëwēninque wēnæ wēnæ mönō cæinente wægāinō ante, Nömænte bacæ wæ, ante wædinque Baa ante edæ aamō cæcæminimpa.

⁵ Codito mänōmai pönō cæcä beyæ mīnitō wede pönēmīni inte nē waa cæmīni bacæte ante cōwē edæ pæ pagænte cæedāni. Ayæ wææ nē waa cæmīni badinque Æbänō cæte nō cæquīi, ante eñēmīni bacæte ante nanguï cæedāni. ⁶ Ayæ wææ mänōmainō ante mīnitō nē eñēmīni badinque godōmenque nanguï cædinque nāmā wææ aamīni bacæte ante cæedāni. Ayæ wææ nāmā wææ aamīni badinque wæætē nē wæntædāmai inte ee cæmīni bacæte ante cæedāni. Ayæ wææ nē wæntædāmai inte ee cæmīni badinque mīnitō wæætē Wængonguï nänō ante entawēnō bai entawēninque tōmengä nänō cædō cæte quëwencæte ante cæedāni. ⁷ Ayæ wææ Wængonguï nänō cædō bai cæte quëwēmīni badinque mīnitō ayæ, Mönō caipæ, ante godongämæ mīni waa cæcabo bacæte ante cæedāni. Ayæ wææ mīni godongämæ waa cæcabo bamīni inte mīnitō ayæ waodāni tōmānāni inānite waadete pönēninque godō waa cæmīni bacæte ante cæedāni.

⁸ Mänōmai wede pönēninque tæi ongōninque waadete pönēninque Wængonguï nänō cædō ante godōmenque godōmenque entawente cæmīni ininque mīnitō mönō Awēnē Itota Codito ingante ate bai nē pönēmīni inte edæ tōmengä beyæ mīni cæquēnēnō ante oda cæte wædāmai imaimīnīpa. Wæætē edæ awæ nanguï inca bai mīnitō adobai mīni cæquēnēnō ante do cæcæminimpa. ⁹ Wæætē mäninō tōmānō ante entawēnāmai ingä guiquēnē tōmengä mōwoyata bai emōnongä inte ingui-pogaque waa adinque oönæde iñōmō gobæ i ædō cæte aquingäa. Tōmengä nänō wēnæ wēnæ cægāinō ñä do mēnongate impa, ante pönēnāmai inte önonque quëwengampa. ¹⁰ Iñānāni eñēedāni. Wængonguï mīnitō imīnite do apænte æninque aa pegacäimpa cæmīni. Mīnitō, Wængonguï nänō änōnonque ante eñente entawēninque mönō

cōwē tæi gongænte ongongæimpa, ante nangui cædāni. Edæ mǎnōmǎinonque ante cæmīni inte mīnitō oda cædāmaī inte tæi ongoncæmīnimpa. ¹¹ Ayæ iīncayæ ate nǎne wæmīni ate mōnō Awēnē Odeye Itota Codito iīnōmō mīnitō imīnite ææntodongā goyōmīnite tōmengā, Pō guidāni, ante watapæ æmæwo manguicā guiite cōwē quēwencæmīnimpa.

¹² Mīnitō mǎnīnō ante do ēñēnīnque mīni nō pōnī ēñēnō ante ædæmō entawente tæi ongōmīni incæte botō, Godōmenque cōwē pōnencæmīnimpa, ante cædinque adodō adodō ante apænebo ēñencæmīnimpa. ¹³ Edæ botō, Mīnitō oda cædāmaī inte cōwē pōnencæmīnimpa, ante cædinque botō baonga botō quēwenganca wæætē wæætē apænedīnque nō cæte apænebopa, ante pōnēmopa. ¹⁴ Edæ mōnō Awēnē Itota Codito botō imote edonque apænedīnque, Bitō oo pōnī wænīnque botō weca ææ poncæbiimpa, angacāimpa. ¹⁵ Angā ēñengāimo inte botō, Nōwo botō yewæmōnīnō ante adīnque entawēmīni inte mīnitō iīnōmō botō gobo ate cōwē pōnencæmīnimpa, ante cædinque nōwo incæ tæi piñæninque nangui cæcæboimpa.

Itota Codito Tæiyæ Awēnē nānō emōnō atamōnipa

¹⁶ Mōnō Awēnē Itota Codito iīnōmō tæi piñængā ingā inte oo poncæcāimpa, ante mīnitō imīnite apænedīnque mōnitō dicæ wadāni nāni mā apænewēnō ante apænetamōniyaa. Wæætē edæ, Tōmengā nē Awēnē inongā inte mōnō Tæiyæ Awēnē nānō emōnō incæ emongampa, ante nē agaimōni inte mōnitō, Nāwangā agamōnimpa, ante apænemōni ēñēmīnitapa. ¹⁷ Edæ Awēnē nānō nǎo apāite bai ongōñmō ongonte apænedīnque Mæmpo Wængonguī incæ, “Iīngā botō Wengā inongā inte botō nē waadecā ingampa. Tōmengā ingante adīnque botō waa tobopa,” ante apænegacāimpa. Ayæ Itota ingante waa adīnque tōmengā nē nǎo emongā ingante odōmongā agamōnipa. ¹⁸ Änanquidi tōmengā tæiyæ waemō emonte nānō ongōñmō godongāmæ ongōnīnque mōnitō mǎnīnō ante Wængonguī oōnæde tedecā ēñentamōnipa.

¹⁹ Wængonguī beyæ nē apænegaināni nāni yewæmongainō bai mōnitō adobai edonque agaimōni inte, Nāwangā iīnōte yewæmongadānimpa, ante apænemōni ēñenguēnēmīni imīnipa. Mǎnīnō nāni angainō wēmō iīnōmō nǎo apāite tica ēnente bai i apa quēwēmīni. Oque pōnente iīnōte, Wadaamō æængæimpa, ante wānō cōnāni bai mīnitō adobai mīni nǎo entawengūnque ante Itota Codito nānō ponguīōnæ ante edæ wānō cōnīnque wede pōnēmīni iīnque waa imaimpa. ²⁰ Iīñānāni ēñēedāni. Dodāni Wængonguī beyæ nē apænegaināni incæ, Wængonguī æbānō ante apænecā ēñente yewæmonguīmoo, ante pōnēnīnque dicæ mā pōnēnīnque adodeque incæ yewæmongadāniyaa. ²¹ Wīi nāmanque pōnēnīnque yewæmongadānimpa. Wæætē Wængonguī Tæiyæ Waemō Önōwoca nempo quēwēñōnānīte tōmengā pōnō apænecā ēñēnīnque Wængonguī nānō apænedonque ante apænegadānimpa, ante amo ēñēmaimīnipa.

2

Nē babæ odōmonte apænedāni iūmaī cædānipa, ante

¹ Doyedē pancadāniya, Wængonguī beyæ apænebopa, ānīnque babæ apænegadānimpa. Nōwo iīnōmō wadāni adobai awēmō cædinque, Mīni cabo oda cæte ewente wæcæmīnimpa, ante cædinque babæ ante odōmonte apænequīnāni mīnitō weca do ongōnānipa. Mōnō Tæiyæ Awēnē incæ tōmēnāni inānīte æncæte ante nāmā wepæ nē godongaingā iīngante tōmēnāni wæætē nāni quīngæ omæe ewengūnque edæ Baa ānānipa cæmīni. ² Pancamīniya nanguī imīni incæ mīni guīñente wæquinque tōmēnāni nāni wentamō mongænte goquīnō incæ tee empote goquīmīni imīnipa, ante awædō. Mǎnīnō godīnque mōnō nōingā ēñēnōnō ante piīnte cæyōmīni wadāni adobai mǎnīi taadō nōinō iīnōte godō babæ ānīnque wēnæ wēnæ ānāni baquīnānimpa, ante awædō. ³ Nē babæ odōmonte apænedāni iīnōmō mīnitō mǎincoo ante ö æīnēwente wæwēnāni inte nāmāneque nāni pōnēwēnō ante tededāni ēñēnīnque mīnitō do oda cæyōmīnīte tōmēnāni wæætē ö æmāinānipa, ante

awædö. Mönö nē pangä önoncadopo do on-gongainäni inänipa. Mönö nē pangä iñömö, Oo näni ewenguinque mänömaï cædänipa, ante apænte ancæte ante piïninque edæ möwo mönämaï mïngä inte a ongongampa.

⁴ Anquedoidi incæ eñenämaï cædäni ate Wængonguï ata cæpodämaï ingacäimpa. Wæætē, Tömēnāni nāni apænte tente wæquinganca ontatodē wēmō mæ māmōnte bai iñömō guï tee mönete ongoncædänimpa, ante cædinque tömengä angä eñente tömēnāni nāni owogaiñömō tadömengadæ pōni dobæ go guïgadänimpa. ⁵ Ayæ doyedē tömengä nänö nē badongaināni ingui-poga quēwēñönānite Wængonguï tömēnāni inānite ata cæpodämaï inte angä ate nē eñenämaï ināni iñömō edæ æpæmpo bete wængadänimpa. Wæætē Nöwee wodi Docä nāni änongä guiquēnē, Mönö nō cæte quēwengæimpa, ante nē apænegaingä iñongante Wængonguï tömengä tönö tiæte ganca ināni mānimpodänique inānite wææ aacä quēwengadänimpa. ⁶ Ayæ, Todömä tönö Gömoda iñömō quēwēnāni inānite, Mīni apænte wido cæquinque, ante tömēnāni quēwēñömō iya täninque wido cæcä gönaiboque bate contagatimpa. Mänömaï cædinque Wængonguï, Botö imote eñenämaï imīni mīni adobaï tente wæquinque cæminipa, ante wadāni inānite odömoncæte ante cægacäimpa. ⁷ Ayæ eñenämaï inte cædäni baonque towente quēwēnāni adinque Dooto wodi iñömō nē nō cægaingä inte, Wentamö pōni mongænte quēwēnāni awædö, ante wædongä inte adoyömö quēwēñongante Wængonguï tömengä ingante töö æmænte ö ængä beyænque quēwengacäimpa.

⁸ Tömengä waa cæquinque nō entawēnongä inte tömēnāni weca quēwente ayongä iimö iñö iimö iñö eñenämaï cædäni adinque tömengä, Ancaa ate awædö, Ancaa eñente awædö, ante wæwēñongante Wængonguï tömengä ingante do ö ængä beyænque quēwengacäimpa. ⁹ Mänömaï cædinque Wængonguï, Botö miñæ nē pönāni caate wædāni adinque botö do eñente cædinque æmo ate quēwēnānipa. Wæætē wiwa cædäni inānite botö apænte anguiönæ

ganca mö ongōnte bai mäniñque ñöwo incæ wæætē wæætē pämo wædänipa, ante Wængonguï cæcampa. Ìniñque, Nö eñente Wængonguï cæcampa, ante mönö edonque eñengæimpa. ¹⁰ Mänüi babæ ante nē odömōnte apænewēnāni iñömö tömēnāni baonque ante towēinente nāni entawēmāmo ante nē cædäni inönāni inte edæ awēnēidi inānite, Wiï eñēinē wædö, ante piïnänipa. Mänömainö ante nē piïnte änāni inānite godömenque pancæte ante Wængonguï mö ongōnte bai mangampa. Tömēnāni iñömö nämä ængö cædinque guïñenedämaï inte edæ nē ñäö entawente tæi emönāni inānite godö wēnæ wēnæ apænedinque edæ babæ ante tedewēnänipa. ¹¹ Iñæmpa anquedoidi tæi piñænāni inte godömenque ñænænāni inönāni incæ Wængonguï ayongante guïñenete wædinque nē ñäö entawente tæi emönāni inānite piïnte apænte änāmaï inänipa.

¹² Nē babæ ante odömönāni guiquēnē tömēnāni nāni nē adämaï inö ante mä pönēninque wēnæ wēnæ apænedinque babæ ante tedewēnänipa. Babæidi ömæwocadäni inte nāni togænte ecate ewenguinque önonque pōni cægönāni bai nē babæ odömönāni iñömö edæ adobaï eñenämaï ināni inte tömēnāni nāni wænguinque babæ cædinque quingämē bai quēwēnänipa. ¹³ Tömēnāni wadāni inānite godö wiwa cædäni ininque iināni wæætē näemæ godö cædäni wæcædänimpa. Tömēnāni iñömö, Itädē incæ mönö baonque pönente towengæimpa, ante cædänipa. Minitö waadete pönēninque godongämæ cæñömīni tömēnāni adoyömö pöninque cæowæo incædö beowæo incædö inte cæyönāni wentamö nāni mongænö beyænque mīni cabo wæætē baate bai eñamīni badinque wentamö tæ encaa tæ encaa emōnte bamīni awædö.

¹⁴ Wacä onquiyængä awinca adinque cöwē godö towēinente wædäni inte tömēnāni iñömö ñimpo cædämaï cöwē wiwa cæinente wædänipa. Wacä aquüi piñænāmaï ingä adinque tömēnāni, Mönitö tönö godongämæ ponte wēnæ wēnæ cæcæcäimpa, ante cædinque godö waa cæte bai babæ cædänipa. Botö quï botö quï, ante

nē æinente wædāni iñōnānite Wængongui iñōmō, Tōmēnāni nāni wæwocaincabo inānīpa, ante piinte angampa. ¹⁵ Taadō tōinō oda cædinque edæ docā Beodo wodi wengā Badāō wodi miñæ tōmēnāni tee empote godānīpa. Tōmengā Badāō iñōmō, Nō cædāmaī imo incæte botō mæincooque ænte tobote, ante bai cægacāimpa. ¹⁶ Tōmengā Wængongui beyæ nē apænecā incæ ocāi omæcacā bai inte wapiticæ eñēnāmaī cæyongante babetadecā iñingā incæ bodo incæ iñontobæ wao bai tededinque Badāō ingante wææ angacāimpa.

¹⁷ Māniī ñowodāni nē babæ odōmōnāni iñōmō æpæ taquēnēñōmō æpæ dæ ā bai edæ onōnānique inte odōmōnānīpa. Boguimancoo wīni cai mongænte ononque ænte poncoo bai tōmēnāni adobāi ināni inte ononque cædānīpa. Mānōmaī cædāni beyæ Wængongui, Tōmēnāni nāni ongonte wæquiñōmō, ante mæ māmōnte bai iñōmō badongacāimpa.

¹⁸ Edæ tōmēnāni ogæ tededinque, Botō godōmenque waa pōni cæbo aedāni, ante ononquedō ante tedewēnānīpa. Wadāni wapiticæ cæte quēwēnāni nempo adocanque wodo aamō cæyongante mānīnāni nē babæ odōmōnāni iñōmō, Bitō mōnitō miñæ wæætē pōnīnque baonque bitō cæinēwēnō ante guiñēñadāmaī inte cæte tocæbiimpa, ante waa cæte bai godō babæ cædānīpa. ¹⁹ Mini ædæmō aamō cæte mōnedāmaī quēwengūnque mōnitō miñæ pōedāni, ante babæ ānewēnānīpa. Incæte nē babæ odōmōnāni incæ tōmēnāni nāni wīwa cædonque beyænque cæte quēwēnāni beyænque nāemæ ñā cæyænte bai inte wædānīpa. Edæ quiēmenque ante waocā eñente cæcāā tōmengā mānīnō nānō eñente cædō beyænque nē cæte quēwēnongā inte nāemæ ñāō cæyænte bai inte wæcampā.

²⁰ Inguipoga ñōmænguēnēmāmo beyæ tee mōnete bai quēwēnīnāni inte tōmēnāni mōnō Awēnē Itota Codito mōnō imonte nē Ængaingā ingante do ate bai pōnēnīnque edæ abæ tawænāni inānitapa. Mānōmaī abæ tawænte godīnāni inte tōmēnāni inguipoga ante nāni cæinente wæpāmo beyænque wæætē adodō go goyo cæte ægodawate tæ wææntodonte bai wædāni iñinque tōmēnāni godōmenque nāni wēnæ

wēnæ wæwengūnque imaimpa. ²¹ Nōinō taadō do adīnāni inte tōmēnāni nāni godōmenque wæwengūnque emō cæte godānīpa. Wængongui tæiyæ waemō nānō wææ angainō ante odōmōnāni nāni do eñēnīnō ante Baa ante wadæ godāni iñōmō godōmenque wēnæ wēnæ nāni wæquinque impa. Iñinque mānīnō taadō ante tōmēnāni cōwē adāmaī ināni inte bai tōmēnāni beyæ godōmenque waa incædōnīpa. ²² Tōmēnāni nōinō taadō emō cæte godīnāni nāni cædō bai ante iīmāinō ante nāwangā ante badete todānīpa. “Guinta awæ wēningā adodō cængampa. Odæ wængānā iñōmō æpæ pantate ate onguipoipæ wēango wēango nangampa.”

3

Mōnō Awēnē wæætē adodō poncæcāimpa, ante

¹ Botō nē waadedōmīni eñēedāni. Mīnitō mōwo mōnāmaī inte nōingā ante pōnencæmīnīpa, ante botō, Mānōmaī impa, ante mentaa yewæmōnīnque adodō adodō ante yewæmōmo aedāni. ² Tæiyæ waemō entawēnāni Wængongui beyæ ante apænedīnque nāni yewæmongainō ante nē adīmīni inte mīnitō wæætē pōnencæmīnīpa, ante cæbopa. Mōnō Awēnē mōnō imonte nē Ængaingā inte adobāi ante wææ angacāimpa. Tōmengā nānō da godongāimōni iñōmō tōmengā nānō wææ angainō ante apænemōni eñēmīni inte mīnitō wæætē adodō ante pōnencæmīnīpa, ante cædinque yewæmōmopa.

³ Iīmāi ante tāno apænebo eñencæmīnīpa. Mōnō waocabo inguipoga mōnō quēwēmāmo wodo iñinque bayōnte nē badete todāni cōwē poncædānīpa. Pōnīnque tōmēnāni badete todīnque nāmā nāni wēnæ wēnæ cæinēnō ante edæ do cæquināni inānīpa. ⁴ Tōmēnāni iīmāi ante badete tocædānīpa. “Codito nānō pongūnque impa, ante wædānitedō abi. Iñæmpa Wængongui nānō badongāñedē inguipo nānō cægāi bai mæmæidi wodi wænte godāni ate ñōwo ganca adobāi inte cæ apa guiñēwēmīnīi,” ante badete toquīnāni inte poncædānīpa. Apænebo eñēedāni. ⁵ Wængongui iñæmpa adodeque angā beyænque oñnædē owocoo

edæ do bagatimpa. Adodeque angä beyænque onguipo æpæ tæcæpæno odæ yate ongõñonte tõmengä æpæ tönö badongä ongompa. Mänömaï impa, ante edonque i incæte tõmænani, Mönö Baa angæimpa, ante beyænque adämaï inte bai pönænämaï inänipa. ⁶ Ado æpæ inguipoga mæ ä beyænque Nöwee wodi quëwengäñedë mäninguipo nänö ingai dæ badingue waguipo bai bagatimpa, ante edæ ñöwodäni iñömö adobai pönænämaï inänipa. ⁷ Ayæ adobai Wængongui adodeque angä beyænque öönädë owocoo tönö iinguipo ñöwo mini cægonguipo edæ iya tanguingue ongompa. Tõmengä, Botö imote nê Baa änäni inänite botö apænte pante wido cæquiönæ ganca mänii öönæ tönö iinguipo ongompa, angampa.

⁸ Botö nê waademini edæ eñeedäni. Mönö Awënë ayongante adoönæque incæ edæ, Miido ganca wadepo bai impa, ante acampa. Miido ganca wadepo iñonte mönö Awënë ayongante, Adoönæque bai impa, ante acampa. Mänömaïno ante adodeque incæ minitö cöwë eñente pönëedäni, ämopa. ⁹ Mönö Awënë, Cöwë pönö cæbo æncæminimpa, ante nänö angainö ante pancadäniya, Æiquedö mönö Awënë cæquiringä, ante wädänipa. Mönö Awënë iñæmpa wii wæntæye ingampa. Wæætë, Adocanque wænämaï incæcäimpa. Wæætë tõmænani, Idæwaa wænæ wænæ cæte awædö, ante botö gämænö poncædänimpa, ante cædinque tõmengä mäninö beyænque ee cædämaï ingampa. Iñinque tõmengä, Minitö wæætë botö gämænö æiquedö ponguimini, ante wänö cöninque edæ ee pönämaï ingampa.

¹⁰ Incæte nê awëmö ö ængä iñontobæ nänö pömaï mönö Awënë nänö poncæ cæönæ iñömö adobai iñontobæ ponguinö anguënë. Nanguï tæi tæi téninque öönädë owocoo incæ iñontobæ dæ goquinö anguënë. Gongä nani angä nanguï pönö bæco iñinque edæ Wængongui nänö badongaincoo tõmancoo edæ aca podinque edæ ewente bacæimpa. Inguipoga tõmäo ongoncoo dæ ba iñinque inguipo önomæca pönö baquinö anguënë. ¹¹ Tõmancoo edæ mänömaï ewenguincooque impa, ante adinque edæ minitö iñömö, Æbänö quëwenguï, ante pönëmini. Wængongui

nänö cædö bai cöwë cædinque tæiyæ waëmö quëwenguënëmö imompa. ¹² Wængongui nänö ponguionæ iñömö edæ æyedënö ponguï, ante wänö cöninque, Quingæ pönö pongæimpa, ante mönö nanguï cæcæimpa. Mänionæ iñonte edæ öönæ incæ gonga bæcote ewente bayonte Wængongui nänö badongaincoo incæ nanguï ocoi äninque tõmancoo aca podinque ewente baquinö anguënë. ¹³ Picæönæ tönö pedænguipo ömæe ewëninque Wængongui wæætë, Botö miionæque tönö miinguipoque pönö badoncæboimpa, ante nänö angainö bai do badoncæcäimpa. Iñinque mönö iñömö, Miionæ tönö miinguipo iñömö mönö nö pönö cæte quëwengæimpa, ante nanguï ainente wæmompa.

¹⁴ Botö nê waadedömini eñeedäni. Mänömaï bacæimpa, ante nê ainente wæmini inte minitö iñömö edæ, Mönö mäninädë wentamö entawënämaï imö adinque Wængongui pünämaï incæcäimpa, ante nanguï cædinque edæ nämä wææ aadedäni. Ayæ tõmengä, Botö ayömo waëmö ewocamini iñinque edæ mönö godongämæ piyænë cæte quëwengæimpa, ante pönö cæcæcäimpa, ante edæ nanguï cæedäni. ¹⁵ Mönö quëwenguinque ante mönö Awënë edæ ee ongonte pönämaï ingampa, ante pönëedäni. Wængongui pönö cæcä ate ocai nê encacä bate pönëninque mönö töninacä Pabodo mönö nê waadecä inte adobainö ante minitö iminite edæ, Acæminimpa, ante yewæmongantapa. ¹⁶ Wængongui mönö quëwenguinque ante ee pönämaï ingampa, ante cadota ante yewæmöninque Pabodo adobainö ante edæ cöwë yewæmongampa. Tõmengä nänö yewæmöninta pancataa wii edonque i adinque nê eñenämaï inäni tönö aquï piñænämaï inäni iñömö edæ oda cædinque wapiticæ odömönänipa. Tõmænani edæ Wængongui angä eñente nani yewæmongainta tõmantaa adobai adinque tõmænani nani æmæwo ewenguinque edæ wapiticæ odömönänipa.

¹⁷ Botö nê waademini eñeedäni. Mänömaï impa, ante do eñëmini iñöminite Wængongui nänö wææ angainö ante eñenämaï cædäni inäni guiquënë minitö iminite töö æmænte wapiticæ ænte gocæ cædäni ate wædinque minitö wæætë

tömënäni miñæ godāmaï iedäni. Wæætë edæ Tæiyæ Awënë nempo quëwëmini inte, Tæi gowæænāmaï incæboimpa, ante nāmā wææ aaedäni. ¹⁸Mönö Tæiyæ Awënë Itota Codito ængä beyænque mönö quëwëmompā. Ìinque tömengä waadete pönö cæcä ate mīnitö tömengä ingante ate bai pönëninque wadäni ìnänite godömenque waadete godö cæmīni baedäni. Tömengä ìñömö edæ ñöwopāmo ìñonte wapāmo mīimāmo ìñonte edæ cöwë tæi ëmongä ìnongä inte ñäö apäite bai ëmongampa, ante adinque mönö ñimpo cædāmaï inte tömengä ingante cöwë waa acæimpa. Mänömaï baquïnö angüënë, ante botö, Amëë, ämopa.

1 Wäo cadota ante nänö tänota yewæmongainta

Mini quëwenguinö ante në pönongä

¹ Æcänö wëenëñedë Wængonguï nänö badongaiñedë do ingacäimpa, ante mäninö ante apænemönipa. Wængonguï nänö Angainö ante në ëmongaingä iñömö Itota adocä, Mini quëwenguinö ante në pönongä ingacäimpa. Mönitö iñömö mäningä apænecä ëñëningä tömengä ingante awinca inte në adimöni imönipa. Adocä ingante cöwä adinque mönitö tömengä ingante në gampodimöni imönipa. Inique möni në ëñëningä ingante ante, awinca inte möni në adingä ingante ante, möni në cöwä adingä ingante ante, möni në gampodingä ingantedö ante apænemönipa. ² Edä Itota në quëwengaingä iñömö edonque pöni a ongongacäimpa. Mönitö tömengä ingante në adimöni imönipa. Mäningä ingante ante, Näwangä quëwengaingä ingampa, ante apænemöni imönipa. Ayæ mönö Mæmpo Wængonguï tönö guëa cöwë quëwengaingä iñömö tömengä mönö weca ponte a ongongä atamönipa. Inique minitö iminite mäningä ingante ante apænemöni ëñencæminimpa. ³ Ayæ mönö Mæmpo Wængonguï tönö tömengä Wengä onguinængä Itota Codito tönö mönitö godongämæ cæmöni imönipa. Inique, Minitö adobai mönitö tönö godongämæ cæcæminimpa, ante cædinque mönitö möni në adingä ingante ante, möni në ëñëningä ingante ante minitö iminite apænemöni ëñencæminimpa. ⁴ Mönö eyepæ watapæ toquinque ante mäninö ante minitö iminite yewæmömönipa.

Wængonguï ñäö apäite bai inongä ingampa

⁵ Tömengä nänö angainö möni ëñëninö æbänö i, ante mönitö iimaï ante minitö iminite apænemöni ëñencæminimpa. Wængonguï ñäö apäite bai inongä ingampa. Inique tömengä wentamö nänö entawënö edä dä ampa. ⁶ Wentamö iñömö në cægömö inique mönö, Tömengä tönö

godongämæ cæmönipa, ante ämö inique mönö edä në babæ ämö imaimompa töö. Ayæ mänömai cæmö inique mönö, Quinö nöingä impa, ante cædämai imaimompa. ⁷ Wængonguï ñäö apäiyömö mäniñömö ongongä bai mönö adobai ñäö iñömö cægömö inique mönö wacä ingä wacä ingä godongämæ cæbaimompa. Ayæ ñäö iñömö cægömö inique mönö wënæ wënæ cægainö tömäa adinque tömengä Wengä Itota nämä wepæ inte mönö imonte mënongacä ate mënongate imaimompa.

⁸ Mönö, Botö wënæ wënæ cæpämö dä ampa, ante ämö inique mönö nämä incæ oda cæte wapiticæ go bai cæbaimompa. Ayæ mänömai äninque mönö, Quinö nöingä i, ante ewocadämai quëwëmaimompa töö. ⁹ Wæætë edä Wængonguï mönö imonte cöwë pönëningä në ædæmö cæcä inongä ingampa. Ayæ në nö cæcä iñongante mönö tömengä ingante, Botö nämä wënæ wënæ cædimö inte awædö, ante ämö ëñëningä tömengä wæætë püinämai inte mönö imonte pönö ñimpo cæcä quëwencæmöimpa. Ayæ wiwa mönö cæte quëwënö tömäa adinque tömengä wæætë mönö imonte mënongacæcäimpa. ¹⁰ Mönö, Botö cöwë wënæ wënæ cædämai ingaimö imopa, ante ämö inique Wængonguï ingantedö ante, Babæ änogä ingänö, ante ämaimompa. Ayæ mänömai ämö inique tömengä nänö angainö ewocadämai quëwëmaimompa töö.

2

Mönö Codito wææ angä beyænque mönö quëwenguinque

¹ Botö wëñæmini bai imini ëñëdäni. Minitö wënæ wënæ cædämai incæminimpa, ante iimaï ante cædinque yewæmömopa. Incæte adocanque wënæ wënæ cæcantawo. Tömengä beyæ wacä, Mæmpo Wængonguï pänämai incæcäimpa, ante mönö në wææ änogä incæ mä ongongampa. Mäningä iñömö në Nö Cæcä inongä inte Itota Codito inongä ingampa. ² Ayæ idægoidi, Mönö wënæ wënæ cægainö ante mönö imö Wængonguï püinämai incæcäimpa, ante cædinque cæningä wænönäni nänö wængai bai mäninganque adobai mönö wënæ wënæ cægai beyæ wængacäimpa. Ayæ wiï önonque

mönö wënæ wënæ cægainonque beyænque wæætē tōmāmæ quëwënäni nāni wënæ wënæ cægai beyæ adobai wængacäimpa.

³ Mönö Wængongui ingaingä ingante ate bai pönemö, ante æbänö cæte ëñenguü. Edæ, İimai cæedäni, ante Wængongui nänö wææ angainö ante ëñente cæmō İinque mönö edæ, Wængongui ingante ate bai nē pönemö İmopa, ante do ædæmō ëñemaimopa. ⁴ Waocä İñömö, Wængongui ingaingä ingante ate bai pönemö İmopa, ante nē angä incæte tōmengä Wængongui nänö, İimai cæedäni, ante wææ nänö angainö ante ëñenāmai cæcä İinque mäningä nē babæ änongå ingampa. Ayæ Wængongui nöingä nänö angainö ante ewocadāmai quëwengampa tōö. ⁵ Wæætē, Wængongui nänö angainö ante æcänö ëñente cæda İñömö mäningä ingante Wængongui pönö cæcä beyænque tōmengä Wængongui waadete nänö pönenö ante eyepæ entawente quëwengampa. İinque Wængongui nänö angainö ante ëñente cæmō inte mönö, Tōmengä nempo quëwemö İmopa, ante ædæmō ëñemopa. ⁶ İinque æcämenque, Botö tōmengä nempo nē quëwemö İmopa, ante nē angä İñömö tōmengä Itota nänö quëwente cægöni bai adobai quëwente cægonguënë ingampa.

Itota, İimai cæedäni, ante ñöwo nänö wææ änö

⁷ Botö nē waademini ëñeedäni. Minitö İminite, İimai cæedäni, ante wüi botö tōmēmo wææ änö ante ñöwo yewæmōmopa. Wæætē Itota do nänö wææ angainö ante wëenëñedē mini ëñente ængainö ante adodö ante yewæmōmo aedäni. İi tōmengä do nänö wææ angainö İñömö minitö İminite möni apænedö mini ëñeninö İmpa. ⁸ Incæte minitö İminite Itota, İimai cæedäni, ante ñöwo nänö wææ änö yewæmōmopa. Tōmengä tönö minitö quëwente cædinö beyænque, Mäninö nö pönİ İmpa, ante edonque pönİ acæİmpa. Edæ mönö wëmö İñömö wodemäa tæcæ bacæ cæyö nö ñäö İñömö tatodonte do apäite İmpa.

⁹ Botö ñäö İñömö quëwemö İmopa, ante nē angä incæte tōmengä nänö tönİñacä ingante nē pİingä ingä İinque tōmengä wëmö İñömö ayæ quëwengampa. ¹⁰ Æcänö

guiquënë nänö tönİñacä ingante nē waadete pönengä tōmengä ñäö İñömö nē quëwengä ingampa. Tōmengä ñäö İñömö quëwëninque quëmē beyænque edæ tēwate goquingä. Edæ dæ ampa. ¹¹ Wæætē æcänö nänö tönİñacä ingante nē pİingä wëmö İñömö quëwengampa. Tōmengä wëmö İñömö cægongä inte compocæ compocæ gocä ingampa. Wëmö İñömö quëwëninque babetamongä bagaingä inte tōmengä ædönö gocä, ante ëñenāmai ingampa.

¹² Wëñæmini ëñeedäni. Edæ Itota Codito emöwo beyænque mini wënæ wënæ cægainö ante ñimpo cæte quëwëmini İminipa, ante adinque botö minitö İminite yewæmōmopa.

¹³ Mæmpomini ëñeedäni. Minitö edæ, Wëenëñedē nē ingaingä ingante do ate bai pönengaimini İmini beyænque botö minitö İminite yewæmōmopa. Onguiñæmini tæcæ pæmini ëñeedäni. Minitö edæ godömenque tæi emömini İmini inte wënæ awënë ingante Baa ante gänä cæmini beyænque botö minitö İminite yewæmōmopa. Wëñæmini ëñeedäni. Minitö edæ mönö Mæmpo Wængongui ingante do ate bai pönengaimini İmini beyænque botö minitö İminite yewæmōmopa.

¹⁴ Mæmpomini ëñeedäni. Minitö edæ wëenëñedē nē ingaingä ingante do ate bai pönengaimini İmini beyænque botö minitö İminite yewæmōmopa. Onguiñæmini tæcæ pæmini ëñeedäni. Minitö edæ tæi emömini inte ayæ Wængongui nänö angainö cöwē ewocate quëwëmini İminipa. Adobai minitö edæ wënæ ingante godömenque tæi emömini inte Baa ante gänä cæminipa. Mänömai beyæ botö minitö İminite yewæmōmopa.

¹⁵ Inguipogaque ante nāni quëwëmāmo ante waadete pönenāmai İedäni. Inguipoga quëwënäni quëmē wënæ wënæ nāni cæpāmo ante tōmāmāmo ante adobai waadete pönenāmai İedäni. Ayæ æcänö İi inguipogaque ante nāni quëwëmāmo ante waadete pönente İna mäningä mönö Mæmpo Wængongui nänö waadete pönenö ewocadāmai quëwengä ingampa. ¹⁶ İi inguipoga İñömö æbänö İ, ante acæİmpa. Edæ wënæ wënæ cædäni quëmē beyæ nāni æinente wädö İ, awinca inte adinque nāni æinente wädö İ, ante wüi

mönö Mæmpo Wængongui pönö cæcä ate æinänäni. Tömänäni, Mäincoo nanguï eamöni imöni aedäni, ante cædänipa. Ayæ, Nanguï cæmöni aedäni, ante cædänipa. Incæte tömäa mänii näni æinänö wii mönö Mæmpo Wængongui pönö cæcä ate æinente badänipa. Wæætë inguipoga iñömö në mä cædäni inte quiëmë wënæ wënæ näni cæpämö ante adinque wadäni dobæ wënæ wënæ cæinänäni badänipa. ¹⁷ Inguipoga mönö quëwëñömö incæ mäninguipogaque ante quëwänäni näni cæinänö incæ oo pöni dæ baquïnö anguënë. Wæætë waocä, Wængongui nänö angainö ante në eñente cæcä inte wantæpiyæ wänämaï quëwencæcäimpa.

Quïnö nöingä ante impa, quïnö babæ ante impa

¹⁸ Wëñæmïni eñëedäni. Ìnque baquïönæ mönö äönæ oo batimpa. Mänïönæ iñonte Codito ingante wacä në piinte cæcä iñömö, Botö Codito imopa, ante në änewëongä ponguingä, ante eñëmïnitapa. Edæ mäninö mïni eñëninö bai ñöwoönæ incæ nanguï inäni Codito ingante në piinte cædäni iñömö, Botö Codito imopa, ante në änewëönäni inte edæ do pönänitapa. Mänömaï i ìnque edæ, Ìnque baquïönæ do bapa, ante mönö eñengæimpa. ¹⁹ Mäninäni iñömö mönö imonte emö cæte godänitapa. Incæte tömënanäni wii nö mönö pönencabo adocabo inämaï inänitapa. Edæ mönö pönencabo adocabodäni inänäni inte bai tömënanäni edæ wadæ godämaï inte mönö tönö ayæ a ongoncædönänimpa. Wæætë do godäni adinque mönö, Mäninäni tömänäni mönö cabo inämaï inänitapa, ante edonque pöni acæimpa.

²⁰ Edæ ogui wapæ gadoncadäni encadäni bai mönö Tæiyæ Waëmö inongä iñömö edæ tömengä Önöwoca ingante mïnitonga angä pö guicä ate mïnitö tömämi tömengä ingante entawëninque, Quïnö nö i, ante eñëmïnipa. ²¹ Mïnitö imïnite yewæmöninque botö dicæ, Mïnitö, Quïnö nö i, ante eñënämaï imïnipa, ante yewæmömogaa. Wæætë edæ, Mïnitö, Quïnö nö i, ante eñëmïnipa, ante adinque botö mänömaï beyæ ante yewæmömopa. Ayæ babæ näni äninö tönö Wængongui nöingä nänö

angainö tönö ædö cæte guëa inguïnaa, ante eñëmïni adinque botö mänömaï beyæ ante yewæmömopa. ²² Babæ ante në änewëongä æcänö ingantawo. Edæ Itota incæ wii mönö Codito ingaingä ingampa, ante në angä iñömö tömengä në babæ änewëongä ingampa. Mäningä wæætë, Botö Codito inömo imopa, ante Codito ingante në piinte cæcä ingampa. Tömengä edæ mönö Mæmpo Wængongui tönö tömengä Wengä Itota Codito näna Mæmpocaya inate Baa angampa. ²³ Ìi Wengä onguïñängä ingante Baa äninque, Itota incæ wii mönö Codito ingaingä ingampa, ante në änanäni iñömö ædö cæte Mæmpo Wængongui nempo quëwëönäni inguïnänii. Wæætë tömengä Wengä ingante æcänö Ao äninque, Itota mönö Codito ingaingä ingampa, ante në angä guiquënë tömengä Mæmpo Wængongui nempo në quëwëongä ingampa.

²⁴ Mïnitö guiquënë, Quïnö angainö, ante wëenëñedë mïni eñengainö ante ñöwo godömenque mïnitö mïmönë entawente quëwëedäni. Mäninö ante godömenque entawëmïni inte mïnitö Itota Codito tömengä Mæmpo Wængongui näna Mæmpocaya tömäna nempo cöwë quëwenguïmïni imïnipa. ²⁵ Mönö imonte Wængongui, Cöwë cæcæboimpa, ante cædinque iïmaï angacäimpa. Mïnitö wantæpiyæ cöwë wänämaï quëwencæmïnimpa.

²⁶ Wadäni, Mïnitö incæ oda cæcæmïnimpa, ante në cædäni iñönänite botö mïnitö imïnite mäninö ante yewæmömopa.

²⁷ Codito tömengä Önöwoca ingante do pönongä ewocamïnipa. Tömengä ingante cöwë ewocamïni iñömïnite wacä ædö cæte mïnitö imïnite odömonte apænequingäa. Tömengä Önöwoca incæ tömänö ante odömonte apænecä eñencæmïnimpa. Ayæ tömengä nänö odömonte apænedö iñömö nö pöni i ìnque edæ wii babæ äninö impa. Ìnque mïnitö tömengä mänömaï nänö odömonte apænedinö bai cædinque godömenque mönö Itota Codito nempo quëwëedäni.

²⁸ Mänömaï beyæ botö wëñæmïni bai imïni eñëedäni. Tömengä nempo godömenque quëwëedäni. Edæ, Tömengä

pongä mönō aquiōnæ mönō guiñēnāmaī ingæimpa, ante cædinque ayæ, Tömengä ponguiōnæ mönō tömengä weca ongōninque guingo imōnāmaī ingæimpa, ante cædinque godōmenque tömengä nempo quēwēedāni. ²⁹ Edæ mīnitō, Itota Codito nō nānō cæte ingainō ante ēñēmīni īnīnque edæ mīnitō īmaī ante adobaī do ēñēmaīmīnīpa. Quīnō waa impa, ante nē cædōnāni tōmānāni mempoga ēñagāināni inte Wængonguī wēnāni īnānīpa.

3

Wængonguī wēnāni

¹ Mōnō Mæmpo Wængonguī incæ æbānō mönō imonte nanguī pōnī nē waadete pōnēnongä inte cægacāimpa, ante apænebo ēñēedāni. Edæ mönō imonte, Botō wēmīni imīni āmopa, ante angacāimpa. Īnīnque nāwangä mānīmōnō imōmpa. Ingui-pogaque quēwēnāni īñōmō, Mōnō Mæmpo Wængonguī ingante wīi adīnque pōnēnāmaī īnānitapa. Mānōmaī beyæ mönō imonte adobaī adāmaī īnāni inte baī pōnēnāmaī īnānīpa. ² Botō nē waademīni ēñēedāni. Nōwoyedē Wængonguī wēmō īnōmō inte mönō ayæ ate æbānō baquīmōō, ante ayæ wīi edonque amōmpa. Wæætē, tömengä nānō pōōnæ mönō aquiōnæ tömengä nānō ingaī baī mönō adobaī bacæimpa, ante ædæmō ēñēmōmpa. Edæ tömengä æbānō ingaingä ingää, ante mönō edonque acæimpa. ³ Edæ, Tömengä beyænque mānōmaī bacæimpa, ante nē pōnente todāni tōmānāni, Itota Codito tæiyæ waēmō nānō ingaī baī mönō adobaī tæiyæ waēmō bacæimpa, ante nāmā incæ cædānīpa.

⁴ Nē wēnæ wēnæ cædāni tōmānāni Wængonguī nānō, īmaī cæedāni, ante nāni yewæmongainō ante Baa ante nē ēñēnāmaī cædāni īnānīpa. Edæ wēnæ wēnæ nāni cægāinō incæ Wængonguinque ingante Baa ante nāni angāinō impa. Mānīnō ante nō ante impa. ⁵ Mīnitō do ēñēmīnīpa. Tömengä edæ mönō wēnæ wēnæ cægāinō ante mönō imonte, Nīmpo cæbo quēwenguīmīni, ante cæcæte ante cædinque ēñagacāimpa. Ayæ tömengä wēnæ wēnæ cædō entawēnāmaingä ingampa. ⁶ Ayæ edæ tömengä nempo nē quēwēnōnāni

tōmānāni wīi godōmenque wēnæ wēnæ cædāni īnānīpa. Godōmenque nē wēnæ wēnæ cædōnāni guiquēnē tömengä ingante adāmaī īnōnāni inte pōnēnāmaī īnīnāni īnānīpa tōō. ⁷ Wēñæmīni ēñēedāni. Wacā mīnitō imīnite, Wapiticæ gote oda cæquīmīni, ante nē māocæ cæcā ingante gomō aedāni. Wæætē, Quīnō waa impa, ante nē cæcā guiquēnē tömengä Itota Codito nō nānō cæte ingaī baī adobaī nō cædongä īnongampa. ⁸ Nē wēnæ wēnæ cæcā guiquēnē wēnæ pæingä baī inte adocā nempo quēwengampa. Edæ wēñēñedē wēnæ awēnē nānō wēnæ wēnæ cægāi baī cōwē wēnæ wēnæ cæcampa. Mānōmaī beyæ Wængonguī Wengä īñōmō wēnæ awēnē nānō wēnæ wēnæ cægāinō ante wo ēwencæte ante inguipoga ponte ēñagacāimpa.

⁹ Wængonguī wēnāni tōmānāni wīi godōmenque wēnæ wēnæ cæquīnāni īnānīpa. Edæ tōmēmō guīdīmō baī mīnte baī cædinque Wængonguī nānō quēwēnō ante da pōnongä ænīnque tōmēnāni cōwē entawente quēwēnānīpa. Tōmēnāni edæ Wængonguī wēnāni inte ædō cæte godōmenque wēnæ wēnæ cæquīnānīi. ¹⁰ Æcānō, Quīnō waa impa, ante nō cædāmaī īnaa tömengä wīi Wængonguī wengä ingampa. Ayæ æcānō tömengä nānō tōnīñacā ingante nē waadete pōnēnāmaī īnaa tömengä adobaī wīi Wængonguī wengä ingampa. Wængonguī wēnāni ædānidō īnānīi, ante ayæ, Wēnæ wēnāni ædānidō īnānīi, ante mönō mānōmaī beyænque edonque pōnī ēñēmōmpa.

Wacā ingä wacā ingä mönō waadete pōnengæimpa, ante

¹¹ Mīnitō mā mīni pōnēñedē mīni ēñēngāinō īmaī ante impa. Wacā ingä wacā ingä mönō waadete pōnengæimpa. ¹² Mīnitō Cāinō wodi baī wīi īedāni. Māningä edæ wēnæ nānō pæingä baī ingaingä inte tömengä nānō tōnīñacā ingante nāēmæ wænongä wængacāimpa. Ayæ quīnante tömengä ingante wænongacāi. Edæ tömengä nāmā nānō cæinō wēnæ wēnæ cæinonque īñonte, Tömengä tōnīñacā nānō cæinō wæætē nō cæinonque ī, ante adīnque

mänömaï beyænque Cäinö wodi tömengä nänö tönïñacä ingante wæñongacäimpa.

¹³ Botö tönïñamïni eññeedäni. Ingui-pogaque quëwënäni mïnitö imïnite ancaa pïinäni adinque mïnitö wæætë, Quïnante pïinäni, ante wædämaï iedäni. ¹⁴ Mönö tönïñadäni inänite nê waadete pönëmö beyænque, Mönö nê wænguënëmö inte mönö wæætë mïi quëwëmö imompa, ante edonque eññemompa. Nê waadete pönënamäi ingä guiquënë tömengä iñömö mönö wænguënëmämö cöwë ëmö cædämaï ingampa töö. ¹⁵ Æcänö tömengä tönïñacä ingante pïina tömengä iñömö nê wæñongä bai ingampa töö. Ayæ, Nê wæñongä inongä inte tömengä nänö wantæpiyæ wænämaï quëwenguïmämö ante ædö cæte entawente quëwenguïngäa, ante do eññemïnipa. ¹⁶ Näwangä waadete pönëninque æbänö cæquiï, ante mönö iïmaï ante eññengæimpa. Edæ, Itota Codito nämä incæ mönö beyænque wængacäimpa, ante adinque mönö, Mänömaï waadete pönente cæquiï impa, ante eññemompa. Inique mönö adobai mönö tönïñadäni beyænque ante mönö nämä incæ Ao äninque wænguënëmö imompa. ¹⁷ Mäincoo nê ëacä iñömö tömengä tönïñacä nänö quëwenguïnö ante wïi eyepæ ëacä acä incæte tömengä ingante waadete cædämaï ingantawo. Edæ nê ëacä incæ ædö cæte Wængonguï nänö waadete pönëno entawengä ingantawogaa. ¹⁸ Wëñæmïni eññeedäni. Mönö, Waodäni inänite botö waadete pönëmö imopa, ante tedemö incæte wïi mäninö önöne mönö tededö beyæ mönö nöingä cæte waadete pönëmö imompa. Wæætë edæ waodäni beyæ godö cædinque mönö nöingä waadete pönengæimpa.

Wængonguï weca ongonte mönö guiññenämaï ingæimpa

¹⁹ Mänömaï cæmompa, ante adinque mönö, Wængonguï nöingä nänö angainö bai quëwëmö imompa, ante do eññemompa. Ayæ adobai, Tömengä weca mönö a ongöñedë nämä guiññenämaï incæmöimpa, ante eññemompa. ²⁰ Botö pante wæquinque wënæ wënæ cæbopa, ante mïmönë nämä apænte ämö incæte iïmaï ante adobai eññemompa. Wængonguï edæ wïi mönö

mïmönë eññenö bai inongä inte tömengä godömenque nê eññengä ingampa. Ayæ tömengä tömäa eññengä ingampa.

²¹ Botö nê waademïni eññeedäni. Botö pante wæquinque wënæ wënæ cæbopa, ante mïmönë nämä apænte änämaï imö inique mönö Wængonguï weca ongöninque guiññenämaï iïmaïmompä. ²² Ayæ tömengä, Iïmaï cædäni, ante nänö wææ angainö ante eññente cæmö inique ayæ, Cæmö adinque tömengä tocæcäimpa, ante cæmö inique tömengä ingante quïëmë beyæ ante ämö tömengä wæætë pönö cæcä æmaïmompä. ²³ Tömengä nänö wææ angainö iïmaï impa. Botö Wengä Itota Codito ëmowo ante pönëedäni. Ayæ tömengä mönö imonte, Botö wææ angainö bai wacä ingä wacä ingä waadete pönëedäni. ²⁴ Mänömainö ante Wængonguï nänö wææ angainö ante nê eññente cædäni iñömö tömënäni tömengä nempo quëwënönäni inänipa. Ayæ adobai tömënäni tömengä ingante entawënänipa. Wængonguï tömengä Önöwoca ingante pönongä ænimö inte mönö mäningä tömengä nänö pönongaiwoca beyæ, Wængonguï ingante entawëmö imompa, ante do eññemompa.

4

Æcänö önöwoca ingante ewocadäni, ante

¹ Botö nê waademïni eññeedäni. Wadäni, Wængonguï Önöwoca incæ mönitonga pö guïicä inique ewocamöni imönipa, ante nê änäni incæte mïnitö wïi tömënäni nani äno pönëedäni. Wæætë, Tömënäni önöwoca Wængonguï weca owodinque pöwocacantawo, ante eññencæte ante apænte aedäni. Edæ Wængonguï beyænque nê apænemönipa, ante nê babæ änewënönäni nanguï inäni imæca quëwënäni weca godänipa. ² Mïnitö edæ, Mäniwoca näwangä Wængonguï Önöwoca ingantawoo, ante eññencæte ante iïmaï ante edonque pönï eññencæmïnimpa. Edæ, Itota Codito Waocä eññate pongaingä ingacäimpa, ante änäni adinque mïnitö, Tömënäni tömänäni Wængonguï weca nê pöwocacä ingante nê ewocadäni inänipa, ante eññencæmïnimpa. ³ Wæætë Itota ingantedö ante adodö ante nê änämaï inäni guiquënë tömënäni

tömänäni edæ Wængonguï weca pöwocä ingante ewocadämaï inänipa. Tömänäni näni nē ewocadongä iñömö tömengä, Itota Codito Waocä eñate pongaingä ingacäimpa, ante änämaï ingampa. Mäningä iñömö Codito ingante nē piinte cædongä iñömö tömengä poncæcäimpa, ante mini nē eñëningä ingampa. Nöwoönæ incæ tömengä do inguipoga mönö quëwëñömö iñömö pongä ataquëedäni.

⁴ Wëñæmïni eñëedäni. Wadäni, Codito ingante nē piinte cædonäni iñönänite mïnitö Wængonguï quïmïni imïni inte godömenque tæï emömïni imïnipa. Edæ Wængonguï Önöwoca mïni nē ewocadongä iñömö tömengä godömenque nanguï tæï emongä iñongante wënæ inguipogaque quëwënäni näni nē ewocadongä guiquënë wædænque tæï emongä ingampa. Ìninqe mïnitö mäninäni nē babæ anewënönäni inänite Baa ante cædinque godömenque tæï emömïni inte gänä cædimïni imïnipa. ⁵ Mäninäni inguipoga beyænque quëwënäni inte mänömaï beyæ inguipoga quëwënäni näni pönente änö bai tededäni iñönänite inguipogaque ante quëwënäni adodäni inte tömönäni inänite eñëänäni töö. ⁶ Mönitö Wængonguï quïmöni imöni iñömönite, Wængonguï ingante nē ate pönengä iñömö tömengä mönitö imönite eñengampa. Wæætë Wængonguï wengä inämaï inongä guiquënë tömengä mönö imonte eñëänämaï ingampa. Mänömaï ì ininqe edæ waocä adocanque önöwoca nöingä angä ingante ewocadongä incæ wacä önöwoca babæ angä ingante ewocadongä incæ mönö mäninö beyænque, Æwocadö ïi, ante edonque pöni eñëmompä.

Wængonguï waadete pönengaingä inte

⁷ Botö nē waademïni eñëedäni. Mönö wacä ingä wacä ingä waadete pönengæimpa. Edæ mönö waadete pönönö incæ Wængonguï nänö da pönongainö impa. Tömänäni, Nē waadete pönänäni iñömö Wængonguï wëñænäni näni mempoga eñagaincabo inönäni inte Wængonguï ingaingä ingante ate bai pönänäni. ⁸ Wæætë nē waadete pönänämaï inäni guiquënë tömönäni Wængonguï ingante wïi ate bai pönänäni inänipa. Edæ Wængonguï nē waadete pönengaingä

ingampa. ⁹ Mönö imonte Wængonguï nänö waadete pönämö iïmaï cæte odömongacäimpa. Tömengä edæ, Botö Wengä beyænque quëwencæmïnimpa, ante cædinque tömengä Wengä adocanque ingante inguipoga mönö quëwëñömö da pönongä pongacäimpa. ¹⁰ Æbänö waadete pönenguïi, ante iïmaï impa. Mönö wïi Wængonguï ingante waadete pönänimö imompä. Wæætë tömengä mönö imonte waadete pönengä ingaingä ingampa. Ayæ, Mönö wënæ wënæ cægainö ante mönö imonte Wængonguï piinämaï incæcäimpa, ante idægoidi cæningä ingante wänönäni nänö wängai bai Wængonguï adobai mönö wënæ wënæ cægainö beyænque tömengä Wengä ingante da pönongä pöninqe mönö beyæ wæætë wængacäimpa.

¹¹ Botö nē waademïni eñëedäni. Wængonguï edæ mönö imonte mänömaï nē waadete pönengaingä ingampa, ante adinqe mönö adobai wacä ingä wacä ingä waadete pönenguënëmö imompä. ¹² Mönö waocabo tömämö Wængonguï ingante cöwë adämaï imompä. Incæte mönö wacä ingä wacä ingä waadete pönëmö ininqe Wængonguï ingante entawente quëwëmaïmompä. Ayæ adobai wacä ingä wacä ingä waadete pönëmö ininqe tömengä pönö cæcä beyænque mönö tömengä nänö waadete pönönö ante eyepæ entawente quëwëmompä. ¹³ Mönö tömengä nempo quëwëmö inte tömengä ingante adobai mönö entawente quëwëmompä. Wængonguï tömengä Önöwoca ingante mönö imonte pönongä ængamöimpa. Mänömaï beyæ mönö mäninö ante do eñëmompä. ¹⁴ Mæmpo Wængonguï tömengä Wengä ingante äninque, Inguipoga quëwënäni tömänäni inänite bitö æmi beyænque quëwenguïnäni, ante cæcæbiimpä, ante da pönongä pongantapa. Pongä adinqe mönitö nē adimöni inte wadäni inänite mäninö ante apænemöni eñencædänimpä. ¹⁵ Æcänö, Itota Codito Wængonguï Wengä ingaingä ingampa, ante äna iñömö tömengä Wængonguï ingante entawente quëwengampa. Tömengä adobai Wængonguï nempo quëwengä ingampa.

¹⁶ Ayæ mänüi beyæ Wængonguï mönö

imonte waadete pönengampa, ante mönö nē ēñenömö inte edæ ædæmō pönēmō imompa. Wængonguī iñömō nē waadete pönengaingä ingampa. Tömänäni nē waadete pönente quēwēnāni iñömō tömēnāni Wængonguī nempo quēwēnānīpa. Wængonguī ingante adobai tömēnāni entawente quēwēnānīpa. ¹⁷ Wængonguī nānō waadete pönēnō ante ædæmō entawēmō inique mönō godongāmæ waadete pönēmō beyæ tömengä apænte anguiönæ iñonte guñēnāmai inguimō imompa. Edæ Mæmpo Wængonguī nempo Itota nānō quēwengai bai mönō imæca quēwēnīque adobai quēwēmō inte māniñedē guñēnāmai inguimō imompa. ¹⁸ Nē waadete pönengä iñömō tömengä guñēnāmai ingampa. Wæætē edæ tömengä nānō waadete pönēnō æmæwo pæte bai eyepæ ba inique tömengä nē waadete pönengä inongä inte ædō cæte guñenguingää. Nē guñengä guiquēnē tömengä nānō pante wæwenguinō incæ do pante bai wæwengä ingampa. Tömengä nānō waadete pönēnō ante wii eyepæ ba inique tömengä æmæwo pædāmai bai ingampa.

¹⁹ Wængonguī edæ mönō imonte tāno waadete pönengacäimpa. Mänōmai beyæ mönō wæætē waadete pönēmō imompa. ²⁰ Botō Wængonguī ingante nē waadete pönēmō imopa, ante nē angä iñömō tömengä wæætē tömengä tōniñacä ingante nē piinte ingä inique tömengä babæ anewēnongä ingampa. Edæ māningä nānō tōniñacä ingante nē adingä incæ tömengä ingante waadete pönēnāmai ingä incæte adocä Wængonguī ingante nē adāmai iningä incæ ædō cæte tömengä ingante waadete pönenguingää. ²¹ Ayæ, Iīmai cæedāni, ante Itota Codito mönō imonte iīmai angacäimpa. Tömāmīni Wængonguī ingante nē waadete pönēmīni inte mīnitō tōniñadāni inānite adobai waadete pönenguēnēmīni imīnīpa.

5

Inguipogaque nāni quēwēnō ante mönō Baa angcäimpa

¹ Tömänāni Itota ingantedō ante, Mönō Codito ingaingä ingampa, ante nē pönēnāni inte Wængonguī wēnāni

nāni mempoga ēñagaincabo inānīpa. Ayæ tömānāni Mæmpocä ingante nē waadete pönēnāni iñömō tömēnāni adobai tömengä Wengä ingante waadete pönēnānīpa. ² Mönō Wængonguī wēnāni inānite waadete pönēmō imöö, ante ēñencæte ante iīmai ante do ēñēmompa. Wængonguī ingante waadete pönēmō inique ayæ tömengä, Iīmai cæedāni, ante nānō wææ angainō ante ēñente cæmō inique mönō, Nē waadete pönēmō imompa, ante ēñēmaimompa. ³ Wængonguī ingante mönō waadete pönēnō iñömō iīmai ante impa. Wængonguī, Iīmai cæedāni, ante nānō wææ angainō ante mönō ēñente cæcäimpa. Edæ māninō ante, Iīmai cæedāni, ante nānō wææ angainō ante ēñente cædinque mönō wii teēmē mongænte bai baquinque cæmompā. ⁴ Edæ Wængonguī wēmō mempoga mönō ēñagaincabo iñömō mönō tömāmō inguipogaque ante nāni quēwēnō ante Baa ānīque godōmenque tæi emonte gänä cæmompā. Inguipogaque ante nāni quēwēnō ante mönō godōmenque tæi emōmāmo iñömō iīmai ante impa. Wængonguī ingante mönō wede pönēnō beyænque mönō godōmenque tæi emōmō inte gänä cæmompā. ⁵ Inguipogaque ante nāni quēwēnō ante Baa ancæte ante æcānō godōmenque tæi emongä inte gänä cæcantawoo. Edæ Itota Wængonguī Wengä ingaingä ingampa, ante nē pönenganque tömengä godōmenque tæi emōnongä ingampa.

Wængonguī Wengä ingantedō ante nö ante impa

⁶ Nē æpænē guite pongaingä iñömō nāmā wepæ petæ petæ wæænte nē gogaingä iñömō māningä iñömō Itota Codito inongä ingacäimpa. Tömengä wii æpænenque inte pongacäi wæætē æpænē inte ayæ nāmā wepæ inte pongacäimpa. Ayæ Wængonguī Önōwoca incæ tömenganque māninō ante, Nö ante impa, ante nē apænecä ingacäimpa. Edæ Wængonguī Önōwoca nē nöingä inongä ingampa. ⁷ Edæ mēa go adoque ināni mānimpodāni, Nö impa, ante apænete bai nē ānāni inānīpa. ⁸ Edæ Wængonguī

Önōwoca incæ æpæ incæ wepæ incæ mēa go adoque mānimpodāni incæ, Nō impa, ante nē apænedāni mæ öñōmpa. Mānimpodāni iñōmō quiēmē āninqe adodō ante nē apænedāni inānīpa. ⁹ Quiēmē ante waocā incæ, Nō impa, ante nānō apænedinō ante do ēñēmōmpa. Quiēmē ante, Nō impa, ante Wængonguī nānō apænegainō guiquēnē godōmenque waa pōnī impa. Edæ Wængonguī tōmenganque nānō apænegainō impa. Edæ tōmengā Wengā ingantedō ante Wængonguī, Nō pōnī impa, ante nānō apænegainō impa tōö. ¹⁰ Æcānō Wængonguī Wengā onguīñængā ingante nē wede pōnēna iñōmō tōmengā, Nō impa, ante Wængonguī nānō apænegainō ante entawente quēwengampa. Wæætē edæ æcānō Wængonguī nānō apænegainō ante wīi pōnēna guiquēnē tōmengā Wængonguī ingantedō ante, Babæ ānongā ingānō, ante nē angā ingampa. Edæ Wængonguī tōmengā Wengā ingantedō ante, Nō impa, ante nānō apænegainō ante māningā iñōmō pōnēnāmaī ingampa tōö. ¹¹ Ayæ māninō ante tōmengā, Nō impa, ante nānō apænegainō ante iīmaī ante impa. Mōnō imonte Wængonguī, Mīni wantæpiyæ cōwē quēwenguīnō, ante pōnongā æntamōmpa. Māninō mōnō quēwenguīnō ante tōmengā Wengā nē quēwēnongā inte mōnō imonte pōnongā ænīmō inte entawente quēwēmōmpa. ¹² Tōmengā Wengā nempo nē quēwengā iñōmō tōmengā wantæpiyæ nānō quēwenguīnō do entawente quēwengampa. Wængonguī Wengā nempo nē quēwēnāmaī ingā guiquēnē tōmengā wæætē wantæpiyæ nānō quēwenguīnō ænāmaī ingampa.

Wäö iinque nānō angainō

¹³ Mīnitō Wængonguī Wengā emōwo ante nē pōnēmīni iñōmīnite botō māninō ante yewæmōmo aedāni. Mīnitō edæ wantæpiyæ cōwē mīni quēwenguīnō do entawente quēwēmīni iñōmīnite botō, Æñencæmīnīmpa, ante yewæmōmōpa.

¹⁴ Iīmaī beyænque Wængonguī weca guīñēnāmaī pōmō imōmpa. Mōnō quiēmē æncæte ante tōmengā ingante apænedinque tōmengā nānō ānō bai ante apænemō iinque tōmengā mōnō imonte ēñēmaingampa. ¹⁵ Ayæ, Mōnō imonte nē

ēñēnongā ingampa, ante ēñēmō iinque mōnō, Quiēmē ante apænemō ēñēnīnque tōmengā māninō mōnō āninō ante do pōnongā æmō imōmpa, ante ēñēmaīmōmpa.

¹⁶ Mīnitō mīni tōniñacā wēnæ wēnæ cæcā incæ wīi tōmengā nānō æmæwo wænguinque wēnæ wēnæ cæcā amīnitawo. Mānōmaī cæyongante nē adingā iñōmō māningā beyæ ante Wængonguī ingante apænecæcāimpā. Apænecā ēñēnīnque Wængonguī tōmengā ingante wantæpiyæ nānō quēwenguīnō pōnongā æncæcāimpā. Edæ pancadāniya wēnæ wēnæ nāni cædincoo mongænāni incæ wīi tōmēnāni nāni æmæwo wænguinque wēnæ wēnæ cædānīpa, ante botō māninānīnque inānītedō ante apænebōpa. Wæætē edæ waocā Wængonguī Tæiyæ Waēmō Önōwoca ingante anca Baa Baa āninqe tōmengā nānō æmæwo wænguinque nē wēnæ wēnæ cæcā ingampa. Iinque botō, Mānōmaī Baa āninqe nē wēnæ wēnæ cædingā beyæ ante Wængonguī ingante apænecæimpā, ante ānāmaī imōpa. ¹⁷ Quiēmē wīwa cæmō māninō tōmānō wēnæ wēnæ mōnō cædō impa. Wæætē wēnæ wēnæ cæmō incæte wīi tōmānō mōnō wēnæ wēnæ cædō beyæ mōnō nē wænguēnēmō bamōmpa. Panca beyænque nē wænguēnēmō bamōmpa.

¹⁸ Wængonguī wēnāni nāni mempoga ēñagāincabo iñōmō godōmenque wēnæ wēnæ cædāmaī inānīpa, ante ēñēmōmpa. Edæ Wængonguī Wengā ēñagāingā inte tōmēnāni inānīte wææ cædongā ingampa. Ayæ wēnæ incæ tōmēnāni inānīte gampodāmaī inongā ingampa. ¹⁹ Wængonguī wēmō imō imōmpa, ante ēñēmōmpa. Wæætē wadāni edæ inguipogaque ante nē quēwēnāni guiquēnē tōmēnāni tōmānāni wēnæ awēnē nempo quēwēnānīpa, ante ēñēmōmpa. ²⁰ Wængonguī Wengā do pongā ingacāimpā. Ayæ Wængonguī nē nōingā ingāingā ingante ate bai pōnencæmīnīmpa, ante cædinque tōmengā mōnō imō pōnō odōmongā ate ēñēmōmpa. Tōmengā mānōmaī cæcampa, ante adobai ēñēmōmpa. Ayæ tōmengā nē nōingā ingāingā iñongante mōnō tōmengā Wengā Itota Codito nempo quēwēmōmpa. Itota Codito nō Wængonguī ingāingā ingampa. Ayæ tōmengā wantæpiyæ cōwē nē quēwengā

ingaingä inte pönö cæcä beyænque mönö
adobai wantæpiyæ quëwëmö imompa.
²¹ Botö wëñæmîni bai imîni ëñëedâni.
Wadâni, Mönitö wængonguîdi impa, ante
nâni cönönincoo weca godâmai iedâni,
ämopa. Mäninque ante yewæmömopa.

2 Wäo cadota ante nänö ayænta yewæmongainta

*Nöinö mönö änö ante ayæ mönö waadete
pönönö ante*

¹ Minitö Wængonguï ingante mîni pönencabo iñöminite botö nê aabo Picæmo mîni änömo inte yewæmömopa. Minitö badä nâni wencabo bai iñöminite tömengä mînitö imînite apænte ængacäimpa. Botö mînitö imînite nō waadete pönëmopa. Wîi botonque waadete pönëmîni inte wæætê mönö Codito nöingä nänö waa pönî angainö ante nê eñëninâni adobai tömënâni tömânâni nâni nê waadete pönëmîni iñöminite yewæmömo aedâni. ² Edæ mönö nê Nöingä nänö waa pönî angainö ante entawente quëwëmö inte mönö cöwê ñimpo cædämaï entawencæmöimpa. ³ Nê Mæmpocä Wengä Itota Codito tönö Mæmpo Wængonguï tömëna godongämæ waadete pönö cædinque, Quëwencæminimpa, ante mönö imonte waadete waa cæda beyænque mönö gänê entawencæmöimpa. Inique mönö nê nō pönëmö inte mäninö ante cöwê entawente quëwënömö inte mönö wacä ingä wacä ingä waadete pönëmö incæmöimpa.

⁴ Mæmpo Wængonguï mönö imonte nänö, Ìimaï cæedâni, ante nänö wææ angainö bai eñente cædinque mîni pönencabo iñöminî botö, Pancadâniya nöinö cægonte bai quëwënâni, ante eñënimö inte nanguï tobopa. ⁵ Nöwo iñömo mînitö imînite ämo eñëedâni. Minitö Wængonguï ingante mîni pönencabo iñömo wacä ingä wacä ingä waadete pönëedâni ämopa. Botö ñöwo mänömaï äninque wîi tömëmo wææ änö ante yewæmömopa. Wæætê Awënë do wææ nänö angainö ante wëenëñedê mönö eñente ængainö ante adodö ante yewæmömo aedâni. ⁶ Nê pönënâni inânite mönö waadete pönönö iïmaï impa. Mönö Codito, Ìimaï cæedâni, ante nänö wææ angainö ante eñente cædinque mönö quëwengäimpa. Minitö wëenëñedê do

mîni eñëninö bai wææ äninque tömengä, Minitö cöwê waadete pönente quëwëedâni, angacäimpa.

*Waadâni oda cæcædänimpa, ante nê
cædâni*

⁷ Waodâni edæ oda cæcædänimpa, ante nê cædâni nanguï inâni imæca quëwënâni weca gote mæ ongönänimpa. Mäninâni iñömo Itota Codito Waocä eñate pongaingä ingampa, ante änämaï nê inâni inânipa. Æcänö tömënâni bai nê ingä, Waodâni edæ nâni oda cæquinque, ante nê cæcä ingampa. Ayæ, Botö Codito imopa, ante Codito ingante piinte cædongä ingampa. ⁸ Minitö iñömo nämä wææ aaedâni. Quiëmê cæcæte ante mîni cædinö ante mînitö, Wê womönämaï ingäimpa, ante cædinque wææ cæedâni. Wæætê mîni cædinö beyæ Wængonguï nänö pönonguincoo tömancoo eyepæ pönongä æncæte ante cæedâni.

⁹ Nê pönengä Itota Codito nänö odömonte apænëgainö ante nê eñëningä incæ wîi godömenque eñente cædinque wadö ante wadæ gocä iñömo tömengä ædö cæte Wængonguï tönö godongämæ quëwengüingä. Wæætê Itota Codito nänö odömonte apænëgainö ante godömenque nê eñente cædongä iñömo tömengä iñömo Mæmpocä tönö ayæ tömengä Wengä tönö godongämæ quëwengampa. ¹⁰ Wacä mînitö weca pöninque mäninö Codito odömonte apænëdinö ante odömonte apænëdämaï ingampa, ante adinque mînitö tömengä ingante, Botö oncönê pö guie, ante änämaï iedâni. Ayæ, Waa quëwente pömi, ante änämaï iedâni. ¹¹ Edæ adocä ingante æcänö, Waa quëwente pömi, ante äna tömengä mäningä wënæ wënæ cæyongante tömengä tönö guëa cæte bai cæcampa.

Wäo inque nänö angainö

¹² Botö mînitö imînite godömenque nanguï äinente wæbo incæte mincayonta inte wentamömæ yewæmöimæ inte wîi yewæmöinëmopa. Wæætê mînitö weca eñacæ pöinëmo imopa. Ayæ mînitö tönö awincadö awinca adinque botö apænëinëmo imopa. Mänömaï cædinque botö, Mönö godongämæ eyepæ pönî wat-apæ tocæmöimpa, ante cæbopa. ¹³ Mönitö

töniñamini eñeedäni. Wængongui in-
gante möni pönencabo tömengä nänö
në ængaimöni inte mönitö iñömö mini
pönencabo iñöminite, Waa quëwëedäni,
ämönipa, ante yewæmömopa.

3 Wäo cadota ante nänö tōmanta yewæmongainta

Gayo ingante Wäo nänö waa apænedö

¹ Gayo botö nē waadebi eñēmi. Bitö botö nē nō waadete pönēmi iñōmite botö nē aabo Picæmo mīni änōmo inte, Acæbiimpa, ante yewæmōmopa.

² Botö nē waadebi eñēmi. Tōmēmi önōwoca incæ waa ewocate quēwēmi bai bitö baonga adobai waa eñabi quēwencæbiimpa, äninque ayæ, Bitö quēwenguinö ante bitö cōwē waa pōni quēwencæbiimpa, ämopa.

³ Mönö tōniñadāni pancadāniya iñōmō pōninque, Gayo iñōmō Itota Codito nō pōni nänö angainö ante cōwē nō pōneninque cæcampa, ante apænedānitapa. Ayæ, Gayo ñōwo godōmenque nōinö cægonte bai quēwengā ingampa, ante apænedāni eñēninque nangui pōni totabopa. ⁴ Botö wēmīni bai imīni imīnitedö ante, Itota Codito nō pōni nänö angainö bai tōmēnāni nōinö cægonte bai quēwēnāni inānipa, ante apænedāni eñēninque botö godōmenque watapæ toquinque impa.

⁵ Botö nē waadebi eñēmi. Mönö tōniñadāni incæ bitö nē tæcæ adināni ināni incæte bitö quīnō tōmēnāni beyæ ante cædinque cōwē pōneninque ædæmō cæbi imipa. ⁶ Codito ingante godongāmæ mōni pōnencabo iñōmōnite mānināni wæætē, Gayo nē waadete pōnengā ingampa, ante mōnitö imōnite apænedāni eñentamōnipa. Tōmēnāni Wængonguī ingante nē cædāni inānipa cæbii. Bitö tōmēnāni inānite godö cæbi æninque gomonga godāni ininque waa imaimpa. ⁷ Edæ tōmēnāni iñōmō Itota emōwo beyænque tao godānitapa. Mānōmai goyōnānite nē eñēnāmai cædāni dicæ pōnōnāni ænānitawogaa. ⁸ Mānōmai beyæ mōnō Wængonguī nōingā nänö angainö ante tōmēnāni tōnō godongāmæ cæcæimpa, ante cædinque mānināni bai ināni mōnō oncö pōnāni adinque mōnō, Pō guite cænte mōedāni, anguēnēmō imoppa.

Diotedepeto tōnō Deēmetedio

⁹ Codito ingante mīni pōnencabo iñōmōnite botö mīnitö imīnite do yewæmontabopa. Incæte Diotedepeto iñōmō, Botö nē awēnē imopa, ante nē cæinēnongā inte mōnitö imōnite Baa äninque nänēnē cæcā ingampa.

¹⁰ Mīnitö weca botö pōninque tōmengā quīnō nänö cædö ante edonque pōni apænebo eñencæmīnimpa. Edæ tōmengā mōnitö imōnitedö ante önonquedö ante wēnæ wēnæ apænecampa. Ayæ māninö ante wīi eyepæ impa, ante pōnente ingā ininque tōmengā edæ mōnō tōniñadāni pōnāni adinque, Pō guite cænte mōedāni, änāmai ingampa tōö. Wadāni guiquēnē, Pō guite cænte mōedāni, ancæte ante nē cæinēnāni inānite tōmengā adobai, Cædāmai iedāni, ante wææ angā ingampa. Ayæ mānōmai cædāni adinque tōmengā, Mōnitö Codito ingante mōni godongāmæ pōnencabo iñōmōnite mīnitö gobæwedāni, angampa cæbii.

¹¹ Botö nē waadebi eñēmi. Quīnō wēnæ wēnæ i adinque bitö adodö cædāmai iē. Wæætē quīnō waa i adinque adodö cæe. Quīnō waa impa, ante nē cædāni iñōmō Wængonguī wēnāni inānipa. Quīnō wēnæ wēnæ impa, ante nē cædāni guiquēnē Wængonguī ingante adāmai inānipa.

¹² Deēmetedio ingantedö ante tōmānāni waa apænedānipa. Wængonguī nōingā nänö quēwēnō bai Deēmetedio adobai nōinö cæte quēwēnongā ingampa, ante acæimpa. Mōnitö adobai tōmengā ingante ante waa apænemōni imōnipa. Ayæ tōmengā ingantedö mōnō äninö nō impa, ante do eñēmipa.

Wäo inque nänö yewæmongainö

¹³ Mīnitö imīnite godōmenque nangui äinente wæbo incæ yewæmōingö inte wentamōmæ yewæmōimæ inte wīi yewæmōinēmopa. ¹⁴ Wæætē bitö weca wantæ iñö pōninque botö ainēmo imopa. Pōmo ate botö bitö tōnō awincadö awinca adinque apænecæmōnaimpa.

¹⁵ Bitö piyænē cæte quēwencæbiimpa, ämopa. Mönö æmigoidi iñōmō quēwēnāni bitö imite, Waa quēwencæbiimpa, ante apænedānimpa. Mönö æmigoidi bitö weca quēwēnāni tōmānāni inānite wæætē bitö adocanque ingante adocanque ingante apænedinque, Waa quēwencæbiimpa,

ante botö beyæ apænebi eñencædänimpa,
ämopa. Mäninque ante yewæmömopa.

Codaa cadota ante nänö yewæmongainta

*Waa quëwencæminimpa, ante Codaa
yewæmongampa*

¹ Botö Itota Codito ingante nê cædömo inte Tantiago tönĩñabo Codaabo inömo imopa. Mæmpo Wængonguĩ mĩnitö imĩnite waadete pönëninque aa pecä pömĩni ininque mĩnitö Itota Codito nempo nê ongömĩni iñöminite botö, Acæminimpa, ante yewæmömopa. ² Wængonguĩ waadete pönö piyænê cæcä ininque mĩnitö tömengä nänö gänê entawënö ædæmö entawëninque nangui waadete pönente waa cæte quëwencæminimpa, ante yewæmömopa.

*Babæ ante nê odömonte apænedäni
(2 Pegodo 2.1-7)*

³ Botö nê waadedöminĩ eñnedäni. Botö, Codito ængä beyænque mönö quëwëmämo æbänö i, ante quingæ yewæmoncæte ante cæyömote wadäni wënæ wënæ cædäni ate wædinque botö, Minitö wææ cæedäni, ante yewæmonguënëmo batabopa. Wængonguĩ quimö iñömonte tömengä iñömo, Wede mĩni pönënö ante pönömo æninque mĩnitö cöwë wææ aadäni, ante æmæwo pönĩ pædæ pönongä ænte entawëmopa. Ininque botö wæætë, Wede mĩni pönënö ante wææ cæcæminimpa, ante yewæmonguënëmo intabopa. ⁴ Wængonguĩ, Botö imote nê Baa änäni nãni pante wæquinque wentamö mongænänipa, ante tömënäni inänite apænte äninque piingampa, ante do yewæmongatimpa. Tömënäni iñömo mĩnitö weca do awëmö pönänipa cæminii. Wængonguĩ pönö waadete nänö cægainö ante tömënäni wapiticæ cædinque, Minitö baonque townenque mĩni cæinënö ante önonque cæcæminimpa, ante cædinque Wængonguĩ waadete pönö cæcampa, ante babæ ante odömonte apænedänipa. Ayæ Itota Codito adocanque mönö Tæiyæ Awënê iñongante tömënäni iñömo tömengä ingante Baa änänipa.

⁵ Minitö wæætë tömännö ante eñënimini iñöminite botö, Do mĩni eñëninö ante

wæætë wæætë adodö ante pönencæminimpa, ante cædinque adodö ante yewæmoncæ cæbo aedäni. Dodäni Equitobæ quëwëñönänite mönö Awënê ænte mäocä godäni ate tömengä nê wede pönënämaĩ inäni inänite edæ, Ömäe, ante capo wænogä wængadänimpa. ⁶ Ayæ anquedoidi nê awënëidi inönäni incæ pancadäniya tömënäni nãni aagainö incæ ñimpo cædinque tömënäni nãni quëwengaiñömö ëmö cædinque wadæ gogadänimpa. Adinque Wængonguĩ, Botö apænte anguionæ inque bayonte tömënäni inänite botö pancæboimpa, ante ñowo iñömo gæguincamenca wodämaĩ inguimenca tæi goti wininque tömënäni inänite wëmö iñömo mangui tee mönete wææ cæcampa. ⁷ Ayæ Todömä iñömo quëwengainäni tönö Gömoda iñömo quëwengainäni eyequei godongämæ nãni quëwengaincabo nãni quëwengaincabo tönö adobaĩ wënæ wënæ cædinque nänöogængä inämaĩ iñongante godö möninque ayæ godömenque quingämë bai wiwa tote quëwengadänimpa. Mänömaĩ cæte quëwënäni ate Wængonguĩ angä gonga wææ ti wocæno gonte æmæwo wængadänimpa. Mänömaĩ godö pangä nãni wængai bai ante odömöninque Wængonguĩ, Nê wënæ wënæ cædäni adobaĩ gonga cöwë yædæ yædæ bæcöyömö caate wæquinänidö anguënê, ante mönö imonte odömoncæte ante cægacäimpa.

⁸ Ayæ wiimonte bai mä pönente nê odömonte apænedäni iñömo ñowo mĩnitö weca pöninque dodäni nãni cægai bai adobaĩ pönĩ cædänipa. Wiwa cædinque tömënäni wentamö mongænte bai edæ baö ñömængui eñadänipa. Awënëidi inänite edæ Baa änänipa. Ayæ anquedoidi öönæde ñäö iñömo quëwënäni inänite edæ babæ äninque wënæ wënæ ante tedewënänipa. ⁹ Incæte anquedo awënê Miiguedo incæ tömënäni piinte nãni tedewënö bai adobaĩ tededämaĩ ingacäimpa. Möitee wodi baö inĩ adinque anquedo Miiguedo tönö wënæ awënê iñömo edæ, Æbänö cæquii, ante guëadö guëa angadäimpa. Äñönote Miiguedo iñömo, Botö nê apænte anguënëmo imopa diyæ anguimoo, ante pönëninque guiñente wædinque wënæ awënê ingante, Wënæ

wënæ cæbipa tōō, ante piinte änāmaī ingacäimpa. Wæætē, “Wængonguī incæ bitō imite Baa angä eñencæbiimpa,” angacäimpa. ¹⁰ Nōwodāni iñōmō tōmēnāni adāmaī inte nāni eñēnāmaī inōnō ante edæ piinique do wīwa tedewēnānipa. Wæætē babæidi nāni eñēnonque ante eñēninque tōmēnāni mānīnonque ante nāni cædō beyæ wænte nāni ñōmænguinque godōmenque quingāmē bai cædānipa.

¹¹ Tōmēnāni edæ nāni Ca ca wæquinque baquīnō anguēnē. Cainō wodi nānō gogainō incæ edæ do godānipa. Ayæ Badāō wodi, Nanguī æncæboimpa, ante cædinque tōmengä nānō oda cægainō incæ tōmēnāni iñōmō adodō ante pogodo godinque, Godōmenque nanguī æncæboimpa, ante oda cædānipa. Ayæ Codee wodi, Awēnēidi inānite wido cæcæimpa, ante nānō cægainō bai cædinque ñōwodāni nāni wænguinque adobai cædānipa.

¹² Mīnitō waadete pōnēninque godongāmæ ponte cæñōmīni iñāni iñōmō guiñēnāmaī inte adoyōmō ponte cænānipa. Mīnitō tōnō godongāmæ ongōnāni beyænque mīni cabo wentamō baate bai emōmīni awædō. Tōmēnāni, Nē aawēmōni imōnipa, ante babæ apænedinque nē cænīnāni bai ināni inānite pædæ godōnāmaī ināni inte tōmēnānique ade cænte bai cædinque wīi nōinō ante odōmonte apænedānipa tōō. Ayæ waodāni, Cōönæ cæ tobaimpa, ante wæyōnānite boguīmancoo cōönæye emōñonte woboyæ pō wido cæ bai cædinque tōmēnāni nāni, Pōnōmōni æncæmīnimpa, änīnō ante pōnōnāmaī inte edæ babæ cædānipa. Ayæ awæ incayedē omæcawæ i adinque do bæ wite mempoga wæniwæ bai ināni inte tōmēnāni mempoga wænte bai ināni inte, Pōnōmōni cæncæmīnimpa, ante nē babæ anewēnāni inānipa. ¹³ Ayæ gāwapæno tadōmengadæ ompota oñōñō mængonta mængonta cædinque ompota yabæ tayōnōi edonque oñō ai bai tōmēnāni wīwa cæyōnāni wentamō nāni entawēnō adobai edonque pōni ongō acæimpa. Ayæ nēmō adodonque goquēnē incæ oo tobæ wæente wēmō ba bai tōmēnāni adobai oda cæte wapiticæ godāni inte edæ tōmēnāni nāni cōwē tadāmaī wæwenguinque mæ māmōnte

bai iñōmō edæ godāni inānipa.

¹⁴ Ayæ Adāō wodi nānō mōmōidi wææ nānō mōmōidi wææ nānō mōmocā ingaingä inte Ënoco iñōmō tōmengä Wængonguī beyæ apænedinque dodāni babæ ante nē odōmonte apænedāni inānitedō ante iīmāinō ante apænegacäimpa. “Mōnō Awēnē pongä apa quēwēnāni. Ayæ tōmengä quīnāni tæiyæ waēmō ināni adobai mīido ganca mānimpodāni pōñōnānite adopo adopo edæ pō pō cædinque onompo tipæmpoga mānimpoga pōnāni inte bacoo ināni mōnō Awēnē tōnō godongāmæ poncædānimpa. ¹⁵ Tōmengä mānōmaī pōninque edæ tōmāmō imonte apænte ancæcäimpa. Wængonguī ingante nē Baa änāni inānite tōmengä, Mīnitō mīni wæwente baquinque botō imote Baa änīnque edæ eñēnāmaī cæmīnipa tōō, ancæcäimpa. Ayæ, Mīni nē Baa ānoncabo inōmīni inte mīnitō mīni wæwente baquinque edæ botō imote piinte änīnque wīwa āmīnipa. Amo eñēmaīmīnipa, ante edonque apænecæte ante mōnō Awēnē poncæcäimpa.” Mānōmāinō ante Ënoco wodi wēnēñedē pōni angacäimpa. ¹⁶ Nōwodāni æbāmē cædāni incæ nē babæ ante odōmonte apænedāni iñōmō, Quīmæ quēwēē, ante piinique piyænē cædāmaī inānipa. Taadō ante tōmēnāni nāmā nāni cæinēwēnonque ante tee empote godānipa. Botō godōmenque waa pōni cæbo aedāni, ante nāmā ængō cædinque tedewēnānipa. Ayæ, Wadāni mōnitō wædō ante pōnō cæcædānimpa, ante babæ cædinque tōmēnāni wadāni inānite waa ate bai tededinque waa pōni cæte bai godō apænedānipa cæmīni.

Nē pōnēmīni iñōmō iīmāi cæcæmīnimpa, ante

¹⁷ Mīnitō guiquēnē botō nē waademīni eñēedāni. Mōnō Awēnē Itota Codito nānō nē da godongaināni incæ, Æbānō baquīi, ante nāni apænegainō ante iīmāinō ante pōnēedāni. ¹⁸ Tōmēnāni iñōmō mīnitō imīnite apænedinque, “Wodo iīmæca iinque bayonte edæ wadāni nāmā nāni toinēwente godōnō ante goquīnāni incæ Wængonguī ingante Baa ante badete toquīnāni inōnāni inte edæ do poncædānimpa,” ante apænedāni eñēmīnitapa. ¹⁹ Iñāni nē badete

todāni iñōmō Wængonguī Ōnōwoca ingante ēwocadāmaī ināni inte edæ nāmā nāni cæinēnō ante eñente cædānīpa. Mīnitō adocabomīni iñōmīnite tōmēnāni, Nānēneto nānēnē gocæmīnimpa, ante cædinque pā cæte baī cædāni inānīpa.

²⁰ Botō nē waadedōmīni edæ iīmaī cæedāni. Mīnitō mōnō Tæiyæ Waēmō pōnī inongā ingante wede pōnēmīni inte mānīnō mīni wede pōnēnō incæ dica tæī gō cæte ongonca baī impa. Ante adinque mīnitō oncō dicaboga mænonte baī edæ tæī piñæninque godōmenque cæedāni. Ayæ Wængonguī Tæiyæ Waēmō Ōnōwoca ingante ēwocadinque mīnitō, Tōmengā æbānō angāā, ante eñēninque mānīnonque ante Wængonguī ingante apæneedāni. ²¹ Mīnitō, Mōnō Awēnē Itota Codito pōnō waadete waa cæcā beyænque mōnō wænāmaī inte cōwē wantæpiyæ quēwengæimpa, ante æncæte ante wānō cōmīnitawo. Iinque Wængonguī nē waadete pōnengā nempo cōwē waadete pōnēninque ongōedāni.

²² Pancadāniya guiquēnē, Wabānō quēwenguīmoo, ante guīñente wæyōnānite mīnitō tōmēnāni inānite piinte adāmaī inte godō waadete waa cæedāni. ²³ Pancadāniya guiquēnē gonga bæcoyōmō oo goquīnāni īmaī impa, ante adinque mīnitō wæætē, Quēwencædānimpa, ante odōmonte apænedinque tōmēnāni inānite ō æmīni beyænque quēwencædānimpa. Wadāni guiquēnē wīwa cædāni inte nāmā baō wentamō mongænte baī eñayōnānite mīnitō, Nāate wæcæ wæ, ante guīñente wædinque tōmēnāni weocoo nāni nāadincoo incæ gampodāmaī inte tōmēnāni beyæ wæætē waadete godō waa cæedāni.

Wængonguī waēmō pōnī emōnongā ingampa, ante

²⁴ Mīnitō tæ go wæænte baī oda cædāmaī incæmīnimpa, ante Wængonguinque eyepæ pōnī inongā inte tōō æmængā ate mīnitō adiyæ ongonce baī wede pōnencæmīnimpa. Ayæ tōmengā adocanque eyepæ pōnī cædongā inte pōnō badongā ate mīnitō waīmīni bamīni iinque mīnitō nanguī pōnī mīni watapæ toquinque tōmengā nānō ñāō emōñōmō ænte mæicā æicæmīnimpa.

²⁵ Wængonguī adocanque pōnī inongā inte

mōnō imonte, Quēwencæmīnimpa, ante nē Ængaingā ingampa. Iinque Itota Codito mōnō Awēnē nānō cægainō beyænque eyepæ bate quēwēmō iñōmō mōnō iīmaīnō ante apænecæimpa. Wængonguī eñēmi. Bitō badongaincoo dæ añonte wēēnē imāmoque iñonte ñōwopāmo iñonte wapāmo mīimāmo iinque bayonte bitō adobique cōwē ñāō entawente tæī emōninque Awēnē nē tæī piñæmi inōmi inte tōmāo iñōmō quēwēnāni inānite nē Ānōmi imidō anguēnē, ante mōnō apænecæimpa. Mānōmaī baquīnō anguēnē, ante botō, Amēē, āmopa.

Wäo ingante Itota Codito Nänö Odömongainö

Wäo wüimonte bai nänö adi, ante yewæmongainö

¹ Wëenëñedë quïnö wë wodonte bai ingatimpa, ante Itota Codito nänö odömongainö ante yewæmonte impa. Wængonguï iñömö, Wantæ iñonte quïnö bai baquïi, ante, Itota tömengä ingante në cædäni inänite odömoncæcäimpa, ante cædinque Itota Codito ingante edonque odömongä agacäimpa. Ayæ Itota Codito wæætë tömengä anquedo ingante, Bitö Wäo botö në cæcä weca godinque odömömi acæcäimpa, ante da pönongä ponte odömongä atabopa. ² Botö Wäömo guiquënë, Quïnö botö adinö tömänö incæ nö impa, ante yewæmömopa. Mäninö Wængonguï nänö angainö ante Itota Codito incæ botö imote edonque odömongä adimo inte botö adobai wüimonte bai tömänö botö adinö ante, Nö impa, ante yewæmömopa.

³ Wængonguï beyæ botö apænedö ante iï yewæmöintaa yewæmömopa. Mänintaa adinque në apænedäni nani toquinque. Ayæ mäninta botö yewæmöninö ante ëñente cædäni nani toquinque. Edæ iïmai baquïönæ wantæ iñö oo baquïnö anguënë.

Godongämæ nani pönencabo tiæte ganca inäni beyæ Wäo yewæmongampa

⁴ Botö Wäömo inömo imopa. Atiabæ iñömö wayömö wayömö incæ Codito ingante godongämæ mini pönencabo önompo æmæmpoque go mencabomïniya acæminimpa, ante botö yewæmömopa.

Mönö Mæmpo Wængonguï wëenëñedë në quëwengaingä inte ñöwo quëwengä incæ ayæ wantæpiyæ quëwencæcäimpa. Tömengä Önöwoca incæ önompo æmæmpoque go mëwoga önöwocaidi bai ëwocadongä inte Wængonguï nänö aacæ tæ con-tayömö tæcætawë inö në ongongampa. Ininque Mæmpocä tönö tömengä Önöwoca waadete pönö cæda ate mïnitö gänë entawencæminimpa.

⁵ Ayæ adobai Itota Codito edæ Wængonguï ingantedö ante cöwë ædæmö pönö apænedongä inte wængä ate täno ñäni ömæmongaingä ingampa. Tömengä tömämæ awënë odeyeidi nani Tæiyæ Awënë Odeye inongä ingampa. Tömengä adobai mönö imonte në waadete pönëningä inte mönö wënæ wënæ cægainö ad-inque tömengä wepæ inte mënongacäimpa. Tömengä adobai waadete pönö cæcä ate mïnitö gänë entawencæminimpa, ämopa. ⁶ Ayæ Itota, Botö Awënë Odeyebo nempo quëwëninque mïnitö botö tönö godongämæ aamini bacæminimpa, ante pönö badongacäimpa. Ayæ, Botö Mæmpo Wængonguï ingante cæcæminimpa, ante Itota pönö cæcä ate mönö Wængonguï quï, ante në godömö bagaimö imopa. Tömengä ñäö bai ëmöñongante mönö waocabo tömenganque ingante waa acæimpa. Tömenganque cöwë në tæi piñænongä inte quingämenque quëwënanäni iñönänite tömengä tömänäni Awënë inongä ingampa, ante mönö cöwë angæimpa, ante Amëë, ante ämopa.

⁷ Eñnedäni, tömengä edæ boguïmancodë wææñongante, tömänäni tömengä ingante acædänimpa. Tömengä ingä në timpogainäni incæ adobai tömengä ingante acædänimpa. Ayæ tömämæ quëwënanäni tömänäni tömengä ingante adinque Ca ca wæcædänimpa. Mänömai baquïnö anguënë, ante botö, Amëë, ämopa.

⁸ Wængonguï Awënë adocanque Tömää në Cægaingä inte iïmai angampa. “Botö Tånobo ingaimo inte Tömämo inguïmo imopa.” Mänömainö ante në angä iñömö tömengä wëenëñedë do quëwengaingä inte ñöwo quëwengä incæ ayæ wantæpiyæ quëwencæcäimpa.

Itota Codito në ñäö bai ëmongaingä ingante Wäo nänö adö

⁹ Botö Wäömo inömo imopa. Mïnitö tönöñäbo inte botö mïnitö tönö Awënë Odeye Itota nempo quëwëninque mönö tömengä tönö godongämæ aamö inömo imopa. Botö mïnitö tönö godongämæ wæwëmö imö incæte mönö wæntæye inämai inte ee cæmopa. Wængonguï nänö

angainö ante apænedinque ayæ, Itota mönö Codito inongä ingampa, ante, Nö impa, ante botö apænedö beyænque botö wää tēiwænē Patömoto iñömö tee mönete bai quēwentabopa.

¹⁰ Wængongui Awënë itädē iñonte Wængongui Tæiyæ Waëmö Önöwoca incæ botö imote bæi ongonte bai cæyongä botö önöñabæ inö adocanque tedepämo todompeta nani ancadeca we öonte bai yedæ tē eñentabopa. ¹¹ Iimaï angantapa. “Bitö quinä wüimonte bai abii, ante yewæmöntaa yewæmöe. Yewæmöninque wayömö wayömö incæ Codito ingante godongämæ nani pönencabo önompo æmæmpoque go mencabodäniya iñönänite tömënäni inänite da godöe,” ante angantapa. “Epeto quēwēñömö quēwēnāni Ätämidöna quēwēñömö quēwēnāni Pedegämo quēwēñömö quēwēnāni Tiatida quēwēñömö quēwēnāni Tadoditi quēwēñömö quēwēnāni Pidadedepia quēwēñömö quēwēnāni ayæ Daoditea quēwēñömö quēwēnāni Codito ingante godongämæ nani pönencabo nani cabo nani cabo iñönänite bitö tömënäni inänite i bitö yewæmöninta da godömi æncädänimpa.”

¹² Äñongante botö, Äcänö äna eñëmoo, ante dadi emænte atabopa. Dadi emæñömote yædo concædi ti wodönoincade oodo inte badöincade önompo æmæmpoque go mä ganca ongoncade atabopa. ¹³ Ayæ yædo concædi ti wodönoincade ongöñömö adoyömö tæcæguedē adocanque nē Waocä eñagaingä bai inte ongongä atabopa. Tömengä doyæncoo önöwa ganca incoo mongæninque ayæ tæcæenëmæ inö pacadeyænta oodo inte badöi eënëmængä ingantapa. ¹⁴ Tömengä ocabo tönö ocagui iñömö dayö näämænta pöni emö bai adobai encadinque yoguimö ñäö pöni emö bai adobai ñäö bai encacä ingantapa. Ayæ tömengä awinca incæ gonga wo bæcote bai emongä ingantapa. ¹⁵ Tömengä önöwa incæ yaëmenta bodonte nani änö gongapamö guii ocoi äñonte ñäö emö bai tömengä adobai ewacä ingantapa. Tömengä tedeyongä æpæ mä conta goyonte æpæ tē bai adobai tē eñentabopa. ¹⁶ Tömengä önönempo tömempo incæ nömöidi æmæmpoque go mä

ganca næængantapa. Ayæ tömengä önöne inö yaëmē tipængaa waingamē engamē enedinque yædæ tadete ongongantapa. Ayæ tömengä awinca incæ nænque nanguï tamonte bai ñäö bai emongantapa.

¹⁷ Tömengä ingä adinque botö tömengä önöwa inö wænte bai tæ gowææntabopa. Tæ gowææñömö tömengä önompo tömempo inte botö imote gampodinque “Bitö guinänämaï incæbiimpa,” ante äninque edæ, “Tömää badönämaï iñedē botö Do Quēwengäimo imopa. Ayæ tömää iinque bayedē incæ botö Ayæ Pöni nē Quēwëmo incæboimpa,” ante angantapa. ¹⁸ Edæ “Botö nē Quēwengäimo inömo inte nē wænimo incæ ñäni ömæmonte cöwē wantæpiyæ quēwëmo inömo imopa. Waodäni nē wænte godināni nani wænte ongöñömö ongöñönänite botö, Cöwē wænämaï quēwencæminimpa, ante botö tæi piñæmämo inte nē æmo imopa.

¹⁹ “Mänömaï beyæ bitö wüimonte bai bitö adinö ante quinä ñöwo i, ante quinä iincayæ ate baquii, ante yewæmöe ämopa. ²⁰ Mänii nömöidi önompo æmæmpoque go mä ganca botö önönempo tömempo incæ mä öñoncoo bitö adincoo ante, Äbänö i, ante bitö eñänämaï inönö ante botö edonque pöni apænebo eñencæbiimpa. Botö imote godongämæ nani pönencabo önompo æmæmpoque go mencabodäniya iñönänite tömënäni inänite nē aadäni bai nömöidi inänipa. Ayæ yædo concædi ti wodönoincade oodo inte badöincade önompo æmæmpoque go mä ganca ongoncadecoo bitö adincoo ante, Quinä bai inänii, ante botö adobai bitö imite edonque pöni apænebo ate nē eñëmi bacæbiimpa. Wayömö wayömö incæ botö imote godongämæ nani pönencabo önompo æmæmpoque go mencabodäniya iñömö tömënäni yædo concædi ti wodönoincade bai adobai inänipa,” ante Waocä nē eñagaingä iñömö botö imote apænegacäimpa.

2

Godongämæ nani pönencabo tiæte ganca inäni inänite Itota nänö änö

Epeto iñömö quēwēnāni inänite Itota nänö änö

¹ Ayæ adocä godömenque apænecantapa.

“Epeto iñömö Wængongui ingante godongämæ nani pönencabo inänite nē aacā acæcäimpa, ante botö änö ante iimaï yewæmöe ämopa. ‘Botö edæ nēmōidi önompo æmæmpoque go mēa ganca botö önönempo tömempo nē nææmo imo inte botö adobaï yædo concædi ti wodönoincade oodo inte badöincade önompo æmæmpoque go mencadea incade ongöñömö adoyömö tæcæguedē nē cægömo imopa.

² “ ‘Minitö æbänö cæminii, ante do eñëmopa. Edæ nangui pōni cædinque mīnitö wæntæye inämaï inte ee cæminipa. Minitö wiwa cædāni inänite Baa ante quëwëminipa, ante do eñëmopa. Ayæ Wængongui nänö nē da godongaimöni imönipa, ante nē änāni incæte inämaï iñönänite mīnitö, Nawangā inänii, ante eñencæte ante apænte adinque, Tömēnāni babæ änānipa, ante eñente wæmīnitapa. ³ Minitö wæntæye inämaï inte ee cæmini iminipa. Ayæ botö emöwo apænete beyænque wæwëmini incæte godömenque godömenque cædinque mīnitö mīmönē nangæ badāmaï iminipa, ante do eñëmopa.

⁴ “ ‘Incæte adoque pōni mīni cædinö wii waa abopa. Minitö edæ wii wëenëñedē baï ædæmö waadete pönëmini iminipa, ante awædö. ⁵ Edæ mīnitö waa cædimini imini incæte ñöwo wæætē wënæ wënæ cæmini bamini awædö. Mäninö ante pönëedāni. Mänii mīni wënæ wënæ cædinö ante, Ancaa wæwente awædö, ante pönente ñimpo cædinque mīnitö wëenëñedē mīni waa cægai baï adobaï cæte quëwëedāni ämopa. Amo eñëninque mīnitö mīni wënæ wënæ cædinö ante wædāmaï imini adinque botö mīnitö weca pōmaïmopa. Pöninque mīni yædo concædi ti wodönoincade nänö ongöñömö ongöñonte botö ö ænguimodö angüenē. ⁶ Incæte adoque mīni cædinö guiquenē waa abopa. Minitö edæ Nincodaitaidi nāni änāni nāni cædö ante adinque piinte iminipa. Botö adobaï tömēnāni nāni cædö ante adinque piinte imopa.

⁷ “ ‘Wayömö wayömö incæ botö imote godongämæ nani pönencabo inänite Wængongui Önöwoca quinö

angää, ante tömengä nänö änö ante nē eamonca imini inte eñëedāni. Wængongui waa gönea iñömö mäniñömö adowænque quëwenguiwæ pædiwæ iwæmpa. Tæi emonte nē gänä cædāni inänite botö iñömö, Mäniwæ inca cæncæminipa, ante pædæ godoncæboimpa,’ ante mäninque ämopa,” ante Waocā nē eñagaingä iñömö botö imote apænegacäimpa.

Ætämidoña iñömö quëwënanī inänite Itota nänö änö

⁸ Ayæ adocā godömenque apænecantapa.

“Ætämidoña iñömö Wængongui ingante godongämæ nani pönencabo inänite nē aacā acæcäimpa, ante botö änö ante iimaï yewæmöe ämopa. ‘Tömää badönāmaï iñedē botö Do Quëwengaimo imopa. Ayæ tömää iinque bayedē incæ botö Ayæ Pōni nē Quëwëmo incæboimpa. Botö nē wænimo incæ ñöwo wæætē ñāni ömæmongaimo imopa.

⁹ “ ‘Minitö wæwëmini inte adobaï ömæpomini iminipa, ante botö do eñëmopa. Incæte mīnitö nö eamini iminipa. Oodeoidi pancadāniya, Mönitö Wængongui ingante möni pönencabo imönipa, ante nē änāni incæte wii mänömaï inānipa. Tömēnāni mīnitö iminite ancaa piinte babæ anewënanī inānipa, ante botö do eñëmopa. Mänināni iñömö Tatāna ingante nāni eñencabo inte mänömaï cædānipa töö. ¹⁰ Minitö quinö beyæ wæwencæ cæmini imini incæte guinëñämaï iedāni. Tatāna incæ, Æbänö cæminii, ante acæte ante cæcā beyænque waodāni pancaminiya iminite tee mönecædānipa. Önompo tipæmpoga eönæ iñonte wæwenguimini iminipa. Iinque mīnitö mīni wænguinque wæmini incæ cöwë pönëninque ædæmö cædāni. Mänömaï nē cæmini iinque botö, Mīni cöwë quëwenguinta, ante poganta baï mīnitö iminite pönömo æmaïminipa.

¹¹ “ ‘Wayömö wayömö incæ botö imote godongämæ nani pönencabo inänite Wængongui Önöwoca quinö angää, ante tömengä nänö änö ante nē eamonca imini inte eñëedāni. Wadāni adopoque wæninqe nāni mempoga wænguimāmo baï tæi emonte nē gänä cædāni

iñömö wæætē mempoga wænāmaī incædānimpā,’ ante māninquē āmopa,” ante Waocā nē ēñagaingā iñömö botö imote apænegacāimpa.

Pedegāmo iñömö quēwēnāni inānite Itota nänö ānō

¹² Ayæ adocā godömenque apænecantapa. “Pedegāmo iñömö Wængonguī ingante godongāmæ nāni pönencabo inānite nē aacā acæcāimpa, ante botö ānō ante iīmaī yewæmōe āmopa. ‘Botö edæ yaēmē tipængaa waingamē engamē nææmo imopa.

¹³ “ ‘Ædönö quēwēmīni, ante botö do ēñēmopa. Tatāna containpa ongonte nänö aayömö adoyömö mīnitö quēwēmīni imīni incæte botö imo edæ ñimpo cædāmaī quēwēmīni imīnipa. Mīni quēwēñömö Tatāna adoyömö quēwengā ininque, Antipato edæ botö ānō ante cōwē pönēninque ædæmō apænedongā iñongante māniñömö quēwēnāni tōmengā ingante wænōnāni wængantapa. Tōmengā wæñedē incæ mīnitö botö imote edæ, Dicæ pönemogaa, ānāmaī imīnipa.

¹⁴ “ ‘Incæte pancaa mīni cædinö wīi waa abopa. Edæ pancamīniya docā Badāo nänö odömonte apænegainö ante ēñewēmīni awædö. Tōmengā iñömö, Badaco godö cæcā beyænque idægoidi tee tēwate bai oda cæcædānimpā, ante cædinque adocā Badaco ingante odömonte apænecā ēñente cægacāimpa. Wadāni, Mōnitö wængonguī cænguī impā, ante nāni cōnōni ante, Mīnitö cæedāni, ante Badaco iñömö idægoidi inānite odömonte apænegacāimpa. Ayæ onquiyænāni tönö godö towente cæedāni, ante odömonte apænegacāimpa. ¹⁵ Ayæ pancamīniya adobai Nincodaitaidi nāni odömonte apænedö ante ēñewēmīni awædö. ¹⁶ Mānōmaī beyæ mīni wænæ wænæ cædinö ante, Ancaa wæwente awædö, ante pönente ñimpo cæedāni. Mīnitö mīni wænæ wænæ cædinö ante wædāmaī imīni adinque botö wantæ iñonte mīnitö weca pōmaimopa. Pōninque tōmēnāni nāni odömonte apænedö ante nē ēñewēnāni iñōnānite botö önöne incæ yaēmē ēnedinque yædæ tadedinque guēadö guēa cæcæboimpa.

¹⁷ “ ‘Wayömö wayömö incæ botö imote godongāmæ nāni pönencabo inānite Wængonguī Önōwoca quīnō angāā, ante tōmengā nänö ānō ante nē ēamonca imīni inte ēñeedāni. Tæi ēmonte nē gānā cædāni inānite cænguī mānāā nāni angainö botö wē wodōni cænguī iñonte godömo ænte cæncædānimpā. Adodāni inānite adobai dica nāāmæntaca godömo æncædānimpā. Wa ēmōwo ante pemōninque mānincaa yewæmonte ingæimpa. Nē ænāninque māniwo ēñēnāni inānipa,’ ante māninquē āmopa,” ante Waocā nē ēñagaingā iñömö botö imote apænegacāimpa.

Tiatida iñömö quēwēnāni inānite Itota nänö ānō

¹⁸ Ayæ adocā godömenque apænecantapa.

“Tiatida iñömö Wængonguī ingante godongāmæ nāni pönencabo inānite nē aacā acæcāimpa, ante botö ānō ante iīmaī yewæmōe āmopa. ‘Botö edæ Wængonguī Wēmo inōmo imopa. Botö awinca incæ gonga wo bæcote bai nē ēmōmo imopa. Botö önōwa incæ yaēmenta bodonte nāni ānō bai ñāo bai nē ēwabo imopa.

¹⁹ “ ‘Mīnitö æbānō cæmīni, ante mīni waadete pönēnō ante mīni wede pönēnō ante wadāni inānite mīni waa cædö ante botö do ēñēmopa. Mīnitö wæntæye ināmaī inte ee cædinque godongāmæ cæmīni imīnipa, ante ayæ, Wēēñēñedē do waa cædimīni inte ñōwo godömenque waa cæmīni imīnipa, ante adobai do ēñēmopa. ²⁰ Incæte adoque pōni mīni cædinö wīi waa abopa. Onquiyængā Etabete nē ēmongā iñömö edæ, Wængonguī beyæ nē apænebo, ante nāmā incæ nē angā ingante wido cædāmaī imīni inte wæætē tōmengā ingante ayæ godömenque Ao āmīnipa tōö. Iñæmpa tōmengā iñömö botö imote nē cædāni inānite nänö odömonte apænedö beyænque oda cæte gocædānimpā, ante cæcā beyæ tōmēnāni onquiyænāni tönö godö towente cædānipa. Wadāni, Mōnitö wængonguī cænguī impā, ante nāni cōnōni cænānipa tōö. Mānōmaī cæcædānimpā, ante māningā onquiyængā odömonte apænecāimpa.

21 “Tömengä nänö towente cædimämo ante, Botö wënæ wënæ cæbo inte ancaa wæwente awædö, ante pönente wabänö ñimpo cæquingää, ante botö tömengä ingante ee pänämaï intabopa. Incæte tömengä nänö wënæ wënæ cædö ante wädämaï quëwengä ingampa. 22 Ìniquè botö, Tömengä ingante cæbo beyænque wënæ wënæ bate wæwencæcäimpa, ante cæcæboimpa. Ayæ tömengä nänö odömonte apænedinö bai në eñente cædäni iñömö tömengä tönö nani guëa godö möwëninö ante, Mönitö wënæ wënæ cæmönì inte ancaa wæwente awædö, ante pönente ñimpo cædämaï inäni ìniquè tömënäni inänite adobaï botö cæbo beyænque nanguï wënæ wënæ bate wæwëmaïnänipa. 23 Tömengä wënäni inänite wænömo wæncædänimpa. Ìniquè wayömö wayömö incæ botö imote godongämæ nani pönencabo tömancabodäniya iñömö, Botö incæ tömënäni nani mímöno tönö ocaidë, Æbänö pönënanii, ante në eñëmo inömo imopa, ante eñencædänimpa. Ayæ mïnitö cædi bai ante adinque botö wæætë adobaï mïnitö tömämïni imïnite cæcæboimpa.

24 “Wamïni pancamïniya guiquënë Tiatida iñömö quëwëmïni inte mäningä onquiyængä nänö odömonte apænedö ante mïnitö në pönënämaï imïnipa. Ayæ Tatäna wë wodonte nänö angainö ante eñënämaï imïnitapa. Ìniquè botö mïnitö imïnite iïmaï ämopa. Mïnitö teëmë mongæncoo mongænte gote bai wädämaï incæmïnimpa, ante wadö ante änämaï incæboimpa. 25 Wæætë botö ocæ ëmænte wæenganca mïnitö edæ do mïni pönënö ante ñimpo cædämaï iedäni. Mäninque ämopa.

26 “Inguipoga ìniquè baganca ædänidö botö änö në cædönäni inte tæi ëmonte në gänä cædäni inänite botö pönö cæbo ate tömënäni nämä tæi piñænäni badinque tömämæ quëwënäni inänite në änäni bacædänimpa. 27 Botö Mæmpo botö imote pönö cæcä beyænque Awënë badinque nämä tæi piñænte inte në ämo bai botö adobaï tömënäni inänite pönö cæbo beyænque awënëidi badinque

aacædänimpa. Tæiyæ awënë tömengä nempo quëwënäni inänite aacä bai tömengä iñömö tömämæ quëwënäni inänite, Ìïmaï cæedäni, ante aacæcäimpa. Dai inte bæte cængæmö tæi ænacä nancate bai cædinque tömengä adobaï wabæca wabæca quëwënäni inänite nanguï pante cæcæcäimpa. 28 Mäninäni inänite botö adobaï wadaamö ñäö bayonte apäimö incæ godömo æncædänimpa.

29 “Wayömö wayömö incæ botö imote godongämæ nani pönencabo inänite Wængonguï Önöwoca quïnö angää, ante tömengä nänö änö ante në ëamonca imïni inte eñëedäni, ante mäniinque ämopa,” ante Waocä në eñagaingä iñömö botö imote apænecäimpa.

3

Tadoditiidi inänite Itota nänö änö

1 Ayæ adocä godömenque apænecantapa.

“Tadoditi iñömö Wængonguï ingante godongämæ nani pönencabo inänite në aacä acæcäimpa, ante botö änö ante iïmaï yewæmöe ämopa. Wængonguï Önöwoca incæ önoppo æmæmpoque go mëwoga önöwocaidi ëwocadongä ingampa. Botö iñömö tömengä ingante në ëwocate quëwengäimo inte nëmöidi önoppo æmæmpoque go mëa ganca inäni në næænte ingäimo imopa.

“Ìniquè, Mïnitö æbänö cæmïni, ante do eñëmopa. Mïnitö mïmïni quëwëmïnipa, ante wadäni apænedäni incæte mïnitö wïi waa cæte quëwëmïni inte do wængainäni bai imïnipa töö. 2 Edæ, Botö Wængonguï ayongä mïni cædinö wïi eyepæ cæmïnipa, ante adinque botö, Nänö ömæmöedäni, ante ämopa. Nänö ömæmöninque mïnitö, Ayæ mïinäni quëwënäni incæ në wæncæ cædäni bai badäni incæte tömënäni wænämaï inte wæætë tæimö bacædänimpa, ante cæedäni. 3 Mänömaï beyæ, Quiëmë do ænimïni bai imïni, quiëmë ante do eñëmïni, ante mäninö ante wæætë adodö ante pönëedäni. Pönëninque mïnitö mäninö ante eñente cædäni. Ayæ mïni wënæ wënæ cædinö ante, Ancaa wæwente awædö, ante pönente

ñimpo cæedäni. Wæætē mīnitō wīī ñāni ōmæmonte bai imīni ate wædinque botō incæ mīnitō weca awēmō nē ængā bai pōmaimopa. Ayæ, Awēmō nē ængā æyedēnō ponguingāā, ante eñēnāmaī ināni bai botō adobai mīnitō eñēnāmaī iñōmīni mīnitō weca awēmō ponguimo apa quēwēmīni.

4 “ ‘Incæte Tadoditi iñōmō mīni quēwencabo iñōmīnite pancadāniya tōmēnāni weocoo wentamō nāmōnāmaī bai inināni inte nē waa cæte quēwēnānīpa. Mānināni waa cæte quēwēnāni beyæ eyepæ inōnāni inte weocoo nāāmæntacoo mongænte botō miñæ gocædānīpa. 5 Nē tæi emonte gānā cædāni iñōmō adobai weocoo nāāmæntacoo mongæncædānīpa. Ayæ, Quēwenguinta, ante Wængonguī nānō yewæmongaintaa mānināni emōwo do yewæmōi ininque botō cōwē wadæ cædāmaī incæboimpa. Wæætē botō Mæmpo Wængonguī weca ayæ tōmengā anquedoidi weca botō, Iñāni botō miñæ gogaināni inānīpa, ancæboimpa.

6 “ ‘Wayōmō wayōmō incæ botō imote godongāmæ nāni pōnencabo inānite Wængonguī Ōnōwoca quīnō angāā, ante tōmengā nānō ānō ante nē ēamonca imīni inte eñēedāni,’ ante māninque āmopa,” ante Waocā nē eñagāingā iñōmō botō imote apænegacāimpa.

Pidadedepiāidi inānite Itota nānō ānō

7 Ayæ adocā godōmenque apænecantapa.

“Pidadedepia iñōmō Wængonguī ingante godongāmæ nāni pōnencabo inānite nē aacā acæcāimpa, ante botō ānō ante iīmaī yewæmōe āmopa. ‘Botō edæ nē Tæiyæ Waēmō ingaimo imopa. Nō ante cægaimo inte botō docā Awēnē Dabii nānō wi ænequī nē næængaimo imopa. Iñinque quīnō odemō botō wi ænebo incæ mānīnemō wacā ædō cæte tee mōnequingāā. Ayæ quīnō odemō botō tee mōnebo incæ mānīnemō wacā ædō cæte wi ænequingāā.

8 “ ‘Mīnitō æbānō cæmīnī, ante do eñēmopa. Mīnitō cæcæmīnīpa, ante botō odemō wi ænete bai cæbo aedāni. Æcānō mānīnemō wæætē tee mōnequingāā. Edæ dæ angampa. Mīnitō wīī tæi piñæmīni imīni incæte botō angainō ante

eñente cæmīni inte botō emōwo ante, Dicæ eñēmōniyaa, ante ānāmaī inīmīni imīnīpa. Botō do eñēmopa. 9 Mōni ood-eocabo imōni incæ pancadāniya, Mōnitō Wængonguī ingante mōni eñencabo imōnīpa, ānāni incæte ināmaī inānīpa. Wæætē tōmēnāni iñōmō babæ ānewēnāni inānīpa. Tatāna ingante nāni eñencabo inānīpa tōō. Botō godō cæbo ate adodāni mīnitō weca ponte mīnitō ōnōwa gāānē ædæ wææncædānīpa. Ayæ, Botō mīnitō imīnite nē waadete pōnengaimo imopa, ante botō godō odōmōmō eñencædānīpa. 10 Mīnitō imīnite, Ee cædinque wæntæye ināmaī iedāni, ante botō angainō ante eñente nē cædimīni imīni adinque botō wæætē mīnitō imīnite wææ aacæboimpa. Inguipoga quēwēnāni tōmānāni nāni wæwenguīmāmo ancaa baquīnō anguēnē. Edæ Tatāna, Æbānō quēwēnānī, ante acæte ante cæcā ate nāni wæwēñedē botō iñōmō, Mīnitō wæwēnāmaī incæmīnīpa, ante mīnitō imīnite wææ aacæboimpa.

11 “ ‘Botō oo ocæ emænte ponguimo imopa. Wængonguī poganta nānō godonguinta, ante mīnitō imīnite godongā æncæmīnīpa. Mānīnta mīni ænguinta iñōmō wacā ænāmaī incæcāimpa, ante mīnitō mīni entawēnō ante godōmenque godōmenque ñimpo cædāmaī iedāni. 12 Botō cæbo ate waodāni tæi emonte nē gānā cædāni iñōmō tōmēmō Wængonguī tæiyæ waēmō oncōnē wantæpiyæ quēwenguīnānidō anguēnē. Tōmēnāni Wængonguī weca cōwē quēwente taodāmaī incædānīpa. Tōmēnāniya botō Wængonguī emōwo yewæmoncæboimpa. Mīi Eedotadēē nāni āñōmō iñōmō botō Wængonguī nānō quēwēñōmō iñonte mānīi tōmengā nānō quēwēñōmō incæ ōnædē inō da pōnongā wæængæimpa. Mānīi Wængonguī nānō quēwēñōmō emōwo botō adobai tōmēnāniya yewæmoncæboimpa. Ayæ botō wawo botō ñōwo pemongaiwo adobai tōmēnāniya yewæmoncæboimpa.

13 “ ‘Wayōmō wayōmō incæ botō imote godongāmæ nāni pōnencabo inānite Wængonguī Ōnōwoca quīnō angāā, ante tōmengā nānō ānō ante nē ēamonca imīni

inte eññedäni,' ante mäninque ämopa," ante Waocä nē eññagängä iññömö botö imote apænegacäimpa.

Daoditeaidi inänite Itota nänö änö

¹⁴ Ayæ adocä godömenque apænecantapa.

"Daoditea iññömö Wængongui ingante godongämæ nani pönencabo inänite nē aacä acæcäimpa, ante botö änö ante iimaï yewæmoe ämopa. 'Botö emöwo Amëë, ante pemongaimo inte botö cöwë, Nawangä impa, ante nē cöwë ædæmö apænegaimo imopa. Wëenëñedë Wængongui nänö badongäñedë mäniñedë botö tömengä tönö godongämæ badongaimo beyænque tömengä nänö badongaincoo tömancoo Awënë badinque botö nē ämo imopa.

¹⁵ " 'Minitö æbänö cæminii, ante do eññemopa. Yoguiþæ bai inämaï imini incæte ocoi ämæ bai adobaï inämaï iminipa töö. Iññempa yoguiþæ bai iminipa diyæ waa aquimoo. Edæ ocoi ämæ bai iminipa diyæ waa aquimoo. ¹⁶ Minitö yoguiþæ bai inämaï imini incæte ocoi ämæ bai inämaï imini inte wæætë wii eyepæ cæminii inte gänë ämæ bai iminipa töö. Mänömaï beyæ botö edæ tömëmo önönë towæ tänonte bai minitö iminite adobaï wido cæcæ cæbo apa quëwëminii.

¹⁷ Minitö, Mönitö nanguï ëamöni imönipa, ante äminipa. Edæ, Tömëmöni mäincoo gæte da wëninque eyepæ ëamönipa, ante äminipa. Iññempa mäninö ante wapiticæ pönente äminipa. Minitö mini wæwënö incæ eññänämaï iminipa töö. Minitö æbänö bate cæminii, ante adinque wadäni, Minitö wodi, ancædänimpa. Ömæpodäni bai imini inte minitö babetamönäni bai imini inte ömaadäni bai imini incæte, Mänömaï imönipa, ante eññëminiyaa.

¹⁸ " 'Mänömaï beyæ botö, Iimaï cæedäni, ante waadete ämopa. Botö pönö cæbo beyænque minitö wæætë waa bate bai nanguï cæcæminimpa, ämopa. Mäninö botö pönö cædö iññömö oodo gongapamö aca podonte ate waëmö oodo bate bai impa. Ininque minitö, Mönitö nanguï ëamöni bacæmönimpa, ante cædinque botö weca ponte tömëmo oodo ante godonte æedäni. Ayæ, Ömaamöni

inämaï incæmönimpa, ante guingo imönämaï incæmönimpa, ante minitö botö weocoo näämæntacoo godonte ænte mongæedäni. Ayæ minitö, Awinca waa acæimpa, ante cædinque tömëmo awinca cönömöimæ godonte æninque cönömöedäni.

¹⁹ " 'Botö nē waadete pönënanäni inänite botö piinte ämo inte adobaï pante cæbo imopa cæminii. Minitö nanguï cædinque mini wënæ wënæ cædinö ante, Ancaa wæwente awædö, ante pönente ñimpo cæedäni. ²⁰ Èamonca eññedäni. Botö incæ odemö yabæ inö ongonte bai waomini mimöno a ongöninque, Wi ænequï, ante aa peyömo waocä æcæmenque incæ eññëninque odemö wi ænete botö imo, Pö guie, angä ininque botö iññömö edæ tömengä mimönë pö guicæboimpa. Tömengä mimö botö oncö bai iññonte botö tömengä tönö cænte bai cöwë quëwencæboimpa. Ayæ tömengä wæætë botö tönö cænte bai cöwë quëwencæcäimpa. ²¹ Botö tæï emonte nē gänä cægaimo inte botö Mæmpo nänö aacæ tæ containpaa tömengä tönö guëa tæ contagaimo bai nē tæï emonte nē gänä cædäni iññömö adobaï botö tömëmo aacæ tæ contayömo botö tönö godongämæ tæ contacædänimpa, ante ämo adopaa tæ contaquinäni.

²² " 'Wayömö wayömö incæ botö imote godongämæ nani pönencabo inänite Wængongui Önöwoca quinö angää, ante tömengä nänö änö ante tömënanäni nē ëamonca imini inte eññedäni,' ante mäninque ämopa," ante Waocä nē eññagängä iññömö botö imote apænegacäimpa.

4

Öönædë iññömö Wængongui ingante wat-apæ apænedäni

¹ Botö Wäömo inömo inte ayæ ate æmö ayömote öönædë inö odemö wi ænete atabopa. Todompeta nani ancadeca we öonte yedæ tē bai tedepämo täno botö eññëninö iññömö ñöwo wæætë adopämo botö imote iimaï äninque, "Iññömö pö æe. Æññömite botö, Ayæ ate quinö baquënë inguiï, ante

bitö imite edonque odömömo acæbiimpa,” angantapa.

² Mäninö ante äñongä Wængonguï Önöwoca incæ botö imote bæi ongonte bai cæyongä botö wüimonte bai adinque iïmai atabopa. Öönædë inö Awënë tæ containpa ayömo adocanque mäniñömö tæ contacä atabopa. ³ Mäningä adoyömö nê tæ contadongä iñömö dica ñäö bai ëmonca bai adobai ëmongä ingantapa. Aatape nani äninca bai codönadina nani äninca bai mäninca mencaa ñäö bai inca bai tömengä adobai ëmongä ingantapa. Awënë tæ containpa iñömö daimë dica bai etëmedada nani äninca ëmonca bai inte æidämæ waimë pöni gongæmënimpa. ⁴ Mänimpa Awënë nänö aacæ tæ containpa waimpaco bæinticoatodo ganca mänimpopaco mäniñömö godämæ a ongompapa. Adopaco iñömö nê aadani nê Picænani bæinticoatodo ganca mänimpodani tæ contadinque näämëntacoo mongæninque poganta oodo inte badöinta da wencate a ongönanitapa. ⁵ Awënë tæ containpa inö näinte yædæ yædæ ta gote detæbo tæi tæi tē tēñonte yedæ pöni änimpa. Ayæ Awënë tæ contayömö tæcætawë inö ti wodönoincade önompo æmæmpoque go mencadea wocædöincadecoo a ongönimpa. Wængonguï Önöwoca incæ önompo æmæmpoque go mēwoga önöwocaidi bai ewocadongä inte mänincadecoo bai ingampa.

⁶ Ayæ Awënë tæ containpaa tæcætawë inö adobai gäwapæntibæ bai iñonte awocawænta bai inimpa. Ayæ Awënë tæ containpa iñömö müinani quëwënanï mēnaa go mēnaa inani godämæ a ongönanitapa. Mäninani iñömö tæcætawë inö önöñabæ inö tömäo awinca ëmönani atabopa. ⁷ Tānocä müingä quëwëngä botö adingä iñömö nēöö bai ëmongampa. Ayæ wacä müingä quëwëngä botö adingä iñömö wagada mæmpo bai ëmongampa. Wacä müingä quëwëngä botö adingä iñömö tömengä awinca waocä awinca bai ëmongampa. Ayæ tömangä müingä quëwëngä botö adingä iñömö guingämöwæ pao pao gocä bai atabopa. ⁸ Mēa go mēa müinani quëwënanï incæ adocanque adocanque önompo æmæmpoque go adoguënepænque ëmænte quëwënanï

inänipa. Ayæ adodani inte tömënanï baonga godämæ tömanga nanguï pöni awinca ëmonte ænömengadænguënepæ incæ awinca adobai ëmönänipa. Mäninani edæ itædë woyowotæ ñimpo cædämaï inte iïmai ante ämotamini änanipa.

“Bitö Tæiyæ Waëmö Awënë imidö, bitö Tæiyæ Waëmö Awënë imidö, ante ämönipa.

Wængonguï Awënë bitö adobique Tömää nê Cæbi inte

wëenëñedë do nê quëwëngäimi imi ñöwobi adobi inömi inte ayæ wantæpiyæ cöwë quëwëncæbiimpa.”

Ante ämotamini ante cöwë änanipa.

⁹ Awënë tæ containpaa nê tæ contadongä inte nê wantæpiyæ cöwë quëwëngä ingante apænedinque mēa go mēa müinani quëwënanï iñömö iïmai ante apænedänipa. Bitö ñäö ëmömi imipa, ante apænedinque tömënanï, Bitö imite waa amönipa. Mönitö bitö imi waa ate pönente apænemönipa, ante apænedänipa.

¹⁰ Mänömaï ante apæneyönani nê aadani nê Picænani iñömö bæinticoatodo ganca mänimpodani Awënë tæ containpaa nê tæ contadongä inte nê wantæpiyæ cöwë quëwëngäingä weca ædæ wææninque tömengä ingante, Bitö Wængonguï Awënë imidö anguëné, ante watapæ apænedinque tömënanï poganta gä æncadinque Awënë tæ containpa gäänë cö cædinque iïmai ante ämotamini ante änanipa.

¹¹ “Bitö iñömö mönitö Wængonguï Awënë imidö, ämönipa. Bitö badöinënö, ante pönente ingäimi inte öönædë ongönani tönö inguipoga ongönani tönö tömänani inänite badongäimi imipa.

Bitö wüi badömi bai tömänani badongänani quëwënamäi dæ ancædönänimpa.

Mänömaï beyæ bitö eyepæ inömi iñömite, Bitö ñäö ëmömidö anguëné, ante mönitö bitö imite waa amönipa.

Bitö nämä tæi piñænte nê cæbi imidö, ante bitö imite ämönipa,”

ante ämotamini ante änanipa.

5

Wængonguï Codotodo yewæmöinta wi æmpocampa

¹ Ayæ Awënë nänö aacæ tæ containpaa nē tæ contacä iñömö tömengä önönempo tömempo incæ yewæmöinta dadi ompointa næængä atabopa. Mäninta tipäataa yewæmöinta impa. Adotaa yæwedeta iñömö guiñenca bai inte tee bædinta önompö æmæmpoque go mentaa inimpa. ² Ayæ Wængonguï anquedo adocanque nē tæi emongaingä inte yedæ aa pecä atabopa. “Mäninta dadi ompointa wi æmpoquïi, ante æcänö nö waa pöni inongä inte eyepæ inte tee bædedinta wäa wäa ænete wi æmpoquingäa,” angantapa. ³ Ayæ öönæde incæ inguipoga incæ tadömengadænga incæ cöwä ayönäni, Æcänö mäninta wi æmpoquingäa, cæncadenta inö æcänö aquingäa, ante edæ dæ angantapa. ⁴ Æcänö nö waa pöni inongä inte eyepæ inte dadi ompointaa wi æmpoquingäa iñömö edæ dæ angampa. Cæncadenta inö æcänö aquingäa ante dæ angampa, ante adinque nanguï pöni Ca ca wætabopa. ⁵ Ca ca wæbo adinque nē aadäni nē Picænäni iñönäni adocanque nē Picængä incæ botö imo, “Wædämaï ie. Wæætë cöwä ae, angantapa. Adocanque onguïñængä iñömö mäninta wi æmpoquingä a ongongampa. Awënë Dabii Pæingä incæ tömengä iñömö docä Oodaa pæinäni nani cabo iñonte nē nööo bai tæi emönongä inte nē gänä cæcä ingaingä ingampa. Tömengä iñömö edæ eyepæ inte tee bædedinta önompö æmæmpoque go mentaa wi æmpodinique dadi ompointa wi æmpocæcäimpa,” angantapa.

⁶ Ayæ Wængonguï Codotedo nani wænönäni nē wæningä bai ingä atabopa. Tömengä Awënë Wængonguï nänö aacæ tæ contayömö tæcæguedë ongöñongä miinäni quëwënëni mënaa go mënaa inäni tönö nē aadäni nē Picænäni godämæ a ongönäni atabopa. Tömengä iñömö önömoncawæncoo önompö æmæmpoque go mëwäa emoncadinique awinca önompö æmæmpoque go mëmonga emongacäimpa. Edæ Wængonguï Önöwoca incæ önompö æmæmpoque go mëwoga önöwocaidi bai nänö ewocadö bai mänii awincacoo inänipa. Adodäni önöwocaidi inänite inguipoga da pönongä pöningue tömënäni inguipoga tömämæ gote cæwodäni inänipa. ⁷ Ayæ

Wængonguï Codotedo iñömö Awënë tæ contayömö pöningue nē tæ contadongä önönempo tömempo inö dadi ompointa nänö nææninta ö ængantapa. ⁸ Tömengä mäninta ö ængä ate mëa go mëa miinäni quëwënëni tönö nē aadäni nē Picænäni bæinticoatodo ganca mänimpodäni Wængonguï Codotedo weca ponte ædæ wæænänitapa. Iinäni tömänäni ampoquï adapa nani änö nææninique owæta oodo inte nani badöinta oguï waaquï eyede enga næænänitapa. Wængonguï quinäni tömengä ingante nani apænedö iñömö mänii oguï waaquï bai impa. ⁹ Tömënäni mä äninque iimaï ante ämotamini ante änänitapa.

“Bitö imite wænönäni nē wænimi inte bitö nö waa pöni inömi imipa.

Äninque bitö eyepæ inte dadi ompointaa ænte tee bædedinta wäa wäa ænete wi æmpoquïmi imipa.

Waadäni nani cabo waodäni nani cabo incæ wadö nani tedecabo wadö nani tedecabo incæ

wacä awënë nani cabo wacä awënë nani cabo incæ wabæca nani quëwencabo wabæca nani quëwencabo incæ waodäni inänite bitö,

Wængonguï quimini bacæminimpa, ante cædinque nämä wepæ godonte ængabiimpa.

¹⁰ Bitö nempo quëwëninque tömënäni bitö tönö godongämæ aadäni bacædänimpa, ante badongabiimpa.

Mönö Wængonguï ingante cæcædänimpa, ante bitö pönö cæbi ate tömënäni,

Mönö Awënë Odeye Wængonguï quï, ante nē godönäni bagainäni inänipa.

Mäninäni edæ awënëidi badinique inguipoga quëwënëni inänite aacædänimpa.”

ante ämotamini änänitapa.

¹¹ Ayæ ayömo Wængonguï anquedoidi iñömö bacoo inäni inte ämotamini änäni eñëninque, Tömënäni æpodö miido ganca inänii, ante botö ædö cæte tee mampote eñenguimoo. Edæ miinäni quëwënëni tönö nē aadäni nē Picænäni tönö Awënë tæ containpaa gäänë tæcæguedë ongöñönänite Wængonguï anquedoidi iñömö yabæque godämæ gongænte ongönänitapa. ¹² Mäniiñömö godämæ

ongöinque tömönäni yedæ äninque iïmai ante ämotamini änänitapa.

“Wængongui Codotedo ingante wænönäni nē wæningä inte tömengä nö waa pönï inongä inte eyepæ ingampa.

Tömengä edæ tæi piñængä ingänö anguënë. Tömengä quincodö incæ tömancoo nē äcä inte tömänö ante eñenongä ingänö anguënë.

Tömengä tæi piñænte inte tömäa nänö cæinēnō cædongä ingampa.

Tömengä ingante, Bitö imite waa amönipa. Bitö ñäö emömidö anguënë, ante bitö imite watapæ apænemönipa,” änänitapa.

¹³ Ayæ Wængongui nänö badongainäni öönädē quēwēnāni incæ inguipoga quēwēnāni incæ tadömengadæ quēwēnāni incæ gäwapæntibädē quēwēnāni incæ tömänäni adoyedē iïmai ante ämotamini ante änäni eñentabopa.

“Awënë tæ contaimpaa nē tæ contadongä ingante ayæ Wængongui Codotedo ingante tömēna inate iïmai amönipa.

Minatö iminate watapæ amönipa. Minatö iminate waa amönipa.

Minatö ñäö emöminadö anguënë. Minatö tæi piñæmina iminadö anguënë.

Wantæpiyæ iñonte mäninö ante cöwē ancæmönimpa,” ante änänitapa.

¹⁴ Ante añönäni mēa go mēa miiñäni quēwēnāni adobai, “Iïmai baquinö anguënë,” ante, “Amēē,” änänitapa. Ayæ nē aadäni nē Picænäni iñömö ædæ wææninqe watapæ änänitapa.

6

Tee bædinta önompo æmæmpoque go mentaa

¹ Ayæ Wængongui Codotedo iñömö tee bædinta önompo æmæmpoque go mentaa incæ yewæmöinta dadi ompointa tee bædedinta tänota wi æmpoyongä atabopa. Ayæ mēa go mēa miiñäni quēwēnāni incæ adocanque iñömö tömengä nänö tedepämo detæbo tē bai inte botö imote, “Pöe,” ante yedæ angä eñentabopa. ² Tæcæ ayömo cabayo näämænta eñacä do a ongongä atabopa. Cabayo inte nē tæ contacä iñömö to piyæncaimpa næængantapa. Tömengä iñömö wadäni inänite guëadö guëa cæte tæi

ëmongä inte gänä cædongä iñongante Awënë poganta pönönäni æninque tömengä wæætē guëadö guëa cæcæte ante cabayo mongænte gocantapa.

³ Ayæ Wængongui Codotedo wæætē tee bædedinta wataa wi æmpoyongante mēa go mēa miiñäni quēwēnāni incæ wacä iñömö botö imote, “Pöe,” angä eñentabopa. ⁴ Ayæ wacä cabayo opatawæ gonga emö bai eñacä pongantapa. Waodäni incæ wacä ingä wacä ingä wænoncædänimpa, ante cædinque Wængongui godö angä beyænque cabayo inte nē tæ contacä iñömö, Inguipoga quēwēnāni piyænē cædämaï incædänimpa, ante nē cæcä bacantapa. Ayæ, tömengä ingante ñænæ yaëmē bai pönönäni ængantapa.

⁵ Ayæ Wængongui Codotedo wæætē tee bædedinta wataa wi æmpoyongante mēa go mēa miiñäni quēwēnāni incæ ayængä iñömö botö imote, “Pöe,” angä eñentabopa. Tæcæ ayömo cabayo wentamö eñacä do a ongongä atabopa. Cabayo inte nē tæ contacä iñömö tee mangui önönempo næængä ingantapa. ⁶ Ayæ mēa go mēa miiñäni quēwēnāni weca tedepämo bai eñeñömo, “Todigomö tönö tebadamö nāni cænguimö, ante nanguināni godonte æimö impa, ancæte ante iïmai angä eñentabopa. Tömäa itädē cædäni ate nāni cæganca beyæ todigomö mēa diboda pönï tee mangui ganca mäninque godonte æncædänimpa. Adobai tömäa itädē cædäni ate nāni cæganca beyæ tebadamö önompo æmæmpoque go adoque diboda tee mangui ganca mäninque godonte æncædänimpa. Ayæ oginguipæ ante odibomö nāni ämö eyepæ pæcæimpa, ante ee aedäni. Biinömæ ante yowe eyepæ pæcæimpa, ante ee aedäni.”

⁷ Ayæ Wængongui Codotedo wæætē tee bædedinta wataa wi æmpoyongante mēa go mēa miiñäni quēwēnāni incæ tömengä iñömö botö imote, “Pöe,” angä eñentabopa. ⁸ Tæcæ ayömo cabayo nämēnäa eñacä do a ongongä atabopa. Cabayo inte nē tæ contacä iñömö tömengä emöwo, Nē Wænöinengä, ante pemonte ëmongantapa. Waodäni nāni wænte ongöñömö awënë tömengä miñæ tee empo pongantapa. Wængongui Codotedo pönö cæcä beyænque

tömëna inguipoga quëwënäni inänite ad-
inque mënaa go mënaa iñönänite ado-
canque ingante wænöninque ayæ wadäni
mënaa go mënaa iñönänite adocanque
ingante wænöninque nanguï inäni inänite
në wænöna badatapa. Tömëna pan-
cadäniya inänite yaëmenca në wænöna ba-
datapa. Ayæ tömëna godö cæda beyænque
waodäni pancadäniya gue ænente nani
wænguimämo pö wæncædänimpa. Ayæ
tömëna godö cæda beyænque pancadäniya
quingæ wodonte nani wænguimämo pö
wæncædänimpa. Ayæ tömëna godö cæda
beyænque pancadäniya babæidi wænönäni
beyæ wæncædänimpa.

9 Ayæ Wængonguï Codotedo wæætë
tee bædedinta wataa wi æmpoyongante
botö, Wængonguï quï, ante nani wëmonca
iya täimoga ænömengadæ inö waodäni
önöwocaidi owodäni atabopa. Mäninäni
Wængonguï nänö angainö ante në
ëñente cædäni inte, Itota mönö Codito
inongä ingampa, ante, Nö ante impa,
ante apænedäni beyæ tömënäni inänite
wænönäni wængainäni inänitapa. 10 Adodäni
yedæ äninque iimaï änänitapa, “Awënë
Wængonguï bitö tömänäni inänite në Aabi
inömi imipa. Edæ tæiyæ waëmö inömi inte
bitö në nö ante apænebi imipa. Inique
inguipoga quëwënäni mönitö imönite në
wænöninäni inänite æiquedö apænte an-
guimii. Ayæ mönitö wepæ möni gowepæ
beyæ ante tömënäni inänite æiquedö pan-
guimii ämönipa.” 11 Mäninäni tömänäni
inänite tömengä doyæncoo näämæntacoo
pönongä ænänitapa. Æñönänite, “Wædænque
ayæ ee ongödäni,” äninque tömengä,
“Minitö iminite do wænönäni wæmini
baï wadäni mini töninäni ayæ müinäni
quëwënäni inte minitö tönö Wængonguï in-
gante në cædönäni inänite wænoncædänimpa.
Inäni inänite wænonguënänäni inänipa,
ante Wængonguï nänö änö baï tömënäni
inänite iinque nani wænonganca ee
ongödäni,” ämopa, ante angantapa.

12 Ayæ Wængonguï Codotedo wæætë
tee bædedinta wataa wi æmpoyongä
atabopa. Mäninëdë tæimö goinque ocæ
ocæ gotimpa. Waodäni tömënäni gui-
idengä wængä ate wæwente beyænque

wentamoncoo mongænäni baï nænque
iñontobæ adobaï wentamö pönï ëmö
batimpa. Apäicä pæibo iñedë incæ wepæ
baï opatawæ ëmö batimpa. 13 Ayæ
nëmoncoo öönædë inö owocoo iñömö
wææ tæ ayæ waa wææ tæ ayæ waa
wææ tæ inguipoga iñömö tæ wææninque
iigowæmö ayæ icadämaï iñonte nanguï
woboyæ pæmæñonte woga woga cædinque
tæ wæænte baï adobaï tæ wæænänitapa.
14 Ayæ öönæ incæ mincayonta dadi om-
pote baï dæ ä batimpa. Ayæ tömanquidi
tömää wää tæiwænë iñontobæ wayömö gote
dæ ä baï inimpa.

15 Ayæ awënë odeyeidi incæ ñænænäni
inte në cædönäni incæ tontadoidi awënëidi
incæ në nanguï ëadäni incæ tæi piñænte
cædäni incæ tömënäni guiñente badänitapa.
Ayæ awënë në godonte æningä beyænque
në cæte quëwënäni incæ nämanque
cæte quëwënäni incæ tömënäni tömänäni
guiñente badänitapa. Guiñente badinque
tömenäni änanquidi æite ontatodë iñömö
wë womönänitapa. Ayæ onquiyaboga
dicabocodë tæcæguedë go guiite wë
womönänitapa. 16 Ayæ waodäni inänite
aa pete baï tömënäni, “Onquiyaboidi
ëñeedäni, dicaboidi ëñeedäni, Awënë tæ
contaimpaa në tæ contadongä mönitö
imönite adämaï incæcäimpa, ante cædinque
minitö mönitonga tæ wæænte beocaedäni,”
ante aa pedänitapa. Ayæ, “Wængonguï
Codotedo ænguï badinque mönitö imönite
pänämaï incæcäimpa, ante cædinque tæ
wæænte beocaedäni,” ante aa pedänitapa.
17 “Edæ tömëna nana nanguï pönï ænguï
baquionæ do ba inique æcänö ayæ
quëwenguingää. Edæ dæ ä inguinö an-
guënë,” ante wædänitapa.

7

Wængonguï anquedo nänö në yewæmöinäni

1 Ayæ ate Wængonguï anquedoidi
mënaa go mënaa ongönäni atabopa. Ado-
canque yædæcapæ inö ongöñongante wacä
yæwainö ongöñongante wacä imatæ beta-
monca inö ongöñongante tömengä æmataæ
betamonca inö a ongongantapa. Inique,
Woboyæ mëa go mëa iñonte mönö a ongönö
inö inguipoga go pæmænämaï, ante

cædinque cædänitapa. Tömänäni ömaa iñömö incæ gäwapæntibæ iñömö incæ adobai tömäo awæncoo pæyömö incæ woboyæ pæmænāmaï ingæïmpa, ante cædänitapa. ² Wacä anquedo nænque tamönö inö pongä atabopa. Tömengä Wængongui næænte pongä atabopa. Wængongui anquedoidi mënaa go mënaa inäni iñömö inguipoga incæ gäwapæntibæ incæ wo ewente cæcædänimpa, ante cædinque Wængongui godö cæcä beyænque tæi piñænäni badänitapa. Mäninäni inänite Wængongui anquedo ñowo pöningä yedæ aa pecantapa. ³ “Ee ongöedäni. Edæ minitö inguipoga incæ gäwapæntibæ incæ awæncoo incæ ee wo ewenämaï iñöminite mönitö Wængongui ingante næ cædäni näni önönemö inö tömengä nänö yewæmöi ante täno yewæmoncæmönimpa. Yewæmömöni ate minitö mäniñedë ate wo ewente cæedäni.”

⁴ Ayæ yewæmöinäni æpodänidö badänitapa, ante apænecä eñentabopa. Tömänäni yewæmöinäni inte tiento coadenta i coatodo müido ganca inänitapa. Idægoidi näni cabo tipæmpoga go mencabodäniya iñönänite iïmaï yewæmöinäni badänitapa.

⁵ Wëenëñedë Oodaa wodi pæinäni näni cabo iñönänite næ yewæmöinäni iñömö tipæmpoga go mëa müido ganca inänitapa.

Ayæ Odobeë wodi pæinäni näni cabo iñönänite næ yewæmöinäni wææ tipæmpoga go mëa müido ganca inänitapa.

Ayæ Gado wodi pæinäni näni cabo iñönänite næ yewæmöinäni wææ tipæmpoga go mëa müido ganca inänitapa.

⁶ Ayæ Atedo wodi pæinäni näni cabo iñönänite næ yewæmöinäni wææ tipæmpoga go mëa müido ganca inänitapa.

Ayæ Nempatadii wodi pæinäni näni cabo iñönänite næ yewæmöinäni wææ tipæmpoga go mëa müido ganca inänitapa.

Ayæ Mänatee wodi pæinäni näni cabo iñönänite næ yewæmöinäni wææ

tipæmpoga go mëa müido ganca inänitapa.

⁷ Ayæ Timeönö wodi pæinäni näni cabo iñönänite næ yewæmöinäni wææ tipæmpoga go mëa müido ganca inänitapa.

Ayæ Debii wodi pæinäni näni cabo iñönänite næ yewæmöinäni wææ tipæmpoga go mëa müido ganca inänitapa.

Ayæ Itacado wodi pæinäni näni cabo iñönänite næ yewæmöinäni wææ tipæmpoga go mëa müido ganca inänitapa.

⁸ Ayæ Tabodöo wodi pæinäni näni cabo iñönänite næ yewæmöinäni wææ tipæmpoga go mëa müido ganca inänitapa.

Ayæ Ootee wodi pæinäni näni cabo iñönänite næ yewæmöinäni wææ tipæmpoga go mëa müido ganca inänitapa.

Ayæ adobai Beencaminö wodi pæinäni näni cabo iñönänite næ yewæmöinäni wææ tipæmpoga go mëa müido ganca inänitapa.

Tæiyænäni näämcentacoo mongænte a ongöninque

⁹ Ayæ ate wæætë ayömö tæiyænäni inäni a ongönäni atabopa. Æpodänidö inänii, ante æcänö tee mampote anguingää. Mäninäni wabæca näni quëwencabo wabæca näni quëwencabo inte tæiyænäni incæ waodäni näni cabo waodäni näni cabo inte tæiyænäni incæ wacä awënë näni cabo wacä awënë näni cabo inte tæiyænäni incæ wadö näni tedecabo wadö näni tedecabo inte tæiyænäni incæ mänömaï inönäni inte ongönänitapa. Iinäni iñömö näämænta weocoo doyæncoo mongænäni inte yædëmæmäa önönemö nææningue Awënë nänö aacæ tæ contaimpa gäänë ongöninque Wængongui Codotedo weca a ongönänitapa. ¹⁰ Ayæ tömönäni yedæ äninque iïmaï äänitapa.

“Mönö Wængongui iñömö tömengä nänö aacæ tæ contaimpaa næ tæ contacä inongä inte

tömengä adocä mönö imonte, Quëwencæminimpa, ante næ Ængä inongä ingampa.

Ayæ Wængongui Codotedo adobaï mönō imonte, Quëwencæminimpa, ante nē Ængä inongä ingampa,” änänitapa.

11 Nē aadäni nē Picænäni tönö mäa go mäa miinäni quëwënäni Awënë tæ contaimpa gäänē ongöñönänite Wængongui anquedoidi tömänäni iñömö yabæ inö godämæ ongönänitapa. Wængongui nänö aacæ tæ contayömö gäänē guidömëmæ ædæ wææninqwe tömënäni Wængongui ingante, Bitö Wængongui Awënë imidö anguënë, ante watapæ apænedänitapa.

12 Ayæ änänitapa.

“Amëë. Mönö Wængongui ingante watapæ apænemönipa.

Ayæ tömengä ñäö emongänö anguënë. Tömengä tömänö ante eññongä ingänö anguënë.

Tömengä ingante waa adinqwe mönitö tömengä ingante waa ate pönente apænemönipa.

Ayæ tömengä tæi piñængä ingänö anguënë.

Tömengä tæi piñængä inte tömäa nänö cæinënö cædongä ingampa.

Wantæpiyæ iñonte cöwë mäninö ante ancæmönimpa.

Mänömaï baquinö anguënë, ante, Amëë,” änänitapa.

13 Ayæ nē aadäni nē Picænäni incæ adocanque botö imo äninque, “Iinäni näämæntacoo doyæncoo nē mongænäni iñömö æmönänidö inänitawo. Edæ ædönö quëwëninäni inte pönänitawo,” angantapa.

14 Äñongante botö tömengä ingante, “Awënë bitö tömëmi do eññemipa,” antabopa. Äñömote tömengä wæætë, “Mäninäni nangui nani wæwengaimämo iinque baganca incæ ayæ miinäni quëwënäni inänipa. Edæ tömënäni weocoo doyæncoo, Waëmö pönï bacæimpa, ante Wængongui Codotedo wepænē yamongainäni inänipa,” ante nē aacä nē Picængä apænecantapa.

15 Ayæ adocä godömenque apænecantapa. “Mänömaï beyæ Wængongui nänö aacæ tæ contaimpa gäänē a ongöninque tömënäni

itædë incæ woyowotæ incæ Wængongui oncö tæiyæ waëmö oncönē tömengä ingante cöwë cædänipa.

Iinque oncontai bai tömënäni wænömënæcawo cæcä bai cædinque mänimpaa nē tæ contadongä iñömö

tömënäni inänite ante wææ aacæcäimpa.

16 Tömënäni cöwë gue ænënämaï tepæ gæwænämaï incædänimpa.

Nænque tömënäniya ti näwänämaï i inique tömënäni gönämaï incædänimpa.

Quiëmë ocoi ä beyænque tömënäni gonte inämaï inguinänidö anguënë.

17 Edæ Wængongui Codotedo Wængongui nänö aacæ tæ contayömö gäänē nē a ongongä iñömö

tömengä iñömö mäninäni näämæntacoo nē mongænäni inänite nē aacä incæcäimpa.

Tömengä edæ tömënäni inänite quëwenguimæ tapæñömö iñömö ænte mäocä goquinäni.

Ayæ Wængongui tömënäni wëñapæ nani tamonte wædi tömämaï wadæ cæmoncæcäimpa,” angantapa.

8

Tee bædedinta tömanta wi æmpocampa

1 Ayæ Wængongui Codotedo tee bædedinta tömanta wi æmpoyongante öönædë iñömö mëedia ooda ganca nöwæ ongonte batimpa. 2 Ayæ anquedoidi önompo æmæmpoque go mäa ganca inäni Wængongui weca nē a ongönäni inänite atabopa. Mäninäni inänite tömengä todompeta nani ancade önompo æmæmpoque go mencadea ganca pædæ godongä ænänitapa. 3 Ayæ wacä anquedo iñömö ogui waaqui iya täincade oodo inte nani badöincade nææninqwe, Wængongui qui,

ante nani iya täimpa gäänē ponte a ongongantapa. Mänimpa oodo inte nani badöimpa Wængongui nänö aacæ tæ contaimpa gäänē ongönimpa. Ayæ, Wængongui quinäni tömengä ingante apæneyönäni bitö ogui waaqui tancæbiimpa, ante cædinque adocä anquedo ingante wacä pöninque nangui ogui waaqui godongä ængantapa. 4 Ænte önompo næænte ogui waaqui iya tangä iinque tæëmämämo Wængongui weca æipämoyedë Wængongui quinäni tömengä ingante nani apænepämo guëa adoyömö æipämotimpa. 5 Ayæ adocä anquedo

iñömö ogui waaqui iya täincade æninque iya täimoga gonga ænte eyede wëninque inguipoga iñömö wææntodongantapa. Wææntodongä ate detæbo tæi tæi tē goyö yedæ pöni änimpa. Yædæ yædæ näinimpa. Ayæ goinque gotimpa.

Todompeta nani ancade

⁶ Ayæ Wængongui anquedoidi önompo æmæmpoque go mä ganca inäni todompeta nani ancade önompo æmæmpoque go mencadea ganca në nææinäni inte todompeta önöne gö cædedinque we we öoncæ cædänitapa.

⁷ Wængongui anquedo tänocä iñömö tömengä todompeta inte we we öongä ate yoguica gonga tönö wepæ adoyömö wempodente bai inguipoga iñömö tæ tæ wæænimpa. Tæ tæ wææ ate inguipoga iñömö pancabaa nangui ömä iñömö gonte batimpa. Awæncoo iñömö pancacooga incæ adobai nangui incoo gonte wænimpa. Gaguimæncoo iñömö tömancoo gonte batimpa.

⁸ Wængongui anquedo ayængä iñömö tömengä todompeta inte we we öongä ate ñænæ onquiyabo emö bai gonga bæcodote bai iñonte wææntodönäni gäwapæntibaa tæi tæi guitimpa. Tæi tæi guii ate gäwapæntibæ iñömö pancatibaa incæ nangui pöni æpæ iñömö wepæ batimpa. ⁹ Ayæ gäwapæntibæ cæncadëmæ inö quëwënäni iñömö pancadäniya incæ nangui inäni wænänitapa. Ayæ ñænæ wipocoo pancacooga incæ nangui wo cæwodincoo iñömö wo ewente guitimpa.

¹⁰ Wængongui anquedo ayængä iñömö tömengä todompeta inte we we öongä ate ñænæ nömö iñömö cadentato tica wodönote bai öönædë inö owodëmö incæ tæ wææninque önoncooga iñömö pancacooga incæ nangui æpænë iñömö tæi tæi guitimpa. Æpæ tayömö adobai cæncadëmæ inö tæi tæi guitimpa

¹¹ Mäninëmö emöwo iñömö, Ti Nänëmö, ante nani änëmö impa. Nömö tæi guiiyonte nangui æpæ iñömö moncapæ bai ti nämæ batimpa. Waodäni tæiyænäni iñömö imæ ti nämæ bagaimæ bete wænänitapa.

¹² Wængongui anquedo ayængä iñömö tömengä todompeta inte we we öongä

ate nænque pancayömonga tente ba ate apäicä adobai pancayömonga tente ba adinque nana apäidinö iñömö pancaa wëmö batimpa. Nëmoncoo iñömö pancadäniya incæ nangui inäni wo ewente badäni ate nani apäidinö iñömö pancaa wëmö batimpa. Itædë iñonte tipæmpoga go mä ooda ganca iñö mä go mä ooda ganca nænque ñäö apäidämai inimpa. Ayæ woyowotæ iñonte tipæmpoga go mä ooda ganca iñö mä go mä ooda ganca apäicä tönö nëmoncoo apäidämai inänitapa.

¹³ Ayæ ayömote guingämöwæ öönædë gämænö pao pao godinque iimaï ante aa pecä ëñentabopa. “Inguipoga quëwënäni nani wæquinque. Nani wæquinque. Nani wæquinque impa, angantapa. Edæ Wængongui anquedoidi mënaa go adocanque inäni inte tömënäni todompeta inte we we öoncæ cædäni beyænque inguipoga quëwënäni iñömö nangui pöni wæwenguinäni bacædänimpa,” ante guingämöwæ angantapa.

9

¹ Wængongui anquedo ayængä iñömö tömengä todompeta inte we we öongä ate wa nömö öönædë inö owodinque inguipoga tæ wæængainëmö ongö atabopa. Mänii nömö ingante tadömengadænguipo ontatodë wi ænequi godonte inimpa. ² Wi ænequi æninque ontatodë wi ænecä ate tēemancoo ta æitimpa. Mänii tēemancoo ñænæ gongapamö tēemancoo bai inimpa. Inique ii tēemancoo tadömengadænguipo ontatodë ta æiyonte nænque tönö öönæ wentamö pöni badaimpa. ³ Tēemancodë inö ñäwäi ta pöninque inguipoga iñömö wæænönänite wacä godö cæcä beyænque tömënäni tæimö badinque emëñe inguipoga quëwënäni bai tæ guidäni badänitapa. ⁴ Ayæ tömënäni inänite, Inguipoga gaguimæncoo incæ gæpæñabocoo incæ awæncoo incæ pæcoo wo ewënamäi iedäni. Wæætë waodänique öönëmö inö Wængongui nänö yewämöi inte në yewämönämai ingainäni inänite adinque minitö tömënäni inänite godö cæmini beyænque nantate wæcædänimpa, ante wacä angantapa. ⁵ Ayæ ñäwäidi inänite

edæ, Wænöedäni, änämaï ingä inte tömengä, Minitö wæætë tömënäni inänite önompo æmæmpoque apäicä ganca cæmini beyæ nanguï pönï wæwencädänimpa, angantapa. Ìnque emëñe tæ guï waocä nantate wæcä bai tömënäni nanguï pönï nantate wæwënäni inänitapa.

⁶ Mäniñedë waodäni, Æbänö cæte wænguïmoo, ante ancaa cædinque wænämaï incädänimpa. Wæinëmönipa, ante änäni incæte ædö cæte wæmäinänii.

⁷ Ayæ ñawäiidi iñömö tontadoidi cabayoidi guëadö guëa cæte nê godäni bai adobai emönänitapa. Tömënäni ocaboga awënë poganta oodo inte badöninta bai wencadänitapa. Ayæ mäninäni awinca iñömö waodäni awinca bai emönänitapa.

⁸ Tömënäni ocaguï iñömö onquiyængä ocaguï bai encadinque tömënäni bagacoo iñömö nêöö бага bai engadänitapa.

⁹ Tömënäni tæcætawë inö tæineta inte badöinta bai wææ mongæänänitapa. Ayæ tontadoidi guëadö guëa wænoncæte ante cædinque änäni ate cabayoidi pogodo gote awoto bai wëä pönonte nanguï pönï ä bai ñawäiidi iñömö adobai önonguënepæ pao pao godinque ämæ godänitapa.

¹⁰ Tömënäni önömiñæ incæ emëñe önömiñæmpa bai emiñænänitapa. Tömënäni nani tæi piñæmämo önömiñæ inö emiñænäni inte önompo æmæmpoque apäicä ganca godö cädäni beyæ waodäni nanguï pönï wæwënänitapa.

¹¹ Mänii ñawäiidi iñömö awënë odeye ingante ëñente quëwënänitapa. Mäningä tömënäni awënë iñömö tadömengadænguipo iñömö quëwënäni inänite nê aacä anquedo inongä inte tömengä emöwo ebedeo tededö, Abadoö, nani äwo i ayæ, Nê Wo Èwengä, ante emongä ininque guidiego tededö, Apodiö, ante pemönänipa.

¹² Täno nani wæquinque do inque batimpa. Incæte godömenque mempoga ganca nanguï pönï nani wæquinque ayæ baquinö angüënë.

¹³ Wængonguï anquedo ayængä iñömö tömengä todompeta inte we we öngä ate tedepämo tēñö ëñentabopa. Oguï waquï iya täimpa oodo inte badöimpa Wængonguï weca mä ongompa. Mänimoga önömoncawæ bai mäa go mäa mä

ongöñömö mäniñömö tedepämo tēñö ëñentabopa. ¹⁴ Wængonguï anquedo ayængä todompeta nê næængä ingante iïmaï angantapa. “Ñænæ önonga Eopadatedö nani änonga iñömö anquedoidi mënaa go mënaa inäni iñömö nê ñä cæyëninäni inänite bitö ñimpo cæe,” angantapa. ¹⁵ Edæ mäninäni anquedoidi mënaa go mënaa inäni iñömö tömënäni mäninpo inque ba ate mäniï apäicä iñonte mäniönæ incæ mäniï ooda iñonte dobæ nani cæquinque ante a ongöñönänite iïmaï angantapa. Waodäni tömänäni iñömö mencabodäniya go adocabodänique quëwëñönäni adocabodänique inänite minitö wænoncæminimpa, angantapa. Ayæ ñowo tömënäni inänite ñimpo cæcä ate tömënäni wænoncæte ante tao godänitapa. ¹⁶ Ayæ tontadoidi iñömö cabayo mongæinäni inäni æpodänidö inänii, ante tee mampote dootiento miñöö ganca inänitapa. Mänimpodäni inänipa, ante ëñentabopa.

¹⁷ Botö wiimonte bai ayömo cabayoidi tönö nê mongæinäni iñömö iïmaï emönäni atabopa. Cabayo nê mongæinäni iñömö tæcætawë inö tæineta nani wææ mongæntacoo pancataa opatawæ gonga gonte bai emontapa. Pancataa wentamö emontapa. Pancataa atopode nani ä bai wiñadæ emö bai emontapa. Cabayoidi ocabo iñömö nêöö ocabo bai encadänitapa. Tömënäni önöne inö gonga tönö tēemä tönö atopode nani öö waadö tadedänitapa.

¹⁸ Mänii gonga tönö tēemä tönö atopode iñömö mëmämoque go adopämoque nani wænömämocoo nê tadedäni inte cabayoidi iñömö waodäni tömänäni mencabodäniya go adocabodänique quëwëñönäni adocabodänique inänite wænönäni wænänitapa.

¹⁹ Mäninäni cabayoidi tömënäni önöne inte tæi piñænte wænöninque adobai tömënäni önömiñæ inte tæi piñænte wænönänipa. Edæ tömënäni önömiñæ iñömö tæntæ ocabo bai emiñænäni inte waodäni inänite pocænäni wænänitapa.

²⁰ Mänimämo wodonte nani wængaïmämocoo beyæ ayæ wænämaï quëwënäni inte wæwënäni incæte tömënäni nani wënæ wënæ cægäinö ante, Ancaa wæwente awædö, ante pönënämaï inäni inte ñimpo cädämaï inänitapa. Wæætë oodo inte

padata inte bodonte inte dica inte awæmpa inte tömënäni nāni badonte cönönincoo iñömö adāmaī incoo incæte eññēnāmaī incoo incæte dao dao godāmaī incoo incæte tömënäni, Mönitö wængonguīdi inānīpa, ante ædæ wæænte apænedinque ñimpo cædāmaī inānitapa. Ayæ adobaī wënæidi inānite ædæ wææninque, Minitö mönitö wængonguīdi imīnidö anguēnē, ante ñimpo cædāmaī inte apænedānitapa. ²¹ Ayæ mānīnāni godömenque waodāni inānite piinte wænönāni inte tömënäni mii bete yewænāni inānīpa. Nänöogængä ināmaī iñongante towente cædönāni inte tömënäni awēmö ö ænāni inānīpa. Mänömaī godömenque cædinque tömënäni nāni wënæ wënæ cægainö ante, Ancaa wæwente awædö, ante pönēnāmaī ināni inte ñimpo cædāmaī inānitapa.

10

Wængonguī anquedo dadi ompointa guiyanta næcængä

¹ Ayæ wacā anquedo nē tæi emongä inte öönædē inö wæængä atabopa. Tömengä weocoo mongænte bai boguimancodē pöninque tömengä ocaboga tæcædæca inö daimē godāmæ owotapa. Tömengä awinca incæ nænque bai apäidinque tömengä önömēnē incæ cobacadewæ gonga gonte emö bai emēnengä ingantapa. ² Tömengä önönempo inö dadi ompointa ininta nāni wi æmpodinta guiyanta næcængä ingantapa. Tömengä önöwa tömēwa gāwapæntibaa cö cæwadinque tömengä dipæwa guiquēnē ömaa cö cæwacantapa. ³ Mänömaī cö cæwadinque tömengä nēöö ii pepa bai nangui pōni yedæ aa pecantapa. Aa peyongä detæbo önompo æmæmpoque go mēa ganca wæætē tæi tēninque tededānitapa. ⁴ Detæbo önompo æmæmpoque go mēa ganca ināni iñömö tededāni eññēninque botö yewæmoncæ cætabopa. Tæcæ yewæmoncæ cæyömo öönædē inö tedepāmo iīmaī ante tedecā eññentabopa. “Iñæmpa önompo æmæmpoque go mēa detæbo nāni tededö æbānō ante tededāni, ante wii eñngui i ininque bitö yewæmönāmaī iē,” angantapa.

⁵ Wængonguī anquedo botö adingä iñömö gāwapæntibaa tönö ömaa nē a ongongä

iñömö tömengä önompo tömempo öönædē inö pædæ æmpocantapa. ⁶ Tömengä tömempo pædæ æmpodique, Wængonguī eññēngä botö änö ante nöingä baquinö anguēnē, ante iīmaī angantapa. Edæ nē wantæpiyæ cöwē quēwengängä inte öönædē tömää inguipoga tömää gāwapæntibæ tömää badöninque tömengä adobaī öönædē owodāni tömānāni inguipoga quēwēnāni tömānāni gāwapāa quingānō owodāni tömānāni inānite nē badongängä inte tömengä emöwo apænedinque, Botö apænedö nöingä baquinö anguēnē, ante nē apænecā iñömö, “Mönö ee ongöñedē do iinque batimpa, angantapa. ⁷ Edæ Wængonguī anquedo tömängä pōni iñömö tömengä todompeta we we öoncæ cæyongante Wængonguī nänö cæinēnō ante wē wodonte bai nänö angainö ante ñöwo iinque cæcæcäimpa. Wængonguī ingante nē cægaināni tömengä beyæ nē apænegaināni iñönānite mānīnō nänö cæinēnō ante do apænegaingä inte Wængonguī mānīnō bai ñöwo iinque cæcæcäimpa,” angantapa.

⁸ Ayæ öönædē inö tedepāmo adopāmo do botö eññēnō ñöwo wæætē botö imote iīmaī angä eññentabopa. “Wængonguī anquedo nē gāwapæntibaa tönö ömaa iñömö a ongongä weca godinque bitö tömengä önönempo dadi ompointa ininta nāni wi æmpodinta nänö nææininta æe,” angantapa. ⁹ Angä eññēninque Wængonguī anquedo weca godinque botö tömengä ingante, Dadi ompointa guiyanta pönömi æmoe, ante añömo tömengä wæætē botö imo, “Æe. Æninque cæe. Bitö önöne da wēneyömi guiñēmæ bai waēme pōni ingæimpa. Incæte yo mongænte ate cæncadē guiidinque ti nā bacæimpa. Iinque cædente wæcæbiimpa,” angä eññentabopa.

¹⁰ Wængonguī anquedo önönempo dadi ompointa guiyanta æninque botö ade cæntabopa. Önöne guiñēmæ bai waēme pōni i incæte yo mongænte ate cæncadē guiidinque ti nā badinque cædente wætabopa. ¹¹ Ayæ botö imote angantapa. “Wacā awēnē nāni cabo wacā awēnē nāni cabo incæ wabæca nāni quēwencabo wabæca nāni quēwencabo incæ wadö nāni tedecabo wadö nāni tedecabo incæ wabæca wabæca nāni awēnē odeye cabo iñönānite

bitö, Mäninäni inänite æbänö baquii, ante wæætē Wængongui beyæ apæneceæbiimpa,” ante angantapa.

11

Wængongui æbänö cæcää, ante mënaa apænedapa

¹ Wacä botö imote, Tee manguimpa impa, ante cæwipa bai pædæ pönöninge ayæ botö imote, “Goe, angantapa. Wængongui oncö tæiyæ waëmö oncönē godingue mänincö tönö, Wængongui qui, ante nani iya täimpa tee mäe. Ayæ waodäni adoyömö ædæ wææninge Wængongui ingante, Bitö Wængongui Awënë imidö anguënë, ante watapæ apænedäni iñömö æpodänidö inänii, ante tee mampote cæe. ² Wængongui oncö tæiyæ waëmö oncönē tee mäningue yacö boyäa iñömö tee mänämaï ie. Edæ mänincö boyäa wadäni oodeoidi inämaï inäni inänite do godonte intapa. Mäninäni edæ coadenta i doo apäicä ganca mänimpoga iñonte Wængongui nänö tæiyæ waëmö quëwëñömö incæ wo ëwente cæcædänimpa. ³ Ayæ botö imotedö ante, Botö æbänö cæboo, ante nē, Nö ante impa, ante apænedä iñönte botö godö cæquimo beyænque tömëna tæi piñænte badingue miido dootiento tetenta eönæ mänimpoönæ iñonte botö beyæ apæneceædäimpa. Waodäni wæwente beyænque gömæ ëmoncoo mongænäni bai tömëna adobai gömæ ëmoncoo mongæninge apæneceædäimpa,” ante apæneceä ëñentabopa.

⁴ Wængongui æbänö cæcää, ante nē, Nö ante impa, ante apænedä iñömö tömëna iñömö Wængongui inguipoga Awënë iñongante tömengä weca odibowæ nani äwæ mëwäa ongöwæ bai inapa. Ayæ tömengä weca yædo concædi ti wodönoincade mencadea ongoncade bai mänina iñömö adobai inöna inapa. ⁵ Wadäni, Tömëna inate wënæ wënæ cæinëmopa, ante cædäni iningue tömëna wæætē nē piinte cædäni inänite gonga wo tadete bai cædinge wænöna wæncædänimpa. Edæ, Tömëna inate wënæ wënæ cæinëmönipa, ante nē cædäni tömänäni mänömaï wæncædänimpa.

⁶ Wængongui godö cæcä beyænque

tömëna tæi piñæna badingue, Wængongui beyæ möna apæneyedē cöönæ cædämaï ingæimpa, ante cædinge öönæde tee mönete bai cæcædäimpa. Ayæ tæi piñæna inöna inte tömëna æyedëmē cæinëna incæ wæætē wæætē cæyönate æpæncoo tömancoo wepænque bacæimpa. Adobai inguipoga tömämæ quëwëñäni inänite tömëna cæda ate quiëmē wænömämocoo incæ pö wënæ wënæ bacædänimpa.

⁷ Ayæ tömëna, Wængongui æbänö cæcää, ante iningue apænedä ate babæcä bai mönö guiñëngä inte tadömengadænguipo inö tadinge tömëna inate guëadö guëa cædinge tæi ëmongä inte gänä cædinge wænongä wæncædäimpa. ⁸ Wænä

ate tömëna baonque ñænængade nani quëwëñömö taadö iñömö öñoncedäimpa. Edæ Todömä iñömö quëwëñäni wiwa cædäni bai ayæ Equitobæ quëwëñäni wënæ wënæ cædäni bai mänii ñænængade nani quëwëñömö nē quëwëñäni iñömö adobai wënæ wënæ cædänipa. Mänii quëwëñömö adoyömö tömëna Awënë ingante awäa timpote wænönäni wængacäimpa. ⁹ Mëönaa go adoönæque go tæcæ itæde iñonte tömëna baö ini acæte ante pöningue wacä awënë nani cabo wacä awënë nani cabo incæ waodäni nani cabo waodäni nani cabo incæ wadö nani tedecabo wadö nani tedecabo incæ wabæca wabæca nani quëwëncabo incæ waodäni nanguï inäni ponte tömëna baö acædänimpa. Ayæ, Da wënämaï ingæimpa, ante wææ cæcædänimpa.

¹⁰ Tömëna iñömö Wængongui beyæ nē apænedäna inöna inte inguipoga quëwëñäni inänite nanguï äna wædinäni inte tömëñäni ñöwo wæætē watapæ tocædänimpa. Iningue tömëna mänömaï wænte öñöna ate tömëñäni nanguï Yæ yæ todingue wacä ingä wacä ingä, Önonque æe, ante pædæ godönäni æncædänimpa.

¹¹ Mëönaa go adoönæque go tæcæ itæde iningue go ate Wængongui edæ, Quëwëncæmëna, ante tömengä nänö guëmämämo quëwënguimämo woo öongacä ate tömëna iñömö wæætē miina badingue ængæ ganticædäimpa. Ængæ gantiyöna nē adäni guiquënë ancai guiñente wæcædänimpa. ¹² Ancai guiñente ayönäni tömëna öönæde inö tedepämo

yedæ ante eñencædaimpa. “Iñömö pö æeda,” angä eñenique tömëna öönæde inö boguimancodë æiyöna tömëna inate nê piinte cædinäni edonque acædänimpa. ¹³ Tömëna æiyedë mäniñedë goinque nanguï ocæ ocæ goquimpa. Tömënanäni nänäni quëwëñömö onconcoo bacoo iñonte pancaconga incæ nanguï onconcoo acapowate bogocæ tæ gowæænguimpa. Ado goinque goyedë waodäni tiæte müido ganca wæncædänimpa. Ayæ müinänäni quëwënanäni ancaï guñëninque, Wængonguï öönæde nê quëwëmi imi inte bitö nö tæi piñænte imidö angüenë, ante wæcædänimpa.

¹⁴ Ayæ mempoga nänäni wæquinque do iñque batimpa. Incæte godömenque adopoque nanguï pönäni nänäni wæquinque oo pönäni bacæimpa.

Todompeta æmæwoya

¹⁵ Wængonguï anquedo tömangä iñömö tömengä todompeta we we öongä ate öönæde inö wadäni nänäni tedepämo yedæ tededinque iimaï änänitapa.

“Mönö Awënë Wængonguï tömengä Codito tönö inguipoga Tæiyæ Awënë Odeyeda badinque

wantæpiyæ cöwë aacædaimpa,” änänitapa.

¹⁶ Nê aadäni nê Picænänäni iñömö bæinticoatodo ganca inänäni mänimpodäni iñömö Wængonguï weca tömënanäni awënë tæ contaimpaa nê tæ contadäni inte ñowo guidömëmæ ædæ wææninque Wængonguï ingante, Bitö Awënë Wængonguï imidö angüenë, ante watapæ apænedänitapa.

¹⁷ Ayæ iimaï apænedinque, “Awënë Wængonguï bitö adobique Tömää nê Cædömi inte wëenëñedë do nê quëwengäimi imi ñowobi inömi imipa.

Bitö nämä tæi piñæmi inte ñowo ædæmö nê aabi inömi imipa, ante adinque bitö imite waa ate pönente apænemönipa.

¹⁸ Wabæca wabæca nänäni quëwencabo incæ tömänänäni quëwënanäni ænguï badänitapa.

Ayæ bitö ænguï babi iñinque nê wængainänäni inänite bitö apænte pangüönæ do batimpa.

Ayæ bitö beyæ nê apænedönäni iñömö bitö imite nê cædönäni iñönänite tömënanäni inänite bitö, Minitö cædi beyæ paga cæbo æncæminimpa, ante bitö godonguïönæ dobæ batimpa.

Ayæ bitö quänäni iñönänite bitö emöwo ante bitö imite nê eñente cædönäni iñönänite

awënë bai inänäni incæ önönänique inänäni incæ tömänänäni inänite bitö, Minitö cædi beyæ paga cæbo æncæminimpa, ante bitö godonguïönæ dobæ batimpa.

Ayæ inguipoga quëwënanäni inänite wadäni nê wo ewente cædönäni iñönänite bitö wo ewente cæquiönæ do batimpa.”

¹⁹ Ayæ öönæde inö Wængonguï tæiyæ waëmö oncö odemö wibænetapa. Wibæneyö Wængonguï, Waodäni æbänö cæte botö tönö godongämæ waa cæte quëwencædänimpa, ante odömoncæte ante nänö yewæmongainca nänäni da wencaincade iñömö mänincönë mä ongoncade atabopa. Ayömote yædæ yædæ näninimpa. Yedæ pönäni änimpa. Detæbo tæi tæi tēñö yedæ pönäni änimpa. Goinque gotimpa. Ayæ yoguica cöönæ bai nanguï cæte wæænimpa.

12

Onquiyængä tönö dadagöo nänäni änongå

¹ Wængonguï, Mä pönäni odömömo adinque eñencædänimpa, ante cædinque öönæde inö waëmö pönäni badongä a owo atabopa. Edæ onquiyængä iñömö nænque inte weocoo wëñate bai mongæñongä apäicämo incæ tömengä cæncadëwa ænömengadæwa inö impa. Tömengä, Awënë poganta, ante tipæmpoga go mä nêmöidi inte godämæ badöinta wencacantapa. ² Mäningä onquiyængä yædëmadä ënengä iñongante wëñængä eñacæ cæcä wæte wædinque wëñæ nantate Yæ yæ wæcantapa.

³ Iñinque Yæ yæ wæyongante öönæde inö mä pönäni Wængonguï nänö badöi wadö bai badöi a owo atabopa. Edæ ñænængade obe bai dadagöo nänäni änongå opatawæ eñacä inte tömengä ocabocoo önompo æmæmpoque go mencaa encacä inte mänii ocabocooga awënë pogantacoo önompo æmæmpoque go mentaa wencacä

ingantapa. Tömengä önömoncawæ adobai önompo tipæmpoga ocabocooga encacä ingantapa. ⁴Tömengä önoncaimifænca picæ cæmifænique öönæde owodäni nemöidi incæ pancadäniya incæ nangui inäni inänite wææntodongä inguipoga tæ wæænänitapa. Onquiyængä oo pöni ifhongante dadagöö, Wëñængä ëñacä ate cæncæboimpa, ante tömengä weca a ongongantapa.

⁵ Onquiyængä wëñængä onguifængä ingante mangä inique tömengä ifnömö nänö Awënë baquinque pæcantapa. Tömengä ifnömö tæiyæ awënë tömengä nempo quëwëñäni inänite aacä bai adobai tömämæ quëwëñäni inänite, Ifmaï cæedäni, ante aacæcäimpa. Mäningä onquiyængä wëñængä ingante wacä ö ænte Wængongui weca ayæ tömengä nänö aacæ tæ contayömö mäniifnömö ænte mäicä æicantapa. ⁶ Mäninö bayonte wäänä ifnömö önömæca ifnömö wodii gocantapa. Tömengä beyæ ante Wængongui nänö eyepæ cæyömö mäniifnömö wodii gocantapa. Mäniifnömö miido dootiento tetenta eönæ mänimpoönæ ifonte tömengä quëwente beyæ cængui eyepæ pönönäni cæncæcäimpa, ante Wængongui tömengä nänö owoyömö ante do badongantapa.

⁷ Mäniifnedë edæ öönæde ifnömö guëadö guëa cæte wænönänitapa. Wængongui anquedo Miiguedo nani angaingä ifnömö tömengä wadäni anquedoidi awënë inongä ingampa. Tömengä tömënäni tönö dadagöö ingante wido cæcæte ante cæyönäni dadagöö wæætë tömengä anquedoidi tönö wæætedö wæætë guëa cædäni incæte ⁸ tömënäni ædö cæte gänä cæquifnänii. Edæ ædö cæte öönæde ifnömö ayæ quëwenguifnänii, ante tömënäni inänite wido cædänitapa. ⁹ Tömënäni ifnömö ñænængade dadagöö ingante wido cæte wææntodönänitapa. Mäningä dadagöö ifnömö wëñëñedë tæntæ ingaingä inte tömengä ëmowo Wënæ Tatäna mëwoga ëmongä ingampa. Adocä, Inguipoga quëwëñäni tömännäni oda cæcædänimpa, ante nê wapiticæ ænte mäocä ingampa. Tömengä ingante ayæ tömengä anquedoidi inänite inguipoga ifnömö wido cæte wææntodönänitapa.

¹⁰ Ayæ ate öönæde inö tedepämo yedæ ante ifmaï ä ëñentabopa.

“Ñöwoönæ mönö Wængongui mönö imonte, Minitö botö æmæwo æmo beyænque quëwenguifnini, ante tömengä nänö cæönæ batimpa.

Ayæ tömengä nänö tæi pifnænö ñöwoönæ ba inique

tömengä adobai Tæiyæ Awënë Odeye ñöwoönæ bacäimpa.

Ayæ tömengä nänö apænte ængaingä mönö Codito adobai nämä tæi pifnængä inte nê angä bacäimpa.

Wënæ guiquënë mönö tönifnadäni inänitedö ante, Wënæ wënæ cædänidö anguënë, ante wapiticæ apænete anewëngä ingampa.

Woyowotæ incæ itæde incæ mönö Wængongui weca a ongöninge

tömengä mäniifnänii inänitedö ante nê wapiticæ anewëngä ifhongante tömengä ingante inguipoga ifnömö wææntodönäni wæængantapa.

¹¹ Wængongui Codotedo wepæ tömengä nänö wænte godongaïmæ beyænque tæi ëmönäni badinque

mönö tönifnadäni ifnömö wënæ ingante gänä cædänitapa.

Ayæ, Wængongui æbänö cæcää, ante tömënäni nani apænedö beyænque tömënäni tæi ëmönäni badinque wënæ ingante gänä cædänitapa.

Wadäni tömënäni inänite Wængongui beyæ wænönæ cæyönäni tömënäni,

Mönitö guifnëñämaï wæncæmönimpa, ante nê änäni inänitapa.

¹² Mänömaï beyæ minitö öönæde ifnömö nê quëwëfni inte watapæ tocæminimpa.

Wamini guiquënë inguipoga ifnömö æpæntibæde ifnömö nê quëwëfni inte mini wæquinque ingæimpa.

Edæ wënæ minitö weca wææ pö quëwëngäimpa.

Tömengä nänö wo ëwenguifnö oo pöni impa, ante ëñente beyænque äingä pöni bacampa.

Mänömaï beyæ minitö guifnëngüimämo baquinque impa.”

Mänömaï ante yedæ angä ëñentabopa.

¹³ Ayæ dadagöö, Botö imote inguipoga ifnömö wido cæte wææntodönäni

adi wædö, ante wædinque onquiyængä ingante wëñængä onguiñængä nē mäningä ingante bæi ongoncæte ante togængantapa. ¹⁴ Incæte Wængongui, Önömæca iñömö bitö beyæ botö cæyömö pao pao gocæbiimpa, ante cædinque ñænængade guingämöwæ ononguënepæ bæi tipænguënepæa pönö badongä enguënepænte bæi onquiyængä bacantapa. İninqe onquiyængä, Tæntæ botö imote bæi ongönämaï incæcäimpa, ante Wængongui önömæca tömengä beyæ nänö cæyömö pao pao gocantapa. Mëa go adoque tæcæ wædepo iñonte tömengä mäniñömö quëwente beyæ nänö cængui eyepæ ænte cænguiñömö gocantapa. ¹⁵ Ayæ, Onquiyængä ingante æpæ quingæ mangui bæi bæ ta tæi guicæcäimpa, ante cædinque dadagöö tömengä önöne inö önö bæi æpæ towæ tadonte bæi tao godecantapa. ¹⁶ Dadagöö towæ tadonte bæi nänö tao godepæ quingæ pöñö onguipo incæ onquiyængä beyæ ante cædinque wi ænete cæyö ada guipæntapa. ¹⁷ Ada guipæ adinqe dadagöö iñömö onquiyængä ingante godömenque ængui badinqe wadæ godinqe, Mäningä onquiyængä wënäni incæ wadäni inänite guëa cæte wænonguimo, ante gocantapa. Tömënäni Wængongui nänö, İimaï cædäni, ante wææ angainö ante nē eñente quëwënäni inte, Itota æbänö cæcää, ante nē apænete quëwënäni inönäni iñömö mäniñäni mäningä onquiyængä wënäni iñönänite dadagöö, Wænoncæboimpa, ante gocantapa.

13

Mënaa mönö guiñënöna

¹ Ayæ dadagöö æpæntibæ yæwedeca emönaiya iñömö ponte a ongongantapa.

Ayæ babæcä bæi nē guiñënongä iñömö æpæntibæde quëwente ta pöñongä atabopa. Mönö guiñënongä tömengä ocabocoo onompo æmæmpoque go mencaa encacä inte tömengä önömoncawæ onompo tipæmpoga ocabocooga inö encacä ingantapa. Awënë pogantacoo tipæmpoga ganca tömengä önömoncawäa da da wencate encacantapa. Ayæ Wængongui emöwo incæ wiwa babæ wapiticæ ante äniwoï tömengä

ocabocooga tömancooga inö yewæmonte encacä ingantapa. ² Mäningä mönö guiñënongä botö nē adingä iñömö mēne bæi emönongä incæte tömengä önöwa oto önöwa bæi ewacä inte tömengä önöne nēöo önöne bæi enecä atabopa. Ayæ dadagöö nämä nänö tæi piñænö ante mönö guiñënongä ingante pædæ godöninque tömengä nänö aacæ tæ contaimpa pædæ godongä ænte tæ contadinque mönö guiñönongä nē awënë badinqe, İimaï cædäni, ante nangui angä bacantapa. ³ Ayæ mönö guiñënongä adoque ocaboga ämocate wæncæ cæcä bæi ingaingä incæte gämæ cæcate ingantapa.

Tömämæ quëwënäni mönö guiñënongä ingante adinqe ancai guiñëninque tömänäni tömengä miñæ godänitapa. ⁴ Dadagöö godö cæcä beyænque mönö guiñënongä iñömö awënë badinqe dadagöö bæi nē angä do bacä impa, ante adinqe tömänäni dadagöö ingante, Bitö Awënë Wængongui bæi imidö anguënë, ante apænedänitapa. Adobaï mönö guiñënongä ingante, Bitö Awënë Wængongui bæi imidö anguënë, ante apænedänitapa töö. Mäninö ante godömenque iimaï äninque, “Æcänö mönö guiñënongä bæi ingä iñömö edæ dæ angampa. Æcänö tömengä ingante guëadö guëa cædinque tæi emonte gänä cæquingäa.”

⁵ Dadagöö godö cæcä beyænque mönö guiñënongä iñömö nämanque pönente anewëningä badinqe Wængongui ingantedö ante babæ wapiticæ ante anewëninque, Botö Wængongui bæi imopa cæminii, anewëngantapa. Ayæ awënë badinqe nē angä badingä inte mönö guiñënongä iñömö coadenta i doo apäicäa mänimpoga iñonte, İimaï cædäni, ante aacantapa. ⁶ Ayæ tömengä mäniñedë Wængongui ingantedö ante wënæ wënæ babæ wapiticæ ante anewëningä inte Wængongui emöwo ante tömengä nänö quëwëñömö ante babæ wapiticæ ante anewëngantapa. Tömënäni öönæde nē quëwënäni inänitedö ante adobaï babæ wapiticæ ante anewëngantapa. ⁷ Tömengä Wængongui quinäni inänite guëadö guëa cæcæcäimpa, ante cædinque dadagöö godö cæcä beyænque tömengä nämä tæi piñængä badinqe tömënäni inänite tæi emongä

inte gänä cæcantapa. Ayæ dadagöö godö cæcä beyænque mönö guiñenongä iñömö waodäni nani cabo waodäni nani cabo incæ wacä awënë nani cabo wacä awënë nani cabo incæ wadö nani tedecabo wadö nani tedecabo incæ wabæca nani quëwencabo wabæca nani quëwencabo iñönänite tömengä tömänäni awënë badinque tömënäni inänite, İimaï cæedäni, ante nē angä bacantapa.

⁸ Mänömaï beyæ tömämæ quëwënäni iñömö tömengä ingante, Bitö Awënë Wængongui bai imidö anguënë, ante apænedänimpa. Wængongui inguipoga nänö badöñedë, Botö Codotedo ingante do wænönäni wæncæcäimpa, ante do angacäimpa. İingä Codotedo, Nani quëwenguinta, ante nänö yewæmongaintaa ædänidö emöwo yewæmönämaï inäni iñömö tömënänique mönö guiñenongä ingante, Bitö Awënë Wængongui bai imidö anguënë, ante apænedänimpa.

⁹ Nē ēamonca imini inte eñëedäni.

¹⁰ “Æcämenque ingante ante apænedinque Wængongui, Ao bæi ongonte tee mönete bai cæedäni, angä İinque tömengä ingante do bæi ongonte tee mönecædänimpa.

Æcämenque ingante ante apænedinque Wængongui, Ao yaëmenca wænömini wæncæcäimpa, angä İinque tömengä ingante do yaëmenca wænönäni wæncæcäimpa.”

Mänömaï beyæ minitö Wængongui quimini iñömö wæntæye inämaï inte ee cæcæminimpa. Edæ tömengä ingante godömenque wede pönencæminimpa.

¹¹ Ayæ ate wacä babæcä bai nē guiñenongä guiquënë onguipodë quëwente ta pöñongä atabopa. Codotedoidi önömoncawæ mēwäa nani emoncadö bai tömengä adobai encacä ingantapa. Incæte tömengä dadagöö bai tedecantapa. ¹² Mönö guiñenongä tänocä pöningä nänö änö beyænque ayængä pöningä iñömö awënë badinque tänocä beyænque äninque, İimaï cæedäni, ante nē aacä ingantapa. Tänocä pöningä mönö guiñenongä ämocate beyæ nē wæncæ cæcä incæ wæætë gämæ cæcadingä iñongante ayængä pöningä iñömö tömämæ quëwënäni inänite angä eñëinque

tömänäni tänocä pöningä ingante, Bitö Awënë Wængongui bai imidö anguënë, ante apænedänitapa. ¹³ Mäningä mönö guiñenongä ayængä pöningä, Mä pöni cæbo adinque eñencædänimpa, ante cædinque badongampa. Ayæ godömenque mä pöni cæcä beyænque waodäni edonque pöni ayönäni öönæde inö incæ gonga inguipoga wææ adänitapa.

¹⁴ Mönö guiñenongä tänocä pöningä nänö änö beyænque tömengä weca mä cædinque ayængä pöningä iñömö tömämæ quëwënäni inänite oda cæte nani goquinö ante mäocä godänitapa. Edæ tömënäni inänite äninque, Mönö guiñenongä yaëmenca guiyömö wæætë gämæ cæcate nē mlingä quëwengä nänö emönö bai adobai badöedäni, angä eñente badonte concædänitapa. ¹⁵ Mönö guiñenongä ayængä pöningä iñömö eyepæ cædinque mönö guiñenongä tänocä pöningä nänö emönö bai nani badöninca incæ, Tedecæcäimpa, ante cæcä ate mäninca incæ oo guëmangantapa. Tömënäni nani badöninca ante waodäni Baa äninque, Bitö Awënë Wængongui bai imidö anguënë, ante apænedämaï inäni inänite mäninca incæ ä beyænque wænönäni wænänitapa.

¹⁶ Ayæ awënëidi bai inäni incæ önönänique incæ mäincoo ëadäni incæ mäincoo ömæpodäni incæ wacä godonte æningä beyænque nē cæte quëwënäni incæ nämanque cæte quëwënäni incæ mäninäni tömänäni inänite tömengä nänö änö beyænque önompo tömempo inö yewæmöinäni badänitapa. Wæætë önompo tömempo inö yewæmönämaï inäni inte tömënäni önönemö inö yewæmöinäni badänitapa. ¹⁷ Tömengä nänö yewæmöi yewæmönämaï inäni guiquënë tömënäni mäincoo ædö cæte godonte ænguänäni. Ædö cæte godonte ænäni weca gote tömënäni mäincoo ini godonte ænguänäni. Ayæ mäninö ante yewæmöi iñömö mönö guiñenongä tänocä pöningä emöwo impa. Wii tömengä emöwo yewæmonte i bai tömengä emöwo ante beyæ, Æpodö i, ante yewæmonte impa.

¹⁸ Mäninö ante eñencæte ante nani eñëno ante eyepæ encadäni inte eñencædänimpa. Ocai nē encacä İinque, Mönö guiñenongä tänocä pöningä nänö, Æpodö i, ante

ēñencæte ante cæcæcäimpa. Edæ tömengä, Æpodö i, ante waocä, Æpodö i, ante adopo impa. Tömengä nänö, Æpodö i, ante teitiento teitenta i tei impa.

14

144.000 ganca inäni nāni ämotamini äinö

¹ Ayæ botö ayömote Wængongui Codotedo änanquidi inömö Tiöno nāni anquidi māniñömö a ongongä atabopa. Tömengä weca waodāni tiento coadenta i coatodo miido ganca inäni inte Wængongui Codotedo emöwo adobaï tömengä Mæmpo Wængongui emöwo nāni önönemö inö nē yewæmōināni inte a ongönāni atabopa. ² Ayæ botö ēñēñömote öönædē inö tedepāmo ante ñænæ tēñabo ante bai detæbo eyequei tē bai ēñēñinque adobaï waodāni nāni adapate nāni ampoque inte tæiyænāni ampyönāni ante bai tedepāmo tē ēñentabopa. ³ Tiento coadenta i coatodo miido ganca inäni inömö mā äninque waa ämotamini ante änanitapa. Wængongui nänö aacæ tæ containpa gäänē ämotamini äñönāni miināni quēwēnāni mēa go mēa ganca inäni nē aadāni nē Picænāni tönö ēñēñānitapa. Tiento coadenta i coatodo miido ganca inäni inguipoga quēwēnāni tönö adoyömö quēwēñönāni, Godonte æmo beyænque quēwenguimini, ante Wængongui nänö nē æninānique i ämotamini äinö ante ēñente ancædänimpa. Wadāni guiquēnē ædö cæte ēñente anguināni.

⁴ Inäni inömö Wængongui ingante ante waemö quēwencæmönimpa, ante cædinque, Onquiyængä, ante nē towēnāmaï ingaināni inānipa. Ininque tömēnāni Wængongui Codotedo ædönö gocä tömengä miñæ cōwē godānipa. Tömēnāni waodāni tönö adoyömö quēwēñönāni Itota, Botö wepæ beyænque quēwenguimini, ante tömēnāni inānite ængacäimpa. Täno amiña bayedē tā pedinque mīnitö, Wængongui quī baquimpa, ante mīni cōnōni bai mānināni adobaï Wængongui quīnāni badinque Wængongui Codotedo quīnāni inānipa. ⁵ Adodāni cōwē babæ änāmaï ināni ininque wadāni ædö cæte tömēnāni inānitedö ante, Babæ änānipa, ante anguināni. Tömēnāni edæ cōwē wēnæ wēnæ cædāmaï inānipa töö.

Wængongui anquedoidi mēnaa go adocanque nāni änö

⁶ Ayæ Wængongui anquedo wacä inömö öönædē inö pō pao pao gocä atabopa. Inguipoga nē quēwēnāni inānite wabæca nāni quēwencabo wabæca nāni quēwencabo incæ waodāni nāni cabo waodāni nāni cabo incæ wadö nāni tedecabo wadö nāni tedecabo incæ wacä awēnē nāni cabo wacä awēnē nāni cabo inñönānite anquedo tömānāni inānite Wængongui wantæpiyæ cōwē nänö watapæ apænedö ante ēñencædänimpa, ante apæñecæte ante pongantapa. ⁷ Māningä Wængongui anquedo inömö yedæ iimaï äninque, “Wængongui apænte nänö anguiönæ do iinque bayonte māniönæ tömāmīni mīni cægainö ante tömengä apænte ancæcäimpa. Ininque tömengä ingante guīñēñinque ee aedāni. Adobaï tömengä ingante waa aedāni. Tömengä edæ öönædē incæ inguipoga incæ æpæntibæ incæ æpæ tayömö incæ tömäa nē badongaingä ingante mīnitö, Bitö Awēnē Wængongui imidö anguēnē, ante ædæ wææninque watapæ apæneedāni. Māninque ämopa,” angantapa.

⁸ Māningä Wængongui anquedo gocä ate wacä Wængongui anquedo ayængä pōninque iimaï angantapa. “Babidōnia nāni äñömö do wo ewente batimpa. Babidōnia nāni waemö quēwēñömö i incæte do wo ewente ba aedāni. Māniñömö nē quēwēnāni wēnæ wēnæ cædināni inömö onquiyængä nē towengä bai cædinque biinömäæ bete quidi quidi dowæninque towencædänimpa, ante tī nāmæ godonte bai cædānipa. Tömēnāni mānōmaï godö cædāni beyænque wabæca nāni quēwencabo wabæca nāni quēwencabo wæætē wēnæ wēnæ cædānitapa. Māninque ämopa,” angantapa.

⁹⁻¹⁰ Ayæ māningä Wængongui anquedo gocä ate wacä Wængongui anquedo tömengä pōninque yedæ iimaï angantapa. “Mönö guīñēñongä tänocä pōningä ingante æcänö, Bitö Awēnē Wængongui bai imidö anguēnē, ante apæñecäa. Ayæ tömengä nänö emönö bai nāni badōnīca gäänē ædæ wææninque æcänö apæñecäa. Wængongui tömēnāni inānite nangui piincæcäimpa. Tömēnāni önompö incæ önönemö incæ

mönö guññenongä nänö yewæmöi nē yewæmöināni adinque Wængongui adobai tömēnāni inānite nangui piincæcäimpa.” Äninqe Wængongui anquedo godömenque apænecantapa. “Mänināni Wængongui biinömæ nänö piimæ becædänimpa. Mänimænque æninqe tömengä nänö piinte owætadē pe ñiñængantapa. Mänimænque nē bete bai ināni iñömö nangui pōni wæwencædänimpa. Wængongui tæiyæ waemö anquedoidi weca ayæ Wængongui Codotedo weca gonga bæcoyömö atopode nāni öö wadö gonga bæcoyömö öö wayömö mäniñömö iñāni æmæwo gonte ba bai nangui wæwencædänimpa,” angantapa.

11 “Ayæ tömēnāni gonga bæcoyömö mäniñömö wæwēñönāni nāni wæwēmāmo tēmā bai cōwē æicōompa. Woyowotæ incæ itædē incæ mäniñāni edæ guēmānāmai incædänimpa. Tömēnāni iñömö, Mönö guññenongä tänocä pöningä weca ædæ wææninque, Bitö Awēnē Wængongui bai imidö anguēnē, ante nē apænedāni inānipa. Ayæ tömengä nänö emönö nāni badöninca gäänē ædæ wææninque nē apænedāni adobai tömengä emöwo nänö yewæmöi nē yewæmöināni inte mäniñāni tömānāni wantæpiyæ mänōmai guēmānāmai inte wæwencædänimpa. Mäninqe ämopa,” angantapa.

12 Mänōmai beyæ mīnitö Wængongui quimīni iñömö tömengä nänö, iñmai cæedāni, ante nänö wææ angainö ante eñente cædömīni inte ayæ Itota ingante godömenque wede pönēmīni inte mīnitö wæntæye ināmai inte ee cæcæmīnimpa.

13 Ayæ ate botö öönædē inö tedepāmo iñmai ante eñentabopa. “Bitö iñmai yewæmöe,” angantapa. “Ñöwo ganca ayæ ate Awēnē Itota ingante pönente nē wænāni inte tömēnāni nāni toquinque.”

Ante añongä Wængongui Tæiyæ Waemö Önöwoca, “Ao ämopa, angampa. Nāni toquinque ingæimpa. Tömēnāni nāni nangui cægāinö ñimpo cæte guēmancædänimpa. Edæ tömēnāni nāni waa cægāinö öönædē iñömö edonque pōni acæimpa,” ante angantapa.

Inguipoga quēwēnāni beyæ amiña bai baccæimpa

14 Ayæ botö ayömo näämænta boguimä mæ owo atabopa. Adocanque Waocä eñagaingä ingä bai iñömö mäniñ boguimäa tæ contacä atabopa. Tömengä ocaboga awēnē poganta oodo inte badöinta encacä inte tömengä nänö önönempo yaemē bai waingamē idämæ engamē næængä atabopa. 15 Ayæ ate wacä anquedo Wængongui oncö tæiyæ waemö oncönē ta pöninque boguimäa nē tæ contacä ingante iñmai yedæ ante aa pecantapa. “Inguipoga quēwēnāni botö imote nē wede pönente waa cædönāni iñömö nē minte pæmō bai ināni inte tömēnāni nāni to amiña bayedē bai impa. Wadæ wadæ pinöninque nāni ö æñedē bai do bayonte bitö yaemē bai bitö nææi ænte gote mäniñāni inānite wadæ wadæ pinonte bai cædinque ö æe.” 16 Angä eñēninque boguimäa nē tæ contacä gote inguipoga iñömö tömengä yaemē bai nänö nææi inte wadæ wadæ pinonte bai cædinque tömānāni nē minte pæmō bai ināni inānite ö ængantapa.

17 Ayæ öönædē iñömö Wængongui oncö tæiyæ waemö oncönē ongonte ta pöninque wacä anquedo adobai yaemē bai waingamē idämæ engamē nææente pongantapa. 18 Tömengä pongä ate Wængongui anquedo wacä pongantapa. Wængongui oncö tæiyæ waemö oncönē, Wængongui qui, ante iya tæe, ante nē änongä inte nāni iya täimoga gäänē ongöninque ta pöninque yaemē bai waingamē idämæ nē engamē næængä ingante iñmai yedæ apænecantapa. “Inguipoga tömāo nē wēnæ wēnæ cædāni iñömö yowecoo bai inānipa. Mänināni yowe ite bayedē bai ināni adinque bitö yaemē bai bitö nææi ænte gote yowecoo wangö tadampote gæte bai cædinque tömēnāni inānite cæe.”

19 Angä eñēninque Wængongui anquedo inguipoga iñömö tömengä yaemē bai nänö nææi inte wangö tadampote cædinque yowecoo gædāni bai tömengä nē wēnæ wēnæ cædāni inānite adobai cæcantapa. Ayæ yowepæ ante ñænængade nāni pinä pinä gawate cæincadedē yowecoo wææntodonte bai cædinque tömengä wēnæ wēnæ cædāni inānite Wængongui piinte nänö päiñömö wido cæcantapa. 20 Mänii

tömənäni yowecoo ænte pinä pinä gäwate cæincade iñömö tömənäni nāni quēwēñömö yabæca ongompa. Māniñömö tömənäni inānite pinä pinä gäwate bai cædanitapa. Cæyönāni tömənäni wepæ nanguī pōni gotimpa. Cabayo goto winediñömö æi ganca tömənäni wepæ māninganca æi godingue todee tiento quidōmetodo ganca māninganca nanguī pōni wepæ gotimpa.

15

Ticete ganca nāni wæwenguimāmo pompa

¹ Ayæ botö ayömote Wængonguī ñowo wæætē mā pōni odömömo adinque eñencædanimpa, ante cædinque öönæde inö bamönengæ pōni badongä a owo atabopa. Wængonguī anquedoidi önompo æmæmpoque go mēnaa ināni iñömö öönæde ongöñönānite tömənäni inānite, Minitö cæmini beyænque waodāni nāni wæwenguimāmocoo önompo æmæmpoque go mempoga pongæimpa, angä eñente ænte pönānitapa. Māniī wæwēmāmocoo æmæwo ba adinque Wængonguī nänö ænguī panguimāmo eyepæ bapa.

² Ayæ æpæntibæ iñömö awocawænta emö bai adinque botö mänintibæ tönö gonga guëa wempodente bæco atabopa. Adotibæ yæwedeca waodāni mæ ongönānipa. Mānināni iñömö mönö guiñenongä ayæ pöningä ingante ante ayæ tömengä nänö emönö bai nāni badöninca ante Baa äninque tömənäni tæi emonte gänä cædāni inānitapa. Adodāni tömengä emöwo ante, Æpodö i, ante Baa ante yewæmönāmaī ināni atabopa. Wængonguī tömənäni inānite adapate nāni ampoquī godongä ænte næænte a ongönānipa. ³ Tömənäni a ongöningue Wængonguī ingante nē cægaingä Möitee wodi ämotamini nänö angainö ante ayæ Wængonguī Codotodo ämotamini nänö againö ante iīmaī ämotamini änānipa.

“Awënë Wængonguī bitö adobique Tömää Cægaimi inte

bitö mā cædö iñömö waëmö pōni inönö angüenë.

Bitö tömämæ quēwēnāni Tæiyæ Awënë Odeyebi imidö angüenë.

Quiëmë cædinque bitö nē nō cæbi imipa.

⁴ Awënë eñemi, Æcämë bitö imite guiñenāmaī inguingää.

Ayæ bitö emöwo ante pönente æcämë waa adāmaī inguingää.

Edæ bitö adobique tæiyæ waëmö imipa.

Tömää bitö nō cædinö edonque pōni ba adinque

wabæca wabæca nāni quēwencabo tömənāni bitö weca ponte ædæ wææninque bitö imi, Bitö Awënë Wængonguī imidö angüenë, ante ancædanimpa.”

⁵ Ayæ ate botö ayömote öönæde iñömö Wængonguī tæiyæ waëmö oncö incæ æmontaicö bai inte tömengä nänö nänënë owocö iñömö wi ænete bayö atabopa. ⁶ Wængonguī anquedoidi önompo æmæmpoque go mēnaa ināni mänincönë ongonte ta pönānitapa. Tömənäni cædāni ate waodāni nāni wæwenguimāmo iñömö önompo æmæmpoque go mempoga pongæimpa. Tömənäni weocoo waëmoncoo ñino nāni ancoo ñäö bai émoncoo mongæñāni inānipa. Tömənäni tæcætawë inö pacadeyænta oodo inte nāni badöinta mongæñemæñāni inānipa.

⁷ Ayæ münāni quēwēnāni mēnaa go mēnaa iñönāni adocanque Wængonguī anquedoidi önompo æmæmpoque go mēnaa ināni iñönānite owætacoo adotaque adotaque pædæ godongä ænānitapa. Mänintacoo önompo æmæmpoque go mentacoo iñömö oodo inte nāni badöintacoo inte Wængonguī nē wantæpiyæ cōwë quēwengaingä ingä nänö ænguī pāmāmo eyede énentapa. ⁸ Wængonguī nänö ñäö apäidö beyæ ayæ tömengä nänö tæi piñæmāmo beyæ tömengä tæiyæ waëmö oncönë iñömö tēemāmāmo eyede mæ ongompa. Ayæ Wængonguī anquedoidi önompo æmæmpoque go mēnaa ināni cædāni ate waodāni nāni wæwenguimāmo ante önompo æmæmpoque go mempoga nāni wæwenguinganca iinque baganca æcāmenque incæ Wængonguī tæiyæ waëmö oncönë guidāmaī incædanimpa.

16

Wængonguī nänö ænguī panguintacoo

¹ Ayæ ate Wængonguī tæiyæ waëmö oncönë inö tedepāmo yedæ tē éñentabopa. Nē angä iñömö Wængonguī anquedoidi

önompo æmæmpoque go mēnaa ināni inānite, “Goedāni, āninqe, Wængonguī owætacoo nänö ænguī panguintacoo önompo æmæmpoque go mēa ganca incoo næænte gote inguipoga iñömö gao cæedāni,” angä eñentabopa.

² Wængonguī anquedo tänocä godinque tömengä owætadē ēnē incæ inguipoga gao cæcantapa. Gao cæcä ate mönō guiñēnongä ayæ pöningä nänö yewæmöi nē yewæmöināni inte tömengä nänö emönö bai nāni badöinca gäänē ædæ wææninque apænedāni iñönānite tömēnāni ayaa nantai ñömæi tömäo baadinque nantate wædānitapa.

³ Wængonguī anquedo ayæ nē gocä tömengä owætadē ēnē incæ æpæntibæ cæncadēmæ gao cæcä ate mänimæ iñömö do wænināni wepæ bai bayonte mänintibædē quēwēnāni tömānāni wæñānitapa töö.

⁴ Wængonguī anquedo ayæ nē gocä tömengä owætadē ēnē incæ æpænē tömānonga gao cædinque æpæ tayömö tömäñömö gao cæcä ate mänimæ tömāmæ wepæ batimpa. ⁵ Ayæ ate Wængonguī anquedo æpæ tömāmæ beyæ nē angä inte iimaī apænecä eñentabopa.

“Mönö Tæiyæ Waëmö inömi eñēmi, bitö wēēnēñedē do nē quēwēngāimi imi ñöwobi adobi inömi imipa.

Mänömaī tömēnāni inānite apænte ante pāninque bitö nö cædinque apænte pānimi imipa.

⁶ Edæ bitö quīnāni tönö bitö beyæ nē apænegaināni inānite wænönāni ate tömēnāni nē wænāni wepæ näate bagadānimpa.

Bitö wæætē nē wænonte näate badāni nāni cægāi beyæ

wepæ godömi begadānimpa,” angantapa.

⁷ Ayæ Wængonguī quī, ante nāni iya täimoga inö tedepāmo tē eñentabopa. “Ao ämopa. Awēnē Wængonguī bitö adobique Tömää Cægāimi inte, Iimaī pancæboimpa, ante bitö apænte angainö bai cædinque tömēnāni inānite pāninque bitö cōwē nö cæte waa pāmipa.”

⁸ Wængonguī anquedo ayæ nē gocä tömengä owætadē ēnē incæ nænque mæ

owoyömö mäniñömö gao cæcantapa. Ayæ waodāni æmontaiya montæ gongate wæcædānimpa, ante cædinque nē godö angä beyænque nænque nanguī tī nāwä batimpa. ⁹ Mänii nanguī tī nāwante beyæ waodāni montæ gongate badāni incæte tömēnāni nāni wēnæ wēnæ cædinö ante, Ancaa wæwente awædö, ante ayæ pönēnāmaī ināni inte ñimpo cædāmaī inte Wængonguī ingante waa adāmaī inānitapa. Tömēnāni, Wængonguī cæcä beyænque mönō wæwēmāmocoo pönimpa, ante wædinque Wængonguī ingante piininque tömengä emöwo ante wēnæ wēnæ babæ ante tedewēñānitapa.

¹⁰ Wængonguī anquedo ayæ nē gocä tömengä owætadē ēnē incæ mönō guiñēnongä tänocä pöningä nänö aacæ tæ containpaa gao cæcä ate tömengä awēnē odeye inongä inte nänö aayömö mæ māmōnte bai batimpa. Waodāni nantate wædinque önonguēñewa æo pocænguēñewate wædānitapa. ¹¹ Mänömaī wædāni incæte tömēnāni nāni wēnæ wēnæ cædinö ante, Ancaa wæwente awædö, ante godömenque pönēnāmaī ināni inte ñimpo cædāmaī inānitapa. Wæætē nantai baate nantate wædinque Wængonguī öönædē quēwēnongä ingante piinte badinque wēnæ wēnæ babæ ante tedewēñānitapa.

¹² Wængonguī anquedo ayæ nē gocä tömengä owætadē ēnē incæ ñænæ önonga Eopadatedö nāni änonga mäninonga gao cæcä ate awēnē odeyeidi nænque tamönö quēwente nāni ponguīnö taadö ante önö tömäo amimö batimpa.

¹³ Ayæ wēnæidi wentamö nāni ewocacabo mēnaa go adocanque ināni iñömö weque bai ināni ta pönāni atabopa. Dadagöö önönē inö adocanque wēnæ ta pongantapa. Mönö guiñēnongä tänocä pöningä önönē inö wacä wēnæ ta pongantapa. Ayæ Wængonguī beyæ nē apænedömo imopa, ante nē babæ apænedongä önönē inö wacä wēnæ pongantapa. ¹⁴ Mänināni wēnæidi önöwocaidi ināni inte mä cædāni inānipa. Iināni iñömö tömāmæ awēnē odeyeidi weca añecæ godinque tömēnāni inānite apænedinque, Awēnē Wængonguī adocanque Tömää nē Cægāingä inte nänö apænte anguionæ

iñonte mīnitō godongāmæ ponte guēadō guēa cæcæminimpa, ante cædānīpa.

¹⁵ “Mōnō Awēnē nāmā incæ iīmaī angantapa. Aedāni. Nē awēmō ængā iñontobæ pongā bai botō adobai ānāmaī inte poncæboimpa. Æyedēnō ponguīgā, ante nē mōnāmaī ongongā iñōmō tōmengā wānō cōnongā bai iñongā inte nānō toquinque. Edæ tōmengā, Ōmaabo iñāmaī incæboimpa, ante ayæ, Guiñēñate wædāmaī incæboimpa, ante tōmengā weocoo tōmē weca ee mangā iñongā ingampa,” angantapa.

¹⁶ Mānīi wēnæidi ōnōwocaidi tōmāmæ awēnē odeyēidi iñānite añecæ gote ānāni ēñēnīnque awēnē odeyēidi iñōmō tōmēnāni tontadoidi tōnō Adāmaguedō ebedeo tededō nāni añōmō adoyōmō godongāmæ pōnānitapa.

¹⁷ Ayæ Wængonguī anquedo tōmangā nē gocā tōmengā owætadē ēnē incæ woboyæ owoyōmō māniñōmō gao cæcā ate oōnædē iñō Wængonguī tæiyæ waēmō oncōnē tōmengā nānō aacæ tæ contayōmō māniñōmō tedepāmo yedæ tededīnque, “Ñōwo iīnque batimpa,” angantapa.

¹⁸ Ayæ ate yædæ yædæ nānīnīpa. Detæbo tæi tæi tē goyō yedæ pōnī ānīnīpa. Ayæ goinque nanguī pōnī ocæ ocæ gotimpa. Waodāni inguipoga nāni quēwenganca tōmanganca mānīi goinque bai wa goinque cōwē godāmaī iñīnīpa.

¹⁹ Goinque ocæ ocæ goyonte tōmēnāni nāni ñænæ quēwēñōmō incæ tænguīmæ tænguīmæ godīnque mēñōmōnga go adoyōmonque batimpa. Ayæ wabæca nāni quēwencabo wabæca nāni quēwencabo incæ tōmāo nāni quēwēñōmō onconcoo acapowate bogocæ tæ gowæænīnīpa. Wængonguī adobai, Babidōnia nāni waēmō quēwēñōmō quēwēnāni wēnæ wēnæ cædānīpa, ante pōnente wædīnque ænguī badīnque, Mīni wæwēngūnque impa, ante owæta biñōmæ nānō pīīmæ eyede ēnē godonte bai cædīnque tōmēnāni iñānite nanguī pīīnīnque pangantapa. ²⁰ Tōmāā wāā tēiwænē iñōmō yogæ guītīnīpa. Ayæ onquiyabocoo adobai dæ bibītapæ batimpa. ²¹ Ayæ oōnædē iñō yoguica cōōnæ bai waodāniya tæi tæi wæænīnīpa. Mānīnca tæi tæi wæænīnca adocaque incæ wodo tiēē

diboda tee mā ganca enca impa. Yoguica wēnæ wēnæ incapa, ante adīnque waodāni, Mānīnca mōnō wēnæ wēnæ wæwēmāmo impa, ānīnque Wængonguī ingante pīinte badīnque wēnæ wēnæ babæ ante tedewēnānitapa.

17

Onquiyængā māincoo beyæ nē towente quēwēnongā

¹ Wængonguī anquedoidi ōnōmpo æmæmpoque go mēa ganca iñāni ōnōmpo æmæmpoque go mēa ganca owætacoo nē næænāni iñōnānite adocanque botō weca ponte, “Pōe, angantapa. Onquiyængā māincoo beyæ nē towente quēwēnongā iñōmō æpæncoo yædopāa nē tæ contacā apænte nānō panguīnō ante botō odōmōmo acæbiimpa. ² Inguipoga awēnē odeyēidi incæ tōmengā tōnō towengadānīnīpa. Waodāni inguipoga quēwēnāni incæ adobai tōmengā towēīnēnō beyæ tōmengā biñōmæ bete bai quidi quidi dowænte bai pōnēnāmaī cægadānīnīpa,” ante apænecā ēñentabopa.

³ Wængonguī Ōnōwoca incæ botonga pō guiyongā botō wīimonte bai iīmaī atabopa. Wængonguī anquedo adocā iñōmō botō imote ō ænte māo ōnōmæca iñōmō cōnongā ongontabopa. Māniñōmō ongōnīnque botō onquiyængā babæcā bai nē guiñēnongāa mongænte a ongongā atabopa.

Māningā mōnō guiñēnongā opatawæ ēñadongā inte ēmōwocoo tōmengā baonga godāmæ tōmangā yewæmōi ēñacā ingantapa. Māniwocoo Wængonguī ingantedō ante wēnæ wēnæ babæ wapiticæ āniwocoo iñōnīnīpa. Māningā mōnō guiñēnongā nānō ocabocoo ōnōmpo æmæmpoque go mēa encacā inte tōmengā nānō ōnōmoncawæncoo ōnōmpo tipæmpoga ēmoncacā ingantapa.

⁴ Onquiyængā iñōmō tōmengā weocoo awēnēidi wæēmoncoo nāni mongæncoo tōnō opatawæ ēmoncoo mongængantapa. Tōmengā, Botō waēmō incæboimpa, ante oodo badōincoo tōnō dicamō nāni nanguī godonte ænīncoo tōnō pededamō nāni amō mānīmoncoo mongænte ingantapa. Tōmengā ōnōnēmpo owætadē oodo inte badōintadē quīmæmē baapæ bai i

eyede engapæ næængantapa. Mäningä onquiyængä quïemë nänö wënæ wënæ cæpämö nänö towente quëwënö bai mänintadë næængantapa. ⁵ Adocä onquiyængä tömengä önönemö inö emöwo yewæmöi emongä ingantapa. Mäniwo wë wodonte bai i incæte iïmaï ante impa.

“Babidönia nani waëmö quëwëñömö i incæte onquiyængä në towengä bai impa.

Waadäni në godö towënäni wäänä bai mäningä onquiyængä ingampa.

Ayæ adobai inguipoga quëwënäni wiwa nani cæinënö ante në cædäni wäänä bai adocä onquiyængä ingampa.”

Mänömaï tömengä önönemö inö yewæmonte emongantapa. ⁶ Wængonguï quïnäni ingainäni tönö Itota ingante ante apænedäni beyæ në wængainäni tömënäni wepæ bete bai mäningä onquiyængä quidi quidi dowænte bai ingä botö atabopa. Tömengä ingante adinque botö ancai guïñente wætabopa.

⁷ Ancai guïñente wæyömote Wængonguï anquedo botö imote iïmaï angantapa. “Quïnante ancai guïñente wæbii. Mönö guïñëñongä iñömö tömengä ocabocoo önompö æmæmpoque go mencaa encacä inte tömengä önömoncawæncoo önompö tipæmpoga emoncacä inongä inte onquiyængä ingante në mongængä ingampa. Onquiyængä ingante në mongængä mönö guïñëñongä tönö onquiyængä tömëna nana wë wodonte inï æbänö i, ante apænebo ëñëe. ⁸ Adocä mönö guïñëñongä bitö adingä iñömö wëenëñedë quëwengaingä inte ñöwo dæ angä incæte ayæ ate tadömengadænguipodë inö ææ ta poncæcäimpa. Ta pöningue tömengä nänö æmæwo ömæe ewenguingue ingæimpa. Wængonguï, Quëwenguinta, ante inguipoga badönämaï iñedë nänö yewæmongaintaa inguipoga quëwënäni tömënäni emöwo në yewæmönämaï inäni iñömö tömënäni iñömö mönö guïñëñongä do quëwengaingä ñöwo dæ angä incæte ayæ ate pongä adinque ancai guïñente wæcædänimpa,” ante Wængonguï anquedo apænecantapa.

⁹ Ayæ tömengä wæætë apænecantapa. “Mäninö ante ëñencæte ante ocäi ëñënö në encacä inte ëñencæcäimpa.

Mönö guïñëñongä tömengä önompö æmæmpoque go mæa ocabocoo iñömö önompö æmæmpoque go mæa änanquidi bai inänipa. Mänii änanquidiboga onquiyængä tæ contacä ingampa. Mänii ocabocoo adobai önompö æmæmpoque go mæa awënë odeyeidi bai inänipa. ¹⁰ Mänimpodäni iñönänite önompö æmæmpoque awënë odeyeidi inänite wido cædänitapa. Adocanque awënë odeye iñömö ñöwo aacä ingampa. Wacä awënë odeye ayæ pönämaï ingä incæte tömengä pöningue wantæ iñö ongonte aacæcäimpa. ¹¹ Önompö æmæmpoque go mæa ganca awënë odeyeidi nani cabo iñönänite mönö guïñëñongä adocä inongä incæte tömënäni beyæ ponguingä ingampa. Tömengä iñömö wëenëñedë në quëwengaingä incæ ñöwo dæ angä inongä inte tömengä nänö æmæwo ömæe ewenguingue poncæcäimpa,” ante Wængonguï anquedo apænecantapa.

¹² Ayæ tömengä wæætë apænecantapa. “Ayæ önompö tipæmpoga önömoncawæncoo bitö adimoncawæncoo iñömö önompö tipæmpoga awënë odeyeidi bai inäni incæte ayæ aadämaï inänipa. Incæte ayæ ate tömënäni inänite änäni ate awënë odeyeidi badingue tömënäni, iïmaï cædäni, ante änäni bacædänimpa. Ayæ mönö guïñëñongä tönö tömënäni adoque ooda ganca godongämæ aacædänimpa. ¹³ Tömënäni adodö ante pönënäni inte, Mönö tæi piñænö ante guïñëñongä ingante godömö æncæcäimpa. Ayæ awënë odeyeidi inömö inte mönö, iïmaï cædäni, ante në ämö imö bai mönö tömengä ingante ämö në angä bacæcäimpa.

¹⁴ “Mäninäni Wængonguï Codotedo ingante guëadö guëa cæcædänimpa. Incæte tömengä iñömö awënëidi tömänäni Awënë inongä ingampa. Ayæ waodäni awënë odeyeidi iñönänite tömengä Tæiyæ Awënë Odeye inongä ingampa. Iñinque tömengä tæi emönongä inte tömënäni inänite gänä cæcæcäimpa. Tömengä, Botö miñæ tee empo goquimini, ante waodäni inänite aa pedingue apænte nänö në ængainäni inte tömengä miñæ cöwë ædæmö cæte tee empo godäni inänipa. Mäninäni adobai tömengä tönö godongämæ guëadö guëa

cæte wænonguināni inte tæi emonte gānā cæcædānimpā,” ante Wængonguī anquedo apænecantapa.

¹⁵ Ayæ tōmengā wæætē botō imote iīmaī apænecantapa. “Onquiyængā māincoo beyæ towente quēwēnongā inte æpæncōo yædopāa tæ contacā abitapa. Mānīi æpæncōo iīnōmō tæiyænnāni waodāni bai inānīpa. Wabæca nāni quēwēncabo wabæca nāni quēwēncabo incæ wadō nāni tedecabo wadō nāni tedecabo incæ waodāni tæiyænnāni inānīpa. Mānīnāni tōmānāni mānīi æpæncōo bai inānīpa. ¹⁶ Ayæ onompo tipæmpoga onōmoncawæncōo bai awēnē odeyēidi tōnō mōnō guīñēnongā iīnōmō tōmēnāni bitō nē adīnāni inōnāni inte onquiyængā māincoo beyæ nē towente quēwēnongā ingante piīncædānīpa. Piīnīnque, Tōmengā ingante æmæwo omæ ewengæīmpā, ante cæcædānīpa. Tōmengā māincoo tōmancoo ō ænāni ate ōmaacā inte wæyongante tōmengā baō cæninque tōmengā ingante æmæwo iya tancædānīpa. ¹⁷ Wængonguī, Botō angāi bai iīnque baganca tōmēnāni botō pōnēnō ante cæcædānīpa, ante godō cæcā beyænque mānīnāni awēnē odeyēidi nāni mīmōnē adodō ante pōnēnānīpa. Pōnēnīnque tōmēnāni godongāmæ Ao ānīnque, Mōnō guīñēnongā aacæcāīmpā, ante tōmengā ingante, Mōnō tæi piīñænō ante godōmō ænguingā, ante godōnāni ængantapa.

¹⁸ “Māningā onquiyængā bitō adingā bai Babidōnia nāni waēmō quēwēñōmō adobaī impā. Mānīñōmō awēnēidi iīnōmō tōmāmæ awēnē odeyēidi inānite nē aadāni inānīpa,” ante Wængonguī anquedo apænecantapa.

18

Babidōnia nāni quēwēñōmō do wo ewente batīmpā

¹ Ayæ ate Wængonguī anquedo wacā inte oōnædē inō wææ pongā atabopa. Tōmengā tæi piīñægā inte nanguī angā ingā inte nāmā nānō ñāō apāite emōnō inte ingui-poga iīnōmō ñāō apāicā atabopa. ² Tōmengā nānō tedepāmo inte iīmaī yedæ aa pedīnque,

“Babidōnia nāni āñōmō do wo ewente batīmpā. Babidōnia nāni waēmō

quēwēñōmō i incæte do wo ewente ba aedāni.

Badinque wēnæidi nāni owoyōmō batīmpā. Wēnæidi wentamō ewocadāni tōmānāni mānīñōmō tee mōnīncōnē bai quēwēnānīpa.

Ayamōidi baacāidi tōmānāni adobaī mānīñōmō wææ cæte bai owodānīpa.

³ Wabæca nāni quēwēncabo wabæca nāni quēwēncabo incæ tōmānāni

babidōniāidi wīwa nāni towēinēnō beyæ tōmēnāni biīnōmæ bete quidi quidi dowænte bai wædānīpa.

Inguipoga awēnē odeyēidi incæ babidōniāidi tōnō towēnānīpa.

Babidōnia iīnōmō quēwēnāni nāmanque ante pōnente tocæte ante māincoo nanguī pōnī ænte eadāni beyænque

inguipoga nē godonte ænāni iīnōmō māincoo nanguī pōnī eadāni badānīpa,”

ante Wængonguī anquedo aa pecantapa.

⁴ Ayæ oōnædē inō wacā tedepāmo tedecā eñentabopa.

“Botō guīdēmīni eñēedāni. Mīnitō tōmēnāni weca quēwēmīni incæte,

Tōmēnāni tōnō godongāmæ wēnæ wēnæ cædāmaī incæmōnīmpā, ante cædinque wadæ tao pōedāni.

Ayæ, Wængonguī tōmēnāni inānite pānīnque mōnitō imōnite pānāmaī incæcāīmpā, ante pōnente wædinque wodīi wīnonte pōedāni.

⁵ Tōmēnāni wēnæ wēnæ cædimāmo iīnōmō cabo tī gæte cōnōnīnque bacoo pōnī ongōmpā.

Incæte Wængonguī mānīnāni nāni wīwa cædimāmo cōwē pōnente wæcāmpā.

⁶ Tōmēnāni nāni pōnōnī bai mīnitō tōmēnāni inānite adobaī godoncæmīnīmpā.

Tōmēnāni nāni pōnō cædinō beyæ mīnitō wæætē adopo godō cædinque mempoga ganca godōmenque godō cæmīni wæcædānīmpā.

Tī nāmæ godōnāni bete bai wædānitawo. Mīnitō wæætē tōmēnāni owætadē tī nāmæ adopopæ pe ñīñænte wempo cædēnīnque,

mempoga pe ñīñænte wempo cædente bai cædinque godōmenque tī nāmæ godōmīni bete wæcædānīmpā, angantapa.

⁷Edæ tömënäni nämä incæ, Mönö ñænæmö imompa, ante pönente nangui waëmö mäincoo èate quëwënäni iñönänite minitö wæætë, Tömënäni ægancadö waëmö quëwënänii, ante adinque tömënäni inänite adoganca piinte cæmini nantate wædinque tömënäni wæwente quëwencædänimpa.

Mäninäni iñömö, 'Awënë odeye nänöogængä bai contate ongömompa. Edæ wat-apæ quëwëmö imompa.

Wii owæmpoingä bai iñömö inte wæwënämai cöwë incæmöimpa,' ante önöwënenque pönente änewënanipa.

⁸Mänömainö ante në änäni inte adoque itædë iñonte tömënäni nani wæwëmämö iñontobæ pö ate nangui wæcædänimpa.

Mäniönæ tömënäni nani wænguimämo nani wæwenguimämo nani gue ænenguimämo pö wæcædänimpa töö.

Tömënäni onconcoo gonga bæcodocæimpa. Edæ Wængongui Awënë iñömö Babidönia iñömö quëwënäni inänite në apænte ante pangä iñömö edæ tömengä tömää cægaingä ingampa," ante apænecantapa.

⁹Inguipoga awënë odeyeidi incæ Babidönia quëwënäni tönö towënäni inte tömënäni adobai Babidönia quëwënäni tönö nangui waëmö mäincoo godongämæ ænte èate quëwënänipa. İninqe Babidönia nani quëwëñömö gonga bæcododinqe tæmancoo baca baca æi adinque tömënäni wæwente Ca ca wæcædänimpa. ¹⁰Babidönia iñömö quëwënäni nangui pönii nani wæwënö adinque awënë odeyeidi ancai guiñëninque, Mäninäni tönö godongämæ wæwënämai incæmönimpa, ante gomonga a ongöninque wæcædänimpa.

"Babidönia mini waëmö quëwëñömö në quëwëmini mini wæquinque ingæimpa.

Mäniñömö quëwëmini mäincoo nangui èate inimini inte mini wæquinque.

Wænæ wænæ cæmini iñöminite adoque ooda iñonte Babidönia mini quëwëñömö do apænte pante wo ewente batimpa." ante wæcædänimpa.

¹¹Inguipoga mäincoo ænte mante në godonte ænäni iñömö, Edæ æcänö mönö

godonguënencoo godonte ænguinaa. Nöwo dæ ä, ante wæwente Ca ca wæcædänimpa.

¹²İncoo iñömö nani godonguënencoo impa. Oodo tönö padata, dica nani nangui godonte ænincacoo tönö pededamö nani ämoncoo mæ ongoncoopa. Adobai wæmoncoo nino nani ancoo tönö awënëidi wæmoncoo nani mongæncoo ayæ teda nani ancoo tönö opatawæ incoo mæ ongoncoopa. Quiwæmë ogui wawænque i mäniwæ mæ ongoncoopa. Edepante бага inte nani badönincoo tönö awænque nani nangui godonte æniwæ inte nani badönincoo mæ ongoncoopa. Yaëmenta bodonte nani äni inte nani badönincoo tönö iædo nani äni inte nani badönincoo tönö mänömodo nani anca inte nani badönincoo iñömö mänincoo tömancoo mæ ongoncoopa, ante wæcædänimpa.

¹³Cänäda nani antapo tönö ogui waa öni pæcaqui, ogui waqui nani iya täimö tönö ti nä öni pæqui ayæ ogui wapæ öni pæquimæ, biinömmæ tönö oginguipæ, waëmö ædina tönö todigomö mänincoo mæ ongoncoopa. Cæningäidi tönö obegaidi cabayoidi tönö cabayo inte ñä cæte nani wëä godö awotocoo mæ ongoncoopa. Mänincoo tömancoo mæ ongoncoopa, ante wæcædänimpa. Ayæ adobai, Waodäni incæ në cæte quëwencædänimpa, ante cæningäidi bai godonguënëmö intamompa, ante wæcædänimpa. ¹⁴Mäninäni Babidönia quëwënäni inänite iimaï ancædänimpa.

"Quincamë ante beinente wæmini incæ mäninca tömanca minitö weca ñöwo dæ ancapa.

Mini eadincoo tönö quinä waëmö mini mäincoo iñömö mänincoo tömancoo ñöwo dæ ä ininqe minitö

ömæpomini inte cöwë wæætë ænämai incæminimpa," ante ancædänimpa.

¹⁵Tömënäni mäniñömö quëwënäni inänite mänincoo nani godönincoo beyæ në æninäni inte në nangui eadinäni incæ Babidönia iñömö quëwënäni nani wæwënö adinque, Mäninäni tönö godongämæ wæwënämai incæmönimpa, ante gomonga a ongöninque ancai guiñencædänimpa. Ayæ wæwente Ca ca wæcædänimpa. ¹⁶Ayæ iimaï yedæ ancædänimpa.

“Babidönia mīni waēmō quēwēñōmō nē quēwēmīni incæ mīni wæquinque ingæimpa.

Edæ māniñōmō quēwēmīni tōmēmīni weocoo waēmoncoo nīno nāni ancoo tōnō awēnēidi waēmoncoo nāni mongæncōo tōnō opatawæncōo mānincooque mongæmīni imīnitapa.

Mīnitō, Mōnō waēmō incæmōimpa, ante oodo inte badōincoo tōnō dicamō nāni nanguī godonte ænincoo tōnō pededamō nāni amō māniñōmō mongæmīni imīnitapa.

¹⁷ Incæte adoque ooda iñonte mānincoo mīni ēadincōo incæ edæ æmæwo omæ ewente batimpa, ante nē ænte godōnāni edæ wæcædānimpa,” ante angantapa.

Æpæntibædo wipocoo nē tōō tōō cædōnāni tōnō, Wipodē nē godāni, wipodē nē cædōnāni tōnō, Wipo inte māincoo godonte ængæimpa, ante nē māō godāni tōmānāni māniñāni gomonga a ongoncædānimpa. ¹⁸ Babidönia

nāni quēwēñōmō gonga bæcododique tēemancoo baca baca æi adinque iīmaī yedæ ancædānimpa, “Iī Babidönia nāni waēmō quēwēñōmō bai wayōmō nāni waēmō quēwēñōmō edæ dæ ampa, ante wæcædānimpa,” ante angantapa. ¹⁹ Nē wæwēnāni inte nāni cæi bai onguipo guidimō ænte ocaboga wo ææntodonte wææ guicadinque Ca ca wædinque iīmaī yedæ ancædānimpa,

“Babidönia nāni waēmō quēwēñōmō nē quēwēnāni nāni wæquinque ingæimpa.

Māniñōmō æpæntibædo wipocoo nē ēadāni inte

tōmēnāni nāni godōnincoo māniñōmō quēwēnāni inānite godonte æninque tōmānāni nanguī ēadāni badānitapa.

Ayæ adoque ooda iñonte Babidönia nāni quēwēñōmō tōmāō æmæwo omæ ewente batimpa, ante ancædānimpa,” angantapa.

²⁰ Māniñō ante ānāni ate, Tōmāmīni oōnædē iñōmō quēwēmīni māniñōmō wo ewente i adinque watapæ tocæmīnimpa.

Wængonguī quīmīni adobai

Itota nānō nē da godongaimīni tōnō

Wængonguī beyæ nē apænemīni tōnō mīnitō tōmāmīni māniñōmō wo ewente i adinque watapæ tocæmīnimpa.

Edæ, Mīnitō imīnite æbānō wēnæ wēnæ cædāni, ante adinque

Wængonguī tōmēnāni nāni quēwēñōmō quēwēnāni inānite apænte āninque pangā ate tocæmīnimpa, ante angantapa.

²¹ Ayæ Wængonguī anquedo nē tæi emongā iñōmō dicabo nāni mō mō equinca bai ñænængade dicabo æninque æpæntibæ cæncadēmæ wo guitudōninque iīmaī angantapa.

“Māninca æpæntibæ cæncadēmæ tæi wo guitudōmo guī bai

Babidönia nāni waēmō quēwēñōmō wo ewente dæ ba ate cōwē adāmaī incædānimpa.

²² Iñinque, Adapate nāni ampogainō incæ āmotamīni nāni angainō incæ

ōōña bai nāni we we oōngainō incæ todompeta nāni ancadeca nāni we we oōngainō incæ māniñōmō cōwē ēñēnāmaī ingæimpa.

Quiēmē badōnāni incæ nē badongaināni māniñōmō cōwē dæ ancædānimpa.

Tōmēnāni nāni dicabo mō mō equinca inte cæyōnāni dicabo dadi dadi cæyedē ā bai māniñōmō cōwē wīi ēñēnguīnānidō anguēnē.

²³ Do nāni ti wodōnoincade māniñōmō cōwē tica ēñēnāmaī ingæimpa.

Onquiyængā ingante nē monguingā māniñōmō cōwē dæ ā mōnāmaī inguīnānidō anguēnē.

Māniñōmō māincoo ænte mante nē godonte ænāni iñōmō inguipoga ñænænāni inte ongongadānimpa.

Ayæ idōidi yewænte bai cædinque māniñōmō quēwēnāni, Waēmō māincoo, ante wapiticæ ānewēnāni beyænque wabæca nāni quēwencabo wabæca nāni quēwencabo incæ tōmānāni nāni quēwencabo oda cæte gogadānimpa,” angantapa.

²⁴ Wængonguī beyæ nē apænegaināni inānite wænōninque māniñōmō quēwēnāni incæ Wængonguī quīnāni inānite godōmenque wænōnāni wængadānimpa. Edæ inguipoga wænōnāni nē wængaināni tōmānāni

mäniñömö wænönäni wænte bai ingadänimpa.

19

¹ Babidönia wo ewente ba ate öönæde iñömö waodäni tæiyæñäni adotedæ ogæ tededäni bai eñentabopa.

“Mönö Awënë ingante watapæ apæñecæimpa, ante, Adedoya, äninque,

Mönö Wængongui mönö imonte, Quëwencæmïñimpa, ante nê Ængä inongä ingampa.

Tömengä ñäö emongä inongä ingampa. Ayæ tömengä tæi piñængä inongä ingampa.

² Edæ, Wængongui, Iïmai pancæboimpa, ante nänö apænte angainö bai cædinqe tömengä cöwë nö cæte waa pangampa.

Babidönia iñömö onquiyængä mäincoo beyæ nê towente quëwëñongä bai impa. Mäniñömö quëwëñäni nê wiwa cædäni beyænque

inguiipoga quëwëñäni wæætë nê wiwa cædäni badäni adinqe

Wængongui mäniñömö quëwëñäni inänite apænte ante pangantapa.

Wængongui ingante nê cædinäni inänite adodäni wænönäni adinqe tömengä wæætë tömëñäni inänite wæñongä wæñänitapa,” ante änänitapa.

³ Ayæ wæætë ogæ tededinqe, “Adedoya,” änänipa.

“Mäniñömö tēemancoo, cöwë baca baca æicöompa,” ante änänitapa.

⁴ Mäniñedë Wængongui nänö tæ contaimpaa tæ contayongante nê aadäni nê Picænäni bæinticoatodo ganca inäni tönö mïñäni quëwëñäni mēnaa go mēnaa inäni iñömö ædæ wææninqe, Bitö Wængongui Awënë imidö anguënë, äninque “Amëë, Adedoya,” ante aa pedänitapa. ⁵ Wængongui nänö tæ contaimpa inö tedepämo iïmai tededinqe,

“Wængongui ingante nê cæmïni inte tömengä ingante nê guiñente eñente cæmïni iñömö

nê awëñëidi imïni incæ önöminique incæ mïñitö tömämïni,

Mönö Wængongui ingante watapæ apæñecæimpa, ante apæneedäni,” angantapa.

Wængongui Codotedo monguingä ææmæ

⁶ Ayæ adobai waodäni tæiyæñäni adotedæ ogæ tededäni bai eñentabopa. Ñænæ tēñabo ä bai detæbo eyequei tē bai eñentabopa.

“Adedoya,

Mönö Wængongui Awënë Tömää nê Cægäimi inte

bitö nê Awënë badinqe aabipa.

Mönö watapæ pöñi entawëñinqe waa tocæimpa.

Edæ tömengä ingante apæñedinque mönö, Bitö ñäö emömi imipa, ante angæimpa.

Edæ Wængongui Codotedo nänö monguïñö oo bacæ cæpa cæmïni.

Onquiyængä tömengä ingante monguingä iñömö, Botö nänöogængä inguingä oo poncæcæimpa, ante nämä incæ eyepæ cæte a ongongampa.

⁸ Tömengä ingante weocoo nïno näni ancoo waëmö näämæntacoo nänö wëñaquincoo, ante pönönäni ængä ingampa.

Wængongui quïñäni näni nö cægäincoo incæ nïno näni ancoo waëmö näämæntacoo bai impa.”

⁹ Ayæ Wængongui anquedo botö imote angantapa. “Iïmai ante yewæmöe. ‘Wængongui Codotedo monguingä ææmæ pö becædänimpa, ante wente ængä nê ponguïñäni näni toquinque.’ ” Tömengä ayæ godömenque äninque, “Mäninö Wængongui nänö nö angainö impa,” ante angantapa.

¹⁰ Ante äñongä botö tömengä önöwa inö ædæ wææninqe tömengä ingante watapæ apæñecæte ante cæyömote tömengä wæætë, “Mänömai cædämai imäwe, angantapa. Botö ononque bitö bai Wængongui ingante nê cæbo imopa. Edæ bitö tönïñadäni Itota nänö apænegainö nê eñente cædäni bai botö adobai Wængongui ingante nê cæbo imopa cæbii. Edæ Wængonguinqe ingante ædæ wææninqe, Bitö Wængongui Awënë imidö anguënë, ante apænee,” ante angantapa.

Itota godö odömongä beyænque Wængongui beyæ nê apæñedäni iñömö tömengä nänö apænegainö ante ewocadinqe apæñedänipa.

Näämänta cabayoga në tæ contacä mongænte pongampa

¹¹ Botö ayæ ayömote öönädë wi ænete bai bayö cabayo näämänta ëñacä a ongongä atabopa. Cabayo në tæ contacä mongænte pongä iñongante, Tömengä cöwë pönëningue në Ædæmö Cædongä inte, Nawangä impa, ante në Apænegaingä ingampa, ante pemonte ingampa. Wënæ wënæ cædäni inänite tömengä nö apænte ante pänongä ingampa. Ayæ guëadö guëa cædinque tömengä në nö cædongä ingampa. ¹² Tömengä awinca gonga bæcodote bai ëmongä inte tömengä ocaboga pogantacoo encacä ingampa. Tömengäa ëmowo yewæmte ii incæte mäniwo tömenganque nänö ëñëwo impa. Wadäni ædö cæte ëñenguinänii. ¹³ Tömengä weocoo yacoo wepænë guipænente mongængampa. Tömengä ëmowo iñömö, Wængongui nänö Angainö, ante pemonte ingampa.

¹⁴ Öönädë iñömö tontadoidi tömengä miñæ tee empote godänipa. Tömënäni nino nani ancoo waëmö näämäntacoo mongæninque cabayoidi näämänta ëñadäni yabæ tæ contate mongænte godänipa. ¹⁵ Cabayoga në tæ contacä iñömö wabæca nani quëwencabo wabæca nani quëwencabo incæ waodäni inänite yaëmenca pancæte ante äninque tömengä önönë inö yaëmë tipængaa waingamë engamë ënedinque yædæ tadete ongongantapa. Tömengä iñömö në tæiyæ awënë tömengä nempo quëwënäni inänite aacä bai adobaï tömämæ quëwënäni inänite, İimaï cædäni, ante aacæcäimpa. Yowepæ ante yowecoo nani pinä pinä gawate cæincadedë pinä pinä gawate bai cædinque cabayoga në tæ contacä Wængongui ængui nänö angainö beyænque iñömö tömënäni inänite piinte pancæcäimpa. Wængongui adocanque Tömää në Cægaingä ingampa. ¹⁶ Cabayoga në tæ contacä iñömö weocoo yacoo adobaï tömengä önontiya ii ëmowo yewæmte ëñacampa. “Ayæ waodäni awënë odeyeidi iñönänite tömengä Tæiyæ Awënë Odeye inongä ingampa. Tömengä iñömö awënëidi tömänäni Awënë inongä ingampa,” ante pemonte ingampa.

¹⁷ Ayæ wacä Wængongui anquedo

nænque cæncadëmö inö a ongongä atabopa. Tömengä öönädë gämænö në cæwodäni tömänäni inänite yedæ ante aa pedinque, “Adoyömö godongämæ pödäni. Edæ Wængongui tæiyæ ææmæ ante pö cæedäni. ¹⁸ Awënë odeyeidi incæ tontado capitäoidi incæ onguinænäni tæi piñænäni incæ cabayoidi incæ cabayocooga inte në tæ contate godäni incæ iñäni tömänäni wænäni ate tömënäni baö cæncæte ante pödäni. Waodäni awënë beyænque në cæte quëwënäni incæ në nämä cæte quëwënäni incæ awënëidi incæ önönänique incæ tömänäni baö pö cæedäni,” ante aa pecantapa.

¹⁹ Ayæ botö ayömö mönö guiñëongä tönö inguipoga awënë odeyeidi tönö tömënäni tontadoidi tönö adoyömö godongämæ pöningue, Cabayoga në tæ contacä ingante ayæ tömengä tontadoidi inänite mönö guëadö guëa cæcäimpa, ante cædäni atabopa. ²⁰ Incæte guëadö guëa cæyönänite tömënäni näëmæ mönö guiñëongä ingante bæi ongöningue, Wængongui beyæ në apænebo, ante në babæ äningä ingante adobaï bæi ongönänitapa. Në babæ äningä iñömö mönö guiñëongä beyænque mä pöni cæcä inongäimpa. İinque mönö guiñëongä tömengä nänö yewæmöi në yewæmöinäni iñömö tömengä nänö ëmönö bai nani badöninga gäänë ædæ wææninque në apænedäni inte tömënäni në babæ äningä nänö mä cædö adinque guiñente wædinque oda cædönänipa. İinque mönö guiñëongä tönö në babæ äningä ayæ müna quëwëñönte atopode nani änantibæ gonga bai nani bæcodotibæ cæncadëmæ wido cædänitapa. ²¹ Tömëna miñæ pönäni inänite guiquënë cabayoga në tæ contacä tömengä önönë inö yaëmenca yædæ tadete ongöningue do wænongä wænänitapa. İinque në cæwodäni baö ade cænänique tömänäni në wænänäni baö tömo pöni cæwëñönäni inänitapa.

20

Müdo wadepo iñonte cëbänö baquü

¹ Wængongui anquedo wacä iñömö tadömengadænguipo ontatodemö wi

ænequï tönö ñänömencaimë ñænæmë önönempo næængä inte öönæde inö ta wæængä atabopa. ² Ta wææninque tömengä dadagöö ingante bæi ongöningue tömengä nänö miido wadepo ganca ñä cæyænte ongonguinque ante ñä cæyængantapa. Mäningä dadagöö wëenëñedë täntæ në ingaingä inte wënæ awënë Tatäna ingacäimpa. ³ Mäningä ingante ñä cæyæninque tadömengadænguipodë wido cædinque ontatodemö wi ænequï inte tee mönedinque tömengä dæca ontatodemö ædæmö tee moncasantapa. Waodäni wabæca nani quëwencabo ayæ wabæca nani quëwencabo iñönänite tömengä, Oda cæte gocædänimpa, ante miido wadepo ganca cædämaï incæcäimpa, ante Wængonguï anquedo dadagöö ingante wido cæcantapa. Mänimpodepo iinque ba ate tömengä ingante, Wantæ iñö ñimpo cæte goquingä, ante ñimpo cæcä gocæcäimpa.

⁴ Ayæ awënëidi tæ contaimpacoö botö atabopa. Wængonguï Awënë godö angä beyænque awënëidi badinque apænte ante në änäni badinäni inte mänimpaa tæ contadäni inänitapa. Ayæ Itota ingante ante apænedinque Wængonguï nänö angainö ante apænedäni beyænque tömënäni inänite wangö tamencadäni wængadänimpa. Wangö tamencadäni wængainäni nani önöwocaidi botö ñöwo atabopa. Mäninäni iñömö mönö guiñëngä ayæ pöningä ingante adinque, Bitö Wængonguï Awënë bai imidö angüenë, ante apænedämaï inte ayæ tömengä nänö emönö bai nani badöninca gäänë ædæ wæænte apænedämaï ingadänimpa. Ayæ tömënäni nani önönemö inö nani önömpo inö mönö guiñëngä ayæ pöningä nänö yewæmöi yewæmönämaï ingadänimpa. Adodäni ñäni ömæmöninque adoque miido wadepo ganca Itota Codito tönö godongämæ aadänitapa.

⁵ Mäninäni täno ñäni ömæmönäni incæte wadäni guiquënë në wængainäni incæ miido wadepo iinque go ate ñäni ömæmoncædänimpa. ⁶ Täno ñäni ömæmönäni iñömö në tæiyæ waëmö inäni inte nani toquinque. Edæ wadäni në wængainäni mempoga ganca nani wænguimämo iñonte mäninäni iñömö wænämaï incædänimpa. Wæætë,

Wængonguï quï, ante në godönäni bai tömënäni adobai, Wængonguï beyæ, ante ayæ, Itota Codito beyæ, ante cæcædänimpa. Ayæ miido wadepo iñonte Itota Codito tönö godongämæ aacædänimpa.

Tatäna nänö æmæwo ömäe ewenguïnö ante

⁷ Tadömengadænguipodë tömengä nänö tee mönecönë ñä cæyænte quëwëngä iñongante Tatäna ingante miido wadepo iinque go ate ñi cæyænäni ta gocæcäimpa. ⁸ Ta godinque tömengä inguipoga æmatæ go æmatæ go godinque Gogobæ nani ämæ ganca go Mäogobæ nani ämæ ganca gocæcäimpa. Inguipoga tömæo godinque tömengä, Wabæca nani quëwencabo ayæ wabæca nani quëwencabo nani oda cæte goquimämo ante cædinque tömënäni inänite, Mönö guëadö guëa cæquinque gocæimpa, ante, Adoyömö godongämæ pödäni, ante ancæcäimpa. Æpodänidö inänii, ante tömënäni æpæ wedeca emönai bai tæiyænäni inguïnänidö angüenë.

⁹ Mäninäni bogænæ tömæo godäni bai tömënäni adobai inguipoga tömæo gocædänimpa. Wængonguï nänö waadete quëwëñömö tömengä quinäni quëwëñömö godämæ gocædänimpa. Goyönäni öönæde inö gonga bæcodote gao wææñonte gonte wæncædänimpa. ¹⁰ Ayæ wënæ tömënäni inänite, Oda cæte gocædänimpa, ante në cægaingä ingante Wængonguï bæi ongonte atopode nani änontibæ gonga bai nani bæcodotibæ cæncædämæ wido cæcæcäimpa. Edæ mönö guiñëngä tönö, Wængonguï beyæ në apænebo, ante në babæ äningä tönö tömëna dobæ mäniñömö wido cæte ingadäimpa. Iinque mäninäni itädë woyowotæ mäniñömö quëwente cöwë wantæpiyæ nani wæwenguimämo ingæimpa.

Wængonguï Awënë tæ contaimpa näämæntapa

¹¹ Ayæ awënë tæ contaimpa ñænæmpa näämæntapa adinque botö mänimpaa në tæ contacä ingä adobai atabopa. Inguipoga tönö öönæ iñömö tömengä ingante ate bai cædinque wodii godinque nana ongöñömö edæ ædömë gote dæ änimpa.

¹² Ayæ nē wængaināni tōmānāni awēnēidi incæ önönānique incæ mänimpa gäänē a ongönāni atabopa. A ongöñönāni mincayontacoo wataa wataa wi æmpote ongoncoopa. Ayæ mincayonta wataa Wængonguī, Quēwenguinta, ante tōmengā yewæmongaintaa wi æmpote acantapa. Mänii mincayontacoo iñömö, Nē wængaināni tōmānāni æbānō cægāināni inānii, ante Wængonguī mänintacoo nänö yewæmongainö ante wataa wataa tōmanta adinque nē wængaināni nāni cægāi ganca, ante tōmēnāni inānite adoganca apænte ante pangantapa. ¹³ Ayæ æpæntibæ cæncadēmæ do wængaināni wæætē ta pönānitapa. Æmæwo wængaināni incæ ta pönānitapa. Tōmēnāni nāni wænte ongöñömö nē ongongaināni inte wadæ ta pönānitapa. Ta pönāni ate, Æbānō cægāināni inānii, ante adinque Wængonguī adocanque adocanque nänö cægāi ganca, ante tōmengā ingante adoganca apænte ante pangantapa.

¹⁴ Māniñedē ganca ayæ baganca wænāmaī quēwencädānimpā, ante ayæ, Wængaināni nāni ongöñömö adobaī dæ bacæimpā, ante cædinque mōnō Awēnē wængaināni æmæwo nāni wængaimāmo tōnō nāni wænte ongöñömö æpæntibæ gonga baī nāni bæcodotibæ cæncadēmæ wido cæcantapa. Mänintibæ mempoga ganca æmæwo nāni wænguimāmo baī impā. ¹⁵ Wængonguī, Quēwenguinta, ante nänö yewæmongaintaa adinque, Æcānō èmōwo mänintaa yewæmōnāmaī i, ante adinque nē yewæmōnāmaī ingaināni inānite mänintibæ cæncadēmæ wido cæcantapa.

21

Inguipoga münguipo öönæ müönæ

¹ Ayæ öönæ müönæ inguipoga münguipo atabopa. Edæ öönæ picæönæ inguipoga picænguipo dæ iinque batimpa. Ayæ æpæntibæ adobaī dæ ānimpā. ² Ayæ godōmenque botō ayōmote Wængonguī nänö tæiyæ waēmō quēwēñömō müi Eedotadēē nāni āñömō öönädē inō ta wææ atabopa. Onquiyængā nē moncæ cæcā iñömö, Botō nänöogængā inguingā waa acæcāimpā, ante waēmō weocoo nē mongængā baī iī

quēwēñömō adobaī waēmō pōni èmō inte ta wææ atabopa.

³ Ayæ Awēnē tæ containpā inō tedepāmo yedæ ä èñentabopa. “Nōwo Wængonguī nänö owoquincō waodāni weca ongō iinque tōmengā tōmēnāni tōnō quēwenguingā ingampa. Tōmēnāni tōmengā guidēnāni bacädānimpā. Ayæ Wængonguī incæ, Botō tōmēmo mīnitō Wængonguimo incæboimpā, ante tōmēnāni weca ongoncæcāimpā. ⁴ Tōmēnāni wēñapæ tamonte wædi tōmāmæ Wængonguī wadæ cæmoncæcāimpā. Māniñedē æmæwo mōnō wænīmāmo incæ mōnō wæwēnimāmo incæ Ca ca mōnō wædimāmo incæ nantate mōnō wædimāmo incæ tōmāā mänīmāmo dæ angæimpā. Edæ wēēñedē inīmāmo incæ iinque batimpā,” angantapa.

⁵ Ayæ Awēnē tæ containpā nē tæ contactā iīmaī angantapa. “Tōmāā inīmāmo botō ñōwo müi cæcæboimpā,” angantapa. Ayæ, “Mänōmainō ante botō āninō edæ nō pōni iī iinque mäninō ante wede pōnengæimpā. Mänōmaī beyæ bitō iīmaī ante yewæmōe,” angantapa.

⁶ Ayæ tōmengā wæætē botō imote iīmaī āninqe, “Dobæ iinque batimpā. Botō Tānobo ingaimo inte Tōmāmo inguimo imopa. Wēēñedē tōmāā nē Badongaimo inte tōmāā nē Iinque Cæbo incæboimpā. Edæ nē gæwænāni, Æpæ beinēmōnipā, ante nē ānāni inānite botō æpæ tapæ quēwenguimæ önonque godōmo becädānimpā. ⁷ Tæi èmonte nē gānā cädāni inānite botō mänincoo botō nē godonguincoo godōmo æncädānimpā. Ayæ botō incæ tōmēnāni Wængonguimo incæboimpā. Tōmēnāni wæætē botō wēñænāni bacädānimpā. ⁸ Wæætē guñente awädō, ante nē ānāni tōnō nē pōnēnāmaī ināni guiquēnē, nē wīwa cädāni tōnō wacā ingante nē wænōnāni guiquēnē, nē towente quēwēnāni tōnō idōidi nē ināni guiquēnē, Wængonguī impā, ante nāni badōninca gäänē ædæ wææninque nē apænedāni tōnō nē babæ ānāni tōmānāni guiquēnē, mänināni iñōnānite atopode nāni ānontibæ gonga baī nāni bæcodotibæ incæ tōmēnāni nāni wæcōñömō bacæimpā. Mänii nāni wænguimāmo iñömō mempoga ganca nāni æmæwo wænguimāmo impā,” angantapa.

Mii Eedotadëe quëwëñömö

⁹ Wængongui anquedoidi önompo æmæmpoque go mæa ganca inäni önompo æmæmpoque go mæa ganca owætacoo waodäni iinque nani wæwenguimämocoo eyede engate intacoo në næænäni iñönänite adocanque botö weca pöinque, “Pöe,” angantapa. “Wængongui Codotedo nänöogængä në baquingä në monguingä iñongante botö bitö imite odömömo acæbiimpa,” angantapa. ¹⁰ Ayæ Wængongui Önowoca incæ botö imote bæi ongonte bai cæyongante botö wiimonte bai iimai atabopa. Wængongui anquedo botö imote ö ænte mäo onquiyaboga tæcædæca pöni cönongä ongonte ayömo Wængongui tæiyæ waëmö nänö quëwëñömö Eedotadëe nani añömö öönæde inö ta wææñonte tömengä botö imote odömongä atabopa.

¹¹ Mänii quëwëñömö Wængongui ñäö emönongä bai apaitimpa. Ayæ dica aatapeca nani anca emö bai awocawænta bai waëmonca inimpa. Waodäni nani nangui godonte æninca bai ñäö apäite bai Eedotadëe inimpa. ¹² Mänii quëwëñömö godämæ tæimö wææ cædi ænówæmö ongönimpa. Ayæ wææ cædi odemoncoo iñömö önompo tipæmpoga go mënemonga wææ cædinemö inimpa. Önompo tipæmpoga go mæa ganca wææ cædinemö incæ wayömö adodemonque Wængongui anquedo adocanque a ongöñongä wayömö adodemonque Wængongui anquedo a ongöñongante anquedoidi önompo tipæmpoga go mæa ganca ongönänitapa. Mäninemö önompo tipæmpoga go mënemonga odemoncooga idægoidi nani cabo tipæmpoga go men-cabodäniya iñönänite tömënäni emöwocoo yewæmonte inimpa. Wayömö odemonga adocaboque emöwo wayömö odemonga adocaboque emöwo yewæmonte inimpa. ¹³ Nænque tamönö inö mæa go adoque odemö inimpa. Nænque wæidö inö mæa go adoque odemö inimpa. Adobai æmatæ inö mæa go adoque odemö inimpa. ¹⁴ Mänii quëwëñömö wænömænæca mænonte wææ cæqui, ante nani ñönönincacoo iñömö önompo tipæmpoga go mencaa inimpa. Mänincacoo önompo tipæmpoga go men-

caa incæ Wængongui Codotedo nänö da godongainäni önompo tipæmpoga go mænäa inäni tömënäni emöwo incæ adocanque emöwo wacaa adocanque emöwo wacaa yewæmonte eñacaimpa.

¹⁵ Wængongui anquedo botö imote në apænedingä iñömö tee manguimpa oodo inte badöimpa në næængä atabopa. Mänii quëwëñömö tee mancæte ante mänii wææ cædinemoncoo adobai tee mancæte ante mänii wææ cædi adobai tee mancæte ante tömengä tee manguimpa næængantapa. ¹⁶ Mänii quëwëñömö æmatæ adoganca æmatæ adoganca mænonte inimpa. Doyæ inö betamonca inö adoganca inimpa. Tömengä mänii quëwëñömö tee manguimpa inte tee mante doyæ inö ænówæmö inö doo müido dootiento quidömetodo ganca inimpa. Ayæ betamonca iñömö adobai doo müido dootiento quidömetodo ganca i atabopa. ¹⁷ Wængongui anquedo waodäni nani tee mänö bai tee mangä ayongä mänii quëwëñömö wææ cædi tæinebo inö tetenta i coatodo meetodo ganca inimpa.

¹⁸ Mänii wææ cædi aatapeca nani änonca inte mænöni impa. Mänii quëwëñömö guiquënë oodo inte awocawænta bai waëmö inte mænöni impa. ¹⁹ Mänii quëwëñömö wænömænæca mænonte wææ cæqui, ante ñönönincacoo iñömö, Waëmö emongæimpa, ante tömënäni quincacoo nani nangui godonte ænincacoo ænte mämö ñönönincacooga bewodö bewodö cædänitapa.

Tänoca ñönöninca aatapeca nani anca inimpa.

Waca ñönöninca guiquënë tapidoca nani anca inimpa.

Waca ñönöninca guiquënë aagataca nani anca inimpa.

Waca ñönöninca guiquënë etemënaotaca nani anca inimpa.

²⁰ Waca ñönöninca guiquënë ööninteca nani anca inimpa.

Waca ñönöninca guiquënë codönadinaca nani anca inimpa.

Waca ñönöninca guiquënë coditooditoca nani anca inimpa.

Waca ñönöninca guiquënë bedidoca nani anca inimpa.

Waca ñönöinca guiquënë topatioca nani anca inimpa.

Waca ñönöinca guiquënë coditopadataca nani anca inimpa.

Waca ñönöinca guiquënë aatintoca nani anca inimpa.

Waca tömanca guiquënë ämatitaca nani anca inimpa.

Mänimpoca inimpa.

²¹ Mänii wææ cæðinemö iñömö önompo tipæmpoga go mënemonga iñömö pededamö nani ämö önompo tipæmpoga go mëmonga inte mænonte inimpa. Wææ cæðinemö incæ wææ cæðinemö incæ pededamö adomonque adomonque inte mænöninemö inimpa. Mänii quëwëñömö taadö ñænænö godö oodo inte mænöwate taadö awocawænta bai waëmö inimpa.

²² Mönö Wængongui Awënë adocanque Tömää nè Cægaingä tönö Wængongui Codotedo tönö mäniñömö cöwë ongöna inique godongämæ quëwënäni guiquënë, Mönö Wængongui oncönë guicæimpa, ante quinante anguinäni. Edæ Wængongui tæiyæ waëmö oncö mäniñömö dæ ä atabopa.

²³ Wængongui nè ñäö bai emönongä inte ñäö apäiquingä bai inongäimpa. Ayæ Wængongui Codotedo iñömö nani ti wodönoincade bai i inique mäni quëwëñömö iñömö nænque incæ apäicä incæ quinante godömenque ñäö apäiquii.

²⁴ Wabæca nani quëwencabo ayæ wabæca nani quëwencabo inänite Wængongui ængä beyænque nè quëwënäni inte mäniñänique mäni ñäö apäiyömö cægoncæðänimpa. Adobai inguipoga awënë odeyeidi waëmoncoo nani eadincoo mäniñömö ænte poncæðänimpa.

²⁵ Mänii quëwëñömö woyowotæ inämaï ingæimpa. Inique mäniñömö wææ cæðinemoncoo iimö iñö iimö iñö iñonte cöwë tee mönedämaï ingæimpa.

²⁶ Wabæca nani quëwencabo ayæ wabæca nani quëwencabo incæ tömënäni waëmoncoo nani eadincoo mäniñömö ænte poncæðänimpa. Mänii quëwëñömö waa quëwëñömö impa, ante waa ate apænecæðänimpa.

²⁷ Quiëmë wënæ wënæ i mäniñömö cöwë guiidämaï ingæimpa. Nè wiwa cæðäni incæ nè babæ änäni incæ mäni quëwëñömö guiidämaï inguinänidö angüënë. Wæætë Wængongui

Codotedo, Quëwenguintaa, ante nänö yewæmöintaa nè yewæmönäni guiquënë tömënäni quëwëñömö.

22

¹ Ayæ Wængongui anquedo botö imote önö quëwenguimæ odömongä atabopa. Mänimæ awocawænta bai waëmömæ impa. Wængongui tönö Wængongui Codotedo nana aacæ tæ containpa inö tapæmpa.

² Mäniñömö tadinque mäni quëwëñömö taadö ñænænö godö tæcæguedë inö ta gopæmpa. Mäninö æmæ wedeca incæ imæ wedeca incæ awæ quëwenguwæ pæwæ atabopa.

Mäniwæ iñömö tömenca wacä apäicä iñonte wacä apäicä iñonte incapa. Inique adoque wadepo iñedë önompo tipæmpoga go mäa ganca mäniimpoga mäniwæ incayedë impa.

Wabæca nani quëwencabo ayæ wabæca nani quëwencabo incæ mäniwæ quëwënäni tömänäni mäniwæ öñabocoo beyæ ganca bacæðänimpa, ante eñabocoo.

³ Wængongui pante nänö angainö beyænque quincöömë wënæ wënæ bagatüi mäniñö mäniñedë dæ angæimpa.

Wængongui tönö Wængongui Codotedo nana aacæ tæ containpa mäni quëwëñömö mæ ongoncæpaimpa.

Tömengä ingante nè cæðönäni iñömö tömengä ingante watapæ apænedinque tömengä ingante cæcæðänimpa.

⁴ Tömengä awinca acæðänimpa. Ayæ tömengä emöwo tömënäni önönemö inö yewæmonte incæðänimpa.

⁵ Mäniñömö woyowotæ inämaï ingæimpa. Edæ mäniñömö quëwënäni beyæ Wængongui Awënë nè ñäö emönongä inte apäiquingä inongampa.

Inique nænque ñäö apäidö incæ ti wodönoincade ënënö incæ quinante ayæ apäiquii.

Ayæ mäniñömö quëwënäni adodäni cöwë wantæpiyæ aacæðänimpa.

Itota Codito oo poncæcäimpa

⁶ Ayæ Wængongui anquedo botö imote apænedinque, “Mäninö bitö ëñënö nö pöni i inique mäniñö ante wede pönengæimpa.

Wængongui beyæ nè apænedönäni tömengä Önöwoca ingante ewocadinque apænedänipa. Tömënäni nani nè ewocadongä Wængongui Awënë iñömö

tömengä anquedo ingante apænedinque, Bitö botö imote nê cædönäni weca godinque, Æbänö oo pöni baquimpa, ante odömömi acædänimpa, ante da pönongä pongantapa,” ante botö imote apænecantapa.

⁷ Itota Codito, “Aedäni. Botö oo ocæ emænte ponguimo imopa. Ii mincayontaa Wængonguï beyæ apænedinque nâni yewæmonte angainö ante nê eñente cædäni iñömö nâni toquinque,” ante apænecantapa.

⁸ Botö Wäömo inömo imopa. Mäninö Wængonguï anquedo nänö äninö ante nê eñenimo inte botö mänii tömengä nänö odömöninö ante nê adimo inömo imopa. Wængonguï anquedo angä eñeninque ayæ odömongä adinque botö nê odömöningä önöwa inö ædæ wæænte tömengä ingante watapæ apænecæte ante cætabopa.

⁹ Cæyömote tömengä wæætë, “Mänömaï cædämaï imäwe, angantapa. Botö ononque bitö bai Wængonguï ingante nê cæbo imopa. Ayæ bitö töninadäni Wængonguï beyæ nê apænedönäni tönö ii yewæmointaa nâni angainö ante nê eñente cædäni tönö botö tömënäni bai adobai Wængonguï ingante nê cæbo imopa cæbii. Edæ Wængonguinque ingante ædæ wææninque, Bitö Wængonguï Awënë adobique imidö anguënë, ante apænee,” angantapa.

¹⁰ Wængonguï anquedo godömenque botö imote iïmaï angantapa. “Edæ mänömaï baquionæ oo pöni ingæimpa cæbii. Ii yewæmointaa Wængonguï beyæ apænedinque nâni angainö ante bitö wê wodönämaï inte do apænee. ¹¹ Nê wënæ wënæ cædönäni inänite ee abi godömenque wënæ wënæ cæcædänimpa. Tömënäni nâni pönënö wentamö bai nê entawënäni inänite ee abi godömenque nâni pönënö wentamö bai entawencædänimpa. Nê nö cædäni inänite ee abi godömenque nö cæte quëwencædänimpa. Nê tæiyæ waëmö entawënäni inänite ee abi godömenque tæiyæ waëmö entawencædänimpa.”

¹² Itota Codito, “Aedäni. Botö oo ocæ emænte ponguimo imopa. Ocæ emænte pöninque botö tömëmö godömo nâni ænguincoo, ante næænte ponguimo imopa. Tömänäni æbänö cædäni, ante

adinque botö tömënäni nâni cægai ganca ante adoganca godömo æncædänimpa. ¹³ Botö Tånobo ingaimo inte Tömämö inguimo imopa. Tömää badönämaï iñedë botö Do Quëwengaimo imopa. Ayæ tömää iinque bayedë incæ botö Ayæ Pöni nê Quëwëmö incæboimpa. Wëenëñedë tömää nê Badongaimo inte tömää nê Iinque Cæbo incæboimpa.”

¹⁴ Weocoo yamonte bai mimönë nê mënongate inäni iñömö tömënäni nâni toquinque edæ mänii quëwëñömö wææ cædinemö iñömö go guiquinäni inänipa. Go guidinque tömënäni quëwenguïwæ quëwenguinca bequinäni inänipa. ¹⁵ Wiwa cædäni guiquënë mänii quëwëñömö yabæque iñömö ongonte wæquinäni inänipa. Idöidi nê inäni, nê towente quëwënäni, wacä ingante nê wænönäni yabæque ongönänipa. Wængonguï impa, ante nâni badöninca gäänë ædæ wææninque nê apænedäni, nê babæ änäni tönö, Babæ äinëmönipa, ante nê änäni tönö tömënäni tömänäni mänii quëwëñömö yabæque iñömö quëwenguinäni inänipa.

¹⁶ “Botö Itotabo ingaimo imopa. Mäninö botö angainö ante nö impa, ante botö imote godongämæ nâni pönencabodäni tömänäni inänite apænecä eñencædänimpa, ante cædinque botö do botö anquedo ingante minitö weca da pönömo pongantapa. Botö docä Awënë Dabii nänö Wæmæncoo ingaimo inte adobai nänö Pæimo inömo imopa. Botö wadaamö bai ñäö bayö apäimö bai imopa.”

¹⁷ Wængonguï Tæiyæ Waëmö Önöwoca tönö Wængonguï Codotedo nänöogængä nâni änogä, “Pöedäni,” änapa. Äñöna tömënäni tömëna inate nê eñënäni inte adobai, “Pöedäni,” ancædänimpa, ämopa. Nê gæwænte inäni tömänäni pö becædänimpa, ämopa. Nê beinänäni iñönänite, Minitö quëwenguïmæ, ante ononque pönonguïmæ incæ pö ænte becæminimpa, ante ämopa.

¹⁸ Ii yewæmointaa Wængonguï beyæ nê apænedäni nâni angainö ante nê eñënäni tömänäni inänite, Ee aedäni, botö wææ ämopa. Edæ mäninö nâni angainö ante godömenque wadö änäni inänite Wængonguï pancæcäimpa. Ii yewæmointaa

quiemē nāni pante wæwenguincoo, ante yewæmonte adinque Wængongui nē wadö änāni inānite mänincoo bai godömenque pancæcäimpa. ¹⁹ Ayæ iï yewæmöintaa Wængongui beyæ nē apænedāni nāni angainö incæ pancadea æninque nē wëä godonte bai cädāni inānite Wængongui quëwenguïwæ quëwenguinca godönāmai incæcäimpa. Tömengä adobai, Botö tæiyæ waëmö quëwëñömö mänïñömö guidāmai incæminimpa, ante ancæcäimpa. Mänï quëwenguïwæ ante mänï quëwëñömö ante

iï yewæmöintaa yewæmonte impa.

²⁰ Mäninö ante, Nö impa, ante nē apænecä iñömö tömengä iñömö, “Ao, botö oo ocæ emænte ponguimo imopa,” angantapa. Äñongante botö,

Mänömai baquïnö anguënë, ante, Amëë, äninque, Awënë Itota pöe, ämopa.

²¹ Awënë Itota Wængongui nänö guidënāni inānite waadete godö cæcæcäimpa. Mänömai baquïnö anguënë, ante botö, Amëë, ante mäninque ämopa.